


Ilajtulisi Yancuic  
toTata Jesucristo



New Testament in Nahuatl, Michoacán (MX:nc1:Nahuatl,  
Michoacán)

# **Ilajtulisli Yancuic to Tata Jesucristo**

## **New Testament in Nahuatl, Michoacán (MX:ncl:Nahuatl, Michoacán)**

copyright © 1998 Wycliffe Bible Translators, Inc.

Language: Nahuatl, Michoacán

Translation by: Wycliffe Bible Translators, Inc.

Náhuatl, Michoacán [ncl], Mexico

### **Copyright Information**

© 1998, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### **The New Testament**

in Nahuatl, Michoacán

**© 1998, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files dated 29 Jan 2022  
da3cba3e-3a5e-5fce-927d-24a57a332bf9

## Contents

SAN MATEO . . . . .	1
SAN MARCOS . . . . .	76
SAN LUCAS . . . . .	119
SAN JUAN . . . . .	198
HECHOS . . . . .	255
ROMANOS . . . . .	325
1 CORINTIOS . . . . .	365
2 CORINTIOS . . . . .	402
GÁLATAS . . . . .	425
EFESIOS . . . . .	440
FILIPENSES . . . . .	454
COLOSENSES . . . . .	463
1 TESALONICENSES . . . . .	472
2 TESALONICENSES . . . . .	479
1 TIMOTEO . . . . .	483
2 TIMOTEO . . . . .	494
TITO . . . . .	501
FILEMÓN . . . . .	506
HEBREOS . . . . .	508
SANTIAGO . . . . .	536
1 PEDRO . . . . .	545
2 PEDRO . . . . .	556
1 JUAN . . . . .	562
2 JUAN . . . . .	571
3 JUAN . . . . .	572
JUDAS . . . . .	574
APOCALIPSIS . . . . .	578

## Ilamachitlisli cuali Jesucristo hual quijcuiluc San Mateo

### *Jesucristo itajtzitzían* (Lc. 3:23-38)

<sup>1</sup> Nican unca lajcuiluli itajtzitzían Jesucristo. Yihual yec imiahuil David hual yec imiahuil Abrahám.

<sup>2</sup> Abraham yec itajtzin Isaac, Isaac yec itajtzin Jacob, Jacob yec inminta-jtzin Judá huan icnían. <sup>3</sup> Judá yec inminta-jtzin Fares huan Zara, huan Tamar yec inminantzin. Fares yec itajtzin Esrom, Esrom yec itajtzin Aram. <sup>4</sup> Aram yec itajtzin Aminadab, Aminadab yec itajtzin Naasón, Naasón yec itajtzin Salmón. <sup>5</sup> Salmón yec itajtzin Booz, huan inantzin Booz yec Rahab. Booz yec itajtzin Obed huan Obed inantzin yec Rut. Obed yec itajtzin Isaí. <sup>6</sup> Isaí yec itajtzin David in hué. David monamictic ca se sihual hual mocahuac ihuan pampa polehuic ilahuical itocaya Urías. Cuaquinon David huan in sihual quipialoaya se xolol hual quitocayaltic Salomón.

<sup>7</sup> Salomón yec itajtzin Roboam, Roboam yec itajtzin Abías, Abías yec itajtzin Asa. <sup>8</sup> Asa yec itajtzin Josafat, Josafat yec itajtzin Joram, Joram yec itajtzin Uzías. <sup>9</sup> Uzías yec itajtzin Jotam, Jotam yec itajtzin Acaz, Acaz yec itajtzin Ezequías. <sup>10</sup> Ezequías yec itajtzin Manasés, Manasés yec itajtzin Amón, Amón yec itajtzin Josías. <sup>11</sup> Josías yec inminta-jtzin Jeconías huan icnían hual yulinijme quiman in babilontecos quinhuicaloaya in judíos lailpili pa in lali Babilonia.

<sup>12</sup> Quiman quinhuicaje pa Babilonia, Jeconías quipíac se ixolol motocaya Salatiel, Salatiel yec itajtzin Zorobabel. <sup>13</sup> Zorobabel yec itajtzin Abiud, Abiud yec itajtzin Eliaquim, Eliaquim yec itajtzin Azor. <sup>14</sup> Azor yec itajtzin Sadoc, Sadoc yec itajtzin Aquim, Aquim yec itajtzin Eliud. <sup>15</sup> Eliud yec itajtzin Eleazar, Eleazar yec itajtzin Matán, Matán yec itajtzin Jacob. <sup>16</sup> Jacob yec itajtzin José hual yec ilahuical María. María yec inantzin Jesús in hual quitocayaltico Cristo.

<sup>17</sup> Yoje, quiman lacatic David, ca inon lacatijtihualaje catorce imiahuimes Abrahám. Cuaquín lacatijtihualaje catorce imiahuimes David quiman quinhuicaje pa Babilonia. Huan quiman lacatic Cristo yoje lacatijtihualaje oc sequin catorce imiahuimes David hual pehuaje lacatijtihualaje quiman quinhuicaje pa Babilonia.

### *In quinami lacatic Cristo* (Lc. 2:1-7)

<sup>18</sup> Axcán, yoje unca quinami lacatic Jesucristo. María, se sihual yancuic hual yahuiaya ye inantzin, yahuiaya monamicti ca José. Huan ayamo yuliloaya quinami ilahuical ca isihua quiman quitaje pampa yahuiaya quipía se xolol María pan ipampa in Espíritu Santo. <sup>19</sup> José hual yahuiaya ye ilahuical yec se local cuali huan yultiahuiaya quichihuillijtataya moxtin in hual cuali. Huan amo quinequiaya pa moxtin quipinahuiljtinemilosquiaya María. Pampín quiytuc pa iyolo pampa yahuiaya quicahua huan amo yahuiaya quimachitili inon amaqui. <sup>20</sup> Huan quinami quiytutataya pa iyolo

yihual in hual yahuiaya quichía, xiquita, cochic José. Cuaquín nescic capa yihual se ca ilanahuatinijmes Dios pin cielo (ilhuicac), quitac quitemictataya, quilijtataya:

—José, tel imiahuil David, amo xiquijtu pa moyolo pampa amo unca cuali pa ticanas María pa yes mosihua, (pampa in Espíritu Santo quilalilic ca laijtic María in hual quilacatiltis). <sup>21</sup> Huan yahui quiipía se xolol lalac. Tictocayaltis Jesús, pampa yihual quinquixtilis inminlajlaculisli yehuanten hual cate iyaxca.

Yoje quilic ilanahuatini in cielo. <sup>22</sup> Huan mochíac mochi inon pa yoje panusquiaya mochi hual quijtuc in Tata pan ipampa ilajtuni hual quijtuc, quil:

<sup>23</sup> Xiquitacan.

Cayas se sihual yancuic hual amo quiman cataya ca se lalac.

Ma yojque, quiipías se ixolol.

Quilacatiltis huan quitocayaltisqui Emanuel.

In lajtol quinequi quijtúa: Dios unca ca tehuanten.

<sup>24</sup> Ejsac José, quichíac quinami quilic in Tata ilanahuatini pin cielo. Canac María pa yes isihua. <sup>25</sup> Yuliloaya pin se cali yehuanten omenten. Ma yoje, José amo yulic ca yihual quinami ilahuical pa innojen tonalijmes hual ayamo lacatic ixolol María. Quiman lacatic in xolol, José quitocayaltic Jesús.

## 2

### *Huejueyenten hual chantiloaya huejca hualalo pa quimolancuacuetzilisi Jesús*

<sup>1</sup> Lacatic Jesús pin caltilan Belén pin lalticpan Judea. Lacatic pa innojen tonalijmes quiman Herodes yec inminhué in judíos. Huan ajsije pa in caltilan hué Jerusalén lacames hual quimatiloaya niman míac. Chantiloaya pa se lali huejca hual unca capa quisa in tonali. <sup>2</sup> Quilajlanije:

—¿Capa unca yihual hual lacatic, yihual hual inminhué in judíos? Ticmatilo pampa lacatic, pampa tiquitaje yihual ilucero (isilalin) nepa capa quisa in tonali. Ca in ticmatilo pampa lacatic, huan tihualaje pa ticmolancuacuetzilisi —quilije.

<sup>3</sup> Quiman quimatic Herodes in hué in hual quijtuloaya innojen lacames huejueyenten, yajmo huil mosehuiaya yihual huan noje yajmo huil mosehuiloaya niman míac ca yehuanten pa Jerusalén. <sup>4</sup> Cuaquín quilic pa monchicusu moxtin in tiopistas huejué huan in lamaxtinijmes hual quimaxtiloaya in lajtol hual quinnextilo in judíos quinami quimolancuacuetzililo Dios. Monechicuje, quinlajlanic Herodes capa yahuiaya lacati in Cristo. (Cristo quinequi quijtúa in se hual unca laxahuilili pa itzontecon. Yoje quichihuililo se lalac quiman yahuililo quitemachilo pa yes inminhué yehuanten.)

<sup>5</sup> Yehuanten quinanquilije:

—Lacatis pin caltilan Belén pin lalticpan Judea, yoje quijcuiluc Dios ilajtuni. Quijtúa, quil:

<sup>6</sup> Tehual, Belén, pin lali Judea, quimatisi momajtisi mopampa tehual.

Mas que tianca se caltilan tipichin, ma yoje yajmo mitztisasi quinami in niman tipichin, pampa quisas nepa pa tehual se hual yes mohué.

Yihual huelitis ca yehuanten ilacames Israel hual cate noyaxca.

Yoje quijtúa Dios ilajtol pan ipampa Dios ilajtuni.

<sup>7</sup> Cuaquinon Herodes latilanic pa hualalosquiaya in huéjueyenten, quinahuatic pa yoje amaqui quimatisquiaya quiman hualaje. Huan quinlanlanic ca míac lajtomes jan quiman nescic in lucero (silalin), huan yehuanten quilije quiman nescic. <sup>8</sup> Cuaquinon quinmilic:

—Xiacan, xictemucan cuali pa anquitas in xolol. Xictemucan yoje quinami anquimati anlatemúa. Quiman anquitas, xinechmachiltican pa yojque nehual nías nicmolancuacuetzilic noje —quinmilic.

Cuaquinon quintilanic pa Belén.

<sup>9</sup> Canaje ojli in huéjueyenten quiman quicaquije in hual quinmilic in hué. Cuaquinon nescic in lucero (silalin) hual quitaje quiman cataloaya pa inminlali hual unca capa quisa in tonali. Quinlaicanac in silalin, uyajtiac huan ajsic moquetzac ca pani pin cali capa cataya in xolol. <sup>10</sup> Quiman quitaje in silalin, quipiaje niman míac paquilisli. <sup>11</sup> Calaquije pin cali calijtic huan quinmitaje in xolol ca María inantzín. Cuaquinon quimolancuacuetzilije huan quimahuisuje in xolol. Huan quilapuje inminxotopajmes capa quihualicatihualaje len ipatiaya míac. Quimacaje oro huan ajualisli huan je altzindi hualajuac, itoca mirra. <sup>12</sup> Cuaquinon pan ipampa lajtemiquilisli Dios quinmilic pa camo mocuepasi capa Herodes. Pampín canaje oc se ojli pa mocuepasi pa inminlali.

### *Cholou José huan María huan in xolol pa Egipto*

<sup>13</sup> Huan quiman quisaje in huejueyenten, nescic ilanahuatini toTata pin cielo ca José. Nescic pan ipampa lajtemiquilisli, quilic:

—Ximoquetza, xiquinhuica in xolol huan inantzín, xicholucan pa in lali Egipto. Xichantican umpa huan quiman panusi tonalijmes nimitzilic pa anmocuepas. Xicholucan, pampa Herodes axan yahui quitemúa in xolol pa quimictis.

<sup>14</sup> Cuaquinon pa in layúa moquetzac José, quinhuicac in xolol huan inantzín, quisaje cantiaje ojli pa in lali Egipto. <sup>15</sup> Huan umpa cataloaya pa mochi tonalijmes hual yuliaya Herodes. Yojque panuc pa mochiasquiaya len quijtuc toTata pan ipampa ilajtuni. Quijtuc, quil: “Nicnotzac noxolol pa quisas nepa Egipto.”

### *Herodes quinmictía in xolomes hual yuliloaya pa Belén*

<sup>16</sup> Cuaquinon, cualanic niman míac Herodes quiman quimatic quinami quihuitzquilije in huejueyenten. Pampín latilanic pa quinmictilosquiaya mochi in xolomes lacames hual cataloaya pa Belén huan mochi in calimes hual cataloaya itenco Belén. Quinmictije mochi in xolomes lacames hual lamije lacatije huan moxtin oc sequin xolomes hual lacatije huan ayamo ajsije quipiaje ome xixihuil huan moxtin hual lacatije huan axan ajsije quipiaje ome xixihuil. Latilanic pa quinmictilosquiaya jan innojen xolomes, pampa in huejueyenten quilije pampa pehuac nescic in silalin quipiaya quinami ome xixihuimes.

<sup>17</sup> Yoje lamic mochíac len quijtuc Dios ilajtol pan ipampa ilajtuni Jeremías, quijtuc, quil:

<sup>18</sup> Pin caltilan Rama icnotialoaya.

Mocaquiaya lajtol ca niman míac icnotilisli, chocalisli, quincócuhuaya inminyolo,

Raquél quinchoquilijtataya ixolomes, huan amo quinequiaya molacahualti, pampa polehuije ixolomes.

<sup>19</sup> Quiman miquic Herodes, xiquita, nescic capa José pin lali Egipto se ilanahuatini in Tata pin cielo. Nescic pan ipampa lajtemiquilisli, quilic:

20—Ximoquetza, xiquinhuica in xolol huan inantzin huan ximocuepacan pa in lali Israel. Axan miquije yehuanten hual quinequiloaya quimictilo in xolol.

21 Yojque, moquetzac José, quinmanac in xolol huan inantzin in xolol huan mocuetiaje pa in lali Israel. 22 Pa ojli, quimatic pampa Arquelao huelitijtataya pin lalticpan Judea capa huelitini itajtzin Herodes. Pampín momajtic José pa mocuepas ca umpic. Cuaquín Dios quilic pan ipampa lajtemiquilisli pampa nepa cayasquiaya polehuilisli, huan pampín uyajtiaje José huan María ca ixolol pa in lalticpan Galilea. 23 Ajsije umpa, uyaje chantije pa se caltilan itoca Nazaret, pa yojque mochiasquiaya len quijtuc Dios pan ipampa ilajtuni. Quijtuc, quil: “Quitocayaltisi nazareteco.”

### 3

*Juan Lacuayatequini quinlaquetzilia Dios ilajtol nepa capa amaqi chanti-  
aya*

(Mr. 1:1-8; Lc. 3:1-9, 15-17; Jn. 1:19-28)

1 Panuje mías xixihuimes. Huan ajsije in tonalijmes quiman hualac Juan Lacuayatequini quinnoztataya moxtin hual quisaje pa quicaquisi. Quinnotzaya quinmilijtataya Dios ilajtol. Quinnotzaya nepa pa se ilajco in lalticpan Judea capa in lali amo cataya cuali pa quitocasquiaya se icuajmili.

2 Huan quinmiliaya:

—Xicpalacan anmoyolo, ximolalilican pa anlajnamiquis pa anmoyolo quinami Dios laijnamiquía, pampa amo huejcahuas ajsis in tonali quiman huelitia Dios.

3 In Juan Lacuayatequini yec in lalac hual aqui quijtuc inahuac yihual Isaías ilajtuni Dios. In Isaías quijcuiluc se amal pa yina, huan pa iamal yojque quijtuc:

Mocaqui ilajtol se hual lanotica nepa pa in lali capa amo unca cuali pa quitocasquiaya se icuajmili.

Huan in se quijtutica, quil:

“Xicchipahuacan anmoyolo pa calaquis in Tata, xiclapulican jan quinami anquilapulía ojlimes quiman hualas capa amhuan-  
ten se hual unca hué.”

4 Huan quipiaya yihual Juan ilaquen lachihuali ca itojmiyo camello, huan ilacuejtiloni cataya lachihuali ca cuilaxli. Quincuaya chapulimes huan néculi hual moita pa cuajlan. 5 Hualaloaya capa yihual pa quicaquilosquiaya yehuanten hual chantiloaya pa Jerusalén. Huan quistihualaloaya lacames huan sihuames mochi cajcapa pin lalticpan Judea. Huan quistihualaloaya mochi in lali hual cataya pa itejtenco in atenco hué itoca Jordán. 6 Huan quincuayatequiaya Juan pin atenco hué Jordán, quiman moyolcuitije inminlajlaculisli inminlajxpan moxtin, quijtuticate pampa yajmo yahuiloaya yulilo quichijtcate laijlaculisli.

7 Ma yoje, quinmitac Juan mías lacames hual quitocaloaya in ome lamaxtilisli calica quimolancuacuetzililoaya Dios in judíos, motocaloaya fariseos huan saduceos. Hualaloaya pa yihual quincuayatequisquiaya. Huan quinmili:

—¡Ah, amhuanten ixolomes Satanás! Anunca quinami cuhuames choluticate pa se cuajmili chichinajtica. Huan ¿aqui anmitzilic pampa anunca pin ipolehuilisli icualanilisli Dios hual ajsitihuala? ¿Aquinojen anmitzilije pin ancholusquiaya? 8 Amo annimitzcuayatequis sinda amo anyahui anpehua anyuli yoje pa lanextilis pampa anquipalac anmoyolo huan axan anlajnamiquía quinami Dios quinequi. 9 Huan amo xiquijtucan pa anmolajitic

amhuanten: “Tehuanten ticate imiahuimes totajtzin Abraham hual pa yina techpehualtic tehuanten in judíos. Pampín amo timomajtilo pampa Dios cualanía.” Amo xiquijitucan yoje, pampa annimitzilia Dios huil quinchía mi-ahuimes pa Abraham lachihuali ca innojen tixcalimes nican. <sup>10</sup> Axan unca quinami Dios quilalijtica in hacha pa ilalhuayol se cuahuil. Amhuanten anquinami cuahuimes hual amo laquilo cuali. Yoje, mochi cuahuil hual amo laqui cuali yes lamayahuili huan yes lalasali pin tixuxli. Yoje mochi lalcal hual amo quichía cuali cayas quinami se ca innojen cuahuimes hual amo laquilo cuali. <sup>11</sup> Nehual neli annimitzcuayatequía ca al pa yoje lanextilis pampa anquinpalac anmoyolo pa anpehuas anlajnamiquis quinami Dios. Ma yoje, yihual hual yahui huala quiman nilantica notequipanulisli unca niman hué. Nehual amo quiman niyes yoje hué. Pampín amo unca noyaxca pa niyes itequipanujquil niman tipichin. Yihual anmitztilanis in Espíritu Santo. Inon ilacuayatequilisli yihual. Yes quinami tixuxli hual amo lachichinus. Calaquis laijtic anmoyolo, anmitzpujpuhuas anmitzquixtilijtica len yes amo cuali. <sup>12</sup> Yihual cayas quinami se hual quitzejtzjelujtica layoli pa yoje quisas chipác. Quema, quichipahuas niman cuali yehuanten hual Dios quinlajtultic. Cayas quinami se hual quinechicúa in layoli pa capa cajcoquilo, huan quichichinus in xiníul pin tixuxli hual amo quiman huil mosehuis. Yehuanten hual Dios quinlajtultic cate quinami in layoli, huan yehuanten hual amo quinlajtultic cate quinami in xiníul.

*Juan quicuayatequía Jesús*  
(Mr. 1:9-11; Lc. 3:21-22)

<sup>13</sup> Cuaquinon ajsitihualac Jesús, quisac pin lalticpan Galilea. Ajsiaya pa atenco hué Jordán capa cataya Juan. Quinequiaya pa Juan quicuayatequ-uisquiaya. <sup>14</sup> Juan pehuac quilic Jesús pampa amo canaya cuali pa yihual quicuayatequisquiaya Jesús, Juan quilic:

—Monequi pa tehal tichcuayatequis nel. ¿Leca tihuác ca nel pa nim-itzcuayatequisquiá?

<sup>15</sup> Jesús quinanguilic:

—Ma ye jan yoje axan, pampa unca cuali pa yoje ticchihuasi mochi hual Dios techilia pa ticchihuasi.

Cuaquinon Juan quimacahuiltic pa hualasquiaya pa yihual quicuayatequ-uisquiaya. <sup>16</sup> Huan Jesús, quiman cataya lacuayatequili, quisac jan ajnaxcan nepa pin al. Huan jan ajnaxcan in cielo (ilhuicac) molapuc ca pani capa Jesús huan yihual quitac Dios iEspíritu (iIjyecal Cualí) temujtihalaya. Nesti-hualaya quinami se huilol. Ajsic huan moquetzac pani capa yihual Jesús.

<sup>17</sup> Huan ca inon mocaquic se lajtol pin cielo hual quijtuc:

—In unca noxolol hual niclasojla míac. Ca yihual nimopaquiltitica niman míac.

## 4

*Satanás quitlanilia Jesús iyolo*  
(Mr. 1:12-13; Lc. 4:1-13)

<sup>1</sup> Cuaquinon in Espiritu Santo quilaicanac Jesús pa panquisasquiaya ca capic amaqui chantiaya. Quilaicanac nepa pa yojque in lili quitlanil-ისquiaya Jesús iyolo.

<sup>2</sup> Mosahuac Jesús cuarenta tonalijmes huan cuarenta layuajmes, huan quiman panuc inon, yihual mayanaya. <sup>3</sup> Hualac capa Jesús in lili hual quintlanilia lacames inminyolo, quilic:



—Sinda tehual tiunca Dios ixolol, cuaquín xiquinmili in tixcalimes pa mochihuasi len huil tijcuas.

<sup>4</sup> Jesús quinanquilic:

—Unca lajcuiluli: “Lacames amo yulisi jan pan ipampa in hual quicualo san. Yulisi pan ipampa mochi lajtol hual quijtúa Dios.”

<sup>5</sup> Cuaquinon in lili quihuicac Jesús pa Jerusalén hual unca Dios ilasojli caltilan hué, quilejcultic niman ca pani in tiopan hué. <sup>6</sup> Huan quilía:

—Sinda ti'ixolol Dios, cuaquín ximolasa pa latzindan, pampa unca lajcuiluli:

Yihual Dios quinmili ilanahuatinijmes pin cielo pa mitzlachilisi.

Huan ca inmajmajuan mitzpalehuisi tehual pa camo timotecuilis se mocxían pan se tixcali.

<sup>7</sup> —Huan noje unca lajcuiluli —quilic Jesús—: “Amo timocalactis capa cuajnesi tipolehuis san pa tiqitas sinda Dios moTata mitzquixtilis pin polehuilisi.”

<sup>8</sup> Huan oc sejpa quihuicac Jesús in lili pa pani se loma (tepel) niman cuajtic. Quinextilic Jesús mochi in lalimes pin lalticpan capa huelitilo in huejueyenten, huan quinextilic mochi hual unca cuajcualtichin pin lalimes.

<sup>9</sup> Huan in lili quilic:

—Mochi innojen nimitzmacas tehual sinda tichmolancuacuetzilis pa tichmahuisus ca lamajtilisi.

<sup>10</sup> Cuaquinon Jesús quilic:

—Xiquisa, Satanás, pampa unca lajcuiluli inon: “Ticmolancuacuetzilis pa ticmahuisus ca lamajtilisi moTata Dios. Jan Yihual san ticchihuilis mochi hual monequi pa ticmolancuacuetzilis.”

<sup>11</sup> Cuaquinon in lili quicahuac Jesús. Huan axan hualaje ilanahuatinijmes in cielo, pehualoaya quichihuililo mochi hual monequiaya pa quipías Jesús.

### *Jesús pehua quichía itequipanulisi*

*(Mr. 1:14-15; Lc. 4:14-15)*

<sup>12</sup> Axan, quiman quimatic Jesús pampa quitzacuaje Juan Lacuayatequini pin calijtic, uyac pa ichan pin caltilan Nazaret hual unca pin lalticpan Galilea. <sup>13</sup> Cuaquín ca je nadita quicahuac ichan nepa Nazaret, uyac chantic pin caltilan itocaya Capernaum hual cataya pa itenco in al huejcalan Galilea. Noje cataya inmintejtenco in lalimes itocaloaya Zabolón huan Neftalí. <sup>14</sup> Uyac chantic Jesús nepa pa yoje mochías len quijcuiluc Isaías hual pa yina yec Dios ilajtuni. Quijtúa pa iamal:

<sup>15</sup> Pin lali itoca Zabolón, huan pin lali Neftalí, pan ojli hual laicana pa in al huejcalan, ca yojque itenco (analco) in atenco hué Jordán, unca pin lali Galilea capa chantilo yehuanten hual amo judíos.

<sup>16</sup> Yehuanten hual chantilo capa amaqui quimati quinami Dios quinequi pa yulis se, axan yehuanten quimatilo cuali quinami Dios quinequi pa yulisi, axan quipialo lahuilisi pa inminyolo laijtic.

Quema, yehuanten hual chantilo capa amo quimatilo Dios ilajtol melahuac huan yoje mocahualo moxilujticate capa Dios,

axan quimatilo aquí unca Dios huan quimatilo quinami huil quipialo in yulilisi hual yihual quinequi pa quipiasqui.

<sup>17</sup> Cuaquín pejtiahuiaya nahuati Jesús inminyampa yehuanten, quinmilitinemiaya:

—Xicpalacan anmoyolo huan xipehuacan xilajnamiquican quinami Dios quinequi, pa yajmo anmoijlacus. Unca pampa axan ajsic in tonali quiman Dios ilahuelitlisli pin cielo yahui caya lanextili nican pan lalticpan.

*Jesús quinnotza in micheros*  
(Mr 1:16-20; Lc 5:1-11)

<sup>18</sup> Nejnemiaya Jesús inahuac in al huejcalan Galilea. Quinmitac ome lacames, se motocaya Simón hual noje quitocayaltloaya Pedro. In oc se motocaya Andrés, yihual icni Simón. Yehuanten quilastataloaya se latzojuini palahuac pa in al huejcalan, pampa yehuanten yeje micheros. <sup>19</sup> Huan Jesús quinmilic:

—Anquinmantica michimes. Xichtocacan nehual pa anmochías nomonextilinijmes. Annimitznexilis quinami anquinmanas lacames pa necheltocasi.

<sup>20</sup> Huan jan axcan quincajcahuaje inminlatzojuini huan quitocaje.

<sup>21</sup> Cuaquín uyac Jesús jan nadite huejquita capa cataya. Quinmitac oc se quin ome lacames. Se yec icni in oc se. Se motocaya Jacobo huan in oc se icni motocaya Juan, yehuanten ixolomes Zebedeo. Huan Zebedeo inmintajtzin cataloaya pan se barquito laijtic, quinchijchihualoaya inminlatzojuinijmes. Jesús quinnotzac Jacobo huan Juan. <sup>22</sup> Jan ajnaxcan yehuanten quincahuaje in barco huan inmintajtzin, huan quitocaje Jesús.

*Jesús quinmactía míac lalalera*  
(Lc 6:17-19)

<sup>23</sup> Uyajtiac Jesús pa mochi in lalticpan Galilea, lamaxtitataya pa inmintopajmes yehuanten pa Galilea. Quimachilitataya in lamachilitlisli cuali, in unca quinami Dios huelitía. Huan quinpajtinemiaya mochi inmincocolisli yehuanten, huan mochi in hual quincocuhaya. <sup>24</sup> Yoje quimatije in hual quichihuaya yihual moxtin yehuanten pin lali Siria hual unca pa quiahuac Jesús ilali. Huan yehuanten quihualiquilije moxtin in cocoxquimes hual quincocuhualoaya míac cocolisli, míac ca yehuanten mococuhualoaya niman míac. Quihualiquilije yehuanten hual quinpioaloaya iyecames hual quincocoltiloaya huan quihualiquilije yehuanten hual cataloaya laticocojquimes huan yehuanten hual amo huil moliniloaya. Huan quinpajtic Jesús. <sup>25</sup> Yoje quitocaje niman míac lalalera hual chantiloaya pin lalticpan Galilea huan pin lali capa cataloaya in diez (majlacli) caltilan hual quitocayaltloaya Decápolis. Quitocaje míac hual chantiloaya pin caltilan hué Jerusalén huan pin lalticpan Judea huan pin lali pa yojque itenco (analco) in atenco hué Jordán.

## 5

*Jesús quinmactía imonextilinijmes pan loma (tepetzindi)*

<sup>1</sup> Yoje, quiman quinmitac Jesús in niman míac lalalera, panquisac pan se loma (tepetzindi). Molalic nepa, huan hualaje capa yihual imonextilinijmes.

<sup>2</sup> Pehuac quinmactic, quinmilic:

*Jesús quinmilla aquinojen cate yehuanten hual yulilo quipixticate paquilisli*  
(Lc 6:20-23)

<sup>3</sup> —Quipialo paquilisli yehuanten hual quimatilo pampa amo quipialo nindeno calica huil quipaquiltlo Dios. Quema, yulilo ca paquilisli, pampa lacames quinami yehuanten cayasi capa yes Dios huelitía.

<sup>4</sup> Quipialo paquilisli yehuanten hual quincocúa inminyolo pampa unca mochi amo cuali pin lalticpan. Quema, yulilo ca paquilisli, pampa yehuanten Dios quinquacahualtis.

<sup>5</sup> Quipialo paquilisli yehuanten hual amo motolinilo pa canasi inminyaxca, pampa yehuanten Dios quinquamacas in lalticpan pa yes inminyaxca capa huelitisi.

<sup>6</sup> Quipialo paquilisli yehuanten hual quinequilo ca mochi inminyolo pa yesi cuali huan pa quichihuasi len unca cuali, pampa Dios quinquhuelitisi pa yoje yesi.

<sup>7</sup> Quipialo paquilisli yehuanten hual quimatilo laicnililo, pampa yehuanten quinquimicnilis Dios.

<sup>8</sup> Quipialo paquilisli yehuanten hual cate chipahuac pa inminyolo, mochi ca se lajtulisli ca Dios huan ca mochi hual Yihual quinequi. Quema, yulilo ca paquilisli, pampa yehuanten quitasi Dios.

<sup>9</sup> Quipialo paquilisli yehuanten hual quinquextililo oc sequin quinami huil cayasi jan sejpa se ca oc se, yajmo moanticate. Quema, yulilo ca paquilisli, pampa Dios quinquimilis pampa yehuanten Dios ixolomes, pampa quichihualo quinami Yihual quichía.

<sup>10</sup> Quipialo paquilisli yehuanten hual lacames quinquojtocalo pa quinchihuilisli amo cuali pampa yulilo quichijiticate in hual Dios quinequi. Quema, yulilo ca paquilisli pampa lacames hual yulilo quinami yehuanten cayasi capa yes Dios huelitía.

<sup>11</sup> Anquipía paquilisli quiman anmitzcocolilo huan anmitztojtoocalo huan islecatilo quijutiticate míac amo cuali anmonahuac amhuanten pampa anechnehtoca nehual. Quema, anyuli ca paquilisli. <sup>12</sup> Xipaquican, xicpíacan niman míac paquilisli, pampa pin cielo anyahui ancana niman míac hual cuali. Anquimati pampa yoje quinquojtocanijme Dios ilajtunijmes hual yulinijme pa yina quiman ayamo anlacatic amhuanten, huan unca neli yehuanten canaje laxlahuilisli.

*Jesús technextilía quinami cate istal huan lahuilisli pa in lalticpan (Mr. 9:50; Lc. 14:34-35)*

<sup>13</sup> Amhuanten anunca quinami istal hual quilalilo pin nacal pa quitechcunis pa quitzacuilis pa camo moiylacus. Jan yoje amhuanten Dios anmitzlacic pa anquintechnis pa ilacames pin lalticpan pa yoje anquintzacuilis pa camo moiylacusi. Huan sinda in istal mochías pataca, cuaquín ¿quinami mochías istal oc sejpa? Amo huil, yajmo unca cuali pa nindeno. Quilasalo pa quiahuac huan in lacames quitelicsalo.

<sup>14</sup> Jan amhuanten san anunca quinami in lahuilisli hual quilahuilía inminyolo yehuanten pin lalticpan. Jan yoje amhuanten anquinhahuilía inminyolo quinami anquinxactía Dios ilajtol. Huan anquinhahuilía inminyolo pampa yojque anyulis quinami Dios quinequi. Quinami se caltilan hual unca pani pan se loma (tepel) amo huil molatía, jan yoje in lahuilisli amo huil molatía. <sup>15</sup> Huan amo quilalaltilo lacames se tapalquita huan cuaquinon quilalilo itzindan se chiquihuil hué. Quilalilo pa pani, huan quinhahuis moxtin hual cate calijtic. <sup>16</sup> Ximomacahuiltican pa quimatisi lacames pampa anyuli quinami Dios ilajtol quinxactilía pa yulis se. Yoje anquinxactilis pampa anmitzlahuilic Dios anmoyolo. Yoje quiman quitasi quinami anyuli anquichijitica len unca cuali, cuaquín laquetzasi cuali inahuac anmoTajtzin hual unca pin cielo (ilhuicac).

*Jesús quinxactilía quinami huejcahuas ilajtol Dios*

17'Amo xiquijtucan pampa nihualaya pan lalticpan pa niclamis Dios ilajtol huan in hual quimaxtije Dios ilajtunijmes. No, amo nihualaya pa niclamis, nihualaya pa annimitznexutilis neli len quinequilo quijtulo. 18 Annimitzilía melahuac inon: Amo yes laquixtili se lajtol ca ilajtomes niman tijtipichin pa ilajtol Dios sinda ayamo mochíac mochi hual quijtúa pampa yahui mochía. Quema, cayas yoje pa mochi in xixihuimes hual huejcahuasi in cielo huan in lalticpan. 19 Yoje, aquí yes amo quinequis quichías len quijtúa se ilajtol Dios jan sinda unca se ilajtol niman tipichin, huan sinda quinmaxtis oc sequin pa camo quichihuasi len quijtúa in lajtol, cuaquín in se yes niman tipichin capa Dios huelitía. Huan aquí yes quichías len quijtúa mochi ilajtol Dios huan quinmaxtis oc sequin pa yoje quichihuasi, cuaquín in se yes hué capa Dios huelitía. 20 Xicchihuacan yoje, pampa annimitzilía amhuanten amo quiman ancayas capa Dios huelitía sinda jan anyuli anquichijtica san quinami in fariseos huan yehuanten hual quimaxtilo in lajtol. Ca inminlachihualisli quijtulo pampa inon Dios quinmita amo quipixticate laijlaculisli. Huan inminlachihualisli amo quinpalehuis pa yoje Dios quinmitas.

*Jesús quinmaxtía quinami quita cualanilisli  
(Lc. 12:57-59)*

21 'Anquicaqui quiman anmitzmomaxtililo quinami Dios pa yina quinmilic totajtzitzían: "Amo tilamictis. Huan aquí yes quimictis oc se, yihual quihuicasqui ilaixpan in la'ajuani pa quitexpahuisi huan pa quitilanis pa yes lamictili." 22 Ma yoje, nehual annimitzilía pampa aquí yes cualanis ca icni, cuaquín yihual quihuicasi ilaixpan in la'ajuani hué pa quitexpahuisi huan pa quitilanis capa yes lamictili. Huan aquí yes quilis icni: "Amo timonotza nindeno", yihual quihuicasi ilaixpan in la'ajuani hué pa quitexpahuisi huan pa quitilanis pa yes lacocoltili. Huan aquí yes quilis icni: "Tehual ti'elehuis, ma Dios mitzpolehuilti", yihual unca pa in ojli hual laicanas pa capa amo mochahu pa chichinahuis.

23 'Yoje, se tonali ticalicas mohuendi pa capa quilalilo ilaixpan Dios. Nepa jan axcan tiquijnamiqis quinami mocni amo mitziztica cuali pampa yihual quijtúa tel ticchihuilic o tiquilic len amo cuali. 24 Pampín ayamo xiclalili Dios mohuendi. Xipehua xicchía inon: Xiajtiquisa pa anmochías jan sejpa huan mocni. Cuaquín ximocuepa, xiclali ilaixpan Dios mohuendi.

25 'Ximochijtiquisacan ca se lajtulisli ca aquí yes mitzhuicas ilaixpan in la'ajuani pampa tiquihuiquilía len tomin. Quema, ximochijtiquisacan ca se lajtulisli quiman aunca ca yihual pan ojli. Ma camo ye pa yihual mitztemaca pa in la'ajuani, huan in la'ajuani mitztemacas in laquitzquini huan yihual mijzacuas pin calijtic. 26 Annimitzilía neli, amo quiman tiquisas umpa sinda ayamo tilamis ticlaxlahuis, mas que unca in tomin niman tipichin.

*Jesús quimaxtía quinami quinmita yehuanten hual canaloc oc sequin sihuames hual amo inminyaxca*

27 'Anquicaquic quiman anmitzmomaxtililo quinami Dios quinmilic totajtzitzían pa yina: "Amo ticanas oc se sihual hual ca yihual amo timonamic-tic." 28 Ma yoje, nehual annimitzilía pampa aquí yes quiztías se sihual pa yoje pehuas quinequis míac pa monilus ca yihual, yoje yihual canac in sihual pa iyolo.

29 'Huan sinda quiztía moixtololon pa moma cuali len hual mitzlaijlacultía, cuaquín xijquixti huan xiclasa huejca. Sinda san polehuiaya se nadita mocuerpo, neli inon amo yesquiaya polehuilisi hué pa tehual quinami

cataya sinda yesquiaya lalasali mochi mocuerpo (monacayo) pin tixuxli hual amo quiman mosehuis. <sup>30</sup> Huan sinda mojmosta quichijtía momajma cuali len hual mitzlaijlacultía, cuaquín xijcotona huan xiclasa huejca. Sinda polehuiaya jan se nadita mocuerpo, neli inon amo yesquiaya polehuilisi hué pa tehual quinami cataya sinda yesquiaya lalasali mochi mocuerpo pa capa amo mocahua pa chichinahuis.

*Jesús quimaxtía quinami quinmita lacames hual quincajcahualo inminsi-huahuan*

(Mt. 19:9; Mr. 10:11-12; Lc. 16:18)

<sup>31</sup> Quijtulo pampa aquí yes quicajcahua isihua, cuaquín ma quimaca se amal hual lanextilis pampa in sihual unca lacajcahuali. <sup>32</sup> Ma yoje, nehual annimitzilía pampa sinda aquí yes quicajcahuas isihua, yoje yihual quichihualtis isihua pa monilus ca se lalac amo iyaxca sinda monamictis oc seppa in sihual. Yoje, ma camo quijcuani se lalac isihua. Ma yoje, sinda isihua moniluc ca oc se lalac, cuaquinon unca iyaxca ilahuical pa quicajcahuas isihua.

*Jesús quimaxtía inahuac len tiqulis Dios ca lajtol hual amo mopala*

<sup>33</sup> Noje, anquicaquic quiman anmitzmomaxtililo quinami Dios quinmilic totajtitzian pa yina: “Amo tiqulis ilaixpan Dios len hual unca islacatilisli. Len yes tiqulis ilaixpan toTata pampa ticchihuilis, cuaquinon ticpías pa ticchihuilis.” <sup>34</sup> Ma yoje, nehual annimitzilía amo xiquili nindeno ca lajtol hual amo mopala ilaixpan Dios. Amo xiquili len tía ticchía pan ipampa in cielo, pampa in cielo unca capa Dios huelitía. <sup>35</sup> Amo xiquili pan ipampa in lalticpan, pampa in lalticpan unca quinami se icpali capa Dios quinehuía icxihujmes. Amo xiquili pan ipampa in caltilan hué Jerusalén, pampa inon icaltilan hué in Niman Hué hual unca Dios. <sup>36</sup> Amo xiquili pan ipampa motzontecon, pampa amo huil ticchías jan se motzondi iztac o liltic. <sup>37</sup> San quiman anlananquilía, jan monequi pa anquilis “quema” o “amo”. Xiquilican yoje, pampa len yes oc se lajtol pa in omenten unca lajtol hual annitzilía in lili.

*Jesús lamaxtía quinami quinmita lacames hual quinlacuepililo oc sequin*  
(Lc. 6:29-30)

<sup>38</sup> Anquicaquic quinami quijtulo: “Sinda se quiquixtilis iixtololon oc se, cuaquín jan yoje quicocoltisi quiquixtilijtica iixtololon in se. Huan sinda se quihuitequis oc se pa icamac huan yoje quisas ilan in oc se, cuaquinon jan yoje quicocoltisi in se quiquixtilijtica noje ilan.” <sup>39</sup> Ma yoje, nehual annimitzilía inon: Amo xiquihuica pan lahuelitilisli se hual mijchihuila amo cuali. Niquijtúa aquí yes mijchihuilis len amo cuali, xicmacahuiltpa pa mijchihuilis oc seppa in amo cuali. <sup>40</sup> Huan sinda se quinequi mitzhuicas ilaixpan in la'ajuani pa mitzquixtís mocotón, cuaquín xicmacahuiltpa pa mitzquixtís molaquen noje. <sup>41</sup> Huan aquí yes mijchihualtis len, cuaquín xicchihuili len mijchihualtía. Huan quema, amo xicchihuili jan inon san pa in hual mijchihualtis pa ticchihuís, xicchihuili oc seppa yoje míac. <sup>42</sup> Xicmaca yihual hual miltztemachía len. Huan amo xiquili pampa no yihual hual quinequi molanehuía len ticpa.

*Jesús techmaxtía pampa monequi pa tiquinlasojlasi tolacocolinjmes*  
(Lc. 6:27-28, 32-36)

<sup>43</sup> Anquicaquic quinami quijtunijme: “Ticlasojlas molasojli huan tijcocolis molacocolini.” <sup>44</sup> Ma yoje, nehual annimitzilía inon: Xiquinlasojlancan

anmolacocolinijmes. Xiquinmilican len cuali yehuanten hual anmitzililo len amo cuali, xiquinchihuilican cuali yehuanten hual amo anmitzixtocalo, huan xiclaflanican Dios pa yehuanten hual anmitztenehualo ca islachatilisli huan anmijchihuulilo len amo cuali huan anmitztojtocalo. <sup>45</sup> Xicchihuacan yoje pa yoje anyes ixolomes anmoTajtzin hual unca pin cielo. Unca pampa yihual quichía pa quisas itonali pa lacames amo cuajcuali huan pa lacames cuajcuali. Noje quinquiahuilía pani yehuanten hual quichihualo cuali huan yehuanten hual quichihualo amo cuali. <sup>46</sup> Sinda anquinlasojla jan yehuanten hual anmitzlasojlalo, ¿len laxlahuilisli ancanas? Nindeno. Quichihualo yoje yehuanten in judíos hual quilajlanilo ilapixcalisli tomin pa in romanos hual huelitilo pan amhuanten. <sup>47</sup> Huan sinda anquinchihuilía quinami lajlasojli jan yehuanten san hual cate ca amhuanten, cuaquín jan anquichijtica san quinami oc sequin lacames san. Noje yehuanten hual amo judíos quichihualo yoje. Quema, yehuanten hual amo quiximatilo Dios quichihualo yoje. <sup>48</sup> Yoje, amhuanten xiyén (xiyecan) quinami anmoTajtzin hual unca pin cielo. Yihual quinlasojla moxtin huan quinequi quinchihuilía cuali moxtin.

## 6

### *Jesús quimaxtía quinami ticchihuasi in hual cate cuajcuali*

<sup>1</sup> Ximolachilijtiacan pa camo anquinchías innojen cuajcuali inminyampa in lacames jan pa yoje yehuanten anmitzitasi anquinchijtica. Sinda anquichía yoje, amo anmitzmacas laxlahuilisli anmoTajtzin hual unca pin cielo (pa ilhuicac). <sup>2</sup> Yoje, quiman yes ticmacas len yehuanten hual amo quipialo míac, amo xilamachiltitinemi pa yoje moxtin quimatisi in cuali hual ticchijtica. Yoje quichihualo yehuanten hual quinequilo nesilo quinami lacames hual quimolancuacuetzililo pa quimahuisusi Dios míac. Ma yoje cate lacuajcuamananijmes. Nesilo yoje cuali huan neli cate amo cuali. Quema, lamachiltitinemilo pin tiopajmes huan pa ojlimes pa yoje lacames laquetzasi cuali pampa yehuanten quinchihualo in cuali. Annimitzilía neli, yehuanten amo quipiasi oc se laxlahuilisli pa in laquetzalisli cuali hual quijtsusi lacames inminahuac yehuanten. Amo canasi Dios ilaxlahuilisli. <sup>3</sup> Tehual quiman ticmacas len yehuanten hual amo quipialo míac, amo ximomacahuiltili pa quimatis molasojli niman cuali. <sup>4</sup> Xicchía yoje pa yoje amaqi quimatis pampa ticmacac len yehuanten hual amo quipialo. Huan moTajtzin pin cielo quita mochi hual amo quimatilo lacames, huan yihual mitzmacas molaxlahuilisli.

### *Jesús technextilía quinami monequi pa ticlaflanisi Dios (Lc. 11:2-4)*

<sup>5</sup> Huan quiman ticlaflanisi Dios, amo tiyes quinami yehuanten hual quinequilo nesilo quinami niman lamahuisujquimes ilaixpan Dios. Yehuanten quixtocalo míac pa quilajlanisi Dios moquezticate calijtica pin tiopajmes huan pa inmintenco in ojlimes, pa yoje lacames quinmitasi. Annimitzilía neli, yehuanten axan canaje inminlaxlahuilisli. Inminlaxlahuilisli unca in laquetzalisli cuali yehuanten hual quinmitalo quijtulo quiman quichihualo cuali. Amo canasi Dios ilaxlahuilisli. <sup>6</sup> Tehual, quiman yes ticlaflanisi Dios, xía ca capic ticayas mohuían. Xiclaflanisi moTajtzin pin cielo hual unca ca tehual quiman tiunca mohuían. Huan moTajtzin pin cielo quicaqui huan quita len ticchijtica, mas que lacames amo quicaquilo huan quitalo. Huan yihual mitzmacas molaxlahuilisli.

<sup>7</sup> Huan quiman yes anquilajlanis Dios, amo xiquijtutinemican oc sejpa huan oc sejpa lajtomes hual amo tiquinpalalo. Yoje quichihualo yehuanten hual amo quineltoocalo Dios. Yehuanten quijtulo pampa inmindioses quinaquisi pampa quinmilijiticate in lajtomes míac. <sup>8</sup> Amo xiyén quinami yehuanten, pampa quimati Dios anmoTajtzin len monequi pa anquipias quiman ayamo anquilajlanic. <sup>9</sup> Yoje, monequi pa anquilajlanis Dios ca lajtomes quinami innojen:

ToTajtzin hual tiunca pin cielo, ma momajtican moxtin pampa motoca unca hué.

<sup>10</sup> Ma ajsi in tonali quiman tihuelitis pa mochi cajcapa, ma mochihua quinami ticnequi pin lalticpan, quinami yoje unca pin cielo.

<sup>11</sup> Xitechmaca pa tijcuasi hual monequi pa tijcuasi mojmosta.

<sup>12</sup> Huan xicpujpuhua len yes amo cuali timijchihuilije, quiman tehuanten ticpujpuhaje yehuanten hual tejchihuilije len amo cuali.

<sup>13</sup> Huan amo xilamacahuilti pa techajsis len hual tejchihuilis pa timoijlacusi. Quema, xitechmacahuili pa camo techmatoca in se hual amo unca cuali, in lili,

pampa unca moyaxca pa tihuelitis huan unca moyaxca mochi lahuelilitisli, huan unca moyaxca in laixpelalisli cualtichin huan in lahueyilisli. Amo mocahuas pa yes yoje.

Yojqe ma ye.

<sup>14</sup> Sinda anquinpujpuhuas in lacames hual anmijchihuilije amo cuali, cuaquín anmoTajtzin pin cielo noje anmitzpujpuhuas. <sup>15</sup> Huan sinda amo anquinpujpuhuas in lacames hual anmijchihuilije amo cuali, cuaquín amo quinpujpuhuas anmoTajtzin pin cielo in amo cuali hual anquichíac.

### *Jesús quimaxtía quinami monequi pa mosahuasi lacames*

<sup>16</sup> Huan amo inon san. Quiman yes anmosahuas, amo xiyén quinami yehuanten hual quinequilo nesilo niman lamahuisujquimes hual quimolancuacuetzililo Dios míac. Quichihualo pa nesis inmixco ca míac icnotilisli. Nesilo quinami quincocojtica míac inminyolo, pa yoje monextilisli inminyampa in oc sequin pampa mosajticate. Annimitzilia neli, yehuanten inminlaxlahuilisli unca quiman lacames quinmitalo mosajticate, huan amo canasi Dios ilaxlahuilisli hual yihual temaca. <sup>17</sup> Huan tehual, quiman timosajtica, ximotzicahuasti huan ximoixpaca quinami ticchia mojmosta.

<sup>18</sup> Yoje amo timonextilis ca oc sequin lacames pampa timosajtica. Ma yoje, quiman timosahuas, mas que amo mitzizticate lacames, Dios moTajtzin mitzitas. Huan Dios moTajtzin hual quita len ticchia quiman tiunca mohuan mitzmacas molaxlahuilisli.

### *Jesús techilla quinami monequi pa ticajcoquisi len ipati míac*

*(Lc. 12:33-34)*

<sup>19</sup> Amo xiyulican anmajcoquilitica innojen hual ipatilo míac nican pan lalticpan. Nican pan lalticpan quinmijlaculo in oculilimes, noje palanilo huan moaxixalo. Noje lahuajuanalo in laixtequinijmes pa calaquisi capa cate pa yoje quinmixtequilisli. <sup>20</sup> Quema, ximajcoquilitiacan pin cielo len Dios quijtúa pampa monotza míac. Mochi in cuali hual anquichía pan lalticpan Dios quijnamiquía huan anmitzajcoquilia anmolaxlahuilisli pin cielo. Nepa amo quinmijlaculisli in oculilimes, amo palanisi, amo moaxixasi, huan amo lahuajuanasi pa calaquisi pa quinmixtequilisli. <sup>21</sup> Quema, ximajcoquilitican pin cielo len Dios quita ipati míac, pampa capa yes anquipias la'ajcoquili

len amhuanten anquijitúa pampa ipati míac, yoje anyulis anquijnamictica capa unca.

*Jesús techilía quinami unca in lahuilisli laiitic tocuerpo*  
(Lc. 11:34-36)

<sup>22</sup> Pan ipampa iixtololon se, yihual quita in lahuilisli, huan ca iixtololon huil lachía pa quichía mochi. Yoje, sinda unca cuali moixtololon, cuaquín huil ticchía cuali mochi pampa tiunca mochi pin lahuilisli. Huan jan yoje moyolo mitzlahuía molaijtíc. Sinda unca cuali moyolo, ticmatis len yes Dios quita pampa monotza pa quichías se huan yoje ticchías. <sup>23</sup> Huan sinda unca cocoxqui moixtololon, cuaquín unca quinami unca pin laticumac mocuerpo (monacayo). Huan jan yoje sinda moyolo amo mitzlahuía molaijtíc, amo ticmatis len yes Dios quita pampa monequi pa yulis quichijtica se. Cuaquín tiunca pin laticumactilisli hual unca niman amo cuali. Yojque, jniman amo cuali yes molaticumactilisli sinda amo unca cuali moixtololon!

*Jesús techilía quinami Dios quita tomin*  
(Lc. 16:13)

<sup>24</sup> Se tequipanujquil amo huil quintequipanuía ome itecojuan. Unca pampa yihual quicocolis in se huan quilasojlas in oc se, o quitequipanuilis cuali in se huan quixijxicus in oc se. Huan amhuanten jan yoje amo huil anquitequipanuilis Dios sinda anyuli anmotequipanuilijtica san pa yoje anmonechiculis míac tomin.

*Jesús techilía quinami Dios quinmolachilía ixolomes*  
(Lc. 12:22-31)

<sup>25</sup> Yoje, annimitzilía inon: Amo ximomajtican quiman anquijnamiquía quinami anyahui anyuli nican pan lalticpan. Amo ximomajtican inahuac quinami ancanas len anquicuas o ancunis. Noje amo ximomajtican inahuac len yes monequi pa anmocuerpo, quinami ancanas len calica anmolaquentis. Dios anmitzmacac anmoyulilisli. Pampín neli unca yihual anmitzmacas len anquicuas huan ancunis pa yoje anyultías. Huan yihual anmitzmacac anmocuerpo, huan unca neli yihual anmitzmacas tzotzomajli calica anmolaquentis. <sup>26</sup> Xiquinmitacan in tutomes hual palanilo pin ijyecal. Amo latocalo, amo lapixcaló, amo quisajsacalo nindeno pa capic cajcoquilis. Ma yoje quinlacualtía anmoTajtzin hual unca pin cielo. Huan amhuanten anmonotza míac. Yehuanten amo yoje míac monotzalo. <sup>27</sup> Huan amo unca se capa amhuanten hual huil huejcahua pa yultías oc sequin tonalijmes jan pampa lajtúa pa iyolo pampa yahui motolinía pa yultías oc se nadita. <sup>28</sup> Huan ¿leca anmomajtía inahuac quinami ancanas anmotzotzomajli? Xiquinmitacan in xuchimes pin cuajlán quinami moscaltilo. Amo tequipanulo huan amo tzahualo. <sup>29</sup> Ma yoje, annimitzilía pampa in hué Salomón ca mochi itomin amo molaquentic cualtichin quinami nesilo in xuchimes. <sup>30</sup> Pampín, sinda Dios quichía cualtichin in sacal hual moscaltitica pin cuajlan, huan mosta cuajnesi huaquis huan quilasasi pin tixuxli, cuaquín niman neli unca yihual anmitzlaquentis amhuanten, mas que amo anquilalía míac laneltocalisli ca yihual.

<sup>31</sup> Yoje, amo ximomajtican, amo xiquijtucan: “¿Len tijcuasi? Huan ¿len ticunisi? Huan ¿ca len timolaquentisi?” <sup>32</sup> Yehuanten hual amo quineltocalo Dios yultialo quitemujticate quinami quipiasí mochi innojen. Amhuanten, amo ximomajtican, pampa anmoTajtzin hual unca pin cielo quimati pampa monequi pa anquipías mochi innojen. <sup>33</sup> Yoje, pampa anquimati Dios quimati len monequi pa anquipías, xicnequican pa Dios huelitis pan



amhuanten. Quema, xicnequican inon, amo yoje míac xicnequican mochi innojen oc sequin. Huan noje, mas que anquinequi mochi innojen, monequi niman míac pa anyulis amo laijlaculi quinami yihual Dios quinequi huan quinami yihual anmitzhueliltía pa anyulis. Huan mochi innojen hual monequi pa anquipías, Dios anmitzmacas noje. <sup>34</sup> Yoje, amo ximomajtican inahuac len yahui panúa mosta, pampa quiman ajsis mosta, cuaquin cayas len amo cuali hual unca iyaxca in tonali san. Huan Dios quichías pa quisas quinami yihual quinequi. San in amo cuali hual panúa pan se tonali miactzini pa in tonali.

## 7

### *Jesús quijtúa pampa monequi pa camo tilatenehuasi* (Lc. 6:37-38, 41-42)

<sup>1</sup> Ximocahuacan pa anquinequis anlatenehuas inahuac in hual quijtulo huan quichihualo oc sequin. Yoje amhuanten amo anyes latenehuali.

<sup>2</sup> Sinda anlatenejtías pampa in hual quijtulo huan quichihualo oc sequin, cuaquin anyes latenehuali jan quinami anquintenehuac oc sequin. Cayas ca amhuanten jan quinami lacames molamachihuililo. Ca in lamachihualoni calica anlamachihuilía, Dios anmitzlamachihuilis amhuanten. <sup>3</sup> Huan ¿leca timoijnamiquiltía inahuac mocni ilaijlaculisli tipichin, huan amo timoijnamiquiltía inahuac molaijlaculisli niman hue? Tiunca quinami se hual quita se lalpotocli pa iixtololon oc se, huan amo tiquita in cuahuil niman hue hual unca pa tel moixtololon. <sup>4</sup> Pampín, amo unca moyaxca pa tiqulis mocni: “Ma nimitzpalehui pa timocahuas pa ticchías molaijlaculisli.” ¡Xiq-uita! Tel ticchijtica se laijlaculisli niman tetzcuinuc. <sup>5</sup> ¡Lacuajcuamanani tehual! Ticnequi pa tinesis cuali inminlaixpan oc sequin, huan ma yoje amo tiunca cuali. Ximonextili pa tilajtus melahuac pa moyolo inminahuac oc sequin. Ximocahua pa ticchías molaijlaculisli hueyote, cuaquin ticmatis quinami huil ticpalehuis mocni pa mocahuas pa quichías ilaijlaculisli tipichin.

<sup>6</sup> Amo xilaqueztican ca ilajtol Dios inminlaixpan lacames hual motzacuililo pa camo quicaquisi pampa quixijxiculo Dios ilajtol. Yesquiaya quinami anquimaca pelojmes pa quicuasi len iyaxca Dios, huan yesquiaya quinami anquinlaca inminlaixpan in cuchis tixcalitos hual ipatilo míac. Quintelicalosquiaya in yulijquimes huan momalinalosquiaya pa anmitzccotalosquiaya.

### *Jesús quijtúa pampa monequi pa tiyulisi ticlajlanticate Dios* (Lc. 11:9-13; 6:31)

<sup>7</sup> Xiyultiacan anquilajlantica Dios, huan yihual anmitzmacas len anquitemachis. Xiyultiacan anquitemujtica len Dios quipía pa anmitzmacas, huan anquitas. Xiyultiacan anquinoztica Dios huan yihual anmitzlapulis quinami in lalapujquimes pin cielo pa yoje anmitzcaquis len anquilajlantica. <sup>8</sup> Unca pampa aqui yes yultías quitemachijtica Dios, yihual canas in hual quitemachis. Huan aqui yes hual yultías quitemujtica len Dios quipía pa quimacas yihual, yihual quitas. Huan aqui yes yultías quinoztica, Dios quilapulis.

<sup>9</sup> Amo unca se lalcal ca amhuanten hual quimacas ixól se tixcali sinda ixól quitemachis len quicuas. <sup>10</sup> Huan sinda ixól quitemachis se michin, itajtzin amo quimacas se cuhual. <sup>11</sup> Yoje, mas que amhuanten anunca amo cuali, ma yoje anquimati anquimaca anmoxolomes innojen hual cuajcuali. Huan noje niman míac quimati quichía yoje anmoTajtzin hual unca pin

cielo. Amhuanten amo quiman anquimati anquinmaca innojen cuajcuali quinami yihual quimati. Huan unca neli yihual quinmacas innojen cuajcuali yehuanten hual quitemachilo.

<sup>12</sup> Yoje, mochi len yes anquinequisquiaya pa anmijchihuillilosquiaya lacames, jan yoje amhuanten xiquinchihuillican yehuanten. Sinda anquichía yoje, cuaquín yoje anquineltoctatía mochi hual quijtúa Dios ilajtol huan mochi hual quijcuiluje Dios ilajtunjimes.

*Jesús quimaxtía quinami calaquí se pa iojli*  
(Lc. 13:24)

<sup>13</sup> Quiman ancanas Dios iojli, cuaquín unca quinami ancalactica pa se lalapujquil pitzahuac, pampa pan Dios iojli yihual anmijtzacuilía pa camo anyulis quinami yehuanten hual amo cate pan iojli. Ma yoje, xicalaquican pa in lalapujquil pitzác. Sinda ancanas in ojli hual anmitzlaicana pa quiahuac in ojli capa Dios unca, cuaquín in unca quinami se ojli palahuac. Unca palahuac capa calaquilo lacames pa canasi in ojli. Huan cate míac hual calaquilo umpa huan polehuisi, amo quiman quipiasí Dios iyulilisi.

<sup>14</sup> Pampín, xicanacan Dios iojli. Se cana Dios iojli quinami calaquí se pa se lalapujquil pitzác, huan Dios iojli unca quinami pitzahuac pa canas. Ma yoje anmitzlaicana capa anquipías Dios iyulilisi. Huan amo cate míac hual quitalo Dios iojli pa canasi.

*Jesús quimaxtía quinami tiquiximatilo se cuahuil*  
(Lc. 6:43-44)

<sup>15</sup> Ximolachilican pa camo anmitzcuajcuamanasi coyomes hual molaquenteilo quinami borregos. Quichihualo yoje pa huil calaquisi capa cate in borregos pa quinmictisi. Jan yoje cate sequin lacames. Nesilo capa amhuanten huan lajtulo quinami cataloaya Dios ilajtunjimes, huan amo cate ilajtunjimes mejmelahuac. Jan quinequilo anmijchihuillilo amo cuali.

<sup>16</sup> Anquimatis pampa yehuanten cate islatatinjimes pampa quichihualo inon. Unca quinami anquimati len cuahuil pampa laqui ilaquilyo. Ma annimitzilía se lanextilisi: Amo quitequilo uvas pan huitzcuajtzitzindis huan amo quitequilo higos pan ipacholimes huizlimes. <sup>17</sup> Jan yoje laqui mochi cuahuil cuali ilaquilyo cuali. Se cuahuil amo cuali laqui ilaquilyo amo cuali. <sup>18</sup> Se cuahuil cuali amo huil laqui ca ilaquilyo amo cuali. Huan se cuahuil amo cuali amo huil laqui ca ilaquilyo cuali. <sup>19</sup> Mochi cuahuil hual amo laqui ca ilaquilyo cuali quicotonalo pa quimayahuisi, huan quilasalo pan tixuxli. <sup>20</sup> Yoje, anquimatis quinami cate lacames pan ipampa inon hual quichihualo, jan quinami anquimatis calía cuahuil unca pan ipampa ilaquilyo.

*Innojen cate yehuanten hual amo cayasi capa Dios huelitía*  
(Lc. 13:25-27)

<sup>21</sup> Amo cate yehuanten hual jan yultialo nechilijtcate: “Tata, Tata”, hual quipiasí inmintequipanulisli ca Dios capa huelitía. Amo cate noyaxca san pampa nechnotzalo. Quema, quipiasí inmintequipanulisli capa Dios huelitía jan yehuanten san hual quichihualo len quinequi noTajtzin hual unca pin cielo. <sup>22</sup> Pa in tonali quiman Dios latexpahuía, cuaquín nechilisi míac, quil: “Tata, Tata, ¿amo tiquinlaquetzilije lacames molajtol, tiquinmilitaloaya pampa ticpialoaya molahuelitilisi pa tiquinlaquetzililosquiaya? Huan ¿amo tiquinquixtililoaya in ijyecames amo cuajcuali yehuanten? ¿Amo timijtzajtzililoaya ca motoca pa yoje tiquinquixtililosquiaya? Huan ¿amo

tiquinchihuaje míac lachihualisli hual quinlachialtije lacames ca lamajtilisli? Tiquinchihuaje pan ipampa ilahuelilitlisli motoca.”<sup>23</sup> Cuaquinon niquinmilis ca lajtol hual quicaquisi cuali, niquinmilis: “Amo quiman animitziximatic. Xiquisacan nolaixpan nehual, amhuanten hual mojmosta amo anquichía quinami quijtúa nolajtol.”

*Se lalac hual quimati huan se hual amo quimati*

(Mr. 1:22; Lc. 6:47-49)

<sup>24</sup>Yoje, niquilis len hual lanextilis quinami unca se lalac hual quicaquis in hual niquijtúa huan quichías quinami niquijtúa. Unca quinami se lalac hual quimati, se lalac hual quichíac icali pani in tel hué.<sup>25</sup> Huan huetziaya chichahuac in quiahuil huan lejcuc míac in al pin atenco hué. Toyajtataya, huan ijyecaya chichahuac. Quihuitequiaya in cali in ijyecal, huan ma yoje amo xitinic in cali, pampa in lalac quichíac pani in tel hué.<sup>26</sup> Huan aqui yes quicaquis in nolamaxtilisli huan ma yoje amo quichía quinami quijtúa unca quinami se lalac hual amo quimati. In lalac quichíac icali pan xalipan.<sup>27</sup> Huetziaya chichahuac in quiahuil huan lejcuc in al pin atenco hué. Toyajtataya, huan ijyecaya chichahuac. Quihuitequiaya in cali in ijyecal huan xitinic in cali huan jcataya xitinilisi tetzcuinuc quiman huetziac!

<sup>28</sup>Huan quiman laquisac quijtuc Jesús in lamaxtilisli, moitaje ca lamajtilisli niman míac in lalalera pampa quinmaxtiaya innojen.<sup>29</sup> Cataya pampa yihual quinmaxtiaya quinami se hual quipía lahuelilitlisli pa lamaxtiyoje. Yehuanten amo quijtuloaya pampa yahuiaya lamaxtiyoje. Amo lamaxtiaya quinami yehuanten hual quimaxtiloaya inminlajtol in judíos. Yihual quinmaxtiaya ca lahuelilitlisli.

## 8

*Nican quijtúa quinami Jesús lapajtiaya*

(Mr. 1:40-45; Lc. 5:12-16)

<sup>1</sup>Temuc Jesús nepa pin tepetzindi (loma), quitocaloaya niman míac lacames huan sihuames.<sup>2</sup> Huan hualac ca yihual se lalac quipiaya se cocolisli pan icuilaxli, in cocolisli itoca lepra. Hualac capa Jesús in lalac ca in lepra huan quimolancuacuetzilic, quilic:

—Tata, sinda jan ticnequis, huil tichpajtis.

<sup>3</sup>Huan quixilanic Jesús imajma, quimatocac, quilic:

—Nicnequi nimitzpajtía, xipajti.

Huan jan ajnaxcan pajtic in lepra.<sup>4</sup> Cuaquín Jesús quilic:

—Ximoiztía pa camo tiquilis amaqui. San xía ximonextili in tiopista, huan xicuica ca tehual in huendi hual Moisés quijtuc pin lajtol pa ticmacas. In huendi quinnextilis moxtin pampa tipajtic.

*Jesús quipajtía se tequipanujquil hual iteco quixtocaya míac*

(Lc. 7:1-10)

<sup>5</sup>Jesús calaquic pin caltilan Capernaum. Cuaquinon hualac capa yihual se ilaicani in guaches romanos. In laicani quilajlanic Jesús ca icnotilisli, quilic:

<sup>6</sup>—Tata, unca pa nochan se xól hual unca notequipanujquil, yihual lastica pan lapexli. Amo huil molini, unca niman cocoxqui.

<sup>7</sup>Cuaquín Jesús quilic:

—Nihualas pa nicpajtis.

<sup>8</sup>Quinanquilic in laicani:

—Tata, amo nimonotza pa tehual tihuás pa nochan. Jan xiquili in lajtol san, huan pajtis notequipanujquil. <sup>9</sup> Nehual noje nilacal hual nictequipanuilía oc se hué hual nechilía len monequi pa nicchías. Huan nehual niquinpía guaches hual quipialo pa quichihuasi len niquinmilía. Niquilía se: “Xía”, huan yahui. Niquilía oc se: “Xihuá”, huan huala. Niquilía notequipanujquil: “Xicchia inon”, huan quichía. Pampín nicmati yihual pajtis pampa tel ticpía lahuelilitlisli pa lapajtis jan ca molajtol san.

<sup>10</sup> Quicaquic inon Jesús, mocahuac quinmiztica yehuanten nepa, lachíac molapolultitaya, cuaquín quinmilic yehuanten hual quitocatihualaloaya:

—Annimitzilía neli, amo quiman niquitac jan se ca moxtin amhuanten israelitos hual laneltoca quinami in lacal romano. <sup>11</sup> Huan annimitzilía inon: Cayasi pa mochi in lalticpan míac quinami in laicanani hual hualasi huan cayasi ca Dios quiman huelitía. Quipiasí míac paquilisli. Quema, quinxiluilis Dios in cuali hual quinmacas yehuanten huan Abraham huan Isaac huan Jacob. <sup>12</sup> Ma yoje, Abraham imiahuimes hual amo laneltocalo amo quipiasí inminlaxilulisli capa Dios huelitía. Quema, quijtulo pampa cayasi ca Abraham huan Isaac huan Jacob pampa unca inminyaxca Abraham imiahuimes. Ma yoje, amo cayasi nepa. Cayasi latzacuali pa quiahuac, hual amo cayas capa Dios huelitía. Mocaquasi capa laticumac. Nepa mocaquis chocalisli huan quincuajcuasi inminlames pampa moitasi capa unca lacocoltilisli.

<sup>13</sup> Cuaquinon Jesús quilic in laicanani:

—Xía cuaquín. Huan quinami ticneltocac, cayas jan yoje.

Huan pajtic itequipanujquil jan ajnaxcan in tonali.

### *Jesús quipajtía Pedro isihua inantzin*

(Mr. 1:29-31; Lc. 4:38-39)

<sup>14</sup> Hualac Jesús pa ichan Pedro. Nepa quitac Pedro isihua inantzin lastataya pan lapexli, totoniaya chichahuac. <sup>15</sup> Cuaquín quimatocac imajma in sihual huan yajmo quipiaya totonalisli. Huan moquetzac in sihual, pehuac quinyucxilitic len quicuasi.

### *Jesús quinpajtía míac cocoxquimes*

(Mr. 1:32-34; Lc. 4:40-41)

<sup>16</sup> Quiman tiolactitiahuiaya, quihualiquilije Jesús míac hual quinpialoaya ijyecames amo cuajcuali hual quinmantiaje mojmosta. Jesús quinquixtilic in ijyecames jan quinmilijtica pa quisasi. Quema, quinpajtic moxtin hual cataloaya cocoxquimes. <sup>17</sup> Yojque mochíac len quijcuiluc pa yina Isaías ilajtuni Dios. In Isaías quijcuiluc quinami Cristo yahuiaya lapajti quiman hualaya pan lalticpan, quijtuc: “Yihual techijcanilic tococolisli huan quinpajtic tococoxquimes.”

### *Sequin quijtulo pampa quinequilo quitocalo Jesús*

(Lc. 9:57-62)

<sup>18</sup> Axan quiman quinmitac Jesús niman míac hual quiyahualujtataloaya inahuac yihual, quinmilic imonextiliniymes pa panulosquiaya ca yoje itenco (analo) in al huejcalan. <sup>19</sup> Huan hualac capa Jesús se ilamaxtini in judíos inminlajtol lajcuiluli hual quineltocalo in judíos. Quilic:

—Lamaxtini, nimitztocas ca capic yes tías, nicnequi nimochías se momonextilini tehual.

<sup>20</sup> Huan Jesús quilic:

—Quipialo in zorras inmincojcoyunqui capa chantilo. Quipialo in tutomes capa mosehuilo. Ma yoje, nehual ilacal in cielo amo nicpía capa noyaxca pan lalticpan, huan yoje yes ca tel sinda tichtocas.

<sup>21</sup> Huan oc se imonextilini quilic:

—Tata, xichmacahuilti pa nel nías pa niclaltocas notajtzin. Cuaquín nimitztocas.

<sup>22</sup> Huan Jesús quilic:

—Xichtoca pa timochías nomonextilini. Oc sequin amo quitalo pampa unca len hué quinami Dios huelitía. Yehuanten quinami micticate pa inminyolo. Ma quinlaltocacan yehuanten innojen mijquimes.

*Jesús quinsehuía in ijyecal huan in al huejcalan hual majcoquiaya*

*(Mr. 4:35-41; Lc. 8:22-25)*

<sup>23</sup> Cuaquín calaquic se barco huan quitocaje imonextiliniymes. <sup>24</sup> Nejnentiyahuiaya in barco pa al, huan jan ajnaxcan hualajtiquisac je ijyecal chicahuac ca quiahuil pan in al huejcalan. Majcoctataya in al huan ca nadita yahuiaya moijsima in barco ca in al hual calaquiyaya lajtíc pin barco. Ma yoje, coxtataya Jesús. <sup>25</sup> Pampín uyajtiquisaje ca yihual imonextiliniymes, quejxiltije, quilije:

—¡Tata! ¡Xitechquixtili pa topolehuilisli! ¡Tialo timoatoctilo!

<sup>26</sup> Huan quinmilic:

—¿Leca anmomajtía? ¿Amo anquipía san se nadita laneltocalisli ca nehual?

Cuaquinon moquetzac huan quinmilic chicahuac in ijyecal huan in al hué pa mosehúisi huan mosehúije jan ajnaxcan. <sup>27</sup> Huan moitaje ca lamajtilisli in lacames, quijtuje:

—¿Len lacal inon? ¡Quineltocalo in ijyecal huan in al huejcalan!

*Jesús quinpajtía ome lacames hual quinpialoaya míac ijyecames ej'elehuis*

*(Mr. 5:1-20; Lc. 8:26-39)*

<sup>28</sup> Huan ajsije ca yoje itenco (analco) capa cataya inminlali yehuanten itocaloaya gadaratecos. Nepa pin lali quinamiquije ome lacames hual quinpialoaya ijyecames amo cuajcuali hual amo mocahualoaya pa quinmanalosquiaya. Quisaloaya in omenten capa quinlalpachulo mijquimes, cataloaya niman ej'elehuis. Pampín moxtin momajtije pa panusquiaya ca umpic. <sup>29</sup> Huan jan axcan tzajtziye chicahuac, quilije:

—¡Jesús, tehual Dios ixolol! ¿Len ticpía pa tiquitas ca tehuanten? ¿Tihualac ca níc pa titechcocoltisquiaya? ¡Ayamo ajsic in tonali pa ticayasi lacocoltili!

<sup>30</sup> Huejquita capa yehuanten moitilije míac cuchis (coyamimes) lacuajtine-miloaya. <sup>31</sup> Yoje in ijyecames quilajlanije Jesús ca mochi inminyolo, quilije:

—Sinda titechtojoquillis, xitechmacahuilti pa ticalaquisi lajtíc innojen míac coyamimes.

<sup>32</sup> Huan Jesús quinmilic:

—Xiquisacan pa lajtíc innojen lacames huan xiacan.

Cuaquín quisaje pa lajtíc yehuanten, calactiaje pa innojen coyamimes lajtíc. Huan ¡xiquitacan! Mochi in coyamilera molalujtiquisaje pa se temuán (temuayan) huan molasaje pin al huejcalan, moatoctije.

<sup>33</sup> Huan yehuanten hual quinlachililoaya in coyamilera choluje. Uyaje pa in caltilan, quinpuhuilije mochi in hual quinpanuc in omenten hual in ijyecames amo cuajcuali quinmananijme. <sup>34</sup> Huan quisaje moxtin yehuanten pin caltilan pa monamiquilosquiaya ca Jesús. Nepa quitaje huan quitemachije ca mochi inminyolo pa quisasquiaya pa inminlali.

## 9

*Jesús quipajtía se lacal amo huil molinic*

*(Mr. 2:1-12; Lc. 5:17-26)*

<sup>1</sup> Cuaquín calaquic Jesús pan in barco, quipanajtíac in al huejcalan, ajsic pa icali yihual. <sup>2</sup> Huan quita, sequin lacames quihualiquilije se local cocoxquil, amo huil moliniaya. Quimantihualaje lastataya pan len quinami lapipixtiloni. Huan Jesús quitac quinami quineltoaloaya pampa yihual huil quipajtic in local. Yoje, quilic in local hual amo huil moliniaya, quilic:

—Amo ximomajti, Nito, nicpujpuá molaijlaculisli.

<sup>3</sup> Huan xiquita, sequin ilamaxtinijmes inminlajtol in judíos hual quinnex-tilía quinami quimolancuacuetzililo Dios quiqtuje laijtic yehuanten inminy-olo:

—In local quihuejuecaltitica Dios. Mochía quinami Dios pampa quiqtúa inon.

<sup>4</sup> Jesús quimatic len quiqtuloaya laijtic inminyolo huan quinmilic:

—¿Pa len anquijutica in amo cuali laijtic anmoyolo? <sup>5</sup> Sinda san niquilía in local pampa nicpujpuhua ilaijlaculisli, amaqui yoje quimatisquiaya sinda neli nicpía Dios ilahuelilitlisli. Ma yoje, sinda niquilía pa moquetzas pa ne-jnemis, cuaquín moxtin quimatilosquiaya pampa nicpía Dios ilahuelilitlisli sinda in local moquetzasquiaya huan nejnemisquiaya. <sup>6</sup> Yoje, axan anyahui anquimati pampa nehual ilocal in cielo nicpía lahuelilitlisli pan lalticpan pa nicpujpuhuilis se ilaijlaculisli.

Cuaquín mocuepac quitac Jesús in local hual amo huil moliniaya, quilic:

—Ximoquetza, xicana molapipixtiloni huan xía pa mochan.

<sup>7</sup> Cuaquín moquetzac huan uyac pa ichan. <sup>8</sup> Huan quiman quitaje inon in lalalera, momajtije huan quiqtuje lajtomes huejué pa Dios hual quinmacac lacames lahuelilitlisli hué quinami in hual quiptiaya Jesús.

### *Jesús quinotza Mateo*

*(Mr. 2:13-17; Lc. 5:27-32)*

<sup>9</sup> Cuaquín yajtíac Jesús pa iojli in caltilan capa cataya, quitac se local motocaya Mateo. Molaliaya tequipanujtataya pin cali capa laxlahuiloaya ilapixcalisli tomin pa in lahuelilitlisli romano. Jesús quilic:

—Xichtoca pa timochías nomonextilini.

Huan moquetzac Mateo, quitocac.

<sup>10</sup> Cataya se tonali molalijtataya Jesús pin cali pa lacuas, huan quita, hualaje huan molalije ca yihual huan imonextilinijmes míac lacames hual cantiahuiloaya ilapixcalisli tomin pa in lahuelilitlisli romano. Noje hualaje míac judíos hual amo quineltoaloaya cuali in lajtol hual quiqtúa quinami monequi pa quimolancuacuetzilisi Dios in judíos. <sup>11</sup> Quiman quitaje inon yehuanten hual quineltoaloaya inminlamaxtilisli in fariseos, quinmilije Jesús imonextilinijmes:

—¿Leca lacua anmolamaxtini ca yehuanten hual techanililo ilapixcalisli tomin huan ca yehuanten hual amo quineltoalo cuali in lajtol hual tech-nextilía quinami ticmolancuacuetzililo Dios?

<sup>12</sup> Quiman quicaquic Jesús inon, quinmilic:

—Yehuanten hual amo cate cocoxqui amo quinequilo lapajtini. Quema, quinequilo lapajtini pa quinpalehuis yehuanten hual cate cocoxqui. Huan jan yoje cate yehuanten hual quiqtulo laijtic inminyolo pampa amo cate laijlaculi. Amo quinequilo pa niquinpalehuis. Cate quinami lacames hual quiqtulo pampa amo cocoxqui. Amo quinequilo pa quinpalehuis se lapajtini. Huan lacames hual laijlaculi cate quinami yehuanten hual cocoxqui, quinequilo pa niquinpalehuis. <sup>13</sup> Ma yoje, amhuanten, xiacan ximonex-tilican len quinequi quiqtúa Dios quiman quiqtúa: “Nicnequi pa quimatisi laicnilisi yehuanten hual nechneltoalo. Amo nicnequi pa jan nechlalilisi

huendis nolaixpan san.” Nehual nihualaya pa niquinnotzas in lacames laijlaculi pa quipalasi inminyolo pa pehuasi laijnamiquisi quinami Dios laijnamiquí. Amo nihualaya pa niquinnotzas yehuanten hual pa inminyolo amo cate laijlaculi.

*¿Leca amo mosahualo imonextilinjmes Jesús?*

*(Mr. 2:18-22; Lc. 5:33-39)*

<sup>14</sup> Cuaquinon hualaje capa Jesús in lacames hual quitocaloaya Juan Lacuayatequini, quilije:

—¿Leca timosahualo míac tehuanten huan yehuanten hual quitocalo inminlamaxtilisli in fariseos? Tehual momonextilinjmes amo quiman mosahualo.

<sup>15</sup> Huan Jesús quinmilic:

—Amo huil mosahualo ilasojlimes se lalac hual monamictía quiman cate ca yihual. Huan nehual niunca quinami in lalac hual monamictía. Ma yoje, ajsisi tonalijmes quiman quinquixtilisli in lalac hual monamictía hual nel niunca quinami yihual. Quinquixtilisli ilasojlimes, huan cuaquín yehuanten mosahuasi.

<sup>16</sup> 'Amaqui quilalía se tzotzomajli yancuic pan se tzotzomajli hual unca cacaxlito pa quitzomas ca in yancuic, pampa in tzotzomajli yancuic hual quilalía ipan mocololúa huan quitzayana in tzotzomajli hual cacaxlito.

<sup>17</sup> Huan lacames amo quiman quilalilo iayo uva yancuic pa cuilaxlimes hual cate cacaxli. Sinda yoje quichihualo, xopunis in cuilaxlimes, tzayanisi huan toyahuis iayo uva huan moijlacusi in cuilaxlimes. Quilalilo iayo uva yancuic pa cuilaxlimes yajyancuic, huan iayo uva huan in cuilaxlimes amo moijlaculo. Huan jan yoje nolamaxtilisli yancuic amo moajxiltía cuali ca in lamaxtilisli hual mochi ichicahualisli umpa quicahuac. Yoje unca inminlamaxtilisli in fariseos.

*Se sihual quimatoca Jesús inahuas huan pajtía huan Jesús quiyuliltía oc sejpa ixolol sihual Jairo*

*(Mr. 5:21-43; Lc. 8:40-56)*

<sup>18</sup> Ayamo laquisac quinmilic Jesús innojen lajtomes, huan xiquita, hualac se ipiscal in tiopan, quimolancuacuetzilizic, quilic:

—Noxól sihual san quipía nadita lamic polehuic. Ma yoje xihuala xiclalili moma ipan huan yulis oc sejpa.

<sup>19</sup> Cuaquín moquetzac Jesús, pehuac quitocac, huan noje quitocaje imonextilinjmes. <sup>20</sup> Huan xiquita, hualac itepotzcon Jesús se sihual, ajsiti-hualaya pa Jesús pampa quiniac doce xixihuil cataya cocoxquil ca esli hual quisaya pa icuerpo. Quimatocac ilatemijmiluli Jesús inahuas. <sup>21</sup> Quimatocac pampa quijutataya lajtic yihual: “Sinda jan nicmatocas inahuas, yoje nipahtis.” <sup>22</sup> Huan momalinac Jesús huan quitac in sihual, quilic:

—Xicaya ca paquilisli, Tuinon. Tipajtic pampa tilaneltocac.

Huan in sihual mochi pajtic jan ajnaxcan.

<sup>23</sup> Cuaquín ajsic Jesús, calaquic calijtic ichan ipiscal in tiopan. Quinmitac in latzotzonanijmes huan in lalalera xahuantataloaya. <sup>24</sup> Huan quinmilic:

—Ximohuicacan, pampa amo polehuic in xól, jan coxtica san.

Yehuanten quihuitzquilije. <sup>25</sup> Ma yoje Jesús quinquixtic in lalalera, calaquic, quiquitzquic ima in xolol sihual huan yihual yulic oc sejpa.

<sup>26</sup> Cuaquín mosemanac ilamachiltisli in hual quipanuc in xolol sihual, huan yoje quimatic moxtin pa mochi in lali itenco.

*Jesús quinpajtía ome pachacames*

<sup>27</sup> Quisac umpa Jesús, quitocaje ome pachacames, quitzajtzilijtataloaya, quililoaya:

—Tehual David imiahuil, ¡xitechicnili!

<sup>28</sup> Huan quiman calaquic calijtic, hualaje capa yihual in pachacames, huan Jesús quinmilic:

—¿Anquineltoqa pampa nehual huil annimijchihuilía in hual annechtemachijtica?

Quilije:

—Quema, Tata.

<sup>29</sup> Cuaquinon quinmatoquilic inmixtololojmes, quinmilijtataya:

—Quinami anquineltoqa, yoje ma ye pa amhuanten.

<sup>30</sup> Yoje pajtije inmixtololojmes, huil lachialoaya. Huan Jesús quinmilic chicahuac:

—Amo xiquilican inon amaqui.

<sup>31</sup> Ma yoje, yehuanten, quiman quisaje, quimachilitinemiloaya in hual quinchihuilic Jesús. Lamachilitoaya pa mochi in lali hual cataya itenco nepa.

### *Jesús quipajtía se hual amo huil lajtuaya*

<sup>32</sup> Quiman quistataloaya in lacames hual axan huil lachialoaya, quihualiquilije Jesús oc sequin lacames se lalac hual amo huil lajtuaya. Se ijyecal elehuis quijlacuhuaya ilajtol, amo quimacahuiltiaya pa lajtusquiaya.

<sup>33</sup> Huan quiman Jesús quiquixtilic in ijyecal in lalac, cuaquinon huil lajtuaya. Yoje moitaloaya ca lamajtilisli in lacames, quililoaya:

—Amo quiman panuje lachihualisli quinami innojen pin tolali Israel.

<sup>34</sup> Ma yoje, yehuanten hual quineltoaloaya inminlamaxtilisli in fariseos quijtutinemiloaya:

—Yihual quinquixtilía in ijyecames pan ipampa ilapalehuilic Satanás hual huelitía ca in ijyecames amo cuajcuali.

### *Jesús quinmicnília in lalacalera*

<sup>35</sup> Huan Jesús yajtinemiaya pa mochi caltilan huejué huan mochi caltilan tijtipichin. Lamaxtitataya pa inmintiopajmes huan quimachilitataya in lamachilitisli cuali pa quimatilosquiaya quinami Dios huelitía. Huan noje yajtiahuiaya quinpajtitataya moxtín hual quipialoaya cocolisli huan len yes hual quincocojotataya. <sup>36</sup> Huan quiman quinmitaya in lacames, nesiloaya siajtataloaya pampa quipialoaya míac cocolisli huan lastataloaya pan lali pampa niman siahuiloaya. Huan quinmicniliaya Jesús niman míac pampa cataloaya quinami borregos hual amo quipialoaya aqui quinlachilisquiaya. Quema, nesiloaya quinami lacames hual amo huil canaloaya len mon-equiaya pa quipialosquiaya. <sup>37</sup> Cuaquinon Jesús quinmilic yehuanten hual quinmaxtiaya, quinmilic:

—Cate míac pin lalticpan hual quinequilosquiaya monechiculo capa Dios huelitía. Yehuanten cate quinami se lapixcalisli hué capa amo cate míac tequipanujquimes pa lapixcasi. <sup>38</sup> Dios Yihual iteco in lapixcalisli. Xictemachican Dios pa quintilanis lapixcanijmes pa quinnechicusi yehuanten pa in lapixcalisli, niqijjutica yehuanten hual quinequisi yesi lanechiculi capa Dios huelitía.



## 10

*Jesús quinlajtultía in doce (majlaclihuanome) lacames pa yesi ilanahuatini-jmes*

(Mr. 3:13-19; Lc. 6:12-16)

<sup>1</sup> Huan quinnotzac Jesús pa hualalosquiaya capa yihual doce imonextilinjmes, quinmacac lahuelilitlisli pa quinquixtilisi iyecames amo cuajcuali in lacames. Quinmacac lahuelilitlisli pa quinpañtililosquiaya len yes cocolisli huan len yes hual quincocoltiaya yehuanten.

<sup>2</sup> Huan nican unca quinami motocaloaya in doce ilanahuatinijmes: Pehua ca in se hual motocaya Simón hual unca Pedro, oc se motocaya Andrés, yihual icni Pedro. Cuaquinon cataya se motocaya Jacobo ixolol Zebedeo huan oc se motocaya Juan, yihual icni Jacobo. <sup>3</sup> Cuaquinon cataloaya Felipe huan Bartolomé huan Tomás huan Mateo. Yihual Mateo yec se hual la'anilini ilapixcalisli tomin pa in lahuelilitlisli romano. Huan cataya Jacobo ixolol Alfeo, cataya Lebeo hual noje motocaya Tadeo, <sup>4</sup> cataya Simón hual catani ca in cananistas hual quinequiloaya huelitilo pa Israel, huan cataya Judas Iscariote hual quitemacac Jesús pa yehuanten hual yahuiloya quimictilo.

*Jesús quintilanía ilanahuatinijmes pa lamachiltinemisi*

(Mr. 6:7-13; Lc. 9:1-6)

<sup>5</sup> Innojen doce lacames Jesús quintilanic quinami ilanahuatinijmes. Quinpehualtilic inmintequipanulisli quinmilijtica:

—Amo xiacan capa chantilo yehuanten hual amo judíos. Huan amo xicalaquican pa se inmincaltlan samaritecos. <sup>6</sup> San nicnequi pa anyas capa cate yehuanten pa ilali Israel, in judíos hual monequi pa yesi laquixtili pin polehuilisli ca capic quihuica inminlajlaculisli. Yehuanten cate quinami borregos mopolujticate. <sup>7</sup> Xilamachiltitiacan capa yes anyajtía, xiquinmilican: “Ajsitihuala in tonali quiman Dios lanextilis pampa yihual huelitía”, xiquinmilican. <sup>8</sup> Xiquinpañtitiacan in cocoxquimes, xiquinyuliltitiacan in mijquimes, xiquinpañtitiacan yehuanten hual mococolo ca in cocolisli lepra, xiquinpañtitiacan yehuanten hual iyecames amo cuajcuali quincocoltiticate. Annimitzmaca in lahuelilitlisli pa anquichías mochi inon, huan amo annimitzlañlaniaya laxlahuilisli nindeno. Pampín ma camo anmitzlañlahuican nindeno yehuanten hual anquinpalehuis.

<sup>9</sup> Xiacan jan quinami anunca axan, amo xihuejcahuacan anquichixtica pa huil ancanas tomin pa anquihuicas. <sup>10</sup> Amo xiquinhuicacan anmoxotopajmes, xicuicacan jan se cotón mochi sejse ca amhuanten, xiquinhuicacan san ome anmolacsames, huan amo xiquihuicacan se cuál pa anmopalehuis quiman annejnemi. Amo monequi pa anquinpiás innojen. Anmitzmacasi len anquinequi capa yes anajsis, pampa se tequipanujquil monotza pa canas inon hual quicua.

<sup>11</sup> Huan quiman ancalaquis calía yes caltilan hué o caltilan tipichin, xilajlanican sinda unca se nepa hual moxtin lachialo ca lasojlalisli, hual quinequis pa anmitzmosehuiltis pa ichan. Quiman anquimati aqui yes anmitzmosehuiltis, cuaquín xiacan pa ichan nepa. Ximocahuacan pa anchantis nepa mochi tonalijmes hual anunca pa in caltilan. <sup>12</sup> Huan quiman ancalaquis se cali calijtic, xiquinpialtican yehuanten hual nepa chantilo. <sup>13</sup> Sinda yehuanten pa in cali quinequisi anmitzmosehuiltis amhuanten huan quineqtocasi anmolamachiltisli, cuaquín ma mocahua ca yehuanten anmosehuilisli calica anquinpialtic. Huan sinda yehuanten pa in cali

amo quinequis anmitzmoheuiltisi amhuanten huan amo quineltocasi anmolamachiltisli, cuaquín ma mocuepa pa amhuanten anmomosehuilisi calica anquinpaltic yehuanten. Yoje huil anquinmacas oc sequin anmomosehuilisi. <sup>14</sup> Huan aqui yes amo quinequis anmitzmoheuiltisi huan amo quinequis quicaquis anmolamachiltisli, cuaquín quiman anquisas pa in cali o in caltilan, xiquintzejzeluican capa yehuanten in lalmoluncal hual salijtica pa anmolacsames. In yes lanextilisli pa yehuanten. Yoje quimatisi pampa Dios quinmita quinami lacames hual amo quinequilo quineltocalo ilamachiltisli. Pampín Dios amo quinmanilis pa yesi ilacames. <sup>15</sup> Annimitzilia neli pampa yehuanten hual chantilo pa in caltilan panusi míac lacocoltilisli. Yehuanten hual chantinijme pin caltilan hué itocani Sodoma huan pin caltilan Gomorra, amo panusi yoje míac lacocoltilisli pan tonali quiman quinmotexpahuilis Dios yehuanten hual chantilo pin lalticpan hual amo quineltocalo.

### *Jesús quinmilía quinami quintojtocasi ilanahuatinijmes*

<sup>16</sup> ¡Xiquitacan! Nehual annimitztilantica, huan amhuanten lacames hual amo huil anmonapatía. Anunca quinami borregos hual in coyomes quinyahualujticate pa quinmictisi. Pampín, xiyén (xiyecan) lacames hual quimatilo motzacuililo pa camo mocahuasi capa lacames hual cate quinami in coyomes hual anmijchiuilisi len amo cuali. Quema, xiyén quinami in cuhuames hual quimatilo moixcuelo pa moquixtisi pin miqulisli. Noje xiyén quinami in huilomes hual amo quiman quichihuillosquiaya amaqui len amo cuali. <sup>17</sup> Ma yoje, ximolachilican pampa lacames molalisi anmopan. Anmitztemacasi ca in la'ajuanijmes pa anmitzljalanisi chichahuac. Anmitzhuitequis pa inmintiopajmes. <sup>18</sup> Anmijchiuilisi inon pampa annecheltoca. Noje pampa inon anmitzhuilanasi inminlaixpan hueyenten huan lacames niman hué hual huelitilo. Quiman anunca inminyampa yehuanten anquinlaquetzilis pa quicaquis nolamaxtilisli. Huan inminyampa yehuante hual amo judíos anquinlaquetzilis pa quicaquis nolamaxtilisli. <sup>19</sup> Huan quiman anmitztemacasi pa anmitzljalanisi in la'ajuanijmes, cuaquín amo ximomajtican pampa amo anquimati quinami anlananquilis huan ca len lajtol anquijtus, pampa Dios anmitzmacas jan ajnaxcan lajtomes hual anquinmilis. <sup>20</sup> Amo cayas amhuanten hual anlajtus. Cayas iEspiritu anmoTajtzin pin cielo hual lajtúa pan anmopampa.

<sup>21</sup> Se lalac quitemacas icni pa quimictisi, pampa icni necheltoca. Pampa inon noje itajtzin se xól quitemacas ixól pa quimictisi pampa ixól necheltoca. Huan in xolomes molalisi inminpan inmintajtzitzián huan inminnantzitzian, huan in xolomes latilani pa quinmictisi. <sup>22</sup> Huan moxtin lacames anmitzcocolisi pampa anmotocayaltis ca notoca. Ma yoje, aqui yes mopepenialtis pa mochicahualtis pa panus innojen pa mochi tonalijmes hual huejcahuas huan mojmosta yultía necheltocatica, cuaquín yihual cayas laquixtili capa unca pin polehuilisli. Huan quipias ichan capa Dios huelitía. <sup>23</sup> Quiman anmitztojtocalo pa se caltilan, cuaquín xicholucan pa anajsis pa oc se caltilan. Yoje anpanujtinemis pa mochi caltilan pin lali Israel, anquinmijtica Dios ilamachiltisli cuali. Ma yoje, annimitzilia neli, ayamo anlaquisas anpanujtinemis pa mochi innojen caltilan quiman nehual ilalac in cielo nihualas oc sepa.

<sup>24</sup> Se monextilini amo ajsis yes hué sinda ilamaxtini amo unca yoje hué. Huan se tequipanujquil amo ajsis yes hué sinda amo unca yoje hué iteco.

<sup>25</sup> Ma mocahua ca paquilisli se monextilini sinda ajsis yes jan quinami

ilamaxtini. Noje ma mocahua ca paquilisli se tequipanujquil sinda ajsis yes jan quinami iteco. Nel nechtcayaltilo Beelzebul (in itoca inminteco in iyecames amo cuajcuali, yihual in lili). Sinda nechtcayaltilo Beelzebul, cuaquín neli hual quintocayaltilo niman tetzcuinuc amhuanten hual anchanti ca nehual.

*Jesús quinmilía aqui yihual hual monequi pa timomajtisi*  
(Lc. 12:2-7)

<sup>26</sup> Ma yoje, amo ximomajtican inminpampa yehuanten, pampa len yes amo cuali hual anmijchihuililo, Dios quimati, huan moxtin pin lalticpan quimatisi. Amo unca nindeno lalatali hual amo moitas, huan amo unca nindeno hual amo quimatilo hual amo yes lamachiltili. <sup>27</sup> Yoje, len annimitzilis quiman ticate tohuían, inon xiquinlaquetzilian inminyampa in oc sequin lacames. Quema, len yes anquicaquis annimitzilis nel ixtacayito, inon xiquinmachiltitinemican moxtin pa yoje huil quimatisi pa mochi lalticpan. <sup>28</sup> Amo ximomajtican pampa yehuanten huil quimictilo se icuerpo huan ma yoje amo huil quimictilo se iyulilislí. Monequi pa anmomajtisi niman míac ilaixpan Dios hual huil quijlacúa se icuerpo huan iyulilislí capa amo mocahuas pa quincocoltis yehuanten hual amo quineltocalo. In unca in coyunquil capa chichinahuia.

<sup>29</sup> Anquimati pampa jan quilaxlahuilo se naditita san pa ome tutotzitzindis. Huan mas que amo ipatilo, ma yoje amo unca se capa yehuanten hual huetzis pan lalí huan míquis sinda amo quimacahuiltis anmoTajtzin pin cielo. <sup>30</sup> Huan amhuanten anmitzpuhuilía Dios mochi in tzondis pa anmotzontecon. <sup>31</sup> Pampín, amo ximomajtican. Dios anmitzita quinami anmonotza niman míac. Amo yoje míac monotzalo míac tutotzitzindis.

*Yehuanten hual quineltocalo huan quinmililo oc sequin pampa quineltocalo*

(Lc. 12:8-9)

<sup>32</sup> Aquí yes hual quijtus neli inminyampa lacames pampa yihual nechneltoaca, cuaquín nehual noje niquijtus iyampa noTajtzin hual unca pin cielo pampa nehual niquiximati in se. <sup>33</sup> Ma yoje, aquí yes quijtus inminyampa lacames pampa amo nechneltoaca, cuaquín nehual noje niquijtus iyampa noTajtzin hual unca pin cielo pampa in se amo unca noyaxca.

*Jesús quijtúa pampa lacames amo cayasi jan sejpa ipampa ilamaxtilisli*  
(Lc. 12:51-53; 14:26-27)

<sup>34</sup> Amo xiquijttucan laijtic amhuanten pampa quiman nel nihualaya pan lalticpan yahuiaya caya mosehuilislí pan lalticpan pan nopampa. Amo nihualaya pa nicchías mosehuilislí. Amo nicualcatihualaya mosehuilislí, pampa pan nehual nopampa yehuanten hual amo nechneltoocalo majcoquisi pa moanasi. <sup>35</sup> Quema, nihualaya pa nicchihuilis pa se lalacal yes lacocolini ca itajtzin, in xól síhual pa yes lacocolini ca inantzin huan isihua ixól pa yes lacocolini ca inantzin ilahuical. <sup>36</sup> Yoje, se lalacal ilacocolinijmes yesi yehuanten hual chantilo ca yihual pa se cali. <sup>37</sup> Se lalacal quinlasojlas itajtzin huan inantzin. Ma yoje, monequi pa nechlasojlas nel niman míac, amo san yoje quinami quinlasojlas itajtzin huan inantzin. Sinda amo yoje, cuaquín amo monotza pa yes nomonextilini. Huan se lalacal neli quilasojlas ixól lalacal huan ixól síhual. Ma yoje, monequi pa nechlasojlas niman míac, amo san yoje quinami quinlasojlas yehuanten. Sinda amo yoje, amo monotza pa yes nomonextilini. <sup>38</sup> Huan aquí yes amo quineltocas nolamaxtilislí amo monotza pa yes nomonextilini. Huan aquí yes amo quinequis mopepenialtis

pa mochicahuaitis pa panus mochi lacocoltilisli hual Dios quimacahuiltía pa panus, cuaquín yihual amo monotza pa yes nomonextilini. Quema, quipías pa mochicahuaitis pa panus in hual quicocoltía mas que cuajnesi Dios quimacahuiltis pa miquis pan se cuahuil quinami nel. <sup>39</sup> Aquí yes quinequi niman míac pa yultías pan laticpan huan amo san yoje quinequi quineltoca Dios, cuaquín yihual amo quiman yulis capa Dios. Huan sinda Dios quinequi pa se quipolus iyulilislí pa yoje Dios canas lahueyilislí pampa inon, huan sinda in se amo motzacuilis pa miquis yoje, cuaquín yihual quipías yulilislí capa unca Dios.

*Jesús quijtúa pampa ilacames quipiasí laxlahuilislí*  
(Mr. 9:41)

<sup>40</sup> Aquí yes anmitzitas quinami ilasojlimes huan anmitzixtocas pampa anquipía nolamaxtilislí, cuaquín yihual noje nechiztica nel quinami ilasojli pampa quixtoca nolamaxtilislí. Huan aquí yes nechiztica quinami ilasojli noje quiztica quinami ilasojli yihual hual nechtilanic. <sup>41</sup> Aquí yes quitas quinami se ilasojli se ilajtuni Dios jan pampa unca Dios ilajtuni, cuaquín Dios quimacas in laxlahuilislí hual yes quinami inon hual canas Dios ilajtuni. Huan aquí quitas quinami ilasojli se lalac hual amo mocahua pa yultías quinami Dios quinequi pa yulis, huan quitas quinami ilasojli jan pampa yuli quinami Dios quinequi pa yulis, cuaquinon Dios quimacas yihual se laxlahuilislí jan quinami in laxlahuilislí hual canas in lalac hual yultía quinami Dios quinequi pa yulis. <sup>42</sup> Cuajnesi cayas se hual quichihuilis se nomonextilini niman tipichin jan len lachihualislí tipichin. Cuajnesi jan quimacas se tecomal al iztíc san, huan jan quimacas pampa yihual hual cuni in al unca nomonextilini. Annimitzilía neli, yihual neli quipías ilaxlahuilislí.

## 11

*Juan quintilanía lacames pa quilajlanisi Jesús*  
(Lc. 7:18-35)

<sup>1</sup> Quiman laquisac quintilanic Jesús in doce imonextiliniymes, uyac yihual cajcapa pa lamaxtis huan pa lamachiltis pa inmincaltilan huejué yehuanten pin laticpan Galilea.

<sup>2</sup> Huan cataya latzacuali calijtic Juan Lacuayatequini. Nepa yihual quimachiltilije in hual quichijtataya Cristo. Pampín quintilanic Juan ome imonextiliniymes pa yehuanten quilajlanilosquiaya Cristo pa yoje yihual Juan quimatisquiaya mochi inahuac yihual. <sup>3</sup> Huan imonextiliniymes quilije:

—Juan Lacuayatequini quinnotzaya quinmilijtataya lacames pampa Dios yahuiaya quitilani se pan laticpan. Axan quinequi quimati Juan sinda tehual tiunca in se. Sinda amo, cuaquín quinequi quimati da monequi pa techiasí pa hualas oc se.

<sup>4</sup> Jesús quinnanquiloc:

—Xiacan huan ximachiltican Juan oc sejpa innojen hual anquinmiztica huan anquincactica. <sup>5</sup> Anquita huan anquicaqui quinami lachialo in pachacames. Nejnemilo yehuanten hual amo huil nejnemiloaya. Pajtilo yehuanten hual quipialo in cocolislí lepra, huan lacaquilo in panatames. Yulilo oc sejpa yehuanten hual miquije. Huan yehuanten hual amo quipialo nindeno quicaquilo in lamachiltislí cuali pampa axan quinlamachiltiticate. <sup>6</sup> Huan yulis ca míac paquilislí yihual aquí yes amo mocahuas pa quixtocas pa iyolo huan quineltocas in hual nicmaxtía.

<sup>7</sup> Cuaquín, quiman mohuicaloaya in omenten imonextiliniymes Juan, Cristo pehuac quinlaquetziliz in miac lalalera inahuac Juan, quinmilic:

—In tonalijmes hual anyahuini ca capic amaqui chantiaya pa anquicaquis huan anquitas Juan, ¿quinami len lalal anquijtuaya pampa anyahuiaya anquita? ¿Anquijtuaya pampa in Juan yesquiaya quinami lalal hual quipala in hual quijtúa quinami quihuixujtica se lajtol pa oc se lajtol, quinami se acal hual in ijyecal quihuixúa? No, yíal Juan amo lalal quinami inon.

<sup>8</sup> Cuaquinon, ¿quinami len lalal anquijtuaya pampa anyahuiaya anquita? ¿Anquijtuaya pampa Juan yesquiaya lalal hual molaquentiaya ca tzotzomajli cualtichin? No, yíal amo lalal quinami inon. Xiquitacan, yehuanten hual molaquentilo ca tzotzomajli cualtichin chantilo pa inminalimes cuajcualtichin in huejueyenten. <sup>9</sup> Axan, ¿pa len anyahuini ca umpic pa anquitasquiaya? ¿Anyahuini pa anquitasquiaya se ilajtuni Dios? Quema, annimitzilía yihual se ilajtuni Dios. Huan annimitzilía yihual amo unca jan Dios ilajtuni san. <sup>10</sup> Noje yihual unca in se hual aqui lajtúa Dios pan ipampa ilajtol lajcuiluli capa quijtúa, quil:

Xiquitacan, nictilantica nolanahuatini pa anmitzlaicanas, huan yihual quinnahuatilis lacames pa quimatisi pampa tihualas.

Yihual yes quinami se hual quichichías mo'ojli quiman tehual ayamo tiajsi-aya.

<sup>11</sup> Annimitzilía neli, ca moxtin hual lacatije pan lalticpan, amo quiman cataya lalal hual yec yoje hué quinami Juan Lacuayatequini. Ma yoje, Juan Lacuayatequini amo ajsi pa yes yoje hué quinami yihual hual unca in niman tipichin capa Dios huelitía.

<sup>12</sup> 'Pa innojen tonalijmes quiman Juan Lacuayatequini pehuac lamachiltic, huan pan tonalijmes hual ajsitihualaloaya pa axan, lacames hual latequihulo motolinilo pa cayasi capa Dios huelitía. <sup>13</sup> Pa in tonalijmes quiman nesc Juan lamachiltitica, cataloaya ilamaxtilisli Dios ilajtunijmes huan in lajtol hual Dios quilajcuilultic Moisés. Innojen lajtomes quijtunijme len yahuiaya panu. <sup>14</sup> Axan, sinda anquinequi anquineltoca inminlamaxtilisli, cuaquinon Juan Lacuayatequini unca in Elías hual Dios ilajtol quijtúa pampa yahuiaya huala pa anmitznexilis aqui yes in Cristo. <sup>15</sup> Aquí yes quipía inacas pa lacaquis, ma quicaqui inon ca mochi ilacaquilisli.

<sup>16</sup> 'Yehuanten hual yulticate axan amo quixtocaloaya Juan ilamaxtilisli huan amo quixtocalo nolamaxtilisli nehual. Amo unca nindeno calica mopaquiltisi. Cate quinami xolomes yehuaticate nepa pin lajcotiyan capa lanamacalo huan capa monechiculo xolomes pa mahuiltisi. Sequin xolomes quinnotzalo in oc sequin, quinmililo: <sup>17</sup> “Antimitzmahuiltilije quinami cataya monamictilisli huan amhuanten amo anquinequic anmahuiltic ca tehuanten. Huan antimitzmahuiltilije quinami cataya latzotzonalisli pa se mijquil huan amo anquinequic anmahuiltic.”

<sup>18</sup> Jesús quinmilitiác:

—Juan hualac capa amhuanten amo lacuajtataya quinami anlacua amhuanten, huan amo cunic alcohol huan iayo uva coc. Huan amhuanten anquijtúa pampa quipía se ijyecal amo cuali hual huelitía laijtic yihual. <sup>19</sup> Nehual ilalal in cielo nihualac capa lacames nilacuajtica huan nicuntica jan quinami in oc sequin, huan amhuanten anquijtúa: “Xiquitacan in lalal lacuani huan lahuanani, inminlasojli yehuanten hual anmitzanililo

ilapixcalisli tomin pa in lahuellitlisli romano. Huan noje yihual inminlasojli yehuanten hual amo quichihualo quinami monequi pa se quimolancuacuetzilis Dios, quinami quijtúa tolajtol.” Anquinami in xolomes hual amo quinequilo mahuiltilo. Ma yoje tiyulilo Juan huan nehual quinami inon pampa ticpialo Dios ilajmatilisli. Huan yehuanten hual quineltocalo tolamaxtilisli quimatilo pampa neli unca Dios ilajmatilisli calica tiyulilo. Huan yehuanten quichihualo quinami tiqinnextililo.

*Sequin caltilan capa yehuanten amo quineltocaje Jesús*  
(Lc. 10:13-15)

<sup>20</sup> Cuaquinon pehuac Jesús quinmajua yehuanten pa sequin caltilan huejué. Yehuanten cataloaya capa yihual quinchíac innojen míac lachihualisli hual lanextilije pampa Dios neli quitilanic yihual pa in lalticpan. Laquetzac yoje pampa yehuanten amo mopalaje inminyolo pa pehualosquiaya laijnamiquilo quinami Dios, quilic:

<sup>21</sup> —¡Dios anmitztilanis pa anpanus lacocoltilisli, amhuanten pa Corazín huan Betsaida! Unca pampa niquinchíac míac lachihualisli huejué capa amhuanten. Huan sinda innojen lachihualisli cataloaya lachihuali ca yehuanten hual yulinijme pa yina pa innojen caltilan huejué Tiro huan Sidón, quiplaya míac tonalijmes yehuanten mopalaloaya inminyolo pa laijnamiquilosquiaya quinami laijnamiquía Dios. Huan pa lanextilosquiaya quinami mopalaloaya inminyolo, molaquentiloaya ca tzotzomajli huahuas-tic huan molaliloaya pan tinextilan. <sup>22</sup> Noje annimitzilía pampa yehuanten pa Tiro huan Sidón Dios amo quintilanis pa panusi míac lacocoltilisli quinami anyahui anpanúa amhuanten. Anmitztilanis pa anpanus lacocoltilisli pan tonali quiman yihual quintojtocas ilaixpan yihual yehuanten pin lalticpan hual amo quineltocalo.

<sup>23</sup> Huan amhuanten pa Capernaúm, anquijtúa pampa anyahui anquichía pa anmocaltilan yes hué quinami oc sequin caltilan huejué. Ma yoje, amo yahui caya yoje. Anmocaltilan xitinis huan yajmo nesis. In quipanus pampa anunca niman elehuis, amo yoje elehuis catanijme yehuanten pa Sodoma. Sinda yehuanten pa Sodoma hual yulinijme pa yina quinmitaloaya in lachihualisli huejué hual amhuanten anquinmitac, cuaquín Sodoma mocajtihualaya axan, pampa ilacames quipalaloaya inminyolo pa pehualosquiaya lajtulo pa inminyolo quinami Dios quinequi. <sup>24</sup> Huan annimitzilía pampa yehuanten pa Sodoma Dios amo quintilanis pa panusi lacocoltilisli chicahuac quinami anpanus amhuanten pa in tonali quiman quintojtocas ilaixpan yihual moxtin pin lalticpan hual amo quineltocalo.

*Jesús quinmilía moxtin pa hualasi ca yihual pa mosehuisi*  
(Lc. 10:21-22)

<sup>25</sup> Quinami pa in tonali, Jesús laquetzac ca Dios, quilic:

—Nimijsehuía, Tata, tehual iTeco in cielo huan in lalticpan. Nimijsehuía pampa tiqintzacuilic pa como quimatisi innojen yehuanten hual quijtulo pampa quimatilo míac monahuac tehual huan ma yoje amo quimatilo. Jan quipialo in ilajmatilisli in lalticpan. Quema, tiqintzacuilic pa como quimatisi yehuanten. Ma yoje, tiqinnextilic yehuanten hual amo quipialo ilajmatilisli in lalticpan, huan cate yehuanten hual quinequilo míac pa monextilisi pan nopampa nehual. <sup>26</sup> Quema, Tata, pampa yoje tiquitac cuali pa como quimatisi len quinequi quijtúa molajtol yehuanten hual quijtulo pampa quimatilo. Huan quema, tiquitac cuali pa quimatisi len quinequi quijtúa molajtol yehuanten hual amo quimatilo.

<sup>27</sup> Cuaquinon Jesús quinmilic:

—NoTajtzin nechlalic nehual pa niquinnextilisquiaya yehuanten pin lalticpan mochi quinami yihual unca. Nehual niunca ixól huan amaqui pin lalticpan quimati quinami niunca, amo quimati pa len nihualaya pan lalticpan. Jan noTajtzin san quimati inon. Noje amaqui pan lalticpan quimati quinami unca noTajtzin, huan amo quiximati. Jan nehual hual niunca ixól nicmati mochi quinami yihual unca, huan jan nehual san niquiximati yihual. Huan yihual san quiximatis noTajtzin aqui yes nehual nicnequis nicnextilis. <sup>28</sup> Xihualacan ca nehual anmoxtin hual anmitzmacalo tequil huan anunca anlamantica ca mochi in lajtomes hual amo anmitz-palehuilo anmitzquixtililo anmolajlaculisli huan anmoicnotilisli. Quema, xihualacan ca nehual, annimitzmosehuiltis. <sup>29</sup> Ximonextilican quinami anmochías nomonextiliniymes. Yes quinami ancataya lailpili ca nehual pa yoje tiomenten quinami tilamantiasi, quinami lamantialo yulijquimes. Anmoitas ca mosehuiltisli pa anmoyulilisli pampa nehual amo nilamaxtia chichahuac. Nehual amo nilatequihuía chichahuac, jan sejpa niunca. <sup>30</sup> Xihualacan ca nehual, pampa notequipanulisli amo quiman anmitzlamilis anmochichahuailisli huan nolamaxtilisli unca quinami lamamani hual amo etic.

## 12

### *Jesús imonextiliniymes canaló trigo pan tonali chicome*

(Mr. 2:23-28; Lc. 6:1-5)

<sup>1</sup> Panuc inon, cataya pan in tonali quiman amo tequipanulo judíos, uyac Jesús panujtataya capa cataloaya in cuajmilimes ca trigo. Huan mayantataloaya imonextiliniymes. Pampín pehuaje quincepehuaje imiahuimes trigo huan quicuaje in trigo. <sup>2</sup> Quitaje inon sequin fariseos, huan quilije:

—Xiquita. Quichijtcate momonextiliniymes len amo cuali. Tolajtol hual technextilía quinami ticmolancuacuetzililo Dios amo quimacahuiltía pa quichihuasi pan tonaliymes quiman amo titequipanulo.

<sup>3</sup> Huan Jesús quinmilic:

—¿Amo quiman anmomaxtic pin iamal Dios ilajtol capa quijtúa in hual quichíac David? Mayantataloaya yihual huan yehuanten hual cataloaya ca yihual. <sup>4</sup> ¿Amo anmomaxtic quinami calaquic pin tiopan huan quicuac in pan hual quilalilo in tiopistas ilaixpan Dios? Huan in lajtol quijtúa pampa jan unca inminyaxca in tiopistas san pa quicuasi in pan. Ma yoje quicuaje David huan yehuanten hual cataloaya ca yihual. <sup>5</sup> Huan amo inon san. ¿Amo anmomaxtic pa iamal ilajtol hual anmitznextilía quinami anquimolancuacuetzilía Dios? Pan tonali siete (chicome) quiman monequi pa camo antequipanusi, ma yoje tequipanulo pin tiopan in tiopistas huan amo quipialo laijlaculisli. <sup>6</sup> Pampín, nehual annimitzilía pampa nel niunca nican huan nicpía lahuellitilisli hual amo quipialo yehuanten hual tequipanulo pin tiopan. Huan sinda ilajtol in tonali chicome amo quintzacuilía pa tequipanusi pin tiopan in tiopistas, cuaquín amo nejtzacuilía nel. <sup>7</sup> Dios quijtúa, quil: “Nicnequi niman míac pa quimatisi laicnilisi lacames. Amo yoje míac nicnequi pa nechmacasi huendis.” Sinda anquimatiaya len quinequi quijtúa Dios quiman quijtúa inon, cuaquinon amo anejsehuiaya anquinmotexpahuili yehuanten hual amo quichihualoaya nindeno amo cuali. <sup>8</sup> Nehual ilacal in cielo nicpía lahuellitilisli niman hué hual amo quipía ilajtol in tiopan. Pampín noje nicpía mochi lahuellitilisli pa niquilis len huil quichía se pan tonali quiman amo antequipanúa.



*Quipajtía Jesús se lalac imajma*  
(Mr. 3:1-6; Lc. 6:6-11)

<sup>9</sup> Huan quiman mohuicaya, calaquic pa inmintiopan capa momaxtiloaya Dios ilajtol. <sup>10</sup> Nepa quitac se lalac ca se imajma patzajquil. Quilajlanije Jesús len quijtuaya inahuac yihual, quilije:

—¿Tolajtol hual techilía quinami ticmolancuacuetzililo Dios quimacahuiltía pa quipajtis se pan tonali quiman amo titequipanulo?

Inon quilajlanije pa yoje huil quimotexpahuililosquiaya ca se laijlaculisli.

<sup>11</sup> Huan Jesús quinmilic:

—Mochi lalac ca amhuanen sinda quipiaya se borrego hual huetzic pa se coyunquil pan tonali quiman amo antequipanúa, jan axcan quiquixtiaya in borrego. <sup>12</sup> Huan se lalac monotza niman míac, amo monotza yoje míac se borrego. Pampín, quema, in lajtol quimacahuiltía pa se quichías len cuali pan tonali quiman amo antequipanúa.

<sup>13</sup> Cuaquinon Jesús quilic in lalac:

—Xicxilani momajma.

Huan quixilanic imajma in lalac huan jan ajnaxcan pajtic mochi, jan quinami in oc se imajma. <sup>14</sup> Cuaquinon quisaje yehuanten in fariseos, mon-echicuje pa molaquetzililosquiaya quinami huil quimictilosquiaya Jesús. Quinequiloaya quimictilo pampa Jesús amo quineltocaya inminlajtol hual quijtuaya quinami yehuanten quinequiloaya pa lacames quimolancuacuetzililosquiaya Dios.

*Dios ilajtunijmes pa yina quijcuiluc pampa yahuiaya huala Jesús*

<sup>15</sup> Ma yoje, quimatic Jesús inon, huan mohuicac, amo mocahuac nepa. Niman míac lacames quitocaloaya huan quinpajtic moxtin. <sup>16</sup> Huan Jesús quinmilic chichahuac pa camo quilaquetzilijtnemilosquiaya quinami yihual quinpajtiaya pa yoje amo quimatilosquiaya moxtin in hual yihual quichijtataya. <sup>17</sup> Inon Jesús quinmilic pa yoje mochiasquiaya len quijtuc Dios inahuac yihual pa yina pan ipampa ilajtuni Isaías. Yihual Isaías quijcuiluc quijtutataya pa íamal, quil:

<sup>18</sup> Xiquitacan notequipanujquil.

Niclajtultic pa yesquiaya notequipanujquil.

Niclasojla huan pa noyolo nicpía míac paquilisli ca yihual.

Niclalis noEspíritu (noIjyecal Cualí) laijtic yihual, huan yihual quihueliltis.

Huan notequipanujquil quinmachiltis yehuanten hual amo judíos quinami huil quipiasí Dios ilapujpuhualisli pa inminlaijlaculisli.

<sup>19</sup> Yihual amo mochihualtis pa lacames quicaquisi.

Yihual amo lanojnotzas chichahuac pin ojlimes capa cate in niman míac lalalera.

<sup>20</sup> Yihual quinpajtis huan quinmanas pa yesi ilacames yehuanten hual quimatilo pampa amo quipialo nindeno calica mopalehuisi.

Jan yihual notequipanujquil san huil quinpalehuía yehuanten hual quimonextililo yoje.

In lacames cate quinami acal laxamanili, quinami se icpal tomahuac hual pupucatica se nadita pan se tapalquifa pa lahuis.

Quema, lacames quinami innojen yihual notequipanujquil quinmanas pa yesi iyaxca huan yihual quinsulahuas moxtin ilacocolinijmes.

Quichías inon quiman quintojtocas ilaixpan yihual yehuanten hual amo quineltocalo huan cuaquín quilalis ilahueliltisli pan lalticpan calica quichihuilis seje jan yoje quinami quichihuilía oc se.



<sup>21</sup> Huan quiman yehuanten hual amo judíos quicaquisi itoca, quimatisi len huil quinchihuilía yehuanten.  
Pampa inon quilalasi inminlaneltocalisli ca yihual notequipanujquil.

*Quijtulo pampa Jesús quipía Satanás pa iyolo*

(Mr. 3:20-30; Lc. 11:14-23; 12:10)

<sup>22</sup> Cuaquinon quihualiquilije se hual se ijyecal amo cuali quichihualtiaya. In ijyecal quipachalcatic in lalac, noje quichihuilic pa camo huil lajtuc. Jesús quipajtic huan yoje in lalac huil lachiaya huan lajtuaya. <sup>23</sup> Moxtin moitaloaya ca lamajtilisli huan moililoaya:

—¿Cuajnesi yihual yes David imiahuil hual Dios techilic pampa yahuiaya huala pan lalticpan?

<sup>24</sup> Quiman quicaquije inon in fariseos, quilije:

—In se quinquixtilia in ijyecames amo cuajcuali hual quinchihualtiticate jan pan ipampa ilahuelilitlisli Beelzebú. Yihual Satanás hual huelitía pan mochi in ijyecames amo cuajcuali.

<sup>25</sup> Jesús quimatic len quijtutataloaya lajtic inminyolo huan quinmilic:

—Sinda se lahuelilitlisli moana ca yihual ihuían, cuaquín moijlacus in lahuelilitlisli. Huan sinda yehuanten pa se caltlan o yehuanten hual chantilo pa se cali moanalo ca yehuanten inminhuían, cuaquín yajmo yahuil huejcahualo. <sup>26</sup> Huan sinda Satanás moquixtis yihual ihuían pa capa huelititica, yihual moana ipan yihual ihuían. Yoje, yajmo huejcahuas ilahuelilitlisli sinda yoje quichías. <sup>27</sup> Huan sinda pan ipampa Beelzebú ilahuelilitlisli nehual niquinquixtilía lacames in ijyecames, cuaquín ¿pan ipampa aqui ilahuelilitlisli quinquixtililo ijyecames anmomonextilinijmes? Noje yes pan ipampa ilahuelilitlisli Beelzebú. Huan sinda amhuanten anquijtúa inon, cuaquín anmomonextilinijmes yalo anmitzmotexpahuililo, pampa anquijtitica yehuanten quinquixtililo ijyecames pan ipampa Beelzebú. <sup>28</sup> Axan, sinda nehual niquinquixtilía in ijyecames lacames pan ipampa Dios iEspíritu ilahuelilitlisli, huan yoje nicchía, cuaquinon axan hualac Dios ca amhuanten pa huelitis.

<sup>29</sup> Sinda se quinequi calaqui pa calijtic icali se lalac chicahuac pa quixtequilis len quipía, monequi pa quipehualtis quilpilitica in lalac chicahuac. Cuaquín huil quixtequilis len quipía pa icali. Huan jan yoje niunca quinami niquilpic Satanás huan ijyecames amo cuajcuali hual pan yehuanten yihual huelitía. Axan huil niquinquixtilía moxtin lacames innojen ijyecames. <sup>30</sup> Aquí yes amo unca ca se lajtulisli ca nehual, cuaquín yihual unca nolacolini. Huan aquí yes amo nechpalehuis pa niquinnechicus lacames pa yoje momacahuiltisi pa Dios huelitis pan yehuanten, cuaquín yihual quinsemana in lacames pa camo monechicus pa yesi ca nehual.

<sup>31</sup> Pampín, annimitzilía Dios quinpuphuas mochi inminlaijlaculisli hual quichihualo lacames. Ma yoje, Dios amo quiman quinpuphuas yehuanten hual quihuejuercaltico in Espíritu Santo. <sup>32</sup> Huan aquí yes quijtúa len amo cuali nonahuac nehual ilalac in cielo, Dios huil quipuphuas. Ma yoje, aquí yes quijtúa len amo cuali inahuac in Espíritu Santo, cuaquín Dios amo quiman quipuphuas pa mochi in tonalijmes huejcahuas in lalticpan, huan amo quipuphuas quiman lamis in lalticpan.

*Jesús quijtúa pampa se quiximati se cuahuil pan ipampa ilaquilyo*

(Lc. 6:43-45)

<sup>33</sup> Quiximatilo se cuahuil pan ipampa ilaquilyo. Anquijtúa se cuahuil unca cuali quiman ilaquilyo unca cuali. Anquijtúa se cuahuil amo unca cuali

sinda ilaquilyo amo unca cuali. Quiman nel niqunquixtilía in ijyecames amo cuajcuali, nicchijtica len cuali huan yoje monequi pa anquimatis pampa nel nicuali. <sup>34</sup> ¡Amhuanten Satanás ilacames! Amo anquijtúa len cuali pampa amhuanten amo anunca cuali. Lajtúa se lalac pampa in miac lajtulisli cate pa iyolo. <sup>35</sup> Se lalac cuali lajtúa pampa in miac amo cuali unca pa iyolo. Huan se lalac amo cuali lajtúa pampa in miac amo cuali unca pa iyolo. <sup>36</sup> Huan annimitzilía pampa quinmixcomacas Dios in lacames ca mochi lajtol laijlaculi hual quijtulo. Quema, pa in tonali quiman Dios quitojtocas ilaixpan yihual yehuanten pin lalticpan hual amo quineltocalo, yehuanten quimachiltisi mochi hual quichihuaje. <sup>37</sup> Dios anmitztojtocas ilaixpan yihual pampa anlajtúa elehuis. Sinda cataloaya cuajcuali anmolajtomes anmitzquixtís anmolajlaculisli huan sinda amo cuajcuali anmolajtomes, anmitzcahuilis anmolajlaculisli.

*Yehuanten hual amo cuali amo mocahualo pa quinequisi quitasi lanextilisli pin cielo*

*(Mr. 8:12; Lc. 11:29-32)*

<sup>38</sup> Cuaquinon sequin ilamaxtinijmes ilajtol hual quinnextilía quinami quimolancuacuetzililo Dios in judíos huan sequin fariseos quilije:

—Lamaxtini, ticnequilo timitzitalo ticchías len hual lanextilisli pampa neli ticpía Dios ilahueliltisli.

<sup>39</sup> Jesús quinnanquiliic:

—Yehuanten hual yulticate axan cate amo cuali huan quicajcahualo Dios. Jan lacames quinami yehuanten quitemulo pa quitasi len hual lanextilía pampa se quipía Dios ilahueliltisli. Huan Dios amo quinmacas lacames quinami innojen se lanextilisli. San quinmacas ilanextilisli Jonás, hual yec Dios ilajtuni. <sup>40</sup> Yihual Jonás cataya lajitic iyolo in michin niman hué pa ye tonalijmes huan ye layuajmes. Huan len quinami inon nechpanus nehual ilalac in cielo. Nehual nicayas lalalili lajitic in lali quiman nimiquis. Nimocahuas nepa ye tonalijmes huan ye layuajmes. <sup>41</sup> Pan tonali hual Dios quitojtocas ilaixpan yihual yehuanten hual amo quineltocalo, cuaquin moquetzasi in lacames hual yulinijme pin caltilan hué Nínive quiman Dios quinlatexpahuilis yehuanten hual yulticate axan. Huan yehuanten hual yulinijme pa Nínive quinmotexpahuilisli yehuanten hual yulticate axan. Quinmotexpahuilisli pampa yehuanten pa Nínive quipalaje inminyolo pa pehualosquiaya lajtulo pa inminyolo quinami Dios. Cataya quiman quinnotzac Jonás quinmilijtataya ilajtol Dios. Huan xiquitacan. Nican unca se niman hué. Jonás amo yec hué quinami in se. Ma yoje yehuanten hual yulticate axan amo quinequilo nechcaquilo. <sup>42</sup> Huan pan tonali hual Dios quitojtocas ilaixpan yihual yehuanten hual yulticate axan, cuaquin moquetzas in hué sihal hual yulini pin lali Sebá hual unca pin sur. Huan yihual quinmotexpahuilisli yehuanten hual yulticate axan. Quinmotexpahuilisli pampa yihual hualac niman huejca pa quicaquis nican in hué Salomón ilajmatilisli. Huan xiquitacan, unca nican se niman hué. Salomón amo yec hué quinami in se. Ma yoje amo quinequilo nechcaquilo yehuanten hual yulticate axan.

*Jesús lajtúa quinami se ijyecal amo cuali mocuepa*

*(Lc. 11:24-26)*

<sup>43</sup> Quisa se ijyecal amo cuali hual quichihualtía lajitic se lalac, cuaquin nejnentinemis pa capa unca lali huaqui. Quitemuñtinemi capa huil mosehuis, huan amo quita capa mosehuis. <sup>44</sup> Cuaquin quilia: “Nehual nimocuepas

pa nochan hual unca icuerpo in se pa capa niquisac.” Huan quiman ajsi, quita icuerpo in se axan quinami se cali capa amo unca nindenō huan unca quinami laxpanali huan lachijchihuali jan cuali. <sup>45</sup> Cuaquín yahui yihual huan quinmana oc sequin chicome ijyecames niman ej'elehuis. Yihual amo ajsic yec elehuis quinami yehuanten. Cuaquinon hualalo, calaquilo icuerpo in se huan nepa chantilo. Yoje in se capa calaquije moita niman temajquil. Amo yoje temajquil cataya quiman jan cataya se ijyecal san laijtíc icuerpo. Jan yoje quinpanus in lacames ej'elehuis hual yulticate axan.

*Jesús inantzin huan icnían: ¿Aquinoven cate?*

*(Mr. 3:31-35; Lc. 8:19-21)*

<sup>46</sup> Ayamo mocahuac quinlaquetzilizic yehuanten quiman hualaje inantzin huan icnían huan mocahuaje moquezatataloaya pa itenco in lalalera, quinecatataloaya laquetzalo ca yihual. <sup>47</sup> Cuaquinon se quilic:

—Quita. Moquezaticate pa quiahuac monantzin huan mocnían, quinecticate laquetzalo ca tehual.

<sup>48</sup> Huan Jesús quinancuilic yihual hual quilic inon, quilic:

—Ma nimtizili aquinojen yehuanten hual niqijtúa cate nonantzin huan nocnían.

<sup>49</sup> Huan quixilanic imajma ca imonextiliniymes huan quilic:

—Quita. Innojen nonantzin huan nocnían. <sup>50</sup> Aquí yes quichías len quinequi noTajtzin hual unca pin cielo, in se unca nocni lalal huan nocni sihual huan nonantzin.

## 13

*Jesús lamaxtía ca ilapuhualisli in latocani*

*(Mr. 4:1-9; Lc. 8:4-8)*

<sup>1</sup> Pa in tonali quisac Jesús pin cali huan molalic pa itenco in al huejcalan.

<sup>2</sup> Huan monechicuje capa yihual niman míac lalalera. Pampa inon lejcuc pan se barquito, molaliaya, huan mochi in míac lacames mocahuaje moquezaticate pa itenco in al huejcalan. <sup>3</sup> Huan Jesús quinlaquetzilizic míac pan ipampa sequin lapuhualisli calica quinextiliaya ilamaxtilisli. Quinmilic:

—Quisac se lalal latocani pa latocas. <sup>4</sup> Huan quiman latocatiahuiaya, sequin in latocli quixintiahuiaya pa itenco in ojlitō. Huan temujtihualaje in tutomes, quincuaaje. <sup>5</sup> Xintiahuiaya in lalal, sequin in latocli calaquije pin lali canahuac capa quipiaya tel itzindan. Jan ajnaxcan ixuaje pampa amo cataya telahuac in lali. <sup>6</sup> Quisac in tonali laixpelatataya chichahuac. Quinchichinuc in pacholimes huan huaquije pampa amo quipialoaya lalhuayojmes.

<sup>7</sup> Quixintiahuiaya sequin in latocli pin huiztilan, huan moscaltitiquisaje in huizlimes, quintzaculije in pacholimes hual ixuaje capa xiniaya in latocli.

<sup>8</sup> Cuaquinon, quixintiahuiaya oc sequin latocli pan lali cuali, huan quiman ixuaje, laquije cien pa seje latocli, ca oc sequin laquije sesenta, ca oc sequin laquije treinta pa seje latocli hual yec latocali. <sup>9</sup> Aquí yes quipía inacas pa lacaquis, ma caya jan seje pa quicaquis.

*Jesús quinmilia leca lamaxtía ca lapuhualisli*

*(Mr. 4:10-12; Lc. 8:9-10)*

<sup>10</sup> Ajsije capa yihual imonextiliniymes, quilije:

—¿Leca tiquinlaquetzilía ca lapuhualisli pa tiquinmaxtis?

Quinnanquilic:

<sup>11</sup> —Niquinlaquetzilía yoje pampa amo quimacahuiltía Dios pa yehuanten quimatisi ilajtulisli iyolo huan ilachihualisli hual quiman pehuac in lalticpan huan pa axan quinlatilic moxtin. Axan quinlamachiltitijtica jan sequin

san. Huan amhuanten anunca yehuanten hual Dios quinlamachiltilijtica ilachihualisli huan ilajtulisli hual anmitznexilis quinami yahui huelitía.

<sup>12</sup> Unca pampa aquí yes quipía lajmatilisli hual lanextilía quinami Dios huelitía, yihual yajtía quipixtica mojmosta oc se nadita in lajmatilisli. Huan aquí yes amo quipía lajmatilisli hual quinextilía quinami Dios huelitía, yoje Dios quichihuilis pa yajmo huil quimatis quinami Dios huelitía. <sup>13</sup> Pampín niqinlaquetzilía pan ipampa lapuhualisli hual quinlatililo nolamaxtilisli, pampa yehuanten, mas que huil lachía, amo quinequilo monextililo len quinequi quijtúa nel nolamaxtilisli. Huan mas que lacaquilo amo quinequilo quimatilo nolamaxtilisli. <sup>14</sup> Huan pan inminpampa yehuanten, yoje mochijtica len Dios ilajtuni Isaías quijtuc inminahuac yehuanten. Quijtuc quinami yahuiloaya yelo, quijtuc, quíil:

Mas que anlacaquí, amo anquimati len quinequi quijtúa.

Huan mas que anlachía ca anmoixtololojmes, ma yoje amo anquimatis pa anmoyolo len quinequi quijtúa.

<sup>15</sup> Unca pampa inminlajmatilisli inminyolo yehuanten yajmo quinpalehuía pa quimatisi len quinequi quijtúa.

Huan inminacajmes yajmo lacaquilo cuali pa quimatisi pa inminyolo len quinequilo quijtulo nolajtomes.

Unca quinami motzacuilijque inmixtololojmes pa yoje amo quitalosquiaya pa quimatilosquiaya.

Quema, quichihualo mochi len huil quichihualo pa yoje amo quimatisi pa inminyolo len quinequi quijtúa nolajtol.

Quichihualo yoje pa camo yelosquiaya lapatili pa inminyolo, huan pa yoje nehual amo niqinpajtilisquiaya inminlajlaculisli.

Yoje quijtuc Isaías quiman quijcuiluc ilajtol Dios.

<sup>16</sup> 'Ma yoje, ¡quinami anquipías paquilisli pampa anquita innojen hual niqinchía huan anquimati len nicnequi niqijitúa! Huan anquicaquí innojen lajtomes hual niqinmijtúa huan anquimati len quinequilo quijtulo.

<sup>17</sup> Neli annimitzilía inon. Cataniyme míac ilajtunijmes Dios huan míac oc sequin ilacames Dios hual quinequinijme míac quitalo innojen hual amhuanten anquinmiztica. Ma yoje, amo quiman quinmitaje. Quinequinijme míac quinaquilo innojen lajtomes hual amhuanten anquincactica, huan amo quiman quinaquije.

*Jesús quinmíla len quinequi quijtúa ilapuhualisli in latocani*

*(Mr. 4:13-20; Lc. 8:11-15)*

<sup>18</sup> 'Xilacaquican axan, huan annimitznexilis len quinequi quijtúa ilapuhualisli in latocani. <sup>19</sup> Quiman yes quicaquis se in lajtol hual lanextilía quinami Dios huelitía, huan amo quimati len quinequi quijtúa, cuaquín hualas in lili huan quilcahualtía in lajtol hual quicaquic. In lalac unca quinami in lali pa itenco in ojltio capa quixintiahuiaya in latocli. <sup>20</sup> Huan in lali canahuac capa quixintiahuiaya capa cataya tel itzindan, in quinami se hual quicaquí ilajtol Dios huan quineltoca ca paquilisli. <sup>21</sup> Ma yoje, yihual quinami in latocli hual amo quipía lali telahuac pampa unca tel itzindan. Amo calaquí pin lali míac, huan ca in se amo calaquí in lajtol míac laijtic iyolo. Yoje, yihual quineltoca ilajtol Dios pa se nadita. Huan quiman péa panúa len lacocutilisli pampa quineltoca ilajtol Dios, quiman quitojtocalo pampa quineltoca, cuaquín jan axcan mochahua pa quineltocas. <sup>22</sup> Huan in lali capa catá huiztilan capa quixintiahuiaya in latocli unca quinami se hual quicaquí ilajtol Dios, huan ma yoje momaca míac tequil inahuac quinami

yahui yuli pan lalticpan. Noje amo mocahua pa quijnamiquis quinami huil monechiculis míac tomin. Huan jan quinami in huizli quintzacuilia in pacholimes yajyancuic, jan yoje in se ilaijnamiquilisli quitzacuilia Dios ilajtol pa camo mocahuas laijtic iyolo. Yoje yajmo quipalehuía ilajtol Dios. <sup>23</sup> Huan in lali cuali capa quixintiahuiaya in latocli unca quinami se hual quicaqui Dios ilajtol huan quimati len quinequi quijtúa. Huan Dios ilajtol yajtía quijnamiquiltjtica míac. Quichihuilis quinami pacholi hual quilaquiltía cien ilaquilyo ca se latocli. O quichihuilis quinami pacholi hual quilaquiltía sesenta ilaquilyo ca se latocli o quinami se pacholi hual quilaquiltía treinta ilaquilyo ca se latocli. Quema, Dios quichía míac pan ipampa in se.

### *In trigo huan in latocli amo cuali*

<sup>24</sup> Quinpuhuilic oc se lapuhualisli calica yahuiaya quinnextili ilamaxtilisli, quinmilic:

—Dios huelitía yoje pan lalticpan. Unca quinami se lalac hual quitocac trigo ca latocli cuali pa icuajmili. <sup>25</sup> Huan coxtataloaya itequipanujquimes, hualac ilacocolini, quitocac latocli amo cuali ca in trigo latocali, cuaquín uyac. <sup>26</sup> Quiman ixuaje inminpacholimes in trigo huan quilalilije miahuil, noje nesije inminpacholimes in latocli amo cuali, hual nesiloaya quinami trigo huan ma yoje amo quipialoaya imiahuil trigo. <sup>27</sup> Cuaquín hualaje itequipanujquimes in teco capa yihual, quilije: “Xiquita, Tata, ¿amo tictocac latocli cuali pa mocuajmili? ¿Leca quipía in pacholimes amo cuali?” <sup>28</sup> Quinmilic: “Quichíac inon se nolacocolini.” Quilije itequipanujquimes: “¿Ticnequi pa tiasi pin cuajmili pa tiquincapunasi in pacholimes amo cuajcuali?” <sup>29</sup> Yihual quinmilic: “No, amo xicchihuacan yoje, amo sangá anquincapunasi noje inminpacholimes in trigo quiman anquincapuntica inminpacholijmes in latocli amo cuali. <sup>30</sup> Ma moscaltitiacan in omenten huan quiman ajsis in lapixcalisli, cuaquinon niqunmilis in lapixcanijmes pa pehuasi quitequisi in pacholimes amo cuajcuali. Quinmontusi huan quilpisi ca míac pa quichichinusi. Huan inminpacholimes in trigo quinmontusi huan quilpisi ca míac huan quilalisi pa nochan.”

### *Ilatocli in mostaza*

*(Mr. 4:30-32; Lc. 13:18-19)*

<sup>31</sup> Quinmilic oc se lapuhualisli calica quinnextilic ilamaxtilisli, quinmilic:

—In unca quinami panúa capa Dios huelitía. Unca quinami se lalac hual canac se ilatocli in mostaza huan quitocac pa icuajmili. <sup>32</sup> In latocli unca niman tipichin, amo yoje mochi oc sequin latoclimes hual quitocalo lacames. Ma yoje, quiman moscaltis, unca niman hué, amo yoje hué mochi in oc sequin pacholimes. Mochías hué quinami se cuahuil, huan hualalo in tutomes hual palanilo, mosehuilo pani iramas (iitzmolinquimes).

### *Ilapuhualisli in laxocoyaltili*

*(Lc. 13:20-21)*

<sup>33</sup> Quinlaquetzilic oc se lapuhualisli calica quinnextilic ilamaxtilisli, quinmilic:

—Yoje unca quinami panúa capa Dios huelitía. Unca quinami se sihual hual canac laxocoyajquil huan quilalac pa se lamachihualoni harina, huan cuaquín moteposahuac mochi in textli.

### *Jesús quinmilía in lapuhualisli pa lamaxtía*

*(Mr. 4:33-34)*

<sup>34</sup> Mochi innojen lajtomes quinmilic Jesús in míac lalacalera pan inminpampa lapuhualisli calica quinnexilic ilamaxtilisli. Quema, jan ca lapuhualisli quinami innojen Jesús quinlaquetzilic yehuanten, amo quinlaquetzilic ca oc se laquetzalisli. <sup>35</sup> Yoje quinlaquetziliaya pa mochías len Dios ilajtuni quijcuiluc, quijtuc, quil: Niclapus nocamac pa nilaquetzas pan ipampa lapuhualisli calica nilamaxtilis.

Niquinmilis innojen hual quiman nicchíac in lalticpan pa axan, amo nicmacahuiltiaya pa quimatísi lacames.

Yoje quijtúa pin amal hual quijcuiluc Dios ilajtuni.

*¿Len quinequi quijtúa ilapuhualisli in latocli amo cuali?*

<sup>36</sup> Cuaquino Jesús quinmilic in míac lacames pa mohuicalosquiaya huan yihual calaquic pa calijtic. Huan hualaje capa yihual imonextilinijmes, quilije:

—Xitechili len quinequi quijtúa ilapuhualisli molamaxtilisli in latocli amo cuali hual nesic quinami trigo mas que amo yec trigo.

<sup>37</sup> Quinnanquiloc:

—Yihual hual quixinic in latocli unca nehual ilacal in cielo. <sup>38</sup> In cuajmili pin lapuhualisli unca quinami in lalticpan. In latocli cuali unca quinami in lacames hual pan yehuanten Dios huelitijtica. Huan in latocli amo cuali hual nesi quinami trigo quiman ixua, huan ma yoje amo unca, in unca quinami yehuanten capa Satanás huelitijtica. <sup>39</sup> In lacocolini hual quixinic in latocli amo cuali unca quinami in lili Satanás. In lapixcalisli unca quinami quiman lamis in lalticpan hual axan unca. Innojen lapixcanijmes cate quinami Dios ilanahuatinijmes pin cielo. <sup>40</sup> Huan quinami yehuanten quinnechiculo inminpacholimes in latocli amo cuali huan quichichinulo pin tixuxli, inon unca quinami quiman lamis in lalticpan. <sup>41</sup> Nel ilacal in cielo niquintilanis pa temuán nolanahuatinijmes pin cielo. Huan yehuanten quinnechicusi moxtin hual cate capa Dios huelitía, moxtin hual quinmijlaculo oc sequin ilaixpan Dios. Quema, huan quinnechicusi yehuanten hual yulilo quichiticate amo cuali. <sup>42</sup> Quinlasasi ca capic panusi lacocoltilisli hual quincocoltis quinami tixuxli. Nepa choca huan lacuajcualo ca inminlames pampa quincocúa niman míac. <sup>43</sup> Cuaquín quinpanus len niman cuali Dios ilacames hual yihual quinmitas amo quipixticate laijlaculisli nindeno. Quema, Dios ilacames nesis ca mochi Dios ilaixpelalisli cualtichin capa Dios inminTajtzin huelitía. ¡Ma quicaqui inon aqui yes huil lacaqui!

*In hual cataya lalatili hual ipati niman míac*

<sup>44</sup> Dios ilahuelitilisli unca quinami len hual ipati niman míac huan unca lalatili pin se cuajmili. Quiman se lalacal quita capa unca lalalpachuli, mocuepa quilatía. Cuaquín yahui pa quinamacas mochi hual quipía pa yoje huil mocuhuilis in cuajmili. Mocuhuilis quipixtica míac paquilisli pampa quitac in hual ipati niman míac.

*Se tixcalito hual ipati niman míac*

<sup>45</sup> Noje, sinda se quinequi caya capa huelitía Dios, yihual unca quinami se lanamacani hual yajtinemi quintemujtica tixcalitos hual ipatilo míac pa mocuhuilis. <sup>46</sup> Huan quiman in lanamacani quita se tixcalito hual ipati niman míac, cuaquín yahui, quinamaca mochi hual quipía huan mocuhuilis in tixcalito ca in tomin hual quilaxlahuiloaya pa mochi hual quinnamaquiltic.

*In latzojuini hué ca michimes*

<sup>47</sup> 'Ca oc se lapuhualisli, Dios ilahuelilitlisli huil moita quinami se latzojuini niman hué pa michimes hual quilasalo pan al huejcalan huan quinmana michimes huejué huan tijtipichin. <sup>48</sup> Tenticca in latzojuini ca michimes, quitlanalo pa itenco in al huejcalan. Molalilo, quinnechiculo in michimes cuajcuali, quinlalijiticate pa chiquihuimes. Huan quinlasalo in michimes amo cuajcuali. <sup>49</sup> Inon unca quinami yes quiman lamis in lalticpan. Hualasi Dios ilanahuatinijmes pin cielo huan quinxilusi yehuanten hual amo yulilo cuali pa camo cayasi ca yehuanten hual yulilo quinami Dios quinequi. <sup>50</sup> Huan quinlasasi yehuanten hual yulilo amo cuali ca capic amo quiman laquisasi panusi lacocoltilisli, quincocoltis quinami tixuxli. Nepa moxtin chocasi huan lacuajcuasi inminlames pampa quincocúa niman míac.

*Jesús lamaxtía ca in hual yajyancuic huan in hual moviejotic hual ipatilo míac*

<sup>51</sup> Jesús quinmilic:

—¿Axan anquimati len quinequije quijtuje mochi innojen?

Quilijque:

—Quema, Tata.

<sup>52</sup> Cuaquinon quinmilic:

—Dios ilajtol hual quijtuc pa yina unca Dios ilajtol hual moviejotic. Huan in lajtol hual lanextilía quinami Dios huelitía unca ilajtol yancuic. Sinda anquimati len quinequilo quijtulo mochi innojen, yoje huil anquimatis quinami unca ca se hual quimaxtía ilajtol Dios huan noje unca lamaxtili pa quimatis quinami Dios huelitía axan. Se hual unca quinami in lalcal quimati lamaxtía ca lajtol hual quijtuje pa yina huan ca lajtol yancuic. Yihual quinami se hual quipía cali hué capa quipía la'ajcoquili innojen lachihuali pa yina huan innojen hual yajyancuic hual ipatilo míac. Huan in lalcal quimati quinquixtía innojen quiman quinequi quintequipanúa. Huan jan yoje yihual hual quimati Dios ilajtol hual quijtuc pa yina huan ilajtol yancuic quimati quitequipanúa quiman quinequi lamaxtía.

*Jesús yahui paxalúa pa Nazaret*

*(Mr. 6:1-6; Lc. 4:16-30)*

<sup>53</sup> Quiman panuc inon huan lamis quinlaquetziliz Jesús innojen lapuhualisli calica lamaxtitataya, mohuicac, canac ojli. <sup>54</sup> Ajsic pa yihual ilali capa moscaltic quiman yec xolol. Pehuac quinmaxtic pa inmintiopan capa momaxtilo in judíos. Huan moitaloaya ca lamajtilisli pampa in hual quimaxtiaya, quililoaya:

—¿Capa canac in lalcal in lajmatilisli? ¿Quinami huil quinchía mochi innojen hual techlalachialtilo ca lamajtilisli? <sup>55</sup> Yihual jan ixól in carpintero san. Huan inantzin itoca María, huan motocalo icnían Santiago huan José huan Simón huan Judas. <sup>56</sup> Huan icnían sihuames chantilo moxtin ca tehuanten. ¿Capa quinmanac in lalcal mochi innojen hual huil quinchía?

<sup>57</sup> Huan amo quixtocaloaya, quixixiculoaya Jesús. Pampín yihual quinmilic:

—Ca capic yes yahuis se ilajtuni Dios, quimatilo momajtilo ilaixpan yihual. Ma yoje, quiman unca capa yehuanten pa icaltilan huan pin cali capa chantilo icnían, amo quimatilo momajtilo ilaixpan.

<sup>58</sup> Huan pampa yehuanten amo quineltocaloaya, Jesús amo quinchíac míac lachihualisli huejué nepa.

## 14

*Herodes quimictía Juan Lacuayatequini*  
(Mr. 6:14-29; Lc. 9:7-9)

<sup>1</sup> Pa innojen tonalijmes, quicaquic Herodes quinami molaquetzililoaya moxtin inahuac mochi hual quichihuaya Jesús. In Herodes huelitiaya pin lalticpan Galilea. <sup>2</sup> Quinmilic yehuanten hual quitequipanuilloaya, quil:

—Niquijtúa in Jesús neli yes Juan Lacuayatequini. Mas que miqic Juan, axan yultica oc sejpa. Huan pampa yultica oc sejpa, quipía lahuelilitlisli pa quinchías mochi innojen hual quinmolachialtilo lacames ca lamajtilisli.

<sup>3</sup> Yojque quijtuc Herodes, pampa quiman ayamo quimatic Herodes in hual Jesús quinchihuaya, latilanic pa quiquitzquilosquiaya Juan pa quilpililosquiaya ca teposli huan pa quitzacualosquiaya pin calijtic. Herodes quichihuilic yojque pa quipaquiltisquiaya Herodías. In Herodías yec isihua Felipe hual yec icni Herodes. <sup>4</sup> Huan Herodes latilanic pa Juan yes latzacuali pin calijtic pampa Juan quilic:

—Amo unca moyaxca pa anyulis huan yihual, pampa yihual isihua mocni.

<sup>5</sup> Yoje, mas que Herodes quinequiaya latilani pa quimictilosquiaya Juan, yihual momajtic pampa cualanilosquiaya in lalalera. Yehuanten quimatiloaya Juan yec ilajtuni Dios. <sup>6</sup> Ma yoje, pa in tonali quiman quipialoaya fiesta (ilhuil) pa Herodes pa quijnamiquilosquiaya quiman lacatic, cuaquín Herodías ixolol sidual mijtotic inminlaixpan yehuanten hual quinnotzaje pa hualasi pa in fiesta. Huan Herodes quixtocac quinami mijtotic. <sup>7</sup> Pampa inon quimacac ilajtol pampa quimacasquiaya len yes quilajlanisquiaya. <sup>8</sup> Herodías inantzin in xolol sidual quilic ixolol quiman lamic mijtotic pa quilajlanisquiaya Herodes pa quimacasquiaya itzontecon Juan Lacuayatequini pan se xicali. Yojque quichíac in muachita quinami quilic inantzin. <sup>9</sup> Cuaquín in hué Herodes icnotic míac. Ma yoje latilanic pa quihualiquililosquiaya. Quichíac yojque pampa quimacac ilajtol. Huan yehuanten hual quinnotzaje pa in fiesta quicaquije quiman quimacac ilajtol. <sup>10</sup> Yoje, quitilanic se guache pa quicotonilisquiaya iquixlan Juan capa cataya latzacuali calijtic. <sup>11</sup> Huan quihualiquilic itzontecon pan se xicali, huan quimacac in muachita huan yihual quihuiquilic inantzin.

<sup>12</sup> Cuaquín hualaje pin calijtic Juan imonextilinijmes, canaje in mijquil huan quilaltocaje. Cuaquinon uyaje quipuhuilije Jesús len panuc.

*Jesús quinlacualtía macuili mil lacames*  
(Mr. 6:30-44; Lc. 9:10-17; Jn. 6:1-14)

<sup>13</sup> Quiman Jesús quimatic inon, yihual mohuicac pan se barquito, uyajtíac pa capa amaqui chantiaya. Huan quiman quimatije in lalalera ca capic uyac Jesús, cuaquín quitocaje nejnentiya huiloaya pa ojli. <sup>14</sup> Huan quisac Jesús pin barquito, quinmitac lalalera, je lanechiculisli hué. Quinmicnilic yehuanten huan quinpajtic in cocoxquimes hual ca yehuanten cataloaya. <sup>15</sup> Hualaje pin barquito ca Jesús imonextilinijmes. Quiman tiolactic, yehuanten hualaje ca yihual, quilije:

—Nican ticate capa amaqui chanti, huan axan panuc in semilhuil, monequi pa tilacuasi. Xiquinmili in lalalera pa mohuicasi, yoje huil yasi pa in calimes pa mocuhuilisi len quicuasi.

<sup>16</sup> Jesús quinmilic:

—Amo monequi pa mohuicasi. Amhuanten xiquinmacacan len quicuasi.

<sup>17</sup> Quilije:

—Nican ticpialo jan macuili panes pa quincuasi huan ome michimes san.



<sup>18</sup> Quinmilic:

—Xichualiquilican nican.

<sup>19</sup> Cuaquinon quinmilic in lacalera pa molalilosquiaya pani pin ixlán (ixlahuayan) capa cataya míac sacal. Quinmanac innojen macuili panes chicuenta tzopimes huan innojen ome michimes, lachíac pa in cielo (ilhucac), quisehuic Dios. Cuaquín quinlapanac in panes, quinmacac imonextilinijmes, huan yehuanten quinxiluilije mochi sejse innojen míac lacames. <sup>20</sup> Moxtin lacuaje huan pachihuije. Quinpejpenaje mochi in lajlajco hual mocahuaje huan quintemiltije doce (majlaclihuanome) chiquihuijes. <sup>21</sup> Cataloaya cinco (macuili) mil lacames hual lacuaje huan amo quinpuhuaje in sihuames huan xolotzizindis hual noje lacuaje huan pachihuije.

*Jesús nejnemi pani in al*  
(Mr. 6:45-52; Jn. 6:16-21)

<sup>22</sup> Jan ajnaxcan, Jesús quinmilic imonextilinijmes pa lejcuculosquiaya pan in barquito pa quipanahuísi quilaicanticate yihual ca yoje itenco (analco) in al huejcalan. Huan yihual yahuiaya mocahua pa quinmilisquiaya in míac lacames pa mohuicalosquiaya. <sup>23</sup> Quiman quinmilic pa mohuicalosquiaya, yihual panquisac se loma (tepetzindi) ihuían pa quilajlanisquiaya Dios. Huan quiman layuajtic, nepa mocahuac ihuían. <sup>24</sup> In barquito axan cataya lajco pin al huejcalan, majcoquiaya in al huan quihuixuaya in barquito, pampa ijyecatataya inminpan yehuanten. <sup>25</sup> Huan pa cualcan, uyac Jesús capa yehuanten cataloaya, nejnentiahuiaya pani in al. <sup>26</sup> Quiman quitaje imonextilinijmes Jesús nejnentiahuiaya pani pin al, momajtije niman míac, tzajtziye:

—¡Unca se temajquil! —huan tzajtziye ca momajtilisli.

<sup>27</sup> Jan axcan Jesús quinnotzac, quinmilic:

—¡Amo ximacajsicán! ¡Nehual niunca, amo ximomajtican!

<sup>28</sup> Cuaquín Pedro quinanquilic:

—Tata, sinda tehual tiunca, xichili pa nehual nihuala capa tehual pani pin al.

<sup>29</sup> Huan Jesús quilic:

—Xihuala.

Cuaquinon quisac Pedro pin barquito, nejnemic pani pin al pa yasquiaya capa Jesús. <sup>30</sup> Ma yoje, pehuaya quita quinami chicahuac ijyecatataya, huan quimacajsic, pehuac mojsimac. Jan axcan quitzajtzilic Jesús, quilic:

—¡Tata, xichquixti, niplejtica!

<sup>31</sup> Huan jan axcan quixilanic Jesús imajma, quiquitzquic huan quilic:

—¡Amo tichneltoca jan nadita san! ¿Leca ticmahuiliaya pampa tiahuiaya timoatocti?

<sup>32</sup> Quiman lejuje pin barquito lajtic, mosehuic in ijyecal. <sup>33</sup> Huan yehuanten hual cataloaya pin barquito quimolancuacuetzilije Jesús, quillije: —Neli tehual tiDios iXól.

*Jesús quinpajtía yehuanten de Genesaret*  
(Mr. 6:53-56)

<sup>34</sup> Quiman quipanahuíje in al huejcalan, ajsije pa in lali itoca Genesaret. <sup>35</sup> Huan quiman quitaje yehuanten hual yuliloaya nepa, quiximatije, huan lanahuatije pa mochi itenco in lali pampa axan cataya nepa Jesús. Huan quihualiquilije moxtin in cocoxquimes. <sup>36</sup> Quilajlanije pa quinmacahuiltisquiaya pa in cocoxquimes jan quimatocalosquiaya ilatemijmiluli inahuas. Huan pajtije moxtin hual quimatocaje.

## 15

*Jesús quinmilía in hual quichihualo yehuanten hual Dios amo quita cuali (Mr: 7:1-23)*

<sup>1</sup> Cuaquinon hualaje capa Jesús sequin ilamaxtinijmes in lajtol hual quinnextía quinami quimolancuacuetzililo Dios in judíos. Hualaje ca in fariseos, chantiloaya pa Jerusalén, quilije:

<sup>2</sup> —¿Leca tiquinmaxtía momonextiliniyjes pa como quineltocasi in lajtomes hual techmacaje totajtztzían? In lajtol hual techmacaje yehuanten pa yina quijtúa pa se quinpacas imajmajuan pa yoje quinquixtilisi imajmajuan ilajlaculisli. Monequi pa quinpacas quiman yalo lacuálo. Huan momonextiliniyjes amo quichihualo yoje.

<sup>3</sup> Jesús quinnanquilic:

—Huan amhuanten, ¿leca anyultía amo anquineltocatica len Dios anmitzilic pa anquichías? Yihual amo anquineltoca, huan ma yoje, anquineltoca in lajtomes hual anmitzmacaje anmotajtztzían pa yina. <sup>4</sup> Dios anmitzilic: “Xicmatican ximomajtican inminlaixpan motajtzin huan monantzin.” Huan: “Aquí yes quilis amo cuali itajtzin o inantzin, cuaquinon ma quitilanican pa yehuanten hual quipialo lahuellitlisli pa yes lamictili.”

<sup>5-6</sup> Huan amhuanten anquijtúa pampa se lalac amo quipía pa quinpalehuis itajtzin huan inantzin, mas que yoje quimati momajtía se inminlaixpan yehuanten. No, in lajtol hual anmitzmacaje pa yina anmotajtztzían quijtúa pampa sinda se lalac quichías huendi ca mochi hual quipía pa yoje yes iyaxca in tiopan quiman miquis in lalac, cuaquin amo huil quinpalehuis itajtzin huan inantzin ca itomin pampa axcan unca huendi. Ma yoje in lalac huil mopalehuía ca itomin hual monechiculía yoje. San amo huil quimaca oc se hual quinequi pa se quipalehuis, mas que cuajnesi yesi itajtztzían. Yoje, quiman anquineltoca inminlajtomes anmotajtztzían pa yina, anquijlacúa len Dios quijtuc pa anquichías. <sup>7</sup> Amhuanten anyuli anislatatijtica. Anquinequi pa annesis cuali inminlaixpan oc sequin, huan pa anmoyolo anquijtúa len amo cuali. Isaías ilajtuni Dios quijtuc melahuac anmonahuac amhuanten. Pa yina quijcuiluc quinami ancayas amhuanten hual anyuli axan, quijtuc, quil:

<sup>8</sup> In lacames lajtulo quinami neli nechlasojlalo, mas que amo nechlasojlalo. Nejchihuilía lamajtilisli jan ca len quijtulo.

Ma yoje, pa inminyolo amo nechlasojlalo huan amo nejchihuililo lamajtilisli.

<sup>9</sup> Quiman nechmolancuacuetzililo, yoje islatatilo.

Amo quinpalehuía inminyolo pa yesi cuali.

Yehuanten inminlamaxtilisli unca len jan lacames san quijtulo mas que yehuanten quijtulo pampa unca len quijtúa Dios.

Yoje quijtuc Isaías.

<sup>10</sup> Cuaquinon Jesús quinnotzac in lalacera pa hualalosquiaya capa yihual huan quinmilic:

—Xijcaquican inon huan xicmatican len quinequi quijtúa. <sup>11</sup> Dios amo quita se lalac amo cuali pampa calaqui len pa icamac se. Quita amo cuali se lalac pampa in hual quisa pa icamac.

<sup>12</sup> Cuaquinon hualaje imonextiliniyjes, quilije:

—¿Ticmati pampa niman amo quixtocaje in fariseos quiman quicaquije in hual tiquijtuc?

<sup>13</sup> Jesús quinnanquilic:

—Yes lacapunali mochi pacholi hual amo quitocac noTajtzin hual unca pin cielo. In fariseos ca inminlamaxtilisli cate quinami pacholimes hual amo quintocac noTajtzin. <sup>14</sup> Xiquincahuacan. Yehuanten cate quinami pachacames hual quinlaicanalo oc sequin pachacames. Huan sinda se pachacal quilaicana oc se pachacal, in omenten huetzisi pin coyunquil.

<sup>15</sup> Cuaquinon Pedro quilic:

—Xitechili tehuanten len quinequi quijtúa in lamaxtilisli hual unca pin lapuhualisli.

<sup>16</sup> Huan Jesús quinmilic:

—¿Amhuanen noje ayamo anquipía lajmatilisli pa anquimatis len quinequi quijtúa nolapuhualisli? <sup>17</sup> ¿Ayamo anquimati pampa len yes hual quilalía se pa icamac pa quicuas panúa pa iyolo huan cuaquín quisa quiman yas pa sacatilan? <sup>18</sup> Ma yoje, innojen hual quisalo pa se icamac, niquijtúa, in lajtomes hual quijtúa se, innojen quisalo pa iyolo. Huan unca pampa inon hual quijtúa se lalac hual Dios quita amo cuali. <sup>19</sup> Unca pampa pa se iyolo quisalo lajtulisli amo cuajcuali. In lajtulisli quichías pa se canas isihua oc se. Quichías pa se quinmanas sihuames amo pa monamictis. Quichías pa laixtequis. Quichías pa quijtus len amo unca melahuac inahuac oc se quiman quilajlanilo. Quichías pa quinlatisli in hual unca melahuac pa camo quimatisi yehuanten hual lalajlanilo. Quinchías pa quinhuejuecaltis Dios huan lacames. <sup>20</sup> Innojen cate hual Dios amo quitas cuali ca se lalac hual quinchía. Quijlacusi sinda quichía innojen se lalac. Dios amo yahui quijtúa pampa se lalac amo unca cuali sinda amo mopaquilis imajmajuan yoje quinami quijtúa anmolajtol. Amo moijlacus sinda amo quichía inon.

*Se sihual pa oc se lali quilajlanía Jesús pa quipalehuis*

(Mr: 7:24-30)

<sup>21</sup> Cuaquinon mohuicaya Jesús, uyac pa in lali itenco in caltilan hué motocaya Tiro huan in caltilan hué Sidón. <sup>22</sup> Huan cataya se sihual cananita quistihualac umpa, pehuac quitzajtzilic, quilic:

—¡Tata, tehual ti'imiahuil David, xinechicnili! Noxolol sihual niman mococúa pampa se ijyecal amo cuali quichihualtitica.

<sup>23</sup> Jesús amo quinanguilic ca se lajtol. Huan hualaje imonextilinijmes, quitemachije Jesús, quilije:

—Xicchihuili len mitztemachijtica huan xiquili ma mohuica, pampa tech-cocatihuala.

<sup>24</sup> Huan yihual quinanguilic:

—NoTajtzin Dios jan nechtilanic san pa niquinlaquetzilis ilajtol yehuanten hual cate judíos hual amo quipialo nolajtol. Pampín moxiluje pa camo mocahuasi pan iojli Dios.

<sup>25</sup> Cuaquinon hualac in sihual ca yihual huan quimolancuacuetzilizic, quilic:

—¡Tata, xinechpalehui!

<sup>26</sup> Jesús quinanguilic:

—Nihualaya pan lalticpan pa niquinpalehuis yehuanten pa Israel san, huan amo yesquiaya cuali sinda nicpalehuisquiaya se hual amo unca judío. Inon yesquiaya quinami nel niquinmanilisquiaya in xolomes in hual yalo quicualo huan niquinmacasquiaya in pelotzitzindis pa quicualosquiaya.

<sup>27</sup> Cuaquín in sihual quilic:

—Tiquijtúa neli, Tata. Ma yoje quincualo in pelotzitzindis in lajquitos tipichitos hual huetzilo capa lacuajtcate inmintecojuan, huan sinda unca yoje ca in pelotzitzindis, ¿amo huil tinechpalehuis jan nadita san?

<sup>28</sup> Cuaquín Jesús quinanquíllic:

—¡Ah, tuincito, ticmati tilaneltocha niman míac! Jan quinami tichtemachic ma caya ca tehual.

Huan ixolol in síhual pajtic jan ajnaxcan.

*Jesús quinpajtía míac lacames*

<sup>29</sup> Mohuicac Jesús, quisac pa umpa, panujtíac pa itenco in al huejcalan Galilea, cuaquín panquisac pan se loma (tepetzindi), nepa molaliaya.

<sup>30</sup> Huan hualaje capa yihual niman míac lalacera, quihuicatataloaya ca yehuanten lacames hual quinlacoculoaya inmicxihuaimes huan amo huil nejnemiloaya, lacames laculululi hual amo huil nejnemiloaya, huan pachacames huan yehuanten hual amo huil lajtuloaya huan míac oc sequín hual mococuloaya. Quinhualicaloaya, quinlaliye ilaixpan Jesús, huan yihual quinpajtic. <sup>31</sup> Yoje moitaloaya ca lamajtilisli in míac lalacera, pampa quinmitaloaya lajtuticate yehuanten hual amo huil lajtuloaya quiman ajsije. Quinmitaloaya yehuanten hual ajsije laculululi huan axan mohuicaloaya ca inminmajmajuan huan inmicxihuaimes jan cuali san. Quinmitaloaya nejnenticate yehuanten hual ajsije quinlacocujtataloaya inmicxihuaimes. Quinmitaloaya axan lachixticate yehuanten hual ajsije pachacal. Pampín moililoaya yehuanten quinami unca hué iDios Israel huan moililoaya pampa quiapiaya in lahuelilitlisli hué.

*Jesús quinlacualtía nahui mil lacames*

(Mr. 8:1-10)

<sup>32</sup> Cuaquinon quinnotzac imonextiliniymes pa hualasi ca yihual, quinmilic inminhuán:

—Nechcocúa noyolo míac pampa in lalacera axan cate ca nehual ye tonalimes huan amo quiपाल len quicuasi. Huan amo nicnequi niquintilanía pa mohuicasi ca mayandi, amo san gá huetzisi pan ojli.

<sup>33</sup> Quilije imonextiliniymes:

—Huan ¿capa tiquinmanasi yoje míac pa quicuasi pa yoje tiquinpachi huiltisi se lanechiculisli hué quinami inon?

<sup>34</sup> Jesús quinlajlanic:

—¿Quichi innojen panes chicuenta tzopimes anquipía pa quicuasi?

Quilijque:

—Chicome. Huan ticpialo nadita michimes.

<sup>35</sup> Cuaquín Jesús quinmilic in lalacera pa molalisi pan lali. <sup>36</sup> Quinmanac in chicome panes chicuenta tzopimes huan in michimes, quisehuic Dios huan quinlapanac, quinmacac imonextiliniymes, huan imonextiliniymes quinhuiquilije in lalacera. <sup>37</sup> Yojque quicuaaje moxtin huan pachihuije. Huan imonextiliniymes quintemiltije chicome (siete) chiquihuimes huejué ca in lajlajco hual amo quicuaaje. <sup>38</sup> Huan yehuanten hual lacuaaje cataloaya nahui mil lacames huan ma yoje amo quinpahuaje in sihuames ca inminxolotzitzindis hual noje lacuaaje. <sup>39</sup> Cuaquinon Jesús quinmilic yehuanten pa mohuicasi. Huan umpa canac se barguito huan yihual huan imonextiliniymes quipanhuije in al huejcalan, ajsije pa in lali capa cataya in caltilan motocaya Magadán.

## 16

*Quilajlanilo pa Jesús quinnextilis len hual quinmahuisultis ca lamajtilisli*  
(Mr. 8:11-13; Lc. 12:54-56)

<sup>1</sup> Hualaje capa yihual yehuanten hual quitocaje inminlamaxtilisli in fariseos huan inminlamaxtilisli in saduceos. Quitemujtaloaya quinami quichihuillosquiaya Jesús pa quinnexilis quinami yihual quiapiaya Dios ilahuelilitlisli. Quitemachije pa quinchihuilis se ilanexilisli in lahuelilitlisli. <sup>2</sup> Huan Jesús quinnanquilic:

—Quiman tiolactía, anquijtua: “Mosta lapuhuis, pampa in cielo unca chichiltic quinami in tixuxli.” <sup>3</sup> Lanesi, huan anquijtúa: “Axan quiahuis pampa chichiltic unca in cielo, laticumactía.” ¡Lacuajcuamananijmes amhuanten! Anquimati len quinequi quijtúa quinami nesilo in cielos (ilhuicac), huan amo huil anquimati len quinequilo quijtulo innojen hual panujticate nican pan lalticpan quiman nehual niunca nican. Innojen cate ilanexilisli innojen tonalijmes. <sup>4</sup> Lacames amo cuajcuali hual amo cate cuajcuali pa inminyolo ca Dios, yehuanten quitemulo se lanexilisli. Ma yoje, quiyasi san ilanexilisli Jonás ilajtuni Dios.

Cuaquín quincahuac, uyac.

### *Inminlaxocoyajquil in fariseos hual quitequipanulo*

*(Mr. 8:14-21)*

<sup>5</sup> Quiman uyaje imonextilinijmes pa yojque itenco (analco) in al huejcalan, quilhahuaje quihuicaje pan. <sup>6</sup> Huan quinmilic Jesús:

—Xicipacan ca litalisli in laxocoyajquil hual quipialo in fariseos huan saduceos. <sup>7</sup> Cuaquín molaquetzilije yehuanten, quijtuje:

—Unca pampa amo ticalicaje len pa tijcuasi. Pampín techilijtica inon.

<sup>8</sup> Quiman quimatic Jesús len quijtuloaya, quinmilic:

—¿Leca anmolaquetzilijtica amhuanten? ¿Amo anlanelto ca nadita san? ¿Leca anmolaquetzilijtica ca amhuanten pampa amo anquipía pan? <sup>9</sup> ¿Ayamo anquimati huan ayamo anquijnami quia in macuili panes calica niquinlacualtic in macuili mil lacames? ¿Quichi chiquihuimes anquintemiltic ca in lajquitos hual quincahuaje? <sup>10</sup> Huan ¿amo anquijnami quia in chicome panes calica niquinlacualtic in nahui mil lacames huan quichi chiquihuimes huejué anquintemiltic ca in lajquitos? <sup>11</sup> ¿Quinami amo anquimati pampa amo annimitzlaquetzilic de len tijcuasi? Nicnequiaya niquijtu xicipacan litalisli inahuac inminlaxocoyajquil in fariseos huan in saduceos.

<sup>12</sup> Cuaquinon quimatije len quinequiaya quijtu. Amo quinmilic pa quipialosquiaya litalisli pa ilaxocoyajquil in pan. Quinmilic pa quipialosquiaya litalisli pa inminlamaxtilisli amo cuali in fariseos huan in saduceos.

### *Pedro quijtúa pampa Jesús unca in Cristo*

*(Mr. 8:27-30; Lc. 9:18-21)*

<sup>13</sup> Quiman ajsic Jesús pa itenco in caltilan Cesarea de Filipino, quinlajlanic imonextilinijmes, quinmilic:

—¿Aqui quijtulo lacames pampa nehual ilacal in cielo niunca?

<sup>14</sup> Huan quilije:

—Sequin quijtulo pampa tijuán Lacuayatequini, oc sequin quijtulo tehual Elías, oc sequin quijtulo pampa tehual tijeJeremías o se ca ilajtunijmes Dios hual yultica oc sejpá.

<sup>15</sup> Quinmilic:

—Huan amhuanten, ¿aqui anquijtúa pampa nehual niunca?

<sup>16</sup> Quinanquilic Pedro, quilic:

—Tehual tiunca in Cristo ixolol Dios hual yuli.

<sup>17</sup> Quinanquilic Jesús quilic:

—Dios mijchihuic cuali tehual, Simón ixól Jonás, pampa amo mitzlamachiltije inon lacames hual jan lacatije nacal huan esli. Cataya noTajtzin hual unca pin cielo hual mitzlamachiltic. <sup>18</sup> Huan nimitzilía pampa tehual tiPedro hual tiunca quinami se tixcali hué. Huan pan ipampa in tixcali hué, nehual niquinmiactis yehuanten hual nechnehtocalo pa yesi nolacames. Huan mas que miquisi, ma yoje in miquilisli amo quiman huil quinsulahua yehuanten.

<sup>19</sup> Huan nimitzmacas pa yes moyaxca pa tiquinlapulis pa calaquisi capa unca ilahuelilitisli in cielo nican pan lalticpan. Len yes amo ticmacahuiltis pan lalticpan, in amo unca lamacahuilti pin cielo. Huan len yes ticmacahuiltis pan lalticpan, in unca lamacahuilti pin cielo.

<sup>20</sup> Cuaquinon quinmilic chicahuac in monextiliniyjes pa camo quilisi amaqui pampa yihual in Cristo.

### *Jesús quinmachiltía pampa yalo quimictilo*

(Mr. 8:31-9:1; Lc. 9:22-27)

<sup>21</sup> Cuaquinon pehuac quinmilic Jesús quinami quiipiaya pa yahuis pa Jerusalén pa panus míac lacocoltisli hual yahuiloaya quichihuililo in abuelojmes huan in tiopistas huejué huan in lamaxtinijmes. Cuaquinon yahuiloaya quimictilo. Huan quiman panuloaya ye tonalijmes, quil, yihual yahuiaya yuli oc sejsa. <sup>22</sup> Cuaquín Pedro canac, quihuicac ca yihual inahuac, pehuac la'ajuac, quilic:

—Ma camo quimacahuilti inon Dios, Tata. Ma camo quiman mitzpanu inon.

<sup>23</sup> Huan momalinac Jesús, quilic Pedro:

—¡Xiquisa nonác nehual ca yoje, Satanás!, pampa tichcuejsutica. Amo tilajutitica pa moyolo quinami Dios lajtúa. Jan tilajtúa pa moyolo quinami lacames san.

<sup>24</sup> Cuaquinon Jesús quinmilic imonextiliniyjes:

—Sinda se quinequi nechtoaca pa yes nomonextilini, ma mocahua pa quichías san in hual quinequi quichía. Ma nechtoaca nehual, huan ma momacahuilti pa miquis quinami nehual nimiquis. <sup>25</sup> Yihual polehuis aqui yes quinequi mopilía iyulilisli. Huan aqui yes quipolus iyulilisli pampa unca se nolac quinami moxtin nolacames, yihual mopilis iyulilisli. <sup>26</sup> ¿Len quipías se lalac cantica mochi hual unca pin lalticpan sinda yoje quipolus iyulilisli? Huan sinda quipolus iyulilisli, amo huil canas oc sejsa mas que quilaxlahuis míac pa canas. <sup>27</sup> Nehual ilacal in cielo nihualas ca ilaixpelalisli cualtichin huan ichicahualisli hué noTajtzin, ca ilanahuatinijmes pin cielo nihualas. Cuaquín niclaxlahuis mochi sejsa pa mochi quichihualoaya pan lalticpan. <sup>28</sup> Neli annimitzilía pampa sequin hual nican moqueztecate yulisi pa nechitasi nehual ilacal in cielo nihualajtica ca nolahuelilitisli cualtichin, yoje ninesis quiman nihuelitis. Quema, ayamo miquisi, huan nechitasi yoje nihualajtica.

## 17

### *Jesús mopala inminlaixpan in yeyenten imonextiliniyjes*

(Mr. 9:2-13; Lc. 9:28-36)

<sup>1</sup> Huan quiman panuje seis (chicuase) tonalijmes, Jesús quinhuicac Pedro huan Jacobo huan Juan icni Jacobo, uyaje inminhuían. Panquisaje se loma (tepel) niman cuajtic. <sup>2</sup> Huan nepa mopalac inminlaixpan, pehuaya nesi ca oc se lanextilisli. Laixpelaya iixco quinami in tonali, huan inahuas mochíac

iztac laixpelatataya. <sup>3</sup> Huan jxiquita!, moitilije ca yihual Moisés huan Elías laquezatataloaya ca yihual. <sup>4</sup> Cuaquinon Pedro quilic Jesús, quil:

—Tata, junca cuali pampa ticate nican! Sinda ticnequi, ma tiquinchihua-can ye calitos ca cuahuimes huan isacayo, se pa tehual huan se pa Moisés huan se pa Elías.

<sup>5</sup> Ayamo lamiaya laquetza Pedro huan quitaloaya quinpachujtataya se mextemil laixpelajquil huan quicaquije se lajtol quistataya pin mextemil hual quijtuaya:

—In noxolol nolasojli, hual ca yihual nicpía paquilisli. Xijcaquican yihual.

<sup>6</sup> Quicaquije inon in monextiliniymes, huan huetzije pa inmixco pan lali huan quimacajsiloaya míac. <sup>7</sup> Cuaquinon ajsic Jesús, huan quinmatocac, quinmilijtataya:

—Ximoquetzacan huan amo xicmacajsican.

<sup>8</sup> Quinlapuje inmixtololoymes, amo quitaje amaqui, jan Jesús ihuían san.

<sup>9</sup> Quiman temujtiahuiloya pan in loma cuajtic, quinmilic Jesús, quil:

—Amo xiquilican amaqui hual Dios anmitzitaltic nepa. Quiman niyulis oc sejpa, nehual ilacal in cielo, cuaquín xiquinmilican.

<sup>10</sup> Cuaquinon imonextiliniymes quilajlanije Jesús, quilije:

—¿Leca quijitulo in lamaxtiniymes pampa quipías pa hualas Elías, huan cuaquín hualas in Cristo?

<sup>11</sup> Jesús quinnanquilic:

—Neli hualas Elías quilaicantica huan quimelahuas mochi. <sup>12</sup> Ma yoje, annimitzilía pampa hualac Elías huan amo quinequije quislacuje. San quichihuilije len quinequije. Huan noje nejchihuilisi yojque nehual ilacal in cielo. Nejchihuilisi pa nípanus lacocotlisli.

<sup>13</sup> Cuaquinon quimatije imonextiliniymes pampa quinmiliaya Jesús pampa in Elías hual yihual quinlaquetziliaya yec Juan Lacuayatequini.

*Jesús quipajtía se xolol hual se ijyecal quicocoltiaya*

*(Mr. 9:14-29; Lc. 9:37-43)*

<sup>14</sup> Quiman ajsije ca capic cataloaya in míac lacames, ajsic se lalac ca Jesús, quimolancuacuetzilic huan quilic:

<sup>15</sup> —Tata, xichicnilili noxól. Mococúa míac pampa in ijyecal quiquitzaquí. Itequi quiquitzaquí huan sejpa huan oc sejpa míac huetzic pin tixuxli huan pa al. <sup>16</sup> Niqihualiquilic momonextiliniymes huan amo huil quipajtije.

<sup>17</sup> Jesús lananquilic:

—¡Ay, lacames hual amo laneltocalo huan lacuilmatilo! ¿Quiman yajmo nicayas ca amhuanten? ¿Quiman yajmo monequi pa nimopepenialtis pa huil niyultías ca amhuanten? Xichualiquilican nican in xolol.

<sup>18</sup> Cuaquinon Jesús cajuac huan quitojtocac in ijyecal, quinahuatilic pa quisasquiaya. Yoje quisac huan mocahuac lapajtili in xolol jan axcan.

<sup>19</sup> Quiman panuc inon, hualaje ca Jesús ihuían imonextiliniymes, quila-jlanije:

—¿Leca amo huil tijquixtilije tehuanten in ijyecal amo cuali?

<sup>20</sup> Quinnanquilic:

—Cataya pampa amo anquilalía míac laneltocalisli ca Dios. Annimitzilía neli, sinda anquipiaya laneltocalisli nadita quinami unca tipichin se ilatocli mostaza, cuaquín anquiliaya in loma (tepel) hué: “Ximijcuani capa tiunca nepa huan xía ca umpic”, cuaquín mijcuaniaya in loma. Yoje amo unca nindeno hual amo huil anquichía sinda anquilalía anmolaneltocalisli ca

Dios. <sup>21</sup> Ma yoje, ijyecames amo cuajcuali quinami innojen huil quiquixtilía se jan sinda se quitemachía Dios huan mosahua.

*Jesús quinmachiltía oc sejpa quinami yahui miqui*  
(Mr. 9:30-32; Lc. 9:43-45)

<sup>22</sup> Yajtiahuiloaya inminhuían pa in lalticpan Galilea. Huan Jesús quinmilic quinami lacames yahuiloaya quitemacalo yihual ilacal in cielo, yahuiloaya quitemacalo ca lacames hual yahuiloaya quimictilo. <sup>23</sup> Huan quiman panuje ye tonalijmes quiman lamije quimictije, quil, yihual yahuiaya yuli oc sejpa. Quicaquije inon, icnotiaje niman míac imonextiliniymes.

*Jesús quilajlanic Pedro inahuac ilapixcalisli in tomin pa in tiopan*

<sup>24</sup> Ajsije Jesús huan imonextiliniymes pa Capernaum, hualaje yehuanten hual quitemachiloaya ilapixcalisli in tomin pa in tiopan. Hualaje quitaje Pedro, quilajlanije:

—¿Amo quilaxlahuía molamaxtini in tomin pa in tiopan?

<sup>25</sup> Pedro quilic:

—Jo quema.

Cuaquinon quiman calaquic Pedro calijtic, Jesús pehuac quilaquetzilic, quilic:

—¿Quinami tiquijtúa, Simón? ¿Aquinojen quinlajlanilo ilapixcalisli in tomin in huejueyenten pin lalticpan? ¿Inminxolomes o yehuanten hual amo chantilo pa inmincali?

<sup>26</sup> Pedro quinanquilic:

—Yehuanten hual amo chantilo pa inmincali.

Huan Jesús quilic:

—Cuaquinon, inminxolomes amo quipialo pa laxlahuisi. <sup>27</sup> Ma yoje, amo ticnequilo tijcualantilo amaqui. Pampín, xía pa in al huejcalan huan xiclasa se laquixtini. In michin hual jan ajnaxcan leycus, inon xijquixti. Xiclapu icamac huan nepa laijtic tiqutas se tomin hual yes pa quichi monequis pa ilapixcalisli in tomin. Xicuica huan xiquinmaca pa titechlaxlahuilis tehual huan nehual.

## 18

*¿Aqui unca in se hual yes in hué ca in monextiliniymes?*  
(Mr. 9:33-37; Lc. 9:46-48)

<sup>1</sup> Pa nepa in tonali hualaje imonextiliniymes capa Jesús quilijtcate:

—¿Aqui cayas in hué pa ilahueliltilisli in cielos hual quinlaicanas moxtin in oc sequin?

<sup>2</sup> Cuaquín Jesús quinotzac pa hualas se xolol, quilalic lajco capa yehuanten.

<sup>3</sup> Quinmilic:

—Annimitzilia neli, sinda amo anquipala anmoyolo huan anmochía quinami xolomes, amo quiman ancayas capa unca ilahueliltilisli in cielo.

<sup>4</sup> Aquí yes hual mochía tipichin pa ilaijnamiquilisli quinami in xól, yoje in se yes hué. Huan in oc sequin hual amo mochihualo tijtipichin amo cayasi yoje hué pa ilahueliltilisli in cielos. <sup>5</sup> Huan aquí yes quinamiquía ca lasojlalisli se xól quinami in xól huan quinamiquía pampa quimati momajtía pampa nicpia lahueliltilisli, cuaquín yoje nechnamiquía nehual.

*Unca laiylaculisli sinda se quilaicana oc se pa quichías laiylaculisli*  
(Mr. 9:42-48; Lc. 17:1-2)

<sup>6</sup> Huan sinda se quilaicanas pa quichías laiylaculisli se xolol hual nech-neltoca, cuaquín cataya cuali sinda cataya lapiluli pa iquixlan se melapili



hué huan cataya la'atoctili lajco pin al huejcalan. <sup>7</sup> ¡Cayas míac lacocotlilisli pa yehuanten hual quinlaicana oc sequin pa quichihuasi laijlaculisli! Amo quiman mocahuas pa cayasi lacames quinami yehuanten. Ma yoje, ¡quichi yahui panúa lacocotlilisli in se hual quilaicanas oc se pa quichías laijlaculisli!

<sup>8</sup> 'Pampín, sinda mijchihualtía amo cuali momajma o mocxían, ximocotonili, xiclasa pa camo cayas capa tehual. Sinda tipehuaya ticpía in yulilisi hual amo quiman lamis ca jan se momajma san o jan se mocxían san, ma yoje, cuali cataya pa tehual. Sinda Dios mitzlasaya pin coyunquil milintica ca tixuxli hual amo quiman sehuis, inon neli cataya niman amo cuali pa tehual, mas que tiquinpiaya ome momajmajuan huan ome mocxían. <sup>9</sup> Huan sinda mijchihualtía laijlaculisli moixtololon, ximoquixtili huan xiclasa pa camo cayas capa tehual. Sinda tipehuaya ticpía in yulilisi hual amo quiman lamis ca jan se moixtololon san, ma yoje, pa tehual inon cataya niman cuali. Cataya niman amo cuali sinda ca ome moixtololomes Dios mitzlasaya pin coyunquil milintica ca tixuxli hual amo quiman sehuis.

*In borrego hual mopoluc*  
(Lc. 15:3-7)

<sup>10</sup> 'Ximolachilican cuali pa camo quiman anquiztías se ca in tijtipichin quinami se hual amo monotza, pampa annimitzilía Dios noTajtzin quinlalic míac ilanahuatinijmes pin cielo pa quinmiztialo. Huan yehuanten in lanahuatinijmes mochi tonali quizticate iixco Dios pin cielo pa quimachiltisi mochi in amo cuali hual quinpanus innojen xolomes. <sup>11</sup> Nehual ilacal in cielo, nihualaya pan lalticpan pa nijquixtis pin polehulisli aquí yes hual mopoluc.

<sup>12</sup> '¿Len anquijtúa inahuac inon? Sinda se lalacal quinpía cien borregos huan se ca innojen mopolúa, cuaquín ¿amo quincahuas in noventainueve pin latzacuali huan yas quitemus in se hual mopoluc? Quema. <sup>13</sup> Huan sinda quipanúa quita in borrego, annimitzilía neli yihual cayas ca míac paquilisli ca in borrego. Amo yoje míac paquilisli quipías ca in noventainueve hual amo mopoluje. <sup>14</sup> Yoje annoTajtzin pin cielo noje amo quinequi pa se ca in tijtipichin quipolus iojli Dios.

*Monequi pa se quipujpuhuas ilaijlaculisli icni*  
(Lc. 17:3)

<sup>15</sup> 'Sinda mijchihuilía len amo cuali mocni, xía ca yihual mohuían huan ximachilti quinami mijchihuilic amo cuali. Sinda mitzcaqui, yoje ticpatilic iyolo mocni. <sup>16</sup> Huan sinda amo quinequi mitzcaqui, xiquinhuica ca tehual oc se o cuajnesi ome oc sequin, pa yoje pan ipampa inminlajtol ome o ye lacames mocahuas neli in hual ticmotexpahuilía. <sup>17</sup> Huan sinda amo quinequi quincacqui yehuanten, cuaquín xiquinmili moxtin capa monechiculo moxtin in laneltocanijmes. Huan sinda noje amo quinequi quincacqui in laneltocanijmes, ma ye ca tehual quinami se hual amo quineltoca Dios o quinami se ca yehuanten hual canaló ilapixcalisli in tomin pa in lahueliltilisli romano.

<sup>18</sup> 'Annimitzilía neli, len yes amo anquimacahuiltis pa mochihuas pin lalticpan, inon amo unca lamacahuiltisli pin cielo. Huan len yes anquimacahuiltis pin lalticpan unca lamacahuiltisli pin cielo.

<sup>19</sup> 'Oc sejpa, annimitzilía neli pampa sinda ome ca amhuanen pin lalticpan anajsis ca se lajtulisli ca len yes anquinequi anquilajlanis noTajtzin pin cielo, cuaquín yihual anmitzmacas. <sup>20</sup> Inon quichías, pampa capa ome o ye cate lanechiculi pampa nechtemacaje ca nehual quilalijtcate ca nehual inminlaneltocalisli, cuaquín nepa niunca lajco capa yehuanten.

<sup>21</sup> Cuaquinon hualac Pedro, quilic:

—Tata, sinda nocni nejchihuilía amo cuali sejpa huan oc sejpa, ¿pa quichi innojen lachihualisli amo cuajcuali monequi pa nicpujpuhuas, pa chicome (siete)? Huan sinda nejchihuilis len amo cuali oc sejpa, cuaquín ¿amo nicpujpuhuas?

<sup>22</sup> Quilic Jesús:

—Amo nimitzilía pa chicome. Nimitzilía sinda pa chicome setenta huala, xicpujpuhua. Nicnequi niqijtúa, amo xiquijnamiqui quichi lapujpuhualisli ticpujpuhuac.

*Jesús quinmilía len quipanuc se hual amo quinequiaya lapujpuhua*

<sup>23</sup> Pampa inon, ilahuelilitisli in cielo unca quinami se lalac hué hual quinequiaya quimati quichi quihuiquililoaya itequipanujquimes. <sup>24</sup> Yoje, pehuac quitemuc huan canac se hual quihuiquilic míac millones. <sup>25</sup> Huan amo quipíac len calica quilaxlahuiaya. Cuaquinon latilanic iteco pa quina-macasi isihua huan ixolomes huan mochi hual quipiaya. Pan ipampa inon quilaxlahuiaya. <sup>26</sup> Cuaquín itequipanujquil huetzic lancuacueztataya, quitemachic: “Xicpía laicnilisli ca nehual, xijchía huan nimitzlaxlahuis mochi.” <sup>27</sup> Huan quicnilic iteco in tequipanujquil, quipujpuhuac inon hual quihuiquilijtataya. <sup>28</sup> Cuaquín quisac in tequipanujquil huan ca se nadita quitac oc se itequipanujquil iteco hual quihuiquilic in tequipanujquil dos cientos. Cuaquín quiquitzquic, quitolpatzcac, quilic: “¡Xichlaxlahui len tich-huiquilía!” <sup>29</sup> Molancuacuetzac inahuac icni tequipanujquil, quitemachic ca mochi iyolo, quilic: “¡Xichicnili, huan nimitzlaxlahuis!” <sup>30</sup> Ma yoje, amo quinequic in se, san quihucac quitzacuac pin calijtic pa mocahuasquiaya nepa sinda amo quilaxlahuisquiaya len quihuiquiliaya. <sup>31</sup> Cuaquín, quiman quitaje inon, in oc sequin tequipanujquimes icnotiloaya míac, quincocuc inminyolo. Pampín quimachiltije in teco mochi hual panuc. <sup>32</sup> Cuaquín latilanic in teco pa hualas in tequipanujquil, quilic: “¡Tequipanujquil ele-huis! Nimitzpujpuhuac ca mochi in hual tichhuiquilic pampa tichtemachic ca mochi moyolo. <sup>33</sup> ¿Amo monequiaya pa tehual tiquicniliaya mocni tequipanujquil quinami nehual nimitzicnilic?” <sup>34</sup> Huan cualanic míac iteco, quitemacac ca in lacames pin calijtic hual quincocoltilo yehuanten hual cate latzacuali. Nepa mocahuasquiaya in tequipanujquil sinda amo lamiaya quilaxlahui mochi hual quihuiquiliaya.

<sup>35</sup> Huan Jesús lamic quinmilic:

—Yoje anmijchihuilis noje noTajtzin pin cielo sinda se amo quipujpuhuas icni ca mochi iyolo.

## 19

*Lacames hual quincajcahualo inminsihuahuan*  
(Mr. 10:1-12; Lc. 16:18)

<sup>1</sup> Lamic quijituc Jesús innojen lajtomes, quisac pa Galilea huan mohucac pa itenco in laticpan Judea hual unca ca yojque (analco) in atenco hué Jordán. <sup>2</sup> Quitocaje míac lalacera huan nepa quinpajtiaya.

<sup>3</sup> Huan hualaje capa yihual sequin fariseos pa quilalilisi se lajtol calica huil quimotexpahuililoaya, quilije:

—¿Quimacahuiltía tolajtol pa moxilus se lalac ca isihua pampa amo quixtoca len yes ca isihua?

<sup>4</sup> Jesús quinnanquilic:

—¿Amo quiman anmomaxtic pa Dios ilajtol lajcuiluli pampa quiman Dios lamic quipehualtic mochi (pa ipehuayan), quijtúa “quinchiác lacal huan sihual”? <sup>5</sup> Noje quijtúa: “Pampa inon, quincajcahua se lacal itajtzin huan inantzin huan cayas ca isihua huan in omenten cayasi se san.” <sup>6</sup> Yoje yajmo cate ome, jan se san. Pampín, in omenten hual Dios quinchíac se san ma camo quinxilucan lacames.

<sup>7</sup> Cuaquinon quilajlanije:

—Cuaquín ¿leca quinmilic Moisés pa quinmacasi se amal pa monextilis pampa cate laxiluli inminsihuahuan?

<sup>8</sup> Jesús quinmilic:

—Cataya pampa amo anquinequi anmonextilía anquichía in hual unca cuali. Pampín Moisés anmitzmacahuiltic pa anmoxilusquiaya ca anmosihuahuan. Ma yoje amo cataya yoje quiman Dios quipehualtic mochi. <sup>9</sup> Annimitzilía sinda se lacal moxilúa ca isihua pampa isihua quichíac len yes hual ilahuical amo quixtocac, huan sinda monamictía ca oc se sihual, cuaquín in lacal moijlacúa pampa canac oc se sihual. Ma yoje, sinda isihua uyac moniluc ca oc se lacal, cuaquín in lajtol quimacahuiltía pa moxilus ca yihual. Huan se lacal hual monamictía ca se sihual laxiluli, yoje in lacal cana se sihual hual amo iyaxca.

<sup>10</sup> Cuaquinon imonextilinjmes quilije:

—Sinda unca yoje in hual huil quipanúa se lacal ca isihua, cuaquín cuali unca pa camo monamictis se.

<sup>11</sup> Quinmilic Jesús:

—Amo cate moxtin hual huil quineltocalo in lajtol, jan yehuanten san hual Dios quinpalehuía pa quineltocasi. <sup>12</sup> Sequin lacames amo quiman huil quinpioalo inminsihuahuan, pampa yoje lacatije. Ca oc sequin, cataloaya lacames hual quinchihuilije yoje. Ca oc sequin, mochihuaje yoje pampa quinequiloaya quitequipanuililo Dios ca ilahuelilitlisli in cielo. Aquí yes huil quineltoca in lajtol, ma quineltoca.

### *Jesús quintuchihua in xolomes* (Mr 10:13-16; Lc. 18:15-17)

<sup>13</sup> Cuaquinon sequin quihualiquilije xolomes pa quinlalilis imajmajuan inminpan huan quintemachilis Dios. Ma yoje, pehuaje quinmajuaje imonextilinjmes yehuanten hual quinhualicaje in xolomes. <sup>14</sup> Cuaquín Jesús quinmilic:

—Xiquinmacahuiltican pa hualasi ca nehual in xolomes huan amo xiquintzacuilican, pampa ilahuelilitlisli in cielos unca pan ipampa yehuanten hual cate quinami xolomes.

<sup>15</sup> Huan quinlalilic imajmajuan inminpan, cuaquinon uyac, canac ojli.

### *Se lacal hual quiptaya miác laquetza ca Jesús* (Mr 10:17-31; Lc. 18:18-30)

<sup>16</sup> Huan xiquita, hualac se capa yihual cataya, quilic:

—Lamaxtini cuali, ¿len cuali nicchías pa nicpías yulilislisli hual amo quiman lamis?

<sup>17</sup> Quilic Jesús:

—¿Leca tichtocayaltía cuali? Se san unca in cuali. Yihual unca Dios. Ma yoje, sinda ticnequi ticpía in yulilislisli, xiquinneltoca ilajtomes Dios.

<sup>18</sup> Quilic in se:

—¿Calía?

Quilic Jesús:

—Sequin cate: Amo tilamictis, amo ticanas sihual hual amo moyaxca, amo tilaxtequis. <sup>19</sup> Amo tiqulis len islacatilisli inahuac oc se, xicmati ximomajti inminlaixpan motajtzin huan monantzin, huan ticlasojlas yihual hual unca monahuac quinami timolasojla.

<sup>20</sup> In lacal yancuic quilic:

—Mochi innojen nyulic niquinneltocatica. ¿Len ayamo nicchíac?

<sup>21</sup> Jesús quilic:

—Sinda ticnequis tiyes se hual quimati quichía mochi hual Dios quinequi, cuaquín xía xicnamaca len ticpía huan xiquinmaca yehuanten hual amo quipialo. Yoje ticpías len hual ipati pin cielo. Cuaquín xichtocatihuala.

<sup>22</sup> Quicaquic in lajtol in lacal yancuic, quicocuc iyolo. Icnotitíac, pampa yec se lacal hual quipiaya míac hual iyaxca.

<sup>23</sup> Cuaquinon Jesús quinmilic imonextilinjmes:

—Annimitzilía neli pampa san ca niman míac chicahualisli huil calaquisi capa unca ilahuelilitisli in cielo yehuanten hual quipialo míac. <sup>24</sup> Oc sejpa annimitzilía pampa amo cataya lachihualisli hué pa se camello quipanhuis iixtololon se lajtzomaloni quinami cataya pa calaquisi capa Dios huelitía se lacal hual quipía míac hual iyaxca.

<sup>25</sup> Quicaquije inon imonextilinjmes, moitaloaya ca míac lamajtilisli, quilije:

—Sinda unca yoje ca se lacal hual quipía míac, cuaquín ¿aqui huil yes laquixtili pa ipolehuilislil ilaijlaculisli?

<sup>26</sup> Jesús quinmitaya huan quinmilic:

—Quinami quitalo lacames, in amo huil panúa. Ma yoje, ca Dios mochi huil panúa.

<sup>27</sup> Cuaquinon quinanquilic Pedro, quilic:

—Xiquita. Tehuanten tijcajcahuaje mochi huan timitztoaje. ¿Len ticpiasi pampa ticchihuaje inon?

<sup>28</sup> Jesús quinnanquilic:

—Neli annimitzilía inon amhuanten hual annectocac. Pan in tonali quiman nihuelitis pan lalticpan nehual ilacal in cielo, nimolalis pan noicpali capa nihuelitis, noicpali hué huan cualtichin, huan amhuanten anmolalis pan doce icpalimes cuajcualtichin pa anquinmilis len quipiasi inminmi-ahuimes in doce lacames hual quipehualtije moxtin yehuanten hual iyaxca in lali Israel. <sup>29</sup> Huan moxtin hual quincajcahuaje inminchan, o inmicnían lacames huan sihuames o inmintajtzitían o inminantzitzían o inminxolomes o inminlalimes, yehuanten quipiasi míac. Quema, Dios quinmacas niman míac moxtin hual quincajcahuaje innojen pampa nechlasojlaloaya míac. Huan amo yoje míac quinlasojlaloaya innojen hual quincajcahuac. Huan innojen hual quincajcahuaje amo quiman huil ajsiloaya cayalo yoje míac quinami in míac hual Dios quinmacas. Huan noje quipiasi in yulilislil hual amo quiman lamis. Quipiasi quinami inminlaxilulislil inon hual iyaxca Dios.

<sup>30</sup> Ma yoje, míac ca yehuanten hual axan monotzalo niman míac yajmo monotzasi míac. Huan míac hual axan amo monotzalo cayasi yehuanten hual monotzasi niman míac.

## 20

*Ilajnamiquiltisli in tequipanujquimes*

<sup>1</sup> 'Ilahuelilitlisli in cielo unca quinami se lalac quiapiaya cuajmili huejué. Quisac cualcan pa quinlaquehuasi tequipanujquimes pa tequipanulosquiaya pa iuvatilan. <sup>2</sup> Mochihuaje ca se lajtulisli pa quichi yahuiaya quinlaxlahui. Cataya je denario tomin pa se tonali. Cuaquin quintilanic pa iuvatilan. <sup>3</sup> Uyac pa chichnahui horas pa huajtzinco, quinmitac oc sequin lacames moquezataloaya pin lajcotiyan, amo quichijtataloaya nindeno. <sup>4</sup> Quinmilic yehuanten: "Xiacan amhuanten noje pa novatilan, huan len yes cuali annimitzlxlahuis." Huan uyaje yehuanten. <sup>5</sup> Huan oc sejpa quisac pa lacualispan huan oc sejpa pa ye horas pa tiolac in teco huan yoje quinlaquehuac lacames. <sup>6</sup> Huan quinami macuili horas pa tiolac uyac pa in lajcotiyan huan oc sejpa quinmitac lacames moquezataloaya huan quinmilic: "¿Leca annoqueztica nican pa mochi in semilhuil anlatzejtica?" <sup>7</sup> Quilije: "Unca pampa amaqui techlaquehuac." Quinmilic: "Xiacan amhuanten noje pa novatilan." <sup>8</sup> Pehuac layuajtic, huan quilic iteco in uvatilan ilaicnani itequipanujquimes: "Xiquinnotza pa hualasi in tequipanujquimes huan xiquinlaxlahui inmintomin. Xipehua ca yehuanten hual hualaje pa macuili horas pa tiolac huan xilami ca aquinojen hualaje quiman pehuaya in semilhuil." <sup>9</sup> Hualaje yehuanten hual pehualoaya tequipanulo pa macuili horas pa tiolac, quinmacaje mochi sejse je tomin denario. <sup>10</sup> Hualaje yehuanten hual tequipanuloaya de quiman pehuaya in semilhuil quijtuticate pampa yahuiaya quinlaxlahui oc se tomin ca in denario. Ma yoje, yehuanten noje quinmacac mochi sejse itomin denario. <sup>11</sup> Huan quiman canaje, cualanije pampa quinlaxlahuic yoje in teco. <sup>12</sup> Quijtuloaya: "Innojen hual hualaje niman pa tiolac jan tequipanuje se hora san huan tiquinlaxlahuic se denario quinami tehuanten. Huan xiquita. Tehuanten itequipanuloaya mochi semilhuil quiman tonaya." <sup>13</sup> Huan in teco quinanquilic se hual cataya ca innojen, quilic: "Nito, amo nimijchihuilijtica len hual amo cuali. ¿Amo timochihuaje ca se lajtulisli pa nimitzlxlahuisquiaya se tomin denario?" <sup>14</sup> Xicana in hual moyaxca huan ximohuica. Nicnequi niclaxlahui aqui hual hualac pa macuili pa tiolac jan quinami nimitzlxlahuía tehual. <sup>15</sup> ¿Amo unca noyaxca pa nicchías quinami nicnequi ca len unca noyaxca? O ¿amo tiquita cuali pampa nehual nicchijtica len cuali?" <sup>16</sup> Yoje aquinojen hual huejcahualo hualalo yesi quinami yehuanten hual pehualo huan yehuanten hual pehualo yesi quinami yehuanten hual huejcahualo hualalo, jan quinami yehuanten hual huejué cayasi quinami yehuanten hual tijtipichin. Unca pampa cate míac yehuanten hual cate lanotzali pa tequipanusi, huan cate naditas hual cate lajtultli.

*Oc sejpa Jesús quinmachiltía pampa yahui miqui  
(Mr. 10:32-34; Lc. 18:31-34)*

<sup>17</sup> Quiman canaya Jesús ojli pa Jerusalén, quinnotzac quinhuicac inhuían in doce imonextilinjimes nepa pan ojli huan quinmilic:

<sup>18</sup> —Xiquitacan. Tialo pa Jerusalén huan nehual ilacal in cielo nechtemacasi in tiopistas huejué huan in lamaxtinijmes, nechtilanisi pa nechmictisi. <sup>19</sup> Nechtemacasi ca yehuanten hual amo judíos, huan nechhuejuecaltisi huan nechpilusi pan se cuahuil. Huan quiman panusi ye tonalijmes niyulis oc sejpa.

*Jacobo huan Juan inminantzin quitemachía Jesús pa quinchihuilis len cuali  
(Mr. 10:35-45)*

<sup>20</sup> Cuaquinon hualac capa yihual inantzin ixolomes Zebedeo, hualac ca ixolomes. In sihual quimolancuacuetzilic quitemachic pa quinchihuil-isquiaya len cuali. <sup>21</sup> Huan Jesús quilic:

—Huan ¿len ticnectica?

Quilic yihual:

—Quiman tipehuas tihuelitis, xicmacahuilti pa innojen omenten noxolomes molalisi se pa momajma cuali huan se pa momajma amo cuali pa huelitisi ca tehual.

<sup>22</sup> Jesús quinanquilic:

—Amo anquimati len anquitemachijtica. ¿Huil anmopepenialtía pa anpanus inon hual nehual nicpiás pa nipanus? Yes quinami ancunisquiaya len niman chichic pa míac tonalijmes. Huan pa amhuanten anyes nolanahuatiniymes anquipiás pa anpanus lacocoltilisli hual cayasi quinami se lacuayatequilisli ca tixuxli. ¿Huil anmopepenialtía pa anpanus inon?

Quinanquilije:

—Huil timochicahuiltilo pa tipanus inon, timopepenialtisi.

<sup>23</sup> Quinmilic Jesús:

—Neli anpanus lacocoltilisli quinami launilisli chichic huan quinami lacuayatequilisli pa tixuxli. Ma yoje, pa anmolalis pa noma cuali huan pa noma amo cuali, inon amo unca noyaxca pa annimitzmacas. NoTajtzin quichijchíac innojen pa sequin hual yihual quinlajtultic pa quipiasi, huan quinlalis yehuanten nepa.

<sup>24</sup> Quiman quicaquije inon innojen diez (majlacli) imonextiliniymes, cualanije ca in omenten icnían. <sup>25</sup> Ma yoje, Jesús quinnotzac moxtin, quinmilic:

—Anquimati quinami in huejueyenten hual huelitilo pan yehuanten pa mochi lalimes, huelitilo chichahuac. Huan yehuanten hual huelitilo mojmosta quinequilo quinnextililo in lacames quinami quipialo lahuelitilisli.

<sup>26</sup> Amo cayas yoje ca amhuanten, cayas quinami inon: Aquí yes quinequi mochía hué ca amhuanten, monequi pa yihual quintequipanuilis moxtin oc sequin. <sup>27</sup> Huan aquí yes quinequi caya in hué ca amhuanten pa anmitzlaicanas, yihual quipiás pa yes in se hual mochías quinami tequipanujquil lailpili pa moxtin. Yihual amo motzacuilis pa quichías in tequipanulisli hual moxtin quixijxiculo pa quichihuasi. <sup>28</sup> Quipiás pa mochías jan quinami nehual ilacal in cielo. Amo nihualaya pan lalticpan pa nechtequipanuilis nehual lacames. Nihualaya pa niquitequipanuilis yehuanten huan pa nimotemacas pa nimiquis. Yoje niclaxlahuis pa inminlamacahualisli míac lacames pa camo polehuisi pampa quinchihuaya laijlaculisli.

*Jesús quinpajtía ome pachacames*

*(Mr. 10:46-52; Lc. 18:35-43)*

<sup>29</sup> Quistiahuiloya yehuanten pin caltilan Jericó, quitocaloaya Jesús míac lalalera. <sup>30</sup> Huan xiquitacan, pa itenco in ojli cataloaya yehuatataloaya ome pachacames, quicaquiloaya pampa panuaya Jesús. Pampín tzajtzije, quilije:

—¡Tata, ti'ixól David, xitechicnili!

<sup>31</sup> Huan in lalalera quinmajuac pa camo nahuatisi. Ma yoje, yehuanten quitzajtzilije chichahuac, quilije:

—¡Tata, ti'ixól David, xitechicnili!

<sup>32</sup> Pampín, moquetzac Jesús, quinnotzac, quinmilic:

—¿Len anquinequi pa annimijchihuilis?

<sup>33</sup> Quilije:

—Tata, xiquinpajti toixtololjmes pa huil tilachiasi.

<sup>34</sup> Quipíac Jesús laicnililisi pa yehuanten, huan quinmatoquile inmixtololjmes. Jan ajnaxcan lachiaje huan pehualoaya quitocalo Jesús.

## 21

### *Jesús calaqui pa Jerusalén*

(Mr. 11:1-11; Lc. 19:28-40; Jn. 12:12-19)

<sup>1</sup> Ajsitihualaloaya yehuanten pa Jerusalén huan hualaloaya pa Betfagé pa in tepetzindi (loma) itoca Olivos. Cuaquinon quintilanic Jesús ome imonextilinijmes. <sup>2</sup> Quinmilic:

—Xiacan pin caltilan hual anmolaixpan, huan jan ajnaxcan anquitas se burra ilpitica huan ixól ca yihual. Xictomacan huan xichhualiquilican.

<sup>3</sup> Huan sinda se anmitzilía len, xiquilican: “Monequi pa in Tata quinpiás yehuanten huan ca nadita yahui quincuepa.”

<sup>4</sup> Inon panuc pa mochías len quijtúa ilajtól Dios ilajtuni hual quijcuiluc:

<sup>5</sup> Xiquilican yehuanten pin caltilan Sión:

“Xiquitacan, huala anmoHué capa amhuanten, yihual hual momacahuiltía, yihual lejcutica pan se burra, paní ixolol se burra hual quilamamilito.”

<sup>6</sup> Cuaquinon uyaje imonextilinijmes, quichihuaje quinami Jesús quinmilic. <sup>7</sup> Quinhuicaje in burra ca ixolol, huan quilalaje inminpan inminlaquemes, huan quilejcultije Jesús huan ipan molalic. <sup>8</sup> Huan in lalalera quinsuhuaje inminlaquemes pan in ojli. Oc sequin quincotonaje inminitzmolinquijmes (ramas) cuahuimes, quinxintiaje pan ojli. <sup>9</sup> Quilaicanaje huan quitocaje in míac lalalera tzajtzitiahuiloaya huan quijtutiahuiloaya:

—¡Ma yuli pa techquixtis pin polehuilisi yihual ixolol David! ¡Ma quilican lajtomes hué inahuac yihual hual hualaya ca ilahuelilitilisi Dios! ¡Ma techquixti pin polehuilisi yihual hual hualac, quisac pin niman cuajtic pin cielo!

<sup>10</sup> Yoje calaquic Jesús pin Jerusalén, huan moxtin yehuanten pin caltilan hué molinije huan majcoquije, quilije:

—¿Aqui in se?

<sup>11</sup> Huan in lalalera quinmililoaya:

—In se ilajtuni Dios itoca Jesús hual moscaltic pin caltilan Nazaret pin lalticpan Galilea.

### *Jesús quichipahua in tiopan hué*

(Mr. 11:15-19; Lc. 19:45-48; Jn. 2:13-22)

<sup>12</sup> Calaquic Jesús pin tiopan hué huan quinquixtic pa quiahuac moxtin hual lanamactataloaya huan lacujtataloaya pin tiopan hué calijtic. Quintzincuepac innojen capa lacames quipatililoaya in tomin. Noje quintzincuepilic inmicpalimes yehuanten hual quinnamacaloaya huilomes. <sup>13</sup> Quinmiliaya:

—Unca lajcuiluli pa ilajtól Dios: “Quitocayaltisqui nocali se cali capa quilajlanilo Dios.” Huan amhuanten anquichihuac quinami se cueva (ostul) capa chantilo laxtequinijmes.

<sup>14</sup> Nepa pin tiopan hué hualaloaya capa yihual pachacames huan yehuanten hual amo huil nejnemiloaya, huan yihual quinpahtic. <sup>15</sup> Yoje quitaloaya in tiopistas huan in lamaxtinijmes innojen hual quinlachiailoaya moxtin ca lamajtilisi. Noje quicaquiloaya quinami in xolomes tzajtziloaya calijtic in tiopan hué, quijtutataloaya: “¡Ma yuli pa techquixtis pin polehuilisi ixól in

Hué David!” Pampín cualanije in tiopistas huan in lamaxtinijmes. <sup>16</sup> Quilije Jesús:

—¿Tijcaquí len quijttucate innojen?

Huan Jesús quinmilic:

—Jo quema. ¿Amo quiman anmomaxtic in hual unca lajcuiluli pa ilajtol Dios hual quijtúa inon? Yoje quijtúa:

Quisalo lajtomes huejué pa tehual pa inmincamac xolomes tipichinchitos huan xolomes hual ayamo mócahuajque pa chichisi.

Huan inminlajtomes yehuanten amo quipialo laijlaculisli.

O Dios, tiquinhueliltic pa quichihuasqui inon.

<sup>17</sup> Cuaquinon quincahuac Jesús huan quisac nepa Jerusalén, uyac pa in caltilan Betania, nepa panuc in layúa.

*Jesús cajua se amacual hual amo sulajtica*

(Mr. 11:12-14, 20-26)

<sup>18</sup> Huan niman pa huajtzinco, mocuepaya pa Jerusalén huan mayantataya.

<sup>19</sup> Quitac se amacual tipichin inahuac in ojli huan uyac capa cataya. Huan amo quitac ilaquilyo nindeno ipan, jan quitac isacayo san. Cuaquinon quilic in cuahuil:

—Ma yajmo quiman caya laquilyo mopan.

Huan jan ajnaxcan huaquic in amacual tipichin nepa capa cataya.

<sup>20</sup> Quitaje inon imonextilinjmes huan moitaje ca lamajtilisli, quilije:

—¿Quinami huaquic jan axcan in amacual tipichin nican capa cataya?

<sup>21</sup> Quinnanquilic Jesús, quinmilic:

—Neli annimitzilía, sinda anquineltoca huan sinda amo anquimahuilía pa anmoyolo cuajnesi amo panus in hual anquitemachis pa Dios anmitzmacas, cuaquín anquichihuís in amacual tipichin inon jan quinami nel nicchihuíc. Huan amo in san. Noje huil anquilis in loma: “Ximoejua, ximolasa pa al huejcalan”, huan yoje quipanus. <sup>22</sup> Huan mochi hual anquitemachis Dios anquipías sinda anquitemachía anquineltocatica pampa yihual anmitzmacas.

*Jesús quipía lahueliltisli*

(Mr. 11:27-33; Lc. 20:1-8)

<sup>23</sup> Cuaquinon calaquic Jesús pin tiopan hué, hualaje capa yihual quiman lamaxtitataya in tiopistas huejué huan inminabuelojmes hueyenten in julije:

—¿Ca aquí ilahueliltisli tiquinchijtica innojen? Huan ¿aquí mitzmacac in lahueliltisli?

<sup>24</sup> Jesús quinnanquilic:

—Annimitzljalanis nehual noje se lajtol, huan sinda annechnanquilis, cuaquín nehual noje annimitzilía ca aquí ilahueliltisli niquinchijtica innojen. <sup>25</sup> ¿Aquí quitilanic Juan Lacuayatequini pa yihual lacuayatequisquiaya? ¿Quitilanic Dios, o quitilanije lacames?

Cuaquinon molaquetzilije yehuanten, moilijtataloaya:

—Sinda tiquijtulo cataya Dios, cuaquín techilis: “Cuaquín ¿leca amo anquineltocac?” <sup>26</sup> Huan sinda tiquijtusi cataloaya lacames, timomajtía inminlaixpan in míc lacames, pampa moxtin quineltoaloca pampa Juan yec se ilajtuni Dios.

<sup>27</sup> Yoje quinanquilije Jesús:

—Amo ticmatilo.

Huan Jesús quinmilic:

—Huan nehual noje amo annimitzilis ca aquí ilahueliltisli niquinchijtica innojen.



*Jesús quinpuhuilía quinami ome xolomes quitequipanuilije inmintajtzin*

<sup>28</sup> Huan quinmilic:

—¿Quinami anquita inon? Quimpiaya se lalac ome ixolomes huan quilic se: “Noxól, xía xitequipanu axan pin uvatilan.” <sup>29</sup> Huan ixól quinanquilic: “Amo nicnequi.” Ma yoje, ca nadita mopatilic iyolo, uyac tequipanuc. <sup>30</sup> Cuaquín uyac quitac in oc se ixól huan quilic pa yas tequipanuc, huan yihual quinanquilic: “Jo quema, Tata, nías.” Ma yoje, amo uyac. <sup>31</sup> ¿Calía ca in omenten quichihuaya quinami quinequiaya itajtzin?

Quilije:

—In xól hual quipatilic iyolo huan uyac tequipanuc.

Cuaquinon Jesús quinmilic:

—Annimitzilía neli pampa yehuanten hual canaló ilapixcalisli tomin pa in lahuelilitisli romano, huan in sihuames amo cuajcuali calaquisi capa Dios huelitía huan amhuanten amo. <sup>32</sup> Yoje cayas, pampa hualac Juan pa anmitznexilisquiaya amhuanten quinami ancanas se ojli melahuac huan cuali. Huan amhuanten amo anguineltocac. Ma yoje, quineltocaje yehuanten hual canaló ilapixcalisli tomin huan in sihuames amo cuajcuali. Huan amhuanten, mas que anquitac in, ma yoje amo anmopatilic anmoyolo pa anquineltocasquiaya.

*Jesús quinpuhuilía in hual quichihuaje in tequipanujquimes ej'elehuis*  
(Mr. 12:1-12; Lc. 20:9-19)

<sup>33</sup> Xijcaquican oc se lapuhualisli hual annimitzmaxtis. Cataya se lalac hué hual quiapiaya míac, quitocac se uvatilan. Quitzacuac itenco, quihuajuanac coyounqil pin tel capa quitelicsalo in uvas, huan quichíac se caltzindi cuajtic capa huil qitalo sinda calaquilo yulijquimes putzames.

Cuaquín quilaquehualtilic sequin tequipanujquimes lachianijmes huan uyac pa oc se lali. <sup>34</sup> Ajsic in tonalijmes quiman yucsiaya in laquilyo. Quintilanic sequin itequipanujquimes pa canalesquiaya in hual iyaxca in laquilyo. <sup>35</sup> Cuaquín in tequipanujquimes lachianijmes quinquitzquije itequipanujquimes in teco, huan se quihuictequije, oc se quimictije huan oc se quilaxilije tixcalimes. <sup>36</sup> Oc sejpa quintilanic in teco oc sequin míac itequipanujquimes, amo ajsiloaya cayalo yoje míac yehuanten hual yihual pehuac quintilanic. Ma yoje, quinchihuilije in tequipanujquimes jan yoje quinami ca yehuanten hual pehuac quintilanic.

<sup>37</sup> Cuaquín quintilanic ixól, ca yihual laquisac, quijtuc: “Quimatisi mo-majtisi ilaixpan noxól.” <sup>38</sup> Ma yoje, quiman quitaje ixól in tequipanujquimes lachianijmes, moilije: “In se unca hual canas in hual iyaxca in teco. Ma tián, ma ticmictican. Yoje cayas toyaxca in uvatilan.” <sup>39</sup> Yoje quihuicaje, quilasaje pa quiahuac in uvatilan, quimictije.

<sup>40</sup> Cuaquinon Jesús quinlajlanic:

—Quiman hualas iteco in uvatilan, ¿len quinchihuilis innojen tequipanujquimes lachianijmes?

<sup>41</sup> Quilije:

—Quinmictis in lacames ej'elehuis yoje tetzcuinuc huan quintemacas in uvatilan oc sequin tequipanujquimes lachianijmes hual quitemacasi in laquilyo pa in tonalijmes quiman yucsis.

<sup>42</sup> Jesús quinmilic:

—Huan ¿amo quiman anmomaxtic pa Dios ilajtol lajcuiluli? Quijtúa: In tel hual quijtuje amo monotza nindeno yehuanten hual quichijtataloaya in cali,

axan mochiác pa in cali itel niman cuali, in tel capa quipehualtijque mochi in cali.

Panuc yoje pampa toTeco quichíac, huan quiman tiquitajque, timoitajque ca lamajtilisli.

<sup>43</sup> Pampín, annimitzíla pampa anmitzquixtilis Dios ilahueliltilisli amhuan-ten huan quintemacas yehuanten hual yulisi quichijtcate quinami Dios quinequi. <sup>44</sup> Aquí huetzis ipan in tel quilajlapanas yihual. Huan sinda in tel huetzis ipan aquí yes, yoje quitesis huan yihual mochas lalpotocli. Nehual niquinami in tel. Ca inon niqijtúa pampa sinda se quinequi quijlacúa nolahueliltilisli, in se polehuis.

<sup>45</sup> Quicaquije in tiopistas huejué huan in fariseos innojen lapuhualisli hual quinmilic Jesús. Quimatiloaya pampa Jesús quinmiliaya pampa yehuan-ten cataloaya quinami innojen lacames ejelehuis pa innojen lapuhualisli.

<sup>46</sup> Pampín quitemuje quinami quiquitzquilosquiaya. Ma yoje, momajtiloaya quiquitzquilo pampa in míac lalacera nepa cataloaya. yehuanten quinel-tocaloaya pampa Jesús yec se ilajtuni Dios, huan pampín amo quinmac-ahuiltilosquiaya pa quiquitzquilosquiaya.

## 22

### *Se monamictilisli hual míac quixijxiculoaya*

(Lc. 14:15-24)

<sup>1</sup> Huan Jesús pehuac quinlaquetzilic oc sejpa, quinlaquetzilic ca lapuhualisli calica quinmaxtiaya, quinmilic:

<sup>2</sup> —Ilahueliltilisli in cielo unca quinami se hué hual quichíac se lacualisli pampa ixól monamictiaya. <sup>3</sup> Huan quintilanic itequipanujquimes pa quinnotzalosquiaya pa hualasi yehuanten hual quinnotzac pan lacualisli. Huan amo quinequiloaya. <sup>4</sup> Oc sejpa quintilanic oc sequin tequipanujquimes, quinmilic: “Xiquinmilican yehuanten yoje: Axan nicpía lachijchihuali mochi pa anquicuas. Nilatilanic pa quinmictisi notoros huan noborregos tojtomahuac. Mochi unca lachijchihuali. Xihualacan pa in lacualisli.” <sup>5</sup> Ma yoje, yehuanten hual quinnotzac amo quinequiloaya quinquilo huan uyaje se pa icuajmili, oc se pa ilanamacaloyan pa lanamaquiltis. <sup>6</sup> Huan in oc sequin quinqutzquije itequipanujquimes in hué, quinchihuilije amo cuali huan noje quinmictije. <sup>7</sup> Cuaquín cualanic míac in hué huan quintilanic iguaches hual quinmictije innojen lamictinijmes huan quichichinuje inmincaltlan yehuanten. <sup>8</sup> Cuaquinon quinmilic itequipanujquimes: “In lacualisli unca lachijchihuali. Ma yoje, yehuanten hual niquinnotzac pa hualasi amo monotzaloaya. <sup>9</sup> Xiacan pa in lajcotiyan capa quisalo in ojlimes huan xiquinnotzacan moxtin hual anquinmitas pa hualasi pan lacualisli.”

<sup>10</sup> Quisaje in tequipanujquimes pan ojlimes, quinechicuje moxtin hual quinmita, yehuanten hual amo cuajcuali huan hual cuajcuali. Yoje tentataya in cali ca yehuanten hual quinnotzaje pa hualasi.

<sup>11</sup> Cuaquinon calaquic in hué, quinmitac moxtin yehuanten huan nepa quitac se hual amo molaquentic ca inahuas in monamictilisli. <sup>12</sup> Quilic: “Nito, ¿quinami ticalaquic nican huan amo ticpiaya in nahuas pa in monamictilisli?” Huan amo huil quinanquiliaya. <sup>13</sup> Cuaquín in hué quinmilic itequipanujquimes: “Xiquilpican imajmajuan huan icxihuajmes, xiclasacan pa quiahuac capa laticumac. Nepa moxtin chocasi chichahuac huan quincua-jcuasi inminlames.” <sup>14</sup> Pampa míac cate lanotzali huan jan naditas san cate lalajtultili pa cayasi Dios ilacames.

*Jesús quijtúa quinami quilaxlahuilo ilapixcalisli tomin*

(Mr. 12:13-17; Lc. 20:20-26)

<sup>15</sup> Cuaquinon uyaje in fariseos huan molaquetziliye pa quimatilosquiaya quinami huil quicuajcuamanalosquiaya Jesús pa quijtusquiaya len lajtol calica huil quimotexpahuuilosquiaya. <sup>16</sup> Yoje quintilanije sequin hual quintocaloaya yehuanten huan sequin hual cataloaya ca in herodistas, quilije:

—Lamaxtini, ticmatilo pampa tehual tiquijtúa len unca melahuac huan ticmactia iojli Dios ca melahualisli. Ticmatilo pampa amo tictemúa quinami ticpaquiltis amaqui ca len tiquilia, huan inon unca pampa tiquita se lacal jan quinami tiquita oc se. <sup>17</sup> Axcán, xitechili quinami tiquita inon. ¿Unca cuali ilaixpan Dios pa ticlaxlahuisi ilapixcalisli in tomin pa in hué romano César?

<sup>18</sup> Quimatic Jesús quinami yehuanten quinequiloaya quimotexpahuililo huan quinmilitic:

—Amhuanten lacuajcuamananjimes, anquinequi annesi quinami lames cuajcuali, huan ma yoje nicmati pampa anquijuttica amo cuali lajtic amhuanten. ¿Leca annehlalilia in calica anquinequi annehmotexpahuilia?

<sup>19</sup> Xichnextili in tomin pa lapixcalisli.

Quihualiquilije in tomin. <sup>20</sup> Jesús quitaya huan quinmilitic:

—¿Aqui iyaxca in layapali huan in lajcuilulisli?

<sup>21</sup> Quinanquilije:

—Iyaxca César in hué.

Cuaquinon quinmilitic:

—Xicmacacan César in hual iyaxca, huan xicmacacan Dios in hual iyaxca yihual.

<sup>22</sup> Quicaquije inon, mocahuaje moiztataloaya ca lamajtilisli. Cuaquinon quicahuaje huan uyaje.

*Quilajlanilo Jesús quinami yulilo oc sejpa*

(Mr. 12:18-27; Lc. 20:27-40)

<sup>23</sup> Cataya in tonali hualaje capa Jesús sequin saduceos. yehuanten quijtulo pampa amo yulilo oc sejpa yehuanten hual miquije. Pampa inon, quilajlanije:

<sup>24</sup> —Lamaxtini, quijtuc Moisés sinda miqui se huan amo quinpiaya xolomes, cuaquín monequi pa monamictis icni ca isihua ihuían icni pa yoje quinpiasi xolomes hual quihuicasi itoca in se hual miquic. <sup>25</sup> Axcán, cataloaya siete (chicome) icnían hual yuliloaya capa tehuanten. Monamictic inmicni hué huan miquic amo quinpixtataya xolomes. Pampín icni canac isihua ihuían icni. <sup>26</sup> Quimpanuc yehuanten jan quinami ca in se, amo quinpiaje xolomes. Huan noje quinpanuc ca in oc sequin icnían, ca moxtin in chicome, huan amo quinpiaje xolomes. <sup>27</sup> Huan quiman lamije miquije moxtin in chicome, cuaquín miquic noje in sihual. <sup>28</sup> Axcán, quiman yulisi oc sejpa, ¿aqui ca in chicome icnían yes ilahuical in sihual? Pampa moxtin canaje.

<sup>29</sup> Jesús quinnanquilitic:

—Anmoixpolúa pampa amo anquimati ilajtol Dios hual unca lajcuiluli, huan amo anquimati ilahuelilitisli Dios. <sup>30</sup> Quiman yulisi oc sejpa yehuanten hual miquije, amo monamictilo huan amo temacasi pa monamictisi.

<sup>31</sup> Cayasi quinami Dios ilanahuatinijmes hual cate pin cielo. <sup>32</sup> Huan inon hual quinmatoca yehuanten hual miquije, neli unca pampa yulisi oc sejpa. ¿Amo quiman anmomaxtic len yihual Dios anmitzilic? Yoje quijtuc: “Nehual

niunca iDios Abrahám huan iDios Isaac huan iDios Jacob.” Dios amo inminDios in mijquimes. Yihual inminDios yehuanten hual yulticate. Pampín yulticate mas que miquiye.

<sup>33</sup> Quicaquiye inon in míac lacames, huan molapolultije ca Jesús ilamaxtilisli.

*Dios ilajtol hué hual amo unca oc se ilajtol yoje hué*

(Mr. 12:28-34)

<sup>34</sup> Quimatije in fariseos quinami Jesús quinsulahuac in saduceos pa yajmo huil monapatisi ca inminlajtomes. Pampín monechicuje capa yihual.

<sup>35</sup> Huan se ca yehuanten hual yec ilamaxtini in lajtol quilajlanic len pa quimatis sinda neli quinanquilisquiaya quinami quijtúa Dios ilajtol, quilic:

<sup>36</sup> —Lamaxtini, ¿calía unca ilajtol Dios niman hué?

<sup>37</sup> Jesús quilic:

—“Ticlasojlas in Tata moDios ca mochi moyolo huan ca mochi moyulilisi huan ca mochi molajnamiquilisli.” <sup>38</sup> In unca in lajtol niman hué huan quipehualtia mochi Dios ilajtomes. <sup>39</sup> In oc se unca quinami in calica quipehualtic: “Ticlasojlas mochi oc se hual unca monahuac quinami timolasojla tehual.” <sup>40</sup> Aquí hual quichía in ome lajtomes, noje quichijtica mochi hual quijtulo Dios ilajtomes huan Dios ilajtunijmes.

*¿Unca Cristo ixolol David?*

(Mr. 12:35-37; Lc. 20:41-44)

<sup>41</sup> In fariseos ayamo mohuicaje. <sup>42</sup> Cuaquín Jesús quinlajlanic:

—¿Quinami anquita inon hual quijtúa quinami unca in Cristo? ¿Aquí ixól yihual?

Yehuanten quilije:

—Yihual ixól David.

<sup>43</sup> Cuaquinon quinmilic Jesús:

—Cuaquinon, ¿quinami unca yoje sinda David quitocayaltic Tata quiman quijsuiluc pan ipampa in Espíritu Santo innojen lajtomes? Quijtúa:

<sup>44</sup> In Tata quilic noTata:

“Ximolali inahuac noma cuali,

huan niquinsulahuas molacocolinijmes huan yesi quinami se icpali pa itzindan mocxihuajmes.”

<sup>45</sup> Axan, sinda David quitocayaltic “noTata”, cuaquín ¿quinami huil yes ixolol David?

<sup>46</sup> Huan amaqui huil quinanquilic se lajtol. Huan pa in tonali huan pa mochi tonalijmes hual ajsitiahuloaya, momajtiloaya moxtin pa quilajlanilosquiaya len.

## 23

*Jesús quinmotexpahuilía in fariseos huan ilamaxtinijmes in lajtol*

(Mr. 12:38-40; Lc. 11:37-54; 20:45-47)

<sup>1</sup> Cuaquinon quinlaquetzilic Jesús in lalalera huan imonextilinijmes, quinmilic:

<sup>2</sup> —Huelitilo in lamaxtinijmes huan in fariseos ca Moisés ilahuelilitilisi huan ca in hual iyaxca Moisés. <sup>3</sup> Pampín, mochi hual anmitzililo, in xicchihuacan huan xiquinneltocacan. Ma yoje, amo xilachihuacan quinami yehuanten lachihualo, pampa quijtulo len quipía pa quichías se, mas que

yehuanten amo quichihualo. <sup>4</sup> Huelitilo quinami quinmilpilijticate lamamanijquimes ej'etic huan unca quinami quinlamamilitilo pani inminhuaj-lacames lacames. Huan yehuanten amo quinequilo quinmijcuanilia nadita in lamamanijquimes ej'etic, amo quinmatocalosquiaya ca se ixerixa yehuanten. <sup>5</sup> Huan mochi in hual quichihualo, san quichihualo pa quinmitasi cuali lacames. Yoje quinchihualo palahuac in latzacualinijmes tijtipichin hual quipixticate laijtic ilajcuilulisli Dios ilajtol, huan quinpilulo pa pani inmin-laixpan huan pa inminmajmajuan. Huan quihuejcanaltilo niman xilanzquil inmincpalmes inminahuas calica molaquentilo, amo cate yoje xilanzquil innojen hual in oc sequin quipialo. <sup>6</sup> Huan quixtocalo molalilo capa lacualo pin fiestas pani in icpalimes hual cate pa in huejueyenten. Huan quixtocalo in icpalimes pa in huejueyenten pin tiopajmes. <sup>7</sup> Quixtocalo pa moxtin quinpialtisi ca miac lamajtilisli quinnozticate "Rabí" pan ojlimes huan pin lajcotiyan hué lajco pin caltilan.

<sup>8</sup> Axan, amhuanten, amo xiquinmacahuiltican pa lacames anmitznotzasi Rabí Lamaxtini, pampa anquipía se anmolamaxtini hual nehual niunca, Cristo. Huan amhuanten anmoxtin anunca anmocnían se ca oc se. <sup>9</sup> Huan amo xicnotzacan amaquí pan lalticpan anmotajtzin, pampa se san unca anmoTajtzin, yihual pin cielo. <sup>10</sup> Huan monequi pa como anquimacahuiltis pa amaquí anmitznotzas "noteco", pampa se san unca anmoteco, yihual Cristo. <sup>11</sup> Yihual hual quitequipanuilía in oc sequin yes in hué capa amhuanten. <sup>12</sup> Pampín, aquí yes quijtúa pa iyolo pampa yihual hué, yihual yes lachihuali tipichin. Huan aquí yes quijtúa pa iyolo pampa unca tipichin yes lachihuali hué.

<sup>13</sup> ¡Quichi anpanus lacocoltilisli amhuanten ilamaxtinijmes in lajtol huan fariseos hual anyuli anquincujcuamantica lacames! Anquichihuilía pa quijtusí pa inminyolo pampa amhuanten anunca lacames niman cuali, huan neli anunca lacuajcuamananijmes. Unca pampa anquitzacuiliía lacames hual canticate in ojli capa quitasi ilahuelilitisli in cielo. Amhuanten amo anquinequi ancana in ojli huan amo anquinmacahuiltía pa canasi yehuanten hual quinequilo canaló.

<sup>14</sup> ¡Quichi anpanus lacocoltilisli amhuanten, ilamaxtinijmes in lajtol huan fariseos, amhuanten lacuajcuamananijmes! Unca pampa anquinquixtilía in calimes in sihuames hual inminlahuicalhuan polehuije. Cuaquí anquichía oración ca miac lajtomes pa anquinmonextilis lacames pampa anunca niman cuali, huan ma yoje anunca lacuajcuamananijmes. Pampín, Dios anmitzmacas lacocoltilisli niman chichahuac hual amo yoje quinmacas oc sequin.

<sup>15</sup> ¡Quichi anpanus lacocoltilisli amhuanten, ilamaxtinijmes in lajtol huan fariseos, lacuajcuamananijmes! Unca pampa anquipanahuía in al huejcalan huan anyahui pa miac lalimes pa anquitemus se pa anquineltoaltis anmolamaxtilisli. Huan quiman anquitas se hual quinequi, cuaquí anquijlacúa ca anmolamaxtilisli. Huan yoje anquichía pa monequis pa panus in lacocoltilisli hual ome ca amhuanten anpanus.

<sup>16</sup> ¡Quichi anpanus lacocoltilisli amhuanten, telaicana nijmes pachacames! Amhuanten anquijtúa: "Aquí yes quilis ilaixpan Dios len yahui quichía, huan quijtúa ca lajtol hual amo mopala pan ipampa in tiopan hué, cuaquí amo quipía pa quichías in hual quilic. Ma yoje, aquí yes quilis ilaixpan Dios ca lajtol hual amo mopala pampa yahui quichía len, huan quilía pan ipampa

in oro calijtic in tiopan hué, cuaquín yihual quipías pa quichías.” <sup>17</sup> ¡Amo anquimati anlajnamiquía, anunca pachacames, amhuanten! ¿Calía ca innojen monotza ca Dios? ¿Unca in oro, o unca in tiopan hué capa Dios mochihuilía lachipahuali in oro pa huil quitas quinami iyaxca? ¡Anquimati unca in tiopan hué hual monotza ca Dios! <sup>18</sup> Huan noje amhuanten anquijtua: “Aqui yes quijtúa ilaixpan Dios pampa yahui quichía len, huan ca lajtol hual amo mopala quijtúa pan ipampa inon capa quilalilo in huendi, cuaquín amo quipías pa quichías. Ma yoje, sinda se quijtúa ilaixpan Dios ca lajtol hual amo mopala pampa yahui quichía len, huan quilía pan ipampa in huendi pa pani capa quilalilo, cuaquín yihual quipía pa quichías.” <sup>19</sup> ¡Amo anquimati anlajnamiquía, anunca pachacames, amhuanten! ¿Calía ca innojen monotza ca Dios? ¿Unca in huendi, o unca inon capa quilalilo capa Dios mochihuilía lachipahuali in huendi pa huil quitas quinami iyaxca? ¡Anquimati unca in capa quilalilo hual monotza ca Dios! <sup>20</sup> Yoje, aqui yes quijtús len ilaixpan Dios ca lajtol hual amo mopala, huan quijtúa pan ipampa inon capa quilalilo in huendi, cuaquín amo jan quijtutica pan ipampa inon capa quilalilo in huendi san. Quijtutica pan ipampa capa quilalilo huan pa mochi huendi hual unca pa pani inon. <sup>21</sup> Huan aqui yes quijtúa len ilaixpan Dios ca lajtol hual amo mopala, huan quijtúa pan ipampa in tiopan hué, yihual amo quijtutica jan pan ipampa in tiopan hué san. Noje quijtutica pan ipampa Dios hual yuli calijtic in tiopan hué. <sup>22</sup> Noje aqui yes quijtúa len ca lajtol hual amo mopala pan ipampa in cielo, yoje yihual quijtutica pan ipampa in icpali cualtichin capa Dios huelitía huan jan yoje quijtutica pan ipampa Dios hual molalía ipan.

<sup>23</sup> ¡Quichi anpanus lacocoltilisli amhuanten, ilamaxtinijmes in lajtol huan fariseos, amhuanten lacuajcuamananijmes! Amhuanten anquimaca Dios se ca mochi diez inminlajlajco menta huan eneldo huan cominos hual anquixca, huan amo anquinequi anquimijnamiquía in lajtomes hual niman monotzalo ca Dios. Cate innojen lajtomes hual anmitznextililo quinami monequi pa anyuli anquichijtica len hual Dios quita cuali pa moxtin. Huan cate innojen lajtomes hual anmitznextililo quinami monequi pa anquimatis anlaicnilía huan quinami monequi pa anquimatis anquilalía anmolanelto-calisli ca Dios. Cate innojen hual monequi pa anquimatis anquichías. Huan noje monequi pa como anmochahuas pa anquichías len quililo in oc sequin lajtomes tijtipichin. <sup>24</sup> ¡Amhuanten telaicananijmes pachacames! Anunca quinami se hual quitzejtzélúa pa quisas se muyol pin al huan quitolúa se camello, pampa ca míac lachialisli anlaquisa anquichijtica in lajtomes tijtipichin huan amo anquinequi anquijnamiquía in lajtomes huejué.

<sup>25</sup> ¡Quichi anpanus lacocoltilisli amhuanten, ilamaxtinijmes in lajtol huan fariseos, lacuajcuamananijmes! Unca quinami ancaltía pa quiahuac in tecomal huan in nixcumil. Ma yoje, pa laijtic cate catzahuac, quinami amhuanten laijtic anmoyolo anunca catzahuac. Anunca catzahuac pampa ancanac mochi hual anquinequic míac. Amo cataya anmoyaxca huan ma yoje anquinmixtequillíc oc sequin pa ancanas. <sup>26</sup> Fariseo pachacal, monequi pa tipehuas timochipajtica molajtic quinami quichipahualo ilajtic in tecomal huan in nixcumil huan cuaquín ancayas chipahuac pa quiahuac.

<sup>27</sup> ¡Quichi anpanus lacocoltilisli amhuanten ilamaxtinijmes in lajtol huan fariseos lacuajcuamananijmes!, pampa amhuanten anquinami in caltzindis layapali iztac hual quichihualo capa quinlalpachulo in mijquimes. Nesilo cualtichin pa quiahuac, huan ma yoje laijtic tenticate ca inminumimes

mijquimes huan ca mochi catzahualisli. <sup>28</sup> Yoje nuso annesi amhuanten noje quinami cuali huan cualtichin huan melahuac pa anmoquiahuac. Ma yoje, lajtic amhuanten autentica ca ilacuajcuamanalisli anmoyolo huan amo anquinequi anquineltoca Dios ilajtol, amhuanten ej'elehuis.

<sup>29</sup> ¡Quichi anpanus lacocoltisli amhuanten ilamaxtinijmes in lajtol huan fariseos lacuajcuamananijmes! Pampa anquinchía in caltzindis capa quinlalpachuje Dios ilajtunijmes, huan anquichijchía cuajcualtichin inminlajnamiquiltinijmes in lacames cuajcuali. <sup>30</sup> Cuaquin anquijtúa: “Sinda tiyuliloaya quiman yuliloaya totajtzitzian, amo tiquinpalehuiloaya quiman quinmictinije Dios ilajtunijmes.” <sup>31</sup> Ca inon anquijtutica nuso pampa amhuanten nojen anuncia inminmiahuimes yehuanten hual quinmictije Dios ilajtunijmes. <sup>32</sup> Axan ¡xilaquistiaca anquichijtica len pehuaje quichi-huaje anmotajtzitzian!

<sup>33</sup> ¡Cuhuames! ¡Amhuanten inminxolomes cuhuames! ¡Quinami huil anmoquixtis pin lacocoltisli capa cayasi yehuanten hual amo iyaxca Dios! <sup>34</sup> Pampín, xiquitacan. Annimitztilanilis Dios ilajtunijmes huan lacames hual quimatilo huan lamaxtinijmes. Sequin anquinmictis, sequin anquinpilus pan cuahuimes. Oc sequin anquinhuitequis pa anmotiopames huan oc sequin anquintojtocas pa quisasi pa se caltilan huan pa oc se. <sup>35</sup> In annitzpanus pa yoje Dios annitzmotexpahuilis amhuanten. Annitzmotexpahuilis pa mochi lacames inminesli latoyahuili, quema, inminesli moxtin lacames cuajcuali hual cataloaya lamictili pan mochi in lalticpan quiman pehuac in lalticpan huan pa axan. Inon unca quiman Abel yec lamictili pa quiman anquimictic Zacarías hual yec ixolol Baraquías. Yihual anquimictic lajco pin tiopan hué huan inon capa quilalilo in huendis. <sup>36</sup> Neli annimitzilia, Dios quinmotexpahuilis inminpampa moxtin yehuanten hual cate lamictili. Quema, Dios annitzmotexpahuilis amhuanten hual anyultica axan.

*Jesús quinchoquila yehuanten hual chantilo pa Jerusalén  
(Lc. 13:34-35)*

<sup>37</sup> ¡Jerusalén, Jerusalén! Yehuanten lajtic tehual, Jerusalén, yehuanten quinmictilo Dios ilajtunijmes huan quinlaxililo tixcalimes yehuanten hual Dios quintilanía. ¡Quichi míac nicnequic niquinnechic yehuanten pa Jerusalén quinami quinnechicúa se lapachuaní iparachitos itzindan inastacapajmes huan amo quinequije! <sup>38</sup> Xiquitacan. Cayasi lacajcahuali chantiticate yehuanten pin caltilan huan Dios amo cayas ca yehuanten. <sup>39</sup> Pampa annimitzilia neli, yajmo annechitas axan pa quiman. San annechitas quiman ajsis in tonali quiman anquijtus: “Ma Dios quipía yihual hual huala ca ilahueliltisli, ichicahualisli in Tata.”

## 24

*Jesús quinmilía pampa in tiopan hué yes laxitinili  
(Mr. 13:1-2; Lc. 21:5-6)*

<sup>1</sup> Quisac Jesús pin tiopan hué, uyajtíca huan ajsitiaje capa yihual imonxetilinijmes. Pehuaje quilaquetzilije quinami cataloaya lachijchihuali cualtichin mochi icalimes in tiopan hué. <sup>2</sup> Huan Jesús quinnanquilic:

—¿Anquinmita mochi innojen? Neli annimitzilia, amo mocahuas nican se tel pan oc se tel hual amo quimayahuisi, mochi quixitini.

*Jesús quinmaxtía quinami quimatisi quiman ajsitihuala in tonali quiman lamis in lalticpan  
(Mr. 13:3-23; Lc. 21:7-24; 17:22-24)*

<sup>3</sup> Cuaquín uyaje pani in loma (tepetzindi) itoca Olivos. Nepa molalic Jesús, hualaje capa yihual imonextilinjmes inminhuán, quilije:

—Xitechili, ¿quiman cayasi innojen? Huan ¿len yes in lanextilisli calica ticmatisi quiman tihualas pa tihuelitis, in lanextilisli calica ticmatisi quiman lamis in lalticpan hual unca axan?

<sup>4</sup> Jesús quinnanquiliic:

—Ximolachilican pa camo anmitzcuaajcuamanas amaqui. <sup>5</sup> Hualasi miác quijttucate pampa quipialo nolahuelilitisli, huan quijtusi: “Nehual niCristo”, huan quincuaajcuamanasi miác lacames. <sup>6</sup> Anmitzlamachiltisi lacames pampa cate moanalisi cajcapa pin lalticpan, moanalisi hual panu-jtticate huan moanalisi hual yalo pehualo. Amo ximomajtican, innojen quipialo pa panusi huan ayamo lamis in lalticpan. <sup>7</sup> Se lahuelilitisli moanas ca oc se lahuelilitisli. Yehuanten pa se lali moanasi ca yehuanten pa oc se lali. Cayas mayandi cajcapa huan miquisi miác. Cayasocolisli, huan laulinis chichahuac cajcapa. <sup>8</sup> Mochi innojen yesi jan quinami pehuasi in miácocolisli hual yalo panulo lacames. Unca quinami mococúa se sihual quiman pehua lacati ixól.

<sup>9</sup> Cuaquinon anmitztemacasi pa anmitzhuejuecaltisi huan anmitzmictisi. Huan moxtin anmitzcocolisi pampa annechneltoca. <sup>10</sup> Pan innojen tonalijmes miác lacames mijcuanisi pa yajmo quitocasi iojli Dios, yajmo quinel-tocasi. Huan motemacasi se huan oc se pa yesi latojtocali. Mococolisi se huan oc se. <sup>11</sup> Huan nesilo cajcapa miác hual quijtusi pampa yehuanten cate Dios ilajtunijmes. Ma yoje, islacatisi, huan yehuanten quincuaajcuamanasi miác lacames. <sup>12</sup> Huan cayasi yoje miác lacames hual yultialo quichijtticate amo cuali. Pampín, miác mocahuasi pa quinlasojlasi oc sequin quinami lalasojanijme. <sup>13</sup> Ma yoje, aqui yes mopepenialtis huan mochichualtis pa panus mochi in amo cuali, yihual Dios quiquixtilis pin polehuilisli. <sup>14</sup> Huan momachiltisi ilamachiltisli cuali nolahuelilitisli pa capa yes chantilo lacames pin lalticpan, pa quimatisi pa mochi lalimes. Cuaquín lantihualas mochi pan lalticpan. Dios laquisas ca in hual quichijtica ca in lalticpan.

<sup>15</sup> 'Pa yina, Daniel ilajtuni Dios quijcuiluc pa iamal, quijcuiluc pampa yahuiaya nesi in hual niman tetzcuinuc hual lacatzahua huan laijlacúa. (Ma quimati len quinequi quijtúa inon mochi sejse hual momaxtitica.) Huan quiman anquitas inon yehuatica pin tiopan hué capa jan unca iyaxca Dios pa cayas, capa in niman chipahuac pin tiopan hué, <sup>16</sup> cuaquín ma cholu aqui cayas pa Judea, ma cholu pan lomas (tepemes). <sup>17</sup> Huan aqui cayas pani pa icali, ma camo temu pa quiquixtis len pa icalijtic. <sup>18</sup> Huan aqui cayas pa icuajmili, ma camo mocuepa pa canas inahuas. <sup>19</sup> ¡Quichi panusi lacocoltilisli yehuanten hual yalo quipialo xolomes huan yehuanten hual lachichiltijtticate innojen tonalijmes! <sup>20</sup> Xictemachican Dios pa camo anquipías pa ancholus quiman cayasi tonalijmes hual sehua, o pa camo panus pan tonali quiman anmosehuía. <sup>21</sup> Unca pampa lacames yalo panulo lacocoltilisli pa in tonalijmes quinami amo quiman panunijme quiman pehuac in lalticpan niman pa yina huan pa mochi in tonalijmes hual lantihualaje ca axan. Huan amo quiman cayas yoje oc sepa quiman panusi innojen tonalijmes. <sup>22</sup> Huan sinda Dios amo quilaliya pa camo huejcahualosquiaya innojen tonalijmes, cuaquín amaqui mocahuaya yultica. Ma yoje, amo cayas yoje. Dios quilalic pa camo huejcahualosquiaya innojen tonalijmes pampa quinlasojla yehuanten hual quinlajtultic pa yesi ilacames.



<sup>23</sup> 'Cuaquín, sinda se anmitzilía: "Xiquitacan, nican unca in Cristo", o "Xiquitacan, nepa unca", amo xicneltocacan. <sup>24</sup> Pampa nesisi lacuajcuamananijmes hual quijtusi islatatijtcate pampa cate cristos yehuanten huan nesisi lajtunijmes hual quijtusi pampa anmitzilijtcate ilajtomes Dios, huan ma yoje islatatijtcate. Quinchihuasi hual pampa innojen in lacames moitasi momajtíticate. Quinchihuasi pampa quinequis quincuaajcuamanasi, sinda huil, yehuanten hual Dios quinlajtultic pa yesi ilacames. <sup>25</sup> Xiquitacan. Axan annimitzilic inon quiman ayamo panuc. Pampín sinda anmitzilisi: <sup>26</sup> "Xiquitacan. Cristo unca nepa capa amaqui chanti", cuaquín amo xiquisacan amhuanten ca umpic. O sinda anmitzilic: "Xiquitacan. Cristo unca nican niman calijtic", amo xiquinneltocacan. <sup>27</sup> Pampa jan quinami pelanía pejtica capa quisa in tonali huan lami capa calaquí in tonali, yoje yes quiman nel nihualas, nel ilacal in cielo. <sup>28</sup> Capa cayas in mijquil, nepa monechicusi in tzopilojmes.

*Jesús quinmilía quinami cayas quiman hualas*  
(Mr. 13:24-37; Lc. 21:25-33; 17:26-30,34-36)

<sup>29</sup> 'Jan axcan quiman lamisi panusi innojen tonalijmes capa panulo miac lacocoltisli, cuaquín laticumactis in tonali huan in mesli amo quinequis lahuis. Huetziasí in luceros (silalimes) pin cielo huan molinisi in iyecames amo cuajcuali pin iyecal hual huelitilo ca lacames amo cuajcuali pan laticpan, quipolusi inminchicahualisli. <sup>30</sup> Cuaquinon moitas pin cielo in lanextilisli hual lamachiltis pampa huala nel ilacal in cielo. Pampín moxtin pin laticpan chocasi quiman quitasi hualajtica ca lahueliltisli chicahuac huan laixpelalisli cualtichin, hualajtica pin mextemimes. <sup>31</sup> Quintilanis ilanahuatinijmes pin cielo ca lancaquetzalisli chicahuac, xahuantica chicahuac ca ilancaquetzaloni. Quinnechicusi yehuanten hual Dios quinlajtultic pa yesi iyaxca. Quinnechicusi quinquixtilijtcate pa mochi cajcapa pin laticpan, pa se itenco in laticpan capa pehua in cielo ca capic unca in oc se itenco in laticpan capa lami in cielo.

<sup>32</sup> 'Ximonextilican in lajtol inahuac in amacuál tipichin calica annimitznextilis len nicnequi niqijtúa: Quiman mochía sejselic iramitas (iitzmolinquimes) huan ixua isacayo, cuaquín anquimatis pampa amo huejcahuas pa ajsis xupanda. <sup>33</sup> Yoje, amhuanten noje quiman anquitas mochi innojen, cuaquín anquimatis pampa ajsitihuala inon hual yahui panúa, quinami se hual tijcaquía jan pa quiahuac in lalapujquil. <sup>34</sup> Annimitzilía neli, mochi inon panus quiman ayamo lamisi yehuanten pin lali hual yulticate nepa. <sup>35</sup> Mochahuasi pa yesi in cielo huan in laticpan. Ma yoje, nolajtomes amo quiman mochahuasi pa yesi, amo quiman motzacuasi pa camo mochihuasi.

<sup>36</sup> 'Ma yoje, amaqui quimati calía tonali huan hora quiman mochihuasi innojen. Amo quimatilo in lanahuatinijmes pin cielo, amo nicmati nehual hual Dios ixól. San Dios noTajtzin quimati.

<sup>37</sup> 'Jan quinami cataya quiman yulini Noé pan laticpan pa yina, yoje cayas quiman nía nihuala nehual ilacal in cielo. <sup>38</sup> Pa innojen tonalijmes quiman Dios ayamo quinmatocctic moxtin, lacames yulinijme lacuajtataloaya huan launtataloaya huan monamicctitaloaya huan quinmacatataloaya inminxolomes sihuames pa monamicctilosquiaya, yoje yulinijme. Cuaquín ajsic in tonali capa calaquic Noé pin arca. <sup>39</sup> Huan amo moijnaniquiltije len yahuiaya panu. Cuaquín huetzic in al hual catani pa pani pin cielo huan lejcuc in al hual catani itzindan in lali huan quinhuicac quinmatocctitaya moxtin. Yoje cayas noje quiman nihualas nehual, ilacal in cielo. <sup>40</sup> Pa in

tonali, cayasi ome lacames pan cuajmili, se yes lahuicali huan in oc se yes lacahuali. <sup>41</sup> Ome sihuames cayasi in omenten testicate pan melal, se yes lahuicali, oc se lacahuali.

<sup>42</sup> Pampín, ximolachilican pa mojmosta anmoijnamiquiltitías, pampa amo anquimati calía tonali yahui huala in Tata. <sup>43</sup> Xicmatican inon: Sinda quimatiaya iteco in cali quiman yahuiaya huala in laxtequini, cuaquín lachiaya huan amo quimacahuiltiaya quichía coyunquil pa calaquisquiaya quixtequili len iyaxca hual cataya calijtic. <sup>44</sup> Pampín, amhuanten noje xicayacan xilachixtiacan, pampa nehual ilacal in cielo nía nihuala quiman amo anquijnamictica inon hual annimitzilic.

*Ome tequipanujquimes, se hual amo quineltoca huan oc se hual quineltoca iteco*

*(Lc. 12:41-48)*

<sup>45</sup> Sinda se teco quipía se tequipanujquil hual quimati huan quineltoca, cuaquín quicahuilis pa quilachilis pan mochi icali huan pa quinmacas moxtin len quicuasi pa quiman monequi pa lacuasi. <sup>46</sup> Quipías paquilisli in tequipanujquil hual quichijtica yoje quiman mocuepa iteco pa ichan huan quita itequipanujquil quitequipanuilijtica yoje. <sup>47</sup> Neli annimitzilía in teco quicahuilis itequipanujquil pa quilachilis pan mochi hual quipía pampa iteco yoje quimati yihual itequipanujquil quimati quitequipanuilia cuali. <sup>48</sup> Huan sinda itequipanujquil mochías amo cuali, yihual pehua quijtúa laijtic yihual: “Huejcahua pa hualas noteco.” <sup>49</sup> Yoje pehua quinhuitequía icnían tequipanujquimes huan pehua lacua huan lahuana ca in lahuanquimes. <sup>50</sup> Cuaquín hualas iteco pan se tonali quiman amo cayas quichixtica, se tonali hual amo quimatiaya. <sup>51</sup> Huan iteco quimacas lacocotilisli chichahuac. Quitilanis pa quipías in hual quipiasí yehuanten hual yuliloaya lacuajcuamantataya inminlaixpan moxtin. Cuaquín chocas huan quincuajcuas ilames.

## 25

*In majlaci sihuames yajyancuic*

<sup>1</sup> Cuaquín huil quijtúa se pampa ilahueliltilisli in cielo unca quinami diez sihuames yajyancuic hual quinhuicaje chahuac huan inmintapalquitas pa lalahuisi huan uyaje pa se monamictilisli pa quisalosquiaya quinamiquilo in local hual monamicatiaya. <sup>2</sup> Cinco (macuili) ca in sihuames yajyancuic amo quimatiloaya huan in oc sequin macuili quimatiloaya. <sup>3</sup> Yehuanten hual amo quimatiloaya amo quihuicaje ca yehuanten oc sequin tapalquitas ca chahuac, san in hual cataya laijtic inmintapalquitas. <sup>4</sup> Yehuanten hual quimatiloaya quihuicaloaya chahuac pa inmintapalquitas pa quiman quinequiaya. <sup>5</sup> Huan quinami huejcahuac hualac in local hual monamicatiaya, quipiaje cochilisli in sihuames yajyancuic huan cochije. <sup>6</sup> Cuaquín quinami pa lajco layúa mocaquic tzajtziye, quijtuje: “¡Axan huala in laca! ¡Xiquisacan xicnamiquican!” <sup>7</sup> Moxtin in sihuames ejsaje huan moquetzaje pa quichijchihuasi inmintapalquitas. <sup>8</sup> Huan yehuanten hual amo quimatiloaya quinmilije yehuanten hual quimatiloaya, quil: “Xitechmacacan nadita anmochahuac pampa mosejticate totapalquitas”, quil. <sup>9</sup> Huan in sihuames hual quimatiloaya quinnanquiliye: “Amo huil, pampa cuaquín amo techajsi tehuanten huan amhuanten. Monequi pa anyahuisi capa in lanamacanijmes huan ximocuhuilican chahuac.” <sup>10</sup> Quiman uyaje in macuili hual amo quimatiloaya pa quimocuhuilisli, cuaquín ajsic yihual hual

monamictiaya. Calaquije ca yihual yehuanten hual quipialoaya chahuac, calaquije pan monamictilisli, cuaquinon cataya latzacuali in lalapujquil. <sup>11</sup> Panuc nadita, ajsije innojen oc sequin sihuames yajyancuic pan lalapujquil quinoztataloaya: “¡Tata, Tata, xitechlapuli!” <sup>12</sup> Huan yihual quinnanquilic: “Neli, annimitzilía da amo annimitziximati.”

<sup>13</sup> Cuaquinon Jesús quinmilic:

—Xilachixtiacan, pampa amo anquimati in tonali huan in hora quiman nihualas nehual ilacal in cielo.

*Se lapuhualisli hual lanextilía quinami sequin quimiactije pocuinijmes tomin*

(Lc. 19:11-27)

<sup>14</sup> ¡lahuelilitlisli in cielo unca jan quinami se lacal hual yahui pa oc se lali, huan quiman ayamo quisac, quinnotza itequipanujquimes, quintemacac tomin pa quilachilisi.

<sup>15</sup> 'Se ca yehuanten yihual quimacac quinami macuili mil tomin, ca oc se quimacac ome mil, huan ca oc se quimacac se mil. Cuaquín mohuicac pa oc se lali. <sup>16</sup> In tequipanujquil hual quipíac macuili mil lacuhuac huan lanamacac ca in tomin, huan monechiculic oc sequin macuili mil. <sup>17</sup> Jan yoje monechiculic oc sequin ome mil in se hual quipíac ome mil tomin. <sup>18</sup> Huan in se hual quipíac se mil uyac lahuajuanac huan quilatic itomin iteco pin lali.

<sup>19</sup> Cuaquín, quiman panuje míac tonaliijmes, mocuepac inminteco innojen tequipanujquimes huan ca yehuanten pehuac laquetzac inahuac itomin.

<sup>20</sup> Hualac ca yihual in se hual quipíac in macuili mil tomin, quihualiac ca yihual oc sequin macuili mil tomin, quilic: “Tata, tichtemacac macuili mil tomin huan xiquita, nimitznechiculic oc sequin macuili.” <sup>21</sup> Quinanquilic iteco: “Ticchíac cuali, tel tiunca se tequipanujquil cuali hual nicmati huil ticchía mochi cuali. Ticchihuac cuali ca nadita. Pampín nimitzmacas lahuelilitlisli ca míac. Axan tía tiquitas quichi paquilisli huil nimitzmaca. Xicalaquí capa nehual.” <sup>22</sup> Cuaquín hualac in se hual quipíac in ome mil tomin, quilic: “Tata, tichtemacac ome mil tomin. Xiquita, nimitznechiculic oc sequin ome mil.” <sup>23</sup> Iteco quinanquilic: “Ticchíac cuali, tel tiunca se tequipanujquil hual nicmati huil ticchía mochi cuali. Ticchiac cuali ca nadita. Pampín nimitzmacas lahuelilitlisli ca míac. Axan tía tiquita quichi paquilisli huil nimitzmaca. Xicalaquí capa nehual.” <sup>24</sup> Quiman hualac pa iteco in se hual quipíac in se mil tomin, quilic: “Tata, nimitziximati quinami tiunca se lacal chicahuac pa moyolo. Tilapixca capa amo tilatocac huan tilapejpena capa amo tilaxinic. <sup>25</sup> Huan nimomajtic, pampín niclatic pin lali motomin. Xiquita, nican ticpía len moyaxca.” <sup>26</sup> Iteco quinanquilic: “Elehuis tequipanujquil tehual, tilatzehui. ¿Ticmati nuso pampa nilapixca capa amo nilatocac huan nilapejpena capa amo nilaxinic? <sup>27</sup> Pampín ticpiaya pa tictemacasquiaya notomin yehuanten hual quilanehuilo tomin. Cuaquín quiman nihualaya, nicpiaya notomin ca imiactilisli.” <sup>28</sup> Cuaquín quinmilic yehuanten hual nepa cataloaya: “Xijquixtilican in mil tomin huan xicmacacan yihual hual quipía in diez mil tomin.” <sup>29</sup> Pampa aquí quipía, yihual quimacasi noje oc sequin huan quipías niman míac pa cajcoquis. Aquí hual amo quipía, quiquixtilisi in nadita hual quipía. <sup>30</sup> Huan in tequipanujquil hual amo monotza, xiclasacan pa quiahuac capa laticumac. Nepa chocasi huan quincujcuasi inminlames.

*Quijtúa quinami Dios quinmotexpahuilis yehuanten hual yulilo pa mochi lalimes*

<sup>31</sup> Quiman nihualas nehual ilacal in cielo, nihualas quinami se hué, huan Dios ilanahuatinijmes pin cielo nechyahualusi. Cuaquín nimolalis pan noicpali hual laixpelas cualtichin. <sup>32</sup> Umpa quinnechicus nolaixpan moxtin yehuanten hual yulinijme pa mochi inminlalimes. Niqunxiluilis sequin huan oc sequin quinami in lachiani quinxiluilía iborregos pa camo cayasi ca ichivos. <sup>33</sup> Quinlalía in borregos pa ima cuali huan quinlalía in chivos pan ima amo cuali. <sup>34</sup> Cuaquín niqunmilis yehuanten hual cate pan noma cuali: “Xihualacan nican amhuanten hual anquipaquiltía noTajtzin, xicpicacan pa anmoyaxca in hual anmijchihuilic Dios quiman quipehualtic mochi. <sup>35</sup> Inon anquipías pampa quiman nimayantataya, annehlaualtic, niamictataya huan annehlauniltic, nicataya se hual amo annehximatiaya huan annehnamiquic quinami se ca amhuanten. <sup>36</sup> Nicataya nacatil huan annehlaquentic, nicataya cocoxquil huan annehpaxalulic, nicataya latzacuali pin calijtic, huan anhualac capa nehual pa annehpalehuis.” <sup>37</sup> Cuaquín quinanquilisi yehuanten hual quipialo cuali inminyolo, quilisi: “Tata, ¿quiman timitzitaje timayantataya huan timitzlacualtije? ¿Quiman timitzitaje tiamictataya huan timitzlauniltije? <sup>38</sup> ¿Quiman timitzitaje quinami se hual amo timitziximatiloaya huan timitznamiquije quinami ticataya se ca tehuanten, o nacatil huan timitzlaquentije? <sup>39</sup> Huan ¿quiman ticataya cocoxquil, o latzacuali pin calijtic huan timitzpaxalulije?”

<sup>40</sup> Niquinnanquilis huan niqunmilis: “Neli annimitzilía pampa mochi hual anquichihuilic se ca innojen nocnían, mas que yec in niman tipichin ca yehuanten, yoje cataya quinami annehchihuilijtataya nehual.”

<sup>41</sup> Cuaquín niqunmilis yehuanten hual cate pa noma amo cuali: “Xiquisacan capa nehual ca yoje, amhuanten ej’elehuis, ximijcuanican pa yajmo ancayas nican, pa anyas pin tixuxli hual amo quiman sehuis, tixuxli lalalatlili pa in lili huan ilanahuatinijmes. <sup>42</sup> Pampa nimayantataya huan amo annehlaualtic, niamictataya huan amo annehlauniltic. <sup>43</sup> Nicataya se hual amo annehximatiaya huan amo annehnamiquic quinami se ca amhuanten. Nicataya nacatil, huan amo annehlaquentic. Nicataya cocoxquil huan latzacuali pin calijtic huan amo annehpaxalulic.” <sup>44</sup> Cuaquín nechnanquilisi yehuanten noje, quilisi: “Tata, ¿quiman timitzitaje timayantataya o tiamictataya o quinami se hual amo timitziximatiloaya o nacatil o cocoxqui o latzacuali pin calijtic huan amo timitzpalehuije?” <sup>45</sup> Huan nehual quinami hué niqunmilis: “Neli annimitzilía pampa mochi hual amo anquichihuilic se ca innojen nocnían, mas que yec in niman tipichin, yoje amo annehchihuilic nehual.” <sup>46</sup> Cuaquín innojen yasi pa in lacocoltilisli hual amo quiman lamis, huan yehuanten hual quipiaje inminyolo cuali yasi capa amo quiman mocahuasi pa yulisi cuali.

## 26

*Quitemulo quinami huil quiquitzquisi Jesús*  
(Mr. 14:1-2; Lc. 22:1-2; Jn. 11:45-53)

<sup>1</sup> Yoje, quiman Jesús lamic quinmilic mochi inon, quinmilic imonextilini-jmes:

<sup>2</sup> —Anquimati pampa ajsis in ilacualisli pascuas axan ca ome tonalijmes. Cuaquín nechtemacasi pa nechpilusi pan se cuahuil nehual ilacal in cielo.

<sup>3</sup> Cuaquinon pan innojen tonalijmes monechicuje in tiopistas huejué huan abuelojmes inminhueyenten in judíos huan ilamaxtinijmes in lajtol.

Monechicuje pa ilajcotiyan icali cualtichin Caifás, yihual ihué in tiopistas. <sup>4</sup> Nepa molaquetziloaya quinami yahuilooaya quiquitzquilo Jesús ca lacuacjuamanalisis pa quitilani pa quimictisi. <sup>5</sup> Ma yoje, quijtuloaya:

—Ma camo ticchihuacan quiman panujtica in fiesta pa camo majcoquisi in lalalera pa moanasi ca tehuanten.

*Se sihual quixahuilía Jesús*

(Mr. 14:3-9; Jn. 12:1-8)

<sup>6</sup> Jesús cataya pa icali Simón hual quipiani in cocolisli itoca lepra huan pampín quitocayaltinjme in Leproso. <sup>7</sup> Huan ajsic capa Jesús se sihual quihualicatataya se tapalcal lachihuali ca alabastro. In tapalcal tentataya ca chahuac hual ajuíac huan ipatiaya míac. Jesús cataya pan lacualisli huan in sihual quitoyahuac in chahuac pa itzontecon Jesús. <sup>8</sup> Quitaje inon imonextilinjmes, cualaniloaya, pehualoaya quijtulo:

—¿Pa len quipoluc yoje in chahuac? <sup>9</sup> Pampa huil quinamacaloaya in chahuac pa míac tomin huan huil quinmacaloaya yehuanten hual amo quipialo míac, yoje pa quinpalehuilosquiaya.

<sup>10</sup> Quiman Jesús quimatic len quijtuloaya, quinmilic:

—¿Leca anquimaca tequil in sihual? Nejchihuilic len cuali nehual.

<sup>11</sup> Mojmosta anquinpía ca amhuanten yehuanten hual amo quipialo míac. Nehual amo anyahuí annehpía mojmosta. <sup>12</sup> Quiman yihual nechtoyahuilic in chahuac hual ajuíac pan nocuerpo, yoje nejchijchihuilic nocuerpo pa quiman nechlalpachusi. <sup>13</sup> Annimitzilía neli, capa yes quinnahuatilo in nolamachiltisli cuali pa mochi in lalticpan, cuaquín quinnahuatisi noje inon hual nejchihuilic yihual nehual, pa yoje moxtin quijnamiqisi inon hual nejchihuilic.

*Judas huan in tiopistas huejué quichihualo inminlajtulisli*

(Mr. 14:10-11; Lc. 22:3-6)

<sup>14</sup> Cuaquinon uyac in se imonextilini hual motocaya Judas Iscariote, uyac capa in tiopistas huejué. <sup>15</sup> Quinmilic:

—¿Quichi annechlahuis sinda annimitztemaca yihual?

Huan mocahuaje pa quilaxlahuis ca plata, ca treinta (sempuhualihuan-majlacli) tomin. <sup>16</sup> Huan jan axcan quitemujtinemiaya quiman cuali huil quintemacas Jesús ca yehuanten.

*Jesús quinnextilía quinami tiquijnamiqisi*

(Mr. 14:12-25; Lc. 22:7-23; Jn. 13:21-30; 1Co. 11:23-26)

<sup>17</sup> Pan tonali quiman pehuac in fiesta (ilhuil) quiman quicualo in pan hual amo quipía laxocoyajquil, hualaje capa Jesús imonextilinjmes, quilije:

—¿Capa ticnequí pa ticyucxiltisi in nacal pa huil tijcuas iborreguito in pascua?

<sup>18</sup> Quinmilic:

—Xiajtican pin caltilan pa icali in lalal huan xiquilican: “Quijtúa in Lamaxtini: Amo huejcahua pa nechajsis quiman nipanus nolacocoltilisli. Pampín nía nijcua iborreguito in pascua ca nomonextilinjmes pa mochan.”

<sup>19</sup> Quichihuaje quinami quinmilic Jesús, huan quiyucxiltije iborreguito in pascua.

<sup>20</sup> Quiman layuajtic, Jesús cataya pan lacualisli ca in doce (majlacli-huanome) imonextilinjmes. <sup>21</sup> Huan quiman lacuajtataloaya, quinmilic:

—Annimitzilía neli pampa se ca amhuanten yahuí nechtemaca ca nolacocolinjmes.

<sup>22</sup> Huan icnotiloaya niman míac, pehualoaya quililo mochi sejse:

—¿Amo unca nehual, Tata?

<sup>23</sup> Huan quinnanquilic Jesús:

—Yihual hual huan nehual tijcalactilo tomajma pin xicali ca altzindi chichic, yihual in se hual nechtemacas. <sup>24</sup> Nehual ilacal in cielo, nía nicana in ojli hual Dios nechlalilic quinami unca lajcuiluli pin iamal ilajtol. Ma yoje, ¡quichi panus lacocoltilisli in lacal hual nechtemaca ca nolacocolinijmes nehual ilacal in cielo! Cataya cuali pa in lacal sinda amo lacatiaya.

<sup>25</sup> Quinanquilic Judas in hual quitemacasquiaya, quilic:

—¿Amo unca nehual, Lamaxtini?

Jesús quinanquilic:

—Tehual tiquijtuc.

<sup>26</sup> Lacuajtataloaya yehuanten, Jesús canac in pan pa imajmajuan, quisehuic Dios, huan quilapanac. Cuaquinon quinmacac imonextiliniymes, quinmilic:

—Xicanacan huan xijcuacan. In nocuerpo.

<sup>27</sup> Cuaquinon canac in tapalquita pa imajmajuan, quisehuic Dios, cuaquín quinmacac, quinmilijtica:

—Xicunican amoxtin iayo uva coc pin tapalquita. <sup>28</sup> Inon noesli hual quichía pa yes cuali Dios ilajtulisli yancuic ca amhuanten. Amo lamis in lajtulisli. Noesli toyahuis pa míac pa quinquixtilis yehuanten inminlajlaculisli, Dios quinpujpuhuas. <sup>29</sup> Huan annimitzilía pampa yajmo nicunis in iayo uva coc. Ma yoje, quiman noTajtzin ilahueliltlisli pin cielo pehua monextía pan lalticpan, cuaquín pa in tonali nicunis yancuic ca amhuanten.

*Jesús quilía Pedro pampa yahui quijtúa pampa amo quiximati*  
(Mr. 14:26-31; Lc. 22:31-34; Jn. 13:36-38)

<sup>30</sup> Cuaquín quicantaruje (quicuicaje) innojen lajtomes huejué pa Dios, huan umpa uyaje pa in loma (tepetzindi) hual itoca Olivos. <sup>31</sup> Cuaquinon Jesús quinmilic:

—Anmoxtin anyahui annehcajcahua axan in layúa, pampa anpinahuas pa annehpiás nehual pa anmolamaxtini. Yahui caya yoje pampa Dios ilajtol lajcuiluli quijtúa: “Nicmictis in lachiani hual quinmita in borregos, huan in borregos yesi lasemanali ca capic yes.” <sup>32</sup> Ma yoje, quiman niyultica oc sejsa, nía annimitzlaicana amhuanten pa Galilea.

<sup>33</sup> Cuaquinon Pedro quilic:

—Mas que moxtin mitzcajchualo pampa pinahuasi mitzpiasi pa inminlamaxtini, nehual amo quiman nimitzcajcahuas.

<sup>34</sup> Huan Jesús quilic Pedro:

—Nimitzilía neli pampa axan pan in layúa ayamo xahuanis in gallo, huan tehual tiquijtus pampa amo tichiximati, tiquijtus sejsa huan oc sejsa, quema, tiquijtus ca ye lajtulisli.

<sup>35</sup> Pedro quilic:

—Mas que nicpiaya pa nimiquis ca tehual, damo niquliaya pampa amo nimitziximati.

Huan yojque quijtuje moxtin imonextiliniymes.

*Jesús quilajlanía Dios pin lajcotiyan Getsemaní*  
(Mr. 14:32-42; Lc. 22:39-46)

<sup>36</sup> Cuaquinon hualaje ca imonextiliniymes pan se lajcotiyan itoca Getsemaní, huan Jesús quinmilic:

—Ximolalican nican huan nehual nías ca umpic pa niclajlanis Dios.

<sup>37</sup> Huan quinhuicac ca yihual Pedro huan in ome ixolomes Zebedeo huan pehuaya icnoti niman mías, mococujtiahuiaya niman mías pa iyolo.

<sup>38</sup> Cuaquinon quinmilic:

—Nechcocojtica noyolo mías, huan nilamati quinami nimictica. Ximocahuacan nican amhuanten huan xilachiacan ca nehual.

<sup>39</sup> Cuaquinon Jesús uyac nadita huejquita, huetzic pa iixco, quilajlanic Dios, quilic:

—NoTajtzin, sinda huil, ma camo nechpanu in hual yahui nechpanúa. Ma yoje, ma camo mochía quinami nicnequi, ma mochía quinami tehual ticnequi, inon ma ye.

<sup>40</sup> Cuaquinon mocuepac pa capa cataloaya yehuanten, quinmitac coxtataloaya, huan yihual quilic Pedro:

—¿Amo huil anlachía jan se hora san ca nehual? <sup>41</sup> Ximocahuacan anejsatica huan xiclaflanican Dios, pa yoje amo anmitztilanilis anmoyolo Satanás. Neli pa anmoyolo anquinequi anquichía cuali. Ma yoje, anmocuerpo (anmonacayo) amo quipía chichahualisli pa quichías.

<sup>42</sup> Oc sepa uyac huan yoje que quilajlanic Dios, quilic:

—NoTajtzin, sinda inon hual yahui nechpanúa amo huil yes lapatili, cuaquín ma mochía quinami ticnequi.

<sup>43</sup> Huan oc sepa quiman mocuepac capa cataloaya imonextilinjmes, quinmitac coxtataloaya pampa quinyamantataya in cochilislí.

<sup>44</sup> Quincahuac yehuanten huan oc sepa uyac, quilajlanic Dios quilijtataya oc sepa in lajtomes hual lamíc quijtuc. Yoje quilajlanic ca ye lajlanilislí.

<sup>45</sup> Cuaquinon hualac capa cataloaya imonextilinjmes huan quinmilic:

—Ancochi huan anmosehuía pa in nadita hual anmitzcahuilía. Xiquitacan, axan ajsic ilajco in layúa quiman nehual ilacal in cielo nicayas latemacali pa nechquitizquisi in lacames laijlaculi. <sup>46</sup> Ximoquetzacan, ma tiacan. Xiquitacan, axan yihual hual nechtemaca huala.

### *Quiquitzquilo huan quihuicalo Jesús*

*(Mr. 14:43-50; Lc. 22:47-53; Jn. 18:2-11)*

<sup>47</sup> Huan ayamo lamiaya laqueztataya Jesús, xiquitacan, hualaya Judas, in se imonextilini ca in doce. Ca yihual hualaloaya se lanechiculisli hual yeje lacames hual in tiopistas huejué huan inminhuejueyenten in judíos quintilanije. Quimpixtihualaloaya cuahuimes huan teposli calica moanalo guaches. <sup>48</sup> Huan Judas hual quitemacaya Jesús quinmacac in mías lacalera se lanextilislí, quinmilic:

—Aqui yes nictenamiquis, yihual in se, xijquitzquican.

<sup>49</sup> Huan jan axcan hualaya ca Jesús, quilic:

—¡Ma Dios mitzpiá, Lamaxtini!

Huan quitenamiquic. <sup>50</sup> Jesús quinanquilic:

—Nito, ¿pa inon tiunca nican?

Cuaquinon hualaje, molaxilije inmajmajuan pani Jesús huan quiquitzquijquisaje.

<sup>51</sup> Ca inon, xiquitacan, se hual cataya ca Jesús quixilanic imajma huan quiquixitiquisac iteposli pa moanalislí, quimacac se latzontequilislí itequipanujquil in tiopista hué, quicotonilic se inacas. <sup>52</sup> Jesús quilic:

—Ximopili moteposli capa monequi mocahuas. Moxtin hual moanalo ca teposli pa moanalislí noje miquisi pan ipampa in teposli. <sup>53</sup> ¿Amo ticmati nehual huil niclaflanía noTajtzin huan Yihual nechtilanilis jan ajnaxcan doce batallones ca ilanahuatininjmes guaches hual cate pin cielo? Quema, huan oc

se sinda nicnequiaya. <sup>54</sup> Ma yoje, sinda yoje nicchihuaya, ¿quinami lamiaya mochía Dios ilajtol lajcuiluli hual quijtúa pampa monequi pa nechpanus inon?

<sup>55</sup> Cuaquinon Jesús quinmilic in míac lalacera, quinmilic:

—¿Anquisac ca teposlimes huan cuahuimes quinami anquisaya anqui-quitzqui je laxtequini? Itequi nimolaliaya pin tiopan nilamaxtitataya huan amo anechquitzquic. <sup>56</sup> Ma yoje, mochi inon panujtica pa yoje lamis mochías len quijcuiluje ilajtunijmes Dios.

Cuaquinon moxtin imonextiliniymes quicajcahuaje, choluje.

*Jesús inminlaixpan yehuanten hual yeje in Lanechiculisli Hué*  
(Mr. 14:53-65; Lc. 22:54-55, 63-71; Jn. 18:12-14,19-24)

<sup>57</sup> Yehuanten hual quiquitzquije Jesús quihuicaje ca ilaixpan Caifás in tiopista hué, capa cataloaya lanechiculi lamaxtinijmes in lajtol huan inmin-huejueyenten in judíos. <sup>58</sup> Pedro quitocac nejnentataya huejca. Ajsic pa ilajcotiyan icali in tiopista hué. Nepa calaquic huan molalic ca in guaches pa quitasquiaya quinami yahuiaya laquisa mochi inon.

<sup>59</sup> In tiopistas huan in oc sequin ca in Lanechiculisli Hué quintemuloaya lacames hual quiqtulosquiaya latexpahuilisli ilaixpan Dios ca lajtomes hual amo mopalalo. Yojque huil quitilanilosquiaya Jesús pa yesquiaya lamicitili. Huan quema, quintemuloaya lacames hual islacatilosquiaya quiqtutataloaya ilaixpan Dios pampa quiqtuloaya melahuac. <sup>60</sup> Ma yoje, amo quitaje lacames hual huil quiqtuloaya len ca lajtol melahuac, mas que míac lacames islacatije inahuac yihual. Cuaquín lamije hualaje inminlaixpan ome lacames islacatinijmes. <sup>61</sup> Quimotexpahuilije, quiqtuje:

—In se quiqtuc: “Nehual huil nicxitinía Dios itioipan hué huan quiman panusi ye tonalijmes huil nicchías oc sejpá.”

<sup>62</sup> Cuaquinon moquetzac in tiopista hué, quilic Jesús:

—¿Amo ticnanquilía nindeno inahuac in hual yehuanten mitzmotexpahuilijtcate?

<sup>63</sup> Huan Jesús amo nahuatic. Cuaquinon in tiopista hué quilic:

—¡Nimitzilía pa titechilis ilaixpan Dios hual yuli, xitechili sinda tehual tiCristo, Dios ixolol!

<sup>64</sup> Jesús quilic:

—Nehual niunca, quinami tiquiqtúa. Ma yoje, annimitzilía neli, anechitas nehual ilacal in cielo nimolalijtica pa ima cuali Dios hual quipía in chichahualisli niman hué. Annechitas nihualajtía pan imextemimes in cielo.

<sup>65</sup> Cuaquinon quitzayanic inahuas in tiopista hué. In quichihuaya pa lanextilisquiaya quinami cualanic míac pampa quiqtuc inon Jesús, huan quiqtuc:

—¡Quihuejuecaltic Dios! ¡Yajmo monequi pa tiquintemusi oc sequin lacames pa quimotexpahuilisli! ¡Xcan, xiquitacan! ¡Anquicaquic in lahuejuecaltisli! ¿Quinami anquíta?

<sup>66</sup> Yehuanten quinanquilije, quilije:

—Quipías pa miquis.

<sup>67</sup> Cuaquinon quichijchaje pa iixco huan quitecuaje chichahuac ca inminmajmajuan. Oc sequin quitecuaje ca se ojtal, quilije:

<sup>68</sup> —Tehual tiCristo, pampín, ¡xilajmati aquí mitztecucal!

*Pedro quinmilía pampa amo quiximati Jesús*  
(Mr. 14:66-72; Lc. 22:56-62; Jn. 18:15-18,25-27)



69 Panujtataya Jesús inon, nepa pa quiahuac pin lajcotiyan cataya Pedro molalijtataya. Hualac capa yihual se tequipanujquil sihual yancuic, quilic:

—Tehual noje ticataya ca Jesús in galileteco.

70 Huan yihual Pedro quilic pampa no inminlaixpan moxtin, quilic:

—Amo nicmati in hual tiquijtutica.

71 Cuaquín quisac Pedro pa in lalapujquil huan nepa oc se tequipanujquil sihual yancuic quitac huan quinmilic yehuanten hual nepa cataloaya:

—In se noje cataya ca Jesús in nazareteco.

72 Huan oc sejpa quijtuc Pedro pampa no, quillijtataya quinami ilaixpan Dios, quijtuc:

—Amo niquiximati in lalac.

73 Quiman panuc se nadita, hualaje capa yihual yehuanten hual moquez-tataloaya nepa, quilije Pedro:

—Tehual nuso tiunca ca yehuanten noje pampa tilajtúa quinami yehuan-ten in galiletecos. Molajtol technextilía inon.

74 Cuaquinon pehuac quinotzac Dios pa quilalilis ila'ajualisli ipan sinda in hual yehuanten quijtutataloaya inahuac yihual cataya melahuac. Huan quijtuc ilaixpan Dios ca lajtomes hual amo mopalalo, quinmilic:

—Amo niquiximati in lalac.

Huan jan ajnaxcan xahuanic in gallo. 75 Cuaquinon Pedro quijnamiquic len Jesús quilic: “Ayamo xahuanis in gallo, huan tiquijtuc ca ye lajtulisli pampa amo tichiximati.” Huan Pedro quisac pa quiahuac huan pehuac chocac mías.

## 27

### *Quitemacalo Jesús ca Pilato*

(Mr. 15:1; Lc. 23:1-2; Jn. 18:28-32)

1 Cuaquín huajtzinco quiman lanesic mochihuilije se lajtulisli in tiopistas huejué huan inminhuejeyenten in judíos. Moilije quinami huil laticlanilosquiaya pa yesquiaya lamictili Jesús. 2 Quihuicaje ilpitataya huan quitemacaje Poncio Pilato in gobernador (lahuelitini) romano.

### *Judas momictía*

3 Cuaquinon Judas in se hual quitemacac Jesús ca ilacocolinijmes quitac quinami quitilaniye Jesús pa miquis, huan pampín mococuhuaya iyolo pampa quichíac inon. Quincuepilic in plata, in treinta (sempuhualihuan-majlacli) tomin, quinmacac in tiopistas huejué huan in huejeyenten.

4 Quinmilic:

—Nicchíac laijlaculisli pampa annimitztemacac se hual amo quiapiaya len laijlaculisli.

Yehuanten quinanquilije:

—¿Len inon pa tehuanten? Tehual mohuían ticpías pa ticchías in hual monequi pa timoquixtís in laijlaculisli.

5 Cuaquinon quilasac Judás in tomin pa in lali pin tiopan huan quisac, uyac, huan mopiluc pan se cuahuil, miquic.

6 Cuaquín canaje in tomin in tiopistas, moilije:

—In tolajtol amo techmacahuiltía pa ticlasasi in tomin capa quipialo itomin in tiopan hué pampa unca tomin hual quilaxlahuije pa yojque quimictisi se lalac.

7 Molaquetzilije, huan ca nadita molalije pa quicuhuaje ca in tomin icuajmili in tapalquero. In cuajmili yesquiaya pa capa quilalpachulosquiaya

yehuanten hual amo yuliloaya pa inminlali. <sup>8</sup> Pampa inon quitocayaltije in cuajmili iCuajmili Esli, huan yoje motocatihuala axcan. <sup>9</sup> Huan yojque lamac mochíac inon hual quijcuiluc Dios ilajtuni itocac Jeremías, quijtúa: “Huan quinmanaje in plata, in treinta tomin (cataya ilaxlahuilisli hual yehuanten pa Israel quilalilije yihual). <sup>10</sup> Huan ca in tomin quicuhuaje icuajmili in tapalquero, jan quinami nechilic in Tata pa nichchías.”

*Jesús ilaixpan Pilato*

(Mr. 15:2-5; Lc. 23:3-5; Jn. 18:33-38)

<sup>11</sup> Huan Jesús quihuicaje pa moquetzas iyampa in gobernador romano, huan in gobernador quilajlanic:

—Tehual, ¿tiunca inminhué in judíos?

Huan Jesús quilic:

—Quema, unca quinami tiquijtuc.

<sup>12</sup> Huan quimotexpahuililoaya in tiopistas huejué huan in huejueyenten. Ma yoje, Jesús amo quinnanquilic nindeno. <sup>13</sup> Cuaquinon Pilato quilic:

—¿Amo tijcaqui mochi in cálica mitzmotexpahuililo?

<sup>14</sup> Huan amo quinanquilic ca se lajtol. Pampa inon in gobernador molapolultic huan amo quimatic len quijtusquiaya pa iyolo.

*Quitilanic Jesús pa miquis*

(Mr. 15:6-20; Lc. 23:13-25; Jn. 18:38-19:16)

<sup>15</sup> Axcan, pan in fiesta (ilhuil) quipiani in huelitini (gobernador) in lachihualisli pa quinmacahuilisquiaya in judíos se hual cataya latzacuali pin calijtic, aquí yes quilajlanije. <sup>16</sup> Quipiaje se latzacuali niman laiximatili hual motocaya Barrabás. <sup>17</sup> Pampa inon quiman monechicuje, Pilato quinlajlanic:

—¿Aquí, nuso, anquinequi pa annimitzmacahuilis: Barrabás, o Jesús hual quitocayaltilo Cristo?

<sup>18</sup> Yojque quinlajlanic, pampa yihual quimatic pampa cataya pampa moxiculoaya pampa moxtin quixtocaloaya Jesús huan pampa inon quitemacaje yihual.

<sup>19</sup> Huan quiman molalijtataya Pilato pa iicpali capa molaliaya quiman quichíac ilachihualisli se la'ajuani, quinahuatilic lajtol isihua, quilic: “Amo xicpía nindeno pa tiquitas ca in lalac cuali, pampa pa layúa nipanuyaya lacocolisli pampa nilajtemiquic inahuac yihual.”

<sup>20</sup> Ma yoje, quinchihualtije in tiopistas huejué huan in huejueyenten pa in míac lalacera molajlanilisi pa quinmacahuilis Barrabás huan pa latilanic pa quimictisi Jesús. <sup>21</sup> Oc sepa quinnotzac Pilato in gobernador, quinlajlanic:

—¿Calía innojen omenten anquinequi pa annimitzmacahuilis?

Quilije:

—Barrabás.

<sup>22</sup> Cuaquín Pilato quinlajlanic:

—Huan ¿len nichchihuilis Jesús hual quitocayaltilo Cristo?

Moxtin quinanquilije:

—¡Xicpilu pan se cuahuil!

<sup>23</sup> Pilato quinmilic:

—Axan, ¿len amo cuali quichíac?

Ma yoje, yehuanten oc sepa quitzajtzilije:

—¡Xicpilu pan se cuahuil!

<sup>24</sup> Yoje Pilato quitac pampa amo mopaquiltilosquiaya in míac lalacera, huan neli quinequiloaya majcoquilo pa moanalosquiaya. Pampa inon

latilanic pa quihualiquililosquiaya al huan mopaquilic imajmajuan inminyampa in míac lalacera, quijtuc:

—Ma camo nechexpahuili amaqui quiman quimictisi in lalac. Xiquij-namiquican inon amhuanten.

<sup>25</sup> Huan moxtin quinanquilije:

—¡Ma techexpahuilican iesli tehuanten huan toxolomes pampa ticmictic!

<sup>26</sup> Cuaquinon Pilato quinmacahuilic Barrabás, huan latilanic pa iguaches quihuijutequisi Jesús. Cuaquinon quitemacac pa quipilusi pan se cuahuil.

<sup>27</sup> Huan iguaches in gobernador quihuicaje Jesús calijtic icali cualtichin Pilato, icali itocaya Pretorio. Quinnechicuje mochi in míac guaches pa quiyahualusi Jesús. <sup>28</sup> Quiquixtilije itzotzomajli huan quilaquentije ca se nahuas morado. <sup>29</sup> Quijquitequije se yahuali lachihuali ca huizli huan quila-lalilije ipan itzontecon, huan quilalije se ojlal pa imajma cuali. Cuaquinon quimolancuacuetzilije ilaixpan huan quihuitzquilije quijtutataloaya:

—¡Ma yuli inminhué in judíos!

<sup>30</sup> Noje quichichaje, huan quiquitzquilije in ojlal huan quitecuaje pa itzontecon. <sup>31</sup> Lamije quihuitzquilije yoje, quiquixtilije in nahuas huan quilaquentije ca itzotzomajli yihual, cuaquinon quihuicaje pa quipiluloquiaya pan in cuahuil.

### *Quipilulo Jesús pan in cuahuil*

*(Mr. 15:21-32; Lc. 23:26-43; Jn. 19:17-27)*

<sup>32</sup> Huan quiman quisaje, quitaje se lalac cireneteco itocaya Simón. In se quilamamilitoaya ca in cuahuil calica yahuiltoaya quipilulo Jesús.

<sup>33</sup> Yojque ajsije pa se lajcotiyan itoca Golgotá. Quinequi quijtúa in lajtol “Cuajtecomal”. <sup>34</sup> Nepa quinequije cuniltije iayo uva lanipanuli ca se altzindi chichic. Quiman quichichinac Jesús amo quinequic cunic.

<sup>35</sup> Quiman lamije quipiluje pan in cuahuil, moxiluilije in guaches ca yehuanten itzotzomajli Jesús, quilastataloaya cuajtzindis cuixtitos. Huan quiman in guache moquixtilic se cuajtzindí capa quilasaje, sinda in cuajtzindí cataya iyaxca hual quilalic pa in se itzotzomajli, yoje yihual canac in se itzotzomajli Jesús. Yojque lamic mochíac len quijsuiluc Dios ilajtuni pin iamal Dios, quijtuc: “Moxiluilije notzotzomajli ca yehuanten quinlastataloaya cuajtzindis cuijsuixtic.” <sup>36</sup> Cuaquinon molalije huan mocahuaje quiztataloaya. <sup>37</sup> Huan quisaluje ca pani pa itzontecon se amal capa quijsuiluje pa len yihual cataya lapiluli pan in cuahuil. Quijtuc: “IN UNCA JESÚS IN-MINHUÉ IN JUDÍOS.” <sup>38</sup> Noje cataloaya ome laxtequinijmes hual quinpiluje ca Jesús, se cataya pa ima cuali huan in oc se pa ima amo cuali. <sup>39</sup> Huan yehuanten hual panujtataloaya quihuejuecaltaloaya, quinhuixujtataloaya inmintzontecon. <sup>40</sup> Quilije:

—Tel hual ticxitinis in tiopan hué huan quiman lamisi panusi ye tonalijmes ticchías oc sejpa, ximoquixti pan mopolehuilisli. Sinda tehual tiunca ixól Dios, xitemu capa tiunca pan in cuahuil.

<sup>41</sup> Yojque quihuitzquilije noje in tiopistas huejué huan inminhuejueyenten in judíos huan ilamaxtinijmes in lajtol huan in fariseos, moilije:

<sup>42</sup> —Oc sequin quinquixtic pan inminpolehuilisli. Ma yoje, yihual ihuían amo huil moquixtia pan ipolehuilisli. Sinda yihual ihué Israel, ma temu axan capa unca pan in cuahuil huan ticneltocasi. <sup>43</sup> Quilalic ilaneltocalisli ca Dios. Axcan, ma Dios quiquixti de ipolehuilisli sinda neli quinequi, pampa techilic pampa yihual ixól Dios.

<sup>44</sup> Huan vojque quihuejuecaltije innojen laxtequinijmes noje hual ca yihual cataloaya lapiluli pan cuahuimes.

*Jesús miquí*

(Mr. 15:33-41; Lc. 23:44-49; Jn. 19:28-30)

<sup>45</sup> Cuaquín lacualispan laticumactic pa mochi in lalticpan, huan mocajti-ahuiaya laticumac pa quiman ajsic in ye horas pa tiolac. <sup>46</sup> Huan quinami pa ye horas pa tiolac Jesús tzajtzcic ca lajtol chicahuac, quijtuc:

—¡Elí, Elí! ¿Lama sabactani? —hual quinequi quijtúa: ¡NoDios, noDios! ¿Leca tichcajcahuac?

<sup>47</sup> Quiman quicaquiye inon sequin hual nepa moquezataloaya, quijtuje:

—In se quinoztica Elías ilajtuni Dios.

<sup>48</sup> Jan ajnaxcan molaluc se ca yehuanten huan canac se pochinquil hual quiquixtilo pin al huejcalan, quitehcuniltic ca iayo uva xocuc, quilalic pan se acal huan quilalic pa icamac Jesús pa quilauniltisquiaya. <sup>49</sup> Huan quijtuje in oc sequin:

—Xijcahua, ma tiquitacan sinda hualas Elías pa quiquixtis pin polehuilislí. <sup>50</sup> Cuaquín tzajtzcic Jesús oc seppa ca lajtol chicahuac, huan miquic, quitemacatica iyulilislí. <sup>51</sup> Huan ca inon, xiquita, tzayanic in tzotzomajli telahuac hual pilujtataya pin tiopan hué lajco pin lasojli calijtic huan in niman lasojli calijtic. Tzayanic pa pani mochi pa latzindan, mocahuac ome lajcomes. Laulinic huan lapanije in teles. <sup>52</sup> Huan cataloaya lalapuli in coyunquimes capa Dios ilacames huejueyenten hual miquije pa yina. Pehualoaya yulilo oc seppa. <sup>53</sup> Huan quiman Jesús yulic oc seppa, yehuanten quisaje pa inmincoyunquimes huan calaquiye Jerusalén in lasojli caltilan. Nepa miac quinmitaje.

<sup>54</sup> Inminlaicanani in guaches huan yehuanten hual mocahualoaya quiz-tataloaya Jesús pan in cuahuil, quiman quitaje in laulinilislí huan innojen oc sequin hual panujtataloaya, cuaquín momajtije miac, huan quijtuje:

—Neli in se yec ixolol Dios.

<sup>55</sup> Huan nepa cataloaya miac sihuames quilachixtataloaya huejca. Yehuanten quitocaje Jesús quitequipanuilijtiahuioloaya quiman quisaya pa Galilea. <sup>56</sup> Cataloaya ca in sihuames María Magdalena huan María inminantzin Jacobo huan José, huan noje cataya nepa inminantzin ixolomes Zebedeo.

*Quilalpachulo Jesús*

(Mr. 15:42-47; Lc. 23:50-56; Jn. 19:38-42)

<sup>57</sup> Quiman yahuiaya layuajti, hualac se lalac hual quiapiaya miac hual iyaxca, motocaya José, yuliaya pin caltilan Arimatea. In José noje yec se imonextilini Jesús. <sup>58</sup> Yihual uyac quitac Pilato, quilajlanic pa quitemacasquiaya icuerpo (inacayo) imijquil Jesús. Cuaquinon Pilato latilanic pa quitemacasi. <sup>59</sup> José canac in cuerpo, quiliaruc ca se tzotzomajli chipahuac. <sup>60</sup> Cuaquín quilalic pa se coyunquil yancuic quinami se cueva (ostul) hual yihual pa quimaniyan latilanic pa quihuajuaniilosquiaya pin tel. Cuaquinon quitzacuac in lalapulisli ca se tel niman hué quinami se yahualujquil, cuaquín uyac. <sup>61</sup> Huan cataloaya nepa María Magdalena huan in oc se María yehuatataloaya ilaixpan in ostul.

*Quintilanilo guaches pa quilachilisi in cueva pa camo calaquis amaqui*

<sup>62</sup> Mostatica hual cataya in tonali hual quitocac itonali in lachijchihualisli pa in fiesta (ilhuil), monechicultije in tiopistas huejué huan in fariseos huan uyaje quitaje Pilato. <sup>63</sup> Quilije:

—Tata Lahuelitini, tiquijnamiquilo quinami in islacatini quijtuc quiman ayamo miquic, quil, “Panusi ye tonalijmes, huan niyulis oc sejpa.” <sup>64</sup> Pampín, xilatilani pa quilachiasi in cueva capa unca in mijquil pa quiman lamisi panusi ye tonalijmes. Inon xicchia pa camo cuajnesi hualasi imonextilini-jmes huan quixtequisi in mijquil huan cuaquín quinmilisi lacames: “Yulic oc sejpa, axan yajmo mictica.” Yojque, in lacuajcuamanalisli calica laquisasi cayas niman hué, huan yajmo cayas yoje hué in lacuajcuamanalisli hual quijtuc yihual quiman pehuac lacuajcuamanac.

<sup>65</sup> Quinmilic Pilato:

—Nepa anquipía guaches pa lachiasi. Xiacan, xinapachican quinami cuali anquimati anquichía pa mocahuas latzacuali.

<sup>66</sup> Yoje uyaje yehuanten huan quitzacuaje cuali in cueva (ostul) quilal-ijticate se latzacualoni lachihuali ca cera pani in tel capa quitzacataya ilalapulisli in ostul. In latzacualoni cataya iyaxca ilahuelilitlisli romano. Cuaquinon uyaje quincajtaloaya nepa in guaches pa lachialosquiaya.

## 28

*Jesús yuli oc sejpa*

*(Mr. 16:1-8; Lc. 24:1-12; Jn. 20:1-10)*

<sup>1</sup> Cuaquín quiman panuc in tonali quiman mosehuilo in judíos huan lane-  
siaya pan tonali hual quinpehualtía in chicome tonalijmes yajyancuic, uyaje  
María Magdalena huan in oc se María pa quitasi in ostul (cueva). <sup>2</sup> Huan jan  
ajnaxcan laulinic chicahuac. In panuc pampa temujtihualac se ilanahuatini  
in Tata pin cielo. Ajsic pa in cueva, quijcuanic in tel hual quitzacuac  
ilalapulisli in cueva huan molalic ipan. <sup>3</sup> Laixpelaya in lanahuatini quinami  
se lapelanilisli huan itzotzomajli laixpelaya iztatataya quinami fesihuil.  
<sup>4</sup> Quitaje in guaches, niman momajtije, yuyucaje huan mocahuaje quinami  
mijquimes, yoje míac quimacajsije. <sup>5</sup> Cuaquinon quinmilic in sihuames in  
ilanahuatini in cielo:

—Amo ximomajtican. Nicmati pampa anquitemujtica Jesús hual quipiluje  
pani in cuahuil. <sup>6</sup> Amo unca nican pampa yulic oc sejpa, jan quinami  
anmitzilic. Xihualacan pa anquitas capa quilalije, capa lastataya. <sup>7</sup> Axcan,  
xijajtiquisacan, xiquinmilican imonextilini-jmes pampa yultica oc sejpa, mas  
que quimictije. Axan quisac capa cate in mijquimes. Huan xiquitacan.  
Yahui anmitzlaicana amhuanten pa Galilea, nepa anquitas. Axan annim-  
tizilic inon.

<sup>8</sup> Cuaquinon quicajtiquisaje in cueva (ostul) in sihuames momajtitat-  
aloaya, huan ma yoje quipialoaya míac paquilisli. Molalujtiaje pa quinla-  
machiltilosquiaya in monextilini-jmes. <sup>9</sup> Huan quiman molalujtiahuiloya,  
xiquitacan, quinnamiquic Jesús pan ojli huan yihual quinpialtic. Cuaquín  
yehuanten in sihuames hualaje ca yihual, quimolancuacuetzilije quin-  
quitquitataloaya icxihujmes huan quinnapalujtataloaya icxihujmes.

<sup>10</sup> Huan Jesús quinmilic:

—Amo ximomajtican. Ximohuicacan xiquinlamachiltican nocnían pa yasi  
pa Galilea, huan umpa nechitasi.

*In guaches quinpuhuililo in tiopistas len quinpanuc*

<sup>11</sup> Yajtiahuiloaya in sihuames, sequin innojen guaches uyaje pa Jerusalén, quinlamachiltije in tiopistas huejué mochi in hual quinpanuc. <sup>12</sup> Cuaquín in tiopistas quinmonechicultije inminhuejueyenten in judíos pa mochiuilisi se lajtulisli. Molaquetziloaya huan quiman molalilije ca se lajtulisli, quinmacaje miac tomin in guaches. <sup>13</sup> Quinmilije:

—Amhuanten xiquinmilican moxtin pampa quema, hualaje imonextiliniymes pa layúa, quixtequije in mijquil quiman tehuanten ticoxtataloaya. <sup>14</sup> Huan sinda quicaquis inon in gobernador, cuaquín tehuanten ticyonlalisi pa quineltocas len tiquilisi, huan amhuanten amo anmitzexpahuilis. <sup>15</sup> Cuaquinon canaje in guaches in tomin huan quichihuaje quinami in tiopistas quinmilic. Huan yoje quijtutihualaje axan in judíos jan quinami quinlaquetzilije inon in guaches huan in tiopistas.

*Jesús quinmaca imonextiliniymes inmintequipanulisi*  
(Mr. 16:14-18; Lc. 24:36-49; Jn. 20:19-23)

<sup>16</sup> Uyaje in once monextiliniymes pa Galilea pa in loma (tepetzindi) capa quinnahuatic Jesús. <sup>17</sup> Huan quiman quitaje, quimolancuacuetzilije. Ma yoje, sequin quimahuiloaya da amo neli cataya yihual. <sup>18</sup> Cuaquinon ajsic Jesús capa yehuanten, quinmilic:

—Nehual nechtemacac Dios mochi lahuelilitilisi pin cielo huan pan lalticpan. <sup>19</sup> Pampín, xiacan capa moxtin in lacames pa mochi in lalimes pin lalticpan, xiquinchihuilcan pa mochihuasi nomonextiliniymes. Xiquincuayatequican ca inminlahuelilitilisi Dios in Tajtzin huan Dios in Xolol huan Dios in Espíritu Santo. <sup>20</sup> Huan xiquinmaxtican pa quineltocasi mochi in hual annimitzmaxtic amhuanten. Huan xiquitacan. Nehual nicayas ca amhuanten mojmosta pa quiman ajsis in tonali hual lamis in lalticpan ca ilahuelilitilisi hual axan huelitía. Yoje ma ye.

## Ilamachitlisli cuali Jesucristo hual quijcuiluc San Marcos

*Lanotza Juan Lacuayatequini ca míac lacames capa amaqui chanti  
(Mt. 3:1-12; Lc. 3:1-9, 15-17; Jn. 1:19-28)*

<sup>1</sup> Yoje pehuac ilamachitlisli cuali Jesucristo iXolol Dios.

<sup>2</sup> Pehuac quinami quijcuiluc Isaías ilajtuni Dios, quijcuiluc inon hual Dios quilib Jesucristo quiman ayamo cataya pan lalticpan, quilib:

Xiquita, nehual nictilanía nolanahuatini pa mitzlaicanas pa mijchijchihuilis mo'ojli.

<sup>3</sup> Mocaquis nolanahuatini itzajtzilisi tzajtzitica nepa capa amaqui chanti, quijjutica:

“Huala toTata. Xicxijchihuacan anmoyolo anquiquixtilijtica mochi hual quijlacujtica.

Xicxijchihuacan quinami anquichijchihuilía ojli quiman huala se hué.

Xicmelahuacan anmoyolo quinami quimelahualosquiaya iojli se hué.”

<sup>4</sup> Huan yoje hualac Juan Lacuayatequini, hualac capa amaqui chantiaya, quijtuaya Dios ilanahuatilisli. Quinmiliaya lacames huan sihuames pa mocuayatequillosquiaya pa yoje lanextillosquiaya quinami axan quipalaje inminyolo pa pehualosquiaya laijnamiqui quinami Dios quinequi. Yoje Dios quinpupuhuilisquiaya yehuanten inminlajlaculisli. <sup>5</sup> Quisaloaya moxtin pin lalticpan motocaya Judea pa quicaquisi. Quisaloaya noje yehuanten pin caltlan (pueblo) hué itoca Jerusalén. Quincuayatequiaya Juan pin atenco hué itoca Jordán quiman moyolcuitiloaya ca Dios inminlajlaculisli.

<sup>6</sup> Huan quipiaya Juan itzotzomajli lachihuali ca itojmiyo camello. Quipiaya ilacuejtiloni de cuilaxli. Inon hual quicuaya cataya chapulimes huan néculi hual canalo pa cuajlan. <sup>7</sup> Quinnotzaya in lacames huan sihuames, quinmijtataya Dios ilanahuatilisli. Quinmiliaya:

—Nilaguas nehual ca nolanotalisli, cuaquin hualas se hual quipías niman míac chicahualisli hual nehual amo nicpía. Pampín amo nimonotza pa nimopachus pa nictomilis ilacsames huan pa nictequipanuilis jan nadita.

<sup>8</sup> Nehual annimitzcuayatequía ca al. Yihual anmitzcuayatequis ca in Espíritu Santo.

*Juan quicuayatequía Jesús  
(Mt. 3:13-17; Lc. 3:21-22)*

<sup>9</sup> In tonalijmes quisac Jesús pin cali itoca Nazaret hual unca pin lalticpan Galilea. Uyac pa atenco hué itoca Jordán, huan nepa Juan quicuayatequic pin atenco hué. <sup>10</sup> Quisac Jesús pin al, huan jan ajnaxcan quitac molapuc chicahuac in cielo (ilhuicac), quitac temujtihualaya in Espíritu Santo chicuenta se huilol huan moquetzac pani yihual. <sup>11</sup> Huan moqaquic ilajtol Dios lajtutica pin cielo (ilhuicac), quijtuaya:

—Tehual tinoxolol. Nimitzlasojla huan nicpía míac paquilisli ca tehual.

*Satanás quitilanilía iyolo Jesús  
(Mt. 4:1-11; Lc. 4:1-13)*

<sup>12</sup> Cuaquinon jan ajnaxcan in Espíritu quichihualtic pa yahuisquiaya Jesús ca capic amaqui chantiaya. <sup>13</sup> Huan nepa mocahuac cuarenta (ompuhuali) tonalijmes. Nepa cataya Satanás, quinequiaya quitilanilía Jesús iyolo pa

quichiasquiaya Jesús len hual quitzacuasquiaya Dios. Noje umpa ca Jesús cataloaya in yulijquimes hual yulilo pa cuajlan. Huan hualaje Dios ilanahuatinijmes in cielo (ilhucac) huan quitequipanuililoaya.

*Jesús quipehualtía itequipanulisli*

(Mt. 4:12-17; Lc. 4:14-15)

<sup>14</sup> Se tonali quitzacuaje Juan Lacuayatequini pin calijtic. In tonali hual quichihuilije inon Juan, Jesús uyac pan lalticpan motocaya Galilea. Quinnotzaya in lalalera, quinmilitataya Dios ilanahuatilisli hual unca in lamachiltisli cuali inahuac quinami Dios huelitía. <sup>15</sup> Quijtuaya:

—Axan ajsic in tonali, amo huejcahuas in tonali quiman Dios yahui huelitía. Xicpalacan anmoyolo pa anpehuas anyultías anlajnamictica quinami Dios quinequi. Xicneltocac Dios ilamachiltisli cuali.

*Jesús quinnotza nahui micheros*

(Mt. 4:18-22; Lc. 5:1-11)

<sup>16</sup> Umpa panuaya Jesús inahuac in al huejcalan itoca Lago de Galilea. Nepa quinmitac Simón huan icni Andrés, quilastataloaya inminlatzojuini lajco pin al huejcalan. Quintemuloaya michimes pampa yehuanten micheros.

<sup>17</sup> Quinmilic Jesús:

—Xichtocac nehual. Annimitznexilis quinami huil anquintemus lacames quinami axan anquintemúa michimes.

<sup>18</sup> Jan ajnaxcan quincahuaje inminlatzojuinijmes, quitocatiaje Jesús.

<sup>19</sup> Panuc Jesús nadita huejquta de umpa huan quinmitac Jacobo huan icni Juan, yehuanten ixolomes Zebedeo. Ca oc sequin cataloaya yehuanten pin barquito, quinpanitataloaya inminlatzojuinijmes yehuanten. <sup>20</sup> Jan ajnaxcan quinnotzac Jesús. Cuaquín yehuanten quincajcahuaje pin barquito laijtic inmintajtzin huan ilapalehuinijmes huan quitocatiaje Jesús.

*Se lalac hual quipiaya se ijyecal amo cuali*

(Lc. 4:31-37)

<sup>21</sup> Ajsije pin cali motocaya Capernaum. Cuaquinon pin tonali hual mosehuilo yehuanten in israelitos hual noje motocalo in judíos, calaquic Jesús pa inmintiopan in judíos, nepa lamaxtiaya. <sup>22</sup> Lamaxtiaya ca chichualisli quinami se hué. Amo lamaxtiaya yihual quinami yehuanten in ilamaxtinijmes in lajtol. Quimaxtiaya in lajtol hual quineltocalo in judíos quinami quipialo pa quimolancuacuetzilisi Dios. Pampin molapolultiloaya pampa lamaxtiaya yoje Jesús. <sup>23</sup> Huan jan axcan cataya pin tiopan se lalac quipiaya se ijyecal hual quichijtataya catzahuac in lalac pa iyolo. <sup>24</sup> Tzajtzc in se, quilic:

—¿Len ticpía pa tiquitas ca tehuanten, Jesús hual tiquisac pin caltilan Nazaret? ¿Tihualac pa titechlamis? Nicmati aqui tehual. Tehual Dios ilalac chipahuac, Dios mitzalic pa ticnextis Dios ichipahualisli.

<sup>25</sup> Cuaquín Jesús quinnotzac chichahuac in ijyecal, quilic:

—¡Amo xinahuati huan xiquisa capa yihual!

<sup>26</sup> Cuaquín in ijyecal catzahuac quiyuyucaltic chichahuac in lalac, tzajtzc chichahuac huan quisac pin lalac. <sup>27</sup> Huan umpa moxtin molapolultiloaya michac, moililoaya:

—¿Len inon? ¡Se lamaxtilisli yancuic! ¡Yihual quinnotza in ijyecames, quichía quinami se hué hual quipía chichualisli! ¡Huan quineltocalo!

<sup>28</sup> Jan ajnaxcan moxtin quipuhualoaya pa mochi in lali Galilea in hual quichihuilic Jesús.



*Jesús quipajtía inantzín isihua Pedro**(Mt. 8:14-15; Lc. 4:38-39)*

<sup>29</sup> Cuaquín quisaje pin tiopan. Umpa mohuicac Jesús, huan ca yihual uyaje Jacobo huan Juan. Uyaje pa inminchan Simón huan Andrés. <sup>30</sup> Huan inantzín isihua Simón lastataya pa ilapexli, quipiaya totonalisli. Jan ajnaxcan quilamachiltije Jesús pampa cataya cocoxqui yihual. <sup>31</sup> Cuaquín ajsitiac capa yihual Jesús, quiquitzquic imajma, cajcoquic pin lapexli, quiquetzac. Yoje pajtic in sihual, yajmo quiapiaya totonalisli. Cuaquín quinlacualtiaya.

*Calaquic in tonali, quinpajtía míac**(Mt. 8:16-17; Lc. 4:40-41)*

<sup>32</sup> Calaquic in tonali, huan layuajtitataya. Quihualiquilije Jesús moxtin in cocoxquimes huan yehuanten hual quinpioaloaya ijyecames amo cuajcuali. <sup>33</sup> Huan moxtin motojpehuaje pa in cali ilalapujquil. <sup>34</sup> Quinpajtic Jesús míac hual mococuloaya ca míac cocolisli. Quinquixtiliaya yehuanten míac ijyecames amo cuajcuali. Ma yoje, amo quinmacahuilic Jesús pa lajtulosquiaya in ijyecames pampa quimatiloaya aqí yihual.

*Jesús lanoztinemi pan lalticpan Galilea**(Lc. 4:42-44)*

<sup>35</sup> Pa cualcan quiman ayamo lanestihualaya huan cataya laticumac, moquezac Jesús. Quisac pa quiahuac in caltilan, uyac capa amaqi cataya, nepa huan Dios lajtuloaya. <sup>36</sup> Simón ca oc sequin hual cataloaya ca yihual uyaje quitemuje. <sup>37</sup> Quitaje, quinmilije:

—Moxtin mitztemujticate.

<sup>38</sup> Jesús quinmilic:

—Ma tiacan pa oc sequin caltilan pa nilanoztinemis. Umpa noje niquinmils Dios ilamachiltisli. Pampa inon niquisac pin cali.

<sup>39</sup> Yoje quinmilijtnemiaya Dios ilamachiltisli pa in judíos inmintiopa-jmes pa mochi in lalticpan Galilea. Noje quinquixtiliaya ijyecames amo cuajcuali hual quiquitzquiloaya lacames.

*Jesús quipajtía se hual palantica ipan inacal icuerpo**(Mt. 8:1-4; Lc. 5:12-16)*

<sup>40</sup> Ajsic capa Jesús se lalac, quilajlanic pa quicnilisquiaya huan pa quipajtisquiaya. Quipiaya in icocolisli icuilaxli itoca lepra. Quimolancuacuetzilic Jesús, quilic:

—Sinda ticnequi, huil tichpajtis.

<sup>41</sup> Jesús quicnilic cualantica pampa quiapiaya in cocolisli huan quimatocac ca imajma, quilic:

—Nicnequi pa tipajtis. Xipajti.

<sup>42</sup> Jan ajnaxcan yajmo nesic icocolisli in lalac, yoje pajtic. <sup>43</sup> Cuaquinon Jesús quinahuatic ca míac chicahualisli huan quitilanic pa iojli yihual, quilijtataya:

<sup>44</sup>—Xiquita. Ximoiztía pa camo tiquilis amaqi nindeno. Jan xía ximonex-tili in tiopista. Axcán tichipahuac. Xiquihuicá pa in tiopan in huendi hual quinahuatic Moisés pa quimacas aquí yes hual quiapiaya in cocolisli huan pajtic. Yoje lacames quimatisi pampa tipajtic tel.

<sup>45</sup> Ma yoje, quisac in lalac huan pehuac quinpahuilic moxtin len quipanuc yihual. Pampín Jesús yajmo huil calaquíaya pan se caltilan sinda lacames quimatiloaya yihual cataya nepa. Yoje mocahuaya pa quiahuac capa amaqi chantiaya. Huan yahuiloya quitalo lacames, quisaloaya pa mochi caltilan cajcapa.

## 2

*Jesús quipajtía se lacal amo huil moliniaya*  
(Mt. 9:1-8; Lc. 5:17-26)

<sup>1</sup> Panuje sequin tonalijmes, huan mocuepac Jesús oc sejpa pin caltilan Capernaum. Momachiltije in lacalera pampa yihual cataya pa ichan. <sup>2</sup> Pampín monechiculoaya míac huan yoje yajmo quinmajsiaya ilalapujquil in cali capa Jesús quinmaxtiaya ilajtol Dios. <sup>3</sup> Cuaquinon hualaje sequin quihualicatataloaya se lacal cocoxqui, amo huil moliniaya. Quimantihualaloaya pan ipelal telahuac nahui lacames. <sup>4</sup> Huan amo huil cajxilitoaya in lacal calijtic capa Jesús pampa cataloaya míac pin cali calijtic huan pa quiahuac. Cuaquín quilapuje ca pani in cali capa cataya Jesús. Quitemuhuije in cocoxqui pan ipelal pa calijtic capa in coyunquil. <sup>5</sup> Jesús quitac quinami quineltocaloaya pampa yihual huil quipajtisquiaya, quilic in cocoxqui:

—Nito, axan lapujpuhuali unca molaijlaculisli.

<sup>6</sup> Huan sequin lacames lamaxtinijmes hual quimaxtiloaya in lajtol inahuac quinami quimolancuacuetzililo Dios in judíos nepa molaijtataloaya. Moilije ca inminyolo: <sup>7</sup> “¿Leca lajtúa yojque in se? Quihuejuecaltitica Dios. ¿Aqui huil quipujpuhuilía se lacal ilaijlaculisli? Dios yihual san huil quichi-huilía inon.”

<sup>8</sup> Quimatic Jesús ca iyolo in hual yehuanten quijtuloaya ca inminyolo in lamaxtinijmes huan quinmilic:

—¿Leca anlajtúa yoje ca anmoyolo? <sup>9</sup> Neli unca anquita quinami amo quinxtilía nochicahualisli sinda niquilía in cocoxqui: “Axan unca lapujpuhuali molaijlaculisli.” Ma yoje, sinda niquliaya: “Ximoquetza, xicajcoqui mocochiyan huan xinejnemi”, huan yihual pajtiaya, cuaquín anquimatiaya pampa quinextiliaya nochicahualisli. Huan sinda niquliaya inon huan yihual amo pajtiaya, cuaquín anquimatiaya pampa amo nicpía ilahuelilitlisli Dios. <sup>10</sup> Axan, nicnequi pa anquimatis pampa nehual ilacal in cielo, quema, nicpía ilahuelilitlisli Dios pa niquinpujpuhuilis lacames inminlaijlaculisli.

Cuaquinon Jesús quiztataya in lacal hual amo huil moliniaya, quilic:

<sup>11</sup> —Ximoquetza, xicajcoqui mocochiyan huan xía pa mochan.

<sup>12</sup> Huan moquetzac in lacal jan ajnaxcan huan cajcoquic icochiyan huan quisac inminlaixpan moxtin. Pampín moxtin moitaloaya ca lamajtilisli huan quinmijtuloaya lajtomes huejué pa Dios. Quילוaya:

—Amo quiman tiquitaje len quinami inon.

*Jesús quinotza Leví*  
(Mt. 9:9-13; Lc. 5:27-32)

<sup>13</sup> Quisac Jesús oc sejpa pa itenco in al huejcalan. Moxtin hualaje capa yihual huan yihual quinmaxtiaya. <sup>14</sup> Umpa je nadita quiman panujtataya pa iojli, quitac ixolol Alfeo motocaya Leví. Molaliaya pin cali capa quilajlaniloaya lapixcalisli hual yec pa tomin, quinlaxlahuiloaya ca in tomin in romanos hual huilitiloaya. Jesús quilic:

—Xichtoca nehual.

Yoje, moquetzac Leví, huan Jesús uyaje.

<sup>15</sup> Quiman panuc inon lacuajtataya Jesús pa ichan Leví. Ca Jesús huan imonextilinijmes lacuajtaloaya míac oc sequin hual quitocaje Jesús. Sequin yeje lacames hual quilajlaniloaya lapixcalisli hual yec ca tomin (contribuciones). Oc sequin yeje lacames hual amo quineltocaloaya cuali inminlajtol in judíos hual quijtúa quinami monequi pa se quimolancuacuetzilic Dios. <sup>16</sup> Huan quitaloaya Jesús ilamaxtinijmes in lajtol huan sequin hual

quineltocaloaya inminlamaxtilisli in fariseos. Quitaloaya quinami lacuaj-tataloaya ca Jesús moxtin yehuanten. Huan in lamaxtinijmes quinnotzaje Jesús imonextiliniyjes, quinmilije:

—¿Leca molalía anmolamaxtini pa lacuas huan pa launis ca lacames amo cuajcuali huan ca yehuanten hual quilajlanilo lapixcalisli hual unca tomin pa in romanos?

<sup>17</sup> Quicaquic inon, Jesús quinmilic:

—Amo quinnequilo lapajtinijmes yehuanten hual amo cojcocoxqui. In cojcocoxqui, quema, quinnequilo. Yojque nehual amo nihualaya pa niquinnotzas yehuanten hual quijtulo pa inminyolo: “Nel nicuali.” Nihualaya pa niquinnotzas pa nechtcasi yehuanten hual quimatilo pampa cate laijlaculi.

*Quilajlanilo leca amo mosahualo Jesús imonextiliniyjes*

(Mt. 9:14-17; Lc. 5:33-39)

<sup>18</sup> Se tonali mosajtataloaya imonextiliniyjes Juan Lacuayatequini huan inminmonextiliniyjes in fariseos. Sequin lacames hualaje capa Jesús, quilajlanije inahuac inon, quilije:

—¿Leca mosahualo inminmonextiliniyjes Juan huan in fariseos? Tehual momonextiliniyjes amo mosahualo.

<sup>19</sup> Jesús quinnanquilic:

—Amo monequi pa mosahuasi ilajlasojli se lalac hual yahui monamictía sinda cate ca yihual in tonaliyjes quiman monamictitica. Huan yoje amo mosahualo nomonextiliniyjes innojen tonaliyjes hual cate ca nehual. <sup>20</sup> Ma yoje, ajsilo tonaliyjes capa quinquixtilisli nehual hual niunca quinami in se hual yahui monamictía. Cuaquín mosahuasi.

<sup>21</sup> Umpa pehuaya quinmaxti quinami inon hual yihual quinmaxtitataya cataya lamaxtilisli yancuic. Quinmilic:

—Amaqui quipantía je tzotzomajli hual moviejojtíc ca se dango yancuic. Sinda quipantía yoje, cuaquín in dango yancuic quicololúa ca in tzotzomajli hual moviejojtíc huan quitzayana oc sejpá. <sup>22</sup> Noje amaqui quilalía iayo uva yancuic laijtic pin pocuinijmes lachihuali ca cuilaxli hual itequi quitequipanuje. Sinda yoje quichía, cuaquín iayo uva yancuic quitzayanaltis in cuilaxli pampa amo huil motilana. Toyahuis iayo uva, moijlacus in cuilaxli. Pampín monequi pa quilalis iayo uva yancuic pin pocuinijmes lachihuali ca cuilaxli yancuic.

*Imonextiliniyjes Jesús quincopinilo imiahuimes trigo pan tonali quiman mosehuilo judíos*

(Mt. 12:1-8; Lc. 6:1-5)

<sup>23</sup> Se tonali nejnentiyauiaya Jesús capa moscaltitataya trigo. Cataya in tonali hual mosehuilo in judíos. Pehuaje quincopintiaje imiahuimes trigo imonextiliniyjes. <sup>24</sup> Cuaquinon in fariseos quilije:

—Xiquita. ¿Leca quichihualo momonextiliniyjes inon? Tolajtol hual techilía quinami monequi pa se quimolancuacuetzilis Dios amo quimacahuiltía pa quichías se inon pan tonali quiman timosehuilo tehuanten.

<sup>25</sup> Jesús quinmilic:

—¿Amo quiman anmomaxtic len quichíac David in hué pan se tonali pa yina? Yihual huan yehuanten hual quitocaloaya mayanaloya. <sup>26</sup> Yoje calaquic pin tiopan hué calijtic, cataya nepa Abiatar in tiopista hué. Quincuac David in panes hual quilalilo in tiopistas ilaixpan Dios. Huan in lajtol quimacahuiltía pa quincuasi in panes jan in tiopistas san. Ma yoje, David

quinmacac pa quincuasi in lacames hual cataloaya ca yihual. Huan amo quichihuaya David laijlaculisli mas que quichíac inon.

<sup>27</sup> Huan noje quinmilic:

—Dios quilalic pa cayas se tonali capa huil anmosehuis. Quichíac inon pa anmijchihuilis len cuali amhuanten. Dios amo quinchíac lacames pa yoje quinchihualtis pa mosehuis pan in tonali quiman mosehuilo. <sup>28</sup> Pampín, nehual ilacal in cielo nicpía lahuelilitisli pa nicnahuatís len huil quichihuasi lacames pan in tonali capa mosehuilo.

### 3

#### *In lacal hual quipiaya se ima huaquic*

(Mt. 12:9-14; Lc. 6:6-11)

<sup>1</sup> Oc sejpa calaquic Jesús calijtic pa inmintiopan in judíos. Nepa cataya se lacal quipiaya se ima huaquic. <sup>2</sup> Quinapachiloaya Jesús in lacames nepa pa quitasi sinda lapajtisquiaya pan tonali quiman mosehuilo pampa quinequiloaya motexpahuilo ca yihual. <sup>3</sup> Cuaquín Jesús quinotzac in lacal, quilic:

—Xihúa, ximoquetza lajco ca tehuanten capa ticate.

<sup>4</sup> Jesús quinlajlanic, quinmilic:

—¿Calía unca cuali? ¿Unca cuali sinda ticchihualo cuali pan in tonali capa timosehuilo? ¿Unca cuali sinda ticchihualo amo cuali? ¿Unca cuali sinda quipalehuilo pa yulis se lacal? ¿Unca cuali sinda quimictilo?

Yehuanten amo nahuatije. <sup>5</sup> Quicocuc iyolo Jesús, quinmitac cualantataya pampa amo quinequiloaya quimatilo. Cuaquín quilic in lacal:

—Xicxilani momajma.

Quixilanic huan pajtic imajma. <sup>6</sup> Cuaquín quisaje in fariseos huan jan ajnaxcan ca yehuanten hual quitocaloaya Herodes laquetzaje. Quinequiloaya quimatilo quinami huil quimomictiluililosquiaya Jesús.

#### *Míac quitocalo Jesús huan ajsilo pa itenco in al huejcalan*

<sup>7</sup> Quisac Jesús pa in al huejcalan pin lalticpan Galilea. Quitocaje míac yehuanten hual chantiloaya pa Galilea. <sup>8</sup> Noje hualaje míac hual chantiloaya pin lalticpan Judea huan pin caltilan hué Jerusalén huan pin lalticpan Idumea. Noje hualaje quistataloaya pa yoje itenco (analc) in atenco hué Jordán huan pa in lali itejtenco in caltilan hué Tiro huan in caltilan hué Sidón. Yaje quitaje Jesús quiman quimatije pampa quinchihuaya innojen lachihualisli. <sup>9</sup> Pampa inon Jesús quinmilic imonextilinjmes pa quipiasí lalalí se barquito capa yihual pa huil calaquís, pampa cuajnesi in míac lacalera yahuiloaya quitojpehualo. <sup>10</sup> Quinpajtic míac hual cataloaya ca yehuanten. Pampín mochi cocoxqimes motojpejtiahuloaya pa quimatocalosquiaya. <sup>11</sup> Huan quiman in ijyecames amo cuajcuali quitaloaya Jesús, cuaquín quinmayahuiloaya ilaixpan yihual in lacames hual quinpiaje laijtic yehuanten, tzajtziloaya, quilije:

—¡Tehual tí'ixolol Dios!

<sup>12</sup> Huan yihual quinmajuac chicahuac pa camo quijtusi aquí yihual.

#### *Jesús quinlajtultí doce (majlacliuhanome) imonextilinjmes*

(Mt. 10:1-4; Lc. 6:12-16)

<sup>13</sup> Panuc inon, Jesús panquisac pin pani, quinnotzac yehuanten hual quinequiaya quinlajtultí. Yehuanten moxiluje ca in lacalera, ajsitihualaje capa yihual. <sup>14</sup> Quinlajtultic doce (majlacliuhanome) ca yehuanten pa cayasi

ca yihual. Yahuiaya quintilani pa quinmilijtinemisi lacames ilamachiltisli. <sup>15</sup>Noje quinmacac lahueliltisli pa huil quinpajtisi yehuanten huan pa huil quinquixtilisli iyecames amo cuajcuali. <sup>16</sup>Quinlajultic doce lacames. Se yec Simón hual noje quitocayaltic Pedro. <sup>17</sup>Oc sequin yeje Jacobo huan icni Juan, yehuanten ixolomes Zebedeo. Jesús quintocayaltic yehuanten Boanerges. Inon quinequi quijitúa pampa yehuanten cataloaya lacames quinami comunilisi. <sup>18</sup>In oc sequin cataloaya Andrés huan Felipe huan Bartolomé huan Mateo huan Tomás huan Jacobo ixolol Alfeo, huan Tadeo huan Simón hual yec se ca in lanechiculisi motocaya cananistas. <sup>19</sup>Huan noje quilajultic Judas Iscariote hual se tonali yahuiaya quitemaca Jesús ca yehuanten hual yahuiloya quimictilo.

*Jesús laquetza inminahuac yehuanten hual quihuejuecaltía in Espíritu Santo*

*(Mt. 12:22-32; Lc. 11:14-23; 12:10)*

Cuaquinon ca imonextiliniymes calaquije pan se cali. <sup>20</sup>Oc sejpa monchicuje míac lacalera huan pampín amo huil quicualoaya nadita Jesús huan imonextiliniymes. <sup>21</sup>Huan quiman quicaquije yehuanten hual iyaxca Jesús, quisaje pa quisehuiltisi, pampa quijituloaya:

—Axan mopoluc ilajnamiquilisi.

<sup>22</sup>Sequin ca in lamaxtinijmes hualaje, quisaje pin caltilan hué Jerusalén, quijituloaya:

—Quipía lajtíc yihual in iyecal itoca Beelzebú. Yihual inminhué in iyecames amo cuajcuali. Ca ilahueliltisli Beelzebú quinquixtilía lacames in iyecames hual quinpialo lajtíc yehuanten.

<sup>23</sup>Cuaquinon Jesús quinnotzac, quinlaquetzlic se lapuhualisli calica yehuanten quimatilosquiaya cuali len quinequiaya quijtu, quinmilic:

—¿Quinami huil yihual Satanás moquixtía pa quiahuac sinda unca lajtíc se? <sup>24</sup>Sinda momijmictitinemilo in lacames pa se lali, cuaquín ilahueliltisli in lali amo huejcahuas. <sup>25</sup>Huan sinda yehuanten hual chantilo pan se cali moxilulo cualanticate huan mocualantitinemilo, cuaquín yajmo quiman monechicú pa chantisi pan in se cali. <sup>26</sup>Huan jan yoje, sinda Satanás huan iijyecames mocualantitinemilo huan yoje moxilulo, cuaquín yajmo huil huejcahuas Satanás, lamis ilahueliltisli.

<sup>27</sup>Amaqui huil calaqui icali se lacal chicác pa quixtequilis len quipía sinda ayamo quilpic in lacal chicác. Cuaquín, quiman unca lailpili, huil calaqui pa quiquixtilis mochi hual cayas calijtic.

<sup>28</sup>Annimitzilía neli, Dios quinpujpuhuilis in lacames mochi in laijlaculisi huan mochi inminlahuejuecaltisli hual quijtulo. <sup>29</sup>Ma yoje, Dios amo quiman quipujpuhuas aqui hual quihuejuecaltía in Espíritu Santo. Huejcahuas pa yes in laijlaculisi, amo quiman lamis.

<sup>30</sup>Quinmilic Jesús inon pampa in lamaxtinijmes quijituloaya:

—Yihual quipía iyecal catzahuac.

*¿Aqui inantzin huan icnían Jesús?*

*(Mt. 12:46-50; Lc. 8:19-21)*

<sup>31</sup>Cuaquinon hualaje inantzin huan icnían, mocahuaje pa quiahuac, quitilanije lajtol pa molisi Jesús pampa quinequiloaya quitalo yehuanten.

<sup>32</sup>Yehuanten hual molalijtataloaya inahuac Jesús quillije:

—Monantzin huan mocnían umpa cate pa quiahuac mitztemujticate pa mitzitati.

<sup>33</sup> Jesús quinnanquiliic:

—¿Aqui nonantzin? ¿Aquinojen nocnían?

<sup>34</sup> Quinmitac yehuanten hual molaliloaya quiyahualujtataloaya, quijtu:

—Nican cate nonantzin huan nocnían. <sup>35</sup> Aquí hual quichías quinami quinequi Dios, yihual nocni lalac huan nocni sihual huan nonantzin.

## 4

*Jesús quinmilía lapuhualisli pa quinmactis inahuac in lalac hual quixintía latocli*

(Mt. 13:1-9; Lc. 8:4-8)

<sup>1</sup> Oc seipa pehuac lamactic Jesús pa itenco in al huejcalan, huan hualaje huan sequin latocli huetzije ipan itenco in ojli. Hualaje in tuxomes, quicuaaje.

<sup>2</sup> Quinmactiaya miac pan ipampa lapuhualisli hual quinlatiliaya ilamaxtilisli, huan amo ca lajtol calica huil quimatiloaya len quinequiaya quijtu. Quinmactiaya quinmilijtataya:

<sup>3</sup> —Xilacaquican: Se lalac quisac pa quixinis latocli. <sup>4</sup> Laxintíac, laxintíac huan sequin latocli huetzije ipan itenco in ojli. Hualaje in tuxomes, quicuaaje.

<sup>5</sup> Oc sequin latocli huetzije pan tixcaltlan capa amo cataya lali telahuac. Innojen huejcahuac jan nádita huan ixuaje pampa amo cataya lali telahuac.

<sup>6</sup> Quisac in tonali, quinhuactic in pacholimes pampa amo quipialoaya lahualyol. <sup>7</sup> Oc sequin pan huiztilan huetzije. Moscaltije in huizli, quinmictije in pacholimes, yoje amo laquije in latocli. <sup>8</sup> Oc sequin latocli huetzije ipan lali cuali. Ixuaje, moscaltije, quilalije ilaquilyo. Sequin latocli quilalije treinta (sempuhualihuanmajlacli) ca mochi seipse latocli, oc sequin sesenta (yepuhuali) ca mochi seipse latocli, oc sequin cien (macuilipuhuali).

<sup>9</sup> Cuaquinon Jesús quinmilic:

—Aqui quipía inacas, ma quicaqui.

*¿Leca quinmactía ca lapuhualisli?*

(Mt. 13:10-17; Lc. 8:9-10)

<sup>10</sup> Lamac quinmactic yoje, mocahuac Jesús ihuían. Cuaquinon yehuanten hual mocahuaje capa yihual quilajlanije, quillije:

—¿Len quinequi quijtúa in lapuhualisli calica tilamactiaya?

<sup>11</sup> Quinmilic:

—Amhuanten anmitzmachiltitica Dios len oc sequin amo quimatilo. Anmitzmachiltitica quinami yihual huelitía pan mochi lalticpan. Huan yehuanten hual amo cate ca tehuanten, yihual quinmachiltía mochi pan ipampa lapuhualisli hual quinlatilía ilamaxtilisli, pa yoje <sup>12</sup> mas que lachiasi, amo quitasi. Huan yoje, mas que lacaquisi, amo quimatisi len quinequi quijtúa. Inon quinpanúa pa yoje amo mopalasi yehuanten pa inminyolo huan pa yoje Dios amo quinpujpuhuilis inminlajlaculisli.

*Jesús quinmilía len quinequi quijtúa ilapuhualisli*

(Mt. 13:18-23; Lc. 8:11-15)

<sup>13</sup> Huan quinmilic:

—¿Amo anquimati len quinequi quijtúa in lapuhualisli? Cuaquín ¿quinami anquimatis len quinequilo quijtulo mochi lapuhualisli? <sup>14</sup> In lalac hual laxintíac, yihual quinami se hual quinmilía Dios ilamaxtilisli. <sup>15</sup> Sequin lacames cate quinami in latocli hual huetzije inahuac in ojli. Quicaquilo Dios ilamachiltisli, jan ajnaxcan huala Satanás, quinmijcuanilía in lacames Dios ilamachiltisli hual quixinic in lalac pa inminyolo yehuanten. <sup>16</sup> Oc sequin

cate quinami in latocli hual quixintíac pin tixcaltilan. Quicaquilo in lajtol, pehualo quineyto calo ca paquilisli. <sup>17</sup> Ma yoje, Dios ilajtol amo calaquic cuali pa inminyolo yehuanten huan pampín amo huejcahualo pa quineyto casi. Huan yojque jan ajnaxcan in tonali hual quinpanulo lacocoltilisli huan quiman quitejtoyto calo in lacames pampa quineytofocalo Dios ilamachilitlisli cuali, cuaquín yajmo quinequilo quineyto calo. Cate quinami in pacholimes hual amo quipialo lalhuayol, huejcahualo je nadita san. <sup>18</sup> In latocli hual cataya lakinili pin huiztilan, in quinami aquinojen noje quicaquilo Dios ilanahuatilisli. <sup>19</sup> Ma yoje, amo mocahualo pa quijnamiquisi in míac hual cate pin lalticpan hual quinequilo canal. Canal tomin calica mocuajcuamanalo, mocuhuiljicate inon hual quinchihuilía amo cuali. Quinequilo míac len yes huan yoje mochi inon quinmijlacúa lacames pa inminyolo. Quinequilo quicalhualo Dios ilajtol, huan mochi hualo quinami cuahuimes hual amo laquilo. Dios ilajtol amo quinpalehuía. <sup>20</sup> Huan in latocli hual cataya lakinili pan lali cuali, inon quinami yehuanten hual quicaquilo in lamachilitlisli cuali huan quineyto calo. Cuaquinon Dios ilamachilitlisli quinchihualtía cuali. Yulilo quichijticate quinami Dios quinequi, sequin niman míac, oc sequin amo yoje míac, cate quinami latocli, sequin quilaquiltilo treinta latocli pan se miahuil, sequin sesenta pan se miahuil huan sequin cien latocli pan se miahuil.

### *Mochi hual lalatili moitasi*

*(Lc. 8:16-18)*

<sup>21</sup> Noje quinmilitic:

—¿Cuajnesi quihualicalo se tapalquita calica lahuilo pa quilalisi itzindan se tapalcal o itzindan se lapexli? ¿Amo quilalilo capa quinlahuis moxtin?

<sup>22</sup> Yoje, len yes hual unca lalatili, unca yoje pa moitilis se tonali. Huan len yes hual amaqui quimati, unca yoje pa yoje se tonali quimatisi. <sup>23</sup> Aquí quipía inacas pa lacaquis, ma lacaqui.

<sup>24</sup> Noje quinmilitic:

—Xiquijnamictiacan inon hual anquicaqui. San quinami anlajnamictía, yoje anquimatis inon hual quinequi quijtúa. Huan yoje, jan quinami anquimaca, san yoje anyahui anquipía. Huan anyahui anquipía míac hual amo anpehuac anquipía amhuanten hual anlacaqui cuali. <sup>25</sup> Aquí quipía, yihual yahui cana míac hual ayamo quipiaya. Aquí amo quipía, yihual quiquixtilisi in nadita hual quipía.

### *Jesús lamaxtía ca ilapuhualisli quinami ixua in latocli*

<sup>26</sup> Noje quijtuaya:

—Yoje unca quinami huelitía Dios. Unca quinami se lalac hual quixini latocli. <sup>27</sup> Quiman unca lakinili, in lalac cochi pa layúa, moqueztinemi semilhuil. Ixuatía in latocli huan moscaltitía huan amo quimati in lalac quinami mochía. <sup>28</sup> Mochía pan ipampa in lali ihuían. Pehua ca nesi isacayo, cuaquín in miahuil, huan umpa monextilo in latocli pin miahuil. <sup>29</sup> Cuaquín cate yujyucsi in latocli, huan quisalo in lacames pa quitequisi, pampa ajsic in tonali pa lapixcasi.

### *Jesús lamaxtía ca ilapuhualisli ilatocli mostaza*

*(Mt. 13:31-32; Lc. 13:18-19)*

<sup>30</sup> Noje Jesús quijtuc:

—¿Quinami len huil tiquijtulo in unca quinami Dios huelitía? ¿Len lajtomes tiquijtusi pa ticnextilisli quinami unca? <sup>31</sup> Unca quinami se latocli mostaza.

Quitocalo pin lali in niman tipichin ca mochi latocli hual quitocalo pin lalticpan. <sup>32</sup>Ma yoje, quiman unca latocali, ixua huan moscaltía hué quinami amo cate yoje huejué in oc sequin pacholimes. Itzmolinía, itzmolinía huan in tutomes huil quinchihualo inminchan pa ilasehuán (ilasehuayan) in laitzmolinilisi.

*Nican quijtúa quinami Jesús quitequipanuaya lapuhualisli quiman lamaxtiaya*

*(Mt. 13:34-35)*

<sup>33</sup>Huan quinmilic Jesús ilamaxtilisli ca míac lapuhualisli quinami innojen. Quinmilic ilamaxtilisli quinami huil quicaquije. <sup>34</sup>Amo quinmilic nindeno sinda amo quinmilic ca lapuhualisli calica quinlatilic ilamaxtilisli, jan yoje quinmilic. Ma yoje quiman cataya ihuán ca imonextiliniymes, quinmilic len quinequiloaya quijtulo mochi ilapuhualisli.

*Jesús quinmilía pa mocahuasi in ijyecal huan in al huejcalan*

*(Mt. 8:23-27; Lc. 8:22-25)*

<sup>35</sup>In tonali nepa quiman layuajtitataya, Jesús quinmilic:

—Ma ticpanahuican in al huejcalan ca yoje itenco.

<sup>36</sup>Cuaquinon yehuanten quinmilije pa mohuicasi in míac lalacera huan imonextiliniymes Jesús quihuicaje pin barquito capa cataya. Noje ca yehuanten inminbarquito uyaje oc sequin barquitos. <sup>37</sup>Umpa ca se nadita pehuac ijyecal chichahuac. Majcoquiaya in al huan calaquiaya pin barquito, huan yoje tentataya ca al. <sup>38</sup>Huan Jesús coxtataya pin barquito itenco, mocuajtontitataya ca se xotopa yamanquil. Yehuanten quejxiltije, quitzajtzilije:

—¡Lamaxtini! ¿Amo timomajtía pampa tipolejticate?

<sup>39</sup>Cuaquinon ejsac, moquetzac, cajuac in ijyecal huan quilic in al huejcalan:

—¡Ximocahua, ximosehui!

Huan mosehuic in ijyecal, in al yajmo majcoquiaya. <sup>40</sup>Cuaquín Jesús quinmilic:

—¿Leca anquimacajsía? ¿Ayamo anquilalía laneltocalisli ca nehual?

<sup>41</sup>Momajtiloaya yehuanten míac, moilijtataloaya se huan oc se:

—¿Aqui yes in lalac hual quineltocalo in ijyecal huan in al huejcalan?

## 5

*Jesús quiquixtilía míac ijyecames se lalac pin lali Gadara*

*(Mt. 8:28-34; Lc. 8:26-39)*

<sup>1</sup>Ajsije ca yoje itenco (analco) in al huejcalan pa in lali itocac Gadara. <sup>2</sup>Quisac Jesús pin barquito laijtic. Hualac capa yihual quistihualaya se lalac capa quinlalpachulo mijquimes, quinamictihualac Jesús in lalac quipixtataya ijyecal amo cuali. <sup>3</sup>Chantiaya in lalac pin ostumes (cuevas) capa quinlalpachulo mijquimes. Amaqui huil quilpiaya, quema, amo huil quilpiloaya ca teposli. <sup>4</sup>Pan míac tonalijmes quilpinijme ca teposli pa icxihuaimes huan ca teposli pa imajmajuan. Ma yoje yihual quipostequini sequin teposlimes huan quicojcotonani oc sequin teposlimes huan moxtin momajtiloaya pa quiqitzquilosquiaya. <sup>5</sup>Amo mocahuaya pa tzajtztinemisquiaya ca semilhuil huan ca layúa pin tepetzindis (lomas) huan capa quinlalpachuje in mijquimes. Noje motecuatiniemiaya ca tixcalimes. <sup>6</sup>Quitac pa huejquita Jesús, molalujtihualac, quimolancuacuetzilizic, tzajtztic chichahuac. <sup>7</sup>Huan quilic:





míac, amo yoje cataya quiman pehuac mococuc. <sup>27</sup> Huan quimatic len quijutinemiloaya quinami huil lapajtiaya Jesús. Pampín hualac ca in lalacalera, ajsic itepotzcon Jesús, quimatoquilic inahuas. <sup>28</sup> Inon quichiác pampa quijtuaya laijtic yihual: “Sinda nicmatoquilis jan inahuas san, cuaquín nipajtis.” <sup>29</sup> Huan jan ajnaxcan mosehuic iqualisli eslera. Quimatic laijtic icuerpo pampa axan pajtic. <sup>30</sup> Jesús jan ajnaxcan quimatic laijtic yihual pampa quisac pa yihual oc sepa ilahuelilitisli pa lapajtis. Momalinac, quinmitac in míac lalacalera, quinmilic:

—¿Aqui nechmatocac?

<sup>31</sup> Imonextilinjmes quilije:

—¿Leca tilajlanic: “Aqui nechmatocac”? Tiquiztica quinami in míac lalacalera ajsitalo monahuac.

<sup>32</sup> Ma yoje, yihual mocahuac lachixtataya cajcapa pa quitas aqui quichi-huilic inon. <sup>33</sup> Cuaquín in sihual momajtic yuyucatataya. Huan quinami quimatic len panuc laijtic icuerpo, hualac, quimolancuacuetzilic ilaixpan Jesús, quilic mochi in hual quipanuc. <sup>34</sup> Huan Jesús quilic:

—Nito, axan tipajtic pampa ticlalic molaneltoalisli ca nehual. Ximohuica axan ca paquilisli huan ma yajmo mitzcocúa mococolisli.

<sup>35</sup> Ayamo lamiaya lajtu Jesús, huan hualaje yehuanten hual cataloaya pa ichan ihué in tiopan. Quilije:

—Lamic polehuic moxolol, ¿pa len ticmaca tequil in lamaxtini?

<sup>36</sup> Quicaquic Jesús in hual quilije, huan quilic ihué in tiopan:

—Amo ximomajti, xiclali laneltocalisli ca nehual san.

<sup>37</sup> Huan amo quinmacahuilic moxtin pa yalosquiaya ca yihual, jan Pedro huan Jacobo huan Juan icni Jacobo, yehuanten san. <sup>38</sup> Ajsije pa ichan in hué lalac. Quitac Jesús quinami quichihualoaya míac xahuanilisli, chocatat-aloaya huan tzajtzitataloaya. <sup>39</sup> Calaquic huan quinmilic:

—¿Leca anchocatitaca? Huan ¿leca anxahuantica? Amo polehuic in muachita, jan coxtica.

<sup>40</sup> Yehuanten quihuitzquilije san. Cuaquinon Jesús quinquixtic moxtin pa quiahuac. Quinhuicac itajtzin huan inantzin huan yehuanten hual ca yihual hualaloaya, calaquije capa cataya in muachita (ichpocal o piltondi).

<sup>41</sup> Quiquitzquic imajma in muachita, quilic ca ilajtol:

—Talita, cumi —hual quinequi quijtúa: Muachita, nimitzilía, ximoquetza.

<sup>42</sup> Jan ajnaxcan in muachita hual quipiaya doce xixihuil moquetzac, huan pehuac nejnemic. Pampa inon molapolultiloaya míac yehuanten. <sup>43</sup> Ma yoje, quinmilic Jesús chicahuac:

—Amo xicmachiltican amaqui len panuc.

Quinmilic noje pa quilacualtilosquiaya.

## 6

### *Jesús pin caltilan (pueblo) Nazaret* (Mt. 13:53-58; Lc. 4:16-30)

<sup>1</sup> Mohuicac Jesús umpa, mocuepac pa ilali capa moscaltic, uyac ca imonextilinjmes. <sup>2</sup> In tonali hual mosehuilo in judíos pehuac lamaxtic pa inmintiopian, huan in míac hual quicacataloaya mocahualoaya moizticate, mollije:

—¿Capa monextilic in se mochi in hual techilijtica? ¿Len in lajmatilisli hual quipía? Huan quinchía innojen hual techlapolultilo. <sup>3</sup> ¿Amo in se in carpintero, amo yihual ixól María, huan amo icnián Jacobo huan José huan

Judas huan Simón? Quema, yihual. Huan icnián sihuames, yehuanten cate nican ca tehuanten.

Huan quixijxicuje, cualanije ca yihual. <sup>4</sup> Huan Jesús quinmilic:

—Lacames quimatilo momajtilo ilaixpan se ilajtuni Dios. Jan yehuanten san pa ilali huan icnián pa oc sequin calimes huan yehuanten pa ichan, innojen amo quipililo lamajtilisli ilaixpan.

<sup>5</sup> Huan nepa amo huil quichíac len hual lanextilisquiaya quinami yihual quipía Dios ilahuelilitlisli. Jan quinlalilic imajmajuan pan sequin naditas coxquimes huan quinpahtic. <sup>6</sup> Huan molapolultiaya Jesús pampa yehuanten amo quinequiloaya quineltocalo yihual.

*Jesús quintilanía imonextilinjmes pa quinmilisi in judíos ilajtol*

(Mt. 10:5-15; Lc. 9:1-6)

Huan quisac nepa Nazaret, yajtiahuiaya pan sequin caltilan tijtipichin amo huejca, nejnepa lamaxtiaya. <sup>7</sup> Cuaquín quinnotzac in doce imonextilinjmes ca yihual huan pehuac quintilaníc pa yahuilosquiaya oj'ome. Quinmacac lahuelilitlisli pa quinquixtilisli lacames huan sihuames ijyecames amo cuajcuali. <sup>8</sup> Quinnahuatic pa camo quihuicalosquiaya nindeno pa ojli, jan se cuajtzindi san pa mopalehuizi pa nejnemisi. Huan amo quinmacahuiltic pa quihuicalosquiaya xotopa huan len quicualosquiaya huan tomin pa inminpaxajmes. <sup>9</sup> Noje quinmilic pa molalililosquiaya jan lacsames san, huan quinmilic pa molaquentilosquiaya ca in tzotzomajli calica mojmosta molaquentiloaya huan ca se cotón san. <sup>10</sup> Quinmilic:

—Capa yes ancalaquis se cali, nepa xicayacan pa mochi tonalijmes anayas pin caltilan. <sup>11</sup> Sinda yehuanten pin caltilan amo anmitznamiquisi huan amo quinequisi anmitzcaquisi, cuaquín in tonali anquisas umpa, ximotzejtzeluilican in lalpotocli hual unca pa anmolacsames. Yoje quimatisi quinami quichihuilihticate Dios len amo cuali. Annimitzilia neli, pa in tonali Dios quintilanís iyampa yihual yehuanten pin lalticpan, yehuanten pa in caltilan yalo panulo míac lacocoltilisli. Amo yoje míac panusi lacocoltilisli yehuanten de in caltilan Sodoma huan in caltilan Gomorra.

<sup>12</sup> Yoje quisaje in doce imonextilinjmes quinmililoaya in judíos Jesús ilamachilitlisli pa quipalasi inminyolo pa yulisi quinami Dios quinequi. <sup>13</sup> Noje quinquixtililoaya yehuanten míac ijyecames amo cuajcuali, quinxahuililoaya míac cocoxquimes ca chahuac huan quinpahtiloaya.

*Quimictilo Juan Lacuayatequini*

(Mt. 14:1-12; Lc. 9:7-9)

<sup>14</sup> In hué itocac Herodes quimatic len quichihuaya Jesús, pampa moxtin molaquetziloaya inahuac yihual. Sequin quijituloaya Jesús cataya Juan Lacuayatequini hual mocuepac yulic mas que quimictije. <sup>15</sup> Oc sequin quijituloaya:

—Yihual Elías, hual yec ilajtuni Dios pa yina.

Huan oc sequin quijituloaya:

—Yihual se ca ilajtunijmes Dios hual yulinijme pa yina.

<sup>16</sup> Quiman quicaquiaya inon Herodes, quijtuc:

—In se unca Juan. Nilatilaníc pa quicotonilisi iquixlan. Unca yihual hual axan yuli oc sejpa, quisac pa capa cate in mijquimes.

<sup>17</sup> Yoje quijtuc Herodes pampa quinpiac sequin mesli, yihual latilaníc pa quiquitzquilosquiaya Juan pa quicalactilosquiaya pin calijtic. <sup>18</sup> Inon cataya pampa Juan sejpa huan oc sejpa quilic Herodes:

—Dios ilajtol quijtúa pampa amo unca moyaxca pa ticanas isihua mocni.

Juan quilic inon pampa Herodes canac Herodías hual yec isihua Felipe huan Felipe yec icni Herodes.

<sup>19</sup> Huan Herodías amo mocahuac cualanic ca Juan. Quinequiaya quimicti, huan amo huil. <sup>20</sup> Amo huil quimictic pampa Herodes quimatiaya momajti ilaixpan Juan. Quimatiaya pampa Juan yec local cuali hual quiapiaya iyolo chipahuac. Pampa inon Herodes amo quimacahuiltiaya pa Herodías quichihuilisquiaya nindeno Juan. Herodes quicaquic quilaquetzilic Juan Dios ilajtol, huan mas que quimacajsiaya in hual quiliaya Juan, ma yoje quixtocaya quicaqui.

<sup>21</sup> Cuaquinon, ajsic se tonali quiman Herodías quitac quinami quimomic-tiulisquiaya Juan. Pan in tonali quichijtaloaya ilhuil (fiesta) pampa in tonali monamiquic ca in tonali hual lacatic Herodes. Herodes quinnotzac pa lacuasi in huejueyenten huan in laicananijmes huan mochi yehuanten huejueyenten pin lalticpan Galilea. <sup>22</sup> Lacuajtaloaya, calaquic Herodías ixolol sihual, pehuac mijtotic. Yoje quinmacac paquillisli Herodes huan yehuanten hual ca yihual cataloaya. Pampa in, Herodes quilic in sihual:

—Xichtemachi len ticnequis huan nel nimitzmacas.

<sup>23</sup> Quilic inon ca lajtol hual amo mopala, quilic:

—Len yes tichtemachis nimitzmacas, quema, sinda tichtemachis lajco in lali capa nihuelitía.

<sup>24</sup> Quisac in sihual yancuic, quilic inantzin:

—¿Len nictemachis?

Huan inantzin quinanquilic:

—Itzontecon Juan Lacuayatequini.

<sup>25</sup> Mocuectiquisac in sihual yancuic capa cataya Herodes, quilic:

—Nicnequi pa tichmacas jan ajnaxcan itzontecon Juan Lacuayatequini pan se tapalcal xalapa.

<sup>26</sup> Cuaquinon quicococ iyolo in hué. Ma yoje, amo quinequiaya quipala in lajtol hual yihual quilic, pampa quijtuc ca lajtol hual amo mopala, huan quicaquije yehuanten hual nepa cataloaya ca yihual. <sup>27</sup> Yoje, quitilanic se guache quilijtataya pa quihualiquilis Juan itzontecon. <sup>28</sup> Uyac in guache pa in calijtic capa cataya Juan, quicotonilic iquixlan, quihualicac itzontecon Juan pan se tapalcal xalapa. Quimacac in sihual yancuic, huan yihual quihuiquilic inantzin.

<sup>29</sup> Quimatije inon imonextiliniyjes Juan, uyaje canaje icuerpo (inacayo), quilalpachuje.

*Jesús quinlacualtía macuili mil lacames*  
(Mt. 14:13-21; Lc. 9:10-17; Jn. 6:1-14)

<sup>30</sup> Yehuanten doce imonextiliniyjes Jesús monechicuje oc seppa capa cataya Jesús, quilije mochi hual quichihuaje. Quilije noje len quinmxtije yehuanten pa innojen míac caltilan. <sup>31</sup> Cuaquín Jesús quinmilic:

—Ma tiacan tohuán pa lajcotiyan capa amaqui unca, nepa timosehuisi je tipichin.

Inon quinmilic pampa yahuiloaya huan hualaloaya míac lacames huan sihuames. Pampín amo huil lacuaje Jesús huan imonextiliniyjes. <sup>32</sup> Yoje uyaje ca se barquito ca capic amaqui cataya. <sup>33</sup> Ma yoje, míac quinmitaje quiman uyaje yehuanten, huan quinmiximatije Jesús huan in doce imonextiliniyjes. Pampín quisaje pa mochi caltilan, molalujtaje ca umpic, ajsije quiman ayamo ajsic Jesús. <sup>34</sup> Cuaquinon, ajsic Jesús, quisac laijtic in barquito, quinmitac míac lalalera. Huan quinpiliaya laicnilisli yehuanten pampa cataloaya quinami borregos hual amaqui quinmiztataya. Cuaquín

pehuaya quinmaxti míc. <sup>35</sup> Quiman tiolactic, hualaje imonextilinjmes capa yihual, quilije:

—Axan tiolactic, ca niquic amaqui chanti. <sup>36</sup> Xiquintilani pa yasi pa innojen caltilan itenco nican huan pin caltilan tijtipichin pa mocuhulisi len quicuasi.

<sup>37</sup> Yihual quinnanquilic:

—Amhuanten xiquinlacualtican.

Quinnanquilije:

—¿Tiasi tijcuhuasi pan ca ome cientos denarios tomin pa tiquinlacualtisi?

<sup>38</sup> Jesús quinlajlanic:

—¿Quichi panes anquinpía? Xiacan xiquitacan.

Quimatije quichi, cuaquín quilije:

—Macuili, huan ome michimes.

<sup>39</sup> Cuaquinon quinmilic in lalalera pa mosehuisi sejsequin nican, sesequin nepa pani pin sacal xuxuctic. <sup>40</sup> Yoje moxiluje yehuanten huan molalije ca míc lanechiculisli, sequin ca cien, oc sequin ca cincuenta lacames. <sup>41</sup> Huan Jesús quinmanac in macuili panes huan in ome michimes, lachíac pa pani pin cielo, quisehuic Dios pampa in hual yahuiloaya quicualo. Cuaquinon quinxiluic in panes, quinmacac imonextilinjmes pa quinlalilisi inminlaxpan moxtin. Noje quinxiluic in ome michimes pa moxtin. <sup>42</sup> Yoje moxtin lacuaje huan pachihuije. <sup>43</sup> Cuaquín quinpejpenaje mochi in pan lapanali huan in michimes hual amo quicuaje, quintemiltije doce chiquihuimes ca innojen. <sup>44</sup> Cataloaya macuili mil lacames hual quicuaje in panes.

### *Jesús nejnentía pani in al*

(Mt. 14:22-27; Jn. 6:16-21)

<sup>45</sup> Jan axcan Jesús quinmilic imonextilinjmes pa lejcusi pin barquito, quinmilic pa quilaicanasi yihual pa Betsaida hual cataya pa yoje (analco) in al huejcalan. Huan yihual mocahuaya pa quinmilis in lalalera huan sihalera pa mohucasi pa inminchan, quinlichahuaya. <sup>46</sup> Quiman quintilanic moxtin, uyac Jesús pin lomas (tepetzindis), umpa quilajlaniaya Dios.

<sup>47</sup> Cuaquín layuajtíc, huan cataya in barquito lajco pin al huejcalan huan mocahuaya Jesús ihuían pan lali. <sup>48</sup> Pa cualcan quinmitac Jesús imonextilinjmes siahuloaya quilanilultitataloaya in barquito ca cuahuimes, pampa quinlaxnamiquiaya in ijyecal chicahuac. Cuaquín ajsitihualaya Jesús nejnentataya pani pin al, yahuiaya quinpanahui. <sup>49</sup> Quitaje yihual nejnentihualaya pani pin al, quijtuloaya Jesús yec se lamajtini. <sup>50</sup> Pampin tzajtziyoaya pampa quitaje moxtin huan quimacajsije. Ma yoje, quinnotzac Jesús, quinmilic:

—¡Xicchichualtican anmoyolo, amo ximomajtican! ¡Nehual niunca!

<sup>51</sup> Lejuc pin barquito ca yehuanten, mosehuic in ijyecal. Huan molapolultije imonextilinjmes. <sup>52</sup> Molapolultije pampa ayamo quimatiloaya quinami panuc nepa capa quinxiluic Jesús in panes huan in michimes. Amo huil quimatiloaya san quinami míc unca ilahuelilitisli hual quipía Jesús.

### *Jesús quinpajtía míc cojcoxquimes pin lali Genesaret*

(Mt. 14:34-36)

<sup>53</sup> Quipanahuije in al huejcalan, ajsije pin lali itocaya Genesaret. Quilpije in barquito pa itenco in al huejcalan. <sup>54</sup> Quisaje pin barquito huan jan ajnaxcan in lalalera quiximatije, quislacuje Jesús. <sup>55</sup> Cuaquín molalujtine-miloaya moxtin yehuanten umpa, pehuaje quihualicaje in cojcoxquimes pan

lapexlimes quiman quimatije capa cataya Jesús. <sup>56</sup> Cajcapa yes calaquiaaya yihual, sinda pa sequin caltilan tijtipichin o sinda pa sequin caltilan huejué o sinda pa sequin caltilan niman tijtipichin, quinlalije in cojcocoxquimes pin lajcotiyan. Quitemachiloaya Jesús pa yihual quinmacahuiltis pa quimatosasi jan itenco icotón huejcanic san. Huan moxtin hual quimatocaje, yehuanten pajtijte.

## 7

*¿Len quijlacúa iyolo se lalcal?*  
(Mt. 15:1-20)

<sup>1</sup> Huan quistihualaje Jerusalén fariseos huan sequin inminlamaxtinijmes in judíos, quimaxtiloaya inminlajtol hual quinmíla quinami monequi pa quimolancuacuetzilisi Dios. Yehuanten monechicuje capa cataya Jesús. <sup>2</sup> Quitaje quinami sequin imonextilinijmes lacualoaya ca inminmajmajuan catzahuac, quinequi quijtúa amo lapacali. Huan inminlajtol in judíos quijtúa pampa quema, quipialo pa mochipahuililo inminmajmajuan jan yojque quinami quijtúa in lajtol. Pampín motexpahuiloaya ca Jesús imonextilini-jmes. <sup>3</sup> (Motexpahuiloaya pampa in fariseos quichihualo quinami mochi in oc sequin judíos. Amo lacualo sinda amo pehualo ca lapacalisli pan inmajmajuan. Yojque quinmajcoquilo in lachihualisli hual quitemacaje pa yina míac xixihuil inmintajtzitzián. <sup>4</sup> Huan sinda yalo pa in lajcotiyan (tianquisli) capa lacuhualo huan lanamacalo, cuaquín quiman mocuepalo, amo lacualo sinda amo pehualo ca lapacalisli pan ipampa lajuichulisli hual quipialo pa quichihuasi jan yoje. Huan cate oc sequin míac lajtomes hual quitemacaje inmintajtzitzián, hual in judíos quipialo pa quineltocasi, quinami innojen: Quipialo pa quinpacasi quinami lacuayatequilisli tapalcames tijtipichin huan tapalcames huejué huan nixcumimes jan yoje quinami quijtúa inminlajtol.) <sup>5</sup> Pampín yehuanten in fariseos huan in lamaxtinijmes quilajlanije Jesús, quilije:

—¿Leca amo quineltocalo momonextilinijmes inminlajtomes totajtzitzián? Lacualo ca inminmajmajuan amo lachipahuali jan yoje, huan inon amo unca quinami quijtúa tolajtol hual techilía quinami ticmolancuacuetzililo Dios.

<sup>6</sup> Huan Jesús quinnanquilic:

—Isaías ilajtuni Dios quijtuc melahuac anmonahuac amhuanten hual anlajtúa yoje. Ma yoje, amo anquichía yoje quinami anlajtúa. Yihual Isaías quijsuiluc len Dios quijtuc, quilic: Innojen lacames quimatilo nechpililo lamajtilisli san ca inmincamac, huan ca inminyolo amo quiman nechijnamiquilo.

<sup>7</sup> Jan lapic (de in balde) nechmolancuacuetzililo pampa quinmaxtilo san inminlajtomes lacames.

Amo monotza len in lancuacuetzalisli hual nejchihuililo, pampa quinmaxtilo san lacames inminlajtomes.

<sup>8</sup> Amhuanten anquicahua Dios ilamachiltisli huan amo quiman anmocahua pa anquichías len anmitznahuatinijme in hual quijsuiluje lacames pa yina, pampa amo anquilcahua pa anquincuyatequis tapalcames huejué huan tijtipichin huan xicalimes. Huan anquinchía oc sequin míac hual anmitztemacanjime lacames.

<sup>9</sup> Noje quinmilic:

—¿Cuajnesi anquichijtica cuali quiman yes anquitojpehua Dios ilamaxtilisli? Anquitojpehua quiman anquichijtias anmolamaxtilisli hual anmitztemacanjime pa yina lacames. <sup>10</sup> Amo anquichijtica cuali, pampa Moisés quijtuc: “Xiquinlasojla motajtzin huan monantzin.” Noje quijtuc: “Aqui quihuejuecaltia itajtzin o inantzin, ma ye lamictili.” <sup>11</sup> Ma yoje, amhuanten anquijtua pampa sinda se lalac quinmilia itajtzin huan inantzin: “Amo huil annimitzpalehua ca notomin huan len yes noyaxca, pampa mochi hual noyaxca unca Corbán.” (Corbán quinequi quijtua pampa quitemacaje Dios.) <sup>12</sup> Huan sinda quinmilia yoje, cuaquin amhuanten yajmo anquimacahuiltia pa quinpalehuis itajtzin huan inantzin. <sup>13</sup> Yoje anquichia. Huan yoje ca amhuanten yajmo monotzas nindeno Dios ilajtol pan ipampa anmolamaxtilisli. In lamaxtilisli anmitztemacanjime pa yina in huejueyenten. Huan amhuanten anquitemacas anmoxolomes in lamaxtilisli. Noje cate miac oc sequin lamaxtilisli quinami innojen hual anquinchia.

<sup>14</sup> Oc sepa Jesús quinnotzac in lacames huan sihuames, quinmilic:

—Xichcaquican anmoxtin huan xicmatican inon hual nicnequi niquijtua. <sup>15</sup> Amo unca nindeno hual quicuas se hual quijlacus iyolo. Unca inon hual quisa capa iyolo se, quema, in quijlacua. <sup>16</sup> Aqui yes quipia incas, ma quicaqui inon.

<sup>17</sup> Jesús moxilujtiac capa cataloaya in miac lalalera, calaquic pa icali. Quilajlanije imonextilinjmes len quinequiaya quijtu in lapuhualisli calica lamaxtiaya, yojque quinlatilijtataya in lalalera ilamaxtilisli. <sup>18</sup> Yihual quinmilic:

—¿Noje amo anquimati amhuanten len quinequi quijtua? ¿Amo anquimati pampa mochi hual quicua se amo quijlacus iyolo? <sup>19</sup> Amo calaqui pa iyolo, calaqui pa lajitic icuerpo (inacayo), cuaquinon quisa quiman yes yahui sacatlan.

Yojque quinequiaya quijtu Jesús pampa mochi pin lalticpan hual quicualo lacames unca cuali pa tijcuasi.

<sup>20</sup> Noje quinmilic:

—Unca in hual quisa capa iyolo se, inon quijlacua. <sup>21</sup> Unca pampa lajitic iyolo se quijtua len amo cuali. Huan quinami yoje quijtulo lacames pa lajitic inminyolo, monilulo lacames huan sihuames mas que amo monamictije. <sup>22</sup> Laxtequilo, lamictilo, canaloc sequin sihuames hual amo inminsihuahuan, quinequilo hual amo inminyaxca. Quichihualo in amo cuali, lacuajcuamanalo, amo quimatilo pinahualo, quixiculilo oc sequin. Lahuejuecaltilo, amo lalasojlalo, amo quinequilo quimatilo len unca amo cuali pa motzacuilisi pa camo quichihuasi. <sup>23</sup> Mochi inon quisalo pa lajitic iyolo se huan quijlacua iyolo.

### *Se sihual pin lali Sirofenicia quilalá ilaneltocalisli ca Jesús*

(Mt. 15:21-28)

<sup>24</sup> Cuaquinon quisac Jesús umpa, uyac capa cataloaya in caltilan hué Tiro huan in caltilan hué Sidón. Nepa pehuac chantic pa se cali. Quinequiaya pa amaqui quimatisquiaya pampa umpa cataya. Ma yoje, amo huil quinmolatiliaya. <sup>25</sup> Nepa cataya se sihual quiapiaya se muachita (ichpocal). In muachita quiapiaya se ijyecal amo cuali. Quicaquic in sihual quilaquetzilije quinami huil lapajtia Jesús, huan jan ajnaxcan hualac quitac, quimolanacuacuetzilic capa icxían. <sup>26</sup> Cataya ilali in sihual in lali Sirofenicia huan lajtuaya griego. Quitemachiaya Jesús pa quiquixtilis in ijyecal imuachita. <sup>27</sup> Jesús quilic:

—Ma mopehualti pa in xolomes pachihuisi. Amo unca cuali sinda quiquixtililo in hual quicualo in xolomes pa quilasasi pa quicuasi in pelotz-itzindis.

<sup>28</sup> Huan in sihual quilic:

—Jo quema, Tata. Ma yojque itzindan capa lacualo in xolomes in pelotz-itzindis quicualo inminlapanajquimes tijtipichin in xolomes hual quinmayahuilo pan lali.

<sup>29</sup> Jesús quilic:

—Unca cuali in hual tiquijtoc. Pampín, huil timohuica, axan quisac in ijyecal capa moxolol.

<sup>30</sup> Huan ajsic in sihual pa ichan, quitac in muachita pa ilapexli, quisac capa yihual in ijyecal.

### *Jesús quipajtía se panata hual amo huil lajtúa*

<sup>31</sup> Quisac Jesús pin lali inahuac Tiro, quipanahuic Sidón, quipanajtíac in lali capa cataloaya in Diez Pueblos (Majlacli Cajcaltlan), huan ajsic pa in al huejcalan itoca Galilea. <sup>32</sup> Quihualicaje se lacal panata hual amo huil lajtuya cuali. Quilije:

—Xícnequi xiquinlali momajmajuan capa yihual pa pajtis.

<sup>33</sup> Cuaquín Jesús huan in lacal panata moxiluje ca capic cataloaya inminhuían. Quinlalic Jesús ixerixajmes pa inacajmes in lacal, lachijchac, quimatocac inejnepil in lacal. <sup>34</sup> Cuaquinon lachíac pa pani pin cielo, ijyulantic, quilic:

—¡Efata! —hual quinequi quijtúa: ¡Ma molapucan!

<sup>35</sup> Jan ajnaxcan molapuje inacajmes, molinic cuali inejnepil, lajtuc cuali.

<sup>36</sup> Quinnahuatic Jesús pa camo quilisi amaqui. Ma yoje, mas que míac quinmilic inon oc sejpa huan oc sejpa, jan yoje yehuanten míac, míac quinmilijtinemiloaya oc sequin. <sup>37</sup> Huan in lacalera molapolultiloaya niman míac. Quema, amo quiman molapolultije yoje, quijtuloaya:

—Yihual quichía cuali mochi. Yehuanten hual panatas quinlacaquiltía, huan aquinojen hual amo lajtulo, yihual quinchihuilia pa lajtusi.

## 8

### *Jesús quinlacualtía nahui mil lacames* (Mt. 15:32-39)

<sup>1</sup> Innojen tonalijmes monechicuje oc sejpa míac lacames, huan amo quipialoaya len quicalosquiaya. Quinnotzac Jesús imonextiliniijmes quinmilic:

<sup>2</sup> —Niquinmicnília in míac lacalera pampa quipía ye tonali yehuanten cate ca nehual huan axan amo quipialo len quicuasi. <sup>3</sup> Sequin hualaje huejca. Sinda niquintilanis ca mayandi pa inminchan, amo quipiasi chichahualisli pa in ojli.

<sup>4</sup> Quijtuje imonextiliniijmes:

—¿Quinami huil quinlacualtía se nican? Amaqui chanti ca níc.

<sup>5</sup> Quilajlanic, quinmilic:

—¿Quichi panes anquinpía?

Quijtuje:

—Chicome.

<sup>6</sup> Cuaquín Jesús quinmilic pa molalilosquiaya pan lali. Quinmanac in chicome panes, quisehuic Dios. Cuaquinon quinxiluilic, quinmacac imonextiliniijmes pa quinlalililosquiaya inminlaixpan yehuanten. <sup>7</sup> Quimpialoaya noje sequin michimes tijtipichin. Quisehuic Dios, huan quinmilic noje



imonextiliniymes pa quinlalilisi inminlaixpan pa quicualosquiaya. <sup>8</sup> Lacuaje huan pachihuije. Cuaquinon quinpepenaje chicome chiquihuimes tenticate ca lajquitos ca in pan lalapanali hual mocahuaje. <sup>9</sup> Yehuanten hual lacuaje cataloaya quinami nahui mil lacames. Cuaquinon quinmilic Jesús pa mohuicalosquiaya. <sup>10</sup> Cuaquín, Jesús huan imonextiliniymes calaquije se barquito, uyaje pa in lali motocaya Dalmanuta.

*Sequin fariseos quitemachililo Jesús se lanextilisi hual quinnextilía Dios ilahueliltisli*

*(Mt. 16:1-4; Lc. 12:54-56)*

<sup>11</sup> Hualaje quitaje Jesús sequin fariseos, pehuaje quinlaxilije Jesús lajtomes, quilije:

—Timitztemachilo, xicchia len hual technextilis pampa unca iyaxca Dios molahueliltisli.

Cataya pampa yehuanten amo neli quineltocaloaya pampa Dios quitilanic Jesús. Pampín quinequiloaya quichihualtilo se lanextilisi. <sup>12</sup> Cuaquín ijyulantic Jesús ca mochi iyolo pampa amo quineltocaloaya huan quinmilic:

—¿Leca quitemachilo lacames pa quitasi je lanextilisi pin cielo? Annimitzilía neli, amo nesis se lanextilisi pin cielo pa yehuanten hual yulticate axan.

<sup>13</sup> Huan quiman quinmilic inon, quincajcahuac, mocuepac calaquic in barquito oc seypa. Quipanahuiaya ca imonextiliniymes ca yoje (analco) in al huejcalan.

*Jesús quinlaquetzilía inahuac inminlaxocoyajquil in fariseos*

*(Mt. 16:5-12)*

<sup>14</sup> Huan imonextiliniymes quilcahuaje quihuicaje len pa quicualosquiaya, quipialoaya jan se pan ca yehuanten pin barquito. <sup>15</sup> Cuaquín quinmactic Jesús ca lajtomes niman pa inminyolo, quinmilic:

—Xiquitacan. Ximoitacan pa como anmocujcuamanas ca inminlaxocoyajquil in fariseos huan Herodes.

<sup>16</sup> Pehualoaya moililo:

—Yihual techilic inon pampa amo ticalicaje len tijcuasi.

<sup>17</sup> Quimatic Jesús len moililoaya, quinmilic:

—¿Leca annoilía pampa amo anquipía len pa tijcuasi? ¿Ayamo anquilalía pa anmotzontecón huan amo ancajsi pa anmoyolo inon hual nicnequi annimitzmactía? ¿Amo anquinequi anquimati len quinequilo quijtulo nolajtomes?

<sup>18</sup> Anquinpía annoixtololojmes. ¿Amo anlachía? Anquinpía anmonacajmes. ¿Amo anlaçaqui? ¿Amo anquijnamiçuí? <sup>19</sup> Niquinxiluic in macuili panes ca in macuili mil lacames. Axan, ¿quichi chiquihuimes ca lajquitos lalapanali anquinnechicuc huan anquintemiltic?

Yehuanten quinanquilije:

—Doce.

<sup>20</sup> —Huan niquinxiluic in chicome panes ca in nahui mil lacames. ¿Quichi chiquihuimes anquinnechicuc huan anquintemiltic ca lajquitos lalapanali hual anquinpepenac?

Yehuanten lananquilije:

—Chicome.

<sup>21</sup> Cuaquinon quinlajlanic:

—¿Ayamo anquimati len annimitzmactita? Da amo nilaqueztataya inahuac in hual tijcuasi.

*Quipajtía Jesús se pachacal pin caltilan Betsaida*

<sup>22</sup> Ajsije pin caltilan motocaya Betsaida. Nepa sequin lacames quihualicaje capa Jesús se lalac pachacal, quilajlanije pa quimatocasquiaya. <sup>23</sup> Cuaquín Jesús quiquitzquic ca imajma, quiquixtic in pachacal pa quiahuac in caltilan. Nepa lachijchac capa iixtololojmes pa quinxahuilis ca ilachijchal, quilalilic imajmajuan pani yihual huan quilajlanic:

—¿Huil tiquita len?

<sup>24</sup> Lachíac in pachacal huan quilic:

—Niquinmita lacames quinami cuahuimes, huan nejnemilo.

<sup>25</sup> Cuaquinon Jesús quinlalic oc sejpa imajmajuan capa iixtololojmes in pachacal. Cuaquín momelahuac lachíac, huan axan, quema, lachíac cuali. Pajtije iixtololojmes, mochi huil quitaya. <sup>26</sup> Huan Jesús quitilanic pa ichan, quilic:

—Amo xicalaquí pin caltilan axan huan amo xiquili amaquí.

*Pedro quijtúa pampa Jesús unca in Cristo hual Dios quitilanic*  
(Mt. 16:13-20; Lc. 9:18-21)

<sup>27</sup> Mohuicaje Jesús huan imonextiliniyjes, uyaje pa innojen caltilan hual amo cataya huejca se caltilan motocaya Cesarea Filipo. Huan pa ojli quinlajlanic imonextiliniyjes, quinmilic:

—¿Len quijtulo lacames pampa aquí nehual?

<sup>28</sup> Yehuanten quinanquilije:

—Sequin quijtulo tel tiJuan Lacuayatequini. Oc sequin quijtulo tel tiElías. Huan oc sequin quijtulo tel tiunca se ilajtuniyjes Dios.

<sup>29</sup> Oc sejpa yihual quinlajlanic:

—Amhuanten, ¿len anquiqtúa pampa aquí nehual?

Pedro quinanquilic:

—Tehual tiunca in Cristo hual Dios quitilanic.

<sup>30</sup> Huan Jesús quinmilic chicahuac pa camo quilisi amaquí inon.

*Jesús quijtúa quinami miquis*  
(Mt. 16:21-28; Lc. 9:22-27)

<sup>31</sup> Pehual quinmaxtic, quinmilic:

—Nehual ilacal in cielo nicpía pa nipanus míac lacocoltilisli. In abuelojmes huan tiopistas huejué huan in lamaxtinijmes nechilisi pampa amo quinequilo pa nicayas ca yehuanten, huan nechmictisi. Huan quiman panusi ye tonalijmes, niyulis oc sejpa.

<sup>32</sup> Inon quinmilic ca lajtl hual quimatije len quinequiaya quijtu. Cuaquinon Pedro quihuicac ca yihual ihuán, pehuac quilic chicahuac pa camo quijtusquiaya pampa yahuiaya miqui. <sup>33</sup> Ma yoje, momalinac Jesús, quinmitaya imonextiliniyjes, cajuac Pedro huan quilic:

—¡Ximijcuani nolaixpan! Tilajtutica quinami Satanás. Amo tiquiqtúa in hual unca iyaxca Dios, tiquiqtúa san in hual quijtulosquiaya lacames.

<sup>34</sup> Cuaquinon quinnotzac Jesús imonextiliniyjes huan in lalacera, quinmilic:

—Aquí quinequi nechtoctatía pa monextilis quinami nicnequi pa yulis, amo huil quichía quinami yihual quinequi. Quipía pa canas ojli capa yahui panúa lacocoltilisli quinami nehual nipanus lacocoltilisli huan cuaquín nechmictisi pan se cuahuil. <sup>35</sup> Monequi pa yes yoje, pampa aquí yes quinequi cajcoquia iyulilisi icuerpo san, yoje yihual quipolus iyulilisi huan mochi. Quema, yihual miquis. Huan aquí momacahuiltis pa quipolus iyulilisi icuerpo pampa unca nomonextilini huan pampa quineltoca in lamachiltisli cuali, yoje yihual neli cajcoquis iyulilisi. <sup>36</sup> Cuajnési moyaxcajtía se

lacial ca mochi in lalticpan. Ma yoje, miquis, quipolus iyulilisi. Cuaquinon, ¿len quipías? <sup>37</sup> ¿Len huil quilaxlahuía se lacial pa quipías oc sejpa iyulilisi? Nindeno. <sup>38</sup> Yehuanten hual axan yulticate quicajcahualo Dios, quintocalo oc sequin dioses, quichihualo laijlaculisli. Huan aqui pinahuas pampa nehual huan nolajtomes, cuaquín nehual ilacal in cielo, nehual noje nipinahuas pampa yihual pa in tonali hual nihualas pa nihuelitis pan lalticpan. Nihualas ca ichichualisli hué huan ilaixpelalisli cualtichin noTajtzin huan ilanahuatinijmes chijchiphahuac pin cielo hual quinpia pa quitequipanuilisi.

## 9

<sup>1</sup> Noje Jesús quinmilic:

—Neli annimitzilia, sequin ca yehuanten hual nican cate axan quitasi quinami hualas ilahueliltilisli Dios ca chicahualisli. Quema, yehuanten quitasi mas que ayamo miquije.

*Jesús mopala laixpelatica inminlaixpan ye imonextilinjmes*

*(Mt. 17:1-13; Lc. 9:28-36)*

<sup>2</sup> Panuje chiuase tonalijmes. Cuaquín Jesús quinhuicac Pedro huan Jacobo huan Juan, mohuicaje inminhuian, panquisaje se loma (tepel) cuajtlic. Nepa mopalac Jesús inminlaixpan. <sup>3</sup> Pehuac laixpelac inahuas, iztatataya miac quinami tisihuil. Se lapacani pan lalticpan amo huil quichiphahuasquiaya iztac quinami in. <sup>4</sup> Huan nesije Elías huan Moisés, ca Jesús laquezatataloaya. Yehuanten in omenten yulinijme niman pa yina pa tonalijmes hual ayamo lacatic Jesús nican pan lalticpan. <sup>5</sup> Cuaquín Pedro quinotzac Jesús, quilic:

—¡Lamaxtini! Cualí unca pampa ticcate nican. Ma ticchihuacan ye calimes lachihuali ca isacayo cuahuimes, se pa tehual huan se pa Moisés huan se pa Elías.

<sup>6</sup> Inon quilic Pedro pampa momajtitataloaya in ye monextilinjmes huan pampín Pedro amo quimatiaya len quijtusquiaya. <sup>7</sup> Huan hualac se mextemil, quinlaquentic huan quicaquije in monextilinjmes se lajtol quistataya pin mextemil, quijtuc:

—In noxolol, yihual niclasojla. Xijcaquican yihual.

<sup>8</sup> Huan jan ajnaxcan, lachiaje inmintenco, yajmo quitaje amaqui ca yehuanten, jan yihual Jesús san.

<sup>9</sup> Cuaquín temujtiahuloaya in loma (tepel) cuajtlic, huan Jesús quinmilic chicahuac:

—Amo xiquilican amaqui len anquitac. San quiman nehual ilacal in cielo nimiquis huan cuaquinon niyulis oc sejpa, pa in tonali, xiquinmilican moxtin.

<sup>10</sup> Cuaquín yehuanten molajlaniloaya len quinequiaya quiytu in hual Jesús quinmilic, in quinami yahuiaya miqui huan umpa yahuiaya yuli oc sejpa. Huan mas que quiqnamiquije pa inminyolo, ma yoje amo molaquetzilije inahuac inon.

<sup>11</sup> Cuaquín quilajlanije Jesús, quilije:

—¿Leca techmaxtilo ilamaxtinijmes Dios ilajtol, quil, monequi pa hualas Elías, cuaquinon hualas Cristo?

<sup>12</sup> Jesús quinnanquilije:

—Neli monequi pa hualas Elías pa quipehualtis imelahualisli mochi. Ma yoje, nehual ilacal in cielo, ¿quinami unca lajcuiluli ca Dios ilajtol pampa nehual nicpías pa nipanus miac lacocoltilisli hual nejchihuilisi in lacames, huan yehuanten nejxixicusi? <sup>13</sup> Huan annimitzilia pampa hualac se hual

quichihuaya quinami Elías, huan sequin quichihuilije quinami quinequi-loaya. Quimictije jan quinami unca lajcuiluli inahuac yihual.

*Jesús quipajtía se xolol hual quipía ijyecal amo cuali*  
(Mt. 17:14-21; Lc. 9:37-43)

<sup>14</sup> Cuaquín ajsije capa cataloaya in oc sequin imonextiliniymes. Quinmitaje míac lacalera quinyahualujtataloaya yehuanten. Noje cataloaya ilamax-tiniymes inminlajtol in judíos. Quinlaxilijtataloaya lajtomes ca yehuanten imonextiliniymes Jesús. <sup>15</sup> Quitaje Jesús in lacames, molapolultije, molaluje quipialtije. <sup>16</sup> Huan Jesús quinlajlanic, quinmilic:

—¿Len anquilaxilijtica lajtomes ca in lamaxtinijmes?

<sup>17</sup> Huan quinanquilic se ca in lacames, quilic:

—¡Lamaxtini! Nicualiac noxól, quipía se ijyecal, pampín amo huil lajtúa.

<sup>18</sup> Capa yes quiquitzquía in ijyecal, cuaquín quimayahuía pan lali, nepa pan lali posuni icamac huan choca ilames. Cuaquín mocahua huapistic. Huan niquinlajlanic momonextiliniymes pa quiquixtilisi, huan amo huil yehuanten.

<sup>19</sup> Cuaquinon quinnanquilic Jesús, quinmilic:

—¡Ah, lacames hual amo anquineltoaca Dios, hual amo anquilalía an-molaneltocalisli ca Dios! ¿Quichi tonalijmes monequi pa nicayas ca amhuan-ten? ¿Quichi tonalijmes nicpías pa nicchixtías pa anpehuas annechneltocas? ¡Xichhualiquilican in muachito!

<sup>20</sup> Quihualiquilije. Huan quiman in ijyecal hual cataya lajtíc in muachito quitac Jesús, jan ajnaxcan quitzejtzejteluc in muachito, quimayahuc huan huetzic in muachito pan lali momijmilujtataya, posuntataya pa icamac.

<sup>21</sup> Huan Jesús quilajlanic itajtzin, quilic:

—¿Quichi xixil quipía quiman pehuac quiquitzquic?

Huan itajtzin quinanquilic:

—Quiman yec xól. <sup>22</sup> Huan ca míac tonalijmes quiman quiquitzquic, quimayahuini pan tixuxli huan quimayahuini pa al pa quimictusquiaya. Sinda huil titejchihuiliía len, cuaquín xitejchihuili, xitechpalehui.

<sup>23</sup> Jesús quilic:

—¿Leca tiqijtúa “Sinda huil”? Mochi huil panúa ca aqui yes quilalis ilaneltocalisli ca nehual.

<sup>24</sup> Huan jan ajnaxcan tzajtzic itajtzin in muachito, quilic:

—¡Tata, niclalía nolaneltocalisli ca tel! ¡Xichpalehui pa camo nicmahuilis da amo huil ticpajtis!

<sup>25</sup> Quitac Jesús quinami monechicujtataloaya míac lacames. Pampín ca-juac in ijyecal elehuis, quilic:

—¡Tel, ijyecal, pan mopampa amo huil lajtúa huan amo huil lacaqui in muachito! ¡Axan nimitzilia xiquisa pa yihual huan amo quiman xicalaqui oc sejpa capa yihual!

<sup>26</sup> Tzajtzic in ijyecal, quitzejtzeluc chicahuac in muachito huan quisac. Cuaquinon mocahuac chicuenta mijquil in muachito. Pampín quijtuloaya míac ca in lacames pampa axan miquic. <sup>27</sup> Ma yoje, quiquitzquic Jesús imajma, cajcoquic huan moquetzac in muachito.

<sup>28</sup> Cuaquinon calaquic Jesús pan cali. Nepa cataya, hualaje capa yihual imonextiliniymes quilajlanije inminhuían, quilije:

—¿Leca tehuanten amo huil tijquixtilije in ijyecal?

<sup>29</sup> Huan Jesús quinnanquilic:

—Monequi pa quilajlanisi Dios huan pa mosahuasi pa huil quinquixtilisi ijyecames quinami innojen. Jan yoje huil yesi laquixtili yehuanten.

*Oc sejpa Jesús quinmillá quinami miquis*

*(Mt. 17:22-23; Lc. 9:43-45)*

<sup>30</sup> Quisaje yehuanten nepa, quipanajtiahuiloaya in lalticpan Galilea, huan Jesús quinequiaya pa amaqui quimatisquiaya. <sup>31</sup> Cataya pampa quinmaxtiaya imonextiliniymes, quinmilliaya:

—Nehual ilacal in cielo nechtemacasi ca lacames hual nechquitzquisi. Nechmictisi huan quiman nimiquis, panusi ye tonalijmes, cuaquín niyulis oc sejpa.

<sup>32</sup> Ma yoje, yehuanten amo quimatiloaya len quinlaquetziliztataya huan momajtiloaya quilajlanilo len quinequiaya quiitu.

*¿Aqui yihual in hué capa yehuanten?*

*(Mt. 18:1-5; Lc. 9:46-48)*

<sup>33</sup> Huan ajsije Capernaum. Cataloaya calijtic capa chantiloaya, Jesús quinlajlanic, quinmilic:

—¿Len anmolaquetziliztihualaya pa ojli?

<sup>34</sup> Yehuanten amo nahuatije, pampa pa ojli molaquetzizililoaya inahuac aqui ca yehuanten yesquiaya in hué hual quinlaicanasquiaya in oc sequin.

<sup>35</sup> Cuaquinon molalic Jesús, quinnotzac in doce imonextiliniymes, quinmilic: —Sinda se quinequi mochía in hué pa anmitzlaicanas amhuanten, cuaquín yihual quipías pa mochías in niman tipichin ca moxtin in oc sequin, huan quipías pa quintequipanuilis moxtin.

<sup>36</sup> Canac se xolol, quilalic lajco capa yehuanten, quinapaluc in xolol, quinmilic:

<sup>37</sup> —Sinda se quilalía ilaneltocalisli ca nehual huan notoca, huan pampín quinamiquía ca lasojlalisli se xól quinami inon, cuaquín yoje in se quichijtica quinami yihual nechnamiquía nehual ca lasojlalisli. Huan aqui hual nechnamiquía nehual, yihual amo nechnamictica nehual san. Noje quinamictica ca lasojlalisli yihual Dios hual nechtilanic pan lalticpan.

*Aqui hual amo quitzacuilía Jesús quipalehuía*

*(Mt. 10:42; Lc. 9:49-50)*

<sup>38</sup> Cuaquín Juan quilic:

—Lamaxtini, tiquitaje se lacal quinquixtitataya ijyecames, quinquixtiliaya quijtutataya motoca, mitznoztica. Huan tehuanten tiquillije pa camo quichías inon, pampa yihual amo techtocatica.

<sup>39</sup> Jesús quilic:

—Amo xictzacuilican. Quiman yes quichía se len hual lalapolultía pan ipampa nochicahualisli hual quipalehuía pampa quijtúa notoca, yoje amo huil panus pa in se jan axcan nechhuejuecaltis. <sup>40</sup> Inon annimitzilía pampa aqui yes amo tejtzacuilía, yoje yihual techpalehuía. <sup>41</sup> Huan aqui yes anmitzmacas pa ancunis jan se tecomal ca al san, huan anmijchihuilia inon pampa amhuanten ilacames in Cristo, yoje annimitzilía neli, yihual yahui quipía ilaxlahuilisli.

*Ximoiztiacan pa camo anyulis laijlaculi*

*(Mt. 18:6-9; Lc. 17:1-2)*

<sup>42</sup> Huan aqui yes quichihualtis laijlaculisli se ca in xolomes tijtipichin hual quilalilo inminlaneltocalisli ca nehual, yesquiaya cuali pa quipuilisli se melal hué pa iquixlan in se huan quilasasi lajco pa al huejcalan pa moatoctis.

<sup>43</sup> Huan sinda momajma mijchihualtia laijlaculisli, cuaquín xijcotona. Cualí, cualí yes pa tehual ticalaquís pan cielo capa unca Dios ca se momajma san huan amo ca ome momajmajuan tías capa amo huil sehuis in tixuxli.

<sup>44</sup> Nepa amo miquilo in oculimes hual quicualo icuerpo se, huan noje nepa amo quiman sehuis in tixuxli. <sup>45</sup> Huan sinda mocxían mijchihualtis laijlaculisli, cuaquín xijcotona. Cualí, cualí unca pa tehual pa tipehuas ticpías in yulilislí hual Dios quimaca ticpixtica jan se mocxían san. Amo yesquiaya cualí pa tehual sinda Dios mitzlasas ca ome mocxihuajmes pa in tixuxli hual amo mosehuis. <sup>46</sup> Nepa amo miquisi in oculimes hual quicualo icuerpo se, noje amo quiman sehuis in tixuxli. <sup>47</sup> Huan sinda mijchihualtis laijlaculisli moixtololon, xijquixti. Cualí pa tehual tías capa huelitía Dios ca se moixtololon san. Amo yesquiaya cualí pa tehual sinda mitzlasas Dios ca ome moixtololojmes capa chichinahuá. <sup>48</sup> Nepa amo miquilo in oculimes hual quicualo icuerpo se huan nepa amo quiman sehuá in tixuxli.

<sup>49</sup> Amhuanten nomonextiliniñmes anquipía pa anpanus lacocoltilislí capa anyultica, huan yojque anmochipahuas quinami lachipahua tixuxli. Yojque amo anmochías laijlaculi. Inon unca quinami quilalilo istal pan nacal hual unca pa huendi. Yoje amo moiylacúa. <sup>50</sup> Unca cualí in istal pa camo moiylacus nacal. Quema, in istal unca cualí pa len yes ticlalisí. Ma yoje, sinda pataquías in istal, cuaquín ¿quinami quichihuasi pa mochías istal oc seypa? Dios ilajtol cualí unca quinami istal, pampa sinda anquipía pa anmoyolo, amo anmochías laijlaculi. Xicpiacan iistal Dios laijtíc amhuanten. Yoje anyulís ca sehuilislí pa anmoyolo huan anpanus cualí ca moxtin.

## 10

### *Jesús lamaxtia de lacames hual quincajcahualo inminsihuahuan* (Mt. 19:1-12; Lc. 16:18)

<sup>1</sup> Quisac Jesús de Capernaum, uyac pa in lali Judea. Cuaquín uyac ca yojque (analco) in atenco hué Jordán. Huan oc seypa monechicujtihualaloaya miac lacames huan sihuames capa yihual, huan oc seypa quinmaxtiaya quinami quichihuani ca mochi cajcapa. <sup>2</sup> Cuaquinon ajsije sequin fariseos capa yihual. Quinequiloaya quicaquilo sinda Jesús quijtusquiaya se lajtol calica yehuanten huil quimotexpahuililosquiaya. Pampín quilajlanije, quilije:

—¿Tolajtol hual technetilía quinami ticmolancuacuetzililo Dios quimacahuítia pa quincajcahuasi lacames inminsihuahuan?

<sup>3</sup> Jesús quinnanquilic:

—¿Len anmitzilic Moisés quinami lajtol inahuac inon?

<sup>4</sup> Yehuanten quinnanquilije:

—Moisés quijcuiluc pin lajtol pa quimacahuiltisi se lalac quimacas isihua se amal hual quijtúa pampa yajmo isihua yihual.

<sup>5</sup> Jesús quinnanquilic:

—Moisés quijcuiluc in lajtol pampa amhuanten amo anquinequi ancana pa anquichías len yes cualí. <sup>6</sup> Ma yoje, quiman pehuac mochi, pa innojen tonaliñmes quiman quichíac Dios in lalticpan, Dios quinchíac lalac huan sihual. <sup>7</sup> “Pampín se lalac yajmo yuli ca itajtzin huan inantzin, yuli ca isihua.

<sup>8</sup> Yoje in omenten mochihualo se, yajmo cate ome yehuanten, mochihuaje se san.” <sup>9</sup> Dios quinchíac pa yesi se san. Pampín ma camo quinxilucan in lacames.

<sup>10</sup> Quiman mocuepaje pin cali, quilajlaniloaya Jesús imonextiliniñmes oc seypa inahuac in hual yihual quinmilic in fariseos. <sup>11</sup> Jesús quinmilic:

—Aquí yes quicajcahuas isihua huan monamictis ca oc se sihual, yoje yihual cana oc se sihual hual amo iyaxca pa yes isihua huan yoje quichihuilía amo cuali isihua hual quicajcahuac. <sup>12</sup> Huan sinda se sihual quicajcahuas ilahuical huan yulis ca oc se lalacal, yoje yihual cana oc se lalacal hual amo iyaxca huan yoje quichihuilía amo cuali ilahuical hual quicajcahuac.

*Jesús quinlasojla xolomes*  
(Mt. 19:13-15; Lc. 18:15-17)

<sup>13</sup> Quinhualiquililoaya Jesús xolomes pa yihual quinmatoquilis, huan imonextiliniymes quinmajualoaya yehuanten hual quinhuaticataloaya. <sup>14</sup> Jesús quinmitac quinami quichijtataloaya, huan pampín yihual cualanic huan quinmilic:

—Xiquinmacahuiltican in xolomes pa hualasi ca nehual, amo xiquintzacuilcan. Yehuanten hual cayasi capa Dios huelitía quipiasí pa yesi quinami xolomes. <sup>15</sup> Se xolol quipía paquilisli quiman yes Dios quineltoaltía. Huan neli annimitzilía, sinda se amo quilalía ilaneltoalisli ca ilahueliitilisli Dios quinami se xól quilalilía ilaneltoalisli yihual, cuaquín in se amo quiman cayas capa Dios huelitía.

<sup>16</sup> Cuaquinon quinnapaluaya mochi in xolomes, huan quinlalilic imajma-juan capa yehuanten huan quintuchíac, quinmilic pampa Dios quinchihuilisquiaya cuali.

*In lalacal yancuic hual quipiaya míac tomin*  
(Mt. 19:16-30; Lc. 18:18-30)

<sup>17</sup> Cuaquinon Jesús canac ojli. Huan molalujtihualac se lalacal, quimolan-cuacuetzilic, quilajlanic:

—Lamaxtini cuali, ¿len nicpías pa nicchías pa yojqe Dios nechmacas pa camo quiman nilamis niyulis capa yihual quiman niyulis oc sejpa?

<sup>18</sup> Jesús quinanquilic:

—¿Leca tichilía pampa nehual nicuali? Amo unca amaqui hual cuali, jan Dios san unca cuali. <sup>19</sup> Tel, ticmati innojen lajtomes hual Dios quinmilic lacames pa quichihuasi: “Amo xicana je sihual hual quipía ilahuical, amo xicmicti oc se, amo xilaixtequi, amo xicmotexpahuili se tislacatijtica, xiquin-lasojla motajtzin huan monantzin.”

<sup>20</sup> In lalacal yancuic quinanquilic, quilic:

—Lamaxtini, mochi inon niyulic nicneltocatihualac quiman niyec xól pa axan.

<sup>21</sup> Cuaquín quiztataya in lalacal yancuic Jesús, quilasojlac, quilic:

—Unca oc se lachihualisli hual monequi pa ticchías. Xía, xicnamaca len ticpía. Cuaquín in tomin hual ticanac ca mochi hual ticnamacac xiquinmaca yehuanten hual amo quipialo. Yoje ticpías len hual ipati míac pin cielo capa unca Dios. Cuaquín xicana no'ojli capa panulo lacocoltilisli huan xichtoca nehual.

<sup>22</sup> Quilic Jesús inon, iixco in lalacal yancuic sulahuac, uyac quicocujtíac iyolo pampa quipiaya míac hual iyaxca.

<sup>23</sup> Huan quinmiztataya Jesús imonextiliniymes hual cataloaya itenco, quinmilic:

—¡Quinami quipía pa motolinis niman míac pa calaquís capa huelitía Dios se lalacal hual quipía míac tomin!

<sup>24</sup> Molapolultije imonextiliniymes quicactataloaya len quinmilic Jesús. Cuaquín Jesús oc sejpa quinmilic:

—Nitos, quipiasi pa motolinisi niman míac pa calaquisi capa huelitía Dios yehuanten hual quilalilo inminlachialisli ca in míac hual inminyaxca. <sup>25</sup> Quema, sinda se camello huil quipanahuiaya iixtololon se lajtzomaloni, amo quipiaya pa motolinisquiaya yoje quinami se hual quipía míac tomin quipiaya pa motolinisquiaya pa calaquisi capa huelitía Dios.

<sup>26</sup> Huan molapolultije míac míac imonextilinijmes, molajlanije se huan oc se, moilije:

—Cuaquín ¿aqui huil quipías Dios iyulilisli hual amo quiman lamis sinda yoje uncá?

<sup>27</sup> Jesús quinmitac huan quinmilic:

—Lacames amo quiman huil quichihualo pa panus inon. Ma yoje, Dios, quema, yihual huil, pampa ca Dios mochi huil panúa.

<sup>28</sup> Cuaquinon Pedro pehuac quilic:

—Xiquita. Tehuanten tijcajchuaaje mochi hual ticpiaje pa timitztocasi tehuat.

<sup>29</sup> Jesús quinnanquilic:

—Annimitzilía melahuac. Cate yehuanten hual quincajchualo inminchan huan inmicnían lacames huan inmicnían sihuames huan inminnantzitzían huan inmintajtzitzían huan inminxolomes huan inmincuajmilimes. Quema, mochi quincajchualo pa nechtequipanuulis huan pa quilamachiltisi capa yes in lamachiltisli cuali. <sup>30</sup> Ma yoje, mas que quincajchualo, pa mochi in xixihuimes hual huejchuaas in lalticpan hual axan unca, mochi sejse ca yehuanten quinpías cien ca mochi sejse calimes huan icnían lacames huan icnían sihuames huan inantzitzían huan ixolomes huan cuajmilimes. Huan noje quiman huejcajtica in lalticpan, quitotocalo huan quicocoltilo yehuanten hual amo nechnehtocalo. Huan pa in lalticpan hual yahui caya, quipías capa unca Dios in yulilisli hual amo quiman lamis. <sup>31</sup> Ma yoje, míac hual axan cate huejueyenten cayasi itzinderos, huan in itzinderos cayasi huejueyenten.

*Oc sejpa Jesús quinmilía aquinojen yahuiló quimictilo  
(Mt. 20:17-19; Lc. 18:31-34)*

<sup>32</sup> Cataloaya pa ojli, panquisaloaya pa Jerusalén, quinlaicanaya Jesús. Huan molapolultiloaya imonextilinijmes pampa Jesús amo momajtiaya yahui ca ompic. Yehuanten hual quintocaloaya Jesús huan imonextilinijmes, quema, momajtiolaya. Huan quinmanac Jesús ca yihual ihuían in doce imonextilinijmes, pehuac quinmilic len yahuiaya quipanu. <sup>33</sup> Quinmilic:

—Xiquitacan. Tipanquisticate pa Jerusalén, huan nehual ilacal in cielo nechtemacasi ca in tiopistas huejué huan ca in lamaxtinijmes hual quimaxtilo inminlajtol inahuac quinami quimolancuacuetzililo Dios. Huan nechmotexpahuilisi pa yoje nicayas lamictili. Cuaquín nechtemacasi ca yehuanten hual amo judíos. <sup>34</sup> Yehuanten nechhuitzquilisi huan nejchijchasi huan nechhuitequisi huan nechmictisi. Huan quiman panusi ye tonalijmes, niyulis oc sejpa.

*Jacobo huan Juan quitemachilo len pa yehuanten inminhuían  
(Mt. 20:20-28)*

<sup>35</sup> Ajsije capa Jesús yehuanten Jacobo huan Juan, ixolomes Zebedeo, quilije:

—Lamaxtini, ticnequilo pa titejchihuilis len yes tialo timitztemachilo.

<sup>36</sup> Jesús quinmilic:

—¿Len anquinequi pa annimijchihuilis?



<sup>37</sup> Huan quilije:

—Xitechmacahuiliti pa timolalisi se ca moma cuali huan se ca moma amo cuali pa in tonali hual timochías tohué ca míac laixpelalisli hué. Yoje timitzpalehuisi pa tihuelitis.

<sup>38</sup> Jesús quinmilic:

—Amo anquimati len anquitemachijtica. ¿Huil anpanúa lacocoltilisli quinami nehual nipanus lacocoltilisli? Yes quinami ancuniaya se tecomal chichic. ¿Huil anmopepenialtis in lacuayatequilisli quinami lacocoltilisli quinami nehual nimopepenialtis?

<sup>39</sup> Huan quilije:

—Tehuanten huil ticchihualo.

Jesús quinmilic:

—Quema, anpanus lacocoltilisli quinami nehual nipanus lacocoltilisli. Huan pampa nehual anquipías pa anmopepenialtis quinami se lacuayatequilisli hual lacocoltia quinami nehual nicpías pa nimopepenialtis. <sup>40</sup> Ma yoje, amo unca noyaxca pa annimitzmacahuilitis pa anmolalis ca noma cuali huan pa noma amo cuali. Dios quinmacahuilitis pa molalisi nepa yehuanten hual quinlajtultic pa molalisi nepa.

<sup>41</sup> Quicaquije inon in oc sequin diez (majlacli) monextiliniymes, pehuaje cualanije ca Jacobo huan Juan. <sup>42</sup> Cuaquinon quinnotzac Jesús pa hualasi capa yihual, huan quinmilic:

—Amhuanten anquimati quinami huelitilo yehuanten hual amo judíos pa mochi lalimes. Moxtin hual huelitilo capa yehuanten quinnextilo moxtin pampa quipialo lahuelitilisli pa quinchiuualtis lacames. Huan in huejueyenten ca yehuanten yulilo quinmilijticate len quipias pa quichihuasi.

<sup>43</sup> 'Amo cayas yoje ca amhuanten. Nican unca quinami cayas: Aqui hual quinequisquiaya pa mochías quinami in hué pa anmitzlaicanas amhuanten, yihual quipías pa anmitztequipanuilis. <sup>44</sup> Huan aqui yes quinequisquiaya mochías in se hual monotza míac ca amhuanten, cuaquín yihual quipias pa yes anmotequipanujquil. <sup>45</sup> Monequi pa yes yoje, pampa noje nehual ilacal in cielo amo nihualac pan lalticpan pa nechtequipanuilis lacames. Nihualaya pa niquntequipanuilis huan noje nihualaya pa niquis pa yoje niquinmacahuas pa camo panusi in miquilisli hual amo quiman lamis.

*In pachacal itoca Bartimeo lachía*

*(Mt. 20:29-34; Lc. 18:35-43)*

<sup>46</sup> Cuaquinon ajsije pa in caltilan Jericó. Huan quiman quistiahuiloaya pa Jericó Jesús huan imonextiliniymes huan míac lacames huan sihuames, nepa molaliaya pa itenco in ojli Bartimeo, yihual Timeo ixolol. Yihual yuliaya motemachilijtataya tomin pampa yec pachacal. <sup>47</sup> Quilije pampa panujtataya Jesús in nazaretco, huan pampín pehuac tzajtzc, quijtuaya:

—¡Jesús, tel ixolol David, xichicnili!

<sup>48</sup> Cajualoaya míac ca yehuanten, quililoaya pa mocahuasquiaya. Ma yoje, yihual tzajtziaya niman chicahuac, quilic:

—¡Tehual ti'ixolol David, xichicnili!

<sup>49</sup> Cuaquín moquetzac Jesús, quinmilic:

—Xicnotzacan pa hualas.

Huan quinotzaje in pachacal, quilije:

—Amo ximomajti, ximoquetza, mitznoztica.

<sup>50</sup> Yoje jan ajnaxcan moquixtilic ilaquen moqueztiquisac, uyac ca Jesús.

<sup>51</sup> Jesús quilic:

—Axan, ¿len ticnequi pa nimijchihuilis?

Quilic in pachacal:

—Nolamaxtini, nicnequi nilachía.

<sup>52</sup> Huan Jesús quilic:

—Cuaquín ximohuica. Ticlalic molanelto localisli ca nehual, pampín tipajtic. Huan jan ajnaxcan huil lachíac Bartimeo huan quitocatiahuiaya Jesús pan ojli.

## 11

*Jesús calaqui Jerusalén pan ixolol se burra*  
(Mt. 21:1-11; Lc. 19:28-40; Jn. 12:12-19)

<sup>1</sup> Hualatataloaya pa Jerusalén, ajsije pa in ome caltilan tijtipichin Betfagé huan Betania. Innojen caltilan tijtipichin cataloaya pa quiahuac Jerusalén amo huejca, cataloaya pa iixlán in tepetzindi (loma) itoca Olivos. Quintilanic Jesús ome imonextiliniymes, <sup>2</sup> quinmilic:

—Xiacan in caltilan anmolaixpan, huan jan axcan ancalactica, anquitas ilpitica se ixól je burra. Ayamo quiman lejcuc amaqui in burrito. Xictomacan, xicualicacan ca niquic. <sup>3</sup> Sinda se anmitzilis: “¿Leca anquichijtica inon?”, cuaquín xiquilican: “In Tata quinequi pa nadita, huan jan axcan quicuepas.”

<sup>4-5</sup> Yoje uyaje huan quitaje ilpitataya se ixolol se burra. Cataya inahuac se ilalapujquil pa quiahuac se cali inahuac in ojli. Quitomaje, huan sequin ca yehuanten hual umpa moquetzaloaya quinmilije:

—¿Leca anquichijtica inon, anquitontica in burro?

<sup>6</sup> Yehuanten quinnanquilije quinami Jesús quinmilic, huan in lacames quinmacahuiltije pa yahuisi. <sup>7</sup> Quihualiquilije Jesús in burro, quinlalilije in inminlaquemes pani in burro, cuaquinon lejcuc Jesús. <sup>8</sup> Huan míac quinsuhualoaya inminlaquemes pan ojli, oc sequin quinpipixtiloaya ca iramas (iitzmolinquimes) ca inminsacayo cuahuimes hual quincotonaje. <sup>9</sup> Yehuanten hual quinlaicanaloaya huan yehuanten hual quitocaloaya tzaizitiahuiloaya, quijtuloaya:

—¡Hosana! ¡Ma quichihuili niman cuali Dios yihual hual quitilanic pa huelitis! <sup>10</sup> ¡Ma quituchía yihual hual huelitis capa huelitini totajtzin David! ¡Ma quijtucan “¡Hosana!” yehuanten hual yulilo pin cielo!

<sup>11</sup> Calaquic Jerusalén Jesús, uyac calijtic pin tiopan hué, huan nepa quinmiztinemic mochi hual nepa cataya. Cuaquín tiolactitíac, huan pampín quisac Jerusalén, uyaje yihual huan imonextiliniymes pa Betania.

*Jesús cajú se cuahuil higuero*  
(Mt. 21:18-19)

<sup>12</sup> Mostatica quisaje Betania huan Jesús mayantiahuiaya. <sup>13</sup> Quitac pa huejquita se amacuál tipichin hual quiapiaya isacayo hué, huan uyac quitac sinda sulajtataya. Quiman ajsic, amo quitac nindeno ilaquilyo. Quiapiaya jan isacayo san, ayamo cataya itonali pa quipiasquíaya ilaquilyo. <sup>14</sup> Cuaquinon Jesús quilic in amacuál tipichin ca isacayo hué:

—Ma camo quiman quícua amaqui molaquilyo axan huan pa quiman.

Quicaquije imonextiliniymes inon hual quilic.

*Jesús quinlaluxtía pa quiahuac in tiopan hué*  
(Mt. 21:12-17; Lc. 19:45-48; Jn. 2:13-22)

<sup>15</sup> Cuaquín ajsije pa Jerusalén huan umpa calaquic Jesús pin tiopan hué. Pehuac quinquinixtic pa quiahuac aquinojen lanamactataloaya huan lacujtataloaya pin tiopan hué. Quintzincuepiloc innojen capa yehuanten hual quinpatililoaya tomin quinpatililoaya inmintomin yehuanten hual mocuhuילוaya huendis, noje quintzincuepiloc inmicpalijmes yehuanten

hual quinnamacaloaya huilomes. <sup>16</sup> Huan amo quimacahuiltic amaqui pa panusquiaya pa ilajcotían in tiopan hué sinda quimantiahuiaya len. <sup>17</sup> Huan quinmaxtiaya, quinmiliaya:

—¿Amo unca lajcuiluli inon hual quijtúa: “Quitocayaltisi nocali se cali capa quilajlanilo Dios, huan cayas cali pa moxtin capa huil quilajlanilo Dios”? Ma yoje, amhuanten anquichihuilijtica in tiopan hué quinami cataya se cueva capa molatilo laxtequinijmes.

<sup>18</sup> Inminhuejueyenten in tiopistas huan in lamaxtinijmes quicaquije inon, huan pehuaje quitemuje quinami huil quimictilosquiaya. Ma yoje, momajtiloaya pa quichihuilisi len pampa moxtin in lacames quixtocaloaya quicaquilo huan yehuanten molapolululoaya pampa inon hual quinmaxtiaya Jesús. <sup>19</sup> Cuaquín ca tiolac quisaje Jerusalén Jesús huan imonextilinijmes.

### *In amacuál tipichin huaquic*

*(Mt. 21:20-22)*

<sup>20</sup> Mosta pa huahtzincó panuloaya huan quitaje in amacuál tipichin (cuahuil higuero), huaquic pa ilahuayojmes huan mochi. <sup>21</sup> Cuaquinon quijnamiquic Pedro huan quilic Jesús, quilic:

—Lamaxtini, xiquita, in amacuál tipichin hual ticajuac, axan huáic.

<sup>22</sup> Jesús quinnanquilic:

—Xiclaican anmolaneltoalisli ca Dios, anquimaztica pampa yihual huil quichía mochi. <sup>23</sup> Annimitzilía neli, amhuanten huil anquilia in loma nican, “Ximijcuani ximolasa pin al huejcalan”, huan quema, quichías quinami tiquilis sinda amo ticmahuilis pampa amo yahui quichía quinami tiquilis.

<sup>24</sup> Pampa inon annimitzilía inon: Quiman yes anlajtúa ca Dios, huil anquitemachía pa yihual anmijchihuilis len yes. Xicneltoacan quinami axan anquipiac inon hual anquitemachic, huan yoje anquipías. <sup>25</sup> Huan sinda anmoqueztica anlajtutica ca Dios, huan jan axcan anquijnamiquía pampa annitczualantic se, cuaquín xicpujpuhuacan. Yoje quinpujpuhuas anmolajlaculisli anmoTajtzin hual unca pin cielo. <sup>26</sup> Annimitzilía inon, pampa sinda amo anquinpuphuas, cuaquín noje anmoTajtzin hué hual unca pin cielo amo quinpujpuhuas anmolajlaculisli.

### *Unca Jesús iyaxca pa quijtús len monequi quichihuasi lacames*

*(Mt. 21:23-27; Lc. 20:1-8)*

<sup>27</sup> Huan oc seppa ajsije Jerusalén. Huan quiman Jesús nejnentinemiaya calijtic pin tiopan hué, hualaje capa yihual inminhuejueyenten in tiopistas, noje hualaje in lamaxtinijmes huan in abuelojmes. <sup>28</sup> Quilajlanije, quilije:

—¿Ca aquí ilahuelilitisli ticchía innojen hual tiquinchijtica? ¿Aquí mitzhuelilitic pa tiquinchías innojen?

<sup>29</sup> Jesús quinnanquilic:

—Ma annimitzljajlani noje se lajtol, huan xichnanquilican. Cuaquín annimitzilis aquí nechuelilitic pa niquinchías innojen hual niquinchijtica. <sup>30</sup> ¿Cataya Dios hual quitilanic Juan Lacuayatequini ca lahuelilitisli pa lacuayatequis o quitilanije lacames pa lacuayatequis? Xichnanquilican.

<sup>31</sup> Cuaquinon yehuanten quijtuloaya laijtic yehuanten huan molaquetzililoaya, moilije:

—Sinda tiquilisi pampa quihuelilitic Dios, yihual techilis: “¿Leca amo anquineltoac?” <sup>32</sup> Ma yoje, amo huil tiquilisi pampa lacames quihuelilitije.

Sinda quililoaya pampa lacames quihueliltije, cuaquín momajtiloaya inminyampa in lacames. Moxtin yehuanten quimatiloaya pampa Juan yec se ilajtuni Dios. <sup>33</sup>Yoje, quinancuilije Jesús, quilije:

—Amo ticmatilo.

Cuaquinon Jesús quinmilic:

—Nehual noje amo annimitzilis aqui nechueliltic pa niquinchías innojen hual niquinchijtica.

## 12

### *Sequin lacames ej'elehuis hual tequipanuloaya lajlajco*

(Mt. 21:33-46; Lc. 20:9-19)

<sup>1</sup> Cuaquinon Jesús pehuac quinmactic ca se lapuhualisli hual quinmij-namiquiltisquiaya. Quinmilic:

—Se lalac quitocac se cuajmili ca uva. Quitzacuac quiyahualujtataya itenco ca tixcalimes lachijchihuali cuajtíc (se tepandi), quihuajuanac se huejcalito pa quintelicsalosciaya in uvas pa quisasquiaya iayo. Noje quichíac se cali cuajtíc capa huil lachiasquiaya pan mochi iuvatilan pa pani. Cuaquín quinmanac sequin lacames tequipanujquimes pa quitalosquiaya icuajmili, huan umpa quisac pa ichan, uyac huejca. <sup>2</sup>Ajsic in tonali hual yucsitaloaya in uvas. Quitilanic se tequipanujquil pa yasquiaya cana hual yihual iyaxca ilaquilyo. <sup>3</sup>Huan yehuanten hual tequipanuloaya lajlajco quiquitziye in tequipanujquil. Quihuitequije, quitilaniye huan amo quimacaje nindeno. <sup>4</sup>Iteco mocuepac quitilanic oc se tequipanujquil, huan tixcalazos quimacaje, quicocoltije pa itzontecon huan quihuejuecaltije. <sup>5</sup>Cuaquín iteco quitilanic oc se, huan yihual quimictije. Umpa in lalac quintilanic míac oc sequin itequipanujquimes huan in lacames hual tequipanuloaya lajlajco quinhuitequije sequin huan quinmictije oc sequin.

<sup>6</sup>'Quicahuilfa in lalac oc se san pa quitlanis, in yec yihual ixól hual quilasojlaya míac. Yoje quitilanic, pampa yihual quijtuc: "Yehuanten quimatitisi momajtisi ilaixpan noxól." <sup>7</sup>Ma yoje, in tequipanujquimes ej'elehuis molaquetzilije se ca oc se, moilije: "In yihual hual canas icuajmili itajtzin, cayas iyaxca. Ma tián, ma ticmictican pa yes toyaxca tehuanten in cuajmili."

<sup>8</sup>Cuaquinon quiquitziye, quimictije, quilasaje imijquil pa quiahuac in cuajmili.

<sup>9</sup>'Axan, ¿len quichías iteco in cuajmili? Mocuepas huan quinmictis in tequipanujquimes ej'elehuis. Cuaquín quinmacas oc sequin tequipanujquimes in cuajmili.

<sup>10</sup>¿Amo quiman anmomactic in hual unca lajcuiluli? Quijtúa:

Quilasaje in tel yehuanten hual quichihuaje in cali, quijtuye in tel amo unca cuali.

Ma yoje, in tel mochíac in tel calica quipehualtije mochi in cali.

<sup>11</sup>ToTata quilalíc pan cali quiman pehuaya quichía, huan timocahuaje timolapolultiticate pampa tiqitaje inon hual quichíac yihual.

<sup>12</sup>Yoje, in huejeyenten quinequiloaya quiquitziyo Jesús. Quimatiloaya Jesús quinmilic in lapuhualisli pa yoje laquetzasquiaya inminahuac yehuanten. Yehuanten cataloaya quinami in tequipanujquimes ej'elehuis. Ma yoje, amo quiquitziye pampa momajtije inminyampa in lalalera. Pampín quicajcahuaje huan uyaje.

*Jesús laquetza inahuac in contribución (lapixcalisli hual unca tomin)*

(Mt. 22:15-22; Lc. 20:20-26)

<sup>13</sup> Panuc inon, yehuanten quintilanije capa Jesús sequin ca in fariseos huan oc sequin hual yeje ca in lanechiculisi hual quitocaloaya Herodes. Quinequiloaya pa Jesús quijtusquiaya se lajtol calica quitalosquiaya quinami huil quiquitzi. <sup>14</sup> Hualaje quilije:

—Lamaxtiní, ticmatilo pampa tehual tiquijtúa len melác. Tiquita je lalac jan quinami tiquita oc se, ticlasojla se lalac hué jan quinami se lalac tipichin san. Huan ticnextía melahuac len quinequi Dios pa quichihuasi in lacames. Axan timitzajlanilo, ¿monequi pa ticlaxlahuili in niman hué César ilapixcalisi tomin, o amo? ¿Ticlaxlahuisi, o amo ticlaxlahuisi?

<sup>15</sup> Quimatic Jesús quinami quinequiloaya quicaujcuamanalo, huan quinmilitic:

—¿Leca anquitemúa quinami huil annehmotexpahuilis pa nechquitzi? Xichualiquilican se tomin denario pa niquitas.

<sup>16</sup> Yehuanten quihualiquilije huan Jesús quinlajlanic:

—¿Aqui iixco inon? Huan ¿aqui ilajcuilulisi?

Yehuanten quinanquilije:

—In niman hué César iyaxca.

<sup>17</sup> Cuaquinon quinmilitic Jesús:

—Xicmacacan César hual iyaxca yihual, huan xicmacacan Dios hual iyaxca yihual.

Yoje, mocahuaje molapolultiticate pampa yojque quinnanquilic.

*Jesús quinlaquetzilia quinami ticmatilo pampa tiyulisi oc sejpa*

*(Mt. 22:23-33; Lc. 20:27-40)*

<sup>18</sup> Cuaquinon hualaje sequin hual quineltoaloaya inminlamaxtilisi in saduceos. Yehuanten quijtulo pampa aquinojen miquilo amo yulisi oc sejpa. Quilije:

<sup>19</sup> —Lamaxtini, Moisés techcahuilic in lajcuilulisi hual unca lajtol pa tehuanten. Huan in lajtol quijtúa sinda se lalac miqui huan quicahua isihua ihuán huan amo quinpialoaya xolomes, cuaquín icni in lalac hual miquic quiptías pa monamictis ca isihua ihuán icni. Inon quichías pa yoje quinpiasi xolomes hual motocasi quinami in se hual polehuic. <sup>20</sup> Axan, cataloaya chicome (siete) icnían. Se monamictic, huan amo huejcahuaya míac huan polehuic, amo quicahuac se xolol. <sup>21</sup> Pampín, oc se icni canac in sihual, yihual noje miquic, amo quincahuac xolomes. Yoje quipanuc oc se icni. <sup>22</sup> Huan yoje quinpanuc in chicome, monamictije ca in sihual. Amaqui ca moxtin innojen quincahuac xolomes. Cuaquín, polehuic in sihual noje.

<sup>23</sup> Axan, quiman yulisi oc sejpa innojen hual miquije, ¿calía lalac yes ilahuilic in sihual? Pampa mochi in chicome monamictije ca in sihual.

<sup>24</sup> Cuaquinon Jesús quinnanquilic:

—Amhuanten annoixpolúa, pampa amo anquimati ilajcuilulisi Dios ilajtol huan ichicahualisi. <sup>25</sup> In tonali hual yulisi oc sejpa yehuanten hual miquije, cuaquín amo monamictisi lacames huan sihuames. Yulisi quinami Dios ilanahuatinijmes hual cate pin cielo. <sup>26</sup> Huan inon hual anquijtúa inminahuac yehuanten hual miquilo, quema, yulisi oc sejpa. ¿Amo anmomaxtic capa quijtúa iamal hual quiqcuiluc Moisés? Pin cuajtzindi hual lalatataya capa Dios quinzotzac Moisés, yoje quilic: “Nehual niunca iDios Abraham huan iDios Isaac huan iDios Jacob.” Yehuanten, quema, miquije. Ma yoje, yulticate, pampa quijtuc Dios: “Nehual inminDios yehuanten.” <sup>27</sup> Huan Dios amo inminDios mijquimes. Yihual inminDios yehuanten hual yulilo. Yoje amhuanten annoixpolujtica míac.

*Jesús quinmilía calía unca in lajtol niman hué*

(Mt. 22:34-40)

<sup>28</sup> Ajsic se lamaxtini ca in lamaxtinijmes. Yihual quincacquiaya quiman laquetzaloaya, quimatic pampa Jesús quinnanquiloc cuali. Huan quilajlanic: —¿Calía in niman hué ca mochi in lajtomes?

<sup>29</sup> Quinanquiloc Jesús:

—Inon in lajtol niman hué: “Xijcaqui, Israel. In Tata toDios, yihual se san, amo unca oc se. <sup>30</sup> Huan ticlasojlas in Tata moDios ca mochi moyolo huan ca mochi moyulilisi huan ca mochi moijnamiquilisli huan ca mochi mochicahualisli.” Inon in lajtol niman hué. <sup>31</sup> Huan in oc se lajtol unca quinami inon hual nilamic niqijituc: “Ticlasojlas aqui yes unca ca tehual quinami tehual timolasojla.” Amo unca oc sequin lajtomes hual monotzalo yoje mías quinami innojen.

<sup>32</sup> Cuaquinon in lamaxtini quiloc:

—Cuali tiqijituc, Lamaxtini. Unca melahuac len tiqijitúa quinami Dios yihual se san. Amo unca oc se, jan yihual san. <sup>33</sup> Huan sinda se quilasojla Dios ca mochi iyolo huan ca mochi ilaijnamiquilisli huan ca mochi iyulilisi huan ca mochi ichicahualisli, huan sinda quilasojla mochi sejse hual unca ca yihual quinami yihual molasojla, quema, in monotza niman mías. Amo quiman monotzalo yoje mochi in huendis huan mochi in huejuendi hual cate borregos huan bueyes hual quilalililo pani capa quichichinuilisli ilaixpan Dios.

<sup>34</sup> Jesús quicaquic quinami quinanquiloc ca laijnamiquilisli huan quiloc:

—Jan nadita san huan huil timoita ca Dios mitzlaicantica lajitic moyolo.

Cuaquinon moxtin momajtiloaya quilajlanilo oc sequin lajtomes pa quitási quinami huil quimotexpahuililisoquiaya.

*In Cristo, ¿yihual ixolol David?*

(Mt. 22:41-46; Lc. 20:41-44)

<sup>35</sup> Jesús lamaxtiaya pin tiopan hué, quinmilic:

—¿Quinami huil quijitulo in lamaxtinijmes pampa yihual ixolol David in Cristo hual Dios quitilanía? <sup>36</sup> In Espíritu Santo quijitúa pan ipampa yihual David, quijitúa:

In Tata quiloc noTata:

“Ximolali pa noma cuali pa tichpalehuis pa nihuelitis.

Xicaya nican pa quiman ajsis in tonali hual niquinlalis inmintzindan mocxihuaimes yehuanten hual mitzcocolilo.”

<sup>37</sup> Yihual David quitocayaltía in Cristo noTata. Yoje, ¿quinami yes yihual ixolol David?

Huan in mías hual cataloaya nepa quixtocaloaya mías quicaquilo.

*Jesús quinmilía pa como momacahuiltisi pa mocuajcuamanasi ca in hual quimaxtilo ilamaxtinijmes Israel*

(Mt. 23:1-36; Lc. 11:37-54; 20:45-47)

<sup>38</sup> Lamaxtiaya Jesús, quijituc:

—Xilachixtiacan pa como anmitzcuaajcuamanasi ilamaxtinijmes in lajtol hual quimaxtilo, pampa yoje quichihualo yehuanten. Quixtocalo nejnen-tinemilo ca inminahuas huejuejcanic. Quixtocalo pa moxtin quinpialtilo ca mías lamajtilisli. <sup>39</sup> Quixtocalo molalilo pin icpalimes huejué pin tiopan calijic pa moxtin quitási quinami yehuanten cate lacames huejueyenten. Noje quixtocalo cayasi capa in huejueyenten cate lacuajtcate pin fiestas.

<sup>40</sup> Quinquixtililo inmincalimes in sihuames inminhuían huan amo quinmicnililo. Cuaquín quilajlanilo Dios ca mías lajtomes pa quincuaajcuamanasi

in lacames huan sihuames pa yoje quijtusi pampa yehuanten lacames cuajcuali. Yehuanten Dios quinmacas míac lacocoltilisli hual niman ticocu.

*Se sihual ihuían quimaca je tomin tipichin*

*(Lc. 21:1-4)*

<sup>41</sup> Jesús yehuatataya laixpan capa quilasaloaya tomin laijtíc pa in tiopan hué, quiztataya quinami yehuanten quilaxilijtiahuiloaya laijtíc. Míac ca yehuanten hual quipialoaya míac tomin quilasaje míac laijtíc. <sup>42</sup> Huan panuc se sihual ihuían hual amo quipiaya. Quilaxilic ome tomin hual cataloaya niman tipichin. <sup>43</sup> Cuaquín Jesús quinmilic pa quitasi imonextiliniymes huan quinmilic:

—Neli annimitzilía, in sihual ihuían amo quipía pa molacualtis. Ma yoje, Dios quita quinami yihual quilaxilic laijtíc míac. Amo yoje míac quilaxilije moxtin in oc sequin hual quilaxilijtataloaya tomin nepa. <sup>44</sup> Moxtin yehuanten quilasaje tomin hual amo quinequije, cataya pampa quipialoaya míac. Huan in sihual ihuían quipiaya jan se nadita. Quilasac nepa mochi hual quipiaya calica quicuhuasquiaya len pa quicuasquiaya.

## 13

*Jesús quinmilía quinami yalo quixitinilo in tiopan hué*

*(Mt. 24:1-2; Lc. 21:5-6)*

<sup>1</sup> Jesús quisaya pa quiahuac in tiopan hué, huan se ca imonextiliniymes quilic:

—Xiquita, Lamaxtini, in tixcalimes huan in calimes, ¡xiquita quinami cate hue huan cualtichin!

<sup>2</sup> Huan Jesús quinanquilic:

—¿Tiquinmita in calimes huejué? Amo mocahuas se tixcali inahuac oc se tixcali pan in calimes, mochi yesi lamayahuilí.

*Jesús quinlaquetzilía quinami moitasi in tonali hual mochi yahui lami*

*(Mt. 24:3-28; Lc. 21:7-24; 17:22-24)*

<sup>3</sup> Uyaje panquisaje in tepetzindi (loma) itoca iLoma in Olivos hual cataya ilaixpan in tiopan hué. Nepa molalic Jesús huan Pedro huan Jacobo huan Juan huan Andrés quilajlanije inminhuijuían, quilije:

<sup>4</sup> —Xitechili. ¿Quiman panus inon? ¿Len lanextilisli cayas pa ticmatasi quiman yahui panúa mochi innojen?

<sup>5</sup> Huan Jesús pehuac quinmilic:

—Xilachiacan pa amaqui anmitzcuaajcuamanas. <sup>6</sup> Hualasi míac lacames hual quijtusi quipialo nolahuellitlisli, quijtusi: “Nehual niCristo.” Huan quincuaajcuamanasi míac lacames huan sihuames. <sup>7</sup> Anquicaquis anmitzilisi quinami moanalo cajcaca huan quinami yalo moanalo cajcaca. Innojen tonaliymes hual anmitzlamachiltisi pampa panujticate in, amo ximomajtican. Yoje quipialo pa panusi, huan ayamo lamis in lalticpan. <sup>8</sup> Lacames pa se lali moanasi ca lacames pa oc se lali. Huan aquinojen hual huelitilo pa se lali moanasi ca inminlalimes yehuanten hual lahuellitilo nepa. Huan laulinis cajcaca pin lalticpan. Noje cajcaca miquisi pan ipampa mayandi. Lacames cualantinemisi huan majcoctinemisi pa moanasi. Ma yoje, lacames jan pehuasi mococusi san ca innojen, san unca ipehualisli in lacocoltilisli.

<sup>9</sup> Amhuanten xilachixtiacan pa como anmocahuas pa annechneltocas. Sequin anmitztemacasi pa ilahuellitilisli inminlanechiculisli in huejueyenten. Sequin anmitzhuitequisi pin tiopajmes. Anmitzhuicasi inminlaixpan gobernadores huan in oc sequin niman hueyenten, yehuanten hual quipialo

lahuelilitisli. Inon anmijchihuilisli pampa annechneltoca. Cuaquín anquijtus lamachilitisli nonahuac nehual inminyampa yehuanten. <sup>10</sup> Ayamo lamis in lalticpan sinda in cuali lamachilitisli ayamo yes lamachiliti capa chantilo moxtin yehuanten pin lalticpan. <sup>11</sup> Huan quiman anmitzquitzi quilo pa anmitztemacasi ca yehuanten hual quipialo lahuelilitisli, amo ximomajtican pampa amo anquimati len anquijtus. Xiquijtucan san inon hual jan axcan anmitziznamiquiltis in Espíritu Santo pa in tonali. Xiquijtucan inon pampa amo yes amhuanten hual anlajtus, cayas in Espíritu Santo hual lajtus pan anmopampa amhuanten. <sup>12</sup> Cayasi icnían hual quitemacasi icnían pa quimictisi. Cayasi inmintajtzitzían hual quitemacasi inminxolomes pa quinmictisi. Huan cayasi xolomes hual cualanisi ca inmintajtzitzían huan quitemacasi pa quinmictisi. <sup>13</sup> Huan moxtin anmitzcocolisi pampa annechneltoca. Ma yoje, aqui hual mopepenialtis mas que quipías pa miquis, yihual yes laquixtili pin polehuilisli, quipías yulilisli hual amo quiman lamis.

<sup>14</sup> 'Daniel ilajtuni Dios quijcuiluc pin amal de in hual elehuis hual quijlacúa. Inon noje quijlacúa mochi capa quimolancuacuetzililo Dios. Quiman anquitas inon lalalili capa amo unca iyaxca pa cayas (ma monextía len quinequi quijtúa inon aqui yes hual momaxtitica inon), cuaquín ma cholucan pan lomas yehuanten hual cayasi pin lalticpan Judea. <sup>15</sup> Huan pa in tonali, aqui cayas pa pani icali ma camo temu pa calaquis pa calijtic pa quiquixtis len pa calijtic. <sup>16</sup> Huan aqui cayas pin cuajmili ma camo mocuepa pa canas ilaquen. <sup>17</sup> Huan jeh, quinami yalo cayalo lacocoltili yehuanten hual yalo quipialo xolotzitzindis huan yehuanten hual lachichilitiasli pan innojen tonalijmes! <sup>18-19</sup> Huan xictemachican Dios pa como anquipías pa ancholus in tonalijmes quiman sehua, pampa pan innojen tonalijmes, quema, yalo panulo miac lacocoltilisli quinami ayamo quiman quinpanuaya lacames. In tonalijmes quiman pehuac quichíac Dios mochi, huan pa mochi in tonalijmes hual ajsitihualaloaya umpa pa axan, amo quiman cataloaya tonalijmes capa quinpanuaya lacames lacocoltilisli quinami inon hual quinpanus pa innojen tonalijmes hual ajsisi. Huan yajmo quinpanus yoje oc sepa. <sup>20</sup> Sinda toTata amo quilalic pa camo huejcahualosquiaya innojen tonalijmes, cuaquín amaqi mocahuasquiaya yultataya. Ma yoje, Dios quinlasojla innojen hual quinlajtultic pa yesi yihual iyaxca. Pampín quilalic pa camo huejcahualosquiaya in tonalijmes.

<sup>21</sup> 'Cuaquinon innojen tonalijmes cuajnesi se anmitzilis: "Xiquitacan, nican unca in Cristo." Huan cuajnesi anmitzilis: "Xiquitacan, umpunca yihual." Amo xicneltocacan. <sup>22</sup> Hualasi cristos hual amo yesi Cristo. Hualasi noje innojen hual quijtus pampa yehuanten ilajtunijmes Dios, huan yesi islatatinijmes. Quinchihuasi innojen lachihualisli hual quinmolapolultisi lacames. Yoje, sinda huil quichihuasi, motolinisi pa quincuaicjuamanasi yehuanten nojen hual Dios quinlajtultic pa yesi iyaxca. <sup>23</sup> Amhuanten xicayacan amo anmomajtitica pampa inon, pampa axan annimitzilic pampa mochi in yahui panúa.

*Jesús quinlaquetzilía quinami hualas oc sepa*

*(Mt. 24:29-35,42,44; Lc. 21:25-36)*

<sup>24</sup> Quiman lamisi panusi innojen tonalijmes capa yalo panulo lacocoltilisli yehuanten pin lalticpan, cuaquín mochías laticumac in tonali. In mesli yajmo lahuis. <sup>25</sup> Luceros (silalimes) hueztiyasi pin cielo huan mochi hual unca pin cielo motzejtzelus. <sup>26</sup> Cuaquinon moxtin nechitasi nehual ilacal in cielo. Nechitasi nihualajtihuala pani pin mextemimes nicpixtica chicahualisli



hué huan laixpelalisli cualtichin. <sup>27</sup> Huan niquintilanis nolanahuatinijmes pin cielo pa quinnechicusi innojen hual Dios quinlajtultic pa yesi iyaxca. Quinnechicusi quinquixtiticate cajcapa lami in lalticpan huan cajcapa lami in cielo.

<sup>28</sup> Xijcaquican in laijnamiquilisli inahuac in amacuál tipichin. Itzmolinía sejselic huan selistitica isacayo. Cuaquín anquimati amo huejcahua pa ajsis xupanda. <sup>29</sup> Yoje, in tonalijmes hual anquitas panujtica mochi inon hual axan annimitzilic, cuaquín anquimatis ajstitihualalo in tonalijmes. Quema, yalo ajsilo jan ajnaxcan. <sup>30</sup> Neli annimitzilía inon: Panusi mochi innojen quiman yulticate yehuanten hual cayasi nepa pa innojen tonalijmes, ayamo lamisi quiman panusi mochi innojen, quema, quinmitasi. <sup>31</sup> In cielo huan in lalticpan lamisi. Ma yoje, nolajtomes amo lamisi.

<sup>32</sup> Amaqui quimati in tonali huan in hora quiman panus inon. Dios ilanahuatinijmes pin cielo amo quimatilo, Dios ixolol amo quimati. Jan Dios noTajtzin san quimati.

<sup>33</sup> Xilachiacan, xicayacan laejxiltili, pampa amo anquimati calía tonali yes. <sup>34</sup> Unca quinami se lacal hual yahui huejca. Quicahua icali, quinmilía chicahuac itequipanujquimes pa quiztiasi in cali. Mochi sejse quipía itequipanulisli, huan quilía in lalapuni pa lachías. <sup>35</sup> Yoje, xilachixtiacan amhuanten mojmosta, pampa amo anquimati quiman hualas anmoTata. Amo anquimati da hualas pa layúa o pa lajco layúa o pa cualcan o pa laxpoyahua nepa quiman xahuania in gallo o pa huajtzinco. <sup>36</sup> Xilachixtiacan pa camo hualas jan ajnaxcan huan anmitzajsis ancotica. <sup>37</sup> Huan niquinmilía moxtin inon hual annimitzilía amhuanten. Xilachixtiacan.

## 14

### *Quitemulo quinami huil quiquitzquilo Jesús* (Mt. 26:1-5; Lc. 22:1-2; Jn. 11:45-53)

<sup>1</sup> Mocahuaje ome tonalijmes huan cuaquín yahuiaya ajsi in ilhuil (fiesta) itoca ipascau in judíos. Noje cataloaya itonalijmes in fiesta quiman quicualo in pan hual amo quipía laxocoyajquil. Axcán inminhuejueyenten in tiopistas huan in lamaxtinijmes quitemuloaya quinami huil quiquitzquilosquiaya Jesús ca lacuajcuamanalisli pa quimictisi. <sup>2</sup> Yoje quitemuloaya pampa quiqtuloaya:

—Amo huil tijquitzquisi pin fiesta pampa cualantiquisasi in lacalera.

### *Se sihual quixahuilía Jesús* (Mt. 26:6-13; Jn. 12:1-8)

<sup>3</sup> Cataya Jesús pa Betania pa ichan Simón hual quipiani in cocolisli lepra hual quixacualuilía se icuilaxli icuerpo (inacayo). Umpa lacuaya huan ajsic se sihual capa yihual, quiapiaya se tapalquita yancuic lachihuali ca se tixcali itoca alabastro. Quiapiaya laijtíc in tapalquita se chahuac hual ajuíac itoca nardo, ipatiaya miac. Cuaquín quilapanac in tapalquita, huan umpa quitoyahuac in chahuac hual ajuíac ípan itzontecon Jesús pa quixahuilis.

<sup>4</sup> Sequin hual umpa cataloaya cualanije, moilije:

—¿Leca amo quichíac cuali ca in chahuac hual ajuíac? <sup>5</sup> Huil quina-macaloaya pa ye cientos denario tomin huan in tomin huil quinxiluililloaya ca yehuanten hual amo quipialo len.

Huan cajuaje in sihual.

<sup>6</sup> Jesús quinmilic:

—Xijcahuacan, ¿leca anquimaca tequil? Nejchihuilic len cuali in sihual.  
 7 Cate itequi ca amhuanten yehuanten hual amo quipialo. Huil anquinchihuilia cuali quijquiman yes anquinequis. Huan nehual jan nadita huan amo nicayas ca amhuanten. 8 In sihual quichíac hual huil quichíac. Axan nejxahuilic ca in chahuac hual ajuíac pa nejchijchihuilisquiaya pa in tonali hual yalo nechlalpachulo. 9 Neli annimitzilia, capa yes pa mochi lalticpan quilaquetzilisi in lamachiltlisli cuali, noje quipuhuasi in hual yihual nejchihuilic. Yoje moxtin quijnamiquisi yihual.

*Judas quilalía pa quitemacas Jesús*  
 (Mt. 26:14-16; Lc. 22:3-6)

10 Cuaquinon Judas Iscariote hual yec se ca in doce (majlaclihuanome) monextilnijmes uyac quinmitac inminhueyenten in tiopistas. Yahuiaya quitemaca Jesús pa yehuanten inminlahueliitlisli. 11 Quicaquije yehuanten len yahuiaya quinchihuili, quipialoaya paquilisli huan quilije pampa neli yahuiloaya quilaxlahuilo. Cuaquinon quitemuaya Judas quinami yahuiaya quitemaca.

*Jesús quiyancuilia inon calica tiquijnamiquilo*  
 (Mt. 26:17-29; Lc. 22:7-23; Jn. 13:21-30; 1 Co. 11:23-26)

12 Cataya in tonali quiman pehuaya in ilhuil (fiesta) quiman quicualoaya in pan hual amo quipia laxocoyajquil. Pan in tonali quimictilo quinami huendi in borrego itoca pascua. Pampín imonextilnijmes quilajlanije Jesús, quilije:

—¿Capa ticnequi pa tiasi pa ticyucxiltisi pa tijcuasi ilacualisli in pascua?

13 Cuaquinon quintilanic ome imonextilnijmes, quinmilic:

—Xiacan pa in caltilan, nepa anquitas se lalac quimantía je tapalcal ca al. Xictocacan. 14 Capa calaquis yihual, xiquilican iteco in cali: “Quijtúa in Lamaxtini: ¿Capa unca in calijtic capa tialo tijcualo nehual huan nomonextilnijmes ilacualisli in pascua?” 15 Yihual anmitznextilis je calijtic hué nepa pin cali pa pani. Umpa cayasi mochi hual ticnequilo. Xicyucxiltican umpa in lacualisli pa tehuanten.

16 Uyaje in monextilnijmes, ajsije pin caltilan, quitaje san quinami quinmilic Jesús. Huan nepa quiyucxiltije ilacualisli in pascua.

17 Calaquic in tonali, hualaje Jesús huan in doce imonextilnijmes.

18 Cataloaya nepa capa lacuajtataloaya, Jesús quinmilic:

—Neli annimitzilia, se ca amhuanten hual ca nehual lacuajtica, yihual yahui nechtemaca ca yehuanten hual yalo nechmictilo.

19 Pehuac quincocuc inminyolo, molaflanije se ca oc se:

—¿Yes nehual?

Huan oc se noje quilajlanic:

—¿Yes nehual?

20 Huan Jesús quinnanquilic:

—Yes se ca amhuanten doce hual huan nehual ticpaltililo tolajcomes pan pin tapalquita xalapa. 21 Nehual ilalac in cielo nía nimiQUI. In yes quinami quijcuiluje nonahuac nel Dios ilajtunijmes. Huan jeh, quinami yahui panu lacocotlisli in lalac hual nechtemaca pa nechmictisi yehuanten! Cuali cataya ca in lalac sinda amo lacatic.

22 Lacualoaya yehuanten, Jesús canac pan, quisehuic Dios, quilapanac huan quinxiluic pa quicalosquiaya, quinmilic:

—Xijcuacan, in nocuerpo.

<sup>23</sup> Canac se tapalquita calica launilo, quisehuic Dios. Cuaquinon quinmacac yehuanten huan moxtin cunije. <sup>24</sup> Quinmilic:

—In noesli hual yahui toyahuía quiman nimiquis. Ca inon nicchías pa mocahuas cuali in lajtulisli hual Dios quichía pa lacames. Toyahuis noesli pa míac. <sup>25</sup> Neli annimitzilía pampa amo nicunis oc sejpa iayo uva coc. Quiman ajsi in tonali nepa capa huelitía Dios, cuaquinon nicunis yancuic.

*Jesús quilía Pedro pampa yahui quijtúa pampa amo quiximati*  
(Mt. 26:30-35; Lc. 22:31-34; Jn. 13:36-38)

<sup>26</sup> Cuaquinon quicantaruilije (quicuiquilije) Dios ilahueyilisli huan umpa quisaje. Uyaje panquisaje pin loma (tepetzindi) itoca Olivos. <sup>27</sup> Huan Jesús quinmilic:

—Anmoxtin anyahui annehcajcahua axan layúa, pampa Dios ilajcUILISLI yoje quijtúa: “Nehual Dios nicmictis yihual hual quinmiztía in borregos huan in borregos mosemantinemisi.” Amhuanten in borregos. Yoje quijtúa in lajcuilulisli. <sup>28</sup> Ma yoje, nel niyulis oc sejpa. Cuaquín nías annimitzlaicanas amhuanten pa in lalticpan Galilea.

<sup>29</sup> Cuaquinon Pedro quilic:

—Mas que moxtin oc sequin mitzcajcahuas, nel amo nimitzcajcahuas.

<sup>30</sup> Jesús quilic:

—Neli nimitzilía, axan layúa ayamo xahuanis ome xahuanilisli in gallo, huan tehual timocuepas tiqijtus ca ye lajtulisli pampa amo tichiximati.

<sup>31</sup> Ma yoje, Pedro quilic niman chicahuac:

—Sinda nicpiaya pa nimiquisquiaya ca tehual, amo quiman niqijtusquiaya pampa amo nimitziximati.

Huan yojque quijtuje moxtin.

*Jesús quilajlanía Dios pin cuajtilan*  
(Mt. 26:36-46; Lc. 22:39-46)

<sup>32</sup> Cuaquinon ajsije pan se cuajtilan itoca Getsemaní huan quinmilic Jesús imonextilinjmes:

—Ximolalican nican huan nel nías pa niclajlanis Dios.

<sup>33</sup> Quinhuicac Pedro huan Jacobo huan Juan, ca yihual uyaje. Pehuaya quicocu míac iyolo huan momajtiaya. <sup>34</sup> Huan quinmilic:

—Nehcocúa noyolo, quema, ca nadita nicnequi nimiQUI pampa yoje míac nehcocúa. Nican ximocahuacan huan xilachiacan.

<sup>35</sup> Huan uyac Jesús oc se nadita huejquita, molasac pan lali pa icamac. Quitemachic Dios sinda huil cayasquiaya pa yihual amo quipiasquiaya pa quipanusquiaya in lacocoltilisli hual yahuiaya quipanu nepa in tonali.

<sup>36</sup> Quijtuaya:

—Abba, noTajtzin, tehual huil ticchía mochi, xichnapati pa camo nipanus in hual yahui nechpanúa. Ma yoje, amo xicchía in hual nicnequi nel, xicchía in hual ticnequi tel.

<sup>37</sup> Cuaquinon mocuepac capa cataloaya imonextilinjmes, quinmitac coxtataloaya. Quilic Pedro:

—Simón, ¿ticocxtica? ¿Amo huil tilachía se nadita san? <sup>38</sup> Xiejsacan, xicla-jlanican Dios pa camo anmitztilanilis anmoyolo Satanás pa anquichías len amo cuali. Anquinequi anquichías pa anmoyolo. Ma yoje, amo anquipía chicahualisli pa anmocuerpo.

<sup>39</sup> Cuaquinon oc sejpa uyac quilajlanic Dios, quijtuc quinami pehuac quila-jlanic. <sup>40</sup> Oc sejpa mocuepac capa cataloaya, quinmitac coxtataloaya. Quipialoaya míac cochilisli, amo quimatiloaya quinami quinanquillosquiaya.

<sup>41</sup> Mocuepac oc sejpa, ca in cataya ye latemachilisli hual quilic Dios. Cuaquín mocuepac capa cataloaya, quinnmilic:

—Ayamo anlaquisa ancoxtica huan anmosejtica. Jan yoje. Axan nil-amic nictemachic Dios, axan ajsic inon hual ticchialoaya. Xiquitacan. Nehual ilacal in cielo nía nipanúa pa inminlahuelilitlisli lacames laijlac-uli. <sup>42</sup> Ximoquetzacan, ma tiajtican. Xiquitacan, axan yihual hual yahui nechtemaca ajsitihuala.

*Quiquitzquilo Jesús ilacocolinijmes*

(Mt. 26:47-56; Lc. 22:47-53; Jn. 18:2-11)

<sup>43</sup> Ayamo lamic lajtuc Jesús huan ajsic Judas, yihual se ca in doce mon-extilinijmes. Ca yihual hualaloaya míac lacames quinpialoaya teposlimes lajlatequi pa moanalisli, huan quinpialoaya cuahuimes. Quintilanije inmin-hueyenten in tiopistas huan in lamaxtinijmes huan oc sequin huejueyenten.

<sup>44</sup> Huan Judas hual yahuiaya quitemaca quinnahuatic, quinnmilic:

—Annimitzmacas je lanextilisli: AQUI nictenamiquis, yihual yes, xi-jquitzquican pa como annitzcajcahuas huan pa como cholus.

<sup>45</sup> Cuaquín ajsitihualac Judas capa Jesús, quilic:

—Lamaxtini, Lamaxtini —quipialtic, huan quitenamiquic.

<sup>46</sup> Cuaquinon ajsitihualaje huan quiquitzquije Jesús, quihuicaje. <sup>47</sup> Huan se ca yehuanten imonextilinijmes hual nepa cataya quiquitzquic iteposli pa moanalisli, quicotonilic se inacas itequipanujquil in tiopista hué.

<sup>48</sup> Cuaquinon quinnmilic Jesús:

—¿Anquisac pa annehquitzquis quinami nehual nicataya je laixtequini?

<sup>49</sup> Mojmosta nicataya ca amhuanten nilamaxtitataya pin tiopan hué huan nepa amo annehquitzquic. Ma yoje, inon panujtica yoje pa lamis mochías in hual quijtúa Dios ilajcuilulisli.

<sup>50</sup> Cuaquinon quicajcahuaje moxtin imonextilinijmes, choluje.

*Cholúa se oquixli*

<sup>51</sup> Huan se oquixli hual quitocaya, yec lalaquentili ca se tzotzomajli iliarujtataya pan icuerpo, in san. Quiquitzquije in lacames. <sup>52</sup> Jan axcan yihual itzotzomajli copinic huan yoje choluc nacatil.

*Quihualicalo Jesús inminyampa inminlanechiculisli in hueyenten*

(Mt. 26:57-68; Lc. 22:54-55, 63-71; Jn. 18:12-14, 19-24)

<sup>53</sup> Quihuicaje Jesús capa in tiopista hué. Axan monechicuje inminhueyenten in tiopistas huan oc sequin huejueyenten huan in lamaxtinijmes hual quinnaxtiloaya in lajtol hual quinnextilo in judíos quinami quimolan-cuacuetzililo Dios. <sup>54</sup> Pedro quitocaya Jesús de huejca, ajsic huan calaquic ilajcotiyan ichan in tiopista hué. Umpa molaliaya ca in guaches moutzcutat-aloya ilaixpan se tixuxli.

<sup>55</sup> Moxtin in huejueyenten hual huelilitoaya huan inminhueyenten in tiopistas quitemuloaya lacames hual quimotexpahuuililosquiaya Jesús. Yo-jqe huil quitilanilosquiaya pa miquisquiaya. Huan amaqui quitaje. <sup>56</sup> Míac quimotexpahuuililoaya islatatijtataloaya. Ma yoje, in hual quijtuloaya se-quin amo cataya yoje quinami oc sequin quijtuloaya. <sup>57</sup> Cuaquinon sequin moquetzaje pa quimotexpahuuililosquiaya, huan islatatije, quijtuje:

<sup>58</sup> —Tehuanten tijcaquije yihual quijtuc: “Nixtitinis in tiopan hual quichi-huaje in lacames, huan quiman panusi ye tonalijmes nicchías oc se tiopan hual lacames amo quichihuae.”

<sup>59</sup> Ma yoje, yehuanten noje amo cataloaya ca se lajtulisli pa quimotex-pahuuililosquiaya.

<sup>60</sup> Cuaquín moquetzac inminyampa moxtin in tiopista hué, quilajlanic Jesús, quilic:

—¿Amo huil tilananquilía? ¿Len inon hual mitzmozexpahuiljicate?

<sup>61</sup> Jesús mocahuac, amo quinancuilic se lajtol. Cuaquinon mocuepac quilajlanic in tiopista hué, quilic:

—¿Tehual tiunca in Cristo? ¿Tehual ixolol Dios in latuchihuali hual ticmolancuacuetzililo?

<sup>62</sup> Jesús quinancuilic:

—Quema, nehual. Huan amhuanten anechitas nehual ilacal in cielo. Anechitas niyehuatica inahuac ima cuali Dios hual quiplá mochi chichahualisli huan lahuelilitlisli. Annechitas nihualajtica pan mextemimes pin cielo.

<sup>63</sup> Cuaquín quitzayanic itzotzomajli in tiopista hué pa quinnexilis moxtin quinami yihual quiqtuaya Jesús quihuejuecaltitaya Dios. Quinmilic moxtin:

—¿Leca ticnequilo oc sequin lacames pa quimozexpahuilisi yihual?

<sup>64</sup> Axcán anquicaquic quinami yihual quihuejuecaltic Dios. ¿Len anquijtúa? Huan moxtin quiqtuje pampa quiptaya pa miquis.

<sup>65</sup> Cuaquinon sequin pehuaje quichijchaje. Quitzacuillije iixco ca se tzotzomajli, cuaquín quitecualoaya ca inmajmajuan, quilije:

—¡Xitechili aquí mitztecuac!

Huan in guaches canaje yihual huan quitecuaje niman chichahuac.

*Pedro quinmilía pampa amo quiximati Jesús  
(Mt. 26:69-75; Lc. 22:56-62; Jn. 18:15-18, 25-29)*

<sup>66</sup> Pedro cataya pa latzindan pin lajcotiyan. Panuc se sihual, itequipanujquil in tiopista hué. <sup>67</sup> Quiztiac Pedro moutzcutataya, cuaquín quitac oc sejpa huan quilic:

—Tehual noje ticataya ca Jesús in nazaretco.

<sup>68</sup> Pedro islacatic, quilic pampa no, quilic:

—Amo niquiximati huan amo nicmati len ticnequi tiquijtúa.

Huan quisac pa quiahuac ilalapujquil in lajcotiyan. Cuaquinon xahuanic in gallo. <sup>69</sup> Huan in sihual quitac oc sejpa, pehuac quinmilic yehuanten hual nepa moquezataloaya:

—In lacal se de yehuanten hual cataya ca Jesús nazaretco.

<sup>70</sup> Huan Pedro oc sejpa quiqtuc pampa no. Huan ca je nadita, yehuanten hual nepa moquezataloaya quilije:

—Tehual neli se ca yehuanten. Tehual tigelileteco pampa tilajtúa quinami se galileteco.

<sup>71</sup> Cuaquinon Pedro pehuaya quinotza Dios pa cajuas chichahuac sinda amo lajtuaya melahuac, huan quinmilic quinami iyampa Dios:

—Nicalía nolaxpan Dios damo niquijtúa neli, amo niquiximati in lacal hual annechajlantica.

<sup>72</sup> Huan jan ajnaxcan xahuanic in gallo oc sejpa. Cuaquinon quiqnamiquic Pedro quinami Jesús quilic: “Ayamo xahuanis ome xahuanielisli in gallo, huan tehual timocuepas tiquijts ca ye lajtulisli pampa amo tichiximati.”

Quiqnamiquic in, jan axcán pejtiquisac chocac.

## 15

*Quihuicalo Jesús ilaixpan Pilato  
(Mt. 27:1-2, 11-14; Lc. 23:1-5; Jn. 18:28-38)*

<sup>1</sup> Quiman lanesic, monechicuje inminhueyenten in tiopistas ca in oc sequin huejueyenten huan in lamaxtinijmes huan moxtin in oc sequin ca

yehuanten hual quipialoaya lahuelilitisli. Quilpije Jesús huan quihuicaje pa quitemacasi ca Pilato in gobernador (huelitini) romano. <sup>2</sup> Pilato quilajlanic, quilic:

—Tehual ¿tíunca inminhué in judíos?

Quinanquilic:

—Tehual tiquijtua.

<sup>3</sup> Quimotexpahuilloaya yihual ca míac lachihualisli amo cuajcuali inminhueyenten in tiopistas. <sup>4</sup> Cuaquín Pilato quilajlanic oc sejpa, quilic:

—¿Amo len ticnanquilía? Xiquita in míac monahuac tehual hual mitzmotexpahuillilo.

<sup>5</sup> Huan Jesús yajmo quinanquilic nindeno, huan pampín molapolultiaya Pilato.

*Quijtulo pampa Jesús quipía pa miquis*  
(Mt. 27:15-31; Lc. 23:13-25; Jn. 18:38-19:16)

<sup>6</sup> Pan mochi fiesta (ilhuil) Pilato quinmacahuilini in judíos se lailpili hual catani latzacuali pa calijtic hual quimotemachilinijme. <sup>7</sup> Huan nepa cataya se lailpili motocaya Barrabás. Yihual se ca yehuanten hual quinequije quichihuaje moanalisli pa quinsulahualosquiaya in romanos, noje yehuanten quinmictije lacames. <sup>8</sup> Pampín hualaje in judíos capa Pilato, pahuaje quitemachije pa quinchihuililosquiaya in lachihualisli cuali quinami quinchihuilini yehuanten pan mochi ilhuil (fiesta). <sup>9</sup> Yoje quinnanquilic Pilato:

—¿Anquinequi pa annimtzmacahuilis inminhué in judíos?

<sup>10</sup> Quimatiaya Pilato leca inminhueyenten in tiopistas quitemacaje Jesús. Moxicuje pampa quixtocaje Jesús moxtin lacames hual tijtipichin. <sup>11</sup> Huan inminhueyenten in tiopistas quinmacaje lajtol in lalacera pa quitemachisi Pilato pa quinmacahuilisquiaya Barrabás. <sup>12</sup> Cuaquinon oc sejpa Pilato quinmilic:

—Axan, ¿len nicchihuilis yihual hual itoca inminhué in judíos?

<sup>13</sup> Tzajtziye huan quinanquilije:

—¡Xicpilu pan se cuahuil!

<sup>14</sup> Quinmilic Pilato:

—¿Leca? ¿Len amo cuali quichíac?

Ma yoje, yehuanten tzajtziyoaya míac ca chichahualisli:

—¡Xicpilu pan se cuahuil!

<sup>15</sup> Cuaquinon Pilato quinmacahuilic Barrabás pa quinpaquiltisquiaya in lalacera huan latilanic pa iguaches quihuijuitequisi Jesús. Cuaquín quitemacac pa quipilusi pan se cuahuil.

<sup>16</sup> Iguaches Pilato quihuicaje pa lajtic ilajcotiyan icali in gobernador (huelitini). In cali motocaya Pretorio. Quinnechicuje mochi iguaches in lanechiculisli pa moanalisli.

<sup>17</sup> Cuaquinon quilaquentije Jesús ca se nahuas morado huan cahuanquil. Huan quijquetije se yahuali ca huizli. Quilalilije chichahuac pan itzontecon quinami yihual cataya se hué. <sup>18</sup> Pehuaje quipialtije quinami quipialtiloaya se hué, quihuitzquilijtataloaya. Quitzajtzilije quillijtataloaya:

—¡Ma yuli inminhué in judíos!

<sup>19</sup> Quitecualoaya oc sejpa itzontecon ca se ojtal, quichijchaloaya yihual. Quimolancuacuetzililoaya quinami quinextililoaya lamajtilisli iyampa se hué. <sup>20</sup> Yoje lamije quihuitzquilije, huan cuaquinon quiquixtilije in nahuas

morado, quilaquentije ca yihual itzotzomajli huan quiquixtije pa quipilulosquiaya pan se cuahuil.

*Jesús miqui pilujtica pan cuahuil*  
(Mt. 27:32-44; Lc. 23:26-43; Jn. 19:17-27)

<sup>21</sup> Panuc se lacal hual lacatic pin lali Cirene, motocaya Simón, mocuectataya pa ichan pin caltilan, tequipanuaya pa icuajmili. Yihual inmintajtzin yehuanten Alejandro huan Rufo. Innojen guaches quilamamiltije icuahuil Jesús pa ihuajcol Simón pa quimamilijtiac.

<sup>22</sup> Cajxiltije Jesús ca capic itoca Golgotá, in quinequi quijtúa Itzontecomal in mijquil. <sup>23</sup> Quimacaje pa cunisquiaya iayo uva coc calica quinipanuje len altzindi chichic itoca mirra, huan Jesús amo cunic. <sup>24</sup> Cuaquín quipiluje pan in cuahuil, huan moxiluilije yehuanten itzotzomajli, mahuiltitataloaya pa itzotzomajli pa quimantilosquiaya aqui yahuiaya moyaxcaji ca mochi sejse ilajco itzotzomajli.

<sup>25</sup> Cataya nueve (chicnahui) horas pa huajtzinco quipiluje pan in cuahuil. <sup>26</sup> Huan quiqcuiluje se amal calica quimotexpahuilije ilachihualisli hual pampa inon quimictiloaya. Quisaluje pa pani icuahuil, huan in lajcuilulisli quijtuya: “INMINHUÉ IN JUDÍOS”. <sup>27</sup> Huan ca yihual in guaches quinpiluje ome laixtequinijmes pan cuahuimes, se cataya pa ima cuali huan oc se pa ima amo cuali. <sup>28</sup> Yoje lamic mochiac Dios ilajcuilulisli hual quijtúa: “Quijtujque pampa yihual yec se ca yehuanten hual quichihualo amo cuali.”

<sup>29</sup> Innojen hual panuloaya pa quitasi quixixiculoaya quihuixujtataloaya inmintzontecon, quilije:

—¡Jo! Tel tiunca in lacal hual quijtuc: “Nicxitinis in tiopan hué huan cuaquín quiman panusi ye tonalijmes nicchías oc sepa.” <sup>30</sup> Axan, ximoquixti capa tia timiquis sinda huil, xitemu pin cuahuil.

<sup>31</sup> Yoje inminhueyenten in tiopistas huan in lamaxtinijmes noje quihuitzquilije, moilije se ca oc se:

—Quinquixtilic oc sequin pa camo miquilosquiaya. Ma yoje, amo huil moquixtilia yihual ihuían pa camo miquis. <sup>32</sup> Axan, ma temu Cristo ihué Israel, ma quisa pin cuahuil. Cuaquín tiquitasi huan ticneltocasi yihual.

Huan quihuejuecaltije yehuanten noje hual ca yihual pilujtataloaya.

*Jesús miqui*  
(Mt. 27:45-56; Lc. 23:44-49; Jn. 19:28-30)

<sup>33</sup> Pa lacualispan laticumactic pan in lalticpan huan mocahuac yoje pa ye horas. <sup>34</sup> Huan pa ye horas pa tiolac Jesús tzajtzc chicahuac, quijtuc:

—¡Eloí, Eloí! ¿Lama sabactani? —hual quinequi quijtúa: ¡NoDios, noDios! ¿Leca tichajcahuac?

<sup>35</sup> Sequin hual nepa moquezatataloaya quijtuje:

—Xijcaquican, quinoztica Elías.

<sup>36</sup> Molalujtihualac se, quipaltic ca iayo uva xocuc se latehcunijquil hual moita pin al huejcalan, se pochinquil. Quilalic pan se ojlal, quilejcultic pa quipachichinasquiaya Jesús, quijtuc:

—Xilachiacan. Ma tiquitacan sinda Elías hualas quitemuhuis.

<sup>37</sup> Cuaquinon tzajtzc chicahuac Jesús huan miquic. <sup>38</sup> Huan calijtic in tiopan hué cataya pilujtataya se tzotzomajli huejcanic huan telahuac hual quitzacuulic yehuanten pin lasojli calijtic pa camo calaquilosquiaya pin niman lasojli icalijtic in tiopan. Huan in tzotzomajli tzayanic, pejtataya ca pani huan tzayanic mochi pa latzindan, mochijtataya ome lajlajco nepa

quiman miquic Jesús. <sup>39</sup> Huan inminlaicanani in guaches hual moquez-tataya ilaixpan Jesús quitac quinami yoje tzajtzc Jesús quiman miquic huan quijtuc:

—Neli in lalacal yec Dios ixolol.

<sup>40</sup> Nepa noje cataloaya sequin sihuames lachixtataloaya huejca. Ca yehuanten cataloaya María hual lacatic pin caltlan Magdala, huan María inminnantzin Jacobo in Tipichin huan Josés, huan Salome. <sup>41</sup> Innojen sihuames yahuiloaya cajcapa ca Jesús, quipalehuiloaya nepa capa cataya pa Galilea. Huan míac oc sequin sihuames hual hualaje ca yihual pa Jerusalén umpa cataloaya.

*Quilalilo Jesús imijquil laiitic se ostul (cueva)*  
(Mt. 27:57-61; Lc. 23:50-56; Jn. 19:38-42)

<sup>42</sup> Tiolactiaya pan in tonali hual quijtulo in tonali quiman mochijchihualo pa in ilhuil (fiesta) pa mostatica. <sup>43</sup> Huan José hual lacatic pin caltlan Arimatea, yihual se ca in hueyenten huan moxtin quimatiloaya momajtilo iyampa yihual. Yihual noje quichixtataya in tonali quiman Dios san hueltis. Uyac amo momajtitataya capa Pilato pa motemachilis imijquil Jesús. <sup>44</sup> Pilato molapolultic quiman quimatic Jesús miquic. Quitlanic se guache pa quinoztac pa hualas inminlaicanani in guaches. Ajsic in laicanani, Pilato quilajlanic sinda miquic Jesús. <sup>45</sup> Quinanquilic in laicanani pampa quema, axan miquic. Cuaquinon Pilato quimacahuiltic José pa quihuicasquiaya imijquil Jesús. <sup>46</sup> Huan quicuhac José se tzotzomajli cuali huan iztac, quitemuhuije imijquil Jesús, quiliaruje pin tzotzomajli huan quilalije laiitic pan se cueva (ostul). In cueva yec lahuajuanali pin se xaltel hué. De umpa quimijmiluje se tel pa quitzacuas in ostul. <sup>47</sup> Huan María hual lacatic pa Magdala huan María inantzin Josés quitaloaya capa quilalije imijquil Jesús.

## 16

*Jesús yuli oc sejpa*  
(Mt. 28:1-10; Lc. 24:1-12; Jn. 20:1-10)

<sup>1</sup> Axan panuc in tonali hual mosehuilo in judíos, huan María hual lacatic pa Magdala huan Salome huan María inantzin Jacobo quicuhuae len hual ajuác. Ca innojen yahuiloaya quixahuililo imijquil Jesús. <sup>2</sup> Cataya in tonali hual quipehualtia in siete (chicome) tonalijmes huan uyaje yehuanten pa cualcan. Ajsije capa in cueva (ostul), quiman quistataya in tonali. <sup>3</sup> Yehuanten moililoaya:

—¿Aqui techmijmiluilis in tixcali capa calaqui se pin ostul capa unca imijquil?

<sup>4</sup> Ma yoje, lachiaje, quitaje in tixcali hual niman hué cataya, quitaje pampa mijcuanic in tixcali ilaixpan in ostul (cueva). <sup>5</sup> Calaquije, quitaje se lalacal yancuic molalijtataya pan ima cuali in cueva. Cataya lalaquentili ca se nahuas huejcanic hual iztatataya, huan quimacajsije in sihuames. <sup>6</sup> Ma yoje, in lalacal quinmilic:

—Amo ximomajtican. Anquitemujtica Jesús in nazareteco hual quipiluje pan in cuahuil huan quimictije. Xiquitacan. Yulic oc sejpa, amo unca nican. Xiquitacan capa quilalije. <sup>7</sup> Axan, xiacan, xiquinmilican Pedro huan in oc sequin imonextilinjmes: “Yihual anmitzlaicantía amhuanten pa Galilea. Umpa anquitas, umpa cayas jan quinami anmitzilic.”



<sup>8</sup> Cuaquín yehuanten in sihuames quisaje pin cueva (ostul), choluje pampa momajtitaloaya huan yuyucatataloaya. Amo quipuhuilije amaqui inon hual quitaje pampa momajtiloaya.

*Jesús monextia ca María hual lacatic pa Magdala*

*(Jn. 20:11-18)*

<sup>9</sup> Jesús yulic oc sejpa. Huan quiman lanesiaya in tonali hual quipehualtia in chicome tonalijmes, pehuac monextic yultataya ca María hual lacatic pa Magdala. Quiman ayamo quimictije Jesús huan yihual nejntentinemiaya pa in lali Israel, yihual quiquixtilic María siete (chicome) ijyecames amo cuajcuali. <sup>10</sup> Huan in sidual uyac quinlamachiltic yehuanten hual cayanijme ca Jesús, quinlamachiltic pampa axan yuliaya oc sejpa. Yehuanten quicocuhuaya inminyolo huan chocaloaya. <sup>11</sup> Huan quiman quicaquije pampa yuliaya oc sejpa Jesús, quil, huan yihual María quitac, quil, yehuanten amo quineltocaje.

*Jesús monextia ca ome imonextilinijmes*

*(Lc. 24:13-35)*

<sup>12</sup> Quiman panuc inon, ome imonextilinijmes nejntentiaje pin ojli hual uyac pa se caltilan amo huejca. Hualac Jesús, ajsic ca yehuanten, nesiaya quinami se lalac hual amo quiximatiloaya yehuanten. Ma yoje, ca nadita quislacuje. <sup>13</sup> Cuaquín mocuepaje pa Jerusalén, quinlamachiltic in oc sequin imonextilinijmes, huan amo quineltocaje yehuanten noje.

*Jesús quintilanía imonextilinijmes pa yasi pa mochi lalticpan*

*(Mt. 28:16-20; Lc. 24:36-49; Jn. 20:19-23)*

<sup>14</sup> Panuc inon, monextic Jesús ca in once imonextilinijmes capa lacuatataloaya. Quinmajuac nadita pampa amo quinequiloaya quinneltocalo yehuanten hual quinmilije quinami quitaje yultataya oc sejpa. <sup>15</sup> Huan quinmilic:

—Xiacan pa mochi in lalticpan, xiquinmilican moxtin nejnepa in lamachiltisli cuali. <sup>16</sup> Aquí hual quineltoca huan yes lacuayatequili, yoje yihual yes laquixtili pa camo polehuis huan quipías yulilislis hual amo quiman lamis. Huan aquí hual amo quineltocas in lajtol yahui panúa polehuilislis hual amo quiman lamis. <sup>17</sup> Huan yehuanten hual quineltocasi nolajtol huil quinchihuasi lanextilisli hual quinnexutilo quinami quipialo nolahuililtilisli. Ca in nolahuililtilisli quinquixtilisli lacames ijyecames amo cuajcuali. Huil lajtusi ca oc sequin lajtomes yajyancuic. <sup>18</sup> Huil quinquitzquisi cuhuames ca inminmajmajuan huan sinda cunisi len hual quinpajuia, amo quincocoltis, amo miquisi. Huan quinlalilisi inminmajmajuan pani pin cocoxquimes huan innojen cocoxquimes pajtisi.

*Jesús lejcúa pa ilhuicac (pin cielo)*

*(Lc. 24:50-53)*

<sup>19</sup> Huan quiman toTata Jesús lamic quinlaquetzilic mochi innojen, cuaquín Dios quilejcultic. Quihuicac pa ilhuicac (pin cielo), nepa molalic pa ima cuali Dios pa huelitisi huan yihual. <sup>20</sup> Huan pa mochi cajcaca yehuanten imonextilinijmes quinlaquetzilijtinemiloaya moxtin in lamachiltisli cuali quinami Dios techmaca in yulilislis hual amo quiman lamis. Yihual toTata quinpalehuiaya, quinhuililtiaya pa quichihuasi itequipanulisli. Huan yoje quinextiliaya quinami ilajtol unca melahuac pan inminpampa miac lanextilisli hual quinmitaliloaya lacames ca lamajtilisli quiman quinchihuaje inminyampa. Yoje ma ye.

## Ilamachiltisli cuali Jesucristo hual quijcuiluc San Lucas

### *Lucas pehua quijcuiluilá (quescribiruilá) Teófilo*

<sup>1</sup> Lasojli Teófilo, cate míac lacames hual molalilijque pa quijcuilulosquiaya se lapuhualisli hual quilamachiltisquiaya quinami panujque innojen hual quinchíac Jesucristo hual neli ticmatilo. <sup>2</sup> Inon techlamachiltijque yehuanten hual quincaquijque ilajtomes hual quijjut. Huan quitajque ca inmixtololojmes len quichíac Jesucristo quiman yuliaya pan lalticpan huan quiman uyac pin cielo (ilhuicac). Yehuanten cate hual quilamachiltitine-miloaya ilajtol Jesucristo. <sup>3</sup> Huan nehual noje nimomachiltic cuali mochi in hual panuc, huan noje inon hual panuc pin tonalijmes quiman ayamo lacatic Jesucristo. Pampín niquixtocaya nimitzijcuiluilu tehual, Teófilo, pa nimitzmachiltisquiaya sejse ca sejse innojen hual panujque quiman pehuac huan hual quinchijtiac pa quiman laquisac. Inon nimitzijcuiluilá pa ticmatisquiaya jan quinami panuc. <sup>4</sup> Nicchijtica inon pa ticmatis cuali pampa unca melahuac huan neli in hual mitzmaxtijque pampa quinchíac Jesucristo innojen.

### *Quilamachiltia se ilanahuatini in cielo (ilhuicac) pampa yahui lacati Juan Lacuayatequini*

<sup>5</sup> Pa innojen tonalijmes quiman Herodes yec in hué pin lalticpan Judea, cataya se tiopista motocaya Zacarías. Yihual yec se ca inminlanechiculisli in tiopistas hual quintocayaltloaya quinami motocaya Abías. In Abías yulini pa yina huan imiahuimes tiopistas tequipanunijme pin tiopan hué in tonalijmes hual quinlalinilijme. Huan Zacarías quiapiaya isihua motocaya Elisabet. In Elisabet, yihual noje yec imiahuil in tiopista motocani Aarón hual yec in tiopista pa yina hual ca yihual Dios quinpehualtic inmintiopistas in israelitos pin lali Israel. <sup>6</sup> In omenten, Zacarías huan Elisabet, Dios quinmitaya cuali pampa quineltocaloaya ilajtulisli huan ilajtomes Dios toTata. Amaqui huil quinmotexpahuiliaya ca nindeno hual amo cataya cuali. <sup>7</sup> Ma yoje, amo quiman quiapijque se xolol pampa amo huil quinpiaya xolomes Elisabet. Huan in omenten Zacarías huan Elisabet axcan moviejotijque.

<sup>8</sup> Cuaquinon se tonali, Zacarías huan icnían inmintiopistas inechiculisli Abías quiपालoaya pa quichihualosquiaya inmintequipanulisli tiopistas ilaixpan Dios pin tiopan hué. <sup>9</sup> Quinami quichihuanijme yehuanten in tiopistas quiman quinequiloaya quimatilo aqui yahuiaya quichía se huan oc se tequipanulisli pa itiopan hué Dios, quijcuilunijme (quescribirunijme) quinami motocaloaya moxtin in tiopistas sejse itoca pan se cuajtzindi, quinlasaje mochi innojen pan se tapalcal. Cuaquinon quiquixtijque pin tapalcal se cuajtzindi. Pa in tonali, quiquixtijte inon capa quijcuilujque quinami itocaya Zacarías. Yoje, in tonali quiapiaya yihual pa calaquisquiaya pin lasojli calijtic in tiopan hué pa lapopochuisquiaya. <sup>10</sup> Calaquic Zacarías, lapopochuiaya ca in ajuíac, huan moxtin in lacames huan sihuames cataloaya pa quiahuac in tiopan hué, quilajlantataloaya Dios. <sup>11</sup> Cuaquinon nesic se ilanahuatini toTata pin cielo (ilhuicac). Nesic capa Zacarías, moqueztataya in lanahuatini pa ima cuali inon capa lapopochuilo.

<sup>12</sup> Quitac Zacarías in lanahuatini huan mocahuaya lachixtica, momajtic m'iac.

<sup>13</sup> Cuaquín in lanahuatini quilic:

—Amo ximomajti, Zacarías, pampa quicaquic Dios in hual ticlajlanic. Mitzlacatitilis mosihua Elisabet se xolol, huan tictocayaltis Juan. <sup>14</sup> Tehual ticayas paquintzudo, ticpías paquilisli, huan quipiasqui paquilisli m'iac lacames pampa yihual lacatic.

<sup>15</sup> 'Huan Dios quitas in xolol quinami se lalac hué. Dios quilía pa camo quiman cunis iayo uva coc, huan nindeno hual quipía alcohol. Huan in Espíritu Santo canas in xolol quiman ayamo lacatis. <sup>16</sup> In xolol quichías pa m'iac yehuanten pa Israel mocuepasqui quitequipanuillisqui cuali in Tata Dios. Quincuepaltis pa quitequipanuillisqui oc sejpa quinami quichihuani-jme pa yina, quinami Dios quinnextilic. <sup>17</sup> Huan Dios quitilanic in Juan moxolol hual quipixtías ilajtol Dios, quitilanic quinami quitilanic ilajtuni Elías hual yulini pa yina. Quema, Juan yes quinami Elías ca iyolo huan ilahueliltitlisli. Quinchihuillis inminyolo in tajtzitzian pa yesi jan sejpa ca mosehuillisli ca inminyolo inminxolomes. Huan yehuanten hual aqui lacuilmatilo, yihual quinlaneltoaltis. Yojque yahui quichijchihuillis toTata lacames hual aqui cayasqui lachijchihuili pa quinamiquisqui Dios.

<sup>18</sup> Cuaquín Zacarías quilajlanic in lanahuatini, quilic:

—¿Quinami nicmatis da in cayas jan quinami tiquijjtutica? Pampa nehual nimoviejojtic huan nosihua moviejojtic.

<sup>19</sup> Ilanahuatini in cielo quinanquilic:

—Nehual niGabriel, nictequipanuilía Dios. Cataya yihual hual nechtilanic pa nimitiznotzas huan pa nimitizlis in cuali lamachititlisli. <sup>20</sup> Huan axcan, pampa amo tichneltozac, tía timocahua, amo huil tilajtus. Quiman lacatis moxolol, cuaquín tilajtus oc sejpa. Huan moxolol, quema, lacatis pan in tonali hual quipías pa mochías in hual nimitzilic.

<sup>21</sup> Huan pa quiahuac in tiopan hué yehuanten quichixtataloaya Zacarías huan moilliloaya:

—¿Leca huejcajtica pa quisas pin tiopan hué?

<sup>22</sup> Cuaquinon quisac Zacarías, huan amo huil quinnotzaya. Cuaquinon quimatiloaya yehuanten pampa yihual quitac len ilanextitlisli in cielo nepa capa cataya pa icalijtic in tiopan hué. Huan Zacarías quinlaquetzilic ca imajmajuan pampa axcan mocahuac, amo huil lajtuaya.

<sup>23</sup> Ajsic in tonali hual laquisac tequipanuc Zacarías ca ilachihualisli se tiopista pin tiopan hué, cuaquinon uyac pa ichan.

<sup>24</sup> Quiman panuc inon, pehuac pilhuac Elisabet isihua Zacarías, yahuiaya quilacatilti se xolol, huan amo quisac pa icali pa macuili mesli. Quijtuaya laijtic yihual: <sup>25</sup> “Yojque nejchihuic in Tata, nechitac quinami nipinahuaya pampa amo nicpiaya se xolol. Axcan yajmo nipinahuas ca lacames pampa quema, nicpías se xolol.”

### *Se ilanahuatini in cielo (ilhuicac) quimachiltía pampa lacatis Jesucristo*

<sup>26</sup> Pa in mesli chicuase quiman pilhuaya Elisabet, quitilanic Dios in lanahuatini Gabriel pa se caltilan itoca Nazaret pin lalticpan Galilea.

<sup>27</sup> Quitilanic pa quitas se sihual yancuic motocaya María. Yahuiaya monam-icti María ca se lalac motocaya José. Yihual José yec imiahuil in hué David hual yulini pa yina. <sup>28</sup> Calaquic in lanahuatini capa María, quilic:

—Nimitzpialtía, tehual hual Dios yahui mijchihuiliía len niman cuali. In Tata unca ca tehual, yahui mijchihuiliía len hual unca hué. Mochi in

lachihualisli hual quinchihuilía moxtin oc sequin sihuames amo quiman cataya yojque hué.

<sup>29</sup> Mocahuac quiztataya María quiman quinoztac in lanahuatini, moilic laijtic pa iyolo:

—Axcán, ¿leca yojque nechpialtitihuala in se?

<sup>30</sup> Cuaquinon in lanahuatini in cielo (ilhuicac) quilic:

—María, amo ximomajti, pampa tehual tía ticpía len niman cuali hual mitzmacas Dios. <sup>31</sup> Axcán, tipilhuas huan ticpías se xolol huan tictocayaltis Jesús.

<sup>32</sup> Yihual yes hué, quitocayaltisqui ixolol in niman hué hual chanti niman míac pa pani pin cielo. Huan Dios in Tata quimacas ilahuelilitisli pa huelitis ca yehuanten pa Israel. Cayas yojque quínami quipiani in lahuelilitisli pa yina in hué David hual yec itajtzin motajtzíán, yihual yulini niman pa yina. <sup>33</sup> Huan tehual moxolol huelitis ca yehuanten ilacames Jacobo, cate yehuanten pa Israel, huan amo quiman lamis ilahuelilitisli yihual.

<sup>34</sup> Cuaquinon María quilajlanic in lanahuatini, quilic:

—¿Quínami huil nechpanus inon? Pampa amo nicpía nolahuical.

<sup>35</sup> Quinanquilic in lanahuatini, quilic:

—Hualas in Espíritu Santo mopán, huan ilahuelilitisli yihual hual chanti niman pa pani pin cielo mitzyahualus quínami ilasehuán se mextemil. Yojque mitzhuelitis pa ticlacatilis. Pampín, in se hual lacatis pa tehual cayas lalalili pa quichías Dios ilachihualisli niman hué, quilalilic pa cayas pa yihual pan lalticpan. Pampín, quitocayaltisqui ixolol Dios. <sup>36</sup> Huan noje Elisabet mocni pa oc se cali yahui quipía se xolol lacal, mas que axcán moviejojtíc. Quema, huan axcán quipía chicuase mesli pilhuatica. Huan lacames quijtunijme yihual amo quiman yahuiaya quipía se xolol. <sup>37</sup> Ma yoje, ca Dios amo unca nindeno hual amo huil quichía.

<sup>38</sup> Cuaquinon María quilic:

—Xiquita, nehual itequipanujquil in Tata. Ma nejchihuili quínami tichilic. Cuaquinon quisac capa María ilanahuatini in cielo.

### *María quipaxaluilía Elisabet*

<sup>39</sup> Pa in tonalijmes ejsehuic uyac María pa se caltilan pin lalticpan Judea, pin lali pani. <sup>40</sup> Calaquic pa ichan Zacarías huan quipialtic Elisabet. <sup>41</sup> Huan yojque panuc quiman Elisabet quicaquic quipialtic María, cuaquín tzicuinic in xolol laijtic capa iyolo Elisabet, quitemiltic Elisabet in Espíritu Santo.

<sup>42</sup> Cuaquinon ca se lajtol chicahuac, quitzajtzilic:

—Dios mijchihuilic míac hual niman cuali. Yoje míac amo quiman quinchihuilic moxtin oc sequin sihuames. Huan Dios quichihuilis moxolol lachihualisli hué, hual amo quinchihuilis oc sequin, pampa quipías mochi lasojlalisli pa in lalticpan huan pin cielo. <sup>43</sup> Huan ¿len yes nechpanujtica? ¡Inantzin noTata nechpaxaluilijtica! <sup>44</sup> Xiquita, jan ajnaxcán nimitzcaquic tinechpialtic, cuaquín tzicuinic ca paquilisli in xolol laijtic capa nehual. <sup>45</sup> Tiyuli niman ca paquilisli pampa ticneltocac in hual mitzilic in Tata, huan yahui mochía in lajtol hual quijtuc.

<sup>46</sup> Cuaquinon María quilic:

Laijtic capa nehual niquijtúa lajtomes huejué pa in Tata,

<sup>47</sup> huan quipía paquilisli noyolo pampa Dios nechquixtía pin polehuilisli.

<sup>48</sup> Unca pampa Dios nechitac cuali nehual hual itequipanujquil, nehual hual amo nilápía.

Huan xiquita, pejtica axcan pa mochi xixihuil, moxtin lacames huan yehuanten hual lacatisqui laquetzasqui hué nonahuac nehual.

Quijtusqui pampa nehual nicanac ilachihualisli cuali Dios, quijtusqui quinami Dios nechtechíac.

<sup>49</sup> In Dios hual quipía mochi lahuelilitisli, yihual nejchihuilic len hué.

Huan yihual unca niman hué huan amo quimacahuilítia pa cayas laijlaculisli capa yihual.

Pampín tehuanten tohuían amo huil tiajsilo ca yihual.

<sup>50</sup> Quinmicnilía yehuanten hual yulinijme pa yina huan yehuanten hual yulilo axcan huan pa mochi xixihuimes hual ajsitihualalo.

Quema, quinmicnilía yehuanten hual quimatilo momajtilo ilaixpan yihual.

<sup>51</sup> Ca ilahuelilitisli imajma quinchihuac innojen hual niman huejué: quincholultic yehuanten hual quijtuloaya pa inminyolo pampa yehuanten huejueyenten.

<sup>52</sup> Quinquixtic lacames chijchicahuac pa capa huelitiloaya, huan yehuanten hual tijtipichin quinlalic capa huil canaloya lasojlalisli.

<sup>53</sup> Quinmacac míac yehuanten hual quimatiloaya pampa monequi pa Dios quinpalehuis.

Huan quincholultic iyampa yihual amo quipixtataloaya nindeno yehuanten hual quijtuloaya pampa amo monequiaya pa Dios quinpalehuisquiaya.

<sup>54</sup> Quinpalehuía yehuanten pa Israel, yehuanten hual cate itequipanujquimes, quijnamiquic quinmicnilic.

<sup>55</sup> Quinchihuilic jan quinami quinmilic totajtztzían, quinami quinmilic Abraham huan imiahuimes pa yina huan pa axcan huan pa quiman.

<sup>56</sup> María mocahuac chantitataya ye mesli ca Elisabet, cuaquinon uyac pa ichan.

### *Lacati Juan Lacuayatequini*

<sup>57</sup> Cuaquinon, ajsic in tonali capa yahuiaya quipía ixolol Elisabet huan quilacatiltic se xolol local. <sup>58</sup> Quimatijque ichantiniymes huan icnían quiinami in Tata quichihuilic len cuali niman hué. Pampín hualajque quipaxalulijque yehuanten, quipilijtataloaya yihual paquilisli. <sup>59</sup> Cuaquinon,

panuc in chicue tonaliymes, huan quipialoaya pa quitequililosquiaya nadita icuilaxli in xolol, quinami monequi pa quichihuasqui in judíos ca inminxolomes lacames, huan yahuioloaya quitocayaltilo in xolol Zacarías, yojque quiinami motocaya itajtzin. <sup>60</sup> Huan inantzín Elisabet quinmilic:

—Amo tictocayaltisqui yoje, tictocayaltisqui Juan.

<sup>61</sup> Huan quilijque:

—Amo unca se anmocnían hual motoca yoje.

<sup>62</sup> Pampín quilajlaniloaya Zacarías ca inminmajmajuan quinami yihual quinequiaya pa motocasquiaya ixolol. <sup>63</sup> Huan Zacarías molajlanilic se amal huan quiqcuiluc: “Juan itoca.” Huan moxtin mocahualoaya moiztataloaya.

<sup>64</sup> Cuaquinon quilapuc icamac Zacarías huan jan ajnaxcan inejnepil huil lajtuaaya, pehuac quijtuc lajtomes huejué pa Dios. <sup>65</sup> Huan pehualoaya momajtilo moxtin in chantiniymes. Pa mochi in lali pa pani ilomera (itepetilan) in laticpan Judea, moxtin pehualoaya moililo inahuac in hual panuc.

<sup>66</sup> Huan moxtin yehuanten hual quimatijque quinami panujque innojen quijnamictiahuioloaya laijtic inminyolo, quijtuloaya:

—Axan, ¿len yahui caya ca in xolol?

Pampa cataya neli Dios ilahuelilitisli cataya ca yihual.

*Zacarías quijtúa lajtomes huejué pa Dios*

<sup>67</sup> Huan in Espíritu Santo quitemiltic Zacarías itajtzin in xolol Juan, quilaquetzaltic ilajtomes in Espíritu Santo, huan quilic:

<sup>68</sup> Ma cayacan lajtuli lajtomes huejué pa in Tata, iDios Israel, pampa techitac pa techpalehuis huan pa laxlahuis pa tiyelosquiaya lamacahuali tehuanten ilacames.

<sup>69</sup> Quitilanía se hual quipía mochi lahuelilitlisli pa techquixtis pin polehuilisi.

In se unca imiahuil in hué David hual yec itequipanujquil Dios.

<sup>70</sup> Unca jan quinami Dios lajtuc pan inminpampa ilajtunijmes hual lajtujque pa yina, yehuanten quinlalilic pa quijtus ilajtol.

<sup>71</sup> Quijtuc pampa in se yahuiaya techquixti pin itemajquil tomocualantini-jmes huan pin ilahuelilitlisli moxtin hual amo techixtocalo.

<sup>72</sup> Quijtuc pampa yojque yahuiaya quinmicnili totajtzitzián.

Yoje quijnamiqic in lajtol hual quijtuc pampa yahuiaya tejchiuili yihual ihuán.

<sup>73</sup> Dios quimacac Abraham totajtzin in lajtulisli ca lajtomes hual amo quinpalas.

<sup>74</sup> Quimacac pa yoje techquixtisquiaya pa inminlahuelilitlisli tomocualantini-jmes.

Yojque yajmo ticpialosquiaya pa timomajtilosquiaya inminpampa yehuanten.

<sup>75</sup> Quimacac in lajtol hual techilía quinami yahuiaya tejchiuili pa huil tictequipanuililosquiaya Dios ca toyolo lachipahuali, pa huil ticchihualosquiaya in hual Dios quixtoca pa ticchiuasi mochi in tonalijmes hual tiyulilo.

<sup>76</sup> Huan tehual, noxolol, mitztocayaltisqui ilajtuni in Dios hual chanti niman pa pani pin cielo, pampa ticlaicanas in Tata pa ticchijchiuilis iojli.

<sup>77</sup> In quinequi quijtúa tehual tía tiquinlamachiltía ilacames Dios quinami Dios yahui quinquixtía pin polehuilisi.

Huan yoje quinquixtía, cayas pampa quinpupuhuilía inminlaijlaculisli.

<sup>78</sup> In unca pampa toDios quixtoca laicnilía.

Pampín Dios techita capa unca pa niman pani pin cielo, unca quinami ilaixpelalisli in huajtzinquito.

<sup>79</sup> Techixpela tehuanten hual ticate pin laticumac, tehuanten hual tichantilo capa unca quinami ilaticumactilisli in miquilisli, quinequi quijtúa, capa tiyulilo timomajticate pampa timiquisi.

Axcan huil tilachialo cuali pa in ojli hual techhuicas capa ticayasi jan yoje ca Dios ca ilaijnamiquilisli huan imosehuilisi pa toyolo.

Ticpiasqui mochi hual unca cuali pa tehuanten, mochi hual Dios quipía pa tehuanten huan quinequi techmaca.

Techixpela pa techmelahuilis tocxihuajmes pan in ojli capa ticayasi jan yojque tilaijnamicticate quinami Dios huan capa ticayasi ticpixticate imosehuilisi pa toyolo.

Umpa laquisac lajtuc Zacarías.

<sup>80</sup> Huan moscaltitiahuiaya in xolol, cantiyahuiaya chicahualisli pa iyolo huan chantiaya capa amaqui oc se chantiaya. Panuje xixihuimes huan cuaquinon ajsic in tonali quiman Dios quitlanic pa quinnotzasquiaya quinmilitataya yehuanten pa Israel ilajtol Dios.

## 2

*Lacati Jesucristo*  
(Mt. 1:18-25)

<sup>1</sup> Cataya pa innojen tonalijmes in hué niman hué hual motocaya César Agosto quichijchiuac se lajto pa quichihualosquiaya se ilapuhualisli moxtin hual umpa chantiloaya pa mochi in lali. <sup>2</sup> In lapuhualisli quichihuajque pa innojen tonalijmes hual Quirinio yec huelitini (governador) pin lali itoca Siria. In lapuhualisli cataya in calica yahuiloaya quipehualtilo ilapixcalisli tomin pa in hueyenten hual huelitiloaya. <sup>3</sup> Huan yahuiloaya moxtin pa cayalosquiaya lasaluli pa in lasalulisli. Mochi sejse uyac pa in caltilan capa moxtin itajtzitzian lacatijque huan yulinijme. <sup>4</sup> Huan José noje uyac pa inmincaltlan itajtzitzian hual cataya pin ilomera (itepetilan) in lalticpan Judea. Quisac pin caltilan tipichin Nazaret pin lalticpan Galilea, huan panquisac pa Judea pa icaltilan tipichin David, in caltilan itoca Belén. José yec imiahuil David, pampín uyac pa Belén. <sup>5</sup> Huan lamiaya monamicti ca María hual pilhuatataya, amo huejcahuasquiaya pa lacatis ixolol. Huan José uyaje pa yesi lasaluli pin lasalulisli. <sup>6</sup> Cataloaya pa Belén, huan ajsic in tonali pa lacatis ixolol María. <sup>7</sup> Huan lacatic pan yihual se xolol lalal, ca yihual quipehualtic in xolomes hual quilacatiltic María. Quiliaruc ca se tzotzomajli huan quitecac pan se sacalera lanechiculi laijtic se lacomultic capa lacualoaya in burros. Yojque quichiác María pampa amo cataya capa huil mosehuilosquiaya pin cali.

*Ilanahuatini in cielo quinlamachiltia yehuanten hual quinmiztataloaya inminborregos*

<sup>8</sup> Huan cataloaya lacames hual quinmiztataloaya inminborregos pa layúa pin ixlahuitos itejtenco Belén. <sup>9</sup> Huan nestiquisac inminlaixpan yehuanten ilanahuatini in Tata, quisac pin cielo (ilhuicac). Huan laixpelatiquisac ilaixpelalisli chichahuac in Tata quinyahualujtataya, huan momajmajtijque miác. <sup>10</sup> Huan in lanahuatini quinmilic:

—Amo ximomajtican. Xiquitacan, nehual nihuala pa annimitzlamachiltis se lamachiltisli cuali hual anmitzmacas miác paquilisli, huan in lamachiltisli cayas pa moxtin. <sup>11</sup> Axcan anmitzlacatic axcan se hual anmitzquixtis pin polehuilisli. Unca CRISTO in Tata, lacatic pa icaltilan David. <sup>12</sup> Axcan annimitzilia quinami anquitas. Anquitemus huan anquitas se xolol iliarujtica ca se tzotzomajli huan lastica pan se sacalera pan se lacomultic calijtic capa lacualo in burros.

<sup>13</sup> Jan ajnaxcan ca in lanahuatini nestiquisajque miác oc sequin ilanahuatinijmes in cielo, quijutataloaya lajtomes huejué pa Dios, quijtuje:

<sup>14</sup> ¡Xiquijutacan lajtomes huejué huan cuajcualtichin pa Dios hual chanti niman pa pani pin cielos, huan pan in lalticpan ma yulican ca mosehuilisli quipixticate in hual Dios quinmacasquiaya yehuanten hual yihual quinpilía paquilisli!

<sup>15</sup> Cuaquín in lanahuatinijmes quinchahuajque innojen lacames hual quinmitaloaya inminborregos, uyaje pin cielo. Huan molijque in lacames se ca oc se, quilijque:

—Ma tiacan pa Belén pa tiqitasqui in hual axcan panuc, hual in Tata techlamachiltic.

<sup>16</sup> Cuaquín uyaje ejsejtataloaya, latemujque huan quinmitajque María huan José huan in xolol lastataya pan se sacalera capa lacuanijme in burros.

<sup>17</sup> Quinmitajque in yeyenten, quinlamachiltijque in hual ilanahuatini in

cielo (ilhuicac) quinmilic inahuac in xolol. <sup>18</sup> Huan moxtin hual quicaqui-  
jqe, mocahualoaya moiztataloaya ca lamajtilisli pampa quinmajtic inon  
hual quinmilliloaya inminlaitanijmes in borregos. <sup>19</sup> Ma yoje, María cajco-  
quiaya mochi innojen lajtic capa iyolo, mojmosta quiqnamiquiaya mochi  
hual panuc.

<sup>20</sup> Huan mocuepaje pa inminborregos in laitaniymes quiqtutataloaya la-  
jtomes huejué pa Dios. Quiqtutataloaya mochi hual cuali inahuac yihual,  
pampa quicaquijsue huan quitajque mochi jan quinami quinmilic ilanahu-  
atini in cielo (ilhuicac).

### *Quinextilo in xolol Jesús pin tiopan hué*

<sup>21</sup> Cuaquinon, quiman quinpiaya chicue tonaliymes quiman lacatic  
Jesús, quitequilijque nadita icuilaxli huan quitocayaltijque JESÚS, quinami  
ilanahuatini in cielo quilic María pa quitocayaltilosquiaya pa in tonali hual  
ayamo pehuaya moscalti in xolol lajtic María inantzin.

<sup>22</sup> Ajsic in tonali hual María quiapiaya pa yes lachipahuali, quinami quiqtúa  
ilajtol Moisés: Quiqtúa pampa moxtin sihuames hual quilacatiltic se xolol  
quiipialo pa mochipahuasi. Pampín, panquisajque pa Jerusalén itajtzitzián  
pa quinextilisqui in xolol Jesús ilaixpan in Tata Dios nepa pin tiopan hué.

<sup>23</sup> Quichihuaajque inon pampa yojque unca lajcuiluli pa ilajtol in Tata: “Sinda  
unca lalac se xolol calica se sihual quinpehualtía ixolomes hual quinla-  
catiltía, cuaquín yihual unca lalalili pa yes iyaxca in Tata.” <sup>24</sup> Huan itajtzin  
huan inantzin noje quilalilijque Dios in huendi pa María ilachipahualisli,  
quinami quiqtúa ilajtol in Tata: In huendi yes ome huilomes o ome pichones  
sejselic.

<sup>25</sup> Huan xiquitacan. Cataya se lalac pa Jerusalén itocaya Simeón, yihual  
se lalac cuali, quilasojlaya in Tata huan cataya in Espíritu Santo lajtic capa  
yihual iyolo. Axcan quiapiaya míac yihual mochixtataya pa quiman yahuiaya  
ajsi in Cristo hual Dios yahuiaya quitilani pa quinquixtisquiaya yehuanten  
pa Israel pin polehuilisli. <sup>26</sup> Huan in Espíritu Santo quilamachiltic Simeón  
pampa yahuiaya quita in Tata Dios iCristo hual in Tata Dios quilalilic pa  
hualasquiaya pa in lalticpan. Quilic pampa yahuiaya quita iCristo huan amo  
miquisquiaya sinda ayamo quitac. <sup>27</sup> Huan in Espíritu Santo quichihuilic  
Simeón pa quimatis pa iyolo pampa monequiaya pa yas pa in tiopan hué.  
Huan nepa ajsije José huan María pa quichihuillilosquiaya ca in xolol Jesús  
quinami in lajtol quiqtuc pa quichihuillilosquiaya yihual. <sup>28</sup> Cuaquinon  
Simeón canac huan quimacuic in xolol, quiqtuc lajtomes huejué pa Dios huan  
quilic:

<sup>29</sup> Axcan, Tata Hué, xinechtilani pa nimiquis ca paquilisli quinami tinechilic.

<sup>30</sup> Axcan niqtitac ca noixtololjmes yihual hual tictilanic pa techquixtilis in  
miqulisli.

<sup>31</sup> Ticchijchiac inminlaixpan moxtin pa Israel.

<sup>32</sup> Yihual yes quinami lahuilisli pa mitznexstis tehual, Dios, ca yehuanten hual  
amo lacatijque israelitos, pa mitziximatisqui yehuanten.

Huan yes quinami laixpelalisli chichahuac pa quinnextilis yehuanten pa  
mochi in lalticpan in míac lachihualisli cuali,  
hual tehual, Dios, tiqinchihuilic in israelitos hual moyaxca yehuanten.

Yojque quiqtuc Simeón. <sup>33</sup> Huan itajtzin huan inantzin in xolol Jesús moc-  
ahualoaya moiztcate pampa quiqtuaya Simeón innojen lajtomes inahuac  
in xolol Jesús. <sup>34</sup> Cuaquinon quinlaquetzilic cuali Simeón, quintuchihuaya,  
huan yihual quilic inantzin María, quilic:



—Xiquita. In xolol Dios quilalía ca tehuanten pa Israel huan yihual quinchihuilis pa míac ca yehuanten miquisqui amo lachipahuali ipampa inminlajlaculisli, huan míac yesi laquixtili pin ipolehuilisli inminlajlaculisli.

Noje Simeón quilic:

—Yihual in xolol yes se hual míac amo quinequisqui quineltoacasqui pampa Dios quitilanic. Pampa inon, amo quinequisqui quineltoacasqui inon hual quinmilis. <sup>35</sup> Yojque momatis quinami yehuanten laijnamiquilo lajtic inminyolo. Huan tehual, María, yahui mitzcocúa moyolo pampa panus mochi inon.

<sup>36</sup> Nepa noje cataya Ana, ixolol sihual Fanuel. Yihual Fanuel imiahuil se hual motocaya Aser. In Aser yulini pa yina, yihual yec se ca Israel ixolomes hual imiahuimes huan inminmiahuimes in oc sequin ixolomes Israel mochihuaje yehuanten ilacames Israel, yehuanten in judíos. Huan in sihual Ana yec se ilajtuni Dios, cataya niman ilamantzita. <sup>37</sup> Huan ilahuical chantije chicome xixihuil, cuaquin ilahuical polehuic. Huan mocahuac Ana ihuían pa nahuipuhualihuanahui (ochentaicuatro) xixihuil. In Ana mojmosta pa semilhuil cataya pin tiopan hué, amo quiman quisac huejca nepa, mosajlataya míac huan quilajlaniaya Dios mochi tonali, quimolancuacuetzilic yihualitonali, pa semilhuil huan pa layúa. <sup>38</sup> Huan lamic laquetzac Simeón, jan ajnaxcan hualac capa yehuanten Ana, quisehuiaya Díos quiqtutataya lajtomes huejué huan cuajcualtichin pa yihual, quinlaquetziliaya inahuac in xolol, quinlaquetziliaya moxtin hual quichixtataloaya in tonali hual Dios yahuiaya quilaxlahui inminlamacahualisli yehuanten in israelitos.

### *Mocuepalo pa Nazaret*

<sup>39</sup> Cuaquinon laquisajque quichihujque José huan María mochi quinami quiqtúa ilajtol in Tata, mocuepaje pa in lalticpan Galilea pa Nazaret inmincali yehuanten.

<sup>40</sup> Huan moscaltiaya in xolol Jesús, mochicahualtitiahuiaya ca míac lajmatilisli huan Dios quichihuilijtitiahuiaya cuali.

### *In xolol Jesús pin tiopan hué*

<sup>41</sup> Itajtitzían Jesús yahuiloya xixixihuil pa Jerusalén pa cayalosquiaya pin fiesta (ilhuil) capa quicualo in judíos inacal borrego pa quijnamiquisqui quinami Dios quinquixtic in israelitos pin Egipto. Quinquixtic pa yina capa yehuanten pin lali Egipto hual quinchihuaje tequipanujquimes hual amo quinlaxlahuilinijme. <sup>42</sup> Cuaquinon, quiman Jesús moscaltic huan quinpiaya doce xixihuimes, yehuanten yeyenten panquisajque pa Jerusalén pa cayalosquiaya pa in fiesta, quinami quichihuanijme mochi xixihuil. <sup>43</sup> Huan quiman laquisajque inmintonalijmes in fiesta (ilhuil), mocuepaloaya itajtitzían. Ma yoje, mocahuac Jesús in xolol pa Jerusalén, huan amo quimatiloaya itajtitzían. <sup>44</sup> Quiqtuloaya pampa yihual cataya ca in oc sequin míac hualca yehuanten canaloya ojli. Yoje cataloaya pan ojli se tonali huan pehuajque quitemujque ca inmicnían huan inminchantinijmes hualca yehuanten cataloaya pa ojli. <sup>45</sup> Huan pampa amo quitajque, mocuepajque pa Jerusalén quitemujtajque. <sup>46</sup> Cuaquinon, quiman panuje ye tonalijmes quiman mocahuac Jesús pa Jerusalén, itajtitzían quitajque pin tiopan hué, molalijtataya lajco pa in lamaxtinijmes, quincacataya huan quinlajlantataya. <sup>47</sup> Huan mocahualoaya moizticate moxtin hual quicaquiloaya, mocahualoaya yoje pampa quicaquiloaya quinami yihual quimatiaya huan

quinami quinnanquiliaya. <sup>48</sup> Huan quipolujque inminlajtol itajtztzían nepa capa quitajque. Cuaquín inantzin quílic:

—Noxól, ¿leca yoje titejchihuilic? Xiquita. Motajtzin huan nehual timztzemujtinemiloaya, techcocojtinemiaya toyolo.

<sup>49</sup> Huan Jesús quinmilic:

—¿Len inon? ¿Annechtemujtinemiaya? ¿Amo anquimatiaya pampa nehual nicpía pa nicayas capa cate lachihuali innojen hual cate iyaxca noTajtzin?

<sup>50</sup> Amo quimatiloaya yehuanten len quinequiaya quijtu inon hual quinmilic. <sup>51</sup> Cuaquín temujtíac ca yehuanten pa Nazaret huan yihual yuliaya quinneltocatataya itajtztzían. Ma yoje, inantzin sejpa huan oc sejpa quinmijnamictiahuiaya mochi innojen laijtíc pa iyolo.

<sup>52</sup> Huan cantiyahuiaya Jesús míac lajmatilisli huan moscaltitiahuiaya hué. Huan yultiahuiaya quinami Dios quinequi huan moxtin quixtocaloaya míac.

### 3

#### *Juan Lacuayatequini quinnojnotta lacames capa amaqui chanti* (Mt. 3:1-12; Mr. 1:1-8; Jn. 1:19-28)

<sup>1</sup> Quipiaya quince xixihuil yihual huelitijthuiaya in hué niman hué motocaya César Tiberias pa Roma. Huan Poncio Pilato yec huelitini romano pin lalticpan Judea, Herodes huelitiaya pin lalticpan Galilea, huan icni Felipe huelitiaya pin lali capa cataloaya in lalticpan Iturea huan in lalticpan Traconite. Lisánias huelitiaya pin lalticpan Abilinia. <sup>2</sup> Anás huan Caifás yeje in tiopistas huejué. Pan in tonalijmes, Dios quitilanic Juan ixolol Zacarías pa quinnotzas in lalalera. Chantiaya Juan capa amaqui oc sequin chantiloaya.

<sup>3</sup> Yoje uyac Juan lanojnoztinemiaya pa mochi in lali itenco in atenco hué itoca Jordán, quinmilijtinemiaya yehuanten pa mopatillosquiaya inminyolo pa pehualosquiaya laijnamiquilo quinami Dios quinequi. Yoje huil cayalosquiaya lacuayatequili, yoje yelosquiaya lapujpuhuali inminlajlaculisli.

<sup>4</sup> Cataya quinami yec lajcuiluli pa in amal hual quijcuiluc Isaías ilajtuni Dios pa yina, quijtuc:

Mocaqui se hual tzajztzítica pin lali capa amaqui chanti, quílic:

“Xicchijchihuilican iojli in Tata, xiquinchihuacan melahuac iojlitos.

<sup>5</sup> Mochi lali hual unca pa temuán cayas latemiltili ca lali, huan mochi loma (tepel) huan lomita (tepetzindi) mochihuasqui ixlán.

Ojlimes panderá mochihuasqui ojlimes mejmelahuac.

Ojlimes huajuahuastic mochihuasqui ojlimes aj'alastic.

<sup>6</sup> Cuaquinon moxtin quitasqui yihual hual Dios quitilanía pa quinquixtilis ipolehuilisli inminlajlaculisli.”

Yojque unca lajcuiluli pin iamal Isaías.

<sup>7</sup> Yoje, míac quisajque pa míac caltilan pa quincuayatequis Juan nepa pa in atenco hué Jordán. Cuaquín Juan quinmilic:

—¡Amhuanten quinami cuhuames hual lapajuilo! ¿Anquijtúa sinda annimitzcuayatequis, cuaquín ancayas laquixtili pin polehuilisli quiman cualani Dios? No, amo yoje. Anquipía pa anyulis anquichijtías len unca cuali, pa yoje anquinnextilis Dios huan lacames pampa ca melahualisli anquipalac anmoyolo pa anpehuas anlajnamiquis quinami Dios quinequi. <sup>8</sup> Huan amo xipehuacan ximoilican laijtíc pa anmoyolo pampa amhuanten anunca imiahuimes Abraham totajtzin huan pampín Dios amo anmitztojtocas ilaixpan yihual. Nehual annimitzilía pampa Dios huil quinchía lacames ca in

tixcalimes nican hual yelosquiaya imiahuimes Abraham. <sup>9</sup> Axcan unca lalalili Dios pa anmijxitinis anmonapatilisli. Unca quinami se hacha hual quilalilo pa ilalhuayol se cuahuil. Sinda amo quipía laquilyo cuali in cuahuil, cuaquín quimayahuisqui huan quilasasqui pin tixuxli. Huan jan yoje sinda amo quipala iyolo se pa laijnamiquis quinami Dios quinequi, cuaquín Dios quichihuilis quinami quichihuililo in cuahuil hual amo quipía laquilyo cuali.

<sup>10</sup> Huan quilajlanijque Juan innojen míac lacames, quilije:

—¿Len ticchihasqui tehuanten?

<sup>11</sup> Quinnanquilic Juan:

—Sinda se quipía ome cotones, ma quimaca se pa yihual hual amo quipía se cotón. Huan sinda se quipía len quicua hual mocajtica, ma quimaca yihual hual mayana.

<sup>12</sup> Hualajque noje lacames hual canaloaya ilapixcalisli in tomin pa in hueyenten romanos. Hualajque pa yelosquiaya lacuayatequili, quilajlanijque:

—Lamaxtini, ¿len ticchihasqui pa tilanextilisqui pampa ticpalaje toyolo pa tipehuasi tilajnamiquisqui quinami Dios quinequi?

<sup>13</sup> Juan quinmilic:

—Jan xicpixcacan in tomin san hual anmitzlalililo yehuanten hual huelitilo.

<sup>14</sup> Noje quilajlanije in guaches hual quinlaquehuajque in lacames hual huelitiloaya, quilije:

—¿Len ticchihasqui tehuanten noje?

Huan quinmilic:

—Amo xijquixtilican nindeno amaqi, amo pan ipampa quinami anquinmacajsía ca in lacocoltilisli hual huil anquinchihuilía sinda amo quichihualo quinami anquinequi. Huan amo xiquinmacajsican pan ipampa quinami cuajnesi anquinmotexpahuilía inahuac len amo quichihuaaje. Huan ximopaquiltican san ca in hual anmitzlxlahuilo anmotecojuan.

<sup>15</sup> Quijtuloaya moxtin yehuanten pampa Dios yahuiaya quitilani iCristo huan pampín quichialoaya. Quinequiloaya quimatilo da cuajnesi yesquiaya Juan in Cristo, pampa quijnamicinemiyoaya laijtic pa inminyolo mochi hual quitaje hual quichihuaaya Juan. <sup>16</sup> Huan Juan quinnanquilic moxtin, quinmilic:

—Nehual annimitzcuayatequía ca al. Ma yoje, hualas se hual quipía niman míac lahuelilitilisli hual nel amo nicpía. Huan nehual amo nimonotza pa yes noyaxca pa nictomolis ilailpili ilacsames pa icxihuaimes. Yihual anmitzcuayatequis ca in Espíritu Santo, unca quinami tixuxli hual lachipahua.

<sup>17</sup> Huan yihual quinxilus yehuanten hual quineltocalo Dios pa camo cayasi ca yehuanten hual amo quineltocalo. Yes quinami yihual quipiasquiaya se latzejtzeluloni pa imajma calica quichipahuililo in trigo pa quisas in xiniúl. Quimontus in trigo pa capa cajcoquilo huan in xiniúl quilasas huan quichichinus pin tixuxli hual amo químan sehuis.

<sup>18</sup> Yojque Juan quinnoztinemiaya yehuanten pa quinmilisquiaya len quipialoaya pa quichihualosquiaya. Yihual quinlaquetzilijtinemiaya míac huan ca oc sequin lajtomes pa quinchicahualtisquiaya yehuanten. Yojque quinlaquetziliaya in lacames ca in lamachilitilisli cuali.

<sup>19</sup> Huan Herodes in hué cualanic ca Juan. Cataya pampa Juan cajuac inminlaixpan moxtin in lacames, cajuac pampa Herodes canac Herodías. In Herodías yec isihua Felipe huan Felipe yec icni Herodes in hué. Juan noje cajuac Herodes pampa quinchihuaaya míac oc sequin lachihualisli amo

cuajcuali. <sup>20</sup> Cuaquinon mocuepac quichíac Herodes oc se lachihualisli amo cuali. Latilanic pa quitzacualosquiaya Juan pin calijtic.

*Jesús unca lacuayatequili*  
(Mt. 3:13-17; Mr. 1:9-11)

<sup>21</sup> Ayamo latilanic pa quitzacualosquiaya Juan pin calijtic, huan pampín, Juan ayamo mocahuaya pa quincuaayatequisquiaya lacames. Juan noje quicuayatequic Jesús. Quiman laquisac cayac lacuayatequili, yihual Jesús quilajlantataya Dios, huan molapuc in cielo (ilhuicac). <sup>22</sup> Temujtihuualac in Espíritu Santo nestihualaya quinami se huilol. Moquetzac ipan capa yihual, huan quicaquiloaya moxtin se lajtol pin cielo (ilhuicac), quijtuc:

—Tehual noxolol hual nimitzlasojla, ca tehual nicpía míac paquilisli.

*Nican lanextía quinami Jesús unca imiahuil Dios*  
(Mt. 1:1-17)

<sup>23</sup> Jesús axcan moscaltic huan pehuaya quinpía quinami treinta xixihuil. Moxtin quijtujque pampa yihual yec ixolol José. <sup>24</sup> Huan José yec ixolol Elí. Elí yec ixolol Matat, Matat yec ixolol Leví, Leví yec ixolol Melqui, Melqui yec ixolol Jana, Jana yec ixolol José. <sup>25</sup> José yec ixolol Matatías, Matatías yec ixolol Amós, Amós yec ixolol Nahum, Nahum yec ixolol Esli, Esli yec ixolol Nagai. <sup>26</sup> Nagai yec ixolol Maat, Maat yec ixolol Matatías, Matatías yec ixolol Semei, Semei yec ixolol José, José yec ixolol Judá. <sup>27</sup> Judá yec ixolol Joana, Joana yec ixolol Resa, Resa yec ixolol Zorobabel, Zorobabel yec ixolol Salatiel, Salatiel yec ixolol Neri. <sup>28</sup> Neri yec ixolol Melqui, Melqui yec ixolol Adi, Adi yec ixolol Cosam, Cosam yec ixolol Elmodam, Elmodam yec ixolol Er. <sup>29</sup> Er yec ixolol Josué, Josué yec ixolol Eliezer, Eliezer yec ixolol Jorim, Jorim yec ixolol Matat, Matat yec ixolol Leví. <sup>30</sup> Leví yec ixolol Simeon, Simeon yec ixolol Judá, Judá yec ixolol José, José yec ixolol Jonán, Jonán yec ixolol Eliaquim. <sup>31</sup> Eliaquim yec ixolol Melea, Melea yec ixolol Mainán, Mainán yec ixolol Matata, Matata yec ixolol Natán, Natán yec ixolol David. <sup>32</sup> David yec ixolol Isaí, Isaí yec ixolol Obed, Obed yec ixolol Booz, Booz yec ixolol Salmon, Salmon yec ixolol Naasón. <sup>33</sup> Naasón yec ixolol Aminadab, Aminadab yec ixolol Aram, Aram yec ixolol Esrom, Esrom yec ixolol Fares, Fares yec ixolol Judá, Judá yec ixolol Jacob. <sup>34</sup> Jacob yec ixolol Isaac, Isaac yec ixolol Abraham, Abraham yec ixolol Taré, Taré yec ixolol Nacor. <sup>35</sup> Nacor yec ixolol Serug, Serug yec ixolol Ragau, Ragau yec ixolol Peleg, Peleg yec ixolol Heber, Heber yec ixolol Sala. <sup>36</sup> Sala yec ixolol Cainán, Cainán yec ixolol Arfacsad, Arfacsad yec ixolol Sem, Sem yec ixolol Noé, Noé yec ixolol Lamec. <sup>37</sup> Lamec yec ixolol Matusalén, Matusalén yec ixolol Enoc, Enoc yec ixolol Jared, Jared yec ixolol Mahalaleel, Mahalaleel yec ixolol Cainán. <sup>38</sup> Cainán yec ixolol Enos, Enos yec ixolol Set, Set yec ixolol Adán, Adán yec ixolol Dios.

## 4

*Satanás quitlanilia Jesús iyolo*  
(Mt. 4:1-11; Mr. 1:12-13)

<sup>1</sup> Huan in Espíritu Santo quinejnemiltiaya Jesús nepa quiman quisac pin atenco hué Jordán pa mocuepasquiaya, huan quitlanilanic capa amaqi chantiaya. <sup>2</sup> Nepa in lili quitlanilic iyolo pa quichihuasquiaya len Dios amo quinequi, quitlaniliaya iyolo pa ompuhuali (cuarenta) tonalijmes. In tonalijmes amo quicuaya Jesús nindeno, huan quiman panuje in tonalijmes, yihual mayanaya. <sup>3</sup> Cuaquín in lili quilic:

—Sinda tehual tiunca ixolol Dios, axan xiquili in tixcalimes pa mochihuasi len tijcuas.

<sup>4</sup> Cuaquinon quinanquilic Jesús, quilic:

—Yojque unca lajcuiluli pa ilajtol Dios, quijtúa: “Amo yulis se pan ipampa len quicua san, pampa in hual quicua se amo quichihuilia nindeno pa yulis se iyolo. No, se lalac yulis pan ipampa mochi lajtol hual Dios quijtúa.”

<sup>5</sup> Cuaquinon in lili quihuicac Jesús pa pani huan quinextilic ca jan se nadita san mochi in lalimés pin lalticpan ca inminlacialera huan inmintomin.

<sup>6</sup> Huan in lili quilic:

—Tehual nimitzmacas mochi inon pa tiquinchihuilis quinami tehual ticnequis tiquinchihuilis, huan ticpiás mochi len cuali hual moitas pa yehuanten. Huil nimitzmaca inon pampa unca noyaxca pa nicmacas aqui yes nicnequis nicmacas. <sup>7</sup> Huan nimitzmacas mochi inon sinda tehual tinecholanacuetzilis.

<sup>8</sup> Huan Jesús quinanquilic:

—Yojque unca lajcuiluli, quijtúa: “Ticmolancuacuetzilis jan in Tata moDios san, huan jan yihual san tictequipanulis.”

<sup>9</sup> Cuaquinon in lili quihuicac Jesús pa Jerusalén huan quilalic pa pani pin tiopan hué huan quilic:

—Sinda tehual tiunca Dios ixolol, ximolasa nican pan lali pa latzindan, <sup>10</sup> pampa yojque unca lajcuiluli ilajtol Dios, quijtúa: Dios quintilanís ilanahuatinijmes pin cielo pa mitziztiasi cuali.

<sup>11</sup> Ca inminmajmajuan mitzajcoquisi pa camo timotecuas pan len tixcali mocxian.

<sup>12</sup> Huan quinanquilic Jesús, quilic:

—Huan yojque unca lajtuli: “Amo timolalis capa cuajnesi tipolehuis jan pa yoj ticmatis sinda in Tata moDios mitzquixtis pin polehuilisli.”

<sup>13</sup> Cuaquinon in lili lamic quitilanilic Jesús iyolo, mijcuanic nepa capa Jesús, yahuiaya quichía pa se tonali quiman huil quitilanilisquiaya iyolo oc sejpa.

### *Jesús pehua itequipanulisli pa Galilea*

*(Mt. 4:12-17; Mr. 1:14-15)*

<sup>14</sup> Cuaquinon mocuepac Jesús pa in lalticpan Galilea, quipixtataya ilahueliltilisli in Espíritu Santo. Huan momachiltijque pampa yihual panu-  
ilatata cajcaca pa mochi itenco in lali capa yes nejnentinemiaya. <sup>15</sup> Yihual lamaxtitinemiaya pa mochi inmintioapjmes, huan moxtin quijtuloaya laj-  
tomes huejué pa yihual.

### *Jesús pa Nazaret*

*(Mt. 13:53-58; Mr. 6:1-6)*

<sup>16</sup> Huan uyac Jesús pa Nazaret capa itajtztizian quiscaltijque, calaquic pa inmintioan quinami quichihuaya pan mochi in tonalijmes hual mosehuilo in judíos huan yalo pa tiopan. Huan nepa Jesús moquetzac pa momaxtis.

<sup>17</sup> Quimacajque in amal hual quipía lajtict len quijcuiluc pa yina Isaías ilajtuni Dios. Quilapuc Jesús in amal, quitac capa yec lajcuiluli yojque:

<sup>18</sup> In Tata iEspíritu unca ca nehual pampa nechlalic yihual pa niquinmilis lamachiltilisli cuali yehuanten hual quimatilo pampa monequi pa Dios quinpalehuis.

Nechtilanic pa niquinnahuatis pampa cate lamacahuali yehuanten hual Satanás quinpía lailpili.

Nechtilanic pa niquinnahuatis in pachacames pampa yalo lachialo oc sejpa.

Nechtilanic pa niquinmacahuas yehuanten hual inminlajlaculisli quinx-acualuilijque inminyolo, nechtilanic pa yojque yesi lachijchihuali yancuic.

<sup>19</sup> Nechtilanic pa nilanahuatis pa quimatisqui pampa axcan in xihuil unca quiman Dios ca míac paquilisli quinequi quinchihuilía moxtin ilachihualisli cuali niman hué hual san yihual huil quinchihuilía.

<sup>20</sup> Cuaquinon quitzacuac Jesús in amal, quimacac in se hual cajcoquiaya in amal, cuaquinon molalic, huan mocahuajque quiztataloaya moxtin hual cataloaya pin tiopan calijtic. <sup>21</sup> Cuaquinon pehuac quinlaquetzilic Jesús, quinmilic:

—Axcan lamic mochíac in lajcuilulisli hual anquicaquic nimomaxtic.

<sup>22</sup> Huan moxtin quijtuloaya neli pampa cataloaya cuali ilajtomes, mocahualoaya moiztataloaya pampa quinlaquetzilijtataya in lajtomes. Cuaquinon pehualoaya quijtulo:

—¿Amo in se ixolol José?

<sup>23</sup> Cuaquinon Jesús quinmilic:

—Neli amhuanten annehilis in lajtol hual quijtulo míac, annehilis: “Lapajtini, ximopajti tehual.” Huan annehilis: “Ticmatijque in hual ticchíac pin caltilan Capernaúm. Axan xicchía jan yoje nican pa mocaltilan capa timoscaltic.” Yoje annehilis.

<sup>24</sup> Huan quinmilic:

—Annimitzilía neli pampa yehuanten pin caltilan capa moscaltic se ilajtuni Dios amo quineltocalo in lajtuni sinda yihual quinmilía ilajtol Dios.

<sup>25</sup> Huan annimitzilía len melahuac: Cataloaya pin lali Israel míac sihuames inminhuían nepa capa yulini Elías ilajtuni Dios, cataya pin tonalijmes hual amo quiahuiaya pa ye xixihuil huan lajco. Huan cataya se mayandi pa mochi in lali. <sup>26</sup> Ma yoje, Dios amo quitilanic Elías pa se ca innojen sihuames inminhuían pin lali Israel. Jan quitilanic pa se sihual ihuían hual amo yulini nican. Quitilanic pa se hual chantiaya pin caltilan tipichin itoca Sarepta, umpa amo huejca cataya in caltilan hué Sidón. <sup>27</sup> Huan cataloaya míac lacames pin lali Israel hual mococuloaya ca in cocolisli lepra pin tonalijmes quiman yulini Eliseo ilajtuni Dios. Ma yoje, Eliseo amo quipajtic se ca yehuanten. San quipajtic in lalac itocaya Naamán, yihual yulini pin lali Siria.

<sup>28</sup> Pampín cualanije míac moxtin pa in tiopan pampa quinmilic Jesús innojen lajtomes. <sup>29</sup> Moqueztiquisajque, quiquixtijque Jesús pa quiahuac in caltilan, quihuicajque pa itenco in loma (tepel) capa cataya in caltilan. Yahuiloaya quilasalo pa in cuajtic nepa pa miquisquiaya. <sup>30</sup> Ma yoje, yihual panuc lajco capa yehuanten huan uyac.

### *Jesús quipajtia se lalac hual quipía ijyecal amo cuali*

*(Mr. 1:21-28)*

<sup>31</sup> Cuaquinon temuc pa Capernaum, se caltilan pin lalticpan Galilea, nepa lamaxtiaya mochi in tonalijmes hual mosehuilo in judíos. <sup>32</sup> Mocahualoaya moiztataloaya míac pampa ilajtomes hual quinmaxtiaya yehuanten quiपालoaya ilahueliltilisli Dios. <sup>33</sup> Huan pin tiopan cataya se lalac quiapiaya se ijyecal amo cuali huan catzahuac, huan quitzajtzilic ca lajtol chicahuac, quilic:

<sup>34</sup> —¡Ah tel! ¿Len ticpía ca tehuanten, Jesús in nazaretco? ¿Tihualaya pa titechlamisquiaya? Nicmati aquí tiunca tehual, tiunca in lalac lajtultili hual Dios quitilanic pa in lalticpan.

<sup>35</sup> Jesús cajuac, quilic:

—Amo xinahuati huan xiquisa pa quiahuac yihual.

Jan axcan in ijyecal amo cuali quilasac in lalcal lajco capa yehuanten, quisac pa yihual, amo quicocoltic nindeno. <sup>36</sup> Huan momajtijque moxtin, moילווא:

—¿Len yes in lajtol hual quijtúa? Pampa ca ichichualisli quinami quipía se lalcal ca lahuelilitlisli, yihual quinmilia in ijyecames amo cuajcuali huan quisalo pa laijtc yehuanten.

<sup>37</sup> Huan pa mochi cajcapa pa itejtenco in caltilan quilamachiltije inon hual quichíac Jesús.

### *Jesús quipajtia inantzin isihua Simón Pedro*

(Mt. 8:14-15; Mr. 1:29-31)

<sup>38</sup> Cuaquinon quisac pin tiopan, uyac pa ichan Simón, calaquic. Nepa quitac totontataya míac inantzin isihua Simón huan quilajlanijque Jesús pa quichihuilis len pa yihual. <sup>39</sup> Yoje hualac Jesús, moquetzac inahuac huan cajuac in totonalisli. Pampín mosejtiquisac in totonalisli huan jan ajnaxcan moquetzac in sihual huan quinyucxiltilic len pa quicuasi.

### *Jesús quinpajtia míac*

(Mt. 8:16-17; Mr. 1:32-34)

<sup>40</sup> Calaquíaya in tonali pa tiolac huan moxtin hual quipialoaya pa inminchan cocoxquimes ca len yes cocolisli quihualquילווא Jesús. Huan yihual quilalilic imajmajuan pan mochi sejse in cocoxquimes, huan quinpajtic.

<sup>41</sup> Quisaje ijyecames pa míac yehuanten, tzajztitaloaya, quilijtataloaya:

—Tehual ti'ixolol Dios.

Huan Jesús quinmajuaya, amo quinequiaya pa lajtulosquiaya, pampa yehuanten quimatiloaya yihual yec iCristo Dios.

### *Jesús quinpaxaluilia in tiopajmes*

(Mr. 1:35-39)

<sup>42</sup> Lanesic, quisac Jesús pin caltilan, uyac capa amaqui cataya. Quitemu-jtihualaloaya in míac lacames capa cataya huan quinequiloaya quitzacuילוဝ် pa camo mohuicasquiaya, quinequiloaya pa mocahuas ca yehuanten. <sup>43</sup> Ma yoje, yihual quinmilic:

—Cate noje oc sequin caltilan capa nicpía pa niquinlaquetzilis ilamachiltisli cuali Dios huan quinami huelitía. Unca pampa inon nechtilanic Dios pa nicchías.

<sup>44</sup> Huan yahuiaya quinquahuatjtinemi ilajtol Dios pa inmintiopajmes in judíos.

## 5

### *Quinquitzquilo míac michimes*

(Mt. 4:18-22; Mr. 1:16-20)

<sup>1</sup> Cataya se tonali in míac lalcalera monechiculoaya inahuac Jesús pa quicaquilosquiaya ilajtol Dios. Yihual noje moquetzaya pa itenco in al huejcalan itoca Genesaret. <sup>2</sup> Quinmitac ome canoas cataloaya itenquito in al huejcalan. Quincahuajque in micheros, axcan quinchipajtataloaya inminlatzojuinijmes calica quinquitzquiloaya michimes. <sup>3</sup> Calaquic Jesús pa in se canoa hual iyaxca Simón, huan quilajlanic pa quinejnemiltis in canoa pa quijcuanis nadita pin al huejcalan pa camo cayas pa itenco in al. Cuaquinon molalic huan pa in canoa quinmaxtiaya in míac lalcalera.

<sup>4</sup> Cuaquín quiman mocahuac laquetzac, Jesús quilic Simón, quilic:

—Xicnejnemilti in canoa, ma ajsi capa cayas huejcalan huan xiquinlasacan anmolatzojuinijmes huejué pa anquinqitzquis michimes.

<sup>5</sup> Simón quilic:

—Lamaxtini, pa mochi layúa titequipanuloaya huan amo tijquitzquije nindeno. Ma yoje, pampa tel tichilic, niquinlasas in latzojuinijmes.

<sup>6</sup> Quichíac inon, huan quinnejnechicujque michera, míac, huan pehuajque tzayanijque inminlatzojuinijmes. <sup>7</sup> Cuaquín quinculiniloaya inminmajmajuán pa hualasqui yehuanten pan in oc se canoa pa quinpalehuilosquiaya. Huan hualajque, quintemiltijque in ome canoas ca michimes, pampín pejtiajque moactojijque. <sup>8</sup> Huan quitaya mochi inon Simón Pedro, huetzic quimolancuacuetziliztica capa ilaixpan Jesús, molaquitzquic pa ilancuajmes Jesús, quilic:

—Ximijcuani capa nehual, Tata, pampa nehual nilajlaculi.

<sup>9</sup> Quilic inon pampa momajtiaya pampa quinqitzquijque innojen míac michimes. <sup>10</sup> Yojque mocahualoaya moizticate ca lamajtilisli moxtin hual cataloaya ca yihual. Quema, yoje mocahualoaya moizticate Jacobo huan Juan ixolomes Zebedeo, hual tequipanuloaya ca Simón. Huan Jesús quilic Simón:

—Amo ximomajti. Tiquinqitzquini michimes hual miquinijme. Pejtica ca axcan huan pa quiman tiquinqitzquis lacames hual yulisqui pampa yesi nolaneltocanijmes.

<sup>11</sup> Cuaquinon quinqixtijque pin al huejcalan in canoas pa quinlalilosquiaya pa itenco in ál, huan jan axcan quincajcahuajque mochi huan quitocajque Jesús.

*Jesús quipajtía se hual quipía lepra*

(Mt. 8:1-4; Mr. 1:40-45)

<sup>12</sup> Se tonali cataya Jesús pa se innojen caltilan, huan moitac se lalac, quipiaya in cocolisli itoca lepra pa mochi icuerpo. Huan quitac Jesús in lalac, mopachujtiquisac pan lali, huan quitemachic Jesús, quilic ca icnotilisli, quilic:

—Tata, sinda ticnequi, huil tijchipahuilis in lepra.

<sup>13</sup> Huan Jesús quixilanic imajma, quimatocac, quilic:

—Nícnegui nicchía. Xicaya lachipahuali.

Jan ajnaxcan pajtic in lepra pan in lalac. <sup>14</sup> Cuaquinon Jesús quilic in lalac pa camo quilisquiaya amaqui, quilic:

—Axcán quiman timohuicas, ximonexti ca in tiopista huan xicuica se huendi hual quimaca se pa lachipahualisli, quinami moijcuiluc ilajtol Moisés. In huendi quinnextilis in tiopistas pampa axcan tichipahuac.

<sup>15</sup> Ma yoje, ilamachiltilisli in lapajtilisli mosemanaya míac huan míac huan mojmosta momiactithualaloaya in lacames pa quicaquilosquiaya Jesús huan pa yihual quinpajtilisquiaya inmincocolisli. <sup>16</sup> Huan yihual yahuiaya ihuían capa amaqui chantiaya, yahuiaya pa nepa quilajlanis Dios.

*Jesús quipajtía se hual amo huil nejnemiaya*

(Mt. 9:1-8; Mr. 2:1-12)

<sup>17</sup> Cataya se tonali yihual lamaxtiaya huan molalijtataloaya nepa sequin hual quinelocaloaya inminlamaxtilisli yehuanten hual itocaloaya fariseos, huan sequin ilamaxtinijmes inminlajtol hual quinxtilisli quinami quimolancuacuetzililo Dios in judíos. Yehuanten quisajque pa mochi caltilan pin lalticpan Galilea huan pin lalticpan Judea huan pin caltilan hué Jerusalén. Huan in Tata ilahueliltilisli cataya ca yihual pa lapajtisquiaya. <sup>18</sup> Huan



xiquitacan, quihualicatihualaloaya sequin lacames se lacal pan se lapejtzindi. In lacal amo huil moquetzaya, amo huil nejnemiaya. Yehuanten motolinijque pa quihualicalosquiaya pa calijtic pa quilalilosquiaya ilaixpan Jesús. <sup>19</sup> Huan amo quitaloaya quinami quihualicalosquiaya pa calijtic pampa quintzacuilloaya in miac lacalera itenco in cali. Pampín, lejcujque pani in cali, quixitinijque ca pani pa quichihuasi se coyunquil pa in tapanco capa quitemuhijque in lacal lastataya pan in lapejtzindi. Quitemuhijque lajco capa in lacalera, capa ilaixpan Jesús. <sup>20</sup> Huan yoje quitac Jesús quinami yehuanten quineltocaloaya yihual yahuiaya quipajti in cocoxqui. Pampín quilic:

—Lacal, axcan cate lapujpuhuali molaijlaculisli.

<sup>21</sup> Cuaquinon pehualoaya quijtulo laijtic yehuanten in lamaxtinijmes huan in fariseos, quijtuloaya: “Huan ¿aqui in se hual quihuejuecaltitica Dios? Amo unca amaqui hual quipía lahuelilitisli pan in lalticpan pa quinpujpuhuas lacames inminlaijlaculisli. Jan Dios san, unca iyaxca yihual.”

<sup>22</sup> Quimatic Jesús len quijtuloaya pa inminyolo huan quinmilic:

—Anquijjutica laijtic pa anmoyolo pampa nicuejuecaltitica Dios pampa niquilic: “Cate lapujpuhuali molaijlaculisli.” <sup>23</sup> Axan, annimitznexstilis len. Huil niquilis pampa cate lapujpuhuali ilaijlaculisli. Noje huil niquilis pa moquetzas huan nejnemis. Sinda moquetzas huan nejnemis anquimatis pampa nicpía lahuelilitisli. <sup>24</sup> Yojque nehual ilacal in cielo nía annimitznextilía pampa unca noyaxca pan in lalticpan pa niqinpujpuhuilis lacames inminlaijlaculisli, quinami unca iyaxca Dios pa quichías yoje. Huan neli annimitznexstilis inon, pampa nía nicpajtia in lacal.

Cuaquín, quimalinac iixco huan quitac in cocoxqui, quilic:

—Nimitzilía, ximoquetza, xicmama molapejtzindi huan xía pa mochan.

<sup>25</sup> Jan ajnaxcan moquetzac in lacal inminlaixpan moxtin, quimamac in lapejtzindi capa lastataya, uyac pa ichan quijjutica lajtomes huejué pa Dios. <sup>26</sup> Huan mocahualoaya mozticate ca lamajtilisli moxtin. Pehualoaya quijtulo lajtomes huejué huan neli pa Dios. Pehualoaya momajtilo miac huan quilijtinemiloaya:

—Axan tiquinmitaje lejlen hual amo quiman moitaje pan lalticpan huan techmajtilo innojen.

### *Jesús quinotza Leví (Mt. 9:9-13; Mr. 2:13-17)*

<sup>27</sup> Panujque innojen, quisac Jesús huan quitac se motocaya Leví molaij-tataya pin cali capa quilaxlahuiloaya pa ilapixcalisli tomin pa in hueyenten romanos. Huan Jesús quilic:

—Xihuala xichtoca, xiye se nomonexstilini ca in oc sequin.

<sup>28</sup> Cuaquinon moquetzac Leví, quincahuac mochi, huan yihual uyaje. <sup>29</sup> Huan quichihuic Leví se lacualisli pa Jesús, quihuicac pa ichan. Noje quinhuicac Leví oc sequin miac lacames, cataloaya oc sequin hual canaloya ilapixcalisli tomin huan oc sequin lacames hual cataloaya ca yehuanten pa in lacualisli. <sup>30</sup> Amo quixtocaloaya inon yehuanten in fariseos huan inminlamaxtinijmes. Pampín yehuanten quinlajlanije imonextilinijmes Jesús, quinmilije:

—¿Leca amhuanten anlacua huan anlauni ca in ilapixcanijmes tomin pa in romanos huan in oc sequin lacames hual amo yulilo cuali?

<sup>31</sup> Jesús quinnanquilic:

—Amo monequi pa quitasi se lapajtini yehuanten hual amo cocoxquimes. Yehuanten hual, quema, cate cocoxquimes quipialo pa quitasi se lapajtini. <sup>32</sup> Huan nehual nihualaya pa niquinnotzas yehuanten hual quimatilo pampa quipialo laijlaculisli. Niquinmilis pa quinpalasi inminyolo pa pehuasi laijnamiquisqui quinami Dios quinequi. Amo nihualaya pa niquinnotzas yehuanten hual quijtulo laijtic inminyolo pampa quipialo inminyolo chipahuac. Yehuanten quijtulo pampa amo quipialo pa quipalasi inminyolo pa pehuasi laijnamiquisi quinami Dios quinequi.

*Quilajlanilo Jesús quinami mosahualo*

(Mt. 9:14-17; Mr. 2:18-22)

<sup>33</sup> Sequin quilijque:

—Mosahualo míac imonextiliniymes Juan Lacuayatequini huan quilajlanilo Dios. Noje quichihualo yojque yehuanten in fariseos. Huan tehual momonextiliniymes mojmosta lacualo huan launilo, amo quiman mosahualo.

<sup>34</sup> Huan Jesús quinmilic:

—Nomonextiliniymes cate quinami yehuanten hual cate lahuicali pa se lanamictilisli huan nehual niunca quinami hual yahui monamictía. Amo huil anquinmilis pa mosahuasi yehuanten hual quinnotza se pa hualasi pa se lanamictilisli sinda cate ca in local hual monamictitica. <sup>35</sup> Ma yoje, ajsisi in tonalijmes quiman quinquixtilisi yehuanten in se hual monamictitica hual quinnotzac pa hualasi pa in lanamictilisli. Cuaquinon pa in tonalijmes mosahuasi.

<sup>36</sup> Huan quinmilic yehuanten noje se lapuhualisli pa lamaxtisquiaya, se laijnamiquiltisli, quinmilic:

—Amaqui quitzayana se ilajco se nahuas yancuic pa quilalilis pan se tza-yanquil pan se nahuas cacaxli. Sinda quichías in, yoje quijlacus in yancuic huan amo cayas iyaxca in lajco yancuic ca in nahuas cacaxli. <sup>37</sup> Noje amaqui quintemiltía cuilaxlimes cajcacaxli ca iayo uva yancuic. Sinda quichía yoje, iayo uva yancuic quixopunis in cuilaxlimes. <sup>38</sup> Pampín, quilalilo iayo uva yancuic pin cuilaxlimes yajyancuic. Huan jan yoje nolamaxtilisli amo unca iyaxca ilamaxtilisli in fariseos. <sup>39</sup> Huan sinda se cunic iayo uva hual axan quipía míac tonalijmes quiman quilalijque pin cuilaxlimes, cuaquín yihual amo quinequi cuni jan ajnaxcan iayo uva yancuic, pampa quijtúa: “Unca cuali in hual axan quipía míac tonalijmes quiman quichihuaqje.”

## 6

*Quincaphehualo miahuimes pan tonali quiman mosehuilo in judíos*

(Mt. 12:1-8; Mr. 2:23-28)

<sup>1</sup> Cataya pan se tonali quiman mosehuilo in judíos, panujtiahuiaya Jesús pan se cuajmili capa cataya trigo, huan pehuajque quincaphehuajque miahuimes imonextiliniymes, quinxacualujque ca inminmajmajuan pa quisasquiaya in caliyó, cuaquinon quicuajque in trigo. <sup>2</sup> Sequin fariseos quilijque:

—¿Leca anquichijtica len amo quimacahuiltía tolajtol pa quichías se pan tonalijmes hual timosehuilo?

<sup>3</sup> Huan quinnanquilic Jesús, quinmilic:

—¿Amo quiman anmomaxtic in hual quichíac David quiman mayanaya, yihual huan moxtin yehuanten hual cataloaya ca yihual? <sup>4</sup> Yihual calaquic pa itioipan hué Dios, quinmanac in panes hual in tiopistas quinlalilo ilaixpan Dios. Quincuac huan quinmacac yehuanten hual cataloaya ca yihual. Huan tolajtol lamacahuiltía pa quincuasi jan in tiopistas san.

<sup>5</sup> Cuaquinon quinmilic:

—Nehual ilacal in cielo niunca in Tata hual unca noyaxca pa niquijtus len huil quichía se pan in tonali chicome quiman mosehuilo.

*Jesús quipía lahueltiltilisli*  
(Mt. 12:9-14; Mr. 3:1-6)

<sup>6</sup> Cataya pan oc se tonali chicome quiman mosehuilo in judíos, huan calaquic Jesús pa se tiopan calijtic huan lamaxtiaya. Nepa cataya se lalac ca imajma cuali huaqui. <sup>7</sup> Huan quinapachijtataloaya in lamaxtinijmes huan fariseos pa quimatilosquiaya sinda cuajnesi yahuiaya quipajti Jesús pan in tonali chicome. Yoje quipialosquiaya quinami quimotexpahuililosquiaya. <sup>8</sup> Ma yoje, quimatiaya Jesús len quijtuloaya pa inminyolo, huan quilic in lalac hual quipiaya imajma huaqui, quilic:

—Ximoquetza huan xihuala ximoquetza lajco capa ticate tehuanten.

Huan yojqe quichíac in lalac. <sup>9</sup> Cuaquinon Jesús quinmilic:

—Ma annimitzajlani, ¿len quijtúa tolajtol? ¿Techmacahuiltía pa ticchihuasi len cuali o len amo cuali pan tonali chicome quiman timosehuilo? ¿Techmacahuiltía pa tijquixtisi se pin polehuilislisli o pa tijcahuasi pa miqis?

<sup>10</sup> Quinmitac moxtin pa itenco, cuaquín quimalinac iixco ca in lalac hual quipiaya imajma huaqui, quilic:

—Xicxilani momajma.

Huan quixilanic imajma in lalac huan mocuepac yulic imajma quinami cuali cataya quiman ayamo huaquiaya.

<sup>11</sup> Cuaquín cualaniloaya míac in fariseos huan lamaxtinijmes, pehuajque molajlanijque len huil quichihuililosquiaya Jesús.

*Jesús quinnextilía len quinequi quijtúa in lapuhualisli*  
(Mt. 10:1-4; Mr. 3:13-19)

<sup>12</sup> Huan cataya pan innojen tonalijmes quisac in caltilan Jesús. Uyac pa in loma (tepel) pa quilajlanis Dios, panuc mochi in layúa quilajlantataya Dios.

<sup>13</sup> Quiman lanestic, quinnotzac pa hualalosquiaya ca yihual imonextilinijmes. Ca yehuanten cataloaya majlaclihuanome (doce) hual quinlajtultic. Yihual noje quintocayaltic ilanahuatinijmes. <sup>14</sup> Cataya Simón hual noje quitocayaltic Pedro, cataya Andrés, yihual icni Simón, cataloaya Jacobo huan Juan, cataya Felipe, cataya Bartolomé, <sup>15</sup> cataya Mateo, cataya Tomás, cataya Judás ixolol Alfeo, cataya Simón hual cataya ca innojen hual quinequiloaya molalilo inminpan in romanos, motocaloaya in Zelotes, <sup>16</sup> cataya Judás ixolol Jacobo, huan cataya Judás Iscariote. Yihual in se hual quitemacac Jesús ca yehuanten hual yahuiloaya quimictilo.

*Quinmaxtía Jesús niman míac lacames*  
(Mt. 4:23-25)

<sup>17</sup> Temuc Jesús ca yehuanten, moquetzac pan se ixlán. Nepa hualaje míac imonextilinijmes, huan hualaje noje míac yehuanten pa mochi in lalticpan Judea huan Jerusalén huan pin caltilan hué Tiro huan in caltilan hué Sidón hual cataloaya pa itenco in al niman huejcalan. <sup>18</sup> Hualajque yehuanten pa quicaquilosquiaya Jesús huan pa yihual quinpajtisquiaya inmincocolisli. Noje quinpajtiaya Jesús yehuanten hual quincocoltiloaya noje ijyecames amo cuajcuali. <sup>19</sup> Huan motoliniloaya moxtin pa quimatocalosquiaya Jesús. Cataya pampa quistataya pa yihual ilahueltiltilisli pa lapajtisquiaya huan yoje pajtije moxtin hual quimatocaloaya.

*Paquilisli huan icnotilisli*

(Mt. 5:1-12)

<sup>20</sup> Huan cajcoquic itzontecon Jesús pa quinmitasquiaya imonextilinjmes, pehuac quinmillic:

—Ma quiapiacan paquilisli yehuanten hual quimatilo pampa monequi niman miac pa canasi len Dios quipia pa quinmacas. Quema, ma quiapiacan paquilisli, pampa Dios huelitis pa inminyolo.

<sup>21</sup> 'Ma quiapiacan paquilisli yehuanten hual aqui mayanalo pa len Dios quinequi quinmaca. Quema, ma quiapiacan paquilisli, pampa yehuanten pachihuisi.

'Ma quiapiacan paquilisli yehuanten hual chocalo pampa quincocujtica inminyolo de mochi in amo cuali hual quichihualo. Quema, ma quiapiacan paquilisli, pampa Dios quinchihuili pa paquisi.

<sup>22</sup> 'Ma quiapiacan paquilisli sinda amo quinmixtocalo in lacames, sinda amo quinmacahuilito pa calaquisi pa calijtic inmintiopajmes, sinda quincocolijtialo huan sinda quinhuejuecaltito. Jo quema, ma quiapiacan paquilisli sinda yehuanten quinchihuililo yoje pampa nechnehtocalo nehual ilacal in cielo. <sup>23</sup> Ma paquican pa in tonali quiman yoje quinpanus, ma tzicuican ca paquilisli, pampa pin cielo quipiasi se laxlahuilisli hué. Quema, pampa inmintajtzitzian yehuanten hual anmijchihuililo yoje quinchihuilinijme yoje Dios ilajtunijmes pa yina.

<sup>24</sup> 'Ma yoje, quichi cocolisli quipiasi pan inminyolo yehuanten hual quijtulo pampa quipialo mochi huan pampin amo monequi pa quipiasi in hual Dios quinequi quinmaca. Quema, quichi cocolisli quipiasi pampa axcan pan in lalticpan quipiajqque inminlalacahuilitisli.

<sup>25</sup> 'Huan quichi cocolisli quipiasqui pan inminyolo yehuanten hual axcan quijtulo pampa amo unca nindeno hual Dios quipia pa quinmacas hual monequi pa quipiasi. Jo quema, ¡quichi cocolisli quipiasi pan inminyolo, pampa ajsis se tonali huan quinequisi quipiasi len huil quinmaca Dios huan yajmo quinmacas!

'Huan quichi cocolisli pa inminyolo quipiasi yehuanten hual canaló mochi inminpaquilisli ca in hual quipialo nican pin lalticpan. Jo quema, quichi cocolisli quipiasi. Pampa ajsis se tonali huan quincocus inminyolo, chocasi huan ijyulantitiasi pampa yajmo quipiasi len calica mopactilisli.

<sup>26</sup> 'Huan quichi cocolisli quipiasi pa inminyolo yehuanten hual moxtin laquetzalo cuali pampa quixtocalo in hual quichihualo yehuanten. Unca pampa yoje inmintajtzitzian laquetzaniyme pampa quixtocaniyme in lajtunijmes hual islacatinijme, quijjutataloaya pampa laquezataloaya ilajtomes Dios.

*Ma quilasojla se yihual hual quichihuilia amo cuali*

(Mt. 5:38-48; 7:12)

<sup>27</sup> 'Ma yojque, amhuanten hual annehcactica huan annehnehtocatica, annimitzilía xiquinlasojlcan yehuanten hual molalilo anmopan, xiquinchihuilican cuali yehuanten hual amo anmitzitalo cuali. <sup>28</sup> Xiquinlaquetzilican cuali yehuanten hual anmitzlaquetzililo amo cuali amhuanten, huan xiclaqlanican Dios pa yehuanten hual anmijchihuililo amo cuali. <sup>29</sup> Sinda se mitztecua pa moixco, xicmalina ca yihual oc se moixco pa mitztecuas oc seppa. Huan sinda se mitzquixtilía monahuas, amo xictzacuili pa como mitzquixtilis noje molaquen. Unca cuali pa timopepenialtis in amo cuali hual mijchihuililo yehuanten. Amo unca yojque cuali pa tiquincuepilis.

<sup>30</sup> 'Sinda se mitzmolajlanilis len tehual, xicmaca. Huan sinda se mitzquixtilía len, cuaquín amo xiclaqlani seppa pa mitzcuepilis.

<sup>31</sup> 'Xiquinchihuilican cuali in lacames quinami anquinequi pa yehuanten anmijchihuilisi cuali. <sup>32</sup> Sinda anquinnequi yehuanten hual anmitznequilo, Dios amo yahui anmijsehuía pampa inon. Yehuanten hual amo mocahualo pa quichihuasi laijlaculisli jan yoje quinnequilo oc sequin hual noje quinnequilo yehuanten. <sup>33</sup> Huan sinda anquichihuilía cuali san innojen hual aqui anmijchihuililo cuali, cuaquín ¿anquijtúa pampa yahui anmijsehuía Dios pampa inon? Xiquitacan. Yehuanten hual itequi quichihualo laijlaculisli quinchihuililo cuali innojen hual aqui quinchihuililo cuali yehuanten. <sup>34</sup> Huan sinda anquinlanehuía anmotomin anquichixtica pampa yehuanten yalo anmitzcuepililo anmotomin, yoje amo yahui anmijsehuía Dios pampa inon. Jan yoje quichihualo yehuanten hual yulilo quichijtcate laijlaculisli. Quilanehuilo oc sequin quichixticate pa yehuanten quincuepilisi inmintomin. <sup>35</sup> Yoje, xiquinnequican yehuanten hual molalilo anmopan, xiquinchihuilican cuali huan xilalanehuican, amo xicchiacan lacuepilisi nindeno. Yoje Dios anmitzcuepilisi míac huan anyes ixolomes Dios hual chanti niman pa pani pin cielo. Yihual quinchihuilía cuali yehuanten hual amo cuali huan yehuanten hual amo quisehuilo. <sup>36</sup> Xilaicnilican quinami anmoTajtzin pin cielo laicnilía.

*Amo xitenehuacan oc sequin  
(Mt. 7:1-5)*

<sup>37</sup> 'Amo xiejsehuican pa anquinmotexpahuilis laijlaculisli oc sequin huan amo quiman anmitzmotexpahuilis laijlaculisli Dios. Xicpujpuhuacan in amo cuali hual oc sequin quichihualo, huan Dios anmitzpujpuhuilis in amo cuali hual anquichía. <sup>38</sup> Xitemacacan huan Dios anmitzmacas, anmitzlamachihuilijtica ca ilamachihualisli iyaxca hual unca niman míac, amo quinami inminlamachihualisli lacames. Jo quema, Dios quilamachihuilía anmitztemiltilijtica huan anmijtejezteluilijtica huan anmitzpachihuiltitica, huan cuaquín anmitztemiltisli pa xinis pa in lali. Pampín, quinami amhuanten anlamachihuilía, yoje Dios anmitzlamachihuilis.

<sup>39</sup> Cuaquinon quinmilic se laijnamiquiltisli calica quinmaxtiaya, quinmilic:

—Se pachacal amo huil quilaicana oc se pachacal. Huetzilosquiaya in omenten pa je lali lacomultic. <sup>40</sup> Imonextilini se amo ajsis yes hué sinda ilamaxtini amo unca jan yojque hué. Laquisa monextilía in monextilini mochi len quimaxtia ilamaxtini, cuaquinon in monextilini yes jan quinami ilamaxtini san. <sup>41</sup> ¿Leca tiquita mocni ilaijlaculisli tipichin huan amo tiquita tehual molaijlaculisli hué? Unca quinami tiquiztica se bagazo tipichichito pa iixtololon mocni, huan ma yoje amo timoítilía in cuahuil hual unca pa tehual moixtololon. <sup>42</sup> ¿Quinami huil tehual tiquilis mocni: “Nito”, tiquilis, “ma nimitzquixtili in bagacito moixtololon”? Huan ¡amo tiquita in cuahuil hual unca pa moixtololon tehual! ¡Timochijtica quinami se niman cuali huan mocni amo yojque cuali quinami tel! ¡Lacuajcuamanani! Xipehua timoquixtilijtica in cuahuil hual ticpía pa moixtololon tehual. Cuaquinon tilachías cuali pa tijquixtilis in bagacito mocni iixtololon.

*Quimatilo se cuahuil pan ipampa ilaquilyo  
(Mt. 7:17-20; 12:34-35)*

<sup>43</sup> 'Amo unca se cuahuil cuali hual quimati laqui ca laquilyo hual amo huil quicualo. Huan se cuahuil amo cuali hual amo monotza amo temaca laquilyo cuali. <sup>44</sup> Ticmatilo se cuahuil huan oc se cuahuil pan ipampa ilaquilyo iyaxca. Amo huil canililo se ajual ilaquilyo se amacujtzindí. Huan

amo quinmanililo uvas se huitzcuaajtzindi. <sup>45</sup> Yoje quichía len cuali se lalac cuali pampa iyolo cuali unca, huan amo quichía len cuali se lalac amo cuali pampa quipía iyolo amo cuali. Quinami lajtúa se lalac laijtíc pa iyolo, yojque lajtus ca icamac.

### *In ome lalastili*

(Mt. 7:24-27)

<sup>46</sup> Huan ¿leca anechnotza “Tata, Tata”, huan ma yoje amo anquinchía innojen hual annimitzilía? <sup>47</sup> Annimitzilía quinami unca se lalac hual ca nehual hualas huan quichías len niqulís. <sup>48</sup> Unca quinami se lalac hual quichihuaya se cali. Lahuajuana laijtíc huejcalan. Huan quiman cajsic in xaltel, nepa pehua quilalía in tixcalimes pa quiquetzas icali. Huejcalantíac in atenco hué huan quihuitequía in al pan in cali. Ma yojque amo huil quiculinía in cali pampa in lalac quichíac pani in xaltel. <sup>49</sup> Huan sinda nechcaqui se huan amo quichía quinami niqulía, cuaquín yihual unca quinami se lalac hual quichihuaya icali pan in lali, amo quitoctic in cali. Huejcalantíac in atenco hué, quihuitequic in al pan in cali, huan jan ajnaxcan quimayajtiquisac, mocahuac laxitinili mochi.

## 7

### *Jesús quipajtía itequipanujquil se lalac romano*

(Mt. 8:5-13)

<sup>1</sup> Cuaquinon, quiman laquisac quinnotzac yehuanten ca mochi in lajtomes pa quicaquillosquiaya, uyac Jesús pa in caltilan Capernaúm. <sup>2</sup> Huan cataya se inminlaicanani guaches, yec romano. Quipiaya in laicanani se itequipanujquil niman cocoxqui, yahuiaya miqui. Huan in laicanani quinequiaya míac itequipanujquil. <sup>3</sup> Quimatic in laicanani quinami Jesús huil tepajtíaya, quintilanic sequin inminhueyenten in judíos pa yasi quinahuatísi Jesús pa hualas quipajtís itequipanujquil in laicanani. <sup>4</sup> Ajsijque in hueyenten capa cataya Jesús, pehualoaya quitemachilo ca míac lasojlalisli, quilijque:

<sup>5</sup>—Monequi pa ticpalehuis in laicanani pampa yihual technequi tehuanten in judíos huan techlaxlahuilic totiopan.

<sup>6</sup> Cuaquín uyac Jesús ca yehuanten. Ma yoje, amo cataya Jesús huejca pa ichan in laicanani huan quinamiquijque sequin hual cataloaya ca in laicanani, quintilanic in laicanani pa quinahuatilosquiaya Jesús, huan ca ilajtomes in laicanani quilijque:

—Tata, amo ximomaca tequil pa tihualas pa nochan pampa amo nimonotza pa ticalaquís nocali. <sup>7</sup> Pampín niqijituc amo cataya noyaxca pa nihualas ca tehual pa nimitzlañlanís pa tinechpalehuis. Jan xiquijtu se lajtól san huan pajtis notequipanujquil. <sup>8</sup> Nicmati yihual pajtis pan ipampa molajtól, pampa nehual nicpía pa nicneltocas nolaicanani ilajtól. Noje niqinpiá guaches hual quipialo pa nechneltocasi. Niqulía in se “¡Xía!” huan yahui, niqulía oc se “¡Xihuala!” huan huala. Niqulía notequipanujquil “¡Xicchá inon!” huan quichía. Huan sinda yehuanten nechneltocalo pampa niqinmilía inon, cuaquín ¡quinami amo yahui pajtía notequipanujquil pan ipampa molajtól tehual!

<sup>9</sup> Quicaquic Jesús inon, lajtuaya pa iyolo pampa quineltocaya chichahuac in laicanani mas que amo yec judío. Cuaquín, momalinac capa yehuanten hual quitocatiahuiloyaya, quinmilic:

—Annimitzilía inon. Ayamo niqitac ca amhuanten israelitos jan se hual laneltoca yojque chichahuac quinami laneltoca in laicanani romano.

<sup>10</sup> Cuaquín, mocuepajque yehuanten hual quintilanic ca Jesús in laicanani. Ajsique pa ichan, quitajque pajtic in tequipanujquil.

*Jesús quiyuliltía ixolol se sihual ihuían*

<sup>11</sup> Panuc inon, yahuiaya Jesús pa se caltilan tipichin itoca Naín, quitocaloaya imonextiliniymes huan míac lalacera. <sup>12</sup> Ajsic capa calaquilo pin caltilan, quitac se mijquil, quihuicatiahuiloaya pa quilalpachulosquiaya. Se sihual ihuían yec inantzin in mijquil, huan yihual yec ja in se xolol san hual quipiaya. Ca in sihual cataloaya míac hual chantiloaya pa in caltilan.

<sup>13</sup> Quitaya in sihual, in Tata Jesús quiapiaya laicnililisi pa yihual, quilic:

—Amo xichoca.

<sup>14</sup> Ajsic Jesús capa cataya ilacomultic in mijquil, quimatocac, huan moquetzaje yehuanten hual quimamaloaya. Cuaquinon Jesús quilic in mijquil: —Oquixli, nimitzilia ximoquetza.

<sup>15</sup> Cuaquinon moquetzac molalic in hual miquic, axcan yuliaya oc sejpa, pehuac lajtuc. Huan Jesús quitemacac inantzin yihual hual cataya mijquil.

<sup>16</sup> Huan momajtijque moxtin huan pehualoaya quijtulo lajtomes huejué pa Dios, quililoaya:

—Axcan nestic ca tehuanten se ilajtuni hué Dios.

Noje quijtuloaya:

—Axcan hualac Dios techpaxaluilic tehuanten hual techlajtultic.

<sup>17</sup> Huan quimatijque quinami panuc inon yehuanten pa mochi in lali Judea. Huan pa mochi in lali itejtenco Judea quimatijque len quichihuac Jesús.

*Quintilanía Juan Lacuayatequini sequin imonextiliniymes ca Jesús*

(Mt. 11:2-19)

<sup>18</sup> Huan Juan Lacuayatequini imonextiliniymes quimachiltijque Juan mochi inon. Pampín quinnotzac Juan ome imonextiliniymes, quintilanic ca in Tata Jesús. <sup>19</sup> Quintilanic pa quilajlanilosquiaya:

—¿Tehual tiunca in se hual Dios quijtuc yahuiaya techtilanili? O ¿ticchiasi oc se?

<sup>20</sup> Yojque hualajque capa Jesús in lacames imonextiliniymes Juan huan quilije:

—Techtilanic Juan Lacuayatequini ca tehual pa timitzljalanisi sinda tel tiunca in se hual Dios quijtuc yahuiaya huala pín lalticpan. ¿Tiunca tehual o ticchiasi oc se?

<sup>21</sup> Huan pa in nadita hual nepa cataloaya in omenten hual Juan quintilanic, quitajque Jesús tepajtic. Quinpajtic míac cocoxquimes hual quinpialoaya míac cocolisli. Quinpajtic míac hual quincocoltiloaya ijyecames amo cuaajcuali lajtuc yehuanten, huan quinlachialtic míac pachacames.

<sup>22</sup> Cuaquinon Jesús quinlanquilic in omenten imonextiliniymes Juan, quinmilic:

—Xiacan ximachiltican Juan in hual anquitac huan in hual anquicaquic: Lachialo in pachacames, nejnemilo yehuanten hual amo huil nejneminijme. Pajtilo cuali yehuanten hual quiipalo in cocolisli lepra. Lacaquilo hual cataloaya panatas. Yulticate oc sejpa in mijquimes. Huan quicacticate nalamachiltisli cuali yehuanten hual quimatilo pampa monequi pa quiyasi ilapalehuilisli Dios. <sup>23</sup> Quipiás paquilisli aqui hual quilalía ilaneltoalisli ca nehual.

<sup>24</sup> Yojque uyaje in omenten pa quinahuatilosquiaya Juan inon hual Jesús quinmilic. Cuaquinon inminyampa in míac lacames pehuaya Jesús quinlaquetzili quinami Juan quichijchihuilic Jesús iojli, quinmilic:

—Nepa in tonalijmes anquisani ca capic amaqui chantiaya. ¿Aqui anquijtuni pampa anyahuiaya anquita? ¿Anquisani pa anquitasquiaya se lalac hual momajtc quijtuc len Dios quinequiaya pa quijtusquiaya, se lalac hual quijtuc len quinequiloaya lacames? No, Juan amo quinami inon, yihual amo quinami se acal hual in ijyecal quiculinía. <sup>25</sup> Cuaquín ¿len anquisani anquita? ¿Anquisani pa anquitasquiaya se lalac lalaquentili ca tzotzomajli cualtichin? Xiquitacan. Yehuanten hual molaquentilo ca tzotzomajli cualtichin cate capa chantilo in huejueyenten huan in huejueyenten quinchihuililo cuali huan quipialo miac hual cuajcuali. Juan amo quinami inon. <sup>26</sup> Cuaquinon ¿len anquisani anquita? ¿Anquisani pa anquitasquiaya se ilajtuni Dios? Jo quema, annimitzilía. Huan yihual amo yec jan se ilajtuni Dios san. <sup>27</sup> Unca pampa yoje unca lajcuiluli in hual Dios quijtuc pampa yihual Juan yahuiaya nejchihuilía, quil:

Xiquita, nimitzlaicanaltilía nolanahuatini pa yihual mijchijchihuilis mo'ojli moixpan,

pa mitziximatisqui yehuanten hual niquinlajtultic.

<sup>28</sup> Annimitzilía inon. Ca moxtin lacames hual quinlacatiltije lacames huan sihuames, amo unca se hual ajsic yec hué quinami Juan Lacuayatequini unca hué. Ma yoje, yihual Juan amo niman hué quinami unca hué in niman tipichin hual unca ca yehuanten hual cate capa Dios huelitía. <sup>29</sup> Huan pa innojen tonalijmes quiman moxtin quicaquiloaya Juan, jo quema, quicaquiloaya in yehuanten hual quipixcalo tomin pa yehuanten hual huelitilo, cuaquín yehuanten quimacahuiltijque pa quincuayatequis Juan. Quipalajque inminyolo pa lajnamiquilosquiaya quinami Dios quinequi. Yoje lanextilijque pampa Dios quinchihuilía seise jan yoje quinami quinchihuilía in oc sequin. Huan yehuanten quineltocajque Juan ilamaxtilisli. <sup>30</sup> Ma yoje, in fariseos huan yehuanten hual quimaxtilo in lajtol amo quimacahuiltijque pa quincuayatequis Juan. Yoje lanextilijque pampa amo quineltocajque Dios. Quichihuilijque pa camo quinpalehuisquiaya ilajtol Dios, amo quipalajque inminyolo pa lajnamiquilosquiaya quinami Dios quinequi.

<sup>31</sup> Jesús quilic:

—¿Quinami cate yehuanten hual yulticate axan? <sup>32</sup> Lachihualo quinami xolomes hual molalilo pa mahuiltisi. Quintzajtzilijtcate yehuanten hual mahuiltilo ca yehuanten, quinmilijtcate: “Ticnequiloaya timahuiltilo quinami quiman monamictilo. Antimijtzotzonilije huan amo annijtotic. Cuaquín ticnequiloaya timahuiltilo quinami quilalpachulo se mijquil, titzajtziye quinami techcocujtataya toyolo huan amo anchocac.” <sup>33</sup> Yehuanten hual yulticate axan cate quinami in xolomes pampa amo quimatilo len quinequilo. Amo quixtocalo len yes hual Dios quinequi quinmaca. Juan amo lacuani huan amo cunini iayo uva coc quinami amhuanten anlacualo huan ancuni huan anquijtuni: “Yihual quipía se ijyecal amo cuali.” <sup>34</sup> Huan nehual ilacal in cielo, nel niunca nicán, nilacua huan nilauni quinami moxtin, huan anquijtúa: “Xiquitacan. Nepa unca se lacuani, unca se launini. Quinequi pa cayasi ca yihual yehuanten hual quipixcalo tomin pa yehuanten hual huelitilo. Quinequi pa cayasi ca yihual yehuanten hual lajlaculi.” <sup>35</sup> Ma yoje —quinmilic Jesús—, moxtin hual quimatilo, yehuanten quimatilo ilajmatilisli Dios, in hual tiquinlaquetzililo yehuanten Juan huan nehual. Yehuanten quineltocalo huan quilasojlalo in lajmatilisli.



<sup>36</sup> Huan cataya se fariseo quihuicac Jesús pa ichan pa lacuas ca yihual. Calaquic Jesús icalí in fariseo, molalic pa in lacualisli. <sup>37</sup> Cataya se sihual yu-liaya pin caltilan, se sihual laijlaculi. Yihual quimatic pampa lacuaya Jesús pa ichan in fariseo. Huan in sihual quihualicac se tapalquita lachijchihuali ca tixcali itoca alabastro. In tapalquita cataya tentica ca len hual ajuíac, itoca mirra. <sup>38</sup> Huan in sihual ajsic moquetzac pa icxihuaajmes Jesús, chocaya huan ixicac ichoquis pani icxihuaajmes Jesús, pehuac quinpaltilic icxihuaajmes. Cuaquín in sihual quinquhuactic icxihuaajmes Jesús ca itzondi, huan pehuaya quindenamiqui icxihuaajmes, quinxahuiliaya ca in mirra. <sup>39</sup> Quitac inon in fariseo hual quihuicac Jesús pa ichan, huan quijtuc laijtíc yihual, mollic: “Sinda in se yec se ilajtuni Dios, yoje quimatiaya aquí unca in sihual hual quimatocia. Quimatiaya quinami yihual unca, yihual se sihual laijlaculi.”

<sup>40</sup> Huan Jesús quilic in fariseo:

—Simón —quilic—, nicpía len pa nimitzilis.

Huan Simón quilic:

—Xichili, Lamaxtini.

<sup>41</sup> Jesús quilic:

—Cataloaya ome lacames quihuiquililoaya tomin se telanehuini. Se quihuiquililoaya quinientos denarios tomin, in oc se quihuiquililoaya cincuenta. <sup>42</sup> Pampa amo quipiaje in omenten nindeno calica quilaxlahuilosquiaya in telanehuini quinpuppuhuac pa camo quipialosquiaya pa quilaxlahuilosquiaya in tomin hual quihuiquililoaya. ¿Calía in omenten tehuiquilinijmes tiquijtúa yahuiaya quilasoja niman míac in telanehuini huan calía amo yoje míac?

<sup>43</sup> In fariseo quinanquilic:

—Niquijtúa in se hual quipuppuhuac hual quihuiquililoaya in míac tomin, yihual yahuiaya quilasoja niman míac.

Jesús quinanquilic:

—Tilananquilic cuali.

<sup>44</sup> Cuaquinon momalinac Jesús ca in sihual huan quilic Simón:

—¿Tiquita in sihual, Simón? Nicalaquic mochan huan tehual amo tichmacac al pa niqinpacasquiaya nocxihuaajmes. Huan yihual nechpaltilic nocxihuaajmes ca ichoquis iixtololojmes huan quinquhuactic ca itzondi. <sup>45</sup> Amo tichtenamiquic pa tichpialtisquiaya, huan yihual quiman calaquic pehuaya quindenamiqui nocxihuaajmes huan amo mocahuac quichíac. <sup>46</sup> Amo tijxahuilic notzontecon ca chahuac, huan yihual quinxahuilía nocxihuaajmes ca mirra. <sup>47</sup> Pampín nimitzilía, Dios quipuppuhua ilaijlaculisli hual unca míac. Quipuppuhua pampa yihual nechlasojlac míac. Yihual hual Dios quipuppuhua hual amo quipía míac laijlaculisli, yihual quilasoja Dios jan nadita san.

<sup>48</sup> Cuaquinon Jesús quilic in sihual, quilic:

—Nicpupúa molaijlaculisli.

<sup>49</sup> Cuaquinon pehualoaya moililo laijtíc inminyolo yehuanten hual cataloaya pa in lacualisli ca yihual, moilije: “¿Aquí inon hual quijtúa unca iyaxca pa quipuppuhuas laijlaculisli?”

<sup>50</sup> Jesús quilic in sihual:

—Tiuñca laquixtili pin ipolehuilisli molaijlaculisli pampa tilaneltocac. Ximohuica cuali, xicmati pampa Dios mijchihuilic cuali.

## 8

*Sihuames hual quipalehuiloaya Jesús*

<sup>1</sup> Panuc inon, cantiahuiaya ojli Jesús pa se caltilan huan pa oc se caltilan huan pa se calería pa yasquiaya pa oc se calería. Lanahuatijinemiaya ca Dios ilanahuatilisli, quinlamachiltitinemiaya moxtin ilamachiltilisli cuali hual unca quinami Dios huelitía. Uyaje ca yihual in doce imonextiliniyimes <sup>2</sup> huan sequin sihuames. In sihuames Jesús quinpajtilic inminocolisli huan quinquixtilic iyecames amo cuajcuali. Cataya María hual yulini pa in caltilan Magdala, quisaje pa yihual chicome iyecames amo cuajcuali. <sup>3</sup> Noje cataya ca yehuanten Juana isihua Chuza. In Chuza yec se itequipanujquil hué in hué Herodes. Noje cataya Susana huan cataloaya míac oc sequin sihuames. In sihuames quinpalehuiloaya moxtin ca inmintomin huan ca in hual quicuaje.

*Laijnamiqutilisli in latocani**(Mt. 13:1-9; Mr. 4:1-9)*

<sup>4</sup> Huan monechiculoaya míac, quistihualaloaya pa mochi caltilan ca capic yihual cataya. Huan yihual quinlaquetziloc ca se lapuhualisli quinami laijnamiqutilisli pa quinmaxtisqueiaya, quinmilic:

<sup>5</sup> —Quisac se latocani pa quitocasquiaya ilatocli. Quixintiahuiaya, sequin latocli huetzije pa itenco in ojrito huan cataloaya latelicsali huan in tutomes quincuaje. <sup>6</sup> Huetziaaya oc sequin latocli pan in xaltel, ixuaje in latocli huan jan ajnaxcan pilinije pampa amo cataya lapaltijcal. <sup>7</sup> Huetzije oc sequin latocli lajco pin huiztilan, moscaltiloaya in huizli capa ixualoaya in ipacholimes in latocli huan in pacholimes mosaluje pin huiztilan huan miquije. <sup>8</sup> Huetzije oc sequin latocli pan lali cuali huan moscaltije huan temacaje míac laquilyo, cien pa se latocli hual quixinic in latocani.

Lamic quinmilic Jesús in laijnamiqutilisli, quintzajtzilic:

—Aqui yes hual quinpía inacajmes pa lacaquis, ma lacaqui pampa etic pa quimatis se len quinequi quijtúa.

*¿Leca quinmilía innojen laijnamiqutilisli?**(Mt. 13:10-17; Mr. 4:10-12)*

<sup>9</sup> Cuaquinon pehuaje quilajlanije imonextiliniyimes len quinequiaya quijtu in laijnamiqutilisli, in lapuhualisli calica yihual quinmaxtiaya, cataya lamaxtilisli lalatili. <sup>10</sup> Huan Jesús quinmilic:

—Amhuanten anmitzmacahuilítia Dios pa anquimatis innojen lajtomes hual anmitznextilia quinami yihual huelitía, innojen hual jan tehuanten ticmatilo san. Huan in oc sequin niquinlaquetzilía ilajtol Dios ca lai-jnamiqutilisli ca lamaxtilisli lalatili. Yoje, mas que quizticate, Dios quinchihuilía pa camo quitasi len quinequi quijtúa. Noje, mas que quicacticate, Dios quinchihuilía pa camo ajsisi quimatisi len quinequi quijtúa.

*Jesús quinmilía len quinequi quijtúa in laijnamiqutilisli**(Mt. 13:18-23; Mr. 4:13-20)*

<sup>11</sup> Inon unca hual quinequi quijtúa in laijnamiqutilisli: <sup>12</sup> In latocli unca ilajtol Dios. In latocli pa itenco in ojrito cate quinami aquinojen hual quicaquilo ilajtol Dios, cuaquin huala in lili, quinquixtilía in lajtol pa laijit inminyolo capa ayamo quineltocaje. In lili quichíac inon pa camo yelosquiaya laquixtili pin ipolehuilisli inminlaijlaculisli sinda quinequi-loaya quineltocalo. <sup>13</sup> In latocli pin lali amo telahuac pan ipampa in xaltel cate quinami yehuanten hual quicaquilo ilajtol huan quineltocalo ca paquilisli. Ma yoje, amo quilalilo in lajtol pa inminyolo quinami se

ilalhuayol se cuahuil. Quineltocalo san se nadita, huan sinda quipialo pa panusi lacocoltilisli pampa quineltocalo in lajtol, cuaquinon mijcuanilo, yajmo quixtocalo in lajtol. <sup>14</sup> In latocli hual huetzije pin huiztilan, yehuanten cate quinami lacames hual quicaquije in lajtol huan quijnamiquilo niman míac in quinami yalo yulilo ca paquilisli. Yoje ca yehuanten ilajtol Dios amo moscaltía pa inminyolo, unca quinami se pacholi tzinlalajquil hual moscaltía pin lali, amo quiman yucsi. <sup>15</sup> Huan in latocli hual huetzije pin lali cuali, yehuanten cate quinami lacames hual quicaquilo ilajtol Dios huan monextililo cuali pa camo quilcahuasi. Huan in lajtol quinchihuilía pa quichijtiasi len cuali, amo siahuilo pa yulisi quichijtcate yoje.

### *Ilanextilisli in tapalquita calica lahuilo*

(Mr. 4:21-25)

<sup>16</sup> Huan amaquí quitzacua se tapalquita calica lahuilo ca oc se tapalcal sinda quilalaltía. Huan amo quilalía itzindan se lapexli. Quema, quilalía capa mocahuas nestica pa quínlahuis yehuanten hual calacticate pin cali. <sup>17</sup> Annimitzilía inon pampa amo unca nindeno lalatali hual amo yes laitali. Jo quema, mochi hual amo quimatilo, inon quimatisi se tonali. <sup>18</sup> Pampín xilaiztiacan quinami annehcaquí, xichcaquican cuali. Sinda annehcaquí cuali, anmonextilis niman míac in hual unca pa ilajtol Dios. Huan sinda amo annehcaquí cuali, Dios anmitzquixtilis in hual anquijtúa pampa anmonextilic pan ipampa ilajtol.

### *Inantzin huan icnían Jesús*

(Mt. 12:46-50; Mr. 3:31-35)

<sup>19</sup> Cuaquinon hualaje inantzin huan icnían Jesús ca yihual, huan amo huil ajsije capa yihual pampa cataloaya míac hual quiyahualuloaya Jesús. <sup>20</sup> Pampín quilamachiltijque Jesús, quilijque:  
—Moqueztcate pa quiahuac monantzin huan mocnían quinecticate mitzitalo.

<sup>21</sup> Huan yihual quinnanquilic yehuanten, quinmilic:

—Nonantzin huan nocnían cate yehuanten hual quicaquilo ilajtol Dios huan quichihualo in hual quijtúa.

### *Jesús quisehuía in ijyecal huan in al huejcalan*

(Mt. 8:23-27; Mr. 4:35-41)

<sup>22</sup> Cataya pan se tonali quiman panuloaya mochi innojen, calaquíaya Jesús pa lajco in al huejcalan ca se barquito. Huan imonextiliniñmes cataloaya ca yihual. Yihual quinmilic:

—Ma ticpanahuican in al huejcalan ca yoje itenco (pa analco).

Yoje quipanañtíaje. <sup>23</sup> Huan uyañtíaje ca in barquito, cochic Jesús. Cuaquín quinmajsic se ijyecal chicahuac lajco capa yahuiluloaya pin al huejcalan. Pehuaya calaqui al pin barquito, peñtiahuiaya temi huan ca nadita yahuiaya moatocti. <sup>24</sup> Quejxiltitiquisajque Jesús, quitzajtzilijtataloaya:

—¡Lamaxtini, Lamaxtini! ¡Tipolehuisi!

Ejsac Jesús, cajuac in ijyecal huan in al hual majcoctataya, yojque mosehuic, mocahuac jan sepa in al huejcalan. <sup>25</sup> Cuaquinon Jesús quinmilic:

—¿Leca anmomajtíc? ¿Leca amo anquimati anquilalía anmolaneltocalisli ca nehual?

Cuaquín momajtiloaya yehuanten, amo huil mocahualoaya pa quijtu-losquiaya pa inminyolo pampa quipiaya Jesús lahuelilitisli hué. Huan moñiloaya se ca oc se:

—¿Len yes in lalcal? Yihual quinmajua in ijyecal huan in al, huan quinel-tocalo.

*In lalcal hual quiapiaya in ijyecal amo cuali*  
(Mt. 8:28-34; Mr. 5:1-20)

<sup>26</sup> Cuaquinon acsijque pa yoje itenco (analco) in al huejcalan. Nepa cataya inminlali in lacames gerasatecos. Nepa pa itenco in al huejcalan huil moitaya in lalticpan Galilea ca yoje itenco (analco) umpa capa hualajque. <sup>27</sup> Quisac Jesús pin barquito pan itenco in al. Cuaquinon quinamiquic se lalcal hual yulini pin caltilan, quinpiaya ijyecames amo cuajcuali. Quiapiaya míac xixihuil amo molaquentiaya ca inahuas, huan amo quinequiaya chanti pa se cali. Chantiaya pin cuevas (ostumes) hual quinchihuaque pa lajlajtic. Nepa quinlalilosquiaya inminmijquimes. <sup>28</sup> Huan jan axcan yihual quitac Jesús, quitzajtzilic, huetzic quimolancuacuetziliztataya, huan ca lajtol chichahuac quilic:

—¡Xiquisa huan xichcahua, Jesús, tehual ti'ixolol in Dios hual chanti niman pa pani pin cielo! ¡Nimitzilía ca noyolo, amo xichcocolti!

<sup>29</sup> Tzajtzc yoje in ijyecal amo cuali, pampa Jesús quinmiliaya in ijyecalera pa quisalosquiaya ilajtic in lalcal. Quimpiaya míac xixihuimes in ijyecal pehuac quiquitzquic chichahuac in lalcal. Lacames quilpililoaya imajmajuan huan icxihuaimes ca teposli, yojque quipialoaya. Ma yoje, yihual quincotonaya in teposli huan in ijyecal amo cuali quilaluxtiaya ca capic amaqui chantiaya. <sup>30</sup> Huan Jesús quilajlanic:

—¿Quinami timotoca?

Huan in ijyecal quinanquilic:

—Nimotoca Legión.

Legión quinequi quijtúa míac, pampa calaquijque míac ijyecames amo cuajcuali pa lajtic in lalcal. <sup>31</sup> Huan innojen ijyecames pehuaje quitemachijque Jesús ca mochi inminyolo pa camo quintilansquiaya pa capa Dios yahui quintzacua, capa amo quiman huil quisalosquiaya. <sup>32</sup> Huan nepa cataya niman míac coyamimes (cuchis), lacuajtaloaya pan in loma (tepel). In ijyecames quitemachijque Jesús pa quinmacahuiltisquiaya calaquilo ca lajtic innojen coyamimes. <sup>33</sup> Yojque quinmacahuiltic. Cuaquín quisajque in ijyecames pin lalcal, calaquijque ca lajtic innojen coyamimes. Molalujtiquisajque in coyamimes pa iixlán in loma pa temuán (temuayan), molasajque pa in al huejcalan huan moatoctijque. <sup>34</sup> Quitajque len panuc yehuanten hual quinmiztaloaya in coyamimes. Pampín cholujque huan quilamachiltijque pin caltilan huan pin calerías itenco in caltilan inon hual panuc. <sup>35</sup> Cuaquinon quisajque yehuanten pa quitalosquiaya len panuc, hualajque capa cataya Jesús huan in lalcal huan nepa quitaje molalijtataya in lalcal. Axcan quisajque pa yihual in ijyecames, axcan cataya lalaquentili ca inahuas. Yajmo tzajtztinemiaya quinami se hual amo quijnamiquía, huan yajmo cualantiniemiaya, nepa cataya molalijtataya pa icxihuaimes Jesús. Pampín momajtiloaya in lacames. <sup>36</sup> Huan yehuanten hual quitajque len panuc quinlamachiltijque quinami cataya lapajtili in lalcal hual in ijyecames quiquitzquinijme. <sup>37</sup> Cuaquinon moxtin yehuanten pa inminlali in gerasatecos quitemachijque Jesús pa mohuicasquiaya quistataya pa inminlali yehuanten, pampa momajtiloaya. Yojque uyac pa calaquisquiaya Jesús pin barquito pa mocuepas. <sup>38</sup> Huan in lalcal hual capa yihual quisajque in ijyecames quitemachic Jesús pa quimacahuiltis pa cayasquiaya ca yihual. Ma yoje, Jesús quitalanic pa yasquiaya, quilic:

39 —Ximocuepa pa mochan huan xiquinpuhuili mochi hual mijchihuilic Dios.

Huan yihual mohuicaya pa mochi caltilan lamachiltinemiaya mochi hual quichihuilic Jesús.

*Jesús quipajtía se sihual huan quiyuliltía ixól sihual Jairo*

(Mt. 9:18-26; Mr. 5:21-43)

40 Cuaquinon Jesús mocuepac pa yoje itenco (analco) in al huejcalan pin lalticpan Galilea. Nepa quinamiquijque míac lalalera, pampa moxtin quichialoaya. 41 Huan umpa, xiquitacan, hualac se lalac itocaya Jairo, yihual yec se ihué in tiopan. Yihual molasac ilaixpan Jesús pa icxihuajmes, quitemachiaya pa yasquiaya pa ichan. 42 Quipiaya se xolol sihual, quil, quinpiaya majlaclihuanome (doce) xixihuil, huan yahuiaya polehui, quil, huan in Jairo amo quiapiaya oc se xolol. Huan yahuiyoaya in míac lalalera cajstiahuiyoaya inahuac Jesús. 43 Yahuiaya ca yehuanten se sihual hual quinpiaya doce xixihuil pehuaya quicocu se cocolisli hual iesli quisaya. Quinlaxlahuiaya sejpa huan oc sejpa in lapajtinijmes huan axan yajmo quicahuilic se tomin. Amo huil quipajtijque in lapajtinijmes, amo jan se ca yehuanten. 44 Yoje ajsic pa Jesús itepotzcon, quimatocac itenco inahuas. Huan jan ajnaxcan mocahuac iesli in sihual, yajmo quisaya. 45 Cuaquinon Jesús quijtuc:

—¿Aqui nechmatocac?

Quilijque moxtin pampa no, amo quimatocajque. Huan Pedro quilic:

—Lamaxtini, mitzajstitalo monahuac in lalalera, yehuanten mijchihuic. ¿Leca tilajlanía: “Aqui nechmatocac”?

46 Jesús quilic:

—Nechmatocac se. Nicmati inon, pampa quisac pa nehual nolahuelitlisli calica nitepajtía.

47 Yojque quimatic in sihual amo huil quimolatic Jesús. Yuyucatihualac, huetzic ilaixpan, quilamachiltic Jesús inminlaixpan moxtin leca yihual quimatocac huan quilic quinami pajtic jan ajnaxcan. 48 Cuaquin Jesús quilic:

—Nito, tipajtic pampa tilaneltocac. Ximohuica, xicaya jan cuali ca Dios.

49 Ayamo laquisac lajtuc Jesús huan hualac se hual cataya pa icali Jairo, quilic:

—Axcan polehuic moxolol sihual. Yajmo xicmaca tequil in lamaxtini.

50 Ma yoje, inon quicaquic Jesús, huan quilic:

—Amo ximomajti, Jairo, jan xilaneltoaca san, huan moxolol yes lapajtili.

51 Cuaquinon uyac pa ichan Jairo, huan amo quimacahuiltic pa calaquilosquiaya ca yihual oc sequin, jan Pedro huan Juan huan Jacobo huan itajtzin in xolol sihual huan inantzin san. 52 Chocaloaya huan tzajtziloaya moxtin, motecuililoaya inminlaixpan itzindan in huajcol pampa polehuic in xolol, quincocuhuaya inminyolo. Ma yoje, Jesús quinmilic:

53 —Amo xichocacan. Amo polehuic in xól, jan coxtica san.

Yehuanten quihuitzquilijque Jesús pampa quimatiloaya in xolol yajmo yultataya. 54 Ma yoje, Jesús quinquitzquic imajmajuan in xolol, quilic ca lajtol chichahuac:

—Muachita, ximoquetza.

55 Jan ajnaxcan mocuepac iyulilislai lajtuc yihual iyolo huan moquetzac. Cuaquin Jesús quinmilic pa quilacualtilosquiaya. 56 Yoje mocahualoaya

moizticate ca lamajtilisli itajtitzían. Ma yoje, Jesús quinmilic pa camo quillosquiaya amaqui len panuc.

## 9

### *Jesús quintilanía in doce imonextiliniymes pa oc sequin caltilan* (Mt. 10:5-15; Mr. 6:7-13)

<sup>1</sup> Cuaquinon quinahuatic Jesús pa monechiculosquiaya capa yihual in doce imonextiliniymes. Quinmacac lahuellitlisli pa yes inminyaxca pa quinquixtilisli lacames ijyecames amo cuajcuali. Quinmacac in lahuellitlisli pa quinpajtilosquiaya aquinojen hual quipialoaya len yes cocolisli.

<sup>2</sup> Cuaquinon quintilaníc pa quilamachiltilosquiaya cajcapa yes inminlaixpan lacames quinami Dios huelitía, huan quinmilic pa quinpajtilosquiaya.

<sup>3</sup> Quinmilic:

—Amo xiquihucacan nindeno pa anmo'ojli, amo xiquihucacan cuahuil pa anmopalehuis annejnemis, amo xiquihucacan xotopa huan len pa anquicuas huan tomin. Huan xiquihucacan jan se laquen san, sejse huan sejse ca amhuanten. <sup>4</sup> Huan ancalaquis pa ichan se hual anmitznotzas pa anmocahuas, cuaquín napa xichantican anquistía mojmosta pa napa pa anquilamachiltitinemis quinami Dios huelitía. <sup>5</sup> Huan sinda yehuanten anmiztojtocasi pampa amo quixtocalo nolamachiltitlisli cuali, cuaquín quiman anquisas pa in caltilan, xictzejtzeluilican in lalpotocli hual salijtica pan anmolacsames. Yoje momatis pampa in lacames anmijchihuilic len niman amo cuali.

<sup>6</sup> Cuaquinon mohuicajque Jesús ilanahuatinijmes, yahuloaya pa míac caltilan tijtipichin sejse huan sejse, quinlamachiltitinemiloaya ilamachiltisli cuali Jesús huan quinpajtitinemiloaya cocoxquimes.

### *Herodes quimahuilía da unca Jesús o amo unca* (Mt. 14:1-12; Mr. 6:14-29)

<sup>7</sup> Huan quicaquic Herodes in hué quinami molaquetzilizitinemiloaya lacames, molaquetzilizitinemiloaya mochi hual quichihuaya Jesús. Pampín amo quimatiaya len quijtusquiaya Herodes pampa quijtuloaya sequin pampa Juan Lacuayatequini axcan yuliaya oc sejsa, quisac pa capa in mijquimes. <sup>8</sup> Huan quijtuloaya oc sequin pampa Elías ilajtuni Dios, ilajtuni hual yulini pa yina, axcan mocuepac pan lalticpan. Oc sequin quijtuloaya pampa yuliaya oc sejsa oc se ilajtuni Dios hual yulini pa yina quinami yulinijme innojen ilajtuniymes Dios hual quitequipanulinijme pa yina.

<sup>9</sup> Huan Herodes quilic:

—Nehual nilatilaníc pa quicotonilisqui Juan iquixlan. Axcan, ¿aqui in se hual mojmosta nicmaztica len quichijtica?

Huan pehuaya qitemu Herodes quinami quitasquiaya Jesús.

### *Jesús quinlacualtía macuili mil lacames* (Mt. 14:13-21; Mr. 6:30-44; Jn. 6:1-14)

<sup>10</sup> Ajsic in tonali quiman mocuepajque ilanahuatinijmes Jesús, quipuhuilijque mochi sejse lachihualisli hual quichihuajque. Cuaquín quinhuicac Jesús ca yihual, huan mohuicajque. Uyajque ajsijque capa cataloaya inminhuán capa amo huejca cataya se caltilan itocaya Betsaida. <sup>11</sup> Ma yoje, quimatijque in míac lacames ca capic uyac Jesús, pampín quitocajque. Ajsijque yehuanten, quinpialtic cuali Jesús huan pehuac quinlaquetzilic pa quimatilosquiaya quinami Dios huelitía. Huan quinpajtic yehuanten hual

quipialoaya cocolisli. <sup>12</sup> Cuaquinon pehuac tiolactic, huan hualajque in doce ilanahuatinijmes, quinmilic:

—Xiquintilani in lalacera pa yasi pa innojen caltilan tijtipichin huan in calerías pa totenco. Yojque quitasi capa huil cochisi pa layúa huan quitasi len quicuasi. Amo unca nindeno nican pampa ticate nican capa amaqui chantitica.

<sup>13</sup> Huan Jesús quinmilic:

—Amhuanten xiquinmacacan len quicuasi.

Huan yehuanten quilijque:

—Amo ticpialo nindeno, jan ticpialo macuili panes huan ome michimes. Sinda ticnequilo ticanalo oc sequin, cuaquín ticpiasi pa tiasi tiquincuhuilisi len pa quicuasi moxtin.

<sup>14</sup> Cataya quinami macuili mil lacames. Cuaquín Jesús quinmilic ilanahuatinijmes, quinmilic:

—Xiquinmilican pa molalisi monechicujticate quinami cincuenta huan cincuenta lacames.

<sup>15</sup> Yojque quichihujque, quinchihuilijque pa molalilosquiaya, quinmolaliltijque moxtin. <sup>16</sup> Cuaquinon quinmanac Jesús in macuili panes huan in ome michimes, lachíac pa in cielo (ilhuicac), quisehuic Dios, pehuac quincapahuac ca lajlajco in panes huan in michimes, quinmacatinemiaya imonextilinijmes pa yehuanten quinhuiquilijtinemilosquiaya in lalacera.

<sup>17</sup> Yojque lacualoaya in lalacera, pachihuijque moxtin. Huan quinpepenajque imonextilinijmes in lajlajco lacapehualí hual quincahuajque, cataloaya doce chiquihuimes tentataloaya ca innojen pa yehuanten.

*Pedro quijtúa pampa Jesús unca in Cristo*

(Mt. 16:13-19; Mr. 8:27-29)

<sup>18</sup> Cataya se tonali Jesús quilajlaniaya Dios, huan umpa cataloaya ca yihual jan imonextilinijmes san. Huan Jesús quinlajlanic:

—Molaquetzilijticate lacames nonahuac nehual, ¿aqui quijtulo pampa nehual niunca?

<sup>19</sup> Quinanquilijque:

—Sequin quijtulo pampa tehual tiunca Juan Lacuayatequini. Oc sequin quijtulo pampa tehual tiElías ilajtuni Dios. Huan oc sequin quijtulo tehual tiunca se ilajtuni Dios hual yulini pa yina huan axan yultica oc sepa.

Cuaquinon Jesús quinmilic:

—Huan amhuanten, ¿aqui anquijtúa pampa nehual niunca?

<sup>20</sup> Huan Pedro quinanquilic:

—Tehual tiunca iCristo Dios.

*Jesús quinlamachiltúa pampa yahui miqui*

(Mt. 16:20-28; Mr. 8:30-9:1)

<sup>21</sup> Cuaquinon quinmilic chicahuac Jesús pa como quililosquiaya amaqui inon, quinmilic:

<sup>22</sup> —Nehual ilacal in cielo nicpiás pa nipanus míac lacocoltilisli. In hueyenten huan in tiopistas huejué huan in lamaxtinijmes nejchihuilisi pa nipanus inon, nechtojpehuasqui. Yehuanten quilalisi pa quichihuasi se lajtulisli pa nechquitzquisi, cuaquinon nechmictisi. Ma yoje, quiman panusi ye tonalijmes, cuaquín niyulis oc sepa.

<sup>23</sup> Cuaquinon quinnotzac Jesús mochi in lacames, quinmilic:

—Sinda se quinequi ye nomonextilini, ma como yuli quichijtica len yihual quinequi. Quipía pa yulis quichijtica len quinequi Dios. Huan ma quimati mojmosta pampa quipía pa panus lacocoltilisli sinda nechtocatías, quinami

nehual nipanus lacocoltilisli. <sup>24</sup> In annimitzilía pampa sinda yuli se quitemujtinemi quinami canas mochi len calica huil mopaquiltis nican capa yultica pan lalticpan, cuaquín Dios amo quimacac in se in yulilislí hual jan quipía Dios san pa quimacac yihual. Huan sinda se yuli quitemujtinemi quinami quichías mochi quinami nehual nicnequi, huan sinda amo quimonotzilía nindeno inon hual unca pin lalticpan calica huil mopaquiltía, cuaquín Dios quimacac in se in yulilislí hual amo quiman lamis. <sup>25</sup> ¿Quinami quipalehuis se lalac sinda canas mochi hual unca pin lalticpan calica mopaquiltis huan cuaquín polehuis? Amo quipalehuis nindeno sinda amo quipías in yulilislí calica Dios quinequi quiyuliltía. <sup>26</sup> Pampín, aquí yes hual pinahua nonahuac nehual huan len niqijtúa, yoje nehual ilalac in cielo nipinahuas inahuac in se. Quema, nehual nipinahuas inahuac in se pa in tonali quiman nihualas ca laixpelalislí cualtichin pan lalticpan ca míac nochicahualislí nehual huan ichicahualislí noTajtzin huan inminchicahualislí in lanahuatinijmes pin cielo hual techtequipanuililo yihual huan nehual. <sup>27</sup> Huan neli annimitzilía. Sequin hual nican moqueztcate neli yulisi pa quitasi quinami cayas pa in tonali hual Dios huelitía pan lalticpan.

### *Jesús nesi laixpelatica*

(Mt. 17:1-8; Mr. 9:2-8)

<sup>28</sup> Quiman lamis quinmilic Jesús in lajtomes, panuje quinami chicué tonalijmes, huan quinhuicac Pedro huan Juan huan Jacobo, panquisaje pan se loma (tepel) pa nepa Jesús quilajlanisquiaya Dios. <sup>29</sup> Huan quiman lajlantataya yihual, mopalac iixco ca oc se lanextilislí. Itzotzomajli nesaiya iztatataya, laixpelataya chichahuac. <sup>30</sup> Huan moitilijque ome lacames laquetzataloaya ca yihual. Yehuanten cataloaya Moisés huan Elías ilajtunijmes Dios hual yulinijme pa yina. <sup>31</sup> Yehuanten noje moitaloaya laixpelatataloaya, ca Jesús molaquetzililoaya quinami quipiaya pa miquisquiaya Jesús pa Jerusalén. <sup>32</sup> Quipialoaya míac cochilislí Pedro huan in oc sequin imonextiliniijmes. Ma yoje, ejsatiquisajque huan quitajque ilaixpelalislí chichahuac Jesús. Noje quinmitaje in omenten hual moquezataloaya ca yihual. <sup>33</sup> Cataloaya mijcuanataloaya in omenten capa Jesús moquezataloaya, huan Pedro quilic:

—Lamaxtini, unca cuali pampa ticate nican. Ma tiqinchihuacan ye calitos, se pa tehual huan se pa Moisés huan se pa Elías.

Amo quimatiaya Pedro len quiliaya. <sup>34</sup> Ma yoje, quijtatataya inon, hualac se mextemil, quintzacuac. Huan momajtijque quiman quintzacuac in mextemil. <sup>35</sup> Cuaquinon mocaquic se lajtol quistataya pin mextemil, quijtuc:

—In noxolol hual niclasojla míac. Xicayacan anquicactica len yes quijtúa.

<sup>36</sup> Quiman lamis mocaquic in lajtol, jan moitilic Jesús ihuían san. Huan yehuanten amo nahuatijque nindeno pa innojen tonalijmes, amo quilamachiltijque amaqui in hual quitaje.

### *Jesús quiquixtilía se ijyecal amo cuali se muachito*

(Mt. 17:14-21; Mr. 9:14-29)

<sup>37</sup> Cataya mostatica quiman temujque pani in loma (tepel), quinamiquijque Jesús se lalacera. <sup>38</sup> Huan se lalac ca yehuanten quinotzac Jesús chichahuac, quilic:

—Lamaxtini, nicnequi pa tijchihuilis se cuali. Xichitili noxól, pampa jan in se san nicpía. <sup>39</sup> Huan ¡xiquita! Se ijyecal cana huan jan ajnaxcan quilatzatziltía, quitzejtzélúa, cuaquín quisa posunquil pa icamac huan quicahuilía



aniles, quixacualúa, amo quinequi quimacahua. <sup>40</sup> Huan niquintemachic momonextilinjmes pa quiquixtililosquiaya, huan amo huil quiquixtilije.

<sup>41</sup> Jesús quinanquilic:

—¡Amhuanten hual anyultica axan! ¡Amo anlaneltocha, anmitzmalinilic in lili anmoyolo pa se ojli amo cuali! ¿Quichi tonalijmes nicpías pa nicayas ca amhuanten? ¿Quichi tonalijmes nicpías pa niqitasocolisli pa noyolo pampa amo annechneltocha? Xichualiquili moxól nican.

<sup>42</sup> Huan quihualiquilijtataya itajtzin, in ijyecal canac in xolol, quitzejtzuluc niman chichahuac, quimayajtiquisac. Jan axcan Jesús cajcajuac in ijyecal amo cuali huan quipajtic in xolol, cuaquinon quicuepilic in xolol itajtzin.

<sup>43</sup> Pampín mocahualoaya moiztataloaya in lacames ca lamajtilisli pampa quitajque Dios ilahuelilitlisli hué.

*Jesús quinlamachiltía oc sepa pampa yahui miqui*

(Mt. 17:22-23; Mr. 9:30-32)

Huan quiman moiztataloaya ca lamajtilisli moxtin mochi innojen huejué hual quinchijtataya Jesús, yihual quinmilic imonextilinjmes:

<sup>44</sup>—Xiclalican inon pa anmotzontecon hual annimitzilía: Amo huejcahuas ajsis in tonali quiman nehual ilacal in cielo nechtemacasi ca lacames hual cate Dios ilacocolinjmes.

<sup>45</sup> Ma yoje, yehuanten amo quimatiloaya len quinequiloaya quijtulo in lajtomes, quinmolatililoaya len quinequiloaya quijtulo in lajtomes pa yoje amo quimatilosquiaya yehuanten. Huan momajtiloaya pa quilajlanilosquiaya len quinequiloaya quijtulo in lajtomes.

*¿Aqui unca in hué hual quinlaicanas?*

(Mt. 18:1-5; Mr. 9:33-37)

<sup>46</sup> Huan pehualoaya quinmolaxililo lajtomes yehuanten, laquetzaloaya pa quimatisi calía ca yehuanten yahuiaya ye in lalac hué. <sup>47</sup> Huan Jesús momachiltic inon hual quijtuloaya laijtic inmnyolo. Cuaquinon canac se xolotzindi, quiquetzac inahuac <sup>48</sup> huan quinmilic:

—Se hual quimosehuiltía se xól tipichin pa quichihuilis mochi hual monequi, huan quichía inon pampa quineltoca pampa Dios nechtilanic pin lalticpan, cuaquín yoje in se nechmosehuiltía nehual. Huan aqui yes hual nechmosehuiltía, yoje quimosehuiltía yihual hual nechtilanic pin lalticpan. Yoje, yihual hual unca in niman tipichin ca anmoxtin cayas in niman hué.

*Unca pa tehuanten aqui hual amo tejtzacuilía tehuanten*

(Mr. 9:38-40)

<sup>49</sup> Cuaquinon Juan quilic:

—Lamaxtini, tiquitaje se hual quinquixtiliaya ijyecames in lacames pan ipampa molahuelilitlisli. Huan tiquilije pa camo quichihuasquiaya pampa yihual amo techtocha.

<sup>50</sup> Jesús quilic:

—Amo xiclatzacuilican, pampa aqui yes hual amo tejtzacuilía yoje techpalehuía.

*Jesús quinmajua Jacobo huan Juan*

<sup>51</sup> Ajsitihualaya in tonali hual Dios yahuiaya quilejculti Jesús pin cielo, huan molalilic Jesús pa yas pa Jerusalén huan amaqui huil quitzacuilíaya. <sup>52</sup> Quintilanic lanahuatinijmes pa lamachiltitialesquiaya pampa yihual yahuiaya huala. Cuaquín uyaje in lanahuatinijmes, ajsijque pa se icaltilan

in samaritecos pa quilajlanilosquiaya sinda quipialoaya calijtic capa mocahuasquiaya Jesús. <sup>53</sup> Huan in samaritecos amo quinequiloaya pa ajsis capa yehuanten, pampa yihual yec se judío hual yahuiaya pa Jerusalén. <sup>54</sup> Huan quimantijque inon imonextilinjmes Jacobo huan Juan, yoje quilijque:

—Lamaxtini, ¿ticnequi pa tiquilisi pa temus itixuxli in cielo pa lamis quinchichinus yehuanten? Yoje pa yina quinchihuilic Elías in guaches.

<sup>55</sup> Momalinac Jesús, quinmiztataya Juan huan Jacobo, quinmajuac, quinmilic:

—Ayamo anquimati quinami niquijtúa laijtic nehual. Nehual ilacal in cielo amo nihualaya pa niqinmictisquiaya lacames. Nihualaya pa niqin-quixtilisquiaya pin ipolehuilisli inminlajlaculisli.

<sup>56</sup> Cuaquinon uyaje pa oc se caltilan.

*Ome lacames quinequilo quitocalo Jesús*

*(Mt. 8:19-22)*

<sup>57</sup> Huan nejnentiyahuiloaya pa ojli, se lacal quilic Jesús:

—Tata, nicnequi nimitztoca ca capic yes tías tel.

<sup>58</sup> Jesús quilic:

—Quipiálo in zorras inmincojcoyunki, huan quinpiálo inminchan in tutomes. Huan pa nehual ilacal in cielo amo unca capa nicpía nochan.

<sup>59</sup> Jesús quilic oc se lacal:

—Xichtoca nehual.

Huan yihual quilic:

—Xichmacahuilti pa nías niclaltocas notajtzin. Cuaquín nimitztocas.

<sup>60</sup> Jesús quilic:

—Ma quinlaltocacan inminmijquimes yehuanten hual yulticate mas que pa inminyolo miquije. Huan tehual, xía xiquinlamachilti lacames quinami huelitía Dios.

<sup>61</sup> Oc se lacal quilic Jesús:

—Nimitztocas, Tata. Ma yoje, xinechmacahuilti pa nimochicahuas ca yehuanten pa nochan. Cuaquinon nimitztocas.

<sup>62</sup> Huan Jesús quilic:

—Sinda se pehua laxahua huan sejpa huan oc sejpa lachixtía pa itepotzon, yihual amo monotza pa laxahuas. Noje, sinda se pehua nechtocha huan sejpa huan oc sejpa quijnamictica in hual quixtocaya pin tonalijmes quiman ayamo pehuac nechtochac, cuaquín yihual amo monotza pa cayas capa Dios huelitía.

## 10

*Jesús quintilanía in setenta imonextilinjmes*

<sup>1</sup> Panujque innojen, quinsaluc in Tata Jesús oc sequin setenta, quintilanic oj'ome huan oj'ome pa yalosquiaya pa mochi caltilan capa yihual yahuiaya quinpaxaluili. <sup>2</sup> Huan quinmilic:

—Cate miac hual yalo nechneltochalo huan ticpiálo pa tiquinnechicusi pa pehuas huelitis Dios pa inminyolo. Yoje yes quinami se quipía se cuajmili hué pa lapixcas huan amo quipía miac lacames pa quipalehuisi pa lapixcas. Pampín xictemachican in Teco hual unca Dios pa yihual quin-tijtilantiquisas miac oc sequin lacames pa techpalehuisi ca in lapixcalisli.

<sup>3</sup> Ximohuicacan axan, huan xiquitacan: Annimitztzilantica amhuanten huan anunca quinami borreguitos lajco capa cate coyomes. <sup>4</sup> Amo xiquihuicacan xotopa pa tomin, amo xiquihuicacan xiquipili pa anquihuictías len

anquicuas, amo xiquihuicacan oc sequin ome lacsames. Huan amo xiquin-pialtitiacan in lacames hual anquinnamictias pa ojli. <sup>5</sup> Quiman ancalaquis pan aqui yes icali, xipehuacan ca anquilis: “Xicayacan ca Dios imosehuilisli amhuanten pa in cali.” <sup>6</sup> Huan sinda nepa iteco in cali unca se lalac hual quinequi pa cayas ca Dios imosehuilisli, cuaquinon amhuanten anquimatis, huan yihual cayas ca Dios imosehuilisli. Huan sinda iteco in cali amo quinequi caya ca Dios imosehuilisli, amhuanten anquimatis, huan yihual amo cayas ca Dios imosehuilisli. <sup>7</sup> Huan xichantitiacan san pin cali capa anmitzajxiltisi. Xijcuacan huan xicunican len yes anmitzmacasi, pampa unca iyaxca in tequipanujquil ilaxlahuilisli. Amo ximopalacan pa anchantis pa oc se cali pa in cali capa anpehuac anchantic. <sup>8</sup> Huan calia yes caltilan ancalaquis huan anmitzajxiltis, xijcuacan len yes hual anmitzmacasi pa anquicuas. <sup>9</sup> Xiquinajtican in cocoxquimes, huan xiquinmilican: “Nican ca amhuanten axcan ajstitihualac in tonali quiman Dios huelitia.” <sup>10</sup> Huan pin calia yes caltilan ancalaquis huan amo anmitzajxiltisi xiquisacan pa iojlimes in caltilan, xiquinmilican: <sup>11</sup> “Quema, ilalmoluncal anmocaltilan hual salijtica capa tehuanten antimijtzejteluililo amhuanten. Yoje anquimatis pampa anquichiac len niman amo cuali pampa amo antechajxiltic tehuanten huan amo anquineltocac Dios ilamachiltisli cuali. Jan yoje, xicmatican pampa ajstitihualac in tonali quiman Dios huelitia.” Yoje xiquinmilican. <sup>12</sup> Annimitzilía inon: In tonali hual Dios quintojtocas ilaixpan yihual ipampa inminlajlaculisli yehuanten pin lalticpan pa panusi polehuilisli hual amo quiman lamis, nepa yesi lacocoltili niman miac yehuanten hual yuliloaya pa in caltilan hual amo anmitzajxiltisi. Amo yoje miac yesi lacocoltili yehuanten hual yulinijme pin caltilan hué Sodoma, yehuanten in lacames ej'elehuis hual yulinijme pa yina.

*Innojen caltilan hual amo quineltocajque*  
(Mt. 11:20-24)

<sup>13</sup> Huan iquichi anyahui ancaya lacocoltili, amhuanten hual anyuli pin caltilan Corazín! Huan iquichi anyahui ancaya lacocoltili amhuanten pa Betsaida! Pa amhuanten niquinchiac miac hual anmitzlapolultije huan anmocahuac anmoiztica ca lamajtilisli pampa anquitac Dios ilahuelilitisli. Ma yoje, amhuanten amo anquipalac anmoyolo pa anpehuasquiaya anlajnamiquia quinami Dios quinequi. Huan pa yina cataloaya in caltilan hué motocaya Tiro huan in caltilan hué Sidón. Huan sinda cataloaya lachihuali innojen huejué capa yehuanten, quipalaloaya inminyolo yehuanten pa laijnamiquilosquiaya quinami Dios quinequi. Jo quema, molaquentiloaya ca tzotzomajli xinquí huan molaliloaya pin tinextilan pa lanextilosquiaya quichi icnotiloaya pampa quichihujque miac hual amo cuali. <sup>14</sup> Ma yoje, amo miac panusi lacocoltilisli yehuanten hual yulinijme pa Tiro huan Sidón quinami anpanus amhuanten hual anchanti pa Corazín huan Betsaida pa in tonali hual Dios quintojtocas ilaixpan yihual pa camo lamisi pa yesi lacocoltili yehuanten pin lalticpan hual amo quineltocalo. <sup>15</sup> Huan amhuanten hual anchanti pa Capernaum, ¿cuajnési anquijtúa ancayas se caltilan hual yehuanten pin cielo anmitzlasojlasi miac? Amo quiman. Amhuanten antemus capa cate in mijquimes, yajmo annesis.

<sup>16</sup> Aquí hual quicaqui len anquijtúa amhuanten nomonextilinijmes yoje quicaquí inon hual niquijtúa nehual. Huan aquí hual amo anmitzcaquí, yoje amo nechcaquí nel. Huan aquí hual amo nechcaquí, yoje amo quicaquí Dios hual nechtilanic.

Joyque quinmilic Jesús imonextiliniymes. Cuaquinon mohuicajque.

*Mocuepalo in setenta capa unca Jesús*

<sup>17</sup> Panuje tonalijmes, mocuepajque ca niman míac paquilisli in setenta ca Jesús, niman pactataloaya, quilijque:

—Tata, yehuanten in iyjecames amo cuajcuali techneltocalo pampa titechmacac tehual molahueliltilisli hual ticpía pampa tel iCristo de Dios.

<sup>18</sup> Jesús quinmilic:

—Nolacocolini Satanás quipiani ilahueliltilisli hué calica quinequini mopalehuiaya pa ajsisquiaya pin cielo. Ma yoje, axcan unca lasulahuali. Unca quinami niqitac hueztihualaya pin cielo quinami lapelanilisli, jan ajnaxcan yihual cataya lasulahuali. <sup>19</sup> Xiquitacan. Annimitzmacac lajtol chicahuac calica anquipías lahueliltilisli pa anquinsulahuas nolacocoliniymes hual cate quinami cuhames huan culomes. Yes quinami anquintelicsa nolacocoliniymes. Quema, huan annimitzmacac nolajtol chicahuac calica anquipías lahueliltilisli pa anquisulahuas huan anquixijxicus mochi ichicahualisli in lacocolini. Huan amo huil anmijchihuilisli nindeno pa anmijtzacuilis. <sup>20</sup> Ma yoje, amo xicayacan anpactica jan pampa anmitznel-tocalo in iyjecames amo cuajcuali. Quema, xicayacan anpactica pampa quinmijculuc Dios anmotocajmes nepa pin cielo.

*Quipía paquilisli Jesús*

(Mt. 11:25-27; 13:16-17)

<sup>21</sup> Axcan in Espíritu Santo quimacac Jesús míac paquilisli, pampín ca paquilisli quilic:

—Tehual noTajtzin, tel iTeco in cielo huan in lalticpan, nimitzilía in-minlaxpan moxtin quinami timonotza pa timitzilisi quinami ticpía mochi lahueyilisli. Timonotza pa ticpías in, pampa tiquintzacuilic pa como quimatisi innojen lachihualisli hual lanextilía quinami tihuelitía, tiquintzacuilic yehuanten hual quijtulo pampa quimatilo. Quijtulo pampa amo monequi pa tiqunpalehuis tehual. Jo quema, tiquintzacuilic yehuanten huan ma yoje tiqunnextilic yehuanten hual quimatilo pampa monequi pa tiqunpalehuis tehual. Quema, noTajtzin, inon ticchihuac pampa tiquitac cuali pa ticchihuasquiaya yoje.

<sup>22</sup> Cuaquinon Jesús quinmilic imonextiliniymes:

—Nechmacac noTajtzin nehual mochi lahueliltilisli huan nechmacac mochi len quichíac. Huan amo unca oc se, jan Dios in Tajtzin san hual quimati aquí niunca nehual ixól. Huan amo unca oc se, jan nehual san hual quimati aquí unca in Tajtzin Dios. No, amo unca oc se, jan nehual san huan aquí yes hual nicnequi nicnextili aquí unca noTajtzin.

<sup>23</sup> Cuaquinon momalinac quinmiztataya imonextiliniymes, quinmilic pa jan yehuanten san quicaquilosquiaya, quinmilic:

—Xicayacan ca niman míac paquilisli amhuanten pampa anquinniztica innojen hual panujticate anmoyampa. <sup>24</sup> In annimitzilía pampa cataloaya míac ilajtunijmes Dios huan míac huejueyenten hual quinequiloaya quinmitalo innojen hual amhuanten anquinmita, huan ma yoje amo quinmitaje. Huan quinequiloaya quicaquilo innojen hual anquinaqui, huan amo quicaquiye.

*Jesús quinlapuhuilía in hual quichíac in cuali samaritano*

<sup>25</sup> Cuaquinon moquetzac se ilamaxtini inminlajtol in judíos, quinequiaya quichihuilí pa quijtusquiaya Jesús len lajtol calica huil quimotexpahuil-isquiaya, quilajlanic:

—Lamaxtini, ¿len nicchías pa nicanas yulilisli hual amo quiman lamis?

<sup>26</sup> Jesús quinanquilic:

—¿Len unca lajcuiluli pa ilajtol Dios? ¿Len anmitznexitíia pin lajtol?

<sup>27</sup> Quinanquilic ilamaxtini in lajtol, quilic:

—In lajtol quijtúa: “Ticlasojlas in Tata moDios ca mochi quinami huil ticlasojla pa moyolo huan ca mochi quinami huil ticlasojla pa moyulilisli huan ca mochi mochichualisli huan ca mochi molainamiquilisli. Huan ticlasojlas in oc se hual unca ca tehual san quinami tehual timolasojla.”

<sup>28</sup> Jesús quilic:

—Cuali tilananquilic. Xicchía inon huan amo tilamis tiyulis.

<sup>29</sup> Ma yoje, in lamaxtini quinequiaya monapati pampa Jesús quilic inon. Pampín quilajlanic:

—Huan ¿aqui tiquiqtúa unca in oc se hual nicpía pa niclasojlas?

<sup>30</sup> Canac Jesús in lajtol, quilic:

—Cataya se lalac quisac pa Jerusalén, temujtiahuiaya pa in caltilan Jérico. Quinamiquilic sequin laxtequinijmes hual quitecuaje huan quixtequilije mochi, quiquixtilije itzotzomajli, cuaquín uyaje, quicahuaje lastataya in lalac, ca je nadita miquiaya. <sup>31</sup> Huan quinami panuc, yajtihuialac se tiopista pa in ojli, quitac in lalac, panuc ca yoje pa in ojli. <sup>32</sup> Cuaquín hualac se levita (se de yehuanten hual tequipanulo pin tiopan hué), huan quitac. Yihual noje panuc ca yoje pa in ojli, quinami in tiopista. <sup>33</sup> Cuaquinon umpa panujtihuialaya se lalac samariteco hual amo anquixtoca. Quipana-jtihuialaya tolali. Quitac in lalac huan quicniliaya yihual. <sup>34</sup> Hualac ca yihual, quinlalilic dangos pin sahuames capa quitecuaje, quinxahuilic ca chahuac huan iayo uva coc. Cuaquinon quilejcultic pan yihual iburro, quihuicac pan se cali, nepa quitaya pa quipajtis. <sup>35</sup> Mostatica pa huajtzinco quimacac tomin iteco in cali, quilic: “Xiquita yihual huan mochi hual ticpías pa ticlaxlahuis in in hual monequi pa quipías yihual, nehual nimitzcuepilis in tonali nimocuepas ca nic.” <sup>36</sup> Axan —quilic Jesús—, ye laces quitaje in lalac hual laxtequinijmes quitecuaje. ¿Calía ca in yeyenten quichihuilic in lalac quinami quiqtúa in lajtol pa ticchihuilisli mochi oc se hual moita ca tehuanten?

<sup>37</sup> In lamaxtini quinanquilic Jesús, quilic:

—Yihual hual quipiliaya laicnihilisli in lalac hual quitecuaje, yihual quichihuilic quinami quiqtúa in lajtol.

Cuaquín Jesús quilic:

—Xía huan xicchía quinami yihual quichíac.

### *Jesús pa inminchan Marta huan María*

<sup>38</sup> Yajtiahuiiloaya yehuanten pan ojli, Jesús ihuían calaquic pan se caltilan tipichin, nepa cataya se sihual motocaya Marta, yehuanten moximatiloya. Yihual quinotzac Jesús pa quipaxaluilisquiaya pa ichtan. <sup>39</sup> Huan Marta quipiaya se icni sihual motocaya María. Yihual molalic pa icxihuajmes in Tata Jesús huan pehuaya quicaqui quinami quimaxtiaya ilajtol Dios. <sup>40</sup> Ma yoje, icni Marta laijnamiquiaya siajtataya pampa quiyucxiltiaya mochi pa quicuasquiaya Jesús. Cuaquín hualac capa cataya Jesús, quilic:

—Tata, ¿amo tiquita quinami nocni nechcahuac pa nitequipanusquiaya nohuían? Xiquili pa hualas nechpalehuis.

<sup>41</sup> Huan in Tata Jesús quinanquilic:

—Marta, Marta, timomaca míac tequil huan amo huil timosehuía. <sup>42</sup> Jan inon san monequi pa ticchías quinami María quichijtica. Quinequiaya

quichía in cuali, quinequiaya quicaqui ilajtol Dios. Amaqui quiquixtilis María in hual yihual cana quicactica ilajtol Dios.

## 11

*Jesús quinmilia quinami se quilajlanía Dios*  
(Mt. 6:9-15; 7:7-11)

<sup>1</sup> Cataya se tonali cataya Jesús pan se lajcotiyan capa quilajlantataya Dios. Nepa noje cataloaya imonextiliniymes. Lamíc quilajlaníc, se imonextilini quilic:

—Tata, xitechnextili pa ticmatasi quinami ticlajlanisi Dios, quinami Juan Lacuayatequini quinnexilic imonextiliniymes.

<sup>2</sup> Huan Jesús quinmilic:

—Quiman anquilajlanía Dios, xiquilican yoje:

ToTajtzin Dios hual tiunca pin cielo, ma quijtucan moxtin motoca ca mochi inminlasojlalisli huan inminlajtomes huejué huan cuajcualtichin.

Ma ajsi in tonali hual tihuelitía capa tehuanten.

Ma mochía len ticnequi pan lalticpan jan quinami mochía pin cielo.

<sup>3</sup> Xitechmaca mojmosta pa tijcuasi in hual monequi.

<sup>4</sup> Huan xiquinpujpuhua tolaiflaculisli, pampa yoje tiquinpujpuhualo moxtin yehuanten hual tejchihuililo amo cuali.

Huan amo xitechlaicana ca capic Satanás huil techtilanilía toyolo pa ticchi-huasi len amo cuali, quema, huan xitechmacahuili pa camo techana yihual hual elehuis.

<sup>5</sup> Cuaquinon quinmilic:

—Cuaajnesi se ca amhuanten ticpía se mocni hual chanti pa oc se cali huan tiajsi pa ichan yihual pa lajco layúa huan tiquilía: “Eh, Nito, ¿amo ticpía se ome laxcali pa tichlanehuis? <sup>6</sup> Ajsic pa nochan se tocní pa oc se cali panujtihualaya pa ojli, huan amo nicpía nindeno pa nicmacas pa lacuas” tiquilía.

<sup>7</sup> Huan pa calijtic yihual quinanguilía: “Amo xichyantitihuala. Nictzacuac nochan, axan tilasticate pa tolapexlimes nehual huan noxolomes. Amo huil nimoquetzas pa nimitzmacas nindeno” quilía. <sup>8</sup> Annimitzilía—quilic Jesús—, cuaajnesi in se pa icalijtic amo moquetzas pa mitzmacas tehual ome laxcali mas que tiunca icni pa oc se cali. Ma yoje, tehual hual tiunca icni pa quiahuac amo tipinahuac timotemachilic in se ome laxcali. Pampín, mocni pa calijtic neli moquetzas mitzmacas mochi in hual monequi pa ticpías. <sup>9</sup> Huan annimitzilía: Ximotemachilican, huan Dios anmitzmacas. Xicitemucan len Dios quipía pa amhuanten, huan anquitas. Quema, xiclajlanican Dios, unca quinami anquitecuilijtica pa ilalapujquil Dios. Huan anmitzlapulis.

<sup>10</sup> Xicchihuacan yoje pampa ancanas mochi hual len anmotemachilía Dios pa anmitzmacas. Huan moxtin hual len quitemulo in hual Dios quipía pa quinmacas, quema, yehuanten quitalo. Huan moxtin hual quinami quitecuililo ilalapujquil Dios, yoje Dios quinlapulis.

<sup>11</sup> Amo unca se itajtzin ca amhuanten hual quimacas se tixcali ixól sinda ixól motemachilía len quicuas. Noje amo unca se tata hual quimacas se cuhual sinda motemachilis se michin. <sup>12</sup> Huan amo unca se tata hual quimacas se culol ixól sinda motemachilis se blanquillo. <sup>13</sup> Pampín, mas que amhuanten aunanca amo cuajcuali huan ma yoje anquimati anquinmaca anmoxolomes len unca cuali, cuaquinon anmoTajtzin pin cielo quimati niman cuali quinmaca in Espíritu Santo yehuanten hual quimotemachililo.

### *Quijtulo Jesús quipía Satanás ichicahualisli*

(Mt. 12:22-30; Mr. 3:20-27)

<sup>14</sup> Cataya se tonali quiquixtiliaya Jesús se ijyecal amo cuali se lalac. In ijyecal amo cuali quichihuilini pa camo huil lajtusquiaya in lalac. Huan quisac pa yihual in ijyecal amo cuali, yoje pehuac lajtuc in lalac. Mochahuajque moiztcate huan moilijtcate in miac lalalera. <sup>15</sup> Ma yoje, sequin quilijque:

—Yihual quinquixtilía in ijyecames hual amo cuajcuali pan ipampa ilahuelilitisli Beelzebú hual unca Satanás. Yihual huelitía ca moxtin in ijyecames hual amo cuajcuali.

<sup>16</sup> Oc sequin quimahuililoaya huan quijtuloaya pampa cuajnesi amo unca neli yihual Jesús yes in Cristo hual Dios quitlanic. Pampín quiyantiloaya pa yihual quinnextilisquiaya len pin cielo (ilhuicac) calica momahuisultilosquiaya ca lamajtilisli. <sup>17</sup> Huan quimatic Jesús len quijtuloaya laijtic capa inminyolo, pampín quinmilic:

—Sinda amo cate ca se lajtulisli yehuanten hual huelitilo pa se lali, cuaquín amo huejcahuas inminlahuelilitisli, yajmo cayas. Huan sinda amo cate ca se lajtulisli yehuanten pa se cali huan mocualantitalo yehuanten, cuaquín yajmo huil huejcahuasi pa chantisi pa in se cali, yajmo cayas inminchan.

<sup>18</sup> Huan sinda Satanás huan yehuanten hual huelitilo ca yihual amo cate ca se lajtulisli, cuaquín amo huejcahuas Satanás pa huelitis. Inon anquimatí.

<sup>19</sup> Ma yoje, sinda anquijuttica pampa nehual niquinquixtilía ijyecames amo cuajcuali ca ilahuelilitisli Beelzebú, cuaquinon ¿ca aquí ilahuelilitisli quinquixtililo yehuanten anmolacames hual quimatilo quinquixtililo? ¿Anquijuttica pampa yehuanten quinquixtililo noje ca ilahuelilitisli Beelzebú? Sinda yoje anquijuttica, cuaquinon yehuanten anmitz motexpahuilisi ilaixpan Dios. <sup>20</sup> Axan annimitzilía pampa niquinquixtilía ca Dios ilahuelilitisli. Pampín, axan ajsic Dios huelitijtica capa amhuanten. <sup>21</sup> Unca quinami se lalac chichahuac hual quiztica ca teposli pa moanalisi ilajcotiyan capa quinpía mochi hual iyaxca, huan amo unca nindeno hual quimacas tequil.

<sup>22</sup> Ma yoje, sinda hualas se niman chichahuac huan quisulahuas, cuaquín quiquixtilis mochi calica monapatiaya, huan cuaquín in lalac niman chichahuac laxiluilis mochi len quimpiaya in lalac hual amo yoje chichahuac. Huan yoje cayas ca Satanás sinda ajsis capa yihual ilahuelilitisli Dios. <sup>23</sup> Aquí hual amo nechtoca unca nolacocolini. Huan aquí hual amo nechpalehuía nehual, yoje yihual quipalejtica Satanás.

### *In ijyecal hual mocuepac*

(Mt. 12:43-45)

<sup>24</sup> Quisa in ijyecal amo cuali pa se lalac, panujtía pa cajcaca amo unca al, mochi unca huaqui. Nepa panujtía pa quitas capa huil mosehuis. Sinda amo quita capa huil, cuaquín quijtúa: “Nimocuepas pa nochan hual cataya laijtic capa in lalac capa niquisac.” <sup>25</sup> Cuaquinon huala, huan quita quinami unca laijtic capa in lalac. Unca quinami se cali laxpanali huan lachijchihuali cualtichin, amo chantitica nepa se ijyecal amo cuali. <sup>26</sup> Cuaquín yahui quinmana oc sequin chicome ijyecames niman amo cuajcuali, yihual amo quiman cataya yojque amo cuali. Calaquilo yehuanten moxtin laijtic capa in lalac pa nepa chantisi. Yoje mococúa in lalac niman miac axan. Quema, amo yoje miac mococuni quiman quipiani jan in se ijyecal amo cuali laijtic capa yihual.

*¿Aquí quipía miac paquilisli?*

<sup>27</sup> Huan quijtutataya Jesús innojen lajtomes, cataya se sihual ca in míac lacames huan sihuames, quinotzac ca lajtol chicahuac, quilic:

—¡Niman míac paquilisli quipía in sihual hual mitzlatatiltic huan mi-chichiltic!

<sup>28</sup> Huan Jesús quilic:

—Ma yoje, niqijtúa in paquilisli amo unca yoje hué quinami inon hual quipialo yehuanten hual quicaquilo ilajtol Dios huan quichihualo len quinmíla, yehuanten hual quipixticate ilajtol pa inminyolo.

*Quiyantilo Jesús pa quinnextilis len lanextilisli pa in cielo (ilhuicac)*

(Mt. 12:38-42; Mr. 8:12)

<sup>29</sup> Se tonali ajstitihualaloaya míac míac lacames inahuac Jesús, huan yihual pehuaya quinmili:

—Amhuanten hual anyultica axan anunca lacames anquipixtica anmoyolo amo cuaqcuali. Mojmosta annehyantitica pa annimitznextilis pa in cielo len hual ayamo quiman anquitaya. Anquinequi anquita pa yoje anquinetocasquiaya pampa Dios nechtilanic nican pa in lalticpan. Ma yoje, amo annimitznextilis nindeno hual anquinctica anquita. Jan annimitznextilis inon san hual Jonás ilajtuni Dios quinnextilic yehuanten hual chantinjime pa yina pin caltilan hué motocani Nínive. <sup>30</sup> Jonás quinnextilic yehuanten pa Nínive pampa Dios quitilanic yihual. Huan nehual ilacal in cielo annimitznextilis amhuanten pampa Dios neli nechtilanic nehual pin lalticpan.

<sup>31</sup> Cayas in tonali hual Dios quintojtocas ilaixpan yihual yehuanten pa in lalticpan hual amo quinetocalo, quintojtocas pa panusi lacocoltilisli hual amo quiman lamis. Cuaquín in hué sihual hual huelitini pin lali huejca pa in sur nesis ilaixpan Dios ca amhuanten. Huan in sihual noje quijtus quinami Dios, pampa yihual hualac niman huejca pa quicaquisquiaya ilajmatilisli in hué Salomón hual yulini pa yina. Huan xiquitacan. Unca se hué nican hual yoje hué amo cataya Salomón. <sup>32</sup> Yehuanten hual yulinijme pa Nínive nesisi ilaixpan Dios ca amhuanten huan quijtusi quinami Dios. Yehuanten quipalaje inminyolo pa pehualosquiaya laijnamiquilo quinami Dios quiman Jonás quinnotzac quinmilijtataya ilajtol Dios. Huan xiquitacan. Unca se hué nican hual Jonás amo cataya yoje hué.

*In lahuilisli hual unca lajtic se iyolo*

(Mt. 5:15; 6:22-23)

<sup>33</sup> Jesús laqueztiahuiaya, quinmilitic:

—Amaqui quilalaltía se tapalquita hual lahuía huan cuaquín quilalía capa amaqui unca o quilalía itzindan se chiquihuil. No, quilalía pa pani capa nestías pa quinlahuis yehuanten hual calacticate. <sup>34</sup> Iixtololon se unca quinami se tapalquita hual quilahuilía, yoje huil lachía se. Sinda amo unca len hual quitzacuilía iixtololon se, cuaquinon quita in lahuilisli. Huan sinda unca len amo cuali hual quitzacuilía se iixtololon, cuaquinon amo lachía, jan unca laticumac san. Unca yoje ca iyolo se. Sinda unca amo cuali iyolo se, cuaquín in se unca laticumac. <sup>35</sup> Pampín xictemujtiacan quinami anquimatis da anmoyolo quipía lahuilisli o laticumactitica. <sup>36</sup> Yojque, sinda quimacahuilía se pa calaquis pa iyolo ilajtol Dios pa huelitis ca yihual pa yulis quinami Dios quinequi, cuaquinon yajmo laticumactis pa iyolo. Huan yihual yes quinami se ca iixtololon cuali. Cayas quinami icalijtic se capa lajtica cuali se tapalquita hual lahuía. Yihual yulis quimaztica len quinequi quijtúa ilajtol Dios hual quilahuilijtica pa iyolo.



*Jesús quinmotexpahuilía in fariseos huan in lamaxtinijmes*  
(Mt. 23:1-36; Mr. 12:38-40; Lc. 20:45-47)

<sup>37</sup> Mochahuac Jesús pa quinlaquetzilizic, quihuicac se lalac fariseo pa lacuasquiaya Jesús pa ichan. Yoje calaquic Jesús, molalic pa lacuas. <sup>38</sup> Huan mochahuac quiztica in fariseo pampa quitac Jesús amo pehuac ca in lapacalislí imajmajuan pa lacuasquiaya, quinami quijtúa in lajtól hual quimaxtilo in judíos. <sup>39</sup> In Tata Jesús quilizic:

—Axan, quema, amhuanten in fariseos anquijtúa pampa da anmopaquilía, cuaquín yoje anmitzita chipahuac Dios. Ma yoje, pa laijtíc amhuanten capa anmoyolo anunca niman amo cuali ca mochi hual anquijtúa huan anquichía. Anunca quinami se hual quipaquilía pa quiahuac se tapalcal o se tapalquita xalapa, huan pa laijtíc quiahuac tetzcuinuc. Yoje anunca tetzcuinuc laijtíc anmoyolo. <sup>40</sup> ¡Amo anlajnamiquía! Dios quichíac ilajjtíc se iyolo, amo quichíac jan iqiahuac se. <sup>41</sup> Huan amo xicpiacan len laijnamiquilislí inahuac len yes anmolajtol quijtúa inahuac quinami anmopaquilis. Xicmacahuiltican pa ilajtol Dios anmijchiphahuilís anmoyolo, cuaquinon xiquinmijnamiquican yehuanten hual amo quipialo miac pa yoje anquinmacas sequin ilajljco in hual anquipías. Yoje anquitas pampa mochi unca chipahuac pa amhuanten sinda unca chipahuac anmoyolo. <sup>42</sup> Amhuanten fariseos, ¡quichi lacocoltilislí anyahui anpanu! Anquimaca Dios se ilajco in majlacli inminlajljco mochi anmocominos huan anmoyerbabuena huan in oc sequin anmoajuac, quinami quijtúa ilajtol Dios. Ma yoje, ilajtol Dios noje quijtúa pampa anquipía pa anquilasojla oc sequin, huan amo anquinlasojla. Noje quijtúa in lajtól pampa anquipía pa anquintemus inon hual cuali pa anquinchihuilís oc sequin hual panulo lacocoltilislí hual oc sequin quinchihuililo. Huan amo anquinchihuilía, amo anquinmotexpahuililo yehuanten hual quinchihuililo in amo cuali. Monequiaya pa anquichihuasquiaya innojen hual quijtúa in lajtól. Quema, monequiaya pa camo anquicahuas pa anquimacás in se ilajco inminmajlacli innojen hualajuac. Ma yoje, monequi pa anpehuas anquijnamiquis anquichías in hual monotza in niman miac pa ilajtol Dios. <sup>43</sup> ¡Quichi lacocoltilislí anyahui anpanúa amhuanten fariseos! Anquixtoca anmolalía pin tiopajmes capa moxtin anmitzitasi. Anquixtoca pa moxtin anmitzpialtisi ca miac momajtilislí pa ilajcotiyan in caltilan. Quema, anyahui anpanúa lacocoltilislí pampa inon. <sup>44</sup> Huan ¡quichi lacocoltilislí anyahui anpanúa! Anunca quinami cajcapa quinlalpachuje mijquimes, capa yajmo quitalo lacames capa cate. Amo quimatilo sinda nejnentialo inminpan, huan in lajtól quijtúa pampa lacames yajmo cate chipahuac sinda nejnemilo inminpan. Jan yoje unca ca lacames hual quineltoalo len anquimaxtía. Amo quimatilo pampa anmolamaxtilislí amo unca quinami quijtúa ilajtol Dios. Yoje inminyolo amo unca chipahuac, unca jan quinami anmoyolo amhuanten.

<sup>45</sup> Quinanquilizic se ilamaxtini inminlajtol in judíos, quilizic:

—Lamaxtini, tiquijtúa innojen lajtomes, yoje titechuejuecaltitica tehuanten noje.

<sup>46</sup> Huan Jesús quilizic:

—Amhuanten noje ilamaxtinijmes in lajtól, ¡quichi lacocoltilislí anyahui anpanúa! Unca pampa anquinchía niman miac lajtomes hual cate niman ej'etic pa quinneltocasi lacames. Cate lajtomes quinami se lamamalislí niman etic, huan amhuanten amo je nadita anquinneltoca in lajtomes hual

anquinmilía oc sequin pampa quipialo pa quinneltocasi. <sup>47</sup> ¡Quichi lacocoltilisli anyahui anpanúa! Unca pampa amhuanten anquinchíac in calitos hual anquinlalía pa pani capa quinlalpachuje Dios ilajtunijmes. Huan cataloaya anmotajtzitzian hual quinmictije ilajtunijmes Dios. <sup>48</sup> Yoje anquimati cuali len quichihuaje anmotajtzitzian, huan anquixtoca len quichihuaje, pampa yehuanten quinmictije huan amhuanten anquinchía in caltzindis hual anquinlalía pa pani capa quinlalpachuje Dios ilajtunijmes. <sup>49</sup> Pampín noje Dios ca ilajmatilisli hué quijtuc: “Annimitztilanilis nolajtunijmes huan nolanahuatinijmes. Sequin anquinmictis, oc sequin anquintojtocas.” <sup>50</sup> Yoje, Dios anmitzmotexpahuilis pampa cataloaya lamictili moxtin ilanahuatinijmes, yehuanten hual yulinijme quiman pehuac in lalticpan huan yehuanten hual yultihualalo pa axan. <sup>51</sup> Jo quema, anmitzmotexpahuilis pa yoje anmitztojtocas ilaixpan yihual pampa cataya lamictili Abel inminxól Adán huan Eva. Huan anmitztojtocas ilaixpan yihual pampa cataloaya lamictili moxtin in oc sequin ilajtunijmes hual yultihualaloaya quiman miquic Abel, pa quiman cataya lamictili Dios ilajtuni Zacarías. Yihual quimictije lajco pin ilasojli calijtic in tiopan hué huan inon capa quichichinulo in huendis, nepa quimictije. Jo quema —quinmilic Jesús—, annimitzilía inon, anmitzmotexpahuilis Dios pa anmitztojtocas ilaixpan yihual pampa quichihuajque mochi in lamictilisli. <sup>52</sup> ¡Quichi lacocoltilisli amhuanten ilamaxtinijmes in lajtol anyahui anpanúa! Unca pampa amo anquinmactic lacames in hual quinequi quijtúa ilajtol Dios. Amhuanten amo anquinequic anquimatic len quinequi quijtúa, huan anquintzacuilic pa camo quimatilosquiaya yehuanten hual motoliniloaya pa quimatilosquiaya len quinequi quijtúa.

<sup>53</sup> Cuaquinon, quisac Jesús nepa. Huan in lamaxtinijmes huan in fariseos pehualoaya moanalo chicahuac ca lajtomes ca Jesús. Motoliniloaya pa quilaquetzaltilosquiaya Jesús niman míac. <sup>54</sup> Yojque quinapachiloaya Jesús, quinequiloaya quicaquilo pa yihual quijtus len calica huil quimotexpahuililosquiaya.

## 12

### *Quimaxtía Jesús quinami lacuajcuamanalo in huejueyenten*

<sup>1</sup> Jan pan tonali hual panuloaya innojen, monechiculoaya míac lacames huan sihuames, niman míac míac hualaloaya huan pampín motelicsilijti-hualaloaya. Huan Jesús pehuac quinlaquetzalic imonextilinijmes, quinmilitic:

—Xiquiztiacan amhuanten pa camo anquimacahuiltis pa anmitztechcunilis pa anmoyolo in lacuajcuamanalisli quinami quintechcunilía inminyolo in fariseos. Unca quinami itexli in harina quitehcunía in laxocoyajquil. <sup>2</sup> Amo unca nindeno hual unca latzacuali hual amo yes lalapuli. Huan amo unca nindeno lalatili hual amo yes lamatili. <sup>3</sup> Yoje, len yes hual anquylic capa cataya laticumac hual amo anquinequic pa oc sequin quicaquilosquiaya, jan yoje inon quicaquisi capa amo huil quimolatilis nindeno, quinami capa lajtica. Huan len yes hual anquilis pa se calijtic pa camo quicaquilosquiaya oc sequin, jan yoje in quinahuatisi moxtin.

*Monequi pa timomajtisqui ilaixpan Dios  
(Mt. 10:26-31)*

<sup>4</sup> Huan annimitzilía inon, nocnían lajlasojli. Amo ximomajtican pampa lachames huil quimictilo icuerpo se huan cuaquinon yajmo huil quichi-huilisi nindeno. <sup>5</sup> Ma yoje, annimitznextilía aquí monequi pa anmomajtis. Ximomajtican pampa Dios quipía lahuelilitisli pa quilasas se pin capa lalatica huan milintica quiman quimictía. Quema, annimitzilía, ximomajtican pampa yihual huil quichía.

<sup>6</sup> Quinamacalo macuili tutotzindis pa macuili tomin tijtipichin. Ma yoje, Dios amo quilcahua se tutol hual moitilía ca yehuanten. <sup>7</sup> Jo quema, huan mochi sejse itzondi anmotzontecon unca lapuhuali. Yoje, amo ximomajtican. Amhuanten anmonotza niman míac, amo yoje míac monotzalo míac tutotzindis.

*Yehuanten hual quislacúa Jesús inminlaixpan moxtin*  
(Mt. 10:32-33; 12:32; 10:19-20)

<sup>8</sup> Huan annimitzilía inon. Aquí yes hual nechneleto ca huan quijtus pampa nehual niunca iCristo Dios, huan quijtus inon inminlaixpan moxtin, cuaquín nehual ilacal in cielo niquislacus inminyampa Dios ilanahuatinijmes pin cielo. <sup>9</sup> Aquí yes hual quijtus pampa nehual amo niunca iCristo Dios, cuaquín yihual amo niquislacus inminyampa Dios ilanahuatinijmes pin cielo.

<sup>10</sup> Huan aquí yes hual nechuejuecaltis nehual ilacal in cielo, yihual Dios quipujpuhuas ilaijlaculisli. Ma yoje, sinda se quihuejuecaltis in Espíritu Santo, inon Dios amo quipujpuhuas.

<sup>11</sup> Huan cuajnesi anmitzhuicalo inminlaixpan yehuanten hual huelitilo o yehuanten hual quipialo lahuelilitisli. In tonali hual anmijchihuililo inon, amo ximotolinican pa anquijnamiquis lajtol calica anyahui anmonapatía o calica anyahui anquinmilía. <sup>12</sup> Anmitznextilis in Espíritu Santo len anquipías pa anquinmilis jan axcan quiman yes anlajtus.

*Jesús laquetza de aquinojen quipialo míac tomin*

<sup>13</sup> Se lalac hual cataya nepa ca in míac lacames quilic:  
—Lamaxtini, xiquilí nocni pa yihual nejxiluilis nehual len techcahuilic totajtzin in tonali polehuic.

<sup>14</sup> Jesús quilic:  
—Lalac, ¿aquí nechlajtultic pa niyesquiaya ilaxiluni in hual iyaxca motajtzin?

<sup>15</sup> Cuaquín Jesús quinmilic in lalalera:  
—Xiquitacan. Ximotzacuilican pa camo anquinectías míac huan míac. Niquilía inon pampa mas que quipía se míac hual iyaxca, ma yoje in míac hual quipía amo quiyulitía.

<sup>16</sup> Cuaquinon quinpuhuilic len pa quinmijnamiqultisquiaya in hual quinmaxtiaya. Quinmilic:  
—Cataya se lalac hual quiapiaya míac tomin huan pa icuajmilimes lapixcaya niman cuali. <sup>17</sup> Cuaquinon pehuaya moili: “¿Len nicchías pampa yajmo nicpías calijtic capa nicajcoquis nolapixcalisli?” <sup>18</sup> Cuaquinon quilic: “Inon nicchías. Niquinxitinis nocalijtic capa nicajcoquis huan niquinmiscaltis nocalimes pa yesi niman huejué. Cuaquinon nicnechicus mochi hual len nicpíxcas, nolayoli huan mochi oc sequin innojen hual noyaxca huan niquintemiltis nocalimes. <sup>19</sup> Cuaquinon nimoilis: Axcan nehual nicpía míac la'ajcoquili hual nechuejcahualtis míac xixil. Nimosejtías, huan mojmosta nía nilacua huan nía nilauni huan nía nipaqui.” Yoje quilic in lalac. <sup>20</sup> Ma yoje, Dios quilic: “¡Amo ticmati tilaijnamiquí! Axan layúa tia timiqui.

Cuaquín ¿aquí moyaxcajtis ca mochi inon hual timoajcoquilic?” Yoje quilic Dios.

<sup>21</sup> Cuaquinon, Jesús quinmilic:

—Yoje yes ca se hual yuli moajcoquiliytica míac pa yihual nican pan lalticpan huan ma yoje amo moajcoquilía míac in hual Dios quipía pa quimacas.

*Dios quinmiztia ixolomes*

*(Mt. 6:25-34)*

<sup>22</sup> Huan Jesús quinmilic imonextilinijmes:

—Pampín annimitzilía amo xicpiacan lamajtilisli inahuac quinami amhuanten anyulis huan len anquicuas. Huan amo xicpiacan lamajtilisli inahuac quinami anmolaquentis. <sup>23</sup> No, amo xilajnamiquican ca lamajtilisli pampa inon. Dios anmitzmacac anmoyulilisli, huan anmoyulilisli monotza míac. Amo yoje míac monotza in hual anmitzmaca pa anquicuas. Huan Dios quichíac anmocuerpo, huan anmocuerpo monotza míac, amo yoje míac monotza inon hual anmitzmaca pa anmolaquentis. <sup>24</sup> Xiquinmitacan in cuervos (cacalomes). Amo latocalo, amo lapixcalo, amo quipialo capa huil moajcoquililo nindeno. Ma yoje, Dios quinlacualtía. Huan amhuanten anmonotza míac. In tutomes amo yoje míac monotzalo. <sup>25</sup> Huan cuajnesi anquinequi pa huejcahuas anmoyulilisli nican pan lalticpan. Ma yoje amo huil anquihuejcahualts se nadita, mas que míac anmomajtía anlajtutica pa anmoyolo pa anhuejcahuas anyulis. <sup>26</sup> Pampín, sinda amo huil anquichía jan in nadita san, cuaquinon ¿leca anlajnamiquía ca momajtilisli pa anquimatis quinami ancanas mochi inon hual monequi pa anquipías? <sup>27</sup> Xiquinmitacan in xuchimes quinami moscaltilo. Amo tequipanulo, amo latzahualo, amo lajqueto. Ma yoje, annimitzilía pampa Salomón ca mochi itomin huan innojen oc sequin hual quipiani amo quiman molaquentini cualtichin quinami se xuchil quinami innojen. <sup>28</sup> Huan sinda Dios quichijchía se xuchil quinami tzotzomajli cualtichin, se xuchil hual unca axan pin cuajlan huan mosta quichichinulo inmincuajlan in cuajmilunijmes, cuaquín neli unca pampa Dios yahui anmitzlaquentía amhuanten hual amo míac anquilalilía Dios anmolaneltocalisli. Pampín, xicpiacan míac laneltocalisli ca Dios. Huan mas que amo anquipía míac laneltocalisli ca Dios, ma yoje anmijchiuilis innojen. <sup>29</sup> Huan amhuanten, amo xictemujtinemican len anquicuas huan len ancunis, amo xicljajnamiquican ca lamajtilisli inminahuac innojen. <sup>30</sup> Moxtin pin lalticpan quintemulo innojen, quijnamicitate ca lamajtilisli quinami quinmanas. Huan anmoTajtzin pin cielo quimati pampa monequi pa anquipías innojen. <sup>31</sup> No, xictemucan mojmosta pa anquipías Dios huelitijtica pa anmoyolo, huan yihual anmitzmacas mochi in hual monequi pa anquipías.

*Ma caya pin cielo (ilhuicac) anmoyaxca hual neli monotza*

*(Mt. 6:19-21)*

<sup>32</sup> Amo ximomajtican, amhuanten niman miactzindi hual annechnel-toca, pampa Dios huelitía pa anmoyolo axcan huan amhuanten anhuelitis pan mochi in lalticpan. Jo quema, Dios quipía paquilisli pa anmitzmacas pa yes anmoyaxca inon pa anhuelitis. <sup>33</sup> Xiquinnamacacan len anquipía huan xiquinmacacan yehuanten hual amo quipialo nindeno. Sinda anquinchihuilía cuali ca anmotomin, cuaquín amo anquipolúa, pampa Dios quita len anquinchihuilía huan anmitzajcoquilis míac hual cuali pin cielo. Yes quinami anmochihuilíaya xotopas hual amo quiman mochihualoaya dangochita ca cojcoyunquimes capa quisasquiaya anmotomin huan yoje

mopolusquiaya. Pin cielo amaqui huil anmitzixtequilía in hual Dios anmitzajcoquilía, huan in laxonaxli amo anmitzcualilo. <sup>34</sup> Sinda anquixtoca in hual Dios huil anmitzajcoquilía pin cielo, cuaquín mojmosta anquijnamictías inon. Huan sinda anquixtoca in míac hual cate pin lalticpan, cuaquín mojmosta anquijnamictías inon.

### *Monequi pa se mochías tequipanujquil cuali*

<sup>35</sup> Yoje, xiyén quinami lacames tequipanujquimes hual cate lacuejtli pa latequipanuulisi. Quimpiasi lalaltili mochi in tapalquitos pa lahuilisi pin cali. <sup>36</sup> Quichixtiasi inminteco hual yahui mocuepa pa ichan pampa uyac pa se lanamictilisi. Huan quiman ajsis in teco huan lanotzas pa in lalapujquil, yehuanten hual quichixticate quilapulisi jan ajnaxcan. <sup>37</sup> Quichi paquilisi quipiasi in lacames pa in tonali ajsis inminteco huan quinmita quichixticate yihual. Jo quema, annimitzilía, mochijchías inminteco, quinmilis pa molalisi pa lacuasi huan yihual quinlacualtis. <sup>38</sup> Huan sinda hualas inminteco pa chichahui, diez, once, o lajco layúa o lajco yihuali o pa cualcan o cualquita o laxpoyahua huan yoje quinmitas quichixticate, cuaquín ¡quinami amo paquisi innojen lacames itequipanujquimes! <sup>39</sup> Huan ximatican inon. Sinda quimatiaya iteco se cali quiman yahuiaya huala in laxtequini, cuaquinon amo quimacahuiltili pa quixitinisquiaya icali pa quixtequillisquiaya. <sup>40</sup> Huan amhuanten ximochijchijtiacan pampa nehual ilacal in cielo jan niajsitiquisas, amo anquimatis quiman niajsis.

### *In ome tequipanujquimes (Mt. 24:45-51)*

<sup>41</sup> Cuaquinon Pedro quilic:

—Tata, ¿titechilijtica in laijnamiqutilisli pa titechmaxtis tehuanten san o pa moxtin?

<sup>42</sup> Huan in Tata Jesús quilic:

—Niquilijtica aqui yes hual nechtequipanuulía. Unca quinami inon: Sinda unca se hué hual quipía se tequipanujquil hual quimati, yoje in hué quimati yihual in tequipanujquil quimati quichía mochi quinami quinequi iteco. Pampín quilalis pa quinmiztías oc sequin itequipanujquimes. Cuaquinon yihual in tequipanujquil quinxiluilis in oc sequin tequipanujquimes len quilis iteco pa quinxiluilis. <sup>43</sup> ¡Quinami amo paquis in tequipanujquil pa in tonali hual hualas iteco huan quitas itequipanujquil quichijtica yoje! <sup>44</sup> Neli annimitzilía, quimacas lahueliltilisli niman hué pa quiztías mochi hual unca iyaxca iteco. <sup>45</sup> Ma yoje, cuajnesi in teco quilalía se itequipanujquil pa quinmiztías in oc sequin tequipanujquimes. Cuaquín cuajnesi in tequipanujquil quijtus laijtic yihual, quil: “Huejcahua pa hualas noteco”, huan pehuas lacuas mojmosta huan launis huan mojmosta lahuantinemis. <sup>46</sup> Cuaquinon hualas iteco in tequipanujquil pan se tonali hual amo quichixtica, amo momati quiman. Huan latilani iteco pa yes lamictili itequipanujquil. Yihual yes lacocoltili ca in lacocoltilisli hual panusi yehuanten hual amo laneltocalo. <sup>47</sup> In tequipanujquil hual quimati in hual iteco quinequi pa quichías huan ma yoje amo mochijchías pa quichías len quinequi, yojque yihual yes lahuitequili míac. <sup>48</sup> Huan yihual in tequipanujquil hual amo quimati len quinequi iteco pa quichías, huan quichía in hual cahuilía pa quimacasi lacocoltilisli, ma yoje, yihual amo míac yes lahuitequili. Aquí yes hual quipía míac hual iteco quimacac, yoje yihual iteco quichías pa

quicuepilis míac. Huan aquí yes hual iteco quimacas míac pa quiztías, yoje yihual quipías pa quicuepilis míac.

*Jesús quitlanis tixuxli pan lalticpan*  
(Mt. 10:34-36)

<sup>49</sup> Nihualac pa nicualicasquiaya ilahuelilitlisli Dios pan lalticpan, yes quinami niclasasquiaya tixuxli pan lalticpan. Huan ¡quichi nicnequi pa axan yesquiaya la'aniltili in lalticpan ca in tixuxli! <sup>50</sup> Ma yoje, monequi pa nipanus lacocoltilisli, in yahui ye quinami se lacuayatequilisli hual nechcocus. ¡Quichi nicnequi pa lamis mochías! <sup>51</sup> ¿Anquijtúa pampa nihualaya pa nichihuilisquiaya pa cayalosquiaya ca mosehuilisli yehuanten pan lalticpan? No, annimitzilia, nihualaya pa yajmo cayalosquiaya ca se laijnamiquilisli yehuanten. <sup>52</sup> Ma annimitznextili len nicnequi niquijtúa: Axan huan pa quiman lamis in lalticpan hual axan anquiximati, cayasi macuili pin se cali hual amo cayasi ca se laijnamiquilisli. Yeyenten amo quixtocasi quinami laijnamiquilo omenten, huan omenten amo quixtocasi quinami laijnamiquilo yeyenten. <sup>53</sup> Itajtzin amo mocahuas ca se laijnamiquilisli ca ixól, huan ixól amo mocahuas ca se laijnamiquilisli ca itajtzin. Inantzin amo mocahuas ca se laijnamiquilisli ca ixól sihual huan ixól sihual amo cayas ca se laijnamiquilisli ca inantzin. Inantzin amo cayas ca se laijnamiquilisli ca isihua ixól lacal huan isihua se lacal amo cayas ca se laijnamiquilisli ca inantzin ilahuical.

*Cayasi lanextilisli pin cielo hual amo quimatilo len quinequilo quijtulo*  
(Mt. 16:1-4; Mr. 8:11-13)

<sup>54</sup> Cuaquinon Jesús quinmilic yehuanten in míac lacalera:

—Anquita se mextemil pani pin laiztijcal, jan ajnaxcan anquijtúa: “Yahui quiahui”, huan yoje panúa. <sup>55</sup> Huan lanesi lapuhuitica, anquijtúa: “Yahui tona”, huan yoje panúa. <sup>56</sup> ¡Lacuajcuamananjmes hual anunca! Anmochía quinami lacames cuali huan amo anunca yoje. Anquimati len quinequilo quijtulo in lanextilisli hual anquinmita pan in lalticpan huan pin cielo. Huan amo anquimati len quinequilo anmitznextilo innojen hual panujticate axan capa amhuanten, innojen lachihualisli hual niquinchijtica. Yoje annimitznextilijtica pampa Dios nechtilanic. <sup>57</sup> ¿Leca amo anquimati inon ca anmolajmatilisli?

*Xicsehuilti pa camo cualanis ca tehual se hual mitzmotexpahuilía*  
(Mt. 5:25-26)

<sup>58</sup> Cuajnési mitzmotexpahuilía se hual molalía mopan, huan yihual mitzhuica pan lajco. Cuaquín ximotolini pa ticayas jan sejpa ca yihual capa ayamo anajsis pan lajco. Sinda amo ticchías yoje, yihual mitzhuicas ilaixpan in la'ajuani huan in la'ajuani mitztemacas in policía huan in policía mijtzacuas pa calijtic. <sup>59</sup> Nimitzilia tehual, amo quiman tiquisas nepa sinda ayamo ticlaxlahuic mochi tomin tipichin hual titehuiquilia.

## 13

*Monequi pa ticpalasqui toyolo*

<sup>1</sup> Pa in tonalijmes hualajque yehuanten hual quimachiltijque Jesús quinami Pilato quinmictic sequin lacames pin lalticpan Galilea huan quinipanuc inminesli ca iesli inminhuendis hual yeje borregos. <sup>2</sup> Jesús quinnanquilic:

—¿Anquijtutica innojen lacames pa Galilea catanijme niman laijlaculi huan moxtin in oc sequin galiletecos amo yoje laijlaculi? ¿Anquijtutica pampa

inon panuje lacocoltilisli yoje pampa quichihuaje míac hual amo cuali? <sup>3</sup> Annimitzilia pampa no. Huan sinda amo anquipalas anmoyolo pa anpehuas anlajnamiquis quinami Dios quinequi, amhuanten anmoxtin quinami yehuanten anpolehuis huan yoje amo cayas quinami huil anmoquixtis pin polehuilisi. <sup>4</sup> Huan nepa pin Jerusalén, innojen dieciocho (caxtuli huanye) lacames hual quinmictic in cali cuajtic Siloé in tonali hual huetzic inminpan, zanquijtutica pampa yehuanten cataloaya niman laijlaculi huan moxtin in oc sequin hual chantilo pa Jerusalén amo yoje laijlaculi? <sup>5</sup> No, annimitzilia, huan sinda amo anquipalas anmoyolo pa anpehuas anlajnamiquis quinami Dios quinequi, anmoxtin amhuanten anpolehuis quinami yehuanten, huan amo cayas quinami huil anmoquixtis pin miqulisi.

### *Se amacuál tipichin hual amo laqui*

<sup>6</sup> Cuaquinon quinmiliaya in laijnamiqutilisli pa quinmaxtisqueiaya, quinmilitic:

—Cataya se lalac quiapiaya se amacuál tipichin hual ilaquilyo quicualo. Cataya latocali pa se cuajmili capa quintocac uvas. Hualac quintemujtataya laquilyo, huan amo quitac nindeno. <sup>7</sup> Quilic itequipanujquil hual quiztataya in cuajmili latocali ca uvas, quil quilic: “Quita. Axcan quipía ye xixil nihualaya nictemujtica laquilyo pan in amacuál tipichin huan amo niqutilia nindeno. Xictzontequi pa huetzis huan pa yajmo mochahuas nepa, neli amo unca cuali pa laquis. ¿Leca mochahua pin lali sinda amo laquis?”

<sup>8</sup> Huan yihual hual quiztiac quinancuilic: “Tata, xijcahua noje pa oc se xil, amo xicmayahui huan niclalmolunis itenco huan niclalis cuilal capa niclalmolunis. <sup>9</sup> Cuajnisi ca inon laquis. Huan sinda amo laquis, cuaquinon ticmayahuis pa huetzis, pa yajmo mochahuas nepa.”

### *Jesús quipajtia se pan tonali hual mosehuilo in judíos*

<sup>10</sup> Cataya pan se tonali hual motequihuilo mosehuilo in judíos, huan Jesús lamaxtiaya pin se tiopan. <sup>11</sup> Nepa cataya se sihual, quiapiaya se ijyecal amo cuali hual quiquixtiliaya ichicahualisli pa dieciocho xixil. Yoje quiapiaya pa nejnemisquiaya tepotzita, amo huil nadita momelahuaya. <sup>12</sup> Jesús quitac, quinotzac pa hualasquiaya, quilic:

—Nito, yahui mitzmacahua in ijyecal hual mitzquixtilia mochicahualisli.

<sup>13</sup> Huan quinlalic imajmajuan ipan. Jan ajnaxcan yec lamelahuali, huan pehuac quiqtuc lajtomes huejué pa Dios. <sup>14</sup> Huan ihué in tiopan cualanic pampa Jesús quipajtic pan in tonali hual mosehuilo in judíos. Pehuac quinmilitic yehuanten hual nepa cataloaya pin tiopan, quinmiliaya:

—Cate chicuase tonalijmes, pan innojen monequi pa tequipanus se. Pan in tonalijmes xihualacan huan xicayacan lapajtili, amo xihualacan pan in tonali hual timosehuilo.

<sup>15</sup> Huan in Tata Jesús quinancuilic:

—Lacuajcuamananijmes amhuanten hual anquijtúa anuncia niman cuacuali. Mochi seje ca amhuanten pan mochi tonalijmes hual anmosehuía quitoma ibuey o iburro capa ilpitate huan quihuica pa cunis al. <sup>16</sup> Huan in sihual unca se imiahuil Abraham. Satanás quiapiaya quinami laipili pa dieciocho xixil. Quichihuic ca in ijyecal hual quiquixtilic ichicahualisli. Huan ¿amo monequiaya pa yihual yesquiaya latomali pan se tonali quiman timosehuilo?

<sup>17</sup> Quinmilitic Jesús in lajtomes, yoje inminlaixpan moxtin quinpinahualtic yehuanten hual yeje ilacocolinijmes yihual. Huan in oc sequin pehualoaya



quipialo míac paquilisli pampa Jesús quichihuaya míac hual pampa inon mocahualoaya moiztataloaya yehuanten ca lamajtilisli.

*Ilajnamiquiltisli in latocli tipichin*

(Mt. 13:31-32; Mr. 4:30-32)

<sup>18</sup> Jesús laqueztíac, quinmilic:

—¿Quinami len annimitzmaxtis pa anquimatis quinami huelitía Dios? ¿Ca len lamaxtilisli annimitzilis? <sup>19</sup> Unca quinami se latocli cuixtito hual canac se lalac huan quilasac pa icuajmili. Ixuac, moscaltic huan mochíac se cuahuil huan in tutomes pehualoaya chantilo nepa.

*Jesús quinlaquetzilia quinami laxocoyajquil quichihuilia pan*

(Mt. 13:33)

<sup>20</sup> Oc sejpa quilic:

—¿Ca len lajtomes annimitznexilis quinami huelitía Dios? <sup>21</sup> Unca quinami laxocoyajquil hual canac se sihual huan quiyamanic pa ye lamachi-hualonijmes itexli harina, cuaquín quiteposahualtic mochi itexli in harina.

*In lalapujquil pitzahuac*

(Mt. 7:13-14, 21-23)

<sup>22</sup> Huan panujtiahuiaya Jesús pa mochi in cajcaltlan huan in cajcaltlan tijtipichin. Lamaxtineniaya, huan mojmosta cantiyahuiaya iojli pa Jerusalén. <sup>23</sup> Huan se lalac quilic Jesús:

—Tata, ¿cate jan nadita lacames san hual yahuilo yelo laquixtili pin ipolehuilisli inminlajlaculisli?

<sup>24</sup> Huan Jesús quinmilic:

—Capa Dios huelitía unca quinami se cali hué hual quipía se lalapujquil san hual unca pitzahuac. Ximotolinican pa ancalaquis ca in lalapujquil pitzahuac, pampa annimitzilia cayasi míac hual quitemujticate quinami calaquisi capa Dios huelitía, huan amo quipiasí in lahuelilitisli pa calaquisi nepa. <sup>25</sup> Quiman moquetzac iTeco in cali huan quitzacuac in lalapujquil, cuaquinon amhuanten hual anuncia pa quiahuac anpehuas anquinoxzas pa in lalapujquil, anquilis: “¡Tata, xitechlapuli!” Huan yihual anmitznanquilis: “Amo annimitziximati, ¿capa anquisac pa anhualasquiaya nican?”

<sup>26</sup> Cuaquinon anpehuas anquilis: “Tilacuanijme huan tilaunijme capa tehual ticatani. Huan tehual tilamaxtini pa to'ojlimes huejué pa mochi innojen tocaltilan.” <sup>27</sup> Huan in Teco anmitzilis: “Amo nicmati capa anquisac pa anhualasquiaya nican. Xiquisacan nican huejca ca capic amo niunca nehual, amhuanten anmoxtin hual anyuli anquichijtica in hual amo cuali.” <sup>28</sup> Nepa cayasi chocalisli huan anquinoxctis anmolames quiman anquinmitas Abraham huan Isaac huan Jacob huan moxtin ilajtunijmes Dios hual cayasi capa Dios huelitijtica, huan amhuanten ancayas laquixtili pa quiahuac. <sup>29</sup> Quema, hualasi lacames hual quisaje capa quisa in tonali huan capa calaquía in tonali huan hual quisaje pin norte huan pin sur. Huan molalisli inahuac pa capa Dios huelitía. <sup>30</sup> Huan xiquitacan. Cate yehuanten hual ma yoje amo cayasi capa Dios huelitía, pampa amo quinequije quineltocaje, mas que quimatije ilajtol Dios pin xixihuimes quiman ayamo quimatiloaya moxtin oc sequin. Huan cate yehuanten noje hual mas que ayamo quimatiloaya ilajtol Dios, ma yoje, pin tonali hual quimatije, cuaquín quineltocaje. Yehuanten cayasi capa huelitía Dios.

*Jesús quita Jerusalén huan choca*

(Mt. 23:37-39)



<sup>31</sup> Cuaquinon noje ajstitihualajque sequin fariseos capa cataya Jesús, quili-  
jque:

—Xiquisa, ximohuica ca yoje, pampa quinequi mitzmichtía Herodes.

<sup>32</sup> Jesús quinmilic:

—Ximohuicacan huan quiman anquita in se hual quimati lacuajcuamana  
quinami se zorra, xiquilican: “Xiquita. Axan huan mosta nican ninicaya  
niquinquixtilijitía ijyecames amo cuajcuali huan nilapajitías. Huan pa in  
ye tonali niajsis capa najtía.” <sup>33</sup> Ma yoje monequi pa nicanas ojli axan  
huan mosta huan huipla, pampa amo momacahuiltía pa miquis se ilaj-  
tuni Dios pa quiahuac Jerusalén. <sup>34</sup> ¡Jerusalén, amhuanten pa Jerusalén,  
anquinmichtía ilajtunijmes Dios, anquinlaxilía ca tixcalimes yehuanten hual  
Dios anmitztilanilía! Huan ¡quichi míac nicnequic annimitznechicuc pa an-  
nechneltocasquiaya! Nicnequic annimitznechicuc quinami se lapachuani  
quinnechicúa iparachitos itzindan inastacapajmes, huan amo anquinequic.  
<sup>35</sup> Xiquitacan. Dios yajmo unca nepa pa anmitziztías anmolacames. Axan  
anmitzcahuac pa anmoiztías amhuanten anmohuían, jan yoje anquinequi.  
Huan annimitzilía inon, lacames pa Jerusalén: Yajmo annehitas. San  
annechitas oc sejpá pan tonali quiman anquijtus: “Ma lajtucan moxtin, ma  
lajtucan ca lajtomes huejué pa yihual hual huala pampa Dios quitilanic ca  
ilahueliltisli.”

## 14

### *Jesús quipajtía se hual quipía posahualisli*

<sup>1</sup> Cataya pan se tonali hual calaquic Jesús pa icali se hué fariseo pa  
lacuasquiaya, cataya in tonali hual mosehuilo in judíos. Huan yehuanten  
amo mochualoaya pa quinapachilosquiaya. <sup>2</sup> Cataya nepa ilaixpan Jesús se  
lcal, quipiaya se cocolisli hual quiposahualtitataya. <sup>3</sup> Huan Jesús quinmilic  
in fariseos huan ilamaxtinijmes inminlajtol in judíos, quinmilic:

—¿Quimacahuiltía tolajtol pa titepajtisi pan tonali hual timosehuilo, o amo  
quimacahuiltía?

<sup>4</sup> Yehuanten amo nahuatije. Cuaquinon Jesús quiquitzquic in lcal huan  
quipajtic huan quilic pa mohuicasquiaya. <sup>5</sup> Cuaquinon quinmilic:

—Amo unca se ca amhuanten hual amo quiquixtisquiaya jan ajnaxcan  
ixól o ibuey sinda huetzisquiaya lajitic se coyunquil pan tonali hual timo-  
sehuilo.

<sup>6</sup> Huan momajtiloaya pa quinanquililosquiaya Jesús.

### *Jesús quinmilía len quichihuasqui pin tonali hual quinnotzasqui pa lacuasqui*

<sup>7</sup> Huan quitaya Jesús quinami yehuanten hual cataloaya lanotzali pa  
lcalilosquiaya itequi molajtultilijque pa yehuanten in icpalimes pa capa  
molalilosquiaya in huejueyenten pa lcalulosquiaya. Pampín quinmilic in  
lajnamiquiltisli pa quinmaxtisquiaya, quinmilic:

<sup>8</sup> —Sinda mitznotza se pa tihualas pa se monamictisli, amo ximoy-  
axcajtisi se icpali hual unca pa in huejueyenten. <sup>9</sup> Cuajnesi yihual hual  
mitznotzac noje quinotzac se hual tehual amo tiunca yoje hué quinami  
yihual. Cuaquín quihualicas huan mitzilis: “Ximacahuilti pa molalis in  
lcal capa timolalijtica.” Cuaquinon tipehuas tipinahuas huan tías timolalis  
pan se icpali hual cayas pa yehuanten hual cate tijtipichin. <sup>10</sup> No, xichía  
inon sinda tiunca lanotzali: Quiman tiajsis nepa, ximolali pan se icpali  
hual cayas pa yehuanten hual tijtipichinchito. Yoje, quiman hualas yihual

hual mitznotzac pa in monamictlisli cuajnesi mitzilis: “Nito, ximolali pa in icpali hual unca pa se hué.” Cuaquinon, ticanas lasojlalisli inminlaixpan moxtin hual cayasi ca tehual pa lacuasi. <sup>11</sup> Mochi sejse hual mochías hué inminlaixpan oc sequin, yihual quichihuasi tipichinchito. Huan aqui yes hual mochías tipichinchito, yihual quichihuasi hué.

<sup>12</sup> No Jesús quiliaya yihual hual quinotzac, quilic:

—Sinda tía ticchía se fiesta hué capa tilalacualtía, amo xiquinnoztinemi itequi jan mocnían hual chantilo pa oc sequin calimes huan mocnían huan mochantinijmes san hual quipialo míac tomin. Sinda ticchijtías yoje, cuaquinon yehuanten mitznotzasi tehual huan yoje mitzcuepilisli in lachihualisli cuali. <sup>13</sup> No, sinda tiquinnotzas lacames pa lacuasi pa mochan, xiquinmana yehuanten hual amo quipialo nindeno huan hual tungo huan hual amo huil nejnentialo huan hual pachacal. <sup>14</sup> Yoje tipactías pampa yehuanten amo quipialo quinami mitzcuepilisli in lachihualisli cuali. Ma yoje, Dios mitzcuepilis niman míac lachihualisli cuali pan in tonali tiyulis oc sejpa. In panus pan in tonali hual yulisli oc sejpa yehuanten hual iyaxca Dios hual ca yehuanten yihual amo quita nindeno amo cuali.

*Jesús laquetza de se lacualisli hué*

(Mt. 22:1-10)

<sup>15</sup> Quicaguc in lajtomes se ca yehuanten hual cataloaya lacuajtataya ca yihual, quilic:

—Míac paquilisli cayas pa yihual hual quicuas ilacualisli capa Dios huelitía.

<sup>16</sup> Jesús quilic:

—Cataya se lalac yahuiaya quiyucxilti se lacualisli hué. Latilanic pa hualalosquiaya míac. <sup>17</sup> In tonali hual mochi cataya layucxiltili, quitilanic itequipanujquil pa quinnahuatisquiaya yehuanten hual quinnotzac, quinmilic: “Xihualacan pampa axcan unca layucxiltili.” <sup>18</sup> Cuaquín ca se laijnamiquilisli moxtin pehuaje quilije pampa amo yahuiloaya yalo. In se hual in tequipanujquil pehuac quinotzac pa hualas quilic: “Nilamic nimocuhuilic se cuajmili huan nicpía pa nías niqutas. Nimitzilía xichpupjpuhua, amo huil nía.” <sup>19</sup> Oc se quil quilic: “Nilamic nimocuhuilic macuili omenten bueyes huan niajtía pa niquinlaxahualtis pa nicmatis sinda cate cuali. Nimitzilía xichpupjpuhua, amo huil nía.” <sup>20</sup> Huan oc se quilic: “Nilamic nimonamictic, pampín amo huil nía.” <sup>21</sup> Yoje mocuepac in tequipanujquil, quilamachiltic iteco innojen lajtomes. Cuaquinon cualanic yihual hual quinnotzac pa hualalosquiaya, quilic itequipanujquil: “Xiejsehui xiquisa pa in ojlimes huejué pin caltilan huan in ojlimes tipichitos, huan xiquinmana xiquinhualica ca níc hual amo quipialo huan in tungos huan in pachacames huan yehuanten hual amo huil nejnemilo cuali.” <sup>22</sup> Huan itequipanujquil quichíac hual quilic iteco. Cuaquín mocuepac quilic: “Tata, nilamic nicchíac len tichilic huan jan yoje unca capa huil cayasi míac lacames.” <sup>23</sup> Huan in Tata quilic itequipanujquil: “Xiquisa pa quiahuac in caltilan, xiquintemu yehuanten hual nejnentinemilo pan ojlimes, huan yehuanten hual mochahualo pin cuajlan pampa amo quipialo inminchan. Xiquinmana pa hualasi pa nochan pa yoje temis ca lacames nocali. <sup>24</sup> Nimitzilía, amo jan se ca yehuanten in lacames hual niquinnotzac pa hualalosquiaya yahui quicua nolacualisli.”

*¿Quichi monequi pa laxlahuis se sinda quinequi quitoca Cristo?  
(Mt. 10:37-38)*

<sup>25</sup> Ca Jesús yajtiahuiloaya míac míac lacames. Cuaquín momalinac Jesús, quinmilic:

<sup>26</sup> —Sinda se quinequi ye nomonextilini, quipías pa nechlasojlas niman míac, amo yoje quinami quinlasojla oc sequin. Quema, quipías pa nechlasojlas míac huan yoje nesis quinami yihual amo quinlasojla itajtzin huan inantzin huan isihua huan ixolomes huan icnían lacames huan sihuames. Quema, quipías pa nechlasojlas yoje míac, huan yoje nesis quinami yihual ihuían amo moixtoca. Sinda amo yoje, cuaquín amo huil yes nomonextilini.

<sup>27</sup> Monequi pa nehual nimiquis. Yoje, aquí yes hual amo quinequi nechtoca huan amo quinequi miqui pa nehual, sinda cuajnesi monequi pa miquis pa nehual, cuaquín yihual amo huil ye nomonextilini. <sup>28</sup> Amo xipehuacan xiyén nomonextilini jmes sinda ayamo anquijnami quic cuali in míac hual nía nicnequi pa anquichías pa nehual. Mochi sejse ca amhuanten hual yahui quichía se cali hué, quipehualtía molalijtica pa ajsis quimatis quichi quijtúa pampa yahui quipía pa quilaxlahuis. Yoje quitas da cajsis itomin pa laxlahuis in cali hual yahui quichía. <sup>29</sup> Sinda amo ajsi quimati se yoje, cuajnesi in tonali pehua quichía in cali hué, quita pampa itomin amo cajsis pa laxlahuis, amo huil lamis quichías. Cuaquinon moxtin hual quitalo pehuasi quihuitzquilisi in lalac. <sup>30</sup> Quilisi: “In lalac pehuac quichía huan axan amo huil lamis quichías.” <sup>31</sup> Huan sinda se hué quinequi quichía moanalisi ca oc se hué, quipehualtía molalijtica pa ajsis quimatis sinda huil quisulagua in hué ca diez mil guaches hual quinpía, sinda in oc se hué quinpía veinte mil guaches hual hualalo pa quinamiquisi pa moanasi. <sup>32</sup> Huan sinda quijtúa pampa amo huil quisulagua, cuaquín quiman ayamo ajsiaya huan unca huéjca in hué ca veinte mil guaches, in hué ca san diez mil guaches quinahuatía in oc se hué pampa amo quinequi moana ca yihual. <sup>33</sup> Yoje, amaqui huil ye nomonextilini sinda amo nechmacahuiltía pa nicchías ca yihual len yes hual nicnequis nicchías ca yihual, quema, huan ca mochi hual unca iyaxca.

*Jesús laquetza inahuac istal hual yajmo latechcunía*  
(Mt. 5:13; Mr. 9:50)

<sup>34</sup> Unca cuali in istal. Ma yoje, sinda in istal yajmo latechcunía quinami istal, cuaquín amaqui yahui quilalilía pan len yes quiyucxiltitica pa quicuas. <sup>35</sup> No, in istal hual yajmo latechcunía quinami istal yajmo unca cuali pa nindeno, yajmo unca cuali pa in lali huan pa in cuilal hual quimontulo. Jan quilasalo pa quiahuac san. Huan sinda se nomonextilini yajmo yuli quinami nehual, cuaquín noje yajmo unca cuali pa nehual. Ma lacaqui yihual hual quipía inacas pa lacaquis.

## 15

*Jesús quinpuhuilía len panus se iborrego hual mopoluc*  
(Mt. 18:10-14)

<sup>1</sup> Huan ajstitihualaloaya moxtin in la'anani jmes hual quipixcaloaya tomin pa in romanos hual huelitiloaya. Noje ajсилоaya yehuanten hual yuliloaya amo cuali, hualaloaya pa quicaquilosquiaya Jesús. <sup>2</sup> Pampa inon quimotex-pahuililoaya in fariseos huan ilamaxtinijmes inminlajtol hual quineltocalo in judíos, quilije:

—In se quinnami quía quinami icnían in lacames hual amo yulilo cuali, quema, lacualo huan yehuanten.

<sup>3</sup> Cuaquinon Jesús quinmilic in laijnamiqutilisli pa quinmactisquiaya, quinmilic:

<sup>4</sup> —Sinda se lalac ca amhuanten quinpía cien borregos capa amaqui chanti, huan se iborrego mopolúa, cuaquinon ¿amo quincahuas in noventa y nueve (nahuipuhualicaxtulihuanahui) borregos capa cataloaya huan yas latemus pa quitas in se hual mopoloc? Quema, yoje quichías. <sup>5</sup> Huan quiman quitas in borrego, quilalis ca paquilisli pa ihuajcol. <sup>6</sup> Huan quiman ajsis quimantica pa ichan, quinnotzas pa monechicusi yehuanten hual icnían pa oc sequin calimes huan yehuanten hual chantilo itenco, quinmilis: “Xicpiacan paquilisli ca nehual, pampa axan niquitac in borrego hual mopoloc.”

<sup>7</sup> Annimitzilía pampa cayasi niman míac paquilisli pin cielo quiman se lalac o se sihual hual amo yuli cuali quipalas iyolo pa pehuas laijnamiquis quinami Dios quinequi. Quema, cayas míac paquilisli pin cielo inahuac in se, amo cayas yoje míac paquilisli inminahuac noventa y nueve hual amo monequi pa quipalasi inminyolo pa pehuasi laijnamiquisi quinami Dios quinequi.

### *Jesús quinpuhuilia inahuac in tomin lapoluli*

<sup>8</sup> O, sinda se sihual quinpía diez tomimes, mochi seje ipati míac, huan sinda quipolúa se ca innojen tomimes, cuaquinon ¿amo quilalaltía se tapalcal pa lahuilisli huan quixpana in cali, huan ca melahualisli quitemúa pa quitas in tomin? <sup>9</sup> Quema, yoje quichía. Huan quiman quita in tomin, quinnotza pa monechicusi icnían sihuames pa oc sequin calimes huan yehuanten hual chantilo itenco, quinmilía: “Xicpiacan paquilisli ca nehual, pampa axan niquitac in tomin hual nicpolujtataya.” <sup>10</sup> Yoje annimitzilía, unca paquilisli ca Dios ilanahuatinijmes pin cielo sinda se hual unca laijlaculi quipala iyolo pa pehuas laijnamiquis quinami Dios quinequi.

### *In xolol hual quilamic itomin itajtzin*

<sup>11</sup> Huan quinmilic:

—Cataya se lalac quinpía ome ixolomes lacames. <sup>12</sup> Huan in xól xocuyol quilic itajtzin: “Tata, xixxiluilil axan ilajco motomin hual cayas pa nehual.” Cuaquinon itajtzin quinxiluilic itomin ca in omenten ixolomes. <sup>13</sup> Huan amo panuje míac tonalijmes, huan ixól xocuyol monechiculic mochi itomin hual quixiluilic itajtzin, cuaquinon quisac pa quiahuac ilali. Uyac pa se lali huejca, huan nepa quilantinemiaya móchi itomin. Amo cajcoquiaya tomin nindeno, yultataya yoje amo cuali. <sup>14</sup> Quiman quilamic mochi hual quiapiaya, hualac se mayandi chichahuac pin lali capa cataya, huan yihual pehuac panuc mayanalisli. <sup>15</sup> Uyac, quiyantic se lalac pin lali pa quimacasquiaya tequipanulisli. Yihual in lalac quitilanic pa icuajmili pa quilachilisquiaya icoyamimes (icuchis). <sup>16</sup> Huan quinequiaya pachihui ca len quicuaftataloaya in coyamimes. Ma yoje, amaqui quimacaya nindeno pa quicuasquiaya. <sup>17</sup> Pampín, quijnamiquic in amo cuali hual quichíac, quipalac iyolo pa laijnamiquisquiaya cuali, moilic: “Quichi tequipanujquimes quinpía notajtzin huan yehuanten quipialo míac pa quicuasi, amo quicualo mochi. Huan nehual nican niunca huan nimiqui pampa nimayantinemi. <sup>18</sup> Nimochijchías axan huan nías ca notajtzin huan niquilis: Tata, nicchíac len unca amo cuali ilaixpan Dios huan molaixpan tehual. <sup>19</sup> Yajmo nimonotza pa niquijtus pampa niunca moxól. Xijchihuili axan pa nicayas se ca motequipanujquimes.” <sup>20</sup> Yoje in xól mochijchíac, uyac ca itajtzin.

Huan ayamo ajsic, quema, cataya huejca huan itajtzin pa ichan quitac ajsitihualac. Huan ca paquilisli niman hué molalujtíac ca ixól, quinapaluc quitenamictataya. <sup>21</sup> Pehuac in xól quilic: “Tata, nicchíac len amo cuali

ilaixpan Dios huan molaixpan tehual. Yoje amo nimonotza pa niquijtus pampa niunca moxól.”<sup>22</sup> Ma yoje, itajtzin quinmilic itequipanujquimes: “Xiejsehuican xijquixtican se nahuas niman cualtichin huan xiclaquentican noxól, xicualicacan se anillo pa ixerixa huan lacsames pa icxihuaimes.<sup>23</sup> Huan xicualicacan in becerro tomahuac hual ticajcoctaloaya pa se fiesta. ¡Xicmictican, ma tilacuacan, ma tipaquican!”<sup>24</sup> Pampa in noxól cataya quinami miquic huan yulic oc sejpa, cataya lapoluli huan axan tiquitaje.” Huan pehualoaya mijtoto ca paquilisli.

<sup>25</sup> In xól hué cataya pin cuajmili. Huan ajsic pa in cali, quinqa quic latzotzontaloaya huan mijtotojtataloaya.<sup>26</sup> Quinotzac pa hualasquiaya se ca in tequipanujquimes tipichinchitos, quilajlanic len panujtaya calijtic.<sup>27</sup> Huan in tequipanujquil quilic: “Axan hualac mocni huan latilanic motajtzin pa quimictisi in becerro tomahuac hual ticajcoctaloaya pa fiesta, pampa mocni hualac. Yajmo unca quinami miquiaya, axan yultica.”<sup>28</sup> Quicaquic inon, cualanic icni hué, amo quinequic calaquic. Huan quisac itajtzin, quiyantic ca lasojlalisli pa calaquisquiaya.<sup>29</sup> Ma yoje, yihual quinanquilic itajtzin: “Xiquita. Quichi xixil nimitztequipanuilía huan amo quiman nimocahuac pa nimitzneltoacas. Huan amo quiman tichmacac se chivito calica ticchihualosquiaya se fiesta nehual huan yehuanten hual niquinlasojla.<sup>30</sup> Huan in tonali in se moxól hualac, in se hual quilamic motomin ca sihuames amo cuajcuali. Huan ¡ticmictilic yihual in becerro tomahuac!”<sup>31</sup> Itajtzin quilic: “Noxól, mojmosta tehual tianca ca nehual huan mochi hual nicpía unca moyaxca.<sup>32</sup> Huan amo cataya yoje ca mocni. Pampín, monequiaya pa ticpialosquiaya in fiesta huan pa ticpialosquiaya niman míac paquilisli. Unca pampa in mocni tehual cataya quinami miquic huan yulic oc sejpa. Quema, unca pampa cataya lapoluli huan axan tiquitaje.”

## 16

### *Jesús laquetza inahuac ilaicanani se teco hual quilantataya itomin iteco*

<sup>1</sup> Cuaquinon Jesús quinlaquetzilizic noje imonextilinjmes, quinmilic:

—Cataya se lalac quiapiaya niman míac calica yuliaya huan quiapiaya se laicanani. Huan sequin quilije in lalac quinami ilaicanani quilantinemiaya len iyaxca in lalac.<sup>2</sup> Pampín in lalac latilanic pa hualasquiaya ca yihual in laicanani huan quilic: “¿Leca nechililo pampa tehual itequi tichlaixtequilijtica? Axan, xilami xiquijcuilu mochi hual nechuiquilijticate moxtin, pampa yajmo tiyes laicanani.”<sup>3</sup> Cuaquín moilic in laicanani: “Axcan, ¿len nía nicchía pampa yajmo niyes ilaicanani noteco? Amo nicpía chichahualisli pa nitequipanus quinami se hual quimati cuajmilúa, huan nipinahuas pa niquinlajlanilis tomin oc sequin.<sup>4</sup> ¡Ah! Axan nicmati len nicchías”, quil quilic, “pa nechajxiltisi oc sequin pa inminchan in tonali hual yajmo niyes laicanani.”<sup>5</sup> Cuaquinon quinnahuatic pa hualalosquiaya ca yihual moxtin yehuanten hual quihuiquilijtataloaya len in lalac iteco. Ajsije sejse huan sejse huan in laicanani quipehualtic ilajlanilisli ca se hual hualac, quilajlanic: “¿Quichi tiquihuiquilía noteco?” Quinanquilic: “Tres cientos sesenta lamachihualoni ichahuac olivos”, quilic.<sup>6</sup> Quilic in laicanani: “Xiquixtili moamal, xicana oc se amal, ximolali huan xiejsehui xiquijcuilu pampa tiquihuiquilía ciento ochenta san”, quilic.<sup>7</sup> Cuaquinon in laicanani quilajlanic oc se, quil quilic: “Huan tehual, ¿quichi titehuiquilijtica?”, quilic. Huan quinanquilic: “Cien hanegas trigo”, quil quilic. In laicanani quilic:

“Xicana in oc se amal huan xiquijcuilu ochenta.” <sup>8</sup> Quimatic iteco in hual quichíac ilaicanani, huan yihual lajtuc ca lajtomes huejué pa in laicanani, mas que quicajcayahuilic in lacal itomin. Lajtuc hué pa yihual pampa in laicanani lanextilic quinami quimatiaya quinami molachilisquiaya mas que quichíac ca lacajcayahualisli. Yajmo yahuiaya ye ilaicanani in lacal iteco. Ma yoje, yehuanten hual quihuiquililoaya iteco axan yahuilooaya quimacalo iyulilisli in laicanani. Yoje —quilic Jesús—, lacames pin lalticpan hual amo quineltocalo Dios, yehuanten quimatilo lachihualo ca oc sequin lacames hual amo quineltocalo Dios. Quema, lachihualo ca míac lajmatilisli, amo yoje míac lajmatilisli quipialo yehuanten hual quineltocalo Dios.

<sup>9</sup> Huan annimitzilía inon: Mas que lacames laijlaculi pin mochi in lalticpan lacuhualo huan lanamacalo ca míac tomin pa quichihuasi in hual amo unca cuali, ma yoje, amhuanten xilachihuacan ca in tomin pa anmochías lajlasojli ca lacames pa yoje pan tonali quiman lamis in tomin, cuaquín ancayas la'ajxiltili pin calimes hual amo quiman lamisi.

<sup>10</sup> Noje Jesús quinmilitic:

—Aqui yes hual quilachilía cuali len tipichin hual quililo pa quilachilis, yoje quilachilis cuali len hué hual quililo pa quilachilis. Huan aqui yes hual amo quilachilía cuali len tipichin hual quililo pa quilachilis, yoje yíal amo quilachilis cuali len hué hual quililo pa quilachilis. <sup>11</sup> Yoje cayas sinda amo anquilachilía cuali innojen hual monotzalo pin lalticpan hual Dios anmitzilía pa anquinlachilis. Dios amo anmitzilis pa anquinlachilis innojen hual yihual iyaxca. Innojen amo quiman lamisi huan monotzalo niman míac hual amo yoje monotzalo innojen pin lalticpan. <sup>12</sup> Huan sinda amo anquilachilía cuali in hual unca iyaxca oc se, nicnequi niqijtúa, in hual iyaxca Dios, cuaquinon Dios amo anmitzmacas len iyaxca pa yes anmoyaxca pa anquilachilis.

<sup>13</sup> Amaqui huil quinquipanuilía ome itecojuan, pampa amo quixtocas in se huan quixtocas in oc se, o quineltocas in se huan amo quineltocas in oc se. Huan noje amo huil anquitequipanuilía Dios sinda itequi antequipanúa san pa anquinmanas innojen hual iyaxca in lalticpan hual anquijtúa monotzalo.

<sup>14</sup> Quincaquiloaya mochi innojen lajtomes in fariseos, huan yehuanten quilasojlaloaya tomin míac. Pampín quilaxocuyililoaya Jesús pa quixijxicu-losquiaya. <sup>15</sup> Pampín Jesús quinmilitic:

—Amhuanten amo anmocahua pa anmonextilis inminlaixpan moxtin pampa anunca lacames niman cuajcuali. Ma yoje, Dios quimati len anquijtúa pa anmoyolo. Cate innojen, quema, hual lacames quijitulo pampa monotzalo míac, huan Dios amo quijtúa monotzalo míac. Innojen quicualantilo Dios, niman amo quinmixtoca.

### *Dios ilajtol huan quinami huelitía*

<sup>16</sup> Dios quimacac Moisés ilajtol huan Moisés quijcuiluc. Huan Dios quinmilitic ilajtunijmes ilajtol huan yehuanten quijcuiluje. Huan mochi hual quijcuiluje Moisés huan ilajtunijmes Dios, inon anmitzmaxtic mochi hual Dios quinequiaya pa anquimatisquiaya quinami yihual unca. Cuaquinon hualac Juan Lacuayatequini, huan Dios pehuac quimaxtic lajtol yancuic. Axan moxtin quicacticate ilamachiltlisli cuali Dios huan quinami huelitía. Huan motolinilo ca chichahualisli pa quipiasi Dios huelitijtica pa inminyolo. Ma yoje, amo quinequilo quipialo quinami Dios quilalic pa quipialosquiaya. <sup>17</sup> Monequiaya pa cayasquiaya len ca míac chichahualisli pa quinlamis in cielo huan in lalticpan. Ma yoje, ca in míac chichahualisli, amo quiman huil

quitzacuiliaya pa camo mochías jan se lajtol niman tipichin hual quijtúa Dios ilajtol.

*Aquinojen hual quincajcahualo inminsihuahuan*  
(Mt. 19:1-12; Mr. 10:1-12)

<sup>18</sup>'Se lacal hual yajmo quinequi isihua huan quicajcahua, huan cuaquinon monamictía ca oc se sihual yoje cantica se sihual hual amo iyaxca. Huan jan yoje se lacal cana se sihual hual amo iyaxca sinda monamictía ca se sihual lacajcahuali hual ilahuical yajmo quinequiaya.

*In lacal hual quipiaya niman míac calica yuliaya huan Lázaro hual amo quipiaya len*

<sup>19</sup>'Cataya, quil, se lacal hual quipiani niman míac. Molaquentini ca tzotzomajli cualtichin huan mojmosta quichihuani fiesta, quilamini míac tomin mojmosta. <sup>20</sup> Huan cataya se hual amo quipiani nindeno, yihual itocani Lázaro, lastataya cocoxqui pa ilalapujquil ícali in lacal hual quipiani míac. Huan in Lázaro quipiaya sahuatera pa mochi icuerpo. <sup>21</sup> Huan mojmosta quinequiaya míac pa pachihuisquiaya ca in lacualisli hual quimayahuiloya itzindan capa lacuani in lacal hual quipiani míac. Ma yoje hualaloaya in pelojmes huan quipaluililoaya isahuames Lázaro. <sup>22</sup> Cuaquinon se tonali polehuic in lacal Lázaro huan Dios ilanahuatinijmes pin cielo quihuicaje pin cielo (ilhuicac) capa unca Abraham, yihual hual quinpehualtic yehuanten in judíos. Huan polehuic in lacal hual quipiani míac huan quilalpachuje. <sup>23</sup> Huan cuaquin moitac capa yalo yehuanten hual miqulo amo quineltocaticate Dios, huan nepa panuaya míac lacocoltilisli. Cuaquín lachíac huan quitac huejca Abrahám, huan yihual cataloaya Lázaro. <sup>24</sup> Huan in lacal hual quipiani míac quitzajtzilic, quilic: "Tata Abrahám, xichicnili, huan xictilani Lázaro pa quipaltisli pa al ilamili ixerixa pa nechiztialtilis nonejnepil, pampa nipanujtica míac lacocoltilisli pa in milinilisli." <sup>25</sup> Huan Abraham quilic: "Nito, xiquijnamiqui quinami tiquinpiani len niman cuajcuali nepa capa tiyulini pin lalticpan, huan Lázaro quipiani len amo cuali. Huan axan nican yihual quipía len cuali pin cielo huan tehual tipanujtica lacocoltilisli. <sup>26</sup> Huan ca mochi inon, unca se huejcalan niman palahuac lajco capa yehuanten huan amhuanten. Pampín yehuanten nican hual cuajnesi quinequiloaya panulo pa amhuanten amo huil. Noje nepa amo huil panulo pa yehuanten nican." <sup>27</sup> Cuaquín in lacal hual quipiani míac quilic: "Nimitztemachía cuaquín, Tata Abraham, xictilani Lázaro pa quinnahuatis yehuanten pa ichan notajtzin, <sup>28</sup> pampa niquinpía macuili nocnían. Ma quinnahuati pa yehuanten noje amo hualasi ca niquic capa panusi in lacocoltilisli." <sup>29</sup> Abraham quilic: "Yehuanten quipialo ilajtol Dios hual Moisés quijcuiluc, huan quipialo in hual quijcuiluje Dios ilajtunijmes. Ma momaxtican len unca lajcuiluli huan ma quineltocacan." <sup>30</sup> Huan in lacal hual quipiani míac tomin quilic: "Nocnían amo quineltocasi Moisés huan Dios ilajtunijmes, Tata Abrahám. Ma yoje, sinda yahuiaya pa nocnían se hual miquic, cuaquinon, quema, quipalalosquiaya inminyolo pa pehualosquiaya laijnamiqulo quinami Dios quinequi." <sup>31</sup> Abraham quilic: "Sinda mocnían amo quineltocalo in hual quijcuiluje Moisés huan Dios ilajtunijmes, cuaquinon amo huil quinlaneltocaltía se hual miquic huan yulic oc sejpá, mas que mocuepac capa yehuanten pa quinmilisquiaya."



## 17

*Jesús quinmotexpahuilía aquinojen quinmaxtilo oc sequin pa camo quinel-tocasi*

(Mt. 18:6-7, 21-22; Mr. 9:42)

<sup>1</sup> Cuaquinon quinmilic Jesús imonextiliniymes:

—Amo mocahuas pa cayasi lacames hual quichihuasi len pa quitilanilis in-minyolo oc sequin lacames pa yehuanten quichihuasi laijlaculisli. Pampín, ¡quichi yahui panúa lacocoltilisli in se hual quichías len quinami inon!  
<sup>2</sup> Yesquiaya cuali pa quipilosquiaya se melapili etic pa iquixlan in se huan quillasalosquiaya pa in al huejcalan. Jo quema, cuali in quipanusquiaya, amo san gá yihual cuajnesi quitilanilis iyolo pa quichías laijlaculisli se ca yehuanten hual amo quipialo míac tonalijmes pehuaje necheltocaje, yehuanten hual necheltocalo quinami xolomes. <sup>3</sup> Ximolachilican pa camo panus inon. Sinda mocni quichía se laijlaculisli, cuaquín xicajua. Sinda quipala iyolo pa pehuas laijnamiquis quinami Dios quinequi, xicpujpuhua huan yajmo xiquijnamiqui len quichíac. <sup>4</sup> Huan cuajnesi mijchihuilis laijlaculisli tehual ca chicome lachihualisli pa se tonali huan pa in tonali hualas ca tehual quiman mijchihuic seje ca in chicome lachihualisli, huan mitzilis ca mochi iyolo: “Nechcocúa noyolo pampa nimijchihuic in huan axcan yajmo quiman nimijchihuís.” Cuaquín sinda yoje mitzís, xicpujpuhua huan amo xiquijnamictía in laijlaculisli hual mijchihuic.

*Laneltocalisli quimaca chicahualisli se*

<sup>5</sup> Ilanahuatinijmes quilije in Tata Jesús, quilije:

—Xitechmaca míac lahuelilitlisli pa tilaneltocasi niman cuali.

<sup>6</sup> In Tata Jesús quinmilic:

—Se ilatocli mostaza ixua huan moscaltía huan mochías se cuahuil. Sinda anquipía laneltocalisli hual moscaltía quinami se ilatocli mostaza, cuaquín huil anquilisquiaya in xocol cuahuil nican, quil: “Ximocapuna huan ximotoca lajco pin al huejcalan.” Cuaquín anmitzneltocasquiaya, quichiasquiaya jan quinami tiquilic.

*Jesús quinmilita len quipía pa quichías se hual latequipanuilita*

<sup>7</sup> Huan sinda se ca amhuanten ticpiasquiaya se latequipanujquil laxajtica o je local quinlachilijtica borregos, huan quisas pin cuajmili pa hualas pa in cali, amo tiquilis: “Xihuala ximolali pa tilacuas.” <sup>8</sup> No, tiquilisquiaya: “Xiclali pan tixuxli pa yucsis pa tichmacas pa nilacuas, ximochijchía pa tichtequipanuilis. Quiman nilamis nilacuas huan nilaunis, cuaquín huil tilacuas huan tilaunis tehual.” <sup>9</sup> Cuaquinon, ¿ticsehuisquiaya in tequipanujquil pampa quichíac len tiquilic? No, amo ticsehuisquiaya. <sup>10</sup> Yoje amhuanten, quiman yes anquichíac mochi in hual Dios anmitzilic, cuaquín xiquijtucan: “Tehuanten titequipanujquimes hual amo timonotzalo, jan ticchihuaje inon hual ticpiaje pa ticchihuasi.”

*Jesús quinpajtía majlacli cocoxquimes hual quipialo lepra*

<sup>11</sup> Huan cataya in Tata Jesús yajtiahuiaya pa Jerusalén, panujtiahuiaya lajco pa in ome lalimes Samaria huan Galilea pa inmintenco. <sup>12</sup> Huan nican ajsitihualaya pa se caltilan tipichin capa quinnamiquic majlacli (diez) lacames quipialoaya in cocolisli itoca lepra. Yehuanten mocahuajque huejquita capa yihual cataya huan quinotzajque chicahuac, quilijqque:

<sup>13</sup> —¡Jesús, Lamaxtini, xitechnicnili!

<sup>14</sup> Jesús quinmitac huan quinmilic:



—Ximohuicacan huan ximonextican ca in tiopistas.

Huan cuaquinon quinpanuc quiman mohuicatihuiluolaya, yehuanten pajtijque. <sup>15</sup> Se ca yehuanten quiztataya pampa pajtic, mocuepac quinmijtutica lajtomes huejué huan cuajcuali pa Dios ca lajtol chicahuac. <sup>16</sup> Hualac huan huetzic pa icxihuajmes Jesús huan quisehuic. In se yec local samariteco huan in judíos amo quinmixtocalo in samaritecos. <sup>17</sup> Yehuanten hual cataloaya ca Jesús quicaquijque Jesús quijtuc:

—¿Amo cataloaya diez lacames hual niquinpajtic? Huan in chicnahui lacames, ¿capa cate? <sup>18</sup> ¿Unca jan in se san hual mocuepasquiaya pa quinmijtsquiaya lajtomes huejué huan cuajcuali pa Dios, in se local hual amo lacatic pa tolali tehuanten?

<sup>19</sup> Cuaquinon Jesús quilic in local samariteco:

—Ximoquetza huan ximohuica. Tichneltocac, pampín tipajtic, tiunca laquixtili pin amo cuali.

*Jesús quinmilía quinami ajsis inon quiman Dios huelitía*  
(Mt. 24:23-28, 36-41)

<sup>20</sup> Quilajlanijque Jesús in fariseos, quilijque:

—¿Quiman ajsis in tonali hual huelitía Dios pan lalticpan?

Quinnanquilic Jesús:

—Mas que quitas se mochi in lanextilisli hual nesisli nican pin lalticpan, ma yoje amo huil quimatis calía cayas ilanextilisli calica quimatis quinami ajsis inon quiman Dios huelitía pan lalticpan. Amo ajsis ca len lanextilisli hual quita se. <sup>21</sup> Amo yalo quijtulo: “¡Quita, nican unca!”, o “¡Quita, nepa unca!” No, amo yalo quijtulo yoje. Xiquitacan. Inon quinami Dios huelitía axan unca capa amhuanten.

<sup>22</sup> Cuaquinon Jesús quinmilic imonextilinjmes, quilic:

—Ajsisi tonalijmes huan anquinctías pa ajsis jan ajnaxcan jan se tonali ca in tonalijmes capa nehual ilacal in cielo nihuelitis pan lalticpan. Anquinctías inon quiman ayamo nicpías pa nipehuas nihuelitis. Huan mas que anquinctías, ayamo ajsis. <sup>23</sup> Anmitzilisi: “¡Quita, unca nepa! ¡Quita, unca nican!”, quil quilisi. Amo xijcahuacan anmotequipanulisli pa anquintocas in lacames, yehuanten islacatilo. <sup>24</sup> Quinami in lapelanilisli lapelania pa se ilajco pa in oc se ilajco in cielo, yoje yes in tonali hual nihualas nehual ilacal in cielo. Moxtin quimatis quiman inon panúa. <sup>25</sup> Ma yoje, amo ajsis in tonali quiman ayamo nipanuc in lacocotilisli hual monequi pa nipanuc huan pa nechilisi: “Amo ticnequilo pa ticayas nican.” Yoje nechilisi yehuanten hual yulticate axan. <sup>26</sup> Huan jan quinami catani innojen tonalijmes hual yulini Noé pan lalticpan, yoje cayas pa innojen tonalijmes quiman nehual ilacal in cielo nimocuepas pan lalticpan. <sup>27</sup> Nepa capa yulini Noé, lacames jan lacuanijme, launijme, monamicinijme huan quinmacanijme inminxolomes pa monamictilosquiaya. Jan quijnamiquinijme innojen san. Yoje lachihuanijme, huan cuaquin ajsis in tonali hual calaquic Noé calijtic in arca. Cuaquinon hualac mochi in al huan quinmatoctic moxtin in oc sequin.

<sup>28</sup> Jan yoje catani quinami inon pa innojen tonalijmes hual yulini in local itocaya Lot. Moxtin lacuanijme, launijme, lacuhuanijme, lanamacanijme, latocanijme, quinchihuanijme calimes. <sup>29</sup> Huan in tonali hual quisac Lot pa quiahuac in caltlan Sodoma, huetzije tixuxli huan azufre, quisac pin cielo, huan moxtin in oc sequin polehuije. <sup>30</sup> Quinami cataya ca yehuanten, yoje cayas pan in tonali nehual ilacal in cielo nimonextis ca moxtin in lacames pin lalticpan. <sup>31</sup> Pan in tonali, ma camo quijnamiqui amaqi len iyaxca hual

quipías, ma camo laijnamiqui quinami yahui quinquixtía pa camo xitinis in hual quipía. Sinda unca pa quiahuc icali, ma camo calaqui. Huan noje sinda unca pin cuajmili, ma camo momalina pa canas len cayas pa itepotzcon. <sup>32</sup> Xiquijnamiqican len quipanuc isihua Lot. <sup>33</sup> Aqui yes hual jan qitemus san quinami huil quipías mochi hual quinequis pa iyulilisli nican pan lalticpan, yoje yihual quipolus iyulilisli. Dios quitilanis pa polehuilisli hual amo quiman lamis. Huan aqui yes hual amo qitemujtías jan quinami quipías mochi in hual quinequis pa iyulilisli, yoje yihual quipías iyulilisli. Quema, quipías iyulilisli aqui yes hual momacahuiltis pa miquis pampa yihual quilasoja Dios huan ilahueliltisli. <sup>34</sup> Annimitzilía pa in layúa, cayasi ome lacames pan se lapexli. Se cayas laquixtili pin polehuilisli, huan in oc se yes lacahuali. <sup>35</sup> Cayasi ome sihuames testicate, in se cayas laquixtili huan in oc se yes lacahuali. <sup>36</sup> Cayasi ome pin cuajmili. Se yes laquixtili huan in oc se yes lacahuali.

<sup>37</sup> Huan yehuanten quilajlanijque, quilijque:

—¿Ca capic, Tata?

Jesús quinmilic:

—Jan quinami capa unca se mijquil, nepa monechicusi in tzopilojmes.

## 18

### *Se laijnamiqutilisli inahuac se sihual ihuían huan in la'ajuani*

<sup>1</sup> Cuaquinon quinmilic Jesús se laijnamiqutilisli pa quinmaxtisqueiaya quinami monequi pa moxtin amo mocahuasqui pa quilajlanisqui Dios huan amo siahuisqui, <sup>2</sup> quinmilic:

—Cataya se la'ajuani pa se caltilan amo momajtiaya ilaixpan Dios, huan amo quimacajsiaya hual quijtuloaya lacames. <sup>3</sup> Huan cataya se sihual ihuían pin caltilan amo mocahuaya pa hualas capa yihual, quilijtataya: “Xichnapati pa camo nechajcayahuas in nolacocolini.” Huan pa míac tonalijmes amo quinequiaya quinapati in la'ajuani. <sup>4</sup> Ma yoje, panuje tonalijmes, quijtuc laijtuc yihual, quil: “Amo nimomajtía ilaixpan Dios, huan amo nicmacajsiaya hual quijtulo lacames. <sup>5</sup> Ma yoje, nía nicnapatía in sihual ihuían jan pampa nechmacatica tequil. Sinda amo nicnapatis, yihual amo mocahuas pa hualas capa nehual huan nejsiahuiltis huan ca nadita amo huil nipanujtías in tequil.”

<sup>6</sup> Cuaquinon in Tata Jesús quilic:

—Xijcaquican len quijtúa in la'ajuani amo cuali. <sup>7</sup> Huan Dios, ¿len quichías? ¿Amo quinnapatis yehuanten hual yihual quinlajtultic pa yelosquiaya iyaxca? Huan ¿huejcahuas pa quinnapatis? <sup>8</sup> Neli annimitzilía, Dios quinnapatijtiquisas. Ma yoje, nehual ilacal in cielo, pa in tonali hual nihualas oc sejpá, ¿nía niquinmita míac lacames pan lalticpan hual quineltoalo Dios ilamachiltisli cuali?

### *Se laijnamiqutilisli inminahuac in fariseo huan in la'anani hual quipixcaya tomin*

<sup>9</sup> Cuaquinon quinmilic Jesús se laijnamiqutilisli pa yehuanten hual quijtuloaya laijtuc yehuanten pampa cataloaya lacames cuajcuali huan quinxiculoaya moxtin oc sequin. Quinmilic:

<sup>10</sup> —Cataloaya ome lacames panquisaje pa in tiopan hué pa quilajlanilosquiaya Dios. Se yec fariseo, in oc se yec se la'anani hual quipixcaya tomin pa in lahueliltisli romano. <sup>11</sup> Moquetzac in fariseo, quilic Dios in lajtomes pa lanextisqueiaya quinami yihual in fariseo cataya cuali, quilic:

“Dios, nimijsehuía pampa amo niunca quinami moxtin in oc sequin lacames. Yehuanten laxtequinijmes, lacames hual amo quiman quinelto calo mochi in lajtol, lacames hual quinmanalo oc sequin sihuames. Quema, yehuanten quinami in la'anani hual quipixca tomin pa in romanos. <sup>12</sup> Nel nimosahua ome lasahualisli mochi chicué tonalijmes, nimitzmaca se hual unca ca mochi diez tomin hual nechlaxlahuilo huan se hual moita ca mochi diez hual nicpixca.” Yoje quilic in fariseo. <sup>13</sup> Huan in se hual quipixcaya tomin mocahuac huejca, amo quinequiaya lachía pa in cielo. Motecuaya pa itzindan iquixlan pampa icnotiaya pampa quinchíac laijlaculisli, quilijtataya: “O Dios, xichicnili, xichquixtili nolaijlaculisli pampa nel in se hual nicchía laijlaculisli molaixpan tehual.” Yoje quilic in lalac hual quipixcaya tomin.

<sup>14</sup> Cuaquinon Jesús quinmilic yehuanten hual quicactataloaya:

—Annimitzilía inon. Temuc pa ichan in se hual quipixcaya tomin, Dios quizataya quinami yajmo quipixtataya ilaijlaculisli, pampa Dios quicaquic ilatemachilisli. Huan in fariseo temuc pa ichan quipixtataya ilaijlaculisli. Cataya yoje pampa aqui yes hual mochías hué ilaixpan Dios, yihual Dios quichías tipichin. Huan aqui yes hual mochías tipichin ilaixpan Dios, yihual Dios quichías hué.

*Jesús quintuchía in xolomes  
(Mt. 19:13-15; Mr. 10:13-16)*

<sup>15</sup> Huan quinhualiquililoaya Jesús in xolotzitzindis noje pa yihual quinmacasquiaya. Quitajque inon imonextilinijmes, pehuajque quinmajuajque yehuanten hual quinhualiquililoaya. <sup>16</sup> Ma yoje, quinnotzac Jesús in xolotzitzindis pa hualalosquiaya capa yihual, quinmilic imonextilinijmes:

—Xiquinmacahuiltican pa hualasi capa nehual in xolotzitzindis. Amo xiquintzacuilitican, pampa capa huelitía Dios jan moitasi yehuanten san hual quinelto calo ilajtol Dios quinami quinelto calo xolotzitzindis. <sup>17</sup> Quema, annimitzilía neli, aqui yes hual amo quimacahuiltía pa Dios huelitis laijtic yihual quinami se xolotzindi quimacahuiltía huelitía, yihual amo quiman quipías Dios huelitijtica laijtic yihual. Unca pampa se xolotzindi quinelto ca mochi ilajtol Dios huan quinelto ca mochi iyolo.

*Se lalac yancuic hual quipiaya míac tomin laquetza ca Jesús  
(Mt. 19:16-30; Mr. 10:17-31)*

<sup>18</sup> Huan se hué hual yec lalac yancuic quilajlanic Jesús, quilic:

—Lamaxtini ticuali, ¿len nicchías pa nicanas in hual iyaxca Dios pa techmacas, iyulilisli hual amo quiman lamis?

<sup>19</sup> Jesús quilic:

—¿Leca tichilic pampa nicuali? Jan se san unca cuali, in unca Dios.

<sup>20</sup> Tiquinmati Dios ilajtomes hual ticpiás pa tiquinneltocas: Amo xicana sihual hual amo mosihua, amo xilamicti, amo xilaixtequi, amo xiquili islacatilisli inahuac amaqui, xiquinlasojla ca momajtilisli motajtzin huan monantzín.

<sup>21</sup> In lalac yancuic quilic:

—Mochi innojen niquinneltocaya quiman niyec xolol huan quiman ni-mochíac lalac.

<sup>22</sup> Quicaquic Jesús inon, yihual quilic:

—Unca se lachihualisli hual ayamo ticchíac. Mochi hual ticpiá xicnamaca huan xiquinxiluili yehuanten hual amo quipialo. Yoje ticpiás nepa pa in cielo len hual monotza niman míac. Huan xihuala, xichtoca pa tiyes nomonextilini.

<sup>23</sup> Quincaquic innojen lajtomes in lalac yancuic, pehuac quicocuc iyolo míac, pampa quiapiaya míac tomin. <sup>24</sup> Quitac Jesús quinami in lalac yancuic icnotijiahuiaya, huan quiituc:

—¡Neli unca etic pa yehuanten hual quipialo míac pa quimacahuiltisi pa Dios huelitis pa inminyolo! <sup>25</sup> Quema, unca niman etic pa se hual quipía míac pa quipías Dios huelitijica pa iyolo. Amo unca yoje etic pa se camello calaquís huan quipanahuis pa iixtololon se lajtzomaloni.

<sup>26</sup> Yoje yehuanten hual quicaquijque inon quilijque:

—Cuaquín amo unca amaqui hual huil yes laquixtili pin ipolehuilisi ilaijlaculisli.

<sup>27</sup> Jesús quinnanquiloc:

—Dios huil quichía len yes hual amo huil quichihualo lacames.

<sup>28</sup> Cuaquinon Pedro quiloc:

—Xiquita. Tijcajcahuaje mochi hual toyaxca pa timitztocalosquiaya pa tiyelosquiaya momonextilinijmes.

<sup>29</sup> Jesús quinmilic:

—Neli annimitzilía inon: Cuajnesi quincajcahuas se icali o isihua o icnían o itajtzin huan inantzin o ixolomes. Quincajcahuas pa quipías Dios huelitijica pa iyolo. <sup>30</sup> Se hual quichías yoje canas niman míac, huan quitas quinami amo cate míac innojen hual quincajcahuac. Quema, huan panus yoje ca moxtin, pampa quinpías innojen axan capa yultica pin lalticpan. Huan pin lalticpan yancuic hual yahui caya, quipías yulilisi hual amo quiman lamis.

*Jesús laquetza oc sejpa pa quinmilis pampa yahui miqui*

*(Mt. 20:17-19; Mr. 10:32-34)*

<sup>31</sup> Cuaquinon Jesús quinhuicac in doce ilanahuatinijmes capa cataloaya inminhuían, quinmilic:

—Xiquitacan. Tipanquisticate pa Jerusalén huan lamis mochías mochi hual quiicuilluje Dios ilajtunijmes hual nehual ilacal in cielo nicpías pa nipanus. <sup>32</sup> Quiicuilluje pampa nehual nechtemacasi ca yehuanten hual amo judíos. Yehuanten nechuitzquilisi, nechuejuecaltisi, nejchijchasi. <sup>33</sup> Cuaquinon nechuitequisi huan nechmictisi. Huan quiman nechpanus inon, panusi ye tonalijmes huan niyulis oc sejpa.

<sup>34</sup> Yehuanten amo quimatiloaya nindeno len quinequiaya quiitu in lajtol hual Jesús quinmilic. Cataya quinami laticumac inminyolo.

*Jesús quipajtia se pachacal*

*(Mt. 20:29-34; Mr. 10:46-52)*

<sup>35</sup> Ajsitihualaya Jesús pa Jericó, huan cataya se lalac pachacal molalijtataya pa itenco in ojlí, motemachilijtataya tomin. <sup>36</sup> Huan quicaquic in míac lalacalera panujtataloaya, quilajlanic pa quimatisquiaya len panujtataya. <sup>37</sup> Quimachiltijque pampa Jesús in nazaretco panujtataya. <sup>38</sup> Pampín tza-jtzic, quiloc:

—¡Jesús, tehual ixól David, xichicnili nehual!

<sup>39</sup> Yehuanten hual nejnemiloaya quilaicantataloaya Jesús cajuajque pa mocahuasquiaya. Ma yoje, yihual jan yoje amo mocahuaya pa tza-jtzisquiaya chicahuac, quiloc:

—¡Tehual ixól David, xichicnili nehual!

<sup>40</sup> Moquetzac Jesús, latilanic pa quihuicalosquiaya in pachacal capa yihual. <sup>41</sup> Ajsic yihual capa Jesús cataya, Jesús quiloc:

—¿Len ticnequi pa nimijchihuilis tehual?

Huan yihual quiloc:

—Tata, nicnequi nilachía.

<sup>42</sup> Huan Jesús quilic:

—¡Xilachía, cuaquín! Pampa ticneltocac, yoje tipajtic.

<sup>43</sup> Jan ajnaxcan lachiaya huan pehuaya quitoca Jesús pa in ojli, quinmij-tutataya lajtomes huejué huan cuajcuali pa Dios. Huan moxtin in oc sequin quijtuloaya lajtomes huejué pa Dios pampa quitajque len panuc.

## 19

### *Jesús huan Zaqueo*

<sup>1</sup> Cuaquín Jesús calaquic in caltilan Jericó, <sup>2</sup> huan pejtiahuiaya quipanahui in caltilan. Huan cataya se lalac motocaya Zaqueo, yihual yec in hué ca in la'ananiyimes hual quipixcaloaya tomin pa in romanos hual huelitiloaya. Yec lalac hual quipiaya miac tomin. <sup>3</sup> Yihual quitemuaya quinami quitasquiaya Jesús pa quimatisquiaya aqui cataya. Huan amo huil quitaya pampa in lalacera quitzacuiljtataloaya. Yojqe amo huil quitasquiaya pampa yihual yec lalac cuixtic huan amo huil lachiaya pa pani yehuanten. <sup>4</sup> Pampín molalujtíac ca capic yahuiloaya panulo moxtin. Lejcuc pan se cuahuil hual itoca sicómoro, lejcuc pa huil quitasquiaya Jesús, pampa yahuiaya panu pa in ojli nepa. <sup>5</sup> Huan panuc Jesús ca ompic, lachíac pa pani huan quilic:

—Zaqueo, xitemujtiquisa, pampa monequi pa nimitzpacalulilis axan pa mochan. <sup>6</sup> Yoje temujtiquisac Zaqueo, huan paquiaya niman miac pa yoje quinamiquisquiaya Jesús. <sup>7</sup> Quitajque inon in lalacera, moxtin pehualoaya cualanilo pampa Jesús quichíac inon, quijtuloaya:

—Yihual uyac pa paxalus pa ichan se lalac laijlaculi.

<sup>8</sup> Cuaquinon moquetzac Zaqueo, quilic in Tata Jesús:

—Xiquita, Tata. Nia nicmaca yehuanten hual amo quipialo nindeno ilajco mochi in hual nicpía. Huan mochi sejse hual nijquixtilic tomin ca lacajcayahualisli, axan nía niclaxlahuía nahui tomin pa sejse tomin hual nijquixtilic yihual.

<sup>9</sup> Huan Jesús quilic:

—Axan in tonali moxtin pa icali Zaqueo cate laquixtili pin ipolehuilisli inminlajlaculisli, pampa yihual neli unca se imiahuil Abrahám. Axan quineltoca Dios quinami Abraham quineltocani. <sup>10</sup> Unca laquixtili pin polehuilisli pampa nehual ilacal in cielo nihualaya pa nictemus huan pa nijquixtis pin polehuilisli aqui hual polejtataya.

### *Jesús quinmilía se laijnamiqutilisli inahuac in majlacli (diez) tomin (Mt. 25:14-30)*

<sup>11</sup> Quincaquiloaya yehuanten innojen lajtomes, cuaquinon Jesús quinmilic oc se laijnamiqutilisli pa quinmaxtisquiaya. Quinmilic inon pampa amo cataloaya huejca pa quiahuac Jerusalén, huan quijtuloaya yehuanten pampa jan ajnaxcan yahuiaya ajsi pan lalticpan in tonali hual Dios pehuaya hueliti. <sup>12</sup> Huan Jesús quinmilic:

—Cataya se lalac lacatic pan huejueyenten, itajtzin yec se hué. Yahuiaya yahui in lalac pa se lali huejca, nepa yahuiloaya quichihuililo pa yesquiaya inminhué, cuaquinon yahuiaya mocuepa pa ilali. <sup>13</sup> Ayamo uyac, huan laticpan pa hualalósquiaya capa yihual majlacli (diez) itequipanujques hual quitequipanuililoaya yihual ihuán. Quimacac tomin mochi sejse, quinmilic: “Xilacuhuacan huan xilanamacacan ca in tomin pa quiman nimocuepas.” Cuaquinon uyac. <sup>14</sup> Ma yoje, yehuanten pa ilali amo quixtocaloaya, huan

quinahuatije pa quililosquiaya: “Amo ticnequilo in se pa huelitis ca tehuanten.”<sup>15</sup> Panuje tonalijmes, mochíac inminhué yehuanten nepa pin lali huejca. Cuaquinon, mocuepac pa ilali, quinnotzac pa hualalosquiaya capa yihual in diez tequipanujquimes hual quinmacac in tomin. Quinnotzac pa quimatisquiaya quinami lacuhuaje huan lanamacaje huan quichi canaje ca in tomin.<sup>16</sup> Hualac capa yihual in se calica pehuaya quilajlani quinami quichíac ca itomin, quilic: “Tata, motomin momiactic huan axan cate diez tomin pa mochi sejse tomin hual tichmacac.”<sup>17</sup> Huan in Tata quilic: “Ticchíac cuali, tehual titequipanujquil cuali. Ticchíac cuali ca in nadita hual nimitzilic pa ticchihuasquiaya. Pampín, nicmati pampa tehual ticmati ticchía cuali ca mochi hual ticchías. Xihueliti pa innojen diez cajcaltlan.”<sup>18</sup> Hualac oc se tequipanujquil, quilic: “Tata, motomin momiactic huan axan cate macuili tomin pa sejse tomin hual tichmacac.”<sup>19</sup> Huan in hué quilic noje in se, quil: “Xihueliti tehual pa innojen macuili cajcaltlan.”<sup>20</sup> Hualac oc se, quilic: “Tata, nican unca motomin, nicajcoquiaya pa se dango.”<sup>21</sup> Nicchíac yoje pampa nimomajtiaya molaixpan tehual pampa tehual tiunca se lalac chicahuac quinami se hual amo quipía pachihuilisli. Tiquihuica len amo ticlalic, ticpixca len hual amo tictocac.”<sup>22</sup> In hué quilic: “Nimitzmotexpahuilía tehual pampa in hual tiquijtuc, titequipanujquil elehuis. Ticmatiaya pampa niunca se lalac chicahuac hual nicuica len amo niclalic. Huan ticmatiaya nel se lalac hual nicpixca len amo nictocac.”<sup>23</sup> ¿Leca, nuso, amo ticlalic notomin ca yehuanten hual quilanehuilo? Cuaquinon nehual nijquixtiaya ca miac quiman nihualaya.”<sup>24</sup> Cuaquín quinmilic yehuanten hual nepa moquezataloaya, quil: “Xijquixtilican in tomin huan xicmacacan in se hual canac diez tomin pa mochi sejse tomin hual nicmacac.”<sup>25</sup> Huan quilije: “Tata, quipía diez tomin pa mochi sejse tomin hual ticmacac.”<sup>26</sup> In hué quilic: “Annimitzilía inon. Aquí yes hual quipía, yihual quimacasi oc sequin miac. Huan aquí yes hual amo quipía, yihual quiquixtilisi in nadita hual quipía.”<sup>27</sup> Huan innojen nolacocolinjmes hual amo quinequiloaya pa niyesquiaya inminhué, xiquinhualicacan nican, xiquinmictican nolaiixpan.”

*Jesús calaqui pin Jerusalén  
(Mt. 21:1-11; Mr. 11:1-11; Jn. 12:12-19)*

<sup>28</sup> Lamic Jesús quinmilic innojen lajtomes, uyac laicantiahuiaya huan ja umpa quitocatiahuiloaya yehuanten moxtin, panquistiahuiloaya pa Jerusalén.<sup>29</sup> Ajsijque ilaixpan in lomita (tepetzindi) itoca Olivos, amo cataloaya huejca Betfagé huan Betania. Nepa Jesús quintilanic ome imonextilinjmes,<sup>30</sup> quinmilic:

—Xicalaquican in caltilan tipichin hual unca anmolaixpan. Nepa capa ancalaquis, anquitas se burra ixól ilpitica, ayamo quiman lejcuaaya amaqui. Xictomacan huan xicualicacan.<sup>31</sup> Huan sinda se anmitzljajlanis: “Huan ¿leca anquitontica?” cuaquín yoje anquilis: “Monequi pa in Tata quipías yihual pa lejcus.”

<sup>32</sup> Yoje uyaje yehuanten hual Jesús quintilanic, quitajque in burrito jan quinami Jesús quinmilic.<sup>33</sup> Huan quitontataloaya in burrito, itecojuan quinmilijque:

—¿Leca anquitontica in burrito?

<sup>34</sup> Quinmilijque:

—Monequi pa in Tata quipías yihual pa lejcus.

<sup>35</sup> Quihualicajque in burrito capa cataya Jesús. Cuaquinon quinlasajque inminlaquemes pani in burrito, quilejcultijque Jesús ipan. <sup>36</sup> Cuaquinon yajtiahuiaya in burrito, imonextilinjmes Jesús quilaicantiahuiiloaya lapipixtitataloaya ca inminlaquemes pa ojli pa yoje in burro nejnemisquiaya inminpan in laquemes. <sup>37</sup> Yojque ajsitiahuiaya Jesús ca capic pehualosquiaya temulo pin lomita (tepetzindi) itoca Olivos pa Jerusalén. Huan moxtin in míac monextilinjmes pehualoaya quijtulo lajtomes huejué huan cuajcuali pa Dios ca míac paquilisli huan ca lajtol chicahuac. In quichihualoaya pampa quinmitajque in míac hual Jesús quinchíac, yojque quinnextililoaya pampa yihual quiipiaya ilahuelilitlisli Dios. <sup>38</sup> Quililoaya:

—¡Dios quituchía huan quichihuilijtia cuali in hué hual quitilanic pan lalticpan! ¡Dios quijtuni pampa yahuiaya huala ca ilahuelilitlisli Dios! ¡Pin cielo Dios mocahua ca mosehuilisli ca in lacames! ¡Huan nepa capa niman pa pani moxtin quijtulo lajtol hué huan cuali pa Dios pampa inon!

<sup>39</sup> Sequin fariseos hual cataloaya ca in míac lalacera quilijque Jesús:

—Lamaxtini, xiquinmili momonextilinjmes pa mocahuasi.

<sup>40</sup> Quinnanquilic Jesús, quil:

—Annimitzilía amhuanten pampa sinda amo nahuatilosquiaya yehuanten, cuaquinon tzajzilosquiaya in tixcalimes.

<sup>41</sup> Huan quiman ajsitajque pa Jerusalén, chocac Jesús quiman quitac in caltilan hué, quilic:

<sup>42</sup> —¡Sinda amhuanten pa Jerusalén anquimatiaya inon hual Dios anmitzmacasquiaya amhuanten pa yoje anquipiasquiaya yihual imosehuilisli pan anmooyo! Huan axan Dios anmijzacuilic pa como anquimatisquiaya.

<sup>43</sup> Ajsitihualasi tonalijmes huan yehuanten hual moanasi ca amhuanten quimontusi lali huan teles pa itenco anmocaltilan Jerusalen pa anmijzacuilisli pa mochi lajtic, huan amo huil anmoquixtis. <sup>44</sup> Cuaquinon yehuanten hual anmitzcocolisi anmitzlahuitequisi pan lali, amhuanten huan anmoxolomes, huan amo quicahuasi se tixcali pa icalimes anmocaltilan, pampa yalo quinmayahuilo mochi. Yoje anmitzcuepilis Dios. Unca pampa amo anquimatiaya Dios hualac ca amhuanten pa innojen tonalijmes. Hualac pa anmitzquixtis pin polehuilisli.

### *Jesús quichipahua in tiopan hué*

(Mt. 21:12-17; Mr. 11:15-19; Jn. 2:13-22)

<sup>45</sup> Cuaquín calaquic Jesús calijtic in tiopan hué, pehuac quinquixtic pa quiahuac yehuanten hual lanamacaloaya nepa. <sup>46</sup> Quinmilic:

—Yoje unca lajcuiluli pa iamal ilajtol Dios, quijtúa: “Nocali yes se cali capa lacames quilajlanilo Dios.” Yoje quijtúa. Huan amhuanten anquichíac in tiopan hué quinami inminchan laixtequinijmes.

<sup>47</sup> Lamaxtiaya mojmosta Jesús pin tiopan hué. Huan in tiopistas huejué huan ilamaxtinijmes inminlajtol in judíos quitemuloaya quinami quimictilosquiaya. Noje quinequiloaya quimictilo inminhuejueyenten in judíos.

<sup>48</sup> Ma yoje, amo huil quitaloaya quinami huil quichihualosquiaya, pampa mojmosta moxtin quinequiloaya quicaquilo, huan amo quiman quicahualoaya Jesús ihuían.

<sup>1</sup> Cataya pan se ca innojen tonalijmes lamaxtitataya Jesús pin tiopan hué, quinlaquetzilijtataya in lacames in lamachiltlisli cuali. Hualajque capa yihual in tiopistas huejué huan ilamaxtinijmes inminlajtol in judíos, huan noje hualajque oc sequin hueyenten. <sup>2</sup> Quilijque:

—Xitechili ca aqui ilahueliltlisli anquichijtica innojen hual anquinchía. O ¿aqui unca in hual mitzmacac in laheliltlisli?

<sup>3</sup> Huan Jesús quinnanquilic:

—Nehual noje annimitzljajlanis len huan amhuanten xichnanquilican.

<sup>4</sup> Juan Lacuayatequini quincuayatequini lacames pa yehuanten lanex-tilosquiaya pampa quipalaje inminyolo pa pehualosquiaya laijnamiquilo quinami Dios quinequi. ¿Ca aqui ilahueliltlisli quinchihuilini Juan inon? ¿Cataya ilahueliltlisli Dios o lacames?

<sup>5</sup> Yehuanten molaquetzilijque ca yehuanten inminhuían, moilijque:

—Sinda tiqilisi pampa cataya ilahueliltlisli Dios, cuaquinon techlajlanis: “¿Leca amo anquineltoac?” <sup>6</sup> Sinda tiqilisi pampa cataya inminlahueliltlisli lacames, cuaquinon moxtin techlaxilisi tixcalimes, pampa yehuanten neli quijtulo pampa Juan yec ilajtuni Dios.

<sup>7</sup> Pampín quinnanquilijque Jesús:

—Amo ticmatilo aqui ilahueliltlisli quipiaya Juan.

<sup>8</sup> Cuaquinon Jesús quinmilic:

—Huan nehual noje amo annimitzilis ca aqui ilahueliltlisli niquinchía innojen.

### *Sequin tequipanujquimes ej'elehuis*

*(Mt. 21:33-44; Mr. 12:1-11)*

<sup>9</sup> Cuaquinon pehuaya quinmili in lacames in laijnamiquiltlisli pa quinmaxtisquiaya, quinmilic:

—Cataya se lalac quilaltocac pan se cuajmili ipacholimes uva huan temacac lajlajco iuvatilan ca oc sequin lacames pa quitequipanuili. Cuaquín in lalac quisac pa ichan huan uyac huejca huan nepa mocahuac míac tonalijmes, huan in oc sequin lacames quilachililoaya iuvatilan.

<sup>10</sup> Yucsije in uvas, huan in lalac quitilanic se tequipanujquil pa yasquiaya pa in lacames hual quilachililoaya iuvatilan. Quintilanic pa yehuanten quimacalosquiaya se ilajco in uvas hual quitequije. Huan in lacames quihuitequije chichahuac, huan quicholultije huejca, amo quimacaje uvas nindeno. <sup>11</sup> Oc sejpa in lalac quitilanic oc se itequipanujquil. Huan yihual noje quihuitequije chichahuac huan quihuejuecaltije, cuaquín quicholultije, amo quimacaje nindeno. <sup>12</sup> Oc sejpa quitilanic oc se tequipanujquil, huan in se quitecuaje huan quisaya esli, cuaquín quilasaje pa quiahuac. <sup>13</sup> Cuaquinon quijtuc iteco in uvatilan, quil: “¿Len nicchías? Axcan nictilanic noxól, yihual hual nicnequi míac. Cuajnesi ca yihual quimatisi momajtisi.” <sup>14</sup> Ma yoje, in tonali in tequipanujquimes ej'elehuis quitaje ixól, molaquetzilije, moilije:

“In se yahui quipía in uvatilan pampa unca iyaxca itajtzin. Ma ticmictican pa timoyaxcajtisi tehuanten in uvatilan pa yes toyaxca.” <sup>15</sup> Cuaquinon quilasaje pa quiahuac in uvatilan, nepa quimictije. ¿Len, axan, quinchihuilis in lacames iteco in uvatilan? <sup>16</sup> Yihual hualas huan quinmictis in lacames ej'elehuis. Cuaquinon temacas ca lajlajco iuvatilan ca oc sequin lacames pa quitequipanuili. Ja in san.

Yehuanten hual quicaquijque in laijnamiquiltlisli quilijque:

—Ma camo quimacahuilti Dios pa panus inon.

<sup>17</sup> Huan Jesús lachíac capa yehuanten huan quinmilic:



—Cuaquinon, ¿len quinejqijtu in hual unca lajcuiluli pa Dios ilajtol? Yoje quijtúa:

Cataya se tixcali hual amo quinequiloaya quilalilo yehuanten hual quichihualoaya in cali.

Ma yoje iteco in cali quilalic in tixcali capa yehuanten hual quichihualoaya in cali yahuilooaya quipehualtilo in cali.

Pampín quipialoaya pa quinlalilosquiaya in oc sequin tixcalimes pejticate capa quilalic in tixcali iteco in cali.

Yoje quijtúa ilajtol Dios huan quinejqijtu inon: <sup>18</sup> Sinda se mochías nolacocolini cuaquinon yes quinami momañajtis huan huetzis pan in tixcali. Cayas quinami latecuali chicahuac. Huan sinda se mocahua amo quinectica nechneltoaca, yes quinami in tixcali huetzisquiaya pani yihual huan quitesisquiaya pa mochihuasquiaya lalmoluncal hual in iijyecal quihuicasquiaya. Quinami yoje cayan pan tonali Dios quitojtocas ilaixpan yihual se local. Yoje mocahuas laijcuanili, yajmo huil ajsi capa Dios.

*Ilapixcalisli tomin, ¿ticlaxlahuisi?*

*(Mt. 22:15-22; Mr. 12:13-17)*

<sup>19</sup> Cuaquinon ca nadita quitemujque quinami huil quiquitzilosquiaya Jesús in tiopistas huejué huan ilamaxtinijmes inminlajtol in judíos. Ma yoje momajtiloaya pampa in lacames quicaquiloaya. Quimatiloaya in hueyeyenten pampa Jesús quinequiaya quijtu pampa yehuanten cataloaya quinami innojen lacames ejelehuis quiman quinmiliaya in laijnamiquiltlilisli. <sup>20</sup> Ma yoje, mocahualoaya laijcuanili nadita, quichialoaya pa quiman huil ajsilosquiaya ca yihual. Cuaquinon quinalaquehuajque lanapachinijmes, mochihuaje quinami cataloaya lacames cuali mas que lacaujcamanoaloaya. Yoje quinequiloaya quichihuililo pa quijtusquiaya Jesús len lajtol calica huil quimotexpahuililosquiaya. Yoje quitemacalosquiaya pa in gobernador romano. Cataya jan yihual san hual quiipiaya lahuelitlilisli pa latlanisquiaya pa quimictilsquiaya Jesús. <sup>21</sup> Huan in lanapachinijmes quilajlanijque Jesús, quilijque:

—Lamaxtini, ticmatilo pampa tehual tiquijtúa len unca cuali huan ticmaxtía len unca cuali. Ticmatilo noje pampa amo tiquita se quinami yihual cuali huan oc se amo yoje cuali. Huan ticmaxtía iojli Dios hual yihual quilalic pa canasi moxtin. Ticmaxtía melahuac, amo quiman ticmaxtía len hual amo unca quinami Dios quijtúa. <sup>22</sup> Axan, xitechili, ¿quimacahuiltía tolajtol pa ticlaxlahuisi in hué César in tomin pa ilahuelitlilisli, o amo quimacahuiltía?

<sup>23</sup> Jesús quimatiaya quinami yehuanten quichihualoaya pa quimoixpolutilosquiaya ca ilajtomes. Cuaquinon huil quimotexpahuililoaya inminlaixpan in hueyenten ihuelitinijmes in hué César. Yoje Jesús quinmilic:

—Xichnextili se tomin.

<sup>24</sup> Quinextilijque. Cuaquinon quinmilic:

—¿Aqui unca in itzontecon huan itoca pan in tomin?

Yehuanten quilijque:

—Unca iyaxca in hué César.

<sup>25</sup> Cuaquinon Jesús quinmilic:

—Pampín, anquipía pa anquilaxlahuis in tomin pa in hué César ilahuelitlilisli, huan anquipía pa anquimacas César mochi hual unca iyaxca César. Huan jan yoje anquipía pa anquimacas Dios mochi hual unca iyaxca Dios.

<sup>26</sup> Yojque amo huil quijtuloaya nindeno amo cuali ca quinami quin-nanquilic Jesús, pampa moxtin yehuanten hual nepa moquezataloaya quicaquiloaya Jesús huan quimatiloaya pampa amo moixpoluc ca innojen

lajtomes hual quinnanguilic. Huan mocahualoaya moizticate lapolultili in lacames hual quilajlanijque inon. Mocahualoaya yoje pampa quinnanguilic Jesús ca ilajmatilisli hué.

*Quilajlanilo Jesús sinda yulisqui oc sejsa*

(Mt. 22:23-33; Mr. 12:18-27)

<sup>27</sup> Cuaquinon hualajque capa Jesús sequin saduceos, yehuanten quimaxtilo pampa amo yulisqui oc sejsa yehuanten hual miquilo. Huan quilajlanijque Jesús, quilijque:

<sup>28</sup> —Lamaxtini, Moisés hual yulini pa yina techijcuiluic inon: Sinda se lalac miqui, quipía isihua huan amo quinpialo xolomes, cuaquinon icni in lalac hual miquic canas isihua icni hual miquic. Cuaquinon yehuanten quinpiasi xolomes huan quintocayaltis quinami motocaya icni hual miquic. <sup>29</sup> Axan, cataloaya chicome icnián. Canac se sihual se inmicni, amo quinpiaje xolomes, cuaquín miquic in lalac. <sup>30</sup> Canac isihua ihuían oc se icni, cuaquinon miquic, amo quinpiaje xolomes. <sup>31</sup> Huan umpa canac in sihual ihuían oc se icni, miquic. Yojque panuc ca moxtin in chicome, amo quinpialoaya xolomes ca in sihual, moxtin miquije. <sup>32</sup> Huan cuaquín miquic in sihual noje. <sup>33</sup> Axcan, sinda yulisi oc sejsa yehuanten hual miquilo, ¿pa calia innojen chicome yes in sihual? Pampa moxtin in chicome lacames quipialoaya in sihual.

<sup>34</sup> Jesús quinnanguilic:

—Jan yehuanten hual yulilo pin lalticpan monamictilo. <sup>35</sup> Ma yoje, quiman lamis in lalticpan hual axan unca, amo monamictilo yehuanten hual Dios quinalajtultic pa yulisi oc sejsa capa yihual unca pin cielo. <sup>36</sup> Noje yajmo huil miquilo, cayasi quinami in lanahuatinijmes pin cielo. Yehuanten amo monamictilo huan amo miquilo. Quema, cate ixolomes Dios yehuanten hual yulisi capa yihual quiman miquisi. <sup>37</sup> Huan neli unca pampa yehuanten hual miquilo yulisi oc sejsa. Moisés anmitzmachiltía inon, pampa quijcuiluc len in Tata Dios quilic nepa quilaquetzilijtataya ca ilajtol quistataya pin huitzcuajtzindi. Quilic: “Nehual iDios Abraham huan iDios Isaac huan iDios Jacob”, quilic. <sup>38</sup> Dios amo unca inminDios in mijquimes, yihual inminDios yehuanten hual yulticate, pampa Dios quinmita moxtin quinami yulticate.

<sup>39</sup> Cuaquinon sequin ca ilamaxtinijmes inminlajtol in judíos quilijque:

—Lamaxtini, tilajtuc cuali.

<sup>40</sup> Inon quilijque pampa axan momajtiloaya pa quilajlanilosquiaya oc se lajtol.

*¿Aqui ixolol in Cristo?*

(Mt. 22:41-46; Mr. 12:35-37)

<sup>41</sup> Cuaquinon Jesús quinmilic:

—¿Quinami huil quijtulo pampa in Cristo ja unca san imiahuil David?

<sup>42</sup> Yihual David quijtúa pa iamal in Salmos yoje:

In Tata Dios quilic noTata, quilic:

“Xihueliti ca nehual timolalijtica pa noma cuali.

<sup>43</sup> Huan ajsis in tonali hual niqinchihuilis moxtin molacocolinijmes pa mitzneltocasqui.”

<sup>44</sup> Yoje, David quitocayaltic “noTata.” Pampín, in Cristo unca niman hué huan David amo unca hué quinami yihual. Cuaquín, ¿quinami unca in Cristo imiahuil?

*Jesús quinmotexpahuilía ilamaxtinijmes inminlajtol in judíos*

(Mt. 23:1-36; Mr. 12:38-40; Lc. 11:37-54)

<sup>45</sup> Cuaquinon Jesús quinlaquetziliz imonextiliniyjes huan moxtin in oc sequin noje quicaquiloaya len quinmilijtataya, quinmilic:

<sup>46</sup> —Ximijmaztiacan inminpampa ilamaxtinijjes in lajtol. Yehuanten quinequilo molaquentinemilo ca nahuajjes cuajcualtichin. Quixtocalo pa moxtin quinpialtilo ca mochi momajtilisli pin lajcotiyan. Quixtocalo molalilo pin tiopajjes capa cate in icpalimes pa in huejueyenten. Huan quiman molalilo pa lacuasi, quixtocalo molalilo pan icpalimes hual cate pa in huejueyenten. <sup>47</sup> Quinequilo pa moxtin quinmomajtilisi míac, huan ma yoje, quincajcayahualo sihuames hual cate inminhuían, quinmoyaxcajtililo inmincalimes. Huan pa nesisi quinami cate lacames cuajcualli, mas que quinmixtequililo, huejcahualo míac mochijtcate quinami quilajlanticate Dios, quijuticcate míac lajtomes. Yehuanten Dios quincocoltis niman míac, amo yoje míac quincocoltis oc sequin.

## 21

### *Itomin in sihual ihuían hual san quipiaya nadita pa molacualtis* (Mr. 12:41-44)

<sup>1</sup> Cuaquinon lachíac Jesús, quinmitac yehuanten in lacames hual quipialoaya míac tomin quilalijtataloaya inmintomin pin capa quilasaloaya tomin nepa pin tiopan hué. <sup>2</sup> Huan quitac se sihual ihuían amo quipiaya ca len yulis. Yihual quilalic nepa ome tomin hual cataloaya tijtipichin, amo cataloaya oc sequin tomin yoje tipichin. <sup>3</sup> Cuaquín Jesús quinmilic in lacames:

—Neli annimitzilía, Dios quita quinami in sihual ihuían quilalic nepa míac tomin. Amo yoje míac inon hual in oc sequin quilalije, mas que yehuanten quilasaje nepa míac tomin. <sup>4</sup> Unca pampa yehuanten quimacaje nadita inmintomin hual quipialoaya míac. Huan mas que in sihual ihuían amo quipiaya calica molacualtis, quilalic mochi in tomin hual quipiaya.

### *Jesús quinmili pampa cayas laxitinili in tiopan hué* (Mt. 24:1-2; Mr. 13:1-2)

<sup>5</sup> Sequin laquetzaloaya quinami in tiopan hué cataya lachihuali ca teles cuajcualtichin, noje cataloaya cajcapa míac hual ij'ipati hual lacames hual quipialoaya míac tomin quimacajque Dios. Huan Jesús quinmilic:

<sup>6</sup> —Xitini innojen hual anquinmiztica. Ajsisi in tonalijjes huan amo mocahuas se tel ipan oc se tel, mochi yesi lamayahuili.

### *Jesús quinmilia len panus pan tonalijjes quiman yahui lami in lalticpan hual axan unca*

(Mt. 24:3-28; Mr. 13:3-23)

<sup>7</sup> Quilajlanijque Jesús, quilijque:

—Lamaxtini, ¿quiman yahui panúa inon? Huan ¿quinami ticmatasi quiman mochi inon yahui pehua panúa?

<sup>8</sup> Jesús quinanquilic:

—Ximolachilijtiacan pa camo anmocahuas pa anquineltochas nolajtomes, pampa hualasi míac hual motocasi ca notoca pa yoje quipias lahelilitilisi inon hual anmitzilisi. Anmitzilisi: “Nehual niCristo.” Huan quilisi: “Axcan ajsic in tonali hual Dios anmitzilic.” Amo xiquintocatiacan. <sup>9</sup> Huan quiman yes anmitzmachiltisi pampa cate moanalisi huan quinami lacames cualantinemisi pa quichihuasi moanalisi, amo ximomajtiacan pampa mochi innojen quipialo pa panusi pa quinpehualtis itonalijjes in lacocoltisli. Ma yoje, ayamo lami in lalticpan.

<sup>10</sup> Cuaquinon quinmilic Jesús:

—Moanasi yehuanten pa se lali ca yehuanten pa oc se lali, huan amo mosehúisi pa moanasi. Quema, cajcapa yes moantiasi, huan in huejueyenten pa se lali quichihuilijtiasi pa inminguaches pa inminlali moanasi ca oc se lali iguaches. Yoje panus ca míac lalimes. <sup>11</sup> Cayasi míac laulinilisi chijchicahuac cajcapa pa mochi in laticpan. Huan cayasi cajcapa pin laticpan mayandi huan míac cocolisli hual mosemanas ca míac lacames cajcapa cayasi. Cayasi lanextilisi hual quinmajmajtisi moxtin. Huan nesisi pin cielo oc sequin lanextilisi hual quinmahuisultisi lacames ca lamajtilisli hué.

<sup>12</sup> 'Ma yoje, mochi innojen panusi quiman panuje tonalijmes capa anmitzquitzquisi pa anmijtzacuasi pa calijtic. Anmitztojtocasi, anmitztemacasi inminlaixpan inminhuejueyenten in tiopajmes pa anmitzljajlanisi amhuanten. Anmijtzacuasi pa calijtic quinami anyesquiaya lacames niman amo cuajcuali. Anmitzhuicasi inminlaixpan in huejueyenten huan huelitinijmes pampa annechneltoca. <sup>13</sup> Pa innojen tonalijmes quiman anmitzpanus innojen, yoje anmitzmacas quinami huil anquinlaquetzilis quinami nehual huil niquinquixtia pin polehuilisi. <sup>14</sup> Yoje, xiclalican in pa anmoyolo: Amo xilajtucan pa anmoyolo quinami anyahui anquinnanquilia quiman yes ayamo ancayas inminlaixpan yehuanten pa anmonapatis, <sup>15</sup> pampa nehual annimitzpalehuis. Nehual annimitzhueliltis pa anlajtus huan annimitzmacas noje lajmatilisi ca lajtomes huan annimitznextilis jan yoje quinami anquinmilis in lajtomes. Yoje moxtin anmolacocolinijmes amo quimatisi quinami monanquilisli in lajmatilisi hual annimitzmacas, huan yehuanten amo huil anmitznanquilisli len pa monapatisi pampa annimitzmacas in lajtomes. <sup>16</sup> Huan anmitztemacasi anmotajtzitzian huan anmocnían huan anmocnían pa oc sequin calimes, anmitztemacasi ca in huejueyenten huan sequin ca amhuanten anmitzmictisi in huejueyenten. <sup>17</sup> Quema, moxtin amo anmitzixtocasi, anmitzcocolisi pampa annechneltoca nehual. <sup>18</sup> Ma yoje, mas que anpanus in lacocoltilisi, Dios amo quiman quinmacahuiltsi pa anmitzquixtisi capa yihual unca, no, amo jan se anmotzondi. <sup>19</sup> Ximopepenialtican mochi inon ca chichualisli, pampa yoje anquipiás anmoyulilisi, mas que cuajnesi anmitzmictisi.

<sup>20</sup> 'Huan in tonali hual anquitas in caltilan hué Jerusalén ca míac míac guachaje itenco, cuaquinon xicmatican pampa in guachaje amo huejcahuasi pa quixitinisi. <sup>21</sup> Cuaquinon yehuanten hual cate pin mochi in laticpan Judea ma cholucan pa in lomas huejca. Huan yehuanten hual cayasi pa Jerusalén ma quistiquisacan. Huan yehuanten hual cayasi pa quiahuac Jerusalén, yehuanten hual chantilo pa caltilan tijtipichin huan pin cuajlan itenco Jerusalén, ma camo calaquican pa Jerusalén. <sup>22</sup> No —quilic Jesús—, ma camo calaquican, pampa in tonalijmes cayasi tonalijmes hual Dios quincocoltis in judíos pampa amo quineltocalo. Quincocoltis pampa quichihuaje míac pa quintzacuilisi lacames pa camo quineltocasi ilamachilitilisi cuali. Mochias mochi hual unca lajcululi inminahuac in lacocoltilisi hual yalo panulo. <sup>23</sup> Huan ¡quichi panusi lacocoltilisi in sihuames hual yalo quilacatilitilo xolomes, huan yehuanten hual lachichilitiasli innojen tonalijmes! Quema, pampa moxtin in lacames hual mocahualo pin lali panusi lacocoltilisi. Dios icualanilisi cayas pan yehuanten. <sup>24</sup> In guaches quinmictisi ca inminteposlimes calica moanalo, huan quinhuicasi laipili pa yesi tequipanujquimes hual amo quinlaxlahuilo pa mochi inminlalimes yehuanten hual amo judíos, amo mocuepasi ca caniquic. Huan mocahuas

Jerusalén se caltilan capa lacames hual amo judíos huelitisi. Nican huelitisi pa miac xixihuil. Cuaquín ajsis in tonali quiman lamisi in xixihuimes hual Dios quinlalic pa huelitisi.

*Jesús quinmilía quinami yihual yahui huala oc seipa pan lalticpan*  
(Mt. 24:29-35, 42-44; Mr. 13:24-37)

<sup>25</sup> 'Cayasi quinami lanextilisli pa in tonali huan in mesli huan in luceros (silalimes), pampín momajtisi lacames. Huan nican pan in lalticpan comuntías huan majcoctías chicahuac in al huejcalan, huan pampín momajjtiasi in lacames pampa amo quimatisi leca yoje quichías. <sup>26</sup> Quema, lacames miqusi ca momajtilisli pampa quiztiasi innojen hual yahui quipanúa in lalticpan capa yulilo. Momajjtisi pampa motzejzelusi ichicahualisli mochi in cielo huan in lalticpan. <sup>27</sup> Cuaquinon, moxtin nechitisi nehual ilacal in cielo. Nechitisi nihualas pan se mextemil, nihualas ca chicahualisli hué huan laixpelalisli niman cualtichin. <sup>28</sup> Pampín, in tonali quiman pehuasi panusi innojen, ximochijhjtiacan huan xilachixtiacan. Xicayacan quinami anyahui anquita in hual anquinequiaya anquita pa quiman, pampa quema, ajsitihualas in tonali hual annimitzquixtis pin mochi lacocoltilisli hual anpanujtías.

<sup>29</sup> Cuaquinon Jesús quinmilic se laijnamiquiltisli pa quinnextilisquiaya inon hual quinmilijtataya, quinmilic:

—Xiquitacan in amacuá tipichin huan mochi in cuahuimes. <sup>30</sup> Xuchjtiasi huan selistitiasi, cuaquinon anquimatis axan ajsitihuala in xupanda. <sup>31</sup> Yoje, amhuanten, quiman anquitas innojen panujtiasi, cuaquín xicmatican pampa ajsitihualas Dios pa huelitis pan lalticpan.

<sup>32</sup> 'Neli annimitzilía inon: Panus inon hual annimitzilijtica quiman ayamo miqusi moxtin hual yulticate pa innojen tonalijmes. <sup>33</sup> Lamisi in cielo huan in lalticpan. Ma yoje, nolajtomes amo quiman lamisi, amo quiman mocahuasi pa mocaquisi.

<sup>34</sup> 'Ximolachilican pa camo amhuanten cuajnesi anquimacahuiltis pa mochihuasi chicahuac anmoyolo ca lahuanalisli huan oc sequin laijlaculisli. Ximolachilican pa camo ancayas quinami yehuanten hual mojmosta motolinilo san pa canasi len quinequilo. San quijnamiquilo in hual panúa pan in lalticpan hual axan unca. Sinda anunca yoje, cuaquinon in tonali hual nimocuepas pan lalticpan anmitzajsis jan ajnaxcan huan amo ancayas anquichixtica. <sup>35</sup> Quema, pampa quinmajsis moxtin yehuanten hual chantiticate pan mochi in lalticpan. <sup>36</sup> Xiyén, cuaquín, quinami yehuanten hual ejsaticate, xiclajlánican Dios pa amhuanten huil ancayas laquixtili pin mochi innojen hual yalo panulo. Yoje anmoquetzas amo anmomajjtica noyampa nehual ilacal in cielo, huan amo annimitztilanis pa lacocoltilisli hual amo quiman lamisi.

Yoje quinmilic Jesús.

<sup>37</sup> Huan mojmosta cataya Jesús pin tiopan hué lamaxtitataya. Pa layúa quisaya pa Jerusalén, panuaya lajlayúa pin lomita (tepetzindi) itoca Olivos. <sup>38</sup> Huan hualaloaya moxtin pa laxpoyahua pa in tiopan hué pa quicaquilosquiaya.

## 22

*Molalilo pa quiqitzquisqui Jesús*  
(Mt. 26:1-5, 14-16; Mr. 14:1-2, 10-11; Jn. 11:45-53)

<sup>1</sup> Cuaquinon ajsitihualaya itonali in fiesta (ilhuil) capa quicualo in judíos in pan hual amo quipía laxocoyajquil, in ilhuil itoca Pascua. <sup>2</sup> Quitemuloaya in tiopistas huejué huan innojen ilamaxtinijmes inminlajtol in judíos quinami quiquitzquilosquiaya Jesús pa quimictilosquiaya. Huan amo huil quiquitzquiloaya pampa momajfiloaya laixpan in lacames hual quitocaloaya. <sup>3</sup> Cuaquinon Satanás moyaxcajtlic iyolo Judás, in se hual quitocayaltijque Iscariote. Yihual yec se ca in doce lanahuatinijmes. Satanás moyaxcajtlic yihual pa quinextilisquiaya quinami yihual Judás huil quitemacasquiaya Jesús ca yehuanten hual quinequiloaya quimictilo. <sup>4</sup> Cuaquinon uyac Judás pa laquetzasquiaya ca in tiopistas huejué huan in piscuales, quinmilic quinami yahuiaya quintemaquili Jesús. <sup>5</sup> Yoje yehuanten paquiloaya niman míac huan quichihuaqtje se laquetzalisli ca Judás pa quilaxlahuisqui ca tomin huan quimacajque. <sup>6</sup> Cuaquinon yihual quinmilic neli pampa quintemaquilisquiaya Jesús, huan pehuac quitemuc quinami huil quitemaquilisquiaya Jesús ca yehuanten. Quinequiaya quichía capa amo cayasquiaya míac lacames ca Jesús hual quinapatilosquiaya.

### *Ilacualisli toTata*

*(Mt. 26:17-29; Mr. 14:12-25; Jn. 13:21-30; 1 Co. 11:23-26)*

<sup>7</sup> Ajsic in tonali quiman quicualo judíos in pan hual amo quipía laxocoyajquil. Pa in tonali quipialoaya pa quimictilosquiaya in borreguito pa in fiesta (ilhuil) itoca Pascua. <sup>8</sup> Jesús quintilanic Pedro huan Juan, quinmilic:

—Xiacañ xitechyuixtilican in borreguito pa tijcuasi pa in fiesta.

<sup>9</sup> Huan quilijque:

—¿Capa ticnequi pa ticyuxiltisi?

<sup>10</sup> Quinmilic:

—XiQuitacan. Ancalaquis pa in caltilan, anmitznamiquis se lalac quiman-tihuala se tapalcal ca al. Xictocacan pa in cali capa calaquis. <sup>11</sup> Cuaquín xiquilican iteco in cali: “In Lamaxtini mitzilía: ¿Capa unca in calijtic capa nehual nijcuas iborreguito Pascua ca nomonextilinijmes?”, quil. Yoje anquilis —quinmilic Jesús—, <sup>12</sup> huan yihual anmitznextilis se calijtic hué pa pani calijtic in cali capa moitasi mochi hual monequi pa ticpiasi. Nepa xicyuxiltican.

<sup>13</sup> Uyaje Pedro huan Juan, quitajque jan quinami Jesús quinmilic, huan quiyuxiltijque in borreguito. <sup>14</sup> Ajsic in layúa pa lacualosquiaya, molalijque pa lacuasqui Jesús huan imonextilinijmes ca yihual. <sup>15</sup> Cuaquinon Jesús quinmilic:

—¡Nehual nicnequiaya míac nijcua in borreguito pa pascua ca amhuanten! Cuaquín nías pa nipanun nolacocoltilisli. <sup>16</sup> Inon annimitzilía pampa yajmo nijcuas in lacualisli pan lalticpan. Ma yoje, quiman ajsic in tonali quiman moitas Dios huelitijtica, nepa nijcuas, pampa nepa lamis mochías mochi lachihualisli hual ayamo panuc hual pampa innojen ticpialo in fiesta Pascua.

<sup>17</sup> Quimacajque Jesús se tapalcatzindi huan yihual quisehuic Dios, cuaquinon quinmilic:

—Xicanacan inon huan ximoxiluilican ca amhuanten pa ancunis.

<sup>18</sup> Annimitzilía inon pampa yajmo quiman nicunis len lachihuali ca ilaquilyo uvas. Ma yoje, quiman ajsic in tonali hual Dios huelitis pan lalticpan, cuaquín nicunis.

<sup>19</sup> Cuaquinon canac pan huan quisehuic Dios, quilapanac huan quinmacac, quinmilic:

—In nonacal, mochi nehual nimotemacas pa nimiquis pa amhuanten. Xijcuacan in, yoje pa annehijnamiquis.

<sup>20</sup> Huan quiman lamijque lacuajque, canac Jesús in tapalcatzindi yoje quinami canac in pan, quinmilic:

—In hual ancunis pa in tapalcatzindi unca in lajtulisli yancuic ca nehual huan amhuanten. Nicchijtica in lajtulisli ca noesli hual toyahuis pa amhuanten. <sup>21</sup> Ma yoje, xiquitacan. Yihual hual nechtemaca ca yehuanten hual nechcocolilo unca nican lacuajtica ca nehual. <sup>22</sup> Yalo nechmictilo nehual ilacal in cielo jan quinami Dios quilalic. Ma yoje ¡quichi yahui panu lacocoltisli in lalac hual nechtemaca!

<sup>23</sup> Cuaquinon pehualoaya molajlanilo huan molaxililo lajtomes yehuanten pa lajmatisi aqui yesquiaya hual yahuiaya quitemaca Jesús.

### *Laquetzalo pa lajmatisi aqui yes in hué ca yehuanten hual quinlaicanas*

<sup>24</sup> Pehualoaya molaxililo lajtomes in monextiliniymes, laquezataloaya pa lajmatisqui aqui ca yehuanten cataya in hué hual quinlaicanasquiaya moxtin. <sup>25</sup> Huan Jesús quinmilic:

—In huejueyenten ca yehuanten hual amo cate judíos huelitilo ca yehuanten ca chichahalislis quinami tecojuan. Huelitilo pa yoje quinnextilisi yehuanten inminlahuelilitisli huan pa yoje quinnextilisi pampa cate niman huejué, huan pa yoje quinnextilisi yehuanten hual quinneltocaltisi pampa amo cate huejué yehuanten. Yehuanten in laicananijmes, quema, motocayaltilo ca tocajmes hual quinequilo quijtulo pampa yehuanten cate laces hual yulilo quinchihuilijiticate cuali yehuanten hual quinneltocaltilo.

<sup>26</sup> Amhuanten amo anyes yoje. Monequi pa yes quinami in tipichin yihual hual unca in hué capa amhuanten. Huan yihual hual quinlaicana oc sequin ma ye se hual quinquipanuilía in oc sequin. <sup>27</sup> Ma annimitzili len nicnequi niqijitúa. ¿Aqui in hué? ¿Unca yihual hual molalía pa lacuas, o yihual hual quitequipanuilijtica? ¿Amo unca in hué yihual hual molalijtica pa lacuas? Quema, unca yihual. Ma yoje, nehual niunca ca amhuanten quinami in se hual latequipanuilijtica. <sup>28</sup> Huan amhuanten anunca aquinojen hual anmocahuaya ca nehual quiman quitilanalaoaya noyolo pa nicchiasquiaya in hual amo cuali, quiman niqitaya miac icnotilisli. <sup>29</sup> Huan nehual annimitzmaca lahuelilitisli pa anhuelitis. Yoje noTajtzin nechmacac lahuelilitisli pa nihuelitis. <sup>30</sup> Pampín yes anmoyaxca pa anmolalis pa anlacas huan anlauis ca nehual pan tonali hual nihuelitis. Yoje anquipías paquilisli ca nehual. Huan yes anmoyaxca pa anyes la'ajuaniymes pa anquinmotexpahuilis huan pa anquinmacahuas yehuanten hual cate iyaxca in lali Israel, yehuanten inminmiahuimes mochi sejse ca in doce ixolomes Israel.

### *Jesús quilía pampa Pedro yahui quijtúa yihual amo quiximati Jesús (Mt. 26:31-35; Mr. 14:27-31; Jn. 13:36-38)*

<sup>31</sup> Jesús quilic Pedro:

—Simón, Simón, xiquita. Satanás latemachic pa anmitzanas amhuanten. Quinequi pa yajmo annehneltochas. Pampín quitemachic pa quimacahuiltisquiaya pa anmitzpanultisquiaya lacocoltisli. Yoje Satanás quijtúa pampa inon yajmo annehneltochas. <sup>32</sup> Ma yoje, nehual nictemachic Dios pa tehual, Pedro, pa camo mitzmacahuiltisquiaya pa timocahuas pa tichneltochas. Huan tehual, in tonali hual mocuepa moyolo ca Dios, xiquinpalehui mocnían innojen oc sequin monextiliniymes pa nechneltochasi ca miac chichahalislis.

<sup>33</sup> Pedro quilic:

—Tata, sinda monequis, huan tehual tiasi pa ticayasi latzacuali ca calijtic, pa tehual nimitiquis. Níunca nimochijchijtica pa nipanus inon.

<sup>34</sup> Huan Jesús quilic:

—Pedro, nimitzilía inon: Axan in layúa, ayamo xahuanis se gallo huan tiqijtus sejpa huan oc sejpa ca ye lajtulisli pampa amo tichiximati.

*Ajsi in hora capa Jesús panúa lacocotlisli*

<sup>35</sup> Cuaquinon Jesús quinmilic:

—In tonali hual annimitztilanic huan amo anquiapiaya xotopa huan len pa tomin, huan san in ome lacsames, ¿monequiaya pa anquipiasquiaya len?

Quinanquilijque:

—Nindeno.

<sup>36</sup> Cuaquin quinmilic:

—Axan, aquí hual quipía xotopa, ma quihuica, huan ma quihuica len pa tomin noje. Huan aquí hual amo quipía teposli pa moanalisli, ma quinamaca inahuas huan ma mocuhuli se. <sup>37</sup> Quema, ma quichía yoje pampa annimitzilía monequi pa nejchihuilisi inon hual unca lajcuiluli nonahuac nehual pa iamal Dios ilajtuni. Huan yoje quijtúa hual unca lajcuiluli: “Quijtujque pampa yihual yec se lacal elehuis.” Quema, pampa ajsitihuala ilajco in tonali capa lamis mochías in lajtol hual quijtúa in hual yahui nechpanúa nehual.

<sup>38</sup> Huan in lanahuatinijmes quilijque:

—Tata, nican cate ome teposlimes pa moanalisli.

Jesús quinnanquilic:

—Yajmo tilaquetzasi inahuac inon.

*Jesús panúa lacocotlisli quilajlantica Dios pa Getsemani*

(Mt. 26:36-46; Mr. 14:32-42)

<sup>39</sup> Cuaquinon quisac Jesús pa Jerusalén, mohuicac pa in loma itoca Olivos, quinami quichihuaya lajlayúa. Huan quitocaloaya yihual imonextilinjmes.

<sup>40</sup> Ajsijque ca umpic, Jesús quinmilic:

—Xiclajlanican Dios pa como anmitztilanilis anmoyolo Satanás. Yihual quinequi pa yajmo annechneltocas.

<sup>41</sup> Mijcuanic Jesús capa yehuanten pa cayas huejquita quinami se tixcali lalasalí. <sup>42</sup> Nepa molancuacuetzac, quilajlaniaya Dios, quilic:

—Tata, sinda ticnequi, xichquixti pa como nipanus inon hual nía nipanu. Ma yoje, ma como mochía quinami niqijjtúa nel, jan ma mochía quinami tiqijjtúa tehual.

<sup>43</sup> Nestic ca yihual se ilanahuatini in cielo pa quichicahualtisquiaya.

<sup>44</sup> Huan cataya panujtataya lacocotlisli niman mías. Yojqe quilajlaniaya Dios ca mías chichualisli, huan ixicaya imijtonil chicuenta esli ixicatataya pan in lali. <sup>45</sup> Cuaquinon moquetzac capa quilajlaniaya Dios, hualac capa cataloaya imonextilinjmes, quinmitac coxtataloaya pampa quincocujtataya inmnyolo. <sup>46</sup> Huan quinmilic:

—¿Leca ancotxia? Ximoquetzacan huan xiclajlanican Dios pa como anmitztilanilis anmoyolo Satanás.

*Quiquitzquilo Jesús*

(Mt. 26:47-56; Mr. 14:43-50; Jn. 18:2-11)

<sup>47</sup> Ayamo lamic quinmilic inon, ajsiloaya lacalera huan in se imonextilini motocaya Judas, yihual se ca in doce, quinlaicanaya. Yihual ajsiaya pa quitenamiquisquiaya. <sup>48</sup> Huan Jesús quilic:



—Judas, ¿tichtenamiquic nehual ilacal in cielo, pa yoje tiquinnextilisquiaya nolacocolinjmes capa nel?

<sup>49</sup> Quitajque imonextilinjmes len yahuiaya panu, quilijque:

—Tata, ¿amo timoanasi ca in teposli pa moanalisli?

<sup>50</sup> Huan se ca yehuanten quitecuac ca iteposli itequipanujquil in tiopista hué, yojque quicotonilic se inacas pa ima cuali. <sup>51</sup> Jesús calactiquisac capa moantataya, quilic:

—Xijcahua, yajmo xicchia inon.

Huan quisaluc inacas oc sejpa pa itzontecon, quipajtic.

<sup>52</sup> Cuaquín Jesús quinmilic yehuanten hual hualajque pa quiquitzquilosquiaya, cataloaya tiopistas huejué huan in piscales huan in oc sequin hueyente, quinmilic:

—¿Anhualaya pa annehquitzquisquiaya ca teposlimes pa moanalisli huan cuahuimes yoje quinami nicataya se laxtequini? <sup>53</sup> Mojmosta nicataya ca amhuanten pin tiopan hué, huan amo annehquitzquic. Ma yoje, in unca quiman Dios anmitzmacahuiltitica pa anquichías hual len anquinequi. Noje Dios quimacac Satanás in lahueliltilisli pa axan in layúa, yihual Satanás huelitia capa laticumac.

### *Pedro quilía pampa amo quiximati Jesús*

*(Mt. 26:57-58, 69-75; Mr. 14:53-54, 66-72; Jn. 18:12-18, 25-27)*

<sup>54</sup> Yoje quiquitzquijque Jesús, quihuicatiajque, quihuicajque pa ichan in tiopista hué. Huan quintocaya Pedro huejca inminteptzcon. <sup>55</sup> Nepa pa ilajcotiyan ichan in tiopista hué quipitzajque se tixuxli. Molalijque pa itenco in tixuxli, huan Pedro moquezataya ca yehuanten. <sup>56</sup> Nepa cataya se tequipanujquil sihual, quitac Pedro moquezataya, quilahuiaya in tixuxli. Huan yihual mocahuac quiztica jan sejpa, quinmilic:

—In se noje cataya ca Jesús.

<sup>57</sup> Pedro quijtuc pampa no, quilic:

—Sihual, amo níquiximati aquí yihual.

<sup>58</sup> Panuc nadita huan oc se lacal quitac Pedro, quilic:

—Tehual noje tiunca se ca yehuanten.

Huan Pedro quinanquilic:

—Lacal, amo niunca se ca yihual ilacames.

<sup>59</sup> Panuc quinami se hora quiman quijtuc inon, huan oc se lacal pehuac quijtuc pampa neli, quilic:

—Neli in se noje cataya ca yihual, pampa yihual noje unca se galileteco.

<sup>60</sup> Huan Pedro quinanquilic:

—Lacal, amo nicmati len tiquijtutica.

Huan jan ajnaxcan, ayamo laquisac lajtutataya Pedro, xahuanic se gallo.

<sup>61</sup> Huan momalinac in Tata Jesús, quitac Pedro. Cuaquinon Pedro quijnamiquic len quilic in Tata Jesús, quinami yihual quilic: “Axan layúa ayamo xahuanis se gallo huan tiquijtuc ca ye lajtulisli pampa amo tichiximati nehual.” <sup>62</sup> Pampín quisac Pedro pa quiahuac, pehuac chocac chichahuac.

### *Quihuitzquililo Jesús*

*(Mt. 26:67-68; Mr. 14:65)*

<sup>63</sup> Huan in lacames hual quiquitzquijque Jesús quihuitzquilijtinemiloaya, quihuitectinemiloaya. <sup>64</sup> Quilpajque se dango pa iixtololjmes huan quila-jlantinemiloaya, quililoaya:

—¡Xilajtu ca Dios ilahueliltilisli, xitechili aquí mitztecuac!

<sup>65</sup> Huan ca miac oc sequin lajtomes quihuejuecaltitinemiloaya.

*Jesús inminlaixpan in Lanechiculisli Hué*  
(Mt. 26:59-66; Mr. 14:55-64; Jn. 18:19-24)

<sup>66</sup> Quiman lanestic, monechicujque inminhueyente in judíos. Yehuanten cataoaya in tiopistas huejué huan ilamaxtinijmes inminlajtol in judíos. Quihuicajque Jesús capa cataoaya lanechiculi yehuanten inminLanechiculisli Hué in tiopistas huan in lamaxtinijmes. <sup>67</sup> Nepa quilijque:

—Sinda tehual tiunca in Cristo hual Dios mitztlanic, cuaquín xitechili.

<sup>68</sup> Huan Jesús quinmilic:

—Sinda annimitzilia, neli amo anquineltocas. Huan sinda annimitzlanis len anquinequi anquijtúa quiman annechlanía sinda niunca in Cristo, neli unca da amo annechnanquilis. <sup>69</sup> Ma yoje, axan huan pa mosta nehual ilacal in cielo nicayas nihuelitijtica ca Dios ilahuelilitisli, nepa nimolalis pa ima cuali Dios.

<sup>70</sup> Cuaquín moxtin quilajlanijque:

—Tehual nuso, ¿tiunca ixolol Dios?

Jesús quinnanquilic:

—Jo quema, nehual niunca quinami anquijtúa.

<sup>71</sup> Yehuanten quijtujque:

—¡Yajmo monequi pa tilajlantinemisi, pampa tehuanten nojen tijcaquije quinami quijtuc ca icamac!

## 23

*Jesús ilaixpan Pilato*

(Mt. 27:1-2, 11-14; Mr. 15:1-5; Jn. 18:28-38)

<sup>1</sup> Cuaquinon moquetzajque moxtin hual cataoaya nepa pin Lanechiculisli Hué, quihuicajque Jesús capa cataya in gobernador romano itocaya Pilato.

<sup>2</sup> Nepa pehualoaya quipitzililo tixuxli, quimotexpahuililoaya, quilijque:

—Tilajlanije huan ticmatije pampa in se quinequiaya quipehualti moanalisi ca in lacames pa tolali. Quinequiaya quitzacuili pa camo quilaxlahuilosquiaya ilapixcalisli in tomin pa in hué César. Noje quijtúa pampa yihual ihuían unca se hué hual itoca Cristo.

<sup>3</sup> Cuaquín Pilato quilajlanic Jesús, quilic:

—¿Tehual tiunca inminhué in judíos?

Jesús quinanquilic:

—Jo quema, unca tehual hual tiquijtúa.

<sup>4</sup> Huan quinmilic Pilato in tiopistas huejué huan in lalacera, quinmilic:

—Amo niquitilía nindeno amo cuali ca in lalac.

<sup>5</sup> Ma yoje, yehuanten quijtuloaya pampa neli cataya yojque, quipitzililoaya tixuxli, quilijque:

—Techmocualantilía tehuanten in judíos pa cuajnesi timoanasi. Yihual lamaxtitinemi pa mochi in lalticpan Judea, pehuaya pin lalticpan Galilea, lamaxtitihualaya ca niquic.

*Jesús ilaixpan Herodes*

<sup>6</sup> Quicaquic inon Pilato, quilajlanic sinda Jesús yec galileteo. <sup>7</sup> Huan quimatic pampa quema, yuliaya Jesús pa Galilea capa in hué Herodes hueltiaya. Cuaquín quitlanic Jesús capa Herodes, yihual quiapiaya lahuelilitisli ca galiletecos. Huan pa innojen tonalijmes, Herodes cataya pa Jerusalén pa in fiesta (ilhuil). <sup>8</sup> Yoje, quiman Herodes quitac Jesús, quiapiaya miac paquilisli, pampa quiapiaya miac tonalijmes quinequiaya quita. Cataya pampa yihual quincacquiaya moxtin laquetzaloaya inahuac mochi hual quichihuaya

yihual. Huan quichiaya pa quitasquiaya len hual Jesús quichiasquiaya, quinequiaya quita len lanextlisli hual quimahuisultisquiaya Herodes ca lamajtilisli. <sup>9</sup> Pampín Herodes quilajlaniaya Jesús ca míac lajtomes. Ma yoje, Jesús amo quinanquilic nindeno. <sup>10</sup> Moquetzaloaya in tiopistas huejué huan ilamaxtinijmes inminlajtol hual quinnextililo in judíos quinami quimolan-cuacuetzililo Dios, huan quimotexpahuילוaya Jesús chicahuac. <sup>11</sup> Jan yojque, quixijxicujque Herodes huan moxtin yehuanten hual cataloaya ca yihual, quihuitzquililoaya. Cuaquinon Herodes quilaquentic Jesús ca se nahuas cahuanquil calica molaquentilo huejueyenten. Cuaquín quitilanic oc sejsa capa cataya Pilato. <sup>12</sup> Huan pampín pa in tonali pehualoaya moix-tocaló Herodes huan Pilato, mas que amo moixtocanijme quiman ayamo panuc inon.

*Quijtulo pampa Jesús quipías pa miqúis*  
(Mt. 27:15-26; Mr. 15:6-15; Jn. 18:39-19:16)

<sup>13</sup> Cuaquinon quihuatic Pilato pa monechiculosquiaya in tiopistas huejué huan yehuanten hual quipialoaya lahuellitlisli huan in lalalera.

<sup>14</sup> Quinmilic:

—Annechualiquilic in lalal, annechilijtataya pampa yihual quinmocualantiliaya in judíos pa quipehualtilosquiaya moanalisi ca in romanos. Huan xiquitacan, niclajlanic anmolaixpan huan amo niqutilic nindeno amo cuali ca in lalal quinami inon hual anquimotexpahuilijtica.

<sup>15</sup> Huan Herodes noje amo quitilic nindeno ca yihual pampa nechtilanilic oc sejsa. Huan xiquitacan, yihual amo quichíac nindeno. Pampín, quinami quijtúa in lajtol, amo huil tilatilanilo pa yes lamictili. <sup>16</sup> Yoje, nilatilanis pa quihuitequisi noguaches ca in lahuitequiloni ca teposli, cuaquín nicmacahuas.

<sup>17</sup> Inon quinmilic Pilato pampa mochi xihuil cataya ilachihualisli in hueli-tinijmes romanos pa quinmacahuililosquiaya in lalalera pa nepa in fiesta (ilhuil) se hual cataya latzacuali ca in lacames lailpili. <sup>18</sup> Huan tzajtziyque yehuanten moxtin, quilijque:

—¡Xicmicti in se, huan xitechmacahuili Barrabás!

<sup>19</sup> In Barrabás yec se hual quincualantic in judíos pin caltilan hué. Quinequiaya quipehualti se moanalisi. Yihual noje quimictic se lalal, pampín quitzacuajque pa calijtic. <sup>20</sup> Oc sejsa quinnotzac Pilato yehuanten, quinmilic pampa quinequiaya quimacahua Jesús. <sup>21</sup> Ma yoje, yehuanten quitzajtzilijtinemiloaya yihual, quililoaya:

—¡Xicpilu pan se cuahuil, xicpilu pan se cuahuil!

<sup>22</sup> Axan, huan ca inon cataya ye lanotzalisli, Pilato quinmilic:

—¿Leca? ¿Len amo cuali quichíac in lalal? Amo niqutilic nindeno yihual hual monotza pa yes lamictili, huan amo huil nilatilanía pa quimictisi. Pampín, nilatilanis pa quihuitequisi, cuaquinon nicmacahuas.

<sup>23</sup> Ma yoje, yehuanten amo mocahualoaya pa quihilosquiaya ca lajtomes chijchicahuac pa quipilulosquiaya pan se cuahuil, huan ca in míac tza-jtzilislisli, yojque quisulahuajque Pilato. <sup>24</sup> Pampín yihual latilanic pa Jesús yesquiaya lamictili quinami quitemachiloaya yehuanten. <sup>25</sup> Cuaquinon, Pilato latilanic pa quimacahualosquiaya yihual hual quitzacuajque pin cali-jtic, yihual hual quinequiaya quipehualti moanalisi huan hual quimictic se lalal. Quema, yihual quimacahuajque quinami in judíos quitemachiloaya. Huan Jesús, yihual Pilato temacac ca yehuanten pa quichihuililosquiaya quinami quinequiloaya.

*Quipilulo Jesús pan se cuahuil*  
(Mt. 27:32-44; Mr. 15:21-32; Jn. 19:17-27)

<sup>26</sup> Huan nepa capa quihuicatihuiloya Jesús, quiquitzi que Simón, yihual se lalac hual lacatic pin lali itoca Cirene. Cataya in Simón pa icuajmili huan axan mocuetataya pa Jerusalén. Quimamiltijque in Simón ca icuahuil Jesús pa quihuicatasquiaya itepotzcon Jesús. <sup>27</sup> Huan quitocaloaya lalalera, cataloaya yehuanten hual chantiloaya pa Jerusalén. Ca yehuanten cataloaya sihuames hual motecuilijtiahuiloya itzindan inminquixlan huan quichoquilijtihuiloya Jesús. <sup>28</sup> Momalinac Jesús ca yehuanten, quinmilic:

—Amhuanten sihuames hual anchanti nican Jerusalén, ximocahuacan pa annejchoquilis. Monequi pa anmochoquilis amhuanten. Huan xiquinchoquilian amxolomes, pampa xiquitacan: <sup>29</sup> Ajsitihualasi in tonalijmes hual moxtin quilisi: “Cate ca niman miac paquilisli yehuanten hual amo yalo quinpialo xolomes, huan hual amo quiman quilacatlitije xolomes, yehuanten hual amo quiman quinchihiltije xolomes”, quilisi. <sup>30</sup> Cuaquín pehuasi quiytusi: “¡Ma huetzican topan in lomas! ¡Ma techpachucan in lomas pa timiquisli!”, quiytusi. <sup>31</sup> Quema, pampa sinda nejchihuililo yoje in romanos nehual hual amo nicpía laijlaculisli, cuaquín ¡quinami amo yalo anmitzpizililo tixuxli amhuanten hual anquinpía miac laijlaculisli! In cuahuil huaquic chichinahuá ca miac milinilisli, amo yoje chichinahuá in cuahuil xuxuhuic.

<sup>32</sup> Quinhuicaloaya noje oc sequin ome lacames pa quinpilulosquiaya ca Jesús, in omenten yoje laixtequinijmes huan lamictinijmes. <sup>33</sup> Huan ajsijque pa capa itoca Tzontecomal, nepa quipilujque Jesús pan in cuahuil huan noje quinpilujque in oc sequin omenten pan inmincuahuimes, se pa ima cuali Jesús huan in oc se pa ima amo cuali. <sup>34</sup> Huan Jesús quilic:

—Tata, xiquinpujpuhua yehuanten hual nechmictiticate, pampa amo quimatilo len quichijticate.

In guaches moxiluilijque itzotzomajli Jesús huan pa quichihualosquiaya inon, quicuixtijque cuajtzindis, huan quinlasajque in cuajtzindis quinami yoje pa quimatilosquiaya aqui yahuiaya cana in tzotzomajli hual nepa quilalijque pa quipiasquiaya. <sup>35</sup> Huan mocahuajque lachixtataloaya in lalalera. In huejueyenten quihuitzquililoaya Jesús, quilijque:

—Oc sequin yihual quinquixtic pin miquilisli. Axcan, ma moquixti yihual pin imiquilisli sinda in se unca ¡Cristo Dios hual Dios quitilanic.

<sup>36</sup> Huan quihuitzquilijque in guaches noje, ajsijque, quichihuaque quinami quinequiloaya quicuntilo iayo uva xocuc. <sup>37</sup> Quilijque:

—Sinda tiunca inminhué in judíos, cuaquín ximoquixti pin momiquilisli tehual.

<sup>38</sup> Huan cataya se amal ca lajcuilulisli pani pin cuahuil, quiytuc: “IN UNCA INMINHUÉ IN JUDÍOS.” Huan cataya lajcuiluli ca lajtol latín huan ca lajtol griego huan ca lajtol hebreo.

<sup>39</sup> Cuaquion, se laxtequini hual pilujtataya ca Jesús, quihuejuecaltic Jesús, quilic:

—¿Amo tiunca in Cristo? Ximoquixti pin momiquilisli huan xitechquixti pin tomiquilisli tehuanten.

<sup>40</sup> Quinanquilic in oc se laxtequini, cajuac, quilic:

—¿Amo timomajtía je nadita ilaixpan Dios, mas que ticmatía tía timiqui tehual noje? <sup>41</sup> Tehuanten tialo timiquilo pampa techahuilúa, ticchihuaje len amo cuajcuali huan tipanulo in lacocoltilisli. Huan in se amo quiman quichiac len amo cuali.

<sup>42</sup> Cuaquinon quilic:

—Jesús, xichijnamiqui pan in tonali tihualas oc sepa pa tihuelitis.

<sup>43</sup> Huan Jesús quilic:

—Neli nimitzilía, axan ticayas ca nehual pa iparaiso Dios.

*Jesús miqui*

(Mt. 27:45-56; Mr. 15:33-41; Jn. 19:28-30)

<sup>44</sup> Cataya quinami lacualispan huan laticumactic pa mochi in lalticpan, mocahuac laticumac pa ye pa tiolac, <sup>45</sup> amo lahuiaya in tonali. Huan in tzotzomajli telahuazo hual pilujtataya lajco pa in lasojli calijtic huan in niman lasojli calijtic pin tiopan hué, tzayanic pa lajco, mochiac ome. <sup>46</sup> Huan tzajtzc Jesús ca lajtol chicahuac, quilic:

—Tata, nimotemaca ca noyulilisi pa tichlachilis.

Quiman quijtuc Jesús inon, jan yoje miquic. <sup>47</sup> Nepa cataya in laicanani romano hual yec inminteco cien guaches. Quitac yihual len panuc, quijtuc lajtomes huejué huan cuajcuali pa Dios, quilic:

—Neli in lacal yec se lacal cuali, amo quichiac len amo cuali.

<sup>48</sup> Huan moxtin in lacalera hual hualajque pa quitalosquiaya in lamictilisi, quitajque len panuc, pehualoaya motecuililo pa itzindan inminquixlan huan pehualoaya mocuepalo pa Jerusalén. <sup>49</sup> Ma yoje, mocahuajque nepa moquezataloaya huejquta yehuanten hual quiximatiloaya Jesús. Innojen sihuames noje hual quitocaloaya Jesús quiman quisaya pin lalticpan Galilea cataloaya quiztataloaya mochi inon hual panuc.

*Quilalpachulo Jesús*

(Mt. 27:57-61; Mr. 15:42-47; Jn. 19:38-42)

<sup>50</sup> Huan nepa cataya se lacal itoca José. Yihual yec se hué ca in Lanechiculisli Hué, yec se lacal cuali. Dios quitilic cuali iyolo José, pampa José yuliaya quinami Dios quinequi pa moxtin yulisi. <sup>51</sup> Yihual amo cataya ca in lajtulisli hual quichihujque in oc sequin hual yeje in Lanechiculisli Hué hual quimotexpahuililoaya Jesús pa quimictilosquiaya. Yihual yuliaya pa se caltilan itoca Arimatea, unca pa Judea inminlalticpan in judíos. In José quichiaya in tonali quiman huelitisquiaya Dios. <sup>52</sup> Yihual uyac ilaixpan Pilato, quitemachic pa yihual quimacahuiltisquiaya quihuica imijquil Jesús. <sup>53</sup> Cuaquinon uyac quitemuilic, quiquixtic pin cuahuil, quiliaruc ca se tzotzomajli yancuic, huan quilalic pan se coyunquil lahuajuanali pin tel, nepa ayamo quilalijque se mijquil. <sup>54</sup> In tonali cataya se hué tonali pa in inminihuil (fiesta), itocac in tonali pa lachijchihualisli pampa mostatica yahuiaya ye itonali niman hué inminfiesta in judíos. Axcan pejtihualaya ajsi in itonali in ilhuil. <sup>55</sup> Huan quitocatiahuililoaya José in sihuames huejquta, yehuanten hual quisajque pa Galilea ca Jesús. Quitajque in coyunquil (ostul) huan quitajque quinami quilalijque ca lajtic imijquil Jesús. <sup>56</sup> Cuaquinon mocuepajque pa inminchan huan quichijchihujque len ca chahuac hual ajuác calica quixahuililosquiaya in mijquil. Cuaquín ajsic in tonali hual mosehuilo in judíos huan mosehuiloaya in sihuames quinami quijtúa inminlajtlot in judíos.

## 24

*Jesús yuli oc sepa*

(Mt. 28:1-10; Mr. 16:1-8; Jn. 20:1-10)

<sup>1</sup> Huan mostatica, cataya pa laxpoyahuita pa in tonali hual quipehualtía in chicome, hualajque in sihuames pa in coyunquil (ostul) capa quilalijque imijquil Jesús. Quihualicaloaya inon hual ajaúac hual quichijchihuajque. <sup>2</sup> Ajsijque, huan quitajque in tixcali hual cataya chicuenta se layahualu-jquil, quitajque laijcuanili in tixcali capa quitzactataya in coyunquil (ostul). <sup>3</sup> Calajaquique, huan amo quitajque imijquil in Tata Jesús. <sup>4</sup> Yojque, nepa cataloaya, amo quimatiloaya len quijtulosquiaya. Cuaquinon nestiquisajque ome lacames, cataloaya lalaquentili ca nahuajmes hual niman laixpelaloaya. <sup>5</sup> Huan momajtijque in sihuames lachixtataloaya pan lali pampa in laixpelalislí quinmixpelaya pa inmixtololojmes. Innojen lacames quinlajlanijque in sihuames, quinmilijque:

—¿Leca anquitemujtica nican pin mijquimes yihual hual yultica? <sup>6</sup> Amo unca nican, axcan yultica oc seja. Xiquijnamiquican quinami anmitzilic inon pa innojen tonalijmes quiman ayamo anquisaya pa Galilea. <sup>7</sup> Anmitzilic pampa monequiaya pa yihual ilacal in cielo yesquiaya latemacali ca lacames ej'elehuis. Yehuanten yahuilooaya quipilulo pan se cuahuil, huan quiman panuje ye tonalijmes, yihual yahuiaya yuli oc seja.

<sup>8</sup> Cuaquinon quijnamiquijque len quinmilic Jesús. <sup>9</sup> Quisaje pin coyunquil (ostul), uyajtiquisajque pa quimachiltilosquiaya in once lanahuatinijmes huan moxtin in oc sequin monextilinjmes mochi innojen hual panujque. <sup>10</sup> Cataloaya María Magdalena, huan Juana huan María inantzín Jacobo huan in oc sequin sihuames ca yehuanten hual quinmilijque in lanahuatinijmes innojen lajtomes. <sup>11</sup> Huan ca yehuanten in lanahuatinijmes nesaiya quinami in sihuames amo quimatiloaya len quijtutataloaya, pampa inon amo quinel-totaloaya. <sup>12</sup> Ma yoje, moquetzac Pedro, molaluc pa in coyunquil, mopachuc quinmitac quinami in tzotzomajli cataya ihuán. Cuaquinon uyac Pedro ihuán, laijnamiquiaya pa quimatisquiaya len quinequiaya quiytu inon.

*Yehuanten hual canajque ojli pa Emaús quitalo Jesús*  
(Mr. 16:12-13)

<sup>13</sup> Huan noje pan in tonali yahuilooaya ome imonextilinjmes Jesús pa se caltilan tipichin itoca Emaús. Pa ajsilosquiaya nepa, nejnemilosquiaya quinami once kilómetros pan in ojli hual quisac nepa Jerusalén. <sup>14</sup> Yehuanten molaquetzilijtataloaya ca mochi innojen hual panujque. <sup>15</sup> Huan cataloaya laquezttataloaya huan quijnamictataloaya mochi hual panuc, jan axcan hualaya inminahuac yihual Jesús capa yehuanten nejnentataloaya, pehuaya nejnemi ca yehuanten. Ma yoje, yehuanten amo quiximatiloaya Jesús, <sup>16</sup> Dios quinchihuilic inmixtololojmes pa camo quislaculosquiaya. <sup>17</sup> Huan Jesús quinmilic:

—¿Len inon hual anmolaquetzilijtía capa annejnentiá?

Cuaquín yehuanten moquetzajque, lachixtataloaya quinami quincocujtataya inminyolo. <sup>18</sup> Se ca in omenten motocaya Cleopas quinancuilic, quilajlanic:

—¿Tehual tiunca se ca in míac judíos hual amo lacatije nican hual chantiticate pa Jerusalén pa ticayas pa in fiesta huan amo ticmati innojen lachihualislí hual panuje pa Jerusalén pan in tonalijmes? Sinda amo ticmati, cuaquín tiunca in se san hual amo quimati.

<sup>19</sup> Huan Jesús quinmilic:

—Cuaquín, ¿len panuc?

Yehuanten quilijque:

—Unca in hual quipanuc Jesús in nazareteco. Yihual yec lacal hual lanextiliaya pampa yihual yec ilajtuni Dios. Yec se lajtuni hual quiptiaya miac lahuellitlisli ca mochi len quichihuaya huan quiptuaya. Yoje quinextiliaya ilahuelitlisli ilaixpan Dios huan inminlaxpan moxtin lacames. <sup>20</sup> Ma yoje, totiopistas huejué huan yehuanten hual huelitilo ca tehuanten quitemacaje pa in huelitini romano pa yihual latilansiquiaya pa yesquiaya lamictli, huan quipiluje pan se cuahuil. <sup>21</sup> Huan tehuanten ticchixtataloaya pampa cataya yihual hual yesquiaya in se hual yahuiaya laxlahui pa techquixtisquiaya moxtin tehuanten in israelitos pin toplehuilisi. Huan axán, ca mochi inon, quiptiaya ye tonaljmes quiman quipanuc yihual inon. <sup>22</sup> Huan unca oc se lajtol ca inon. Sequin sihuames ca tehuanten techmacajsije. Uyaje laxpoyahuita pa in coyunquil capa quilalije in mijquil. <sup>23</sup> Amo quitaje in mijquil, quil. Ma yoje, techlamachiltitihualaje pampa quinmitaje chicuenta lanahuatinijmes hual quisaje pin cielo hual quinmilije pampa yuliaya oc sejpá. <sup>24</sup> Cuaquinon yaje sequin lacames ca tehuanten pa in coyunquil, quitaje mochi jan quinami techilije in sihuames. Ma yoje, yihual amo quitaje.

<sup>25</sup> Cuaquín Jesús quinmilic:

—Amhuanten, ¡quinami amo anquimati! Anhuejcahua pa anquinelto-cas mochi inon hual quiptunijme Dios ilajtunijmes. <sup>26</sup> Monequiaya pa panusquiaya in Cristo mochi inon, yoje laxlahuic pa mochi inminlajlaculisi in lacames pin lalticpan. Cuaquinon pampa inon Dios quichíac niman hué, yahui quiptiaya in Cristo pa imajma cuali pa huelitis.

<sup>27</sup> Huan pehuac quinmilic in hual quiptiuc Moisés. Cuaquín quinmiliaya len quiptujque mochi oc sequin ilajtunijmes Dios. Quinmilic len quinequiaya quiptu mochi hual quiptuujque pa quinmachiltisquiaya in hual yahuiaya quipanu Cristo. <sup>28</sup> Huan quiman ajsijque pa in cali ca capic yajtiahuiloaya, yihual Jesús quichíac quinami yahuiaya nejnentía pa ca yojque. <sup>29</sup> Cuaquín yehuanten quilijque ca mochi inminyolo, quilijque:

—Ximosehui ca tehuanten, axan unca tiolac huan layuajtitihuala.

Yoje calaquic ca yehuanten pa mocahuasquiaya. <sup>30</sup> Huan cataya nepa molalijtataya pa lacuasquiaya ca yehuanten, yihual canac in pan, quisehuic Dios, quilapanac in pan huan quinmacaya. <sup>31</sup> Cuaquinon Dios quinlapulic in omenten inmixtololojmes huan quiximatijque Jesús. Huan jan axcan yajmo nesiaya Jesús ca yehuanten. <sup>32</sup> Cuaquinon moilijque:

—¿Amo ticpiaje miac paquilisi pa toyolo nepa pan ojli quiman yihual techmachiltitihualaya len quinequi quiptúa in hual unca lajcuiluli pa ilajtol Dios?

<sup>33</sup> Cuaquinon moquetzajque jan ajnaxcan, mocuetquisaje pa Jerusalén huan quinmitajque in once lanahuatinijmes, cataloaya lanechiculi ca in oc sequin monextilinijmes. <sup>34</sup> Huan yehuanten quinmilijque in omenten:

—Neli yultica oc sejpá in Tata huan Simón quitac.

<sup>35</sup> Cuaquinon in omenten quinlamachiltijque len quinpanuaya pan in ojli pa Emaús, quinmachiltijque quinami quiximatijque Jesús quiman quila-panac in pan.

*Jesús quinmonextilia imonextilinijmes*

*(Mt. 28:16-20; Mr. 16:14-18; Jn. 20:19-23)*

<sup>36</sup> Molaquetzilijtataloaya pa momachiltisquiaya mochi inon huan yihual Jesús nestiquisac lajco ca yehuanten capa cataloaya, quinmilic:

—Ma mosehui anmoyolo.

<sup>37</sup> Yehuanten momajtitiquisajque huan mocahuajque momajtiticate, qui-  
jtujque pampa quiztataloaya se lamajtini. <sup>38</sup> Huan Jesús quinmilic:

—¿Leca anyuyucatica? Huan ¿pa len anlajtutica yoje pa anmoyolo?

<sup>39</sup> Xichitilican nomajmajuan huan nocxihuajmes, huan xicmatican pampa  
nehual niyultica. Xichquitzquican huan xiquitacan, pampa anquimati se  
lamajtini amo quinpía nacal huan umimes quinami anquita pampa nehual  
niquinpía.

<sup>40</sup> Quinmilic inon, quinnexilic icxihuajmes huan imajmajuan. <sup>41</sup> Huan  
ayamo quineltocaloaya cataya Jesús pampa quipialoaya niman míac paquil-  
isli huan pampa mocahualoaya quiztataloaya Jesús ca lamajtilisli. Huan  
Jesús quinmilic:

—¿Amo anquimpía nican len pa nijcuas?

<sup>42</sup> Cuaquinon quimacajque se lajco michin lahuatzali huan se xuchiyo  
néculi. <sup>43</sup> Yihual canac huan quicuac inminlaixpan. <sup>44</sup> Cuaquinon quinmilic:

—Ayamo annimitzcahuac quiman annimitzlaquetziliaya in lajtomes pa  
annimitznextilisquiaya quinami monequiaya pa mochihuasquiaya mochi  
innojen lajtomes hual cate lajcuiluli pa ilajtol Dios hual quijtuc pan ipampa  
Moisés. Huan yoje quijtuc pa inminamames ilajtunijmes Dios huan pa iamal  
in cantaditas (cuicames) Salmos. Annimitzilic mochi in lajtomes hual cate  
lajcuiluli pa ilajtol Dios nonahuac nehual.

<sup>45</sup> Cuaquinon quinmachiltic len quinequilo quijtulo innojen lajtomes hual  
cate lajcuiluli pa ilajtol Dios. <sup>46</sup> Huan quinmilic:

—Yoje unca lajcuiluli. Monequiaya pa nipanusquiaya míac lacocoltilisli  
nehual in Cristo, huan monequiaya pa nimiquis huan pa niyulis oc sejpa  
quiman panuje ye tonalijmes. <sup>47</sup> Axan, pampa nicchiac mochi inon, in  
unca ilahueliltilisli notoca. Ca in lahueliltilisli, monequi pa anquinla-  
machiltis moxtin pin lalticpan pampa quipialo pa quipalasi inminyolo pa  
lajnamiquisi quinami Dios quinequi. Yoje Dios huil quinpuphuilis inmin-  
lajlaculisli. Xipehuacan xicchihuacan inon pa Jerusalén. <sup>48</sup> Amhuanten  
anunca aquinojen hual anquitac panuje mochi inon hual nechpanuc.  
<sup>49</sup> Huan xiquitacan. Nehual nía annimitztilanilia in se hual noTajtzin neli  
quijtuc pampa yahuiaya anmitzmaca. Huan amhuanten, ximocahuacan  
nican pa Jerusalén. Amo huejcahuas ajsis in tonali quiman yihual anmitz-  
macas ilahueliltilisli yihual hual quisas pin cielo pa hualas ca amhuanten.

### *Jesús lejcúa pin cielo (ilhuicac)*

(Mr 16:19-20)

<sup>50</sup> Cuaquín quinhuicac Jesús yehuanten capa cataloaya amo huejca  
pa quiahuac Betania. Cuaquinon quinmajcoquic imajmajuan huan  
quitemachic Dios pa quinchihuilisquiaya cuali. <sup>51</sup> Huan quiman cataya  
quilajlantataya Dios pa yehuanten, mohuicac lejcutataya pa pani pin cielo  
(ilhuicac). <sup>52</sup> Yehuanten quimolancuacuetzilijque, cuaquinon mocuepajque  
pa Jerusalén ca paquilisli niman hué. <sup>53</sup> Huan cataloaya mojmosta pin  
tiopan hué, quijtutaloaya lajtomes niman huejué huan cuajcuali pa Dios.  
Yojque ma ye.



## Ilamachiltisli cuali Jesucristo hual quijcuiluc San Juan

### *Dios ilajtol mochíac lacal*

<sup>1</sup> Niman pa yina Dios quipehualtic mochi hual unca. Huan noje pa yina yuliaya in Se hual quijtuc in lajtol calica quipehualtic mochi. Yihual cataya umpa capa ayamo pehuac mochi. Huan cataya yihual hual technextilic quinami unca Dios, yihual hual quijtuc Dios ilajtol. Cataloaya huan Dios in Se, huan in Se yec Dios. <sup>2</sup> Quema, huan Dios cataloaya in Se hual quijtuc Dios ilajtol, huan Dios cataloaya umpa capa ayamo pehuac mochi. <sup>3</sup> Yihual quinchíac mochi, amo yec lachihuali nindeno sinda amo yeje innojen hual yihual quinchíac. <sup>4</sup> Yihual yec aqui hual quiyuliltía in hual quichíac. Huan in yulilisi calica yihual quiyuliltía unca in hual technextilía neli quinami huil tiquiximatilo, unca quinami techlahuilia toyolo timoxtin. <sup>5</sup> In yulilisi calica techyuliltía unca quinami lahuilisi hual lahui capa laticumac. Huan in laticumactilisli amo quiman huil quisehuía in lahuilisi.

<sup>6</sup> Cataya se lacal hual Dios quitlanic pa lajtus. Yihual motocaya Juan Lacuayatequini. <sup>7</sup> Hualac in Juan pa lamachiltis neli quinami se hual amo lacuajcuamana inahuac Dios ilajtol. Hualac pa lajtus neli inahuac Jesucristo, in Se hual techlahuía toyolo pa technextilis quinami neli huil tiquiximatilo Dios. Dios quitlanic Juan pa yojque moxtin quilalilisi inminlaneltocalisli ca in Se huan pa quineltocasi pan ipampa len quinmilic Juan. <sup>8</sup> In Juan amo yec yihual hual techyuliltía. Juan yec hual hualac pa lajtus neli inahuac in se hual hualaya pa techyuliltis. <sup>9</sup> Huan in se yec yihual hual neli quiyuliltía mochi lacal pa quipías lahuilisi melahuac pa iyolo. Huan hualaya pin lalticpan.

<sup>10</sup> Yihual cataya pin lalticpan, huan pan ipampa yihual in lalticpan yec lachihuali. Ma yoje, yehuanten pin lalticpan amo quimatije pampa cataya yihual hual quichíac mochi. <sup>11</sup> Hualac pa ilali hual yihual quichíac huan in míac ca yehuanten hual chantiloaya pa ilali amo quinequije quinamiquije.

<sup>12</sup> Ma yoje, cataloaya sequin hual quema, quinequije quinamiquije pa mochihualosquiaya icnían. Huan yehuanten yihual quinmacac pa yes inminyaxca pa mochihuasi Dios ixolomes. Quema, yehuanten yeje hual aqui quineltocaloaya yihual pampa quimatije yihual quisac capa Dios.

<sup>13</sup> Yoje lacatije quinami Dios ixolomes. Huan mas que lacatije quinami Dios ixolomes, amo cataya yoje quinami lacatilo pan lalticpan. Amo cataya quinami lacati se quipixtica itajtzin iesli huan inantzín iesli. Huan amo cataya quinami lacati se pampa oc se icuerpo quinequi monipanúa ca oc se pa lacatis se pan ipampa se lacal huan se sihual. Huan amo cataya quinami lacati se pampa in lacames quinequije pa lacatis in se. No, cataya quinami lacati se pampa Dios, yoje quinami san yihual Dios quimati.

<sup>14</sup> Huan yihual hual technextilic quinami unca Dios mochíac lacal quinami tehuanten huan chantini capa tehuanten. Huan tehuanten tiqitaloaya quinami quipiaya Dios ichicahualisli hué huan ilaixpelalisli hué huan cualtichin hual techlamahuisultiaya ca lamajtilisli. Yihual quipiaya in chicahualisli hué quinami monequi pa quipías se hual unca ixolol in Tata Dios, hual unca in se xolol san hual quipía Dios. Huan ca in míac chicahualisli hual quipía, tehuanten tiqitaloaya quinami yihual quinchihuiliaya moxtin míac lachihualisli cuali huan amo mocahua pa quijtus in hual unca melahuac

huan neli. <sup>15</sup> Juan Lacuayatequini lajtuc neli inahuac yihual, huan unca quinami axan tijcactialo ilajtol hual quiqtuaya chicahuac:

—Annimitzlaquetzilizic inahuac quiman yes nel nicayas niclantías notequipanulisli. Hualas se hual monotza niman míac huan nehual amo nimonotza nindeno. Unca pampa yihual yulini quiman nehual ayamo nipehuac niyulic. Yihual unca niman hué huan nehual amo nihué —yoje quijtuc Juan Lacuayatequini.

<sup>16</sup> Tehuante imonextilinjmes Jesucristo ticanilije yihual se ilajquito in niman míac lachihualisli cuali hual quipía. Quema, huan amo timocahuasi pa ticanilisi inon. <sup>17</sup> Moisés pa yina quinmilic Dios ilajtol inahuac mochi hual ticpialoaya pa ticchihuasi tehuante in israelitos. In cataya se lapalehuilisli. Ma yoje, hualac Jesucristo, yihual technextilic in cuali niman hué hual san Dios huil tejchihuilía. Huan technextilic inon hual unca melahuac inahuac Dios, technextilic quinami Dios technequi niman míac. <sup>18</sup> Huan mas que amaqui amo quiman quitac Dios, ma yoje Dios ixolol unca yihual hual techlamachiltic quinami unca Dios. Yihual in se xolol hual Dios quipía huan yihual quinami Dios. Yihual unca inahuac totajtzin Dios, huan quiximati mochi inahuac yihual huan quilasojla mochi inahuac yihual.

*Juan Lacuayatequini lajtúa neli inahuac Jesucristo*  
(Mt. 3:11-12; Mr. 1:78; Lc. 3:15-17)

<sup>19</sup> Yojque inminhueueyentes in judíos quintilanilije capa Juan tiopistas huan inminlapalehuinjmes in levitas. Quintilanije quistataloaya pa Jerusalén pa quilajlanisi, quilije:

—¿Len lahuelilitilisli ticanac?

<sup>20</sup> Huan inon unca len Juan quijtuc neli, quinmilic len quimatic pa iyolo. Amo quinmilic da amo quimatic, jan quinmilic len quimatic san, quinmilic:

—Nehual amo in Cristo hual Dios techtilanilía.

<sup>21</sup> Cuaquinon quilajlanije:

—Axcán, ¿len lahuelilitilisli ticpía? ¿lahuelilitilisli Elías? ¿Tehual Elías?

Huan quinmilic:

—Amo niunca.

Tel ¿tiunca in se hual yes Dios ilajtuni hual yahui huala?

Huan Juan quinnanquilic:

—Nehual amo niunca.

<sup>22</sup> Cuaquinon quilije:

—¿Aquí tehual, nuso? Pa yoje tiquinmachiltisi yehuante hual techtilanije ca tehual. ¿Len tía titechili monahuac?

<sup>23</sup> Quinmilic:

—Dios ilajtuni hual motocani Isaías quijtuc pa yina inahuac se hual ilajtol mocaquis tzajztitica capa amaqui chanti, huan in lajtol quijtúa: “Xicchiychi-huacan in ojli capa yahui panúa in Tata.” Inon unca hual quijtuc pa yina Isaías. Huan nehual jan yoje annimitzilijtica pa anmochichías pampa yahui panúa capa amhuante in Tata. Annimitzilijtica inon jan quinami Isaías quijtuc pa yina pampa nehual niahuiaya annimitzili.

<sup>24</sup> Yehuante in tiopistas huan inminlapalehuinjmes in levitas hual cataloaya latilanili capa Juan, yehuante yeje ca in lacames judíos hual quinel-tocaloaya inminlamaxtilisli in lacames hual motocaloaya fariseos. <sup>25</sup> Huan quilajlanije quilijitica:

—Cuaquinon, ¿leca tilacuayatequía sinda tehual amo in Cristo huan tel amo Elías huan tel amo in lajtuni?

<sup>26</sup> Juan quinnanquilic:

—Nehual nilacuayatequía ca al. Ma yoje, ca amhuanten moqueztica se hual amo anquiximati. Yihual pehuas quichías in hual Dios quitilanic pa quichías quiman yes nilaquisas ca in hual Dios nechtilanic pa nicchías nehual. Yihual anmitzlacuayatequis ca in Espíritu Santo hual ilacuayatequilisli unca quinami tixuxli. <sup>27</sup> Huan nehual amo nimonotza pa nictequipanulisli jan se nadita, ma niqijtu, amo nimonotza pa nictequipanulisli quinami se itequipanujquil quitomilía ilacsames iteco.

<sup>28</sup> Inon panuc pin caltilan itoca Betábara hual unca ca yojque itenco (analco) in atenco hué Jordán capa Juan Lacuayatequini lacuayatectataya.

### *Jesús iBorrego Dios*

<sup>29</sup> Mostatica quitaya Juan Jesús hualatataya capa yihual, huan Juan qij-tuc:

—Xiquitacan. Nepa unca in se hual Dios quilalía quinami huendi, yihual unca Dios iBorrego. Pan ipampa yihual Dios quinquixtilis in lacames mochi inminlajlaculisli. <sup>30</sup> In se unca yihual hual annimitzlaquetziliaya nepa capa niqijtuc: “Monotza niman hué yihual hual hualas pin tonalijmes quiman nilantica ca notequipanulisli. Huan nehual amo nimonotza len pampa yihual yultataya quiman nehual ayamo niyuliaya.” <sup>31</sup> Huan nehual amo nicmatiaya yihual yec hual aqui ticchixtataloaya pa hualas. Ma yoje monequi pa yehuanten in israelitos quimatisi pampa axan hualac. Pampa inon nilacuayatectihualaya ca al pa quiximatilosquiaya.

<sup>32</sup> Huan oc sejpa Juan lajtuc neli, quijtutica:

—Niquitac temujtica pin ilhuicac (in cielo) in Espíritu Santo, nesic quinami se huilol. Temuaya huan ajsic pani capa yihual, nepa mocahuac. <sup>33</sup> Huan quiman ayamo niqitac panuc inon, nehual amo nicmatic yihual yec hual aqui ticchialoaya. Ma yoje, Dios nechtilanic pa nilacuayatequis ca al huan yihual nechilic: “Ca yihual capa tiquitas temujtihualas in Espíritu Santo huan ca in se mocajtica, cuaquín in se yes hual aqui lacuayatequía ca in Espíritu Santo.” <sup>34</sup> Huan niqitac huan axan niqijtúa neli in se unca Dios iXolol.

### *Jesús pehua quinmana imonextiliniymes*

<sup>35</sup> Mostatica oc sejpa moqueztataya Juan ca ome imonextiliniymes. <sup>36</sup> Nepa Juan quitac Jesús panujtiahuiaya. Mocahuac quiztataya Juan, cuaquín quinmilic:

—Xiquitacan. Umpa unca Dios iBorreguito.

<sup>37</sup> Quicaquije len quinmilic Juan in omenten imonextiliniymes huan quitocaje Jesús. <sup>38</sup> Momalinac Jesús, quinmitac quitocatihualaloaya, quinmilic:

—¿Len anquitemujtihuala?

Yehuanten quilije:

—Rabí, ¿capa tichanti pa yoje timitzpxaluulisli?

(Rabí quinequi quijtúa Lamaxtini.)

<sup>39</sup> Quinmilic:

—Xihualacan huan anquitas.

Cuaquinon uyaje huan quitaje capa chantiaya, mocahuaje ca yihual in semilhuil, cataya quinami nahui horas pa tiolac.

<sup>40</sup> Huan Andrés cataya se ca in omenten hual quicaquije len quijtuc Juan Lacuayatequini huan cuaquín quitocaje Jesús. Andrés yec icni Simón Pedro.

<sup>41</sup> Cuaquín, in Andrés amo huejcahuac uyac quitemuc icni Simón huan umpa capa quitac, quilic:

—Tilamije ticmatije pampa axan unca in Mesías pin lalticpan, tilamije tiqitaje. (Mesías quinequi quijtúa Cristo, yihual hual Dios quilajtultic pa huelitís.)

<sup>42</sup> Andrés quihualicac Simón capa cataya Jesús. Huan umpa capa Jesús quitac Simón, mocahuac quiztica, quilic:

—Tel timotoca Simón ti'ixól Jonás. Mitztocayaltisi Cefas. (Cefas quinequi quijtúa Pedro o tixcali.)

*Jesús quinnotza Felipe huan Natanael*

<sup>43</sup> Mostatica quinequiaya quisa Jesús capa chantiaya, quinequiaya yahui pa in lalticpan Galilea. Quitac Felipe huan quilic:

—Xichtoca.

<sup>44</sup> Chantiaya Felipe pin caltilan Betsaida, capa chantiloaya noje Andrés huan Pedro. <sup>45</sup> Uyac Felipe, quitemuc huan quitac Natanaél, quilic:

—Tiqitaje yihual hual aqui quijcuiluc Moisés pa iamal in lajtol pa tehuanten in israelitos, noje quijcuiluje inahuac yihual Dios ilajtunijmes. Yihual Jesús ixolol José, yihual quisac pin caltilan Nazaret.

<sup>46</sup> Natanaél quilic:

—Da amo unca len cuali hual quisac pa Nazaret.

Felipe quilic:

—Xihuala xiquita.

<sup>47</sup> Jesús quitac Natanaél hualac capa yihual, huan quijtuc, quilic:

—Xiquita. Nepa unca se israelito melác. Amo quimati lacuajcuamana, amo unca se nadita lacuajcuamanalís ca yihual.

<sup>48</sup> Natanaél quilic:

—¿Quinami tichiximati? ¿Capa tichiximatic?

Quinanquilic Jesús:

—Ayamo mitznotzac Felipe huan nicmatic timolalijtataya itzindan in amacuál tipichin. Unca jan quinami nimitzitic nepa.

<sup>49</sup> Natanaél quinanquilic:

—Rabí, tehual Dios íXolol, tehual ihué Israel.

<sup>50</sup> Quinanquilic Jesús quilijtica:

—Nimitzilic quinami nimitzitic itzindan in amacuál tipichin, huan ¿pampa inon tichneltoca? Inon amo lachihualísli hué quinami innojen míac huéjue hual tiquinmitas pa tonalijmes hual yalo ajsilo.

<sup>51</sup> Huan quilic:

—Annimitzilía neli inon. Anquitas lapujtica in cielo huan anquinmitas Dios ilanahuatinijmes pin cielo (ilhuicac) lejcuticate huan temujticate nopan nehual ilacal in cielo.

## 2

*Jesús yahui pa se monamictilisli pa Caná de Galilea*

<sup>1</sup> Mostatica yupan Jesús cataya capa yahuiloaya monamictilo omenten pin caltilan Caná pin lalticpan Galilea. Huan cataya nepa Jesús inantzin.

<sup>2</sup> Quinnotzaje Jesús noje huan imonextilinijmes pa hualalosquiaya capa yahuiloaya monamictilo. <sup>3</sup> Quitaje pampa yajmo cataya iayo uva coc. Pampín inantzin quilic Jesús:

—Yajmo quipialo iayo uva coc.

<sup>4</sup> Huan Jesús quilic:

—Nana, ¿len nicpías pa niquitas ca tehual? Ayamo ajsic in tonali pa nipehuas nicchías len quinnextilis lacames capa nihualac.

<sup>5</sup> Quinmilic inantzin in tequipanujquimes:

—Xicchihuacan len yes anmitzilis.

<sup>6</sup> Cataloaya nepa seis (chicuase) tapalcames lachihuali ca tixcali hual quilalililoaya al. In al quinequiloaya pa lachipahuasi quinami quijtúa ilajtol Dios hual quimaxtilo in judíos. Cajsiloaya mochi sejse ca in chicuase tapalcames quinami ochenta o cien litros. <sup>7</sup> Quinmilic Jesús:

—Xiquintemiltican ca al in tapalcames.

Huan quintemiltije, ca nadita quinequiloaya toyahuilo. <sup>8</sup> Cuaquinon Jesús quinmilic:

—Axan, xicanacan, xiquihuiquilian inminlaicanani yehuanten hual quinmacaticate iayo uva coc yehuanten hual quinhuacalcaje pa in monamictilisli.

Yojque quichihuaje. <sup>9</sup> Huan cunic in laicanani in al hual mochíac iayo uva coc. Yihual amo quimatiaya capa canaje. Ma yoje, in tequipanujquimes quimatije, pampa cataloaya yehuanten hual canaje in al. Cuaquín quínotzac in laicanani yihual hual monamictiaya. <sup>10</sup> Quilic:

—Mochi lalac pehua quinmacatica iayo uva coc cuali pa cunisi yehuanten hual quinhuacalcaje pa ichan pa len fiesta. Cuaquinon quiman cuniloaya míac, yihual quínmaca pa cunisi iayo uva coc hual amo niman cuali. Ma yoje, tehuac ticajcoquic in cuali pa cunisi axan.

<sup>11</sup> Ca inon pehuaya quinchía Jesús innojen hual quinmahuisultiloaya ca lamajtilisli lacames. Cataya pin caltilan Caná pin lalticpan Galilea. Yoje quinextic quinami yihual quipía Dios ilahueliltilisli hué, huan quilalililoaya inminlaneltocalisli ca yihual imonextiliniymes pampa quimatiloaya yihual yec in Cristo.

<sup>12</sup> Panuc inon, temuc Jesús pa in caltilan Capernaum, yihual huan inantzin huan icnían huan imonextiliniymes. Umpa chantiloaya jan se ome tonaliymes san.

### *Jesús quichipahua in tiopan hué*

(Mt. 21:12-13; Mr. 11:15-18; Lc. 19:45-46)

<sup>13</sup> Ajsitihualaya inminfiesta (ilhuil) in judíos, in fiesta itoca pascua, huan panquisac Jesús pa Jerusalén. <sup>14</sup> Nepa pin tiopan hué quinmitac yehuanten hual quínnamacaloaya toros huan borregos huan huilomes. Noje quinmitac yehuanten hual yehualoaya quínpatilijtataloaya in lacames inmintomin.

<sup>15</sup> Cuaquinon mochihuicilic se lahuitequiloni ca mecames, quinquixtic moxtin pa quíahuac in tiopan hué, in borregos huan in toros huan in lanamacaniymes. Quilasac pan lali inmintomin yehuanten hual quínpatiloaya, huan quíntzincuepac innojen capa molaliloaya pa lanamacasi. <sup>16</sup> Quinmilic yehuanten hual quínnamacaloaya huilomes, quinmilic:

—Xiquinquixtican innojen nican pa quíahuac, amo xicchihuacan pa anlanamacas pa ichan noTajtzin!

<sup>17</sup> Quijnamiquije imonextiliniymes quinami unca lajcuiluli pa Dios iamal, yojque quijtúa inahuac yihual: “Ca laneguilisli niman hué hual nechyantía chicahuac nicnequi pa quichihuasi quinami ticnequi, Tata, quiman yes niunca calijtic mocalí.” Yojque unca lajcuiluli.

<sup>18</sup> Cuaquinon quínanquilije in huejueyenten in judíos, quilije:

—¿Len ilanextilisli ilahueliltilisli Dios tía titechnextilía, pa yojque ticmatisi unca tel moyaxca pa ticchías inon, huan da ticpía lahuiltilisli pa ticchías inon?

<sup>19</sup> Jesús quínnanquilic:

—Xicxitinican in tiopan huan químan panusi ye tonaliymes, nijquetzas.

<sup>20</sup> Cuaquinon quilije in judíos:

—Cuarenta y seis (Ompuhualihuanchicuase) xixihuil quichijtataloaya in tiopan hué, huan ¿tehual tijquetzas jan pan ye tonalijmes san? Tislacati.

<sup>21</sup> Amo quimatiloaya pampa Jesús quinequiaya quiytu icuerpo quiman quijtutataya “in tiopan”, pampa Dios chantiaya laijtic Jesús icuerpo quinami cataya se tiopan. <sup>22</sup> Yoje, quiman quimictije Jesús huan umpa panuje ye tonalijmes, cuaquín ajsic in tonali quiman mocuepac yulic Jesús. Cuaquinon quijnamiqijie imonextiliniyjes quinami yihual quijtuc inon. Quineltocaje len cataya lajcuiluli inahuac Jesús huan quijnamiqijie in lajtol hual yihual quinmilic.

### *Jesús quinmiximati moxtin*

<sup>23</sup> Ma yoje, mochi in tonalijmes capa cataya Jesús pa Jerusalén pa in ilhuil (fiesta) pascua, cataloaya miac lacames nepa hual quineltocaje pampa Dios quitilanic pin lalticpan pa huelitis capa yehuanten, jan quinami quinequi quijtúa itoca. Quineltocaje quiman quitaloaya innojen huejué hual quinchíac calica quinnextiliaya quinami yihual quiipiaya Dios ilahueliltisli.

<sup>24</sup> Ma yoje, Jesús amo quilaliaya laneltocalisli ca yehuanten. Yihual quinmiximatiaya moxtin. <sup>25</sup> Amo monequiaya pa se quilis yihual len neli unca laijtic inminyolo lacames, pampa yihual ihuian quimatiaya cuali quinami jan axcan in lacames huil quipalalo inminyolo pa mochihuasi ilacocoliniyjes yihual.

## 3

### *Jesús huan Nicodemo*

<sup>1</sup> Ma yoje, cataya se lalac ca in lacames fariseos, motocaya Nicodemo. Yihual se hué lalac ca in judíos. <sup>2</sup> In se hualac capa Jesús pa layúa, quilic:

—Rabí, ticmatilo tehual tiunca lamaxtini hual tihualac pampa Dios mitztilanic. Ticmatilo inon, pampa amaqi huil quinchihuaya innojen huejué hual tehual tiquinchá sinda amo cataya Dios ca yihual.

<sup>3</sup> Jesús quinanquilic:

—Neli nimitzilía, sinda amo mocuepa lacati se pa pani pin cielo, yihual amo huil quimatis nindeno quinami Dios lahueliltía.

<sup>4</sup> Quilic Nicodemo:

—¿Quinami huil lacati se sinda axan unca hué? Amo huil calaqui oc sejsa laijtic inantzin pa yoje mocuepas lacatis.

<sup>5</sup> Quinanquilic Jesús:

—Nimitzilía neli, sinda amo lacati se pan ipampa al huan in Espíritu Santo, cuaquín yihual amo huil cayas capa lahueliltía Dios. <sup>6</sup> Lacames cate nacal huan umil huan esli. Huan quinlacatiltilo oc sequin hual cate nacal huan umil huan esli. In Espíritu quilacatiltía espíritu. <sup>7</sup> Amo ximolapolulti pampa nimitzilic anquipías pa anlacatis pa pani pin cielo (ilhuicac). <sup>8</sup> In ijyecal unca quinami in Espíritu, ijyecatía ca capic quinequi huan tijcaqui. Ma yoje, amo ticmati capa hualac huan ca capic yahui. Jan yoje unca ca sejsa sinda lacati pan ipampa in Espíritu. Amo quita capa huala in Espíritu, amo quita tequipanujtica, amo quita ca capic yahui.

<sup>9</sup> Nicodemo quinanquilic:

—¿Quinami huil panúa inon?

<sup>10</sup> Quinanquilic Jesús:

—Tehual tiunca inminlamaxtini niman hué in israelitos, huan ¿amo ticmatí len quinequilo quijitulo innojen? <sup>11</sup> Nimitzilia neli, tehuanten tiquijitulo len ticmatilo, huan tiquijitulo neli len tiquitaje. Huan amo ancana len tiquijitulo neli. <sup>12</sup> Annimitzlaquetzilic inminahuac innojen hual panulo pan lalticpan. Huan amo anquineltoaca in hual nicnequí annimitzmaxtia. Axan, ¿quinami anquineltoacas sinda annimitzlaquetzilis inahuac in hual panúa pin cielo (ilhuicac)? Amo huil.

<sup>13</sup> 'Amo unca amaqui hual lejcuc pin cielo. Pampín amaqui huil anmitzilis len panúa pin cielo. Jan in Se hual temuc quistataya pin cielo, nehual ilacal in cielo, nehual huil. <sup>14-15</sup> Huan jan yoje quinami Moisés cajcoquic in teposcuhual nepa capa amaqui cuajmiluni, jan yoje nehual ilacal in cielo nicpiás pa niyes la'ajcoquili, pa yoje moxtin hual quilalisi inminlaneltoacalisci ca nehual canasi Dios iyulilisi hual amo quiman lamis.

### *In lasojlalisli hual Dios quipía pa moxtin pin lalticpan*

<sup>16</sup> 'Unca pampa Dios quinnequic miac moxtin yehuanten pin lalticpan. Huan yoje unca quinami quinnequic: Quitemacac ixolol, in se san hual quipía, quitemacac pa miquis, pa yoje aquí yes quilalía ilaneltoacalisci ca yihual, yoje in se amo polehuis pa yajmo yulis ca yihual. Huan amo inon san. Noje canas Dios iyulilisi hual amo quiman lamis. <sup>17</sup> Unca pampa Dios amo quitilanic iXolol pin lalticpan pa quinpolehuiltis yehuanten pin lalticpan. Quitilanic iXolol pa yoje pan ipampa yihual yehuanten yesi lamacahuali pa camo polehuisi pampa yeje laijlaculi. <sup>18</sup> Aquí yes hual quineltoca Dios iXolol yihual Dios amo quipolehuiltis. Amo quipias pa miquis laxiluli pa yajmo quitas Dios pampa yec laijlaculi. Aquí yes amo quineltoca, in se Dios axan quijituc pampa quipía pa miquis laxiluli ilaixpan Dios pampa amo quineltoca Dios iXolol hual unca in se iXolol hual quipía. <sup>19</sup> Huan ¿leca cate yoje lapolehuiltis innojen lacames hual amo quineltocalo Dios iXolol? Unca pampa Dios ilajtol ajsic pin lalticpan, unca quinami lahuilisi pa lacames inminyolo. Ma yoje, in lacames amo quixtocaje Dios ilahuilisi pa inminyolo. Quixtocaje yulije quichijiticate amo cuali. Yehuanten hual quixtocalo quichihualo amo cuali quixtocalo quichihualo capa laticumac. Yoje, in lacames quixtocalo in laticumac huan in lahuilisi amo quixtocalo. <sup>20</sup> Unca pampa mochi se hual quichía len amo cuali, yihual amo quixtoca Dios ilajtol hual unca quinami lahuilisi. In se amo moajxiltía pa quicaquis Dios ilajtol, pampa amo quinequi pa momatis quinami amo unca cuali in hual quichijtica. <sup>21</sup> Huan se hual yuli quichijtica len unca melahuac quinami quijtúa Dios ilajtol, yihual moajxiltía capa huil quicaqui Dios ilajtol hual unca quinami lahuilisi. Quichía yoje pa yoje mochi in hual quichijtica cayas quinami quichía se hual quineltoca Dios.

### *Juan Lacuayatequini lajtúa oc sejpa inahuac Jesús*

<sup>22</sup> Panuc inon, uyaje Jesús huan imonextiliniymes pa in lalticpan Judea, nepa mocahuaya huan lacuayatequiaya. <sup>23-24</sup> Juan noje cataya pin caltilan Enon capa amo cataya huejca Salím. Nepa lacuayatectataya pampa cataya miac al. Hualaloaya lacames huan quincuyatequiaya Juan pampa Juan ayamo cataya latzacuali pa calijtic. <sup>25</sup> Yoje, pehuaje molaxilije lajtomes Juan imonextiliniymes ca se judío, molaxililoaya lajtomes inahuac quinami mochipahuas se pa yoje Dios quitas chipahuac in se.

<sup>26</sup> Cuaquinon hualaje Juan imonextiliniymes capa yihual, quilije:

—Rabí, yihual hual cataya ca tehual ca yoje (ananco) in atenco hué Jordán, tiqijituc neli pampa yihual unca Dios iBorrego, huan xiquita. In se lacuayatectica huan moxtin quitocalo yihual.

<sup>27</sup> Quinnanquilic Juan, quinmilic:

—Se lacal amo huil cana Dios ilahueliltilisli sinda Dios pin cielo amo quimacac. <sup>28</sup> Amhuanten nojen anquimati neli quinami annehcaquic niqijituc ca lajtól melahuac pampa nehual amo in Cristo. Ma yoje, niunca latilanili, Dios nechtilanic pa nicayasquiaya nican in tonalijmes capa ayamo hualaya Cristo pa yoje niquinmilis in lacames pampa yahuiaya huala. <sup>29</sup> Unca quinami in lacames hual yalo monamictilo. In lacal quiplá in sihual hualca monamictis. Ma yoje, in lacal ilasojli moquetza pa cayas inahuac in lacal hual monamictía pa quipalehuis. Huan quiman yes ilasojli quicaqui lajtujtica in lacal hual monamictis, cuaquinon ilasojli quiplá míac paquilisli pampa quicaqui. Huan nehual niquinami in lacal ilasojli. Nicplá míac paquilisli pampa in lacal hual monamictía, nicplá yoje niman míac paquilisli hual yajmo huil momiactía. <sup>30</sup> Lacames quiplasi pa quimatisi mojmosta quinami yihual unca niman hué. Huan quiplasi pa quimatisi quinami nehual nitipichin.

### *Yihual hual huala quistataya pa pani*

<sup>31</sup> Yihual hual hualac quistataya pa pani unca niman hué. Moxtin oc sequin amo quiman ajsisi yesi yoje hué. Yihual hual unca pin lalticpan hualac pin lalticpan huan lajtúa quinami quimatilo len unca pin lalticpan. Yihual hual hualac quistataya pin cielo unca niman hué. Moxtin oc sequin amo quiman ajsisi yesi yoje hué. <sup>32</sup> Yihual quijtúa neli len quitac huan quicaquic nepa pin cielo. Huan mas que amo unca se hual quineltoca len yihual Cristo quijtúa, ma yoje Cristo quimati huan quijtúa neli pampa Dios unca melahuac, huan unca neli in hual yihual quijtúa. <sup>33</sup> Aquí yes quineltoca len yihual Cristo quijtúa neli, cuaquín yihual quimati huan quijtúa neli pampa Dios unca melahuac, quinami se temulol lanextilía neli quinami se amal quijtúa len hual unca neli. <sup>34</sup> Yihual Cristo hual Dios quitilanic quijtúa Dios ilajtomes, pampa yihual Dios quimaca mochi in Espíritu Santo. Amo quimaca quinami se hual lalamachihuilijtinemi. <sup>35</sup> Dios in Tata quinequi Jesús iXolol, huan quitemacac mochi ca Jesús iXolol pa yes iyaxca. Yoje mochi hual iyaxca Dios unca iyaxca Jesucristo. <sup>36</sup> Aquí yes quineltoca Dios iXolol quiplá Dios iyulilisli hual amo quiman lamis. Huan aquí yes amo quineltoca Dios iXolol amo quitas iyulilisli. Dios amo mocahua pa cualanis ca in se hual amo quineltoca.

## 4

### *Jesús huan in sihual samariteca*

<sup>1</sup> Cuaquinon, quisac in Tata pin lalticpan Judea. Quisac pampa quimatic quinami yehuanten hual quineltocaloaya inminlamaxtilisli in fariseos quicaquije quinami yihual Jesús quinmanaya huan quincuayatequiaya míac monextiliniñmes huan Juan yajmo míac. <sup>2</sup> Ma yoje, amo cataya Jesús hual lacuayatequiaya, cataloaya imonextiliniñmes hual lacuayatequiloaya. <sup>3</sup> Pampín, quisac in lalticpan Judea, uyac pa in lalticpan Galilea. <sup>4</sup> Huan quiplaya pa quipanahuis in lalticpan Samaria. <sup>5</sup> Quipanajtataya ca ompic, uyac capa amo huejca cataya se caltilan pa Samaria itocac Sicar. Ajsic capa in lali hual Jacob quimacac ixolol José pa yina. <sup>6</sup> Noje cataya nepa Jacob



icoyunquil huejcalan pa al. Huan quinami siajtihualaya Jesús ca in miac nejnemilisi, molalic inahuac in coyunquil, cataya quinami lacualispan. <sup>7</sup> Cuaquín hualac se sihual samariteca pa canas al. Jesús quilic:

—Xichmaca al pa nicunis.

<sup>8</sup> Cataloaya inminhuían pampa uyaje imonextiliniymes pa in caltilan pa quicuhualosquiaya len quicualosquiaya. <sup>9</sup> In sihual samariteca quilic:

—Tehual tijudío. ¿Leca tinechmotemachilía nehual len ticunis? Nel niunca samariteca.

(Quilic yoje, pampa in judíos amo motemachilo ca in samaritecos, amo quinmixtocalo yehuanten.)

<sup>10</sup> Jesús quinanquilic, quilic:

—Sinda ticmatiya len Dios quinequi mitzmaca, huan sinda tiqixima-tiya aqui nehual niunca hual nimitzmotemachilic al pa nicunis, cuaquín tichmotemachiliaya huan nimitzmacaya al hual totoca pa layulitilis.

<sup>11</sup> In sihual quilic:

—Tata, tehual amo ticpía len calica ticanas al, huan in coyunquil unca huejcalan. ¿Capa ticpía in al hual totoca pa layulitilis? <sup>12</sup> ¿Tehual tihué huan totajtzin Jacob amo yoje hué? Yihual quihuajuanac in coyunquil huan techcahuilic. Cuniniyme al hual quisac nican, yihual huan ixolomes huan iyulijquimes cuniniyme al hual canaje pin huejcalan nican. Huan tehual, ¿tinechmacas al?

<sup>13</sup> Jesús quinanquilic:

—Moxtin hual cunilo in al nican amiquisi oc sejpa. <sup>14</sup> Ma yoje, aqui yes cunis in al hual nicmacas nehual, yihual amo quiman amiquis. Quema, in al hual nicmacas yes quinami se ilajuichuilisli al laijtic yihual huan in al quinami lajuichus lejcitica pa paní pa quiyuliltis ca Dios iyulilisi hual amo quiman lamis.

<sup>15</sup> In sihual quilic:

—Tata, xinechmaca in al pa como niamiquis huan pa como nicpías pa nihualas nicanas al ca niquic.

<sup>16</sup> Jesús quilic:

—Xía xicnotza pa hualas molahuical huan xihualacan ca niquic.

<sup>17</sup> Quinanquilic in sihual:

—Amo nicpía nolahuical.

Jesús quilic:

—Neli tiqijtúa tichilijtica pampa amo ticpía molahuical. <sup>18</sup> Unca pampa tixinpíac macuili molahuicalhuan. Huan amo san inon, yihual hual ticpía axan amo molahuical. Neli tiqijtuc tichilijtataya inon.

<sup>19</sup> In sihual quilic:

—Tata, nicmati pampa inon pampa tehual tiunca se ilajtuni Dios.

<sup>20</sup> Quimolancuacuetziliniyme Dios totajtzitzían pan in loma nican. Huan amhuanten anquijtúa unca pin Jerusalén capa monequi pa lacames quimolancuacuetzilisi Dios.

<sup>21</sup> Jesús quilic:

—Nito, xicneltoca len nía nimitzilía. Ajsiticate tonaliymes huan pa inonjen tonaliymes yajmo monotzas capa anquimolancuacuetzilis toTajtzin Dios. Amo anquipías pa anquimolancuacuetzilis nican, amo anquipías pa anquimolancuacuetzilis pa Jerusalén. <sup>22</sup> Amhuanten anquimolancuacuetzilía len amo anquimati. Tehuanten ticmolancuacuetzililo len ticmatilo. Unca pan topampa tehuanten in judíos huala Dios ilajtol hual lamaxtilía quinami in lacames moquixtilisi pin ipolehuilisi inminlajlaculisli. Huan

lamaxtilía quinami quipiasí Dios iyulilislí hual amo quiman lamis. <sup>23</sup> Ma yoje, ajsítica in tonalí, quema, axan ajsic in tonalí, huan yehuanten hual neli quimolancuacuetzililo Dios quimolancuacuetzilislí pan ipampa inminyolo huan quimolancuacuetzilislí pan ipampa mochi melahualislí. Lacames quinami innojen toTajtzin Dios quintemujtá pa quimolancuacuetzilislí. <sup>24</sup> Dios unca Espírítu, huan yehuanten hual quimolancuacuetzililo quipialo pa quimolancuacuetzilislí pan ipampa espírítu huan pan ipampa melahualislí. In espírítu unca pa iyolo se. Dios toTajtzin quintemúa lacames huan sihuames quinami yehuanten pa quimolancuacuetzilislí yoje.

<sup>25</sup> In síhual quílic:

—Nicmatí pampa yahuí huala in Mesías hual quitocayaltílo Cristo. In tonalí yihual hualas, yihual technextilislí mochi.

<sup>26</sup> Jesús quílic:

—Nehual niunca in Cristo, nehual hual nimitzlaquetzilijtica tehual.

<sup>27</sup> Jan nican mocuetzihualaloaya imonextiliniymes, mocahualoaya moizticate pampa Jesús laquetzátaya ca se síhual. Ma yojqe amaquí quílic: “¿Len tícnequí ca in se?”, o “¿Leca tilaquetzica ca yihual?”

<sup>28</sup> Cuaquinon quicajcahuac in síhual itapalcal, uyac, yajtíac pa in caltilan, quinmílic in lacames:

<sup>29</sup> —Xihualacan xiquítacan se lalac hual nechílic mochi len nicchihuaya. ¿Amo yes in Cristo in se?

<sup>30</sup> Jan axcan quisaje pin caltilan, pehuaje hualaje ca capic cataya Jesús.

<sup>31</sup> Hualajtataloaya in samaritecos, quilije Jesús imonextiliniymes:

—Rabí, xilacua.

<sup>32</sup> Huan Jesús quinmílic:

—Nehual nicpía len nijcuas hual amhuanten amo anquimati.

<sup>33</sup> Pampín moilije imonextiliniymes se ca oc se, moilije:

—¿Unca se hual quihualiquílic len pa quicuas?

<sup>34</sup> Jesús quinmílic:

—Nicnequí míac pa nicchías len quínequí Dios hual nechtilanic, amo yoje míac nicnequí nilacua. Yoje nilamis nicchías Dios itequipanulislí. <sup>35</sup> ¿Amo anquijtúa: “Quipías nahuí meslí, cuaquinon ajsislí in lapixcalislí”? Huan nehual níquinnechicujtica lacames hual nechneltoaloc, inon unca quinami se lapixcalislí. Huan xiquítacan, annimitzilía xiquinlapucan annoixtololojmes huan xiquinmiztiacan in cuajmilimes. Huan quinami lacames huan sihuames hual nechneltocasi axan hualajticate nepa pin cuajmilimes. Unca quinami cuajmilimes axan chicajticate pa in lapixcalislí, pampa lacames yalo nechneltoaloc. <sup>36</sup> Unca quinami axan cantica in lapixcani ilaquehualislí, huan lapejpentica huan lamontutica. Yoje lanechicujtica pa in lapixcalislí. In lapixcalislí unca quinami se hual quinnotzas oc sequin lacames pa nechneltocasi, huan yehuanten canasi Dios iyulilislí hual amo quiman lamis. Yoje moxtin hual pehuaje quinlamachiltije nonahuac nehual quipiasí paquílislí ca yehuanten hual quinpalehuíje pa nechneltocasi. Unca jan quinami in paquílislí hual quipialo yehuanten hual latocalo huan yehuanten hual lapixcalo. <sup>37</sup> Unca neli in hual tiquijtulo: “Unca se hual latoca, huan oc se hual lapixca.” <sup>38</sup> Unca quinami annimitztilanic pa anlapixca capa amo antequipanuaaya. Oc sequin tequipanuloaya nepa, huan axan unca quinami amhuanten anpejtica anlapixca capa yehuanten latocaniyme.

<sup>39</sup> Huan míac ca innojen lacames samaritecos hual chantiloaya pa in caltilan quíneltoaje pan ipampa len quinmílic in síhual. Yihual quinmílic neli: “Yihual nechílic mochi hual nicchíac pa noyulilislí.” <sup>40</sup> Yoje, hualaje

capa yihual Jesús in samaritecos, quitemachije pa mocahuas ca yehuanten pin caltilan Sicar. Cuaquín mocahuac Jesús umpa ome tonalijmes. <sup>41</sup> Huan miac oc sequin ca yehuanten quineltocaje Jesús pan ipampa len yihual quinmilic. <sup>42</sup> Pehuaje quilije in sihual:

—Axan ticneltocalo amo pan ipampa len titechilic, pampa axan tijaquije tehuanten tohuían, huan neli ticmatilo in lalac unca in Cristo hual quinquixtilía inminlajlaculislí in lacame pin lalticpan pa camo polehuisi.

### *Jesús quipajtía ixolol lalac se huelitini*

<sup>43</sup> Panuje in ome tonalijmes, quisac Jesús umpa huan uyac pa in lalticpan Galilea. <sup>44</sup> Uyac umpa ca imonextiliniijmes. Huan yihual Jesús neli quijtuc pampa amo quimatilo momajtilo iyampa se ilajtuni Dios yehuanten pa ilali capa moscaltic. <sup>45</sup> Ma yoje, yehuanten pa Galilea quinamiquije ca paquilislí, pampa quitaje mochi innojen hual quinchíac nepa Jerusalén pin fiesta (ilhuil), yehuanten noje nepa cataloaya.

<sup>46</sup> Cuaquinon uyac oc sejpa pa in caltilan Caná pin lalticpan Galilea. In caltilan cataya capa quipiaya je quesqui tonalijmes quipalac in al pa mochíasquiaya iayo uva coc. Huan cataya se huelitini ca yehuanten hual huelitiloaya. Quipiaya ixolol mococujtataya pin caltilan Capernaum.

<sup>47</sup> Quicaquic lajtuloaya quinami quisac Jesús in lalticpan Judea huan axan ajsic pa Galilea. Pampín uyac capa Jesús, quiyantíc pa temus Jesús pa Capernaum pa quipajtís ixolol, pampa yahuiaya miqui ixolol. <sup>48</sup> Jesús quilic:

—Sinda amo anquita panúa len pin cielo (ilhuicac) o pan lalticpan hual anmitzmahuisultía ca lamajtilislí, amo quiman anquinequi anquineltoaca nehual niquistihualac capa unca Dios.

<sup>49</sup> In huelitini quilic:

—Tata, xihuala ca nehual pa camo miquis noxól.

<sup>50</sup> Jesús quilic:

—Xía pa mochan, yuli moxól, amo miquis.

Quineltocac in lalac in hual quilic Jesús, uyac. <sup>51</sup> Huan cataya pan ojli, ayamo ajsiaya pa ichan huan quinamictihualaje itequipanujquimes, quilije pampa pajtic ixolol, quilije:

—Pajtic moxól, yultica.

<sup>52</sup> Quilajlanic quiman pehuac pajtic huan quilije:

—Yalhua pa se hora pa tiolac mosehuic totoníac.

<sup>53</sup> Pampín quimatic itajtzin cataya in hora quiman quilic Jesús: “Yultica moxól.” Yoje yihual quineltocac pampa Jesús quistihualac capa unca Dios huan noje quineltocaje moxtin pa ichan. <sup>54</sup> Ca inon, axan cataloaya ome lachihualislí hual Jesús quinchíac hual pampa innojen quinmahuisultije ca lamajtilislí moxtin. Inon panuc pin tonalijmes quiman quisac in lalticpan Judea pa hualas pa Galilea.

## 5

### *Jesús quipajtía se lalac hual amo huil moquetza*

<sup>1</sup> Panuje innojen tonalijmes, cataya se fiesta (ilhuil) pa in judíos, huan panquisac Jesús pa Jerusalén. <sup>2</sup> Cataya se lahuajuanali amo huejcalan capa maltinijme. Amo cataya huejca in lalapujquil capa calaquiniijme in borregos pa in cali cuajtíc (tepandí) hual quiyahualuaya in caltilan. In lahuajuanali motocaya ca lajtól hebreo Betzata, huan pa itenco catanijme

macuili caltzindis mochi lalapuli san ca chicuenta cuajmaxalimes lachihuali ca tixcalimes. <sup>3</sup> Pa in caltzindis lastataloaya míac hual cojcocoxqui, pachacames huan yehuanten hual amo huil nejnemiloaya huan yehuanten hual mocololojtataloaya. Quichialoaya pa quiman molinisquiaya in al. <sup>4</sup> Se ilanahuatini in Tata temuni quistataya pin cielo (ilhuicac) huan quiculinini in al, yoje panuc sejpa huan oc sejpa mochi xihuil. Huan quiman mosehuiaya molini in al, cuaquín aqui cayasquiaya hual laicaniaya calaqui pa al, yojque yihual pajtiaya. <sup>5</sup> Nepa lastataya se lalac cocoxqui, axan quiapiaya treinta y ocho (sempuhualicaxtulihuanye) xixihuil amo huil moliniaya. <sup>6</sup> Quitac Jesús in lalac lastataya, quimatic pampa quiapiaya míac xixihuil yoje cocoxqui. Huan quilic:

—¿Ticnequi tipajtía?

<sup>7</sup> In cocoxqui quinanquilic:

—Tata, amo nicpía je lalac ca nel pa nechlasas pa al quiman yes mosehuía molinía. Huan nimotolinía pa nitemus pa al, umpa nechpanahuía oc se.

<sup>8</sup> Jesús quilic:

—Ximoquetza, xicana mopelal huan xinejnemi.

<sup>9</sup> Huan jan ajnaxcan pajtic in lalac, canac ipelal huan pehuac nejnemic. Cataya in tonali siete (chicome) huan pa in tonali mosehuilo in judíos.

<sup>10</sup> Pampín quilije in judíos yihual hual pajtic, quil:

—Axa in tonali timosehuilo, huan tolajtol amo mitzmacahuiltía pa ticmantías mopelal.

<sup>11</sup> Yihual quinnanquilic:

—Yihual hual nechpajtic nechilic: “Xicana mopelal huan xinejñentía.”

<sup>12</sup> Quilajlanije:

—¿Aqui in lalac hual mitzilic: “Xicana huan xinejñentía”?

<sup>13</sup> Yihual hual Jesús quipajtic amo huil quinmiliaya aqui cataya, pampa mohuicac Jesús, yajmo huil moitiliaya pampa tentataya ca lacames in lajcotiyan. <sup>14</sup> Mochiác je nadita huan Jesús quitac in lalac hual quipajtic, cataya calijtic pin tiopan hué, huan quilic:

—Xiquita. Axan tipajtic. Yajmo xicchia laijlaculisli amo san gá mitzpanus oc se cocolisli hual mitzcocoltis míac, hual amo mitzcocoltic yoje míac mococolisli hual tilamic tipajtic.

<sup>15</sup> Uyac in lalac, quinmilic in judíos huejué cataya Jesús hual quipajtic.

<sup>16</sup> Pampa inon in judíos huejué quitemujtinemiloaya quinami quitojtocasi Jesús pampa amo quineltocaya inminlajtol. Quichihualoaya yoje pampa Jesús quichíac inon pan in tonali hual mosehuilo in judíos. <sup>17</sup> Ma yoje, Jesús quinnanquilic:

—NoTajtzin amo mocahua pa quichías mochi hual unca cuali. Quinami pa yina, jan yoje axan. Huan nehual nicchijtica noje quinami yihual.

<sup>18</sup> Cuaquín pampa inon, quitejtemuje in judíos niman míac quinami quimictilosquiaya. Amo cataya jan pampa quichihuaya len amo quixtocaloaya pan tonali chicome san. Noje yihual quinmilic pampa Dios yec yihual iTajtzin. Huan pampa quijtuaya inon, yoje yihual mochihuaya jan quinami Dios.

### *Dios iXolol quiplá lahueliltisli*

<sup>19</sup> Cuaquinon, Jesús pehuac monapatic ca ilajtomes, quinmilic:

—Neli annimitzilía, nehual iXolol Dios amo huil nicchia nindeno pan nopampa. Jan huil nicchia len niquita quichijtica noTajtzin. Unca pampa len yes yihual quichía, cuaquinon jan yoje inon nicchia nehual iXolol.

<sup>20</sup> Inon unca pampa noTajtzin nechlasojla nehual iXolol, huan nechnextilía mochi innojen hual yihual quinchía. Quema, huan nechnextilis lachihualisli niman huejué. Amo cate yoje huejué innojen hual annechitac niquinchiác. Nechnextilis pa yoje niquinchiás huan pa yoje anmomajtis pampa anquitas quinami quipía lahuelilitlisli. <sup>21</sup> Yoje, quinami noTajtzin qinyuliltía in mijquimes, jan yoje nehual iXolol niqunyuliltía aquinojen yesi nicnequi niqunyuliltía. <sup>22</sup> Huan amo inon san. NoTajtzin Dios amo quitojtoca amaqui ilaixpan pa polehuis capa amo huil mocuepas. Ma yoje, quimacac pa nehual iXolol niquntojtocas nolaixpan yehuanten hual quipialo laijlaculisli. <sup>23</sup> Yoje, moxtin quimatisi momajtisi nolaixpan nehual Dios iXolol jan quinami quimatilo momajtilo ilaixpan noTajtzin Dios. Aqui yes amo quimati momajtía nolaixpan nehual Dios iXolol, cuaquín jan yoje amo quimati momajtía ilaixpan noTajtzin hual nechtilanic nican pan lalticpan.

<sup>24</sup> Neli, neli annimitzilía, aqui yes quicaqui len niqijitúa huan quineltoca yihual Dios hual nechtilanic, yihual quipía Dios iyulilisli hual amo quiman lamis. Huan amo nictojtocas nolaixpan nehual pampa yec laijlaculi. Quema, axan yihual quisac capa in miqulisli lahuelilitiaya huan quimajtic, axan quipía Dios iyulilisli. <sup>25</sup> Neli, neli annimitzilía, ajsitica in tonali, quema, axan ajsic in tonali hual yehuanten hual miqijije quicaquisi nolajtol nehual Dios iXolol, huan yehuanten hual quicaquisi yulisi oc sejpa. Moquetzasi, quisasi pin miqulisli, yajmo quiman miqusi. <sup>26</sup> Unca pampa jan quinami Dios noTajtzin quipía yulilisli pan ipampa yihual ihuían, jan yoje nechmacac nehual iXolol noje pa nicpías yulilisli pan nopampa. <sup>27</sup> Huan Dios nechmacac lahuelilitlisli pa niqinmilis pampa quipiasí pa polehuisi laxiluli pa camo cayasi ca Dios pampa nehual niunca ilacal in cielo. <sup>28</sup> Amo ximolapolultican pampa inon, pampa ajsis in tonali hual moxtin in mijquimes hual cataloaya lalalpachuli quicaquisi nolajtol. <sup>29</sup> Pampín, quisasi capa cataloaya lalalpachuli. Yehuanten hual yulinijme pan lalticpan quichijtataloaya inon hual unca cuali canasi Dios iyulilisli hual amo quiman lamis. Yehuanten hual yulinijme pan lalticpan quichijtataloaya in hual amo unca cuali yulisi oc sejpa pa niqijitus pampa quipiasí pa polehuisi pa camo quiman cayasi ca Dios.

### *Cate míac hual quinextilía Jesús ilahuelilitlisli*

<sup>30</sup> Amo huil nicchía nindeno sinda nicnequi nicchía pan ipampa nahuelilitlisli. Ca Dios ilahuelilitlisli nicpía pa nicchías mochi. Huan quinami nijcaqui Dios quijtúa, niquntojtoca nolaixpan nehual pa polehuisi o niqinmacahua pa yulisi. Huan unca melahuac len yes niqijitúa inahuac aqui yes. Unca melahuac pampa amo nictemúa quinami nicchías len nehual nicnequi. Nictemúa quinami nicchías len yihual quinequi hual nechtilanic pan lalticpan. <sup>31</sup> Sinda nilajtuaya neli nonahuac nehual nohuían, in lajtulisli amo anmitzajsiaya pa yoje anquipías pa anquineltocas pampa unca melahuac in hual niqijitúa. <sup>32</sup> Unca oc se hual quijtúa neli nonahuac nehual, huan nicmati inon hual yihual quijtúa unca melahuac. <sup>33</sup> Amhuanten anquintilanic lacames pa quilajlanisi Juan Lacuayatequini sinda yihual yec in Cristo, huan yihual anmitzilic inon hual unca melahuac nonahuac nehual. <sup>34</sup> Huan ca nehual amo monotza nindeno in hual lacames quijtulo neli nonahuac nehual. Unca oc se hual lajtúa neli nonahuac nehual, yihual Dios. Ma yoje, annimitzilijtica inon hual Juan quijtuc nonahuac nehual, pa huejtica annechneltocas huan yoje anyes laquixtili pin ipolehuilisli anmolajlaculisli. <sup>35</sup> Juan Lacuayatequini anmitzilic nadita inahuac Dios lajtol.

Yoje yihual cataya quinami lahuilisli laixpelatataya hual Dios quilalaltic. Huan ancataya niman ca paquilisli pa je nadita pa anquicaquis len inahuac Dios ilajtol hual yihual anmitziliaya. Ancataya quinami lacames hual quipialo paquilisli ca se lahuilisli. <sup>36</sup> In hual Juan Lacuayatequini anmitzilic nonahuac nehual cataya melahuac. Ma yoje, innojen hual niqinchijtica neli quinextilía quinami noTajtzin nechtilanic pa niqinchías. Quema, lanextililo niman míac. Amo yoje míac lanextilía in lajtol hual Juan quijtuc nonahuac nehual. Yihual Dios noTajtzin nechilic pa nicchías mochi innojen hual anquinmita anmomajitica ipampa Dios ilahuelilitisli. Nechilic pa nilamis niqinchías, huan innojen lachihualisli quinextililo pampa nihualac niquistataya capa unca Dios noTajtzin. <sup>37</sup> Quema, noTajtzin Dios nechtilanic pa nihualas ca niqic, huan quilamachiltic lajtomes nonahuac nehual hual neli cate. Ma yoje, amhuanten amo quiman anquicaquis ilajtol huan amo quiman anquitac. <sup>38</sup> Huan amhuanten amo anquipía Dios ilajtol mocajtica laijtic anmoyolo. Inon nicmati, pampa mas que Dios nechtilanic pa nihualas, ma yoje amo annechneltoca. <sup>39</sup> Anquitejtemujtía len unca lajcuiluli pin amames hual Dios ilajtunijmes quijcuiluje. Anquichía yoje pampa anquijtúa jan monequi pa anmomaxtía pa yoje ancanas Dios iyulilisli hual amo quiman lamis. Huan inon hual unca lajcuiluli neli anmitznextilía pampa nehual niunca aqui hual annimitzilía. <sup>40</sup> Ma yoje, amo anquinequi anhuala ca nehual pa yoje anmitzmacas Dios iyulilisli hual amo quiman lamis.

<sup>41</sup> 'Amo nimotolinía pa niqitas quinami niquinlaquetzaltis hué nonahuac nehual lacames. <sup>42</sup> Ma yoje, annimitziximati amhuanten, nicmati pampa laijtic amhuanten anmoyolo amo anquilasoja Dios. <sup>43</sup> Nihualaya quinami Dios noTajtzin ilanahuatini, huan nicpía ilahuelilitisli hual unca ca quinami itoca. Huan amhuanten amo annechneltoca. Sinda huala oc se ca ilahuelilitisli yihual ihuán, cuaquín yihual anquineltoacas. <sup>44</sup> ¿Quinami huil annechneltoca? Amo huil, sinda mochi sejse ca amhuanten amo anmocahua pa anquitemus pa oc sequin anmitzitasi cuali huan amo anquitemúa pa Dios anmitzitas cuali. <sup>45</sup> Amo xiquijtucan pampa nehual nía annimitz-motexpahuilía ilaixpan Dios noTajtzin. Unca se hual anmitz-motexpahuilía. Yihual Moisés hual anquijtúa pampa anquineltoaca. <sup>46</sup> Yihual anmitz-motexpahuilis pampa sinda anquineltocaya len yihual quijtuc, cuaquinon annechneltocaya, pampa yihual quijcuiluc lajtomes nonahuac nehual. <sup>47</sup> Ma yoje, sinda amo anquineltoaca in hual yihual quijcuiluc, cuaquinon amo anyahui anquineltoaca in hual niqijtúa nehual.

## 6

### *Jesús quinlacualtía macuili mil lacames* (Mt. 14:13-21; Mr. 6:30-44; Lc. 9:10-17)

<sup>1</sup> Panuc inon, Jesús quipanahuic in al huejcalan itoca Galilea, noje itoca Tiberias. Quipanahuic ca barquito ca yoje itenco (analco). <sup>2</sup> Huan quitocaloaya niman míac lacames huan sihuames pampa quitaloaya quinami quinpajtiaya in cocoxquimes. Inon quinextiliaya quinami yihual quipiaya Dios ilahuelilitisli. <sup>3</sup> Huan panquisac Jesús pa pani pin loma (tepetzindi), nepa molalic ca imonextilinijmes. <sup>4</sup> Ajsitihualaya in fiesta (ilhuil) itoca pascua, in judíos inminilhuil. <sup>5</sup> Momelahuac Jesús, quinmitac niman míac lacames huan sihuames hualajticate capa yihual, huan quilic Felipe:

—¿Capa tijcuhuasi len pa quicuasi in lalalera?

<sup>6</sup> Jesús quimatiaya len yahuiaya quichía pa canas in lacuali. Ma yoje, quilajlanic Felipe inon pa yoje quiijnamiqultisquiaya Felipe quinami yihual Felipe quiapiaya pa monextilisquiaya míac pa quimatisquiaya quinami cataya hué Jesús ilahuelilitlisli.

<sup>7</sup> Felipe quinanquilic:

—In tomin hual canaloaya ome cientos (majlaclipuhuali) lacames tequipanujticate pan se tonali, in cataya tipichin, amo quinmajsisquiaya pa móchi sejse quiapiasquiaya je nadita pan pa quicuasquiaya.

<sup>8</sup> Se ca Jesús imonextiliniymes hual yec icni Simón Pedro, huan motocaya Andrés, quilic:

<sup>9</sup> —Nican unca se muachito, quinpiá macuili panes lachihuali ca cebada huan ome michimes. Unca san naditita. ¿Quinami quinmajsis innojen in míac lacames?

<sup>10</sup> Jesús quilic:

—Xiquinmilican in lacames pa molalisi.

Cataya nepa míac sacal. Huan molalije pani pin sacal in lacames, cataloaya quinami cinco (macuili) mil. <sup>11</sup> Cuaquín quinmanac Jesús in panes huan quisehuic Dios. Cuaquín quinxilullic yehuanten hual molalijtataloaya. Jan yoje quinxilullic in michimes huan quicuaaje moxtin quinami quinequioloaya quicualo. <sup>12</sup> Quiman pachihuije, quinmilic imonextiliniymes:

—Xiquinpejpenacan in lajquitos lalapanali hual quincahuaje, pa camo ticpolusi nindeno.

<sup>13</sup> Quimpejpenaje huan quintemiltije doce chiquihuimes ca inminlajquitos in macuili panes lalapanali. Cataloaya in hual quicahuaje yehuanten hual lacualoaya.

<sup>14</sup> Yoje, quiman quitaje in míac lacames huan sihuames in hual Jesús quichíac, inon hual lanextilic quinami yihual quiapiaya Dios ilahuelilitlisli, cuaquín quilije:

—Neli in se ilajtuni Dios hual yahuiaya huala pin lalticpan.

<sup>15</sup> Pampín, Jesús quimatic yehuanten yahuioloaya hualalo canalo pa quichi-hualtije pa yes inminhué. Yoje mijcuanic ihuían oc sejpa pa pani pin loma (teptzindi).

### *Jesús nejnemi pani pa al*

(Mt. 14:22-27; Mr. 6:45-52)

<sup>16</sup> Axan tiolactitiahuiaya, huan temuje imonextiliniymes pa in al huejcalan. <sup>17</sup> Calaquije pan se barquito, yahuioloaya quipanahuilo in al huejcalan pa ajsis pa Capernaum. <sup>18</sup> Pehuac majcoquic in al hué pampa pehuac ijyecac se ijyecac chicahuac. <sup>19</sup> Quilanilultitiahuioloaya in barquito quinami macuili o chicuase huejcani (cinco o seis kilometros), cuaquín quitaje Jesús pani pin al, nejnemiaya ajsitihualaya capa in barquito, huan momajtiloaya míac.

<sup>20</sup> Huan jan axcan yihual quinmilic:

—¡Nehual niunca, amo ximomajtican!

<sup>21</sup> Cuaquín quinenequioloaya pa calaquis pin barquito. Calaquic cuaquín, huan jan ajnaxcan ajsic in barquito pa itenco in lali ca capic yajtiahuioloaya.

### *Lacalera qitemulo Jesús*

<sup>22</sup> Mostatica ayamo mohuicaloaya in míac lacalera hual cataloaya ca yoje (analo) in al huejcalan, capa Jesús quinlacualtic. Quitaloaya quinami yalhua pa tiolac amo cataya oc se barquito, jan se san, huan pa in se barquito jan calaquije in monextiliniymes san, huan mohuicaje inminhuían. Quitaloaya quinami Jesús amo calaquic pin barquito ca yehuanten. <sup>23</sup> Ma

yoje ajsitihualaje barquitos hual cayaje pa Tiberias, ajsije capa amo huejca cataloaya in lalcalera, capa in Tata Jesús quisehuic Dios pa in pan hual yehuanten quicuaje. <sup>24</sup> Yoje, quitaje in lalcalera quinami yajmo cataya Jesús ca yehuanten, huan noje yajmo cataloaya imonextiliniymes. Cuaquín yehuanten noje calaquije pin barquitos hual ajsije, quipanahuje in al huejcalan, ajsije pa Capernaum, pehuaaje quitemuje Jesús.

*Jesús in pan hual layuliltia*

<sup>25</sup> Huan quitaje Jesús nepa pa ca yoje (analco) in al huejcalan, quilajlanije:

—Rabí, ¿quiman tihualac ca niquic?

<sup>26</sup> Jesús quinnanquilic:

—Neli, neli annimitzilia inon: Amo annechtemujtica pampa anquitac len nicchia hual lanextilia quinami nehual nicpia Dios ilahuelilitlisli. Jan anechtemujtica san pampa anpachihuic pan ipampa in pan hual anquicuac.

<sup>27</sup> Anquijnamictica san inon hual anquicua. Huan inon moijlacua, amo huejcahua, amo anmitzyuliltis pa yajmo anmiquis. Pampín, amo ximotolinican pa ancanas inon hual amo anmitzyuliltis. Monequi pa anquichias inon hual nia annimitzilia. Ximotolinican pa ancanas pa anquicas in hual huejcahua pa yes, hual anmitzmacas iyuliltisli cuali hual amo quiman lamis. Inon nehual annimitzmacas, nehual ilacal in cielo. Huan Dios noTajtzin neli nechilic pa annimitzmacas inon. Huan amo quiman quipalac len quijtúa. Unca quinami se layapani pan se amal, quiyapa in hual unca lajcuiluli pan in amal pa camo mopalas.

<sup>28</sup> Yoje in lalcalera quilije:

—Huan ¿len monequi pa ticchiuasi pa tictequipanuilisi Dios quinami yihual quinequi?

<sup>29</sup> Jesús quinnanquilic:

—Inon unca hual Dios quinequi pa anquichias, huan neli, amo unca tequipanulisli. Dios quinequi pa anquineltoacas yihual hual yihual Dios quitilanic pan lalticpan, niquijtúa, xichneltoacan nehual.

<sup>30</sup> Yoje quilije:

—Huan ¿len tia ticchia pa titechnextilis da Dios neli mitztilanic? Yoje timitzneltoacasi. ¿Len tia ticchia? <sup>31</sup> Totajtzitzián quicuanijme pa yina in maná unca quiman yultataloaya capa oc sequin amo chantinijme. Quinami unca lajcuiluli pa Dios iamal, quijtúa: “Yihual quinmacac pan hual cataya pin cielo (ilhuicac) pa quicuasi.”

<sup>32</sup> Jesús quinmilic:

—Neli, neli annimitzilia, amo cataya Moisés hual anmitzmacaya in pan hual cataya pin cielo huan temuc capa amhuanten, quinami anquijtúa. No, cataya Dios noTajtzin hual anmitzmaca in pan melahuac pin cielo hual neli anmitzyuliltia. <sup>33</sup> Sinda annimitzlaquetzilia inahuac in pan pin cielo hual Dios quimaca, nicnequi niquijtúa pampa nehual niunca in pan hual Dios quimaca, nehual in lalcal hual niquisac pin cielo pa nitemus ca niquic. Nehual in lalcal hual niquinmaca yuliltisli yehuanten pin lalticpan.

<sup>34</sup> Cuaquinon quilije:

—Tata, xitechmaca mojmosta in pan hual titechlaquetzilijtica.

<sup>35</sup> Jesús quinmilic:

—Nehual niquinami pan hual quimaca yuliltisli. Aquí yes hualas ca nehual pa motemacas, cuaquín in se amo quiman mayanas. Huan aquí yes nechneltoacas, in se amo quiman amiquis. <sup>36</sup> Annimitzilic pampa mas



que amhuanten annehitac, amo annehneltoac. <sup>37</sup> Ma yoje, sequin nech-neltocalo. Yehuanten cate innojen hual nechmacac Dios noTajtzin, huan yehuanten hualasi ca nehual. Huan aqui yes hualas ca nehual, amo quiman nijquixtis in se capa niunca. <sup>38</sup> Amo niquinquixtis, pampa niquisac pin cielo pa nitemus ca niquic amo pa nichías len nehual nicnequi. Nitemuc pa nichías quinami quinequi yihual hual nechtilanic. <sup>39</sup> Huan yihual hual nechtilanic quinequi pa camo nicpolus amaqi ca yehuanten hual yihual nechmaca pa cayasi ca nehual. Yihual quinequi pa niquinyuliltis pan in tonali quiman lamis in lalticpan hual axan unca. <sup>40</sup> Quema, in unca hual quinequi noTajtzin. Quinequi pa quipias iyulilisi hual amo quiman lamis mochi sejse hual nechita huan nechneltoaca nehual iXolol. Huan nehual nicyuliltis mochi sejse pan in tonali quiman lamis in lalticpan hual axan unca.

<sup>41</sup> Cuaquion pehuaje laquetzaje in hueyenten judíos pampa amo quix-tocaloaya len quinmiliaya Jesús, pampa quinmiliaya yihual yec in pan hual quisac pin cielo huan temuc pan lalticpan. <sup>42</sup> Quililoaya:

—In se unca Jesús ixolol José, yihual itajtzin huan inantzin tiquinmixi-matilo. Huan techilijtica yihual quisac pin cielo huan temuc ca niquic. Amo ticneltocalo len techilijtica tehuanten.

<sup>43</sup> Quinnanquilic Jesús, quinmilitic:

—Amo ximolaquetzilican yoje pampa amo anquixtoaca len annimitzilic.

<sup>44</sup> Amaqui huil huala ca nehual sinda Dios noTajtzin amo quinequiltía pa hualas ca nehual. Huan nicyuliltis pan in tonali quiman lamis in lalticpan hual axan unca. <sup>45</sup> Dios ilajtunijmes quijcuiluje inon, huan yoje mocahua melahuac. Quijcuiluje: “Dios quinmaxtis yehuanten moxtin.” Pampín annimitzilía pampa hualasi ca nehual moxtin hual quicaquilo len quijtúa Dios noTajtzin. Quema, monextililo pan ipampa ilajtol pampa yihual quin-maxtilía ilajtol.

<sup>46</sup> Amo unca se ca amhuanten hual quitac Dios noTajtzin. Jan nehual san niquitac Dios noTajtzin, nehual hual niquisac pin cielo pa nitemus ca niquic. <sup>47</sup> Neli, neli annimitzilía, aqui yes nechneltoaca quipía Dios iyulilisi cuali hual amo quiman lamis. <sup>48</sup> Nehual niunca in pan hual layuliltía. <sup>49</sup> Annotajtzitzián quicuanijme in maná pa yina nepa capa amaqi cua-jmiluni. Ma yoje, yehuanten miquije. <sup>50</sup> Nehual annimitzlaquetzilijtica inahuac in pan hual quisac pin cielo huan temuc, pa yoje, sinda se lalac quicuas, yoje amo miquis. <sup>51</sup> Nehual niunca in pan hual layuliltía, nehual in pan hual quisac pin cielo huan temuc. Sinda se lalac quicua in pan, cuaquín amo mocahua pa yulis. Quema, huan in pan hual nehual nía nicmaca, in unca nocuerpo inacal, pa yoje moxtin pin lalticpan quipias Dios iyulilisi.

<sup>52</sup> Inminhueyenten in judíos molaxilije lajtomes se ca oc se, moilijtcate:

—¿Quinami huil in lalac techmaca inacal icuerpo pa tijcuasi?

<sup>53</sup> Cuaquín Jesús quinmilitic:

—Neli, neli annimitzilía, sinda amo anquicua inacal nocuerpo nehual ilalac in cielo, huan sinda amo ancuni noesli, cuaquín amo anquipías Dios iyulilisi lajtic amhuanten. <sup>54</sup> Yihual hual quicua nocuerpo inacal huan cuni noesli, unca yihual hual quipía Dios iyulilisi hual amo quiman lamis. Huan nehual nicyuliltis pa in tonali quiman lamis in lalticpan hual axan unca. <sup>55</sup> Nocuerpo inacal neli unca quinami len quicua huan noesli neli unca quinami len cuni se. <sup>56</sup> Unca quinami yuli lajtic nehual yihual hual quicua nocuerpo inacal huan cuni noesli. Nicnequi niquijtúa yihual yuli

pan ipampa noyulilislis huan nehual niyuli lajitic yihual. <sup>57</sup> Nechtlanic Dios noTajtzin hual yuli, huan nehual niyuli pan ipampa Dios noTajtzin. Pampín yoje yulis pan nopampa nehual aquí yes hual nechcuas. <sup>58</sup> Nehual niunca in pan hual quisac pin cielo huan temuc ca niquic. In pan amo unca quinami in pan hual quisac pin cielo hual quicuaje anmotajtzitzian huan miquije. Aquí hual quicua in pan hual niquijutuca amo quiman mocahuas pa yulis.

<sup>59</sup> Innojen lajtomes quinmilic pin tiopan nepa Capernaum capa lamaxti-aya.

### *Lajtomes hual layuliltía*

<sup>60</sup> Quicaquije inon míac ca imonextiliniymes huan quijtuje:

—Innojen lajtomes lacualantilo huan ejetiaxicate pa ticmatisi len quinequilo quijtulo. Amaqui quinequis quicaquis, amo huil quimati se len quinequilo quijtulo.

<sup>61</sup> Quimatic Jesús lajitic yihual quinami molaquetziloaya imonextiliniymes inahuac len quinmiliaya huan amo quixtocaloaya len quilic. Pampín quinmilic:

—¿Amo anquixtoca in hual annimitzilic? <sup>62</sup> Cuaquinon, ¿len anyahui anqujtúa pin tonali annechitas nehual ilacal in cielo nilejcutica ca capic nicatani nepa pin cielo quiman ayamo nihualac pan lalticpan? <sup>63</sup> Xicmatican pampa unca in Espíritu hual layuliltía. Se inacal icuerpo amo lapalehuía nindeno pa layuliltis. In lajtomes hual annimitzilic quiyuliltilo se iyolo huan in yulilislis huejcahuas, amo quiman lamis. <sup>64</sup> Ma yoje, sequin ca amhuanen amo annechneltoca.

Quinmilic Jesús inon, pampa yihual quinmiximatic quiman pehuac itequipanulislis yehuanten hual amo quineltocaje. Huan quimatic aquí yahuiaya quitemaca ca yehuanten hual quinequiloaya quimictilo. <sup>65</sup> Huan quinmilic:

—Pampa inon annimitzilic amaqui huil huala ca nehual sinda Dios noTajtzin amo quimacahuiltía.

<sup>66</sup> Quinmilic inon, mocuepaje míac ca imonextiliniymes, yajmo quitocaje.

<sup>67</sup> Cuaquinon Jesús quinmilic in doce imonextiliniymes hual mocahualoaya, quinmilic:

—¿Amhuanen noje anquinequi anmohuica?

<sup>68</sup> Quinanquilic Simón Pedro, quilic:

—Tata, ¿ca aquí tiasi? Tehual tiquinpía lajtomes hual layuliltilo ca Dios iyulilislis hual amo quiman lamis. <sup>69</sup> Huan tehuanen timitzneltocaje huan ticmatilo pampa tehual tiunca in se hual Dios quilajultic pa technextilislis quinami lajtúa Dios pa iyolo.

<sup>70</sup> Jesús quinanquilic:

—Annimitzljaltulic amhuanen doce huan se ca amhuanen unca iyaxca in lili, quitequipanuilía in lili.

<sup>71</sup> Ca in lajtomes yihual quinequiaya quijtu pampa Judas ixolol Simón Iscariote yec iyaxca in lili. Yihual se ca in doce imonextiliniymes, huan yihual in se hual yahuiaya quitemaca Jesús ca yehuanten hual yahuiyoaya quimictilo.

## 7

### *Jesús icnían amo quineltocalo*

<sup>1</sup> Panuc inon, panujtiahuiaya Jesús pa míac caltilan pin lalticpan Galilea. Yajmo quinequiaya panu pin lalticpan Judea pampa quitemuloaya quinami

huil quimictilosquiaya inminhuejueyenten in judíos. <sup>2</sup>Ma yoje, ajsitihualaya inminfiesta (ilhuil) in judíos itoca in fiesta quiman chantilo pin caltzindis.

<sup>3</sup>Yoje, Jesús icnian quilije:

—Ximohuica, amo ximocahua nican, xía pa Judea, pa yoje quitasi momonextilinjmes hual cate nepa innojen hual tiquinchía, hual pampa innojen mahuisulo momajtiticate moxtin. <sup>4</sup>Xicchia yoje, pampa sinda se quitemúa quinami huil quinmachiltía moxtin inahuac yihual, yihual amo quiman yahui quinlatilía in hual quichía. Tiquinchía innojen hual quinlamahuisultilo momajtiticate in lacames. Axan, xiquinchía inminlaixpan moxtin.

<sup>5</sup>Yojque quilije icnian pampa yehuanten noje amo quineltocaloaya pampa Dios quilajfultic pa temus pa in lalticpan.

<sup>6</sup>Cuaquinon Jesús quinmilic:

—Ayamo monequi pa nehual nías nipanquisas ca ompic, pampa ayamo ajsic in tonali. Pa amhuanten mojmosta unca in tonali. <sup>7</sup>Yehuanten pin lalticpan amo huil quinequilo anmitzmictilo. Ma yoje, nehual quinequilo nechmictilo, pampa niquinmilía neli quinami amo unca cuali in hual yehuanten quichihualo. <sup>8</sup>Amhuanten xiacan pa in fiesta (ilhuil). Nehual ayamo nías pa in fiesta pampa ayamo ajsic notonali.

<sup>9</sup>Yoje, lamic quinmilic inon, yihual mocahuac nepa Galilea.

### *Jesús yahui pa in fiesta*

<sup>10</sup>Quiman uyaje icnian pa in fiesta (ilhuil), yihual quichiaya je nadita, cuaquinon noje uyac. Ma yoje, amo quimacahuilic pa oc sequin quitasi yihual yajtataya pan tonali hual uyac, quinami quinmolatilijtiahuiaya.

<sup>11</sup>Huan quitemuloaya Jesús in huejueyenten judíos nepa pin fiesta (ilhuil), quililoaya:

—¿Capa unca in se?

<sup>12</sup>Huan quitenehualoaya in míc lacalera inahuac yihual, molaxilijtime-miloaya lajtomes. Sequin inminhuian moilloaya, quijtuloaya: “Cuali in lalcal.” Oc sequin quijtuloaya: “Amo unca cuali. Yihual neli quincuaajcuamana moxtin.”

<sup>13</sup>Ma yoje, amaqui quipiaya iyolo chicahuac pa laquetzas yoje inminlaixpan moxtin. Momajtiloaya, amo quinequiloaya pa quincacuisi in huejueyenten judíos.

<sup>14</sup>Cuaquinon quiman panuje ilajco inmintonalijmes in fiesta, panquisac Jesús pa in tiopan hué huan lamaxtiaya. <sup>15</sup>Pampa inon, mahuisuloaya momajtitataloaya in huejueyenten judíos, quilije:

—¿Quinami quimati lanextilía in se? Amo quiman cataya ca tolamaxtinijmes huejué.

<sup>16</sup>Quinnanquilic Jesús, quinmilic:

—In hual nicmaxtitica amo unca nolajtomes nehual, unca ilajtomes yihual hual nechtilanic. <sup>17</sup>Sinda se quinequi quichía len Dios quinequi, yihual quimatis sinda unca Dios ilamaxtilisli in hual nicmaxtitica, o sinda nehual nilajtutica ca nolajtomes nehual nohuían. <sup>18</sup>Se quinmilía lacames yihual ilajtomes, sinda yihual quitemúa pa lacames lajtusi niman cuali inahuac yihual. Amo yoje se lalcal melahuac. Yihual quitemúa quinami huil quinlaquetzaltis cuali lacames inahuac yihual hual quitilanic pa hualasquiaya lajtu. Amo unca nindeno calica se quijlacultis se lalcal melahuac quinami yihual. <sup>19</sup>Pa yina Moisés quinmacac annotajtzitzián Dios ilajtol. Ma yoje amo unca se ca amhuanten hual quineltoca. ¿Leca anquitemujtica quinami annechmictis?

<sup>20</sup> Quinanquilije innojen míac lacames, quilije:

—Tehual ticpía se ijyecal hual mitzizlacúa. ¿Aqui quitemujtica quinami huil mitzmictis?

<sup>21</sup> Lananquilic Jesús, quinmilic:

—Nicbíac se lachihualisli huan pampa inon anmoxtin anmahuisuaya anmomajtitataya. <sup>22</sup> Moisés anmitzijcuilulic in lajtol hual quijtúa pa anquizontequía nadita inmincuilaxli anmoxolomes lacames quiman yes lacatilo. Moisés amo anmitzmacac in lajtol. Cataloaya anmotajtzitzián hual yulinijme pa yina míac xixihuimes quiman ayamo lacatic Moisés, yehuanten anmitzmacaje in lajtol. Huan pan tonali hual in lajtol quijtúa pa anmosehuis, ma yoje anquinchihuilía anmoxolomes quinami quijtúa in lajtol. <sup>23</sup> Axan, inon anquichihuilía se pan tonali chicome (siete) quiman anmosehuía pa yoje anquineltoacas cuali Moisés ilajtol. Ma yoje, nehual, nicpajtc se lalac mochi icocolisli pan tonali chicome, huan pampín ancualantica ca nehual. <sup>24</sup> Monequi pa anlajnamiquis quinami Dios laijnamiquía pa anquimatis sinda len unca cuali o amo cuali. Amo xiquijtuca unca cuali o amo cuali pan ipampa quinami amhuanten anmohuían anquijtúa unca cuali o amo cuali se lachihualisli.

### *Jesús quijtúa quinami hualac pan lalticpan*

<sup>25</sup> Cuaquinon sequin ca yehuanten hual yuliloaya pa Jerusalén mola-  
lanije:

—¿Amo unca in se yihual hual quitemujticate quinami huil quimictisi?

<sup>26</sup> Huan ¡xiquitacan! Nepa laqueztica inminlaixpan moxtin huan amo unca se lalac hual quijtúa len pa quitzacuasi yihual. ¿Yes quimatisi in huejueyenten pampa in lalac in Cristo? <sup>27</sup> Ma yoje, tehuanten ticmatilo in caltilan capa quisac in lalac. Nesis in Cristo, amaqui, quil, quimatis capa quisas.

<sup>28</sup> Yoje, tzajtzic Jesús pin tiopan hué capa lamaxtitataya, quinmilic:

—¡Annechiximati huan anquimati noje capa niquisac! Huan amo nihualaya pan ipampa nel nolahueliltilisli huan nolajtol. Unca yihual Dios in melahuac hual nechtilanic, huan yihual amo anquiximati. <sup>29</sup> Nehual, quema, niquiximati, pampa niquisaya capa yihual unca. Unca yihual hual nechtilanic.

<sup>30</sup> Yoje, pehuaje ajsije pa quiquitzquilosquiaya. Ma yoje, amo cataya se lalac hual quilalic ima ipan, pampa ayamo ajsic itonali pa miquis. <sup>31</sup> Ma yoje, ca in lalacera cataloaya míac hual pehuaje quineltoacaje pampa yihual in Cristo, quilije:

—Neli in se in Cristo. Amaqui quinchías in míac quinami yihual quinchía. Innojen technextililo quinami yihual quipía Dios ichichualisli.

### *In fariseos quinequilo quiquitzquilo Jesús*

<sup>32</sup> Quicaquiye in fariseos quinami in lacames laquezataloaya ixtacayito innojen lajtomes inahuac Jesús. Pampín innojen fariseos huan tiopistas huejué quintilanije ipiscales in tiopan hué pa quiquitzquilosquiaya Jesús.

<sup>33</sup> Ma yoje, Jesús laquezaya inminlaixpan moxtin, quinmilic:

—Nicayas jan nadita ca amhuanten, cuaquín nías capa aqui nechtilanic.

<sup>34</sup> Annechtemus, huan amo annehitas. Huan capa nicayas, amhuanten amo huil anajsis.

<sup>35</sup> In judíos moilije se ca oc se:

—¿Ca capic yas in lalac pa camo tiquitasi? ¿Yas ca capic cate in judíos hual mosemananijme cajcapa ca yehuanten hual lajtulo griego? ¿Yahui

quinmaxtía in griegos? <sup>36</sup> ¿Len quinejquijtu in lajtol hual yíal quilic: “An-nechtemus, huan amo annechitas. Huan capa nicayas, amhuanten amo huil anajis?”

*In al hual iyaxca iatenco iEspíritu Dios hual layuliltía*

<sup>37</sup> Cuaquinon ajsic in tonali hual lamiaya in ilhuil (fiesta), cataya itonali niman hué in fiesta. Pa in tonali moquetzac Jesús, quintzajtzilic in lacames, quinmilic:

—Sinda se quinami amiqui pa iyolo, ma huala ca nehual, huan ma caya quinami launtica. <sup>38</sup> Aquí yes nechnehtoca, ca yihual yes quinami quisas pa iyolo in se míac aj'atenco ca al hual quimacas yulilisli, quinami quijtúa Dios ilajtol lajcuiluli.

<sup>39</sup> Jesús quijtuaaya inon inahuac in Espíritu Santo hual yahuiaya calaqui pa inminyolo yehuanten hual yahuiyoaya quineltocalo Jesús. Ma yoje, ayamo hualaya in Espíritu Santo, pampa Jesús ayamo yec lalalili capa yahuiaya cana in niman míac lasojlalisli hual amo lámí. Dios ayamo quilalic Jesús nepa.

*In lacalera amo cate ca se lajtuilisli*

<sup>40</sup> Axcan, sequin ca in lacalera, quiman quicaquije inon hual quijtuc Jesús, quijtuje:

—Neli in se Dios ilajtuni hual yahuiaya huala pan lalticpan.

<sup>41</sup> Oc sequin quijtuje:

—In se in Cristo.

Ma yoje, sequin quijtuje:

—Amo yoje, pampa amo yes galileteco in Cristo. <sup>42</sup> ¿Amo quijtúa Dios ilajtol lajcuiluli pampa in Cristo yes imiahuil David huan lacatis pa Belén, in caltilan hual yec iyaxca David? Quema, yoje quijtúa.

<sup>43</sup> Pampa inon in míac ca yehuanten amo molaliloaya innahuac ca in hual quijtuloaya inahuac Jesús. <sup>44</sup> Huan sequin quinequiloaya quiquitizquilo. Ma yoje, amo cataya se lalac hual quilalic ima ipan pa quiquitizquis.

<sup>45</sup> Cuaquinon mocuepaje in piscales ca in tiopistas huejué huan in fariseos. Huan in tiopistas huejué huan in fariseos quinmilije:

—¿Leca amo anquiquitizquic pa anquihualicasquiaya?

<sup>46</sup> Quinnanquilije in piscales, quinmilije:

—¡Amo quiman cataya se lalac hual yoje lajtuc quinami in lalac!

<sup>47</sup> Quinnanquilije in fariseos:

—¿Amhuanten noje anunca lacuajcuamanali? <sup>48</sup> Amo unca amaqui ca in huejueyenten huan ca in fariseos hual quineltocalo. <sup>49</sup> Quema, in míac lacalera quineltocalo. Ma yoje, yehuanten in lacalera amo quimatilo nindeno inahuac in lajtol. Ej'elehuis cate.

<sup>50</sup> Cataya nepa Nicodemo, yihual yec se ca in huejueyenten. Cataya yihual hual hualac capa Jesús pa layúa. Yihual quinmilic:

<sup>51</sup> —Quinami quijtúa tolajtol, amo tictilanilo se lalac pa yes lacocolti pampa quichíac in amo cuali sinda ayamo tijcaquije len yihual quijtúa inahuac in hual quichijtica. ¿Amo unca yoje?

<sup>52</sup> Quinnanquilije:

—¿Tehual noje, tigelileteco elehuis? Xictemu huan ticmatis pampa amo unca se ca Dios ilajtunijmes hual lacatic huan yuliaya pa Galilea.

<sup>53</sup> Huan moxtin yehuanten uyaje sejse huan sejse pa ichan.

## 8

*In sihual hual quichíac laijlaculisli*

<sup>1</sup> Huan uyac Jesús pa iLoma (tepetzindi) in Olivos. <sup>2</sup> Mostatica ca hualtzinco, calaquic oc sejpa pin tiopan hué. Moxtin in lacames hualaje capa yihual, huan molalic Jesús, quinmaxtiaya. <sup>3-4</sup> Huan inminlamaxtinijmes in lajtlot hual quineltocalo judíos huan in fariseos quihualicaloaya se sihual capa Jesús. Quiquitziye in sihual monilujtataya ca se lalac hual amo ilahuical. Quilalije in sihual lajco ca yehuanten, huan quilije Jesús:

—Lamaxtini, in sihual ticajsije monilujtataya ca se lalac amo ilahuical.

<sup>5</sup> Axcan, pa ilajtol, Moisés quijtuc pa ticlaxililosquiaya ca tixcalazos yehuanten quinami in se. Axan, tehual ¿len tiqijitúa pa ticchihuilisi in sihual? ¿Ticmictisi ca tixcalazos?

<sup>6</sup> Inon quilije pa quichihuasi pa Jesús quipías pa quichías o quilis len calica huil quimotexpahuililosquiaya. Cuaquín mopachuc Jesús, lajcuiluc ca ixerixa pan lali. <sup>7</sup> Huan quinami quilajlaniloaya huan mocuepaloaya quilajlanilo, Jesús moquetzac, quinmilic:

—Aqui yes ca amhuanten hual unca chipahuac pa iyolo huan amo unca laijlaculi, ma pehua quilaxili se tixcali.

<sup>8</sup> Huan oc sejpa mopachuc, huan ca ixerixa lajcuiluaya pan lali.

<sup>9</sup> Yehuanten, quiman quicaquiye inon, pehualoaya quisalo sejse huan sejse. Pehualoaya quisalo lacames hual quipiaje miac xixihuil quiman lacatije, cuaquinon quisaloaya yehuanten hual yajyancuic. Quimatiloaya laijtic yehuanten moxtin quinami cataloaya laijlaculi pa inminyolo. Cuaquinon, mocahuac Jesús ihuían huan in sihual nepa capa cataya lajco ca yehuanten.

<sup>10</sup> Cuaquinon Jesús moquetzac, quilic in sihual:

—Nito, ¿capa cate? ¿Amaqui quijtuc pampa ticpía pa tiyes lamictili?

<sup>11</sup> Huan in sihual quilic:

—Amaqui, Tata.

Cuaquín Jesús quilic:

—Nehual noje amo niqijitus pampa ticpía pa timiquis. Axan, xía huan yajmo xiyuli ticchijtica laijlaculisli.

*Jesús ilahuilisi in lalticpan*

<sup>12</sup> Oc sejpa quinlaquetzilic yehuanten Jesús, quinmilic:

—Nehual niquinlahuía yehuanten pin lalticpan. Niquijtúa, unca pampa niquinmaca lahuilisi pa iyolo aqui yes hual nechtoac. In se amo yulis quinami se hual nejnemi capa laticumac pan se ojli hual amo quiximati. Yihual quimatis canas Dios iojli. Yihual yulis ca Dios iyulilisi hual unca quinami lahuilisi hual quiyuliltía se iyolo huan iyulilisi hual cate quinami micticate.

<sup>13</sup> Cuaquinon quilije in fariseos:

—Inon hual tiqijituta amo unca melahuac, pampa tehual mohuían tiqulic. Amo ticpía se hual mitzpalehuis quijtuta len unca neli monahuac tehual.

<sup>14</sup> Quinnanquilic Jesús, quinmilic:

—Mas que san nehual niqijitúa neli nonahuac nel nohuían, ma yoje in hual niqijitúa unca melahuac. Nicmati capa nihualaya huan ca capic nía. Yoje, unca melác in hual niqijitúa. Amhuanten amo anquimati capa nihualaya huan ca capic nía. <sup>15</sup> Amhuanten anlajlanía pa anquimatis huan anquimaca iojli se yoje jan quinami laijtic amhuanten anquita san. Huan nel amo nicmaca iojli amaqui. <sup>16</sup> Quema, huan sinda nicmaca iojli,

ma yoje unca melahuac quinami nicmaca iojli. Unca melahuac pampa amo nicmaca iojli nohuían. Dios noTajtzin hual nechtilanic, huan yihual ticmacalo iojli tiomenten. <sup>17</sup> Huan mocahua lajcuiluli pa anmolajtol sinda omenten quijtulo pampa unca neli len yes, cuaquín moxtin quipialo pa quineltocasi quinami neli. <sup>18</sup> Nehual nilajtúa neli nonahuac nehual huan inahuac noTajtzin hual nechtilanic, yihual lajtúa neli nonahuac nehual.

<sup>19</sup> Cuaquinon quilije:

—¿Capa unca moTajtzin?

Jesús quinnanquilic:

—Amo annehiximati nehual huan amo anquiximati noTajtzin. Sinda annehiximatiaya nel, cuaquín noje anquiximatiaya noTajtzin.

<sup>20</sup> Innojen lajtomes quijtuc Jesús calijtc capa cajcoquiloaya in tomin pin tiopan hué, cataya nepa capa lamaxtiaya. Huan amaqui quiquitzquic, pampa ayamo ajsic in tonali pa yes laquitzquili.

### *Yehuanten amo huil yahuilo ca capic Jesús yahui*

<sup>21</sup> Cuaquinon oc sepa laquetzac inminlaixpan, quinmiloc:

—Nía nimohuica huan amhuanten annehctemus. Ma yoje, anmiquis anquinpixtica anmolajlaculisli hual anmitzijlacúa, anmiquis laijlaculi. Amhuanten amo huil anajsis capa nehual nías.

<sup>22</sup> Pampa inon, moilije in judíos:

—¿Yahui momictía huan pampín techilijtica: “Amo huil anajsis capa nehual nías”?

<sup>23</sup> Huan Jesús quinmiloc:

—Amhuanten anunca iyaxca in lalticpan nican hual unca itzindan in cielo (ilhuicac). Huan nehual niunca iyaxca in cielo hual pa pani. Amhuanten anunca iyaxca in lalticpan capa mochi unca laijlaculi. Nehual amo niunca iyaxca in lalticpan nican. <sup>24</sup> Yoje, annimitzilic amhuanten anmiquis laijlaculi, Dios amo anmitzanas. Unca pampa sinda amo annechneltoca nehual in se hual niunca quinami Dios hual nechtilanic pa nihualas nican, cuaquinon anmiquis laijlaculi, anyahui anmiqui anquixitica anmolajlaculisli.

<sup>25</sup> Cuaquinon quilije:

—¿Aqui tehual, nuso?

Jesús quinmiloc:

—Nehual niaqui hual annimitzilic quiman nipehuaya annimitzlaquetzili. <sup>26</sup> Nicpía míac pa niquijtus huan míac calica annimitzmacas anmo'ojli amhuanten pampa anunca laijlaculi. Huan yihual hual nechtilanic unca melahuac, huan nehual niquinmilia yehuanten pin lalticpan innojen lajtomes hual nijcaqui yihual nechilía.

<sup>27</sup> Amo quimatije pampa Jesús quinlaquetziliaya inahuac Dios iTajtzin.

<sup>28</sup> Pampín Jesús quinmiloc:

—In tonali quiman yes annehajcoquis nehual ilacal in cielo pa annehctictis, yoje pampa inon Dios nejchías hué. Cuaquín anquimatis pampa neli niunca yihual hual Dios quitilanic. Nehual niunca, huan anquimatis quinami amo nicchía nindeno pan nopampa nehual nohuían. No, jan quinami nechmaxtía Dios noTajtzin, yoje inon niquijtúa. <sup>29</sup> Unca ca nehual yihual hual nechtilanic pa nicmachiltis ilajtol. Huan amo nechcahuas, pampín amo nicayas nohuían. In unca pampa nehual amo nimocahua pa niquinchías innojen hual quipaquiltulo.

<sup>30</sup> Quinmilic Jesús innojen lajtomes, cataloaya míc ca inminhuejueyenten in judíos pehuaje quineltocaje pampa yihual yec in lalac hual mojmosta quinmiliaya pampa yec.

*Jesús lajtúa inahuac ixolomes Dios huan yehuanten hual iyaxca in lili hual quinchihualtía laijlaculisli*

<sup>31</sup> Yoje, Jesús quinmilic inminhuejueyenten in judíos hual axan quineltocatataloaya, quinmilic:

—Sinda ancayas anquineltoctías in hual niqijtúa, cuaquinon neli anunca amhuanten nomonextiliniymes. <sup>32</sup> Huan anquimatis len unca melahuac inahuac Dios. Huan inon hual unca melahuac anmitzmacahuas pa camo anquineltoctas Satanás iislatatilisli huan anmitzmacahuas pa camo anpolehuis pampa anyec laijlaculi.

<sup>33</sup> Quinanquilije:

—Tehuanten imiahuimes Abraham, huan ayamo quiman tiyeje itequipanujquimes se toteco hual amo techlaxlahuiaya. Axan, ¿quinami titechilía ticayasi lamacahuali?

<sup>34</sup> Quinnanquilic Jesús:

—Neli, neli annimitzilía, mochi seje hual cayas quichijtica len hual quijlacúa, yoje yihual unca itequipanujquil se teco hual quichihualtía laijlaculisli. <sup>35</sup> Huan se tequipanujquil amo mocahuas yes iyaxca iteco quinami unca ixól iteco. Ma yoje, se ixól, quema, mocahuas yes ixól itajtzin. <sup>36</sup> Yoje, sinda ixól in se anmitzilis pampa yihual anmitzmacahua, cuaquín neli unca pampa anunca lamacahuali quinami ixól in se. Yajmo anunca tequipanujquimes amo lalaxlahuili. <sup>37</sup> Nicmati pampa amhuanten anunca imiahuimes Abraham. Ma yoje, anquitemujtica quinami annehmictis. Inon anquichía pampa pa anmoyolo amo anquinequi anquineltoctas inon hual niqijtúa anmonahuac amhuanten. Ma yoje, unca melahuac. <sup>38</sup> Nehual annimitzlaquetzilía inminahuac innojen hual niquinmitac nepa capa nicataya ca Dios noTajtzin nehual, huan amhuanten noje anquinchía innojen hual anquinaquic inahuac anmotajtzin amhuanten.

<sup>39</sup> Quinanquilije yihual, quilije:

—Totajtzin yihual Abraham.

Jesús quinmilic:

—Sinda Abraham cataya anmotajtzin, cuaquín anquichihuaya len quichihuani Abraham. <sup>40</sup> Axan anquitemujtica quinami annehmictis nehual hual niunca lalac hual annimitzlic len unca melahuac, inon hual nijcaquic nechilic Dios. Abraham amo lachihuani quinami amhuanten. Yihual quineltocani Dios huan quipilini lasojlalislí yehuanten hual quilije Dios ilajtol. <sup>41</sup> Amhuanten anquichía quinami quichía anmotajtzin.

Quilije:

—Amo tilacatije inminpampa lacames hual amo monamictije huan hual amo quimolancuacuetzilije Dios. Ticpialo se toTajtzin, yihual Dios.

<sup>42</sup> Quinmilic Jesús:

—Sinda Dios cataya anmoTajtzin, cuaquín annechlasojlaya, pampa niquisac capa unca Dios huan nihualac pan laticpan. Amo nihualaya pan nopampa nehual, nihualaya pampa Dios nechtilanic pa nihualas. <sup>43</sup> ¿Leca amo anquimati len quinejquijtu in hual annimitzilía? Annimitzilía leca. Unca pampa amo anquinequi anquimacahuiltía pa anmitzpatilis anmoyolo in hual niqijtúa. <sup>44</sup> Amhuanten anunca ixolomes in lili, yihual anmotajtzin, huan in amo cuali hual yihual quinequi quichía, noje amhuanten



anquinequi anquichía. Quiman pehuac mochi pa axan, in lili yec lamictini. Yihual amo quiman quixtoca len unca melahuac, pampa ca yihual amo moitilia len unca melahuac. Sinda islacati, yoje unca san pampa yihual quinami inon. Quema, yihual quipehualtic islacatilisli. <sup>45</sup> Huan amhuanten amo annechneltoca pampa annimitzilia len unca melahuac. <sup>46</sup> Amo unca se ca amhuanten hual huil lanextilia pampa nel nicchia laijlaculisli. Sinda niqijitúa len unca melahuac, ¿leca amo annechneltoca? <sup>47</sup> Aquí hual quipía Dios quinami iTajtzin, yoje yihual quinequi quincacqui Dios ilajtomes. Pampa inon amo anquinequi anquicaqui Dios ilajtomes, pampa amo anquipía Dios quinami annoTajtzin.

*Cristo yuliaya quiman ayamo lacatic Abraham*

<sup>48</sup> Innojen huejueyenten ca in judíos quinanquilije:

—Unca yoje quinami tiqijituloaya, tel tisamariteco huan ticpía ijyecal amo cuali.

<sup>49</sup> Jesús quinnanquilic:

—Amo nicpía ijyecal amo cuali. Quema, nicpía lasojlalisli pa Dios no-Tajtzin, huan amhuanten amo annechlasojla. <sup>50</sup> Nehual amo nictemujtica quinami nimochías hué nohuían. Unca Se hual quichía inon, huan yihual anmitzmacas anno'ojli. <sup>51</sup> Neli, neli annimitzilia, sinda se lalac yuli cantica cuali len niqijitúa, cuaquín yihual amo quiman quimatis miquis.

<sup>52</sup> In huejueyenten judíos quilije:

—Axan ticmatilo pampa tehual ticpía se ijyecal amo cuali laijtic moyolo. Miquic Abraham, huan miquije Dios ilajtunijmes, huan tehual titechilia sinda se lalac yuli cantica cuali len tiqijitúa, amo quiman quimatis len yes pa miquis se. <sup>53</sup> ¿Tiqijitúa tiunca niman hué huan totajtzin Abraham hual miquic amo yec yoje hué? ¿Huan Dios ilajtunijmes hual miquije amo yeje yoje huejué? ¿Len timochijtica ca tehual mohuían?

<sup>54</sup> Jesús quinnanquilic:

—Sinda nehual niahuiaya nimochía hué, cuaquín nolahueyilisli amo monotzaya nindeno. Unca noTajtzin hual nejchía hué. Amhuanten anquijitúa yihual annoDios. <sup>55</sup> Ma yoje, amo quiman anquiximatiaya huan ayamo anquiximati axan. Nehual, quema, niquiximati. Huan sinda niqijituaaya: “Amo niquiximati”, cuaquín nicataya quinami amhuanten, nislacatiaya. Ma yoje, niquiximati huan niyuli nicantica cuali in hual quijitúa. <sup>56</sup> Quipiaya niman miac paquilisli annotajtzin Abraham, pampa in tonalijmes quiman yulini pan lalticpan, quimatic pampa yahuiaya quita quinami cayasquiaya in tonali hual niahuiaya nicaya nican pan lalticpan. Huan neli quitac, huan pampín quiapiaya miac paquilisli.

<sup>57</sup> Cuaquinon in huejueyenten judíos quilije:

—Ayamo tiyulic cincuenta xixíl huan ¿tehual tiquitac Abraham?

<sup>58</sup> Jesús quinmilitic:

—Neli, neli annimitzilia, nehual niyultataya quiman ayamo lacatic Abraham.

<sup>59</sup> Cuaquinon quinqitzquije tixcalimes pa quilaxililosquiaya, huan Jesús quinmolatilitic, quisac pin topan hué huan yoje mohuicac

<sup>1</sup> Panujtataya Jesús, quitac se lacal pachacal, yoje lacatic. <sup>2</sup> Huan Jesús imonextiliniymes quilajlanije, quilije:

—Lamaxtini, ¿aqui quichíac laiylaculisli huan pampín lacatic pachacal in lacal? ¿Cataya yihual in se ihuían, o cataloaya itajtzin huan inantzin?

<sup>3</sup> Jesús quinnanquilic:

—Amo cataya in lacal hual quichíac laiylaculisli, huan amo cataloaya inantzin huan itajtzin hual quichihuaje. Jan quipanuc pa yoje pan ipampa yihual moitilisi innojen lachihualisli huejué hual Dios huil quinchía.

<sup>4</sup> Monequi pa nicayas nicchijtica itequipanulisli Dios hual nechtilanic huan monequi pa nicchijtías quiman unca semilhuil. Ajsitihuala in layúa, cuaquín amaqui huil tequipanúa. Nicnequi niquijtúa, ajsitihualalo tonalijmes hual yajmo nicayas nican. <sup>5</sup> Pan mochi in tonalijmes hual niunca nican pan lalticpan, niunca quinami lahuilisli pa yehuanten pin lalticpan. Unca quinami niquinlahuilijtica Dios iojli.

<sup>6</sup> Lamac quijtuc inon, lachijchac pan lali, quichíac sucuil ca ilachijchal huan ca in sucuil quixahuilic iixtololojmes in pachacal. <sup>7</sup> Cuaquín quilic:

—Xía ximoixpaca ca al nepa pin lahuajuanali hual itoca Siloé. (Siloé quinequi quijtúa Latilanili.)

Yoje uyac in pachacal, moixpacac huan lachixtihualac. <sup>8</sup> Cuaquinon, quitaje yehuanten hual chantiloaya inahuac huan yehuanten hual quitaniyme quinami molajlanilijtinemini tomin, huan moilloaya:

—¿Amo in se yihual hual molalini huan molajlanini tomin?

<sup>9</sup> Sequin quililoaya:

—Unca yihual.

Oc sequin quililoaya:

—Amo yihual, san nesi quinami yihual.

Ma yoje, yihual hual catani pachacal quinmiliaya:

—Nehual niunca hual nicataya pachacal.

<sup>10</sup> Pampa inon quililoaya:

—¿Quinami tipajtíc pa yoje huil tilachía axan?

<sup>11</sup> Quinnanquilic in lacal, quinmilic:

—In lacal itoca Jesús quichíac sucuil calica quinxahuic noixtololojmes huan nechilic: “Xía ximoixpaca ca al nepa pin lahuajuanali itoca Siloé.” Pampín, níac huan nimoixpacac, yoje nilachixtihualac.

<sup>12</sup> Huan quilije:

—¿Capa unca in se?

Quinmilic:

—Amo nicmati.

### *In fariseos quilajlanilo in pachacal*

<sup>13</sup> Quihuicaje inminlaixpan in fariseos in se hual catani pachacal. <sup>14</sup> Huan cataya pan tonali chicome (siete) quiman mosehuilo in judíos hual Jesús quichíac in sucuil huan quipajtíc in pachacal pa huil lachías. <sup>15</sup> Pampín in fariseos noje quilajlanije in lacal oc sepa quinami pehuac lachíac, huan quinmilic:

—Quilalic sucuil pan noixtololojmes huan nimoixpacac huan nilachixtihualac.

<sup>16</sup> Cuaquinon quilije sequin ca in fariseos:

—In lacal amo unca se ilacal Dios pampa amo quimati momajtía tequipanúa pan tonali hual timosehuilo.

Oc sequin quinmilloaya:

—¿Quinami huil se lalac laijlaculi quinchía innojen hual cate lachihuali hual techlamahuisultilo timomajtiticate?

Huan amo cataloaya ca se lajtulisli yehuanten. <sup>17</sup> Cuaquinon quilije oc sejpa in lalac hual yajmo yec pachacal, quilije:

—¿Len tiquijtúa tehual inahuac yihual? Pampa tehual tiunca hual mitzlachialtic.

Quinmilic:

—Niquijtúa yihual unca se ilajtuni Dios.

<sup>18</sup> In huejueyenten judíos amo quineltocaje inon hual quinmilije inahuac in lalac, amo quineltocaje pampa yec pachacal huan axan lachiaya. Pampín, quinnotzajque itajtzin huan inantzin. <sup>19</sup> Quinlajlanije:

—¿In se anmoxól huan anquijtúa lacatic pachacal? Axcán, ¿quinami huil lachía nuso?

<sup>20</sup> Huan lananquilije itajtzin huan inantzin, quinmilije:

—Ticmatilo in se toxól huan lacatic pachacal. <sup>21</sup> Ma yoje, amo ticmatilo axan quinami huil lachía, huan amo ticmatilo aqui quilachialtic. Xiclajlanican yihual, yihual lalac hué, yíal motilanía, yihual huil lajtúa inahuac yihual ihuían.

<sup>22</sup> Quilije inon itajtzin huan inantzin pampa momajtiloaya inminlaixpan in huejueyenten judíos. Cataya pampa axan quilalije in huejueyenten pa quiquixtilisi pa quiahua in tiopan aqui yes hual quiqtusquiaya Jesús unca in Cristo. <sup>23</sup> Pampa inon itajtzin huan inantzin in pachacal quinmilije: “Yihual motilanía, xiclajlanican yihual.”

<sup>24</sup> Yoje, quinnotzaje oc sejpa in lalac hual yajmo yec pachacal, quilije:

—Amo xitechcuaajcuamana, san ilaixpan Dios xitechili melahuac. Tehuanten ticmatilo in lalac se lalac laijlaculi.

<sup>25</sup> Huan yihual quinnanquiloc:

—Sinda yihual se lalac laijlaculi, amo nicmati. In san nicmati: Niyec pachacal huan axan nilachía.

<sup>26</sup> Quilije:

—Cuaquín ¿len mijchihuiloc? ¿Quinami mitzlachialtic nuso?

<sup>27</sup> Quinnanquiloc:

—Annimitziloc huan amo anquinequiaya anquicaqui. ¿Leca anquinequi anquicaqui oc sejpa? Unca neli amo anquinequi anmochía imonextilini-jmes. O ¿cuajnesi quema anquinequi? ¿Pampín anquinequi anquicaqui oc sejpa?

<sup>28</sup> Cuaquín yehuanten quixixciculoaya, quilije:

—Tehual imonextilini in se. Tehuanten ti'imonextilini-jmes Moisés.

<sup>29</sup> Ticmatilo Dios laquetzac ca Moisés. In se amo ticmatilo capa pehuac nescic.

<sup>30</sup> Lananquiloc in lalac, quinmilic:

—¡Jo, cuaquín, nimolapolultía ca inon! ¡Anquijtúa da amo anquimati capa pehuac nescic huan ma yoje nechlachialtic! <sup>31</sup> Ticmatilo Dios amo quicaqui yehuanten hual cate laijlaculi sinda molajlanililo len ca yihual. Quema, sinda se quimolancuacuetzilia Dios ca mochi iyolo huan quichía quinami quinequi Dios, cuaquín Dios quicaqui quiman yes quilajlanía. <sup>32</sup> Quiman yes pehuac in lalticpan amo quiman cayani lalac hual quilachialtic se lalac hual lacatic pachacal. <sup>33</sup> Sinda in lalac amo cataya iyaxca Dios, amo huil quichihuaya nindeno.

<sup>34</sup> Lananquilije yehuanten, quilije:

—Tehual tilacatic jan mochi laijlaculi. Huan tehual ¿tiqijúta huil titechmaxtía tehuanten?

Huan quiquixtije pa quiahuac in tiopan.

*Yehuanten pachacames pa inminyolo*

<sup>35</sup> Jesús quicaquic quinami quiquixtije pa quiahuac in tiopan, huan quiman quitac, quilajlanic:

—Tehual, ¿ticneltoca yihual hual ilacal in cielo?

<sup>36</sup> Quinanquilic in lalac:

—Huan ¿aqui yihual, Tata, pa yoje nicneltocas?

<sup>37</sup> Jesús quilic:

—Axan tiqitac yihual. Nehual in se hual nilaqueztica ca tehual.

<sup>38</sup> In lalac quilic:

—Niczneltoca, Tata.

Huan quimolancuacuetzilic.

<sup>39</sup> Cuaquín Jesús quilic:

—Nihualaya pin lalticpan pa niquinxilic in lacames pan ipampa quinami niquinmacas inminojli. Cate yehuanten hual quimatilo pampa amo lachialo pa inminyolo. Nihualaya pa niquinlachialtis. Yoje niquinxilúta pa camo cayasi ca yehuanten hual quijtulo laijtic yehuanten pampa lachialo cuali pa inminyolo huan ma yoje amo neli lachialo nepa. Nihualaya pa niquinchihuilis yehuanten quinami pachacames pa inminyolo.

<sup>40</sup> Quicaquije inon sequín fariseos hual nepa moquezataloaya, quilije:

—Huan tehuanten, ¿tipachacames noje?

<sup>41</sup> Jesús quinmilic:

—Sinda amhuanten ancataya pachacames, cuaquín amo anquiapiaya laijlaculisli. Ma yoje, anquijtúta pampa anlachía pa anmoyolo huan amo neli inon. Yoje anmocahua laijlaculi.

## 10

*In lanechiculi calijtic pa in borregos*

<sup>1</sup> Neli, neli annimitzilía, aquí yes amo calaquí ca ilalapujquil in borregos inminlajtic, huan ma yoje calaquí ca yoje, cuaquín yihual quinami se hual la'anilía, unca quinami laxtequini. <sup>2</sup> Huan aquí hual calaquí ca in lalapujquil, yihual in teco, yíal quinmiztía in borregos. <sup>3</sup> Yihual hual quiztía in lalapujquil quilapulía in teco. Quitencaquilo in borregos inminteco huan yihual quinnotza iborregos, mochi seje quinami itoca, huan quinlaicana pa quiahuac. <sup>4</sup> Quiman mochi iborregos pa quiahuac cate, cuaquinon laicantía inminteco huan iborregos quitocatíalo pampa quiximatilo yihual quinami quinnotza. <sup>5</sup> Huan amo quitocasi se hual amo quiximatilo. San cholusi ilaixpan yihual pampa amo quiximatilo yihual quinami quinnotza.

<sup>6</sup> Quinlaquetzilic Jesús ca in lapuhualisli hual quiapiaya se lamaxtilisli lalatili. Ma yoje, yehuanten amo quimatiloaya len quinequiaya quiitu in hual quinmiliaya.

*Jesús unca in teco cuali*

<sup>7</sup> Cuaquinon, Jesús quinmilic oc sejpá:

—Neli, neli annimitzilía nehual niquinami in lalapujquil pa in borregos. <sup>8</sup> Pa yina pin tonalijmes hual ayamo niajsiaya pan lalticpan cataloaya yehuanten hual quinmiliyoaya lacames pampa yehuanten Cristo. Annimitzilía pampa moxtin yehuanten cataloaya quinami laxtequinijmes, yehuanten lacames hual la'anililo. Ma yoje, in borregos amo quicaquiloaya

pa quintocalosquiaya. Nicnequi niqijtúa, yehuanten hual hualaloaya nechnehtocalo amo quicaquiloaya. <sup>9</sup>Yoje, nehual niquinami in lalapujquil. Pan nopampa, sinda se calaquía, nicnequi niqijtúa, sinda nechnehtoca, yoje moitas capa Dios hual cana pa huelitis pan yihual huan yoje yes laquixtili pin polehuilisi ca capic quihuicaya ilaijlaculisli. Yes quinami se borrego huil panúa ca calijtc huan pa quiahuac huan quitas sacal pa quicuas.

<sup>10</sup>Huala in laxtequini jan pa laxtequis huan pa lamictis huan pa laijlacus. Nehual nihualaya pa yoje lacames quipiasi niman míac in hual Dios quita monequi pa quipías se pa yoje yulis ca paquilisli. <sup>11</sup>Nehual in teco cuali. In teco cuali motemaca pa miquis pa yoje quinpías laquixtili pin polehuilisi iborregos. <sup>12</sup>Aqui hual amo unca in teco huan jan unca se hual in teco quilaquehua, yoje yihual amo inminteco in borregos. Pampín, sinda quita hualajtica in coyol, quincajchua in laquejquil in borregos huan cholúa. Huan in coyol quinhuilantía in borregos huan quinmacajsía pa mosemanasi. <sup>13</sup>Yoje quichía aquí yes hual unca lalaquehuali, pampa amo motolinía pa in borregos. <sup>14</sup>Nehual in teco cuali, huan niquinmiximati yehuanten hual noyaxca. Huan yehuanten hual noyaxca nechiximati nehual. <sup>15</sup>Unca jan quinami nechiximati noTajtzin huan nehual niquiximati noTajtzin. Nimotemacas pa nimiquis pa in borregos hual cate in lacames hual nechnehtocalo. <sup>16</sup>Niquinpía oc sequin borregos hual amo cate ca in laijtc latzacuali, yehuanten hual amo iyaxca Israel. Nicpía pa niquinhualicas pa cayasi ca nehual. Quicaquis nolajtol huan monechicusi huan mochihuasi jan se ca yehuanten hual ilacames Israel, huan nechpiasi nehual pa inminteco. <sup>17</sup>Pampa inon noTajtzin nechlasojla pampa nimotemaca pa nimiquis, pa yoje niyulis oc sejpa. <sup>18</sup>Amaqui nejchihuilis pa nimiquis. Nehual nohuían nimotemaca pa nimiquis. Nicpía lahuellitilisi pa nimotemacas pa nimiquis, huan nicpía lahuellitilisi pa nicanas noyulilisi oc sejpa. In nicchías pampa yoje noTajtzin nechilic pa nicchías.

<sup>19</sup>Oc sejpa in huejueyenten judíos amo moililoaya ca se lajtulisli inahuac in hual Jesús quinnmilic. <sup>20</sup>Huan míac ca yehuanten quililoaya:

—Yihual quipía se iyjecal amo cuali laijtc iyolo. Yihual amo quimati in hual quijtutica, yihual quinami yes quichía. ¿Leca anquicactica?

<sup>21</sup>Oc sequin quililoaya:

—Se hual quipía iyjecal amo cuali amo lajtúa ca lajtomes quinami innojen. ¿Huil quilachialtía se pachacal se hual quipía iyjecal amo cuali? ¿Amo quiman huil!

### *In judíos amo quinequilo quineltocono Jesús*

<sup>22</sup>Cataya cuaquinon in fiesta (ilhuil) quiman quijnamiquiloaya ilayan-cuilulisli in tiopan hué pa Jerusalén, huan pa quiahuac cataya sehua. <sup>23</sup>Huan nejnentinemiaya Jesús pin tiopan hué, cataya pa se lanejnemijquil hual itocaya Salomón ilanejnemijquil. <sup>24</sup>Yoje, quiyahualujtihualaloaya in huejueyenten judíos, peshualoaya quililo:

—Axan, ¿quichi tonalijmes tía titechchua amo ticmazticate aquí tehual? Sinda tehual tiunca in Cristo, xitechili ca lajtol calica amo timoixpolulo.

<sup>25</sup>Jesús quinnanquiloc:

—Annimtzilic sejpa huan oc sejpa huan amo anquineltocon. Innojen hual niquinchía pan ipampa noTajtzin ilahuellitilisi, innojen anmitznextilía neli pampa nicpía Dios ilahuellitilisi. <sup>26</sup>Ma yoje, amhuanten amo annehnehtoca pampa amhuanten amo ca noborregos. <sup>27</sup>Nehtencaquilo noborregos,

huan nehual niquinmiximati, huan nechtocalo. <sup>28</sup> Huan nehual niquinmaca Dios iyulilislí hual amo quiman lamis huan yehuanten amo quiman polehúisi. Huan amaqú huil nechquixtilía yehuanten. Unca quinami yehuanten cate pa noma. <sup>29</sup> Dios noTajtzin nechmacac yehuanten hual nechneltocalo hual niquijtúa yehuanten noborregos. Huan Dios noTajtzin, yihual in nicalo hué, amo unca oc se yoje hué. Huan amaqú huil quinquixtilía noTajtzin, unca quinami cate pa ima. <sup>30</sup> Nehual huan noTajtzin, tehuanten ticate jan se san.

<sup>31</sup> Oc sejpa quinqúitzquije tixcalimes in judíos pa quilaxilisi. <sup>32</sup> Jesús quinmilic:

—Cate míac lachihualislí cuajcuali hual annimitznextilic. Huan niquinchíac pampa noTajtzin nechilic pa niquinchíac. ¿Calía ca innojen amo anmitzanac cuali pa yoje anquinequi annechlxalili tixcalimes?

<sup>33</sup> In judíos quinanquilije:

—Amo timitzmacalo tixcalazos pampa ticchíac len cuali. Unca pampa ticejuecaltitica Dios. Unca pampa tehual, mas que tilacal san, tiqúijtutica pampa tehual Dios.

<sup>34</sup> Jesús quinnanquilic:

—Unca lajcuiluli pa iamal anmolajtol hual noje unca Dios ilajtol, quijtúa: “Niquijtuc: Amhuanten anunca dioses.” <sup>35</sup> Capa Dios quijtuc inon, yoje quinmiliaya ilajtol yehuanten hual quintilanic pa quinmilisi lacames inon. Huan quema, Dios quinmilic yehuanten yeje dioses mas que yehuanten lacames san. Huan monequi pa anquineltoacas inon, pampa unca Dios ilajtol lajcuiluli huan amaqú huil quijtúa pampa amo unca melahuac. <sup>36</sup> Axan, pa in tonali hual noTajtzin nechtilanic pin lalticpan, nechlalic quinami ilanahuatini. Pampa inon amo unca anmoyaxca pa annechilisi níquihuejuecaltitica Dios pampa annimitzilic nehual niunca Dios iXolol. <sup>37</sup> Sinda amo niquinchía innojen hual Dios noTajtzin nechtilanic pa niquinchías, cuaquín amo xichneltocacan. <sup>38</sup> Huan sinda quema niquinchía innojen, cuaquín, mas que amo annechneltoca nehual, xicneltocacan innojen cate hual noTajtzin nechmacac pa niquinchías. Xicneltocacan pa yoje anquimatis huan pa ancayas anquimaztica quinami Dios noTajtzin unca nonahuac, huan yihual tiyulticate, nehual niunca inahuac. Yihual lajitic nehual huan nehual lajitic yihual.

<sup>39</sup> Cuaquínon motolinije pa quiquitzquilosquiaya oc sejpa, huan yihual mijcuantiquisac inminlaixpan yehuanten. <sup>40</sup> Uyac oc sejpa ca yoje (analco) in atenco hué Jordán, cataya capa Juan pehuaya lacuayatequi. Nepa Jesús mocahuaya chantitataya. <sup>41</sup> Huan ca ompic míac lacames uyaje ca yihual, huan quíiloaya:

—Neli amo quichíac Juan nindeno hual techmahuisultiaya ca lamajtilislí. Ma yoje, mochi in hual Juan quijtuc inahuac in lalac cataya melahuac.

<sup>42</sup> Huan míac pehuaje quineltocaje nepa.

## 11

### *Lázaro miqui*

<sup>1</sup> Cataya se lalac cocoxqui, yihual Lázaro hual yulic pin caltilan Betania, in caltilan capa chantiloaya María huan icni síhual Marta. <sup>2</sup> Cataya in se María hual quixahuilic in Tata Jesús ca chahuac hual ajuíac, huan quinhuactic icxihuajmes ca itzondi. Quichihuilic inon pin tonalijmes quiman ayamo quimictije Jesús in judíos.

Yihual Lázaro in cocoxquil, yihual inmicni María huan Marta. <sup>3</sup> Yoje, icnían sihuames quitlanilije Jesús lajtol, quilije:

—Tata, quita, yihual cocoxqui, yihual hual ticnequi.

<sup>4</sup> Ma yoje, in tonali Jesús quicaquic in lamachilitlisli hual quitlanilije, quinmilic imonextiliniymes:

—In cocolisli amo unca pa yihual miquis. Unca pa quitasi moxtin quinami unca niman hué Dios ilahuelilitlisli, pa yoje nehual hual Dios iXól nejhías hué Dios pan ipampa in cocolisli.

<sup>5</sup> Jesús quinnequic Marta huan icni sihual huan Lázaro. <sup>6</sup> Ma yoje, pa in tonali hual quicaquic pampa Lázaro cataya cocoxqui, mocahuaya ome tonalijmes nepa capa cataya. <sup>7</sup> Cuaquinon, quiman panuje innojen tonalijmes, quinmilic imonextiliniymes:

—Ma tiacan oc sejpa pa Judea.

<sup>8</sup> Quilije imonextiliniymes:

—Lamaxtini, in huejueyenten judíos san huipla quinequiloaya mitzmicilo ca tixcalazos. ¿Leca tías ca ompic oc sejpa?

<sup>9</sup> Jesús quinnanquilic:

—Cate doce lajlajco pa se semilhuil, ¿amo yoje? Huan jan yoje Dios quilalic quichi lachihualisli monequi pa nicchías pa se semilhuil. Amo nejtzacuilis nindeno pa camo nicchías mochi hual Dios nechilic pa nicchías. Sinda se nejnemi pa semilhuil, amo motecuas icxían ca se tixcali, pampa lachía pan ipampa in lahuilisli hual quilahuía mochi in lalticpan. <sup>10</sup> Huan sinda se nejnemi pa layúa, yoje yahui momañajtía, pampa amo unca lahuilisli pa yihual lachías. Huan sinda unca laticumac laijtic iyolo se, momañajtis pampa ilahuilisli Dios amo quinextilis Dios iojli.

<sup>11</sup> Lamac quijtuc inon, yihual quinmilic:

—Tocni Lázaro cochic axan. Huan nehual nía pa niquejxiltis.

<sup>12</sup> Cuaquín imonextiliniymes quilije:

—Tata, sinda coxtica, cuaquín pajtis.

<sup>13</sup> Jesús quinequiaya quiytu pampa miquic Lázaro. Huan quiytuje imonextiliniymes pampa yihual quinlaquetziliaya quinami cochiaya. <sup>14</sup> Pampín, quinmilic Jesús ca lajtol calica amo moixpolulosquiaya:

—Lázaro miquic. <sup>15</sup> Huan unca paquilisli pa noyolo pampa amo nicataya nepa, pampa yoje cataya cuali pa amhuanten. Pampa inon, anyahui anquilalía miac laneltocalisli ca nehual. Ma yoje, ma tiacan capa yihual.

<sup>16</sup> Cuaquinon Tomás hual noje itocaya Seinomenten quinmilic in oc sequin monextiliniymes, quinmilic:

—Ma tiacan noje ca yihual, pa yoje timiquisi ca yihual.

*Jesús, yihual in se hual quinyliltía in mijquimes, yihual in yulilisli*

<sup>17</sup> Yoje, ajsiaya Jesús, quilije quinami axan quinpiaya nahui tonalijmes hual Lázaro cataya pin cueva (ostul) capa quilalpachuje. <sup>18</sup> Betania huan Jerusalén amo cate huejca se ca in oc se, quinami cinco (macuili) kilometros.

<sup>19</sup> Huan miac ca in huejueyenten judíos hualaje ca Marta huan María pa quinlacahualtilisi inmicni Lázaro. <sup>20</sup> Huan quiman quimatic Marta pampa ajsitihualaya Jesús, uyac quinamiquic. Ma yoje, mocahuac María molalijtataya pin cali. <sup>21</sup> Huan Marta quilib Jesús:

—Tata, amo miquiaya nocni sinda ticataya nican. <sup>22</sup> Ma yoje, axan nicmati len yes ticlajlanis Dios, yihual mitzmacas.

<sup>23</sup> Jesús quilib:

—Mocni yulis oc sejpa.

<sup>24</sup> Marta quilic:

—Nicmati yihual yulis oc sejpa pan tonali quiman lamis in lalticpan hual axan unca. Yulis nepa ca moxtin hual yulisi oc sejpa.

<sup>25</sup> Jesús quilic:

—Nehual in inminlayuliltisli in mijquimes, nehual in yulilisli. Nehual pan nopampa huil nicyuliltia aqui yes huan quiman yes nicnequi, pampa nicpia yulilisli calica nilayuliltia. Aqui nechnehtoca, mas que miquis, ma yoje yihual yulis. <sup>26</sup> Huan aqui yes yuli nechnehtocatica, yihual amo quiman miquis pa moxilus ilaixpan Dios. ¿Ticnehtoca inon hual nimitzilijtica?

<sup>27</sup> Marta quinancuilic:

—Jo quema, Tata, nehual nicnehtoca quinami tehual tiunca in Cristo, tiunca ixolol Dios hual ticchialoaya pa hualas pin lalticpan.

*Jesús choca inahuac capa quilalpachuje Lázaro*

<sup>28</sup> Huan quiman quilic inon, mohuicac, uyac quintzac ixtacayito icni María, quilic:

—Axan unca in Lamaxtini huan mitznoztica.

<sup>29</sup> Huan quicaquic inon María, moqueztiquisac, uyac capa Jesús.

<sup>30</sup> Axan ayamo calaquic Jesús pin caltilan, ayamo mijcuanic capa Marta quinamiquic. <sup>31</sup> Pin cali cataloaya ca María sequin huejueyenten judíos hual quilacahualtitataloaya. Cuaquinon, quitaje moqueztiquisac huan quisac. Yehuanten quitocaje, quijtutaloaya yihual yahuiaya pa in cueva (ostul) capa quilalije in mijquil. Quijtuloaya yahuiaya quichoquili umpa.

<sup>32</sup> Yoje, ajsic capa cataya Jesús quimolancuacuetzilijtiquisac, quilijtica:

—Tata, sinda tehual ticataya nican, nocni amo miquiaya.

<sup>33</sup> Huan Jesús quitaya chocatataya huan quinmitaya in judíos hual hualaloaya ca yihual María, yehuanten noje chocataloaya. Cuaquin quic-oc yolo huan laijtic yihual motoliniaya. <sup>34</sup> Quinmilic:

—¿Capa anquilalic?

Quinmilije:

—Xihuala huan xiquita.

<sup>35</sup> Chocac Jesús. <sup>36</sup> Cuaquin moilije in judíos:

—Xiquitacan quinami yihual quinequic.

<sup>37</sup> Huan sequin ca yehuanten quilije:

—In lalac quilachialtic se pachacal. ¿Leca amo huil quitzacuilic pa camo miquisquiaya in lalac?

<sup>38</sup> Huan Jesús iyolo quicocujtataya ca icnotilisli, iyyulantic laijtic yihual quiman ajsiaya capa quilalije. Cataya se cueva (ostul) huan se tel quilalilije inahuac pa quitzacuas. <sup>39</sup> Quinmilic:

—Xiquijcuanican in tel.

Marta icni in mijquil quilic:

—Tata, axan quisas iyyul. Quipia nahui tonalijmes quiman polehuic.

<sup>40</sup> Jesús quilic:

—Nimitzilic sinda ticnehtocas, tiquitas quinami unca hué Dios ilahueliltisli. ¿Amo tiquijnamiquia?

<sup>41</sup> Cuaquin quijcuanije in tel. Huan Jesús lachiac pa in cielo (ilhuicac) huan quilic:

—Tata, nimijsehuia pampa tichcaquic. <sup>42</sup> Huan nicmati tehual amo quiman timocahua pa tichcaquis. Ma yoje, nimitzilic inon pampa yehuanten in miac moquezticate notenco, huan yoje quineltocasi tehual tichtilanic nican pan lalticpan.



<sup>43</sup> Huan quiman lamíc lajtuc yoje, tzajtzic ca lajtol chicahuac, quilic:

—¿Lázaro, xihuala pa quiahuac!

<sup>44</sup> Huan hualac pa quiahuac Lázaro, yihual hual cataya mijquil, ilpitataya ca in tzotzomajli calica quiliarulo in mijquimes, huan pa iixco ilpitataya oc se tzotzomajli. Jesús quinmilic:

—Xictomilican pa huil yas.

*Molaquetzililo in huejueyenten quinami quinmictiluililo Jesús*

(Mt. 26:15; Mr. 14:12; Lc. 22:12)

<sup>45</sup> Yoje, míac ca innojen huejueyenten judíos pehuaje quineltocaje Jesús unca in Cristo, pampa nepa ca María cataloaya huan quitaje in hual quichíac Jesús. <sup>46</sup> Ma yoje, sequin ca yehuanten uyaje capa in fariseos, quinquhuilije inon hual Jesús lamíc quichíac. <sup>47</sup> Pampín, lanahuatije in tiopistas huejué huan in fariseos pa monechicusi moxtin yehuanten, moilije:

¿Len tialo ticchihualo? Pampa in lalac quinchía míac hual quinmahuisul-tilo ca lamajtilisli moxtin. <sup>48</sup> Sinda ticmacahuilitlo pa yahuis yoje, moxtin quineltocasi yihual unca in Cristo. Cuaquín hualasi in romanos huan techquixtilisi tolahuelilitlisli huan tolali.

<sup>49-50</sup> Cuaquín se ca yehuanten motocaya Caifás, yihual in tiopista hué pa in xihuil, quinmilic:

—Amo anquimati nindeno, huan amo anmoijnamiquiltía quinami unca cuali pa amhuanten pa san se lalac miquis pa moxtin, yoje pa camo lamisi moxtin huan tolali.

<sup>51</sup> Yihual Caifás amo quinmilic inon pan ipampa yihual ihuían. Cataya pampa yihual yec tiopista hué pa in xihuil, pampín yihual quijttutataya Dios ilajtol inahuac Jesús. Ma yoje, amo quimatiaya pampa yihual quijttutataya pampa Jesús yahuiaya miqui pa camo quipiási pa polehuisi yehuanten pin lali Israel. <sup>52</sup> Huan Jesús amo yahuiaya miqui jan pa yehuanten hual iyaxca Israel san. Noje pan ipampa imiquilisli, Dios yahuiaya quinnechicu Dios ixolomes hual mosemanticate pa mochi in lalticpan, pa yoje ixolomes yesi jan se cali san. <sup>53</sup> Yoje, pejtaloaya ca in tonali huan pa mochi in tonalijmes hual ajsitihualaloaya, yehuanten molaquetzililoaya quinami yahuilaloaya quimictiluililo. <sup>54</sup> Pampín yajmo mocahuaya Jesús chantititaya capa huil quitaloaya in huejueyenten judíos. Jan mohuicac pa quiahuac nepa pa se caltilan capa amo cataya huejca in lali capa amaqui chantiaya. In caltilan itocaya Efraín. Nepa mocahuac ca imonextiliniyjes.

<sup>55</sup> Ajsitihualaya in fiesta (ilhuil) ipasca in judíos, huan míac lacames pa mochi in lalticpan panquisaloaya pa Jerusalén, quinequiloaya ajsilo pin tonalijmes quiman ayamo pehuac in fiesta (ilhuil) pa huil mochiphuasi quinami quijttúa in lajtol hual lamaxtilía quinami monequi pa mochijchi-huililo pa huil quimolancuacuetzilisi Dios. <sup>56</sup> Innojen lacames quitemuloaya Jesús, moililoaya moquezataloaya pin tiopan hué, quililoaya:

—¿Anquijttúa yihual amo hualas pa in ilhuil?

<sup>57</sup> Quiman ajsitihualaya in fiesta (ilhuil), lanahuatije in tiopistas huejué huan fariseos sinda calía lalac yes quimatic capa cataya Jesús, quipiaya pa quinlamachiltis in huejueyenten pa yoje huil quiquitzquisi.

## 12

*Se sihual quixahuilía Jesús itzontecon huan icxían*

(Mt. 26:6-13; Mr. 14:3-9)

<sup>1</sup> Yoje, ca chucuase tonalijmes yahuiaya ajsi in fiesta (ilhuil) itoca pascua, huan Jesús hualac pa Betania capa cataya Lázaro hual miquic hual Jesús quiyuliltic. <sup>2</sup> Huan quichihualoaya nepa se lacualisli. Marta quinlacualtiaya yehuanten pan capa lacualoaya, huan Lázaro cataya se ca yehuanten hual cataloaya ca Jesús lacuajtaloaya. <sup>3</sup> Cuaquín María canac se altzindi tetzahuac lachihuali ca nardo puro, quinami lajco kilo, niman ipati. Huan ca inon quixahuilic Jesús icxihuajmes, de umpa quinquhuactic icxihuajmes ca itzondi. Yoje, pa mochi in cali quijnecuije quinami ajuíac in altzindi. <sup>4</sup> Huan nepa cataya Judas Iscariote. Yihual imonextilini Jesús hual yahuiaya quitemaca Jesús ca yehuanten hual yahuiyoaya latilanilo pa quimictisi. Quilic:

<sup>5</sup> —¿Leca amo quinamacaje in altzindi huan quinamacaje in tomin yehuanten hual amo quipialo? Xiquitacan. In altzindi ipati quinami in tomin hual canaloye cientos lacames tequipanujticate se tonali.

<sup>6</sup> Judas quilic inon pampa yihual yec laxtequini. Amo quilic pampa quinmicniliaya yehuanten hual amo quipialoaya nindeno. Cataya pampa yihual mojmota quihuicani in xotopa capa quipixtiahuiyoaya inmintomin yehuanten. Huan yihual sejpa huan oc sejpa caniliaya tomin pin xotopa hual yehuanten quilalilije laijtic. <sup>7</sup> Cuaquín Jesús quilic:

—Amo xicmaca tequil. Cataya pampa quinequiaya cajcoqui pa nejaxhuilis pin tonalijmes capa ayamo nechlalpachuje. <sup>8</sup> Mojmota anquinpiás ca amhuanten yehuanten hual amo quipialo. Ma yoje, nehual amo anechpiás ca amhuanten míac tonalijmes.

### *Quitemulo quinami huil quimictisi Lázaro*

<sup>9</sup> Axan, míac lacames judíos amo huejué quimatije Jesús cataya nepa Betania. Pampín hualaje, huan amo jan pa huil quitasi Jesús san. Noje quinequiloaya quitalo Lázaro hual Jesús quiyuliltic oc sejpa. <sup>10-11</sup> Pampín, in tiopistas huejué molaquetzililoaya quinami quimictilosquiaya Lázaro noje. Axan míac judíos mocahuaje pa quinneltocasi quinami quinequiloaya in huejueyenten judíos. Axan quinneltocaloaya Jesús pampa yihual quiyuliltic Lázaro.

### *Jesús calaquía Jerusalén*

<sup>12</sup> Mostatica monechicuje míac ca yehuanten hual quipialoaya sequin tonalijmes ajsije pa Jerusalén pa in fiesta (ilhuil). Quimatije quinami Jesús ajsitihualaya noje pa Jerusalén. <sup>13</sup> Pampín quinmanaje isacayo in palmas huan quisaje pa quinamiquisi, huan tzajtziloaya, quijtutataloaya:

—¡Hosana! (In lajtol quinequi quijtúa: “¡Xitejchihuili cuali axcan!”) ¡Ma lajtucan cuali moxtin inahuac yihual hual huala ca in Tata ilahuelitilisli! ¡Yihual ihué Israel!

<sup>14</sup> Quitac Jesús se burro yancuic, molalic ipan, jan quinami Dios ilajtol quijtuc pa yina inahuac yihual, yoje unca lajcuiluli:

<sup>15</sup> Amo ximomajtican amhuanten hual anchanti pa Sión. Xiquitacan, huala anmohué capa amhuanten, molalijtica pani ixolol se burra.

<sup>16</sup> Amo quimatije imonextilinijes len quinequije quijtuje mochi innojen pa in tonali hual panujtataloaya. Ma yoje, in tonali hual Jesús yuliaya oc sejpa, cuaquinon quimatije. Quijnamiquiloaya quinami cataya lajcuiluli pa Dios ilajtol pampa lacames yahuiyoaya quichihuililo innojen lachihualisli. Huan imonextilinijes quinmitaje yehuanten capa quichihuilije mochi innojen.

<sup>17</sup> Huan nepa noje cataloaya in míac hual cataloaya ca Jesús in tonali hual yihual quinzac Lázaro pa quisasquiaya pa quiahuac capa quilalije imijquil,

in tonali hual yihual quiyuliltic oc sejpa. Axcan yehuanten quinlaquetzilitinemiloaya neli inahuac míac oc sequin innojen lachihualisli hual quitaje panuje. <sup>18</sup> Pampa inon uyaje pa quinamiquisi Jesús in míac oc sequin, pampa quimatije inon hual Jesús quichihuilic Lázaro. Yoje quimahuisujtiahuiloaya ca lamajtilisli. <sup>19</sup> Pampín, moililoaya in fariseos, quijtuloaya:

—Xiquitacan. Yajmo huil ticchihualo nindeno. Quitocaticate moxtin in lacalera pin lali.

### *Sequin lacames griegos quitemulo Jesús*

<sup>20</sup> Huan cataloaya sequin lacames griegos ca yehuanten hual panquisaje pa Jerusalén pa quimolancuacuetzilisli Dios nepa pin fiesta (ilhuil).

<sup>21</sup> Hualaje in griegos capa Felipe, yihual cataya se hual chantiaya pin caltilan Betsaida pin lalticpan Galilea. Quilajlanije quilije:

—Tata, ticnequilo tiqitalo Jesús.

<sup>22</sup> Uyac Felipe, quilic Andrés, huan Andrés uyac ca Felipe huan yehuanten quilije Jesús. <sup>23</sup> Jesús quinnanquilic, quinmilic:

—Axcan ajsic in tonali hual nel nicanas lahueyilisli hual nejchihuilis niman hué nehual ilacal in cielo. <sup>24</sup> Neli, neli annimitzilía inon: Se latocli mocahua jan se san sinda amo huetzis pin lali huan polehuis. Huan sinda quema polehuis, cuaquín ixuas huan quilalis míac. <sup>25</sup> Aquí hual quinequi yultía pa yoje canas mochi hual huil cana pa yulis pan lalticpan quinami yihual quinequi, yoje yihual polehuis amo quipixtica in yulilisli hual amo quimán lamis. Huan aquí hual motzacua pa camo yulis yoje, cuaquín yihual quimajcoquilis iyulilisli huan amo quiman quipolus. <sup>26</sup> Sinda se lacal, aquí yes, quinequi nechtequipanuilia, ma nechtocha. Huan capa niunca, nepa noje cayas yihual hual nechtequipanuilia. Sinda se lacal aquí yes nechtequipanuilia, cuaquín Dios noTajtzin quichihuilía hué in se.

### *Jesús quinlamachiltía quinami yalo quimictilo*

<sup>27</sup> Axan nimoita nietiaxtica laijtíc noyolo, huan nehual, ¿len nía niquijtúa inahuac inon? ¿Niclajlanis Dios noTajtzin pa yihual nechquixtis pa camo nipanus in miqulilisli hual yahui nechpanúa? No, inon amo niclajlanis, pampa nihualac pan lalticpan pa yoje nechpanus, pampín nechajsitihuala in tonali. <sup>28</sup> Tata, xicchía niman hué motoca tehual. Ximochía niman hué inminlaixpan moxtin, pa quilasojlasi niman míac motoca.

Mocactihualac se lajtol pin cielo, quilic:

—Nimochíac niman hué, huan oc sejpa nimochías niman hué pa moxtin quilasojlasi notoca.

<sup>29</sup> Quijtuje pampa comunic in míac ca yehuanten hual nepa moquetzaloaya huan quicaquije. Oc sequin quijtuje:

—Lajtuc ca yihual se ilanahuatini in cielo.

<sup>30</sup> Jesús quinnanquilic:

—Amo mocactihualac in lajtol pa nehual nijcaquis. Mocactihualac pa amhuanten anquicaquis. <sup>31</sup> Axan Dios yahui quinmaca ojli yehuanten pin lalticpan, axan Satanás yahui caya laquixtili capa quipía ilahuelilitilisli.

<sup>32</sup> Huan nehual niyes lachihuali hué pa in tonali hual nechajcoquisi. Yoje niquinchihuilis pa moxtin hualasi ca nehual, yehuanten pa mochi lali niquinlaneltocaltis pa nechtocasi.

<sup>33</sup> Inon Jesús quilic, pa yoje quimatasi quinami yahuiaya miqi. <sup>34</sup> Pampín, innojen míac lacames quinnanquilije:

—Quinami techmomaxtililo len quijtúa ilajtol Dios hual quilic Moisés, tijcaquilo quinami quijtúa pampa in Cristo mocahua yultica huan amo quiman miquis. ¿Quinami huil titechilia monequi pa yes la'ajcoquili pa quimictisi yihual hual cataya inahuac Dios, hual Dios quitilanic pin laticpan? ¿Aqui unca in ilacal in cielo?

<sup>35</sup> Jesús quinmilic:

—Jan nadita san nicayas ca amhuanten, nehual hual niqinami lahuilisli pa annimitzlahuis pan Dios iojli. Xiyén quinami yehuanten hual quimatilo nejnemilo pan se ojli mopalejticate ca in lahuilisli. Xicchihuacan inon pa yoje amo anmitzajsis in laticumactilisli. Pampa yihual hual nejnemía capa laticumac amo quimati ca capic yahui. <sup>36</sup> Axan anquipía Dios ilahuilisli, inon hual annimitzilia. Xicneltocacan, pa yoje anmochías Dios ixolomes anquipixtica Dios ilahuilisli lajtite amhuanten anmoyolo.

Quinmilic Jesús innojen lajtomes, huan cuaquinon moxiluc inminlaixpan yehuanten, quinmolatilic.

*In unca leca in judíos amo quineltocaje Jesús*

<sup>37</sup> Huan mas que yihual quinchíac inminlaixpan miac lachihualisli hual lanextiloaya quinami yihual neli quipiaya in hual iyaxca Dios, ma yoje amo quineltocaloaya. <sup>38</sup> Amo quineltocaloaya pa yoje panus quinami quijtuc inminahuac yehuanten Dios ilajtuni itocac Isaías. Yoje unca lajcuiluli quinami yihual quijtuc:

Tata, amaqui quineltocac len ticlamachiltijque.

Huan amo unca amaqui hual cataya lanextili quinami unca hué Dios ilahuelilitilisli.

<sup>39</sup> Pampa inon amo huil quineltocaloaya, pampa ca oc se lajtol pa iamal Isaías quijtuc:

<sup>40</sup> Unca quinami Dios quinpachacaruc inmixtololojmes huan quinchihuilic pa camo huil quimatisi len Dios quinequi.

Dios quinchihuilic yoje pa yoje yes quinami amo quitasi ca inmixtololojmes, quinchihuilic pa yoje amo quimatisi pa inminyolo,

quinchihuilic pa yoje amo quimatisi len quinequi quijtúa pa inminyolo,

quinchihuilic pa yoje amo mopalasi quinami amo quineltocaloaya,

pampa sinda mopalaloaya, cuaquinon niqinquixtiaya, quilía in Tata, pa inminpolehuilisli.

<sup>41</sup> Innojen lajtomes quijtuc Isaías pampa yihual quitac Cristo ca mochi ilaixpelalisli chicahuac, huan pampa inon Isaías quijtuc quinami quitac Cristo. <sup>42</sup> Huan quema, miac ca in huejueyenten judíos quineltocaje Cristo.

Ma yoje, momajtije inminlaixpan in fariseos, huan pampín amo quililoaya pampa quema, quineltocaje. Sinda quililoaya yoje, cuaquín in fariseos quinquixtiloaya mochi hual inminyaxca pa quichihualosquiaya pin tiopan hué. Yoje yajmo huil calaquiloaya pa se tiopan, huan yoje in miac judíos molaliloaya inminpan. <sup>43</sup> Amo quinequiloaya cayalo laquixtili pa camo huil calaquilosquiaya in tiopan hué, pampa quixtocaloaya miac pa lacames lajtulosquiaya cuali inminahuac yehuanten. Pa yehuanten, amo monetzaya pa Dios lajtusquiaya cuali inminahuac.

*Jesús ilajtomes quinmotexpahuililo in lacames pa yoje yesi latojtocali ilaixpan Dios*

<sup>44</sup> Latzajtzilic Jesús, quilic:

—Aqui hual nechneltoca amo nechneltoca nehual. Quema, quineltoca yihual hual nechtilanic. <sup>45</sup> Huan aqui hual nechita, yihual quixtica aqui hual

nechtilanic. <sup>46</sup> Nihualaya quinami se lahuilislí pin lalticpan, pa yoje aquí yes nechnehtoca amo yulis quinami se hual nejnemía capa laticumac. <sup>47</sup> Huan sinda aquí lacal yes quicaquí len niqijtúa, huan amo quineltoca, cuaquí nel amo nicmacas íojli. Amo nihualaya pa niquinmacas ojli yehuanten pin lalticpan. Nihualaya pa niqinquixtis pa inminpohuilislí. <sup>48</sup> Aquí hual nejcíca huan amo quineltoca in hual niqijtúa, yihual quipía in hual quimotexpahuilislí. Yes in lajtol hual niqijtuc. Pan ipampa in, yihual yes lajtotocali pa camo cayas ilaixpan Dios. Pohuis pan tonalí quiman lamis in lalticpan hual axan unca, huan amo quiman mocuepas. <sup>49</sup> Yoje yes lajtotocali pa camo cayas iyampa Dios pampa amo niqijtuc nindenó hual nehual nohuán niqijtuc pa noyolo. Cataya Dios noTajtzin hual nechtilanic, yihual nechmacac lajtol. Ca in niqijtúa huan ca in annimitzilí. <sup>50</sup> Huan nicmati ilajtol unca pa nel annimitzlamachiltis huan pa annimitznextilis quinami huil anquipía iyulislí hual amo quiman lamis. Huan innojen lajtomes hual niqijtúa cate innojen jan quinami Dios in Tata nechilic, huan jan yoje niquinmilí.

## 13

### *Jesús quinmaltíla inmicxihuaimes imonextilinjmes*

<sup>1</sup> Ayamo ajsiaya itonali in fiesta (ilhuil) pascua huan Jesús quimatiaya pampa cataya in tonalí capa yes lamictilí. Quimatic pampa yahuiaya quisa pa in lalticpan pa mocuepas capa Dios iTajtzin. Amo mochahuaya pa quinnequis yehuanten hual iyaxca huan quinnequiaya ca mochi iyolo. Yoje, quiman calaquic in tonalí, mochijchihualoaya pa lacualosquiaya.

<sup>2-4</sup> Satanás calaquic pa iyolo Judas Iscariote, ixolol Simón. Yoje yihual yahuiaya quitemaca Jesús ca yehuanten hual yahuiloaya quitlanilo pa quimictilosquiaya. Jesús quimatiaya quinami Dios iTajtzin quimacac yihual Jesús lahuiltilislí pa mochi. Quimatic quinami yihual cayac capa Dios huan umpa hualac pan lalticpan. Huan axan yahuiaya mocuepa capa Dios. Yoje, quiman lamije quicuaje ilacualislí in pascua, moquetzac Jesús, moquixtilic inahuas huan canac se tzotzomajli calica mohuactía se, huan ca inon mocuejtic. <sup>5</sup> Cuaquimon quitoyahuac al pa se xicali hué huan pehuac quinpaquic icxihuaimes imonextilinjmes huan quinhuactic ca in tzotzomajli calica mocuejtic. <sup>6</sup> Ajsic capa Simón Pedro, hual quilic:

—Tata, ¿tía tichpaquilí nehual nocxihuaimes?

<sup>7</sup> Jesús quinanquilic:

—Ayamo ticmati leca nehual nimijchihuilitica inon. Ma yoje, ca jan nadita ticmatis.

<sup>8</sup> Pedro quilic:

—Amo quiman tichpaquilis nocxihuaimes.

Jesús quinanquilic:

—Sinda amo nimitzpaquilis, cuaquí amo huil tiyes nomonextilini.

<sup>9</sup> Simón Pedro quilic:

—Tata, amo jan nocxihuaimes san. Noje xichpaquili nomajmajuan huan notzontecon.

<sup>10</sup> Jesús quilic:

—Aquí hual unca la'altíli amo monequi pa matis pa mochi icuerpo, jan pa icxihuaimes san, pampa axan yihual unca mochi chipahuac. Amhuanten anunca chipahuac, ma yoje amo anmoxtin.

<sup>11</sup> Jesús quimatic aquí yahuiaya quitemaca ca yehuanten hual yahuiloaya quimictilo. Pampín quinmilic: “Amo anunca chipahuac anmoxtin.”

<sup>12</sup> Quimpaquilic inmicxihuaimes huan umpa molaquentic ca inahuas. Cuaquín molalic huan quinmilic:

—¿Anquimati in hual nilamic annimijchihuilic? <sup>13</sup> Annehtocayaltía Lamaxtini huan Tata. Huan yoje annehtocayaltía cuali, pampa nehual, quema, nilamaxtini huan niTata. <sup>14</sup> Huan mas que nehual niunca Tata huan Lamaxtini, ma yoje annimitzpaquilic anmoxcixuaimes. Pampín, sinda annimijchihuilic yoje, monequi pa amhuanten anquinaquilis anmoxcixuaimes se huan oc se. Nicnequi niqijtúa, monequi pa amhuanten anmotequipanuilis quinami tequipanujquimes moxtin oc sequin ca amhuanten. <sup>15</sup> Unca pampa axan annimitznexilic ca in lachihualisli quinami monequi pa anquichías yoje jan quinami nel annimijchihuilic. <sup>16</sup> Neli, neli annimitzilía inon: Se tequipanujquil amo unca hué quinami iteco unca hué. Huan aquí hual unca latilanili amo unca hué quinami unca hué aquí quitilanic. <sup>17</sup> Anquimati inon. Sinda anyulis quinami quijtulo in lajtomés, yoje anyulis ca paquilisli.

<sup>18</sup> Amo nilaqueztica anmonahuac anmoxtin. Nehual nicmati aquinojen niqinlajtultic. Huan unca se hual niclajtultic hual unca ca tehuanten pa yoje panus quinami quijtúa Dios ilajtol lajcuiluli, quijtúa: “Yihual hual huan nehual tilacuaje, unca quinami nechlaxilic mas que tiyeje quinami icnían.”

<sup>19</sup> Ca nican mosta annimitzilijtica in hual yahui panúa mas que ayamo panuc, pa yoje pa in tonali quiman panus, cuaquín anquineltocas nehual in se hual yoje quitilanic. <sup>20</sup> Neli, neli annimitzilía, aquí hual quimosehuilía aquí yes nictilanis, unca quinami yihual nechnamiqui cuali nehual. Huan aquí hual nechnamiqui cuali, neli unca quinami quinamictica cuali yihual hual nechtilanic.

*Jesús quinmachiltía pampa Judas yahui quitemaca ca yehuanten hual quimictisi*

(Mt. 26:20-25; Mr. 14:17-21; Lc. 22:21-23)

<sup>21</sup> Lamic lajtuc Jesús yoje, quitzintecuac pa iyolo huan lajtuc pa huil quicaquisi cuali, quinmilijtica:

—Neli, neli annimitzilía, se ca amhuanten yahui nechtemaca ca yehuanten hual yalo nechmictilo.

<sup>22</sup> Moitaloaya imonextilinjmes se ca oc se, quimahuilijtataloaya de aquí quilaquetziliaya. <sup>23</sup> Cataya inahuac Jesús se imonextilini huilantataya pa Jesús ilaixpan ihuajcol. (Pa yina yoje lacuanijme huilantataloaya yehuanten inahuac inon capa lacuanijme.) Huan Jesús quinequiaya in monextilini.

<sup>24</sup> Cuaquín Simón Pedro quilamachiltic ca ima in monextilini pa quilajlanisquiaya Jesús aquí yahuiaya quitemaca. <sup>25</sup> Huan huilantiqisac in monextilini pani Jesús ilaixpan huan quilic:

—Tata, ¿aquí yihual hual yahui mitztemaca?

<sup>26</sup> Jesús quinanguilic:

—Yihual unca hual nía nicpulactilía in pan huan nía nicmaca.

Quipulactic ilajco in pan pin tapalquita, quimacac Judas ixolol Simón Iscariote. <sup>27</sup> Canac Judas in pan, cuaquinon Satanás calaquic pa iyolo, quiquitzquic. Cuaquín Jesús quilic Judas:

—Xicchía jan ajnaxcan in hual tía ticchía.

<sup>28</sup> Ca yehuanten hual cataloaya nepa lacuajtataloaya, amo cataya se hual quimatiaya leca Jesús quilic inon. <sup>29</sup> Sequin quijtuje cataya pampa quiapiaya Judas in tomin, huan pampín Jesús quilijtataya pa quincuhuas innojen hual yahuiloaya quinequilo pa in fiesta (ilhuil). O quijtuje pampa quilijtataya pa

quimacas len yehuanten hual amo quipialoaya nindeno. <sup>30</sup>Yoje, canac Judas ilajco in pan, uyajtiquisac. Cataya layúa.

*In lajtol yancuic hual monequi pa quineltocasi*

<sup>31</sup>Quiman quisac Judas, Jesús quinmilic:

—Axan, nehual ilacal in cielo niyes lachihuali niman hué. Huan Dios yes lachihuali hué pan nopampa. <sup>32</sup>Huan pampa Dios yes lachihuali niman hué pan nopampa, noje yihual nejchías nel niman hué pan ipampa yihual. Nicayas jan quinami yihual Dios. <sup>33</sup>Nitos, jan nadita nicayas ca amhuanten. Annechtemus, huan ma yoje, quinami niquinmilic in huejueyenten judíos, yoje axan annimitzilijtica, ca capic nías, amo huil anyas amhuanten. <sup>34</sup>Annimitzilijtica se lajtol yancuic, unca inon: Ximolasojlacan se huan oc se. Jan quinami nehual annimitzlasojlac, noje amhuanten ximolasojlacan. <sup>35</sup>Pan ipampa inon, moxtin quimatisi amhuanten anunca nomonextilini-jmes, sinda anmolasojlac se huan oc se.

*Jesús quíla Pedro pampa yahui quijtúa pampa amo quiximati*  
(Mt. 26:31-35; Mr. 14:27-31; Lc. 22:31-34)

<sup>36</sup>Simón Pedro quilic:

—Tata, ¿ca capic tía?

Jesús quinanquilic:

—Amo huil tichtoca axan ca capic nía. Ma yoje, tichtocas innojen tonalimes hual ajsitihualalo.

<sup>37</sup>Pedro quilic:

—Tata, ¿leca amo huil nimitztoca axan in layúa? Nimiquisquiaya ca tehual.

<sup>38</sup>Quinanquilic Jesús:

—¿Timiquisquiaya ca nehual? Neli, neli annimitzilía, tehual axan in layúa tía tiquilía ca ye lajtulisli pampa amo tichiximati, huan inon tía tiquilía quiman ayamo xahuanis in gallo.

## 14

*Jesús yihual in ojli hual techhuicas ca toTajtzin Dios*

<sup>1</sup>Ma camo anmitzcocu anmoyolo. Anquineltoca Dios, xichneltocacan nehual noje. <sup>2</sup>Pin cielo capa chanti noTajtzin cate míac calimes capa chantisi yehuanten hual nechlasojlalo. Sinda amo cataya yoje pin cielo, cuaquín amo annimitziliaya quinami nía ca ompic pa annimijchijchihuilis capa ancayas. <sup>3</sup>Huan sinda nías pa annimijchijchihuilis capa ancayas, cuaquín nihualas oc sejpga pa annimitzanas, pa yoje ancayas amhuanten capa nehual niunca. <sup>4</sup>Huan anquimati ca capic nía huan in ojli anquimati.

<sup>5</sup>Tomás quilic:

—Tata, amo ticmatilo ca capic tía. ¿Quinami ticmatisi in ojli?

<sup>6</sup>Quinanquilic Jesús:

—Nehual in ojli hual lahuica capa Dios, amo unca oc se. Nehual niaqui hual niquiqtúa mochi hual unca melahuac inahuac Dios. Huan nehual niunca in yulilislisli, nicnequi niquiqtúa nehual nicmaca moxtin Dios iyulilislisli. Amaqui huil ajsis capa Dios sinda amo ajsis pan nopampa nel. <sup>7</sup>Sinda annechiximatiaya nehual, noje anquiximatiaya Dios noTajtzin. Quiman anpehuac annechtocac pa axan, annechiximatijtica. Yoje anquiximatis Dios noTajtzin noje. Ca nican mosta anquiximati huan yihual anquitac.

<sup>8</sup>Felipe quilic:

—Tata, xitechnextili Dios toTajtzin, ja in san ticnequilo.

<sup>9</sup> Jesús quílic:

—Míac tonalijmes niunca ca amhuanten huan ma yoje ¿ayamo tichiximati, Felipe? Aquí hual nechitac nel, yihual noje quitac Dios noTajtzin. ¿Quinami tichilía pa annimitznextilis Dios noTajtzin? <sup>10</sup> ¿Amo ticlalijtica molaneltocalisli ca in lajtol hual mitznextilía quinami nehual niunca ca Dios noTajtzin huan Dios noTajtzin unca laijtic nehual? Innojen lajtomes hual annimitzilijtica amo niqijitutica ca nolajnamiquilis nehual nohuían. Unca Dios noTajtzin hual unca laijtic nehual, huan yihual tequipanujtica pan nopampa. <sup>11</sup> Xichneltocacan quiman annimitzilía quinami nehual niunca ca Dios noTajtzin huan Dios noTajtzin unca laijtic nehual. O, sinda amo anquineltoaca inon, xichneltocacan pan ipampa innojen hual niqinchíac hual quínextiliaya quinami nehual nicpía Dios ilahuelilitlisli. <sup>12</sup> Neli, neli annimitzilía inon: Aquí hual nechneltoaca, yihual quinchías noje innojen huejué hual nehual niqinchía. Quema, huan quinchías lachihualisli hual cayasi niman huejué hual innojen hual niqinchíac amo yeje yoje huejué. Huil quinchías pampa nehual nías capa unca Dios noTajtzin. <sup>13</sup> Huan len yes pan ipampa notoca ilahuelilitlisli anquilajlanis hual nel niqitaca cuali, cuaquinon annimijchihuilis, pa yoje pan nopampa nel lacames quitasi Dios noTajtzin niman hué. <sup>14</sup> Quema, sinda anquilajlanis len yes pan ipampa notoca ilahuelilitlisli, cuaquin annimijchihuilis inon.

### *Jesús quijtúa neli pampa yahui techtilanilía in Espíritu Santo*

<sup>15</sup> Sinda anechlasojla, anquinchías quinami quijtulo nolajtomes. <sup>16</sup> Huan niclajlanis Dios noTajtzin huan yihual annitzilanilis oc se, pa yihual amo quiman anmitzcajcahuas amhuanten. Annimijchicahuatis huan annitzaicanas, yihual yes annolapalehuini. <sup>17</sup> Yihual in Espíritu Santo. Mochi hual yihual quijtúa unca melahuac. Yehuanten pin lalticpan quixtocalo yulilo quinami Satanás quínextilía. Yoje amo huil canaló in Espíritu Santo, pampa amo quitalo huan amo huil quiximatilo. Ma yoje, amhuanten anquiximatis, pampa yihual mocahuas chantitica ca amhuanten huan cayas laijtic amhuanten anmoyolo. <sup>18</sup> No, amo nía annimitzcajcahua quinami xolomes hual amo quipialo inmintajtzitzián. Nimocuepas nihualas ca amhuanten. <sup>19</sup> Jan nadita san huan yehuanten pin lalticpan yajmo nechitasi. Ma yoje, amhuanten anechitas pampa niyulis. Huan pampa niyuli, amhuanten noje anyulis. <sup>20</sup> Pa in tonali quiman niyulis oc sepa, anquimatis quinami nehual niunca ca laijtic Dios noTajtzin huan amhuanten anunca ca laijtic nehual huan nehual niunca ca laijtic amhuanten. <sup>21</sup> Aquí hual quimati nolajtomes huan yas yultica quinami quijtulo, yoje yihual unca se hual yas nechlasojlatica. Huan aquí hual nechlasojla, yoje noTajtzin quilasojlas, huan nehual niclasojlas huan nicmonextilis yihual.

<sup>22</sup> Cataya oc se imonextilini itocaya Judas, yihual amo Judas Iscariote, quílic:

—Tata, ¿quinami panúa pa tehual titechmonextilis tehuanten huan amo tía tiquinmonextilía yehuanten oc sequin pin lalticpan?

<sup>23</sup> Jesús quinanguílic:

—Sinda se lacal nechlasojla, yihual yulis ca se lajtulisli ca nehual nolajtol hual niqijitúa. Huan Dios noTajtzin quilasojlas yihual huan tehuanten tihualasi capa yihual huan tichantisi laijtic iyolo. <sup>24</sup> Aquí hual amo nechlasojla amo yuli ca se lajtulisli ca nel nolajtol hual niqijitúa. Huan in lajtol hual anquicaquic quiman nehual annimitzilic amo unca nehual nolajtol. Unca



ilajtol Dios noTajtzin hual nechtilanic ca niquic. <sup>25</sup> Innojen lajtomes annimitzilic pin tonalijmes quiman nicataya niyultataya ca amhuanten. <sup>26</sup> Ma yoje, hualas in Lalacahualtini hual annimijchicahualtis huan annimtzlaicanas, yihual in Espírítu Santo. Huan Dios noTajtzin quitlanis pan ipampa ilahuelilitlisli notoca nehual. Yihual in Espírítu Santo annimtzmaxtis mochi, huan annimtzlajnamiquiltis mochi hual annimitzilic. <sup>27</sup> Annimtzcahua anquinpictica mosehuilislisli huan laneltocalislisli, huan inon amo cayas quinami in mosehuilislisli huan laneltocalislisli hual anquinpias sinda anyuliaya quinami quijitulo yehuanten pin lalticpan. Amo huejcahua in mosehuilislisli huan laneltocalislisli hual iyaxca in lalticpan. Pampín, ma como annimtzcocu amoyolo, noje ma como momajti. <sup>28</sup> Annechcaquic annimitzilic nía nimohuica huan nimocuepas nihualas ca amhuanten. Sinda annechlasojlaya, anquipiaya paquilislisli, pampa nía ca capic Dios noTajtzin, pampa Dios noTajtzin yihual unca niman hué huan nehual amo yoje hué. <sup>29</sup> Axan annimitzilic quiman ayamo panúa, pa yoje quiman panus, amhuanten anquineltoacas.

<sup>30</sup> Yajmo nilaquetzas míac ca amhuanten, pampa huala Satanás, yihual aqúi lahuelitlía pa moxtin hual amo Dios ilacemas. Ma yoje, amo quipía lahuelitlislisli nindeno ca nehual. <sup>31</sup> Inon nechpanujtica pa yoje quimatisi yehuanten pin lalticpan quinami nehual niclasojla Dios noTajtzin. Huan quinami yihual noTajtzin nechmacac lajtol, jan yoje nicchía. Ximoquetzacan, ma tiquisacan pa quiahuac nican.

## 15

### *Ipacholi uva huan itzmolinilisi*

<sup>1</sup> Nehual niquinami icuajmecal uva neli hual Dios quitocac. Huan Dios noTajtzin, yihual quinami iteco icuajmecal uva hual quiztía pa quichijchías.

<sup>2</sup> Mochi hual itzmolinía ca nehual in icuajmecal uva, Dios quicotona sinda amo quilalía laquilyo. Huan mochi hual itzmolinía hual quema quilalía laquilyo, iteco quichipahua, quipujpuhua pa yoje quilalis míac laquilyo.

<sup>3</sup> Axan amhuanten anunca chipahuac pan ipampa in lajtol hual annimitzilic.

<sup>4</sup> Xicayacan anyultica ca nehual annimtzlanextilijtica amhuanten. Huan xichmacahuiltican pa nehual nicayas niyultica lajitic amhuanten. Se itzmolinquil amo huil quilalía laquilyo ihuían sinda amo mocahua ca in icuajmecal uva. Huan jan yoje, amhuanten amo huil anquichía nindeno hual Dios quita cuali sinda amo ancayas anyultica ca nehual annimtzlanextilijtica.

<sup>5</sup> Nehual niquinami in icuajmecal uva, huan amhuanten in itzmolinquimes. Aqúi hual caya yultica ca nehual niclanextilijtica huan jan yoje nechmacahuiltía pa niyulis lajitic yihual, yoje yihual quichías míac hual Dios quita cuali, yes quinami in icuajmecal uva hual quilalía míac laquilyo. Pampa sinda nehual amo niyultica lajitic amhuanten annimtzlanextilijtica, amhuanten amo huil anquichía nindeno hual Dios quita cuali. <sup>6</sup> Huan sinda se lacal amo yuli ca nehual niclanextilijtica, yihual yes quinami se itzmolinquil hual huaqui. Quicotonalo huan quilasalo. Quema, quinechiculo huan quilasalo pin tixuxli huan quichichinulo.

<sup>7</sup> Sinda anyuli ca nehual annimtzlanextilijtica huan sinda anyultía ca nel nolajtomes, cuaquín xiclajlanican Dios len yes anquinequi, huan yihual annimjihuilis. <sup>8</sup> Sinda anquichía míac hual quita cuali Dios noTajtzin, cuaquín ancayas quinami se icuajmecal uva hual laqui míac. Huan yoje yesi lajtuli lajtomes niman hué inahuac Dios noTajtzin. Yoje anyes nomonextilinjmes. <sup>9</sup> Jan quinami Dios noTajtzin nechlasojlaya, jan yoje

annimitzlasojlaya. Xiyulican annechlasojlatica. <sup>10</sup> Sinda ancayas anyultica ca nehual nolajfomes, yoje anyulis annechlasojlatica. Ancayas jan quinami nehual. Niyuli ca yihual Dios noTajtzin ilajfomes huan niyuli niclasojlatica.

<sup>11</sup> Innojen lajtomes annimitzalic pa yoje anquipías in paquilisli hual nel nicpia huan pa yoje anmopaquilisli yes miac huan pa anyulis antentica ca niman miac paquilisli. <sup>12</sup> Inon nolajtol: Nicnequi pa amhuanten anmolasoilas jan quinami nehual amo nimocahua pa annimitzlasojlas. <sup>13</sup> Sinda se miqui pa yehuanten hual quinlasojla pa yoje yehuanten mocahuasi yulticate, cuaquín amo unca oc se lasojlalisli hué quinami inon. <sup>14</sup> Amhuanten anunca yehuanten hual niquinlasojla sinda anyuli anquichijtica quinami quijtulo innojen lajtomes hual annimitzilia. <sup>15</sup> Yajmo annimitzilia amhuanten anunca notequipanujquimes, pampa amo quimati je tequipanujquil leca quichía iteco len yes quichía. Axcán, annimitzilia amhuanten anunca hual annimitzlasojla pampa annimitzlamachiltic mochi hual nijcaquic nechilic Dios noTajtzin. <sup>16</sup> Amhuanten amo anquilalic pa anmochías nomonextilinjimes. Cataya pampa nehual annimitzljaltultic amhuanten. Huan annimitzljaltultic pa anyulis anquinmantica lacames pa nechnehtocasi huan pa anquitequipanuilis Dios ca mochi hual unca quinami yihual quita cuali. Yoje anyes quinami icuajmecal uva hual quilalía ilaquilyo hual amo lamis huejahuas, pampa yehuanten hual nechnehtocalo yalo yulilo ca nehual. Noje annimitzljaltultic pa yoje Dios noTajtzin annitzmecas len yes anquilajlanis pan ipampa notoca ilahuelilitlisli. <sup>17</sup> Inon annimitzlijitica pa anquichías, pa yoje anmolasoilas se huan oc se.

*Yehuanten pin lalticpan quincocolilo Jesús huan yehuanten hual quinel-tocalo*

<sup>18</sup> Sinda yehuanten pin lalticpan amo quinequilo annitizalo, cuaquinon anquimati pampa yehuanten amo quinequiloaya nechitalo nehual nepa capa ayamo pehuaje anmitzcocolije amhuanten. <sup>19</sup> Sinda ancataya quinami yehuanten pin lalticpan hual amo nechnehtocalo, cuaquín yehuanten anitizaloaya lajlasojli lacames ca yehuanten, pampa anyesquiaya quinami yehuanten. Ma yoje, amhuanten amo inminyaxca yehuanten pin lalticpan hual amo nechnehtocalo. Nehual annimitzljaltultic pa anquincahuas yehuanten. Yoje amo quinequilo annitizalo. <sup>20</sup> Xiquijnamiquican in hual annimitzalic: “Se tequipanujquil san huil ajsis yes hué quinami iteco unca hué. Amo huil quipanahuía yoje in hué hual unca iteco.” Pampín, quinami nejchihuiliye nehual anmoteco, yoje annijchihuilisi. Nechtojtocaje pa nejchihuillosquiaya tetzcuinuc. Noje annitiztocasi pa annijchihuilisi tetzcuinuc. Sinda yuliloaya ca nel nolajtol hual niquijtúa, cuaquín yulisi ca amhuanten anmolajtol hual anquijtúa, pampa anquijtúa jan quinami nehual. <sup>21</sup> Huan mochi inon annijchihuilisi pampa annechnehtoca, pampa amo quiximatilo Dios hual nechtilanic.

<sup>22</sup> Sinda amo nihualaya pa nilajtusquiaya ca yehuanten, yoje amo quipialoaya laijlaculisli. Huan axan amo huil mocahualo amo quipixticate laijlaculisli pampa nihualac huan ma yoje amo nechnehtocalo. Inon inminlajlaculisli. <sup>23</sup> Aquí hual nechcocolía, yihual noje quicocolía Dios noTajtzin. <sup>24</sup> Sinda nehual amo niquinchihuaya capa yehuanten innojen hual amo quiman quinchihuaya oc se, cuaquín yehuanten amo quipialoaya laijlaculisli. Axan quinmitaje len niquinchíac, huan yoje quimatije pampa neli nicpia ilahuelilitlisli noTajtzin. Yihual quinchía innojen pan nopampa. Ma yoje amo mocahualo pa nechcocolisi nehual huan amo mocahualo pa quicocolisi Dios noTajtzin. <sup>25</sup> Huan inon panujtica pa yoje panus mochi

quinami unca lajcuiluli pa yehuanten inminlajtol hual noje unca Dios ilajtol, quijtúa: “Yehuanten amo mocahuaje pa nechcocolisi, mas que amo cataya nindeno calica huil nechmotexpahuilije.”

<sup>26</sup> Ma yoje, amo huejcahuas pa hualas in Lalacahualtini hual anmitzlaicanas huan annijchihualtis. Yihual annimitztilanis pa quisas capa unca Dios noTajtzin. Yihual in Espiritu hual jan quijtúa len melahuac san. Yihual quisa capa unca noTajtzin Dios. In tonali hual yihual hualas, yihual lajtus neli nonahuac nehual. <sup>27</sup> Huan amhuanten anlajtus neli nonahuac nehual pampa ca nehual anunca amhuanten quiman nipehuaya nicchía Dios itequipanulisli huan pa axan.

## 16

<sup>1</sup> Innojen lajtomes annimitzilic pa yoje amo anmocahuas pa annechneltocas pa in tonalijmes hual annijchihuilisli amo cuali pampa annechneltoca. <sup>2</sup> Anmitzquixtisi pin tiopajmes. Quema, huan ajsis in tonali hual aqui yes anmitzmicis quijtus yihual quichijtica len lachihualisli pa Dios. <sup>3</sup> Huan quinchihuasi innojen pampa amo quiman quiximatic Dios noTajtzin huan amo quiman nechiximatic nehual. <sup>4</sup> Ma yoje, annimitzilic innojen lajtomes, pa yoje pa in tonalijmes hual ajsisi, huan anmitzpanus inon, cuaquín anquinnijnamiquis quinami annimitzilic. Unca inon hual quichía in Espiritu Santo.

<sup>5</sup> Quipía míac tonalijmes quiman nipehuac annimitzilic nolajtomes. An-nimitzmaxtiti hualac, axan nican ticate, huan ayamo annimitzilic innojen lajtomes hual axan annimitzilijtica. Amo annimitzilic pampa mojmosta nicataya ca amhuanten. <sup>6</sup> Axan nía ca capic unca yihual hual nechtilanic, huan ma yoje, amo unca se ca amhuanten hual nechlajlanía, quil, ¿ca capic tía? <sup>7</sup> Huan anmitzcocúa míac anmoyolo pampa annimitzilic innojen lajtomes. <sup>8</sup> Ma yoje, annimitzilía neli pampa unca cuali pa amhuanten pa nimohuicas. Sínda amo nimohuicas, cuaquinon amo hualas ca amhuanten in Lalacahualtini. Yoje, in tonali hual nimohuicas, nictlanis in Lalacahualtini pa amhuanten. <sup>9</sup> Huan yihual, in tonali hual hualas, quinnextilis chichahuac yehuanten pin lalticpan quinami yehuanten cate laijlaculi, quinnextilis chichahuac yehuanten inahuac nomelahualisli, huan quinnextilis chichahuac quinami Dios neli yahui quitojtoca ilaixpan yihual yehuanten hual yulilo quichijtica in hual amo cuali. <sup>10</sup> Quinnextilis yehuanten cate laijlaculi pan ipampa quinami amo nechneltocono. <sup>11</sup> Quinnextilis pampa nehual nimelahuac pan ipampa quinami nehual nías ca Dios noTajtzin huan yajmo annechitas, mas que nehual nicayas nicchijtica mochi quinami Dios noTajtzin quixtoca. <sup>12</sup> Quinnextilis quinami Dios neli yahui quitojtoca ilaixpan yihual yehuanten hual amo yulilo cuali, pan ipampa quinami axan quitojtocac ilaixpan yihual Satanás in lili. Yihual in hué pin lalticpan hual huelitía pan yehuanten hual amo Dios ilacemes.

<sup>13</sup> Ni quinpía míac lajtomes pa annimitzilis hual ayamo huil anquimati len quinequilo quijtulo pampa cate lajtomes ej'etic. <sup>14</sup> Ma yoje, in tonali hual hualas yihual in Espiritu hual quijtúa mochi hual unca melahuac, cuaquín yihual anmitznextilis mochi hual unca melahuac inahuac Dios. Huil quichía inon, pampa amo yahui lajtúa pan ipampa yihual ihuán. Cayas len yes quicaquis Dios quijtus, inon yihual quijtus. Huan anmitzlaquetzilis ca lajtol hual moxtin quimatisi len quinequi quijtúa, anmitzlaquetzilis inminahuac mochi innojen hual yahuillo panulo. <sup>15</sup> Annejchías niman hué pampa yihual canas len ni quijtúa huan anmitznextilis len quinequi quijtúa. <sup>16</sup> Mochi hual

Dios noTajtzin quipía, xicmatican pampa in noyaxca. Yoje, annimitzilic pampa yihual in Espíritu Santo cana in hual niquijtúa huan yihual anmitzilis len quinequi quijtúa.

*Inmicnotilisli mopalas pa mochías paquilisli*

<sup>16</sup> Jan nadita san huan yajmo anechitas. Huan cuaquín jan nadita san huan oc sejpa anechitas, pampa nías ca capic unca in Tajtzin.

<sup>17</sup> Sequin ca imonextilinjmes moilije se ca oc se:

—¿Len quinequi quijtúa inon hual techilijtica? Techilía: “Jan nadita san huan amo anechitas. Huan cuaquín anechitas oc sejpa quiman panus jan nadita san.” Huan noje techilía unca pampa yihual yahui ca capic Dios in Tajtzin. <sup>18</sup> ¿Len inon hual techilía: “Jan nadita san?” Amo ticmatilo len quinequi quijtúa.

<sup>19</sup> Jesús quimatic lajitic yihual quinami yehuanten quinequiloaya quila-lanilo inahuac inon hual quinmilijtataya, huan quinmilic:

—¿Anmolajlantica amhuanten inahuac inon hual annimitzilic: “Jan nadita san huan yajmo anechitas huan cuaquín jan nadita san huan anechitas oc sejpa?” <sup>20</sup> Neli, neli annimitzilía, anchocas huan anlaquetzas inahuac quinami anmitzcocúa anmoyolo. Huan yehuanten hual yulilo pin lalticpan huan amo quineltocalo Dios, jan quinami quinequi Satanás hual huelitía pin lalticpan, yehuanten quipias paquilisli. Quemá, amhuanten anmitzcocus anmoyolo. Ma yoje, amo anmocahuas yoje. Anmopalas huan anquipías míac paquilisli. <sup>21</sup> Quiman yes se sihual lalacatiltía, mococúa pampa ajsic in tonali pa lalacatiltis. Ma yoje, quiman lacatic in xól, cuaquín in sihual yajmo quijnamiquia mochi in laccoltilisli. Axan paqui míac pa iyolo pampa lacatic se xól pin lalticpan. <sup>22</sup> Huan amhuanten axan anquipía icnotilisli. Ma yoje, annimitzitas oc sejpa huan ancayas anquipixtica míac paquilisli pa anmoyolo. Huan amaqui huil anmitzquixtilía anmopaquilisli.

<sup>23</sup> Pan in tonali amo anquipías pa annechajlanis nindeno inahuac ca capic nía, quinami axan annechajlanic, pampa pan in tonali anquimatis. Neli, neli annimitzilía, sinda anquilajlanis Dios noTajtzin len yes, yihual anmitzmacas pa ipampa notoca ilahueliltilisli. <sup>24</sup> Pa mochi tonalijmes hual nicayac ca amhuanten, ayamo anquilajlanic nindeno pan ipampa notoca ilahueliltilisli. Axan xiclajlanican huan anquipías pa yoje ancayas ca niman míac paquilisli.

*Jesucristo quinsulahua yehuanten pin lalticpan*

<sup>25</sup> Innojen lajtomes annimitzilic ca lajtol hual amo anquimati len quinequi quijtúa. Ajsic in tonali hual yajmo annimitzilic len ca lajtol hual amo anquimati. San annimitzlaquetzilic inahuac Dios noTajtzin ca lajtol hual anquimatis neli len quinequi quijtúa. <sup>26</sup> In tonali anlajlanis pan ipampa notoca ilahueliltilisli. Huan amo annimitzilijtica pampa nía niclajlanía Dios noTajtzin pa yihual anmitzmacas len anquilajlanis. Amo monequis pa nicchías yoje. <sup>27</sup> Inon unca pampa yihual Dios noTajtzin anmitzlasojla. Anmitzlasojla pampa amhuanten annechlasojla huan amo anmocahua pa anquineltocas quinami nehual niquisac nepa capa unca Dios noTajtzin. <sup>28</sup> Niquisac pa in cielo capa ticataloaya huan Dios noTajtzin, huan nihualac pin lalticpan, nican niunca. Axan nijcahua in lalticpan huan nimocuepas ca capic Dios noTajtzin.

<sup>29</sup> Imonextilinjmes quilije:

—Xiquita, axan tilaqueztica ca lajtol hual ticmatilo len quinequi quijtúa. Amo tilajtutica ca lajtol hual amo ticmatilo. <sup>30</sup> Axan ticmatilo tehual ticmati mochi, huan amo monequi pa se mitztlajlanis len, pampa ticmati len yes quinequi mitztlajlanía quiman ayamo mitztlajlanic. Pan ipampa inon, ticnel-tocalo tehual tiquisac pin cielo nepa capa mitztilanic Dios.

<sup>31</sup> Jesús quinnanquilic:

—¿Axan anlaneltoqa? <sup>32</sup> Xiquitacan. Ajsitica, quema, axan ajsic in tonali hual ancayas lasemanali mochi sejse pa ichan, annehcahuas nohuían. Ma yoje amo niunca nohuían, pampa unca ca nehual Dios noTajtzin.

<sup>33</sup> Innojen lajtomes annimitzilic, huan mocahualo ca amhuanten, pa yoje pan nopampa amo ancuipías pa anmomajtis. Nican pin lalticpan anpanus mochi hual anmitzcocoltis. Ma yoje xicpiacan miac paquilisli. Nehual niquinsulahuac yehuanten hual iyaxca in lalticpan hual quinequilosquiaya anmitzlamilo. Quema, axan niquinsulahuac yehuanten.

## 17

### *Jesús quilajlanía Dios pa imonextilinjmes*

<sup>1</sup> Ca innojen lajtomes, Jesús laquisac laquetzac ca imonextilinjmes. Cuaquinon lachíac pa in cielo (ilhuicac) huan quilic:

—Tata, axan ajsitihualac in hual yahuiaya huala. Xijchía niman hué nehual moxolol, pa yoje nehual moxolol huil nimijchía niman hué. Nicnextic quinami tiunca niman hué pan ipampa quinami niquinmacas moyulilisli hual amo quiman lamis. <sup>2</sup> Niquinmacas moxtin yehuanten hual tichmacac pa yesi nomonextilinjmes. In nicchías pan ipampa quinami tichmacac lahuellitlisli ca moxtin pin lalticpan. <sup>3</sup> Huan sinda mitziximatilo tehual in se Dios, amo unca oc se, tehual in Dios melahuac, huan sinda nechiximatilo nehual Jesucristo hual tichtilanic pan lalticpan, cuaquinon yoje quipialo moyulilisli hual amo quiman lamis.

<sup>4</sup> Niclamachiltic nican pan lalticpan quinami tehual tiunca niman hué pan ipampa quinami niclamic nicchíac in motequipanulisli hual tichmacac pa nicchías. <sup>5</sup> Huan axan, Tata, xiclamachilti quinami niunca niman hué quiman nicayas oc sejpa monahuac, pa yoje nicayas lachihuali niman hué, jan quinami nicatani quiman huan tehual ticataniyme huan ayamo pehuac in lalticpan.

<sup>6</sup> Niquinnextilic quinami tehual tiunca noTajtzin, inon niquinnextilic yehuanten hual tichmacac pa yesi nomonextilinjmes. Tiquinlajtultic, cataloaya ca yehuanten pin lalticpan. Yehuanten yeje moyaxca tehual, huan tichmacac yehuanten huan yalo yultialo lachijiticate quinami tiquijtúa.

<sup>7</sup> Axan quimatilo mochi len yes tichmacac nehual, huan inon moyaxca tehual. <sup>8</sup> Inon quimatilo, pampa in lajtol hual tichmacac, inon niquinmilic. Huan quineltocape in hual niquinmilic, huan quimatije neli pampa nehual nihualac niquistataya capa tehual. Huan quineltocape pampa tehual tichtilanic.

<sup>9</sup> Nimitztlajlanía pa tehual tiquinlachilis. Amo nimitztlajlantica in pa yehuanten pin lalticpan axan. San nimitztlajlantica inon pa yehuanten hual tichmacac pa yesi tolacames, pampa yehuanten cate molacames tehual.

<sup>10</sup> Huan mochi hual noyaxca, noje unca moyaxca, huan mochi hual unca moyaxca, noje in noyaxca. Huan yehuanten quinlamachiltije nochichual-isli niman hué huan nolaixpelalisli cualtichin. Huan yalo quinlamachiltialo, huil moita inon pan ipampa quinami yulilo.

11 'Nehual yajmo nicayas pin lalticpan. Yehuanten cate pin lalticpan, huan nía nihuala capa tehual. Tata, ma ye lamachilti quinami unca niman hué motoca. Xiquinmiztia yehuanten pa cayasi quinami tehual motoca quinnexiltia quinami monequi pa yulisi yehuanten hual moyaxca. Huan tehual tichtocayaltic quinami tehual timotoca. Yoje, pampa inon yehuanten yesi se san, jan quinami tehual huan nehual ticate se. 12 Innojen tonalijmes hual nicataya ca yehuanten, niquintzacuiliaya pa camo mopolulosquiaya. Niquintzacuiliaya pan ipampa motoca ilahuelilitisli, yehuanten hual tichmacac pa yesi nolacames. Niqinlachiliaya pa camo mopolulosquiaya, huan yehuanten amo nicmacahuiltic pa Satanás quinpolehuiltis. Jan in se hual quipiaya pa polehuis pa camo quiman quisas pin ipolehuilitisli, yihual nicmacahuiltic pa quipolehuiltis Satanás. Inon quipanuc pa yoje panus quinami unca lajcululi molajtol.

13 'Huan axan nía nihuala capa tehual. Huan innojen lajtomes nimitzlijtica nican quiman ayamo niquisac pin lalticpan, pa yoje yehuanten mocahuasi ca niman miac paquilisli pa inminyolo, quipixticate nopaquilisli. 14 Niqinmacac molajtol. Huan yehuanten hual yulilo quichijticate quinami quixtoca Satanás hual huelitia pin lalticpan, yehuanten quincocolilo nomonextilinijmes. Unca pampa nomonextilinijmes amo yulilo quinecticate lachihualo quinami yehuanten pin lalticpan, jan quinami nehual amo nilachia quinami yehuanten pin lalticpan. 15 Amo nimitzljlantica pa tehual tiqinixtits pa camo cayasi ca yehuanten hual amo quinequilo yulilo quinami quijtúa molajtol. Nimitzljlantica pa tiqinmitas pa camo quinsulahuas Satanás. 16 Yehuanten amo iyaxca in lalticpan capa Satanás huelitia inminpan moxtin, jan quinami nehual amo niunca iyaxca in lalticpan. 17 Xiclali pa yulisi quinecticate yulilo quinami tiqita cuali tehual, amo quinami quijtusi yehuanten pin lalticpan. Huan xiquinchihuili inon pan ipampa in hual unca melahuac. Tehual molajtol, in hual unca melahuac. 18 Huan jan quinami tehual tichtilanic nehual nican pin lalticpan, jan yoje nehual niquintilanic yehuanten pa yasi pa mochi in lalticpan. 19 Huan pa mochi quisas cuali pa yehuanten, nehual nimolalia pa nimiquis, inon nicchia pampa unca quinami ticnequi tehual. Inon nicchia pa jan yoje yehuanten yesi lalalili pa yulisi quichijticate quinami tehual ticnequi. Quichihuasi inon pan ipampa molajtol melahuac.

20 'Ma yoje, amo nimitzljlantica pa tiqinchiuilis mochi inon jan pa innojen nomonextilinijmes san. Nimitzljlantica noje pa tiqinchiuilis inon yehuanten hual yalo nechneltocalo pan ipampa quinami innojen nomonextilinijmes quinmiliisli yehuanten nonahuac nehual. 21 Nimitzljlantica pa tiqinchiuilis inon pa yoje yehuanten moxtin cayasi ca se laijnamiqulisli. Cayasi jan quinami tehual, Tata, tiunca ca nehual huan nehual niunca ca tehual, huan ticate ca se laijnamiqulisli. Yoje yehuanten cayasi ca tehuanten ca se laijnamiqulisli. Yoje quineeltocasi yehuanten pin lalticpan pampa tehual tichtilanic. 22 Huan jan quinami tehual ca jan nadita san tia tilanextia quinami nehual niunca niman hué, jan yoje nehual nía niqinchia yehuanten niman hué ca inon calica tia tijchia nehual niman hué. Inon pa yoje cayasi ca se laijnamiqulisli, jan quinami tehual huan nehual ticate ca se laijnamiqulisli. 23 Nehual niyultica lajtic ca yehuanten, huan tehual tiyultica lajtic ca nehual, pa yoje yehuanten cayasi yulticate moxtin ca se laijnamiqulisli quinami tehual ticnequi pa yulisi. Yoje quimatisi yehuanten pin lalticpan pampa tehual tichtilanic ca niqic. Quimatisi pampa tehual tiqinlasojlac jan quinami tehual tichlasojla nehual.

<sup>24</sup> "Tata, nicnequi pa yehuanten noje hual tehual tichmacac cayasi capa nehual nicayas, pa yoje quitasi quinami tehual tijchíac nehual niman hué ca mochicahualisli huan molaixpelalisli niman cualtichin. Inon tichmacac pampa amo timocahua pa tichlasojlas quinami tichlasojlaya quiman ayamo yec lachihuali in lalticpan huan pa axan. <sup>25</sup> Ah, Tata, tehual ticchía mochi cuali huan melahuac. Yehuanten pin lalticpan amo mitziximatije. Ma yoje, nehual nimitziximatic. Huan innojen nican quimatilo pampa tehual tichtilanic. <sup>26</sup> Huan nehual niquinnexilic quinami tiunca pa yoje mitziximatisi. Huan amo nimocahuas pa niquinlamachiltis inon, pa yoje yehuanten quimatisi lalasojlasi jan quinami tehual tichlasojla, huan pa yoje nehual nicayas pa laijitc yehuanten inminyolo.

## 18

### *Quiquitzquilo Jesús*

(Mt. 26:47-56; Mr. 14:43-50; Lc. 22:47-53)

<sup>1</sup> Quiman Jesús lamíc quílic Dios inon, uyajtiac ca imonextilinijmes, quipanahuije in atenco itoca Cedrón. Ca yoje (analco) in atenco cataya se cuajtilan ca cuahuimes hual ilaquilyo yec olivos. Nepa calaquic Jesús ca imonextilinijmes. <sup>2</sup> Judas yahuiaya quitemaca Jesús ca yehuanten hual yahuiyoaya latilanilo pa yesquiaya lamictili. Yihual noje quimatiaya capa cataya in cuajtilan. Sejpa huan oc sejpa Jesús huan imonextilinijmes monechiculoaya umpa. Pampín Judas quimatiaya capa cataya. <sup>3</sup> Yoje yihual quinmanac míac guaches huan píscales hual in tiopistas huejué huan in fariseos quintilanije, quinlaicantiahuiaya ca umpic. Moxtin quinpialoaya calica molahuilosquiaya huan cuajtzitzindis lalatihuiyoaya huan ca cuahuimes huan teposlimes hual latequilo. Innojen quintequipanulo guaches pa moanalisli. <sup>4</sup> Huan pampa Jesús quimatiaya mochi hual yahuiaya quipanu, uyac ca yehuanten, quinmilic:

—¿Aqui anquitemujtica?

<sup>5</sup> Quinanquilije:

—Jesús in nazareteco.

Quinmilic Jesús:

—Nehual niunca.

Huan Judas hual quitemacac Jesús ca yehuanten nepa noje huan yehuanten moquezataloaya. <sup>6</sup> Yoje, quiman quinmilic Jesús: "Nehual niunca", yehuanten molasaje pa inmintepotzcon huan huetzije pan lali. <sup>7</sup> Oc sejpa Jesús quinlajlanic:

—¿Aqui anquitemujtica?

Huan quilije:

—Jesús in nazareteco.

<sup>8</sup> Jesús quinnanquilic:

—Annimitzilic nehual niunca. Sinda nehual annechtemujtica, cuaquín xiquinmacahuiltican pa yasi innojen lacames hual cate ca nehual.

<sup>9</sup> Inon quinmilic Jesús pa yoje panus jan quinami yihual quílic Dios: "Amo niquinpoluc amaqui ca yehuanten hual tichmacac pa nechnehtocasi. Quema, amo nicpoluc se." <sup>10</sup> Cuaquinon Simón Pedro hual quipiác se teposli latequi quiquixtic huan quítecuac se itequipanujquil in tiopista hué, quicotonilic inacas, cataya inacas pa ima cuali. In tequipanujquil itocaya Malco. <sup>11</sup> Jesús quílic Pedro:



—Xicajcoqui moteposli pa capa tijquixtic. Inon hual nechpanujtica unca in hual quinequi Dios noTajtzin pa nechpanus. ¿Tiquijtúa nehual amo nía nicmacahuiltía pa nechpanus mas que yes quinami chicich pa nehual?

*Jesús ilaixpan in tiopista hué*

(Mt. 26:57-58; Mr. 14:53-54; Lc. 22:54)

<sup>12</sup> Cuaquinon quiquitzi que Jesús in guaches huan inminlaicanani huan inminpiscuales in judíos huejué, quilpije. <sup>13</sup> Pehuaje quihuicaje jan axcan capa cataya Anás, yihual itajtzin isihua Caifás huan Caifás yec in tiopista hué pa in xihuil. <sup>14</sup> Huan cataya yihual in Caifás hual quinmacac lajtol inminhuejueyenten in judíos pa canas se lalcal san pa miquis pa moxtin yehuanten.

*Pedro quijtúa pampa amo quiximati Jesús*

(Mt. 26:69-70; Mr. 14:66-68; Lc. 22:55-57)

<sup>15</sup> Huan Simón Pedro quitocac Jesús huan noje oc se imonextilini quitocac. In tiopista hué quiximatiaya in oc se monextilini. Pampa inon yihual calaquic pa ilajcotiyan in tiopista hué ichan, capa cataya Jesús. <sup>16</sup> Mocahuac Pedro moquezataya pa in lalapujquil pa quiahuac. Cuaquín quisac in oc se monextilini hual quiximatiaya in tiopista hué, huan quilic in tequipanujquil sihual hual quilachiliaya in lalapujquil pa quimacahuiltis pa calaquic Pedro. Cuaquinon in monextilini quihuicac Pedro pa calijtic. <sup>17</sup> In sihual hual quilachilijtataya in lalapujquil quilic Pedro:

—Tehual noje, ¿tíunca se imonextilini in lalcal Jesús?

Yihual quilic:

—Amo niunca imonextilini.

<sup>18</sup> Nepa moquezataloaya itequipanujquimes in tiopista hué huan in piscuales. Quipitza se tixuxli pampa quitaloaya sehua huan quiyahualuloaya itenco moutzcutataloaya. Huan noje moquezataya Pedro nepa moutzcutataya.

*In tiopista hué quilajlanía chicahuac Jesús*

(Mt. 26:59-66; Mr. 14:55-64; Lc. 22:66-71)

<sup>19</sup> Cuaquinon in tiopista hué quilajlanic Jesús pa quinpuhuilisquiaya inminahuac imonextilini jmes huan len quimaxtiaya. <sup>20</sup> Jesús quinanguilic:

—Nehual nilajtuaya mojmosta inminlaixpan moxtin. Mojmosta nilamaxtiaya pin tiopajmes huan in tiopan hué huan capa yes monechiculo mochi in judíos, huan amo niquijtc nindeno ixtacayito. <sup>21</sup> ¿Leca tichlajlantica inon? Xiquinlajlani aquinojen nechcaquiloaya in hual niquinmiliaya. Xiquita, innojen quimatilo len niquinmiliaya. <sup>22</sup> Quilic Jesús inon, se piscala nepa moquezataya inahuac quitotecuac Jesús pa iixco, quilic:

—¿Yoje ticnanquilia in tiopista hué?

<sup>23</sup> Jesús quinanguilic:

—Sinda niquijtc len amo cuali, xitechnextili quinami cataya amo cuali. Huan sinda nilajtc cuali, ¿leca tichteacuac?

<sup>24</sup> Cuaquinon Anás quitilanic Jesús lailpili capa cataya Caifás in tiopista hué.

*Pedro quijtúa oc seppa yihual amo quiximati Jesús*

(Mt. 26:71-75; Mr. 14:69-72; Lc. 22:58-62)

<sup>25</sup> Huan mocahuac Pedro moquezataya huan moutzcutataya. In lacames nepa quilije:

—¿Tehual noje tíunca se ca imonextilini jmes in Jesús?

Pedro islatatijtataya quinmilic:



—Amo niunca.

<sup>26</sup> Nepa cataya se icni pa oc se cali in se hual Pedro quicotonilic inacas, in se icni pa oc se cali noje yec se itequipanujquil in tiopista hué, quilic:

—¿Amo nimitzitic nepa ca yihual pin cuajtilan capa laquilo olivos?

<sup>27</sup> Oc sejpa islacatic Pedro quilijtataya pampa no. Jan ajnaxcan zahuanic se gallo.

### *Jesús ilaixpan Pilato*

(Mt. 27:12, 11-14; Mr. 15:15; Lc. 23:15)

<sup>28</sup> Cuaquinon quiquixtije Jesús ilaixpan Caifás, quihuicaje ca se cali hué itocaya in Pretorio capa chantiaya in gobernador (huelitini) romano. Ca ompic quihuicaje pa yihual in gobernador quitlanisquiaya pa quimictisi Jesús. Yahuiaya lanesi in tonali. Yehuanten in judíos amo calaquiloaya pin Pretorio, pampa inminlajtol hual quinmaxtia quinami monequi pa quimolancuacuetzilisi Dios quijtua pa yehuanten amo cayasi ca yehuanten hual amo judíos. Sinda yoje quichihualoaya, cuaquinon amo huil quicualoaya iborrego in fiesta (ilhuil) pascua. In lajtol lajcuiluli quijtua pampa cayalosquiaya laijlaculi sinda yoje quichihualoaya.

<sup>29</sup> Pampín, quisac Pilato in gobernador (huelitini) ca yehuanten, quinmilic:

—¿Leca anmotexpahuía? ¿Len anmijchihuilic in lacal?

<sup>30</sup> Quinanquilije:

—Sinda in lacal amo quichihuaya len niman amo cuali, cuaquín amo timitztemacaloaya.

<sup>31</sup> Huan Pilato quinmilic:

—Xiquihuicacan amhuanten anmohuían huan xictilani pa iojli quinami quijtua anmolajtol.

In huejueyenten judíos quilije:

—In lajtol amo techmacahuiltía pa tehuanten tilatilanisi pa yes lamictili se.

<sup>32</sup> Inon quijtuje pa yoje panus in hual yihual Jesús quijtuc inahuac quinami yahuiaya miqul.

<sup>33</sup> Cuaquín Pilato calaquic oc sejpa pin Pretorio calijtic, lanotzac pa hualas Jesús ilaixpan, quilic:

—¿Tehual inminhué in judíos?

<sup>34</sup> Jesús quinanquilic:

—¿Tichlajlantica inon pampa tiquijtua yoje? O ¿tehual mitzilije inon nonahuac nehual oc sequin lacames?

<sup>35</sup> Pilato quinanquilic:

—¿Quinami huil nicmati inon nehual? Nehual amo nijudío. Cataloaya in lacames pa molali tehual huan in tiopistas huejué hual nechtemacaje tehual. ¿Len ticcháac? ¿Leca mitztemacaje ca nehual?

<sup>36</sup> Jesús quinanquilic:

—Amo nilahueliltía quinami huelitilo in huejueyenten pin lalticpan pampa nehual amo nihué yoje quinami yehuanten inminhuejueyenten. Sinda yoje cataya, cuaquín moanaloya nolapalehuinijmes ca yehuanten pa camo nechtemacalosquiaya ca in judíos. Huan jan yoje, amo nechnapatiloaya pampa amo niunca se hué quinami in huejueyenten pin lalticpan.

<sup>37</sup> Pilato quilic:

—Cuaquín, tehual tiunca se hué, ¿quema?

Jesús quinanquilic:

—Quema, tehual tiquijtuc pampa nehual niunca se hué. Nicpía pa nilajtus neli inahuac in hual unca melahuac. Pampa inon nilacatic, pampa inon nihualac pin laticpan. Mochi lacal hual quinequi yuli quichijtica huan quilijtica in hual melahuac, yihual yuli quinami quijtulo nolajtomes.

<sup>38</sup> Pilato quilic:

—Neli amo huil quimati se len quinequi quijtúa in lajtol “melahuac”.

*Quitlanilo Jesús pa miquis*

(Mt. 27:15-31; Mr. 15:6-20; Lc. 23:13-25)

Cuaquinon, quijtuc inon Pilato, quisac oc sejpa pa quiahuac capa cataloaya in judíos, quinmilic:

—Amo niquitilía amo cuali nindeno hual quichíac in lacal. <sup>39</sup> Axcan, mochi xil pan in fiestas unca lamacahuali pa amhuanten se lacal hual unca laquitzquili, aqi yes anquinequi. ¿Anquinequi pa annimitzmacahuilis anmohué amhuanten in judíos?

<sup>40</sup> Cuaquinon oc sejpa tzajtziye, quilijtataloaya:

—¡Amo in se! ¡Xitechmacahuili Barrabás!

In Barrabás yec laxtequini.

## 19

<sup>1</sup> Cuaquinon, Pilato canac Jesús, latilanic pa quihuetequisi chicahuac ca mecames hual quitejtequije icuilaxli huan inacal. <sup>2</sup> Huan in guaches quijquetije len chicuenta se layahuali ca huizlimes xixilanqui huan quilajlilije pani itzontecon, huan quilaquentije ca se nahuas morado. <sup>3</sup> Cuaquín yajti-ahuiloaya ilaixpan yihual Jesús quilijtataloaya:

—¡Ma yuli inminhué in judíos! —quilije quitecuatataloaya pa iixco.

<sup>4</sup> Huan quisac Pilato oc sejpa pa quiahuac ca yehuanten huan quinmilic:

—Xiquitacan, nijquixtis pa quiahuac ca amhuanten pa yoje anquimatis amo niquitilía ca yihual lajlaculisli nindeno hual quichíac yihual.

<sup>5</sup> Hualac pa quiahuac Jesús quipixtataya pani itzontecon in layahuali lachihuali ca huizlimes huan cataya lalaquentili ca in nahuas morado. Cuaquín Pilato quinmilic:

—¡Xiquitacan in lacal!

<sup>6</sup> Quitaje Jesús in tiopistas huejué huan innojen hual quinquipanuilije, quitzajtzilije:

—¡Xicpilu pan se cuahuil! ¡Xicpilu pan se cuahuil!

Quinmilic Pilato:

—¡Xicanacan amhuanten huan xicpilucan pan se cuahuil! Pampa nehual amo niquitilía nindeno amo cuali ca yihual.

<sup>7</sup> Quinanquilije in judíos:

—Tehuanten ticpialo se lajtol, huan quinami quijtúa in lajtol monequi pa miquis, pampa yihual quilic yihual Dios iXolol.

<sup>8</sup> Quicaquic inon, Pilato momajtic míac. <sup>9</sup> Calaquic oc sejpa pin Pretorio itenencia, huan quilic Jesús:

—¿Capa cataya molali quiman tipejtihualaya ca niquic?

Jesús amo quinanquilic nindeno. <sup>10</sup> Cuaquinon Pilato quilic:

—¿Quinami amo tilaquetza ca nehual? ¿Amo ticmati nehual nicpía lahuiltilisli pa nimitzmacahuas, huan nicpía lahuiltilisli pa nilatilanis pa mitzpilusi pan se cuahuil?

<sup>11</sup> Jesús quinanquilic:

—Amo ticpiaya lahuelilitlisli nindeno pa tijchihuilis len, sinda Dios amo mitzmacaya nepa pin cielo pa pani. Yoje, yihual hual nechtemacac ca tehual quichíac in laijlaculisli hué. Tel molaijlaculisli amo unca yoje hué.

<sup>12</sup> Pampa inon Pilato quitemuc quinami huil quimacahuac Jesús. Ma yoje, tzajtziye in judíos quilijtataloaya:

—¡Sinda ticmacahuas in se, cuaquín tehual amo tiyes inahuac César in hué romano! ¡Mochi lacal hual mochía se hué quinequi quiquixtilía ilahuelilitlisli César in hué niman hué!

<sup>13</sup> Quicaquic Pilato len quilije, cuaquín quihualicac Jesús pa quiahuac huan molalic pa in icpali hué capa quimacani ojli yehuanten hual quinmotexpahuilinjime. Cataya pan se tixcaltlan itocaya Tixcaltlan Aj'alastic. Ca lajtol hebreo moijtúa Gabata. <sup>14</sup> In tonali itocaya In Tonali Capa Mochijchihualo, cataya se itonali hué in fiesta (ilhuil) pascua. Cataya quinami lacualispan huan quinmilic Pilato in judíos:

—¡Xiquitacan anmohué!

<sup>15</sup> Yehuanten quitzajtzilije:

—¡Xiquijcuani, xiquijcuani, xicpilu pan cuahuil!

Quinlajlanic Pilato, quinmilic:

—¿Nicipilus anmohué pan cuahuil?

Quinanquilije in tiopistas huejué:

—¡Amo ticpialo oc se hué, jan César san!

<sup>16</sup> Cuaquinon, quitemacac Pilato Jesús ca yehuanten pa yes lapiluli pan cuahuil.

### *Quipilulo Jesús pan cuahuil*

(Mt. 27:32-44; Mr. 15:21-32; Lc. 23:26-43)

<sup>17</sup> Canaje Jesús, huan yihual quisac quimantiahuiaya icuahuil, uyaje pa se ixlahuito itocac Itzontecomal in Mijquil, in moijtúa ca hebreo Golgotá.

<sup>18</sup> Cataya nepa capa quipiluje pani in cuahuil, huan ca yihual quinpiluje oc sequin ome pan cuahuimes, quinpiluje in yeyenten huan Jesús lajco capa yehuanten omenten. <sup>19</sup> Huan noje quijcuiluc Pilato se amal pa quimatisi moxtin leca quipiluje pani in cuahuil, huan quisaluc pan in cuahuil in amal hual quijtuc: “JESÚS IN NAZARETECO, INMINHUÉ IN JUDÍOS.” <sup>20</sup> Yoje, momaxtije in amal míac judíos, pampa amo cataya huejca pa quiahuac Jerusalén capa quipiluje Jesús pani in cuahuil. Huan in amal quijcuiluc ca lajtol hebreo huan ca lajtol latín huan ca lajtol griego. <sup>21</sup> Quitaje in amal in judíos inmintiovistas huejué, huan quilije Pilato:

—Amo xiquijcuilu “Inminhué in judíos”. Xiquijcuilu pampa in se quijtuc: “Nehual niunca inminhué in judíos.”

<sup>22</sup> Quinnanquiloc Pilato:

—Inon hual niquijcuiluc mocahua lajcuiluli yoje.

<sup>23</sup> Huan in guaches nepa capa quipiluje Jesús pan in cuahuil, canaje itzotzomajli huan moxiluilije pa yehuanten nahuenten, se tzotzomajli pa se guache. Noje canaje ilaquen. Huan ilaquen cataya lajquetili mochi pa pani, amo quiapiaya lajzomali. <sup>24</sup> Yoje, moilije se ca oc se:

—Ma camo tictzayanacan. Ma tiquinlasacan nahui lajquitos cuajtzindi cuixtito pin lasehualoni (sombbrero), cuaquín sejse ca tehuanten tijquixtisi se lajquito amo tiquizticate quiman tijquixtisi. Huan aqui hual canas in lajquito xilangui ca in nahuenten, yihual quipias pa iyaxca in laquen.

Yoje quichihuaje pa panus quinami unca lajcuiluli pa Dios ilajtol, in Amal itoca Salmos, yoje quijtúa: “Moxiluilije ca yehuanten notzotzomajli huan

quinlasaje lajcomes de cuahuil pa se quipías nolaquen pa iyaxca.” <sup>25</sup> In guaches quichihuaje quinami quijtulo in lajtomes.

Nepa amo huejca capa cataya Jesús icuahuil moquezataloaya inantzin, huan icni sihual inantzin huan María isihua Cleofas, huan María hual quisac pin caltilan Magdala. <sup>26</sup> Jesús quitac inantzin huan quitac imonextilini hual quilasojlac nepa moquezataya. Cuaquín quilic inantzin:

—Nana, xiquita. Axan yihual moxól.

<sup>27</sup> Cuaquín quilic imonextilini:

—Xiquita. Axan yihual monantzin.

Huan pa in tonali in monextilini quihuicac Jesús inantzin pa ichan pa mocahuas chantitica ca yihual.

### *Jesús miqui*

(Mt. 27:45-56; Mr. 15:33-41; Lc. 23:44-49)

<sup>28</sup> Panuc inon, cuaquín Jesús quimatiaya quinami mochi panuc quinami unca lajcuiluli Dios ilajtol hual quijtúa quinami yahuiaya panu. Huan quilic: —Niamictica.

<sup>29</sup> Nepa cataya se tapalcal tentataya ca iayo uva xocuc. Yoje quitechcuniltije se pochínquil ca in iayo uva xuc, quilalije pan se acal itoca hisopo, cajcoquije huan quilalije pa icamac pa quipachichinasquiaya. <sup>30</sup> Cunic in iayo uva xocuc, Jesús quijtuc:

—Axan nilamic nicchíac mochi hual nicpiaya pa nicchías.

Huan quipiluc itzontecon huan quimacahuilic pa quisasquiaya iyulilisli, yoje polehuic.

### *Se guache quilapúa Jesús ilanasticali ca se latzopinijquil*

<sup>31</sup> Mostatica yahuiaya caya itonali in pascua. Pampín, in tonali hual quipiluje Jesús pani in cuahuil cataya in tonali capa in judíos mochijchi-hualoaya pa in pascua. Huan in huejueyenten judíos amo quinequiloaya pa mocahualosquiaya in lacames pilujtataloaya pani in cuahuimes pan in tonali pascua quiman mosehuilo, pampa in tonali yec se tonali hué. Pampa inon, in huejueyenten judíos quilajlanije Pilato pa yihual latilanisquiaya pa in guaches quinpostequillosquiaya inmicxihujmes yehuanten pan in cuahuimes, pa yoje miquillosquiaya huan yoje huil quinmijcuanilosquiaya in mijquimes. <sup>32</sup> Cuaquín uyaje in guaches quinpostequilije inmicxihujmes in se hual pilujtataya pa Jesús ima cuali huan in oc se pa ima amo cuali hual ca yihual pilujtataloaya. Yoje amo huil motzanuije huan pampín polehuiloaya. <sup>33</sup> Cuaquinon, ajsije capa Jesús, huan quinami quitaje pampa yihual polehuic, pampín amo quipostequilije icxihujmes. <sup>34</sup> Ma yoje, se ca in guaches quicoyunic ilanasticali Jesús ca se latzopinijquil, huan jan ajnaxcan quisac esli huan al. <sup>35</sup> Huan yihual hual quitac inon quiman panuc quijtúa neli pampa inon panuc, huan in hual yihual quijtúa unca melahuac, huan yihual quimati pampa neli quijtúa, pa yoje amhuanten noje anquineltocas. <sup>36</sup> Panuje innojen pa yoje panusi quinami Dios ilajtol lajcuiluli quijtúa: “Amo quipostequisi se iumil in huendi.” <sup>37</sup> Huan amo inon san. Pa oc se iamal Dios ilajtol lajcuiluli quijtúa: “Mocahuasi quitzicate yihual hual quitzopinije ca in teposli.”

### *Quilalilo Jesús imijquil pa se ostul*

(Mt. 27:57-61; Mr. 15:42-47; Lc. 23:50-56)

<sup>38</sup> Panuje mochi inon, hualaya José hual yuliaya pin caltilan Arimatéa. Yihual yec se imonextilini Jesús. Ma yoje, momajtiaya inminlaixpan in judíos,

huan pampa inon amo quimacahuiltiaya pa quimatisquiaya inon amaqui. Huan in José quilajlanic Pilato pa quimacahuiltis pa quihuicas Jesús imijquil. Yoje Pilato quimacahuiltic. Cuaquinon José uyac quihuicac. <sup>39</sup> Huan yihual hualaje noje Nicodemo, yihual in se hual quimaniyan hualac quitac Jesús pa layúa. In Nicodemo quihualicac ca yihual len laniluli lachihuali ca mirra huan áloes hual ajuiac, cataya quinami treinta kilos. <sup>40</sup> Canaje Jesús imijquil, quiliaruje ca tzotzomajli lachihuali ca lino, quitechcuniltijtataloaya ca in altzindi lachihuali ca mirra huan áloes. Yoje unca quinami quichijchihuililo in judíos se mijquil quiman yes yalo quilalilo pin cueva (ostul) capa quilalpachulo. <sup>41</sup> Huan cataya nepa amo huejca capa quipiluje pan in cuahuil se lajcotiyan latzacuali, huan pin lajcotiyan cataya se cueva (ostul) yancuic capa ayamo quiman quilalije se mijquil. <sup>42</sup> Huan pampa cataya in tonali hual mochijchihualo in judíos pa in oc se tonali quiman quipialoaya pa mosehuisi, nepa quilalije in mijquil Jesús pampa amo cataya huejca in cueva (ostul).

## 20

### *Jesús yuli oc sejpa*

(Mt. 28:1-10; Mr. 16:18; Lc. 24:1-12)

<sup>1</sup> Cuaquinon, panuje in tonalijmes. Cataya laxpoyahuita pa in tonali hual quipehualtia in ocho tonalijmes. Laticumac, ayamo lanesiaya, huan hualaya pa in cueva (ostul) María hual chantini pa Magdala, huan quitac quinami cataya laijcuanili in tel hual quitzactataya in cueva. <sup>2</sup> Jan axcan molalujtiac capa cataloaya Simón Pedro huan in oc se monextilini hual Jesús quinequiaya, quinmilic:

—Quiquixtilije in Tata pin cueva capa quilalpachuje, huan amo ticmatilo capa quilalije.

<sup>3</sup> Cuaquín quisaje Pedro huan in oc se monextilini, uyajtiquisaje pa in cueva (ostul). <sup>4</sup> Molalujtiahuiloya in omenten, huan in oc se monextilini molaluaya ca mochi ichicahualisli. Amo molalujtiahuiaya Pedro quinami yihual. Pampín, yihual ajsic ihuían capa cataya in cueva (ostul). <sup>5</sup> Ajsic yihual, mopachuc, quitac in tzotzomajli lastataya, ma yoje amo calaquic laijtic. <sup>6</sup> Cuaquín ajsic noje Simón Pedro quitocatihualaya huan calaquic laijtic in cueva (ostul). Quitac in tzotzomajli lastataya iliarujtataya. <sup>7</sup> Huan in tzotzomajli hual quiliaruje pa Jesús itzontecon amo lastataya ca in oc sequin tzotzomajli, lastataya iliarujtataya ihuían. <sup>8</sup> Cuaquinon, calaquic in oc se monextilini hual ajsic quilaicantataya Pedro. Yihual calaquic in ostul (cueva) laijtic huan quitac mochi huan quineltoac pampa Jesús yajmo cataya nepa. <sup>9</sup> Yoje quineltoac pampa ayamo quimatiloaya len quinequiaya quijtu Dios ilajtol lajcuiluli hual quijtúa pampa Jesús quipiaya pa yulisquiaya oc sejpa mas que miquic huan cataya ca in mijquimes. <sup>10</sup> Yoje, mohuicaje in monextilinjmes ca capic chantitataloaya.

### *Jesús nesi ca María in magdalena*

(Mr. 16:9-11)

<sup>11</sup> Huan María moquetzaya pa in cueva (ostul) pa quiahuac, chocatataya. Huan quinami chocaya, mopachuc pa quitasquiaya pa in ostul laijtic. <sup>12</sup> Huan nepa quinmitac ome ilanahuatinijmes in cielo lalaquentili ca tzotzomajli iztatataya, molalijtataloaya se pa capa catani Jesús itzontecon huan se capa catanjme icxihujmes, pani capa catani lastataya Jesús imijquil.

<sup>13</sup> Huan yehuanten quilije:

—Nito, ¿leca tichocatica?

Quinmilic:

—Pampa quijcuanije noTeco huan amo nicmati capa quilalije.

<sup>14</sup> Quinmilic inon, momalinac huan pa itepotzcon quitac Jesús moquezataya. Ma yoje, amo quimatiaya cataya Jesús. <sup>15</sup> Huan Jesús quilic: —Nito, ¿leca tichocatica? ¿Aqui tictemujtica?

María quijtuaya pampa yihual yec in lalac hual quiztinemiaya in laj-cotiyán, huan quilic:

—Tata, sinda tel tiquihuicac, xichili capa ticlalic huan nehual nicuicatías.

<sup>16</sup> Huan Jesús quilic:

—María.

Huan yihual momalinac, quilic ca lajtol hebreo:

—¡Rabboni! —hual quinequi quijtúa ¡Lamaxtini!

<sup>17</sup> Jesús quilic:

—Amo xicaya tichquitzquitica, pampa ayamo nilejcus capa unca noTajtzin. Axcán, xía capa cate nocnían, xiquinmili pampa nilejcus pan cielo capa unca noTajtzin huan anmoTajtzin huan capa unca noDios huan anmoDios.

<sup>18</sup> Cuaquinon uyajtiquisac María in magdalena pa quinlamachiltis in monextilinjmes, quinmilic:

—¡Nel niquitac in Tata! —huan quinmilic pampa yihual quilic innojen lajtomes.

*Jesús nesi capa cate in monextilinjmes*

(Mt. 28:16-20; Mr. 16:14-18; Lc. 24:36-49)

<sup>19</sup> Huan cataya tiolac pa in tonali, in tonali hual quinpehualtia in chicue tonalijmes, huan in monextilinjmes quipialoaya tzactataya in calijtic capa cataloaya pampa momajtiloaya. Quijtuloaya cuajnesi in judíos quinmitalosquiaya. Jesús nesi huan moquetzac lajco capa yehuanten, quinmilic:

—Ma Dios anmitzmaca mochi hual cuali huan ma anmijchihuili mochi hual cuali.

<sup>20</sup> Huan quinmilic inon, quinnexilic imajmajuan huan ilanasticali. Yoje quipialoaya miac paquilisli in monextilinjmes pampa quitaloaya Jesús.

<sup>21</sup> Huan quinmilic yehuanten Jesús oc sejpa:

—Ma Dios anmitzmaca mochi hual cuali huan ma anmijchihuili mochi hual cuali. Quinami in Tata Dios nechtilanic, jan yoje nehual annimitztilanía amhuanten.

<sup>22</sup> Quiman quinmilic inon, quimacahuiltic pa iijyul quisac inminpan, quinmilijtataya:

—Xicpiacan yoje in Espíritu Santo. <sup>23</sup> Sinda anquinmilía aquinojen yesi pampa cate lapujpuhuali inminlajlaculisli, unca pampa Dios quijtuc pampa cate lapujpuhuali. Huan sinda anquinmilía aquinojen yesi pampa amo cate lapujpuhuali inminlajlaculisli, unca pampa Dios quijtuc pampa amo cate lapujpuhuali.

*Tomás quita in Tata yultica oc sejpa*

<sup>24</sup> Ma yoje, Tomás, se ca in doce monextilinjmes (yihual yec in se ca yehuanten hual quintocayaltije “Seinomenten”), amo cataya ca yehuanten nepa quiman hualac Jesús. <sup>25</sup> Pampín, in oc sequin monextilinjmes quilije:

—Tiquitaje in Tata.

Huan Tomás quinmilic:

—Sinda amo niquita pa imajmajuan capa quicoyunilije in teposli huan sinda amo niclalis noma capa quitzopinic pa ilanasticali, cuaquín amo quiman nicneltocas yihual yultica oc sejpa.

<sup>26</sup> Cuaquinon panuje chicue tonalijmes. Cataloaya in monextilinijmes oc sejsa calijtic, huan ca yehuanten Tomás cataya. Calaquic Jesús calijtic mas que tzactataloaya in calijtic capa cataloaya, huan moqueztiquisac lajco capa yehuanten, quinmilic:

—Ma Dios anmitzmaca mochi hual cuali huan anmijchihuili mochi hual cuali.

<sup>27</sup> Cuaquín yihual quilic Tomás:

—Xiclali moxerixa nican huan xiquinmita nomajmajuan, huan xijcalacti moma pin nolanasticali. Huan amo xiye se hual amo quineltoca, xiye se hual quineltoca.

<sup>28</sup> Tomás quinanquilic:

—¡NoTata huan noDios!

<sup>29</sup> Jesús quilic:

—Tomás, ticneltocaya pampa tichitac. Ma quipiacan paquilisli yehuanten hual amo nechitac huan ma yoje quineltocalo nehual niyulic oc sejsa.

### *Nican quijtúa leca cataya lajcuiluli in amal*

<sup>30</sup> Quinchíac Jesús míac oc sequin lachihualisli inminlaixpan imonextilinijmes hual quinlamahuisultije ca lamajtilisli. Cate lachihualisli hual amo cate lajcuiluli pa in amal. <sup>31</sup> Ma yoje, innojen hual quema, cate lajcuiluli nican, cate lajcuiluli pa yoje anquineltocas Jesús unca in Cristo hual Dios quilajultic pa quipias Dios ilahuelilitisli. Huan cate lajcuiluli pa anquineltocas yihual Dios iXolol, cate lajcuiluli pa yoje anquipías yulilisli pan ipampa quinami anquilalilis anmolaneltocalisli ca itoca.

## 21

### *Jesús monextía ca siete (chicome) imonextilinijmes*

<sup>1</sup> Panuje innojen lachihualisli. Cuaquín Jesús monextilic imonextilinijmes oc sejsa, cataya pa in al huejcalan itoca Tiberias. Huan yojque unca quinami quinmonextilic. <sup>2</sup> Cataloaya lanechiculi nepa Simón Pedro huan Tomás hual noje quitocayaltiloaya “Seinomenten”. Noje cataya Natanael hual yulini pin caltilan Cana pin lalticpan Galilea, huan cataloaya ixolomes Zebedeo huan oc sequin omenten imonextilinijmes Jesús. <sup>3</sup> Huan Simón Pedro quinmilic:

—Nehual nía niquinquitza michin.

Yehuanten quilije:

—Tehuanten noje tiasi timitztocasi.

Quisaje huan calaquije pin barquito huan pa in layúa amo quiq-uitzquiloaya nindeno. <sup>4</sup> Yahuiaya quisa in tonali, huan nepa xalipan cataya Jesús. Ma yoje in monextilinijmes amo quimatiloaya yihual cataya.

<sup>5</sup> Cuaquinon Jesús quinnotzac:

—Nitos, ¿amo anquipía michin pa quicuas se?

Quinanquilije pampa amo quipialoaya.

<sup>6</sup> Huan yihual quinmilic:

—Xiclasacan xictzojuican ca ima cuali in barquito huan anquinquitzaquis.

Cuaquín quitzojuije huan jan axcan etiá ca míac michimes, amo huil quejuae pa quilalilosquiaya in xiquipili hué pin barquito pampa quinmanaje niman míac michimes. <sup>7</sup> Cuaquinon lajtuc in monextilini hual Jesús quinequiaya, yihual quilic Pedro:

—¡Unca in Tata!

Quicaquic Simón Pedro pampa cataya in Tata, molaquentic pampa quiquixtic ilaquen pa tequipanus. Cuaquín molasac pa al. <sup>8</sup> In oc sequin monextilinijmes ajsije pa xalipan pin barquito quitlantihualaloaya in

xiquipili tentataya ca michimes. Amo cataya huejca in xalipan itenco, jan cien metros san. <sup>9</sup> Ajsije pin xalipan, quitaje tixuxli ca ticahuandera huan michin lalalili ipan, huan noje cataya pan. <sup>10</sup> Jesús quinmilic:

—Xiquinhualicacan sequin michimes hual anlamic anquinqutzquic.

<sup>11</sup> Huan uyac Simón Pedro, quitilanac pa xalipan in xiquipili hué tentataya ca michimes huejué, cataloaya ciento cincuenta y tres (Chicomepuhualimajlacli huanye). Huan mas que cataloaya innojen míac, ma yoje amo cotonic in xiquipili. <sup>12</sup> Cuaquín Jesús quinmilic:

—Xihualacan xilacuacan.

Huan amaqui ca in monextilinjmes laicanac pa quilajlanis: “¿Aqui tehual?”, pampa momajtiloaya, quimatiloaya pampa yihual Jesús. <sup>13</sup> Huan hualac Jesús, canac in pan huan quinmacac, huan in michin jan yoje quinmacac.

<sup>14</sup> Ca in, cataya sejpa huan oc sejpa ca ye lanextilisli hual Jesús monextic yultataya oc sejpa ca imonextilinjmes quiman moquetzac huan quisac capa mictataya ca in mijquimes.

### *Jesús laquetza ca Simón Pedro*

<sup>15</sup> Yoje, quiman lamije lacuaje, Jesús quilic Simón Pedro:

—Simón, ti'ixól Juan, ¿tilaicana tichlasojla ca innojen oc sequin quinami nechlasojlalo?

Pedro quilic:

—Quema, Tata, ticmati nimitznequi.

Jesús quilic:

—Xiquinmita huan xiquinlacualti noborreguitos.

<sup>16</sup> Jesús quilic oc sejpa:

—Simón, ti'ixól Jonás, ¿tichlasojla nehual?

Pedro quilic:

—Quema, Tata, ticmati nimitznequi.

Jesús quilic:

—Xiquinlachili huan xiquinlacualti noborregos.

<sup>17</sup> Jesús quilic oc sejpa, huan ca in cataya ca ye lajlanilisli, quilic:

—Simón, ti'ixól Jonás, ¿tichnequi nehual?

Huan quicocuc Pedro iyolo pampa Jesús quilic ca in ye lajlanilisli: “¿Tichnequi nehual?” Huan quilic:

—Tata, ticmati mochi, ticmati nimitznequi.

Jesús quilic:

—Xiquinlachili huan xiquinlacualti noborreguitos. <sup>18</sup> Neli, nimitzilía inon: Ticatani yancuic, timólalilini molacuejtiloni, timocuejtini tehual huan tinejnemini ca capic catani ticnequini. Huan quiman tiviejojtis, tiquinxilanis momajmajuan huan oc se mitzlalilis molacuejtiloni huan mitzhuicas ca capic amo ticnequis tías.

<sup>19</sup> Inon quilic pa quimachiltis Pedro quinami yahuiaya miqui huan pan ipampa imiquilisli quinami yahuiaya quichihuili hué Dios. Huan lamis Jesús quilic inon, cuaquín quilic:

—Xichtoca pa tyes nomonextilini.

### *In monextilini lalasojlali*

<sup>20</sup> Pedro momalinac, quitac in monextilini hual Jesús quilasojlalaya, quinto-catataya. Yihual in monextilini hual mohuilaniaya pa ilaixpan ihuajcol Jesús nepa capa lacuajtataloaya, yihual hual quilajlanis: “Tata, ¿aqui yihual hual



yahui mitztemaca ca yehuanten hual yalo mitzmictilo?” <sup>21</sup> Huan quiman Pedro quitac in monextilini, quilajlanic Jesús:

—Tata, huan ¿len yahui quichía nepa unca?

<sup>22</sup> Jesús quilic:

—Sinda nehual nicnequi pa yihual mocahuas nican pan lalticpan pa quiman ajsis in tonali hual nihualas oc sejpa pan lalticpan, cuaquín ¿len ticpías tehual pa tiquitas ca inon? Tehual xichtoca pa timochías nomonex-tilini.

<sup>23</sup> Yoje, ca moxtin tocnían hual quineltocalo in Tata, mosemanac in lajtol, huan pampa inon yehuanten quiqtuloaya in se monextilini amo quiman yahuiaya miqúi. Ma yoje, Jesús amo quilic pampa amo quiman yahuiaya miqúi. San quilic: “Sinda nehual nicnequi pa yihual mocahuas nican pan lalticpan pa quiman ajsis in tonali hual nihualas oc sejpa pan lalticpan, cuaquín ¿len ticpías tehual pa tiquitas ca inon?”

<sup>24</sup> Huan in monextilini nehual niunca. Huan neli niquilía innojen lajtomes. Noje niunca in monextilini hual niquinmijcuiluc mochi innojen lajtomes. Huan ticmatilo pampa unca melahuac in lajtol hual nehual neli niquiqtúa.

<sup>25</sup> Cate noje míac oc sequin lachihualisli hual Jesús quinchíac. Huan sinda quinmijcuiluloaya (quinmescibiruloaya) mochi sejse, niquiqtúa pampa mochi in lalticpan amo huil cajxiltiaya mochi in amames hual quiqúaloaya pa moiqcuilulosquiaya (moescribirulosquiaya). Yoje ma ye.

## Inon unca hual quichihuajque Jesucristo ilanahuatinijmes

### *Yahui huala in Espíritu Santo*

<sup>1</sup> Teófilo, tehual hual moxtin quimatilo mitzpililo lamajtilisli, nimitz-ijcuiluilía in amal nican. Pa in oc se noamal calica nicpehualtic nolapuhualisli, nimitzijcuiluilic inahuac mochi inon hual pehuac quichíac huan quimaxtic Jesús. Nicpuhuac in hual mitzmachiltic quiman pehuac huan quinami lachijtiahuiaya innojen xixihuil pa quiman ajsic in tonali hual cataya la'ajcoquili pin cielo. <sup>2</sup> Ma yojque, pan tonaliijmes quiman ayamo cataya la'ajcoquili pin cielo, quinmachiltic pan ipampa in Espíritu Santo yehuanten hual quinlajtultic pa yelosquiaya ilanahuatinijmes, quinmachiltic mochi hual quípialoaya pa quichihualosquiaya yehuanten.

<sup>3</sup> Quiman panuc Jesús ilacocoltilisli huan miquic, yihual yulic oc se-ppa. Monextic neli yultataya ca míac nesilisli ca yehuanten ilanahuatinijmes huan yehuanten neli quimatiloaya pampa yuliaya. Huan pan cuarenta tonaliijmes yojque monextitinemiaya ca yehuanten huan quinmil-iaya quinami Dios huelitía.

<sup>4</sup> Pan tonaliijmes quiman ayamo quisac Jesús capa yehuanten, quinmilic pa mocahuasi pa Jerusalén, quinmilic:

—Amo ximohuicacan pa quiahuac Jerusalén. Nepa xicchiacan yihual hual anmitztilanilía noTajtzin. Nehual noje annimitzilic sejpa huan oc sejpa pampa yihual hualas. <sup>5</sup> Juan Lacuayatequini neli lacuayatequiaya ca al. Jan yoje, amo panusi míac tonaliijmes pejticate axcan huan anyahui ancaya lacuayatequili ca in Espíritu Santo. Pampa in, xicchiacan pa Jerusalén, xicchiacan in tonali hual hualas.

### *Jesús unca la'ajcoquili pin cielo (ilhuicac)*

<sup>6</sup> Cuaquinon, quiman ca Jesús monechiculoaya, quilajlanijque, quilijque:

—Tata, ¿axcan tía ticmaca tolali Israel ilahueliltilisli pa huelitis ihuían pa tolali oc sejpa quinami cataya pa yina?

<sup>7</sup> Huan quinnanquilic Jesús, quinmilic, quil:

—Amo unca anmoyaxca pa anquimatis inon. ToTajtzin Dios, jan yihual san unca iyaxca huan quipía lahueliltilisli pa quilis calía tonali yahui panúa inon. <sup>8</sup> Ma yoje, in tonali hual hualas in Espíritu Santo ca amhuanten, yihual anmitzmacas lahueliltilisli huan anquisas pa anquinnahuatis lacames nolamaxtilisli nehual, anquinlaquetzilis inahuac inon pa Jerusalén huan pa mochi in lalticpan Judea huan pin lalticpan Samaria huan pa mochi in lalticpan ca capic unca niman huejca.

<sup>9</sup> Lamíc quinmilic inon, lejcuc Jesús ca yehuanten ilanahuatinijmes quizataloaya. Cuaquinon hualac se mextemil, quitzacuilic, huan yajmo quitajque. <sup>10</sup> Yojque mocahualoaya lachixtataloaya pa pani pin cielo, monextitiquisajque ca yehuanten ome lacames, yehuanten cataloaya lalaquentili ca tzotzomajli iztac. <sup>11</sup> Quinmilijque:

—Lacames galiletecos, ¿leca anmocahua anlachixtica pa in cielo? In Jesús, yihual hual lejcutíac pa in cielo, hualas oc sejpa. Huan quinami anquitac la'ajcoquili, jan yojque anquitas yihual quiman temujtihuallas oc sejpa.

*Quilajtultilo Matías pa quichihuas itequipanulisli Judas*

<sup>12</sup> Cuaquinon quisaje pin lomita (tepetzindi) itoca Olivos, uyaje pa Jerusalén, amo huejca cataya, jan huejquta quinami quijtúa inminlajtol in judíos pa huil nejnemis se pan tonali quiman mosehuilo in judíos. <sup>13</sup> Ajsije pa Jerusalén, calaquije pin cali, lejcuje pa pani capa chantiloaya. Yehuanten cataloaya Pedro huan Jacobo huan Juan huan Andrés huan Felipe huan Tomás huan Bartolomé huan Mateo huan Jacobo ixolol Alfeo. Noje cataya Simón, yihual se ca inminlanechiculisli lacames hual quinequinijme moanalo ca in romanos pa quinlaluxtisi pa quiahuac inminlali in judíos. Inminlanechiculisli motocani cananistas. Huan noje cataya Judas, yihual icni Jacobo. <sup>14</sup> Yehuanten moxtin molaliloaya ca se lajtulisli pa lajlanilosquiaya Dios. Ca yehuanten cataloaya in sihuames huan María inantzín Jesucristo huan noje cataloaya nepa icnián Jesucristo.

<sup>15</sup> Innojen tonalijmes moquetzac Pedro lajco capa in laneltocanijmes, yehuanten cataloaya quinami ciento veinte (chicusepuhuali), huan Pedro quinmilic:

<sup>16</sup> —Nocnián lacames, quiapiaya pa lamis mochías inon hual quijtuc in Espiritu Santo inahuac Judas. Yihual quinlaicanca yehuanten hual hualaje pa quihuicasi lailpili Jesús. In Espiritu Santo technextilía inon pan ipampa in hual quijcuiluc in hué David pa yina. <sup>17</sup> Judas yec se ca tehuanten imonextiliniijmes Jesús, cataya iyaxca pa tequipanus ca tehuanten. <sup>18</sup> Huan mocuhaulic se cuajmili ca in treinta tomin lachihuali ca plata hual quilaxlahuije Judas pa in niman amo cuali hual quichíac. Cuaquín huetzic in lalac pa itzontecon, xopunic icuerpo (inacayo) huan quistiquisaje mochi ilaijtic (icuilaxcol). <sup>19</sup> Quiman quimatijque inon yehuanten hual chantiloaya pin Jerusalén, quitocayaltijque in cuajmili Aceldama. In quinequi quijtúa iCuajmili Esli pa inminlajtol yehuanten. <sup>20</sup> Huan yojque unca lajcuiluli inon inahuac Judas pa iamal in Salmos, quijtúa:

Ma ye lacajcahuali icali,  
huan ma camo chanti amaqui pa icalijtic.  
Huan quijtúa noje:

Ma tequipanu oc se capa yihual tequipanuni.

<sup>21</sup> Pedro laqueztiahuiaya, quinmiliaya, quil:

—Pampa inon, ma tijcalactican ca tehuanten oc se lalac pa quichijtiás Judas itequipanulisli. Quipiás pa yes se hual itequi ca tehuanten quitocaya Jesús. <sup>22</sup> Quipiás pa yes se hual ca tehuanten cataya quiman tipehuaje, quiman Juan quicuayatequic Jesús. Quipiás pa yes se hual mocahuaya ca tehuanten pa in tonali quiman tiquitaje Jesús la'ajcoquili pin cielo. Yoje cayas ca tehuanten oc se lalac hual huil quijtúa neli pampa Jesús yulic oc sejpa.

<sup>23</sup> Cuaquinon quinlajtultijque ome hual cataloaya ca yehuanten, se ca itoca José Barsabas, noje itocaya Justo, in oc se ca itoca Matías. <sup>24</sup> Cuaquinon, moxtin quilajlanijque Dios, yoje quilijque, quil:

—Tata, tehual tiquinmiximati inminyolo moxtin. Xitechnextili axcan calía ca in ome lacames tehual ticlajtultic. <sup>25</sup> Yoje, pa yihual cayas iyaxca itequipanulisli Judas. Yihual quicahuac itequipanulisli quiman quichíac in niman amo cuali. Pampín uyac ca capic cataya iyaxca pa yahuisquiaya.

<sup>26</sup> Cuaquinon quilalijque cuajtzindis lacuixtili huan quisac icuajtzindi Matías. Yojque quilajtultije Matías, huan yihual yec lanahuatini ca in oc sequin once lanahuatinijmes.

## 2

*Huala in Espiritu Santo*

<sup>1</sup> Ajsic in tonali itoca Pentecostés, moxtin cataloaya pan se cali, lajtuloaya pa inminyolo quinami se san. <sup>2</sup> Huan jan ajnaxcan hualajtiquisac se xahuanilisli, quisac pin cielo (ilhuicac) quinami se ijyecal chichahuac. Mocaquic pa mochi in cali calijtic capa cataloaya. <sup>3</sup> Cuaquinon nesiloaya capa yehuanten len quinami sequin tixuxlimes. Mochi sejse cataya chiqueta se inejnepil hual cataya laxiluli. Huan moxiluje mochi sejse innojen tixuxlimes, molalije sejse pan mochi sejse ca yehuanten. <sup>4</sup> Calaquic in Espiritu Santo ca moxtin inminyolo, huan yehuanten pehuaje lajtujé ca oc sequin lajtomes quiman in Espiritu Santo quinhueliltiaya pa lajtusi.

<sup>5</sup> Innojen tonalijmes hualajque pa Jerusalén judíos hual chantiloaya pa mochi in lalimes pin lalticpan, hual axcan chantitataloaya nepa pin caltilan. <sup>6</sup> Yehuanten quicaquiloaya inminxahuanilisli in lanahuatinijmes laqueztataloaya. Pampin monechicujtihualaloaya ca capic cataloaya in lanahuatinijmes, moitaloaya ca lamajtilisli pampa quicaquiloaya in lanahuatinijmes lajtutataloaya ca ilajtol mochi sejse hual lajtuaya pa calía yes lali capa lacatic. <sup>7</sup> Huan momajtitihualaloaya huan moiztihualaloaya ca lamajtilisli moilijtataloaya:

—Xiquitacan. In lacames cate moxtin galiletecos, innojen hual laquezticate. <sup>8</sup> ¿Quinami tiquincacticate yehuanten lajtulo tolajtol tehuanten hual tilajtulo pin lali capa tilacatiye? <sup>9</sup> Sequin ca tehuanten tichantilo pin lali Partia, sequin tichantilo pin lali Media, oc sequin tichantilo pa Elam. Sequin ticate judíos hual tichantilo pin lali Mesopotamia huan in lalticpan Capadocia, huan pin lalticpan Ponto huan pa Asia. <sup>10</sup> Tichantilo noje pin lalticpan Frigia huan pa Panfilia. Tichantilo pa Egipto huan cajcapa pin lali Libia nepa pa itenco in lali itoca Cirene. Sequin ca tehuanten tichantilo pin caltilan hué Roma, nican tichantiticate se ome tonalitos san. <sup>11</sup> Sequin tilacatiye judíos, oc sequin amo tilacatiye judíos, mas que timochihuaje lacames hual ticmolancuacuetzililo Dios quinami in judíos. Sequin tichantilo pin lali Arabia. Ma yoje tiquincacticate innojen galiletecos laquezticate ca tolajtol mochi sejse ca tehuanten, techilijiticate innojen hual Dios quinchía, innojen hual techmolachialtilo ca lamajtilisli.

<sup>12</sup> Yojque molapoluloaya moxtin, amo quimatiloaya len yahuiloaya quijtulo, moililoaya se ca oc se, quil:

—¿Len yes inon?

<sup>13</sup> Huan quinhuitzquiliytinemoaya oc sequin, quijtuje:

—Yehuanten lahuanticate ca iayo uva tzopelic huan yancuic.

*Pedro quinnotza in lalacera*

<sup>14</sup> Cuaquinon moquetzac Pedro ca in once lanahuatinijmes, quinnotzac in lalacera ca lajtol chichahuac, quinmilitic:

—Lacames hual anmolali unca Judea huan anmoxtin hual anchanti pa Jerusalén, xicmatican inon, xijcaquican cuali len nía annimitzilía. <sup>15</sup> Amo lahuanticate in lacames quinami anquijtutica. Amhuanten anquimati pampa nican amo lahuanalo pa huajtzinco, huan jan ticate chichahui horas san pa huajtzinco. <sup>16</sup> No, inon hual anquita panujtica unca in hual quijtuc pa yina Joel, yihual yec Dios ilajtuni. Nía annimitzilía len quijcuiluc. Quijtuc:

<sup>17</sup> Huan pin tonalijmes quiman mochijchías in lalticpan pa lamis, quijtúa quil

Dios, niqincalactilis noEspiritu ca laijtic inminyolo moxtin. Yoje quijtusqui nolajtomes anmoxolomes lacames huan sihuames.

In lacames yajyancuic quinmitasqui laixotocalisli hual Dios quinnexilis, huan in abuelojmes quintemiquisi lajtemijquimes.

<sup>18</sup> Quema, pa in tonali niquinacalactilis noEspíritu ca laijtíc inminyolo nola-palehuinijmes lacames huan sihuames, huan laquetzasqui nonahuac nehual.

<sup>19</sup> Huan nehual niquinchihuas pin cielo lejlen hual lamajtilo, huan nicnextis nolahuellitlisli pa latzindan pin lalticpan.

Cayasi esli huan tixuxli huan pocli tetzahuac, se popucalisli niman hué.

<sup>20</sup> Mopalas in tonali, laticumactis, mochihuas chichiltic in mesli quinami esli.

In yahui panúa quiman ca nadita ajsis in tonali quiman in Tata quinmacas ojli in lacames,

In yes se tonali hual laixpelas míac, lahuis chicahuac.

<sup>21</sup> Huan yoje cayas ca aqúi yes quinoztas itoca in Tata, yihual yes laquixtili pin ipolehuilisli ilaijlaculisli.

Inon unca len quijtúa Dios pan ipampa ilajtuni Joel hual quijcuiluc inon.

<sup>22</sup> Cuaquinon Pedro quinmilic:

—Xijcaquican, lacames israelitos, in hual nía annimitzilía. Jesús hual yulini pin caltilan Nazaret yec se lalac hual Dios anmitznexitlic pampa yihual Jesús yec lalac hual yihual Dios quitilanic. Huan yoje Dios anmitznexitlic inon pan ipampa innojen hual anmitzlachialtije ca lamajtilisli. Innojen yihual quinchíac anmoyampa amhuanten pan ipampa quinami Dios quihueliltic Jesús pa quinchías. Inon amhuanten anquimati. <sup>23</sup> Huan yihual anquimictic pan se cuahuil pan inminpampa lacames hual amo quinelocalo tolajtol. Inon quipanuc, pampa quiman Dios quipehualtic móchi, yihual quilalic pa quipanusquiaya, quimatic pampa yahuiaya quipanu. Huan amhuanten anquitemacac pa quimictilosquiaya. <sup>24</sup> Ma yoje, yihual Dios quiyuliltic, quimacahuac pa camo mocahuasquiaya mictataya Jesús. In miqulisli amo huil quisulahuac Jesús pa camo yulisquiaya oc sejpa. <sup>25</sup> Yoje lajtuc pa yina tohué David inahuac yihual Jesús, quijtuc, quil:

Mojmosta niquitaya in Tata pa nolaixpan, pampa yihual nechlachilía cuali pa camo nicpías len hual nechmajtis.

<sup>26</sup> Pampa in, paquí noyolo huan quijtúa nocamac ilajtomes ca paquilisli hué, huan quema, nocuerpo yuli cantica len cuali hual nichixtica.

<sup>27</sup> Pampa amo ticmacahuiltis pa nehual nimocahuas capa in mijquimes.

Huan amo ticmacahuiltis pa palanis nocuerpo nehual, quema, nehual hual ticlajultic pa nihuelitis.

<sup>28</sup> Tinechmaxtis pa nicanas in ojli capa amo nimocahuas pa niyultías, nicayas ca niman míac paquilisli quiman niunca moyampa.

Joyque quijtuc David hual yec tohué pa yina.

<sup>29</sup> Nocián lacames, annimitzlaquetzilía inahuac točni hué David hual yulini pa yina. Nehual huil annimitzilía ca lajtol melahuac, David in hué miqúic huan quilalpachuje, tiquitalo tehuanten axcan capa quilalpachuje.

<sup>30</sup> Ma yoje, in hué David yec se ilajtuni Dios hual huil quijtuc len yahuiaya panu, pampa Dios quihueliltic. Quimatic David quinami Dios quilic in ca lajtol hual amo mopala. Quilic pampa yihual Dios yahuiaya quichía hué se imiahuil David hual yahuiaya lacati. Yahuiaya ye hué capa David huelitini.

<sup>31</sup> Huan David quimatic inon pa yina quiman ayamo panuc. Pampín lajtuc de quiman yahuiaya yuli oc sejpa yihual hual Dios quilalic pa yes tohué, quema, in Jesús hual moscaltic pa Nazaret. David quijtuc pampa amo yahuiaya ye lacajchuali yihual capa in mijquimes, huan amo yahuiaya palani icuerpo.

<sup>32</sup> In Jesús Dios quiyuliltic oc seppa, huan tehuanten ticate hual tiquitaje timoxtin innojen hual antimitzlaquetzilijtcate. <sup>33</sup> Axcan, Dios quichíac in Jesús pa yes niman hué. Quilalic pa huelitis, axan unca pa ima cuali Dios pa huelitis. Noje Jesús canac ilahueliltilisli Dios pa techtilanilis in Espíritu Santo. Axcan anquiztica huan anquicactica quinami lahueliltía in Espíritu Santo. <sup>34</sup> Xiquitacan. David in hué amo lejcuc pin cielo. Ma yoje yihual ihuán quijtuc:

Dios in Tata quilic noTata:

“Ximolali pa noma cuali,

<sup>35</sup> xicaya nepa pa quiman niquinsulahuas molacocolinijmes.

Niquinneltocaltis tehual.”

<sup>36</sup> Cuaquinon Pedro quinmilic:

—Pampa inon ma quimatican inon moxtin yehuanten israelitos huan ma camo quimahuilcan pampa amo melahuac: In Jesús hual amhuanten anquipiluc pan in cuahuil, yihual Dios quichía pa yihual yes in Tata huan in Cristo.

<sup>37</sup> Quicaquijque inon, quincocuc niman míac inminyolo, quinlajlanijque Pedro huan in oc sequin lanahuatinijmes, quinmilijque:

—Tocnían lacames, ¿len ticchihuasi?

<sup>38</sup> Pedro quinnanquilic:

—Xicpalacan anmoyolo pa anlajnamiquis quinami Dios quinequi, ximocuayatequican anmoxtin pa anquinextilis quinami anquineltoaca in pampa Dios axan technextilic inahuac Jesucristo. Yoje anquinextilis moxtin huan pampa yihual anmoTata. Yoje quinpuppuhuas anmolajlaculisli, noje anmitzmacas in Espíritu Santo pa anmoyolo. <sup>39</sup> Dios quijtuc neli pampa yahuiaya anmijchiuili inon pa amhuanten huan pa anmoxolomes huan pa moxtin hual chantilo huejca, moxtin hual Dios toTata quinnotzas.

<sup>40</sup> Huan ca in lajtomes huan ca míac oc sequin lajtomes, Pedro quinmilic in melahualisli. Quinmilic quinami monequi pa laneltocasqui yehuanten, quinmilic:

—Ximoquixtilican pin polehuilisli capa anunca ca yehuanten hual yulilo quichijtcate amo cuali huan yalo polehuilo.

<sup>41</sup> Cuaquinon, aquinojen quinmixtocaje ilajtomes Pedro cataloaya lacuayatequili. Huan pa in tonali miaje quinami ye mil lacames hual pehuaje quineltoaje Cristo. <sup>42</sup> Huan monechiculoaya mojmosta pa quicaquisi len quimaxtiloaya in lanahuatinijmes. Moxtin chantiloaya quinami cataloaya inmicnían moxtin, monechiculoaya pa quicualosquiaya pan pa quijnamiquisqui in Tata. Huan yehuanten amo quicahualoaya pa quilajlanisqui Dios mojmosta.

### *Yoje yulinijme yehuanten hual ipehuayan quineltoajque Cristo*

<sup>43</sup> Huan Dios ilahueliltilisli quinmomajtiltic moxtin pampa quitaje miaje mochi hual Dios quichíac pan inminpampa in lanahuatinijmes. Pampa inon lachialoaya momajtitataloaya, quiztataloaya innojen hual quinextiloaya Dios ilahueliltilisli. <sup>44</sup> Chantiloaya monechicujtcate in laneltocanijmes huan mochi hual quinpialoaya quinxiluililoaya ca moxtin in oc sequin laneltocanijmes. <sup>45</sup> Quinamacaloaya len quipialoaya huan len inminyaxca, cuaquín quixiluililoaya mochi seje hual monequiaya pa quipiasquiaya len yesquiaya. <sup>46</sup> Huan mojmosta yahuilooaya seppa huan oc seppa pin tiopan hué pampa lajtuloaya pa inminyolo ca se lajtulisli. Quinlapanililoaya in pan quiman quicualoaya ilacualisli in Tata. Lacuajtinemiloaya pa calijtic

inminalimes yehuanten, monechiculoaya pa lacualosquiaya ca paquilisli. Mocahuaya ca paquilisli mochi seje ca iyolo, pampa quimatiloaya Cristo cataya ca yehuanten. <sup>47</sup> Quijtuloaya lajtomes huejué pa Dios, huan moxtin in oc sequin quinmixtocaloaya. Mojmosta in Tatita quinmiactiaya yehuanten hual quinequiloaya quilalilo inminlaneltocalisli ca in Tata. Huan pehualoaya monechiculo ca yehuanten hual axan quineltoajque Cristo. Monechiculoaya ca yehuanten pampa quinequilosquiaya moquixtililo pin ipolehuilisli inminlajlaculisli.

### 3

#### *Unca lapajtli se hual amo huil nejnemiaya*

<sup>1</sup> Panquisaloaya Pedro huan Juan pin tiopan hué pan ye horas pa tiolac. Cataya in hora quiman quilajlaninijme Dios. <sup>2</sup> Cataya nepa se lalac lahualcali, amo huil nejnemiaya, yojque lacatic. Mojmosta quilaliniijme ilaixpan ilalapujquil in tiopan hué, in lalapujquil itocaya Cualtichin. Nepa quilaliniijme pa quinmotemachilis tomin yehuanten hual panujtaloaya pin tiopan hué. <sup>3</sup> Quinmitac Pedro huan Juan pehualoaya calaquito pin tiopan hué. Cuaquin quintemachic pa quimacasquiaya se tomin. <sup>4</sup> Huan mocahuac Pedro quiztataya in lalac, noje Juan quiztataya, huan Pedro quilic:

—Xitechita.

<sup>5</sup> Huan mocahuac quinmiztataya in lalac, quichixtataya yahuloaya quimacalo len tomin yehuanten. <sup>6</sup> Huan Pedro quilic:

—Amo nicpía tomin. Ma yoje, inon hual, quema, nicpía, in nimitzmaca: Ximoquetza huan xinejnemi pan ipampa ilahueliltilisli Jesucristo in nazareteco.

<sup>7</sup> Cuaquinon Pedro quiquitizquic ima cuali in lalac huan cajcoquic. Jan axcan momacatiquisaje chichualisli icxihuajmes huan icayacojmes.

<sup>8</sup> Tzicuinic pani icxihuajmes, moquetzac huan pehuac nejnemic, calaquic ca yehuanten pin tiopan hué calijtic, nejnentiác huan tzicuintiác huan quijtutiác lajtomes huejué pampa Dios quipajtic. <sup>9</sup> Huan moxtin in lalacera quijtajuque nejnentiahuiaya huan quijtutiahuiaya lajtomes huejué pa Dios.

<sup>10</sup> Quimatijque pampa in se yec yihual hual molalini pin tiopan hué ilalapujquil itoca Cualtichin. Quimatijque cataya in se hual motemachilini tomin. Pampa in, molapolultiloaya huan amo quimatiloaya len quijtulosquiaya inahuac inon hual quipanuc.

#### *Inon unca hual Pedro quijtuc pin lasehuán (lasehuayan) huejcanic, itocaya ilanejnemijquil Salomón*

<sup>11</sup> Huan in lalac hual pajtic quinquitizquiaya, amo quinmacahuaya Pedro huan Juan, huan in lalacera molalujtihualaloaya capa yehuanten cataloaya pin lasehuayan pa nejnemisi, itocaya llanejnemijquil Salomón, molapolultihualaloaya míac. <sup>12</sup> Cuaquinon quinmitac Pedro yehuanten, quinmilic:

—Lacames israelitos, ¿leca anmocahua antechiztica pampa panuc inon? ¿leca antechiztica quinami tehuanten ticnejnemiltije in lalac pan ipampa tolahueliltilisli? ¿leca anquijuttica pampa tehuanten ticpialo lahueliltilisli hual amo quipialo oc sequin lacames? ¿Anquijuttica pampa tehuanten tilacames hual ticchihualo míac pa yoje Dios techhueliltilis huan oc sequin lacames amo yoje míac quichihualo? <sup>13</sup> InminDios Abraham huan Isaac huan Jacob, yihual inminDios totajtzizían, unca yihual hual quilalilic lahueliltilisli hué pa iXolol Jesús. Huan amhuanten anquitemacac Jesús ca yehuanten hual huelitilo, huan amo anquinequiaya pa quimacahuasqui

quiman cataya ilaixpan Pilato, mas que Pilato quinequiaya quimacahua. <sup>14</sup> Amhuanten amo anquinequiaya pa yes lamacahuali Jesús in lalac hual amo yec laijlaculi, yihual hual Dios quilajultic. No, amhuanten anquilic pa anmitzmacahuililosquiaya se lamictini. <sup>15</sup> Huan anquimictic in Cristo hual quinzmaca yulilislis moxtin. Ma yoje Dios quiyuliltic oc sejpa, quiquixtic pa capa cate in mijquimes. Tehuanten ticmatilo inon pampa tiquitaje quiman lamije panuje ye tonalijmes huan yihual quisac pa capa quilalpachuje quiman lamic miqic. <sup>16</sup> Huan in lalac nican hual amo huil nejnemini axan amhuanten anquitzica huan anquiximati. Huan Dios quipajtic pampa ticneltocalo ilahueliltislis Jesús. Huan pampa ticneltocalo Jesús, pampin axan in lalac moqueztica lapajtili anmolaixpan anmoxtin.

<sup>17</sup> Huan axcan, nocnían, nicmati pampa amhuanten amo anquimatiaya len anquichihuaya pan in tonali anquimictic Jesús, huan amo quimatiloaya in yehuanten hual huelitilo. <sup>18</sup> Ma yoje, quichíac Dios jan quinami yihual quilalic pa panusquiaya, quijtuc inon quiman ayamo quinchihualtic ilajtunijmes pa lajtulosquiaya quinami iCristo Dios yahuiaya panu lacocoltislis. <sup>19</sup> Pampin xicpalacan axcan anmoyolo, huan xicanacan iojli Dios. Yojque yihual anmitzquixtilis anmolajlaculislis. Yojque anpanus tonalijmes hual nepa Dios anmitzmosehuiltilis anmoyolo. <sup>20</sup> Huan yoje anmitztilanilislis in se hual niman pa quiman anmitzmachiltije. Yihual in se hual Dios quilajultic, nicnequi niqijtúa, in Jesús in Cristo.

<sup>21</sup> Axan yihual quipías pa mocahuas pin cielo, huan nepa mocahuas pa in tonali quiman Dios yahui quinmelahua huan quinyancuilia mochi. Inon pehuani quiytu Dios quiman pehuac in lalticpan. Quijtuni pan inminpampa ilajtunijmes hual quinlajultic. <sup>22</sup> Yojque se ca innojen, Moisés, quinmilic totajtzitzián, quinmilic, quil: “Anmitztilanilislis in Tata anmoDios se hual nesic capa amhuanten anmocnían, se hual yes lajtuni quinami nehual. In se anquineltochas mochi hual anmitzilislis. <sup>23</sup> Huan aqui yes amo quineltochas in lajtuni” quijtuc Moisés, “cuaquín in se yajmo cayas ca yehuanten hual iyaxca Dios. Dios quipolehuiltilis ca polehuilislis hual amo quiman lamis.”

<sup>24</sup> Yoje —quinmilic Pedro—, moxtin ilajtunijmes Dios quijtunijme inon. Pehuac lajtuc Samuel huan cuaquinon lajtuloaya moxtin in oc sequin lajtunijmes hual yultihualaloaya quiman polehuic Samuel. Moxtin yehuanten lamachiltijque inahuac len yahuiaya panu pan tonalijmes capa tiyulticate axcan tehuanten. <sup>25</sup> Amhuanten anunca aquinojen hual anquipías innojen hual cuali, pampa anunca imiahuimes ilajtunijmes Dios. Jo quema, huan in lajtulislis hual Dios quichíac ca totajtzitzián unca pa amhuanten noje. Ca in lajtulislis Dios quilic Abraham, quil quilic: “Momialhuil quinchihuilislis cuali moxtin yehuanten pin lalticpan.” <sup>26</sup> Dios quiquixtic iXolol Jesús capa cataya ca in mijquimes, huan pejtataya ca amhuanten, anmitztilanilic Jesús pa yoje anmijchihuilisquiaya cuali, pa yojque yajmo anyulislis anquichijtica laijlaculislis.

## 4

*Pedro huan Juan quijtulo ilamaxtilislis Cristo inminlaixpan yehuanten hual huelitilo*

<sup>1</sup> Quinmilijtataloaya in lalalera inon Pedro huan Juan, huan jan ajnaxcan moqueztiqusaje inminahuac in tiopistas huan ilaicnani ilachianijmes in tiopan hué. Huan ca yehuanten hualaloaya innojen hual quineltochaloaya ilamaxtilislis in saduceos. <sup>2</sup> Cualaniloaya pampa Pedro huan Juan quinmaxtiloaya inahuac Jesús. Quinmiloaya pampa Jesús miqic huan cuaquinon



yulic oc sejpa. Huan pampa in, quil, moxtin yulisi oc sejpa quiman miquilo. <sup>3</sup>Yojque, quinqutzquijque huan quintzacuajque pa calijtic pa quiman ajsi-aya mostatica, cuaquinon huil quinlajlanilosquiaya. Yojque quichihujque pampa tiolactiaya huan amo monechicujtataloaya in huejueyenten. <sup>4</sup>Ma yoje, quineltocaloaya niman míac lacames ca yehuanten hual quicaquijque in lajtol. Yojque miajque in laneltocanijmes. Axcan ajsije yeje quinami macuili mil lacames hual quineltocaloaya Cristo.

<sup>5</sup>Cuaquinon mostatica monechicujque inminhuejueyenten in judíos huan in abuelojmes huan in lamaxtinijmes hual quinmaxtiloaya inminlajtomes in judíos. <sup>6</sup>Ca yehuanten cataloaya Anás, yihual in tiopista hué, huan Caifás ilahuical ixolol sihual Anás, huan Juan huan Alejandro huan moxtin in lacames hual yeje inmicnían in tiopistas huejué, inmicnían pa oc sequin calimes. <sup>7</sup>Quinlaliyque Pedro huan Juan inminlaixpan yehuanten, quinlajlanijque:

—¿Ca aqui ilahueliltilisli anquichíac inon?

<sup>8</sup>Cuaquinon in Espíritu Santo quihueliltic Pedro pa quinmilis, quil:

—Amhuanten inminhueyenten huan inminabuelojmes in israelitos, <sup>9</sup>antechlajlantica axcan inahuac len cuali ticchihuilijque in lalac cocoxqui, antechlajlantica ca aqui ilahueliltilisli yihual pajtic. <sup>10</sup>Ximatican anmoxtin huan ma quimatican inon mochi Israel: Unca ca ilahueliltilisli Jesucristo in nazareteco calica in se moqueztica anmolaixpan lapajtli. In Jesús anquip-iluc pan se cuahuil huan anquimictic. Ma yoje, Dios quiyuliltic oc sejpa, quiquixtic capa cataya ca in mijquimes. <sup>11</sup>Pan ipampa se ilajtuni, yihual Dios quiytuc pampa cataloaya sequin lacames hual quichijtataloaya se cali. Cataya se tixcali hual amo quinequiloaya quilalilo pin cali. Ma yoje iteco in cali quilalic in tixcali capa quipialoaya pa quitequipanulosquiaya in tixcali yehuanten hual quichijtataloaya in cali. Jesús unca quinami in tixcali, unca in itixcali hué in cali. Huan Dios unca quinami iteco in cali. Yoje, Dios quilalic in Jesús pa ima cuali yihual. <sup>12</sup>Huan amo unca oc se, jan yihual Jesús san hual huil tejchipahuilis toyolo, amo quitilanic Dios oc se pin mochi lalticpan hual quipía lahueliltilisli pa techquixtilis pin ipolehuilisli tolaijlaculisli, jan Jesús san.

<sup>13</sup>Innojen tiopistas huan in huejueyenten quitaje quinami Pedro laquetzaya amo momajtitataya, huan noje amo momajtiaya Juan. Noje quimatije pampa yehuanten yeje lacames hual amo uyajque momaxtijque ca in lamaxtinijmes, amo yeje lacames ca laquetzalisi. Pampa in, mopolutiloaya, pehuajque quijnamiquijque pampa Pedro huan Juan cayanijme ca Jesús. <sup>14</sup>Noje quitaloaya in lalac hual pajtic, nepa ca Pedro huan Juan moqueztataya. Yojque amo huil quiytuloaya len amo cuali inahuac in hual quichihuilijque in lalac Pedro huan Juan. <sup>15</sup>Ma yoje, quiman quinmilijque in yeyenten pa quisasqui pa quiahuac capa monechicujtataloaya, molaquetzililoaya, moililoaya:

<sup>16</sup>—¿Len tiqinchihuilisqui innojen lacames? Moxtin hual chantiticate pa Jerusalén quimatilo pampa quipajtijque yehuanten ca se lahueliltilisli in se hual amo huil nejnemiaya. Tehuanten amo huil tiquijtulo pampa islatijiticate, pampa nepa unca in lalac hual pajtic. <sup>17</sup>Ma yoje, pa yajmo momachiltitias ca in lalacera israelito len quipanuc in lalac, ma tiquinmajtican tiquinmilijiticate pa yajmo quinlaquetzilisqui lacames ilajtol Jesús.

<sup>18</sup>Cuaquinon quinnotzajque Pedro huan Juan, quinmilijque pa calaquisqui. Quinmilijque pa camo quiman quilaquetzilitinemisqui

amaqui inahuac Jesús, huan pa camo lamaxtinemisqui ca ilamaxtilisli. <sup>19</sup> Huan quinnanquilijque Pedro huan Juan, quinmilijque:

—Ximoiynamiquican calía unca cuali ilaixpan Dios pa ticchihuasi. ¿Unca cuali pa antimitzneltocasi amhuanten o pa ticneltocasi Dios? <sup>20</sup> Tehuanten amo huil timocahualo pa tilaqueztinemisi inahuac in hual tiquitajque huan tijaquijje.

<sup>21</sup> Oc sejpa in tiopistas huan in huejueyenten quinmilijque pampa yahuilloaya quinpitzifilo tixuxli sinda amo quinneltocaloaya. Cuaquinon quinmacahuajque. Momajtiloaya pa quinmacasqui lacocoltilisli pampa in lacalera pin caltilan cualanilosquiaya ca yehuanten sinda yoje huan quinchihuililoaya. Moxtin quinmijttataloaya lajtomes huejué pa Dios huan quisejtataloaya pampa in lacal axcan huil nejnemiaya. <sup>22</sup> Cataya pampa lacatic in lacal quinpiaya quinami cuarenta y un, dos, tres (ompuhualihuanse, ome, ye) xixihuimes.

### *Moxtin in laneltocanjmes quilajlanilo Dios pa quinpalehuis*

<sup>23</sup> Quiman quinmacahuajque Pedro huan Juan, yehuanten uyajque ca capic cataloaya in oc sequin laneltocanjmes, quinmachiltijque mochi inon hual quinmilijque in tiopistas huejué huan in abuelojmes. <sup>24</sup> Yojque, quiman quicaquijque in, moxtin quilajlanijque Dios ca se lajtulisli, quilijque:

—ToTata hué, tehual tiquinchíac in cielo huan in laticpan huan in al huejcalan. <sup>25</sup> Huan pan ipampa in Espíritu Santo, tehual Dios ticchíac pa David quijcuiluc molajtomes, quijtuc:

¿Leca mocuajcualantitinemiloaya yehuanten hual amo molacames?

Huan ¿leca quijtulo ilacames Israel len hual amo monotza?

<sup>26</sup> Hualalo in huejueyenten huan in huelitinijmes, monechiculo pa molaquetzilisqui pa quintzaculisqui Dios huan in lacal hual Dios quilajtultic pa yes hué, yihual Cristo.

<sup>27</sup> Huan neli monechicuje nican pa Jerusalén, monechicuje pa latexpahuisi in huejueyenten pa yoje huil quimictisi motequipanujquil hual ticlajtultic, in Jesús hual ticlajtultic pa yes moCristo. Jo quema, monechicuje in hué Herodes huan Poncio Pilato ca in lacames pa oc sequin lalimes huan ca ilacames Israel. <sup>28</sup> Monechicuje pa quichihuasi mochi inon hual tiquijtuc pampa yahuiaya panu pan tonalijmes quiman ayamo panuc. <sup>29</sup> Huan axan, Tata, xiquita quinami quinequilo techmajtilo yehuanten. Xitechmaca tehuanten motequipanujquimes mochi chicahualisli pa ticmachiltisi mola-jtol. <sup>30</sup> Itoca moXolol Jesús hual ticlajtultic pa yes hué quipía lahueliltisli. Pampin pan ipampa ilahueliltisli Jesús xitechmaca tehuanten lahueliltisli pa tiquinpajtisi cocoxquimes, huan pa ticchihuasi míac hual quinmolapolul-tisi lacames pampa tiquinnextilijtica molahueliltisli.

<sup>31</sup> Lamijque quilajlanijque Dios, cuaquín molinic in cali capa monechiculoaya, pampa hualac in Espíritu Santo, quinhueltic moxtin, huan yehuanten quijtuloaya ca lahueliltisli ilajtol Dios.

### *Jesucristo ilacames moxiluililo se ca oc se len inminyaxca*

<sup>32</sup> Huan pa inminyolo quipialoaya jan se lajtulisli yehuanten hual quinel-tocaloaya ilajtol Dios. Moxtin quijttataloaya jan yoje, amaqui quijtuaya pampa in hual quipiaya yahuiaya ye pa yihual ihuían. Moxtin quijtuloaya pampa yahuiaya ye pa moxtin laneltocanjmes. <sup>33</sup> In lanahuatinijmes amo mocahuajque pa quijttatinemilosquiaya ilamachiltisli in Tata hual yulic oc sejpa. Laqueztinemiloaya ca ichicahualisli in Espíritu Santo. Huan moxtin in oc sequin quinmixtocaloaya in lanahuatinijmes míac. <sup>34</sup> Huan

amo cataya amaqui ca yehuanten hual amo quipiaya nindeno, pampa in tecojuan hual quinpioaloaya inminlalimes huan calimes quinnamacajque. <sup>35</sup> Cuaquinon quinhualiquilijque in lanahuatinijmes in tomin hual canajque quiman quinnamacajque. Cuaquinon in lanahuatinijmes quixiluililoaya mochi seje hual moqueiaya pa quiapiasquiaya len. <sup>36</sup> Cataya se itoca José hual in lanahuatinijmes quitocayaltije Bernabé, itoca quinequi quijtúa lacal hual quimati quinlacahualtía oc sequin. Yihual yec se judío ca imiahuimes Leví. In Leví yec se ca in doce lacames hual quinpehualtije yehuanten in israelitos, yulini pa yina. In Bernabé lacatic pa se lali itoca Chipre hual unca lajco pin al huejcalan. <sup>37</sup> Yihual quiapiaya se cuajmili huan quinamacac, quinhualiquilic in lanahuatinijmes in tomin.

## 5

### *Inminlajlaculisli Ananías huan Safira*

<sup>1</sup> Huan cataya se lacal itoca Ananías, quiapiaya isihua itoca Safira. In Ananías quinamacac se icuajmili. <sup>2</sup> Yihual moajcoquilic se omito in tomin hual quilaxlahuijque. Huan isihua quimatiaya inon huan cataya ca se lajtulisli ca ilahuical. Yojque, Ananías quinhualiquilic in lanahuatinijmes in oc se ilajco in tomin, quinnmiliaya pampa quinmacaya mochi. <sup>3</sup> Cuaquinon Pedro quilic:

—Ananías, ¿leca ticchiác inon calica Satanás mitztilanilic moyolo pa tislacatis ca in Espíritu Santo? Timoajcoquilijtica se omito in tomin hual mitzlaxlahuijque. <sup>4</sup> ¿Amo cataya moyaxca in cuajmili quiman ayamo ticnamacac? Huan quiman ticnamacac, ¿amo cataya moyaxca in tomin? ¿Leca nuso ticlalic pa ticchiasquiaya inon? Amo tislacatic ca lacames, tislacatic ca Dios.

<sup>5</sup> Quincaquic in lajtomes Ananías, hueztiquisac, polehuic. Huan moxtin, quiman quimatijque inon pehuajque momajtijque míac. <sup>6</sup> Cuaquinon moquetzajque in lacames yajyancuic, quilaquentijque, quihuicajque huan quilalpachujque.

<sup>7</sup> Mocahuac se nadita, quinami ye horas, calaquic isihua, amo quimatiaya len panuc. <sup>8</sup> Huan Pedro quilic:

—Xichili sinda anquinamacac anmocujmili ca yoje míac tomin.

Huan yihual quinanquilic:

—Jo quema, ca yoje míac.

<sup>9</sup> Huan Pedro quilic:

—¿Leca nuso anmocahuac ca in lajtulisli tehual huan molahuical pa anquichías inon? ¿Cuajnesi anquijtuc pampa huil anquicuajcuamanac in Espíritu Santo? Xiquita. Mocaqui capantihualalo pin lalapujquil inmicxi-huajmes innojen hual quilalpachuje molahuical, tehual noje mitzhuicasi.

<sup>10</sup> Huan hueztiquisac Safira pa icxihuajmes Pedro, polehuic. Calaquijque in lacames yajyancuic, quitajque mictataya, quihuicajque yihual noje, quilalpachujque inahuac ilahuical. <sup>11</sup> Pampín momajtiloaya míac moxtin in laneltocanijmes huan momajtiloaya moxtin hual momachiltijque ca innojen hual panujque.

### *Quichihualo míac hual quinlapolutilo moxtin*

<sup>12</sup> Huan Dios quinnextiliaya ilahuelilitlisli yehuanten ca innojen míac hual quinchihuaya pan inminpampa in lanahuatinijmes. Huan moxtin in laneltocanijmes quipialoaya se lajtulisli san, monechiculoaya pin lanejnemijquil Salomón hual cataya pin tiopan hué. <sup>13</sup> Ma yoje, in oc sequin hual amo

quineltocaloaya momajtiloaya yahuilco capa monechiculoaya in laneltocanimjes, mas que quinmixtocaloaya míac in laneltocanimjes. <sup>14</sup>Huan mojmosta miajtiahuilcoaya aquinojen quineltocaloaya in Tata Jesús, huan cataloaya míac sihuames jan quinami cataloaya lacames. <sup>15</sup>Cuaquinon yoje quinhualicajque pin ojlimes in cocoxquimes, quinlalijque pan lapexlimes huan pan pelames. Yoique quiman panuaya Pedro, cuajnesi quinmacasquiaya ilasehuán pan in cocoxquimes pa yoique pajtilosquiaya. <sup>16</sup>Noje hualaloaya yehuanten hual chantiloaya pa innojen caltilan pa itejtenco Jerusalén. Quinhualicaloaya in cocoxquimes huan aquinojen quinplaloaya iijyecames amo cuajcuali, huan moxtin cataloaya lapajtli.

### *Quintzacualo pin calijtic in lanahuatinijmes*

<sup>17</sup>Cuaquinon pehuac moxicuc chicahuac in tiopista hué, yihual huan moxtin hual cataloaya ca yihual, yehuanten hual quineltocaloaya ilamaxtilisli in saduceos. <sup>18</sup>Huan quinquitziqijque in lanahuatinijmes, quintzacuajque pa calijtic. <sup>19</sup>Ma yoje, pa layúa in Tata ilanahuatini pin cielo quinlapulic in ilalapunquimes in calijtic capa cataloaya latzacuali, quinlaicanac pa quiahuac, quinmilic:

<sup>20</sup>—Xiacan, ximoquetzacan pin tiopan hué huan xiquinnahuatilian moxtin yehuanten mochi ilamachiltisli cuali in yulilisli hual Jesús quimaca.

<sup>21</sup>Yoique, quicaquijque inon, calaquijque pin tiopan hué quiman lanestihualaya, huan pehualoaya lamaxtilo. Lamaxtiloaya in lanahuatinijmes, hualajque in tiopista hué huan aquinojen cataloaya ca yihual, ajsijque pa oc se icalijtic in tiopan hué. Quitlanijque lajtol pa monechicusqui moxtin in Lanechiculisli Hué ca moxtin inminabuelojmes in lali Israel. Cuaquinon quintlanijque lachianijmes pa quinhualiquilisqui in lanahuatinijmes hual cataloaya latzacuali pin calijtic. <sup>22</sup>Huan ajsijque nepa in lachianijmes hual quintlanijque pa quinmanasqui in lanahuatinijmes, amo quinmitajque.

<sup>23</sup>Mocuepajque, lamachiltitihualajque, quinmilijque:

—Tiquitaje in calijtic latzacuali cuali huan in lachianijmes moquezat-aloya pan lalapunquimes. Ma yoje, techlapulije, amo tiquitaje amaqui calijtic.

<sup>24</sup>Quicaquijque inon in tiopista niman hué huan inminlaicanani in lachianijmes huan in tiopistas huejué, amo quimatiloaya len quijtulosquiaya, quijtujque:

—¿Len panuc, huan len yahui panúa axan?

<sup>25</sup>Cuaquinon hualac se, quinlamachiltic, quinmilic:

—Xiquitacan. Innojen lacames hual anquintzacuac calijtic axan cate moquezticate pin tiopan hué, quinmaxtificate in lacames.

<sup>26</sup>Cuaquinon hualajque ilaicanani in lachianijmes huan ilacames huan quinhualicajque in lanahuatinijmes. Ma yoje, quinhualicajque amo quintecuatiahuilcoaya, pampa momajtiloaya cuajnesi in lacames hual quincaguilloaya quinlaxililosquiaya tixcalimes sinda quinchihuilijtiahuilosquiaya lacocoftilisli.

<sup>27</sup>Yoique quinhualicajque, quinlalijque lajco capa in Lanechiculisli Hué, huan in tiopista hué quinmilic:

<sup>28</sup>—Tehuanten in Lanechiculisli Hué antimitzilijque chicahuac pa como anquinmilis ilamaxtilisli in se itoca Jesús, huan xiquitacan, moxtin pa Jerusalén quimatilo inon hual anquimaxtica. Huan anquinetica antechmotexpahuilía yoique quinami tehuanten ticataloaya hual ticmictijque in lalac.

<sup>29</sup> Cuaquín quinnanquicil Pedro ca in oc sequin lanahuatinijmes, quinmilic:

—Ticpialo pa ticneltocasi Dios sinda lacames techililo pa camo ticchihuasi in hual Dios techilía pa ticchihuasi. <sup>30</sup> InminDios totajtztzian cataya yihual quiyuliltic oc sejpa Jesús hual amhuanten anquimictic. Anlatilanic pa quipilusi pan se cuahuil. <sup>31</sup> Ma yoje Dios axan quimacac Jesús lahuelilitisli hué pa yes laicanani pa huil huelitis quinami Dios huan pa quinquixtis lacames pin ipolehuilisli Dios icualanilisli. In Jesús Dios quimacac lahuelilitisli pa quinpuphuas lacames inminlajlaculisli, pa quinquixtilis inminlajlaculisli. <sup>32</sup> Huan tehuanten ticmatilo pampa neli cate in lajtomes hual tiquijtuticate, huan in Espíritu Santo unca pa toyolo. Yihual in Espíritu Santo Dios quinmaca moxtin hual quineltoalo huan in Espíritu Santo techmaxtia pampa in hual tiquijtulo unca melahuac.

<sup>33</sup> Quicaquijque inon yehuante pin Lanechiculisli Hué, cualanijque niman chicahuac huan quinequiloaya quinmictilo in lanahuatinijmes. <sup>34</sup> Cuaquín moquetzac nepa ca in lanechiculisli se ca yehuante hual quineltoaloaya ilamaxtilisli in fariseos, yihual itocaya Gamaliel. Yihual yec se ilamaxtini inminlajtol in judíos, quilasojlaloaya moxtin lacames. Quinmilic pa quinquixtilosquiaya in lanahuatinijmes pa quiahuac pa je nadita. <sup>35</sup> Cuaquinon laquetzac ca yehuante pin lanechiculisli, quinmilic:

—Lacames israelitos, xiclachilican inahuac in hual anyahui anquinchihuilía innojen lacames. <sup>36</sup> In annimitzilía, pampa monequi pa anquijnamiquis quinami amo quipía míac xixihuil quiman yulini in se itoca Teudas hual quijtuni pampa yihual yec hué lacal huan quitocanjime quinami nahui cientos lacames. Huan in Teudas cataya lamictili huan moxtin hual quitocanjime mosemanaloaya ca capic yes, huan yojque yajmo nesiaya ilanechiculisli. <sup>37</sup> Panuc inon, nesic Judas in galiletco, catanijme in tonalijmes quiman in hueyeyenten quinquihualoaya moxtin. Yihual quinlaicanac míac lacames hual quitocanjime. Huan yihual noje miquic huan mosemantiaje moxtin hual quitocanjime. <sup>38</sup> Huan axcan annimitzilía inon: ximijcuanican pa camo anquintzacuas in lacames. Xiquincahuacan, pampa sinda in hual quichijticate unca san hual lacames quinchijticate, cuaquín amo huejcahuas pa mosehuis. <sup>39</sup> Ma yojque, sinda unca iyaxca Dios in hual quichijticate, cuaquín amhuante amo huil anquintzaculis. Pampa in, xiquincahuacan pa camo anmoitas anmoantica ca Dios.

<sup>40</sup> Cuaquinon, quixtocajque in hual quinmilic Gamaliel. Yojque, quiman quinnotzajque in lanahuatinijmes, quinhuitequijque, quinmilijque chicahuac pa yajmo quilamachiltinemilosquiaya Jesús ilamaxtilisli. Cuaquinon quinmacahuajque. <sup>41</sup> Ma yoje, quisajque in lanahuatinijmes, ca paquilisli quisajque pin Lanechiculisli Hué, pampa Dios quinchihuilic len hué. Quinchihuilic hué pampa quinmacahuilic pa panusqui lacocoltisli pampa quineltoaloaya Jesucristo. <sup>42</sup> Huan mojmosta amo mocahualoaya pa quimaxtilosquiaya huan pa quinahuatilosquiaya ilamachiltisli cuali Jesucristo. Quichihualoaya pin tiopan hué huan calpanuloaya lamaxtitataloaya pa inminchan moxtin.

## 6

*Quinlajtultilo chicome lacames lapalehuinijmes pa quinxiluililo in hual quicualoaya*

<sup>1</sup> In tonalijmes miajque innojen hual quineltoaloaya Cristo. Huan yehuanten hual lajtuloaya griego nadita cualaniloaya ca yehuanten hual lajtuloaya hebreo. Cataya pampa in sihuames inminhuían hual lajtuloaya griego amo quipialoaya míac pa quicualosquiaya. Amo quinmacaloaya míac quinami quinmacaloaya in sihuames inminhuían hual lajtuloaya hebreo. Inon quinpanuc quiman yes quinxiluililoaya len quicualosquiaya mojmosta. <sup>2</sup> Cuaquinon in doce lanahuatinijmes quinquahuatijque pa monchicusqui moxtin in laneltocanijmes, quinmilijque:

—Amo unca cuali pa tehuanten in lanahuatinijmes timocahuasi pa ticmaxtisi ilajtol Dios pa tiquinxiluilisi len quicuasi. <sup>3</sup> Pampín, tocnían, xiquinlajtultican chicome lacames capa amhuanten, lacames hual in Espiritu Santo quinhueliltía, lacames hual quimatilo míac. Tiquinlajtultisi pa quinxiluilisi in lacuali. <sup>4</sup> Huan tehuanten in lanahuatinijmes ticayasi ticlajlanticate Dios huan tiquinnahuatilijtcate moxtin ilajtol.

<sup>5</sup> Cuaquín moxtin quitajque pampa cuali in lajtol. Quilajtultijque Estéban, yihual yec lalac hual míac quimatiaya quineltoaloaya ilajtol Dios, huan in Espiritu Santo moyaxcajtiliaya iyolo. Noje quinlajtultijque Felipe huan Prócoro huan Nicanor huan Timón huan Parmenas huan Nicolás. (Nicolás yulini pin caltilan hué Antioquía. Yihual lacatic pa oc se lali, amo yec judío napa capa lacatic, san pehuac quineltoacac in judíos inminlamaxtilisli quinami quimolancuacuetzililo Dios. Cuaquinon pehuac quineltoacac Cristo.) <sup>6</sup> Lamijque quinlajtultijque in chicome lacames, quinhualicajque inminlaixpan in lanahuatinijmes. Yehuanten in lanahuatinijmes quinlalilijque inminmajmajuan pan in chicome lacames huan quilajlanijque Dios pa yehuanten. Yoique lanextilijque pampa yehuanten in chicome lacames yahuiloaya quitequipanuililo Dios quinxiluilijtcate in hual quicualoaya.

<sup>7</sup> Huan míac oc sequin pehuajque quicaquijque ilajtol Dios, huan pa Jerusalén miajtiajque niman míac aquinojen hual quineltoaloaya Cristo. Quema, míac tiopistas judíos pehuajque quineltoajque Cristo.

### *Quiquitzquilo Estéban*

<sup>8</sup> Huan Dios quihueliltic Estéban pa quinchíac míac hual pampa innojen molapolultiloaya moxtin. Innojen hual quinchíac cataloaya hual quinextiaya Dios ilahueliltisli.

<sup>9</sup> Ma yoje, cataloaya sequin lacames judíos hual yehuanten inmintiopan itocaya inmintiopan in tequipanujquimes lamacahuali, huan cataloaya oc sequin judíos hual inminlali itoca Cirene, huan oc sequin hual yulinijme pin caltilan hué Alejándria, huan oc sequin hual yulinijme pin laticpan itocaya Cilicia huan pin oc se laticpan itocaya Asia. Huan Estéban quinquahuatizilijtinemiloaya inahuac ilajtol Dios, huan yehuanten amo quinequiloaya quineltoalo len quimaxtiaya Estéban. <sup>10</sup> Ma yoje, amo huil quisalahualoaya Estéban ca yehuanten inminlajtomes, pampa in Espiritu Santo amo mocahuac pa quimacas Estéban lajmatilisli huan quimacac lajtol calica quinlanquiliaya. <sup>11</sup> Cuaquinon quinmanajque lacames, quinmilijque pa islacatisqui quimotexpahuilijtcate Estéban. Quinmilijque pa quijtutinemisqui quinami quicaquijque Estéban quinhuejuecaltitayaya Moisés huan Dios. <sup>12</sup> Yoique quincualantitinemiloaya in lalacera huan in abuelojmes huan yehuanten hual quimaxtiloaya inminlajtol in judíos. Hualajtiquisajque, quiquitzquijque Estéban huan quihuilanajque pa in Lanechiculisli Hué. <sup>13</sup> Cuaquinon moquetzajque yehuanten hual yahuiloaya islacatilo pa quimotexpahuililosquiaya Estéban, quijtujque islaticatijtcate:

—In lacal amo mocahua pa laquetzas len amo cuali inahuac in lasojli tiopan hué huan inahuac ilajtol Moisés. <sup>14</sup> Ticmatilo inon pampa tijcaquijque yihual quijtutataya, quil, pampa in Jesús, in se hual yulini pa Nazarét, quil, quixitinis in lasojli tiopan hué huan quinpalas in lajtol hual Moisés techtemacac.

<sup>15</sup> Huan moxtin nepa hual cataloaya pin Lanechiculisli Hué quitaloaya Estéban, amo mocahualoaya pa quitalosquiaya iixco. Quitajque cahuan-tataya iixco chicuenta iixco se ilanahuatini in cielo.

## 7

### *Monopatía Estéban inminlaixpan yehuanten hual lahuelilitlo*

<sup>1</sup> Cuaquinon in tiopista hué quilajlanic Estéban, quil:

—¿Unca yojque inon hual quijtulo?

<sup>2</sup> Huan Estéban quinnanquilic:

—Lacames nocnían huan notajtztizían, xilacaquican. In Dios hual quipía mochi lahuelilitlisli hué monextilic totajtzin Abraham. Cataya pin lali itoca Mesopotamia, cataya quiman ayamo pehuac chantic pin lalticpan itoca Harán. <sup>3</sup> Dios quilic: “Xiquisa pa molali huan pa capa cate mocnían, huan xía pa in lali hual nimitznextilis.” <sup>4</sup> Cuaquinon, quisac pa inminlali in caldeos, chantiaya pa Harán. Huan quiman polehuic itajtzin, hualac Abraham pa chantis nican pin lali capa amhuanten anchantitica axan. <sup>5</sup> Dios amo quimacac Abraham se nadita in lali nican pa yesquiaya iyaxca. Ma yoje, quilic neli pampa yahuiaya quimaca in lali pa quipiasquiaya. Huan amo mocahuasquiaya pa yes inminyaxca yihual huan imiahuimes, mas que ayamo quipiac Abrahám se ixolol. <sup>6</sup> Yojque Dios quijtuc noje pampa Abraham imiahuimes yahuilooaya chantilo pa oc se lali hual amo inminyaxca. Dios quijtuc pampa yehuanten pa in oc se lali yahuilooaya quinchihualo imiahuimes Abrahám tequipanujquimes hual amo quilaxlahuilo. Yahuilooaya quinchihuililo amo cuali pa nahui cientos xixihuimes. <sup>7</sup> Ma yoje, Dios quilic: “Niquincocoltis yehuanten hual quinchihuilisqui yojque. Huan quiman panus inon, cuaquín quisasqui momiahuimes huan nechmolancuacuetzil-squi pin lali nican.”

<sup>8</sup> Cuaquinon quichíac Dios se lajtulisli ca Abraham, —quinmilic Estéban—, huan pa monexitis in lajtulisli, quinqtequilijque naditita inmincuilaxli in xolomes lacames, huan yojque amo timocahualo pa tiquinchiuilisi yoje toxolomes tehuanten in judíos timoxtin. Yojque quiman lacatic Isaac hual yec ixolol Abrahám quichíac chicué tonalijmes, cuaquinon quitequilic icuilaxli. Cuaquinon Isaac quipiaya ixolol Jacob huan pa Jacob lacatije in doce lacames, yehuanten hual quinpehualtije in doce inminlanechiculisli imiahuimes hual ticate tehuanten in judíos. <sup>9</sup> Huan moxiculoaya ixolomes Jacob ca inmicni José, pampín quinamaquiltije José icnían oc sequin lacames hual quihuicaje quinami tequipanujquil ilpitataya pa in lali Egipto. Ma yoje, Dios cataya ca José. <sup>10</sup> Quiquixtilic pa mochi icocoltilisli hual panuc. Noje Dios quixtocaltic José in Faraón hual yec in hué nepa Egipto. Quixtocac pampa Dios quimacac José míac lajmatilisli. Yoje Faraón quilalic José pa yes huelitini pin lali Egipto huan pa moxtin yehuanten hual cataloaya pa ichan Faraón.

<sup>11</sup> Cuaquín ajsic se mayandi pa mochi in lali Egipto huan pa tolali Canaan. Panuloaya míac mayanalisi, amo quitaloaya len quicuajque totajtztizían.

<sup>12</sup> Cuaquín quilijque Jacob pampa cataya, quil, trigo pa Egipto, pampín pehuac quintilanic pa Egipto ixolomes hual yeje totajtztizían, quintilanic



pan trigo. <sup>13</sup> Huan quiman Jacob quintilanic oc seppa pa Egipto, cuaquinon José quinmachiltic icnían pampa yihual inimicni José pampa ayamo quislacuje. Yojqque, Faraón in hué quimatic in lali capa lacatic José huan noje quimatic ca len lacames yihual lacatic. <sup>14</sup> Cuaquín José quintilanic icnían pa quinmanasi Jacob huan moxtin yehuanten pa inminchan. Cataloaya setenta y cinco (yepuhualicaxtuli) lacames huan sihuames. <sup>15</sup> Huan uyac Jacob, quisac pa in lali Canaan pa yas pa Egipto. Nepa polehuic Jacob huan cuaquinon totajtztzian noje polehuije. <sup>16</sup> Mocuepaje pa Canaan pa quinhuicasi in mijquimes pa in caltlan itoca Siquem nican pa tolali Canaan, nepa quinlalpachuje pa in nadita lali hual mocuhuilic Abraham hual quina-maquiltijque ixolomes Hamor nepa pa Siquem. <sup>17</sup> Ajsitihualaya in tonalijmes pa lamisquiaya mochía len Dios quilic pampa yahuiaya quinchihuili Abraham imiahuimes, huan miajtiahuloaya yehuanten imiahuimes Israel. <sup>18</sup> Cuaquín ajsije tonalijmes quiman cataya oc se hué pin lali Egipto. In hué amo quimatiaya in hual quichihuani José. <sup>19</sup> Yihual techcuaqcuamanaya tehuanten in judíos, quinchihuilic niman míac amo cuali totajtztzian. Latlanic pa quincajcahualosquiaya inminxolomes lacames quiman yes lacatije pa yoje miqulosquiaya.

<sup>20</sup> Cataloaya in tonalijmes lacatic Moisés—quinmilic Estéban—, huan Dios quixtocac míac. Itajtzin huan inantzin quilachililoaya Moisés pa ye mesli pa inminchan. <sup>21</sup> Cuaquín quipialoaya pa quiquixtisi pa calijtic inminchan. Huan ixolol sihual Faraón in hué pa Egipto canac Moisés, quipiani quinami yec yihual ixolol. <sup>22</sup> Huan quimaxtije Moisés ca mochi inminlajmatilisli yehuanten pa Egipto. Pampín huelitiaya míac, quimatiaya lajtu niman cuali huan quimatiaya quichía míac.

<sup>23</sup> Yojqque, ajsic yec lalac ca cuarenta xixihuil, quijttuc pampa yahuiaya quinpaxaluili icnían israelitos. <sup>24</sup> Huan quitac se lalac egipcio quihuitequiaya se lalac israelito. Jan ajnaxcan Moisés uyac quinapatic. Quilacuempilic in lalac egipcio pampa quichihuiliaya inon in lalac israelito, quimictic Moisés in egipcio. <sup>25</sup> Moisés quijttuc pampa yehuanten israelitos quimatilosquiaya pampa Dios yahuiaya quinquixti pa Egipto pan ipampa yihual. Ma yoje, yehuanten amo huil quimatiloaya inon. <sup>26</sup> Mostatica moitilic Moisés paxalujtataya capa yehuanten cataloaya. Quinmitac ome icnían israelitos moanticate. Yihual motoliniaya pa quinsehuic pa camo moanaloquiaya, quinmilic: “Lacames, amhuanten anuncia anmocnían. ¿Leca anmoantica?” <sup>27</sup> Ma yoje, in se hual quichihuiliaya amo cuali icni quitojpehuac Moisés, quilic: “¿Quinami unca moyaxca pa tiyes laicanani huan lamacahuani pa tehuanten?” <sup>28</sup> ¿Huejtica ticnequi tichmicti jan quinami yalhua ticmictic in lalac egipcio?” <sup>29</sup> Cuaquín choluc Moisés pampa quijttuc inon in lalac. Uyac chantic pan lali itoca Madián, se lali hual amo yihual ilali. Nepa monamictic, quinpiaya ome ixolomes lacames.

<sup>30</sup> Mocahuac nepa cuarenta xixil—quinmilic Estéban— huan se ilanahuatini in cielo monextic ca Moisés capa amaqui chantiaya, cataya capa unca in loma itoca Sinaí. Huan ilanahuatini in cielo quinqnotzac Moisés pa se huitzcua-tzindi lalatica. <sup>31</sup> Quitac Moisés inon, quilapolultic in hual quiztataya. Moajxiltiaya pa quitasquiaya cuali, lajtuc in Tata, quilic: <sup>32</sup> “Nehual niunca inminDios motajtztzian, iDios Abraham huan iDios Isaac huan iDios Jacob.” Cuaquín pehuac yuyucac Moisés, momajtiaya pa laqztías. <sup>33</sup> Cuaquinon in Tata quilic: “Xiquintoma xiquinquixti ilacsames mocxihuajmes, pampa in lali capa timoqueztica unca lali hual Dios mochiphauilic pa yihual ihuían.



<sup>34</sup> Niquitac neli quinami panujticate lacocoltilisli nolacames nepa pa Egipto, nijaquic quinami xahuanticate. Pampa in, nitemuc pa niquinmacahuas. Huan axcan, xihuala tehual, nimitztilanis pa timocuepas pa Egipto.”

<sup>35</sup> 'In Moisés in israelitos amo quinequije, quilije: “¿Quinami unca moy-axca pa tiyes tolaicanani huan tolamacahuani?” Ma yoje Dios quitilanic in Moisés, quichíac laicanani. Huan quilajtultic in Moisés pa quimacahuasquiaya in israelitos hual quipianijme pa tequipanulosquiaya amo ca laxlahuülisli. Yahuiaya quinmacahua pan ipampa ilanahuatini in cielo hual yahuiaya quipalehui. Cataya ilanahuatini in cielo hual quimonextilic ca in huizcuajtzindi hual lalataya. <sup>36</sup> In Moisés quinlaicanac quinquixtitataya in israelitos pin lali Egipto. Quinchihuaya inminlaixpan yehuanten innojen hual quinlapolultiloaya ca lamajtilisli. Quinchihuiliaya pin lali Egipto huan pin Al Huejcalan Chichiltic, huan pa cuarenta xixihuimes pin lali capa amaqui oc sequin chantiaya. <sup>37</sup> Yihual unca in Moisés hual quinmilic yehuanten ilacames Israel, quil: “Dios anmitzlatatilis se ilajtuni capa anmocnían. Yihual yes quinami nehual, yihual anquinetlocas.” <sup>38</sup> In Moisés unca aquí cataya capa yehuanten ilacames Israel in xixihuimes quiman monechiculoaya capa amaqui chantiaya. Yihual cataya ca ilanahuatini in cielo hual laquetzaya ca yihual pin loma (tepel) hué itoca Sinaí. Huan yihual Moisés noje cataya ca totajtzitzián. Canac pan ipampa ilanahuatini in cielo in lajtol cuali hual techyuliltía, canac pa anmitzmacas amhuanten.

<sup>39</sup> 'Ma yoje, totajtzitzián amo quinequije quineltocaje in lajtol —quinmilic Estéban—, quitojpehuaje Moisés, amo quinequije quicaquije. Ca miac lanequilisli quijnamiquije Egipto, ca ompic quinequiloaya mocuepalo oc sejpa. <sup>40</sup> Quilije Aaron; “Xitejchiuili tatadioses hual techlaicanasi pa Egipto oc sejpa, pampa in Moisés, in se hual techhualicac techquixtitataya pa Egipto, axcan amo ticmatilo len quipanuc.” <sup>41</sup> Cuaquín in tonalijmes quichihuaje se mono chicuenta se becerro. Quihualiquilije huendi ilaixpan, huahuaje quipiaje paquilisli pampa quichihuajque in becerro ca inminmajmjuan. <sup>42</sup> Pampín Dios mocahuac pa quinchihuilis cuali. Quintemacac pa quinmolancuacuetzilisli in tonali huan in mesli huan in silalimes. Yojqe unca lajcuiluli pin iamal Dios ilajtuni, quijtua:

¿Annechhualiquilic nehual huendis hual yeje yulijquimes pa cuarenta xixihuimes pin lali capa amaqui chantiaya, amhuanten israelitos?

<sup>43</sup> No, anquimantíac ilatzacualoni Moloc huan len chicuenta ilucero in dios itoca Renfán.

Cataloaya monos hual anquinchíac pa anquinmolancuacuetzilis.

Pampín annimitzizjcuanis pa anquisas pa anmolali huan annimitztilanis ca yoje nepa Babilonia.

<sup>44</sup> 'Pa innojen xixihuimes quiman cataloaya totajtzitzián capa amaqui chantiaya —Estéban quinlaquetzilijtiahuia—, quipianijme in cali lachihuali ca cuilaxli, nepa calijtic quinpianijme la'ajcoquili in tixcalimes, inminpan cataya lajcuiluli ilajtol Dios. Noje pin cali quinmolancuacuetzilinjme Dios. Dios, pan tonalijmes hual laquetzac ca Moisés, quilic pa quichías in cali lachihuali ca cuilaxli jan quinami Dios quinextilic Moisés quiman cataya ca yihual pin loma (tepel) hué itoca Sinaí. <sup>45</sup> Canaje in cali totajtzitzián, quihualicaje pa in lali nican in tonalijmes quiman calaquije ca Josué. Quinlaicanac ca niquic Josué pampa Moisés polehuic. Moyaxcajtije ca in lali nican. Dios quinquixtiaya in oc sequin lacalera hual cataloaya nican. Totajtzitzián quitaje quinami Dios quinquixtic. Huan in cali lachihuali ca cuilaxli mocahuac nican huan cuaquín ajsije innojen tonalijmes quiman David yec

hué. <sup>46</sup> Dios quichihuilic niman cuali David, huan David quitemachic Dios pa quimacahuilts quichihuilis se cali hué pa iDios Israel. <sup>47</sup> Huan Dios amo quimacahuilic. Cataya Salomón ixolol David hual quichihuilic Dios in cali. <sup>48</sup> Ma yoje, in Dios niman hué amo chanti pin tiopajmes hual quinchihualo lacames. Unca jan quinami quijtúa Dios pan ipampa ilajtuni, quilic: <sup>49</sup> Mochi in cielo jan unca san quinami capa nimolalía, huan in lalticpan jan unca san quinami capa niquinlalia nocxihujames.

¿Len cali annejchihuilis? quil quilía in Tata,  
o ¿len anquichías capa nimosehuis?

<sup>50</sup> Amo huil anquichías len pa nehual pampa ca nehual nolahuelilitisli niquinchiác mochi innojen.

Yojque quijtuc Dios.

<sup>51</sup> ¡Amhuanten amo quiman anquinequi anquimati—quinnotzac Estéban—, huan mas que anquipía pan anmocuerpos in latequillisli hual quinextía tolajtulisli ca Dios, amo anquinequi anquineltoqa pa anmoyolo amo cuali! Anmonacajmes amo quinequilo lacaquilo pa anquijnamiquis in lajtulisli. Amo quiman anquinequi anquineltoqa in Espíritu Santo, anuncia quinami annotajtzitían. <sup>52</sup> Ma annimitzili inon. Annotajtzitían quintojtocanjime moxtin ilajtunijmes Dios pa quinchihuililosquiaya lacocotilisli, quema, moxtin. Huan quinmictijé yehuanten hual pa yina quinlamachiltiloaya pampa hualas in lalcal hual amo quipía laijlaculisli hual Dios yahuiaya quitilani pin lalticpan. Huan yihual in lalcal hual amo quipía laijlaculisli amhuanten anquitemacac pa yes lamictili. <sup>53</sup> Jo quema, ancataya amhuanten hual anquipiác in ilajtol Dios pan inminpampa ilanahuatinijmes in cielo huan ma yoje amo anquineltoqa.

### *Quimictilo Estéban*

<sup>54</sup> Quicaquijque inon yehuanten pin Lanechiculisli Hué, cualaniloaya ca mochi inminchicahualisli huan lacuajcualoaya pa Estéban. <sup>55</sup> Ma yoje, pa iyolo Estéban huelitiaya in Espíritu Santo, huan yihual Estéban mocajtiquisac lachixtica pa pani pin cielo (ilhuicac). Quitac ilaixpelalisli cualtichin Dios, huan nepa moquezataya Jesús pa ima cuali Dios. <sup>56</sup> Cuaquín quinnotzac in lalalera Estéban, quil:

—¡Xiquitacan, niqita lapujtica in cielo, huan yihual ilalcal in cielo, yihual moqueztica pa ima cuali Dios!

<sup>57</sup> Cuaquín tzajtzijque ca lajtol chicahuac huan motzacuilijque inminnacajmes huan ca se lajtulisli molalujtiquisajque capa Estéban. <sup>58</sup> Quiquixitiquisajque pa quiahuac Jerusalén, cuaquinon quilaxilijque tixcalazos. Huan yehuanten hual quimotexpahuilijque Estéban quinmacajque inminnahujames se lalcal yancuic itoca Saulo pa yihual quinmitilis.

<sup>59</sup> Quimictiloaya Estéban ca tixcalazos, yihual quinoztataya in Tata, quil quilic:

—Tata Jesús, xicana noyulilisli.

<sup>60</sup> Cuaquinon molancuacuetzac, tzajtzcic ca lajtol chicahuac, quijtuc:

—Tata, amo xiquinmotexpahuili pampa quichihuaje in laijlaculisli. Lamac quijtuc inon, polehuic.

<sup>1</sup> Huan Saulo quinequiaya pa miquisquiaya, yihual cataya ca inminlaj-tulisli yehuanten hual quimictijque. Cuaquín in tonali, yehuanten hual amo quineltoaloaya Jesucristo pehuajque quintojtocajque niman míac in laneltocanijmes. Quintojtocaloaya pa quinchihuilisqui lacocertilisli yehuanten hual cataloaya pa Jerusalén. Niman míac cholujque mosemantiajque caj-capic pin lalticpan Judea huan pin lalticpan Samaría. Jan in lanahuatinijmes san mocahujque pa Jerusalén. <sup>2</sup> Sequin lacames hual quineltoaloaya Dios ca mochi inminyolo quilalpachujque Estebán huan quichoquilijque niman míac.

<sup>3</sup> Huan Saulo pehuac motolinic pa quinlamis in laneltocanijmes, calpanu-aya calactinemíaya pa inminchan, huan quinhuicatihuiaya lacames huan sihuames, quinhuilantiahuiaya pa quintzacuas pin calijtic.

### *Quinlaquetzililo ilajtol Cristo capa yehuanten pa Samaria*

<sup>4</sup> Pampín mosemantiahuiyoaya in laneltocanijmes, yajtinemiloaya quin-laquetzilijticate moxtin in lamachiltilisli cuali. <sup>5</sup> Huan Felipe temuc pa in caltilan hué pin lalticpan Samaria, nepa quinlaquetziliaya in lacames ilajtol Cristo. <sup>6</sup> Quicaquiloaya cuali in míac lacames in hual quinmiliaya Felipe. Cataloaya ca se lajtulisli pampa quicaquiloaya huan quitaloaya innojen míac hual quinchihuaya Felipe calica quinnextiliaya ilahueliltilisli Dios. <sup>7</sup> Pan ipampa Dios ilahueliltilisli quisajque ijyecames amo cuajcuali pa míac hual quinpialoaya, quisajque tzajtztiahuiyoaya chichahuac. Noje quinpajtic Felipe míac cocoxquimes hual amo huil moliniloaya huan oc sequin hual amo huil nejnemiloaya cuali. <sup>8</sup> Pampín cataya míac paquilisli pa in caltilan. <sup>9</sup> Nepa cataya se lalac itoca Simón, yec lalac laxuxani nepa quiman ayamo hualac Felipe. Huan yehuanten pa Samaria molapolultinijme pampa quinmitanijme innojen hual yihual quinchihuani. In Simón quiijtuaya pampa yihual yec lalac ca míac lahueliltilisli. <sup>10</sup> Huan moxtin lacames tijtipichin huan quema, lacames huejueyenten quicaquinijme ca mochi lamajtilisli, quijtunijme:

—In Simón quipía Dios ilahueliltilisli, in lahueliltilisli hual itoca hué.

<sup>11</sup> Huan míac xixihuil quicaquinijme ca mochi lamajtilisli pampa molapolultinijme quiman quitanijme mochi in laxuxanilisli hual quichihuani. <sup>12</sup> Cuaquín Felipe quinlaquetzilic yehuanten pa quimatilosquiaya ilahueliltilisli Dios huan ilahueliltilisli Jesucristo, huan pampín quineltoaloaya in lamachiltilisli cuali huan cataloaya lacuayatequili lacames huan noje sihuames. <sup>13</sup> Huan in Simón noje quineltoac huan cataya lacuayatequili. Cuaquín yihual mojmosta quitocatiahuiaya Felipe huan molapolultiaya míac quiman yec quinmitaya panulo innojen hual quinxtiloaya ilahueliltilisli hual Dios quipía.

<sup>14</sup> Cuaquín momachiltijque in lanahuatinijmes pa Jerusalén quinami yehuanten pin lalticpan Samaria quineltoaloaya ilajtol Dios. Pampín quintilanilijque Pedro huan Juan. <sup>15</sup> Temujque yehuanten pa Samaria huan quilajlanijque Dios pa quinhuiltilis in Espíritu Santo yehuanten hual axan quineltoacajque. <sup>16</sup> Quipiajque pa quichihuasi inon pampa ayamo quinhuiltilis in Espíritu Santo yehuanten pa Samaria. Jan cataloaya lacuayatequili pampa quineltoacajque Jesucristo. <sup>17</sup> Cuaquinon quinlalilijque Pedro huan Juan inminmajmajuan pan yehuanten pa Samaria hual quineltoacajque Cristo, yojque quinhuiltilic in Espíritu Santo.

<sup>18</sup> Huan quitac Simón quinami hualac in Espíritu Santo quiman yes in lanahuatinijmes quinlaliijque inminmajmajuan pani yehuanten. Pampa in quinequiaya quinmaca Pedro huan Juan tomin, quinmilic:

<sup>19</sup>—Xichmaca nehual noje in lahuelilitlisli pa quihuelilitis in Espíritu Santo aqoi yes niclalilis nomajmajuan.

<sup>20</sup> Pedro quilic:

—Xipolehui ca mochi motomin pampa tiquijtuc tiahuiaya timocuhuilil lahuelilitlisli hual Dios san quitlanía. In lahuelilitlisli amo huil mocuhuilía se. <sup>21</sup> Tehual amo unca moyaxca pa titequipanús ca in, pampa amo unca chipahuac moyolo ilaixpan Dios. <sup>22</sup> Pampín xicpala moyolo, xijcahua in amo cuali hual tiquijtuc. Xiclajlani Dios pa cuajnesi yihual mitzpujpuhua in hual ticnequiaya ticchía pa moyolo. <sup>23</sup> In nimitzilía pampa niquta tehual timoxicujtica míac huan amo timocajtica pa tiquijtus len amo cuali pa moyolo.

<sup>24</sup> Cuaquín quinanquilic Simón:

—Xiclajlanican in Tata pa nehual amhuanten pa como nechpanus nindeno quinami in hual tichilic.

<sup>25</sup> Quiman lamijque quinnahuatilijque Pedro huan Juan in lamachiltisli cuali quinmilijtataloaya quinami unca melahuac ilajtol Dios, cuaquín canajque ojli pa mocuepasqui pa Jerusalén. Quinpanajtiahuilooaya míac caltilan pa in lalticpan Samaria, nepa quinlanahuatilijque yehuanten in lamachiltisli cuali.

*Felipe quiximati se lalac hual chantiaya pin lali itoca Etiopía*

<sup>26</sup> Huan se ilanahuatini in Tata pin cielo (ilhuicac) quilic Felipe, quil:

—Ximoquetza huan xía pa sur, xicana in ojli hual quisa nepa Jerusalén huan temúa pa Gaza, in ojli panúa capa amaqui chanti.

<sup>27</sup> Cuaquín moquetzac Felipe, uyac. Cataya pa ojli, Felipe quitac se lalac hual chantiaya pa Etiopía, in lalac yec se eunuco (se lalac hual amo huil mochía itajtzin xolomes). Yihual yajtiahuiaya pan ojli pan layahualujquimes. Yihual yec hué lalac hual quitequipanuilic in hué sihual itocaya Candace hual huelitiaya pin lali Etiopía. Yec icomisariado de bienes, quilachiliaya mochi itomin in hué sihual. In lalac eunuco hualac pa Jerusalén pa quimolancuacuetzilis Dios. <sup>28</sup> Axcan mocuectiahuiaya pa Etiopía. Molalijtataya pa ilayahualujquimes yihual, momaxtiaya in amal hual quijcuiluc Isaías hual pa yina yec ilajtuni Dios. <sup>29</sup> Cuaquín in Espíritu Santo quilic Felipe, quil:

—Ximoajxilti pa in ca layahualujquimes.

<sup>30</sup> Yojque molalujtíac Felipe huan quicaquic in lalac momaxtitataya iamal Isaías ilajtuni Dios. Huan Felipe quilic:

—¿Ticmati len quinequi quijtúa in hual timomaxtitica?

<sup>31</sup> Huan in lalac eunuco quilic:

—¿Quinami huil nicmati sinda amaqui nechnextilía?

Quilic Felipe pa lejus pin layahualujquimes pa molalis inahuac. <sup>32</sup> Huan pa ilajtol Dios capa momaxtitataya yojque quijtuc:

Cataya quinami se borrego hual quihuicaloaya pa quimictisqui, huan quinami se borreguito hual amo choca quiman quiximalo, yojque cataya in lalac, amo quijtuc nindeno.

<sup>33</sup> Quichihuilijque yihual len quichihuililo se lalac amo cuali, quimotexpahuilijque mas que amo quichihuac nindeno amo cuali. Huan ¿aqoi huil quimati quichi cate moxtin aquinojen hual quineltocalo?

Yihual quimictijque huan quisac yihual pin lalticpan.

<sup>34</sup> In lalac eunuco quilajlanic Felipe, quilic:

—Ma nimitztlajlani, ¿aquí unca in se hual techlaquetzilitica in lajtuni? ¿Yihual ihuían, o oc se?

<sup>35</sup> Cuaquinon Felipe quinanguiliaya, pehuac quilic ilamachitlisli cuali Jesús quinami quiituc ilajtol Dios pa in amal capa momaxtitataya in lalac eunuco. <sup>36</sup> Quiman uyajtiajqque oc se nadita pan ojli, ajsijque capa cataya al, huan in lalac eunuco quilic:

—Xiquita. Nican unca al. ¿Amo huil niyes lacuayatequili nehual?

<sup>37</sup> Huan Felipe quilic:

—Sinda ticneltoca ca mochi moyolo, ¿leca camo?

Cuaquinon in lalac eunuco quinanguilic:

—Nicaneltoca Jesucristo pampa yihual ixolol Dios.

<sup>38</sup> Cuaquín quilic pa moquetzasquiaya in layahualujquimes huan temu-jque in omenten pa al, Felipe huan in lalac eunuco, cuaquín Felipe quicuayatequic. <sup>39</sup> Quisajque pin al, huan iEspíritu in Tata quihuicaticuisac Felipe, yojque in lalac eunuco yajmo quitaya. Cuaquín canac ojli oc seppa, yajtiac ca miac paquilisli. <sup>40</sup> Ma yoje, Felipe moitac pin caltilan itoca Azote huan quinla-quetziliaya in lacames, quinmilijtataya in lamachitlisli cuali nepa huan pa mochi innojen caltilan hual quinpanajtiahuia. Lamic quinpanahuic huan ajsic pa in caltilan Cesarea.

## 9

### *Saulo quipala iyolo*

(Hch. 22:6-16; 26:12-18)

<sup>1</sup> Huan Saulo amo mocahuaya pa quiitutinemisquiaya pampa yahuiaya quinlami aquinonen quineltocaloaya in Tata. Pampa inon uyac quitac in tiopista hué. <sup>2</sup> Quilajlanic pa quimacacquiaya amames lajcuiluli pa quin-huicuilisquiaya yehuanten hual quipaloaya lahuelilitlisli pin tiopajmes hual cataloaya pin caltilan hué Damasco. In amames quimacahuilic Saulo pa quinquitzquisquiaya moxtin hual quitocaloaya Jesús iojli, ma yecan lacames o ma yecan sihuames. Cuaquinon quinhuicacquiaya lailpili pa Jerusalén. <sup>3</sup> Huan cataya nepa quiman ajsitiahuilaloaya pan ojli amo huejca pa quiahuac Damasco, jan ajnaxcan quixpelaticuisac itenco Saulo se laix-pelalisli pin cielo. <sup>4</sup> Huetzic pan lali Saulo, quicaquic se lajtol quilic:

—Saulo, Saulo, ¿leca tiquntotocatica yehuanten hual necheltocalo? Yojqque tichtotocatica nehual.

Huan Saulo quinanguilic:

—¿Aquí tehual, Tata?

<sup>5</sup> Huan in lajtol quilic:

—Nehual niJesús hual tictotocatica. Timococoltitica tehual, tiquinami se buey hual quitecuajtica in latzopinijquil ca icxían.

<sup>6</sup> Cuaquinon Saulo yuyucatataya quilic:

—Tata, ¿len ticnequi pa nicchías?

Quinanguilic:

—Ximoquetza huan xicalaqui pin caltilan, nepa mitzilis se len ticpiás pa ticchías.

<sup>7</sup> Huan mocahuajque, amo huil lajtujque in lacames hual ca Saulo yahuilaloaya pin ojli. Quicaquijque quema in lajtol. Ma yoje amo quitajque amaqui.

<sup>8</sup> Cuaquín moquetzac Saulo capa cataya pan lali, huan quiman quinlapuc iixtololojmes amo huil lachiaya. Yoje in lacames ca yihual quiquitziqijque imajma huan quihuicajque pa Damasco. <sup>9</sup> Huan cataya pa ye tonalijmes amo lachiaya, amo lacuaya huan amo launiaya.

<sup>10</sup> Cataya pa Damasco se laneltocani itocaya Ananías huan in Tata Jesús quixotocac Ananías huan quilic:

—Ananías.

Huan quinanquilic:

—Nican niunca, Tata.

<sup>11</sup> Huan in Tata Jesús quilic:

—Ximoquetza, xía pa in ojli itoca Melahuac, xictemu pa icali Juda se itoca Saulo hual chantini pin caltilan Tarso. Yihual quilajlantica Dios. <sup>12</sup> Huan pan ipampa laixotocalisli yihual quitac se lalac, huan tehual tiunca in lalac hual quitac. In Saulo mitzitic tihualac, tiquinlalic momajmajuan ipan pa lachiasquiaya oc sejpa.

<sup>13</sup> Quinanquilic Ananías, quilic:

—Tata, nechlamachiltije míac lacames in hual quichijtinemi in se. Quinchihuilijtinemiaya tetzcuinuc yehuanten hual mitzneltocalo pa Jerusalén. <sup>14</sup> Huan quimacahuiltije, quil, in tiopistas huejué pa Jerusalén pa hualasquiaya nican pa quinhuicasquiaya lailpili moxtin hual mitznotzalo pa tiqinpalehuis. Yahui quintzacua pin calijtic.

<sup>15</sup> Ma yoje, in Tata quilic:

—Xía, pampa nehual niclajltultic in Saulo pa nechtequipanuulis. Quinlaquetzilis nonahuac nehual inminlaixpan yehuanten hual amo judíos huan inminlaixpan inminhueyenten huan noje inmixpan in judíos. <sup>16</sup> Nicnextilis Saulo quinami yahui quipía pa panus míac lacocoltilisli pampa yihual necheltoca.

<sup>17</sup> Cuaquín uyac Ananías, calaquic pin cali capa cataya Saulo, quilalilic imajmajuan ipan, quilic:

—Nocni Saulo, nechtilanic in Tata, yihual hual mitzmonextilic tehual pan ojli capa tihualaya. Nechtilanic pa tilachias oc sejpa, huan pa mitzhueliltis in Espíritu Santo.

<sup>18</sup> Jan ajnaxcan cataya quinami huetziquisaje len chicuenta icaliyo michin pan Saulo iixtololojmes. Cuaquinon huil lachiaya oc sejpa. Yoje, moquetzac huan cataya lacuayatequili. <sup>19</sup> Cuaquinon lacuac huan yojque canac chichahualisli. Mocahuac pa sequin tonalijmes umpa ca in laneltocanijmes hual cataloaya pa Damasco.

### *Saulo quinmilía lacames pa Damasco ilamachiltisli Cristo*

<sup>20</sup> Huan jan axcan pehuac quinlaquetzilic ilamachiltisli Jesús pin tiopajmes, quiijuaya pampa in Jesús yihual ixolol Dios. <sup>21</sup> Yoje, molapolultijque moxtin hual quicaquiloaya, pehualoaya quijtulo:

—¿Amo yihual in se hual quinchihuilini lacocoltilisli yehuanten pa Jerusalén hual quineltocalo in Jesús? Huan ¿amo cataya pampa inon noje hualac yihual ca niquic pa quinhuicasquiaya lailpili pa in tiopistas huejué?

<sup>22</sup> Ma yoje, quinlaquetzilijtiahuiaya míac Saulo ilajtol Dios ca míac lajmatilisli huan amo momajtic. Yojque quinsulahuaya ca ilamaxtilisli moxtin in judíos hual chantiloaya nepa pa Damasco, quinnextiliaya neli pampa in Jesús yihual in Cristo hual Dios quitilanic pan lalticpan.

*Saulo cholúa pa camo quimictisqui in judíos*

<sup>23</sup> Panujque míac tonalijmes, huan cuaquinon molalilijque in judíos pa quitemulosquiaya quinami quimictilosquiaya Saulo. <sup>24</sup> Momachiltic Saulo pampa yahuilooaya quimictilo, quichixtataloaya yihual yihualitonali, pa semilhuil huan pa layúa, pa ilalapujquimes in latzacuali palahuac huan cuajtic hual quiyahualujtataya in caltilan. <sup>25</sup> Pampín, quihuicajque Saulo in laneltocanijmes, quitemuhijque pa pani ilatzacuali palahuac in caltilan pa layúa, quitemuhijque ca se chiquihuil hué ca mecames pa quiahuac in palahuac latzacuali, huan yojque choluc Saulo.

### *Saulo pa Jerusalén*

<sup>26</sup> Ajsic Saulo pa Jerusalén, quinequiaya yahui capa monechiculoaya in laneltocanijmes, huan momajtiloaya yehuanten pampa yihual quinchihuilini tetzcunuc, amo quijtuloaya pampa neli yihual axcan quineltoaya Cristo. <sup>27</sup> Ma yoje, Bernabé quinamiquic Saulo quinami icni, quihuic capa cayajque in lanahuatinijmes, quinquihuilic quinami pan ojli Saulo quitac in Tata Jesús huan quinami in Tata Jesús laquetzac ca Saulo. Bernabé noje quinmilic quinami nepa pa Damasco Saulo amo momajtiaya quinlaquetzili ilamachiltisli Jesús. <sup>28</sup> Yojque, mocahuaya Saulo ca yehuanten, yajtinemiaya cajcapa pa Jerusalén. <sup>29</sup> Laqueztinemiaya Saulo ilamachiltisli Jesús in Tata, amo momajtitica nindeno. Laquetzaya ca in judíos hual lajtuloaya griego, noje layantiaya ca yehuanten. Cuaquín yehuanten motoliniloaya pa quimictilosquiaya Saulo. <sup>30</sup> Quimatijque inon icnián laneltocanijmes, huan quihuicajque Saulo, temujque pa Cesarea. Umpa quitlanijque pa barco pa in caltilan Tarso.

<sup>31</sup> Cuaquinon quipialoaya mosehuilisli moxtin in laneltocanijmes pa mochi in lalticpan Judea huan pin lalticpan Galilea huan pin lalticpan Samaria. Mojmosta monextililoaya míac ilamaxtilisli in Tata, yojque quineltoaloaya ca míac chicahualisli. Huan moxtin yultinemiyoaya momajtiloaya ilaixpan Dios. Huan quinpalehuiaya mojmosta in Espíritu Santo, yojque mijque Dios ilacames.

### *Eneas unca lapajtili*

<sup>32</sup> Huan panuaya Pedro cajcapa pa míac caltilan, temuc pa se itoca Lida, nepa chantiloaya sequin hual Dios quinlajtultic pa quineltoalosquiaya. <sup>33</sup> Nepa quitac se lacal itoca Eneas. In se lastataya pan lapexli quipiaya chicue xixihuil amo huil nejnemiaya. <sup>34</sup> Huan Pedro quilic:

—Eneas, mitzpajtía Jesucristo. Ximoquetza huan xicajcoqui molapexli.

Jan ajnaxcan moqueztiquisac. <sup>35</sup> Huan quitajque moxtin hual chantiloaya pa Lida huan pa quiahuac pin ixlán Sarón. Niman míac momalinajque inminyolo pa quitocasqui in Tata Jesús.

### *Dorcas yuli oc sejpa*

<sup>36</sup> Cataya pin caltilan itoca Jope se sihual laneltocani itoca Tabita. Pa lajto griego itoca Dorcas. In se mojmosta quinchihuilijtinemiaya len cuali oc sequin huan quinnacatinemiaya míac yehuanten hual amo quipialoaya nindeno. <sup>37</sup> Pa in tonalijmes mococuhuaya, cuaquinon polehuic. Cuaquín caltijque in mijquil huan quihuicajque pa pani, quilalijque calijtic pin caltzindi pani in cali.

<sup>38</sup> Momachiltijque in laneltocanijmes pampa Pedro cataya nepa Lida hual amo cataya huejca. Pampín yehuanten pa Jope quintlanijque ome lacames ca capic cataya Pedro pa quililosquiaya:

—Amo xihuejcahua pa tihualas ca tehuanten.

<sup>39</sup> Yojque moquetzac Pedro, uyac ca yehuanten. Ajsic pa Jope, quihuica-jque pa in calijtic pa pani. Huan hualajque ca Pedro moxtin in sihuames hual inminhuían, chocataloaya, quinextilijque in laquemes huan inminahuajmes hual quinnemiltiyoaya, hual quintzomilini Dorcas quiman yulini.

<sup>40</sup> Cuaquín quinquixtic Pedro pa quiahuac moxtin, molancuacuetzac quilajlanic Dios. Cuaquinon momalinac Pedro capa in mijquil, quilic:  
—Tabita, ximoquetza.

Molapulic iixtololojmes huan quiztataya Pedro, molalic. <sup>41</sup> Cuaquinon Pedro quimacac imajma huan quiquetzac Dorcas. Cuaquín quinnotzac in sihuames hual inminhuían huan quitemacac yultataya oc sejpa. <sup>42</sup> Huan quimachiltijque inon pa mochi Jope. Pampa in, pehuaje quineltocajque in Tata Jesús míac lacames huan sihuames nepa Jope. <sup>43</sup> Huan Pedro mocahuac pa Jope, chantitaya sequin tonalijmes pa ichan se itoca Simón, yihual quiyapani cuilaxli.

## 10

### *Pedro huan Cornelio*

<sup>1</sup> Cataya se lalac pin caltilan Cesarea, yihual itocaya Cornelio. Yec inminlaicanani cien guaches hual cataloaya ilanechiculisli guaches hual motocaya in Italiano. <sup>2</sup> Yihual yec lalac cuali, huan yihual huan moxtin hual chantiloaya pa ichan quimolancuacuetzililoaya Dios huan momajtiloaya ilaixpan Dios. Cornelio quimacani len cuali yehuanten in judíos hual amo quipialoaya nindeno huan mojmosta quilajlaniaya Dios. <sup>3</sup> Se tonali quinami ye horas pa tiolac, quitac in Cornelio se ilanahuatini iDios in cielo (ilhuicac), hualac capa yihual quilic:

—¡Cornelio!

<sup>4</sup> Mocahuac Cornelio quiztataya huan momajtitataya, quilic:

—¿Len ticnequisquiaya, Tata?

In lanahuatini quilic:

—Quicaquic Dios inon hual ticlajlanic huan yihual quimati quinami tiquinpalehuía yehuanten hual amo quipialo nindeno. Pampín mitzij-namiquía. <sup>5</sup> Axcán, xiquintilani lacames pa yasqui pa Jope, xicnahuati pa hualas se itoca Simón hual noje itoca Pedro. <sup>6</sup> Nepa chantiticate huan se Simón hual quiyapa cuilaxli. Unca inahuac in al huejcalan icali in se hual quimati quiyapa cuilaxli. Mitzilis in Simón Pedro len ticpiás pa ticchías.

<sup>7</sup> Jan axcán yajmo nesci ilanahuatini in cielo hual laquetzac ca yihual. Yojque quinnotzac Cornelio ome itequipanujquimes huan se guache hual noje quineltocaya Dios, yihual yec se ca yehuanten in guaches hual mojmosta mocahuaya quitequipanulijtataya Cornelio san. <sup>8</sup> Cuaquín quinmachiltic Cornelio mochi, quintilanic pa Jope.

<sup>9</sup> Mostatica, yehuanten cataloaya pin ojli huan moajxilitihualaloaya pa Jope. Huan Pedro axan lejcuc pa in cali ca pani capa palahuac pa quilajlanis Dios, cataya lacualispan. <sup>10</sup> Huan mayantiquisac Pedro, quinequiaya lacua. Yojque quiyucxiltiyoaya len quicuasquiaya. Huan quiman Pedro quichix-tataya, moxotocac len. <sup>11</sup> Quitac lapujtica in cielo huan nepa temujtihualac len chicuenta se tzotzomajli hué, cataya latemuhuilí ca itejtenco lailpili, temuc pan lalticpan. <sup>12</sup> Pa in tzotzomajli cataloaya mochi yulijquimes ca nahui icxihuajmes huan yulijquimes hual mohuilanilo pan lali huan tutomes. <sup>13</sup> Cuaquinon se lajtol mocaquic, quilic:

—Ximoquetza, Pedro, xicmicti len pa tijcuas.

<sup>14</sup> Pedro quilic:



—Amo quiman, Tata, pampa amo quiman nijcuac len hual amo cuali pa quicuasi tehuanten in judíos, jan quinami quijtúa tolajtol.

<sup>15</sup> Quijtuc in lajtol oc sejpa:

—In hual Dios quijtúa unca cuali pa quicuas se, amo xiquili tehual da amo cuali.

<sup>16</sup> In panuc ca ye latemuhuilisli huan jan ajnaxcan yec lahuicali pin cielo in hual nesiaya chicuenta se tzotzomajli. <sup>17</sup> Yoje mocahuac Pedro quijnamicataya, quijtuc:

—¿Len yes inon? ¿Leca nechnextilic Dios in laxotocalisli?

Ca in nadita, ajsijque pa in cali capa cataya Pedro in lacames hual quintilanic Cornelio, lamijque lajlaniyque capa cataya in cali huan axcan ajsijque. <sup>18</sup> Lanotzajque, lajlaniyque sinda cuajnesi chantiaya nepa se itoca Simón hual noje itoca Pedro. <sup>19</sup> Pedro ayamo mocahuaya pa quijnamiquis in laxotocalisli. <sup>20</sup> Cuaquín in Espíritu Santo quilic:

—Xiquita. Cate ye lacames mitztemujticate. Axcan, ximoquetza, xitemu huan xía ca yehuanten. Amo xicmahuili, pampa nehual niquintilanic.

<sup>21</sup> Yojqte temuc Pedro capa cataloaya innojen lacames, quinmilic:

—Xiquitacan. Nehual aqui anquitemujtica. ¿Pa len anhualaya?

<sup>22</sup> Yehuanten quinancuilijque:

—Unca se itoca Cornelio, yihual inminlaicanani cien guaches. Yihual se lalac cuali, quichía len Dios quinequi, momajtía ilaixpan Dios. Lajtulo cuali inahuac yihual moxtin in judíos. Se ilanahuatini in cielo quilic in Cornelio pa techtilanisquiaya pa timitzhuicalosquiaya tehual pa ichan. In lanahuatini quilic pa quicaquis len tehual tía tiquilía.

<sup>23</sup> Pampín quinmilic Pedro pa mosehuilosquiaya, pa panulosquiaya in layúa ca yihual. Huan mostatica moquetzac Pedro, ca yehuanten uyac. Ca yehuanten noje uyajque sequin inimicnían laneltocanjmes, chantiloaya nepa Jope.

<sup>24</sup> Mostatica ajsijque pa Cesarea, nepa quinchixtataloaya Cornelio ca icnían huan ilajlasojli hual yuliloaya pa oc sequin calimes, quinnehicuc Cornelio pa ichan. <sup>25</sup> Calactataya Pedro, quisac Cornelio pa quinamiquis, quimolancuacuetzilijtihualaya Pedro. <sup>26</sup> Jan axcan, Pedro quiquetzac, quilic:

—Ximoquetza, nehual noje nilacal, amo xichmolancuacuetzili.

<sup>27</sup> Cuaquín calaquic Pedro, huan yihual laquezatataloaya huan calijtic quinmitac Pedro lalalera lanehiculi. <sup>28</sup> Cuaquinon Pedro quinmilic:

—Amhuanten anquimati pampa tolajtol hual technextilía quinami ticmolancuacuetzililo Dios amo techmacahuiltía pa timochihuasi lajlasojli cuajcuali ca aquinojen hual amo cate judíos. Noje amo toyaxca pa tiquinpaxaluilisi. Ma yoje, nechnextilic Dios pampa amo unca cuali pa nehual niqijtus da amo cuajcuali yehuanten hual amo judíos huan yojqte monequi pa como niqijtus da amo unca cuali pa se judío quinpaxaluilisi. <sup>29</sup> Yojqte, nihualac pampa tilatilanic pa nihualasquiaya, amo nimonejnequic. Axcan, ma annimitzlajlani, ¿leca anlatilanic pa nihualasquiaya?

<sup>30</sup> Cuaquín quijtuc Cornelio:

—Axan quipía nahui tonali ca nijquin horas, ye pa tiolac, niclajlantataya Dios nohuán pa nocalijtic huan monextitiquisac se lalac pa nolaxpan lalaquentili ca tzotzomajli laixpelatica. <sup>31</sup> Nechilic: “Cornelio, Dios quijnamiquic len ticlajlanic, huan noje quijnamiquic in cuali hual tiquinchihuilía judíos hual amo quipialo nindeno. <sup>32</sup> Axcan, xilatilani pa in caitlan

Jope pa ticnahuatis pa hualas se itoca Simón hual noje itoca Pedro. Yihual chantitica pa ichan Simón in hual quimati layapa cuilaxli nepa inahuac in al huejcalan.” <sup>33</sup> Jan axcan, nilatilaníc pa tihualasquiaya huan tehual tinejchihuic cuali pampa tihualac. Axcan, timoxtin ticate nican ilaixpan Dios pa tijcaquisi mochi hual mitzilic in Tata pa itechilis.

*Inon hual quinmilic Pedro yehuanten pa icali Cornelio*

<sup>34</sup> Yoje پهuac laquetzac Pedro, quinmilic:

—Axcan neli nicmati pampa Dios quita se jan quinami quita oc se, da unca judío o da amo unca judío. <sup>35</sup> Capa cate mochi lacames yihual quilajultía aquí yes hual quimati momajtia ilaixpan yihual, aquí yes hual itequi quichía len cuali. <sup>36</sup> Dios quintilanilic in judíos ilajtol, unca lamachiltisli cuali hual techhueliltía pa ticayasi jan seppa ca Dios pan ipampa Jesucristo. Yihual iteco moxtin. <sup>37</sup> Amhuanten anquimati in hual panuc pa mochi inminlali in judíos. Pehuac pin lalticpan Galilea, cataya quiman Juan lamini lanoztinemi pa lacames quipalasi inminyolo pa laijnamiquisi quinami Dios, pa yoje huil yesi lacuayatequili. <sup>38</sup> Cuaquinon Dios quilalic Jesús pa quichías itequipanulisli, yihual Jesús hual moscaltic pin caltilan Nazaret. Dios quimacac pa iyolo Jesús in Espíritu Santo, quimacac míac lahueliltisli. Cuaquinon ca in lahueliltisli yajtinemiaya Jesús quichijtataya len cuali. Quinpajtic moxtin aquinojen hual in lili quincocoltiaya ca ilahueliltisli. Yojque quichihuaya Jesús pampa Dios cataya ca yihual. <sup>39</sup> Huan nehual huan oc sequin lanahuatinijmes, tehuanten tiquitaje ca toixtololojmes mochi hual quichiac Jesús cajcapa pa inminlali in judíos huan pa Jerusalén. <sup>40</sup> Huan quipiluje pan se cuahuil pa quimictisli huan yojque miquic. Ma yoje, yihual Dios quiyuliltic quiman panuje ye tonalijmes, quimacahuiltic pa yesquiaya laitali. <sup>41</sup> Amo quitaje moxtin, jan tiquitaje tehuanten san. Dios techlajultic quiman ayamo panuje innojen, techlajultic pa tiyelosquiaya hual tiquitalosquiaya ca toixtololojmes. Tehuanten tiyeje aquinojen hual tilacuanijme huan tilaunijme ca yihual quiman yuliaya oc seppa. <sup>42</sup> Huan techtilanic pa tiquinlaquetzililosquiaya in judíos de inon. Techtilanic pa tiquijtullosquiaya neli pampa in Jesús unca yihual hual Dios quilajultic pa yes la'ajuani pa in tonali quiman lamis in lalticpan. Quijtus len quipanus sejsé quinami cahuilúa aquí hual yahui caya yultica huan aquí hual miquic. <sup>43</sup> Yojque quijtulo neli mochi in amames hual quinmijcuiluje Dios ilajtunijmes. Quijtulo pampa Dios quinpujpuhuas inminlajlaculisli moxtin hual quineltovalo, quinpujpuhuas pan ipampa Jesús.

*Huala in Espíritu Santo pan innojen hual amo judíos*

<sup>44</sup> Ayamo lamiaya quinmili Pedro in lajtomes huan hualac in Espíritu Santo ca moxtin hual quicaquiloaya. <sup>45</sup> Huan molapolultiloaya moxtin in lanelto-canijmes judíos hual yeje latzontequili pa inmincuilaxlimes, yehuanten hual hualajque ca Pedro. Molapolultiloaya pampa quitajque quinami hualac in Espíritu Santo noje capa in lacames hual amo yeje judíos, capa Cornelio huan icnian hual yuliloaya ca oc sequin calimes huan ilajlasojli. <sup>46</sup> In judíos quinquajque yehuanten hual amo yeje judíos. Quinquajque yehuanten laquetzataloaya ca oc sequin lajtomes hual ayamo quiman quimatiloaya laquetzalo. Quililoaya Dios míac lajtomes cuajcuali huan huejué. Cuaquinon Pedro quinmilic yehuanten hual hualajque ca yihual, quinmilic:

<sup>47</sup> —Innojen quipialo in Espíritu Santo san quinami tehuanten. Neli amaquí huil quijtúa pampa amo unca inminyaxca pa tiquincuayatequisi ca al.

<sup>48</sup> Cuaquín quilic Pedro pa yesqui lacuayatequili quiman quijtuloaya pampa quineltocaloaya Jesucristo. Huan yehuanten quilajlanijque Pedro pa mocahuas ca yehuanten sequin tonalijmes.

## 11

*Pedro quinmachiltia in abuelojmes huan in lanahuatinijmes pa Jerusalén in hual panuc pa ichan Cornelio*

<sup>1</sup> Momachiltijque in lanahuatinijmes huan tocnían laneltocanjmes hual cataloaya pa Judea, momachiltijque quinami pehualoaya quineltocalo ilajtol Dios yehuanten hual amo yeje judíos. <sup>2</sup> Quiman panquisac Pedro pa Jerusalén, pehualoaya cajualo in judíos hual quineltocaloaya in lajtol hual quijtúa pampa moxtin quiपाल pa quiपालqui icuilaxli latzontequili quinami quijtúa inminlajtol in judíos. <sup>3</sup> Quilijque:

—Tíac tipaxaluc pa inminchan yehuanten hual amo quiपाल latzontequili inmincuilaxli quinami quijtúa tolajtol, noje ca yehuanten tilacuac.

<sup>4</sup> Pampa inon, pehuac quinmachiltic Pedro mochi sejse lachihualisli hual panujque, quinmilic:

<sup>5</sup> —Nicataya pin caltilan Jope, niclajlantataya Dios. Niqitac quinami len laxotocalisli, temujtihualac len chicuenta se tzotzomajli hué, yec late-muhuili pin cielo quinami quiquitquitataloaya ca in nahui itejtenco, temujtihualac ca capic nicataya. <sup>6</sup> Nimocahuac niquiztataya pa inon, niqitac ca nolajnamiquilisli. Niqinmitac iyulijquimes in lalticpan ca nahui icxi-huajmes, huan iyulijquimes in cuajlan huan yulijquimes hual mohuilanalo pan lali huan tutomes. <sup>7</sup> Cuaquín nijcaquic se lajtol, nechilic: “Ximoquetza, Pedro, xicmicti len pa tijcuas.” <sup>8</sup> Ma yoje, nicnanquilic: “Amo quiman, Tata, pampa amo quiman nijcua in hual tolajtol quijtúa pa camo quicuasi tehuanten in judíos.” <sup>9</sup> Huan nechnanquilic in lajtol pin cielo oc sejpa, quil: “Amo xiquijtú pampa amo unca cuali pa quicuas se in hual Dios quijtúa pampa unca cuali.” <sup>10</sup> Huan in panuc ca ye latemuhuilisli huan cuaquín lejcuje in tzotzomajli huan in yulijquimes oc sejpa pin cielo. <sup>11</sup> Cuaquinon jan ajnaxcan ajsije ye lacames pa in cali capa nicataya, cataloaya latilanili pa nechanasí, quisaje pin caltilan Cesarea. <sup>12</sup> Nechilic in Espíritu Santo pa nías ca yehuanten huan pa camo nías nicmahuilijtataya. Yojque in lacames huan nehual taje pa Cesarea, noje chicuase tocnían uyaje ca tehuanten huan ticalaquije pa ichan in lalac itoca Cornelio. <sup>13</sup> Techmachiltic in Cornelio quinami quitac se ilanahuatini in cielo pa icalí calijtic moqueztataya, huan in lanahuatini quilic: “Xiqintilani lacames pa Jope pa canasi Simón, in hual noje itoca Pedro. <sup>14</sup> Mitzilis quinami tehuall huan moxtin hual chantilo pa mochan anyes laquixtili pin polehuilisli.” <sup>15</sup> Yojque, quiman nipehuac niqinlaquetzilic yehuanten, jan axcan hualajtiquisac capa yehuanten in Espíritu Santo jan quinami hualac capa tehuanten ipehuayan quiman pehuac quitilanic in Tata. <sup>16</sup> Cuaquín niqijnamiquic ilajtol in Tata Jesús quiman quijtuc: “Neli Juan lacuayatequic ca al. Ma yoje, amhuanten anyes lacuayatequili ca in Espíritu Santo.” <sup>17</sup> Pampín, sinda quinmacac Dios yehuanten in lahuellitilisli hual techmacac tehuanten noje hual ticneltocaje in Tata Jesucristo, cuaquinon nehual amo huil nictzacuilic Dios.

<sup>18</sup> Quiman quicaquijque inon, yajmo cajuajque Pedro, quijtujque lajtomes huejué huan cuajcuali pa Dios, quilijque:

—¡Jan yoje Dios quimacahuiltic pa quinpalasi inminyolo pa lainnamiquisi quinami Dios yehuanten hual amo judíos, Dios quinmaca yulilislí hual amo quiman lamis!

*In laneltocanjmes pin caltilan Antioquía*

<sup>19</sup> Quiman quimictijque Esteban, cuaquinon pehuajque quintejetemujque moxtin hual quineltocaloaya toTata Jesucristo pa quinchihuillilosquiaya lacocoltilislí. Pampín cholujque in laneltocanjmes ca capic yesquiaya huan ajsijque pa in lali itoca Fenicia huan pa in lali lajco pin al huejcalan itoca Chipre huan pa in caltilan Antioquía. Quinlaquetzilijtinemiloaya ilajtol Dios ca in judíos san hual chantiloaya nejnepa. <sup>20</sup> Ma yoje, cataloaya sequin ca in laneltocanjmes hual chantinijme pa Chipre huan pa in lali itoca Cirene hual hualajque pa Antioquía, noje quinmachiltilijtinemiloaya lacames griegos ilamachiltislí cuali in Tata Jesús. <sup>21</sup> Huan quinhueliltic míac in Tata quiman quinmililoaya in lamachiltislí cuali. Quineltocajque niman míac lacames huan canajque iojli in Tata Jesús.

<sup>22</sup> Huan momachiltijque in laneltocanjmes pa Jerusalén quinami inon panuaya nepa Antioquía. Pampín quitilanjque Bernabé ca umpic pa Antioquía. <sup>23</sup> Huan quiman yihual ajsic, quitac quinami Dios quinchihuilic cuali in laneltocanjmes. Pampín quiipiaya paquilislí huan quinchicahualtic pa inminyolo moxtin pa quitocasqui ca míac chicahualislí iojli in Tata Jesús. <sup>24</sup> Cataya pampa Bernabé yec lacal cuali. Yuliaya quimacahuiltitica pa in Espíritu Santo quimacas ilachicahualtilislí, huan noje quineltocaya in Tata Jesús ca mochi iyolo. Yojque miajque in lacames hual quineltocaloaya in Tata.

<sup>25</sup> Cuaquín uyac Bernabé pa Tarso pa quitemusquiaya Saulo. <sup>26</sup> Quiman quitac Saulo, yihual quihuicac pa Antioquía, huan nepa mocahualoaya ca in laneltocanjmes pa se xihuil. Ca yehuanten monechiculoaya, quinmaxtitatuloaya míac lacames Bernabé huan Saulo. Huan nepa pa Antioquía cataya capa pehuaje quintocayaltije cristianos yehuanten hual quineltocaloaya toTata Jesucristo.

<sup>27</sup> Innojen tonaljmes temuje pa Antioquía sequin ilajtunijmes Dios hual cataloaya pa Jerusalén. <sup>28</sup> Huan moquetzac se ca yehuanten itocaya Agabo, moquetzac pa lajtusquiaya. Quijtuc pan ipampa in Espíritu Santo pampa yahuiaya caya se mayandi hué pa mochi in lalticpan. In mayandi panuc quiman Claudio yec in hué romano pa mochi lalimes. <sup>29</sup> Yojque, quichihua-jque se lajtuilislí yehuanten hual quineltocaloaya Jesús nepa pa Antioquía. Molalijque pa quinechiculosquiaya tomin, moxtin tequipanujticate pa inon. In tomin quintilanilosquiaya inmicnían hual chantiloaya pa in lalticpan Judea. Mochi sejse quimacac tomin quinami huil quichihuaya pa quinpalahuis yehuanten hual amo quipialoaya nindeno. <sup>30</sup> Cuaquinon yahuililoaya quintilanililo in tomin yehuanten hual quinmiztinemiloaya in laneltocanjmes pin Judea. Quintilanjque Bernabé huan Saulo pa quinhuiquilisqui in tomin pa yehuanten.

## 12

*Quimictilo Jacobo huan quitzacualo Pedro pin calijtic*

<sup>1</sup> Pa innojen tonaljmes latilanic Herodes in hué pa quinquitzquilosquiaya sequin laneltocanjmes pa quinchihuillilosquiaya lacocoltilislí. <sup>2</sup> Latilanic pa quimictilosquiaya Jacobo hual yec icni Juan, quicotonilije iquixlan. <sup>3</sup> Quitac

Herodes quinami in quinpaquiltic in judíos, huan pampín latilanic noje pa quiquitzquilosquiaya Pedro. Cataloaya pin tonalijmes hual quicualoaya in pan hual amo quipia laxocoyajquil, itoca in fiesta (ilhuil) pascua. <sup>4</sup> Yojque quiquitzquijque Pedro huan quitzacuajque pin calijtic. Quitemacajque ca dieciseis (caxtuli huan se) guaches pa quinapachilosquiaya pa como quisasquiaya Pedro. Cataloaya nahui nahuenten, huan mochi seise quinpiaya nahui guaches. Seise nahuenten quipialoaya quiman yahuiloya quinapachilo Pedro. Huan quiman lamisquiaya in fiesta (ilhuil), Herodes yahuiaya quiquixti Pedro pin calijtic, yahuiaya quiytu pampa quipiaya pa miquis. Cuaquinon yahuiaya latilani pa quimictilosquiaya inminyampa moxtin. <sup>5</sup> Yojque, Pedro cataya latzacuali pin calijtic ca in guaches quinapachijtataloaya. Ma yoje, amo mocahuajque pa quilajlanilosquiaya Dios pa Pedro moxtin laneltocanijmes, quilajlanijque ca mochi inminyolo.

### *Dios quimacahua Pedro pa quisas pin calijtic*

<sup>6</sup> Yojque cataya in layúa, huan mostatica Herodes yahuiaya quiquixti Pedro. Coxtataya Pedro ca ome guaches, se pa ima cuali huan se pa ima amo cuali, huan yihual ilpitataya ca ome teposli. Noje cataloaya guaches pa quiahuac pin ilalapujquil in calijtic lanapachijtataloaya. <sup>7</sup> Cuaquinon nestiquisac se ilanahuatini in cielo hual in Tata quitilanic. Lajtiquisac pin calijtic, huan in lanahuatini quitecuac Pedro pa iumil lanasticali, quejxilfic, quilic:

—Ximoqueztiquisa.

Copinijque in teposli pa imajmajuan. <sup>8</sup> Huan in lanahuatini quilic:

—Ximolaquenti huan xiquinlali molacsames.

Yojque quichíac Pedro, huan in lanahuatini quilic:

—Xiclali monahuas huan xichtoca.

<sup>9</sup> Yojque quisac Pedro, quitocac in lanahuatini huan amo quimatiaya in hual quiapanujtataya pan ipampa in lanahuatini cataya ca melahuac, jan quiytaya pampa moxotocaya. <sup>10</sup> Ajsijque capa cataloaya se nahuenten guaches lanapachijtataloaya, quinpanahuije yehuanten, ajsijque capa cataloaya in oc sequin guaches, quinpanahuijque. Cuaquín ajsijque pa in lalapujquil lachihuali ca teposli hual cataya inahuac itenco in ojli, in ojli temacaya pin caltilan. Molapuc in lalapujquil ihuían, quisaje yehuanten, canaje in ojli huan jan ajnaxcan yajmo nesci ilanahuatini in cielo ca Pedro. <sup>11</sup> Axan quimatic Pedro pampa amo moxotocaya, quiytuc laijtic yihual:

—Axan nicmati neli in Tata quitilanic se ilanahuatini in cielo. Quitilanic pa nechquixtis pin polehuilisli, in hual yahuiaya nejchihuili in hué Herodes. Inon yihual huan moxtin in judíos quichixtataloaya pa nechpanusquiaya.

<sup>12</sup> Quijtutiahuiaya pa iyolo ca inon, ajsic pa ichan María inantzín Juan. In Juan noje motocaya Marcos. Nepa cataloaya miac laneltocanijmes, monchiculoaya quilajlantataloaya Dios pa Pedro. <sup>13</sup> Quitecuac Pedro in ilalapujquil in lajcotiyan hual cataya ilaixpan in cali. Hualac se tequipanujquil muachita itoca Rode pa quitasquiaya aqui cataya. <sup>14</sup> Quimatic pampa cataya Pedro ilajtol, pampín mopaquiltic miac huan amo quilapulic in lalapujquil, jan molalujtiac pa quinmachiltisquiaya in oc sequin pampa Pedro cataya pa quiahuac in lalapujquil. <sup>15</sup> Yehuanten quilije:

—Tehual ticchá quinami yes.

Ma yoje, yihual amo mocahuac pa quiytus cataya neli, cuaquinon yehuanten quiytujque:

—Unca ilanahuatini hual quisac pin cielo hual quilachilia.

<sup>16</sup> Huan Pedro amo mocahuac quitecuac in lalapujquil, pampín quila-pulije. Quiman quitajque, molapolultijque. <sup>17</sup> Huan yihual quitzejteluc ca imajma pa camo nahuatilosciuaya, cuaquinon quinquhuilic quinami in Tata quiquixtic pin calijtic, noje quinmilic:

—Xiquinmachiltican Jacobo huan tocnían laneltocanijmes innojen hual nechpanuc.

Cuaquín quisac, mopalac pa camo moitasquiaya chantitataya umpa Jerusalén.

<sup>18</sup> Cuaquín quiman lanesic, in guaches amo quimatiloaya len quijtulosquiaya inahuac in hual quipanuc Pedro. <sup>19</sup> Yoje latilanic Herodes pa quitemosquiaya Pedro, huan amo quitaje. Cuaquín quinlajlanic Herodes in guaches len quipanuc. Yehuanten amo huil quinanquilije nindeno. Pampín latilanic pa quinmictilosquiaya in guaches, huan yihual quisac pin lalticpan Judea, temuc pa Cesarea, nepa mocahuac chantitataya.

### *Miqui Herodes*

<sup>20</sup> Huan cualantataya Herodes míac ca yehuanten pin caltilan Tiro huan in caltilan Sidón, yajmo lamacahuilic pa yehuanten pa ilali quinna-maquiltilosquiaya len quicuasqui yehuanten pa Tiro huan Sidón. Ma yoje, yehuanten in tirotecos huan sidontecos quipialoaya pa molacaultilosquiaya ca in hual quinnamaquiltilosquiaya yehuanten pin lali capa in hué Herodes huelitiaya. Pampa inon quichihuaque lajtulisli ca Blasto, yihual yec se itequipanujquil hué Herodes. Quilijque Blasto in tirotecos huan in sidontecos pa yihual quitemachisquiaya Herodes pa mochiasquiaya jan sejpa ca yehuanten. <sup>21</sup> Yojque, quilalic Herodes se tonali huan pa in tonali molaquentic ca itzotzomajli cualtichin hual quipialo in hueyenten. Molalic pa pani capa moxtin huil quitaloaya pan iicpali hué, cuaquinon quinnojnötzaya yehuanten. <sup>22</sup> Huan yehuanten tzajtziloaya, quililoaya:

—¡Unca se dios hual lajtúa, amo unca se lalac!

Yojque quijtuloaya pampa quinequiloaya pa mocahuasquiaya Herodes niman cuali ca yehuanten. <sup>23</sup> Huan jan ajnaxcan, hualac se ilanahuatini in Tata pin cielo, quicocoltic Herodes ca se cocolisli pampa quimacahuilic pa in lacames quijtutinemilosquiaya yojque, quijtuloaya pampa Herodes yec se dios. Huan yojque Herodes amo momajtiaya ilaixpan Dios. Pampín, quicuaque oculimes icuerpo (inacayo) Herodes, huan pampa inon miquic.

<sup>24</sup> Ma yoje, cataloaya míac hual quicaquiloaya ilajtol Dios huan miajque yehuanten hual quineltocaloaya. <sup>25</sup> Quisajque Bernabé huan Saulo pa Jerusalén, mocuepajque pa Antioquía, axan laquisajque ca itequipanulisli nepa Jerusalén. Quihualicajque ca yehuanten Juan hual noje motocaya Marcos.

## 13

### *Quinlajtultilo Bernabé huan Saulo pa quichihuasqui oc se tequipanulisli*

<sup>1</sup> Pa Antioquía ca in laneltocanijmes cataloaya lajtunijmes huan lamaxtinijmes. Cataloaya Bernabé huan Simeón, yihual noje motocaya Niger, huan cataloaya Lucio hual chantini pin lali itoca Cirene, huan Manaen hual moscaltic ca Herodes in hué pa ichan, huan Saulo. <sup>2</sup> Se tonali quilajlantat-aloaya Dios huan mosajtataloaya, quinmilic in Espiritu Santo:

—Xijxiluilican Bernabé huan Saulo pa quichihuasqui in tequipanulisli hual ninquinmacac.

<sup>3</sup> Cuaquinon, mosahuajque huan quilajlanijque Dios, quinlalilijque inminmajmajuan inminpan Bernabé huan Saulo. In lanextilic pampa Dios axan quinlajtultic pa in tequipanulisli. Cuaquinon in laneltocanijmes quinlanijque Bernabé huan Saulo.

*Quijtulo ilajtol Jesucristo Bernabé huan Saulo pin lali lajco pin al huejcalan itoca Chipre*

<sup>4</sup> Yojque quintilanic in Espíritu Santo. Quistataloaya pa Antioquía, temu-  
jque pa in caltilan itoca Seleucia. Nepa calaquijque se barco hué, uyajque  
pa in lali itoca Chipre lajco pin al huejcalan. <sup>5</sup> Ajsijque pa se caltilan  
pa itenco Chipre hual motocaya Salamina. Umpa pa inmintiopajmes in  
judíos quinahuatiloaya ca mochi inminyolo ilajtol Dios. Noje cataya ca  
yehuanten Juan Marcos hual quinpalhuiaya. <sup>6</sup> Cuaquín quipanahuijque  
pa mochi in lali huan ajsijque pa in caltilan Pafos. Nepa quitajque se  
lacial laxuxani, yec se ilajtuni Dios, quil quilic, mas que islatic, amo yec  
neli. Yihual yec judío, motocaya Barjesús. <sup>7</sup> In Barjesús yec inahuac in  
huelitini (gobernador) itoca Sergio Paulo hual yec lacial hual quimatiaya,  
huan yihual quinnahuatic pa hualalosquiaya Bernabé huan Saulo pampa  
quinequiaya quicaqui ilajtol Dios. <sup>8</sup> Ma yoje, Barjesús in laxuxani molalic pa  
quintzacuilisquiaya yehuanten pa camo quinahuatilosquiaya ilajtol Dios. In  
laxuxani noje motocaya Elimas. Elimas quinequi quijtua laxuxani. Yihual  
amo quinequiaya pa Sergio Paulo quineltocasquiaya Jesucristo. <sup>9</sup> Ma yoje,  
Saulo hual noje itoca Pablo quiapiaya in Espíritu Santo quihuelilitataya pa  
iyolo, mocahuac quiztataya Elimas <sup>10</sup> huan quilic:

—Tehual ticmati tilacuajcuamantía huan ticmati ticchía mochi hual unca  
elehuis. Tehual tiquinami in lili, timolalía ipan mochi hual melahuac. ¿Amo  
quiman timocahuas pa ticchías pando iojli melahuac Dios? <sup>11</sup> Huan axcan,  
xiquta. Yahui mitzcocoltia in Tata. Ticayas pachacal huan amo hual tiqitas  
nindeno pa míac tonalijmes. Cuaquín Dios mitzmacahuiltis pa tilachías oc  
sejpa.

Jan ajnaxcan, yajmo lachiaya, mopachacaruc. Quitaya laticumac san  
huan quitemujiñemiaya se hual quilaicanasquiaya ca imajma. <sup>12</sup> Cuaquín  
pampa quitac in gobernador Sergio Paulo in hual quipanuc Elimas, yojque  
yihual quineltocac ilajtol Dios, molapolultic pampa quitac quinami ilamax-  
tilisli in Tata Jesús quiapiaya míac chicahualisli.

*Pablo huan Bernabé yahuilo pa Antioquía pin lalticpan Pisidia*

<sup>13</sup> Huan quisajque ca barco nepa Pafos Pablo huan yehuanten hual cat-  
aloaya ca yihual, ajsijque pin caltilan itoca Perge pin lalticpan Panfilia.  
Huan nepa Juan moxiluc pa yajmo cayas ca yehuanten, mocuepac pa  
Jerusalén. <sup>14</sup> Pablo huan Bernabé quistiajque nepa Perge, ajsijque pin  
caltilan Antioquía pin lalticpan Pisidia. Uyajque pa inmintiopan in judíos  
pan tonali quiman mosehuilo in judíos, nepa malalijque. Quicaquijque  
se quinmomaxtilic yehuanten ilajtol Dios. Cataya pa iamal Dios ilajtomes  
hual quijcuilujque Dios ilajtunijmes. <sup>15</sup> Cuaquinon, quiman laquisac quin-  
momaxtilic, ilaicananijmes in tiopan quinnotzajque Pablo huan Bernabé,  
quinmilijque:

—Lacames tocnán, sinda anquipía len lajtol calica anquinchicahualtis pa  
inminyolo in lacames, xiquilican.

<sup>16</sup> Cuaquín moquetzac Pablo, quixilanic imajma pa yehuanten pa camo  
nahuatilosquiaya, quinmilic:



—Lacames israelitos huan amhuanten amo israelitos hual ma yoje anmomajtía ilaixpan Dios, xilacaquican. <sup>17</sup> InminDios in israelitos hual ticate tehuanten in judíos, yihual Dios molajtultilic totajtztzían. Quinchihuic hué yehuanten quiman catanijme pin lali itoca Egipto. Cuaquinon quinextic Dios ilahueliltisli huan quinlaicanac pa quiahuac Egipto. <sup>18</sup> Pa cuarenta xixihuimes quinmolachiliya yehuanten huan amo quinlamiaya mas que quichihuanijme míac amo cuali pin lali capa amaqui chantiaya. <sup>19</sup> Huan quiman quinsulahuic chicome (siete) hueyenten ca inminlacames pin lali Canaan, quinxiluilic totajtztzían inminlali yehuanten. <sup>20</sup> Cuaquín Dios quinmacac laicananijmes pa huelitilic quiaya capa yehuanten quinami pa cuatro ciento cincuenta xixihuimes. Lamije quinlaicanaje yehuanten quiman ajsije in tonalijmes hual yuliaya Samuel, yihual yec Dios ilajtuni. <sup>21</sup> Huan pa in tonalijmes totajtztzían quinequiloaya quipialo se hué. Pampín, Dios quinmacac Saúl ixolol Cis. Yihual yec se lalac israelito ca imiahuimes Benjamín, huan huelitiaya in Saúl capa totajtztzían pa cuarenta (ompuhuali) xixihuimes. <sup>22</sup> Huan quiman Dios quijcuanic Saúl pa yajmo yes hué, cuaquín Dios quilajtultic David pa yes inminhué yehuanten, quijtuc cuali inahuc yihual, quilic: “David ixolol Isaí niquita quinami lalac hual quipaquiltía noyolo, yihual quichías len yes hual nicnequi.”

<sup>23</sup> Pablo lajtutíac, quinmilic:

—Huan quinami Dios quijtuc neli pa yina, yihual quihualicac pa tehuanten ilacames Israel se hual techquixtilía pin ipolehuilisli tolaijlaculisli. Huan in se unca Jesús imiahuil in hué David. <sup>24</sup> In Jesús ayamo pehuac quichíac itequipanulisli pampa monequiaya pa Juan Lacuayatequini laquisasquiaya quinnahuatijtinemi Dios ilajtol inminlaixpan moxtin in judíos. Quinmiliaya pa quinpalalosquiaya inminyolo pa laijnamiquisi quinami Dios quinequi, cuaquinon quincuayatequisquiaya. <sup>25</sup> Cuaquín pa innojen tonalijmes hual Juan lamiaya quichía itequipanulisli, quijtuaya: “Nehual amo niunca aqui anquijtutíac amhuanten. Xiquitacan. Hualas se nechtocatic nehual, huan nel amo nimonotza pa nictomilis ilailpili ilacsames pampa yihual unca niman hué, nehual amo quiman nicayas yoje hué.”

<sup>26</sup> Pablo lajtutíac, quinmilic:

—Lacames nocnían, amhuanten imiahuimes Abraham huan amhuanten hual anmomajtía ilaixpan Dios, ma annimitzili inon. Dios quinequic pa tijaquilosquiaya in lajtol hual techquixtilía pin ipolehuilisli icualanilisli Dios. <sup>27</sup> Yehuanten hual chantilo pa Jerusalén, huan yehuanten hual quipialo lahueliltisli amo quimatiloaya aqui yec Jesús. Amo quimatiloaya len quinequi quijtúa in hual quijcuiluje ilajtunijmes Dios. Amo quimatiloaya mas que momaxtilo inon pan mochi in tonalijmes quiman timosehuilo. Pampín quitilaniye in Jesús pa quimictilosquiaya, yoje lamije quichihuae in hual yec lajcuiluli. <sup>28</sup> Huan mas que amo quitaje len calica huil quitilani pa yesi lamictili, ma yoje quitemachije Pilato pa latilani pa in guaches quimictilosquiaya Jesús pan se cuahuil. <sup>29</sup> Yojque lamije quichihuae len quijtulo in amames inon hual quiapiaya pa quipanusquiaya Jesús. In amames quinmijcuiluje pa yina Dios ilajtunijmes. Quiquixtije pin cuahuil, quitemuhuije, quilalpachuje pa se cueva pa laijtuc se tel, se coyunquil capa quilalilo mijquimes. <sup>30</sup> Ma yoje, Dios quiyulitic, quiquixtic capa in mijquimes. <sup>31</sup> Huan cuaquinon Jesús monextic míac tonalijmes ca yehuanten hual pehuanijme ca yihual pin lalticpan Galilea, panquisanijme ca yihual pa Jerusalén. Axan yehuanten quinnahuatijtinemilo moxtin lacames ilajtol yihual. <sup>32</sup> Huan



tehuanten antimitzilijtcate san in lamachiltilisli cuali. Inon unca hual neli Dios quinmilic totatzitzían pampa yahuiaya quinchihuili. Huan inon Dios axan lamic quinchihuilic yehuanten inminmiahuimes totatzitzían pan tonali hual quiyuliltic Jesús oc sejpa. <sup>33</sup> Huan tehuanten inminmiahuimes totatzitzían. Unca quinami quijtúa pa salmo ome: “Tehual tinoxolol”, quil, “axan nimochíac motajtzin.” <sup>34</sup> Quema, Dios quiyuliltic quiquixititaya pa camo palanisquiaya icuerpo. Techilía pa ilajtol lajcuiluli pampa yahuiaya quichía inon, quilic: “Neli nimijchihuilis len hué pa tehual, yes inon hual niquilic David pampa niahuiaya nimijchihuili.” <sup>35</sup> Inon quijtuc Dios, pampa ca oc se ilajtol noje quijtuc jan quinami cataya Jesús hual lajtutataya, quilic: “Amo ticmacahuiltis pa palanis nocuerpo nehual molajtultili hual tichlajultic.” <sup>36</sup> Axcan in ticmatilo. David huelitini capa totatzitzían in judíos quinami quinequiaya Dios. Cuaquinon polehuic David, quialpachuje huan ticmatilo pampa palanic icuerpo David. <sup>37</sup> Ma yoje, amo palanic icuerpo yihual hual Dios quiyuliltic oc sejpa. <sup>38</sup> Ximatican axcan, lacames nocnían, pan ipampa in Jesús Dios quinquipuhuas anmolajlaculisli, inon antimitzililo neli. <sup>39</sup> Pan ipampa Jesucristo, Dios quinquixtilía inminlajlaculisli moxtin hual quineltocalo. In lajtol hual Dios quilic Moisés amo quiman huil quinquixtilic in lacames inminlajlaculisli. <sup>40</sup> Xiquijquiztiacan pa camo anmitzpanus len quijcuiluje ilajtunijmes Dios, quijtuje:

<sup>41</sup> Xiquitacan amhuanten laxijxicunijmes, huan ximolapolultican huan xipolehuican,

pampa nehual nía nicchía len pan innojen tonaliijmes quiman anyultías. Yes len hual amo anquineltocasquiaya mas que se anmitzilisquiaya. Yojque quijtúa ilajtol Dios.

<sup>42</sup> Yojque Pablo laquisac quinlaquetzilizic huan quistiajque pin tiopan yihual huan Bernabé. Cuaquín yehuanten hual lacatijque judíos quitemachijque pa quinnahuatillosquiaya oc sejpa innojen lajtomes, huan pa quinnahuatillosquiaya pa in oc se tonali quiman mosehuiloaya. <sup>43</sup> Lamíc in lanechiculisli pin tiopan huan miac judíos quintocajque Pablo huan Bernabé. Noje quintocajque miac hual amo yeje judíos mas que quimolancuacuetziliziloaya Dios quinami in judíos. Huan quinlaquetzilizijque Pablo huan Bernabé, quinchicahualtijque pa camo mochahualosquiaya pa quineltocalosquiaya Dios huan pa quijnamictiasqui quinami quinmicnilía yehuanten.

<sup>44</sup> Ajsic in oc se tonali quiman mosehuiloaya, huan ca nadita moxtin yehuanten pin caltilan monechicujque, pampa quinequiloaya quicaquilo ilajtol Dios. <sup>45</sup> Ma yoje, quiman in judíos quinmitajque in miac lacalera hual hualajque, niman moxicujque, quijtutinemiloaya pampa amo melahuac in hual quinmiliaya Pablo, quihuejuecaltitinemiloaya ilajtol Jesucristo. <sup>46</sup> Ma yoje amo momajtiloaya Pablo huan Bernabé, amo mochahualoaya. San quinlaquetziliziloaya, quinmililoaya:

—Ticpiaje pa tipehualosquiaya antimitzlaquetzililo amhuanten ilajtol Dios. Ma yoje amo anquinequi anquineltoca. Amhuanten quinami lacames hual anmomaca ojli quinami in la'ajuanijmes quinchihuililo yehuanten hual oc sequin quinmotexpahuililo. Yoje amhuanten anmochijtica lacames hual amo monotzalo pa quipiasí in yulilisi hual amo quiman lamis. Pampín xiquitacan. Antimizcajahualo huan tiquinlaquetzilisi yehuanten hual amo judíos. <sup>47</sup> In ticchihualo pampa yojque techilic in Tata. Yihual pa yina quilic:

Annimitzljaltultic pa anquinnahuatilis nolajtol capa moxtin yehuanten pin lalticpan,

yojque quimatisqui pampa nehual niquinquixtilis inminlajlaculisli, pampa nolajtol quinlahuilis yehuanten no'ojli.

<sup>48</sup> Yoje, quiman quicaquijque inon yehuanten hual amo judíos, quipiajqque míac paquilisli, quijtuloaya lajtomes cuajcuali huan huejué ilaixpan in Tata. Quineltocajque moxtin aquinojen Dios quinlajtultic pa quipialosquiaya in yulilisli hual amo quiman lamis. <sup>49</sup> Yojque mosemanac ilajtol in Tata pa mochi in lali. <sup>50</sup> Ma yoje in judíos latenehualoaya inminahuac Pablo huan Bernabé ca in sihuames hual yuliloaya quichijtcate len quijtulo in lajtomes quinami quipialoaya pa quimolancuacuetzilisqui Dios. Moxtin quimatiloaya momajtilo pampa quineltocaloaya inminlahuelilitlisli in lajtomes. Huan in judíos yojque quincualantijque ca Pablo huan Bernabé. Noje quincualantijque in hueyenten pin caltilan ca Pablo huan Bernabé. Quimpehualtijque pa quintojtcasqui huan yojque quinquixtijque pa inminlali. <sup>51</sup> Ma yoje, quintzejtzelujque Pablo huan Bernabé inminlacames pa quiquixtililosquiaya ilalmoluncal inminlali. Yojque quinextilijtataloaya yehuanten pa Antioquía quinami cataya niman amo cuali inon hual quichihujque, pampa amo quixtocaloaya ilajtol Dios. Cuaquinon uyajque pa in caltilan Iconio. <sup>52</sup> Ma yoje yehuanten hual quineltocajque nepa pa Antioquía quipialoaya paquilisli huan in Espíritu Santo huelitiaya pa inminyolo.

## 14

### *Pablo huan Bernabé pa Iconio*

<sup>1</sup> Moitaloaya pin caltilan Iconio Pablo huan Bernabé, huan calaquijque in omenten pa inmintiopan in judíos. Nepa niman cuali quinnahuatilijque ilajtol Dios, huan yoje quineltocajque niman míac lacames, judíos huan yehuanten hual amo judíos. <sup>2</sup> Ma yoje in judíos hual amo quinequiloaya quineltocalo Cristo ilamachilitlisli cuali quincualantijque yehuanten hual amo judíos, quincualantijque ca yehuanten hual, quema, quinequiloaya quineltocalo. <sup>3</sup> Ma yoje, Pablo huan Bernabé panuloaya míac tonalijmes nepa, quinnahuatiloaya in Tata ilajtol, amo momajtitataloaya. Huan in Tata Jesús quinnextilic in lacames pa Iconio pampa cataya melahuac in lajtol hual Pablo huan Bernabé quijtuloaya. Quinnextilic inon pan ipampa quinami Pablo huan Bernabé quinpajtic cocoxquimes, Dios quinhueliltic pa quinpajtije. <sup>4</sup> Ma yoje, amo cataloaya ca se lajtulisli in lacames. Sequin quixtocaje len quijtuloaya in judíos, oc sequin quixtocaje len quijtuloaya in lanahuatinijmes Pablo huan Bernabé. <sup>5</sup> Yojque, quichihujque in judíos se lajtulisli ca yehuanten hual amo judíos huan ca yehuanten hual quipialoaya lahuelilitlisli. Quichihujque lajtulisli pa quinhuejuecaltilosquiaya in lanahuatinijmes huan pa quinlaxililosquiaya tixcalazos. <sup>6</sup> Quimatijque inon Pablo huan Bernabé, pampín cholujque pa ome caltilan huejué hual motocaje Derbe huan Listra. Noje cataloaya sequin caltilan pa inmintejtenco. Innojen caltilan cayajque pin lali itoca Licaonia. <sup>7</sup> Nepa quinnahuatiloaya ilamachilitlisli cuali Jesucristo.

### *Quilaxililo tixcalazos Pablo*

<sup>8</sup> Huan cataya se lalal pa Listra amo huil quinnejnemiltiaya icxihujames. Lacatic yojque huan amo quiman nejnemic. <sup>9</sup> Nepa molalijtataya, quicaquiaya laqueztataya Pablo. Pablo mocahuaya quiztataya huan quifac

pampa in lalac quimatic pa iyolo pampa Dios huil quipajtsquiaya. <sup>10</sup> Yojque ca lajtol chicahuac, Pablo quilic:

—Ximoquetza melahuac ca mocxihuajmes.

Huan moqueztiquisac huan tzicuinic, pehuac nejnemic. <sup>11</sup> Yojque, quiman quitaje in lacames in hual quipanuc in lalac, pehuaje tzajtzié ca ilajtol Licaonia, quijtutataloaya:

—¡Innojen lacames neli cate todioses hual mochihuaje quinami lacames huan quisaje pin cielo huan temuje ca tehuanten!

<sup>12</sup> Yojque Bernabé quilalilije itoca inmindios Júpiter, huan Pablo quilalilije itoca inmindios Mercurio, pampa Pablo cataya in se hual cantataya in lajtol. Quijtulo in licaontecos pampa inmindios Mercurio quichía yojque.

<sup>13</sup> Huan quipiani yehuante in licaontecos itiopan nepa capa calaquini-jme pin caltilan, nepa quimolancuacuetzilinjme in dios Júpiter. Huan in tiopista quinhualiac toros huan in lacames quisusujque xuchimes hual in tiopista quinhualiac pa ilalapujquimes ilajcotiyan inmintiopan. Yihual huan in míac lalalera quinequiloaya quinmictilo in toros pa yoje quin-molancuacuetzililosquiaya Pablo huan Bernabé. <sup>14</sup> Quiman quicaquijque in lanahuatinijmes Pablo huan Bernabé len yahuloaya quichihual, jan axcan quintzayanijque inmincotones pampa quincoc inminyolo ca cualanilisli pampa yahuloaya quichihualo inon. Molasaje lajco capa in míac lalalera, quintzajtzilije quinmilijtataloaya:

<sup>15</sup> —¡Lacames! ¿Leca anquichijtica inon? Tehuante tilacames jan quinami amhuante. Antimitznahuatlilo in lamachiltisli cuali pa antimitznextilisli quinami monequi pa amocahuas pa anquinmolancuacuetzilis in monos huan pa anquinmolancuacuetzilis in Dios hual yultica. Yihual quichíac in cielo huan in lalticpan huan in al huejcalan huan mochi hual cate ca innojen.

<sup>16</sup> Pa yina Dios quinmacahuiltini lacames pa quinmanasi inminojlimes yehuante. <sup>17</sup> Ma yoje, amo mocahuaya pa quichiasquiaya len calica quin-xentiliaya pampa yihual unca Dios. Quimacaya in quiahuil, quinmacaya in tonalijmes quiman lapixcalo quiman yucsi in laquilyo huan in trigo. Techlacualtía pa tipachihuisi huan techmoixtocaltilia toyolo ca paquilisli.

<sup>18</sup> Pablo huan Bernabé yojque quinmilijque huan quinmilijque pa camo quinmictilosquiaya in toros calica yahuloaya quinchihuil molancuacuet-zalisli. Cuaquinon in licaontecos mocahuaje pa quichihualosquiaya, mas que ca nadita Pablo huan Bernabé amo huil quinzacuilloaya pa camo quichihualosquiaya yojque.

<sup>19</sup> Cuaquín hualajque in judíos hual chantiloaya pa Antioquía huan Iconio, quinyantijque yehuante pa Listra pa cualanilosquiaya ca Pablo. Pampín quilaxilijque ca tixcalazos yehuante pa Listra, cuaquinon quihuilanajque pa quiahuac in caltilan pampa quijtujque pampa miquic. <sup>20</sup> Ma yoje, quiman monechicujque in laneltocanijmes quiyahualujtataloaya itenco Pablo capa lastataya nepa, yihual moquetzac huan calaquic pin caltilan. Mostatica yihual huan Bernabé uyajque pa in caltilan Derbe.

<sup>21</sup> Cuaquinon quinnahuatlijtinemiloaya yehuante pa Derbe ca in lamachiltisli cuali, huan míac lacames mochihuaje laneltocanijmes. Cuaquín mocuepajque Pablo huan Bernabé pa Listra huan Iconio huan pa Antioquía. <sup>22</sup> Quinchicahualtijque inminyolo innojen laneltocanijmes pa camo mocahualosquiaya pa quineltocasqui Jesucristo. Quinmilijque:

—Timoxtin ticpialo pa tipanusi míac lacocoltilisli, jan yoje tiajsisi capa Dios huelitia.

<sup>23</sup> Huan quinlajtultijque sequin lacames pa yelosquiaya yehuanten hual quinmitalosquiaya in laneltocanijmes. Cuaquinon quilajlanijque Dios huan mosahuaje, quintemacaje pa ilahuelilitisli in Tata Jesucristo yehuanten hual quineltocaloaya.

### *Mocuepalo Pablo huan Bernabé pa Antioquía pin lalticpan Siria*

<sup>24</sup> Cuaquín quipanahuijque Pablo huan Bernabé in lalticpan Pisidia, huan uyajque pa in lalticpan Panfilia. <sup>25</sup> Umpa quinnahuatiliijque Dios ilajtol pa Perge, huan ca se nadita temujque pa Atalia. <sup>26</sup> Cuaquín uyajque ca barco hué huan ajsic pa Fenicia. Nepa canajque ojli pa ajsisqui pa Antioquía pin lalticpan Siria, capa pehuajque canajque ojli pa in lalimes ca capic uyajque. Nepa cataya capa in laneltocanijmes pehualoaya quintilanilo Pablo huan Bernabé huan quilajlaniloaya Dios pa quinpalehuis pa huil quichijtiásqui in tequipanulisli hual Dios quintilanic pa quichihualosquiaya. Huan axcan lamijque quichihujque in tequipanulisli, axcan mocuepajque. <sup>27</sup> Ajsijque pa Antioquía, quinahuatijque pa monechiculosquiaya yehuanten hual quineltocaloaya Jesucristo. Cuaquín quinlamachiltijque mochi hual quichíac Dios pan inminpampa yehuanten, quinami yihual quinhueliltic yehuanten hual amo judíos pa quineltocasqui in Tata Jesucristo. <sup>28</sup> Huan panujque Pablo huan Bernabé míac tonalijmes ca yehuanten hual quineltocaloaya in Tata Jesús nepa pa Antioquía.

## 15

### *Monechiculo in lanahuatinijmes huan abuelojmes pa Jerusalén*

<sup>1</sup> Cuaquinon, cataloaya sequin hual quisajque pin lalticpan Judea huan temujque pa Antioquía. Pehualoaya quinmaxtilo tocnían laneltocanijmes hual amo judíos, yojque quinmilloaya:

—Sinda amo anunca latzontequili pa anmocuilaqli quinami quimaxtic Moisés pa yina, cuaquinon amo huil anyes laquixtili pin ipolehuilisli Dios icualanilisli.

<sup>2</sup> Pampín Pablo huan Bernabé pehualoaya quinlaxililo lajtomes ca in judíos, quinmilloaya pampa amo neli cataya inon hual quimaxtitataloaya, quinmilloaya pampa amaqui ca in lacames hual amo judíos quipía pa lamis quichías inon hual quijtúa in lajtol hual Moisés quijcuiluc. Ma yoje, in judíos hual quisajque pin Judea quinlaxilijtinemiloaya lajtomes chicahuac ca Pablo huan Bernabé. Pampín in laneltocanijmes quinlajtultijque Pablo huan Bernabé huan oc sequin ca yehuanten, quinlajtultijque pa panquisalosquiaya pa Jerusalén. Nepa yahuiloyaya quinmitalo in lanahuatinijmes huan in abuelojmes. Yahuiloyaya quinnahuatilitilo in hual quinmaxtiloaya in lacames pa Jerusalén hual temujque pa Antioquía. Quinequiloaya quimatilo neli sinda in hueyenten pa Jerusalén cataloaya ca se lajtulisli ca inon hual quinmaxtiloaya.

<sup>3</sup> Yojque, in laneltocanijmes quintilanijque. Yehuanten quipanahuijque pa in lali Fenicia huan in lalticpan Samaria, huan cajcapa quinlaquetzilijtinemiloaya moxtin in laneltocanijmes quinami yehuanten hual amo judíos quicajchualoaya quinami molancuacuetzanijme inminlaixpan inmindioses huan pehualoaya quineltocalo Dios. Quiman quicajquijque inon, quipialoaya míac paquilisli moxtin in laneltocanijmes pampa yehuanten hual amo judíos noje quineltocaloaya.

<sup>4</sup> Cuaquín ajsijque pa Jerusalén. Quimpialtijque ca paquilisli in laneltocanijmes huan in lanahuatinijmes huan in abuelojmes. Huan Pablo

huan Bernabé quinmachiltijque mochi hual Dios quichíac pan inminpampa yehuanten.

<sup>5</sup> Ma yoje, moquetzajque sequin hual quineltoaloaya inminlamaxtilisli in fariseos huan noje quineltoaloaya in Tata Jesús, quinmilijque:

—Monequi pa tiquinmilisi pa quichihuasi inon hual quijtúa in lajtol hual Moisés techmac, quipialo pa quintzontequilisi mochi sejse icuilaxli.

<sup>6</sup> Monechicujque in lanahuatinijmes huan in abuelojmes pa molaquetzil-squi pa ajsilosquiaya mocahualo ca se lajtulisli. <sup>7</sup> Quiman molaquetzilijque míac, cuaquinon moquetzac Pedro, quinmilic:

—Lacames nocnían, amhuanten anquimati amo quipía míac quiman Dios nechlajtultic nehual pa niquinmilis in lamachiltisli cuali yehuanten hual amo judíos. Pan ipampa inon hual niquinmilic, yojqe quicaquije huan quineltoaje. <sup>8</sup> Dios quinmiximati inminyolo lacames huan yihual quinex-tilic pampa quinmanac yehuanten hual amo judíos. Nicmati inon pampa Dios quinmacac in Espíritu Santo jan quinami techmacac tehuanten. <sup>9</sup> Dios quinnequi yehuanten quinami yihual technequi tehuanten noje pampa quinchipahuilic inminyolo quiman quineltoaje ilajtol. <sup>10</sup> Axcan, ¿leca anquijtutica pampa Dios quinequi pa quichihuasi lanexilisli pan inmin-cuerpos tocnían hual amo judíos? Dios technexilic pampa yajmo monequi pa quipiasi inon. ¿Anquinequi anquicualantía Dios, cuajnesi? Anquinctica anquilalilia len etic pa tocnían hual amo huil mopepenialtisi pa lamisi quichi-huasi. Tehuanten noje amo huil timopepenialtiloaya pa tilamilosquiaya ticchihualo mochi len quijtúa ilajtol Moisés, huan totajtitzían amo huil mopepenialtinijme pa quichihualosquiaya. <sup>11</sup> Amo xicchihuacan inon. Tic-matilo pampa ticate laquixtili pa ipolehuilisli Dios icualanilisli pan ipampa iicnilisli in Tata Jesús. Huan ticmatilo pampa unca yojqe ca yehuanten noje hual amo judíos.

<sup>12</sup> Yojqe, yajmo nahuatijque in laneltocanijmes. Cuaquinon quicaqui-jque len quinmilijque Bernabé huan Pablo, quinmachiltijque mochi hual Dios quichíac pan inminpampa yehuanten quiman cataloaya ca yehuan-ten hual amo judíos. Quinmachiltijque quinami quinpajtiloaya ca Dios ilahueliltilisli. <sup>13</sup> Huan quiman laquisajque lajtujque Bernabé huan Pablo, cuaquinon lajtuc Jacobo, quinmilic:

—Lacames nocnían, xichcaquican. <sup>14</sup> Axcan anmitzmachiltic Simón Pedro quinami Dios pehuac quinnextilic ilahueliltilisli capa yehuanten hual amo judíos, quil quilic, Dios quichíac in pa quinlajtultisquiaya, quil, lacames capa yehuanten hual quineltoalosquiaya Cristo. <sup>15</sup> Huan inon unca ca se lajtulisli ca len quijtunijme Dios ilajtunijmes. Yojqe unca lajcuiluli len Dios quinmilic:

<sup>16</sup> Quiman lamisi panusi innojen, nehual Dios nimocuepas ca nolacames in judíos, imiahuimes David,

yehuanten yes quinami se tiopan laxitinili pampa cate lacames laijlaculi.

Ma yoje, in tonali hual nimocuepas ca yehuanten, cuaquín in hual niquinchi-huilis yes quinami nicchijchihuasquiaya in tiopan laxitinili,

huan yoje niquinchijchihuilis innojen lacames laijlaculi.

Nechmolancuacuetzilisqui quinami nechmolancuacuetziliniyime yehuan-ten hual yulinijme quiman yulini in hué David.

<sup>17</sup> Nicchihuas in pa yojqe quitemusqui quiximatisqui in Tata in oc sequin lacames pin lalticpan, jo quema, mochi in oc sequin lacames hual amo judíos hual nehual in Tata niquinlajtultic pa mochi oc sequin lalimes.

<sup>18</sup> Yojque quijtua in Tata hual quichihua innojen, yihual hual aqui techmachiltic mochi inon pa yina.

In unca len Dios quinmilic ilajtunijmes.

<sup>19</sup> Pampín —quinmilic Jacobo —, niquijtua ma como tiquinmacacan tequil aquinojen hual amo judíos hual pejticate quinelocalo Dios.

<sup>20</sup> Annimitzmaca lajtol pa tiquinmijcuiluilisi se amal. Jan tiquinmilisi san pa como quicuasi in huendis hual quilalilo inminlaixpan in monos inmindioses yehuanten hual amo quinelocalo Cristo. Tiquinmilisi pa se amo canas se sihual o se lalac hual amo unca isihua o ilahuical, pa quipías jan se iyaxca san. Noje tiquinmilisi pa como quicuasi inacal se yulijquil hual quitolpatzcaje pa quimictisi hual iesli amo quisac quiman miquic. Noje tiquinmilisi pa como quicuasi esli. Yojque amo quincualantisi in judíos.

<sup>21</sup> Quipialo pa quichihuasi yoje pampa axan pa mochi caltilan cate judíos hual pehualoaya chantilo nepa pa yina, huan quicaquilo momaxtilo ilajtol Moisés pa inmintiopajmes. Noje quinlaquetzililo ilajtol Moisés mochi in tonalijmes hual mosehuilo.

<sup>22</sup> Cuaquinon yehuanten in lanahuatinijmes huan in abuelojmes huan moxtin in laneltocanijmes quitajque cuali pa quinlajtutilosquiaya lacames pa quintilanosquiaya pa Antioquia ca Pablo huan Bernabé. Quilajtultijque Judas hual noje motocaya Barsabás huan noje quilajtultijque Silas. In omenten yejque huejué lacames ca in laneltocanijmes tocnán.

<sup>23</sup> Quitilanjque ca yehuanten se amal hual quihuicajque pa Antioquia. In amal quijtuc:

“Tehuanten in lanahuatinijmes huan in abuelojmes anmocían antimitzijcuiluililo amhuanten tocnán hual amo judíos pa Antioquia huan pa in lalticpan Siria huan pa in lalticpan Cilicia, antimitzipialtilo. <sup>24</sup> Techlamachiltije pampa sequin ca tehuanten quisaje nican, quil, huan uyaje pa amhuanten, mas que tehuanten amo tiquntilanije. Anmitzmacaje tequil, quil, huan pampín amhuanten amo anquimatiaya len yesquiaya cuali pa anquichías, quil, huan anmitzmacac tequil ca inon hual anmitzmaxtiloaya. Anmitzilije pampa anquipía pa anmotzontequilis anmocuilaxli huan anquipía pa anquinellocas in lajtol hual Dios quilic Moisés. <sup>25</sup> Pampín tehuanten timoxtin timocahuaje ca se lajtulisli huan techanac cuali pa tiquinlajtultisi lacames pa antimitztilanilisi ca tolasojli Bernabé huan tolasojli Pablo.

<sup>26-27</sup> Pan miac tonalijmes Pablo huan Bernabé moitalo yultinemilo capa ca nadita miquilosquiaya pampa quitequipanuililo in Tata Jesucristo. Ca yehuanten techanac cuali pa antimitztilanilisi Judas huan Silas hual anmitznahuatilisi mochi pa anquimatis cuali len quinequi quijtua ilajtol in Tata.

<sup>28</sup> Antimitzijcuiluililo inon pampa tiquitaje cuali tehuanten huan in Espíritu Santo pa como antimitzilisi pa anquichías miac. Jan xicchihuacan san innojen hual monotzalo. <sup>29</sup> Amo xijcuacan len hual quilalilo inminlaixpan in monos inmindioses hual quinmolancuacuetzililo, amo xijcuacan esli, amo xijcuacan inacal se yulijquil hual quitolpatzcaje pa quimictisi. Huan seje lalac ma quipía se isihua san, huan seje sihual ma quipía se ilahuical, ma como moteca ca oc se, san ca in se hualca monamictic. Sinda anquinneltoca innojen, yojque anquichías cuali. Ma Dios anmitzpiá.”

<sup>30</sup> Yojque, quintilanjque, quisajque pa Jerusalén yehuanten, huan temuque pa Antioquia. Nepa ajsijque, quinnahuatijque pa monechicusqui in laneltocanijmes, quinmacajque in amal. <sup>31</sup> Quiman quinmomaxtilijque in amal, paquijque in laneltocanijmes pampa in lajtomes quinlacahualtijque, quinquixtilijque inminicnotilisi. <sup>32</sup> Judas huan Silas noje yeje yehuanten

ilajtunijmes Dios huan pan ipampa inon hual quinmaxtiloaya, quinchicahualtiloaya míac inminyolo tocnían huan quinpalehuiloaya pa quineltocasqui Jesucristo niman cuali. <sup>33</sup> Judas huan Silas huan in oc sequin hual quistihualajque nepa Jerusalén mocahuajque nepa pa Antioquía sequin tonalijmes, cuaquinon yahuiloaya mocuepalo capa tocnían laneltocanijmes pa Jerusalén hual latlanijque pa hualalosquiaya pa Antioquía. Yehuanten pa Antioquía quinchicahuajque quinsejtataloaya yehuanten pa mocuepasqui cuali pa Jerusalén capa cataloaya yehuanten hual quintilanjque. <sup>34</sup> Ma yoje, Silas molalic pa mocahuas nepa Antioquía. <sup>35</sup> Huan mocahualoaya Pablo huan Bernabé pa Antioquía ca tocnían, lamaxtitinemoiloaya huan quinnahuatilijtinemoiloaya ilamachtilisli cuali in Tata. Huan cataloaya míac oc sequin hual noje lamaxtiloaya capa in laneltocanijmes.

*Pablo pehua yahui huejca oc sejpa pa quinahuatis in lajtol cuali*

<sup>36</sup> Panuje sequin tonalijmes, huan Pablo quilic Bernabé:

—Axcan, ma timocuepacan, ma tiquinpaxaluilican tocnían pa mochi innojen caltilan capa tiquinnahuatilije in Tata ilajtol. Ma timocuepacan pa tiqitasi quinami cate.

<sup>37</sup> Bernabé quinequiaya quihuica noje ca yehuanten Juan, in hual noje motocaya Marcos. <sup>38</sup> Quijtuc Pablo pampa amo cataya cuali pa quihuicalosquiaya Juan Marcos ca yehuanten pampa yihual quincajcahuac nepa capa cataloaya pin lalticpan Panfilia. <sup>39</sup> Cuaquín molaxililoaya lajtomes míac. Ma yoje, amo ajsijque pa se lajtulisli. Pampa in, moxilujque. Bernabé quihuicac Juan Marcos ca yihual, uyajque ca barco pa Chipre. <sup>40</sup> Pablo quilajtultic Silas pa yasquiaya ca yihual, huan inmicnían laneltocanijmes quilajlanijque in Tata pa quinmitasquiaya ca iicnilisli. <sup>41</sup> Quipanahuijque in lalticpan Siria huan in lalticpan Cilicia huan quinchicahualtinemoiloaya inminyolo in laneltocanijmes nejnepa.

## 16

*Timoteo yahui ca Pablo huan Silas*

<sup>1</sup> Ajsijque Pablo huan Silas pa Derbe huan Listra. Nepa cataya se laneltocani itoca Timoteo, ixolol se sihual judía hual quineltocac Cristo. Itajtzin yec se lalac griego. <sup>2</sup> Lajtujque cuali inahuac Timoteo icnían laneltocanijmes pa Listra huan Iconio. <sup>3</sup> In Timoteo Pablo quinequiaya pa yasquiaya ca yihual. Ma yoje canac huan quitzontequilic pa icuilaxli, pampa cataloaya míac judíos pa innojen caltilan huan quimatiloaya itajtzin Timoteo yec lalac griego.

<sup>4</sup> Cuaquín quinpanahuijque Pablo huan Silas huan Timoteo pa sequin caltilan huan pa oc sequin huan laquetzajque ca moxtin in laneltocanijmes. Quinmilije inon hual in lanahuatinijmes huan in abuelojmes pa Jerusalén quilijque pa quichihualosquiaya moxtin in laneltocanijmes hual amo yeje judíos. <sup>5</sup> Yojque, quinchicahuajtijque pa quineltocasqui in Tata Jesús niman cuali, huan yojque itequi miajque in lacames hual quineltocaloaya toTata.

*Pan ipampa laxotocalisli, Pablo quita se lalac hual yuliaya pa Macedonia*

<sup>6</sup> Quipanahuijque in lali itoca Frigia huan in lali itoca Galacia, huan quintzacuilic in Espíritu Santo pa camo quinnahuatililosquiaya ilajtol Dios pin lalticpan Asia. <sup>7</sup> Pampín, uyajque huan ajsijque pa in lali itoca Misia, yahuiloaya yahuillo pa in lalticpan itoca Bitinia. Ma yoje, iEspíritu Jesús amo quinmacahuilic. <sup>8</sup> Cuaquín quipanahuijque in lali itoca Misia huan



temujque pa Troas huan nehual Lucas niquinmitac nepa. <sup>9</sup> Huan pa layúa nestic ca Pablo len quinami laxotocalisli, quitac se lalac hual yuliaya pin lali Macedonia, moquezataya huan quitemachijtataya, quilic: “Xipanu pa Macedonia, xitechpalehui.” <sup>10</sup> Quiman quitac Pablo in laxotocalisli, jan ajnaxcan timochijchiuajque pa tiyahuilosquiaya pa in lali Macedonia. Ticmatijque pampa technotzaya Dios pa tiquinnahuatilosquiaya in lamachiltisli cuali ca yehuanten pa Macedonia.

*Pablo huan Silas yahuilosquiaya pa in caltilan Filipos*

<sup>11</sup> Yojque, quisajque ca barco nepa Troas, tiajque jan yoje pa in lali lajco pin al huejcalan itoca Samotracia. Mostatica tiajsijque pa in caltilan Neapolis. <sup>12</sup> Nepa tiquisajque, tiajque pa in caltilan Filipos. Inon in caltilan hué pa ilajco Macedonia capa quisa in tonali, unca se caltilan romano. Cataloaya guaches romanos hual quipehualtijque, yojque mocahua se caltilan romano. Ticataloaya sequin tonalijmes nepa. <sup>13</sup> Pan tonali quiman mosehuilo, tiquisajque pa quiahuac ilalapujquimes in caltilan, tiajque pa atenco hué capa tiqijtuque yahuinijme pa quilajlanilosquiaya Dios. Nepa timolalijque, tipehualoaya tilaquetzalo ca in sihuames hual monechiculoaya. <sup>14</sup> Cataya nepa se sihual itoca Lidia, lacatic pin caltilan Tiatira. In Lidia yec se lanamacani, quinamacaya tzotzomajli hual cataya layapali morado. Yihual Lidia quimolancuacuetziliaya Dios. Mocahuaya quicactica len Pablo quinmiliaya, huan in Tata Jesús quihueliltic pa iyolo pa quilalic ilaneltocalisli ca in hual Pablo quijtuaya. <sup>15</sup> Yojque, cataloaya lacuayatequili, yihual huan noje yehuanten pa ichan, huan cuaquinon quinmilic Pablo huan yehuanten hual cataloaya ca yihual, quinmilic:

—Sinda anquijtúa pampa nehual neli nicneltoca in Tata, xihualacan pa nochan, nepa xichantican.

Yojque technotzac ca lanequilisli, pampín nepa tiajque pa tichantilosquiaya.

<sup>16</sup> Cuaquín cataya se tonali tiyahuilosquiaya pa capa quilajlaniloaya Dios, cataya se muachita hual itecojuan moyaxcajtilijque yihual. In muachita quinqeipanuilini itecojuan, quipiaya se iyjecal amo cuali hual quilalilic Satanás. Yihual in muachita quinnehicuhuilic míac tomin pa itecojuan, pampa in iyjecal amo cuali quihueliltini yihual pa quijtusquiaya len yahuiaya panu. <sup>17</sup> Technamiquic pan ojli huan pehuaya techtoaca totepotzcon Pablo huan tehuanten, tzajtztiahuiaya, quiliaya:

—In lacames yehuanten itequipanujquimes Dios, in Dios hual san yihual unca hué. Yehuanten anmitzmachiltilo iojli capa ancayas laquixtili pin polehuilisli.

<sup>18</sup> In quichihuaya míac tonalijmes. Cuaquín cualaniaya Pablo pampa quimacaya tequil. Pampín momalinac quinotzac in iyjecal amo cuali, quilic:

—Nimitzilía pan ipampa Jesucristo ilahueliltisli, xiquisa capa yihual.

Huan jan ajnaxcan in iyjecal quisac pa yihual. <sup>19</sup> Axcán, quitajque itecojuan in muachita pampa yajmo huil quinechicuhuilic tomin. Pampín quinquitzquijque Pablo huan Silas, quihuilanajque pin tenencia capa cataloaya in hueyenten. <sup>20</sup> Quinmotexpahuilijque Pablo huan Silas, quilijque:

—In lacames cate judíos, quimacalo tequil tocaltilan. <sup>21</sup> Yehuanten quinmaxtilo lachihualisli hual molalilo ipan tolajtol sinda tiquinneltocasi o sinda tiquinchihuasi, pampa tehuanten ticate lacames hual ticpialo toyaxca ca romanos.

<sup>22</sup> Yojque, cualantihualajque ca yehuanten moxtin in lacames, huan in guaches quinquitzilijtiquisajque innahuajmes quinzayanilijtataloaya.



Latilanijque in la'ajuaniymes pa quinhuitequilosquiaya. <sup>23</sup> Cuaquín quiman lamijque quinhuitequijque ca míac latecualisli, quinhuicajque pa in calijtic, quilijque chicahuac in se hual quintzacuaya pa quinmitasquiaya cuali pa como quisalosoquiaya. <sup>24</sup> Yihual quicactataya in lajtol, quintzacuac pa in niman calijtic, quinlalilic icxihuajmes pan sequin cuahuimes hual quipiajque cojcoyunqueimes capa quinqutzquijque inmicxihuajmes. Amo huil quinquxtילוaya inmicxihuajmes pampa quintzacualo in cuahuimes ca teposlimes.

<sup>25</sup> Ma yoje, pa lajco layúa, quilajlaniloaya Dios Pablo huan Silas huan quicantaruilijtaloaya (quicuiquilijtaloaya) Dios ca lajtomes cuajcuali huan huejué. Huan in oc sequin hual cataloaya latzacuali pa calijtic quincaquiloaya. <sup>26</sup> Jan ajnaxcan, laulinic chicahuac, moliniloaya ilastili in calijtic, molapujque mochi lalapujquimes jan ajnaxcan huan tomajque in teposlimes, huetzijque mochi seje hual cataya pan in laquitquilini.

<sup>27</sup> Cuaquín ejsac in se hual quinmiztataya yehuanten hual cataloaya latzacuali huan quinmitac in lalapujquimes lapujticate. Cuaquín quiquixtic iteposli pa moanalisli, yahuiaya momicti, quiituaya pampa cholujque moxtin hual cataloaya latzacuali. <sup>28</sup> Jan axcan, Pablo quinotzac ca lajtol chicahuac, quilic:

—Amo ximomicti, pampa timoxtin nican ticate.

<sup>29</sup> Molajlanilic in lalacal se tixuxli, calactiquisac capa cataloaya Pablo huan Silas, molancuacuetzac yuyucatataya inminlaixpan. <sup>30</sup> Huan quinhuicac pa quiahuac, quinmilic:

—Tatas, ¿len nicpía pa nicchías pa niyes laquixtili pin polehuilisli?

<sup>31</sup> Huan quilijque:

—Xicneltoxa in Tata Jesucristo huan tiyes laquixtili pin ipolehuilisli Dios icualanilisli, tehual huan moxtin pa mochan.

<sup>32</sup> Huan uyajque pa ichan, quinnahuatilizque ilajtol Dios ca yihual huan moxtin pa ichan. <sup>33</sup> Huan jan axcan in layúa quinhuicac in lalacal Pablo huan Silas, quinpaquilic inminlatecualisli huan ca nadita cataloaya lacuayatequili yihual huan moxtin hual chantiloaya pa ichan. <sup>34</sup> Cuaquinon quinhuicac Pablo huan Silas calijtic pa ichan huan quinlacualtic. Huan quipialoaya paquilisli yihual huan moxtin pa ichan pampa axcan quineltocaloaya Dios.

<sup>35</sup> Mostatica in la'ajuaniymes quinnahuatijque in lachianijmes pa quililosquiaya in lalacal hual quinlachiliaya yehuanten hual cataloaya latzacuali pa calijtic, quilijque:

—Xiquinmacahua in omenten lacames.

<sup>36</sup> Yojeque in lalacal quinmilic Pablo huan Silas in lajtomes, quinmilic:

—Axan nechnahuatije in la'ajuaniymes pa annimitzmacahuasquiaya. Pampín, xiacan, ma Dios anmitzhuica.

<sup>37</sup> Ma yoje, Pablo quinmilic in lachianijmes, quil:

—Tehuanten ticate lacames hual ticpialo toyaxca ca romanos. Huan antechhuitequic inminyampa yehuanten pa anmocaltilan. Inon anquichíac mas que amo quilajlanijque in la'ajuaniymes leca techmotexpahuililoaya. Cuaquinon antejtzacuac pin calijtic. Mochi inon hual antejchihuicamo amo unca quinami quijtúa in lajtol pa lacames hual cate ca inminyaxca romanos. Huan axcan ¿yalo techmacahualo huan amo inminyampa yehuanten pa anmocaltilan, yojeque pa como quimatis amaqui? Pampa no. Ma hualacan yehuanten in la'ajuaniymes, ma techmacahuacan yehuanten.

<sup>38</sup> Innojen lachianijmes (policías) quinmachiltije in la'ajuaniymes in hual quinmilic Pablo. Huan quiman momachiltijque in la'ajuaniymes

pampa Pablo huan Silas yeje ca inminyaxca romanos, yojque momajti-  
jqe m'iac. <sup>39</sup> Hualajque capa Pablo huan Silas, quinlajlanijque pa quin-  
pujpuhualosquiaya. Cuaquinon quinquixtijqe pin calijtic huan quin-  
temachijque ca mochi inminyolo pa quisalosquiaya inmincaltilan. <sup>40</sup> Yojque  
quisajque capa cataloaya latzacuali huan cuaquín uyajque pa ichan Lidia.  
Nepa quinpaxaluilijque in laneltocanijmes tocn'ian huan quinchicahualti-  
jqe pa inminyolo, cuaquín uyajque.

## 17

### *Cualantinemilo yehuanten pa Tesalónica*

<sup>1</sup> Quimpanahuijqe Pablo huan Silas in caltilan Anfípolis huan in caltilan  
Apolonia, ajsijque pa Tesalónica. Nepa cataya se inmintiopan in judíos.  
<sup>2</sup> Huan quinami itequi quichihuani Pablo, calaquic pin tiopan pan tonali  
quiman mosehuilo huan pa ye tonalijmes quiman mosehuilo quinnahuatlilic  
Dios ilajtol lajcuiluli. <sup>3</sup> Quinmaxtiaya huan quinnextiliaya pampa quiapiaya  
pa panusquiaya lacocoltilisli in Cristo huan noje quiman miquic, quiapiaya  
pa yulis oc sejpa, quinmiliaya:

—In Jesús, yihual in Cristo, inahuac yihual annimitzmachilitica.

<sup>4</sup> Cataloaya sequin ca yehuanten in judíos pehualoaya quineltoalo Cristo  
huan quintocaloaya Pablo huan Silas. Noje pehualoaya quineltoalo m'iac  
ca in lacames griegos hual quimolancuacuetzililoaya Dios. Huan quinel-  
toaloaya m'iac sihuames hual moxtin quimatiloaya momajtilo inminlaix-  
pan yehuanten. <sup>5</sup> Ma yoje, moxiculoaya in m'iac judíos pampa sequin can-  
tataloaya oc se ojli hual cataya Cristo iojli. Pampín quinmanajque lacames  
ej'elehuis capa in lacames hual amagui quinmitaya ca mosehuilisli, quin-  
nechicujque, quinmilijque pa tzajtzitinemilosquiaya pa quimacalosquiaya  
tequil moxtin pa Tesalónica. Yojque, hualajtiquisajque pa ichan se itoca  
Jason, quintemujtataloaya Pablo huan Silas, quinequiloaya quinquicalo  
capa cataloaya lanechiculi in lacames pin caltilan. <sup>6</sup> Amo quinmitajque  
Pablo huan Silas, pampín quihuilanajque Jason huan sequin tocn'ian lanel-  
tocanijmes, quinquicajque pa ila'ajuanijmes in caltilan, tzajtzitihualaloaya,  
quilijqe:

—In lacames hual temacalo tequil pa mochi in lalticpan hualajque noje  
ca niquic. Quinmanac Jason pa chantilosquiaya pa ichan huan umpa  
chantiticate. <sup>7</sup> Huan innojen moxtin lachihualo quinami ilacocolinijmes  
ilajtomes in hué Cesar, quijtulo pampa unca oc se hué pa mochi in lalticpan,  
itoca Jesús.

<sup>8</sup> Quicaquijque inon in la'ajuanijmes huan in lacames, pampín cualani-  
jqe. <sup>9</sup> Yojque, canilijque tomin Jason huan innojen oc sequin tocn'ian, quip-  
ialoaya pa quicuepilisi in tomin Jason huan tocn'ian quiman quisalosquiaya  
Pablo huan Silas pa quiahuac Tesalónica. Canajque in tomin, cuaquinon  
quinmacahuajque Jason huan in lacames hual cataloaya ca yihual.

### *Pablo huan Silas yalo pa in caltilan Berea*

<sup>10</sup> Yojque, jan ajnaxcan pa layúa yehuanten tocn'ian quintilanijque Pablo  
huan Silas pa in caltilan Berea. Huan quiman ajsijque umpa, Pablo huan  
Silas uyajque pa inmintiopan in judíos. <sup>11</sup> Yehuanten in judíos pa in  
tiopan nepa quipialoaya inminyolo hual m'iac quinequiloaya quineltoalo  
ilajtol Dios, amo cataloaya quinami yehuanten pa Tesalónica. Mojmosta  
momaxtiloaya in lajtol lajcuiluli pa quimatilosquiaya sinda innojen lajtomes  
cataloaya quinami Pablo quinmaxtitataya. <sup>12</sup> Yojque, quineltoaloaya Jesús

míac judíos nepa. Noje quineltoaloaya míac sihuames griegas hual moxtin quimatiloaya momajtilo inminlaixpan yehuanten. Huan noje quineltoaloaya lacames griegos.

<sup>13</sup> Ma yoje, momachiltique in judíos nepa pa Tesalónica pampa quinnahuatiaya Pablo noje pa Berea. Pampín uyajque umpa noje, quijtutinemiloaya pampa amo melahuac len Pablo quimaxtiaya, quiyantitinemiloaya pa quitojtocalosquiaya Pablo. <sup>14</sup> Cuaquinon jan ajnaxcan in laneltocanjimes tocnían quitilanjique Pablo pa yasquiaya pa in al huejcalan, huan ca yihual uyajque sequin tocnían nepa Berea. Mochahuajque Silas huan Timoteo umpa Berea. <sup>15</sup> Yehuanten hual uyajque ca Pablo quihuicajque pa in caltilan hué Atenas. Cuaquinon quicahuajque Pablo nepa huan mocuepajque pa Berea. Pablo quinmilic pa quinmililosquiaya Silas huan Timoteo pa camo huejcahuasqui pa hualalosquiaya pa Atenas capa yihual cataya.

### *Pablo pa Atenas*

<sup>16</sup> Yojque, quiman Pablo quinchixtataya Timoteo huan Silas pa Atenas, cualanic lajitic yihual pampa cajcapa pin caltilan hué quinmitaya monos hual yehuanten pa Atenas quinmolancuacuetziloaya. <sup>17</sup> Yojque, quinnahuatiaya ilajtol Dios pa inmintiopan in judíos, quinnahuatijtinemiaya aquinojen quimolancuacuetziloaya Dios. Noje mojmosta quinnahuatijtinemiaya ca aqui cayasquiaya nepa pin lajcotiyan capa lanamacanjime. <sup>18</sup> Huan sequin lacames pehualoaya laquetzalo ca Pablo. Ca innojen sequin quintocaloaya inminlamaxtilisli se ilanechiculisli lacames hual motocalo epicúreos. Oc sequin quintocaloaya inminlamaxtilisli se ilanechiculisli lacames hual motocalo estoicos. Yehuanten pehualoaya quijtulo:

—Axcan, ¿len quinctica techili in laquetzani?

Oc sequin quijtuloaya:

—Momati quinequi techlaquetzilía inminahuac oc sequin dioses hual amo quimatilo nican.

Quijtuloaya inon pampa Pablo quinnahuatijtinemiaya ilajtol Jesús huan quinami yulilo oc sejpá in mijquimes.

<sup>19</sup> Yojque canajque Pablo, quihualicajque pa in lajcotiyan itoca Areópago. Nepa in hueyenten monechicunjime pa molaquetzililosquiaya inminahuac lajtomes hual quipianijme. Quijlajque:

—Xitejchihuili in cuali pa titechilis len yes in lamaxtilisli yancuic hual tilaquetzinemi. <sup>20</sup> In lajtomes hual tijcacticate titechilis techlapolultilo. Pampín tinctecicate ticmatilo len quinequi quijtúa innojen.

<sup>21</sup> Yojque cate moxtin in lacames pa Atenas huan aquinojen amo lacatijque nepa hual nepa chantilo. Itequi jan quixtocalo quijtulo o quicaquilo len yancuic san, quiman yes cayas len quinami inon. <sup>22</sup> Yojque moquetzac Pablo pin Areópago lajco capa yehuanten inminlanechiculisli in griegos pa Atenas huan quinmilic:

—Lacames atenatecos, nehual nía annimitzlaquetzilía inahuac mochi hual niquita nican pa anmocaltilan. Nicmati pampa amhuanten anlamolancuacuetzilía míac. <sup>23</sup> Inon nicmati, pampa quiman nicpanajtataya in caltilan niqiztinemiaya ca míac lailalisli mochi cajcapa anlamolancuacuetzilía huan niquitac se hual ipan cataya lajcuiluli in lajtomes: “Pa se dios hual amaqui quiximati.” Amhuanten anquimolancuacuetzilía in Dios hual amo anquimati nindeno. Pampín nehual nía annimitzlamachiltía ilajtol yihual.

<sup>24</sup> Yihual in Dios hual quinchiac in lalticpan huan mochi innojen hual cate. Yihual inminteco in cielo huan in lalticpan, amo chanti calijtic tiopajmes hual quinchihualo lacames. <sup>25</sup> Dios quiplía mochi, amo monequi pa quiplías

nindeno hual quinchihualo lacames. Yihual quinmaca moxtin in yulilisi huan iyyul huan mochi. <sup>26</sup> Dios quinchíac mochi lacames pa ilalimes in lalticpan, quinchíac pan ipampa se lalac, quintilanic pa chantilosquiaya pa mochi in lalticpan. Noje Dios quinlalilic quichi xixihuimes seje lali pin lalticpan yahuiaya ye inminyaxca ilanechiculisi in lacames hual chantilo pa in lali o moyaxcajtililo in lali. Noje quinlalilic quichi lali yahuiyoaya quipialo in lalimes capa yulilosquiaya, quinchihuilic inmintejtenco mochi in lalimes. <sup>27</sup> Jo quema, Dios quinlalic mochi inminlalimes lacames pin lalticpan, quinequi pa yehuanten quitemusi yihual sinda cuajnesi moajx-iltilosquiaya capa yihual pa quiximatilosquiaya. Neli Dios amo unca huejca, mochi lalac ca tehuanten huil tiajsilo capa yihual pa toyolo. <sup>28</sup> Unca pan ipampa Dios tiyulilo huan tinejnemilo huan ticchihualo mochi innojen hual ticchihualo. Unca quinami quijtujque sequin anmolajcuilunijmes pa yina, quijtujque: “Tehuanten ticate yihual ixolomes.” <sup>29</sup> Pampín, sinda ticmatilo pampa tehuanten ti'ixolomes yihual, ma camo tiquijtucan pampa Dios unca quinami se mono lachihuali ca oro o ca plata o ca tixcali o len quichíac se hual quimatiaya, o len quichíac se quinami laijnamiquiaya. <sup>30</sup> Yojque, mas que pa yina Dios quinmacahuiltic pa quichihualosquiaya quinami quinequiloaya yehuanten hual amo quimatiloaya in hual quijtúa Dios, ma yoje axcan amo unca yojque. Axcan Dios quinmilijtica moxtin pa mochi in lalticpan pa quinpalasi inminyolo pa laijnamiquisi quinami yihual quinequi. <sup>31</sup> In quichijtica pampa axan quilalac se tonali quiman yahui quinchihuilía moxtin quinami quinmahuilía pampa yulilo elehuis. Jo quema, Dios quinmaca ojli lacames yojque ca melahualisi pan ipampa se lalac hual quilajultic pa quinmacas ojli. Huan in lalac itoca Jesús. Dios quiyuliltic in Jesús mas que yec lamitili. Yojque technextilic neli pampa quilajultic in Jesús pa quintilanic lacames pa camo cayasi capa unca Dios pampa cate laijlaculi, huan amo quiman huil mocuepasi capa yihual.

<sup>32</sup> Quiman quicaquijque Pablo quinlaquetzilijtataya inahuac se hual miquic huan cuaquin yulic oc sepa, sequin quihuitzquilijque, oc sequin quilijque:

—Timitzcaquisi oc se tonali quiman titechilis in lamaxtilisi.

<sup>33</sup> Yojque Pablo quisac inminlaixpan yehuanten. <sup>34</sup> Ma yoje, sequin quitocaloaya Pablo, se ca yehuantén motocaya Dionisio, yihual yec se ila'ajuani in Areópago, in tenencia. Cataya noje se sihual itoca Damaris, huan cataloaya oc sequin hual quineltocajque ca in omenten.

## 18

### *Pablo yahui pa in caltilan Corinto*

<sup>1</sup> Panujque innojen, quisac Pablo pa Atenas, uyac pa in caltilan Corinto. <sup>2</sup> Umpa quiximatic se lalac judío itoca Aquila. Yihual lacatic pin lalticpan itoca Poñto huan yuliaya pin lali itoca Italia. Yajmo yultataya nepa Italia pampa quipíac sequin tonalijmes quiman huan isihua Priscila hualajque pa Corinto. Hualajque pa Corinto pampa in hué itoca Claudio quitilanic lajtol pa quisalosquiaya moxtin in judíos pin caltilan hué Roma, in capital. Yojque Pablo quinpalaxuiliaya Aquila huan Priscila pa inminchan nepa pa Corinto. <sup>3</sup> Quimatiaya Aquila in tequipanulisi hual noje quimatiaya Pablo, quimatiloaya quitzomalo tzotzomajli telahuac calica quinchihualo calitos pa cuajlan ca in tzotzomajli. Pampín Pablo pehuac chantic ca Aquila pa ichan huan yojque pehualoaya tequipanulo in omenten.

<sup>4</sup> Huan mochi in tonalijmes quiman mosehuilo in judíos, uyac Pablo pa inmintiopan. Nepa laquetzaya ca in judíos huan ca yehuanten hual amo judíos, quinequiaya quinnextili pampa cataya neli ilajtol Jesucristo hual yihual quinmilitataya. <sup>5</sup> Yojque, quiman ajsijque Silas huan Timoteo hual catanijme pa Macedonia, quitajque pampa itequi mojmota quinnahuatitinemiaya Pablo ilajtol Dios in corintios. Quinmaxtitinemiaya in judíos ca lajtol melahuac pampa yihual Jesús unca in Cristo hual quichixtataloaya in judíos. <sup>6</sup> Ma yoje, yehuanten mocahualoaya amo quinctataloaya quineltoalo, amo mocahualoaya pa lahuejuecaltitinemilosquiaya. Pampa inon Pablo quintzejtzeluic inahuas quinami unca inminlachihualisli in judíos, yojque quinnextiliaya pampa quincajcahuaya. Quisaya pa capa yehuanten pampa quichihualoaya amo cuali, quinmilic:

—Axcan, amhuanten anmitzmotexpahuilía Dios pampa anquichíac inon, pampa nehual annimitzmacac ilajtol Dios pa anquineltoacasquiaya, huan amo anquinequic. Yojque Dios amo nechmotexpahuilis nehual. Huan axcan mosta nía niquinnahuatilia ilajtol Dios jan ca yehuanten san hual amo judíos.

<sup>7</sup> Cuaquinon quisac Pablo pa inmintiopan, uyac calaquic pa ichan se itoca Ticio Justo. Yihual yec se hual quimolancuacuetziliaya Dios huan icalí cataya inahuac inmintiopan in judíos. <sup>8</sup> Huan ihué in tiopan, yihual itocaya Crispo, quineltoacac in Tata, yihual huan moxtin pa ichan. Noje quineltoaloaya míac lacames huan sihuames pa Corinto huan cataloaya lacuayatequili. <sup>9</sup> Huan in Tata quilic Pablo pa layúa pan ipampa laxotocalisli, quilic:

—Amo ximomajti. Xilaqueztía huan amo ximocahua pa tilaquetzas. <sup>10</sup> Nehual niunca ca tehual. Amaqui yahui mitzquitzquía pa mitzcocoltis pampa pa in caltilan cate míac hual yalo nechneltoalo.

<sup>11</sup> Yojque chantiaya Pablo nepa pa se xihuil huan chicuase mesli, quimaxtitinemiaya ilajtol Dios capa yehuanten.

<sup>12</sup> Axcan, se itoca Galión yec huelitini (gobernador) pin lalticpan itoca Acaya, huan nepa pin lalticpan Acaya unca in caltilan Corinto. Se tonali ca se lajtulisli cualantiquisaje in judíos ca Pablo, quihuicaje pa pan lajco capa cataya Galión. <sup>13</sup> Quilije:

—In se amo mocahua pa quinmaxtitinemis lacames pa quimolancuacuetzilisi Dios amo quinami quijtúa tolajtol.

<sup>14</sup> Yahuiaya lajtu Pablo pa monapatisquiaya huan Galión pehuac quinzotzac in judíos, quinmilic:

—Sinda quichihuaya len amo cuali in se o sinda quichihuaya len hual monotzaya pa tijquitzquisi, cuaquín nicnequisquiaya annimitzcaqui amhuanten judíos. <sup>15</sup> Huan amo unca yojque. Ancualantica inahuac len quimaxtía in lacal, anquinequi anquinlaxilía lajtomes inminahuac in hual quijtunijme anmotajtzitzián huan in lajtomes hual san amhuanten anquipía. Ximolalican ca se lajtulisli amhuanten anmohuían. Nehual amo niyes la'ajuani pa niquincaquis innojen.

<sup>16</sup> Cuaquín Galión quitojtoalcaltic in lachianijmes pa quinquixtilosquiaya in judíos pan lajco. <sup>17</sup> Cuaquinon quiquitzquijque moxtin Sóstenes in hual yec ihué inmintiopan in judíos, quihuitequijque ilaixpan pan lajco huan inon amo monotzaya nindeno ca Galión.

*Pablo mocuepa pa Antioquía, cuaquinon pehua paxalúa oc sejpa pa míac lalimes*

<sup>18</sup> Mocahuac Pablo míac tonalijmes nepa Corinto. Cuaquín mochicahuac ca in laneltocanjmes tocnían huan uyac, ca yihual uyajque Priscila huan Aquila. Ajsijque pa Cencrea capa moximilic Pablo itzontecon. Quichíac inon pa lanextilis pampa nepa lamic quichíac len yihual neli quilic in Tata pampa yahuiaya quichía. Cuaquinon lejcuc pan se barco hual yahuiaya pa in lali Siria. <sup>19</sup> Ajsijque pa Efeso huan Pablo quincahuac nepa Aquila huan Priscila pa pehualosquiaya chantilo. Huan calaquic Pablo pa inmintiopan in judíos, quinnahuatilic yehuanten ilajtol Dios ca in judíos. <sup>20</sup> Quiman yehuanten quitemachijque pa mocahuasquiaya Pablo oc sequin tonalijmes ca yehuanten, quinmilic pampa no. <sup>21</sup> San mochicahuac ca yehuanten, quinmilic:

—Nicipía pa nías pa Jerusalén pa nicayas nepa pa in fiesta. Nimocuepas ca amhuanten oc sejsa sinda Dios quinequis.

Cuaquinon quisac ca barco pin caltilan Efeso. <sup>22</sup> Quiman ajsic pa Cesarea, panquisac pa Jerusalén, nepa quinpiatic in laneltocanjmes, cuaquinon temuc pa Antioquía. <sup>23</sup> Quiman panujque je quesqui tonali nepa, uyac oc sejsa huan quinpaxaluilijtinemiaya mochi innojen caltilan pin lali itoca Galacia huan in lali itoca Frigia. Quinchicahuatiaya inminyolo moxtin in laneltocanjmes pa mochi in míac caltilan.

### *Apolos nahuatía pa Efeso*

<sup>24</sup> Huan cataya se lalac judío itoca Apolos, yec iyaxca pin caltilan hué itoca Alejándria. Yihual quimatic lajtuc niman cuali, noje quimatic niman cuali ilajtol Dios lajcuiluli. Hualac pa Efeso. <sup>25</sup> In Apolos cataya lamaxtili pa quimatis iojli in Tata, huan ca mochi iyolo nahuatiaya huan lamaxtiaya ca lajtol hual moxtin huil quimatiaya len quinequiaya quijtu. Quimaxtiaya ilajtol Jesús, mas que jan quimatic san len quimaxtini Juan Lacuayatequini inahuac Jesús. <sup>26</sup> In Apolos pehuac laquetzac pa inmintiopan in judíos, amo momajtiaya. Huan quiman quicaquijque Priscila huan Aquila, cuaquín yehuanten canajque huan quilaquetzilijque míac ca lajtol calica huil quimatiaya in hual quinequi quijtúa mochi inahuac iojli Dios hual ayamo quimatiaya. <sup>27</sup> Huan quiman Apolos quinequiaya yahui pa in lali Acaya, in laneltocanjmes tocnían quilijque pampa cataya cuali pa yasquiaya. Quinmicuilulijque se amal tocnían hual chantiloaya umpa pa Acaya, quinmilijque pa quinamiquilosquiaya Apolos ca paquilisli. Yojque, Apolos ajsic pa Acaya, huan quinpalehuic míac yehuanten hual quineltocajque toTata Jesús pan ipampa in cuali hual Dios tejchihuilía. <sup>28</sup> Quimpalehuic pampa yihual huil laquetzaya jan cuali san ilajtol Dios. Yojque amo huil quinanquililoaya in judíos, amo huil quijtuloaya pampa amo cataya melahuac in hual Apolos quinmiliaya. Quinnextiliaya inminlaixpan moxtin pampa Jesús unca in Cristo hual Dios quitilanic, quinnextiliaya pan ipampa ilajtol Dios hual unca lajcuiluli.

## 19

### *Pablo pin caltilan Efeso*

<sup>1</sup> Quiman cataya Apolos pa Corinto, Pablo lamic paxaluc pa innojen caltilan hual cataloaya pin lomera (tepetilan) huan hualaya pa Efeso. <sup>2</sup> Nepa quinmitac sequin monextilinijmes huan quinmilic:

—¿Hualac in Espíritu Santo pa amhuanten quiman anpehuac anquinelto-cac Cristo?

Yehuanten quilije:

—No, tehuanten amo tijaquijque amaqui lajtúa inahuac in Espíritu Santo.

<sup>3</sup> Huan Pablo quinlajlanic:

—Cuaquín ¿len lamaxtilisli anquineltoçaya quiman ancataya lacuayatequili?

Quinanquiliçque:

—Ticataloaya lacuayatequili quinami quimaxtic Juan Lacuayatequini.

<sup>4</sup> Pablo quinmilic:

—Juan quincuayatequini lacames pa yoje lanextilosquiaya pampa quipalaje inminyolo pa laijnamiçuisi quinami quinequi Dios. Noje Juan quinmilic pa quineltoçalosquiaya in local hual yahuiaya huala quiman yihual Juan laquisac quichiác itequipanulisli hual Dios quitilanic pa yihual quichihuasquiaya. Huan in local unca Jesús in Cristo.

<sup>5</sup> Quiman quicaquijque inon, cataloaya lacuayatequili quinami lamaxtic Jesucristo, quinoztataloaya Dios pan ipampa itoca Jesús. <sup>6</sup> Huan quiman quinlalilic Pablo imajmajuan inminpan yehuanten, hualaya pa inminyolo in Espíritu Santo huan pehualoaya lajtulo ca oc sequin lajtomes hual amo quiman quimatiniçme lajtulo, huan laquetzaloaya Dios ilajtomes.

<sup>7</sup> Yehuanten yeje quinami doce lacames.

<sup>8</sup> Panuc inon, calaquic Pablo pa inmintiopan in judíos nepa pa Efeso, huan yihual pehuaya laquetza amo quimacajsitataya huan pa ye mesli quinnahuatiliaya quinami huelitía Dios. Quichihuaya mochi len huil pa quinnextiliaya pampa cataya melahuac inon hual quijututata. <sup>9</sup> Ma yoje, sequin ca in judíos mochicahualtije inminyolo pa camo quineltoçalosquiaya in lajtol. Pehualoaya laquetzalo amo cuali inahuac Dios ioçli. Cuaquion miçcuanic Pablo capa yehuanten, quinhuicac ca yihual in monextiliniçmes huan mojmosta quinnachiltiaya Dios ilajtol pa iescuela (imonextiloyan) se hual motocaya Tirano. <sup>10</sup> Yojque Pablo quichihuaya pa ome xixihuil, huan pampín, pin lalticpan Asia capa cataya Efeso, moxtin hual chantiloaya nepa quicaquiloaya Dios ilajtol. Cataloaya yehuanten hual judíos huan yehuanten hual amo judíos quicaquiloaya. <sup>11</sup> Huan Dios quihuelilic Pablo miác pa quinpajtisquiaya cocoxquimes. Quihuelilic pa quinpajtis quinami amo quinpajtiaya pan oc sequin tonaliçmes. <sup>12</sup> Yojque quihuicaloaya dangos huan tzotzomajtzindis hual quilaliliçque pan icuerpo Pablo, cuaquín quihuicaloaya huan quinlaliliçque pan inmincuerpos in cocoxquimes huan yojque pajtiçque. Noje quisaje iyeçames amo cuajcuali pa yehuanten hual quinpialoaya.

<sup>13</sup> Huan noje cataloaya sequin judíos hual yahuiloyaya cajcapa, quinxtilitiniçmiloaya iyeçames amo cuajcuali. Yehuanten motoliniloaya pa quinxtililosquiaya in iyeçames amo cuajcuali pan ipampa quinami quijtuloaya itoca in Tata Jesús, quinmililoaya:

—Xiquisacan, annimitztilanía ca itoca Jesús, yihual hual quinnahuatijtía Pablo.

<sup>14</sup> Huan cataya se judío motocaya Esceva, yihual se tiopista huan quipiaya chicome ixolomes hual quinxtitiniçmiloaya yojque in iyeçames.

<sup>15</sup> Huan se tonali quiman quililoaya pa quisasquiaya se iyeçal amo cuali, in iyeçal quinnanquiliç:

—In Jesús niçuiximati huan noje niçuiximati in Pablo. ¿Aquinohen amhuanten? Amo anunca Jesús ilacames.

<sup>16</sup> Huan molasac pani yehuanten in local hual quipiaya in iyeçal amo cuali. Huil moanaya niman chichahuac huan yehuanten amo huil yoje, pampa in local quipiaya in iyeçal amo cuali. Pampín quinsulahuac huan



yehuanten moxtin in lacames choluloaya pa quiahuac in cali, cataloaya latecuali huan nacatijmes. <sup>17</sup> Cuaquín momachiltijque quinami panuc inon moxtin in judíos huan in amo judíos hual chantiloaya nepa pa Efeso, momajmajtiloaya huan pampín moxtin quitaloaya huan quijtuloaya quinami itoca in Tata Jesús quipiaya niman míac chichahualisli. <sup>18</sup> Hualaloaya míac ca yehuanten hual quineltocajque in Tata Jesús, layulcuituloaya huan lamachiltuloaya inminahuac innojen lachihualisli amo cuali hual quichihuanijme. <sup>19</sup> Huan cataloaya míac hual quichihuanijme laxuxalisli. Yojque quiman quinechicujque inminamames hual quinextilic quinami quichihualo in laxuxalisli, quinchichinuloaya inminlaixpan moxtin. Cuaquinon quipuhuilijque quichi ipatiloaya in amames, huan yoje momatijque pampa ipatiloaya cincuenta mil tomin plata. <sup>20</sup> Cuaquín miajque ichichahualisli ilajtol Dios ca yehuanten, quineltocaloaya ilajtol ca mochi inminyolo.

<sup>21</sup> Panuc inon huan quinequiaya paxalu Pablo pa in lalimes Macedonia huan Acaya huan ca inon cataya ca se lajtulisli ca in Espíritu Santo. Quinequiaya quinaxaluili yehuanten hual quineltocaloaya toTata Jesucristo nepa cajcapa chantiloaya. Cuaquinon yahuiaya yahui pa Jerusalén, quilibic:

—Quiman nías pa Jerusalén, cuaquín nicpías pa niqitas in caltilan hué Roma.

<sup>22</sup> Cuaquín quintilanic pa Macedonia ome ilapalehuinijmes, Timoteo huan Erasto, huan Pablo mocaquaya sequin tonalijmes pin lalticpan Asia.

### *Cualantiquisalo pin caltilan Efeso*

<sup>23</sup> Innojen tonalijmes cataloaya sequin lacames hual amo quixtocaje iojli Jesús, yehuanten quinchihualtijque pa mocualantisqui míac yehuanten pa Efeso. <sup>24</sup> Cataya se motocaya Demetrio, yihual quinchihuaní caltzindis lachihuali ca plata. Cataloaya caltzindis tijtipichin hual nesiloaya quinami in tiopan hué capa quimolancuacuetzililo in diosa sidual itoca Diana, yihual yec idiosa Efeso. Pan impampa in caltzindis tijtipichin monechicululoaya míac tomin Demetrio huan yehuanten hual tequipanuloaya ca yihual. <sup>25</sup> Pampín quinahuatic pa monechiculosquiaya moxtin itequipanujquimes huan in oc sequin hual quichihualoaya in tequipanulisli, quinmilic:

—Lacames, anquimati quinami timonechicuhuililo míac tomin ca in hual ticchihualo. <sup>26</sup> Huan anquitzica huan anquicactica quinami in Pablo laquetzinemi quijtutica pampa amo cate dioses in monos hual quichihualo lacames. Huan axan cate míac hual quineltocalo in hual quijtutinemi in Pablo pampa yihual quimati laquetza cuali. Huan in Pablo amo quinlaquetzilijtica yehuanten pa Efeso san. Noje quinlaquetzilijtica yehuanten hual yulilo pa mochi in lalticpan Asia. <sup>27</sup> Pampín cayas polehuilisli pa tehuanten, pampa yajmo yalo quixtocalo len ticchihualo. Huan noje ca inon cayas polehuilisli pampa cuajnesi yes lacajchuali icali in diosa Diana. Huan cuajnesi yajmo yalo quilasojlalo in cali hué huan cualtichin, in cali capa quimolancuacuetzililo moxtin pa Asia huan pin lalticpan.

<sup>28</sup> Quiman quicaquijque inon, cualantiquisajque chichahuac, peshualoaya tzajtzilo, quilibitataloaya:

—¡Hué unca Diana inmindiosa in efestecos!

<sup>29</sup> Huan mocaquiaya pa mochi in caltilan in tzajtzilisli, molalujtihualaloaya in lacames, amo quimatiloaya len panuaya. Ca se lajtulisli molalujtiquisaloaya pa capa quipialoaya in lanechiculisli pin ilajcotiyan hué in



caltilan Efeso. Ca yehuanten quihuilanaloya Gayo huan Aristarco, yehuanten quitocanjme Pablo quiman canani ojli pa oc sequin caltilan. <sup>30</sup> Huan Pablo quinectataya calaquí pin lajcotiyan hué capa monechicujtiquisaloaya. Ma yoje, amo quimacahuiltoaya tocnán in monextilinjmes. <sup>31</sup> Huan noje sequin ca inminhueyenten in lanechiculisli hual quiximatiloaya cuali Pablo quitlanijque lajtol quinahuatijtataya pa como calaquisquiaya pin lanechiculisli. <sup>32</sup> Huan lajtic pin lanechiculisli comuntataloaya huan tza-jztitaloaya. Sequin quitzajtziloaya se lajtol, oc sequin quitzajtziloaya oc se lajtol. Huan in míac lacames nepa amo quimatiloaya pa len monechiculoaya.

<sup>33</sup> Cualaniloaya in míac lacames ca mochi in judíos. Cataya se judío itoca Alejandro nepa pin lanechiculisli, huan quiman quilajlanijque pa len monechicujtataloaya, cuaquín moxtin in judíos quitojpehuaje Alejandro pa yasquiaya ilaixpan in lanechiculisli pa quinnotzasquiaya in lalacera pa como cualanilosquiaya ca in judíos. Quiculiniaya Alejandro imajma ilaixpan in lanechiculisli, quinequiaya laquetza pa in judíos. <sup>34</sup> Ma yoje, quiman quimatiloaya pampa yihual yec judío, cuaquín moxtin tza-jtziloaya chichahuac quinami cataya ilajtol se san, quilije:

—¡Hué unca Diana inmindiosa in efestecos!

Huan pa ome horas yoje tza-jtziloaya. <sup>35</sup> Cuaquinon hualac inminlaixpan in presidente, quinmilic:

—Ximocahuacan.

Cuaquinon quinmilic:

—Lacames efestecos, amo unca lalac hual amo quimati pampa Efeso unca in caltilan capa quilachililo icali in diosa hué Diana huan itixcali santo yihual hual huetzic pan lalticpan quiman quisac pin cielo. <sup>36</sup> Amaqui huil quijtúa pampa inon amo unca melahuac. Pampín monequi pa anmochahuas, amo xicchihuacan len hual lanextilía pampa amo anquimati nindeno. <sup>37</sup> Anquinhualiac ca niquic in lacames hual amo quixtequilije nindeno itipan todiosa huan amo quihuejuecaltije todiosa. <sup>38</sup> Axcan, sinda Demetrio huan in tequipanujquimes ca yihual quipialo len pa quijtusi, cate tonalijmes quiman monechiculo in huelitinijmes pa lajlanisi. Yojqque, huil motexpahuilo huan monapatilo inahuac len unca inminyaxca mochi sejse ca yehuanten. <sup>39</sup> Sinda anquinequi anquimati oc sequin lachihualisli huan amo jan inon san, cuaquinon huil molajlanisi quiman timonechiculo quinami quijtúa in lajtol. <sup>40</sup> Ma mochía yojqque, pampa tialo timoitalo pin lamajtilisli pampa ticchihuaje inon axcan. Cuajnesi sequin quinmachiltisi yehuanten hual cate ca ilahuelilitisli in hué Cesar in hual panuc nican huan quijtusi pampa tehuanten ticchijcate se moanalisi ipan in hué. Huan amo ticmatilo quinami tiquinmilisi leca timonechicuje.

<sup>41</sup> Quiman quinmilic inon in presidente, cuaquinon quinmilic pampa axan lamic in lanechiculisli huan quinmilic pa mohuicalosquiaya.

## 20

### *Pablo yahui pa Macedonia, cuaquinon pa Grecia*

<sup>1</sup> Cuaquinon, quiman yajmo cualantinemiloaya yehuanten pa Efeso, Pablo quinnahuatic in laneltocanjmes pa monechicosquiaya. Monechicujque, quinlaquetzilizic in quinami monequi pa tiyulisqui pan iojli in Tata Jesús. Cuaquinon quinchichahuac Pablo huan uyac pa Macedonia. <sup>2</sup> Quipanahuic cajcaca pin lali Macedonia huan ca míac lajtomes quinchichahuatilizic inminyolo in laneltocanjmes. Cuaquinon uyac pa in lali Grecia. <sup>3</sup> Nepa

mocahuaya ye mesli. Cuaquinon quiman yahuiaya yahui ca barco pa in lali Siria, momachiltic pampa quinapachiloaya in judíos pa quimictilosquiaya quiman yahuiaya cana in barco. Pampín mocuepac pa Macedonia pan ojli. <sup>4</sup> Ca yihual uyajque Sopater ixolol Pirro hual lacatic pa Berea, huan noje Aristarco huan Segundo hual lacatijque pa Tesalónica huan Gayo hual lacatic pin caltilan Derbe, huan Timoteo. Huan noje ca Pablo uyajque Tíquico huan Trófimo hual lacatijque pin lalticpan Asia. <sup>5</sup> Ajsijque pa Filipos capa nehual Lucas nicataya. Cuaquinon innojen tocnían techlaicanajque huan tejchialoaya pin caltilan Troas. <sup>6</sup> Cuaquín tehuanten Pablo huan nehual tiajque ca barco quiman laquisac in fiesta (ilhuil) quiman quicualo in pan hual amo quipía laxocoyajquíl. Tiyahuiloaya pin barco, huan quiman tiajque pa macuili tonalijmes, tiajsijque pa Troas capa tejchixtataloaya, nepa timocahuajque chicome (siete) tonalijmes.

### *Pablo paxalúa pa Troas*

<sup>7</sup> Cuaquín pan tonali hual quipehualtia in chicome, timonechicujque pa ticlapanalosquiaya pan quinami toTata Jesús techilic pa timojnamiquiltilosquiaya quinami yihual miquic pa tehuanten. Techlaquetzilib Pablo techmaxtitataya ilajtol Dios. Huan pampa yahuiaya quisa nepa Troas mostatica, huejcahuaya Pablo ca ilaquetzalisli, huan pa lajco layúa ayamo lamiaya laquetza. <sup>8</sup> Cataloaya míac tapalquitas milintataloaya pa in calijtic pa pani in cali capa timonechiculoaya. <sup>9</sup> Huan cataya se oquixli itoca Eutico molalijtataya pa se lalapujquil capa quitalo pa quiahuac in cali. Quipiaya se cochilisli chichahuac pampa Pablo huejcahuaya míac ca ilaquetzalisli. Yojque quisulahuac Eutico in cochilisli chichahuac huan huetzic pa quiahuac in lalapujquil, cataya ye cajcalijtic pa pani. Yojque cajcoquijque mictataya. <sup>10</sup> Ma yoje, temuc Pablo, molasac ipan huan quinapaluc, cuaquinon quinmilic:

—Ma camo anmitzcocu anmoyolo, pampa axan yultica oc sejpa.

<sup>11</sup> Huan lejcuc Pablo calijtic oc sejpa. Quiman quilapanac in pan huan quicuac, quinlaquetzilijtiac pa mochi in layúa hual quincahuiliaya. Quiman lanesic, cuaquín uyac. <sup>12</sup> Huan in oquixli hual miquic hual Dios quiyulilitic oc sejpa quihuicajque pa ichan huan quipialoaya míac paquilisli moxtin, huan mochicahuatilliloaya míac pa inminyolo.

### *Quisalo nepa Troas pa yasqui pa Mileto*

<sup>13</sup> Pablo molalilic pa yahuisquiaya pa ojli pa Asón, nepa calaquisquiaya pin barco ca tehuanten. Pampín ticanajque in barco huan tiajque pa Asón. <sup>14</sup> Huan quiman technamiquic Pablo umpa pa Asón, tiquihuicajque ca tehuanten pin barco, tiajque pa Mítilene. <sup>15</sup> Huan umpa tiajque ca in barco, mostatica tipanujque ilaixpan Quiós huan oc se tonali tiajsijque pa in lali lajco pin al huejcalan itoca Samos. Timosehuijque pin caltilan Trogilio huan mostatica tiajsijque pa Mileto. <sup>16</sup> Yojque ticchihuajque pampa molalilic Pablo pa camo timocahualosquiaya míac tonalijmes pin lalticpan Asia, pampín tiajque ca in barco pa yoje amo timoquetzalosquiaya pa Efeso hual unca pin Asia. San ticnequijque tiajque pa Mileto hual unca nadita ca umpic capa unca Efeso. Pablo ejsejtataya pampa quinequiaya ajsi pa Jerusalén sinda huil ajsic umpa pa itonali in fiesta (ilhuil) itoca Pentecostés.

*Pablo quinlaquetzilía ilajtol Cristo in abuelojmes laneltocanjmes pa Efeso*

<sup>17</sup> Nepa pa Mileto quinahuatic Pablo pa hualalosquiaya pa Mileto in abuelojmes laneltocanjmes hual chantiloaya pa Efeso. <sup>18</sup> Huan quiman ajsijque capa yihual, Pablo quinmilic:

—Anquimati quinami mojmosta nicataya ca amhuanten quiman nipehuac niyulic pa Asia huan pa quiman niquisac nepa. <sup>19</sup> Nictequipanuiiaya in Tata ca mochi noyolo. Amo quiman nimochiác hué ilaixpan amaqúi, huan miác tonalijmes nictequipanuiiaya in Tata nichocatataya. Huan nipanuc lacocoltilisli pampa quinequiloaya nejchihuililo amo cuali in judíos. <sup>20</sup> Anquimati amo quiman nimocahuaya pa annimitzilisquiaya len yesquiaya cuali pa amhuanten. Annimitzmaxtiaya quiman anmoxtin anmonechicuhuaya huan quiman niahuiaya pa mochi seje anmochan. <sup>21</sup> Niquinmiliaya judíos huan yehuanten hual amo judíos quinami quipialo pa quipalasi inminyolo pa quichihuasi len quinequi Dios, noje quipialo pa quineltocasi toTata Jesús.

<sup>22</sup> 'Huan axcan, xiquitacan, nechtilantica in Espíritu Santo pa nías pa Jerusalén huan nicpía pa nicneltocas. Huan amo nicmati len yahui nechpanúa nepa. <sup>23</sup> In san nicmati, pa mochi caltilan ca capic nías, in Espíritu Santo nechilía neli pampa yalo nejtzacualo pin calijtic huan nía nipanúa miác lacocoltilisli. <sup>24</sup> Ma yoje, inon amo nechmajtitica nindeno huan amo nechmonotzilía nindeno nel noyulilisli sinda jan huil nilaquisas nicchías in tequipanulisli hual nechilic in Tata Jesús pa nilamis nicchías. Yihual nechilic pa nicnahuatijtiás ilamachiltilisli cuali, niquinmilijtica lacames quinami techicnília Dios.

<sup>25</sup> 'Pampín ninejnemiaya nilaqueztinemiaya ca amhuanten quinami huelitía Dios. Huan axcan xiquitacan. Nicmati pampa yajmo annehitilis noixco ca amhuanten anmoxtin. <sup>26</sup> Ma yoje sinda unca se ca amhuanten hual amo quineltoca ilajtol Dios, amo huil nechmotexpahuilis nel. <sup>27</sup> Annimitznahuatilis mochi ilajtol Dios, amo annimitzlatilic nindeno hual ilajtol techilía. <sup>28</sup> Yojque, ximolachilican amhuanten nojen huan xiquinmiztiacan moxtin hual quineltocalo toTata Jesucristo, pampa anmitztlalilic in Espíritu Santo pa yoje anquichías quinami se quilachilía iborregos. Quimictijque Jesucristo yehuanten pa Jerusalén huan pan ipampa iesli hual toyahuic, yihual moyaxcajtilic yehuanten hual quineltocalo. <sup>29</sup> Nehual nicmati pampa quiman nimohuicas, cuaquín hualasi capa amhuanten lacames hual islacatisi ca amhuanten pampa quinequisi anmitzquixtisi pan iojli Jesús pa camo anquitocatías. In lacames cayasi quinami coyomes hual quisem-analo in borregos. <sup>30</sup> Huan capa amhuanten nojen cayasi lacames hual quimaxtisi islacatilisli. Yojque quitilanilisi inminyolo in laneltocanjmes pa quineltocasi in islacatilisli hual quimaxtisi. <sup>31</sup> Pampín ximoiztiacan, xiquijnamiquican quinami pa ye xixihuil yihualitonali, pa semilhuil huan pa layúa, amo nijcahuaya pa annimitzijnamiquiltis mochi inon ca mochi seje ca amhuanten, nichocatataya quiman annimitziliaya.

<sup>32</sup> 'Huan axcan nocnían, ma Dios anmitzlachili huan ma anmijchicahualti anmoyolo in ilajtol icnirililisli. Ilajtol Dios huil quichía niman miác. Huil anmitzlachilía anmoyolo huan yoje se tonali anquipías mochi hual Dios quinequi anmitzmaca amhuanten. Jo quema, móchi inon Dios quinequi quinmaca moxtin yehuanten hual yihual quinlajtultic pa yesi ilacames. <sup>33</sup> Amo quiman nicnequic amaqúi itomin, amo quiman nicnequic itzotzomajli amaqúi. <sup>34</sup> No, amhuanten nojen anquimati pampa nehual ca

in nomajmajuan nitequipanuaya pa nimolacualtisquiaya huan pa niquinlacualtisquiaya yehuanten hual cataloaya ca nehual. <sup>35</sup> Mojmosta annimitzmaxtiaya pampa yojque ticpialo pa titequipanusi pa ticpiasi len calica huil tiquinpalehuisi yehuanten hual amo quipialo chichahualisli. Xiquijnamiquican len quijtuc toTata Jesús, quijtuc: “Míac paquilisli Dios quimacas se hual quinmaca oc sequin len quipías. Amo yojque míac paquilisli quimacas Dios se hual san cana len quimacalo yihual.”

<sup>36</sup> Huan quiman quinmilic inon, molancuacuetzac Pablo ca moxtin yehuanten huan quilajlanic Dios. <sup>37</sup> Huan chocaloaya míac moxtin, quinalujque Pablo pa iquixlan, quitenamiquiloaya. <sup>38</sup> Quincocuhuaya inminyolo míac pampa yihual mohuicatihuiaya. Ma yoje quincocuhuaya inminyolo niman míac quiman quinmilic pampa yajmo yahuiloyaya quitalo iixco. Cuaquinon uyajque ca Pablo pa in barco.

## 21

### *Pablo yahui pa Jerusalén*

<sup>1</sup> Quiman tilejcujuque in barco huan timoxilujque capa cataloaya yehuanten, tiajque melajfataya pa in lali lajco pin al huejcalan itoca Cos, huan mostatica tiajque pa Rodas huan umpa pa Pátara huan Mira. <sup>2</sup> Huan umpa tiquitajque se barco hual yahuiaya quipanahui in al huejcalan pa Fenicia. Tilejcujuque in barco, tiajque. <sup>3</sup> Huan quiman pehuac nesc in lali lajco pin al huejcalan itoca Chipre, ticpanahuijque ca in lali pa tomajma amo cuali huan tiajque pa Siria. Umpa tiajsijque pa in caltilan hué Tiro capa calaquilo huan quisalo barcos. Nepa quilatemuhuilijque in barco. <sup>4</sup> Tehuanten tiquintemujque in laneltocaniymes huan timocahuajque pa siete tonalijmes ca yehuanten. Yehuanten quilijque Pablo pa camo panquisasquiaya pa Jerusalén pampa in Espíritu Santo lamic quinmilic len yahuiaya quipanu Pablo. <sup>5</sup> Quiman panujque in chicome (siete) tonalijmes, tiquisajque nepa Tiro huan ca tehuanten uyajque moxtin yehuanten ca in sihuames noje huan in xolomes. Timolancuacuetzajque pan itenco in al huejcalan, ticlajlanijque Dios, cuaquinon timochicahuajque se huan oc se. <sup>6</sup> Tilejcujuque pin barco huan yehuanten mocuepajque pa inminchan. <sup>7</sup> Cuaquín tehuanten tiajque tijcajtaloaya Tiro huan tiajsijque Tolemaida. Nepa tilamijque tiajque ca barco. Tiqinpialtijque tocnian in laneltocaniymes huan timocahuajque ca yehuanten se tonali. <sup>8</sup> Mostatica tiquisajque nepa Tolemaida, tiajque pan ojli pa Cesarea, nepa tiajsijque pa ichan Felipe in evangelista, yihual yec se ca in chicome lacames hual quinlajtultijque in lanahuatinijmes pa quinlachillosquiaya in sihuames hual mocahualoaya inminhuían. Nepa pa ichan tichantiloaya. <sup>9</sup> In Felipe quinpiaya nahui ixolomes sihuames. Yehuanten ayamo monamictijque, nepa chantiloaya pa ichan inmintajtzin. Yehuanten quipialoaya Dios ilahuelilitlisli pa quinahuatisquilai lajtol.

<sup>10</sup> Ticataloaya pa Felipe ichan sequin tonalijmes, ajsic se lalac hual chantic pa Judea, yihual itoca Agabo. Yec se ilajtuni Dios, quipiaya Dios ilahuelilitlisli pa quijtusquiaya len yahuiaya panu. <sup>11</sup> Techpaxaluiliaya, canac ilacuejtiloni Pablo, moilpilic icxihuajmes huan imajmajuan, quijtuc:

—Yojque quijtúa in Espíritu Santo: In judíos pin Jerusalén yojque quilpisi in lalac hual iyaxca in lacuejtiloni. Cuaquinon quitemacasi ca yehuanten hual amo judíos.

<sup>12</sup> Yojque quiman tijcaquijque inon, tipehuajque tiquilijque Pablo ca icnotilisli ca mochi toyolo pa camo panquisasquiaya pa Jerusalén, tehuanten

huan yehuanten hual chantiloaya pa Cesarea. <sup>13</sup> Cuaquinon lananquiliic Pablo, techilic:

—¿Leca anchocatica huan annechocolitica noyolo? Amo xicchihuacan inon pampa sinda quinequi Dios, niunca ca se lajtulisli ca yihual pa nías pa Jerusalén pa nicayas laipili nepa, huan noje niunca ca se lajtulisli pa nimiquis nepa sinda yojque quinequi in Tata Jesús.

<sup>14</sup> Yojque amo quinequic quichíac quinami ticmacajque lajtol, pampín yajmo tinahuatijque, tiquijtjque:

—Ma ye quinami quinequi in Tata.

<sup>15</sup> Quiman panujque innojen tonalijmes, timochijchihuajque huan tipanquisajque pa Jerusalén. <sup>16</sup> Noje ca tehuanten uyajque sequin laneltocanjmes hual chantiloaya pa Cesarea. Yehuanten techhuicajque pa ichan se laneltocani itoca Mnason, yihual lacatic pa Chipre, in lali lajco pin al huejcalan. Yihual cataya monextilini pa míac xixihuil, ca yihual pa ichan timocahuajque.

### *Pablo quipaxaulíá Jacobo*

<sup>17</sup> Quiman tiajsijque pa Jerusalén, tocnían laneltocanjmes techpialtijque ca paquilisli. <sup>18</sup> Cuaquín mostatica uyac Pablo ca tehuanten pa tiquitalosquiaya Jacobo huan nepa mochi inminabuelojmes in laneltocanjmes cataloaya ca Jacobo. <sup>19</sup> Quinpialtic Pablo huan pehuac quinquhuilic mochi hual quichíac Dios ca yehuanten hual amo judíos pan ipampa in hual yihual Pablo quichíac, pampa Dios quihuelilitic. <sup>20</sup> Quiman quicaquijque Jacobo huan in laneltocanjmes, quijtjque lajtomes huejué huan cuajcuali pa Dios. Cuaquinon quilijque Pablo, quil:

—Ticmati, tuinon, quichi miles judíos cate hual axcan quineltoalo Cristo. Ma yoje, quimatilo momajtilo niman míac inahuac inon hual Moisés quijtuc pa ilajtol pa ticchihualosquiaya tehuanten, huan quinequilo noje pa mochi oc sequin quimatisi momajtisi yoje. <sup>21</sup> Huan sequin quintenejticate in judíos nican monahuac tehual. Quijtulo islacatijtcate pampa tehual tiquinmaxtineni in judíos hual chantilo pa innojen caltilan capa chantilo yehuanten hual amo judíos, quil quililo, tiquinmilijtinemi pa camo quintzontequilisi icuilaxli inminxolomes, quil, quinami quijtuc Moisés pa quichihualosquiaya. Huan quijtulo pampa tehual tiquinmilijtinemi pa yajmo quichihuasi in míac lachihualisli hual monequi pa quinchihuasi in judíos. <sup>22</sup> Axan, ¿len ticchihuasi? Moxtin in judíos hual quineltoalo Cristo momachiltisi pampa axcan tihualac ca niquic. <sup>23</sup> Pampín, xichía in hual timitzilisi: Cate ca tehuanten nahui tocnían laneltocanjmes hual quichihuaje se lajtulisli ca Dios. Axan quipialo pa lamisi quichihuasi. <sup>24</sup> Tehual xiquinhuica in lacames, ximochipahua quinami se quipía pa quichías quiman quichías se lajtulisli ca Dios. Tehual xiclaxlahuili pa in nahuenten. Cuaquinon yehuanten huil moximasi quinami quichihualo quiman lamilo quichihualo judíos inminlajtulisli ca Dios. Yojque quimatisi in judíos pampa in hual momachiltije monahuac tehual amo unca melahuac. Quema, quimatisi pampa tehual noje ticneltoca ilajtol Moisés. <sup>25</sup> Ma yoje, pa yehuanten hual amo judíos hual noje quineltoalo Cristo, tiquintilanije se amal calica tiquinmilije len tiquijtulo unca cuali pa camo quichihuasi: Ma camo quicuacan nacal hual quilalilo inminlaixpan monos, ma camo quicuacan esli huan inacal se yulijquil latolpatzcali, huan ma quipía jan se íshua o se ilahuical san. Jan ma camo motecacan ca oc se.

*Quiquitzquilo Pablo pin tiopan hué*

<sup>26</sup> Cuaquinon mostatica quinhuicac Pablo in nahui lacames, mochipahuac quinami se judío quipía pa quichías quiman quichía se lajtulisli ca Dios. Yoje quichihuaje innojen nahuenten lacames noje, cuaquinon calaquic Pablo calijtic in tiopan hué, quinlamachiltic in tiopistas quichi tonalijmes cayalosquiaya quiman lamilosquiaya quichihualo in lachipahualisli yihual huan in nahuenten lacames, cuaquinon huil laxlahuisquiaya Pablo in huendi.

<sup>27</sup> Yojqe lamijque quichihuajque chicome (siete) tonalijmes Pablo huan innojen nahui lacames. Ma yoje, quiman ca nadita yahuiloaya laquisalo ca in chicome tonalijmes, quitaloaya Pablo sequin judíos hual chantiloaya pin lalticpan Asia, quitajque calijtic in tiopan hué huan quincualantijque in lalalera. Quiquitzquitiquisajque Pablo, <sup>28</sup> tzajtzitataloaya, quilijque:

—¡Lacames israelitos, xilapalehuican! ¡In se in lalac hual yajtinemi pa mochi cajcapa lamaxtitinemi pampa tehuanten amo ticate cuali! ¡Lamaxtitinemi pa camo quineltocasi in hual Moisés quijtuni pa quichihualosquiaya! ¡Lamaxtitinemi pampa in tiopan hué nican amo unca cuali! ¡Huan noje yihual quichíac catzahualisli, quinhualicac lacames griegos nican calijtic pin lasojli tiopan hué huan yojqe quijlacuc!

<sup>29</sup> Inon quijtujque pampa quitajque nepa pa Jerusalén ca Pablo toctni Trófimo hual yec de Efeso. Quijtujque pampa Pablo quihualicac Trófimo calijtic in tiopan hué, mas que amo quichíac inon. <sup>30</sup> Yojqe mochi in lalalera pin caltilan cualaniloaya, molalujtuhualajque, quiquitzquijque Pablo, quihuilanajque pa quiahuac in tiopan hué, huan jan ajnaxcan quintzactiquisajque in lalapujquimes. <sup>31</sup> Huan quiman motoliniloaya pa quimictilosquiaya Pablo, sequin quilamachiltijque inminlaicanani hué moxtin in guaches len panujtataya, quilijque pampa mochi Jerusalén cualantine-miloaya huan tzajtzitinemiloaya. <sup>32</sup> Yojqe jan ajnaxcan quinhuicac in laicanani hué sequin guaches huan se ome laicananijmes, molalujque pa temuán (temuayan) capa cualantine-miloaya. Huan quiman in judíos quinmitajque in laicanani hué huan in guaches, mochahuajque quihuicitequijque Pablo. <sup>33</sup> Ajsic in laicanani hué, latilanic pa iguaches quiquitzquilosquiaya Pablo huan pa quilpilosquiaya ca teposli. Cuaquinon quilajlanic pampa aquí yihual huan len amo cuali quichíac. <sup>34</sup> Tzajtzijque chichahuac in lalalera, quijtujque míac, huan pampín in laicanani hué amo huil quimatiaya neli leca tzajtzitinemiloaya yehuanten. Yojqe quinmilic iguaches pa quihuicalosquiaya Pablo pa calijtic inmincalimes in guaches. <sup>35</sup> Huan quiman ajsijque pa in lalejculonijmes (in escalera) ca Pablo, in guaches quipialoaya pa quimamalosquiaya pampa in judíos niman cualaniloaya, quinectataloaya quiquitzquilo Pablo oc sepa. <sup>36</sup> Pampín quintocaloaya in guaches, quintzajtzilijtiahuiloaya:

—¡Xicmictican!

*Pablo quinnotza in lalalera pa monapatis*

<sup>37</sup> Jan axcan quiman yahuiloaya quihuicalo pa inmincali in guaches calijtic, Pablo quinnotzac in laicanani hué, quilic:

—¿Tichmacahuiltía pa nimitzilis len?

In laicanani hué quilic:

—Tehual ¿ticmati tilajtúa griego? <sup>38</sup> Cuaquín tiunca in lalac egipcio hual quipehualtic se moanalisli quipía sequin mesli. Huan quinhuicac nahui mil inminlacames inminlanechiculisli in lamictinijmes, quinhuicac ca capic amaqui chanti.

<sup>39</sup> Pablo quinanquilic:

—Amo niunca in se. Nehual nilacal judío huan nilacatic pa in caltilan Tarso. In amo se caltilan tipichin nepa pin lalticpan Cilicia huan nepa nichantiaya. Xichmacahuilti pa niquinnotzas in lalatera.

<sup>40</sup> Cuaquín in laicanani hué quimacahuiltic pa lajtusquiaya Pablo, huan yojque Pablo moquetzac pa in escalera. Quinchihuilic in judíos se lanex-tilisli ca imajma pa mocaualosquiaya. Cuaquín quiman yajmo mocaquic nindeno, quinnotzac Pablo ca lajtol hebreo, quinmilic:

## 22

<sup>1</sup>—Lacames nocnían huan notajtzitzían, xijcaquican axan len nía niquijtúa pa nimonapatis.

<sup>2</sup>Cuaquín quiman quicaquijque Pablo quinlaquetziliztataya ca inminlajtol hebreo, yehuanten niman míac mocaahuajque. <sup>3</sup>Huan Pablo quinmilijtiac:

—Nehual nilacal israelito, nilacatic pa in caltilan Tarso pin lalticpan Cilicia. Ma yoje, nimoscaltic nican Jerusalén capa níac pin cali capa monextillo pin caltilan nican, huan Gamaliel yec nolamaxtini. Yihual nechlamaxtiaya yojque chichahuac pa nicneltocasquiaya in lajtomes hual techmacajque totajtzitzían, in lajtomes hual Moisés quinmacac totajtzitzían. Itequi ca mochi noyolo nimotoliniaya pa nicchíasquiaya quinami niquijtuaya Dios quinequi. Unca quinami amhuanten axan anquichijtica.

<sup>4</sup> Pa yina nipehuani niquintejemuni pa niquintojtocasquiaya yehuanten hual quitocalo iojli Jesús, niquintojtocani lacames huan sihuames, niquinquitzquini huan niquintilanini pa quintzacualosquiaya pa calijtic. Jo quema, huan nicnequini pa miqilosquiaya. <sup>5</sup> Yojque huil anmitzililo noje in tiopista hué huan moxtin inminabuelojmes in judíos hual hueltilo. Nechmacajque amames pa niquinhuiquilisquiaya tocnían judíos hual cate pa Damasco. Níac nepa pa niquintejemusquiaya yehuanten hual quitocaloaya iojli Jesús. Niahuiaya niquinhualica lailpili nican pa Jerusalén pa quincociltosquiaya pa yajmo quitocalosquiaya iojli Jesús.

*Pablo quinpuhuilía quinami quipalac iyolo pan tonali hual in Tata Jesús quinotzac*

*(Hch. 9:1-19; 26:12-18)*

<sup>6</sup>Cuaquín cataya quiman ninejnentataya pan ojli huan amo cataya huejca in caltilan Damasco, cataya lacualispan, huan jan ajnaxcan pin cielo nechixpelatiquisac pa noitenco se laixpelalisli nican chichahuac. <sup>7</sup> Nihuetzic pan lali huan nijcaquic se lajtol nechilic: “Saulo, Saulo, ¿leca tiquintojtocatica yehuanten hual nechneltoalo? Yojque tichtojtocatica nehual.” Huan nehual nicnanquilic: “¿Aqui tehual, Tata?” <sup>8</sup> Huan nechilic: “Nehual niJesús in nazaretco hual tichtojtocatica.” <sup>9</sup> Yehuanten hual cataloaya ca nehual quitajque in laixpelalisli. Ma yoje, amo quicaquijque in lajtol hual laquetzaya ca nehual. <sup>10</sup> Cuaquín niquilic: “¿Len nichías, Tata?” Huan in Tata nechilic: “Ximoquetza, xía pa Damasco, huan nepa mitzilisi mochi hual ticpiás pa ticchías.” <sup>11</sup> Huan yojque chichahuac cataya in laixpelalisli, amo huil nilachiaya. Pampín nechquitziuilije nomajma huan nechhuicaje pa Damasco yehuanten hual cataloaya ca nehual.

<sup>12</sup> Huan cataya se lalac itoca Ananías nepa Damasco. Yihual yec lalac hual itequi lamiaya quichía mochi hual quijtúa tolajtol tehuanten in judíos, huan quijtuloaya moxtin in judíos hual umpa chantiloaya pampa in Ananías yec lalac cuali. <sup>13</sup> Hualac capa nehual in Ananías, ajsic huan nechilic: “Nocni



Saulo, tía tilachía oc sejpa jan axcan.” Huan jan axcan nilachíac huan niq-uitaya yihual. <sup>14</sup> Cuaquín nechilic: “In Dios hual quimolancuacuetziliniyme totajtzitzian mitzljaltultic tehual pa yina pa ticmatis len yihual quinequi pa tehual ticchías. Mitzljaltultic pa tiquitas Jesús hual unca melahuac pa iyolo, huan tiquitac. Mitzljaltultic pa tijcaquis ilajtol mitzlaquetzilijtica huan tijcaquic. <sup>15</sup> Mochi inon mitzpanuc pampa Dios quinequi pa tiquinmilis mochi lacames in hual tiquitac huan tijcaquic. <sup>16</sup> Huan axcan, ¿leca ti-huejcahua? Axan ticpía mochi hual monequi. Ximoquetza huan xicaya lacuayatequili, xicnotza toTata Jesús pa mijchipahuilis molajlajculisli.” Inon nechilic Ananías.

*Pablo quinmilía quinami Dios quitlanic pa yehuanten hual amo judíos*

<sup>17</sup> Cuaquín cataya quiman nimocuepac ca niquic pa Jerusalén huan se tonali niclajlantataya Dios pin tiopan hué, nilaxotocac. <sup>18</sup> Niquitac in Tata Jesús huan nechilic: “Xiejsehui xiquisa nican Jerusalén, amo xihuejcahua, pampa yehuanten nican amo quineltocasi len tiquinmilis nonahuac nehual.” <sup>19</sup> Huan nehual niquilic: “Tata, ¿amo nechcaquisi? Yehuanten quimatilo pampa nehual niquintzacuani pa calijtic yehuanten hual mitznel-tocaloaya, huan niquinhuitequini pin tiopajmes. <sup>20</sup> Huan quiman quim-ictije Estéban hual quinahuatijtinemini molajtol, yojque nepa ca yehuan-ten nicataya huan nicnequiaya pa quimictilosquiaya. Noje niquinlachilic inmintzotzomajli yehuanten hual quimictitataloaya.” <sup>21</sup> Ma yoje, Jesús nechilic: “Xia, pampa nimitztilanis huejca pa yehuanten hual amo judíos.”

<sup>22</sup> Jan ca niquic san quicaquiloaya Pablo, huan quiman quinmilic inon inminahuac yehuanten hual amo judíos, tzajtzijque chicahuac, quilijque: —¡Ma miquí in se! ¡Amo unca iyaxca pa yultías!

*Pablo ca inminlaicanani hué in guaches*

<sup>23</sup> Tzajtziloaya huan quinquixtiloaya inminahuas, quintzejtzeluajtaloaya, yojque quilasaloaya lalpotocli pin iyecal. <sup>24</sup> Cuaquimon latilanic in laicanani hué pa quihuicalosquiaya Pablo pa inmincali in guaches calijtic, quinmilic pa quihuitequilosquiaya. Quijtuaya in laicanani hué pampa yojque momachiltilosquiaya leca tzajtziloaya in judíos pa quimictilosquiaya Pablo. <sup>25</sup> Ma yoje, quiman quilpiliyque imajmajuan huan icxihuajmes pa pehualosquiaya quihuitequilo, Pablo quinotzaca in laicanani nepa moquezataya, quilic:

—¿Tehual unca moyaxca pa ticuitequis se lalcal romano hual ayamo lati-laniye in huelitinijmes pa yes lacocoltli?

<sup>26</sup> Quiman quicaquic inon, uyac in laicanani capa cataya in laicanani hué, quilic:

—Quita. ¿Len tía ticchihua? In lalcal se romano.

<sup>27</sup> Hualac ca Pablo in laicanani hué, quilic:

—Xinechili, ¿tehual tilalcal romano?

Pablo quilic:

—Jo quema.

<sup>28</sup> In laicanani hué quinanquilic:

—Nehual nilalcal romano huan niclaxlahuic míac tomin pa yojque inon yes noyaxca.

Huan Pablo quilic:

—Nehual nilacatic romano.

<sup>29</sup> Jan ajnaxcan mijcuanijque yehuanten hual yahuiloyaya quihuitequilo Pablo. Huan momajtiaya in laicanani hué noje quiman quimatic pampa



Pablo yec lalac romano, pampa yihual quinmilic pa quilpilosquiaya huan quilpijque.

*Pablo inminlaixpan inminla'ajuanijmes in judíos*

<sup>30</sup> Cuaquín mostatica quimacahuac Pablo in laicanani hué pampa quinequiaya quimati neli leca quimotexpahuilloaya Pablo in judíos. Laticanic pa monechiculosquiaya in tiopistas huejué ca moxtin in Lanechiculisi Hué. Cuaquinon in laicanani hué quihuicac Pablo pa latzindan huan quilalic ca yehuanten.

## 23

<sup>1</sup> Cuaquín, quiman Pablo mocahuaya quiztataya in lacames pin Lanechiculisi Hué, quinmilic:

—Lacames nocnían, mojmosta pa yina huan pa axan niyuli ca mosehuilisi ilaixpan Dios, amo nechmotexpahuilía noyolo ilajmatilisi inahuac len unca cuali huan amo cuali.

<sup>2</sup> Huan in tiopista hué itoca Ananías quinmilic pa quitecualosquiaya Pablo pa icamac yehuanten hual moquezataloaya inahuac yihual. <sup>3</sup> Cuaquinon Pablo quinotzac in tiopista hué, quinnanquilic:

—¡Tehual timochijtica quinami lalac niman chipahuac! ¡Dios yahui mitztecua tel! ¡Nepa tiyehuatica pa tilajlanis quinami quijtúa tolajtol! Huan ¿leca tiquinmilía pa nechtecuaasi? ¡Tolajtol amo quimacahuilítia inon!

<sup>4</sup> Yehuanten hual nepa moquezataloaya quilijque:

—Tiquihuejuecaltitica in tiopista hué hual Dios quilajtultic.

<sup>5</sup> Pablo quinnanquilic:

—Nocnían, amo niquislacuhuaya pampa yihual yec in tiopista hué, pampa Dios ilajtol lajcuiluli quijtúa: “Amo xiquijtu len amo cuali hual cajuas se hual huelitía capa amhuanten.”

<sup>6</sup> Cuaquín quitac Pablo quinami sequin pin Lanechiculisi Hué quitocaloaya ilamaxtilisi in saduceos huan in oc sequin quitocaloaya ilamaxtilisi in fariseos. Pampa in quitzajtzilic ca lajtol chicahuac yehuanten pin lanechiculisi, quinmilic:

—Lacames nocnían, nehual nifariseo huan yec fariseo notajtzin. Nechmotexpahuilijtcate pampa nehual nichixtica in tonali quiman tiyulisi oc seppa ca tocuerpos quiman timiquilo.

<sup>7</sup> Yojque, pampa Pablo quijtuc inon, pehualoaya molaxililo lajtol in fariseos huan in saduceos, yajmo cataloaya ca se lajtulisi yehuanten.

<sup>8</sup> Cataya pampa quijtulo in saduceos in mijquimes amo yulilo oc seppa, huan quijtulo pampa amo cate lanahuatinijmes pin cielo huan ijyecames cuajcuali huan amo cuajcuali. Huan quineltocalo in fariseos mochi innojen.

<sup>9</sup> Pampín pehuac se cualanilisi niman hué pin Lanechiculisi Hué huan cuaquinon moquetzajque sequin lamaxtinijmes hual yeje fariseos, quinmilijque chicahuac:

—Amo tiqitalo nindeno amo cuali ca in lalac. Sinda cuajnesi se espíritu o se ilanahuatini in cielo laquetzac ca yihual, amo quichihuilía nindeno amo cuali ipan tolajtol inon.

<sup>10</sup> Huan mochihuaya in cualanilisi niman chicahuac. Pampín momajtiaya in laicanani hué pampa hejtica yahuiloaya quicocoltilo Pablo niman miac. Yojque quinmilic pa temusqui in guaches pa quiquixtililosquiaya Pablo capa yehuanten huan pa quihuicalosquiaya pin inmincalimes in guaches.

<sup>11</sup> Huan mostatica pa layúa nesci in Tata ca Pablo, quilic:

—Amo ximomajti, pampa tía ticnahuatía nolajtol nehual pin caltilan hué Roma quinami noje ticnahuatiaya pa Jerusalén.

*Quichihualo se lajtulisli pa quimictisqui Pablo*

<sup>12</sup> Mostatica quichihuaque in judíos se lajtulisli pa quimictilosquiaya Pablo, moilijque ilaixpan Dios, quilijque:

—Ma Dios techtilani pa ticayasqui lacocoltili sinda tilacualo o sinda tilaunilo sinda ayamo ticmictijque in Pablo.

<sup>13</sup> Yojque quijtujque ilaixpan Dios quinami ompuhuali (cuarenta) lacames ca se ome oc sequin lacames hual monechicujque pa quichihuasqui in lajtulisli chicahuac. <sup>14</sup> Cuaquín uyajque pa in tiopista hué huan inminabuelojmes in judíos, quinmilije:

—Axan tiquijtujque ilaixpan Dios pa yihual techtilanis pa ticayasqui lacocoltili sinda tilacuasi o sinda tilaunisi sinda ayamo ticmictijque Pablo.

<sup>15</sup> Axcan, amhuanten huan yehuanten in Lanechiculisli Hué xicmachiltican inminlaicanani hué in guaches pampa anquinequi anquilajlanilía Pablo mochi inon oc sepa huan niman cuali. Xictemachican in laicanani hué pa quihualicas Pablo ca amhuanten. Huan tehuanten ticayasqui lachijchihuali pa ticmictisi Pablo quiman ajstihualas.

<sup>16</sup> Ma yoje, quicaquic inon ixolol lalac icni sihual Pablo pampa yahuilooaya quimictilo Pablo. Pampín uyajtiquisac pa inmincali in guaches capa Pablo cataya latzacuali, calaquic, quilamachiltic Pablo. <sup>17</sup> Huan Pablo quinotzac pa hualas se ilaicanani in guaches, quilic:

—Xicuica in oquixli pa in laicanani hué, pampa quipía len pa quilamachiltis.

<sup>18</sup> Yojque in laicanani canac ixolol icni sihual Pablo, quihuicac ca in laicanani hué huan quilic:

—In latzacuali Pablo nechnotzac pa nihualas ca yihual, nechtemachic pa nimitzhualiquilis in oquixli pampa yihual quipía len pa mitzilis.

<sup>19</sup> Yojque canac in laicanani hué imajma in oquixli, huan yihual mohuicajque pa capa cataloaya inminhuían, quilajlanic:

—¿Len unca inon hual ticpía pa tinechmachiltis?

<sup>20</sup> In oquixli quilic:

—Axan quichihuaque se lajtulisli in judíos huan yalo mitztemachilo pa ticuicas Pablo mosta pa latzindan pa icali in Lanechiculisli Hué, quil, pa momachiltis oc sepa niman cuali inahuac inon hual quimotexpahuilijcate, quil. Ma yoje, islacatilo. <sup>21</sup> Pampín, tehuac amo xichía quinami quinequilo, pampa cate quinami cuarenta y se, ome lacames yalo anmitzmolatililo pan ojli pa quimictisi Pablo. Quijtuje chicahuac ilaixpan Dios pa quintilanis capa cayasqui lacocoltili sinda lacualo o launilo sinda ayamo quimictije Pablo. Huan axcan cate lachijchihuali huan lachixticate pa ticchías quinami quinequilo.

<sup>22</sup> Yojque, quilic chicahuac in laicanani hué ixolol icni sihual Pablo, quilic:

—Amo xiquili amaqui len tilamic tinechlamachiltic.

*Quitlanía Pablo ca in lalac hual huelitía*

<sup>23</sup> Cuaquion quinnotzac inminlaicanani hué in guaches ome laicanani-jmes pa hualasqui ca yihual, quinmilic:

—Xiquinpiacan guaches lachijchihuali pa chichahui (nueve) horas pa layúa pa yasi pa Cesarea. Anquinmanas dos cientos guaches hual nejnenti-tias, setenta guaches hual lejcütias pan caballos huan dos cientos guaches hual quinpixtias inminteposlimes pa moanalisi.

<sup>24</sup> Noje latilanic pa quinmanalosquiaya ome caballos pa Pablo noje lejusquiaya. Latilanic pa quihuicasqui quiyahualujticate pa mochi ojli, huan yojque ajsilosquiaya ca in lacal itoca Felix in huelitini hual cataya pa Cesarea. <sup>25</sup> Noje in laicanani hué quitilanic in lacal hual huelitiaya se amal ca yehuanten, huan yojque quijtuc in amal:

<sup>26</sup> “Claudio Lisias pa in lasojli Tata Huelitini Félix, nimitzpialtía.

<sup>27</sup> 'In lacal quiquitzquije in judíos huan yahuiloya quimictilo quiman nihualajtiqisac ca noguaches, niquinquixtilic yehuanten quiman nicmatic yihual lacal romano. <sup>28</sup> Nicnequiaya nicmati in amo cuali hual quichíac hual pampa inon quimotexpahuililoaya. Pampín nicuicac inminlaixpan inmin-Lanechiculislí Hué in judíos. <sup>29</sup> Nepa niqitac pampa quimotexpahuililoaya inahuac len lajtol hual quijtúa quinami quimolancuacuetzililo inminDios. Amo quimotexpahuililoaya ca len monotzaya pa quimictilosquiaya o pa quitzacualosquiaya pin calijtic. <sup>30</sup> Huan quiman nechmachiltijque pampa quichihuaque se lajtulislí pa quimictilosquiaya in lacal pan ipampa lacua-jcuamanalislí, cuaquín jan axcan nictilanic ca tehual. Noje nilatilanic pa quimotexpahuilislí pa molaixpan yehuanten hual quimotexpahuililo. Xicaya cuali.”

Yojque quijtuc in amal.

<sup>31</sup> Yojque, in guaches canajque Pablo quinami quinmilic in laicanani hué, quihuicajque pa layúa pa Antípatris. <sup>32</sup> Mostatica yajtíajque ca Pablo in guaches hual lejcutiahuiloya ca caballos huan mocuectiahuiloya in oc sequin guaches pa inmincalimes in guaches pa Jerusalén. <sup>33</sup> Huan in guaches ca caballos ajsijque pa Cesarea huan quimacajque in amal in lacal huelitini (gobernador), noje quitemacajque Pablo ca yihual. <sup>34</sup> Yojque, quiman Felix, in huelitini, lamíc momaxtic in amal, quilajlanic Pablo pa calía lalticpan lacatic. Pablo quinanquilic pampa cataya pin lalticpan Cilicia. <sup>35</sup> Cuaquín Felix quilic:

—Nijcaquis len ticpías pa tiquijtuc quiman hualasi yehuanten hual mitz-motexpahuililo.

Cuaquín latilanic pa quilachilosquiaya Pablo pa icali hué hual itoca iPretorio Herodes.

## 24

<sup>1</sup> Panujque macuili tonalijmes, huan temujque pa Cesarea Ananías in tiopista hué ca sequin inminabuelojmes in judíos huan se itoca Tértulo. In Tértulo yec licenciado. Yehuanten quimotexpahuilijque Pablo ca Felix in huelitini. <sup>2</sup> Quinahuatijque pa hualasquiaya Pablo. Hualac Pablo, huan Tértulo pehuac motexpahuic ca in lacal Felix, quilic:

—Lasojli Félix, pa tehuanten unca mosehuilislí mojmosta huan tipaquilo pampa axan mochíac niman cuali tolali. <sup>3</sup> Tihuelitía cuali ca mochi huan pa mochi cajcaca pan ipampa molajmatilislí tehual. Ticanalo mochi inon pampa tehual titejchihuilía. Huan pampín timijsehuilo míac, Tata Huelitini.

<sup>4</sup> Ma yoje, pa camo nimitzmaca míac tequil, nimitztemachía pa tichcaquis jan nadita san, quinami tehual mojmosta tilachihuilía cuali. <sup>5</sup> Unca pampa tiquitajque in lacal unca quinami se cocolislí. Amo mocahua quimacatinemi tequil pa yajmo cayasi ca se lajtulislí in judíos cajcaca yes chantilo pa mochi in lalticpan. Yihual ilaicanani ilamaxtilislí in Jesús hual chantini pa Nazaret, inminlanechiculislí in nazarenos. <sup>6</sup> Yihual noje motolintataya pa quijlacusquiaya totiopan hué huan pampín tijquitzquijque. Ticnequiloaya ticchi-huililo quinami quijtúa tolajtol. <sup>7</sup> Ma yoje, hualac Lisias inminlaicanani hué

in guaches huan ca niman míac chicahualisli techquixtilic in se. <sup>8</sup> Quijtuc pampa yehuanten hual quimotexpahuililoaya se quipialoaya pa hualasi ca tehual. Huan sinda ticlajlanis tehual, huil ticmati unca melahuac mochi in hual ticmotexpahuilijicate.

<sup>9</sup> Huan in judíos hual nepa cataloaya noje quijtujque pampa cataya yojque quinami quijtuc Tértulo. <sup>10</sup> Cuaquinon in lalcal Felix quichihuilic lanextilisli Pablo pa lananquilisquiaya, huán Pablo quilic:

—Nicmati pampa tehual tihuelitiaya pa tolali axan pa míac xixihuil. Pampín nicpía paquilisli pa nimitzilis len nicchijtataya quiman nechquitziqije. <sup>11</sup> Jan quipía quinami doce tonalijmes san quiman nipanquisac pa Jerusalén pa nicmolancuacuetzilisquiaya Dios. Tehual huil ticmati unca neli inon. <sup>12</sup> Yehuanten amo nechitaje niquinlaxilijtataya lajtomes, amo nechitaje nicchijtataya xahuanilisli pa niquinqualantis pin tiopan hué huan amo pa oc sequin tiopajmes pin caltilan. <sup>13</sup> Huan yehuanten amo quimatilo nindeno calica huil mitznextilisi da unca neli inon hual nechmotexpahuililo. <sup>14</sup> Jan nimitzilía neli inon, nicmolancuacuetzilía iDios totajtitzían, nictoca iojli Jesús, in ojli hual innojen lacames quijtulo unca se ojli ca lamaxtilisli amo cuali. Huan niquinnetoca mochi innojen hual unca lajcuiluli pa iamames tolajtol huan pin amames hual quinmijcuilujque ilajtunijmes toDios. <sup>15</sup> Niyuli nicchixtía pa Dios tejchihuilis len yihual quilic neli, yojque quinami quichialo in lacames nican. Huan yojque nicchixtica pampa Dios yahui quinyuliltía oc seppa yehuanten hual miqije. Yahui quinyuliltía yehuanten hual quinelocalo huan yehuanten hual amo quinelocalo. <sup>16</sup> Pampín nimotolinía pa nicchías len Dios quita cuali huan len quitalo cuali lacames. Nicchía inon pa camo nechmotexpahuilis noyolo nindeno. <sup>17</sup> Axan quipía nahui, macuili xixihuil amo nicataya pin Jerusalén. Huan quiman niajsic nepa quipía doce tonalijmes, nicpiaya len pa niquinmacasquiaya nocnían judíos hual amo quipialoaya pa molacualtis. Noje niahuiaya niclali se huendi pin tiopan hué. <sup>18</sup> Nechitaje pin tiopan hué sequin judíos hual chantilo pin laticpan Asia. Nechitaje nicchijtataya innojen lachihualisli, nimochipajtataya quinami quijtúa tolajtol. Amo cataloaya lalalera ca nehual huan amo nicchijtataya xahuanilisli. <sup>19</sup> In judíos asiaticos, innojen cate hual quipialoaya pa nechmotexpahuililosquiaya pa moixpan sinda quijtulo pampa nicchihuaya len amo cuali. <sup>20</sup> O yehuanten nican ma quijtucan len amo cuali quitaje nicchías quiman nimoqueztataya inminlaixpan yehuanten pa inLanechiculisli Hué in judíos. <sup>21</sup> Cuajnesi quinequilo quijtulo pampa nicchiac len amo cuali quiman nitzajtzc nimoqueztataya capa yehuanten, niquintzajtzilic: “Annechmotexpahuilijtica axan pampa nicneltoaca yalo yulilo oc seppa yehuanten hual miquilo”, niquinmilic.

<sup>22</sup> In Félix quimatiaya míac inahuac ilamaxtilisli iojli Jesucristo. Yojque, quiman quicaquic inon, mocahuac pa lajlanis huan quilamic in lanechiculisli, quinmilijtica:

—Quiman hualas in laicanani hué Lisias, cuaquín annimitzilis quinami niquita anmotexpahuilisli.

<sup>23</sup> Cuaquinon Félix quilic in laicanani pa quilachililosquiaya Pablo in guaches. Noje quilic pa quimacahuiltisquiaya Pablo pa quichiasquiaya len quinequisquiaya quichía, san amo huil quisaya pa quiahuac in cali. Huan quilic pa camo quitzacuilisquiaya ilajlasojli Pablo hual quinequiaya quipaxaluli o quichihuili len yes cuali.

<sup>24</sup> Cuaquín, quiman panujque sequin tonalijmes, hualajque Félix huan isihua itoca Drusila, yihual yec judía. Quinahuatic Félix pa hualasquiaya Pablo pa huil quicaquisquiaya len Pablo quilaquetzilisquiaya pa quimatisquiaya quinami se quineltoca Cristo. <sup>25</sup> Huan quilaquetziliaya Pablo quinami lacames quipiálo pa yesqui melahuac pa inmínyolo quinami Dios unca melahuac. Quilaquetziliaya quinami quinequi Dios pa timotzacuilisqui pa camo ticchihuasqui in amo cuali. Quiliaya noje pampa Dios yahui quintojtoca pa quisas ilaixpan yihual yehuanten hual amo quineltocalo. Pampín pehuaya momajti Félix, quilic:

—Xía nuso axan. Quiman nicpía oc se tonali nimitznotzas pa tihualas ca nehual.

<sup>26</sup> Noje Félix amo mocahuac pa quichiasquiaya pa Pablo quimacasquiaya tomin pa yojque quimacahuasquiaya. Pampín Félix quinahuatiaya miac tonalijmes pa hualasquiaya Pablo pa laquetzasquiaya ca yihual. <sup>27</sup> Huan yojque panujque ome xixihuil. Cuaquinon quijcuanijque Félix, yajmo yec lacal hual huelitiaya. Ja umpa quitocac yihual pa huelitis se hual itocaya Porcio Festo. Yihual in huelitini yancuic. Ma yoje, quiman quisaya Félix pa yajmo huelitisquiaya, quinequiaya quinchihuili len hual quixtocaloaya in judíos. Pampín quicahuac Pablo latzacuali calijtic.

## 25

### *Pablo ilaixpan Festo*

<sup>1</sup> Cuaquinon ajsic Festo pa Cesarea, pehuac yec lacal huelitini pin lalticpan Judea huan quiman panujque ye tonalijmes, quisac nepa Cesarea pa panquisasquiaya pa Jerusalén. <sup>2</sup> Nepa quitaloaya in tiopistas huejué huan inminhueyenten in judíos. Yehuanten quilamachiltijque pampa quimotexpahuילוaya Pablo, pehuajque quitemachijque Festo pa quinchihuilisquiaya cuali. <sup>3</sup> Quinequiloaya pa quitilansiquiaya Pablo pa Jerusalén. Huan umpa pan ojli sequin judíos yahuiloaya quinapachilo pa quimictilosquiaya quiman panuaya. <sup>4</sup> Ma yoje, quinnanquilic Festo, quinmilic:

—In Pablo yahui mocahua latzacuali pa Cesarea, huan nehual amo nía nihuejcahua pa nimocuepas ca umpic. <sup>5</sup> Pampín, yehuanten hual quipialo in lahuellitilisli capa amhuanten ma temucan ca nehual pa Cesarea. Cuaquinon sinda unca len amo cuali hual quichíac in lacal, nepa ma quimotexpahuilican.

<sup>6</sup> Mocahuac in Festo nepa pa Jerusalén jan se ocho o diez tonalijmes san, cuaquinon mocuepac pa Cesarea. Nepa ajsic huan mostatica molalic pa iicpali hué in lacal hual huelitía, latilanic pa canalosquiaya Pablo. <sup>7</sup> Quiman hualac Pablo, moquetzajque itenco moxtin in judíos hual quisajque ca Festo nepa Jerusalén huan temujque pa Cesarea. Quimotexpahuilijque Pablo ca miac lachihualisli amo cuajcuali huan huejué. Ma yoje, amo huil quinextiloaya yehuanten sinda quijtuloaya melahuac. <sup>8</sup> Cuaquín Pablo lajtuc pa quinnextilisquiaya pampa amo quichíac nindeno amo cuali, quinmilic:

—Amo nicchíac nindeno hual inminlajtol in judíos amo techmacahuiltía pa ticchihuasi. Amo nicchíac nindeno amo cuali pin tiopan hué, amo nicchíac nindeno hual ilajtol in hué romano amo techmacahuiltía pa ticchihuasi.

<sup>9</sup> Festo quinequiaya quinchihuili len hual quinnextilisquiaya in judíos pampa yihual quinequisquiaya quinpaquilti. Pampín quilajlanic Pablo, quilic:

—¿Ticnequi tipanquisa pa Jerusalén, pa nimitzcaquis umpa quinami tilananquilis inahuac inon calica mitzmotexpahuililo?

<sup>10</sup> Huan Pablo quilic:

—Nimoqueztica inminlaixpan in huelitini romano hual quipía ilahueliltisli in hué nepa Roma. Unca nican capa nicpía pa niyes lacaquili huan amo pa Jerusalén. Yojque unca quinami quijtúa in lajtol. In judíos amo niquinchiuilic nindeno amo cuali, quinami tehual noje ticmati cuali. <sup>11</sup> Sinda nicchíac len hual nechahuilúa pa nimiquis, cuaquín amo nimonapatis, ma nechmictican. Ma yoje, sinda amo unca melahuac len quijtulo nechmotexpahuilijtcate, cuaquín amaqi huil nechtemaca ca yehuanten. Nehual nimotemacas ca Cesar inminhué in romanos, nicnequi pa yihual nechcaquis.

<sup>12</sup> Cuaquín laquetzac Festo ca ilacames ilanechiculisli, huan cuaquín quinanquilic Pablo, quilic:

—Ticnequi timotemaca ca Cesar in hué. Pampa inon, ca Cesar tías.

*Festo quilaquetzília in hué Agripa quinami quimotexpahuililo Pablo*

<sup>13</sup> Panujque sequin tonalijmes, hualajque pa Cesarea inminhué in judíos hual itocaya Agripa huan icni sihual itocaya Berenice, hualajque pa quipi-altisqui in hué lalac Festo. <sup>14</sup> Quiman cayajque nepa sequin tonalijmes, Festo quilaquetziliz Agripa quinami quimotexpahuililoaya Pablo, quilic:

—Unca se lalac latzacuali hual Félix quicahuac nican quiman quisac pa yajmo yes huelitini. <sup>15</sup> Quiman níac pa Jerusalén, quimotexpahuilije in tiopistas huejué huan inminabuelojmes in judíos, quitemachijtataloaya pa nictilanisquiaya pa miquis. <sup>16</sup> Yehuanten niquinanquilic pampa tolajtol tehuanten romanos amo quimacahuilía pa quitilansi se lalac quinami quinequilo yehuanten hual quimotexpahuililo. Romanos —quilic Festo —, quipehualtilo in lajlanilisli quimacatica tonali pa moitasi lanechiculi yehuanten moxtin, pa cayas in se inminlaixpan yehuanten hual quimotexpahuililo. Yojque in se huil monapatía de len quimotexpahuililo. <sup>17</sup> Pampín tihualaje ca níquic huan amo nihuejcahuac pa nicpehualtis in lajlanilisli. Cataya mostatica nimolalic pa noicpali pa la'ajuani huan nilatilaníc pa canasí in lalac. <sup>18</sup> Huan quiman moqueztataloaya in lalac inminlaixpan yehuanten, amo quimotexpahuilijque ca nindeno hual niqijtuaya yehuanten yahuiloaya quimotexpahuililo. Amo cataya len quinami se hué lachihualisli amo cuali. <sup>19</sup> Jan quimotexpahuililoaya inahuac len quinami quimolancuacuetzililo inminDios san. Laqueztataloaya inahuac se hual itoca Jesús hual miquic, huan quijtúa Pablo neli pampa yuli. <sup>20</sup> Yojque nehual amo nicmatiaya quinami huil niclajlanisquiaya len quinami inon. Pampín niclajlanic Pablo sinda cuajnesi quinequiaya yahui pa Jerusalén, pa umpa yesquiaya lacaquili inminyampa yehuanten. <sup>21</sup> Ma yoje, quilic Pablo pampa yahuiaya motemaca ca in hué Cesar pa yihual quicaquisquiaya quinami Pablo yahuiaya monapati. Cuaquín nilatilaníc pa quipialosquiaya nican. Quiman panusi sequin tonalijmes huil nictilanís ca Cesar Augusto in hué.

<sup>22</sup> Agripa quinanquilic Festo, quilic:

—Nehual noje nicnequisquiaya nijcaqui len quijtúa in lalac.

Festo quilic:

—Mosta tijcaquis lajtus.

<sup>23</sup> Yojque mostatica hualajque Agripa huan Berenice in omente lalaquetntili cualtichin, huan quintocatihualaloaya moxtin oc sequin cualtichin se itepotzcon oc se. Calajijque pa se calijtic hué capa monechicunijme in

huejueyenten. Calaquijque ca yehuanten in inminlaicananijmes huejué in guaches huan inminhuejueyenten in caltilan Cesarea. Cuaquinon latilanic Festo pa quihualicalosquiaya Pablo. <sup>24</sup> Quiman ajsic Pablo, cuaquín Festo quinmilic:

—Hué Agripa huan anmoxtin lacames hual anuncia nican ca tehuanten, anquitzica in se hual inahuac yihual moxtin in judíos pa Jerusalén huan nican nechlaquetzilije. Quimotexpahuילוaya huan quilijtinemiloaya pampa yajmo unca iyaxca pa yultias. <sup>25</sup> Ma yoje, nehual amo niqutiliaya se lachihualisli amo cuali hual cahuiluaya pa yes latilanic pa miquis. Jan yoje yihual ihuían quinequiaya motemaca ca in hué Cesar pa yihual quicaquiltisquiaya. Pampín nimolalic pa nictilanicquiaya in lalcal ca in hué. <sup>26</sup> Ma yoje, nican neli nimoitas amo nicmactica len lajtol pa niqijcuiluilis in Tata Hué Cesar pa nicmachiltis leca nictilanijtica ca yihual. Pampa inon nicualica in se pa anmolaixpan pa anquicaquis. Huan pa molaixpan, Hué Agripa, nicualica ca niman míac lanequilisli pa yojque, cuajnesi quiman ticlajlanis yihual, nehual nicpías len niqijcuiluilis in hué Cesar leca nictilanijtica in lalcal. <sup>27</sup> Niqijjtúa inon pampa niqijjtúa ninesis quinami se hual amo laijnamiquía cuali sinda nictilanic se laipili ca in hué huan amo huil niclamachiltía ca lajtol neli leca quimotexpahuilijtcate in judíos.

Yojque quijtuc Festo.

## 26

### *Pablo ilaixpan in hué Agripa*

<sup>1</sup> Cuaquinon Agripa quilic Pablo:

—Timitzmacahuiltiticate pa timonapatis tehual, xilajtu.

Cuaquinon quixilanic Pablo imajma, quichíac lanextilisli, pehuaya lajtu yojque, quinmilic:

<sup>2</sup> —Tata Hué Agripa, nimoiztica ca paquilisli axcan pampa tichmacahuiltitica pa nimonapatis pa molaixpan inahuac mochi inon hual nechmotexpahuilijtcate in judíos. <sup>3</sup> Huan amo in san. Noje nicpía paquilisli pampa tehual tiquinmati mochi innojen lachihualisli huan innojen lajtomes hual quinneltoalo in judíos, huan ticmati mochi hual inahuac inon molaxililo lajtomes. Pampín nimitztemachía pa tichcaquis huan pa camo tisiahuis quiman tichactica.

### *Pablo quinmilía quinami yulini quiman ayamo quiximatic Cristo*

<sup>4</sup> Moxtin in judíos —quilic Pablo—, quimatilo quinami niyulini quiman nicataya muachito huan quiman nimoscaltitayaya. Quimatilo inon yehuanten hual yulilo capa nilacatic huan quimatilo yehuanten hual yulilo pa Jerusalén. <sup>5</sup> Sinda quinequiloaya mitzililo, huil mitzililoaya pampa nehual nifariseo huan niyulini quinami yulilo in fariseos. Quichihualo in fariseos quinami monequi pa quichihuasi innojen lachihualisli hual cate quinami ticmolancuacuetzililo Dios. Amo yojque míac quichihualo in oc sequin judíos. <sup>6</sup> Huan axcan nechmotexpahuilijtcate. Huan ¿leca? Unca pampa nicchixtica inon hual Dios neli quinmilic totajtzitzián pampa yihual yahuiaya quinmaca. Huan inon unca hual nicchixtica, Dios yahui quinyuliltía in mijquimes. <sup>7</sup> Huan inon quichixticate moxtin inminmi-ahumes in doce totajtzitzián tehuanten hual ilacames Israel, quichixticate pampa quinequilo yulilo oc sejpa. Pampín quimolancuacuetzililo Dios huan quitequipanuililo yihualitonalí, pa semilhuil huan pa layúa. Huan Tata Hué Agripa, nehual noje nicchixtica Dios yahui nechyluliltía. Huan pampa in, in



judíos nechmotexpahuilijticate axcan, in nimitzilía Tata Hué Agripa. <sup>8</sup> Huan ¿leca anquijtúa laijtic amhuanten pampa Dios amo quipía chichahualisli pa quinyuliltis yehuanten hual miquije?

*Pablo quijtúa quinami quintojtocani in laneltocaniymes*

<sup>9</sup> Nehual, amo quipía míac xixihuil quiman niqijituni pampa nicpiaya pa niqinchihuilisquiaya míac amo cuali yehuanten hual quineltocalo Jesús in nazareteco. Nicnequiaya pa yajmo laquetzalosquiaya len lajtol inahuac yihual. <sup>10</sup> Nicchíac inon pa Jerusalén. Niquntzacuac míac ilaneltocaniymes pa calijtic, nicanac inminlatilanilisli in tiopistas huejué. Huan noje, quiman latilaninijme pa yesquiaya lamictili se laneltocani, nehual noje niqinmacani nolajtol pa yesquiaya lamictili. <sup>11</sup> Huan pa mochi in tiopajmes cataloaya míac tonalijmes quiman niqincoltini in laneltocaniymes, niqinchihualtini lahuejuecaltilisli pa quijtusi pampa Jesús amo unca Dios. Nicualanini ca yehuanten niman chichahuac, quema, huan niahuini pa oc sequin caltilan pa niqintojtocasquiaya.

*Pablo quinpuhuilía oc sejpa quinami pehuac quineltocac Cristo*  
(Hch. 9:1-19; 22:6-16)

<sup>12</sup> Yojque nicchijtinemini huan cataya se tonali niahuiaya pa Damasco pa niqinquitziquisquiaya moxtin laneltocaniymes nepa pa niqinhuicasquiaya lailpili pa Jerusalén. Nicpiaya se amal pa nicchiasquiaya inon ca ilahueliltilisli in tiopista hue. <sup>13</sup> Cataya lacualispan, Tata Hué Agripa, huan niqitac se lahuilisli niman chichahuac, laixpelatiquisac pin cielo. Amo quiman huil lahui in tonali quinami in lahuilisli. Nechixpelac notenco huan quinmixpelac yehuanten hual yahuiloaya ca nehual. <sup>14</sup> Timoxtin tihuetzije pan lali huan nehual nijcaquic se lajtutataya ca lajtol hebreo, nechilic: “Saulo, Saulo, ¿leca tiqintojtocatica yehuanten hual nechneltocalo? Yojque tichtojtocatica nehual. Unca len chichahuac pa tehual. Tiquinami se buey hual quitecua in latzopinijquil ca icxían.” <sup>15</sup> Huan niqulic: “¿Aqui tehual, Tata?” Huan in Tata nechilic: “Nehual nijesús hual tichtojtocatica. <sup>16</sup> Axan, ximoquetza ca mocxihuajmes. Nimitzmonextilic tehual pampa nimitzljaltulic pa tichtequipanuilis. Tía tiquinlaquetzilizijtinemi lacames in quinami tichitac axcan. Noje tichitas ca oc sequin tonalijmes huan ticipás pa tiquinlaquetzilis lacames hual nimitznextilis umpa. <sup>17</sup> Nimitzquixtilis pin polehuilisli quiman tiunca ca judíos huan ca yehuanten hual amo judíos pa camo mijchihuilisli len quinequisi mijchihuilisli. <sup>18</sup> Unca ca yehuanten hual amo judíos capa nimitztilanis pa quimatisi len quinequi quijtúa Dios ilajtol. Nimitztilanis pa tiqinmilis pa mocahuasi pa canasi iojli laticumac Satanás, pa tiqinmilis pa canasi iojli Dios capa lajtica, pa camo quineltocasi Satanás huan pa quineltocasi Dios. Nimitztilanis ca yehuanten pa tiqinmilis pampa Dios quinpujpuhuas yehuanten inminlajlaculisli. Yojque quipiasi in hual nía niqinmaca moxtin yehuanten hual niqinlajtultía, hual nechneltocalo.” Inon nechilic Jesús.

*Pablo quineltoca len quilic Jesús*

<sup>19</sup> Yojque, Tata Hué Agripa, nicneltocac len nechilic Jesús quiman nechnotzac nepa pin cielo. <sup>20</sup> Jo quema, nipehuac niqinlaquetzilizijataya yehuanten hual chantiloaya pa Damasco in hual niqitac. Niqinmilic pa quipalalosquiaya inminyolo pa pehuasi lajnamiquisi quinami yihual Dios huan pa canalosquiaya iojli Dios. Niqinmilic pa quichihualosquiaya len quinnextilisquiaya moxtin pampa axan quipalaje inminyolo. Cuaquín,



panuc inon, nicchíac yojque pa Jerusalén, cuaquinon pa mochi in lali Judea. Noje niquinmilic inon yehuanten hual amo judíos. <sup>21</sup> Pampín nechquitziquite in judíos pin tiopan hué, motoliniloaya pa nechmictilosquiaya. <sup>22</sup> Ma yoje, nechpalehuiaya Dios nepa in tonalijmes huan axan nican. Yoje in tonali niyuli niquinlaquetziliztía in lamachilitisli cuali ca lacames tijtipichin huan lacames huejué. Jan niquinmilía san inon hual Dios ilajtunijmes huan Moisés quijtunijme pa yina pampa yahuiaya panu. <sup>23</sup> Quijtunijme pampa quiptiaya panusquiaya lacocoltisli in Cristo, quiptiaya pa miquisquiaya. Quijtunijme pampa yihual yesquiaya hual quipehualtiaya moxtin hual miqijue huan mocuepaje yulije pa camo miquisi oc sejpa. Yojque Cristo quinnexilisquiaya in judíos huan yehuanten hual amo judíos pampa neli yulisi oc sejpa yehuanten hual miquilo. Inon unca in lanahuatilisli hual quinlahuilía lacames inminyolo.

*Pablo motolinía pa quiyamanilis iyolo Agripa pa quineltocas Jesús*

<sup>24</sup> Quiman quijtuc Pablo innojen lajtomes pa monapatisquiaya, quitzatzilic Festo ca lajtol chicahuac, quilic:

—¡Amo ticpía laijnamiquilisli, Pablo, pampa ticmonexilic niman míac! ¡Pampín axan timochíac se hual amo quipti laijnamiquilisli!

<sup>25</sup> Pablo quinanquilic:

—Amo niunca yojque, Tata Festo. Neli niqijuttica inon ca lajtomes hual unca melahuac hual moxtin quimatilo len quinequilo quijtulo. <sup>26</sup> Nican unca in hué huan amo nimomajtia niqijtúa inon ilaixpan yihual, pampa yihual quimati cuali in hual niqijuttica. Nehual niqijtúa neli pampa yihual cajiaya lamachilitisli inahuac in hual panuaya. Inon hual niclaquetziliztica amo panuaya capa cataya lalatili. <sup>27</sup> Tehual, Tata Hué Agripa, ¿ticneltoca len Dios quijtuc pan inminpampa ilajtunijmes? Nicmati pampa tehual ticmati in unca jan quinami annimitzilic.

<sup>28</sup> Huan Agripa quilic Pablo:

—Pan se nadita ticnequi tijsulahua pa nimochihuas se hual quineltoca Cristo.

<sup>29</sup> Huan Pablo quinanquilic:

—Nictemachía Dios pa quinequis pa ticneltocas Cristo, pa tiyes quinami nehual, ma ye pan se nadita, ma ye pan míac tonalijmes. Huan in hual nictemachía Dios pa tehual, noje nictemachía pa moxtin nican hual nechcaticate axcan. Jan annimitzilía san amo nicnectica pa anyesquiaya lailpili quinami nehual.

<sup>30</sup> Ca inon laquisac lajtuc Pablo, huan moquetzac in hué, cuaquinon moquetzajque Festo in lalac huelitia huan Berenice huan yehuanten hual nepa cataloaya. <sup>31</sup> Quiman mohuicajque, laqueztiahuiloya se ca oc se, quililoaya:

—Amo quichíac in lalac nindeno hual cahuilúa pa yes lamictili, huan amo cahuilúa pa yes latzacuali pa calijtic.

<sup>32</sup> Huan Agripa quilic Festo:

—Tehuanten huil ticmacahualoaya in lalac sinda amo quinequiaya motemaca ca in hué Cesar.

<sup>1</sup> Quiman quilalijque pa quitilanosquiaya Pablo pa in lali Italia capa unca in caltilan hué Roma, nehual Lucas huan yihual tiajque. Quitemacajque Pablo huan oc sequin lacames lailpili ca se laicanani itoca Julio. Yihual yec ilaicanani inminlanechiculisli in guaches itoca iBatallón Augusto. <sup>2</sup> Tilejcuajque pan se barco hual quisaya pin caltilan Adramitio capa barcos quisalo huan moquetzalo. Amo yahuiaya huejcahua pa quisas nepa Cesarea huan yahuiaya panu pa atenco in lalticpan Asia, nepa cataloaya sequin caltilan capa calaquilo barcos. Noje ca tehuanten yahuiaya yahui Aristarco hual lacatic pa Tesalónica pin lali Macedonia. <sup>3</sup> Mostatica tiajsijque pa Sidón capa calaquilo in barcos huan nepa Julio cataya niman cuali ca Pablo, quichihuilic se cuali hué. Quimacahuilic pa yas capa ilajlasojli pa Sidón pa yehuanten quichihuililosquiaya mochi hual monequiaya pa quipiasquiaya. <sup>4</sup> Cuaquín quiman tiquisajque nepa Sidón, amo ijyecaya quinami quinequiaya yahui in barco. Pampín tipanujque pan norte in lali Chipre hual unca lajco pin al huejcalan. Yojque yajmo míac techpitzaya in ijyecal. <sup>5</sup> Panujtiahuiaya tobarco pin al huejcalan capa amo huejca cataloaya in lalticpan Cílicia huan in lalticpan Panfilia. Cuaquinon tiajsijque pa Mira pin lali itoca Licia.

<sup>6</sup> Huan umpa quitac in laicanani se barco hual quisac nepa pin caltilan hué Alejándria capa calaquilo barcos, yahuiaya pa Italia. Techlejculitijque pin barco, cuaquinon tiquisajque tinejnentiajque ca in barco. <sup>7</sup> Tiyahuiloaya yulito sequin tonalijmes huan ca míac latolinilisli tiajsijque ilaixpan capa itoca Gnido. Amo techmacahuilic pa panu in ijyecal pa tiajtiahuilosquiaya capa ticnequiloaya. Pampín ticmalinajque in barco nadita pa tiajsisqui pa in sur in lali itoca Creta hual unca lajco pin al huejcalan. Huan tipanujque in atenco in lali capa cataya in caltilan Salmón. <sup>8</sup> Huan umpa ca latolinilisli tipanuloaya pa in sur in lali Creta huan ca nadita tihualajque pa capa itoca Buenos Puertos, capa in caltilan Lasea amo cataya huejca.

<sup>9</sup> Axcan quiapiaya míac tonalijmes quiman tiquisajque nepa Cesarea. Noje cataya cuajnesi polehuilisli sinda tialosquiaya ca barco, pampa axcan panuc in tonali quiman mosahualo in judíos, huan quiman panuc in tonali yahuiaya pehua majcoquía míac in al huejcalan. Pampín Pablo quinlaquetzilic pampa moitalosquiaya pin polehuilisli hual yahuiaya panu, quinmilic:

<sup>10</sup> —Lacames, niqijtúa pampa cayas polehuilisli huan míac xitininilisli pa in hual ticmantialo pin barco sinda tiquisasi nican. Huan noje ticayasi tehuanten pin polehuilisli, cuajnesi timoatocitisi noje.

<sup>11</sup> Ma yoje, inminlaicanani in guaches amo quinequiaya quicaqui in hual quijtuc Pablo. Quinequiaya quicaqui in hual quilijque yihual hual quinejnemilitiaya in barco huan yihual iteco in barco. <sup>12</sup> Cuaquín yehuanten in míac lacames quilalijque pa quisalosquiaya nepa. In caltilan capa cataloaya amo cataya cuali pa panulosquiaya in mesli quiman cayasquiaya secuisli, pampa mojmosta ijyecasquiaya huan quichiasquiaya sehua. Pampín, sinda cuajnesi huil, yahuiyoaya ajsilo pa Fenece pa panulosquiaya nepa in tonalijmes quiman cayasquiaya secuisli. In cataya se caltilan capa huil calaquiloaya in barcos huan cataloaya latzacuali in ijyecames. San ijyecasquiaya pin noroeste huan pin suroeste.

### *Pehua ijyeca chicahuac pin al huejcalan*

<sup>13</sup> Cuaquinon quiman pehuac ijyecac yulito pin sur, quijtujque pampa cataya in ijyecal hual quinecataloaya. Yojque quiquixtijque in teposli etic pin al, quilalic pin barco, cuaquinon techhuicaya in barco capa amo cataya huejca iatenco in lali Creta. <sup>14</sup> Ma yoje, panuc je nadita, pehuac ijyecac chicahuac pa Creta huan cajsic in ijyecal in barco, cataya in ijyecal hual

quitocayaltilo in Norestero. <sup>15</sup> Yojque ijyecac chicahuac pan barco, pampín in barco amo huil quixnamiquiaya in ijyecal. Pampín, ticpiajque pa ticmacahuiltlosquiaya pa in ijyecal quihuicasquiaya in barco. <sup>16</sup> Huan quiman tipanuloaya pa itepotzcon se lali tipichin itoca Claudia lajco pin al huejcalan, in lali quitzacuiliaya pa como míac techhuitequisquiaya chicahuac in ijyecal. Yojque huil ca tolinilisi ticajcoquijque pin barco in barquito hual tictilantiahuloaya pa tolattepotzcon. <sup>17</sup> Quiman ticajcoquijque in barquito, pehualoaya quilalilo paxas lachihuali ca mecames huejué, quilalililoaya lajco pan in barco pa como mocaxanisquiaya icuahuimes in barco. Momajtiloaya pampa quijtuloaya in barco yahuiaya ajsi pa se laxitinijal pin al huejcalan capa cataya míac xali, in laxitinijal itoca in Sirte. Pampín quitemuhuijque in tzotzomajli telahuac pa como quihuicasquiaya in barco in ijyecal pan in xali capa amo cataya huejcalan in al. Yojque quimacahuiltjque in barco pa lanilusquiaya san, in ijyecal huan in al quihuicaloaya in barco. <sup>18</sup> Mostatica amo mocahuaya pa quihuicasquiaya cajcapa in barco in ijyecal huan in al, pampín pehualoaya quilasalo yehuanten in lamamajquil pin al huejcalan pa mocahuasquiaya amo niman etic in barco. <sup>19</sup> Huan quiman quiapiaya ye tonalijmes quiman tiquisajque nepa Creta, pehuajque quilasajque pa al innojen teposlimes huan cuahuimes calica tequipanuloaya pin barco, quinlasajque ca inminmajmajuan yehuanten. <sup>20</sup> Quipiaya míac tonalijmes amo nesiloaya in tonali huan in luceros (silalimes), huan mochi tonali techhuitequiaya in ijyecal chicahuac. Yojque yajmo ticchialoaya nindeno, yajmo tiqijtujque pampa timoquixtililosquiaya pin polehuilisi.

<sup>21</sup> Huan quiapiaya míac tonalijmes amo tilacualoaya. Cuaquinon moquetzac Pablo lajco capa yehuanten, quinmilic:

—Lacames, cataya cuali sinda annechcaquiaya nepa pa Creta quiman annimitzilic pampa yahuiaya caya polehuilisi sinda tiquisalosquiaya nepa. Sinda amo tiquisaloaya, amo tiquinpoluloaya mochi innojen hual tiquinpoluje. <sup>22</sup> Ma yoje, axcan annimitzilía, amo ximomajtican, pampa amo cayas se ca anmoxtin hual polehuis. Jan in barco san yes lapoluli. <sup>23</sup> Nicmati inon pampa axcan layúa hualac ca nehual se ilanahuatini noDios pin cielo. In Dios nehual niunca iyaxca huan noje nictequipanuilía. Huan in lanahuatini nechilic: <sup>24</sup> “Amo ximomajti, Pablo, ticpía pa timoquetzas ilaixpan in hué Cesar, huan xiquita. Dios yahui mijchihuilía in cuali hual tictemachic. Amaqui yahui polehuía ca moxtin yehuanten hual cate ca tehual.” Yojque nechilic in lanahuatini. <sup>25</sup> Pampín, lacames, ma como anmitzcocu anmoyolo, pampa nicneltoca Dios. Nicmati yes quinami nechilic ilanahuatini. <sup>26</sup> Ma yoje, ticpiasi pa tiajsisi pan se lali lajco pin al huejcalan.

Yojque quinmilic Pablo.

<sup>27</sup> Huan se layúa quiman ticataloaya catorce tonalijmes ca in ijyecal techhuicatataya, timoitaloaya pin al huejcalan itoca Adria. Huan quinami pa lajco layúa momachiltijque in tequipanujquimes pin barco pampa tiajsitataloaya pan se lali. <sup>28</sup> Lalamachihujque pa quimatilosquiaya quichi huejcalan cataya in al, huan cataya treintiseis metros. Tiajque oc se nadita, oc sejpá lalamachihujque, cataya huejcalan quinami veintisiete metros. <sup>29</sup> Pampín momajtijque pampa yahuiaya molasa in barco pan capa amo huejcalan capa cataloaya teles (temes). Yojque xitinisquiaya in barco. Pampín quinlasajque pa al nahui teposlimes ejetic pa itepotzcon in barco pa yajmo mohuicasquiaya pa itenco in lali. Momajtiloaya yehuanten, quinequiloaya pa lanesisquiaya. <sup>30</sup> Huan in tequipanujquimes pin barco

quitemuloaya quinami cholulosquiaya quicajcajtataloaya in barco. Quite-muhuloaya in barquito pin al huejcalan. Techililoaya pampa yahuloaya quilasalo teposlimes ej'etic pa ilaixpan in barco pa yojque amo miac mo-huicatihuisquiaya. Yehuanten san lacuajcuamanaloaya, jan quitemuloaya san quinami huil cholulosquiaya pa como moatoctisqui. <sup>31</sup> Cuaquinon Pablo quilic in laicanani huan in guaches, quinmilic:

—Sinda amo mocaualo yehuanten pin barco, amhuanten amo huil anmoquixtis pin polehuilisli.

<sup>32</sup> Cuaquinon quicotonilijque in guaches imecal in barquito huan yojque quimacahuiltijque pa huetzis pa al.

<sup>33</sup> Cuaquín pa cualcan quinchicahualtinemiaya Pablo moxtin pa lacualosquiaya, quinmiliaya:

—Axcan quipia catorce tonalijmes amo anlacuaya. Amo anmocahuaya pa anmomajtis, amo anquicuaya nindeno. <sup>34</sup> Pampín annimitzilía xicnequican xijcuacan nadita, pampa monequi pa ticchihuasi inon pa yojque ticanasi chicahualisli calica timoquixtisi pin polehuilisli. Amaqui yes lacocoltili, amo quipolus jan se itzondi itzontecon se.

<sup>35</sup> Quiman quijtuc inon, canac pan, quisehuic Dios inminlaixpan moxtin, cuaquin quilapanac in pan, pehuac quicuac. <sup>36</sup> Cuaquín mochicahuiltijque moxtin huan yehuanten noje canajque len pa quicalosquiaya. <sup>37</sup> Pin barco timoxtin ticataloaya doscientos setenta y seis (majlaclihuan yepuhualicax-tulihuanse) lacames. <sup>38</sup> Quiman pachihuijque moxtin, quichihuaigque in barco pa como yes etic quinami cataya, quilasajque in trigo pa al huejcalan.

### *Xitini in barco huan moijsima*

<sup>39</sup> Huan quiman lanesic, amo quiximatiloaya in lali hual quitajque. Ma yoje, quitajque capa calaquiaya in al huejcalan je nadita pin lali, cataya se al tipichín ca xalipan pa in atenco. Quilalijque pa cajxiltilosquiaya in barco sinda huil pan in xalipan. <sup>40</sup> Quicotonaje inminmecames in teposlimes ej'etic, quinmacahuiltijque pa huetzilosquiaya pa al huejcalan. Huan quiman quichijtataloaya inon noje quitomaloaya in mecames hual quilpilo in cuahuil calica quimalinalo in barco. Noje cajoquijque in tzot-zomajli telahuac pa ilaixpan in barco pa quipitzasquiaya in iyecal, yojque pehuaya ajsi in barco pa in xalipan. <sup>41</sup> Ma yoje, san laniluaya in barco pan capa monamiquiloaya ome alimes huejué. Nepa amo cataya huejcalan huan ajsic in barco pa inon, nepa mosaluc ilaixpan, mocaahuac, amo huil molinic. Huan ilamili in barco pehuaya xitini pampa in al quihuitequiaya chicahuac. <sup>42</sup> Cuaquinon in guaches quinequiloaya quinmictilo in lacames lailpili pa como cholulosquiaya lanilujtataloaya. <sup>43</sup> Ma yoje, inminlaicanani in guaches amo quinequiaya pa miquisquiaya Pablo huan quintzacuilic in guaches pa como quichihualosquiaya in hual quinequiloaya quichihualo. Quinmilic in laicanani pa pehuilosquiaya molasalo pa al yehuanten hual huil laniluloaya. Yojque molasaloaya pa al pa ajsilosquiaya pan lali. <sup>44</sup> Cuaquín quinmilic pa quintocasqui in oc sequin pan icuahuimes huan ilajcomes in barco huan yojque timoxtin timoquixtijque pin al huejcalan huan tiajsijque pan lali.

## 28

### *Pablo pin lali Malta lajco pin al huejcalan*

<sup>1</sup> Quiman timoquixtijque pin al huejcalan, ticmatijque pampa in lali itocaya Malta. <sup>2</sup> Huan tejchihuiliijque cuali, techicnilijque in lacames chantinijmes nepa, pampa quipitzajque tixuxli hué huan technotzajque pa

timoajxiltilosquiaya timoxtin pampa quichijtataya sehua huan quiajtataya. <sup>3</sup> Huan quinechicuc Pablo sequin cuajtzindis pa quinsajsacas pa in tixuxli. Quiman quinlalic pan in tixuxli, quisac se cuhual pin cuatzindis pampa cataya totonqui, quiquitzquic quicuaajcuac Pablo pa imajma. <sup>4</sup> Huan quiman in chantinjmes quitajque in cuhual pilujtataya pan imajma, pehualoaya moililo:

—In se neli unca se lamictini. Huan mas que moquixtic pa camo polehuisquiaya pin al huejcalan, ma yoje yahui polehui, yojque unca latilanili ca capic cahuilúa.

<sup>5</sup> Ma yoje, quitzeltzeluilic Pablo in cuhual pa quimacahuasquiaya imajma huan huetzic in cuhual pa in tixuxli, huan amo quipanuc Pablo nindeno amo cuali. <sup>6</sup> Yehuanten quichiajque pa quitalosquiaya sinda Pablo posahuasquiaya o sinda jan ajnaxcan huetzisqueiaya mictataya. Huan quiman quichiajque miac, huan amo quipanuc Pablo nindeno, cuaquinon quijtuloaya ca oc se lajtulisli, pehualoaya moililo pampa Pablo yec se dios.

<sup>7</sup> Nepa capa timoutzculoaya, amo huejca cataloaya icuajmilimes inminhué yehuanten pin lali. Yihual motocaya Publio. Yihual technotzac pa ichan huan nepa timocahualoaya ye tonalijmes, tejchihuiliaya cuali. <sup>8</sup> Huan cataya cocoxqui itajtzin Publio, totoniaya huan quipiaya catzahualisli ca esli, lastataya pa ilapexli. Pablo calaquic capa cataya, quilajlanic Dios pa yihual, cuaquin quinlalic imajmajuan ipan, yojque pajtic. <sup>9</sup> Cuaquinon, quiman yehuanten pin lali quimatijque inon, hualaloaya in cocoxjimes huan Pablo quinpajtic. <sup>10</sup> Pampín ca miac lachihualisli technextililoaya quinami quimatiloaya momajtilo tolaixpan, technextililoaya quinami miac technequiloaya. Huan quiman tiquisajque nepa ca barco, techmacajque mochi hual monequiaya pa ticpialosquiaya.

### *Pablo ajsi pa Roma*

<sup>11</sup> Quiman tipanujque nepa ye mesli, tiquisajque nepa ca se barco hual quisac nepa Alejandria capa calaquilo barcos. In barco quinpiaya inminlanextilisli in ome dioses hual motocaloaya Castor huan Pólux. In barco panuaya itonalijmes in secuisli nepa pin lali Malta. <sup>12</sup> Tiquisajque ca in barco nepa Malta huan techhuicatihuiaya pa oc se lali huan yoje tiajsijque pin caltilan pa barcos itoca Siracusa. Nepa timocahuajque ye tonalijmes. <sup>13</sup> Cuaquinon ca in barco tipanujque pa itenco in lali huan tiajsijque pan se caltilan pa barcos itoca Regio, cataya pin lali itoca Italia. Quiman panuc se tonali nepa, pehuac ijyecac pa in sur. Pa oc se tonali tiajque ca in barco pa in caltilan pa barcos itoca Puteoli pin lali Italia. <sup>14</sup> Nepa tiquitaje sequin tocnian laneltocanjmes hual technotzajque pa timocahualosquiaya chicome tonalijmes ca yehuanten. Nepa timocahuajque, cuaquin ticanajque ojli pa Roma. <sup>15</sup> Umpa pin Roma quicaquijque tocnian laneltocanjmes pampa tihualaloaya. Yehuanten quisajque nepa Roma, hualaloaya pa technamiquisqui pan ojli. Sequin hualajque huejca pa quiahuac Roma pa in caltilan iForo Apio, oc sequin hualajque amo yoje huejca pa in caltilan Tres Tabernas. Huan quiman quinmitac Pablo tocnian laneltocanjmes, quisehuic Dios huan mochicahualtic pa iyolo. <sup>16</sup> Quiman tiajsijque pa Roma, inminlaicanani in guaches quintemacac yehuanten hual lajlailpili ca inminlaicanani inminlachianijmes lacames lajlailpili. Ma yoje, quimacahualtic Pablo pa chantisqueiaya ihuan ca se guache pa quilachiasquiaya.

### *Pablo quinnahuatilia ilajtol Jesucristo nepa Roma*

<sup>17</sup> Panuloaya ye tonalijmes quiman tiajsijque huan quinahuatic Pablo pa monechiculosquiaya moxtin inminlacames huejué in judíos. Quiman ajsijque capa Pablo yehuanten, yihual quinmilic:

—Lacames nocnían nehuall amo niquinchiuilic nindeno amo cuali yehuanten tocnían judíos, huan amo nicchiác len hual amo unca ca se lajtulisli ca inminlachihualisli totatzitzían. Ma yoje nepa Jerusalén nechtemacaje lailpili ca in lahuelilitlisli romano. <sup>18</sup>Innojen huelitinijmes romanos lajlaniye inahuac mochi hual nechmotexpahuililoaya tocnían judíos. Quiman amo quitaje nindeno ca in calica nechmotexpahuililoaya hual nechahuiluaya pa nimiquisquiaya, quinequiloaya nechmacahualo. <sup>19</sup>Ma yoje, amo mochahuiloaya pa nechmotexpahuilosquiaya tolaicananijmes judíos. Pampín, nicpiaya pa nimotemacasquiaya ca Cesar in hué. Nicchiác inon mas que amo nicpiaya len calica niquinmotexpahuilisquiaya nocnían judíos. <sup>20</sup>Pampín nilanahuatic pa anhualasquiaya. Nicnequiaya annimitzita huan annimitzlaquetzilia inahuac inon. Annimitzilia pampa nicnemiltia in teposli calica nechilpije pampa nicneltoca in Cristo hual moxtin judíos quichixticate.

Yoje quinmilic Pablo. <sup>21</sup>Huan yehuanten quinanquilijque:

—Tehuanten amo ticanaje amal hual techtilaniye tocnían judíos hual cate pa Jerusalén huan amo ajsic nican se tocní judío pa techmachiltisquiaya huan pa techlaquetzilisquiaya len amo cuali calica mitzmotexpahuililo. <sup>22</sup>Ma yoje, tiqijitulo pampa yesquiaya cuali pa timitzcaquilosquiaya tehual pa titehnextilis in hual ficneltoca. Tiquijtulo in pampa pa mochi cajcapa ticmatilo pampa moxtin laquetzalo amo ca se lajtulisli inahuac Jesús iojli.

<sup>23</sup>Huan yehuanten qilalijque ca Pablo se tonali huan pa in tonali ajsijque pa icalijtic míac innojen judíos. Pablo quinmaxtiaya, quinlaquetziliaya melahuac inahuac ilahuelilitlisli Dios. Motoliniaya pa quinneltocaltilosquiaya in hual Moisés huan Dios ilajtunijmes quijtunijme pa yina quinami Jesús hualasquiaya pan lalticpan. Quinlaquetziliaya Pablo pejtataya pa huajtzinco, huan pa mochi semilhuil pa quiman tiolactic quinlaquetziliaya. <sup>24</sup>Sequin quineltocajque in hual quinmilic Pablo, huan oc sequin amo quineltocajque. <sup>25</sup>Yojque, pampa amo cataloaya ca se lajtulisli innojen judíos se ca oc se, pehualoaya moquetzalo pa quisallosquiaya. Cuaquín Pablo quinmilic oc se lajtol san, quinmilic:

—Neli in Espíritu Santo quijtuaya len niman melahuac quinami catanijme annotajtzitzían. Quijtuaya inon pan ipampa in hual quijcuilic Isaías ilajtuni Dios, quijtuc:

<sup>26</sup>Xía ca innojen ilacames Israel, yojque xiquinmili len quijtúa Dios.

Huan Dios, quil, quijtúa:

Mas que anlactías, ma yoje amo anquimatis len nicnequi niqijtúa.

Mas que anlaxhtías, ma yoje amo anquimatis len anquiztica.

<sup>27</sup>Noje Dios quijtúa:

Quipialo in lacames inminyolo hual amo quinequilo quimatilo,

huan inminacajmes amo huil lacaquilo cuali.

Motzacuililo inmixtolojmes pa como quimatisqui len quinequi quijtúa in hual nicchijtica.

Motzacuililo inminacajmes pa como quicaquisqui len quinequi quijtúa in hual niquinmilijtica.

Motzacuililo inminyolo pa como quimatisqui len nicnequi niqijtúa,

motzacuililo pa camo momalinasqui pa mocuepasqui ca nehual pa yoje niquinpajtisqui niquinquixtilijtica inminlajlaculisli.

<sup>28</sup> Cuaquinon Pablo quinmilic:

—Yojque, xicmatican inon. Dios quintilanilía in lamachilitisli cuali ca yehuanten hual amo judíos, huan yehuanten quineltocasi.

<sup>29</sup> Quiman quinmilic Pablo inon, quisaloaya in judíos molaxilijtataloaya lajtomes míac ca yehuanten.

<sup>30</sup> Huan mocahuaya nepa Pablo pa ome xixihuil, chantiaya pan se cali hual quilaquehuac. <sup>31</sup> Quimacahuiltijque pa quinnahuatilisquiaya moxtin Dios ilahuelilitisli, huan yihual quimaxtiaya mochi hual cataya pa ilajtol in Tata Jesucristo. Amo cataya amaqi hual quitzacuiliaya pa camo quichi-huasquiaya inon.

## **In amal hual in lanahuatini Pablo quinmijcuilulic in laneltocanjmes pin caltilan Roma**

### *Pablo quinmijcuilulía (quinmescribirulía) in laneltocanjmes pa Roma*

<sup>1</sup> Nehual Pablo niunca itequipanujquil Cristo Jesús, niqijitúa, nehual niunca mochi iyaxca. Nechlajtultic quiman nechnotzac pa niyes ilanahuatini. Nejxiluc Dios pa camo nicchías oc se tequipanulisli pa niqinmilis lacames Dios ilamachiltisli cuali.

<sup>2</sup> Yihual quijuc neli in lamachiltisli cuali hual axan unca huan niman pa yina yoje cataya. Lajtuc pan inminpampa ilajtunijmes hual quinmijcuiluje Dios ilajtomes hual techililo ilamachiltisli cuali. Yehuanten inminlajcuilulisli quijcuiluje pampa Dios quinmilic len quijcuilulosquiaya huan unca niman chipahuac, amo unca quinami in hual quijcuilulo lacames.

<sup>3</sup> In lamachiltisli cuali techilía in hual quichíac Dios iXolol. Yihual lacatic imiahuil David hual yec tohué pa yina. Huan mas que Dios iXolol noje unca Dios, ma yoje quilacatiltic se sihual quinami tehuanten tilacatiye, pan inminpampa sihuames. <sup>4</sup> Huan Dios quijuc neli pampa yihual Cristo unca iXolol quipixtica niman míac lahueliltisli. Quipiaya in lahueliltisli niman hué pan ipampa in Espíritu hual quipía mochi cuali huan quipía chipahualisli hual amo huil cajsilo lacames. Huan neli yihual Dios iXolol quinextilía pampa yihual quipía in lahueliltisli niman hué. Quipía in lahueliltisli pampa miqic huan cuaquín yulic oc sejpa pa yajmo miquis, quema, yihual Jesucristo toTata. <sup>5</sup> Huan pan ipampa yihual tehuanten ticpialo in cuali hual Dios tejchihuilía. Huan unca toyaxca pa tiyes ilanahuatinijmes pa yoje tehuanten tiqinpaléhuisi pa quineltocasi lacames pa mochi in lalticpan quinami Cristo quinquixtilía yehuanten inminlajlaculisli. Yoje, lacames quilasojlasi itoca Jesucristo. Huan quimahuisusi yihual ca lamajtilisli yehuanten hual quinnotzac pa yesi icnían iyaxca. <sup>6</sup> Huan amhuanten noje anunca icnían hual quinnotzac.

<sup>7</sup> Pampa inon annimitzjcuilulijtica anmoxtin pin caltilan hué Roma, amhuanten hual Dios anmitzlasojla míac. Yihual anmitznotzac pa anyes ixolomes laxiluli pa camo cayasi ca moxtin in oc sequin pin lalticpan hual amo quineltocalo. Ma Dios toTajtzin huan in Tata Jesucristo anmijchihuilican mochi hual cuali yes pa anquipías mosehuilisli pa anmoyolo.

### *Pablo quinequi quinpaxalulía yehuanten pa Roma*

<sup>8</sup> Ma nipehua noamal nicsejtica noDios pan ipampa Jesucristo. Nicsehuía quiman yes annimitzijnamiquía anmoxtin. Unca pampa quimatilo cuali pa mochi in lalticpan quinami amhuanten anyuli anquinctica anquichía quinami quijitúa Dios ilajtol. <sup>9-10</sup> Amo nimocahua pa annimitzijnamiquis quiman yes niclajlanía Dios. Yihual Dios neli quimati unca melahuac inon hual annimitzilía. Yihual in Dios hual nicmolancuacuetzilía ca mochi noyolo yojque quinami niqinmilía oc sequin ilamachiltisli cuali Jesús, yihual Dios iXolol. Quiman yes niclajlanía, annimitzijnamiquía. Niclajlanía pa cuajnesi axan quisas cuali pa nehual huil nihualas annimitzpxalulis, sinda yes quinami Dios quinequi. Nicchíac míac xixihuil pa huil nihualas. <sup>11</sup> Unca



pampa nicnequi niman míac annimijxiluilis len hual in Espíritu Santo anitzmacas pan nopampa nel. Inon yes len calica yihual anmijchicahualtis míac pa anquineltocas Dios ilajtol pa anmoyolo. <sup>12</sup> Huan amo inon san. Noje nicnequi niqijtúa inon pampa nehual niyesquiaya lachicahualtili noje pan anmopampa, pampa amhuanten huan nehual ticlalilo tolaneltocalisli ca Cristo. Huan pan ipampa tehuanten tolaneltocalisli pa inon hual yihual tejchihuilic, timochicahualtilo. <sup>13</sup> Huan nocnían, nicnequi míac pa neli anquimatis quinami míac tonalijmes niclalic pa nihualas ca amhuanten. Ma yoje, mochi xixihuil cataloaya innojen hual nechpanuje hual amo mocahuaya pa nejtzacuilis. Nicnequiaya nihuala pa niqinmitasquiaya oc sequin pehuasi canasi iojli Cristo. Nicnequiaya pa yulisi quinecticate míac pa quichihuasi quinami quijtúa Dios ilajtol pan ipampa in hual animitzilisquiaya. Yoje panuc quiman niqinpxaxaluiliaya oc sequin, huan nicnequiaya pa panusquiaya yoje ca amhuanten. <sup>14</sup> Dios nechlajtultic pa niqinmilis ilamachilitlisli cuali. Huan pampa inon nicpía pa niqinmilis yehuanten hual lajtulo tolajtol huan yehuanten hual amo lajtulo tolajtol, nicpía pa niqinmilis yehuanten hual quimatilo huan yehuanten hual amo quimatilo. <sup>15</sup> Yoje, nicpía míac lanequilisli pa annimitzilis in lamachilitlisli cuali noje ca amhuanten hual anunca pa Roma.

### *In lamachilitlisli cuali quipía chichahualisli*

<sup>16</sup> Unca pampa amo nipinahua niqinmilía oc sequin in lamachilitlisli cuali, pampa unca pan ipampa inon Dios quitequipanúa ilahuelilitlisli hué pa quinquixtilis lacames inminlajlaculisli, huan pa quinyulitlis quinami yancuic. Inon hual Dios quinequi quinchihuilía neli unca pa in judíos huan cuaquinon noje pa yehuanten hual amo judíos. <sup>17</sup> Pan ipampa in lamachilitlisli cuali, Dios technextilía quinami yihual quinhualica capa yihual lacames huan sihuames pa yesi ixolomes, quijtúa neli pampa yajmo quita len amo cuali ca yehuanten. Quinhualica ca yihual jan pan ipampa quinami quineltoalo ilamachilitlisli cuali, jan quinami unca lajcuiluli pa íamal Dios ilajtol: “Dios quijtúa pampa yajmo quita len amo cuali ca se pan ipampa quinami in se quineltoaca Dios ilajtol. Pampín in se yulis ca Dios iyulililisi hual quimaca.”

### *Dios quinmotexpahuilía moxtin lacames*

<sup>18</sup> Monequi pa Dios quinhualica ca yihual lacames pa yesi ixolomes jan pan ipampa quinami quineltoalo ilamachilitlisli cuali san. Inon unca pampa Dios, nepa capa chanti pin cielo, lanextilía quinami yihual cualani niman míac ca moxtin in lacames hual amo quinequilo quimolancuacuetzililo. Amo quixtoalo Dios huan quichihualo in hual yehuanten quimatilo unca amo cuali. Huan yoje pan ipampa in amo cuali hual quichihualo, motolinilo pa quitzacuasi Dios ilajtol melahuac. Quitzacualo pa como quimatisi lacames quinami Dios quinmita quiman quichihualo amo cuali. Huan pampín, Dios quintojtocas ilaixpan yihual pa yesi lapolehuiltili. <sup>19</sup> Quema, Dios lanextilía quinami neli yahui quintojtoca ilaixpan yihual in lacames pa yesi lacocoltili. Unca pampa huil quimatilo quinami unca Dios, pampa yihual quinhueliltic pa yehuanten quimatilosquiaya pa inminyolo. Ma yoje, amo quinequilo quimatilo. <sup>20</sup> Quipía niman míac xixihuimes quiman Dios quinchíac in cielo huan in laticpan. Yoje, lacames quimatije quinami Dios unca, mas que amo quitaje. Huil quimatije pampa ilahuelilitlisli chichahuac huan niman hué amo quiman mocahuaya pa cayas. Amo quipiaya pehualisli huan amo quiman lami. Quema, yihual Dios quipía

len lajmatilisli hual amo quiman huil ticajsilo. Mochi inon inahuac Dios huil quimati cuali se pan ipampa mochi hual Dios quichíac. Pampa inon, yehuanten hual quilalilo pa camo quineltoasi Dios amo quipialo quinami huil mopujpuhuililo pa ilaixpan Dios in amo cuali hual quichihualo. <sup>21</sup> Unca pampa quimatije pampa Dios unca, huan ma yoje amo quilasojlaje. Amo quijnamiquije yihual quinami monequi pa laijnamiquilosquiaya. Amo quisehuije pa in hual yihual quinmaca. Huan amo quiman mochihuac pa yultiasi quijnamictaloaya mochi calica huil moijlaculoaya. Quicuilmatiloaya pan Dios iojli, amo quinequiloaya quimatilo nindeno quinami unca Dios, mochihualoaya laticumac pa inminyolo. <sup>22</sup> Quijtuloaya pampa yehuanten quimatiloaya, huan ma yoje neli mochihualoaya lacames hual amo quimatiloaya nadita hual quinnextilia quinami unca Dios. <sup>23</sup> Yajmo quinequiloaya quimolancuacuetzililo Dios hual quipia mochi lahueliltilisli huan unca mochi cuali, yihual amo quiman miqui. Ma yoje, yehuanten pehualoaya quinmolancuacuetzililo monos lachihuali pa nesisi quinami lacames hual miquilo. Huan quinmolancuacuetzililoaya monos lachihuali chicuenta tutomes huan yulijquimes ca nahui inmicxian huan yulijquimes hual mohuilanalo pan lali.

<sup>24</sup> Yoje, Dios quincajcahuac pa quichijtiahuilosquiaya in amo cuali hual quinequiloaya quichihualo pa inminyolo, niquiltúa, Dios quincajcahuac pa quichihualosquiaya len Dios quita quinami niman catzahuac. Inmincueros quintequipanultiloaya pa quichihualosquiaya inon hual unca niman amo cuali. <sup>25</sup> Yehuanten yeje lacames hual mopatililoaya Dios ilamaxtilisli hual melahuac, mopatililoaya pa in islatatilisli, huan quinmolancuacuetzililoaya innojen hual Dios quichíac huan yajmo quimolancuacuetzililoaya Dios ihuán hual quinchíac mochi. Yihual san monosta pa moxtin amo quiman mochhuasi pa quimolancuacuetzilisi mojmosta, yoje ma ye.

<sup>26</sup> Yojque, pampa amo quinequiloaya quineltoalo ilajtol melahuac, Dios quincajcahuac pa yulisi quichijtcate len lapinahualtia. Cataya pampa inminsihuahuan mopatililoaya quinami Dios quilalic pa lacames huan sihuames monilusi huan in sihuames quichihualoaya yoje hual amo unca quinami Dios quilalic. <sup>27</sup> Huan jan yoje, in lacames noje mochihualoaya pa monilulosquiaya ca in sihuames quinami Dios quilalic pa quichihuasi, huan chichinahuililoaya laijtic yehuanten, quinecticate quichihualo ca oc sequin lacames len niman lapinahualtia. Inon quichihualoaya huan yoje canaloaya laijtic inmincueros in lacocotilisli hual Dios quijtuc da quipialoaya pa panulosquiaya. Yojque, moijlaculoaya quiman mochihualoaya pa quichihuasi quinami Dios quilalic.

<sup>28</sup> Huan jan yoje, quinami amo quitaje cuali quipiasi laijtic inminyolo Dios ilajmatilisli melahuac, cuaquin Dios quincajcahuac quipixtataloaya laijnamiquilisli hual quinmijlaculo, huan inminlajnamiquilisli yehuanten quinchihualtiaya len niman amo cuali. <sup>29</sup> Jan yoje quijnamiquiloaya miac pa inminyolo hual niman amo cuali pa quichihualosquiaya. Quinequiloaya quinchihuililo amo cuali oc sequin, quinequiloaya quipialo miac hual amo monequi pa quipiasi. Quema, quinequiloaya quipialo inon hual inminyaxca oc sequin. Yuliloaya quinectataloaya pa quinpanusquiaya len amo cuali oc sequin, moxiculoaya quinectataloaya in hual oc sequin quipialoaya, quixtocaloaya quinmictilo lacames, yehuanten mocualantiloaya mojmosta lacuajcuamantinemiloaya, mojmosta quijnamiquiloaya amo cuali inahuac mochi in hual quichihualoaya oc sequin, latenehualoaya.

<sup>30</sup> Quinhuejuecaltiloaya oc sequin quiman amo cataloaya ca yehuanten,

quicocoliloaya Dios. Huan quinami quinchihuילוaya huan quinlaquetzililoaya oc sequin, yojque lanextiliaya pampa amo quimatiloaya momajtilo. Inon lanextiliaya quinami yehuanten quijtuloaya pa inminyolo pampa ca in oc sequin amo cataya inminyaxca pa quipialosquiaya in hual inminyaxca. Moijnamiquiloaya pa inminyolo pampa san yehuanten cataloaya in niman huejueyenten. Quijnamiquiloaya míc pa inminyolo quinami huil quichihualosquiaya len amo cuali. Amo quineltoaloaya inmintajtzitzián.  
<sup>31</sup> Amo quimatiloaya jan nadita quinami unca Dios huan ilamaxtilisli, amo quimatiloaya len unca cuali. Amaqui huil quineltoaya nindeno hual yehuanten quijtuloaya, amo quimatiloaya lalasojlalo. Amo quimatiloaya quinami yulilosquiaya ca mosehuilisli pa mocahualosquiaya jan sejpa ca oc sequin, amo quimatiloaya laicnililo. <sup>32</sup> Huan mas que quimatilo cuali pampa Dios ilajtol quijtúa monequi pa miquisi lacames hual yulilo quichijtcate yoje, jan yoje yehuanten yultialo quichijtcate yoje. Huan amo inon san. Quipialo paquilisli ca oc sequin hual yultialo quichijtcate yoje.

## 2

### *Dios pan ipampa in hual melahuac quijtúa yehuanten quipiasi pa miquisi*

<sup>1</sup> Yoje, amo cayas calica timopujpuhuas tehual hual tiquijtúa oc se quipías pa miquis pampa yuli quichijtica laijlaculisli. Amo monotza aquí tyes hual tiquijtúa inon. Unca pampa sinda tiquijtúa oc se quipía pa miquis, cuaquín tiquijtúa noje tehual ticpía pa timiquis, pampa tiquinchía innojen hual amo cuali jan quinami in oc sequin quichihualo amo cuali. Huan yoje, Dios mitzmotexpahuilía jan quinami in oc sequin, mas que tehual timolalía inminlaixpan oc sequin quinami unca moyaxca pa tiquijtus pampa quipía pa miquis. <sup>2</sup> Axan, timoxtin ticmatilo pampa Dios quijtúa melahuac sinda quijtúa quipialo pa miquisi yehuanten hual quinchihualo len quinami innojen hual amo cuali. <sup>3</sup> Huan tehual, aquí tyes, tiquijtus oc sequin hual quinchihualo innojen amo cuajcuali quipiasi pa polehuisi. Huan ¿tiquijtúa pampa huil ticholus tehual ilaixpan Dios pa camo mitzilis tel ticpía pa timiquis? No, pampa tehual noje tiquinchía innojen. <sup>4</sup> ¿Cuajnesi amo ticmati tilajnamiquía melahuac quinami unca Dios? Yihual quixtoca quinchihuilía niman cuali lacames. Huan pampa inon, huejcahua pa quincocoltis pampa quichihualo in amo cuali. ¿Amo ticmati Dios unca niman cuali ca tehual pa yoje ticayas laicanali pa ticpalas moyolo pa yajmo ticchijτίας in amo cuali? <sup>5</sup> Ma yoje, amo ticnequi ticpala moyolo pa timocahuas pa ticchijτίας in hual amo cuali. Pampín ticmatis quinami Dios quinequiaya mitzlaicana pa ticpalas moyolo. Ticmatis pan in tonali quiman Dios quinmaca lacocoltisli yehuanten hual ejelehuis. Huan quijtus pampa quipiasi pa polehuisi, quijtus inon cuali huan melahuac, amo moixpolus. <sup>6</sup> Quichihuilis cuali o amo cuali mochi sejse, quichihuilis yoje quinami mochi sejse yuliaya. <sup>7</sup> Dios quinchihuilis cuali yehuanten hual quimatilo quitemulo quinami yulisli quichijtcate len cuali. Huan yehuanten canaló Dios iyulilisli hual amo quiman lamis, pampa quitemulo pa Dios lajtus cuali inahuac in hual quichihualo yehuanten. Quitemulo pa Dios quinmilis yehuanten lajtomés huejué huan cuajcuali.

Huan quitemulo pa cayasi lamacahuiliti pa yultiasi ca Dios pa camo quiman moxilusi nepa capa yihual. <sup>8</sup> Ma yoje, cate yehuanten hual amo mocahualo pa molalisi quinami icocolinjmes Dios pa camo quineltoasi. Amo quimatilo quineltoalo Dios ilamaxtilisli melahuac, niman míc quixtoalo quichihualo in hual amo cuali. Pampín ca yehuanten mocahua Dios

cualantica mojmosta pa quiman ajsis in tonali hual quijtus yehuanten yesi lacocoltili. <sup>9</sup> Mochi lalac huan sihual hual yulilo quichijtcate in amo cuali, yehuanten quinpanusi míac lacocoltilisli, amo huil quitasi quinami moquixtilisi pa camo quinpanus. Inon neli cayas pa in judíos huan cuaquinon noje pa yehuanten hual amo judíos. <sup>10</sup> Huan Dios laquetzas hué huan cuali pa moxtin hual yulilo quichijtcate len cuali. Quema, huan cayas mochi hual unca cuali pa yehuanten. Inon Dios neli pehuas quinchihuilis in judíos huan cuaquinon noje yehuanten hual amo judíos. <sup>11</sup> Unca pampa Dios quichía mochi melahuac, quijtutica quipiasi pa yesi lacocoltili jan pampa yulilo quichijtcate in hual Dios quita elehuis. <sup>12</sup> Annimitzilía leca Dios quijtua quipiasi pa yesi lacocoltili lacames: Cataloaya lacames hual amo quiman quimatije Dios ilajtol hual quinmacac in judíos pa yina, in lajtol hual lacames quipialo pa quineltocasi. Ma yoje, yehuanten yuliloaya quichijtataloaya amo cuali. Pampín, Dios quijtus quipiasi pa polehuisi. Inon amo quijtus pampa quijtua yoje ilajtol hual quimacac in judíos, pampa yehuanten amo quimatiloaya in lajtol. Noje cataloaya yehuanten hual quimatiloaya in lajtol hual Dios quinmacac in judíos, huan ma yoje yuliloaya quichijtataloaya in hual amo unca quinami quijtua in lajtol. Yehuanten, quema, Dios quijtus quipiasi pa miquisi yoje quinami quijtua in lajtol. <sup>13</sup> Inon unca pampa Dios amo quinmita lacames huan sihuames quinami amo quipixtcate laijlaculisli jan pampa yehuanten quicaquije len quijtua in lajtol. Cate yehuanten hual quema yulilo quichijtcate len quijtua in lajtol, yehuanten Dios quinmita quinami amo quipixtcate laijlaculisli. <sup>14</sup> Unca yoje, pampa sinda lacames hual amo judíos huan amo quipía in lajtol, huan ma yoje yulilo quichijtcate len quijtua in lajtol, yoje lanextililo quinami quimatilo in lajtol pan ipampa inminlajmatilisli calica lacatije. Huan inon san unca inminlajtol hual quinnextilía quinami monequi pa yulis se. <sup>15</sup> Yoje, lacames quinami yehuanten lanextililo quinami quipialo ilajtol Dios lajtic inminyolo, pampa quipialo lajmatilisli pa quichihuasi in hual quijtua in lajtol. Unca quinami Dios ilajtol cataya lajcululi pa inminyolo. Moxtin quipialo pa inminyolo inminlajmatilisli calica quimatilo len unca cuali huan len amo unca cuali. Pampín quimatisi motexpahuilisi huan quipujpuhuasi inminlajlaculisli pan tonali quiman Dios quijtus sinda quipiasi pa yesi lacocoltili o amo quipiasi pa yesi lacocoltili. <sup>16</sup> Huan inon cayas pan tonali quiman yehuanten moitilisi iyampa Dios. Pan in tonali yihual quijtus quipiasi pa yesi lacocoltili. Yesi lacocoltili pampa quichihuaje mochi hual quinequiloaya quinlatililo Dios huan lacames, quema, mochi hual quichihuaje. Dios quijtus inon pan ipampa Cristo Jesús, huan quimatisi yehuanten pampa yihual Dios quijtua melahualisli sinda quijtus quipiasi pa yesi lacocoltili o amo lacocoltili. Yoje quijtua in lamachiltisli cuali hual nehual niclamachiltía.

*Nican Pablo quijcuilúa quinami in judíos quitalo Dios ilajtol hual quinmilic pan ipampa Moisés*

<sup>17</sup> Tehual hual tiquijtua tiunca judío, huan ticnectica pa moxtin quimatisi inon, ticlalía mochi molaneltoalisli pan Dios ilajtol. Inon mitztlanic pan ipampa Moisés pa yoje timoquixtis pin ipolehuilisi molaijlaculisli. Huan tilajtua hué monahuac tehual pampa ticmolancuacuetzilía Dios hual amo quimolancuacuetzililo yehuanten hual amo judíos. <sup>18</sup> Huan ticmati in hual Dios quinequi. Noje ticmati tilatemúa pa ticmatis calía ca innojen hual tiquinchá cate niman cuali. Huan ticmati tilatemúa pa ticmatis calía ca innojen hual quinchihualo oc sequin amo cate yoje cuali. Inon ticmati

pampa tiunca lamaxtili cuali ca in hual unca Moisés ilajtol. <sup>19</sup> Yoje, tiquijtúa pa moyolo pampa tehual huil tiquinmaxtía yehuanten hual amo quimatilo in hual quijtúa Dios. Tiquijtúa pampa huil tiquinmaxtía mochi ilamaxtilisli yihual. Yoje timoitas quinami lahuilisli pa yehuanten hual cate laticumac pa inminyolo. <sup>20</sup> Quema, timoita quinami lamaxtini hual huil quinmelahua yehuanten hual amo quinequilo quimatilo len unca cuali o amo cuali, timoita quinami lamaxtini pa lacames hual amo quimatilo. Ticmati pampa ticpía mochi lajmatilisli hual melahuac pan ipampa in lajtol. <sup>21</sup> Yoje, pampa mochi inon unca melahuac, timoitas ca lahueliltilisli pa tiquinnexilis oc sequin inon hual quinequi quijtúa Dios ilajtol. Cuaquinon, ¿leca amo timonextilía pa ticchías tehual nuso len quijtúa in lajtol? Tiquinmilía oc sequin quinami in lajtol quijtúa pa camo laixtequisi. Huan tehual, ¿tilaixtequía? <sup>22</sup> Tehual tiquinmilía oc sequin pa camo canasi isihua oc se. Huan tehual, ¿leca ticana isihua oc se? Huan tehual tiquincocolía monos hual lacames quinmolancuacuetzililo. Axcan tehual, ¿leca tiquinmixtequilia monos pa inmintiopajmes yehuanten hual amo quineltocalo Dios? Amo quiman timoitasquiaya ticmolancuacuetzilijtica se mono. Ma yoje, ¿leca tiquinchía inon huan inon hual lanextilía quinami ticxijxicúa Dios? <sup>23</sup> Tehual tilaquetza ca lamajtilisli len quinequi quijtúa in lajtol hual Dios quilib Moisés, jan pampa unca lajtol san. Ma yoje, pampa amo ticchía quinami quijtúa in lajtol, yojque tiquihuejuecaltía Dios. <sup>24</sup> Amhuanten in judíos amo anquineltoca Dios ilajtol, huan yoje unca lajcululi pa iamal ilajtol Dios: “Yehuanten hual amo judíos quihuejuecaltilo itoca Dios pampa amhuanten amo anquineltoca.”

<sup>25</sup> Sinda se unca lalacal judío, yihual quipía lacotonali icuilaxli se nadita, inon se lanextilisli pa lanextilis quinami yihual se ca ilacames Dios. Ma yoje, in lanextilisli jan monotza san sinda yuli quichijtica quinami quijtúa ilajtol Dios. Huan sinda yuli amo quichijtica len quijtúa in lajtol, yoje mochía quinami se hual amo quipía in lanextilisli pan icuerpo. Huan yihual noje yajmo quinpía innojen hual inminyaxca in judíos. <sup>26</sup> Yoje, sinda se amo quipía in lanextilisli pan icuerpo, huan ma yoje yuli quichijtica quinami quijtúa Dios ilajtol, cuaquinon Dios quita quinami se hual quema, quipía ilanextilisli pan icuerpo huan quita quinami se ca ilacames. <sup>27</sup> Huan aqui yes hual yuli quichijtica in hual quijtúa in lajtol, yihual yoje quimotexpahuilía aqui yes icni judío hual yuli amo quichijtica in hual quijtúa in lajtol. Quema, mas que quipía in lanextilisli pan icuerpo huan quimati in lajtol quinami in lajcululi, ma yoje Dios quijtus pampa quipías pa miquis. <sup>28</sup> Huan inon unca pampa se lalacal o sidual amo unca se ca Dios ixolomes sinda san unca imiahuil se ilacal Dios. Huan noje amo unca se ca Dios ilacames je lalacal hual jan quipía in lanextilisli pan icuerpo san. <sup>29</sup> San yihual unca se ixolol Dios sinda quipía in lanextilisli lalatili laijtic icuerpo, unca pan iyolo. Yoje moita pampa neli yihual se ca Dios ilacames. Cana in lanextilisli pan ipampa quinami Dios quichihuilía pa iyolo, amo cana pan ipampa quinami quichía len quijtúa in lajtol. Huan sinda se quipía in lanextilisli pa iyolo, cuaquín unca pa yihual Dios san pa quitas cuali in se. Amo monotza nindeno sinda lacames quitasi cuali o amo cuali, pampa lacames amo quimatilo quinami unca iyolo.

### 3

<sup>1</sup> Cuaquinon, ¿len quipía se judío hual monotza? ¿Len monotza sinda se judío quipía in lanextilisli pa icuerpo? <sup>2</sup> Ma niquijtu pampa in judío quipía

míac hual Dios quimacac hual yihual amo quinmacac yehuanten hual amo judíos. Ma nipehua annimitzili quinami Dios quilalic pa yehuanten in judíos quipialosquiaya in tequipanulisli pa quisemanalosquiaya ilajtol ca moxtin pin lalticpan. <sup>3</sup> Axan ¿len monotza sinda sequin amo quineltoaloaya len Dios quinmilic? Pampa amo quichihuae yeje, cuaquín ¿quinequi quijtúa inon pampa Dios amo yahui lami quichía in hual neli quijtúa? <sup>4</sup> ¡Ma como quiman quijtu inon amaqui! Huil ticmatilo neli pampa Dios amo quiman mocahua pa lajtus melahuac, mas que cuajnesi moxtin lacames islacatilo. Unca quinami moijcuilúa pa iamal ilajtol Dios:

Tehual, Dios, yeje ticchiac pa lacames quijtusi pampa tehual molajtomes cate mejmelahuac huan yeje tiquinsulahuas lacames quiman quijtulo amo tiunca melahuac.

<sup>5</sup> Tehuanten tilacames hual ticate laijlaculi pa toyolo, huan pan ipampa inon tilanextililo quinami Dios amo quipía laijlaculisli pa iyolo nindeno. Cuaquinon ¿len tiquiijtusi? ¿Tiquiijtusi quinami sequin quijtulo pampa Dios amo quichijtica in hual cuali huan melahuac sinda quijtúa ticpiasi pa timiquisi pampa ticate laijlaculi? Oc seppa niquiijtúa ¡ma como quiman quijtu inon amaqui! <sup>6</sup> Pampa sinda Dios amo cataya cuali huan melahuac, cuaquín amo cataya iyaxca pa quijtusquiaya pampa quipiasi pa miquisi yehuanten pin lalticpan.

<sup>7</sup> Cuajnesi se quinequis quijtus inon, quijtus: “Dios imelahualisli mochía niman hué pampa nehual nislacati, huan pampín lacames quijtulo lajtomes niman hué pa yihual.” Axan, sinda cuajnesi unca yeje, cuaquín ¿leca Dios quijtutías pampa nicpía pa nimiquis nehual pampa niunca lacal laijlaculi pa noyolo? <sup>8</sup> Huan ¿leca como tiquiijtulo: “Ma ticchihuacan len amo cuali pa yeje in hual cuali panus?” Yojque sequin quijtulo pampa tehuanten tiquiijtulo pa toyolo len quinami inon. Huan neli cate sequin hual techuejuecaltilo yojque. Dios quichías quinami quimahuilúa quiman quintilanis lacames quinami yehuanten ca capic amo quiman mocuepasi capa yihual.

### *Timoxtin ticate laijlaculi*

<sup>9</sup> Axcan, ¿len, cuaquín? Tehuanten in judíos, ¿yahui techilía Dios pampa tehuanten tilacames niman cuali huan yehuanten hual amo judíos amo cuali? No, amo ticate cuali huan yehuanten amo cuali. Pampín Dios quijtus tehuanten in judíos ticpiasi pa timoxilusi pa yajmo ticayasi ca yihual. Annimitzilic pampa in judíos cate laijlaculi jan quinami yehuanten hual amo judíos. Moxtin quineltoalo len quinchihualtía inminyolo laijlaculi. <sup>10</sup> Jan yeje unca lajcuiluli pa iamal ilajtol Dios, quijtúa:

Amo unca se hual yuli quinectica quichía quinami quijtúa Dios ilajtol pa yeje yes cuali huan melahuac, amo unca jan se san.

<sup>11</sup> Amo unca san se hual quimati len Dios quinequi quijtúa, amo unca se hual quinequi quimati len Dios quinequi pa quichías.

<sup>12</sup> Moxtin moxilujque pa como quitocasi Dios iojli, mochihuajque lacames hual moijlacujque.

Amo unca se hual yuli quichijtica len cuali, amo unca jan se san.

<sup>13</sup> Pa inminquixlan quisalo lajtomes hual quinami potunilo, quinami in potunilisli hual quisa pa se coyunquil lapujtica capa quilalijque se mijquil.

Ca inminejnepimes lajtulo pa lacuajcuamanasqui.

Unca quinami quipialo inminpajli cuhuames laijtic inmincamac.

- 14 Inmincamac quijtúa lajtomes hual lanextilía quinami quincocolilo oc sequin.
- 15 Quinequilo míac pa quinmictisqui oc sequin.
- 16 Pan ipampa quinami yulilo, quinchihualtilo oc sequin pa panusqui míac lacocoltilisli pa yoje yajmo huil yulisqui ca paquilisli.
- 17 Amo quiman quimatijque quinequijque yulijque ca mosehuilisli pa inminyolo.
- 18 Amo quimatilo momajtilo ilaixpan Dios, amo quiman quijnamiquilo inon.
- 19 Axan, ticmatilo pampa len yes quijtúa Dios ilajtol, yoje quinmilitica yehuanten hual yulilo capa in lajtol huelitia, pa yoje amo cayas se hual quilapus icamac pa monapatis sinda Dios quilía unca laijlaculi. Quema, yoje moxtin yehuanten pin lalticpan quipiasi pa motemacasi lacames quipixticate laijlaculisli. Yoje moxtin pin lalticpan mochihuasi lacames hual quipiasi pa miquisi pampa Dios yahui quijtúa yehuanten quipialo pa moxilusli pa yajmo cayasi ca yihual. In unca miqulisli. <sup>20</sup> Miquisi pampa mas que se quichía len yes in lajtol quijtúa, ma yoje Dios amo quiman quijtus yihual amo unca laijlaculi pampa inon. Unca yoje pampa se lacal quimati yihual unca laijlaculi pan ipampa in hual quijtúa in lajtol.

*Pan ipampa tolanellocalisli, timoquixtisi pin polehuilisli ca capic techuica tolaijlaculisli*

<sup>21</sup> Ma yoje, axan Dios technextilic quinami tiajsisi tiyesi lacames amo ticpixticate laijlaculisli ilaixpan yihual. Huan inon amo quipía nindeno pa quitas ca in lajtol hual Dios quinmilic in judíos pan ipampa Moisés. Ma yoje, unca pa Dios ilajtol capa timomaxtilo quinami se lacal mochía pa Dios quitas amo quipixtica laijlaculisli. Ticmatilo inon pan ipampa in hual quijtuje ilajtunijmes, quema, huan Moisés noje. <sup>22</sup> Quema, tiajsilo tiyeloye ilaixpan Dios pan ipampa quinami ticneltoalo Jesucristo. Unca pa moxtin hual quineltoalo Jesucristo, yehuanten ajsisi yesi yoje ilaixpan Dios. Inon Dios quichihuilia se jan quinami quichihuilia oc se. <sup>23</sup> Jan unca se ojli pa canasi moxtin in lacames, pampa moxtin quichihuaje laijlaculisli huan yoje amo ajsilo quipialo in cuali hual unca iyaxca Dios pa yoje Dios quinmitas quinami ixolomes. <sup>24</sup> Huan yehuanten ajsisi yesi lacames hual Dios quinmita cuali pampa Dios quijtúa neli pampa yajmo quipialo laijlaculisli. Quinchihuilia yehuanten yoje pan ipampa quinami Dios quinequi quinchihuilia cuali lacames. Huan amo quipialo pa quilaxlahuisi. Quema, pan ipampa quinami quineltoalo Cristo Jesús, yoje cate lamacahuali pa como quiman moxilusli ilaixpan Dios. <sup>25</sup> Dios quilalic Cristo pa yes se huendi lamictili, pa yoje moxtin quitalosquiaya quinami quilalic Cristo pa yes yihual hual quinxtilisquiaya inminlaijlaculisli yehuanten. Quinchihuiliaya pan ipampa Cristo iesli hual toyahuic quiman miquic. Inon neli quinequi lanextilía quinami Dios amo huil quimacahuilia pa lacames inminlaijlaculisli cayas quinami len hual amo monotza nindeno. Huan axan, yajmo yahui quijnamiquí lacames inminlaijlaculisli hual quichihualoaya quiman Cristo ayamo miquic. <sup>26</sup> Inon unca pampa Dios quilalic pa quinmopepenialtilis lacames inminlaijlaculisli hual quinchihuanijme pa yina huan hual axan in tonali quinchijihualalo. Axan pa innojen tonalijmes Dios noje technextilía neli quinami quichijtia inon hual unca jan yoje pa se quinami pa oc se. Huan axan momati quinami yihual huil quijtúa neli pampa amo quita laijlaculisli ca se pan ipampa quinami quineltoala Jesucristo.



<sup>27</sup> Axan, ¿quinami huil lajtúa hué se lalac ilaixpan Dios inahuac in cuali hual quichíac? Amo huil, pampa amo ticpialo nindeno hual Dios quita cuali, pampa tilacames laijlaculi. Sinda Dios quiqtuaya pampa yihual techita amo laijlaculi pan inminpampa lejlen cuali tiqinchiualo, cuaquinon yoje ticpialoaya len calica tilajtulosquiaya hué inahuac in hual ticchihuaje. Pampín, Dios amo techilis pampa amo ticate laijlaculi ilaixpan yihual pan ipampa len yes ticchihualo. Ma yoje, sinda ticneltocalo ca mochi toyolo Cristo Jesús, cuaquinon Dios quiqtúa neli pampa amo ticate laijlaculi. <sup>28</sup> Yoje, ticmatilo axan pampa Dios quiqtúa se amo unca laijlaculi sinda quineltoca in Tata Jesucristo. Dios amo quiqtúa pampa amo unca laijlaculi se pan ipampa quinami quichía len quiqtúa ilajtol hual yihual quilic Moisés. <sup>29</sup> Sinda cataya yoje, cuaquín Dios cataya inminDios in judíos san. Huan ¿amo yihual inminDios yehuanten hual amo judíos? Quema, yihual noje inminDios yehuanten hual amo judíos. <sup>30</sup> Unca jan se Dios huan yihual quiqtúa pampa se judío hual quipía in lanextilisli pa icuerpo yajmo unca laijlaculi pampa quineltoca toTata. Huan pa se hual amo judío hual amo quipía in lanextilisli pa icuerpo, Dios quiqtúa pampa amo laijlaculi jan yoje pampa quineltoca toTata Jesucristo. <sup>31</sup> Yoje, cuajnesi sequin quiqtulo pampa yoje tiqiqtulo ilajtol Moisés amo monotza nindeno. ¡Ma camo quiman quiqtu inon amaqui! Neli amo tiqiqtulo yoje. Quema, tiqiqtulo pampa unca melahuac in hual quiqtúa in lajtol. Momati pan ipampa ilajtol pampa amo huil tiajsilo tiyelo lacames hual Dios quinmíta amo quipixticate laijlaculisli.

## 4

### *lanextilisli Abraham hual quineltocani pa yina*

<sup>1</sup> Catani Abraham hual techpehualtic tehuanten in judíos. ¿Len tiqiqtusi, cuaquín, inahuac quinami yihual yulini? <sup>2</sup> Tiquiqtusi sinda yihual yulini quichijtataya len quiqtúa Dios ilajtol pa mochi iyulilisli huan pampín Dios quiqtuaya pampa amo quitaya laijlaculisli ca Abraham, cuaquín quiptiaya Abraham len calica huil lajtusquiaya hué inahuac quinami yulini. Ma yoje, amo quiptiaya quinami lajtusquiaya hué ilaixpan Dios ipampa quinami yulini. <sup>3</sup> Pa ticmatisi inon, ma tiqitacan len quiqtúa Dios ilajtol lajcuiluli. Quiqtúa, quil: “Abraham quineltocac in hual Dios quilic, huan pampín Dios quiqtuc Abraham yajmo quiptiaya laijlaculisli”, quil. Huan amo quiqtuc yoje inahuac len hual quichíac Abraham. <sup>4</sup> Sinda se tequipanúa, yoje lacames amo quiqtulo unca se lachihualisli cuali pa yihual ilaxlahuilisli, quinami len hual quimacalo mas que amo quihuiquililo. Quiqtulo ilaxlahuilisli unca hual quihuiquililo. <sup>5</sup> Huan amo yoje inon hual Dios quimaca. Amo quipía se inon hual Dios quimaca pampa tequipanúa. Unca pa se hual amo tequipanúa pa quiptias in cuali hual san huil tejchihuilía Dios, unca pa se hual san quilalía ilaneltocalisli pan Dios. Huan unca yihual Dios hual quiqtúa pampa yajmo quiptía laijlaculisli yihual hual quiptiani laijlaculisli. Inon Dios quinextía pan ipampa inon hual quimaca, quita quinami amo quipixtica laijlaculisli in se hual quineltoca yihual. <sup>6</sup> Yoje David noje lajtuni quinami quiptía mías paquilisli se hual Dios quiqtúa pampa yajmo quiptía nindeno hual Dios quimotexpahuilis pampa inon. Huan in se amo quiptía pa tequipanus pa yoje quiqtus Dios pampa yihual yajmo quiptía laijlaculisli. <sup>7</sup> Quema, inon David quiqtuc: Quiptialo niman mías paquilisli yehuanten hual Dios quinpujpuhuac inmin-laijlaculisli.



Quema, quipialo paquilisli yehuanten hual Dios yajmo quinmita quinami lacames quipixticate inminlajlaculisli.

<sup>8</sup> Huan quipía niman míac paquilisli in se hual in Tata amo quiman quijnamiquis ilajlaculisli.

<sup>9</sup> Axan, cuaquín, ¿len tiquijtusi inahuac in lachihualisli cuali hual quinchihuilic Dios? ¿Unca jan pa yehuanten in judíos hual quipialo inmincuilaxli lacotonali pa yes inminlanextilisli ilacames Dios? Ó, ¿unca pa yehuanten nojen hual amo quipialo in lacotonalisli, yehuanten hual amo judíos? No, jan unca pa yehuanten san hual quilalilo inminlaneltocalisli pan Jesucristo, pampa annimitzilic len quinextilia Dios ilajtol lajcuiluli. Quijtúa: “Abraham quineltocac in hual Dios quilic, huan pampín Dios quijtuc pampa Abraham yec se hual amo quipía laijlaculisli.” <sup>10</sup> Axcan, ¿quiman quijtuc Dios pampa amo quipiaya laijlaculisli Abraham? ¿Cataya quiman quipiác Abraham icuilaxli lacotonali, o quiman ayamo quipiác? Cataya quiman ayamo quipiác Abraham lacotonali icuilaxli. <sup>11</sup> Huan Dios quilic Abraham pa mochihuilisquiaya in lacotonalisli pan icuilaxli pa yesquiaya quinami lanextilisli hual neli lanextilisquiaya quinami Abraham quilalic mochi ilaneltocalisli ca in hual Dios quilic. Huan pampa quialalic ilaneltocalisli ca in hual Dios quilic, cuaquinon Dios quijtuc pampa Abraham yajmo quipiaya laijlaculisli. Huan yoje Abraham mochíac inminlaicanani moxtin hual quineltocalo Dios ilajtol yancuic huan ma yoje amo quipialo lacotonali inmincuilaxli. Huan yoje quinami ca Abraham, Dios quijtúa pampa yehuanten nojen amo quipialo laijlaculisli. <sup>12</sup> Abraham noje yec se hual quipiaya in lacotonalisli, huan jan yoje yihual inminlaicanani moxtin, judíos huan amo judíos, hual quineltocalo jan ilajtol Dios san. Unca pampa mochíac inminlaicanani Abraham quiman ayamo quipiaya in lacotonalisli pan icuerpo. Yoje, quinami tictocalo in ojli hual canac Abraham, yihual quinami totajtzin pampa ticneltocalo Dios ilajtol quinami yihual Abraham quineltocani Dios ilajtol.

*In unca hual Dios quilic pampa quinchihuilisquiaya pan ipampa quinami quilalilo inminlaneltocalisli*

<sup>13</sup> Dios techilic neli pampa ticanasi in lalticpan pa tolaxilulisli hual to-tajtzin Dios techmacas. Ma yoje, ticmatilo pampa amo unca pan ipampa quinami Abraham huan tehuanten ticchihualo in hual quijtúa Dios ilajtol hual Moisés quijcuiluc. Dios techilía neli pampa ticanasi in laxilulisli pampa ticneltocalo da Dios quichías quinami quijtúa. Huan pampín Dios quijtúa neli pampa tehuanten yajmo ticpialo laijlaculisli. <sup>14</sup> Huan sinda in tolaxilulisli hual Dios quimaca cataya pa yehuanten hual quichihualo len quijtúa in lajtol hual Dios quilic Moisés pa quijcuiluc, cuaquinon amo monotzaya sinda quineltocaloaya Dios ilajtol hual technextilia in hual tejchihuilic Jesucristo. Huan amo inon san. Noje quijtúa pampa yehuanten amo quiman huil quipialoaya ilaxilulisli Dios hual quilic pampa yahuiaya quinmaca. Unca pampa amo quiman huil lami quichía se mochi hual unca lajcuiluli pa Dios ilajtol hual Moisés quijcuiluc. <sup>15</sup> Huan pampín, in lajtol quijtúa pampa quipialo pa miquisi lacames. Amo huil quichihualo mochi hual quijtúa in lajtol, huan pampín Dios cualani niman míac. Quipía pa quintojtocas ilaixpan yehuanten quinami quinmahuilúa. Ma yoje, sinda amo cataya lajtol hual techilía len ticpialo pa ticchiuasi, cuaquinon amaqui quipiaya pa miquis. Unca pampa amaqui quilalis pa camo quineltocas se lajtol hual quichihualtía sinda amo unca se lajtol quinami inon.

<sup>16</sup> Yoje, ticanasi in lalticpan quinami ilaxilulisli Dios pampa Dios quijtúa tehuanten yajmo ticpialo laijlaculisli pan ipampa quinami ticneltoocalo in hual Dios quijtúa. Dios quinequi pa yes yoje quinami yihual quinchihuilía cuali lacames. Yoje neli panus in hual Dios quinmilía. Yihual yahui quinmaca ilaxilulisli moxtin yehuanten hual quineltocalo ilajtol quinami Abraham. Huan amo unca in laxilulisli jan pa yehuanten in judíos san hual yulilo quichijtcate yoje quinami quijtúa in lajtol hual Dios quilic Moisés, huan noje quilalilo inminlaneltoocalisli ca Jesucristo quinami Dios ilajtol techilía. Noje unca pa yehuanten hual amo judíos hual san quilalilo inminlaneltoocalisli ca Jesucristo. Jan yoje Abraham tolaicanani timoxtin quilalic ilaneltoocalisli ca in hual Dios quilic. <sup>17</sup> Unca quinami quijtúa Dios ilajtol lajcuiluli, quijtúa: “Tehual Abraham nimijchíac pa tyes inmintajtzin míac lacames pa míac lalimes”, quil. Yoje unca quinami yihual Abraham quinpehualtic moxtin hual quilalilo mochi inminlaneltoocalisli ca Dios ilajtol. Dios quitaya Abraham quinami inmintajtzin. Yihual in Dios hual quinyliltía yehuanten hual miquije, yihual in Dios hual quijtúa ca lahuellitlisli pa pehuasi yesi mochi hual ayamo quiman yeje.

<sup>18</sup> Huan quineltocac Abraham pampa Dios huil quichihuaya. Quema, Abraham mocahuaya quichixtataya pa quinpiasquiaya míac imiahuimes. Quineltocaya pampa yahuiaya panu yoje, mas que nesiaya quinami lajtomes hual se hual amo laijnamiquiaya cuali quichixtiahuísquiaya pa panusi. Huan yoje yihual quineltocaya pampa yahuiaya ye inmintajtzin míac lacames pa míac lalimes, jan quinami Dios quilic, quil: “Yoje míac cayasi momiahuimes, Abraham”, quil. <sup>19</sup> Huan amo lantiyahuiaya ilaneltoocalisli. Mocahuaya chichahuac jan yoje quiman quijnamiquiaya quinami icuerpo moviejojtíc, yajmo huil ihuian lalacatiltiaya. Catani quinami se mijquil amo huil lalacatiltía, pampa yulic cien (macuilipuhuali) xixihuimes. Huan mocahuaya chichahuac ilaneltoocalisli noje quiman quijnamiquiaya isihua Sara icuerpo hual noje moviejojtíc. Yihual catani quinami se mijquil, yajmo huil quinpiaya xolomes. <sup>20</sup> Amo quimahuiliaya pampa amo yahuiaya panu in hual Dios quilic neli. Quilic pampa yahuiaya quinpía míac miahuimes. Yoje mochicahualtitiahuaya quinami quineltocaya Dios ilajtol huan quijtuc lajtomes huejué pa Dios pampa Dios quipía lahuellitlisli hué. <sup>21</sup> Yoje Abraham quimatiaya neli Dios huil quichía in hual quijtuc pampa yahuiaya quichía. <sup>22</sup> Pampa inon, Dios quijtuc neli pampa yajmo quitaya laijlaculisli ca Abraham pampa yihual Abraham quineltocaya Dios ilajtol.

<sup>23</sup> Huan amo jan pa Abraham san catani lajcuiluli quinami Dios quijtuc yihual Abraham yajmo quipiaya laijlaculisli. <sup>24</sup> Catani lajcuiluli noje pa tehuanten. Dios quilalic pa quijtus neli pampa tehuanten noje amo ticpialo laijlaculisli. Catani lajcuiluli pa tehuanten hual ticneltoocalo yihual hual quiyuliltic toTata Jesús oc seppa quiman miquic. <sup>25</sup> Yihual Jesús cataya latemacali pa quimictisi pa tehuanten (pa techmictiluilisi) pampa ticchihuaje míac hual Dios ilajtol quijtúa pa camo ticchihuasi. Huan Dios quiyuliltic Jesucristo oc seppa quiman miquic pa yoje yihual Dios huil lamachiltis pampa yajmo ticpialo laijlaculisli.

## 5

*¿Len techpanuc quiman Dios techitac quinami lacames amo laijlaculi?*

<sup>1</sup> Yoje, Dios quijtúa pampa yajmo ticpialo laijlaculisli huan inon pampa ticneltoocalo ilajtol Jesucristo. Pampa inon ticate ticpixticate mosehuilisli ca Dios, ticate jan seppa ca yihual. Yihual techpuppuhuac huan techana

quinami ixolomes. Inon unca pa tehuanten pan ipampa toTata Jesucristo. <sup>2</sup> Pan ipampa yihual, axan tiajsije capa ticanalo in cuali hual san Dios huil tejchihuilia. Inon ticpialo pampa ticneltoalco Jesucristo. Huan timoitalo ca niman miac paquilisli pan ipampa quinami ticchialo inon hual neli Dios tejxiluilis. Ticmatilo unca len hual iyaxca huan niman cualtichin. <sup>3</sup> Huan amo inon san. Noje ticate ca niman miac paquilisli quiman tipanulo lacocoltisli, ticmazzicate neli pampa inon hual ticpanulo techuelilitia pa timopepenialtisi quiman yes techajsis len amo cuali. <sup>4</sup> Huan sinda ticmatilo timopepenialtilo quiman tipanulo lacocoltisli, cuaquinon Dios techita cuali. Techita cuali quiman tictequipanuilisli cuali mas que tipanulo lacocoltisli. Ca inon yihual quitemua pa quimatis quinami huil timotolinilo pa tictequipanuilisli. Huan yoje tejchicahualitia toyolo pa ticchiasi pa ajsis in tonali hual yihual Dios lamis tejchihuilis in hual quijtuc pampa yahui tejchihuilia. <sup>5</sup> Huan inon hual ticchialo ticmatilo neli yahui panua. Yoje amo timochihuasi lacames huan sihuames hual quijtulo yajmo monotza nindeno. Amo timoitasi quinami ticate lacuajcuamanali quinami neli timoitaloaya yoje sinda amo panuaya. Inon ticmatilo pampa ticmatije ca mochi toyolo Dios techlasojla miac. Huan ilasojlalisli hue mocahua pa toyolo pa yoje tehuanten ticmatisi tilasojlasi. Unca in Espiritu Santo hual techlamachilitia inon. Dios techmacac in Espiritu Santo pa yihual cayas mojmosta lajtic timoxtin hual ticate Dios ixolomes.

<sup>6</sup> Quema, amo timoitasi lacuajcuamanali pampa quiman amo huil timopalehuiloaya pa ticpiasi in cuali hual san Dios huil tejchihuilia, Cristo miqic pa yehuanten hual yulilo amo quineltocaticate Dios. Miqic pa laxlahuis pa quinquixtilis inminlajlaculisli. <sup>7</sup> Huil panua pa se miquisquiaya pa se lacal hual amo quipia laijlaculisli. Huan cuajnesi cayas se hual amo momajtisquiaya pa miquisquiaya pa se hual quinchihuilia cuali moxtin. <sup>8</sup> Ma yoje, Dios technextilia quinami yihual techlasojla miac pampa Cristo miqic pa tehuanten quiman tiyeje lacames huan sihuames laijlaculi. <sup>9</sup> Yoje, Dios quijtuc pampa yajmo quita laijlaculisli ca timoxtin huan inon unca pan ipampa iesli Cristo hual quisac quiman miqic. Pampa inon, niman neli unca ticayasi laquixtili pin polehuilisli hual quinpanus lacames pampa Dios cualania. Dios quintojtocas ilaixpan yihual yehuanten pa cayasi lacocoltili ca lacocoltisli hual amo quiman lamis. Huan tehuanten, pan ipampa Cristo ticayasi laquixtili pa camo tipanusi inon. <sup>10</sup> Timochihuaaje jan sepa ca Dios ticpixticate mosehuilisli pa toyolo ca yihual pampa miqic ixolol Jesus quiman ticataloaya icocolinijmes yihual. Cuaquin pampa inon niman neli unca ticayasi laquixtili pin lacocoltisli calica Dios quinpolehuiltis yehuanten hual quilalilo pa camo quineltocasi. Ticayasi laquixtili pa inon pan ipampa Cristo iyulilisli hual noje unca lajtic tehuanten. <sup>11</sup> Huan amo ja inon san. Noje ticate ca niman miac paquilisli pampa ticpialo Dios pa toDios tehuanten huan inon pan ipampa toTata Jesucristo. Pan ipampa yihual ticanalo in cuali hual san Dios huil tejchihuilia. Ca inon ticpialo mosehuilisli pa toyolo ca yihual.

### *Adán huan Cristo*

<sup>12</sup> Yoje, pan ipampa se lacal Adán in laijlaculisli nesci pin lalticpan. Huan pan ipampa in laijlaculisli noje unca miqulisli. Yoje moxtin quipialo pa miqisli pampa moxtin quichihuaaje laijlaculisli. <sup>13</sup> Cataya laijlaculisli pin lalticpan quiman Dios ayamo quimacac Moisés in lajtol. Huan lacames yuliloaya quichijtataloaya laijlaculisli. San amo quinmotexpahuililo pampa quichihualoaya laijlaculisli sinda amo unca lajtol hual quinnextilia len unca

lajlajlaculisli. <sup>14</sup> Ma yoje, quiman yuliaya Adán huan pa quiman yuliaya Moisés, moxtin miqúije. Quema, cataya quinami in miqúilisli huelitiaya pa yehuanten, mas que amo quiman quichihuae laijlajlaculisli quinami Adán ilajlajlaculisli. Yihual ilajlajlaculisli quichíac mas que Dios quilic pa camo quichíasquiaya. Yojque quipanultilic iyolo laijlajlaculi pan moxtin imiahuimes, pampa yihual Adán quinpehualtic mochi lacames. Huan Cristo yahuiaya nesi pin lalticpan quiman panuloaya niman míac xixihuimes. Cuaquín, yihual Cristo quinpehualtic moxtin hual cate ilacames axan. Yihual quinpanultilic ichipahualisli pan moxtin yehuanten.

<sup>15</sup> Yoje, pan ipampa Dios ilachihualisli cuali, yihual techita tehuanten chipahuac, amo ticpíxicate len laijlajlaculisli, tejchihuílía cuali. Amo yoje ilajlajlaculisli Adán hual tejchihuílía amo cuali. Míac lacames, quema, moxtin lacames miqúije pampa se lalac, Adán, quichíac len Dios quilic pa camo quichías. Ma yoje, niman neli unca pampa in cuali hual Dios quinchihuílía, quinchihuilis niman míac cuali pa míac lacames, mas que Adán ilajlajlaculisli quinchihuilic míac lacames niman amo cuali. In cuali hual Dios quinchihuílía unca inon hual tejchihuílía pan ipampa in se lalac san, yihual Jesucristo. <sup>16</sup> Huan in cuali hual Dios tejchihuilic pan ipampa Cristo amo unca quinami techpanuc pampa se lalac, Adán, quichíac laijlajlaculisli. Yoje ca ompic tiqúitalo Adán hual amo quineltocac se lajtol, huan pampa inon, Dios quipíac pa quilalis pa moxtin miqúisi. Yojque miqúilo Adán huan moxtin imiahuimes hual timoxtin ticate. Huan ca niquic, tiqúitalo axan quinami Dios quilalía pa quinpupuhuas mochi tolajlajlaculisli. Yoje mochi huil panúa cuali pa in míac lacames hual quichihuae míac laijlajlaculisli. Inon unca pampa Dios quijtúa axan pampa yajmo unca nindeno hual yihual Dios quipía pa quinmotexpahuilis. <sup>17</sup> Yojque, moxtin quipialo pa miqúisi pan ipampa ilajlajlaculisli se lalac, Adán. Axan niman neli unca pampa yehuanten amo quiman lamisi yulisi huelitijticate ca paquilisli ca Cristo. Yoje yes san sinda canaló in cuali niman hué hual quinchihuílía Dios. Inon yihual quinchihuílía pampa quijtúa yajmo unca len ca yehuanten hual pampa inon quinmotexpahuilis. In cuali quinchihuílía Dios pan ipampa inon hual Jesucristo lamic quichíac pa in tonali hual miqúic.

<sup>18</sup> Axan, quinami se lalac, Adán, amo quineltocac se lajtol hual Dios quilic pa camo quichías, pampa inon Dios quijtuc pampa quipialo pa miqúisi moxtin lacames, yehuanten imiahuimes Adán. Huan jan yoje oc se lalac, Jesucristo, quineltocac mochi Dios ilajtomes hual Dios quilic pa quichías. Huan pampa inon quichíac pa moxtin huil quipialo ilapupuhualisli Dios. Huan Dios quinmaca in yulilisli hual amo quiman lamis pan ipampa ilapupuhualisli. <sup>19</sup> Quema, in míac lacames mochihuae lacames laijlajlaculi pan ipampa quinami se lalac, Adán, amo quineltocac Dios. Jan yoje in míac lacames noje mochihuasi lacames hual Dios quinmita amo quipíxicate laijlajlaculisli. Inon unca pan ipampa quinami se lalac, Jesucristo, amo quiman mocahuac pa quineltocas Dios.

<sup>20</sup> Yoje in lajtol hual Dios quilic Moisés cataya pa quinnextilic lacames quinami míac quixtocalo quichihualo laijlajlaculisli. Inon unca pampa in lajtol quinnextilic quinami cate míac hual huil quinchihualo calica moijlajlulo. Ma yoje, capa momiactiaya laijlajlaculisli, Dios ilachihualisli cuali niman míac momiactiaya pa quipupuhuas in laijlajlaculisli. <sup>21</sup> Cuaquinon, pan ipampa in laijlajlaculisli, yoje miqúilo lacames. Ma yoje, in cuali hual san Dios quinchihuílía cuali quinyuliltía oc seja pan ipampa quinami yihual

quinpujpuhuilía lacames inminlajlaculisli. Quijtúa yihual pampa yajmo quita nindeno ca yehuanten hual pampa inon quinmotexpahuilía. Axan quipialo iyulilislí hual amo quiman lamis, huan inon pan ipampa Jesucristo toTata.

## 6

*Pampa ticchihualo laijlaculisli, timicticate. Pampa miquic Cristo tiyulticate*

<sup>1</sup> Cuaquinon, ¿len tiquijtusi? ¿Tiyultiasi ticchijtcate laijlaculisli pa yoje in cuali hual san Dios huil tejchihuilía momiactis niman mías? <sup>2</sup> ¡No, ma camo quiman quijtu amaqui yoje! Dios techita axan quinami timiquije pampa ticchihualo laijlaculisli, huan yoje unca quinami timiquije pa yajmo ticchihualosquiaya laijlaculisli. Axcan, ¿quinami huil tiyultiasi ticchijtcate laijlaculisli? No, monequi pa timocahuasi pa ticchihuasi. <sup>3</sup> ¿Amo anquimati quinami timoxtin hual ticataloaya lacuayatequili quiman timotemacaje pa tiyelosquiaya se ca Jesucristo, jan yoje cataya quinami timictataloaya ca yihual? Yoje Dios techitac quinami timiquije ca Cristo. <sup>4</sup> Quema, Dios techita axan quinami ticataloaya lalalpachuli ca Jesucristo pan ipampa tolacuayatequilisli. Huan Cristo cataya layuliltili oc seppa quistataya capa in mijquimes pan ipampa Dios toTajtzin ilahueliltilisli niman hué. Huan pampa yihual cataya layuliltili, jan yoje tehuanten noje tiyulisi ca yulilislí yancuic. <sup>5</sup> Unca quinami ticataloaya ca yihual quiman miquic, Dios techita yoje. Huan pampa unca yoje, noje neli unca ticate ca yihual pan ipampa quinami tiyulilo oc seppa, jan quinami yihual yulic oc seppa. <sup>6</sup> Huil tiquijtulo inon pampa ticmatilo yajmo ticate quinami ticatanijme quiman ayamo ticneltocaje Cristo. Unca quinami toyolo laijlaculi miquic. Cataya in toyolo laijlaculi hual tejchihualtiaya mochi inon hual amo unca quinami Dios quinequi. Tehuanten yajmo tilacames hual ticpialo toyolo laijlaculi. Axcan unca quinami toyolo laijlaculi cataya lapiluli pan in cuahuil ca Cristo. Axan Dios techita quinami ticataloaya yoje lapiluli pa yoje toyolo laijlaculi yes laxitinili. In toyolo laijlaculi mojmosta tejchihualtilini laijlaculisli ca tocuervo. <sup>7</sup> Huan pampa se hual miquic yajmo quichía laijlaculisli, jan yoje aqui hual Dios quita quinami miquic yajmo quinequi quichía laijlaculisli. Unca lamacahuali pa yajmo quichihualtis mochi in amo cuali pa iyolo hual quichihualtini. <sup>8</sup> Huan amo inon san. Sinda Dios techita quinami timiquije ca Cristo, ticmatilo noje tiyulisi ca yihual huan tiyulisi quinami yihual yuli. <sup>9</sup> Unca pampa ticmatilo Cristo cataya layuliltili oc seppa. Mocuepac pa yajmo cayasquiaya capa catani ca in mijquimes. Axan, yajmo miquis, in miquilisli yajmo quipía lahueliltilisli ca yihual, yajmo quipía chichahualisli pa quimictis. <sup>10</sup> In unca pampa quinami cajsí yihual pampa miquic, yoje miquic se tonali huan amo quiman quipías pa mocuepac miquis. Unca pampa quiman miquic, yihual quilaxlahuic mochi pa quixitinis laijlaculisli. Cristo yajmo quipías pa miquis pa yajmo huelitis laijlaculisli ca tehuanten. Huan quinami cajsí yihual pampa yuli, axcan yuli ca Dios, yajmo moxilus pa camo cayas capa yihual. <sup>11</sup> Huan jan quinami inon, amhuanten noje xiyulican annoiztica quinami anmiquic. Huan pampa inon yajmo anquipía nindeno pa anquitas ca laijlaculisli. Noje xiyulican annoiztica quinami axan anunca anyultica pa anquitequipanuulis Dios. Anunca anyultica pa Dios pampa anunca ca Cristo Jesús axan.

<sup>12</sup> Yoje, amo xicmacahuiltican anmoyolo laijlaculi pa anmijchihualtis in amo cuali. Amo xicmacahuiltican pa anmitzlaneltocaltis len yes amo cuali

hual anmoyolo laijlaculi quinequi pa anquichías. <sup>13</sup> Huan noje, ximocahuacan pa camo anquichías laijlaculisli ca anmomajmajuan huan anmocxihua-jmes huan anmocamac huan mochi hual unca iyaxca anmocuerpo. Quema, ximomacahuiltican amhuanen pa anyes pa Dios san, quinami monequi pa lacames hual axan yulticate quinami yehuanen hual quisaje pa capa cate in mijquimes. Huan ximomacahuiltican pa mochi hual anquichías yes in hual unca ca se lajtulisli ca Dios. <sup>14</sup> Anmoyolo laijlaculi amo anmijchihualtis, pampa yajmo huelitía ca amhuanen ilajtol Dios hual quijcuiluc Moisés. In lajtol mojmosta anmitzneltoaltini ca chichahualisli. Axcan huelitía ca amhuanen in cuali hual san Dios huil anmijchihuilía. Inon anmitzhueliltía pa anquineltocas Dios ca lanequilisli.

*Quijtúa quinami cate in tequipanujquimes hual amo quinlaxlahuilo*

<sup>15</sup> ¿Len tiqijtusi, cuaquín? ¿Huil ticchihualo laijlaculisli quijquiman pampa yajmo huelitía pa tehuanen in lajtol, huan quema, lahueliltía pa tehuanen in cuali hual san Dios huil tejchihuilía? ¡Ma camo quiman quijtu inon amaqui! <sup>16</sup> ¿Amo anquimati pampa aqui yes anmotemacas pa anyes itequipanujquimes se hual amo anmitzlxlahuía, anunca itequipanujquimes yihual pa anquineltocas? Cuaquín huil anmotemacas pa anquichías laijlaculisli huan pampa inon anmiquis, amo quiman anyulis capa unca Dios. Huan sinda amo yoje, amhuanen huil anmotemacas pa anquineltocas Dios pa anyulis quinami Dios quixtoca, anquixtica anmoyolo chijchipahuac. <sup>17</sup> Ma yoje, ma ticsehuican Dios. Mas que ancatani tequipanujquimes pa anquichiasquiaya laijlaculisli, axcan yajmo anunca yojque. Anquineltocac pa anmoyolo in lamaxtilisli hual Dios quilalic. Huan yihual anmitztemacac pa anyulis anlachijtica quinami quijtúa ilamaxtilisli. <sup>18</sup> Inon unca pampa anunca lamacahuali. Yajmo anquipía pa anyulis ca in laijlaculisli anmijchihualtijtica. Axan Dios anmijchía itequipanujquimes pa anyulis anquichijtica len cuali, inon unca quinami yihual quinequi. <sup>19</sup> Annimitzlaquetzilijtica quinami lacames lajtulo mojmosta, pa yoje anquimatis len nicnequi niqijjtúa. Unca pampa lacames amo huil quimatilo len quinequi quijtúa in hual unca pa toyolo sinda amo tilajtol yoje. Pa yina anmotemacani pa anquichías len Dios quita amo cuali huan pa anquichías mochi tonali mías hual amo cate quinami quijtúa Dios ilajtol. Axan ximotemacacan pa anquichías mochi hual unca cuali huan mochi hual Dios quita chipahuac. Yoje neli anmochías cuali huan chipahuac pa anyes jan pa Dios san.

<sup>20</sup> Anyec quinami tequipanujquimes hual amo quilaxlahuilo pa anquichihuasquiaya laijlaculisli. Cuaquín anquijtuaya pampa amo anquipiaya pa anyulis anquichijtica len cuali huan melahuac. Cataya quinami anmotemacaya pa anquichías laijlaculisli. <sup>21</sup> Cuaquinon, ¿len lapalehuilisli anquipiac quiman anquichihuaya innojen hual axan anpinahua pampa anquinchihuani? Nindeno, pampa jan lamilo mochi innojen ca miqulilisli pa inminyolo yehuanen hual quinchihualo. <sup>22</sup> Ma yoje, axcan ancyac lamacahuali. Yajmo anquipía pa anquichías laijlaculisli. Quema, anquipías pa anquitequipanuilis Dios. Huan pampa inon ancana lapalehuilisli hué, pampa huil anyuli anquichijtica inon hual cuali huan chipahuac, pa anyes lacames huan sihuamés jan pa Dios san. Huan inon lami cuali pa amhuanen, pampa anquipía anmoyulilisli ca Dios. Huan in yulilisli amo quiman lamis. <sup>23</sup> Neli unca yoje, pampa se hual yuli quichijtica laijlaculisli miqulis huan moxilus pa yajmo huil cayas ca Dios. Inon unca ilaxlahuilisli se hual

yuli quichijtica laijlaculisli. Ma yoje, Dios quinyuliltía lacames, quinmaca yulilislí hual amo quiman lamis. Amo quipialo pa quilaxlahuisi Dios inon. Huan quinyuliltía pan ipampa Cristo Jesús toTata.

## 7

### *In lanextilislí quilía quinami unca monamictilislí*

<sup>1</sup> Nocnían, nilaqueztica ca amhuanten hual anquimati in lajtol hual Dios quilalic. Neli anquimati quinami se quipía pa quineltocas in lajtol jan pa innojen xixihuil quiman yihual yuli san. <sup>2</sup> Huan yojque unca ca se sihual quiman monamictía. Pa mochi xixihuil hual yuli ilahuical, in lajtol quijtúa pampa in sihual mocahua iyaxca ilahuical. Ma yoje, sinda miqui ilahuical, cuaquinon yajmo quipía nindeno pa quitas ca inon hual in lajtol quijtúa inahuac ilahuical, yajmo cajsí in sihual. <sup>3</sup> Yoje, sinda ilahuical unca yultica, huan isihua mohuicas pa yulis ca oc se lacal huan yehuanten monipanulo, cuaquín moxtin huil quijtusi pampa in sihual canac se lacal hual amo iyaxca. Sinda miqui ilahuical, cuaquinon in sihual unca lamacahuali. In lajtol yajmo cajsí pampa yajmo yuli ilahuical. Amo huil quijtusi lacames in sihual cana se lacal hual amo iyaxca sinda monamictis ca oc se lacal ihuían. <sup>4</sup> Jan yoje, nocnían, amhuanten hual anquineltoaca Cristo, amhuanten noje aunca lamacahuali quinami in sihual hual ilahuical miquic. Quiman Cristo yec lamictili, cuaquín Dios anmitzítac amhuanten quinami ancataya lamictili pampa amo anquineltoac ilajtol. Dios anmitzítac quinami anmiquic ca Cristo.

Pampa inon yajmo anquipías pa anquitas nindeno ca in lajtol hual Dios quimacac Moisés pa yoje Dios anmitzítas quinami lacames hual amo quipialo laijlaculisli. Anunca quinami anmictica huan yoje in lajtol yajmo anmitzajsi pampa inon. Yoje ancataya lamacahuali pa anmochías iyaxca oc se. Anmochíac iyaxca Cristo hual yulic oc sejpa huan quisac capa cataloaya huan in mijquimes. Anmochíac iyaxca ilacames pa yoje anyulisquiaya ca yulilislí cuali hual quipaquiltis Dios. <sup>5</sup> Quiman tiyuliloaya ticchijtataloaya quinami quinequiloaya toyolo laijlaculi, yoje ticnequiloaya míac pa ticchihualosquiaya laijlaculisli. In lajtol techlanequiltic pa ticchihualosquiaya mochi hual amo cuali. Huan sinda yoje tiyulisi, timiquisi huan timocahuasi laxiluli pa camo ticayasi capa unca Dios. <sup>6</sup> Ma yoje, axcan ticate lamacahuali huan amo techajsi in lajtol, pampa unca quinami timiquije pa yajmo tiyulisi quinami tiyulinijme. Ticpianijme pa tiyulilosquiaya mojmosta timotolinticate pa ticneltoacas in lajtol. Ticataloaya quinami lacames laipili pa tiyesi latzacuali calijtic. Huan axan ticate lamacahuali pa yoje ticayasi laheliltili pa tictequipanuilisi Dios ca mochi toyolo. Huan tictequipanuilisi pan ipampa se yulilislí yancuic, pan ipampa in Espíritu Santo. Yajmo monequi pa tictequipanuilisi Dios chicahuac yoje quinami quijtúa in lajtol hual Dios quilalic pa yina.

### *Laijtic toyolo ticnequilo ticchihualo laijlaculisli*

<sup>7</sup> Cuaquinon ¿len tiquijtusi? ¿Amo unca cuali in lajtol? ¿Unca laijlaculisli? ¡Ma camo quiman quijtu inon amaqui! Sinda amo cataya in lajtol, amo nicmatiya len unca laijlaculisli, pampa neli amo nicmatiya amo unca cuali sinda se quinequi quipía len hual iyaxca oc se. Ma yoje, in lajtol quijtuaya: “Amo ticnequis ticpías in hual amo moyaxca.” <sup>8</sup> Huan pampa nel niunca laijlaculi, cuaquín quiman nicmatic amo unca cuali pa se quinequis len amo iyaxca, yoje noyolo laijlaculi laijtic nehual nechlanequiltic míac hual



amo cuali pa nicnequisquiaya. Huan quiman amo nicmatiaya len quijtúa in lajtol, cuaquinon, quinami mochi lacames, amo nicmatiaya sinda nicchijataya laijlaculisli. <sup>9</sup> Nehual pa yina niyulini amo nicmaztataya quinami nechajsiaya in lajtol. Ma yoje, quiman nicmatic in lajtol, cuaquín cataya quinami noyolo laijlaculi moyuliltic pa nechyantís pa nicchías len amo unca cuali. Pampa inon, Dios ilajtol quijtúaya nicpiaya pa nimiquisquiaya. <sup>10</sup> In lajtol Dios quimacac pa yoje pan ipampa in lajtol nicmatisquiaya quinami huil niyulis chipahuac huan ca paquilisli ca Dios. Huan axan in lajtol monextic quinami len hual quijtúa pampa nicpiaya pa nimiquis. <sup>11</sup> Huan noyolo laijlaculi amo mocahuaya pa nechijnamiquiltis pampa huil nicneltoca mochi in hual quijtúa in lajtol. Yoje nechcuaicquamanac noyolo laijlaculi. Huan yoje in lajtol nechtilanic pa nimiquisquiaya.

<sup>12</sup> Yoje, in lajtol unca chipahuac huan cajsí se jan quinami oc se, huan unca cuali. Lacames amo cate yoje. <sup>13</sup> Huan in hual unca cuali, axan ¿cataya in hual mochíac quinami len hual quijtúaya pampa nicpiaya pa nimiquisquiaya? ¡Ma camo quiman quijtu inon amaqui! Cataya noyolo laijlaculi hual amo quineltocaya in lajtol. Cataya inon hual nechhualiquilic miquiltisli. Cataya yoje pa neli nicmatis quinami unca laijlaculi noyolo huan yoje amo cuali. Huan pampa noyolo cataya laijlaculi, in lajtol quijtúaya nicpiaya pa nimiquisquiaya. Yoique, pan ipampa in lajtol timoxtin ticmatilo quinami niman amo cuali unca toyolo laijlaculi.

<sup>14</sup> Ticmatilo quinami in lajtol hualac pan ipampa Dios ¡Espíritu huan yoje yehuanten hual quipialo Dios ¡Espíritu pa inminyolo quimatilo in lajtol unca cuali. Ma yoje, noyolo laijlaculi mocahua laijtic nel. Niunca quinami se tequipanujquíl lanamaquiltili hual quipía pa quineltocas iteco. Huan in noyolo laijlaculi unca quinami noteco nehual, mojmosta nicnequi nicchía laijlaculisli. <sup>15</sup> Huan yoje, amo niquinmita cuali innojen hual niquinchía pan miac tonalijmes. Nesi quinami yesquiaya oc se hual nejchihualtía. Amo niquinmita cuali huan amo nicmati leca niquinchía innojen. Amo nimoita cuali sinda niquinchijtica, pampa amo nicchía in hual niquita cuali. Nicchía inon hual amo niquixtoca. <sup>16</sup> Huan sinda nicmati pampa inon hual nicchía amo unca cuali, cuaquín niquita cuali in lajtol hual quijtúa pa camo niquinchía innojen. Huan yoje neli niquijtúa pampa cuali in lajtol. <sup>17</sup> Axan, yajmo unca nehual hual niquinchía, unca in noyolo laijlaculi hual nejchihualtía laijtic nehual. <sup>18</sup> Unca pampa neli nicmati da amo unca len cuali laijtic nehual. Nicnequi niquijtúa, noyolo laijlaculi laijtic nehual amo quiman quinequi quichía len cuali. Nicpía ca nehual nolahueliltisli pa nicnequis nicchías len cuali. Ma yoje, pa nicchías len cuali, inon amo huil. <sup>19</sup> In hual nicnequi nicchía, ma niquijtu, in hual unca cuali, inon amo nicchía. Huan inon hual amo nicnequi nicchía, ma niquijtu, inon hual amo unca cuali, inon nicchía. <sup>20</sup> Axcán, sinda nicchía inon hual amo nicnequi, cuaquinon yajmo unca nehual hual nicchía. Unca noyolo laijlaculi hual unca laijtic nehual hual quichía.

<sup>21</sup> Yoje, niquita laijtic nehual inon. Quiman nicnequi nicchía len cuali, cuaquín nepa noje unca nonahuac len amo cuali hual nechlanequiltía pa nicchías in amo cuali. <sup>22</sup> Ca mochi nolanequilisli laijtic nehual, nimoita ca paquilisli nicnectica pa nicchías in hual quijtúa Dios ilajtol. <sup>23</sup> Ma yoje, niquita oc se len hual quinequi huelitía capa nehual, huan inon quilalía pa camo nicneltocas Dios pa yoje nejxitinilis noyolo yancuic. Unca quinami moana ca noyolo yancuic hual in Espíritu Santo nechlalilic. Inon unca



noyolo laijlaculi hual quinequi huelitía capa nehual, nechana quinami tequipanujquil lailpili.

<sup>24</sup> ¡Ah, nilalac hual nipolejtica! ¿Aqui nechquixtilis pin imiquilisli in noyolo laijlaculi hual nechhuicatlía pa nimiquis nimoxilujtica pa como nicayas capa unca Dios? <sup>25</sup> Nicsehuía Dios pan ipampa Jesucristo toTata, yihual nechquixtilijtica pin miqүүлisli. Axan, nican nehual ca noyolo yancuic niunca itequipanujquil Dios pa nicneltocas ilajtol. Ma yoje, niunca itequipanujquil noyolo laijlaculi pa nicchías laijlaculisli.

## 8

### *In yulilisli hual unca pan ipampa Dios iEspíritu*

<sup>1</sup> Yojque, Dios quijtúa pampa amo quipiasi pa miqüisi yehuanten hual yihual quinmita cuali quinami Cristo. Quinmita cuali pampa unca quinami yihual quinlalic yehuanten laijtic Cristo huan yoje unca quinami quinlalilic yehuanten in cuali hual unca iyaxca Cristo. <sup>2</sup> Pampín Dios amo nechjcuánilis yihual ipampa nolaijlaculisli. Unca pampa in Espiritu Santo nechmaca yulilisli pan ipampa Cristo Jesús huan huelitía pan nehual. Nechmacahuac pa yoje yajmo huelitis laijlaculisli huan miqүүлisli pan nehual. <sup>3</sup> Cataya pampa mojmosta toyolo laijlaculi amo mocahua pa tejchihualtis laijlaculisli. Huan in lajtol hual quimacac Moisés amo quipiaya chichahualisli pa tejtzaculis pa como ticchihualosquiaya laijlaculisli. Pampín, Dios quitlanic iXolol iyaxca pin lalticpan. Yihual lacatijthualac quipixtataya se cuerpo quinami tocuerpo, huan iyolo quinami toyolo. Ma yoje, mas que Dios ixolol yec lalac quinami tehuanten, amo quiman quichíac laijlaculisli. Dios quilalíc pa iXolol miquisquiaya huan yoje laxlahuisquiaya tolaijlaculisli ca icuerpo. Inon unca quinami techquixtilía tolaijlaculisli. Yoje Dios quilic pa iXolol quipiaya pa miquisquiaya pa tehuanten hual ticate lacames huan sihuames laijlaculi. <sup>4</sup> Dios quichíac inon pa yoje tehuanten tiyesi mochi amo ticpixticate laijlaculisli. In lajtol quijtúa pampa monequi pa jan yoje yesi lacames. Tehuanten huil ticate yoje pampa tiyulilo ca in Espiritu Santo huelitijtica pan tehuanten. Amo tiyulilo ca toyolo laijlaculi huelitijtica pan tehuanten. <sup>5</sup> Unca pampa yehuanten hual yulilo jan pa quinpaquiltisi inminyolo laijlaculi quijnamiquilo san len quinequilo yehuanten inminhuían. Amo yoje yehuanten hual yulilo pa quinpaquiltisi in Espiritu Santo. Yehuanten quijnamiquilo san len yes iyaxca in Espiritu Santo. <sup>6</sup> Unca yoje pampa sinda mojmosta yulilo lacames quijnamiccate san len quinequilo yehuanten inminhuían, cuaquín yehuanten lamisi moxilujticate pa como cayasi capa unca Dios. Amo quiman huil mocuepasi ca yihual. Inon unca miqүүлisli pa inminyolo. Amo yoje yehuanten hual yulilo quilalijticate inminlajnamiquilisli pan len yes iyaxca in Espiritu Santo. Yehuanten yulisi ilaixpan Dios quiximatijticate, huan mosejticate pa inminyolo ilaixpan yihual. <sup>7</sup> Yehuanten hual quilalilo mochi inminlajnamiquilisli pan len quinequilo jan yehuanten san, yoje quilalijticate pa como quineltocasi Dios. Amo quinequilo pa huelitis pan yehuanten. Yehuanten hual laijnamiquilo yoje amo mosulahualo ca Dios ilajtol, huan amo huil mosulahualo. <sup>8</sup> Huan yehuanten amo huil quipaquiltilo Dios sinda yulilo mopaquiltiticate jan yehuanten san.

<sup>9</sup> Amo yoje ca amhuanten. Amo anyuli anquinmacahuiltitica anmoyolo laijlaculi pa huelitis capa amhuanten. Anquinmacahuiltitía pa huelitis in Espiritu Santo capa amhuanten. Anyuli quinami anmitzilía in Espiritu Santo, pampa chanti laijtic amhuanten Dios iEspíritu. Sinda se amo quipía

Cristo iEspíritu, cuaquín in se amo unca iyaxca Cristo. <sup>10</sup> Dios quinmita anmocerpos pampa cate laijlaculi, yoje lacatije huan quichihuafe laijlaculisli. Ma yoje, sinda Cristo iEspíritu unca laijtíc amhuanten, cuaquinon ca anmoyolo yancuic anyuli pampa Dios anmitzita quinami amo anquipixtica laijlaculisli, jan quinami Cristo amo quipía laijlaculisli. <sup>11</sup> Huan amo san inon. Dios toTajtzin quiyuliltic Jesús quiman miquic huan cataya ca in mijquimes. Huan Dios in Espíritu Santo chanti laijtíc amhuanten. Pampín, yihual hual quiyuliltic Cristo Jesús noje anmitzyuliltis anmocerpos hual miquisi. Huan Dios anmitzyuliltis pan ipampa in Espíritu Santo hual chanti laijtíc amhuanten.

<sup>12</sup> Cuaquinon, nocnían, amo ticpialo pa tiyulisi yojque quinami quinequilo toyolo laijlaculi pa tiyulisi. <sup>13</sup> Sinda anyuli yoje, cuaquín in tonali hual anniqui, ancayas latzacuali pa camo huil ancalaquis capa unca Dios, amo quiman huil anajsis nepa. Yoje, anquipía pa anyulis quinami in Espíritu anmitzilía. Huan sinda anyuli yoje, monequi pa anmotzactías pa camo anyulis anquichijtías in amo cuali hual anmoyolo laijlaculi quinequi pa anquichías. Cuaquín anyulis anquipixtica in yulilisli yancuic hual quipialo moxtin hual quineltoalo Cristo.

<sup>14</sup> Quema, anyulis yoje yancuic, pampa moxtin hual Dios iEspíritu quinlaicana, yehuanten cate Dios ixolomes. <sup>15</sup> Unca pampa ancanac in Espíritu Santo hual amo annimijchíac quinami tequipanujquimes hual amo quilaxlahuilo pa yoje anmomajtisquiaya anajsi ca Dios. Neli in Espíritu Santo annimijchíac pa annoximatis quinami Dios ixolomes. Huan pan ipampa in Espíritu ticnotzalo Dios tiquilijtcate: “¡Abba!”, hual quinequi quijtúa “¡Tata!” <sup>16</sup> Unca yihual in Espíritu hual quinmilía toyolo pampa tehuanten ti'ixolomes Dios. <sup>17</sup> Huan quinami ti'ixolomes Dios, cuaquinon noje Dios tejaxiluilis in hual iyaxca. Inon quipía pa tehuanten, quema, ca Cristo ticpiasi. Noje ca Cristo tipanusi míac hual techcocoltía. Pampín ca yihual ticayasi la'ajcoquili ca capic ticanasi míac lahuelilitlisli. Huan Dios lajtus hué tonahuac tehuanten pampa ticatē iyaxca.

<sup>18</sup> Dios yahui technextilía míac hual ticanasi quiman ticayasi ca yihual. Niquijtúa pampa cayas niman cuali. Amo yoje cuali in hual ticpialo pan lalticpan. Pampa inon, tiquitasi quinami nindeno inon hual tejaxitúnic huan techcocoltic nican. <sup>19</sup> Huan inon hual ticanasi unca niman hué huan míac. Pampín quichialo ca niman míac lanequilisli mochi hual Dios quichíac pin cielo huan pan lalticpan. Quichixticate in tonali hual ajsis quiman Dios quinmacahuiltis moxtin pa quimatisi pampa tehuanten ti'ixolomes. <sup>20</sup> Huan axcan mocahualo quichixticate, pampa Dios quisulahuac mochi hual quichíac pa camo quipiasí mochi inminchicahualisli hual quipianijme quiman Dios quinpehualtic. Amo mochihuafe yoje pampa quinequiloaya yehuanten inminhuían. Cataya pampa quichíac Adán in laijlaculisli Dios quijtuc pa cayas yojque. Axan, mochi hual Dios quichíac quichixtica pa ajsis in tonali. <sup>21</sup> Cuaquinon noje, mochi hual Dios quichíac yajmo quipias pa mocahuas palantiasi huan yajmo quipias pa mocahuas cacaxlito. No, quiman Dios ixolomes canasi in laixpelalisli cualtichin huan lahuelilitlisli hué, niquijtúa, quiman Dios quinmacahuas pa yajmo quinmijlaculisli in hual quinmijlacultía axan, cuaquín noje mochi hual Dios quichíac cayasi lamacahuali pa yajmo quintzacuas inon calica Dios quintzacuac. <sup>22</sup> Ticmatilo pampa mochi hual Dios quichíac yahui caya lamacahuali yoje. Quiman Dios quinpehualtic mochi niman pa yina hual mocajtihualac pa axan, mochi in

yulijquimes huan lacames hual Dios quinchíac axan mocahualo quinami panujticate lacocoltilisli quinami se sihual panúa lacocoltilisli quiman yahui lacati ixolol. Quema, mochi hual Dios quinchíac panulo lacocoltilisli, yajmo ajsilo quipialo in hual quipianijme quiman Dios quinpehualtic. <sup>23</sup> Huan amo panulo lacocoltilisli san innojen oc sequin hual Dios quinchíac. Noje techpanúa tehuanten hual ticneltocalo Cristo huan ticpialo in Espíritu Santo hual tejchía nadita quinami Cristo axan. Ma yoje, ajsis in tonali hual ticchixticate, huan cuaquín tiajsisi tiyesi jan quinami yihual. Axan techcocojtica toyolo nican capa ticchixticate ca míac lanequillisli in tonali hual Dios lamis techmacahuiltis pa ticayasi mochi laiximatili quinami ixolomes. Ma yoje, quiman ajsis in tonali hual Dios quichías mochi yajyancuic, cuaquín tocuerpos hual axan ticpialo cayasi lapatilili pa oc sequin cuerpos hual amo quiman lamisi. <sup>24</sup> Inon neli unca, pampa quiman ticlalije tolaneltocalisli ca Cristo, cuaquín ticmatije pampa neli ticanasi in hual techilic yahuiaya techmaca, mas que ayamo tiqitalo axan. Sinda tiqitaloaya, cuaquín yajmo monequiaya pa ticchixtiasi, pampa sinda quita se len, cuaquinon ¿leca quichixtías? <sup>25</sup> Axan amo ticpialo huan amo tiqitalo inon hual ticchixticate pa ajsis ca tehuanten. Pampín timochicahualtilo ticchixticate in tonali quiman ticanasi.

<sup>26</sup> Yoje in Espíritu Santo techpalehuía pa ticpiasi chicahualisli pa timopejpenialtilo in lacocoltilisli hual monequi pa tipanusi axan. Huan in Espíritu Santo techpalehuía pa huil tiajsilo tilachihualo quinami cana cuali pa Dios ixolomes. Techpalehuía pampa amo ticmatilo len unca cuali pa ticlajlanisi Dios. Ma yoje, yihual in Espíritu Santo quimati. Huan yihual quilajlanía Dios pa tehuanten, quilajlanijtica ca siahuilisli yoje quinami amo huil ticmatilo ticchihualo ca lajtomes. <sup>27</sup> Huan Dios quita lajtic toyolo pa quimatis len tiqijtticate nepa. Yoje yihual quimati len quinequi quijttía in Espíritu Santo, pampa in Espíritu Santo quilajlanía Dios pa yihual tejchihuilis cuali quinami yihual Dios quinequi pa tehuanten hual ixolomes.

### *Tehuanten tiquinsulahualo tolacocolinijmes huan amo jan inon san*

<sup>28</sup> Huan ticmatilo pampa mochi innojen hual panulo mochihuililo se ca oc se pa yoje lamisi cuali pa yehuanten hual quilasojlalo Dios. Yehuanten cate hual yihual quinnotzac pa quichihuasi huan pa yesi mochi hual yihual quilalic pa yehuanten. <sup>29</sup> Dios quinmiximatic yehuanten quiman ayamo quichíac len. Huan yehuanten hual quinmiximatic, yihual quilalic pa yesi jan quinami unca ixolol. Quilalic pa yesi yojqe quiman ayamo catanijme lacames pan lalticpan. Yoje quilalic pa Jesús ixolol Dios quinpiasquiaya míac icnián huan pa yihual yesquiaya inmicni hué ca yehuanten. <sup>30</sup> Huan yehuanten hual Dios quinlalic pa yesi ixolomes, yihual quinnotzac. Huan yehuanten hual quinnotzac, Dios quijttuc pampa yajmo quipialoaya nindeno calica huil quinmotexpahuiliaya. Huan yehuanten hual yihual quijttuc pampa yajmo quipialoaya nindeno calica yihual huil quinmotexpahuilisquiaya, yihual noje quijttuc pampa ajsisi quipiasi len cuali cualtichin hual quipía Cristo.

<sup>31</sup> Cuaquinon, ¿len tiqijttusi inahuac inon? Sinda Dios quilalic pa techpalehuis, amo unca amaqui hual huil tejtzacuilis pa camo ticpiasi in hual Dios quipía pa tehuanten. <sup>32</sup> Yihual amo quitzacuilit pa camo miquisquiaya ixolol, in se san hual quipía. Pa timoxtin Dios quitemacac Jesucristo pa miquis pa tehuanten. Huan pampa tejchihuilic inon, neli unca da noje yihual techmacas mochi in cuali hual san yihual huil tejchihuilía. Unca

jan quinami yihual techmaca Cristo pa techquixtis pin miqulislí ca capic techuicaya tolajlaculislí. <sup>33</sup> Amo unca amaqui hual quinmotexpahuilís yehuanten hual Dios quinlajtultic pa yesi ixolomes, pampa unca Dios hual quijtúa pampa ca yehuanten yajmo unca nindeno hual huil quinmotexpahuilís se. <sup>34</sup> Huan amo unca amaqui huil quijtus yehuanten quipiasí pa miquisí, pampa Cristo miquic, Dios quilalic pa quipiasquiaya pa miquisí pa yehuanten. Miquic Cristo pa camo miquisí yehuanten pampa sinda yoje miquije, amo huil cayalosquiaya capa unca Dios. Huan amo san inon. Noje monequi pa tiquijtusí quinami Cristo yulic oc sejpa huan unca pin cielo (ilhuicac) ca Dios huan quipía hual yihual iyaxca. Huan yes yihual iyaxca pa huelitis pin cielo huan pan lalticpan jan quinami Dios. Huan axan nepa unca quilajlantica Dios pa techpujpuhuas mojmosta sinda ticchihualo laijlaculislí. <sup>35</sup> ¿Len huil techpanus hual quitzacuilis Cristo pa yajmo techlasojlas? Nindeno. Cuajnesi tipanusí míac lacocoltislí hual amo huil tiquitasí quinami timonapatisí. Cuajnesi tipanusí lacocoltislí quiman techtojtocatihualasí pa tejchihuilisí míac amo cualí. Cuajnesi cayasí tonalijmes quiman ticpiasí niman míac mayandí o yajmo techcahuilís tzotzomajlí. Cuajnesi cayasí tonalijmes quiman timoitalo tialo timiquilo. Cuajnesi techmijmictisí. <sup>36</sup> Huan neli unca lajcuilulí pa iamal Dios ilajto, pa in amal Salmos quinami neli tialo tipanulo lacocoltislí yoje, pampa quijtúa: Pampa tiunca toDios, techmictitate mochi in semilhuil, techitalo jan quinami ticataloaya borregos hual quinhuicatiahuiloaya pa quinmictilosquiaya.

<sup>37</sup> Huan mas que techpanúa mochi in amo cualí, ticsulahualo. Huan amo jan ticsulahualo san. Noje ticpiasí niman míac hual amo quipiasí yehuanten hual jan lasulahualo san. Unca pampa Dios techpalehuía niman míac. Huan mochi in cualí ticpialo pan ipampa Jesucristo hual techlasojlac. <sup>38-39</sup> Inon niqijtúa pampa neli nicmatí inon: Sinda timijmiquisí, inon amo quitzacuas Dios pa yajmo techlasojlas. Huan len yes techpanus quiman tiyulticate amo tejtzacuilis pa camo techlasojlas Dios. Huan in iyjecames cuajcualí o amo cuajcualí, huan yehuanten hual huelitilo amo huil tejtzacuilisí Dios ilasojlalislí. Huan inon hual panujtica axan, huan inon hual yahui panúa mosta, huan in huejueyenten amo cuajcualí, huan in iyjecames huejueyenten hual cate niman pa paní, huan yehuanten hual cate pin niman huejcalan, huan len yesi oc sequin hual Dios quinchíac amo quiman huil tejtzacuilis Dios ilasojlalislí pa camo techajsis. Huan techajsi pan ipampa Cristo Jesús toTata.

## 9

### *Dios quinlajtultic yehuanten in israelitos pa yesi ilacames*

<sup>1-2</sup> Nehual niunca se ilacal Cristo huan yoje niqijtutic len melahuac, amo nislacatijtica. Nolajmatilislí laijtic nehual nehmachiltía neli pampa nilajtutic melahuac. Huan in Espíritu Santo nechilía pampa neli nilajtutic melahuac. Yoje niqijtúa nel nicpía míac laicnotilislí hual amo mocahua pa nechcocus noyolo. <sup>3</sup> Quema, ca jan nadita san, nehual huil nicnequisquiaya pa Dios quijtusquiaya pampa nicpía pa nimiquis pa niyesquiaya laquixtilí ilaixpan Cristo sinda pan ipampa inon nocnían judíos quipialosquiaya Dios iyulilislí hual ticpialo tehuanten hual ticneltocalo Cristo. Yehuanten in judíos cate nocnían pampa ticate imiahuimes se, huan pampín niqijtúa yoje. <sup>4</sup> Yehuanten cate israelitos pampa cate imiahuimes totajtzin Israel hual yulini pa yina. Dios quilalic pa yehuanten yelosquiaya quinami ixolomes

pampa quinmolajtultilic. Quilalic pa yehuanten moxiluililosquiaya ilaix-pelalisli cualtichin huan chichahuac. Quilalic pa yehuanten quinmanilisi in lajtomes calica quinnextiliaya quinami lachihualosquiaya yehuanten. Quinnextilic yehuanten pan inminpampa ilajtomes quinami monequi pa quimolancuacuetzilisi. Huan quinmilic yehuanten ilajtomes in cuali hual neli yahuiaya quinchihuili, jan quinami quijtuaya. <sup>5</sup> Tehuanten in judíos noje ticpialo totajtzitzian huejué quinami Abraham huan Isaac huan Jacob huan in oc sequin. Huan Cristo lacatic se judío, yihual inminhué moxtin yehuanten, yihual Dios. Huan ma camo quiman lamican lajtucan hué inahuac yihual. Yoje ma ye.

<sup>6</sup> Ma yoje, amo moxtin in israelitos quineltocaje Dios ilajtol. Amo moxtin yehuanten hual imiahuimes Israel cate neli Dios ixolomes hual tiqintocayaltilo iIsrael Dios. <sup>7</sup> Huan yehuanten imiahuimes Abraham, quema, lacatijthualaje pejtaloaya ca yihual pa yina. Ma yoje, amo moxtin yehuanten quineltocaloaya Dios quinami Abraham quineltocani Dios. Huan pampín yehuanten amo imiahuimes pa inminyolo. Inon Dios ilajtol technextilía pampa quijtúa inon quiman yihual quilaquetzilijtataya Abraham huan quilic: “Niquinlajtultis momiahuil pan ipampa imiahuimes Isaac moxolol. Pan ipampa Isaac tiquinpías momiahuil.” <sup>8</sup> Inon quinequi quijtúa pampa amo moxtin imiahuimes Abraham lacatije pa mochihuasi ixolomes Dios. San yehuanten hual lacatije huan quineltocaloaya inon hual Dios neli quijtúa, yehuanten mochihualoaya imiahuimes Abraham pa inminyolo. Yoje Dios quinmita, pampa quineltocaloaya ilajtol. <sup>9</sup> Cataya yoje pampa inon unca hual Dios neli quilic Abraham, quil: “Pa oc se xihuil quiman monamiquis in tonali, cuaquin quipías Sara se xolol”, quil.

<sup>10</sup> Huan amo jan inon san. Quiman Rebeca noje yahuiaya quinlacatilti in omenten ixolomes totajtzin Isaac, Dios quilic se lajtol melahuac. <sup>11</sup> Monequi pa niquijtus quinami Dios quilic inon Rebeca quiman ayamo lacatije in ome xolomes, huan pampín ayamo quichihuajé len cuali huan len amo cuali. Cataya pa yoje panusquiaya in quinami Dios quilalic. Quilalic pa quinlajtultis yehuanten hual yahuilaloaya yelo ixolomes pan ipampa in lalajtultilisi hual yihual niman pa yina quilalic. <sup>12</sup> Huan Dios san quinlajtultic in omenten xolomes pa yelosquiaya quinami yihual quinequiaya, pampa quilic Rebeca, quil: “In hual quipehualtis inminlacatilisli yehuanten quitequipanuilis in oc se hual quitocas lacatis”, quil. <sup>13</sup> Huan inon unca jan quinami unca ilajtol Dios lajcuiluli, pampa noje quijtúa: “Jacob niclasojlac huan Esaú san pa quinlajtultis sequin pa yesi ixolomes, huan unca jan Dios iyaxca san amo quinlajtultis oc sequin pa yesi ixolomes. Huan amo quipía pa quinlajtultis pampa quichihualo yehuanten len hual quipaquiltía Dios.

<sup>14</sup> Cuaquinon, ¿len tiquijtusi? ¿Tiquijtusi Dios amo quimati quichihuilia se jan quinami quichihuilia oc se? ¡Ma camo quiman quijtu inon amaquil!  
<sup>15</sup> Dios quimati cuali quichihuilia se quinami oc se, pampa yihual amo quiman mocahua pa quichías quinami yihual quilic Moisés, quil: “Niquicnilis aquí yes nicnequi niquicnilía, huan nicpilis laicnililisi ca aquí yes nicnequi nicpilía laicnililisi”, quil. <sup>16</sup> Yoje, se amo cana in cuali hual san Dios huil quichihuilia jan pampa in se quilalía pa canas. Huan amo cana pampa in se quitequipanuilis chichahuac ca mochi ichichualisli pa canas. No, jan yihual cana inon pampa Dios quilalía pa quicnilis in se. <sup>17</sup> Dios ilajtol technextilía inon pan ipampa inon hual unca lajcuiluli inahuac Faraón ihué Egipto. Quijtúa, quil: “Pampa jan inon san nimitzalic pa tiyes ihué Egipto

nican, pa yoje nicnextilis nolahueliltilisli pan ipampa quinami ticlaliaya pa camo ticnequis tichcaquis. Inon nicchía pa yoje lajtusi hué nonahuac nehual pa mochi in lalticpan”, quil. <sup>18</sup> Yoje, aquí yes Dios quinequi quicnilía, yihual quicnilía. Huan aquí yes quinequi quichihuilía pa camo quinequis quicaquis, cuaquín yoje quichihuilía.

<sup>19</sup> Axan, cuajnesi se nechilis, quil: “Huan ¿leca techmotexpahuilijtía Dios tehuanten? Amo unca amaqui huil quitzacuilis pa camo quichías len yihual quinequi”, quil. <sup>20</sup> ¡Huan tehual, lalal! ¿Quinami tel amo timomajtía pa ticnanquilis yoje Dios? Tiunca quinami se tapalcal hual quilisquiaya yihual hual quipantía, quil: “¿Leca tijchijtica yoje?”, quil. <sup>21</sup> O ¿tiqijtúa amo iyaxca se tapalquero pa canas in lali layamanili huan ca in quichías quipantitica se tapalcal cualtichin pa quipilis len quinequi huan pa quilalis capa moxtin huil qitalo quinami unca cualtichin? O ¿ca in lali quichías se tapalcal amo cualtichin pa quipilis len quinequi, se tapalcal hual amaqui quinequi quita?

<sup>22</sup> Jan yoje, unca Dios iyaxca noje pa quichías quinami quinequi ca lacames. Unca iyaxca pa quichías sinda quinequi lanextilía icualanilisli ca in amo cuali hual quichihualo lacames huan sinda quinequi quinnextilía ilahueliltilisli. Amo unca moyaxca pa quinanguilis sinda quinequi quichía yoje. Dios motzacuilic míac xixihuimes pa camo quintilanis pa polehuilisli yehuanten hual cate lachijchihuali pa polehuilisli hual amo quiman lamis. Huan quiman motzacuilic míac xixil pa camo quichías inon, cuaquín quintilanis pa yesi lacocoltili pampa yajmo quitzacuaya icualanilisli. <sup>23</sup> Noje unca iyaxca Dios pa quinlamachiltis lacames quinami quipía niman míac pa quinmacas yehuanten hual quinequi quinmicnilía. Yehuanten cate hual aquinojen yihual quinlajtultic quiman ayamo quichiac in lalticpan. Quinchijchihuilic pa quipiasi ca yihual yulilisli hual amo quiman lamis pin laixpelalisli cualtichin. <sup>24</sup> Yehuanten cate hual quinnotzac pa yesi ixolomes, in quinequi quijtúa amo jan tehuanten san hual ticate judíos. Noje quinequi quijtúa lacames hual amo judíos. <sup>25</sup> Unca jan quinami quijtúa Osee ilajtuni Dios, quinami moijcuilúa pa Dios ilajtol, quijtúa, quil: Yehuanten hual amo yeje nolacames niqintocayaltis nolacames, huan in lacames hual amo niquinlasojlani, axan niquinlasojlas.

<sup>26</sup> Huan jan nepa capa quinmilic, quil:

“Amhuanten amo nolacames”, quil,

axan nepa in lacames qintocayaltisi ixolomes in Dios hual yultica.

Yoje quijtúa pa iamal Osee. <sup>27</sup> Huan Isaías, yihual Dios ilajtuni, quijtúa pa Dios ilajtol lajcuiluli, quil, unca quinami tzajtzi quijtutic in hual yahuiaya quipanu Israel, quil: “Mas que in israelitos cate niman míac pa yoje amo huil quinpuhuililo quinami amo huil quinpuhuililo in xali pan xalipan nepa pa in atenco in al huejcalan, ma yoje jan sejsequin ca yehuanten yes laquixtli pin miqulilis ca capic quinhuica inminlajlaculisli. <sup>28</sup> In Tata amo huejcahuas pa quichías quinami yihual quijtuc pampa yahuiaya quichía pan lalticpan. Amo huejcahuas pa quincocoltis in israelitos, quinami neli quijtuc.” <sup>29</sup> Huan san quinami quijtuc Isaías ca oc se lajtol quiman ayamo panuc, quil:

In Tata unca hual huelitía pan mochi pin cielo huan pan lalticpan, huan sinda amo techcahuilía sequin tomiahuimes,

cuaquinon timochihualoaya timoxtin quinami moxtin pin caltilan itoca Sodoma, jan ajnaxcan catanijme lamictili.

Quema, timochihualoaya quinami yehuanten pin caltilan itoca Gomorra, ticataloaya lamictili timoxtin quinami yehuanten.

*In judíos amo quitalo in lamachiltisli cuali*

<sup>30</sup> Cuaquinon, ¿len huil tiquijtulo inahuac in lajtol? Inon tiquijtulo: In lacames hual amo judíos amo motoliniloaya pa mochihualosquiaya lacames hual Dios quinmitasquiaya lacames amo laijlaculi. Ma yoje Dios quijtuc pampa yehuanten yajmo cate laijlaculi, huan inon unca pampa quinelto caje ilajtol. <sup>31</sup> Amo cataya yoje ca in míac israelitos, in judíos. Motoliniloaya niman míac pa mochihualosquiaya lacames hual Dios quinmita lachipahuali pa camo quipiasí laijlaculisli. Motoliniloaya pa mochihualosquiaya yoje pampa quinelto caloaya in lajtol hual Dios quilib Moisés pa quijcuilus. Ma yoje, amo ajsije quichihuae len quijtúa in lajtol, huan yoje amo mochihualoaya lacames amo laijlaculi pan ipampa quinami quichihualoaya len quijtúa in lajtol hual Dios quilib Moisés. Huan yoje cualanilo sinda se quinmilía quinami mochihualo lacames amo laijlaculi pan ipampa Cristo imiquilisli. Amo quinequilo quinelto calo, cate jan quinami se hual cualani sinda momañajtía pan se tixcali huan huetzi, amo ajsi ca capic quinequi yahui. <sup>33</sup> Huan inon unca lajcuiluli pa Dios ilajtol, quijtúa, quil:

Xiquita, niclalijtica se lalac capa cate nolacames pa Sión, se hual amo quinequisi quicaquisi.

Cayas quinami se tixcali hual quinmomañajtías huan quinhuetziltis huan yojque amo ajsisi ca capic quinequilo yalo.

Ma yoje, aquí hual quilalía ilanelto calisli ca yihual amo quiman moitas lacuaicuananali pampa quinelto caje.

## 10

<sup>1</sup> Nocnían, nicnequi ca mochi noyolo pa yehuanten in judíos yesi laquixtili pin polehuilisli. Huan niclajlanía Dios pa yihual quinquixtilis pin polehuilisli. <sup>2</sup> Annimitzilía neli pampa nicmati quinami yehuanten quichihualo ca mochi inminyolo in hual laijtic yehuanten quijtulo pampa yoje quitequipanuilijtcate Dios. Ma yoje, quichihualo mochi inon amo quinelto caticate in hual Dios ilajtol quinmaxtía quinami se ajsi quiximati Dios.

<sup>3</sup> Yoje, amo quinequiloaya quimatilo quinami se mochías pa yoje Dios quitas quinami se hual amo quipía iyolo laijlaculi. San quitemuloaya quinami huil ajsisi yesi ca inminyolo amo laijlaculi quinami jan yehuanten san quinequiloaya, amo quinami Dios quinequi. Amo quinequiloaya quinelto calo inon hual Dios quilalic, inon calica se ajsis quipías iyolo amo laijlaculi ilaixpan Dios. <sup>4</sup> Pampín, moixpoluje pan ipampa quinami quinelto calo in lajtol hual Dios quilib Moisés pa quijcuilus. In lajtol Dios quilalic san pa quinclaianasquiaya lacames pa quinelto caje Cristo. Yoje Dios quinmita amo laijlaculi moxtin hual quilalilo inminlanelto calisli ca yihual Cristo.

<sup>5</sup> Moisés quijcuiluc in lajtol hual quijtuc quinami se huil quipía iyolo amo laijlaculi, quijcuiluc, quil: “Se hual quichía len quijtúa in lajtol, yihual yulis ca Dios pan ipampa inon.” <sup>6</sup> Ma yoje, pa huil quipías iyolo amo laijlaculi pan ipampa quinami quilalía ilanelto calisli ca Cristo, Dios ilajtol quijtúa, quil: “Amo xiquijtu laijtic moyolo pampa amo huil tilejúca pin cielo.” In quinequi quijtúa, tilejúca pa ticalicas Cristo pa temuán (temuayan) pa mitzquixtilis molaijlaculisli. Amo monequi pa panus inon, pampa axan hualac Cristo pan lalticpan. <sup>7</sup> Huan ilajtol Dios noje quijtúa, quil: “Amo



xiquijtu laijtic moyolo pampa amo huil timochipahuilía moyolo pa yajmo cayas laijlaculi pampa amo huil titemúa pin coyunquil niman huejcalan, nepa capa cate yehuanten hual miquije.” Quinequi quijtúa, titemúa pa ticalicas Cristo pa pani. Amo monequi ticchía inon pampa axan moquetzac Cristo, yajmo unca capa in mijquimes. <sup>8</sup> No, axcan Dios ilajtol techilía len monequi ticchía pa timochías lachipahuili pa moyolo laijlaculi, quijtúa, quil: “Dios ilamaxtilisli huil mitzpalehuía pampa unca ca tehual. Axan tijcaquic huan huil ticpuhua huan huil tiquijnamiquía inon laijtic pa moyolo.” Inon unca in lamaxtilisli hual quinextilía se quinami quilalía ilaneltocalisli ca Dios ilajtol. Inon unca in lamaxtilisli hual ticlamachiltilo: <sup>9</sup> Sinda tiquijtúa inminlaixpan lacames pampa in Tata Jesúcristo quipía mochi lahuelilitisli pin cielo huan pan lalticpan, huan sinda ticneltoca laijtic pa moyolo pampa Dios quiyuliltic oc sepa quiman miquic huan yoje techmachiltía pampa Jesús unca iXolol ca mochi in lahuelilitisli, cuaquinon ticayas laquixtili pin ipolehuilisli Dios icualanilisli. <sup>10</sup> Monequi pa ticchías yoje, pampa ca iyolo se quineltoca huan yoje unca lachipahuili iyolo laijlaculi. Huan ca icamac se quijtúa inminlaixpan lacames in hual quineltoca huan yoje unca laquixtili pin ipolehuilisli Dios icualanilisli.

<sup>11</sup> Unca yoje, pampa Dios ilajtol lajcuiluli quijtúa, quil: “Aquí hual quilalía ilaneltocalisli ca yihual, Dios canas quinami ixolol huan yihual amo moitas lacuajcuamanali iyampa Dios.” <sup>12</sup> Huan Dios ilajtol nican quinmilia inon moxtin, pampa Dios quinchipahuilía inminlajlaculisli yehuanten hual amo judíos jan quinami quinchipahuilía in judíos, pampa yihual in se Tata pa moxtin. Quipía míac cuali pa quinchihuilis moxtin hual quitemachilo. <sup>13</sup> Quijtúa Dios ilajtol, quil: “Moxtin hual quitzajtzilisi Dios pan ipampa itoca yesi layulilti huan amo quitasi Dios icualanilisli.” <sup>14</sup> Ma yoje, amo huil quitzajtzilisi yihual sinda amo quilalije inminlaneltocalisli ca yihual. Huan amo huil quilalisi inminlaneltocalisli ca yihual in Tata Jesucristo sinda amo quimatije quinami miquic pa yehuanten. Huan amo huil quimatilo inon sinda amo unca se hual quinlamachiltis. <sup>15</sup> Huan amaqui huil quinlamachiltis sinda amo quitilanisi ca capic cate pa quinlamachiltis. Huan quintilanilije yehuanten pa quinlamachiltisi, jan quinami unca lajcuiluli. Quijtúa, quil: “¡Quinami unca niman cualtichin pani in lomas (tepemes) pampa quilamachiltihualalo in lamachiltisli cuali! Inon techmaca mosehuilisli ca Dios pa toyolo.” <sup>16</sup> Ma yoje, jan sequin naditas quineltocaje in lamachiltisli cuali, mas que cataya pa moxtin quicaquilosquiaya. Pa Dios iamal, ilajtuni Isaías quijtuc, quil: “Tata, jan sequin naditas san quineltocajque molamachiltisli hual tiquinmilijque.” <sup>17</sup> Axan, se lalac huil quilalía ilaneltocalisli ca se lajtol quiman quicaqui, huan huil quicaqui in lajtol quiman quililo ilajtol Cristo hual yihual quinmilic pa quililosquiaya.

<sup>18</sup> Axan, nilajlanía, ¿amo quiman quicaquije in judíos? ¡Jo quema, neli quicaquije! Dios ilajtol lajcuiluli pa yina quijtúa, quil: Pa mochi in lalticpan mocaquic ixahuanilisli inminlanahuatilisli. Quema, mocaquic inminlanahuatilisli pa itenco niman huejca pin lalticpan capa cate lacames.

<sup>19</sup> Axan, nilajlanía, ¿amo quimatije yehuanten in israelitos, in judíos, quinami Dios yahuiaya quichihuili cuali oc sequin lacames? Quema, pampa Moisés pehuac quinmilic in lamachiltisli hual Dios quinmilic yehuanten in israelitos, quil:

Nehual annimijchahuatiltis pan inminpampa lacames hual anquinxixicus.



Annimitzcualantis pan inminpampa lacames hual amhuanten anquijtúa da amo huil quimatilo nindeno quinami unca Dios.

<sup>20</sup> Huan Isaías amo momajtic quijtuc in hual Dios quilic pampa yahuiaya quinchihuili yehuanten hual amo judíos, quil:

Nechitajque yehuanten hual amo nechtemujtataloaya. Nimonextilic ca lacames hual amo quilajlanijque pa nimochías inminDios.

<sup>21</sup> Ma yoje, quiman quijtúa quinami lachihualo in israelitos, quijtúa, quil:

Mojmosta, sejsmilhuil niqinxilanía nomajmajuan pa niqinnotzas pa hualasi ca nehual lacames hual amo quinequilo nechneftocalo huan lacuilmatilo pa camo quitocasqui no'ojli.

## 11

### *Nican quijcuilúa quinami Dios quinmita in judíos*

<sup>1</sup> Axan, nilajlanía, ¿da Dios cuajnesi quijtutica ilacames Israel, in judíos, yajmo cate iyaxca? ¿Axan quitojpehuac pa yajmo yesi iyaxca? ¡Ma camo quiman quijtu inon amaqui! Xiquitacan. Nehual noje niunca judío, niunca se imiahuil Abraham pan ipampa ixohuio Benjamín. <sup>2</sup> No, Dios amo quitojpehuac pa yajmo yesi iyaxca ilacames hual yihual quinlajtultic niman pa yina. ¿Amo anquimati len Dios ilajtol techpuhuilía quiman Elías, hual yec ilajtuni Dios pa yina, motexpahuiaya ca Dios pampa yehuanten in israelitos quinequiloaya quimictilo? Quilic: <sup>3</sup> “Tata, quinmictijque molajtunijmes huan quinxitinijque innojen capa quinlalilo inminpan inminhuendis pa mi-jchichinuilosquiaya. Huan jan nehual san nimocahua nohuán, nehual san nimitzneltoqa, huan nechtemujticate pa nechmictisqui.” <sup>4</sup> Huan ¿quinami quinanguilic Dios? Quinanguilic, quil: “Cate chicome mil lacames hual nimocahuilic nehual, huan yehuanten amo quiman quimolancuacuetzilizijque in mono Baal.” <sup>5</sup> Yoje, axan cate sequin judíos noje hual quineltocalo Dios ilajtol, Dios quinlajtultic pan ipampa ilachihualisli cuali. <sup>6</sup> Huan sinda quinlajtultic pan ipampa yihual ilachihualisli cuali, cuaquín yajmo huil quijtulo pampa Dios quinlajtultic pan ipampa len yehuanten cuajnesi quichihuaje pa yoje Dios quinequisquiaya quinlajtulti. Sinda quinlajtultiaya quinami yojqe, cuaquinon in cuali hual san Dios huil quinchihuilía cataya laxlahuilisli.

<sup>7</sup> Axcan, ¿len huil tiquijtulo inahuac inon? Inon hual in israelitos quitejtemuje huan motolinije pa quipialosquiaya hual san Dios huil quinmacasquiaya, inon amo canaje. Ma yoje, in israelitos hual Dios quinlajtultic, quema, canaje. Huan moxtin in oc sequin israelitos Dios quintzacuilic pa camo quimatilosquiaya len quinequiaya quijtu ilajtol. <sup>8</sup> Panuc ca yehuanten jan quinami unca lajcuiluli pa Dios ilajtol, quil: “Dios quinmacac inminyolo hual amo quimati. Yoje quinxitinic pa camo huil mochihuasi ilacames. Cate quinami amo huil lachialo ca inmixtololojmes huan amo huil lacaquilo ca innacajmes. Yoje mocahualo axan quinami cataloaya pa yina.”

<sup>9</sup> Huan David pa yina quijtúa ca Dios ilajtol, quil:

Quilalijque inminlaneltocalisli ca quinami quichihujque quinami quijtúa in lajtol hual Dios quinmacac pa yina huan yojqe pa inminyolo quijtulo mochi unca cuali ca yehuanten.

Cate quinami lacames hual molijticate pan capa unca lacualisli, quijtulo mochi yahui cuali. Ma yoje, moixpolulo.

Pampín ma quinmajsitiquisa ilacocoltilisli Dios hual yoje monequiaya quinmajsi.

Ma quinmajsi quinami quipanúa se yulijquil hual unca laquitzquili ca se laquitzquiloni.

<sup>10</sup> Ma yén (yecan) latzacuali pa camo quimatisqui quinami moixpolujque, pampa amo quimatiloaya in hual quinequi quijtúa Dios ilamaxtilisli. Huan ma siahuican inmincotes ca lamamanijquimes huejué.

*Quinami Dios quinquixtia pin polehuilisli yehuanten hual amo judíos*

<sup>11</sup> Quipoluloaya in judíos Dios iojli pampa quintzacuiliaya inminlajlaculisli, unca quinami momañajtiloaya. Axan, nilajlanía, ¿pampa inon mocahuasi laxiluli pa camo quiman huil mocuepasi pa Dios? ¡Ma camo quiman quijtu inon amaqui! Ma yoje, pampa mocxiluloaya pa yajmo cayalosquiaya pan Dios iojli, yoje yehuanten hual amo judíos cate canticate Dios iojli. Huan inon quinchahuatiltis in judíos pa quinequisi canasi iojli Dios. <sup>12</sup> Quema, amo quineltoaje Dios ilajtol in judíos, yoje quipoluje in míac hual Dios quinequiaya quinmaca. Huan yehuanten hual amo judíos canaló in míac hual Dios yahuiaya quinmaca in judíos. Ma yoje, ajstitihualó tonalijmes capa in judíos cayasi lalalili oc sejpa ca Dios ilacames. Pa in tonali hual panus inon, cuaquinon neli moxtin Dios ilacames, yehuanten in judíos huan yehuanten hual amo judíos, canasi in niman míac cuali hual san Dios huil quinmaca. Pa mochi innojen xixihuil hual pehuaje panuje pa yina huan panujtihualoaya pa axan, tehuanten ilacames Dios ayamo ticanaje in míac cuali quinami tialo ticanalo.

<sup>13</sup> Ma yoje, inon annimitzilijtica amhuanten hual amo judíos. Unca neli Dios nechlalic pa niyesquiaya ilanahuatini ilajtol ca amhuanten hual amo judíos. Huan in notequipanulisli niqita quinami monotza niman míac.

<sup>14</sup> Pampa inon, cuajnesi niquinchahuatiltis nocnían in judíos, pa yoje quinequisi Dios ilatuchihualisli hual ticpialo tehuanten. Yoje huil niquinpalehuis sequin judíos pa quilalisi inminlaneltoalisli ca Cristo. <sup>15</sup> Inon nicnequi nichía, pampa Dios quitojpehuac ilaixpan yihual pa yajmo quipialosquiaya ilachihualisli cuali. Huan yoje pampa inon yehuanten hual amo judíos huil canaló in cuali hual yihual quinchihuilía. Cuaquinon sinda Dios quinmanas in judíos oc sejpa pa quinlalis ca ilacames, cuaquinon yes quinami mijquimes pehualo yulilo oc sejpa. <sup>16</sup> In judíos quixiluililo yihual Dios san ilajquito ilapehualtili in textli hual quichihualo ca in trigo hual pehualo quipixcalo. Quixiluililo quinami huendi. Dios quita in fajquito quinami iyaxca. Noje ca in lajco Dios quita quinami quimacaloaya in judíos mochi in textli pa yesquiaya iyaxca. Huan sinda Dios quita iyaxca yihual ilalhuayol se cuahuil, cuaquin iitzmolinquimes (iramas) cate iyaxca. Huan jan yoje ca in judíos. Sinda Dios quinmita quinami ilacames iyaxca in judíos hual yeje inminlapehualtilisli yehuanten hual quineltoaje Cristo, cuaquinon quinmita moxtin in judíos quinami ilacames iyaxca.

<sup>17</sup> Huil tiquijtulo in judíos cate quinami se cuahuil hual laqui olivos pa se cuajmili. Sequin iitzmolinquimes (iramas) cataloaya lacotonali. Huan tehual hual amo judío, ma tiquijtuacan tehual tiquinami iitzmolinquil (irama) se cuahuil hual laqui iolivo in cuajlan huan mitzaniltije pa iitzmolinquimes (iramas) in olivo pin cuajmili. Yoje ca yehuanten ticpixtica molajco iayo chahuac ichoquis in cuahuil pin cuajmili hual laqui olivo. <sup>18</sup> Ma yoje, amo xiquinxixicu in iitzmolinquimes (ramas) hual cataloaya lacotonali, nicnequi niquijtúa, amo xiquinxixicu in judíos hual amo quineltoalo. Quema, sinda tilajtúa hué monahuac tehual, ma yoje, xiquijnamiqui amo unca tehual hual ticpalehuía in lalhuayol, unca in lalhuayol hual mitzpalehuía.

In quinequi quijtúa Dios iicnililisi mitzajsic tehual pan ipampa Abraham huan imiahuimes. <sup>19</sup> Cuaquinon cuajnesi tiquijtus: “Sequin itzmolinquimes (ramas) cataloaya lacotonali pa yoje niyesquiaya la'anilti.” Quinequi quijtúa sequin judíos cataloaya laquixtili pa ilaixpan Dios pa yoje tiyesquiaya lalalili nepa. <sup>20</sup> Quema, nimitzilía, huan amo unca jan yoje san. Cataya pampa yehuanten amo quineltoaje inon quinami Dios quinquixtilía inmin-laijlaculisli pan ipampa Cristo. Pampín mocahualo quinami itzmolinquimes (ramas) lacotonali. Huan tehual ticneltocac huan pampín tiunca ca Dios mitzicnilijtica, tiunca quinami itzmolinquil (rama) la'anilti. Yoje, amo ximoixtoca pampa inon. Yes cuali pa timomajtis. <sup>21</sup> Unca pampa sinda Dios amo quitac cuali pa quinpixtiahuisquiaya in judíos ca ilacames capa cataya inminyaxca pa yesi quinami iitzmolinquil (irama) se cuahuil olivo hual cataya latocali pin cuajmili, cuaquín Dios amo quitas cuali mitzpixtías ca ilacames sinda yajmo ticneltocáticas tehual hual tiunca quinami irama se cuahuil hual laqui olivos pa cuajlan. <sup>22</sup> Xiquita, axcan, quinami Dios quinchihuilía sequin cuali huan ca oc sequin quinchihuilía amo ca iicnililisi. Ca yehuanten hual yajmo quinequije quineltoctajaje, yihual amo quinmicnilic. Huan ca tehual mijchihuilis cuali sinda tiyultías ticneltocáticas. Yihual mitzpiá pan ipampa in cuali hual san yihual huil mijchihuilía. Sinda yajmo ticneltoca inon, cuaquinon tehual noje mitzquixtis Dios pa camo ticayas ca ilacames quinami amo cayasi innojen itzmolinquimes (ramas) lacotonali ca in cuahuil. <sup>23</sup> Huan innojen oc sequin, in judíos, sinda yajmo yultiasi amo quineltoctate, huan pehuasi quineltoctasi, cuaquinon cayasi lalalili oc sejpa ca Dios ilacames, quinami se itzmolinquil (rama) la'anilti oc sejpa pan se cuahuil. Dios quipía lahuelilitilisi pa quilalilis oc sejpa ca ilacames. <sup>24</sup> Huan Dios, quema, quinlalis oc sejpa, pampa sinda tehual mitzalic ca ilacames, cuaquinon iquinami amo quixtocas míac quinlalis in judíos oc sejpa ca ilacames! Inon unca pampa tehual tiquinami iitzmolinquil (irama) se cuahuil olivo pa cuajlan hual cataya lalalili pan se cuahuil olivo pin cuajmili. Yehuanten in judíos cate quinami iitzmolinquimes (iramas) in cuahuil olivo pin cuajmili, pampa yehuanten cataloaya ilapehualtilisi Dios ilacames. Huan neli amo unca tequipanulisi hué pa se caniltis oc sejpa iitzmolinquil (irama) se icuahuil olivo in cuajmili pan icuahuil in cuajmili capa quicotonilije, pampa quipialo míac lahuelilitilisi pa moanilisi.

### *In judíos quema, mocuepasi ca Dios*

<sup>25</sup> Pampín, nocnían, nicnequi pa neli anquimatis inon, pa camo anquimatiltis pampa amhuanten anquipía míac lajmatilisi, anquijtutica Dios yajmo quipía nindeno pa quitas ca in judíos. Unca pampa Dios axan quilamachilitica len inminahuac in judíos hual ayamo ticmatije, huan unca inon: In niman míac judíos mocahualo amo quinecticate quimatilo len quinequi quijtúa Dios ilajtol hual quilamachilitía quinami Cristo techquixtía pin polehuilisli. Yoje mocajtcate axan. Ma yoje, ajsis se tonali hual moxtin yehuanten hual amo judíos hual Dios quinlajtultic pa mochihuasi iyaxca lamisi ajsisi quineltoctasi Cristo. <sup>26</sup> Huan cuaquinon, mochi Israel, hual quinequi quijtúa mochi in judíos, yesi laquixtili pin polehuilisli, quilalisi inminlaneltoctalisli ca Cristo. Yoje panus jan quinami unca lajcuiluli pa Dios ilajtol, quil:

Nesis ca Israel capa chantilo pin Sión, se hual quinquixtis pa inminpolehuilisli.

Yihual quinquixtilis in amo cuali moxtin ilacames Jacob, pa yoje quinequisi quineltoyasi Dios.

<sup>27</sup> Huan pa in tonali hual niinquixtilis inminlajlaculisli pan ipampa in lalac, cuaquinon ca inon nilaquisac nicchíac in lajtulisli hual nicchíac ca yehuanten.

Yoje quijtúa ilajtol Dios pa yina.

<sup>28</sup> Sinda tiquinmitalo ilacames Israel yoje quinami amo quinequilo quineltovalo Dios ilamachilitlisli cuali, cuaquinon tiquijtulo yehuanten quilalije pa camo quixtocasi Dios. Huan pampa amo quixtocaje ilamachilitlisli cuali, yoje inon cataya cuali pa amhuanten, pampa Dios anmitzitat amhuanten in amo judíos ca iicnilisli. Huan sinda tiquinmitalo ilacames Israel quinami yehuanten hual Dios quinlajtultic quiman ayamo anmitzljajtultic, cuaquinon tiquijtulo yehuanten Dios ilacames hual yihual quinlasojla niman míac pampa yoje quinmilic quiman quichíac in lajtulisli ca inmintajtzitzián pa yina. <sup>29</sup> Dios amo quiman mocahuac pa quinlasojlas in judíos, pampa amo quiman mopatilia len quilía, amo quiquixtilia se in hual quimacac. Huan sinda quinoztá se pa yes se ca yihual ilacames, cuaquinon in se amo quiman mocahua pa yes se ca ilacames. <sup>30</sup> Yoje pa yina amo anquineltoyasi Dios. Axan Dios anmitzicnilijtica huan anmitzpujpujtica pampa yehuanten in judíos amo quineltovalocate. <sup>31</sup> Axan amo quineltovalocate Dios pampa Dios anmitzicnilic amhuanten. Huan quiman in judíos ajsisi quimatisi inon, cuaquinon yehuanten noje quinequisi pa Dios quinmicnilis. <sup>32</sup> Unca yoje pampa Dios quincajcahuac moxtin lacames pa huil quichihuasi quinami quinequilo, amo quineltovalocate. Inon quinchihuilic pa yoje huil quinmicnilisquiaya moxtin, amo monotza sinda yehuanten judíos o amo judíos.

<sup>33</sup> Ah, ¡quichi míac, amo quiman lami in cuali hual Dios quinchihuilia lacames! ¡Amo quiman lami ilahuelilitlisli huan ilajmatilisli pa quichías mochi niman cuali, huan yihual quimati mochi! Lacames amo huil lajlanilo pa quimatisi len quinequi quijtúa mochi hual quichía huan leca yihual yoje quilalía pa quichías mochi hual quichía. Huan amo huil quimatilo quichi míac ojlimes calica yihual quinchihualtía lacames inon hual yihual quilalic pa mochías. <sup>34</sup> Quema, “amo unca amaqui hual quimatic len Dios quijnamiquía huan amo unca amaqui hual huil quilía quinami monequi pa Dios quichías len. <sup>35</sup> Huan amo unca amaqui hual pehuac quimacac Dios len pa huil quijtus pampa unca iyaxca pa quijtus pampa Dios quipía pa quilaxlahuis pa inon.” <sup>36</sup> Unca pampa mochi hual unca hualac pejtataya capa unca Dios. Pan ipampa yihual mochi yec lachihuali jan quinami yihual quinequic. Huan pa yihual unca mochi in hual yec lachihuali, pampa yihual quilalic pa yoje yesquiaya. Pampín ¡ma camo quiman mocahuacan moxtin pa quimacasi míac lasojlalisli niman hué! Yoje ma ye.

## 12

### *Monequi pa tiyulisi jan pa Dios san*

<sup>1</sup> Yoje, nocnían, pampa Dios techicnilía niman míac, annimitzilía ca noyolo, ximotemacacan Dios amhuanten jan quinami huendi yultica huan niman chipahuac, hual Dios quinequi cana ca lasojlalisli. Se huendi quinami inon quimaca Dios paquilisli. Huan yoje anquimatisi pampa anquimolancuacuetzilía Dios ca anmoyolo huan anmolajnamiquilisli. <sup>2</sup> Huan ximocahuacan pa camo anquinequis anyulis quinami yulilo amo cuali yehuanten hual jan quijnamiquilo in hual yes pa yehuanten pin lalticpan. Anmochihuilis

cuali anmopalatica quinami anyuli pa yoje anyulis quinami Dios quinequi. Huan anquipalas quinami anlajnamiquía. Yoje anajsis anquimatis quinami Dios quinequi pa tiyesi huan quinami quinequi pa ticchihuasi. Huan yoje anquimatis anquichías in hual yes cuali huan in hual quimaca paquilisli Dios huan in hual techajxiltía capa ticpiasi mochi hual unca cuali pa tehuanten. <sup>3</sup> Quiman nechnotzac Dios pa niyes ilanahuatini, nejchihuulic miác cuali hual san yihual huil quichihuilía se. Pampa inon, niquilía sejse ca amhuanten pa camo quijtus laijtic iyolo yihual unca hué sinda amo unca yoje hué. Monequi pa quijtus laijtic yihual iyolo jan melahuac, jan quinami quijtúa melahuac laijtic iyolo quinami oc sequin cate. Inon na quichihua mochi sejse ca amhuanten quinami Dios quilamachihuulic lahuellitlisli pa quineltocas in hual quijtúa ilajtol. <sup>4</sup> Monequi pa camo tiquijtusi pa toyolo pampa ticate hué. Unca pampa pa se icuerpo quinpía icxían huan imajma huan inacas huan ixtololon, huan sejse ca innojen motequipanúa amo jan yoje quinami motequipanulo in oc sequin. <sup>5</sup> Huan jan yoje tehuanten timoxtin timochihualo quinami se cuerpo san pa Cristo, pampa mochi sejse ca tehuanten ticate quinami laipili ca yihual pa tiyesi quinami se cuerpo san ca yihual. Huan quinami innojen pa se icuerpo molinilo, se quipalejtica oc se, yoje ticchihualo.

<sup>6</sup> Tehuanten ticpialo lahuellitlisli hual in Espíritu techmaca, huan se quipía ilahuellitlisli hual amo unca yoje quinami unca ilahuellitlisli oc se. Inon unca pampa Dios tejchihuilía cuali hual san yihual huil tejchihuilía, yoje pan se tonali, yoje pan oc se tonali. Quema, tejchihuilía quiman ticlalilo tolanellocalisli ca Cristo. Pampa yihual techueliltía, cuaquín ma titequipanucan cuali ca inon calica techueliltía. Sinda in Espíritu techmacac lahuellitlisli pa tiquijtusi len ilajtol Dios hual yihual techmacac jan axcan, ma tiquijtucan yoje quinami quijtuaya Dios ilamaxtilisli. <sup>7</sup> Sinda techueliltía in Espíritu pa tiquitequipanuilisli Dios ilacames, ma tiquitequipanuilican cuali. Sinda in Espíritu quimacac se in lahuellitlisli pa lamaxtis, ma quimaxti Dios ilamaxtilisli. <sup>8</sup> Sinda quimacac se in lahuellitlisli pa quinmaca chichualisli Dios ilacames pa yulisi yoje quinami quijtúa Dios ilamaxtilisli, ma quichía. Sinda quimacac lahuellitlisli pa quinxiluilis pa oc sequin len quipía hual iyaxca, ma quinchihuili amo quinami se tzutzucal, amo quichixtica pa quicuepilisi o pa yehuante quitasi quinami se hué. Sinda quimacac lahuellitlisli pa yes laicanani pa Dios ilacames, ma quichía ca mochi iyolo. Sinda quimacac lahuellitlisli pa quinpalehuis yehuante hual amo quipialo nindeno, ma quichía ca mochi iyolo.

*Monequi pa quichías inon se hual quipía Dios iyulilisli yancauic laijtic yihual*

<sup>9</sup> Xiquinlasojlacan melahuac oc sequin, amo san ximonextican quinami anquinlasojla. Xictemucan quinami anmotzacuilis pa camo anquinchihuilis oc sequin len amo unca cuali. Huan ca mochi anmochicahualisli, ximotolinican pa anquinchihuilis in hual unca cuali huan in hual quinpalehuis moxtin. <sup>10</sup> Amhuante Dios ilacames. Pampín ximolasojlacan se huan oc se ca anmoyolo, jan quinami lacames inmicnían molasojlalo. Mochi sejse ca amhuante ma caya mochi in tonalijmes ca niman miác lasojlalilisli pa oc sequin. Amo xictemucan pa oc sequin anmitzlasojlalo yoje. <sup>11</sup> Amo quiman xilatzejtican. Xicaya anquichijtica len yes Dios quinequi. Ximochihuaitican miác quiman anquitequipanuilijtica in Tata. <sup>12</sup> Xicpiacan paquilisli pampa anquimati neli anmitzajsis in niman cuali hual anquichixtica pa Dios anmitzmacas. Ximopepenialtican in amo cuali hual anmijchihuililo

yehuanten hual amo quineltocalo Cristo. Amo ximocahuacan pa anyulis anquilajlantica Dios.

<sup>13</sup> Sinda amo quipialo míac Dios ilacames, cuaquín xiquitacan inon quinami amhuanten ancataya hual amo anquiapiaya míac huan xiquinpalehuican anquinmacatica in hual amo quipialo. Xiquinnamiquican quinami amocnían yehuanten hual amo lacatije pa anmolali hual amo quipialo capa chantisi huan amo quipialo len quicuasi.

<sup>14</sup> Xiclajlanican Dios pa quinchiuilis cuali yehuanten hual anmitztojtocalo pa anmijchiuilisi amo cuali. Amo xiclajlanican pa Dios quinchiuilis amo cuali yehuanten, anquincocolijtica ca lajtomes amo cuajcuali huan chijchicahuac.

<sup>15</sup> Xiquinnexilican oc sequin hual quipixticate paquilisli quinami amhuanten noje anquipía paquilisli pampa yehuanten quipialo paquilisli. Huan sinda oc sequin quincoculo inminyolo, cuaquinon ma anmitzcocu anmoyolo amhuanten noje ca yehuanten.

<sup>16</sup> Huan mochi tonalijmes capa anunca amhuanten ma caya se laijnamiquilisli se ca oc se. Amo xictemucan quinami amochías huejueyenten. Yes cuali pa anmomacahuiltis pa ancayas quinami yehuanten hual moitalo tijtipichin. Amo ximomatiltican, amo ximoitacan quinami lacames ca niman míac lajmatilisi.

<sup>17</sup> Amo quiman xijcuepilian amaqui amo cuali sinda anmijchiuilic amo cuali. Xilajnamiquican pa yoje mochi hual anquichías yes cuali hual moxtin quitasi quinami unca cuali. <sup>18</sup> Huan sinda huil, cuaquinon xicayacan ca mosehuilisi pa anmoyolo ca moxtin, yoje quinami anmitzajsi pa ancayas, yoje quinami anquipía lahueliltilisli pa anquichías inon. <sup>19</sup> Lasojli nocnían, amo xiquincuepilian yehuanten hual anmijchiuililo amo cuali. Monequi pa anquimacahuiltis pa ajsis Dios icualanilisi inminpan, pampa yoje unca lajcuiluli Dios ilajtol, quil: “Jan nehual san unca noyaxca pa niquincuepilis, huan niquincuepilis, quijtúa in Tata.” <sup>20</sup> Yes cuali pa anquichías quinami noje quijtúa: “Sinda mayantica yihual hual amo mitzixtoca, xicmaca len quicuas. Sinda amictica, cuaquín xicmaca len cunis, pampa sinda inon ticchihuila, yoje ticchihuilis pa lalas ca pinahuilisi, yes quinami ticmontatica huandi pin se tapalcal pani itzontecon.” <sup>21</sup> Amo ximacahuiltican pa anmoyolo quipolus ichicahualisli pampa anmijchiuililo in hual amo cuali, huan amo ximomacahuiltican pa anmocualantis pa yoje anquinchihuilis amo cuali oc sequin. Xicchiuacan in hual cuali, huan yoje in amo cuali yajmo monotza len, pampa ca in cuali tiquinsulahuia yehuanten hual anmijchiuililo amo cuali.

## 13

### *Dios ilacames quipialo pa quineltocasi yehuanten hual huelitilo*

<sup>1</sup> Ma quilali mochi sejse laijtíc itzontecon pa quinneltocas yehuanten hual huelitilo, pampa jan Dios quimacac lahueliltilisli pa inon. Huan pa yehuanten hual huelitilo cataya yihual Dios hual quinlalilic sejse itequipanulisli.

<sup>2</sup> Pampín, aqui hual quilalía pa ilajnamiquilisi pa como quineltocas in se hual quipía in lahueliltilisli, yoje yihual amo quineltocatica in hual Dios quilalic. Huan sinda lacames quilalisi pa como quineltocasi in hual Dios quilalic, cuaquinon pampa inon Dios quijts yehuanten cayasi lacocoltili.

<sup>3</sup> Yoje, yehuanten hual yulilo quichijtcate in hual amo unca quinami quijtúa in lajtol momajtilo pampa yehuanten hual quipialo lahueliltilisli huil latilanilo pa panusi lacocoltilisi. Ma yoje, amo momajtilo inminlaixpan

yehuanten ca lahuelilitlisli in lacames huan sihuames hual yulilo quichijtica len cuali. Axan, ¿ticnequi tiyuli amo timomajitica inminlaixpan yehuanten hual quipialo lahuelilitlisli? Cuaquín xicchá in hual unca cuali, huan inon yehuanten quixtocasi. <sup>4</sup> Dios quinlalic pa huelitisi pa mitzpalehuisi pa ticpixtías in hual moyaxca huan pa mijchihuilisi cuali. Sinda ticchías in hual amo cuali, cuaquín monequi pa timomajtis, pampa neli unca inminyaxca pa quinmacasi je laxacualulisli. Yehuanten cate Dios itequipanujquimes pa quicocoltisi ca Dios ilahuelilitlisli aqui hual quichía amo cuali. <sup>5</sup> Yoje, monequi pa se quilalis pa itzontecon inon pa quinneltocas, amo jan pampa Dios quinmacac lahuelilitlisli pa cajcajuas pa yes lacocoltili san. Noje monequi quichía yoje se pa yoje quipías se mosehuilisi pa ilajmatilisli pa iyolo calica quimati len unca cuali huan len amo unca cuali. Pan ipampa in lajmatilisli, yoje quimati se quinami Dios quinequi pa quinneltocas yehuanten hual quipialo lahuelilitlisli. <sup>6</sup> Pampa inon noje anquilaxlahuía ilapixcalisli in tomin. Unca pampa yehuanten cate Dios itequipanujquimes. Tequipanulo huelitijtcate quinami Dios quinlalic pa quichihuasi.

<sup>7</sup> Xiquinmacacan moxtin in lacames hual quipialo lahuelilitlisli in hual anquihuiquilía hual unca quinami quijtulo ilajtomes in lahuelilitlisli. Xiclaxlahuican ilapixcalisli tomin aqui hual quipías pa anmitzanilis, ma yén (yecan) tomin hual anquipías pa anquilaxlahuis pa anmolalimes o pa anmolapixcalisli. Xicmatican ximomajtan inminlaixpan yehuanten hual quipialo lahuelilitlisli pa quijtusi sinda se quipías pa yes lacocoltili pampa quichía amo cuali. Huan xiquinmacacan lasojlalisli yehuanten hual quipialo inminyaxca pa lacames quinmacasi lasojlalisli.

*Inon Dios quinmilic pampa quipiasí pa quinchihuilisi inmicnán*

<sup>8</sup> Amo xiquihuiquilian amaqui nindeno, xiquinlaxlahuican mochi hual anquihuiquilía. Ma yoje, unca se lachihualisli hual amo quiman anlaquisas anquipías pa anquihuiquilis huan anquinmacas moxtin in oc sequin. Inon unca anmolasojlalisli. Quema, unca quinami tiquinhuiquililo tiquinlasojlalo moxtin hual tocnán. Unca pampa aqui yes quilasojla oc se hual huan yihual moitililo huan yuli quichihuilijtica cuali, yoje in se quichíac mochi in hual in lajtol quijtúa. <sup>9</sup> Dios ilajtomes hual quijtulo: “Amo ximoteca ca se sihual o se lalac hual amo mosihua o molahuical, amo xilamicti, amo xilaixtequi, amo xicnequi pa ticpiás len amo moyaxca”; huan sinda unca len yes lajtol quinami innojen, cuaquín mochi in lajtomes mochihuasi sinda se yuli quichijtica in lajtol hual quijtúa: “Ticchihuilis lasojlalisli yihual hual unca monahuac jan quinami timochihuilisquiaya tehual noje.” <sup>10</sup> Yihual hual quilasojla in se hual unca inahuac amo quichihuilis nindeno amo cuali. Pampín, sinda se quilasojla, yojqe quichía mochi hual quijtúa Dios ilajtol.

<sup>11</sup> Yoje, xicchihuacan mochi inon. Huan amo inon san. Noje anmitzmonotzilía pa anquichías, pampa anquimati quinami panulo molalujtialo in tonalijmes. Axan unca in tonali pa anejas, amo xicpiacan cochilisli. Nicnequi niquijtúa, unca in tonali pa anpehuas antequipanus ca mías mías chicachualisli pa anyulis yoje quinami quinequi Cristo, pampa moajxiltihuala in tonali hual Cristo techquixtilis pa yajmo quiman timocuepasi ticayasi pin polehuilisi hual ticmatilo nican pan laticpan. In tonalijmes hual tipehuaje ticneltocaje Cristo, yahuiaya huejcahua pa ajsisquiaya in tonali. Amo cataya quinami unca axcan, pampa panuje mías tonalijmes huan yajmo yoje huejcahuas pa ajsis. <sup>12</sup> Unca quinami axan lantica in layúa, quinequi quijtúa, lanticate in tonalijmes quiman ticate pan laticpan ca mochi in laicnotilisli huan laticumactilisli. Axan ajsitihuala in huajtzinco



quiman ticayasi ca Cristo ca mochi ilaixpelalisli cualtichin huan chichahuac. Yoje, ma timocahuacan pa tiquinchihuasi in hual amo cuali, hual ticinequilo ticchihuasi capa amaqui techita. Ma ticayacan ticchijtcate mochi quinami ticataloaya mojmosta pin lahuilisli. Ma ticayacan quinami se guache hual lanesi huan molaquentia ca tzotzomajli huan teposli calica moana. Molaquentia yoje pa camo cayas lasulahuali. <sup>13</sup> Ma tiyulican yoje cuali quinami ticchihualo quiman moxfin techiztcate. Ma camo quiman timoitacan ca yehuanten capa tzajzticcate huan cunticcate alcohol huan mochi len yes calica lahuanalo. Ma camo quiman tiyultiacan timotecaticate ca oc sequin sihuames o lacames. Ma camo tiquinchihuilijtian ca yehuanten len techpinahualtilo. Ma camo quiman tiyulican timocualantiticate ca oc sequin, huan timocualaniljtiasi inminahuac oc sequin. <sup>14</sup> Yes cuali pa anyulis quinami in Tata Jesucristo, jan quinami yihual anmijchiac pa anyes quinami yihual. Huan amo quiman xiquijnamiquican quinami huil ancanes len pa anquipaquiltis anmoyolo laijlaculi sinda quinequi pa anquichias len amo cuali.

## 14

### *Amo xictemu pa tiquitilis laijlaculisli mocni*

<sup>1</sup> Xicanacan quinami anmocni aqui yes hual quilalia ilaneltocalisli ca Jesucristo. Ma yoje, cate sequin tocnian hual amo unca chichahuac inminaneltocalisli. Pampin, amo ximoanilican ca lajtomes inminahuac innojen hual ticchihualo hual huejtica ca timoxtin amo ticate ca se laijnamiquilisli. Cuajnesi tocnial hual amo quineltoaca Cristo chichahuac quijtua yihual quipias pa quichias oc se lachihualisli pa quipaquiltis Dios, amo huil quijtua "in san" sinda jan quilalis ilaneltocalisli ca Jesucristo san. <sup>2</sup> Annimitzmaca se lajtol hual lanextilia inon. Se laneltocani quijtua pampa huil quicua mochi. Ma yoje, in se hual amo quipia ilaneltocalisli chichahuac cuajnesi quijtua quipaquiltis Dios sinda quicua jan len moscaltia pin lali san. <sup>3</sup> Yihual hual quicua mochi ma camo quixixicu in se hual amo quincua. Huan yihual hual amo quicua mochi, ma camo quijtu len hual lanextilia pampa yihual quijtua pa iyolo pampa in se hual quicua mochi quichijtica laijlaculisli. Unca pampa Dios canac quinami ixolol. <sup>4</sup> Tehual, leca tiquijtua unca moyaxca pa timolalis quinami se hual quipia lahuiltilisli pa quijtus itequipanujquil oc se lalac da quichia cuali o amo cuali? Unca iteco in tequipanujquil hual iyaxca pa quijtus inon. Huan jan yoje toTeco in Tata Jesus cayas quinchihuilitica in hual iyaxca ca lacames hual cate tocnian hual quineltoalo, quipia lahuiltilisli pa quipalehuis pa camo mocahuas pa yes se ca ilacames.

<sup>5</sup> Annimitzilis oc se lajtol hual lanextilia. Cuajnesi unca se lalac quijtua pampa monequi pa ticmacasi Dios miac lasojlalisli pan se tonali, huan amo yoje miac lasojlalisli pan oc sequin tonalijmes. Cuaquinon unca oc se lalac hual quijtua pampa amo monotza nindeno calia tonali yes, pampa quijtua se tonali unca jan quinami oc se tonali pa ticmacasi lasojlalisli Dios. Yoje, monequi pa sejse cayas lanextili cuali ca yihual ilainamiquilisli in hual yes in niman cuali. <sup>6</sup> Aqui hual quijtua se tonali unca hue huan in oc sequin tonalijmes amo yoje huehue, cuaquin yihual quijtua yoje pa quimacas lasojlalisli in Tata. Huan aqui hual quijtua in se tonali unca quinami in oc sequin tonalijmes, yoje yihual noje quimaca lasojlalisli in Tata. Yihual hual quicua mochi hual unca pa lacames quicuasi, yoje yihual quimaca Dios lasojlalisli pampa quisehua pa len quicua. Huan yihual hual amo quicua



innojen hual oc sequin quicualo, yoje yihual quimaca Dios lasojlalisli ca quinami amo quicua, huan yihual noje quisehua Dios pa in hual quicua.

*Monequi pa tiyulisi tiquijnamicticate quinami oc sequin tocnán quiztialo in hual ticchihualo*

<sup>7</sup> Unca pampa amo unca se ca tehuanten Dios ilacames hual yuli pa yihual ihuán. Huan amo unca se ca tehuanten Dios ixolomes hual miqui pa yihual ihuán. Amo unca toyaxca pa ticlalis quiman timiquisi. <sup>8</sup> Unca pampa sinda tiyulilo, cuaquinon unca pa in Tata tiyulilo, pampa yihual quinnexilis oc sequin ilahueliltilisli niman hué pan topampa tehuanten. Sinda timiquilo, cuaquinon timiquilo pa in Tata, pampa yihual quilalis in tonali quiman timiquilo huan tehuanten amo timocahualo pa tiyesi iyaxca pampa tiyultialo ca yihual. Yoje, sinda tiyulilo o sinda timiquilo, ma yoje amo timocahualo pa tiyesi iyaxca in Tata Jesucristo. <sup>9</sup> Ticate iyaxca yihual pampa inon hual nía annimitzilía: Cristo miquic huan yulic oc sejpa. Yoje unca yihual iyaxca pa huelitis pan icnían hual miquije jan quinami unca yihual iyaxca pa huelitis pan icnían hual yulticate.

<sup>10</sup> Huan tehual, ¿leca tiquijtúa unca tehual moyaxca pa tiquilis amo quichía cuali mocni hual Cristo canac quinami se icni? ¿Huan tiquijtúa amo quichía cuali pampa tiquijtúa yihual amo quichijtica mochi hual Dios quinequi? O tehual, ¿leca ticxijxicúa mocni hual Cristo canac quinami icni, huan ticxijxicúa pampa yihual quijtúa monequi pa quichías oc sequin lachihualisli huan amo jan pa quilalis ilaneltocalisli ca Cristo san pa quipaquitis Dios? Xiquita. Timoxtin ticpiasi pa tinesisi iyampa Dios pan tonali yihual molalis pa techpuhuilis tolajlaculisli huan tejchihuilis in hual monequi pampa ticchihuaje in laijlaculisli. <sup>11</sup> Unca lajcuiluli pin iamal Dios ilajtol, quil: Quinami neli niyuli, quijtúa in Tata, noje moxtin neli nechmolancuacuetzil-isqui noyampa,

huan moxtin neli qujtusqui pampa nehual niunca Dios huan nicpía mochi lahueliltilisli, quil.

<sup>12</sup> Yoje, sejse ca tehuanten quimacas lapuhualisli yihual ihuán iyampa Dios, quipuhuilis sejse ilachihualisli.

*Amo xicmomañajtili mocni*

<sup>13</sup> Yoje, ma camo quiman timochihuilican yoje tehuanten se huan oc se. Unca inon hual yes cuali pa anquichías: Ximoitacan cuali pa camo anquichías nindeno hual pampa inon se tocní cuajnesi quijtus anquichihuasquiaya laijlaculisli. Unca pampa yihual tocní amo quilalic chichahuac ilaneltocalisli ca Cristo huan pampín quijtúa unca laijlaculisli in hual anquichía, mas que tel ticmati Dios ilajtol amo quijtúa pa camo quichías se inon. <sup>14</sup> Nicmati huan in Tata Jesús nechmachiltía neli pampa amo unca nindeno pin lalticpan hual tijcualo huan ticunilo hual huil tejtzaculisli pa camo tiajsisi ca toyolo ca Dios. Ma yoje, sinda se quijtúa laijtic pa yihual pampa monequi pa camo quicuasi inon Dios ilacames, cuaquinon pa in se unca laijlaculisli sinda quicua inon. <sup>15</sup> Yoje, amo xicchía nindeno hual mocni quijtúa unca laijlaculisli, pampa sinda mocni quichía len hual mitzita ticchijtica huan quijtúa pa iyolo unca laijlaculisli da se quichía inon, cuaquinon pa yihual inon unca laijlaculisli. Huan pa tehual noje unca laijlaculisli pampa amo tiyultica ilaixpan yihual ca lasojlalisli. Amo xicchihualti mocni len yihual quijtúa amo unca cuali. Xiquijnamiqui pampa Cristo miquic pa yihual mocni. <sup>16</sup> Pampín, mas que unca moyaxca pa ticchías inon hual Dios ilajtol amo quijtúa pa camo ticchihuasi, ma yoje sequin anmocnían laneltocanjmes amo quijtulo yoje.

Pampín yehuanten hual amo quineltocalo Cristo techuejuecaltilo pampa timocualantilo capa tehuanten tohuían. <sup>17</sup> Ma camo panu inon pampa sinda Dios huelitía pa toyolo, inon hual tijcualo huan inon hual ticunilo amo monotzalo, amo tejtzacuilía Dios nindeno hual tijcualo huan ticunilo. Quema, moxtin quimatilo da Dios huelitía pa toyolo quiman qitalo pan ipampa quinami tiyulilo ticchijticate cuali. Quimatilo ipampa quinami tiyulilo amo timocualantilo ca tocnían hual quineltocalo Cristo, pampa monequi pa ticpiasi mosehuilisli ca Dios pa toyolo. Quimatilo pan ipampa topaquilisli hual techlalilía pa toyolo in Espíritu Santo. <sup>18</sup> Yoje, monequi pa aquí hual quitequipanuilía Cristo motzacuilis pa camo quichías inon: Ma camo quichía len yes quicocúa iyolo se icni hual amo quilalijtica chichahuac ilaneltocalisli ca Cristo. Sinda yuli se amo quicocoltitica inminyolo icnían, cuaquín yoje quipaquilititica cuali Dios. Huan lacames yalo quilasojlalo pampa yuli yoje.

<sup>19</sup> Axan, ca mochi toyolo ma timotolinican pa ticchihuasi len yes hual techpalehuía pa tiyulisli ca mosehuilisli pa toyolo se ca oc se. Ma timotolinican pa ticchihuasi len yes pa timopalehuisi timoxtin se huan oc se. Yoje ticpiasi mojmosta oc se nadita lajmatilisli huan lahueliltisli pa tiyulisli quinami Cristo icnían quipialo pa yulisli. <sup>20</sup> Amo xiquijlacu iyolo se tocní hual amo quineltoca chichahuac Jesucristo ilamachiltisli cuali, pampa Dios tequipanujtica pa yihual iyolo pa yes quinami yihual Dios quinequí. Huan sinda tiyuli tiquijlacujtica, cuaquín yoje tiquijlacúa Dios itequipanulisli. Ma nimitzili oc se lanextilisli. Mochi hual tijcualo unca cuali pa tijcuasi. Dios amo tejtzacuilía pa camo tijcuasi len yes. Ma yoje, amo unca cuali pa in lalcal hual quijtúa lajtic yihual pampa Dios techilía pa camo tijcuasi len ca innojen hual tijcualo. Ma yoje, cuajnesi amo motzacua pa camo quicuas. Huan pampa quicua, cuaquín quijtúa pa iyolo pampa yoje quichíac laijlaculisli, huan pampín quijtúa Dios cualani ca yihual. <sup>21</sup> Yoje, yes cuali pa ticchías inon, nicnequi niqijtúa, yes cuali pa camo tijcuas nacal huan pa camo cunis altzindi coc, o len yes quinami innojen sinda quiman ticchías inon, tiquijlacus pa iyolo mocni hual quineltoca Cristo. <sup>22</sup> Tehual, sinda ticmati da amo mitzijlacúa in hual tijcuas o ticunis o ticchías, huan ticmaztica Dios quita cuali, cuaquín ma mocahua yoje, anquimaztica huan Dios. Ma yoje, mas que ticmati inon, amo ximonextili hué pampa inon inminlaixpan oc sequin hual quijtulo pa inminyolo pampa amo cayas cuali pa quichías se inon. ¡Mocahua ca paquilisli se lalcal hual amo quiman quipía pa motexpahuilis pampa quichía len hual Dios quimachiltía neli pampa unca cuali! <sup>23</sup> Ma yoje, aquí hual quimahuilía sinda quichía o quicua o cuni len huan yihual amo quimati ca mochi iyolo pampa quichijtica cuali o amo cuali, cuaquinon yihual motexpahuilía sinda quichía o quicua o cuni. Motexpahuilía pampa amo quineltoca chichahuac ilajtol Dios pa quimatis quinami Dios quita inon, sinda cuali o amo cuali. Huan len yes hual se quichía amo quijnamictica quinami yihual quijtúa Dios ilajtol quinextilía, cuaquinon ca yihual inon unca laijlaculisli sinda quichía.

## 15

*Xicpaquilti hual unca monahuac, amo ximopaquilti tehual mohuían*

<sup>1</sup> Tehuanten hual ticlalilo chichahuac tolaneltocalisli ca Cristo, monequi pa timopepenialtisi ca tocnían hual amo quipialo laneltocalisli chichahuac ca Cristo. Mas que Dios ilajtol amo tejtzacuilía pa camo ticchihuasi len,

ma yoje, ma camo timopaquiltican ticchijtcate sinda tocnían hual amo chicahuac quiqtulo pampa amo unca cuali pa ticchihuasi. <sup>2</sup> Mochi sejse ca tehuanten, ma ticpaquiltican tocní hual quineltoca Cristo, ticchijtcate ilaixpan yihual len cuali pa yihual pan mochi tonalijmes yultías quinel-tocatica Cristo. <sup>3</sup> Monequi pa ticchihuasi yoje pampa yihual Cristo amo mopaquiltiaya. Quema, huan pampín quiapanuc Cristo jan quinami catani lajcuiluli, quil: “Mochi lajtomes calica mitzhuejuecaltije tehual, Dios, mochi inon hual mitzcocoltije moyolo tehual, inon niqinmacahuiltic pa nechilisi huan pa nechcocoltisi jan yoje.” Yoje quiqtúa ilajtol Dios. <sup>4</sup> Axan, in hual catani lajcuiluli pa yina pa Dios ilajtol catani lajcuiluli pa yoje tehuanten tiyelosquiaya lamaxtili. Pampa inon, quiman techpanúa mochi inon hual amo cuajcuali, amo timocahualo pa ticchixtiasi inon hual ticmatilo yahui tejchihuiliá Dios. Huan ticchixtialo ticmzticate pan ipampa Dios ilajtol lajcuiluli pampa yahui techpanúa inon. In lajtol tejchicahualtía pa tiyulisi ticchijtcate in hual Dios quinequi. <sup>5</sup> Quema, unca Dios ichicahualisli hual ticanalo pa huil timopeñialtisi quiman techpanúa len amo cuali, amo tiqijttuticate ca laijtíc toyolo quinami tiquincuepilisi. Yihual Dios tejchicahualtía pa yoje tiyulisi ticneltocatiyasi. Ma anmitzmaca in chicahualisli pa anyulis anmoxtin se ca oc sequin, anquijnamictica san in hual unca cuali pa anmoxtin. Yoje anquipaquiltía Cristo Jesús anyultica quinami yihual. <sup>6</sup> Dios quinequi pa anyulis yoje, pa yoje anmoxtin ca se laijnamiqilisi anquijtus lajtomes hué pa Dios, hual unca iTajtzin toTata Jesucristo.

*In lamachitilisi cuali quilamachitililo yehuanten hual amo judíos*

<sup>7</sup> Yoje, mas que anquijnamiqúa ca míac laijnamiqilisi in hual unca cuali pa ticchihuasi, ximonamiqican ca paquilisli mochi sejse ca amhuanten hual anquineltoca Cristo. Jan yoje Cristo noje technamiqic ca paquilisli pa yoje pan topampa Dios quicaquis lajtulisli hué pa yihual. <sup>8</sup> Nicnequi niqij-túa inon: Cristo hualac pa quinqeipanuilis in judíos, quinnextilijtataya pampa in lajtol hual Dios quiqtuc pa yina unca lajtol melahuac. Quema, hualac pa quichihuasquiaya in hual Dios quinnmilic pa yina in judíos inminta-jtzitzían, in hual neli yahuiaya quinchihuili. Yojque Cristo lanextilic quinami huil quilalilo laneltocalisli ca in hual Dios quiqtúa. <sup>9</sup> Huan pa in lacames hual amo judíos, Cristo hualac noje pa yoje yehuanten lajtulosquiaya hué pa Dios, pa quiqtulosquiaya quinami yihual quinnmilic quiman quinnlajtultic pa yesi yihual ilacames. Yojque unca lajcuiluli pa Dios ilajtol quinami quinneltocalosquiaya in lacames amo judíos, quiqtúa, quil:

Pampa inon nehual nilaquetzas ca lajtomes hué pa tehual capa yehuanten hual amo judíos,  
huan nijcantarus (nijcuicas) ca lajtomes huejué pa nimitzmacas lasojlalisli tehual.

<sup>10</sup> Huan pa oc se iamal Dios ilajtol quiqtúa, quil:

Xicpiacan míac paquilisli, xiyén (xiyecan) ca paquilisli amhuanten hual amo judíos.

Xicpiacan paquilisli ca in judíos hual Dios ilacames.

<sup>11</sup> Huan pa oc se lajcuilulisli quiqtúa quil:

Anmoxtin in lacames hual amo judíos, xiquijttucan lajtomes hué pa toTajtzin Dios,

huan moxtin in lacames hual judíos ma lajtucan hué pa yihual.

<sup>12</sup> Huan oc se iamal ilajtol Dios hual quiqcuiluc Isaías, yihual Dios ilajtuni, quiqtúa, quil:

Yes se imiahuil Isaí hual yec itajtzin in hué David.

Huan imiahuil nesis quinami ixua se ipacholi se cuahuil lamayahuili, pampa yehuanten ca icalí David cate quinami se cuahuil lacotonali.

Huan imiahuil Isaí moscaltis pa huelitis pan lacames hual amo judíos, quema, in lacames hual amo judíos quineltoacasqui yihual.

<sup>13</sup> Cuaquinon in Dios hual techmaca in laneltocalisli hual ticlalilo ca Cristo, ma anmítzmaca mochi paquilisli huan mosehuilisli pa anmoyolo. Ma anmichihuili inon pan ipampa quinami anquilalía anmolaneltoocalisli ca yihual, pa yoje anmolaneltoocalisli nomiactis mojmosta pan ipampa ichicahualisli in Espíritu Santo.

<sup>14</sup> Amo nimocahua pa nicmatis neli pan noyolo, nocnían, nehual noje nicmati neli quinami amhuanten amo anmocahua pa anyulis anmochihuiljítica len unca cuali pa amhuanten. Inon unca pampa anquimati len monequi pa anquimatis inahuac Cristo ilamaxtilisli. Huan yoje huil anmoi-jnamiquiltía se huan oc se quinami Cristo ilamaxtilisli technextilía quinami ticpialo pa tiyulisli. <sup>15</sup> Ma yoje, amo nimomajtitíac annimitzjicuiliulic in amal ca lamaxtilisli chicahuac pan inminpampa innojen lajtomes, pampa nicnequiaya annimitzjnamiquilti inon. Nicchíac pampa Dios nechtilanic pan ipampa ilachihualisli cuali hual nejchihuilic. <sup>16</sup> In lachihualisli cuali nejchihuilic pa nictequipanulisli Cristo Jesús pan ipampa quinami niquinmilía ilajtol in lacames hual amo judíos. Nictequipanulía Cristo niquinmiljítica yehuanten hual amo judíos in lamachiltisli cuali pa yoje yehuanten mochihuasi ilacames Cristo. Huan yihual quinmanas ca paquilisli pampa in Espíritu Santo quinchipahuilic yehuanten. Yoje, pampa niqihualiquilía Dios in lacames, nictequipanulía Dios quinami se tiopista hual quilalía huendi ilaixpan Dios. Yehuanten cate nohuendi.

<sup>17</sup> Cuaquinon, pan ipampa in hual Cristo Jesús nejchihuilic, nilajtúa hué inahuac Dios ilajtol, huan niqijitúa quinami ilamaxtilisli mosemantica cajcapa pan ipampa quinami unca lamachilti. Ca inon nicpía paquilisli.

<sup>18</sup> Unca pampa amo nimomajtía nilajtúa inahuac inon hual Cristo quichíac pan nopampa nehual pa yoje niquinlanequiltisquiaya in lacames hual amo judíos pa quineltoalosquiaya Cristo. Cristo quinlaneltocaltic pan ipampa ilamaxtilisli hual niquinmilic. Huan quinlaneltocaltic pan ipampa quinami niyuliaya inminlaixpan yehuanten.

<sup>19</sup> Quema, nechmacac lahuelilitisli pa niquinchías innojen lachihualisli inminlaixpan yehuanten. Huan pampa innojen, quimahuisuje ca lamajtilisli. Huan niquinchíac pan ipampa in Espíritu Santo ilahuelilitisli. Inon Cristo quichíac pan nopampa huan pampa inon nicsemantinemiaya ilamachiltisli cuali. Nipejtiahuiaya pa Jerusalén, ninejntiahuiaya pa míac caltilan huan niajsic niman huejca pin lali itoca Ilírica. Yoje nicchíac mochi notequipanulisli pa niclamasquiaya nicsemana in lamachiltisli cuali.

<sup>20</sup> Huan nicpía pa nimotolinis pa nicsemanas in lamachiltisli cuali capa yes ayamo quiman quimatilo ilajtol Cristo. Amo yesquiaya cuali pa nehual niyes tequipanujquil capa oc se lalacal pehuac quinlamachiltic Dios ilajtol, pampa monequi pa camo nechilisi lajtomes huejué huan cuajcuali sinda oc se ilacal Dios quichíac inon pa toTata. <sup>21</sup> Yes cuali pa nías capa ayamo quimatije ilajtol Cristo pa yoje panus quinami unca lajcuiluli pa íamal Dios ilajtol, quil:

Quimatisqui ilajtol yihual yehuanten hual amaqui quinlamachiltic, huan quimatisqui len quinequi quijtúa in lanahuatilisli yehuanten hual amo quiman quicaquijque quijtunque in hual yihual quinchihuilic.

*Pablo quinequi yahui pa Roma*

<sup>22</sup> Yoje, pampa niahuiaya cajcapa, pampín amo huil annimitzpaxaluiliaya. Cataloaya míac hual nejtzaculinijme pa camo niasquiaya. <sup>23</sup> Ma yoje, axan yajmo nicpía len pa nichchías nican pin lalimes capa nicayac. Huan quipía míac xixihuil hual nicnequiaya ca míac lanequilisli nihuala annimitzpaxaluili. <sup>24</sup> Pampín, nihualas ca amhuanten quiman nipanús nicantica ojli pa España. Quema, nicchixtica pa annehpalehuis pan nolahuejcalisli quiman niquisas pa Roma ca umpic. Ma yoje, pa nipehuas, nicnequi nimopaquiltía annimitzpaxaluiliytica amhuanten. <sup>25</sup> Axcán, nía nicana ojli pa niajsis Jerusalén pa niquinpalehuis Dios ilacames umpa. <sup>26</sup> Inon unca pampa in laneltocanjimes hual chantilo pa in lalimes Macedonia huan Acaya quiituje pampa yesquiaya cuali pa yehuanten quintilanilosquiaya len pa Dios ilacames nepa pa Jerusalén hual amo quipialo nindeno pa molacualtisi. Yoje quinnextililosquiaya quinami yehuanten quinmitalo pampa cate inmicnían pan ipampa Cristo. <sup>27</sup> Inon quinchihuilijtcate pampa quinequiloaya quichihualo ca míac lanequilisli. Huan neli ca yehuanten pa Macedonia huan Acaya unca quinami quihuiquililo quinchihuililo yoje yehuanten pa Jerusalén. Niquijtúa inon pampa yehuanten pa Jerusalén pehuaje pa quinxiluilisi Dios ilamachilitisli cuali pa inmínyolo yehuanten hual amo judíos. Huan yoje ipampa in Tata, yehuanten hual amo judíos quihuiquililo quinxiluililo in hual quipialo pa quinpalehuilisli ca len yes monequi pa quipias yehuanten pa Jerusalén. <sup>28</sup> Yoje, quiman nilamis ca in tequipanulisli huan quiman niqintemacac yehuanten pa Jerusalén in hual tocnían pa Macedonia huan Acaya quinnechiculije, cuaquinon annimitzpaxaluiliytihualas quiman nipanujtías pa España. <sup>29</sup> Huan nicmati pampa quiman nihualas ca amhuanten, nihualas nitentica pa noyolo ca mochi in cuali hual Cristo nechmacas.

<sup>30</sup> Axcán, annimitztemachía ca mochi noyolo, nocnían, pan ipampa in Tata Jesucristo huan ilasojlalisli in Espíritu Santo, xiclaflanican Dios pa nehual. Ma ticlaflanican nehual huan amhuanten ca míac tochicahualisli. <sup>31</sup> Ticlaflanisi pa yoje nicayas laquixtili pin polehuilisli quiman nicayas ca yehuanten pin lalticpan Judea. Nepa cate yehuanten hual amo quineltocalo Cristo. Ma ticlaflanican Dios noje pa yehuanten Dios ilacames pa Jerusalén canasi ca míac lanequilisli tolapalehuilisli. <sup>32</sup> Sinda canasi ca lanequilisli, cuaquín huil nías ca amhuanten ca míac paquilisli sinda Dios quinequí. Huan timochicahuasi quiman nimoitas ca amhuanten. <sup>33</sup> Ma caya ca anmoxtin in Dios hual techmáca mosehuilisli pa toyolo. Yoje ma ye.

## 16

*Pablo quinchicahua yehuanten hual quinmiximati pa Roma*

<sup>1</sup> Nicnequi pa anquiximatis Febe točni sihual hual huala ca amhuanten. Yi-hual se tequipanujquil niman cuali ca in laneltocanjimes hual monechiculo pin caltilan itoca Cencrea. <sup>2</sup> Xicnamiquican quinami se točni hual quineltoca in Tata. Yoje cana cuali pa tehuanten hual ticate Dios ixolomes pa yoje tiquinnamiquisi tocnían hual quitequipanuililo Dios. Pampín, xiquiztiacan pa anquipalehuis ca len yes monequi pa quipías pa itequipanulisli, pampa yihual noje quinpalehuis míac tocnían huan nehual noje nechpalehuic míac.

<sup>3</sup> Xiquinpialtican Priscila huan Aquila hual ca nehual titequipanuloaya pa Cristo Jesús. <sup>4</sup> Yehuanten uyaje capa ca nadita cuajnesi yahuiuloaya miquilo pa nechquixtililosquiaya pin nomiquilisli. Niquinsehuía pampa inon, huan

amo nehual nohuían. Noje quinsehuilo moxtin yehuanten in laneltocanimjes hual amo judíos pa mochi innojen caltilan capa monechiculo pa quimolancuacuetzilisi Dios. <sup>5</sup> Xiquinpialtican moxtin hual monechiculo pa quimolancuacuetzilisi Dios nepa pa inminchan Priscila huan Aquila. Xicpialtican Epenete hual niclasojla míac. Ca moxtin laneltocanimjes pin lalticpan Asia, cataya yihual hual pehuac quineltoac Cristo. <sup>6</sup> Xicpialtican María, yihual tequipanuc chicahuac ca amhuanten. <sup>7</sup> Xiquinpialtican Andrónico huan Junias nocnían pa oc se cali, cataloaya noje latzacuali calijtic quinami nehual. Yehuanten hueyenten capa cate Dios ilanahuatinijmes huan quineltocaje Cristo quiman nehual ayamo nicneltocaya. <sup>8</sup> Xicpialtican nolasojli Amplias hual unca nolasojli pan ipampa in Tata. <sup>9</sup> Xicpialtican Urbano tocní hual tequipanúa ca tehuanten pan itequipanulisli in Tata. Huan xicpialtican nolasojli Estaquis. <sup>10</sup> Xicpialtican Apeles hual momati pampa yihual neli quineltoaca Cristo. Xiquinpialtican yehuanten hual yulilo pa ichan Aristóbulo. <sup>11</sup> Xicpialtican Herodión, yihual nocni pa oc se cali. Xiquinpialtican yehuanten hual quineltoalo in Tata hual yulilo pa ichan Narciso. <sup>12</sup> Xiquinpialtican Trifena huan Trifosa yehuanten sihuames hual quitequipanuílilo in Tata. Xicpialtican tocní sihual Pérsida hual tequipanuc ca míac chicahualisli pa in Tata. <sup>13</sup> Xicpialtican Rufo, yihual se hué ca in Tata ilacames, huan xicpialtican inantzin hual unca pa nehual quinami nonantzin. <sup>14</sup> Xiquinpialtican Asíncrito huan Flegonte huan Hermas huan Patrobas huan Hermes huan tocnían laneltocanimjes hual cate ca yehuanten. <sup>15</sup> Xiquinpialtican noje Filólogo huan Julia huan Nereo huan icni sihual huan Olimpas huan moxtin tocnían hual quineltoalo Cristo, hual cate ca yehuanten.

<sup>16</sup> Ximopialtican se huan oc se ca se latenamiqulislí yoje quinami ticchihualo tehuanten hual Dios ixolomes. Anmijchicahualo moxtin yehuanten icnían Cristo pa mochi innojen cajcaltilan nican capa monechiculo.

<sup>17</sup> Nocnían, annimitzilía ca mochi noyolo, ximijmatican xiquinmiztiacan aquinojen yehuanten hual quinchihuílilo tocnían pa como quijnamiquisi Dios ilamaxtilisli quinami Cristo technextilic. Huan ximijmatican yehuanten hual quinclacanaló Dios ixolomes pa moxilusi pa yajmo quitocasi iojli Cristo. Yehuanten quinequilo anmitzmaxtilo yoje quinami amo unca in lamaxtilisli hual anmonextilic. Amo xicpiacan nindeno pa anquitas ca yehuanten. <sup>18</sup> Inon annimitzjicuiluílía, pampa lacames quinami yehuanten amo quitequipanuílilo toTata Cristo. San motequipanuílilo yehuanten pan ipampa inminlamaxtilisli. Quinequilo quitalo quinami huil quichihuasi in hual quinequilo jan yehuanten san. Huan quinami quimatilo lajtulo niman cuali ca lacuajcuamanalisli, yoje quincuaajcuamanililo inminyolo yehuanten hual amo quimatilo. <sup>19</sup> Nicmati neli pampa anquiztiac lamaxtinijmes quinami yehuanten, pampa pa mochi caltilan cate lamachiltili quinami cuali anquineltoaca Dios ilajtlo. Pampín nicpía niman míac paquilisli pampa yoje anquineltoaca. Ma yoje, nicnequi pa anquipias lajmatilisli pa in hual unca cuali. Huan nicnequi pa como huil anyes latilanili pa anmoyolo pa anquichías len hual amo unca cuali. <sup>20</sup> Sinda anmochías yoje, cuaquín Dios hual techmaca mosehuilisli pa toyolo amo huejcahuas pa quinsulahuas innojen lamaxtinijmes hual amo quimaxtilo Dios ilajtlo. Yes quinami yihual Dios anmijxacualuílía Satanás itzindan anmoxihuajmes. Ma caya ca amhuanten in cuali hual anmijchihuílía toTata Jesús.

<sup>21</sup> Anmitzpialtía Timoteo, huan nehual titequipanulo, noje anmitzpialtilo Lucio huan Jasón huan Sosípater nocnían pa oc sequin calimes.

<sup>22</sup> Nehual, Tercio, niqijcuiluijptica in amal pa Pablo, annimitzpialtía pan ipampa in Tata hual ticneltocalo.

<sup>23</sup> Anmitzpialtía Gayo hual nechnotzac pa nichantis pa ichan, huan noje quinnotzac moxtin in laneltocaniymes pa monechicusi pa ichan pan mochi tonali quiman timonechiculo. Anmitzpialtía Erasto icomisariado in caltilan nican, anmitzpialtía noje tozni Cuarto. <sup>24</sup> Ma caya ca anmoxtin ilachihualisli cuali toTata Jesucristo. Yoje ma ye.

*Pablo quijtúa lajtomes huejué pa Dios pa quilamis in amal*

<sup>25</sup> Ma tiquijtucan lajtomes huejué pa Dios hual huil anmijchicahualtía pa camo anmocahuas pa anyulis anquineltocatica in lamachiltisli cuali hual Dios nechtilanic pa niclamachiltís. Unca ilanahuatilisli Jesucristo. Inon unca ca se lajtulisli ca in hual Dios techmachiltía axan. Quiman pehuac mochi, huan ca niman míac xixihuimes Dios ayamo quilamachiltic inon huan pampín amaqui quimatiaya. <sup>26</sup> Ma yoje, axan unca lamachiltili. Huan pampa inon hual quijcuiluje Dios ilajtunijmes pa yina, tiquinlamachiltililo lacames pa mochi lalimes. Dios hual amo mocahua pa yulis latilanic pa quinlamachiltililo moxtin ilamachiltisli cuali. Latilanic pa yoje axan moxtin huil quineltocasi ilajtol Jesucristo.

<sup>27</sup> Pampa inon hual quichíac, ma camo timocahuacan pa tiquijtusi lajtomes huejué mojmosta pa Dios pan ipampa Jesucristo. San yihual Dios quipía mochi lajmatilisli huan unca niman hué, amo unca oc se hué quinami yihual. Yihual quilalic pa mochi mochías yoje pin cielo (ilhuicac) huan pan lalticpan. Yoje ma ye.

## In amal hual in lanahuatini Pablo quinmijcuiluilic in laneltocanijmes hual yulinijme pin caltilan Corinto

### *Pablo quinmijcuiluilía Dios ilacames hual cate pa Corinto*

<sup>1</sup> Nehual niPablo huan Dios nechnotzac pa niyes ilanahuatini Cristo Jesús. Cataya pampa yoje quinequic Dios. Huan tozni Sóstenes ticate. <sup>2</sup> Annimitzijcuiluilijtica amhuanen hual anunca pin caltilan Corinto, amhuanen hual anmonechicúa pa anquimolancuacuetzilía Dios. Amhuanen Dios anmijchipahuilic anmoyolo pa anyes ilacames iyaxca huan pa anyulis chipahuac pan ipampa Cristo Jesús. Quema, Dios anmitznotzac pa anyes ilacames. Huan quinnotzac pa yesi ilacames moxtin hual quinotzalo Dios pan ipampa itoca toTata Jesucristo, yehuanen hual chantilo cajcaca yes. Cristo yihual inminTata huan toTata. <sup>3</sup> Ma Dios toTajtzin huan in Tata Jesucristo anmijchiuilican cuali huan anmitzmacacan mosehuilisi pa anmoyolo.

### *Quijtúa Pablo quinami Cristo tejchihuilía niman míac cuali*

<sup>4</sup> Amo nimocahua pa nicehuis Dios, pampa anmijchiuilic cuali pan ipampa Cristo Jesús. <sup>5</sup> Nicsehuía pampa yojque huan yojque anmitzmacac míac pa anquipías pa anmoyolo. Ancanac niman míac pan ipampa yihual. <sup>6</sup> Huan jan yoje, quinami anmitzmacac míac, yihual anmitzneltoaltic pampa unca neli mochi hual antimitzlamachiltije inahuac Cristo. <sup>7</sup> Pampa inon, anquipía mochi inon calica Dios anmitzhueliltilía anmoyolo. Mochi inon anquipía mochi tonalijmes nican capa anyultía anquichixtica in tonali quiman nesis toTata Jesucristo. <sup>8</sup> Yihual anmijchicahualtis pa ancayas anquineltocatica pa quiman mochi hual Dios quichíac lamis yes quinami axan unca. Yoje amo anmitzmotexpahuilis Dios pan tonali quiman hualas toTata Jesús. <sup>9</sup> Inon ticmatilo pampa huil ticneltoalo Dios tejchihuilis jan quinami techilic, yihual Dios hual technotzac pa tiyulisi inahuac iXolol Jesucristo toTata.

### *Sequin laneltocanijmes nepa Corinto amo moitalo quinami oc sequin laneltocanijmes*

<sup>10</sup> Ma yoje, ca mochi noyolo, nocnían, inon annimitzyantía annimitzijnamiquiltitica ca ilahueliltisli itoca Jesucristo hual anquitequipanuilía. Annimitzyantía pa annoitas quinami moxtin oc sequin hual cate ca amhuanen. Annimitzyantía pa camo cayasi ca amhuanen laquetzalisli hual annixilus se ca oc se. Quema, annimitzyantía pa anmochías jan se san quinami anlajnamiquía huan quinami anquijtúa len anquijnamictica. <sup>11</sup> Inon annimitzilía, nocnían, pampa sequin hual chantilo pa ichan Cloé nechlaquetzilije nechlamachiltitaloaya quinami sequin ca amhuanen cualanilo amo quixtocate quinami oc sequin laijnamiquilo. <sup>12</sup> Nicnequi niquijtúa inon, quijtulo pampa seje ca amhuanen amo quijtúa quinami in oc se. Sequin quijtulo: “Nehual niunca Pablo imonextilini”, huan oc sequin quijtulo: “Nehual niunca imonextilini Apolos”, huan oc sequin: “Nehual niunca imonextilini Cefas”, huan oc sequin: “Nehual niunca Cristo imonextilini.” <sup>13</sup> Ma annimitzljajlani, ¿anquijtúa pampa huil anmochías imonextilinjmes



Cristo huan noje imonextiliniymes oc se? ¿Anquijtúa pampa nehual Pablo nicataya lapiluli pan se cuahuil pa amhuanten? ¿Ancataya lacuayatequili pa yoje anyesquiaya latocayaltili quinami lacames hual noyaxca, hual nechneltoocalo? Amo huil anquijtúa yoje. <sup>14</sup> Nicsehuía Dios pampa capa amhuanten niqincuayatequic san Crispo huan Gayo. <sup>15</sup> Yoje amaqui hual quijtus yihual yec lacuayatequili pa yoje nehual niyesquiaya iteco, quinami nehual cuajnesi nicpiaya lahueliltisli pa yihual mochihuasquiaya nomonextilini. <sup>16</sup> Ah, huan niquilcahuac, niqincuayatequic yehuanten noje pa ichan Estéfnas. Amo niqijnamiqúa sinda nijcuayatequic oc se ca amhuanten. <sup>17</sup> Amo niqincuayatequic míac pampa Cristo amo nechtilanic pa nilacuayatequisquiaya. Nechtilanic pa nicnahuatis in lamachiltisli cuali. Huan amo nechtilanic pa niqinmahuisultis lacames pan ipampa quinami nilajtúa inminlaxpan ca lajtomes cuajcualtichin. Amo nechtilanic pa yoje nilajtus, amo sangá in lajtomes cuajcualtichin quintzacuililosquiaya lacames pa camo quimatilosquiaya leca miquic Cristo.

### *Cristo unca Dios ilahueliltisli huan ilajmatilisli*

<sup>18</sup> Ticneltoocalo in lamaxtilisli quinami Cristo miquic pan cuahuil. Yehuanten hual amo quipialo in yulilisli yancuic quijtulo pampa san lacames hual amo quipialo laijnamiqulisli cuali quineltocalo in lamaxtilisli. Ma yoje, ca tehuanten hual Dios techquixtilijtica pin ipolehuilisli tolaijlaculisli, neli ticmatilo pampa ilajtol Cristo quipía Dios ilahueliltisli. <sup>19</sup> Inon ticmatilo pampa unca lajcuiluli pa iamal Dios ilajtol, quijtúa, quil:

Niqinmijlaculis inminlajmatilisli lacames hual quimatilo.

Huan yehuanten hual quijtulo pampa quimatilo, niqintzacuilis pa camo lamis cuali in hual yehuanten quijtulo pampa yalo quichihualo, quil.

<sup>20</sup> Yoje cuaquín, Dios technextilijtica pampa pa yihual, amo monotza nindeno inminlajmatilisli yehuanten pin lalticpan, yehuanten hual quijtulo pampa quimatilo, ma yén (yecan) judíos hual quimatilo mochi in lajtol hual quinextilía quinami quipialo pa quineltocasi Dios, ma yecan lacames hual amo judíos hual quimatilo míac huan quimatilo molaxililo lajtomes inahuac mochi hual unca pin lalticpan. Quema, Dios lanextilic quinami amo monotza inminlajmatilisli lacames hual Satanás huelitía pa inminyolo. <sup>21</sup> Huan yoje tiqitalo quinami Dios, pan ipampa ilajmatilisli yihual amo quimacahuiltic pa lacames pin lalticpan quiximatilosquiaya Dios pan ipampa inminlajmatilisli. Yoje canac cuali Dios pa quinquixtilis pin polehuilisli capic quinhuica inminlajlaculisli yehuanten. Huan quinquixtía pin inminpolehuilisli pan ipampa quinami quineltocalo ilajtol quiman quinqaquito yehuanten hual quinnahuatilo. Huan in míac ca yehuanten pin lalticpan quijtulo pampa ilajtol hual ticlamachiltilo unca lajtol hual san quineltocalo lacames hual amo quipialo laijnamiqulisli cuali.

<sup>22</sup> Inon unca yoje pampa in judíos amo mocahualo pa quinequisi quiyantisi Dios pa quichías len huil quitasi hual quinmolapolultilo huan cuaquinon, quijtulo, quineltocasi, quil. Huan yehuanten hual amo judíos quicaquito len lanahuatilisli pa quimatisi sinda quinnextilía lajmatilisli. Huan sinda quijtulo pa inminyolo pampa amo quinnextilía, cuaquín amo quineltocalo.

<sup>23</sup> Amo yoje tehuanten. Ticlamachiltilo quinami Cristo miquic pa tehuanten pan in cuahuil. Huan quiman quicaquito inon in judíos, quijtulo cualanticate pampa in Cristo amo huil yes lamictili, huan pampín Jesucristo amo quisac nepa capa unca Dios, quil. Huan quiman quicaquito inon in lacames hual

amo judíos, quijtulo pampa san lacames hual amo quipialo laijnamiquilisli cuali quineltoalosquiaya pampa Dios quilalisquiaya pa miquisquiaya se pa yoje moxtin yelosquiaya lapalehuili. <sup>24</sup> Ma yoje, tehuanten hual Dios technotzac pa tiyesi ixolomes, ma tiyén (tiyecan) judíos o ma yén (yecan) lacames hual amo judíos, tehuanten ticmatilo pampa Cristo quipía ilahuelilitisli Dios huan ilajmatilisli Dios. <sup>25</sup> Yoje, inon unca hual quichíac Dios. Huan lacames pin lalticpan quijtulo pampa inon unca lajtol hual san quineltocono yehuanten hual amo laijnamiquilo cuali. Inon Dios quichía huan lacames quijtulo pampa lanextilia pampa Dios amo huelitia. Ma yoje, ca inon yihual techmonextilia ca niman miac lahuelilitisli. Amo quiman ajsis yes yoje miac mochi inminlahuelilitisli moxtin lacames. <sup>26</sup> Cuaquion, nocnian, xiquijnamiquican quinami ancataya quiman Dios anmitznotzac pa anyes ilacames. Ca amhuanten amo cataloaya miac hual quipialoaya miac lajmatilisli hual lacames quijtulo unca lajmatilisli. Huan ca amhuanten amo cataloaya miac hual quipialoaya lahuelilitisli ca yehuanten hual huelitilo. Huan amo cataloaya miac ca amhuanten hual lacatijque inminxolomes huejeyenten. <sup>27</sup> Quema, Dios quilalic pa mochiasquiaya in hual lacames pin lalticpan quijtulo san quineltocono yehuanten hual amo laijnamiquilo cuali. Inon quichíac Dios pa yoje quinpinajts yehuanten hual quijtulo pampa quipialo lajmatilisli. Huan quilalic pa mochihuasquiaya ilajtol ca inon hual amo quipía lahuelilitisli pa yoje quinpinajts yehuanten hual quijtulo, quema, pampa quipialo lahuelilitisli. <sup>28</sup> Huan Dios quinlajtultic lacames pin lalticpan hual amo lacatijque ixolomes huejeyenten, huan quinlajtultic in lacames laxijxiculi. Quema, quinlajtultic hual yehuanten pin lalticpan quijtulo amo monotzalo nindeno, quinlajtultic pa quinquixtilis ilahuelilitisli mochi inon hual yehuanten pin lalticpan quijtulo pampa monotza. <sup>29</sup> Inon Dios quichíac pa yoje amo cayas se lalac ilaixpan yihual hual huil lajtutinemis hué inahuac yihual ihuían. <sup>30</sup> Ma yoje, amhuanten Dios anmitzmacac anmoyulilisli yancuic, in hual unca pan ipampa Cristo Jesús. Miquic pan cuahuil pa tehuanten huan pan ipampa inon, Dios technextilia ilajmatilisli. Huan pan ipampa Jesucristo, Dios huil quijtuc pampa yajmo quita laijlaculisli ca tehuanten. Huil tejchihuilic toyolo pa tiyesi ilacames chijchipahuac pa yihual san. Huan noje huil techmacahuac pa yajmo techpolehuisquiaya tolaijlaculisli. <sup>31</sup> Yoje cuaquín, Dios tejchihuilic mochi inon pan ipampa ilajmatilisli, tejchihuilic pa timochihuasi yoje quinami unca lajcuiluli pa ilajtol Dios, quijtúa: “Aquí quinequi lajtúa hué, ma lajtu hué inahuac in Tata Dios.”

## 2

### *Ilanahuatilisli Jesucristo, yihual hual cataya lapiluli pan cuahuil*

<sup>1</sup> Huan nehual, nocnian, in tonali hual nihualaya ca amhuanten, amo nil-amachiltitihualaya quinami se lajtuni hué annimitziliztica lajtomes huejué yojque hual lanextilia quinami nehual nicmatiaya miac in ilajmatilisli in lalticpan. Yojque amo annimitzlamachiltic in hual Dios anmijchihuilic pan ipampa Cristo. <sup>2</sup> Ayamo niasiya ca amhuanten, nimolalic pa san niclamachiltitihualasquiaya ilajtol Jesucristo huan quinami cataya lamictili pin cuahuil. <sup>3</sup> Huan nehual amo nicpiaya chichahualisli quiman nicataya ca amhuanten. Nimomajtiaya huan niyuyucaya miac. <sup>4</sup> Huan in lamachiltisli cuali hual annimitzmachiltic, inon amo annimitzilic ca lajtomes huejué hual

lanextililoaya inminlajmatilisli lacames. Amo nicnequiaya annimitznel-tocalti yoje pan ipampa quinami annimitzlaquezataya. San annimitzla-machiltic ilajtol Dios ca in Espíritu Santo anmitzlanextilijtataya ilahuelilitil-isli. <sup>5</sup> Yoje annimitzlamachiltic amo sangá anquineltoacasquiaya Cristo pampa anquitaya in lamachiltilisli cuali quinami cataya len quimaxtije lacames hual quimatilo. San nicnequiaya pa anquineltoacasquiaya Cristo pampa anquitaya quinami Dios techmachiltía ilahuelilitilisli pan ipampa in lamachiltilisli cuali.

*Dios quimacahuiltía pa tiquiximatisi pan ipampa iEspíritu*

<sup>6</sup> Ma yoje, tilajtulo ca lajmatilisli sinda ticate ca yehuanten hual quimatilo pan ipampa quinami cuali quineltocalo ilajtol Dios. Huan inon amo in lajmatilisli hual monextililo lacames nican pin lalticpan. Huan amo unca inminlajmatilisli yehuanten hual huelitilo pin lalticpan. Inminlajmatilisli hual yehuanten quipialo yahui mopolúa. <sup>7</sup> Amo yoje tilajtulo. Quema, tiquijtulo quinami Dios quinquixtilía lacames inminlajlaculisli hual quinhuiquilía polehuilisli. Lacames amo quiman quimatilo inon sinda Dios amo quinnextilía. Dios tejtzacuilic pa amaqui quimatisquiaya inon pan ipampa inminlajmatilisli lacames. Ma yoje Dios pan ipampa yihual ilajmatilisli quilalic quinami yahuiaya quinquixtili lacames inminlajlaculisli. In lamachiltilisli cuali quijtúa pampa ayamo pehuac quichíac Dios in cielo huan in lalticpan quiman quilalic pa quichiasquiaya inon hual quichíac. Huan quichíac inon pa yoje ticpialosquiaya tolaxilulisli ca yihual ilahuelilitilisli huan ilaixpelalisli cualtichin. <sup>8</sup> Inon hual Dios quilalic pa quichíac, amaqui ca yehuanten hual huelitiloaya pin lalticpan quimatiaya len quichijtataya. Sinda quimatiloaya inon, amo quimictiloaya pin cuahuil in Tata hual quipía mochi lahuelilitilisli huan unca in niman hué. Quema, yehuanten amo quimatiloaya in hual Dios quilalic pa quichiasquiaya. <sup>9</sup> Jan quinami unca lajcuiluli pa iamal Dios ilajtol, quijtúa, quil:

Amaqui quitac, amaqui quicaquic, huan amaqui quimatic lajtjc iyolo len Dios quichijchiuac pa quipiasi yehuanten hual quilasojlalo, quil.

<sup>10</sup> Dios ilajtol quijtúa yoje, pampa unca pan ipampa in Espíritu Santo technextilic Dios inon tehuanten hual ticneltocalo. Unca pampa in Espíritu Santo technextilía mochi, quema, innojen de Dios hual etiaxticate pa quimatis se len quinequilo quijtulo.

<sup>11</sup> Jan iyolo san hual unca lajtjc se lalac quinmati innojen hual quinmijnamiquía se lalac. Huan jan yoje, jan Dios iEspíritu san quinmati innojen hual quinmijnamiquía Dios. <sup>12</sup> Huan tehuanten amo technemiltía in espíritu hual quinnemiltía oc sequin lacames pin lalticpan hual quilalilo pa camo quineltocasi Dios. Pampa no, technemiltía iEspíritu Dios pa yoje huil ticmatilosquiaya in hual Dios techmaca huan tejchihuilía. Inon ticmatilo pan ipampa quinami tejchihuilía cuali. <sup>13</sup> Huan innojen lajtomes hual antimitzililo amo cate lajtomes hual techmaxtije lacames pan ipampa inminlamaxtilisli. Cataya in Espíritu Santo hual techmaxtic. Huan inon hual iyaxca in Espíritu, unca in Espíritu Santo hual technextilía pan ipampa quinami quimati yihual. Jan yehuanten san hual quipialo in Espíritu Santo pa inminyolo quimatilo inon, quimatilo pan ipampa in Espíritu Santo.

<sup>14</sup> Se hual amo quipía iEspíritu Dios amo quinmoanilía innojen hual in Espíritu Santo techmaxtía, pampa yihual quinmita quinami lajtomes hual san quinneltocalo lacames hual amo laijnamiquilo cuali. Amo huil quimati len quinequilo quijtulo pampa jan in Espíritu Santo san huil quinnextilía.

<sup>15</sup> Ma yoje, se hual quema, quipía iEspíritu Dios huil quimati mochi hual quilía in Espiritu Santo, huan amaqui huil quijtúa yihual moixpolúa. <sup>16</sup> Unca pampa Dios ilajtol quijtúa: “Amaqui amo quiman quimatic quinami Dios laijnamiquía huan amaqui huil quimaxtía Dios”, quil. Ma yoje, tehuanten techhueliltía iEspíritu Santo Dios pa tilajnamiquisi quinami Cristo.

### 3

#### *Ticchijtcate Dios itequipanulisli ca moxtin in laneltocanjmes*

<sup>1</sup> Huan nehual, nocnían, amo quiman huil annimitzmaxtiaya quinami niquinmaxtía lacames hual quipialo iEspíritu Santo Dios. Nicpiaya pa annimitzmaxtisiyaya quinami niquinmaxtiaya yehuanten hual amo quimacahuilito pa quinnejnemiltis in Espiritu Santo. Ancataya quinami xolomes hual lamije lacatije. Huan mas que anmochíac ilacames Cristo, amo huil anmonextiliaya quinami monequi pa yulisi yehuanten hual ilacames Cristo.

<sup>2</sup> Pampín annimitzmaxtiaya len amo etiactica pa quimatis se, amo annimitziliaya lamaxtilisli chicahuac pampa yoje amo huil anmonextilisquiaya. Cataya quinami quilacualtilo se xolol tipichin ca leche huan amo ca nacal, pampa ayamo huil quicuajcua nacal. Huan amhuanten ayamo anmocahua pa ancayas quinami xolomes tijtipichin, pampa ayamo huil ancana lamaxtilisli chicahuac. <sup>3</sup> Unca pampa ayamo anquimacahuilitía pa annitznejnemiltis Dios iEspíritu Santo. Niqijtúa inon pampa anmochahuatilia huan amo anyuli mochi seje ca se laijnamiquilisli san. Huan sinda anyuli yoje, amo anquimacahuilitica pa annitznejnemiltis iEspíritu Dios. Anyultica quinami yehuanten hual amo quipialo iEspíritu Santo de Dios. <sup>4</sup> Unca yoje, pampa sinda se ca amhuanten quijtúa: “Nehual niunca Pablo imonextilini”, huan oc se quijtúa: “Nehual niunca Apolos imonextilini”, yoje anlajtutica quinami lacames hual amo quipialo Dios iEspíritu Santo.

<sup>5</sup> Huan ¿len monotza Apolos? Huan ¿len nimonotza nehual Pablo? Jan ticate Dios itequipanujquimes san. Pan topampa tehuanten, amhuanten anquineltoac Jesucristo. Huan seje ca tehuanten tictequipanuilinjme in Tata quiman ticatanijme ca amhuanten, tictequipanuilinjme quinami yihual techhueliltic. <sup>6</sup> Nehual annimitzlic Dios ilamachilitisli cuali, nicpehualtic ca amhuanten, niquinami se hual latocac pa se cuajmili. Cuaquinon hualac ca amhuanten Apolos pa annitzmactisquiaya, yihual quinami se hual la'ajuiliaya. Ma yoje, cataya Dios hual quinmiactiaya yehuanten hual quineltoaloaya ilajtol, yoje quinami momiactilo in pacholimes. <sup>7</sup> Yoje, aqui hual latoca huan aqui hual la'ajuilia amo monotzalo len, unca Dios hual monotza pampa yihual quinmiactis in pacholimes. Huan jan yoje amo monotza len yihual hual quipehualtía Dios ilajtol pa lacames huan sihuames huan cuaquín quinmaxtía. Unca Dios hual monotza mochi, pampa yihual quinmiactía yehuanten hual quineltoalo ilajtol. <sup>8</sup> Dios quinmita aqui latoca huan aqui la'ajuilia quinami yehuanten jan se san. In omenten cate itequipanujquimes Dios huan seje canas ilaxlahuilisli, yihual canas yoje quinami tequipanuc. <sup>9</sup> Yojque unca, pampa tehuanten anmolamaxtinijmes ticate tequipanujquimes ca Dios, ticate lanechiculi ca amhuanten. Huan amhuanten anunca ixolomes Dios hual yihual annitznexlijtjca pa anquitequipanuilis. Yoje anlanextilia quinami Dios unca cuali, anlanextilia pan ipampa quinami antequipanúa anmoxtin ca se laijnamiquilisli. Dios unca quinami se hual quiztica imili pa laquis cuali pa yoje lapixcas míac, huan amhuanten anunca quinami Dios imili. Noje Dios unca quinami se hual

quichía se cali, huan quinlalía in adobes inminnahuac pa yes se cali cuali. Huan amhuanten anunca quinami in adobes, Dios anmitzlaía seyse huan seyse capa yihual quinequi, pa yoje amhuanten anmochías jan se lanechiculi quinami yihual quinequi.

<sup>10</sup> Huan Dios nechmacac lahelilitlisli pa niqunpehualtis lacames huan sihuames hual monehicusu pa moiximatisi yehuanten ilacames Cristo. Yoje niunca quinami se hual quipehualtía se cali lachihuali ca adobes, ma niquijtu quinami se hual quimati míac quinami se quipehualtía se cali pa itzindan. Yoje nel nicataya in se hual annimitzpehualtic pa anmochiasquiaya iyaxca Cristo. Ma yoje, unca oc se quichitica in cali pani in lapehualtili. Huan jan yoje, amhuanten hual anquineltoca, yoje anmomiactitica. Axcan, ma quiztía cuali aqui yes quinami quinmxtía ilacames Dios pa camo quipalas in lamaxtilisli calica niqunpehualtic. <sup>11</sup> Amo unca oc se lamaxtilisli calica se huil quinpehualtía Dios ixolomes, jan ilamaxtilisli Jesucristo san. <sup>12</sup> Sinda se quiscaltía se cali pani in lapehualtili, cuajnesi cana len hual ij'ipati, quinami oro huan plata huan tixcalitos hual ij'ipati, huan len hual amo ij'ipati quinami cuahuil huan surumota huan isacayo soyal huan in hual cana pa imili. <sup>13</sup> Huan jan yoje momatis quinami seyse quitequipanuilia in Tata, pampa quiman hualas Cristo oc sejpa, pa in tonali momatis inminlaixpan moxtin quinami seyse quitequipanuic. Dios yahui quichihuilía len itequipanulisli seyse, pa quimatis sinda yahui huejchaha. Quichihuilía yoje quinami se quilalía oro pin tixuxli pa quichías oro chipahuac. Huan Dios, quiman quichías yoje pa seyse itequipanulisli, cuaquín quichipahuilis o quixitinilis pa yoje momatis da Dios quitas cuali o amo cuali. <sup>14</sup> Sinda quisas cuali se itequipanulisli hual quichihuilic pa Dios, cuaquín in se canas ilaxlahuilisli hual Dios quimacas. <sup>15</sup> Huan sinda amo quisas cuali se itequipanulisli hual quichihuilic pa Dios, ma niquijtu, sinda Dios quita amo quisaya cuali itequipanulisli, cuaquinon in se amo canas len, mas que yihual ihuan quisas pin polehuilisli hual quihuiquilía ilajlaculisli. Yoje cayas quinami se hual moquixtic pa se cali chichinajtica.

<sup>16</sup> Neli amhuanten anquimati pampa chanti ca amhuanten iEspíritu Santo Dios, huan pampa inon, anunca quinami Dios itioipan. Nesi quinami anquilcahuac inon. <sup>17</sup> Ma yoje, sinda se quinmijlaculis inminyolo yehuanten capa yihual Dios chanti, da se quinmijlaculis ca lamaxtilisli amo cuali o ca laijlaculisli, cuaquinon Dios quijlacus in se, pampa yihual chanti laijtic seyse ixolomes pan ipampa iEspíritu Santo. Yoje Dios quichías pampa yihual chanti ca amhuanten huan pampin, anunca chipahuac huan anunca pa Dios san.

<sup>18</sup> Ma camo mocuajcuamana amaqui. Sinda unca se ca amhuanten hual quijtúa pampa quimati míac ilajmatilisli in lalticpan, cuaquín ma mochías quinami se hual amo quimati nindeno. Ma niquijtu, ma quimacahuilit in se pa quitasi in lacames pin lalticpan quinami se hual amo laijnamiquía cuali, pa yoje mochías se hual quipía Dios ilajmatilisli. <sup>19</sup> Quema, ma mochía yoje, pampa Dios quita quinami amo monotza nindeno in lajmatilisli hual quipialo lacames pin lalticpan hual amo quineltocalo in Tata. Ticmatilo Dios yoje quita, pampa yoje unca lajcuiluli ilajtol Dios, yoje quijtúa: "Yihual quinqutzquia yehuanten hual yulilo pin lalticpan hual quijtulo pampa quimatilo. Quintzacuilía pa camo lamisi cuali ca inminlachihualisli." <sup>20</sup> Huan pa oc se iamal ilajtol yoje quijtúa: "Quimati in Tata quinami laijnamiquílo yehuanten hual quimatilo, hual quipialo ilajmatilisli in lalticpan. Quimati in Tata quinami amo monotza inminlajmatilisli lacames." <sup>21</sup> Yoje cuaquín, ma camo lajtu hué amaqui inminahuac in lamaxtinijmes hual

quintoca huan quinmita quinami huejué, pampa mochi unca anmoyaxca. <sup>22</sup> Huil anmoanilis in hual cuali hual unca ca mochi huan hual moxtin quimacalo, ma ye Pablo, ma ye Apolos, ma ye Cefas, ma ye mochi hual Dios quichíac, ma ye yulilisli, ma ye miqulislí, ma ye len unca axan, ma ye len cayas. Yoje mochi huan moxtin café anmoyaxca pa ancanas in hual cuali. <sup>23</sup> Huan amhuanten anuncia iyaxca Cristo. Huan Cristo unca iyaxca Dios.

## 4

### *In lanahuatinijmes inmintequipanulisli*

<sup>1</sup> Yoje, ma techitacan tehuanten lacames hual tictequipanuililo Cristo, ma techitacan lacames hual yihual techlajtultic pa ticlamachiltitinemisi ilajtol Dios hual quipía naditas xixihuimes yihual pehuac quinnextilic yehuanten pin lalticpan. <sup>2</sup> Huan amo inon san. Noje sinda se quipía ilajtultilisli len, cuaquín quipía pa yes se lacal hual iteco quiximati quinami se hual quimati yuli quineltocatica iteco. <sup>3</sup> Ma yoje, pa nehual amo monotza len sinda lacames nechlajlanilo pa quimatasi da nilami nicchía cuali in tequipanulisli hual Dios nechmacac. Noje amo nimolajlanía nehual pa nicmatis sinda nicchijtica cuali in tequipanulisli hual Dios nechmacac. <sup>4</sup> Niquijtúa inon, pampa mas que amo nicmati len amo cuali Dios cuajnesi quita ca notequipanulisli pa yihual, ma yoje amo unca pampa inon Dios quitas cuali notequipanulisli. <sup>5</sup> Yihual hual unca iyaxca pa nechlajlanis quinami nicchía notequipanulisli unca in Tata. Yoje, ximocahuacan amhuanten pa como anquijtus amo quichihualo cuali yehuanten anmocnían hual quineltocalo ca nehual. Quema, pampa ajsis in tonali hual Dios quilalic hual yihual quijtus sinda ticchihuaje cuali o amo ticchihuaje cuali, nicnequi niquijtúa, in tonali hual in Tata hualas oc sejpa. Cuaquinon momatis quinami Dios quinmita. Yihual noje quinnextis mochi inon hual lacames quinchihuaje hual ayamo momatic. Huan quinnextilis mochi hual in lacames neli quinequije quichihuaje laijtic inminyolo. Huan cuaquinon sejse quicaquis Dios lajtutica hué inahuac quinami quichíac.

<sup>6</sup> Ma yoje, nocnían, innojen lajtomes hual nilamic annimitzjicuilulic tonahuac nehual huan Apolos nicnequiaya pa cayas se lajtulisli pa annimitznextilis in hual monequi pa anquichías. Pan ipampa in lanextilisli nicnequi pa anmonextilis inon hual nía annimitzilía: Amo unca cuali sinda anlajtutinemi hué inahuac quinami anquitoca ilamaxtilisli se ca tehuanten in lanahuatinijmes. Annimitzilía oc se lanextilisli. Se lajtúa hué inahuac quinami yihual quitoca nolamaxtilisli huan quixijxicúa oc se icni pampa yihual quitoca ilamaxtilisli Apolos. Ximonextilican pa anquitocas ilamaxtilisli Dios quinami unca lajcuiluli. <sup>7</sup> Monequi pa anmonextilis anquichías inon mochi sejse ca amhuanten, pampa amaqui mitzita quinami se hual quipía se lahueliltilisli hual oc sequin amo quipialo. Huan sinda cuajnesi ticpía se lahueliltilisli hual oc sequin amo quipialo, ma yoje, ticanac in pampa Dios mitzmacac. Huan quinami neli unca ticanac mochi hual ticpía pampa mitzmacac Dios, cuaquinon ¿leca tilajtúa hué monahuac tehual mohuán? Tiunca quinami se hual quijtúa pampa quipía mochi pan ipampa ilahueliltilisli yihual ihuán.

<sup>8</sup> Anquijtúa pampa anquipía mochi hual monequi pa anquipías pa anmoyolo. Ma yoje amo neli unca. Anquijtúa pampa anquipía nican mochi in pin cielo pa anmoyolo hual Dios quita quinami ipati, huan amo neli

unca. Anquijtúa anunca huejueyenten huan Dios anmitzita quinami huejueyenten. Huan tehuanten antechajcahuaya antechilcajtataya pa yoje anyes huejueyenten amo ca tehuanten. Ma yoje, amo neli anunca quinami huejueyenten. Neli nicnequisquiaya pa Dios anmitzitasquiaya quinami huejueyenten pa yoje lacames techitalosquiaya noje quinami huejueyenten ca amhuanten. <sup>9</sup> Nicnequisquiaya chicahuac pa inon techpanusquiaya, pampa niqijtúa Dios tejchihuilic tehuanten in lanahuatinijmes quinami amo timonotzalo nindeno pa inminlaixpan moxtin oc sequin pin lalticpan. Quema, yihual technextía pa inminlaixpan quinami sequin hual se la'ajuani lamic quijtuc pampa quipialo pa miquisi. Niquijtúa inon, pampa moxtin yehuanten pin lalticpan huan pin cielo, nicnequi niqijtúa, lacames huan ilanahuatinijmes in cielo (ilhuicac) techitalo quinami yehuanten hual quinmitalo innojen lacames laquitzquili hual cate lailpili huan yalo yelo lamictili pin lajcotian inminyampa moxtin. <sup>10</sup> Yehuanten pin lalticpan quijtulo pampa amo ticmatilo tehuanten, huan inon pampa ticlamachiltinemilo ilamaxtilisli Cristo. Huan amhuanten anquijtúa pampa anquimati míac pan ipampa Cristo huan oc sequin hual iyaxca Cristo amo quimatilo yoje míac. Yehuanten pin lalticpan techitalo lacames hual amo ticipalo chichahualisli, huan amhuanten amoita quinami anquixpictica chichahualisli. Amhuanten anquijtúa pampa anyultica quinami huejueyenten huan oc sequin quijtulo lajtol hué pa amhuanten. Huan tehuanten in lanahuatinijmes tejxixiculo quinami amo timonotzalo pa technextilisli momajtilisli. <sup>11</sup> Quema, quiman tipehuaje huan pa axan, tiyulilo timayanticate huan tiamicticate huan amo ticpixticate in tzotzomajli hual monequi pa ticipasi. Techcocoltilo huan amo ticipalo capa tichantilo. <sup>12</sup> Huan titequipanulo chichahuac ca tomajmajuan pa timolacualtisi. Techhuejuecaltilo, tiquinmililo len cuali de Dios. Techtojocalo pa tejchihuilisli amo cuali, tiquinmacahuiltilo, amo timolacuepililo. <sup>13</sup> Sinda techmotexpahuililo ca len hual amo unca melahuac, tiquinnanquillilo ca lajtomes yajyamanquil pa como cualanis pa yoje mopatilisli inminyolo. Quema, quiman tipehuaje huan pa axan, yehuanten pin lalticpan techitalo quinami len lamontulisli palantica, tehuanten techitalo quinami tilacames pucmic. Quema, techitalo jan quinami quitalo catzahualisli hual quiquixtililo mochi pin lalticpan hual quichipahualo.

<sup>14</sup> Amo annimitzijcuilulijtica innojen lajtomes pa annimitzpinajtis. San nicnequi annimitzmaca lajtulisli chichahuac amhuanten hual anunca quinami noxolomes hual niquinlasojla míac. <sup>15</sup> Pampin, mas que cuajnesi cate niman míac yehuanten hual anmitzitalo pa anmitzlaicanasi pa iojli Cristo, amo cate míac lacames hual anmitzpehualtic pa ancanas Cristo iojli. San cataya se san, nehual nicataya. Cataya quinami nehual anmotajtzin hual annimitzlatiltic pa anyes iyaxca Cristo, pampa anlacatic pa ancanas yulilisli yancuic pan ipampa quinami nehual annimitzilic in lamachiltilisli cuali. <sup>16</sup> Yoje, annimitzmaca lajtulisli chichahuac, xiyulican quinami nehual, jan quinami se ixolomes yulilo quinami yihual inmintajtzin.

<sup>17</sup> Huan pa anyes lapalehuili pa anyulis quinami nehual, yoje annimitztilanilijtica Timoteo. Yihual quinami noxolol hual niclasojla míac, huan yihual amo mocahua pa quitocas in Tata huan Cristo iojli. Yihual Timoteo annimitz-ijnamiquiltis mochi inon quinami niyultía nicnectica nicneltocatica mochi ilajtol Cristo. Yoje niqinmaxtía ilacames Cristo pa yulisli, niqinmaxtía caj-ca ya yes ilacames monechiculo. <sup>18</sup> Ma yoje, cate sequin ca amhuanten hual quijtulo yehuanten cate huejueyenten huan amo momajtilo, pampa quijtulo amo nías capa anunca amhuanten. <sup>19</sup> Mas que quijtulo yoje, nehual nías



huan amo nihuejcahuas pa nías ca amhuanten sinda Dios quinequi. Huan amo niquinneltocas quinami lajtulo in lacames hual lajtulo ca lajtomes huejué pa yehuanten inminhuian. Ma yoje, nicmatis sinda neli quipialo lahuelilitisli. <sup>20</sup> Inon nicmatis, pampa amo momati da Dios huelitía pan se pan ipampa len quijtúa in se. Momati da Dios huelitía pan ipampa quinami moita pampa quipía lahuelilitisli hual Dios quimaca. <sup>21</sup> Axcan, ¿len anquinequi? ¿Anquinequi pa nías ca amhuanten nicualantica quinami se itajtzin hual yahui quinhuiteguía ixolomes? O ¿anquinequi pa nías amo nicualantica ca amhuanten ca lasojlalisi, pa yoje amo monequis pa niquijtus lajtomes chijchicahuac?

## 5

*Quinmilía monequi pa quijtusi quipías pa quisas capa yehuanten in se hual canac isihua itajtzin*

<sup>1</sup> Mocaqui pa mochi cajcapa quinami ca amhuanten unca se hual canac se sihual hual amo iyaxca. Huan quinami yihual quichíac inon, yoje in lacames hual amo quinneltocalo Dios amo quimacahuiltilo pa se lacal canas sihual yoje quinami in lacal ca amhuanten hual canac itajtzin isihua. <sup>2</sup> Huan ¡xiquitacan! ¡Ma yoje amhuanten anlajtúa ca lajtomes huejué pa amhuanten quinami anquijtuaya pampa Dios amo yahui anmitzmotexpahuilía! Niman amo cana cuali pa anquijtus inon pa anmoyolo. Monequi pa anmitzcocus míac anmoyolo pampa in se quichíac in niman amo cuali. Annimitzilía, xijquixtican pa capa amhuanten in se hual quichíac inon. <sup>3</sup> Anquipía pa anquichías yoje, pampa nehual, mas que amo niunca nepa ca amhuanten, ma yoje nicmati pa noyolo len annimitzilisquiaya sinda nepa nicataya. Huan axan niquijtuc pampa in se quipía pa quisas pa capa amhuanten. Inon niquijtuc quinami nicataya ca amhuanten. Quema, mas que yihual se ca Cristo ilacames, ma yoje quichíac in laijlaculisli niman elehuis. <sup>4</sup> Pampa inon, niquijtuc in se quipías pa quisas huan inon annimitzizcuiluilía nicpixtica ilahuelilitisli in Tata Jesús. Monequi pa anmonechicus nepa ca ilahuelilitisli toTata Jesús nepa ca amhuanten pa anmitzpalehuis. Huan nehual nicayas annimitziznamictica huan niclajlantica Dios quinami nicataya umpa ca amhuanten. <sup>5</sup> Monequi pa yes laquixtili pa camo cayas ca amhuanten in lacal hual quichíac in niman amo cuali. Xictemacacan ca Satanás pa Satanás huelitis capa yihual. Yoje icuerpo mochiqtías cocoxqui. Cuaquín yajmo quinequis quichías in laijlaculisli. Quiman anquitemacas ca Satanás, cuaquín Dios huan ilacames yajmo quipias pa quifasi nindenno ca yihual. Monequi pa quipanus yoje pa quipalas iyolo huan pa yes lachipahuali pa camo cayas ca ilaijlaculisli pan in tonali hual mocuepas in Tata.

<sup>6</sup> Anquimacahuiltitica pa mocahuas ca amhuanten in lacal huan pampín, amo unca cuali quinami anlajtúa hué anmopampa amhuanten. ¿Amo anquimati quinami quijtulo: “Nadita laxocoyajquil quiteposahualtis mochi in texli”? Huan jan yoje, jan nadita laijlaculisli hual moitilía ca Dios ilacames huil mopanultía ca moxtin, huan quiman panusi tonalijmes, quinmijlacus moxtin. <sup>7</sup> Pampa inon, ximochipahuilican pa yajmo cayas anmolaijlaculisli. Anyulini pa yina anquichijtataya laijlaculisli. Axan xiquijnamiquican quinami in judíos quinchipahualo inminchan pa mochiqhihuasi pa ininfiesta (ilhuil) pascua pa yoje amo mocahuas caljitic laxocoyajquil nindenno. Yoje inon unca se lachihualisli pa anmitznextilis quinami anquipía pa anmochipahuilis pa yajmo cayas ca amhuanten anmolaijlaculisli hual



anquichihuani. Quiman anquichía yoje, anmochías quinami anmitznex-tíla ilachihualisli in texli yancuic hual amo quipía laxocoyajquil. Axan xiyulican quinami lacames hual Dios quinyuliltic yoje yancuic, lacames hual amo quipialo laijlaculisli. Cate quinami se texli yancuic hual amo quipía laxocoyajquil, amo teposahua. Ca in texli quichihualo pan hual quicualo quiman quimictilo in borreguito pa in fiesta (ilhuil) itoca pascua. Huan noje tohuendí lamictili pa in pascua unca Cristo, yihual quinami se borreguito hual Dios quilalic pa yes lamictili pa techquixtilia tolaijlaculisli. <sup>8</sup> Yoje, ma tiyulican quinami monequi pa yulisi Cristo ilacames. Axan ma camo tiyulican quinami tiyulinijme pa yina, lacames laijlaculi ticchijtaloaya len amo cuali. Axan ma tiyultiacan melahuac pa quimatisi moxtin quinami Dios techyuliltic quinami yancuic. Ma camo ticchihuacan in hual tip-inahualosquiaya ticchihualo. <sup>9</sup> Pa quimaniyan annimitzjcuiluilic se amal. Ca in amal annimitzilic pa camo anquipías len pa anquitas ca yehuanten hual canal o se sihual o local hual amo inminyaxca. Huan annimitzilic pa camo anquipías len pa anquitas ca yehuanten hual quichihualo oc se lachihualisli quinami inon. <sup>10</sup> Amo nicnequiaya niquijtu pa camo quiman anquipiasquiaya nindeno pa anquitasquiaya ca yehuanten pin lalticpan hual amo Dios ilacames, yehuanten hual canal o se sihual, oc se local hual amo inminyaxca hual amo monamictic ca yihual, huan quichihualo len amo cuali quinami inon. Huan amo niquijtuaya pa camo anquinmitasquiaya ca lacames hual amo mocahualo pa quinequisi niman miac, miac, huan quin-majmanililo oc sequin. Huan amo niquijtuaya pa camo anquinmitasquiaya ca lacames hual quinmolancuacuetzililo oc sequin dioses. Sínda amo anquitaya ca yehuanten, cuaquíñ monequiaya pa anquisasquiaya pin lalticpan pa annijcuanisquiaya capa yehuanten. <sup>11</sup> Inon, quema, nicnequiaya niquijtu: Annimitzjcuiluilic pa camo anquipías len pa anquitas ca se hual tiquijtulo yihual unca tocní pampa quineltoca in Tata huan ma yoje cana sihual, local hual amo iyaxca, se hual quichía len quinami inon, se hual quinequi quipía miac, miac, se hual quinmolancuacuetzilía oc sequin dioses, se hual lahuejuecaltía, se hual unca lahuanquil, se hual unca laxtequini. Quema, annimitzjcuiluilic pa camo quiman anlucas ca in se. <sup>12</sup> Mas que amo unca iyaxca pa se ca Dios ixolomes quijtus pampa yehuanten hual amo Dios ixolomes quipiasí pa yesi la'ajuali pampa quichihualo laijlaculisli, ma yoje, unca amhuanten anmoyaxca pa anquijtus pampa quipiasí pa yesi la'ajuali yehuanten hual quema, cate Dios ixolomes hual quichihuaje laijlaculisli. <sup>13</sup> Huan yehuanten hual amo ixolomes Dios, yihual Dios ihuán quijtus da quipialo pa yesi la'ajuali pampa quichihualo inminlaijlaculisli. Axan, amhuanten xijquixtican pa capa amhuanten in local laijlaculi.

## 6

*Quinmíla pa camo yasi ca inmintexpahuilisli inminlaixpan la'ajuanijmes hual amo quineltocalo Dios*

<sup>1</sup> Nimolapolultía quiman nijcaquíñ quinami amhuanten amo anquimati anmomajti pa yas inminlaixpan in la'ajuanijmes hual amo ilacames Dios quiman quipia pa quimotexpahuilis icni hual quineltoca Cristo. Ni-molapolultía pampa amo quimotexpahuilía inminlaixpan ixolomes Dios. ¿Quinami huil amo quimati momajtia se pa quichías yoje? <sup>2</sup> ¿Amo anquimati ilacames Dios yalo quisehuilo mochi inminlatexpahuilisli yehuan-ten hual Dios quinchíac hual cate pin cielo (ilhuicac) huan pan lalticpan? Quema, anyahui anquinchihuilía inon yehuanten. Huan yoje, axan neli

unca nican pan lalticpan anquipía lahueliltilisli pa anlajlanis pa anquimatis quinami anquisehuis mochi latexpahuilisli hual amo monotzalo míac. <sup>3</sup> ¿Amo anquimati pampa tiahuilo tiquinsehuilo mochi inminlatexpahuilisli in lanahuatinijmes pin cielo? Huan, pampa neli unca anyahui anquisehuía, noje unca neli anquipía lahueliltilisli huan lajmatilisli pa anquisehuis innojen hual quinpanulo lacames quiman yulticate pan lalticpan. <sup>4</sup> Cuaquinon, sinda cuajnesi cayasi latexpahuilisli ca amhuanten hual anunca Dios ilacames, cuaquinon ¿leca anquinmacahuiltía pa quinsehuilisli yehuanten hual moxtin laneltocanijmes quinmitalo quinami lacames hual amo monotzalo míac? <sup>5</sup> Inon annimitzilijtica pa annimitzpinajtis. ¿Amo unca se capa amhuanten ca lajmatilisli hual huil quisehuilis se latexpahuilisli ca se tocní huan oc se tocní? <sup>6</sup> Capa amhuanten, se tocní motexpahuía ca oc se tocní, huan jinon quichihualo inminlaixpan la'ajuanijmes hual amo quineltocalo Dios!

<sup>7</sup> Sinda anmotexpahuis inminlaixpan yehuanten hual amo quineltocalo Dios, cuaquin pampa inon anmijsulahuac in amo cuali, pampa cataya se latexpahuilisli ca amhuanten hual anunca Dios ilacames. Yesquiaya cuali pa se quimacahuiltis pa oc se icni quichihuilisquiaya amo cuali huan mopepenialtisquiaya. Quema, yesquiaya cuali pa quimacahuiltisquiaya oc se icni quicajcayahuasquiaya huan in se mopepenialtisquiaya. Inon yesquiaya cuali, huan amo yoje cuali unca pa se motexpahuisquiaya inminlaixpan yehuanten hual amo quineltocalo Dios. <sup>8</sup> Amhuanten, mas que anunca Dios ilacames, ma yoje anquinchihuilía amo cuali oc sequin huan anquincajcayahua, mas que cate anmocnían. <sup>9</sup> ¿Cuajnesi amo anquimatiaya yehuanten hual yulilo quichijiticate len amo cuali amo quipiasí laxilulisli pin cielo ca Dios capa huelitía? Amo ximocaujcuamanacan. Aquí hual monipanúa ca se huan oc se calica amo monamictía amo quipías laxilulisli ca Dios. Huan yoje unca ca aquí hual quinmolancuacuetzilía inminlaixpan monos o len yes pa quimolancuacuetzilis. Huan unca yoje ca aquí hual monipanúa ca isihua oc se, o ca ilahuical oc se. Unca yoje ca se lalac hual quimacahuiltía pa oc se lalac monipanus ca yihual quinami monipanus ca se sihual. Huan aquí hual unca lalac huan cana oc se lalac pa monipanus quinami lacames monipanus ca sihuames noje amo quipiasí laxilulisli ca Dios. <sup>10</sup> Huan jan yoje, se laxtequini, huan aquinojen hual quinequilo míac, míac len yes, huan lahuanquimes, huan aquinojen hual lahuejuecaltilo, huan aquinojen hual lamictilo pa laxtequisi, quema, yehuanten hual yulilo quichijiticate innojen amo quipiasí laxilulisli pin cielo (ilhuicac) ca Dios. <sup>11</sup> Huan sequin ca amhuanten anyulini anquinchijtataya lejlen quinami innojen. Ma yoje, ancataya lachipahuali pa anmoyolo pa yes laquixtili anmolaijlaculisli. Ancataya lalalili pa anyes san Dios ilacames chijchipahuac, huan Dios umpa quijtic pampa unca lapujpuhuali anmolaijlaculisli. Yoje Dios huil anmitzita amo anquipixtica laijlaculisli. Inon Dios anmijchihuilic pan ipampa ilahueliltilisli itoca in Tata Jesucristo huan pan ipampa iEspíritu Santo toDios.

### *Se icuerpo monequi pa mocahuas chipahuac pa Dios*

<sup>12</sup> Sequin quijitulo: “Ticate lamacahuilti pa ticchihuasi len yes ticnequilo ticchihuasi hual Dios amo quijtic pa camo ticchihuasi.” Inon quijtulo. Ma yoje, amo mochi inon tejchihuililo cuali sinda tiquinchiuasi, huan cuajnesi amo quinchihuililo cuali oc sequin sinda tiquinchiuasi. Niunca lamacahuilti pa niquinchías mochi innojen. Ma yoje, nehual amo nicmacahuiltis pa noyolo nejchihualtis innojen. <sup>13</sup> Lajitic pa toyolo capa timayanalo,

monequi pa ticpiasi len tijcuasi. Huan Dios techmacac mochi len tijcuasi. Ma yoje, Dios amo quinchíac toyolo huan in hual tijcualo pa huejcahuasi yesi yoje. Se tonali Dios quinlamis toyolo huan in hual tijcualo. Jan yoje ca se icuerpo Dios amo quichíac pa in se monilus ca aqui yes quiman yes in se quinequi. No, amo quiman, pampa Dios tejchihuilic tocuerpos huan quinequi pa ticneltocasi yihual ca yehuanten. In Tata unca pa se icuerpo, pampa yuli pa tocuerpos huan yojque huil tiyulilo quinami yihual quinequi. <sup>14</sup> Huan quichíac Dios inon, quiyuliltic in Tata Jesús oc sejpa quiman miguic. Huan yihual noje techyuliltis oc sejpa tehuanten pan ipampa ilahuelitlisli.

<sup>15</sup> Amhuanent, quema, anquimati pampa amhuanent hual anquineltocha Cristo anunca iyaxca Cristo jan quinami tomajma huan toxían cate toyaxca pa techtequipanuilisi. Yoje, amo unca cuali pa nehual nicanas in hual iyaxca Cristo pa nimonilus ca se sihual hual monilúa ca calía yes lalcal. No, jma camo quiman niqijitu pa noyolo pa nicchías yoje! <sup>16</sup> ¿Amo anquimati sinda se monilúa ca se sihual amo cuali, yoje huan yihual mochihuasi quinami se cuerpo? Yoje unca, pampa Dios ilajtol quijtúa: “In omenten mochihuasi se.” Yoje Dios quinmita. <sup>17</sup> Huan aqui hual quimaca iyolo in Tata Jesús, yoje huan yihual mochihuasi se san.

<sup>18</sup> Ximomajtican pa camo anmonilus ca se sihual o lalcal hual amo mosihua o molahuical, ximijcuantiquisacan quiman yes anmoitas capa huil anquichías inon. Mochi oc se ilachihualisli laijlaculisli hual quichía se amo quijlacúa icuerpo quinami quiman monilúa ca se hual amo iyaxca. Aqui hual quichía yoje mochihuilía laijlaculisli pampa quijlacúa icuerpo huan yoje quijcuantitía icuerpo pa camo cayas ca Cristo icuerpo. <sup>19</sup> ¿Amo anquimatiaya in Espíritu Santo chanti lajitic anmocuerpos? Quema, yoje unca, huan anmocuerpos (anmonacayo) amo anmoyaxca amhuanent, pampa Dios anmitzcuhuac. Laxlahuic pa amhuanent, ipatiaya niman mías in laxlahuilisli. <sup>20</sup> Pampín, anquipía pa anquinxtilis Dios momajtilisli pan impampa anmocuerpos jan quinami anquinxtilía momajtilisli pan impampa anmoyolo, pampa in omenten cate iyaxca Dios.

## 7

### *Quinmilía quinami monequi pa yulisi quiman monamictilo*

<sup>1</sup> Axan ma annimitznanquili innojen lajtomes hual annehclajlanic quiman annehijcuilulic pa anmoamal. Anquijtuc unca cuali pa se lalcal amo monilus ca se sihual. <sup>2</sup> Ma yoje, moita se mías quiman iyolo unca latilanili pa monilusi huan se sihual sinda amo quipía isihua. Huan yoje unca ca se sihual sinda amo quipía ilahuical. Pampín, ma quipía sejse lalcal isihua pa yihual ihuían. Huan sejse sihual ma quipía ilahuical pa yihual ihuían. <sup>3</sup> Pa isihua, monequi pa se lalcal motemacas pa monilus ca yihual, pampa pa isihua unca iyaxca. Huan jan yoje pa ilahuical, monequi pa se isihua motemacas pa monilus ca yihual, pampa pa ilahuical unca iyaxca yihual. <sup>4</sup> Unca pampa pa isihua amo unca iyaxca ihuían icuerpo (inacayo) yihual. Noje unca iyaxca ilahuical. Huan jan yoje, amo unca iyaxca ihuían icuerpo in lalcal, noje unca iyaxca isihua. <sup>5</sup> Se lalcal ca isihua, ma camo moquixtilican in hual inminyaxca pa monilusi. Jan quiman anmocahuas ca se lajtulisli pa camo anmonilus pa se ome tonalijmes san quiman anquinequi anpanúa in tonalijmes anquilajlantica Dios, cuaquín huil anmocahuas pa anmonilus. Huan quiman laquisalo in tonalijmes, xipehuacan ximonilucan oc sejpa, amo san gá Satanás anmitztilanilis

anmoyolo pa anquichías in hual amo cuali hual cuajnesi anquinequis míac pa anquichías.

<sup>6</sup> Ma yoje, amo annimitzilijtica pampa anquipías pa anquichías se lajtulisli quinami inon. Annimitzilijtica huil anquichía yoje sinda anquijtúa yes cuali pa amhuanten. <sup>7</sup> Nehual nicnequisquiaya pa moxtin lacames yelosquiaya quinami nehual, lacames hual quipialo lahuelilitlisli pa motzacuilisi pa camo monilusi ca sihuames. Ma yoje, sejse quipía ilahuelilitlisli hual Dios quimacac, se quipía in lahuelilitlisli, oc se quipía oc se lahuelilitlisli.

<sup>8</sup> Pa yehuanten hual amo cate lanamictili huan pa in sihuames hual miqijje inminlahuicalhuan, niquinmilía unca cuali pa mocahuasi yehuanten quinami nehual noje niunca. <sup>9</sup> Ma yoje, sinda quinequilo míac monilusi quinami lacames ca sihuames, cuaquín ma monamictican, pampa cuali unca pa se monamictis pa camo yulis chichinajtica laijtic pampa quinejnectica quipía isihua. <sup>10</sup> Huan yehuanten hual monamictije, niquinmilía chicahuac, huan no, unca in Tata hual quinmilía chicahuac, pa camo moxilul se sihual pa yajmo yulis ca ilahuical. <sup>11</sup> Sinda quema, moxilúa, ma mocahua ihuían, ma camo monamicti ca oc se, o ma caya jan sejpa ca ilahuical, ma chantican in omenten oc sejpa. Huan se lalac, ma camo moxilul pa camo yulis ca isihua.

<sup>12</sup> Huan in oc sequin niquinmilía inon: Sinda se tocní hual quineltoac Cristo, da quipía isihua hual amo quineltoac Cristo huan ma yoje isihua quinequi caya yultica ca yihual, cuaquín ma camo moxilul ilahuical pa yajmo yulis ca yihual. <sup>13</sup> Huan se sihual hual unca iyaxca Cristo, sinda quipía ilahuical hual amo quineltoac Cristo, huan quinequi caya yultica ca in sihual, ma camo moxilul pa yajmo yulis ca ilahuical. <sup>14</sup> Ma ye yoje, pampa in sihual hual quineltoac Cristo unca se san ca ilahuical. Yoje quinmita Dios in omenten jan se san. Pampín Dios quita ilahuical quinami yihual chipahuac, pampa unca chipahuac isihua. Huan jan yojque, in lalac hual quineltoac Cristo unca jan se san ca isihua. Yoje Dios quinmita. Pampín Dios quita isihua quinami yihual chipahuac pampa unca chipahuac ilahuical. Sinda amo yoje cayasquiaya, cuaquinon anmoxolomes cayalosquiaya xolomes hual Dios amo quinmitasquiaya chijchipahuac. Ma yoje, quinami cate axan, Dios quinmita quinami chijchipahuac, pampa se ca inmintajtzitzián Dios quichipahuac pa yes se ixolol. <sup>15</sup> Huan sinda moxilúa yihual hual amo quineltoac Cristo, pa yajmo yulis ca isihua o ilahuical cuaquín ma moxilul. Sinda yoje panúa, tocní lalac huan tocní sihual amo quipía pa mocahuas monamictitica ca in se hual moxilul. Dios technotzac pa tiyesi ilacames pa tiyulisi ca mosehuilisi pa toyolo. <sup>16</sup> Damo huil ticmati neli, nocni sihual, da ticpalehuis molahuical pa quineltoac Cristo. Huan damo huil ticmati neli, tocní lalac, da ticpalehuis mosihua pa quineltoac Cristo.

<sup>17</sup> Jan inon san, ma yuli sejse quinami cataya quiman Dios quinoztac pa yes se ca ilacames. Niquinmilía chicahuac pa yulisi yoje moxtin tocnían cajcapa yes chantilo huan monechiculo quinami quichihualo Dios ilacames. <sup>18</sup> Sinda quipía se pa icuerpo ilacotonalisli in judíos, nicnequi niquijtúa, da quipiaya lacotonali icuilaxli quiman Dios quinoztac, ma camo quitemu quinami huil quimopolutilis in lacotonalisli. Sinda se amo quipiaya in lacotonalisli quiman Dios quinoztac, ma camo quinmilican pa quicotonilisi icuilaxli quinami quichihuililo in judíos. <sup>19</sup> Amo monotza nindeno sinda se quipía in lacotonalisli o sinda se amo quipía in lacotonalisli. Quema, monotza mochi pa se yulis quichijtica quinami quijtúa Dios. <sup>20</sup> Ma mocahua sejse jan quinami cataya quiman Dios quinoztac pa yes se ca ilacames.

21 Ma annimitznextili in ca se lajtulisli. Sinda Dios quintonza se pa yes pa yihual huan in se quipía iteco hual quimocuhuilic pa quitequipanuulis, cuaquín ma camo quijtu in se pampa yihual amo monotza nindeno. Ma yoje, sinda huil quitas quinami huil quisas pa yajmo yes iyaxca iteco, ma quichía. 22 Amo monotza nindeno ca Dios sinda yec lalacacuhuali pa quitequipanuulis iteco quiman Dios quintonzac. Huan amo monotza sinda amo yec lalacacuhuali quiman Dios quintonzac. Sinda unca lalacacuhuali, axan yuli inahuac in Tata hual quimacahuac pa yajmo yes se ilalacacuhuali iteco Satanás hual quichihualtini laijlaculisli. Huan jan yoje, yihual hual amo yec lalacacuhuali quiman Dios quintonzac, ma yoje, axcan yihual quipía Cristo quinami iteco. 23 Dios anmitzcuhuac pa anyes iyaxca, huan laxlahuic míac pa amhuanten. 24 Pampa inon, amo ximochihuacan lacames hual anquinpía quinami anmotecojuan lacames hual anmitzlatzacuilisli pa camo anquichías in hual Dios quinequi. Yoje, nocnían, ma yultía seje quinami yec quiman Dios quintonzac, sinda yec lalacacuhuali pa quitequipanuulis iteco o amo lalacacuhuali, ma yultía quilalijtica ilaneltocalisli ca Dios.

25 Amo nicpía lajtol hual nechmacac in Tata pa annimitzilis pa sihuames hual ayamo moniluje ca se lalacacuhuali. Ma yoje annimitzilía len nicmati unca lajtol cuali inahuac inon, pampa nechmachiltic in Tata ca lajmatilisli huan yoje lacames huil quinellocasi pampa in hual niquinmilia unca quinami Dios quijtusquiaya. 26 Yoje, niquijtúa inon unca cuali. Nicnequi niquijtúa, amo yahui huejcahua pa moitasí tonalijmes quiman Dios ilacames yalo quipanulo míac lacocoltilisli. Pampín unca cuali pa yes yoje se quinami nía annimitzilía. 27 Sinda se monamictic, ma camo quitemu quinami moxilus pa yajmo yulis ca isihua. Sinda se amo monamictía, ma camo quitemu sihual pa monamictis. 28 Huan sinda, quema, timonamictía, amo ticchía laijlaculisli pampa ticchiac inon. Huan sinda monamictía se sihual hual ayamo moniluc ca se lalacacuhuali, yihual noje amo quichijtica laijlaculisli sinda monamictía. Ma yoje, panusi lacocoltilisli pampa monamictije, huan nicnequisquiaya pa camo anquipías pa anpanus inon.

29 San inon, nocnían, nicnequi niquijtúa. Amo huejcahuasi míac in tonalijmes hual Dios techcahuilic pa ticchihuasi inon hual yihual quinequi. Axcan huan pa mosta, yehuanten hual quinpialo inminsihuahuan, ma quitequipanuulic in Tata ca mochi inminyolo quinami amo quipialoaya pa quinmijnamiquilosquiaya inminsihuahuan. 30 Huan yehuanten hual quincocujtica inminyolo, ma quitequipanuulic in Tata quinami amo quicocuhua inminyolo. Yehuanten hual quipixticate paquilisli, ma quitequipanuulic amo quijnamicticate míac in hual quinpauilic. Huan yehuanten hual lacuhuanijmes huan lanamacanijmes ma quitequipanuulic in Tata quinami amo quipialoaya pa quijnamiquilosquiaya in hual quinamacalo huan quicuhualo. 31 Yehuanten hual tequipanulo ca mochi innojen hual cate pin lalticpan, ma quitequipanuulic in Tata quinami amo quinnonotziliaya nindenó innojen hual cate pin lalticpan. Monequi pa quijtusi yojque laijtic yehuanten inminyolo, pampa amo yahui mocahua toyulilisli pin lalticpan yojque quinami ticmatilo.

32 Nicnequisquiaya pa anyultías amo anquixtica momajtilisli inahuac mochi innojen pin lalticpan hual amo yalo huejcahuualo. Aqi hual amo monamictía, ca yihual monotza mochi hual quinequi in Tata, laijnamiquía quinami huil quipaquilía in Tata. 33 Huan aqi hual monamictía, pa yihual monotza iyulilisli pin lalticpan, huan quimonotzilía quinami huil quipaquilía isihua. 34 Huan yojque quinpía in omenten pa quipaquilis, in

Tata huan isihua. Huan in sihual hual amo monamictía huan in sihual yan-cuic hual ayamo monamictía, yoje ca yehuanten monotza in hual quinequi in Tata, pa yojque yesi chijchipahuac pa inminyolo huan pa yesi jan pa in Tata san, seje icuerpo huan iyolo. Amo unca yoje ca in sihual hual monamictía. Pa yihual monotza iyulilisi pin lalticpan huan quimonotzilía quinami huil quipaquilítia ilahuical.

<sup>35</sup> Inon hual annimitzilía unca lajtol ca míac lapalehuilisi pa amhuanten. Amo annimitzilijtica inon pa annimitzlatzacuilis pa camo anmonamictis. Annimitzilijtica inon pa anyulis anquichijτίας in hual amo quiman mocahua pa canas cuali, huan pa anyulis anquitequipanuiliτίας in Tata ca mochi anmoyolo. Huan sinda anyulis yoje, amo anmijtzacuilis nindeno pa camo anquitequipanuilis in Tata.

<sup>36</sup> Axcán, sinda se lalac quipía ixolol sihual hual ayamo moniluc ca se lalac, huan yihual quijtua lajtic iyolo pampa amo unca cuali pa quitzacuilis pa camo monamictis pampa in xolol sihual axan moscaltic huan quinequi míac monamictía, cuaquín ma quichía in lalac quinami quinequi, amo quichijtica laijlaculis yoje. Ma monamicti in xolol sihual ca in lalac. <sup>37</sup> Huan yihual quichía cuali hual quilalic chicahuac pa iyolo pa quipixτίας ixolol sihual pa camo monamictis. Ma yoje, quichías cuali san sinda amo monequi pa quimacahuilts ixolol, quema, quichías cuali sinda quipixτίας ixolol amo lanamictili, sinda neli quilalic yojque pa iyolo. <sup>38</sup> Yoje, quichía cuali sinda quitemaca pa monamictis ixolol sihual hual ayamo moniluc ca se lalac. Ma yoje, yihual quichía niman cuali sinda amo quitemaca pa monamictis ixolol sihual hual ayamo moniluc ca se lalac.

<sup>39</sup> Se sihual mocahua iyaxca ilahuical pa mochi in xixihuimes hual yuli in lalac. Huan sinda migui ilahuical, cuaquinon unca iyaxca in sihual pa monamictis ca oc se lalac hual quixtoca. Ma yoje monequi pa in lalac hual quixtoca yes se ca Cristo ilacames. <sup>40</sup> Mas que monequi pa yes yoje, nehual niqijtua yihual cayas ca paquilisi sinda mocahua ihuán. Niquijtua da amo cayas ca yoje míac paquilisi sinda monamictía oc se jpa. Huan niqijtua Dios in Espíritu Santo nechnextilijtica in unca niman cuali pa in sihual.

## 8

*¿Huil tijcualo nacal hual quilalilo inminlaixpan monos hual quinmolancuacuetzililo?*

<sup>1</sup> Axcán ma annimitzijcuilulía inahuac nacal hual cataya lalalilo quinami huendi ilaixpan se mono hual quimolancuacuetzililo. Timoxtin ticmatilo monos amo monotzalo nindeno. Ma yojque, sinda se quimati inon, cuaquín huejtica yahui quijtua pa iyolo pampa yihual hué. Amo unca yoje ca se hual quimati lalaso jla, yihual quinchihuilia cuali moxtin ilacames Dios. <sup>2</sup> Sinda se quijtua lajtic iyolo pampa quimati len, cuaquín mocuajcuamana, pampa ayamo quimati quinami monequi pa quimatis. <sup>3</sup> Huan sinda se quilaso jla Dios, yoje Dios quiximati in se quinami se ca ilacames. <sup>4</sup> Yoje, tiqijtulo inon inahuac len quicuasi hual quilalilo ilaixpan se mono quinami huendi. Ticmatilo se mono neli amo yuli huan amo monotza nindeno pin lalticpan huan pin cielo. Huan ticmatilo amo unca oc se Dios, jan se san. <sup>5</sup> Huan ma yojque, mas que cate míac hual lacames quijtulo pampa cate dioses, ma cayacán pin cielo (ilhuicac), ma cayacán pan lalticpan, yehuanten neli cate míac dioses huan míac ijyecames amo cuajcuali hual huelitilo ca

yehuanten hual amo Dios ilacames. <sup>6</sup> Huan mas que unca yoje pa yehuanten, pa tehuanten jan unca se Dios hual toTajtzin. Capa yihual quisaje mochi hual unca, huan pa yihual ticate pa tictequipanuilis. Huan unca se toTata Jesucristo, pan ipampa yihual Dios quinchíac mochi. Huan pan ipampa Cristo, tehuanten toyolo techyulilitíla Cristo ca yulilisi yancuic. <sup>7</sup> Ma yojque, amo moxtin quimatilo inon. Huan sequin hual motequihuiniyme quicualo in hual quilalilo ilaixpan in mono quinami huendí, axan cate tocnían pan ipampa in Tata. Ma yojque sinda axan quicualo in hual cataya lalalili ilaixpan in mono quinami huendi, moitalo laijlaculi pampa inon. Huan yojque moitalo quinami yajmo chipahuac inminyolo. Pampa inon, quincocoltía pa inminyolo calica quimatilo len unca cuali huan len amo unca cuali. <sup>8</sup> Huan tehuanten, len yes tijcuasi amo tejchihuillilo nindeno quinami timoitalo ca Dios. Sinda amo tijcualo, amo ticpolulo nindeno in hual Dios techmaca, huan sinda quema, tijcualo, ticpiasi san inon hual iyaxca Dios. <sup>9</sup> Ma yoje, mas que unca anmoyaxca pa anquicuas inminlacuali hual quilalilo inminlaixpan monos hual quinmolancuacuetzililo, ximoitacan cuali pa camo cuajnesi anquichihuillis pa se tocni quichías laijlaculisli. Sinda in tocni quimahuilía pampa in hual Dios quimacahuiltía pa quichías, yihual huejtica quichías laijlaculisli da mitzitas tijcuas. <sup>10</sup> Pampín, monequi pa camo tijcuas. Mas que ticmati monos amo monotzalo nindeno, yihual amo neli quimati inon. Huan sinda mitzitas tehual tijcuajtica pan capa yehuanten quicualo in huendis hual quinlalilo inminlaixpan in monos, cuajnesi amo yahui momajtía quicuas inminlacualisli in monos. Cuaquín quicuas, mas que quimahuilía ca ilajmatilisli hual quinextilía len unca cuali huan amo cuali. <sup>11</sup> Huan yojque, tiqijlacus yihual hual cuajnesi ayamo mocahuac pa momajtisquiaya nadita inahuac in mono. Noje tiqijlacus pan ipampa quinami tehual ticmati in mono amo monotza len. Huan mocni cayas laijlaculi, mas que Cristo miquic pa yihual. <sup>12</sup> Yojque, ticchihuillilic laijlaculisli mocni, tijcocoltilic iyolo pampa yihual amo motzacuilic pa camo quichiasquiaya in hual yihual quijtúa laijtic iyolo amo unca cuali. Huan yojque anquichías laijlaculisli ilaixpan Cristo. <sup>13</sup> Pampín, sinda nocni nehual quichías laijlaculisli pampa nechita nijcuatica len yes hual tijcualo, cuaquín amo quiman nijcuas inon oc sejsa, amo san gá quichías laijlaculisli nocni pampa nehual nijcuac.

## 9

### *Pablo quijtúa in hual unca iyaxca se lanahuatini*

<sup>1</sup> Nehual Dios nechmacahuiltía pa nicchías mochi. Amo nicpía len niqitas ca inon hual quijtúa in lajtol inahuac in hual monequi pa se quichías pa quimolancuacuetzilis Dios. Huan niunca se lanahuatini hual yihual in Tata nechlajtultic, niqitac Jesús toTata yultica oc sejsa. Amhuanten anunca se ca in Tata pan ipampa quinami annimitzmachiltic ilajtol. Inon cataya notequipanulisli ca amhuanten. <sup>2</sup> Cate sequin hual nechitalo quinami se lanahuatini, huan cate oc sequin amo quínequilo nechitalo quinami se lanahuatini hual Dios quilajtultic. Ma yojque unca melahuac nel niunca ilanahuatini Dios, huan amhuanten anquimati nehual niunca ilanahuatini. Pan nopampa nehual anmochíac in Tata ilacames. Huan pampa axcan anunca ilacames in Tata, noje inon axcan anmitznextilía neli pampa nehual nilanahuatini hual in Tata nechlajtultic. Niunca quinami layapali pan anmoyolo. Jan yoje momati se amal unca neli iamal se caltilan pampa in la'ajuani quiyapa iamal ca itemulol.



<sup>3</sup> Huan inon hual nía niqijtúa unca in lajtol calica nimonapatía ca yehuanten hual nechlajlanilo pa quimatis sinda neli nicpía lahueliltisli hual Dios nechmaca. <sup>4</sup> Unca noyaxca pa nicanas len nijcuas huan len nicunis hual nechmacalo. <sup>5</sup> Ca capic nías, unca noyaxca pa nicuicasquiaya umpa nosihua hual quineltocha Cristo sinda nicpiaya nosihua. Unca noyaxca jan quinami unca inminyaxca innojen oc sequin lanahuatinijmes, quema, quinami icnían in Tata huan Cefas noje. <sup>6</sup> Huan amhuanten ¿anquijtúa pampa jan nehual huan Bernabé san amo unca toyaxca pa timocahuasi pa titequipanusi pa timolacualtisi pa yoje timolalisi pa ticlamachiltisi in lamachiltisli cuali? Neli unca toyaxca. <sup>7</sup> Amo unca se guache hual tequipanúa ihuán pa molacualtis. Amo unca se hual quilachilia iuvatilan oc se huan amo quicua ilaquilyo in uvatilan. Huan amo unca se hual quilachilia se quesqui sihuacuacujmes huan amo cuni inminleche. <sup>8</sup> Inon amo niqijtutica pampa in lacames hual quipialo lahueliltisli quilalililo yojque. <sup>9</sup> Inon unca lajcuiluli pa ilajtol Dios hual Moisés techmacac, in lajtol hual monequi pa ticneltocasi, quijtúa: “Amo tiquilpilis iyacatzol in buey hual quitelicsa inmiahuimes in trigo.” ¿Anquijtúa Dios quimacac in lajtol pampa jan quinmijnamiquiaya san bueyes? <sup>10</sup> No, Dios quijtuc inon pa tejchihuilisquiaya cuali tehuanten in lanahuatinijmes. Neli cataya lajcuiluli pa tehuanten pa yojque ticchialosquiaya ticmazticate yihual techmacas len monequi. Inon ticanasi pampa ticlamachiltiyo ilajtol Dios huan tiquinmaxtiloaya yehuanten hual quineltochaje ilajtol. Tolaxlahuilisli ticchialosquiaya jan quinami aquí laxahua huan aquí lapixca, quichialo quimazticate pampa yalo canaló se ilajco in trigo quinami laxlahuilisli. <sup>11</sup> Ticxinije ilajtol Dios quinami se latocli capa amhuanten, pa yojque anquiasquiaya mochi hual yes cuali pa anmoyolo, pa yoje amo anmocahuas pa anyulis pa iojli Dios. Pampa antimijchihuilije inon, cuaquinon unca neli amo antimitzljanticate miac sinda ticchialo pa antechmacas nadita in hual anquipía pa huil timolacualtisi. Yoje yesquiaya quinami tilapixcatalosquiaya capa amhuanten capa tilatocaje. <sup>12</sup> Inon unca toyaxca tehuanten in lanahuatinijmes. Huan sinda ca oc sequin itequipanujquimes Dios unca inminyaxca pa canasi quinami inminlaxlahuilisli in hual anmoyaxca hual anquinxiluilía, cuaquín pa tehuanten unca niman miac toyaxca pa huil ticanalosquiaya tolaxilulisli. Ma yoje tehuanten amo quiman ticchihuaje yojque ca in hual unca toyaxca. Inon, quema, ticchihualo. Timolalilo pa timopepenialtisi ca mochi hual techajsi sinda amo ticpialo inon hual monequi. Amo ticnequilo pa lacames cuajnesi quijtusi ticanalo miac tomin pampa ticlamachiltiyo ilajtol Dios. Yoje yehuanten cuajnesi yelosquiaya latzacuali pa camo quineltoctalosquiaya Cristo ilamachiltisli cuali. <sup>13</sup> Neli anquimati quinami yehuanten hual quitequipanuילו Dios pin tiopan hué molacualtilo ca inminacal in huendis hual lacames quihualicalo pa in tiopan. Quema, yehuanten quilalilo in huendi capa quichichinulo pa quimolancuacuetzilisi Dios huan canaló inminlaxilulisli in nacal hual unca lalalili ipan. <sup>14</sup> Huan jan yojque in Tata noje quilalic pa molacualtisi yehuanten hual quilamachiltiyo in lamachiltisli cuali pan ipampa quinami quinlamachiltiyo in lamachiltisli cuali. <sup>15</sup> Ma yoje, nehual amo quiman nicchíac yoje, mas que cataya noyaxca pa nicchías. Huan amo niquinmijcuilúa innojen lajtomes pa yoje niajsis nicmatis sinda neli amhuanten anyahui annechlacualtia. Sinda monequiaya pa nimiquisquiaya pa yoje amo annimitzanilisquiaya laxlahuilisli, cuaquín nimiquiaya. Amaquí yahui nechquixtilía in hual unca noyaxca pa nilajtus hué pampa amo annimitzljalanis pa annechlacualtis. <sup>16</sup> Sinda



niclamachilitinemi in lamachiltisli cuali, huan pampín annechlacualtía, yoje annechlahuic. Pampín amo cayas noyaxca pa nilajtus hué. Dios nechlalilic pa niclamachiltijtías ilamachiltisli cuali. Huan ¡len amo nipanus la'ajualisli chichahuac sinda amo niclamachiltis in lamachiltisli cuali!

<sup>17</sup> Pampín, nicchía pampa nehual nicnequi, huan nicpías nolaxlahuilisli. Huan sinda amo nicnequiaya nicchía, ma yoje nicataya lachihuaitli pa nichiasquiaya, Dios nechlalilic pa niquiltijtías. <sup>18</sup> ¿Len, axan, unca nolaxlahuilisli? Nolaxlahuilisli unca pa annimitzlamachiltis in lamachiltisli cuali huan pa camo annimitzljalanilis nindeno pampa annimitzlamachiltis. Yoje niquita quinami nolaxlahuilisli inon pampa amo nicchiac quinami unca noyaxca pa annimitzljalanilis nolaxlahuilisli. <sup>19</sup> Unca pampa mas que amo ninuca se hual quipía iteco hual amo quilaxhuía, ma yojque nimochía quinami se hual yuli quinami moxtin cate itecojuan. Pampín nimochía pa niquinpalehuis quineltocasi Dios yoje míac lacames quinami huil niquinneltocaltis. <sup>20</sup> Quema, nimochiac nehual quinami se judío quiman niquinmilijtica in judíos in lamachiltisli cuali. Nicnequi niquiltía, quiman niquinmilijtica in lamachiltisli cuali, nimochía quinami se hual yuli quichijtica in hual quijtía inminlajtol in judíos hual quimaxtía quinami monequi quitequipanuilisli Dios. Huan mas que nehual nohuíamo nicpia pa nijcactías inminlajtol in judíos, ma yojque nijcactías pa niquinpalehuis quineltocasi in judíos hual yulilo quichijtcate len quijtía inminlajtol. <sup>21</sup> Huan quiman niquinmilijtica in lamachiltisli cuali yehuanten hual amo quimatilo in judíos inminlajtol, cuaquinon nehual nimochía quinami se hual amo yuli quinami quijtía in judíos inminlajtol inahuac quinami quitequipanuilisli Dios. Yojque niquinpalehuía pa quineltocasi yehuanten noje. Ma yoje, nicneltoca Dios ilajtol, huan Cristo ilajtol unca laijtic noyolo pa nicneltocas. <sup>22</sup> Cate yehuanten hual quimahuililo pa quichihuasi in hual ilamaxtilisli Cristo quijtía huil quichihualo. Ca yehuanten nimochía se hual amo quichía in hual quijtulo cuajnesi amo unca cuali. Yoje nicchía pa niquinpalehuis pa quineltocasi ca chichahuailisli in lamachiltisli cuali. Ca moxtin nimochía mochi quinami nehual huil pa niyes quinami yehuanten. Yoje nicchía pa cuajnesi niquinpalehuis sequin pa moquixtilisli pin polehuilisi ca capic quinhuica inminlajlaculisi.

<sup>23</sup> Huan nicchía mochi inon pampa niclasojla in cuali lamachiltisli. Nicchía pa yojque nicpías ca in oc sequin in míac hual in cuali lamachiltisli quijtía pampa Dios yahui quinxiluila moxtin hual quineltocalo. <sup>24</sup> ¿Amo anquimati quinami unca ca yehuanten hual molalulo pan se laluxtilisli? Moxtin molalulo huan ma yojque jan se san cana in laxlahuilisli. Yojque, ximolalucan pa ancanas in laxlahuilisli. Nicnequi niquiltía, xiyulican ca mochi anmochicahuailisli quinami Dios quinequi, pa ancanas in hual Dios quijtuc neli pampa yahui anmitzmaca. <sup>25</sup> Pan se laluxtilisli, seje quichía mochi hual huil pa quipanahuis. Huan pa mochijchías pa quipanahuis, yihual quijcuania mochi hual quitzacuulis pa camo quipanahuis. Yehuanten hual mochijchihualo yojque quichihualo pa yoje canasi se laxlahuilisli hual unca se layahuali lachihuali ca isacayo se cuahuil. Huan in layahuali amo huejcahuas míac tonalijmes. Tehuanten, amo quinami yehuanten, ticanasi chicuenta se layahuali hual huejcahuas, amo quinam lamis. <sup>26</sup> Yoje, nehual nicchía mochi hual huil nicchía pa nicanas nolaxlahuilisli. Amo nicchía quinami se hual molalúa huan amo quimati ca capic molalus pa canas. Huan amo niquinami se hual moantica ca imajmajuan amo quitecuatica

nindeno. <sup>27</sup> San inon nicchía: Nicsulahua chicahuac nocuerpo pa yoje nicchías len yes hual nicmati pampa nicpías pa nicchías. Unca quinami nicmochicahuatlíla nocuerpo. Quema, nicsulahua pa nechnehtocas, amo san gá nicpolus nolaxlahuilisli. Inon nicchía pampa cuajnesi sinda amo yoje nicchías, Dios amo quitas cuali notequipanulisli pa yihual. Huan inon mas que niquinlamachiltic oc sequin in cuali lamachiltisli.

## 10

### *Quinmaca lajtol chicahuac yehuanten hual quinmolancuacuetzililo monos*

<sup>1</sup> Nocnían, nicnequi pa anquimatis inon: Quiman totajtitzían in israelitos yajtiahuiloya pa inminlali, moxtin cataloaya itzindan in mextemil, huan yehuanten moxtin quipanajtiaje in Al Huejcalan Chichiltic. <sup>2</sup> Huan pampa quipiaje Moisés quinlaicantataya, quineltocape huan uyaje itzindan imex-temil inapatilisli Dios huan quipanajtiaje in Al Huejcalan Chichiltic. Inon lanextilía quinami yehuanten yeje lacames hual cate lacuayatequili quiman quijtulo yalo quitocalo in Tata ca mochi inminyolo. <sup>3</sup> Moxtin yehuanten quicuaeje inon hual Dios nepa pin cielo quintilanilic. <sup>4</sup> Moxtin cuniloaya al hual Dios quinmacac, quisac pa se tel. Huan cataya quinami yehuanten noje cuniloaya pa inminyolo ial in Tel. Mochi tonali in Tel quintocaya, huan in Tel yec Cristo. <sup>5</sup> Huan mas que Dios quinmiztiahuiaya mochi in tonalijmes hual yajtiahuiloya, ma yoje, in míac ca yehuanten amo quipaquiltiloaya Dios. Pampín miquije cajcapa nepa pin lali capa amaqui chantiaya.

<sup>6</sup> Mochi inon hual quinpanuc yehuanten cate lanextilisli pa tehuanten, pa camo ticayasi lacames hual ticnequilo len amo unca cuali, quinami yehuanten nojen quinequiloaya. <sup>7</sup> Huan amo ximochihuacan lacames hual quinmolancuacuetzililo monos quinami sequin ca yehuanten, jan quinami unca lajcuiluli, quijtúa: “Yehuanten molalije pa lacuasi huan pa launisi, huan moquetzaje pa mahuiltisi mijtotijtcate”, quil. (Yoje quinextilije lasojlalisli inminmono hual quichihuaje.) <sup>8</sup> Huan ma camo timonilucan lacames ca sihuames pa ticchihuasi len amo cuali, quinami sequin ca yehuanten quichihuaje amo cuali lacames ca sihuames hual amo yeje inminsihuahuan. Huan pampa quichihuaje inon, pan jan se tonali san miquije veintitrés mil ca yehuanten. <sup>9</sup> Huan ma camo tijcuilmattijtiacan pan iojli in Tata. Da ticchihuasi yoje, cuaquín ticchihuilijtcate len pa tiquitasi quichi amo cuali Dios techmacahuiltis pa ticchihuasi huan ma yoje amo tejtzacuilis. Sequin ca yehuanten totajtitzían quichihuaje yoje, huan hualaje cuhuames huan quincuaajcuaje. Yoje miquije míac totajtitzían. <sup>10</sup> Huan ma camo tila'ajuajtiacan ilaixpan Dios quinami sequin ca yehuanten la'ajuajtiahuinijme huan pampín temuc pin cielo Dios ilanahuatini lamictini in cielo huan quinmictic míac ca yehuanten.

<sup>11</sup> Mochi inon hual quinpanuc yehuanten cataloaya quinami laijnamiquiltisli pa tehuanten. Dios quichíac pa moijcuilusi innojen lajtomes pa yihual technextilis quinami monequi pa timoiztiasi ca melahualisli, tehuanten hual tiyulilo pin tonalijmes hual axan ajsije. Pampín ximoiztiacan, pampa tehuanten tiyulilo quiman lanticate itonalijmes in lalticpan hual axan unca. <sup>12</sup> Yoje, aqui quijtúa pampa amo quiman yahui quisa pan iojli Cristo, ma lachixtía cuali amo san gá quichías laijlaculisli huan yoje quisas pa yajmo quitocas iojli Dios. <sup>13</sup> Innojen amo cuajcuali hual anmiztpanúa amhuanten cate jan innojen hual quinpanulo moxtin oc sequin. Ma yoje, amhuanten huil anquimati

pampa anmitzpalehuía Dios. Yihual amo quimacahuiltis pa anmitzpanus len amo cuali hual amo huil anmopepenialtía pa anpanus. Anmitzajsís in amo cuali, Dios anmitzmacas quinami huil anquisas cuali pa inon, huan cuaquinon yoje huil anmopepenialtis.

<sup>14</sup> Cuaquin, lajlasojli nocnían, ximomajtician pa como anquinmolancuacuetzilís in monos, pa yojqe amo quiman anmoitas capa quinmolancuacuetzililo. <sup>15</sup> Amhuanten anunca lacames huan sihuames hual anquimati, huan annimitzilijtica inon pampa yoje anunca. Huil anquimati amhuanten nojen pampa unca cuali in hual annimitzilía. <sup>16</sup> Iayo uva coc pin tapalquita hual ticunilo tolaxilulisli ca in oc sequin tocnían, tihualo tilajlanticate Dios, ticsejticate Dios pa inon. Quiman ticchihualo inon, yojqe ticnextilo pampa ticneltocalo quinami pa tehuanten Cristo quitoyahuac iesli pin cuahuil. Huan in pan ticlapanalo huan tijcualo seje tolaxilulisli ca in oc sequin tocnían. Quiman ticchihualo inon, yoje tilanextililo quinami ticneltocalo Cristo panuc míac lacocoltilisli pa tehuanten. <sup>17</sup> In pan hual unca lalapanali ca míac lajlajco, ma yoje unca san se pan. Huan tehuanten, mas que ticate míac lacames huan sihuames, ma yoje ticate san se ca Cristo, pampa timoxtin seje ticpialo tolaxilulisli ca se pan. Huan quinami mochi in lajlajco cate ca se pan, yojqe timoxtin hual tijcualo in pan, ticate se, jan quinami icuerpo Cristo unca se san.

<sup>18</sup> Xiquitacan quinami motequihuil in israelitos quiman quimolancuacuetzililoaya Dios quinami quijtúa inminlajtol. Yehuanten quicualo inon hual quilalilo quinami huendi pan inon capa quinchichinulo huendis. Yoje cate quinami inahuac Dios pan ipampa in huendi. <sup>19</sup> Axcán, ¿len nicnequi niqijtúa pan ipampa in lajtomes? Nicnequi niqijtúa pampa amo monotza nindenó in hual yehuanten hual amo quineltocalo Dios quilalilo quinami huendi pa ilaixpan se mono. Huan amo nicnequi niqijtúa pampa in mono ihuían monotza len. <sup>20</sup> Inon, quema, nicnequi niqijtúa: Neli, yehuanten hual amo quineltocalo Dios quilalijtcate inminhuendi inminlaixpan ijyecames amo cuajcuali quiman quilalilo ilaixpan se mono. Amo quilalijtcate ilaixpan Dios. Huan amo nicnequi pa anmochias lacames hual quipixtialo ilaxilulisli len hual inminyaxca ijyecames amo cuajcuali. <sup>21</sup> Ancuni iayo uva coc pa itapalquita in Tata. Pampa inon monequi pa como ancunis noje in tapalquita hual unca inminyaxca ijyecames amo cuajcuali. Monequi pa como quiman anquichías inon. Huan anlacua capa quicualo ilacualisli in Tata. Pampa inon monequi pa como anquipías anmolaxilulisli ca ijyecames amo cuajcuali ipan capa monechiculo yehuanten hual quilalilo len quicuasi inminlaixpan ijyecames amo cuajcuali. <sup>22</sup> ¿Tijcualantisi Dios pa tejchahuatilis topampa tehuanten? ¡Neli unca amo ticpialo míac chichahualisli quinami yihual quipía!

### *Monequi pa tyulisi tiqijnamicticate quinami timopalehuisi timoxtin*

<sup>23</sup> Tehuanten hual ticpialo huan huil ticchihualo mochi hual Dios amo quijtuc pa como ticpiasi huan pa como ticchihuasi. Ma yoje, amo unca mochi innojen hual techpalehuía tehuanten. Huan noje amo unca mochi hual quinpalehuía oc sequin. Huil ticpialo mochi huan huil ticchihualo mochi. Ma yoje amo mochi innojen tejchihuililo pa timochihuasi ilacames Dios cuali quinami yihual quinequi. <sup>24</sup> Ma como caya amaqui hual yuli quitemujtica quinami huil mopaquiltía yihual ihuían. San monequi pa quitemes in hual cayas cuali pa in oc sequin.

<sup>25-26</sup> Mochi hual quinamacalo pin lajcotiyan (tianquisli) capa mocuhuililo len quicuasi, inon xijcuacan huan amo ximomajtican da cuajnesi cataya

nacal hual quilalije quinami huendi inminlaixpan in monos. Amo monequi pa anquilajlanía capa canaje in nacal pampa in lalticpan huan mochi hual unca pin lalticpan unca iyaxca in Tata. Pampin amo xicmahuilcan sinda anquichijtca cuali o amo cuali sinda anquicua.

<sup>27</sup> Sinda se hual amo quineltoca Dios anmitznotzas pa anlacuas ca yihual, huan anquinequi anyahui ca yihual, cuaquín xijcuacan mochi hual anmitzlamachiltic pampa cataya huendi. Mas que mochi pin lalticpan unca iyaxca in Tata, ma yoje amo ticnequi ticchihuilía amo cuali yihual ilajmatilisli calica quimati len unca cuali huan len amo unca cuali. <sup>28</sup> Ma yoje, sinda se anmitzilis in unca inacal se huendi hual cataya lalalili ilaixpan se mono, cuaquín amo xijcuacan, pampa yoje ticpías momajtilisli pa yihual hual anmitzlamachiltic pampa cataya huendi. Mas que mochi pin lalticpan unca iyaxca in Tata, ma yoje amo ticnequi ticchihuilía amo cuali yihual ilajmatilisli calica quimati len unca cuali huan len amo unca cuali. <sup>29</sup> Amo niqijjtutica amhuanten anmolajmatilisli calica anquimatis in cuali huan in hual amo cuali. San niqijjtutica yihual ilajmatilisli, yihual hual anmitzlic pampa cataya huendi. Dios nechmaca pa yes noyaxca pa nijcuas len yes nicnequi. Amo monotza nindeno sinda se nechmotexpahuilía ca Dios pampa quijtúa in hual nehual nicchijtca amo unca cuali. Quema, amo monotza nindeno, pampa Dios nechnextilic yihual amo quita nindeno amo cuali ca len nijcua. In se nechmotexpahuilía pampa amo chichahuac ilajmatilisli calica quimati in cuali huan amo cuali. <sup>30</sup> Sinda nicsehuía Dios pa in hual nijcua, cuaquín ¿leca nechmotexpahuilía pampa nijcua in? Nicsehuic Dios pa inon, huan yajmo niqijnamiquía pampa quilalilic ilaixpan in mono. <sup>31</sup> Yoje, nocnían, monequi pa anyulis anmopalejtica moxtin, ma ye sinda anquicuas, ma ye da ancunis, ma ye da anquichías len yes. Xicchihuacan mochi pa yoje anquichihuilis Dios mochi pa yoje anquixnextilis quinami Dios unca hué. <sup>32</sup> Xiyulican yoje pa camo anquichías nindeno hual oc sequin quijtulo amo unca cuali, ma yén (yecan) judíos, ma yecan yehuanten hual amo judíos, ma yecan yehuanten hual ilacames Dios. <sup>33</sup> Jan yoje, nehual niyuli niquinpaquiltitica moxtin pan ipampa mochi hual nicchía. Amo niyuli nictemujtca len yes nechpalehuis pa nicpías len nicnequi nehual. San nictemúa pa nicchías len yes quinpalehuis yoje moxtin, pa yoje yehuanten yesi laquixtili pin ipolehuilisli inminlaijlaculisli huan pa yoje canasi in yulilisi yanquic hual Dios quinmacas.

## 11

<sup>1</sup> Ximochihuacan quinami nehual, xiyulican xilachijtiacan quinami nehual, jan quinami nehual noje niyuli nilachijtía quinami Cristo.

*Quinami monequi lachihualo in sihuames quiman monechiculo pa quimolancuacuetzililo Dios*

<sup>2</sup> Axcan ma annimitzili pampa niquita cuali quinami annehijnamiquía nehual huan mochi in hual annimitzmactic. Huan mochi tonali anyajtía anquinneltocatica mochi ilajtomes in lamaxtilisli hual monequi pa quineltocasi Dios ilacames jan quinami annimitzmactic. <sup>3</sup> Ma yoje, nicnequi pa anquimatis Cristo quipía lahuelilitilisli pa quinlaicanas mochi lacames. Huan se lacal quipía lahuelilitilisli pa quilaicanas isihua, huan Dios quipía lahuelilitilisli pa quilaicanas Cristo. <sup>4</sup> Monequi pa mochi lacal pinahuas hual quilajlanía Dios o quimaxtía ilajtol Dios huan quipía lalalili ilasehualoni (sombbrero) pa itzontecan, pampa inon amo cana cuali. Sinda se

lcal quitzacuilis itzontecon, unca quinami quijtutica pampa oc se lcal inahuac Cristo quipía lahuelilitilisi pa quilaicanas. <sup>5</sup> Huan sinda se sihual quilajlanía Dios huan quimaxtia ilajtol Dios amo quipixtica latzacuali itzontecon, yoje yihual amo quimati momajtia ipampa itzontecon huan monequi pa mopinahuas pampa amo cana cuali. Nesi quinami yihual quijtúa pampa quipía ilahuelilitilisi se lcal. Inon pinahua jan quinami quiplaya laximali itzontecon quinami moximalo in lacames. <sup>6</sup> Yojque, sinda se sihual amo quinequi motzacuilía itzontecon, ma moxima. Huan sinda neli unca pinahualisli pa se sihual quipías laximali itzontecon, cuaquinon ma motzacuili itzontecon. <sup>7</sup> Quema, ma caya yojque, pampa in lcal quipía pa quichías yoje. Monequi pa como motzacuilis itzontecon, pampa yihual unca lachihuali pa nesis chicuenta Dios huan yoje quinextia nadita ilahuelilitilisi Dios. Amo yoje in sihual. In sihual Dios quichíac pa quinextis quinami Dios quichíac in lcal pa quipías lahuelilitilisi. <sup>8</sup> Unca yojque, pampa in lcal Dios amo quichíac pan ipampa in sihual, quichíac in sihual pan ipampa in lcal. <sup>9</sup> Noje Dios amo quichíac in lcal pa yes ilapalehuini in sihual, quichíac in sihual pa yes in lcal ilapalehuini. <sup>10</sup> Pampa inon monequi pa se sihual motzacuilis itzontecon pa quinextis quinami ilahuical quipía lahuelilitilisi pa yihual. Noje monequi pa motzacuilis itzontecon pa quinnextilis in lanahuatinijmes pin cielo quinami yihual quimati Dios quita cuali pa se sihual motzacuilis itzontecon. In lanahuatinijmes pin cielo amo mochualo pa cayasi ca tehuanten quiman ticmolancuacuetzilijiticate Dios. <sup>11</sup> Ma yoje, aquinojen yesi hual yulilo inahuac in Tata, in lcal huan in sihual cate jan se, lacames amo yulilo amo quipixticate inminlapalehuilisli in sihuames, huan sihuames amo yulilo amo quipixticate inminlapalehuilisli in lacames. Dios amo quinmita in lacames cuali huan in sihuames amo yoje cuali. Quinmita se jan quinami in oc se. <sup>12</sup> Huan quiman Dios quipehualtic mochi, in sihual yec lachihuali pan ipampa in lcal. Axan in lcal lacati pan ipampa in sihual. Dios quinchíac mochi huan quilalic pa yesi yoje.

<sup>13</sup> Xiquitacan huan xiquijnamiquican len unca cuali. ¿Anquijtúa cana cuali pa se sihual quilajlanis Dios sinda amo unca latzacuali itzontecon? No, amo cana cuali. <sup>14</sup> ¿Amo anmitznextilía inon quinami Dios quinchíac lacames pampa unca pinahualisli pa se lcal sinda quipía itzondi huejcanic? <sup>15</sup> Ma yoje, sinda se sihual quipía itzondi huejcanic, unca cualtichin pa yihual. Huan cana cuali quiman quipía yoje. Unca pampa Dios quimacac in sihual itzondi huejcanic pa yes chicuenta latzacuali itzontecon. <sup>16</sup> Yoje, sinda se nesi quinami quinequi quinlaxilía lajtomes inahuac inon, ma quimati pampa tehuanten in lanahuatinijmes amo ticchihualo oc se lachihualisli quiman ticlajlanilo Dios huan quiman ticmaxtilo ilajtol. Huan amo quichihualo oc se lachihualisli in oc sequin omitos ilacames Dios cajcaca mochiculo pa quimolancuacuetzilisi.

### *Amo cana cuali quinami in corintotecos quicualo ilacualisli in Tata*

<sup>17</sup> Axan, ca inon hual nía annimitzlaquetzilía, nía annimitzilía pampa amo anquichijtica cuali. Quiman anmonechicúa, amo anmitzpalehuía, anmijchihuilia amo cuali. <sup>18</sup> Nipehua annimitzlaquetzilijitica inon: Quiman amhuanten in laneltocanijmes anmonechicúa pa anquimolancuacuetzilisi Dios, nechililo pampa amo mochahua pa cayasi sequin hual amo cate ca se lajtulisli ca oc sequin. Huan niqijtua pampa nadita in hual nechililo unca yoje quinami quijtulo. <sup>19</sup> Unca pampa quipía pa cayasi lacames hual amo cate ca se lajtulisli ca in oc sequin hual quineltocalo cuali in lamaxtilisli

hual in lanahuatinijmes quinmilije. Quema, quipía pa cayasi in lacames pa yoje capa anunca amhuanten momatise cuali calía cate yehuanten hual neli quineltocalo Dios ilamaxtilisli. <sup>20</sup> Yoje, mas que anmonechicúa pa anquimolancuacuetzilis Cristo pan ipampa ilacualisli in Tata, neli amo unca ilacualisli in Tata hual anquicua. <sup>21</sup> Amo huil yes ilacualisli in Tata sinda peshualo lacualo sequin quiman ayamo ajsilo in oc sequin. Huan yoje, lami inon ca se hual mayantica, huan oc se hual cunic míac mochía lahuantica. <sup>22</sup> ¿Leca, nuso? ¿Amo anquipía anmochan capa huil anlacua huan anlauni? ¿Leca amo anmochahuas nepa pa anlacuas huan anlaunis? Quiman anlacua yoje capa anmonechicúa, anquinxixicujtica ilacames Dios hual cate lanechicuí nepa, huan anquinpinajtía yehuanten hual amo huil quipialo len quicualo. ¿Len annimitzilía amhuanten pampa anquichía inon? ¿Annimitzilis len cuali pampa anquichía yoje? ¡Xiquitacan! ¡Amo quiman annimitzilis len cuali pampa anquichía yoje, annimitzajua!

### *Ilacualisli in Tata*

*(Mt. 26:26-29; Mr. 14:22-25; Lc. 22:14-20)*

<sup>23</sup> Annimitzijnamiquiltis in hual annimitzilic pa anquimatisquiaya leca tijcualo ilacualisli in Tata. Annimitzilic quinami yihual noje nechmachiltic, unca inon: Pa in layúa quiman Judas quitemacac in Tata Jesús ca yehuanten hual quinequiloaya quimictilo, Jesús canac pan. <sup>24</sup> Huan quiman quisehuic Dios, quilapanac in pan huan quijtuc: “In unca nocuerpo (nonacayo) nehual hual nictemaca pa yes lamictili pa amhuanten. Amo ximocahuacan pa anquichías inon pa anquijnamiquis mochi hual nicchiac pa amhuanten.” <sup>25</sup> Huan jan yoje canac in iayo uva coc pin tapalquita quiman lamije lacuaje, quijtuc: “In iayo uva coc unca noesli. Noesli toyahuis pa yoje niclalis in lajtulisli yancuic hual nicchiá pa amhuanten. Amo ximocahuacan pa anquichías inon quiman yes ancunis yoje quinami annimitzilijtica. Xic-chihuacan yoje pa anquijnamiquis mochi hual nicchiac pa amhuanten.” <sup>26</sup> Cristo techilic pa ticchiuasi yoje pampa quiman yes anquicas in pan huan ancunis in iayo uva coc, yoje anquilamachiltitica quinami miquic in Tata pa tehuanten. Anquilamachiltitía inon pa quiman ajsis in tonali hual yihual hualas oc sepa.

### *Quinami monequi pa tijcuasi ilacualisli in Tata*

<sup>27</sup> Pampa inon aquí yes hual quicuas in pan huan cunis iayo uva coc calica tiquijnamiquilo in Tata, huan quichías yoje hual amo cana cuali pa quichihuasi yoje ilacames Cristo, cuaquín cayas latexpahuili in se pampa amo quijnamiquía icuerpo (inacayo) huan iesli in Tata. <sup>28</sup> Pampín, ma moita se ihuían laijtic iyolo pa quimatis sinda quijnamiquía Cristo icuerpo huan iesli quinami monequi pa quijnamiquis se. Cuaquinon ma quicua in pan huan ma cuni iayo uva coc. <sup>29</sup> Ma quichía yoje pampa Dios quijtus yihual quipía pa yes lacocoltili sinda quitas ilacualisli Dios quinami quinmita mochi oc sequin lacualisli quiman lacua huan launi. Se quinami yihual amo moiijnamiquiltía leca motemacac Cristo pa miquis. <sup>30</sup> Pampa inon, cate ca amhuanten míac hual Dios quinmacac cocolisli huan sequin capa amhuanten miquije. <sup>31</sup> Ma yoje, sinda timoitaloaya tehuanten noje laijtic toyolo pa yoje ticmatilosquiaya in hual ticchihualo hual Dios amo quixtoca, cuaquín Dios amo techmacaya lacocoltilisli. <sup>32</sup> Huan sinda in Tata techmaca lacocoltilisli, techmaca pa timomajtisi pa ticchiuasi in amo cuali. In Tata tejchihuilia yoje pa camo quipías pa techilis ticpiasi pa tiquisasi pa ilaixpan yihual jan quinami yehuanten pin lalticpan hual amo quineltocalo.

<sup>33</sup> Yoje, nocnían, quiman anmonechicúa pa anquicuas ilacualisli in Tata, ximochiacan pa huil ajsisi moxtin. <sup>34</sup> Sinda se quimati pampa mayantihuala, cuaquin ma lacua pa ichan pa camo anmitzmacas lacocoltisli Dios pampa amo anmonechicúa pa anlacuas quinami cana cuali pa Dios ilacames. Huan innojen oc sequin lachihualisli, annimitzilis quinami monequi pa anquichías quiman niajsis.

## 12

### *Quinami in Espíritu Santo quinmaca lahueliltisli mochi seje in laneltocanijmes*

<sup>1</sup> Ma antimitzilican, nocnían, quinami in Espíritu Santo techueliltía, nicnequi pa anquimatis innojen.

<sup>2</sup> Anquimati pampa quiman ayamo anquineltocaya Cristo, amo cataya lajtic amhuanten in Espíritu Santo huan pampín, Satanás anmitzlaicanaya pan ojlimes amo cuajcuali pa anquinmolancuacuetzilis monos hual amo lajtulo. Quema, mochi tonali cataya quinami yihual anmitztilanac pa ancanasquiaya ojlimes capa anmohuicaya huejca capa Dios amo cataya. Ma yoje, axan anquipía in Espíritu Santo. <sup>3</sup> Yoje, annimitzmachiltía sinda se lacal hual lajtutica pan ipampa Dios iEspíritu Santo amo quiman quijtus: “¡Jesús unca elehuis!” Huan noje amo quijtus oc se lajtol calica quihuejuecaltis Jesús. Huan amaqui huil quijtúa: “¡Jesús unca in Tata!” sinda amo quijtúa pan ipampa Dios iEspíritu Santo, pampa san in Espíritu Santo huil techmachiltía inon.

<sup>4</sup> Ma yoje, cate míac lahueliltisli hual Dios in Espíritu Santo techmaca, quixiluilia mochi seje quinami quinequi. <sup>5</sup> Huan Dios ilacames huil quitequipanuillilo, se ca se tequipanulisli, oc se ca oc se tequipanulisli. Ma yoje unca yihual in Tata hual tictequipanuillilo. <sup>6</sup> Huan monequi pa quichihuasi se tequipanulisli yoje huan oc se tequipanulisli amo quinami yoje, pampa sequin amo cate quinami oc sequin. Ma yoje, unca yihual Dios hual quitequipanultía ilacames ca mochi lahueliltisli hual quinmaca. <sup>7</sup> Dios quinequi pa canasi lapalehuilisli mochi seje pan ipampa ilahueliltisli in Espíritu Santo hual unca pa lajtic in laneltocanijmes. <sup>8</sup> Yoje, Dios quinmaca se in lahueliltisli pa quimatis niman cuali Dios ilajtol. Huan pan ipampa inon, quimati lapalehuía cuali. Huan Dios quinmaca in oc se in lahueliltisli pa quijtus ca lajmatilisli len quinequi quijtúa ilajtol Dios, quinmaca in lahueliltisli jan quinami quipía yihual in Espíritu Santo. <sup>9</sup> Huan quinmaca oc se in lahueliltisli pa quilalis míac laneltocalisli ca in hual quijtc Cristo, huan pampa inon huil quichía inon hual Dios quinequi pa mochías. Huan quinmaca in laneltocalisli hué pan ipampa yihual in Espíritu. Huan yehuanten hual Dios quinmaca in laneltocalisli hué, cuajnesi quinmaca lahueliltisli se pa quinpajtis cocoxquimes, in pan ipampa in se Espíritu Santo. <sup>10</sup> Huan quinmaca lahueliltisli oc se pa quinchías innojen hual quinmahuisultilo lacames ca lamajtilisli, huan cuajnesi quinmaca lahueliltisli oc se pa quilamachiltía ca chicahualisli pa yoje quinpalehuis cuali pa quineltocasi lacames in hual Dios quilic. Huan pa oc se quinmaca lahueliltisli pa quimatis sinda oc sequin lajtulo pan ipampa in Espíritu Santo huan sinda lajtulo pan inminpampa iyecames amo cuajcuali. Huan Dios cuajnesi quinmaca lahueliltisli se pa lajtus ca oc sequin lajtomes hual amo quiman pehuac quimatic, lajtomes hual in Espíritu Santo quihueliltic pa lajtus jan ajnaxcan. Huan pa oc se Dios quinmaca lahueliltisli pa quimatis len quinequi quijtúa



in se hual lajtúa ca oc se lajtol. <sup>11</sup> Unca se Espíritu, yihual in Espíritu Santo hual amo mocahua pa quinhueliltis Dios ilacames pa quinchihuasi mochi inon. Yihual quinxiluilia mochi sejse ihuían se lahueliltilisli huan oc se lahueliltilisli quinami yihual in Espíritu Santo quita cuali.

*Timoxtin ticate quinami se cuerpo san*

<sup>12</sup> Yoje quichía pampa jan quinami se lalal quinpía imajmajuan huan icxihuajmes huan itzontecon, ma yoje, yihual unca se san. Huan jan yoje unca Cristo, yihual se san, mas que tehuanten icnían ticate míac. <sup>13</sup> Sinda ticate judíos, sinda ticate icnían hual amo judíos, sinda ticate inmintequipanujquimes tecojuan hual quinchihualtilo huan amo quinlaxlahuilo, sinda ticate tequipanujquimes hual quinlaxlahuilo, jan yoje timoxtin ticate iyaxca pampa noje timoxtin ticataloaya lacuayatequili pan ipampa se Espíritu hual ticanaje pa toyolo. Pampa inon, Dios techita quinami ixolomes, techita quinami se san pampa timoxtin ticpialo in se Espíritu.

<sup>14</sup> Cuerpo (inacayo) se nesi quinami se san. Ma yoje quinpía míac hual iyaxca, quinami inacas huan imajmajuan huan icxihuajmes huan iixtololomes. <sup>15</sup> Sinda huil lajtuaya se icxían huan quijtuaya: “Nel amo niunca ca icuerpo pampa amo niunca icuerpo imajma”, ma yoje mocahuaya ca icuerpo mas que quijtuaya pampa amo cataya ca icuerpo. <sup>16</sup> Huan sinda huil lajtuaya se inacas huan quijtuaya: “Amo niunca ca icuerpo pampa amo niunca iixtololon”, ma yoje, mocahuaya ca icuerpo mas que quijtuaya pampa amo unca ca icuerpo. <sup>17</sup> Sinda mochi icuerpo se cataya jan iixtololon san, cuaquín ¿quinami lacaquiaya? Huan sinda mochi icuerpo cataya jan pa lacaquis san, cuaquín ¿quinami lajnecuiaya? <sup>18</sup> Yojque, quinami unca axan, Dios quinlalic innojen pa se icuerpo, quinlalilic yoje quinami quinequiaya. <sup>19</sup> Sinda mochi cataya ma tiqijtuacan se imajma, cuaquín amo cataya se icuerpo. <sup>20</sup> Quinami unca axan, cate imajma huan icxían huan iyacatzol, cate míac. Ma yoje, unca san se icuerpo.

<sup>21</sup> Huan se amo quiman quijtusquiaya: “Nicpía noixtololon huan amo monequi pa nicpías nomajma.” Huan amo quiman quijtusquiaya: “Nicpía notzontecon huan pampa inon amo monequi pa nicpías nocxían.” <sup>22</sup> No, monequi pa tiqijtusí pampa quema, monequi pa ticpías mochi innojen. Amo huil tipanuloaya cuali sinda amo tiquinpialoaya innojen hual iyaxca tocuero hual tiqijtulo amo monotzalo míac. <sup>23</sup> Huan innojen ca tocuero hual tiqijtulo amo monequi pa tiquinmacas míac lasojlalisli, ma yoje innojen tiqincuejtilo ca laitalisli. Huan innojen hual iyaxca tocuero hual sinda moitalo yehuanten, yoje tipinahualo, tiquinlaquentilo pa camo moitasi huan yoje tiqinnextililo míac lasojlalisli. <sup>24</sup> Ma yoje, pan tocuero capa amo tipinahualo, amo monequi pa tiquinlaquentisi quinami pan tocuero capa tipinahualo. Pampín, unca melahuac inon: Dios quichíac cuali tocuero huan techajxiltic cuali tomajmajuan huan toxihuajmes huan tonacas huan mochi. Yojque quimaca pa canasi míac lasojlalisli innojen hual amo monotzalo míac. Yojque Dios quichíac tocuero huan yojque unca ca Cristo icuerpo hual tehuanten ticate, nicnequi niquijtúa innojen hual cate quinami icamac huan imajmajuan huan icxihuajmes icuerpo Cristo. <sup>25</sup> Dios quichíac yoje pa camo moxilusi in lacames huan sihuames hual cate quinami Cristo icuerpo. Quema, Dios quinequi pa moxtin hual cate quinami Cristo icuerpo, quinequi quijtúa, moxtin in laneltocanijmes, Dios quinequi pa moitasi mochi sejse. Quinami quita in se, yoje ma quita in oc se. <sup>26</sup> Huan yoje pan ipampa quinami Dios quichíac cuali Cristo icuerpo pa yojque cajsisi cuali in



laneltocanjmes, axan, sinda se mococúa, cuaquín mochi icuerpo, quinequi quijtúa, moxtin laneltocanjmes, mococulo inahuac in se. Huan sinda se ilaneltocani Cristo icuerpo cana lasojlalisli, cuaquín moxtin laneltocanjmes quipialo paquilisli ca yihual.

<sup>27</sup> Yoje, amhuanten anmoxtin anunca quinami icuerpo Cristo huan mochi seje capa amhuanten anunca quinami icxían o imajmajuan o iyolo o incas.

<sup>28</sup> Huan Dios quilalic pa sequin ilacames lapalehuilo. Quinalalic lanahuatiniymes hual pehuaje quilamachiltije in lamachiltilisli cuali. Cuaquinon quinalalic lajtunijmes hual quinmachiltilo len quinequi quijtúa Dios ilajtol. Cuaquinon quinalalic lamaxtinijmes. Cuaquinon quilalic pa sequin ca Dios ilahueliltilisli huil quinchihualo lachihualisli hual quinmahuisultilo ca lamajtilisli lacames. Huan quilalic pa sequin quipialo lahuelliltilisli pa lapajtisi. Quilalic pa sequin quimatisi cuali quinami lapalehuisi, quilalic pa sequin yesi lacames hual quimatisi huelitisi capa cate Dios ilacames, huan quilalic pa sequin lajtusi ca oc sequin lajtomes. <sup>29</sup> ¿Cate lanahuatiniymes moxtin? Amo cate. ¿Cate lajtunijmes moxtin? ¿Cate lamaxtinijmes moxtin? ¿Quinchihualo moxtin innojen hual quinmahuisultilo lacames ca lamajtilisli?

<sup>30</sup> ¿Quipialo moxtin in lahuelliltilisli pa lapajtisi? ¿Lajtulo moxtin ca oc sequin lajtomes? ¿Quipialo moxtin in lahuelliltilisli pa quimatisi len quijtulo yehuanten hual lajtulo ca oc sequin lajtomes? <sup>31</sup> Amo moxtin quinpialo innojen lahuelliltilisli. Ma yoje, xictemucan pa in Espíritu Santo anmitzhueliltis ca innojen lahuelliltilisli hual quinchihuililo niman cuali moxtin laneltocanjmes. Cate sequin lahuelliltilisli hual amo ajsilo quinchihuililo yoje cuali. Huan nía annimitznextilía se ojli niman cuali pa ancanas. Mas que se cuajnesi quinpía in oc sequin lahuelliltilisli, ma yoje amo quichihuilisí yoje cuali quinami in ojli nican quichihuilis.

## 13

### *In unca quinami yuli se sinda quinlasojla oc sequin*

<sup>1</sup> Sinda nehual nicpiaya lahuelliltilisli pa nilajtusquiaya ca mochi inminlajtomes moxtin lacames pa mochi in lalticpan, quema, huan ca inminlajtomes in lanahuatiniymes pin cielo (ilhuicac) noje, huan sinda amo nicmatiaya nilalasoja, cuaquinon nimochihuaya quinami xahuanilisli hual lalacaj-soma, quinami se quihuitectiahuiaya se teposli. <sup>2</sup> Huan sinda nicpiaya in lahuelliltilisli pa niquijtusquiaya ilajtol Dios jan axcan quiman yihual quilalisquiaya pa noyolo, huan sinda nicmatiaya mochi quinami unca Dios hual lacames san huil quimatilo quiman Dios quinnextilía, huan sinda nicmatiaya mochi hual Dios quimati huan len quichía, huan sinda nicmatiaya nicneltoca in Tata pa yojque huil niquinmijcuanisquiaya lomas (tepemes) ca capic yes, huan ma yoje sinda amo nicmatiaya nilalasoja, cuaquinon amo nimonotzaya nindeno. <sup>3</sup> Huan sinda nicanaya mochi len noyaxca pa niqinxiluilis ca yehuanten hual amo quipialo len pa quicuasi, huan sinda nimotemacaya pa nechmictilosquiaya ca tixuxli pampa nicneltocaya Dios ca mías chicahualisli, huan ma yoje amo nicmatiaya nilalasoja, cuaquín amo nechmacaya lapalehuilisli nindeno.

<sup>4</sup> Sinda se quimati lalasoja, yihual mopepenialtía pa quipanus mochi lacocoltilisli hual ajsin pan yihual. Sinda se quimati lalasoja, yihual amo mocahua pa quichihuilis cuali oc sequin, huan amo chahuatía, amo mocualanilía. Sinda quimati lalasoja se, yihual amo moillía quinami unca niman cuali yihual. Amo lajnamiquía pa iyolo pampa yihual unca hué.

<sup>5</sup> Amo quinchihuilía oc sequin nindeno hual amo cana cuali. Amo quitemúa

pa quipías mochi quinami yihual quinequi. Amo quitemúa pa canas mochi len yihual quinequi. Amo momacahuiltía pa mocualantitiquisas. Amo quijnamiquía mochi in amo cuali hual quichihuililo oc sequin, pa yoje molacuepilis. <sup>6</sup> Amo quipía paquilisli sinda quichihualo oc sequin len amo cuali. Ma yoje, quipía paquilisli ca oc sequin sinda yulilo melahuac. <sup>7</sup> Sinda se quimati lalasojla, amo latenehua sinda quinpanúa in lacocoltisli hual quinpanúa oc sequin pampa quichihuaje lajllaculisli. Sinda se quimati lalasojla, quinectía quineltoca pampa yes cuali mochi hual oc sequin quichihualo. Sinda se quimati lalasojla, yihual quichixtía pa mochi lamis cuali. Sinda se quimati lalasojla, yihual amo mocahua lasulahuali sinda quipanúa len amo cuali pampa quimati lalasojla. No, yihual quimacahuiltía pa quipanus in amo cuali.

<sup>8</sup> Amo quiman mocahuas pa cayasi yehuanten hual quimatilo lalasojlalo, lasojlalisli amo quiman lamis. Amo unca yoje ca in lahuelilitisli pa quijtus se ilajtol Dios sinda Dios quilalía pa iyolo se. Se tonali in lahuelilitisli yajmo quipías pa yes. Huan mas que unca in lahuelilitisli pa lajtus ca oc se lajtol hual amo quiman canac se, ma yoje in lahuelilitisli lamis se tonali. Huan mas que unca in lahuelilitisli pa quipías lajmatilisli hual san Dios quimaca, ma yoje, se tonali in lahuelilitisli yajmo quipías pa yes. <sup>9</sup> Unca pampa axan ayamo tiajsilo ticmatilo mochi yoje quinami tialo ticmatilo, huan ayamo tiajsilo tiqijtululo ilajtol Dios hual quilalía pa toyolo yoje quinami huil tiqijtus. <sup>10</sup> Mas que yoje unca axcan, mochi cayas lachihuali quinami Dios quilalic pa cayas. Cuaquinon yajmo cayas mochi inon hual amo quiman ajsic yec lachihuali quinami Dios quilalic pa cayasquiaya. Inon panus quiman Cristo ajsic cayas ca tehuanten.

<sup>11</sup> Quiman nicatani xolol, nilajtuni quinami se xolol, nilajnamiquini quinami se xolol, nicpiani lajnamiquiltisli quinami se xolol. Nimochiác lalac, nimocahuac pa nicchiasquiaya mochi quinami nicchihuani quiman nicatani tipichin. <sup>12</sup> Huan jan yoje unca ca tehuanten axcan, pampa axcan ticmatilo nadita quinami unca Dios, amo mochi. Ticate quinami se hual lachía ca se espejo pa cualcan, amo lachía cuali. Hualas Cristo, cuaquinon tilachias quinami yehuanten hual moitalo iixco ca iixco. Axcan ticmatilo jan nadita san. Hualas Cristo, cuaquinon nicmatis mochi inahuac Dios, jan quinami Dios pa yina huan axcan quimatic mochi nonahuac nehual. <sup>13</sup> Yoje, se tonali, yajmo monotzasi nindeno innojen calica techueliltía in Espiritu Santo. Ma yoje mocahuasi in yeyenten: Tolaneltocalisli hual ticlalije ca in hual Dios techilía quinami yihual unca, toyulilisli ca Cristo hual ticchialo ca mochi laneltocalisli huan ticchixtias pa quiman hualas oc sepa Cristo, huan lasojlalisli. Huan ca in yeyenten, unca in lasojlalisli hual míac monotza. Amo yoje míac monotzalo in oc sequin.

## 14

*In lajtulisli ca oc sequin lajtomes quinami in Espiritu Santo quihueliltía se*

<sup>1</sup> Xictemucan ca mochi anmoyolo pa anquimatis anlalasojlas huan xicnequican ca mochi anmoyolo pa in Espiritu Santo anmitzhueliltis ca len yes lahuelilitisli hual quipía pa anmitzmacas. Xicnequican míac pa anquipías in lahuelilitisli pa anquijtus Dios ilajtol hual yihual anmitzlaalía pa anmoyolo. Amo yoje míac xicnequican pa anquipías innojen oc sequin lahuelilitisli. <sup>2</sup> Quema, in lahuelilitisli monotza niman míac, amo yoje míac monotza in lahuelilitisli pa lajtus ca se lajtol hual in Espiritu Santo

quihueliltía se pa lajtus. In unca pampa yihual hual motequihuía lajtúa ca se lajtol amo lajtutica ca lacames. Yihual lajtutica ca Dios, pampa amaqui ca icnían quimati len quijtúa. Ma yoje, pan ipampa in lajtol, yihual quijtutica ilajtomes Dios hual oc sequin amo huil quimatilo sinda yihual Dios amo quinnextilía len quinequi quijtúa. <sup>3</sup> Amo unca yoje ca se hual quijtúa Dios ilajtol ca inminlajtol icnían, pampa yihual quinlaquetzilijtica lacames huan sihuames. Yoje quinpalehuía pa mochihuasi lacames huan sihuames hual cuali quitocalo Dios. Huan quinchicahualtía pa huil lachihuasi quinami Dios quinequi. Quinchicahualtía pa quinpalehuis pa mopepenialtisi de mochi in amo cuali hual Dios quimacahuiltía pa quinpanus. <sup>4</sup> Amo yoje ca yihual hual lajtúa ca se lajtol hual quihueliltía in Espíritu Santo. In se san mopalehuía yihual ihuían pa quimatis quitocas Dios cuali. Yihual quinpalehuía moxtin hual monechículo ca yihual, san sinda quimati quinmilía Dios ilajtol ca inminlajtol.

<sup>5</sup> Nicnequisquiaya pa anmoxtin anlajtusquiaya ca lajtomes hual in Espíritu Santo anmitzhueliltía pa anquijtus. Ma yoje, monotza míac in lahueliltisli calica quijtus se ilajtol Dios pa moxtin quimatisi, huan amo yoje monotza pa lajtus se ca oc sequin lajtomes hual in Espíritu Santo huil anmitzhueliltía pa anquijtus. San sinda unca se hual quimati quinmilía in oc sequin len quinequi quijtúa inon hual quijtúa yihual hual lajtúa ca oc se lajtol, cuaquinon moxtin hual monechículo quicaquisi lajtol hual quinpalehuis pa mochihuasi lacames hual quimatilo quitocalo Dios cuali. <sup>6</sup> Axan, nocnían, sinda nilajtutihuala ca amhuanten ca oc sequin lajtomes hual in Espíritu Santo nechueliltic pa niquijtusquiaya, cuaquinon ¿quinami annimitzpalehuis sinda annimitznotzas ca lajtomes hual amo anquimati len quinequilo quijtulo? Cuajnesi annimitzilis len Dios nechlamachiltic hual anmitznextilis quinami yihual tejchihuila. Cuajnesi annimitzilis len lajmatilisli hual nechmacac. Cuajnesi annimitzilis len lajtol hual yihual nechmaca pa annimitzpalehuis pa anmochías cuali ca lajmatilisli hual ayamo anmonextilic. Cuajnesi annimitzilis len ilamaxtilisli yihual, huan amo anquimatis len annimitzilic.

<sup>7</sup> Huan jan yoje sinda in latzotzonaloni latzotzona, ma tiquijtucan in flauta, in arpa, huan sinda amo latzotzonalo cuali, cuaquinon ¿quinami huil quislacúa se len cantadita (cuical) quitzotzona? <sup>8</sup> Huan noje, sinda in guáches quichixticate pa moanasi huan se quipitza in lancaquetzaloni amo quitzotzontica cuali, cuaquín ¿quinami quimatisi mochijchihuasi pa moanasi? Amo huil. <sup>9</sup> Huan jan yoje amhuanten nojen, sinda amo anlajtúa ca lajtomes hual quinnatilo ammocnían, cuaquín ¿quinami quimatisi len anquijtúa? Yojque ancayas quinami se hual laquetza ca in iyjecal, amo monotza nindeno in hual anquijtúa. <sup>10</sup> Ticmatilo pampa cate míac lajtomes pin lalticpan hual amo huil tilajtulo, huan mochi innojen quipialo yehuanten hual quimatilo len quijtulo. <sup>11</sup> Ma yoje, sinda amo nicmati len quinequi quijtúa in lajtol, cuaquinon yihual hual lajtutica nechitas quinami se hual amo yuli capa chantí yihual, huan niquitas in se hual lajtutica quinami se hual amo yuli capa nichanti nel. <sup>12</sup> Huan unca jan yoje ca amhuanten nojen quiman anmonechícua pa anquimolancuacuetzilis Dios. Neli anquinequi míac pa ancanas in lahueliltisli calica huil anmitzhueliltía in Espíritu Santo. Pampa inon, xictemucan quinami anquinneltocaltis niman cuali moxtin yehuanten hual monechículo ca amhuanten pa anquilajlanis Dios.

<sup>13</sup> Yoje, aqui lajtúa ca se lajtol calica in Espíritu Santo quihueliltic, ma quilajlani Dios pa canas in lahueliltisli pa quijtus len quinequi qui-

jtúa. <sup>14</sup> Monequi pa quilajlanis yoje, pampa ma tiqijitucan sinda nehual niclajlanía Dios nilajtutica ca oc sequin lajtomes calica in Espíritu Santo nechuelilitía, cuaquín unca noyolo hual quilajlanía Dios. Ma yoje, ca notzon-tecon amo niqijnamiquía in hual niqijitutica. <sup>15</sup> Cuaquín, ¿len monequi pa nicchías? Niclajlanis Dios pan ipampa noyolo, huan noje niclajlanis pan ipampa nolajnamiquilisli. Nijcantaruilis Dios pan ipampa noyolo, huan noje pan ipampa nolajnamiquilisli nijcantaruilis. <sup>16</sup> Monequi pa nicchías yoje, pampa sinda nilajtus ca oc se lajtol, cuaquín quiman niqinmilis lajtomes huejué pa Dios pan ipampa noyolo, in se hual calaquis capa tehuanten timonechicujticate huan amo quimati, axcan ¿quinami quimatis yihual unca ca se lajtulisli ca nehual sinda nicsehuía Dios? Amo huil sinda amo quimati len niqijtúa. <sup>17</sup> Tehual noje, ticchía cuali sinda ticsehuía Dios ca in lajtol. Ma yoje, in oc se hual noje unca se ixolol Dios yoje amo unca lapalehuili pa quineltocas cuali. <sup>18</sup> Nicsehuía Dios pampa in Espíritu Santo nechuelilitía pa nilajtus ca míac oc sequin lajtomes, huan anmoxtin amo yoje míac. <sup>19</sup> Ma yoje, quiman niunca capa tocnían laneltocanijmes monechicujticate, nicnequi pa niqinmaxtis, huan pampín nicnequisquiaya míac pa niqijtusquiaya se ome lajtomes ca in lajtol hual quimatilo tocnían huan amo quiman nicnequisquiaya nilajtu ca míac lajtomes hual amaqui quimati len quinequilo quijtulo.

<sup>20</sup> Nocnían, amo xiyén (xiyecan) quinami xolomes quiman anquinmijnamiquía in míac ilahuelilitilisli in Espíritu Santo. Quema, xiyén quinami xolotzitzindis hual amo quimatilo míac quinami quichihualo amo cuali. Ma yoje, quinami anlajnamiquía, axcan ximochihuacan quinami lacames hual quimatilo. <sup>21</sup> Pa ilajtol Dios unca lajcuiluli, yoje quijtúa: “Niquinlaquetzilis in lacames nican pan inminpampa lacames hual amo lacatije nican. Yehuanten lajtusi ca lajtomes hual amo quimatilo nican. Ma yoje, amo nechneltocasi innojen lacames nican, yojque quijtúa in Tata”, quil. <sup>22</sup> Yoje, in lahuelilitilisli pa se lajtus ca oc sequin lajtomes hual in Espíritu Santo quinmaca, inon unca lanextilisli calica quinmachiltis pampa yehuanten hual amo quineltocalo Cristo amo cate ilacames Dios, amo unca pa quinmachiltis yehuanten hual quema, quineltocalo Cristo. Huan in lahuelilitilisli calica se quijtus Dios ilajtol ca inminlajtol icnían, in lahuelilitilisli in Espíritu Santo quinmaca. Pan ipampa inon quicaquilo in hual Dios quinmilia yehuanten hual quineltocalo Cristo. Amo unca pa yehuanten hual amo quineltocalo. <sup>23</sup> Yoje, ma tiqijitucan pampa monechicujticate pan se lajcotiyan moxtin yehuanten hual iyaxca Dios, huan moxtin lajtuticate ca in lajtomes hual oc sequin amo quimatilo, hual in Espíritu Santo quinmaca. Cuaquín sinda hualalo capa yehuanten sequin hual amo quineltocalo, yoje yehuanten hual amo Dios ilacames yalo quijtulo pampa quipoluje ilajnamiquilisli yehuanten hual Dios ilacames. <sup>24</sup> Huan pa oc se lajcotiyan capa monechicujticate, moxtin quijtuticate ilajtol Dios ca lajtol hual moxtin quimatilo. Cuaquín sinda calaquis capa yehuanten se hual amo quineltoca Cristo huan amo quimati len quijtúa ilajtol Dios, cuaquinon quijnamiquis ilajlaculisli hual quichíac. Quijnamiquis pan ipampa len quililo moxtin hual quijtuticate ilajtol Dios. Yoje yihual moitas quinami quilajlaniaya se la'ajuani len yes quichíac. Unca pampa Dios ilajtol quinextilia ilajlaculisli. <sup>25</sup> Pampín, axan quimatis pampa amo cate cuali innojen lachihualisli amo cuajcuali hual quinpiaya lalatali pa iyolo. Yoje quicocus iyolo pampa quichíac in lajlaculisli. Pampín mopachus pampa yihual quimatis yihual unca iyampa Dios. Huan yihual quimolancuacuetzilis huan lamachiltis pampa Dios neli unca ca

amhuanten.

*Monechiculo tocnían, ma quichihuacan mochi pa canas cuali*

<sup>26</sup> Yoje, nocnían, ¿len yes cuali pa anquichías quiman anmonechicúa? Sinda se quipía se alabanza, sinda se quipía se lamaxtilisli, se lanahuatilisli hual Dios quinextilic, sinda quipía len pa quijtus pan ipampa se lajtol hual in Espíritu Santo quihueliltic pa quijtus, sinda se quipía in lahueliltisli pa quijtus len quinequi quijtúa in oc se lajtol, cuaquín ma quinchihuacan innojen se huan cuaquín oc se. Ma caya mochi pa quinpalehuis yehuanten ilacames Dios pa quineltocasi Cristo ca chicahualisli. <sup>27</sup> Sinda cate aquinojen quinequilo quijtulo ilajtol Dios ca se lajtol hual in Espíritu Santo quimaca, ma lajtucan jan ome san, o san ye lacames, yehuanten san. Huan ma lajtucan jan se, cuaquín in oc se. Ma caya se hual huil quinmilis in oc sequin hual nepa cate lanechiculi len quijtuje yehuanten hual lajtuloaya ca in oc se lajtol hual quinhueliltic in Espíritu Santo. <sup>28</sup> Huan sinda amo unca se hual huil quinmilis in oc sequin len quililoaya yehuanten hual lajtuloaya ca in oc se lajtol, cuaquín ma como nahuatican sinda cate capa lanechiculi tocnían, jan ma lajtu sejse ca Dios ca in lajtol quiman cayas ihuían. <sup>29</sup> Huan yehuanten hual quipialo in lahueliltisli pa quijtus ilajtol Dios hual yihual quilalic pa inminyolo, ma lajtucan ome o ye ca anmolajtol. Cate lanechiculi nepa oc sequin hual quipialo lahueliltisli pa quimatisi sinda se lajtutica pan ipampa in Espíritu Santo. Ma quincaquican pa quimatisi sinda in hual quijtuticate cate ilajtomes in Espíritu Santo. <sup>30</sup> Huan sinda unca oc se nepa hual Dios quimacatiquisac len pa quinnextilis ilacames Dios hual cate nepa, cuaquín ma mocahua in se hual pehuac quinmilic ilajtol Dios. <sup>31</sup> Pampa inon mochi sejse ca amhuanten huil anquijtus ilajtol Dios, pa yoje moxtin huil monextilisli huan cayasi lachicahuatili pa inminyolo. <sup>32</sup> Huan yehuanten hual quijtulo ilajtol Dios, ma quimati sejse quisulahuah ilahueliltisli pa quijtus, pa yoje quimacahuiltis pa lajtus oc se. <sup>33</sup> Dios amo quixtoca sinda ilacames monechiculo huan lajtulo moxtin pampa mochi sejse amo quinequi quimacahuiltía oc se pa lajtus nadita. Dios quixtoca pa cayas mosehuilisli ca mochi hual ticchihualo.

<sup>34</sup> Quinami unca ca moxtin pin calimes capa monechiculo in laneltocanimjes, monequi pa in sihuames amo nahuatisi quiman cate lanechiculi Dios ilacames, pampa in sihuames amo cate lamacahuiltisli pa lajtusi. Monequi pa mosulahuasi, quinami noje quijtúa Dios ilajtol. <sup>35</sup> Huan sinda quinequilo monextililo len, ma quilajlanican inminlahuicalhuan pa inminchan. Unca pinahualisli pa se sihual lajtus capa monechiculo Dios ilacames.

<sup>36</sup> Sinda anquijtúa pampa amo unca cuali pa quichihualo yoje Dios ilacames quiman monechiculo, cuaquín ¿cuajnési anquijtúa amhuanten ancataya innojen hual quinpehualtije yehuanten hual quitilanililo ilajtol Dios in oc sequin caltilan capa ayamo cataloaya yehuanten hual ilacames Dios? O ¿cuajnési anquijtúa ilajtol Dios anmitzajsic amhuanten san, huan amo quinmajsic in oc sequin? Huan pampín ¿anquijtúa unca anmoyaxca pa anquichías mochi quinami yes anquixtoca, huan amo quinami quichihualo in oc sequin laneltocanimjes hual cate pa oc sequin miac cajcaltilan? Amo yoje unca. Monequi pa anquichías quinami quichihualo pa innojen miac oc sequin cajcaltilan. <sup>37</sup> Pampín, sinda unca se hual quijtúa yihual unca se ilajtuni ilajtol Dios, sinda neli quijtúa pampa quipía in lajmatilisli hual quimacac in Espíritu Santo, ma quimati pampa innojen lajtomes hual niqinmijcuilujtica

cate hual nechilic in Tata. <sup>38</sup> Huan sinda unca se hual amo quinequi quimati in Tata quilic inon, cuaquin amo xicneltocac in se.

<sup>39</sup> Yoje, nocnían, xicnequican miác pa in Tata anmitzhueliltis pa anquijtus ilajtol Dios, huan amo xiquintzacuilican yehuanten hual quinequilo quijtulo ilajtol Dios ca oc sequin lajtomes quinami in Espiritu Santo quinhueliltía.

<sup>40</sup> Ma yoje, ma quichihuacan mochi yoje quinami cana cuali pa quichihuasi Dios ilacames. Huan ma quichihuacan mochi yoje pa camo molapolultisi Dios ilacames quiman monechiculo.

## 15

### *Neli unca Cristo miquic huan cuaquinon yulic oc sepa*

<sup>1</sup> Axan, nocnían, nicnequi annimitzijnamiquiltía in lamachiltlisli cuali hual annimitzlamachiltic. Inon anquinequic ancanac huan anyultía anquinelcatica. <sup>2</sup> Huan pan ipampa in lamachiltlisli cuali anyultía anmoquixtilijtica pin miqulisli ca capic anmitzhuicani anmolajlaculisli. Annimitzijnamiquiltía ca in lajtomes calica annimitzilic in lamachiltlisli cuali, sinda anquijnamictica chicahuac in hual annimitzilic. Neli unca anquijnamiquis sinda neli anquimati len quinequi quijtúa, huan amo jan lapic (de in balde) anquinelcatic.

<sup>3</sup> Anquijnamiquía len annimitzilic, pampa annimitznextilic hual monotza in niman miác, hual nechnextilic nehual noje in Tata. Annimitzlamachiltic quinami Cristo miquic pa techquixtilis tolajlaculisli tehuanten, yoje quinami quijtúa Dios ilajtol hual unca lajcuiluli. <sup>4</sup> Huan yihual cataya lalalpachuli, huan yulic oc sepa quiman panuje innojen ye tonalijmes quiman cataya ca in mijquimes, yoje quinami quijtúa ilajtol Dios lajcuiluli. <sup>5</sup> Huan Cefas quitac, cuaquinon quitaje imonextilinijmes yehuanten in Doce lanahuatinijmes. <sup>6</sup> Cuaquinon quitaje pan se tonali quinami quinientos tocnían, quema, noje cataloaya oc sequin ca innojen quinientos. In miác yehuanten yulticate axan, mas que sequin miquije. <sup>7</sup> Cuaquinon Jacobo quitac huan cuaquinon quitaje moxtin in lanahuatinijmes.

<sup>8</sup> Huan quiman quitaje moxtin yehuanten, cuaquin nel niqitac. Ma yoje, amo monextic capa nehual pin tonalijmes quiman in oc sequin quitaje. Pampín niquinami se hual lacatic quiman amo cataya itonali pa lacatis.

<sup>9</sup> Huan yoje nehual niunca, pampa nehual niunca in lanahuatini hual nimonotza nindeno, amo niquinami in oc sequin lanahuatinijmes. Quema, amo nimonotza pa nechtcayaltisi se lanahuatini, pampa niquintojtocani pa niquinchihuilis lacocoltilisli Dios ilacames hual monechiculo pa quijnamiquisi Dios iXolol. <sup>10</sup> Huan pan ipampa in cuali hual Dios tejchihuilía, in cuali hual amo lami huan amo nimonotza pa nicanas, nehual niunca in local hual axan niunca. Huan in cuali hual nejchihuilic amo cataya jan lapic (de in balde). Quema, nehual nitequipanuaya niman chicahuac. In oc sequin lanahuatinijmes amo tequipanuaya yoje chicahuac. Ma yoje, neli amo cataya nehual hual tequipanuaya, pampa no, cataya san in cuali hual nejchihuilía Dios nehual. Yihual nechueliltic pa nitequipanusquiaya. <sup>11</sup> Mas que nehual nicataya hual annimitzilic in lamachiltlisli cuali, ma yoje, inon amo monotza len. Huan amo monotza len sinda cataloaya in oc sequin lanahuatinijmes hual anmitzilije. Inon hual neli monotza unca ticlamachitilo ilajtol Dios pan ipampa in cuali hual san Dios huil quinchihuilía lacames, huan yoje amhuanten anquinelcatic.

*Neli unca yehuanten hual miquilo yalo yulilo oc sepa*

12 Axan, sinda tiquinlamachtilo Cristo mictataya ye tonalijmes huan cuaquín yulic oc seppa, cuaquinon amo unca inminyaxca pa quijtusi in mijquimes amo yulisi oc seppa, quinami quijtulo sequin capa amhuanten. 13 Sinda yehuanten hual miqijje amo yulisi oc seppa, cuaquinon Cristo amo yulic oc seppa. 14 Huan sinda Cristo amo yulic oc seppa, cuaquín jan lapic tehuanten antimitzmachtilo yihual yulic oc seppa, huan jan lapic (de balde) anquineltoca in lajtol hual antimitzlamachtilo. 15 Huan amo inon san. Tehuanten in lanahuatinijmes axan techitasi lacames hual amo tiqijitulo len unca melahuac inahuac Dios, pampa tiqijituje neli tilacames hual tiqitaje Cristo. Tiquitaje yultataya ca toixtololjmes, yihual Dios quiyuliltic Cristo quiman miquic. Ma yoje, amo cataya melahuac Dios quiyuliltic Cristo sinda neli amo yuliloaya oc seppa yehuanten hual miqijje, quinami quijtulo sequin capa amhuanten. 16 Neli yoje cayasquiaya inon, pampa sinda amo yulisi oc seppa yehuanten hual miqijje, cuaquinon Cristo noje amo yulic oc seppa. 17 Huan sinda Cristo amo yulic oc seppa, cuaquín amo monotza nindeno sinda anquineltoca yihual. Anmocahua lacames laijlaculi pa anmoyolo. 18 Axcan yehuanten noje hual polehuije quineltoacataloaya Cristo, yoje polehuije quinami yehuanten hual amo quineltoalo. 19 Sinda ticneltoalo Cristo san quiman tiyulticate nican pan lalticpan, huan cuaquinon timiquilo, huan tiqitalo pampa tipolehuije huan amo timocuepasi tiyulisi, cuaquín ticate lacames hual timonotzalo pa techicnilisi ca in niman miac laicnililisi. Amo monotzalo pa quinmicnilisi yoje miac moxtin pin lalticpan hual amo quineltoalo Cristo. 20 Axcan, ¿unca yoje? Amo quiman, pampa Cristo neli yulic oc seppa. Quisac pa in mijquimes, yajmo quiman miquis. Yihual quinpehualtic yehuanten hual miqijje pa yulisi oc seppa huan yajmo quiman miquisi. Unca quinami quiman quitocalo latocli. Sequin pehualo ixualo, cuaquín oc sequin ixualo yulito. Jan yoje, pampa Cristo quinpehualtic yehuanten hual yulilo oc seppa pa yajmo miquisi, neli unca yehuanten yalo yulilo oc seppa. 21 Pampa quichiac laijlaculisli se lalac, moxtin quipialo pa miquisi. Huan jan yoje pan ipampa se lalac, noje yulisi oc seppa yehuanten hual miqijje. 22 Inon unca pampa timoxtin ticate imiahuimes Adán huan pampín timiquisi. Jan yoje moxtin yehuanten hual quinlacatiltia Dios pan ipampa Cristo yesi layuliltili pa yajmo miquisi. 23 Ma yoje, cayasi layuliltili mochi sejse pan in tonali hual Dios quinlalilic. Cristo unca in Se hual niman hueé huan yihual quipehualtic pa huil yulisi oc seppa, quinami ilapehualtilisli imiahuimes trigo hual ixualo. Cuaquinon quiman Cristo hualas oc seppa, yulisi oc seppa yehuanten hual cate iyaxca Cristo. 24 Cuaquín lamis in lalticpan, yajmo cayas quinami tiqiximatilo axan. Panus inon quiman Cristo quicuepilis Dios toTajtzin in lahueliltisli hual Dios quimacac Cristo quiman pehuaya mochi. Inon panus quiman quinquixtilis pa capa huelitjicate moxtin yehuanten hual quipialo len yes lahueliltisli pa huelitisi, yehuanten hual amo quixtoalo Cristo. 25 Panus yojque pampa Cristo quipias pa huelitjias pa quiman ajsis in tonali hual quinsulahuas moxtin yehuanten hual amo quinequilo quitalo Cristo quinami Dios. 26 Huan quiman quinsulahuas moxtin yehuanten, cuaquinon quichias pa yajmo miquis amaqui. In miqilisli unca quinami se hual amo ticnequilo tiqitalo pampa timomajtilo pa timiquisi quinami timomajtilo pampa quinequilo techmictilo aquinojen hual techcocolilo. 27 Quema, pampa yoje ilajtol Dios quijtúa pampa quisulahuac Cristo mochi pa yojque moxtin yehuanten hual amo quinequilo quitalo quipiasi pa quineltoacasi. Ma yoje, quiman Dios quijtúa pampa mochi unca lasulahuali pa quineltoacasi



Cristo, neli unca yihual Dios amo yes lasulahuali, pampa cataya Dios hual quisulahuilic Cristo mochi hual unca. <sup>28</sup> Ma yoje, quiman mochi cayasi lasulahuali, cuaquinon yihual noje, niquijtúa Cristo iXolol Dios, quitemacas ilahuelilitilisi ca Dios iTajztzin hual quisulahuilic mochi. Quichías yojque pa yojque mochi hual Dios quinchíac quimatasi pampa mochi unca iyaxca yihual Dios huan yihual quipía mochi chichahualisli pa huelitis pa mochi. Huan unca iyaxca mochi tolasojlalisli huan tolaneltocalisli.

<sup>29</sup> Huan sinda inon amo cataya yoje, nicnequi niquijtúa, sinda in mijquimes amo yulisi oc sejsa huan sinda in Tata amo yahui quisulahuia mochi in hual amo cuali, cuaquín amo monotza nindeno quiman quincuyatequilo lacames, inon pa quinpalehuisi yehuanten hual miquije. Sinda amo quiman yulilo oc sejsa yehuanten hual miquije, cuaquinon ¿leca cate lacuyatequili yehuanten hual yulticate pa yehuanten hual miquije?

<sup>30</sup> Huan tehuanten noje, ¿pa len tiyulilo mojmosta amo ticmzaticate sinda yalo techmictilo o amo yalo techmictilo? <sup>31</sup> Annimitzilía neli, nocnían, nilajtúa hué pa noyolo nonahuac nehual nohuían inahuac in hual Cristo Jesús toTata annimichihuilic pan nopampa. Pampa nictequipanuilía in Tata Jesús niunca quinami nimictica mojmosta. <sup>32</sup> Lacames quijtulosquiaya da amo nechpaléhuiaya nindeno in lacocoltilisli hual nipanuc quiman moanaje ca nehual lacames nepa pin caltilan Efeso. Moanaje quinami yulijquimes hual yulilo pa cuajlan. Ma yoje, timomacahuiltilo pa timoítasi mochi tonali amo ticmzaticate da timiquisi o tiyulisi, pampa ticmatilo tiyulisi oc sejsa. Sinda amo yulilo oc sejsa in mijquimes, yesquiaya cuali pa tehuanten tiquijtusi quinami sequin quijtulo: “Ma tilacuacan huan ma tilaunican pa tiyulisi cuali axan, pampa mosta timiquisi.”

<sup>33</sup> Amo ximocujcuamanacan pan ipampa lamaxtilisli quinami inon. Lacames quijtulo: “Sinda se yuli inahuac oc se hual yuli amo cuali, cuaquín noje moijlacus iyulilisi, noje pehuas yulis amo cuali.” Huan jan yoje, anyulis inminahuac yehuanten hual quijtulo pampa in mijquimes amo yulilo oc sejsa. Cuajnesi anpehuas anlajnamiquis quinami yehuanten. <sup>34</sup> Ximocuepacan xicanacan annolajnamiquilisli huan ximocahuacan pa anquichías laijlaculisli. Annimitzilía inon, pampa cate sequin capa amhuanten hual nesilo quinami amo quimatilo nindeno quinami Dios quinmita. Annimitzilía inon pa annimitzpinajtis.

### *¿Quinami yalo yulilo oc sejsa in mijquimes?*

<sup>35</sup> Huan cuajnesi quijtus se: “¿Quinami yulilo oc sejsa yehuanten hual miquije? ¿Ca len cuerpo quistihualalo pa capa quinlalpachuje?” <sup>36</sup> Nadita amo quimati laijnamiquía se hual quilajlanía inon. Xiquita. Tehual, inon hual tictoca jan ixua san sinda palanis icaliyó pin lali, pehua ca in. <sup>37</sup> Huan in latocli hual tictoca amo unca in pacholi hual yahui ixua, amo cayas jan quinami inon hual tictocac. No, san unca in latocli ihuían, cuajnesi unca trigo o se ca in oc sequin latoclimes. <sup>38</sup> Dios quichíac pa nesis se latocli ca icuerpo quinami yihual quinequic. Huan pa mochi sejsa latocli quinmaja inminesilisli calica nesi se latocli amo quinami oc se latocli. <sup>39</sup> Huan noje, amo unca se nacal hual nesi jan quinami oc se nacal. Se nacal unca inacal lacames huan oc se inacal yulijquimes huan oc se inacal michimes. <sup>40</sup> Huan cate lejlen hual cate pin cielo huan lejlen hual cate pin lalticpan. Huan innojen pin cielo nesilo yoje cualtichin quinami in laixpelalisli pin cielo. Huan nesilo cualtichin innojen hual cate pan lalticpan quinami cate in hual unca cualtichin pan lalticpan. <sup>41</sup> In tonali nesi cualtichin huan amo unca oc se cualtichin quinami in. In mesli nesi cualtichin huan amo unca oc



se quinami in. In luceros (silalimes) nesilo cualtichin huan amo cate oc sequin quinami innojen. Quema, huan se silalin lahui huan amo cate oc sequin silalimes hual nesilo yoje cualtichin quinami in silalin. <sup>42</sup> Yoje unca ca yehuanten hual yulisi oc sejsa hual quisasi pa capa in mijquimes. Amo quipiasí en cuerpo hual quipianijme quiman miquije. Miquilo, quilaltocalo quinami quitocalo latocli. Inmincueros palanilo, huan quiman yulisi oc sejsa amo quiman palanisi. <sup>43</sup> Quinlaltocalo quiman miquilo, palanilo, huan xacualihuilo, yajmo canaló lasojlalisli quinami quiman yuliloaya. Ma yoje quiman yulisi oc sejsa, inmincueros cayasi mochi cualtichin. Quiman quinlaltocalo inmincueros, yajmo huil molinilo. Yulisi oc sejsa, cayasi cuerpos hual quipiasí niman miac chicahualisli pa huejcahuasi yulisi, amo quiman lamisi. <sup>44</sup> Quiman quinlaltocalo tocuerpos, cate cuerpos jan pa in lalticpan san. Yulisi oc sejsa, yesi cuerpos hual cayasi cuali pin lalticpan yancuica capa tiyulisí mochi pan ipampa iEspíritu Dios. Yehuanten pin lalticpan quipialo cuerpos hual cate cuali pa toyulilísli nican pan lalticpan. Huan jan yoje yehuanten hual cate pin cielo (ilhuicac) quinpiasi inmincueros hual cayasi cuali pa inminyulilísli nepa.

<sup>45</sup> Noje unca lajcuiluli yoje: “In lalac hual quinpehualtic moxtin lacames, yihual mochiac se hual yuliaya quipixtataya icuerpo, yihual Adán.” In oc se Adán calica Dios quilamic itequipanulisli ca lacames unca Jesucristo, yihual mochiac se hual techyuliltía toyolo pa camo lamisi. Huan techmacas cuerpos hual noje yulisi huan amo quiman lamisi. <sup>46</sup> Ma yoje, in cuerpo hual yulis huan amo quiman lamis amo yes in cuerpo hual axan ticpialo. In cuerpo hual ticpialo axan unca cuali pa quiman tiyulticate pan lalticpan. Cuaquinon mopatilis huan yes se cuerpo cuali pa toyulilísli pin cielo. <sup>47</sup> In lalac Adán hual quinpehualtic timoxtin yec lachihuali ca in lali pa yulis pan lalticpan. In oc se Adán hual unca Jesucristo, yihual quipiasí icuerpo hual unca pa yulis pin cielo. <sup>48</sup> Huan quinami cataya lachihuali ca in lali Adán, jan yoje cate mochi lacames, nesilo quinami Adán, quisaje pa yihual huan cate quinami yihual. Huan quinami unca yihual Jesucristo hual unca pin cielo, jan yoje yesi yehuanten hual yesi pa in cielo. Quinequi quijtúa yehuanten hual iyaxca Cristo, yesi quinami yihual Cristo. <sup>49</sup> Huan yoje quinami tehuanten axan ticate quinami Adán hual icuerpo mochiac lali oc sejsa, tehuanten noje tiyesi jan quinami yihual hual unca pin cielo hual amo mocahua pa yulis.

<sup>50</sup> Huan annimitzilía inon, nocnían, tehuanten quinami ticate axan ca tonacal huan toesli amo huil ticpiasi tolaxilulisli ca Dios capa huelitía nepa pin cielo. Inon hual huil palanis amo huil quipiasí laxilulisli ca inon hual amo quiman palanis. <sup>51</sup> Xiquitacan. Nía annimitzilía len hual ayamo quimatic amaqui. Axcan anyahui anquimati. Cayasi miac ca tehuanten in laneltocanijmes hual amo timiquisi. Tocuerpos cayasi lapatili. <sup>52</sup> Inon panus jan ajnaxcan quinami sinda se quitzacuas huan quilapus iixtololon, panus quiman xahuanis in lancaquetzaloni, panus quiman xahuanis in lancaquetzaloni pa yajmo xahuanis oc sejsa. Quema, latzotzonas in lancaquetzaloni huan yehuanten hual miquije yulisi oc sejsa ca inmincueros (inminacayo) hual yajmo quiman miquisi. Huan tehuanten hual ayamo timiquije, tonacayo (tocuerpos) noje mopalasi pa yajmo quiman miquisi. <sup>53</sup> Panus yoje, pampa tocuerpos hual miquilo huan palanilo quipiasí pa mochiqtiquisasi cuerpos hual amo miquilo huan amo palanilo, cayas quinami timolacuentilosquiaya ca len hual huejcahuas, amo quiman lamis. Quema, tocuerpos hual axcan yalo miquilo huan yalo palanilo, innojen quipialo pa mopalatiquisasi.

<sup>54</sup> Innojen tocueros hual huil palanilo mopalatiquisasi pa mochiuasi cueros hual amo palanilo. Huan quiman innojen hual yalo miqullo mopalatiquisasi pa mochiás len hual amo miqisi, cuaquinon panus inon hual unca lajcuiluli pa ilajtol Dios, quijtua: “In miqilisi yajmo cayas, unca quinami lasulahuasi pan ipampa yulisi. <sup>55</sup> ¿Quinami huil techcocolti in miqilisi? ¿Quinami huil tejsulahuas in miqilisi? In miqilisi yajmo huil techcocoltia, yajmo huil tejsulahuas pa yajmo tiyulisi.” <sup>56</sup> Pampa ticchihuaje laijlaculisi, Dios quilalic pa timiqisi. Yoje quilalic pampa ilajtol quijtua yehuanten hual quichihualo laijlaculisi quipialo pa miqisi. Pampin in laijlaculisi cana ichicahualisi pan ipampa in lajtol hual techilia quinami monequi pa tiyulisi. Huan in lajtol amo huil ticneltocalo. <sup>57</sup> Ma yojque, ma ticsehuican Dios, pampa yihual techmacatica chicahualisi pa timosulahuasi pa camo tiyulisi ticchijicate laijlaculisi. Huan inon ticchihualo pan ipampa toTata Jesucristo hual miqic huan cuaquin yulic oc sepa. Jan yoje, yihual techyulitit tehuanten oc sepa.

<sup>58</sup> Pampa inon, nocnán hual annimitzlasojla niman miac, amo ximocahuacan pa anquineltocas Jesucristo ca mochi anmoyolo. Amo ximacahuiltican amaqui huan nindenó pa anmitzjucanis pan iojli Cristo. Huan mochi tonali xiyulican xicchijiacan miac itequipanulisi in Tata. Anquimati pampa amo unca san lapic (de in balde) anmotequipanulisi hual anquichia ca ichicahualisi in Tata.

## 16

*In tomin hual yehuanten pa Corinto yahuiloyaya quinmacalo in laneltocanimjes hual amo quipialoyaya nindenó*

<sup>1</sup> Axcan ma annimitzjucuiluli in hual monequi pa anquichias ca in tomin hual anquinechicujtica pa anquinmacas ilacames Dios hual amo quipialo. Jan quinami niquinmilic pa quichihuasi yehuanten hual monechiculo pa quimolancuacuetzilisi Dios nepa cajcapa pin lalticpan Galacia, jan yoje xicchihuacan amhuanten. <sup>2</sup> Pa in tonali hual quipehualtia mochi in chicome tonalijmes, mochi sejse ca amhuanten ma cajcoqui sequin itomin pa yoje momiactis, ma ye se ilaxilulisi itomin hual quilaxlahuilo capa tequipanua. Ma quichia sejse yoje pa camo monequis pa quinechicus tomin quiman nihualas ca amhuanten. <sup>3</sup> Huan in tonali niajsis, xiquinpiacan lalajtultili lacames hual aqui anquinmita quinami lacames hual quimatilo quichijchihualo cuali pa quihuicasi anmotomin pa yehuanten pa Jerusalén. Huan nehual niquinmijcuilus amames pa mochi sejse ca yehuanten, pa yoje monapatisi inminlaixpan yehuanten pa Jerusalén. Yoje quimatisi aquinojen cate innojen lacames. <sup>4</sup> Huan sinda monequi pa nehual noje niasquiaya, cuaquinon yehuanten nechtocasi.

*Pablo yahui cana ojli pa Macedonia*

<sup>5</sup> Nias ca amhuanten quiman nipanus pa in lalticpan Macedonia. <sup>6</sup> Cuaajnesi ca amhuanten nimocahuas o noje nicayas nepa pa mochi itonalijmes in sejsecuilisi. Yoje amhuanten huil annechpalehuis pa no'ojli ca capic yes nias. <sup>7</sup> Yoje nicnequi nicchias pampa axan amo nicnequi jan annimitz-paxalulisi je nadita san. Nicchixtica pa huil nimocahuas miac tonalijmes ca amhuanten sinda nechmacahuiltis in Tata. <sup>8</sup> Ma yoje, nimocahuas nican Efeso pa nicayas pa in fiesta (ilhuil) Pentecostés. <sup>9</sup> Nican nicayas pampa unca se tequipanulisi hue pa in Tata nican hual nicnequi nicchia. Unca miac pa

ticchihuasi huan cayasi m'iac hual quineltoacasi ilajtol Dios. Noje cate m'iac lacames nican hual quinequilo tejtzacuililo totequipanulisli tehuanten.

<sup>10</sup> Sinda yas Timoteo capa amhuanten, xiquitacan pa anquimosehuiltis huan pa como cayas amaqui ca amhuanten hual amo quinamiquis quinami tocní quiman unca ca amhuanten. Xicchihuacan yoje, pampa yihual quichía itequipanulisli in Tata jan quinami nehual noje. <sup>11</sup> Ma como quixixicu amaqui. Xicpalehuican pa iojli, xictilanican ca mosehuilisli pa iyolo, pa yoje hualas ca nehual, pampa nicchixtica pa hualasi yihual huan tocnían hual quineltoacalo toTata.

<sup>12</sup> Axan annimitzilía inon hual nechilic tocní Apolos. Niquiyantic chicahuac pa yas ca amhuanten quiman uyaje in oc sequin tocnían. Ma yoje, yihual amo jan nadita quinequiaya yahui axcan. Yihual yas quiman cayas oc se tonali pa huil yas.

*Pablo quinchicahua yehuanten pampa lami quinmijcuiluilía*

<sup>13</sup> Xilachixtiacan mochi tonali pa como anmitzcuajcuamanasi yehuanten hual amo lamaxtilo ca ilajtol Dios quinami quijtúa. Xicneltocatiacan chicahuac Cristo. Xiyulican amo anmomajtitica, yoje unca quinami monequi pa yulisi Dios ilacames. Ximochihuacan chicahuac ca Dios ichicahualisli pa como quiman anmocahuas pa anquineltocas ilajtol. <sup>14</sup> Huan mochi hual anquichía, ma ye lachihuali pampa anquinlasojla toTata huan yehuanten hual iyaxca.

<sup>15</sup> Axan, nocnían, annimitzljalanía pa anquichías inon. Anquimati pampa yehuanten pa ichan Estéfanas cataloaya hual pehuaje quineltoacaje ilajtol Dios. Ayamo cataloaya oc sequin hual quineltoacaloaya nepa pa anmolali Acaya quiman niquinmachiltic Dios ilajtol. Yehuanten molalije pa quin-tequipanuilisli huan quinpalehuisi Dios ilacames hual amo quipialo m'iac.

<sup>16</sup> Yehuanten cate lacames hual quimatilo lapalehuilo huan latequipanuililo chicahuac. Huan cate oc sequin quinami yehuanten hual lapalehuilo huan tequipanulo ca tehuanten. Pampín, annimitztemachía amhuanten noje, pa anquinequis anmolaneltoaltis ca lacames quinami yehuanten pa anmoxextilis quinami monequi pa anquintequipanuilisli tocnían. <sup>17</sup> Nicpía m'iac paquilisli pampa axan ajsije capa nehual Estéfanas huan Fortunato huan Acaico, pampa annimitzijnamictataya m'iac. Huan mas que amhuanten amo huil anhualaya ca yehuanten, ma yoje quiman ajsije yehuanten, nimoitac ca paquilisli pampa cataya quinami amhuanten anhualaya. <sup>18</sup> Cataya yoje pampa yehuanten nejchihuic pa nimoitas ca niman m'iac paquilisli pa noyolo. Huan annimijchihuilisli amhuanten nojen pa anquipías niman m'iac paquilisli pa anmoyolo quiman mocuepasi capa amhuanten. Xiquinlamachiltican moxtin in cuali hual quichihualo lacames quinami yehuanten.

<sup>19</sup> Annimijchicahualo moxtin innojen tocnían hual cate cajcapa yes pin lalticpan Asia cajcapa monechiculo pa quimolancuacuetzilisi in Tata. Annimijchicahualo m'iac pan ipampa ilasojlalisli in Tata. Annimijchicahualo ca mochi inminyolo Aquila huan Prisca huan noje tocnían hual monechiculo pa inminchan. <sup>20</sup> Annimijchicahualo moxtin anmocnían. Ximopialtican quinami motequihuilo mopialtilo Dios ilacames, ca latenamiquilisli hual unca ilanex-tilisli anmolasojlalisli chipahuac sejse ca in oc sequin ca amhuanten.

<sup>21</sup> Nehual Pablo niqijcuilujtica in lapialtilisli ca nomajma.

<sup>22</sup> Sinda unca se hual amo quilasojla toTata, ma Dios quiquixti pa iyampa yihual pa como quiman cayas capa unca Dios. ¡Maranata! In quinequi quijtúa ¡Ma huala toTata!

<sup>23</sup> Ma caya ca amhuanten in cuali hual jan huil tejchihuilía in Tata Jesús san. <sup>24</sup> Nolasojlalisli hual nicpía pa amhuanten pan ipampa Cristo Jesús, ma caya ca anmoxtin. Yoje ma ye.

## Oc se amal hual in lanahuatini Pablo quinmijcuiluilic laneltocanijmes hual yulinijme pin caltilan Corinto

*Pablo quinmijcuiluilía (quinmescribiruilía) yehuanten hual quineltocalo Cristo pin caltilan Corinto*

<sup>1</sup> Nehual Pablo niunca Cristo Jesús ilanahuatini pampa yoje Dios quinequic pa niyes ilanahuatini. Huan tocní Timoteo ticate. Annimitzjicuiluilijtica amhuanten hual anmonechicúa pa anquimolancuacuetzilis Dios pampa anquineltoqa yihual nepa pin caltilan Corinto. Noje annimitzjicuiluilijtica moxtin ilacames Dios hual cate nepa noje pa mochi in lali Acaya. <sup>2</sup> Ma Dios toTajtzin huan toTata Jesucristo anmijchihuilican cuali huan anmitzmacacan mosehuilisi pa anmoyolo.

*Pablo quinmilía quinami Dios quinlacahualtía yehuanten hual icnotilo huan panulo lacocoltilisi*

<sup>3</sup> Ma quijtucan moxtin lajtimes niman cuali pa Dios hual unca iTajtzin toTata Jesucristo. Yihual toTajtzin hual quimati laicnília, huan yihual in Dios hual quimati techmaca mochi lajtol hual tejchicahualtía pa toyolo huan techlacahualtía. <sup>4</sup> Dios techlacahualtía, mocajtica tonahuac pa techmacas chicahualisli pa mochi tonalijmes quiman tipanujticate lacocoltilisi. Inon tejchihuilía pa yoje huil ticmatisi ticmacasi chicahualisli oc sequin mochi tonalijmes quiman yehuanten panujticate lacocoltilisi. Tiqinmacalo in chicahualisli calica Dios tejchicahualtía tehuanten noje quiman techmaca chicahualisli. <sup>5</sup> Inon unca yoje pampa jan quinami tipanujticate míac lacocoltilisi pa Cristo, yoje quinami yihual panuc lacocoltilisi, cuaquín jan yoje yihual mocahua tonahuac pa ticanasi míac ichicahualisli hual quinequi techmaca. <sup>6</sup> Sinda lacames techcocoltilo, yoje unca pa amhuanten ancanas chicahualisli pa ancayas lachicahualtili huan pa ancayas laquixtili pa ipolehuilisi anmolajlaculisli pa anmoyolo. Huan sinda tehuanten timochicahualtilo pa camo ticayasi majquimes, cuaquín unca pa yoje amhuanten anmochicahualtis pa camo ancayas majquimes. Huan anmochicahualtis pa camo ancayas majquimes sinda amo anmocahua pa anmopepenialtis in lacocoltilisi quinami techpanúa tehuanten. <sup>7</sup> Amo timocahualo pa ticchiasi in cuali, huan amo unca nindeno hual tejtzacuilia pa camo ticchiasi. Quema, neli mocahua chicahua inon hual ticchialo pa amhuanten. Ticmatilo pa toyolo pampa anmocahuas anquineltoqatica, mas que anmitzpanus míac hual anmitzcocúa. Inon ticmatilo pampa quinami anpanúa in lacocoltilisi jan quinami tehuanten, noje anmochicahualtía pa camo ancayas majquimes. Huan amo ancayas majquimes pampa Dios techpalehuía pa timopepenialtisi ca ichicahualisli.

<sup>8</sup> Tiquijtulo yoje, nocnían, pampa ticnequilo pa anquimatis quinami míac tipanuje lacocoltilisi nepa pin lalticpan Asia. Quema, yoje míac tipanujtataloaya latojtocalisli, amo huil timopepenialtiloaya huan timocahuaje pa ticchiasi pa huil tiquisalosquiaya pa camo timiquilosquiaya. <sup>9</sup> Quema, tiquijtuloaya pampa neli yehuanten molalilije pa techmictilosquiaya. Ma yoje, inon techpanuc pa yoje amo ticlaililosquiaya laneltocalisli ca tehuanten tochicahualisli. Techpanuc pa ticlaililosquiaya laneltocalisli ca Dios hual

quinyuliltía oc sejpa yehuanten hual miquije. <sup>10</sup>Yoje techquixtic pin miquilisli hual yoje míac ticmacajsije. Huan techquixtis oc sejpa. Ca yihual timolalije pa ticchiasi pa yihual techquixtilis pin miquilisli oc sejpa. <sup>11</sup>Amhuanten noje anquipía pa antechpalehuis pan ipampa quinami anquilajlanía Dios pa tehuanten. Yoique, míac hual cate tocnían quisehuisi Dios pa tehuanten. Yes pampa Dios tejchihuilía cuali. Tejchihuilía cuali pampa míac hual cate ilacames quilajlanije pa tejchihuilisquiaya yoje.

*Pablo quinmilía leca amo uyac pa Corinto*

<sup>12</sup>Ticnequilo pa anquilajlanis Dios pa tehuanten, pampa tiquijtulo ca niman míac paquilisli pampa tiyulije ticchihuilijtataloaya len cana cuali inminlaixpan yehuanten pin lalticpan huan neli anmolaxpan amhuanten. Tiyulije niman chipahuac anmoyampa huan amo tiyulije tilacaujcuamantataloaya. Yoje tiyulije pan ipampa quinami Dios mojmosta techpalehuía, huan amo pan ipampa in lajmatilisli hual quipialo yehuanten pin lalticpan hual amo quiximatilo Dios. Huan tolajmatilisli hual technextilía len unca cuali huan len unca amo cuali techmachiltía neli pampa tiquijtuticate len melahuac. <sup>13-14</sup>Amo tilacaujcuamanticate quiman antimitzizcuiluililo (antimitzescibiruililo), pampa antimitzizcuiluililo mochi ca lajtol hual amhuanten huil anmomaxtía huan huil anquimati len quinequi quijtúa. Axan anquimati nadita pampa huil antechpilia míac paquilisli quinami tehuanten antimitzopililo míac paquilisli. Huan pa in tonali quiman hualas oc sejpa in Tata Jesús, nicchixtica niquita pampa neli anajsic anquimatic pampa huil antechpilis míac paquilisli pan topampa tehuanten, jan quinami pan anmopampa antimitzopililo paquilisli.

<sup>15</sup>Quinami niquijtuaya neli pa noyolo pampa cataya yoje, nicnequiaya nicpehualti nopaxaluilisli nihualajtica ca amhuanten pa yoique annimitzpalehuisquiaya sejpa huan oc sejpa. <sup>16</sup>Nicnequiaya annimitzpaxaluili quiman najtiahuiaya pa Macedonia. Huan nicnequiaya annimitzpaxaluili quiman nimocuepaya niquistataya pa Macedonia pa annehpalehuisquiaya pa nicanasquiaya ojli pa in lalticpan Judea. Ma yoje, amo nicchihuaya yoje. <sup>17</sup>Huan ¿anquijtúa pampa yoje nicnequiaya nicchía? ¿Anquijtúa pampa niunca se hual yuli lachijtica quinami niquijtuaya da amo monotza nindeno len yes? ¿Anquijtúa nehual niquita nicchía mochi quinami se lalac hual yuli quinami quinequilo yehuanten pin lalticpan pa yulis se? ¿Anquijtúa niunca se lalac hual quijtúa “quema” huan “amo” in ome lajtomes jan inminahuac quiman nilananquilía, quinami antimitzilloaya pampa tihualasi huan cuaquinon amo ticchihualo in hual antimitzilije? No, tehuanten amo quinami inon. <sup>18</sup>Neli huil ticneltocalo len quijtúa Dios. Huan jan yoje neli unca pampa inon hual antimitzililo amo quinequi quijtúa “quema” huan “amo” in omenten lajtomes. <sup>19</sup>Tehuanten Silvano huan Timoteo huan nehual antimitzlamachilito quinami Dios iXolol Jesucristo amo quijtúa “quema” huan “amo” pan se lajtulisli. No, pampa ca yihual huil tiquijtulo “quema” pa mochi hual quijtúa, pampa ticmatilo neli unca. <sup>20</sup>Yoje, mochi hual Dios quilía neli pampa tejchihuilis, inon tejchihuilis pan ipampa Jesucristo. Pan ipampa yihual, ticmatilo Dios techilijtica “quema” ca len yes techilía. Pampa inon, tiquijtulo “Yoje ma ye” pan ipampa Cristo, pa yoje Dios quincacuis míac lajtomes huejué hual moxtin yalo quililo. <sup>21</sup>Huan unca Dios hual tejchihuilía tehuanten huan amhuanten pa tiyultiasi tictocaticate Cristo pa iofli, amo timijcuanticate capa yihual. Huan Dios techlajtultic pa tictequipanuilisli. <sup>22</sup>Yihual quilalic topan quinami ilayapalisli ca temulol

hual amo moita. Quilalic topan pa momatis pampa ticate iyaxca huan pa tejtzacuilis pa camo tiqitasi polehuilisli. Quimacac iEspíritu Santo laijtic pa toyolo pa yoje ticmatisi pampa tialo ticpialo mochi hual quinequi techmaca.

<sup>23</sup> Axcan, pampa Dios quimati in hual niquijtúa pa noyolo, nicnotza yihual pa anmitznextilis pampa unca neli inon hual nía annimitzilía: Nimotzacuilic mochi innojen tonalijmes pa camo nihualasquiaya pa Corinto, pampa amo nicnequiaya nicajua amaqui. <sup>24</sup> Amo unca pa tehuanten antimitzilisi chicahuac inon hual anquipía pa anquineltocas pa yoje anyulis anquineltocatica Cristo chicahuac. No, titequipanulo ca amhuanten pa anquipías paquilisli anquichijtica quinami Dios quinequi. Sinda anyuli anquineltocaticá chicahuac Dios ilajtol, cuaquín yoje amo quiman anmoxilus pa anquicahuas Dios iojli.

## 2

<sup>1</sup> Ma yoje, nimolalic pa camo annimitzpaxalulis oc sejpa sinda yahuiaya techcocu toyolo nehual huan amhuanten. <sup>2</sup> Yojque nicchíac pampa sinda annimitzcocuhuilía anmoyolo, cuaquín amo cayas amaqui hual nechpaquilis sinda quinentocujtica inminyolo yehuanten hual niqincocuhuilic inminyolo. <sup>3</sup> Huan annimitzijcuiluilic ca lajtomes chijchicahuac pa yoje, quiman niajsi-aya ca amhuanten, amo nechcocusquiaya noyolo. Unca pampa amhuanten anquipía pa annechmacas paquilisli. Niquijtuaya neli pa noyolo pampa quiman nihualaya, neli amhuanten anmoxtin anquipiasquiaya paquilisli jan quinami nehual. <sup>4</sup> Annimitzijcuiluilic (annimitzescribiruilic) quiman nechcocujtataya chicahuac noyolo, huan nichocatataya. Ma yoje, amo annimitzijcuiluilic inon pampa nicnequiaya pa anmitzcocus anmoyolo. Cataya pa annimitzmachiltisquiaya quinami miac annimitzlasojla.

### *Pablo quinmilía pa quipujpuhuasi in se hual quichíac in laijlaculisli*

<sup>5</sup> Huan sinda unca se hual quincocuc inminyolo pampa quichíac in laijlaculisli, cuaquinon amo unca nehual nohuían nejchihuilic. Nadita annijchihuilic anmoxtin noje. Niquijtúa “nadita” pa yoje amo nesis quinami nilajcuilujtica chicahuac ca cualanilisli. <sup>6</sup> Pa in se niquijtúa “jan ca inon san” ca in la'ajualisli hual anquichihuilic in miac capa amhuanten. <sup>7</sup> Axcan, yes cuali pa anmocuepas pa anquipujpúas huan pa anquilacahualtis. Sinda amo, cuaquín cuajnesi yihual moitas lasulahuali ca miac lacocolisli pa iyolo. <sup>8</sup> Yoje, annimitztemachía xicnextilican oc sejpa quinami anquilasojla. <sup>9</sup> Huan yoje, cataya pampa inon noje annimitzijcuiluilic, pa yoje nicmatis huan pa annimijchihualtis se lanextilisli pa momatis sinda anquineltoca Cristo ca mochi hual anquichía. <sup>10</sup> Huan aqui yes anquipujpúa, cuaquín nehual noje nicpujpúa pampa nicmati anquichíac cuali. Huan sinda unca len hual monequi pa nicpujpúas, cuaquinon inon hual nicpujpúa unca pa annimijchihuilis cuali ilaixpan Cristo. <sup>11</sup> Yoje Satanás amo techquitzquis sejpa pa huil tejsulahuas. Ticmatilo cuali quinami yihual quitemujtia quinami huil tejchihuilis amo cuali.

### *Pablo quijtúa quinami amo quipiaya mosehuilisli pa iyolo nepa pin caltilan Troas*

<sup>12</sup> In tonali quiman niajsic pa in caltilan Troas pa niclamachiltisquiaya ilamachiltisli cuali Cristo, nicmatiaya quinami toTata nejchihuilic tonalijmes cuajcuali pa niqinlaquetzilisquiaya yehuanten nepa pa quimatisquiaya Dios ilajtol. <sup>13</sup> Ma yoje, amo nicpiaya mosehuilisli pa noyolo pampa amo

niquitaya nepa tocní Tito. Pampín nimoxiluc, niquincahuac tocnían huan níac pa in lali Macedonia.

### *Ticsulahualo mochi pan ipampa Cristo*

<sup>14</sup> Huan ma nicsehú Dios hual mojmosta unca quinami yihual techlaicana quinami se guache quinlaicana oc sequin guaches pa se latocalisli sinda quinsulahuaje yehuanten hual moanaloyaya ca yehuanten. Quema, Dios techlasulahualtilía yehuanten hual moanaló ca tehuanten, techlasulahualtilía pan ipampa Cristo. Huan pan topampa tehuanten, Dios quise-mana ilamachiltisli Cristo pa mochi caltilan cajcaca yesi. Unca quinami len hual ajuíac mosemana cajcaca. <sup>15</sup> Quema, unca pampa tehuanten ticate quinami len hual iyaxca Cristo hual ajuíac. Yojque Dios quijtúa pampa ticate tehuanten. Quijtúa pampa ticate quinami ajuialisli capa cate yehuanten hual Dios quinxititica pa ipolehuilisli inminlajlaculisli. Huan ticate ajuialisli capa cate yehuanten hual mopolujticate huan amo quiman moitasi oc seppa pampa amo canaló iojli Cristo. <sup>16</sup> Huan in hual quinami ajuíac, unca in lamachiltisli cuali hual ticlamachiltitinemilo. Quinnextilía yehuanten hual mopolejticate len hual quinmijnamiquiltía miqulisli san. Huan pampa yultiasi amo quineltocticate, yoje lamisi miquisi huan yajmo moitasi capa unca Dios. Huan yehuanten hual canaló iojli in lamachiltisli cuali, pan ipampa in lamachiltisli cuali, quimatilo pampa quipialó yulilisli huan amo mocahuasi pa yulisi. Huan ¿aquí huil quipía chicahualisli pa quinchías innojen pan ipampa ichicahualisli yihual ihuían? Amaquí huil. <sup>17</sup> Ma yoje, pan ipampa ichicahualisli Dios tehuanten huil ticchihualo. Amo ticate lacames hual quilamachilito Dios ilajtol pa ticanasi tomin. Quema, cate sequin hual quichihualo yoje. Ma yoje, tehuanten tilacames hual tiquijtulo ilajtol Dios. Huan moxtin huil quimatilo pampa tiquijtulo melahuac, pampa tiquijtulo quinami ticataloyaya iyampa Dios hual techtilanic pa tiyesi itequipanujquimes pan ipampa Cristo.

## 3

### *Pablo quinmilía len quinequí quijtúa Dios ilajtulisli yancauc*

<sup>1</sup> Axan, ¿anquiqtúa tipejticate tilajtulo hué tonahuac tehuanten tohuían oc seppa? Huan pampa inon hual nilamic niqijtuc, ¿anquiqtúa monequí pa ticpiasi amames hual oc sequin quinmijcuiluje pa lajtulosquiaya hué tonahuac tehuanten, quinami monequí pa quipiasí oc sequin? ¿Anquiqtúa monequí pa amhuanten anquinmijcuilus amames hual lajtulo hué tonahuac tehuanten huan pan impampa in amames ticpialosquiaya lahelilitisli? <sup>2</sup> Damo ticinequilo nindenó quinami inon. Amhuanten nojen anunca quinami amal hual lajtúa hué tonahuac tehuanten quinami neli ticate Dios ilanahuatini-jmes hual yihual quintilanic. Unca quinami in amal unca lajcuiluli pan toyolo. Huan yoje, moxtin huil quimatilo pampa amhuanten anlajtúa hué tonahuac tehuanten, pampa unca quinami yehuanten momaxticate inon hual unca quinami lajcuiluli paní anmoyolo. <sup>3</sup> Quema, yoje anquinnextilía moxtin pampa anunca quinami se amal hual Cristo anmitzjicuiluic huan tehuanten antimitzhualiquilije. Huan in hual unca quinami cataya amal, amo unca quinami cataya lajcuiluli ca tinta. Inon quijcuiluc ¡Espíritu Santo Dios, yihual in Dios hual yuli. Amo cataya lajcuiluli pan tixcalimes aj'alastic. Cataya lajcuiluli pan inminyolo lacames, inminyolo yajyaman-quil. In quinequí quijtúa anquipía ilajtol Cristo pa anmoyolo pampa anyuli anquichijtaca quinami ilajtol quijtúa.



<sup>4</sup> Yojque, ilaixpan Dios ticmatilo pa toyolo pampa huil tiquijtulo neli pampa ticate Dios ilanahuatinijmes. Unca Cristo hual techmachiltic inon pa toyolo. <sup>5</sup> Amo tiquijtuticate pampa huil ticchihualo len pan topampa tehuanten, pa yojque tiquijtulosquiaya pampa len tolahueliltisli tehuanten quisa pa tehuanten tohuian. Tehuanten tolahueliltisli quisa pa Dios hual unca ca tehuanten. <sup>6</sup> Unca yihual hual techueliltic pa tictequipanulisi ticlamachiltiticate ilajtulisli yancuic. Huan in lajtulisli yancuic amo unca míac lajtomes lajcuiluli hual ticpialo pa ticneltocasi. In lajtulisli yancuic ticmatilo pan ipampa quinami technextilía in Espíritu Santo. Ilajtulisli in míac lajtomes lajcuiluli amo huil ticneltocalo huan pampín techtilanisi pa timiquisi. Quema, in lajtulisli lamictía. Huan in Espíritu Santo hual quinextilía se in lajtulisli yancuic, yihual layuliltía.

<sup>7</sup> Axan, in lajtulisli lajcuiluli pan tixcali, in lajtulisli hual lamictía, Dios quinmijcuiluilic totajtzitzían ca míac laixpelalisli cualtichin hual moita san capa unca in Dios hual unca mochi cuali. Huan pampa inon, iixco Moisés noje laixpelaya chicahuac. Yoje yehuanten in israelitos totajtzitzían momajtijje quitaje iixco Moisés laixpelatataya chicahuac, mas que lantiahuiaya in laixpelalisli. <sup>8</sup> Huan sinda cataya yojque ca in lajtulisli calica Dios pehuac monextic ca ilacames, cuaquín ¿amo cayasquiaya lalalili ca niman míac laixpelalisli chicahuac in lajtulisli hual in Espíritu Santo technextilía? <sup>9</sup> Quema, cayasquiaya yojque. Sinda cataya laixpelalisli cualtichin quiman quinlalilije in lajtulisli hual techtilanía pa timiquisi, cuaquinon cayasquiaya niman míac laixpelalisli cualtichin huan hué quiman in Espíritu Santo quilalic in lajtulisli calica Dios quinchipahuilía inminyolo lacames. Yoje quinquixtilía inminlajlaculisli pa Dios toTajtzin quinmitas quinami lacames amo quipixticate laijlaculisli. <sup>10</sup> Inon tiquijtulo neli, pampa in lajtol hual Dios quinmilic totajtzitzían hual quipiani laixpelalisli cualtichin axan amo quipía laixpelalisli cualtichin nindenó sinda tiquitalosquiaya inahuac inon hual Dios techualiquilic ca niman míac laixpelalisli cualtichin. <sup>11</sup> In lajtol hual Dios quinlalilic hualac ca yehuanten pa yina ca lanextilisli chicahuac. Axan yajmo moita yojque pampa unca quinami len hual pilinía. Yoje, inon hual Dios techlalilic hual amo lamis huejcahuas, neli quipías niman míac chicahualisli hué.

<sup>12</sup> Yoje, amo timomajtilo se naditita pampa ticchixticate pa ticanasi in chicahualisli hual unca niman hué huan amo lamis huejcahuas. <sup>13</sup> Huan pampa amo timomajtilo se nadita, amo ticate quinami Moisés hual quitzacuac iixco ca se dango pa yojque amo qitalosquiaya in israelitos quinami lantiahuiaya in laixpelalisli pa Moisés iixco. <sup>14</sup> Huan yehuanten ilacames Israel amo mopatlilije quinami laijnamiquilo, pampa quinami len hual unca chicahuac, jan yoje mocahualo yehuanten ilacames Israel quiman laijnamiquilo. Amo huil mopalalo, mochihuaje pachacal pa inminyolo. Pampa inon, yehuanten hual yulinijme pa yina huan yehuanten hual yulilo axan amo quimatilo len quinequi quijtúa quiman momaxtilo ilajtulisli in lajtol calica Dios pehuac monextic ca ilacames. Unca quinami se tzotzomajli mocahua quintzacuilijtica inminlajnamiquilisli calica quimatilosquiaya len quinequi quijtúa in lajtol. Jan pan ipampa Cristo san huil quimatisi len quinequi quijtúa. <sup>15</sup> Quema, pa yina huan axan, quiman yes momaxtilo iamal Moisés, unca quinami se tzotzomajli quintzacuilijtica pa camo quitasi pa quimatisi len quinequi quijtúa. <sup>16</sup> Ma yoje, sinda se lalac motemaca pa yes se ca Dios ilacames, cuaquín unca quinami in tzotzomajli cataya laijcuanili. <sup>17</sup> Axan,

in Tata, yihual in Espíritu hual quinmijcuanilía inon hual quintzacuilía pa camo quimatisi len quinequi quijtúa. Huan capa cayas iEspíritu Santo in Tata, nepa lacames cate lamacahuali pa camo quipiasí pa panusi in lacocoltisli hual panusi sinda amo quineltocalo in lajtol. Cate lamacahuali pa yajmo quinlachihualtía inminlaijlaculisli. <sup>18</sup> Huan timoxtin tiquizticate ilaixpelalisli cualtichin in Tata, amo ticpixticate quinami in tzotzomajli tejtzacuilijtica toixco. Huan ticate timopalaticate pa timochihuasi quinami in Tata Jesús. Se tonali ticanasi nadita ilaixpelalisli cualtichin, oc se tonali ticanasi oc se nadita. Yoje, se tonali huan oc se tonali ticantiasi pa ticayasi se tonali quinami yihual, pampa in lapatilisli cualtichin quisa pa in Tata pan ipampa iEspíritu.

## 4

<sup>1</sup> Yoje, amo timomajtilo. Unca pampa ticpialo in tequipanulisli pa Dios pan ipampa ilaicnilisli. <sup>2</sup> Amo ticchihualo pinahualisli hual quichihualo lacames quinmolatilijticate oc sequin. Amo ticchihualo lacaujcuamanalisli pa tiquisasi cuali ca len yes ticchijticate. Huan amo tilamaxtilo ca inminlamaxtilisli lacames quinami cataya ilajtol Dios. Amo ticmaxtilo quinami amo quijtúa ilajtol Dios. Quema, tiquijtulo melahuac inminlaijpan moxtin ca lajtol hual huil quimatilo len quinequi quijtúa. Huan pan ipampa inon timonextililo ca moxtin quinami ticate lacames mejmelahuac. Huan yehuanten nechitalo yoje pampa inminlajmatilisli pa inminyolo quinnextilía len unca cuali huan amo cuali. Noje Dios techita yoje. <sup>3</sup> Huan mas que cuajnesi tolamachiltisli cuali amo huil quimatilo len quinequi quijtúa, san cate yehuanten hual amo cate pan iojli Cristo hual amo huil quimatilo. Yehuanten yajtialo micticate, amo moquixtitticate pa in polehuilisli. <sup>4</sup> Yehuanten cate quinami pachacames pampa laijnamiquilo yoje, amo laneltocalo. Quinchihuilic yojqe Satanás, yihual in dios hual quitequipanuililo yehuanten hual amo quiximatilo toDios. Satanás quinchihuilic pa yojque quintzacuilis pa camo quitasi pa inminyolo ilahuilisli ilamachiltisli cuali Cristo. In lamachiltisli unca hué huan cualtichin. Huan Cristo unca san mochi quinami Dios. Ma yoje, amo huil quimatilo inon pa inminyolo. <sup>5</sup> Tehuanten amo tilacaujcuamanalo quiman tiquinlaquetzililo ilajtol Dios, pampa amo tiquinlaquetzilijticate tonahuac tehuanten. Tiquinlamachiltiticate inahuac Jesucristo huan quinami yihual unca in Tata hual quipía lahueliltisli pan moxtin. Huan tehuanten antimitzililo pampa ticate anmotequipanujquimes pampa yoje quinequi Jesús. <sup>6</sup> Yoje ticate pampa cataya Dios hual quijtuc: "Ma lahui capa laticumac", huan yihual Dios lahuic pa laijtic toyolo pa techmacas tehuanten ilajmatilisli ichicahualisli cualtichin hual tiqitalo quiman tiquizticate Cristo. Unca quinami lahuilisli pa toyolo.

### *Tiyulilo ticlalijticate tolaneltocalisli ca Cristo*

<sup>7</sup> Huan ticpialo ilahuilisli ilajmatilisli Dios. Tiquitalo quinami ipati niman míac. Amo yoje míac ipatilo mochi pin lalticpan quinami ipati inon. Huan ticpialo in lahuilisli pa laijtic tocuerpos hual cate lachihuali ca in lali. Ca inon ticnextililo quinami in chichahualisli niman hué quisa capa Dios huan amo quisa capa tehuanten. <sup>8</sup> Ca mochi lachihualisli quinami huil, tolacocolinjmes tejchihuililo amo cuali. Ma yoje, amo huil tejtzacuililo pa camo huil tiquisasi pa capa timoitalo pin amo cuali, pa camo tiasi ticchijticate totequipanulisli. Huan mas que pan míac tonalijmes amo huil tilaijnamiquilo ca mosehuilisli pa ticmatasi len ticpialo pa ticchihuasi, ma yoje, amo quiman timoitalo lasulahuali. <sup>9</sup> Techtotjocalo pa techmictisi, huan

Dios amo techcajcahua. Sinda tejsulahualo, Dios amo quinmacahuiltía pa techmictisi. <sup>10</sup> Mojmosta timoitalo capa quinequilo techmictilo quinami quimictije Jesús. Inon techpanúa pa yoje moitas noje pa tocuerpos iyulilisi Jesús hual tejtzacuiliá pa camo timiquisi. <sup>11</sup> Unca pampa mochi in tonalijmes quiman tiyulticate, amo mocahualo pa techtemacasi pa techmictisi pampa ticneltocalo Jesús, pa yoje monextilis ilayulitilisi Jesús pa innojen tocuerpos (tonacayo) hual huil miquilo. <sup>12</sup> Yoje, timoitalo mojmosta capa huil timiquisi. Ma yoje, amhuanten anquixtía iyulilisi Jesús anmitzyuliltica.

<sup>13</sup> Ticpialo in se Espíritu hual techpalehuía pa ticlalisi tolaneltocalisi ca Jesús. Ticpialo in se Espíritu, jan quinami quijcuiluc se pan ipampa in Espíritu, quijcuiluc, quil: “Niclalic nolaneltocalisi ca in, huan pampa inon nilajtuc.” Huan pampín tehuanten noje ticlaliye tolaneltocalisi ca ilajtol Dios. Huan yoje ticneltocalo huan tilajtulo. <sup>14</sup> Dios quiyuliltic in Tata Jesús quiman cataya mictataya capa cate in mijquimes. Huan pampín ticneltocalo pampa noje techyuliltis pa ticayasi ca yihual. Huan techuicas noje ca amhuanten ca capic ticayasi ca yihual. <sup>15</sup> Mochi inon panuc pa yoje anmitzpanus len cuali amhuanten. Huan yoje, quiman ajsis in cuali ca míac huan oc sequin míac lacames hual Dios quinchihuiliá, cuaquín yehuanten quisehuisi Dios míac. Yihual yoje quincacuis míac lajtomes huejué hual yehuanten quilisi.

<sup>16</sup> Pampín amo timomajtilo. Mas que tocuerpos quinectialo lamilo pa miqusi, ma yoje toyulilisi pa lajitic tehuanten mochía yancuic mojmosta. <sup>17</sup> In lacocoltilisi hual tipanulo amo unca míac sinda tiquiztialo inahuac in míac laixpelalisi cualtichin hual amo lamis huejcahuas. In laixpelalisi cualtichin Dios quichijchitica pa techmacas. Quema, amo tiquitalo nindeno pan lalticpan hual huil tiquijtulo pampa unca jan quinami in laixpelalisi cualtichin. <sup>18</sup> Inon unca pampa tiquizticate innojen hual amo moitas nican pan lalticpan. Amo ticmacalo toixco ca innojen hual moitalo. Innojen hual moitalo yajmo huejcahuasi quiman lamis in lalticpan. Ma yoje, innojen cuajcualtichin hual amo moitalo amo quiman lamisi huejcahuasi.

## 5

<sup>1</sup> Ticmatilo pampa in cuerpo (tonacayo) capa tiyulilo unca lachihuali ca lali, huan quinami se cali amo huejcahua, yoje amo huejcahua in cuerpo. Ma yoje, sinda in cuerpo xitinis, cuaquín ticpialo capa tichantisi. Unca se cali hual Dios quichíac, amo quichíac lacames. Unca pin cielo huan amo quiman lamis. <sup>2</sup> Nican neli tisiahuilo huan ticnequilosquiaya míac timolaquentilo ca tocuerpo hual unca pin cielo pa tichantilosquiaya pin tocuerpo hual unca iyaxca in cielo. <sup>3</sup> Inon ticnequilo, pa yoje, sinda timolaquentilo ca inon, cuaquinon amo timoitasi nacatil, quinequi quixtía, toyolo amo moitas amo quipixtica icuerpo pa quipachus. <sup>4</sup> Neli unca inon pampa mochi in xixihuimes quiman tichantiticate pin cali hual unca tocuerpo, titenalo huan timoitalo lacocoltili. Amo unca pampa ticnequilo timiquilo pa yoje yajmo techcocoltía tocuerpo hual mojmosta oc se nadita mochitica quinami lantica. Ticnequilo quinami timolaquentilo ca tocuerpo yancuic hual Dios yahui techmaca. In ticnequilo pa yojque yajmo nesis in tocuerpo tehuanten hual yahui miqui. Huan yajmo nesis, pampa in yulilisi yancuic cayas capa catani in yulilisi calica tipehuaje, in yulilisi hual amo huejcahuas. <sup>5</sup> Huan Dios, unca yihual hual jan yoje tejchijchiuilic pa huil ticpiasi mochi inon. Techmacac in Espíritu Santo pa techmachiltis neli pampa tialo ticpialo inon.

<sup>6</sup>Yoje, amo timocahualo pa ticmatasi inon pa toyolo pampa pa mochi tonalijmes hual tiyulilo ca in tocuero, timocahualo pa quiahuac focali, nicnequi niqijitúa, ayamo ticate ca in Tata. <sup>7</sup>Huan tiyultialo nican pan lalticpan pan ipampa quinami ticneltocalo Dios ilajtol. Amo tiyultialo san ticneltocaticate len tiqitalo. <sup>8</sup>Tiqijitulo neli pa toyolo huan ticnequilosquiaya pa yajmo tiyulisi pa tocuero hual axan ticpialo, pa yoje huil tiyultiasi capa unca in Tata, pa yoje tichantasi ca yihual. <sup>9</sup>Pampa inon timotolinilo pa tiyulisi tipaquiltiticate in Tata, ma caya quiman ticate pa lajtic tocuero huan pa quiahuac tocuero. <sup>10</sup>Yoje ticchihualo pampa timoxtin ticpiasi pa tinesisi iyampa Cristo quiman molalis pa technextilis sinda totequipanulisli pa yihual quimonotziliaya. Monequi pa yihual technextilis inon pa yoje mochi sejse ca tehuanten ticanasi in hual cayas toyaxca sinda unca cuali, o sinda amo unca cuali. Ticanasi pampa inon hual mochi sejse ca tehuanten ticchihuae quiman tiyuliloaya pa tocuero nican pan lalticpan.

### *Dios ilajtol techmaca mosehuilisli pa toyolo*

<sup>11</sup>Yoje, pampa tiquiximatilo in Tata hual monequi pa timomajtisi ilaixpan yihual, timotolinilo pa tiquinyonalisi lacames pa quialisi inminlaneltocalisli ca yihual. Dios quimati quinami ticate pa toyolo. Huan neli pa toyolo tiqijitulo ticchixticate pampa amhuanten noje anquimati da ticate lacames mejmelahuac. Anquimati inon pan ipampa ilajmatilisli anmoyolo. <sup>12</sup>Amo antimitzilijticate oc sejpa quinami cuali tiyulilo pa yoje anquijtus len cuali pa anmoyolo inahuac quinami tiyulilo. No, antimitzmacaticate quinami huil anquinlaquetzilis hué tonahuac tehuanten ca oc sequin, pa yoje huil anquinnanquilis yehuanten hual lajtulo hué pa inminyolo san inahuac quinami nesilo oc sequin. Nicnequi niqijitúa, lajtulo hué inahuac quinami quinmitalo oc sequin ca inmixtololójmes huan amo inahuac quinami nesilo pa inminyolo. <sup>13</sup>Ma annimitznextili len nicnequi niqijitúa. Tehuanten, sinda tinesilo ca amhuanten quinami yehuanten hual amo laijnamiquilo cuali, cuaquin unca pa Dios san. Huan sinda tilajtulo huan tilachihualo quinami yehuanten hual quimatilo in hual laquetzalo, cuaquin unca pa antimijchihuilisli cuali amhuanten. <sup>14</sup>Inon unca pampa Cristo tejchihualtia pan ipampa ilasojlalisli hual quialic pa toyolo. Yoje ticmatilo neli pampa sinda se miquic pa laxlahuis pa inminyulilisli moxtin, cuaquin Dios quita inon quinami moxtin miquije. <sup>15</sup>Huan Cristo miquic pa moxtin, pa yoje yehuanten hual yulticate yajmo yulisi pa mopaquiltisi yehuanten inminhuán. Axan, quinequi pa yulisi quipaquiltiticate yihual hual miquic huan yulic oc sejpa pa quinchihuilisli cuali yehuanten.

<sup>16</sup>Axan huan pa quiman, yajmo tiqitalo amaqui quinami quitalo yehuanten pin lalticpan hual amo quiximatilo Dios. Huan mas que tiquiximatinijme Cristo quinami quitalo yehuanten pin lalticpan, axan yajmo tiquiximatilo jojque. <sup>17</sup>Huan yoje sinda se mochíac se ca Cristo ilacames, axan yihual unca lalacachihualisli yancuic. Yajmo cate innojen calica pehuac yulic pan lalticpan hual quichihualtic quiman ayamo mochíac ilaneltocani Cristo. Xicmatican inon. Axan, mochi hual quichihualtia unca yancuic, yuli ca se yulilisli yancuic.

<sup>18</sup>Mochi inon quimaca Dios. Yihual quijcuanic in hual tejxiluc pa camo ticayalosquiaya ca yihual, inon hual tejchihuilini pa timoxtin tiyesi ilacocolinijmes. Axan yajmo ticate ilacocolinijmes. Huan Dios quichíac yoje pan ipampa Cristo imiquilisli. Tejchíac ilanahuatinijmes pa tiquinnextilisli lacames quinami Dios yajmo quinmita quinami ilacocolinijmes. <sup>19</sup>Inon quinequi quijitúa pampa Dios cataya ca Cristo huan Cristo yoje quipiaya Dios

ilahuelilitlisli pa quijcuanis inon hual quinchihuilic yehuanten pin lalticpan pa yelosquiaya ilacocolinjmes Dios. Huan quinhuelilitic pa mochihuasi ilacames. Yajmo quinmotexpahuilijtica pampa catanijme laijlaculi. Huan mochinlanilic in lanahuatilisli hual unca quinami axan quinequi quinmita moxtin quinami ilacames. <sup>20</sup> Yoje, tehuanten ticate lanahuatinijmes pa Cristo. Dios quintemachijtica lacames pa mochihuasi ilacames, quintemachijtica pan topampa tehuanten. Tehuanten tiquijtulo ilamachilifilisli Cristo quinami cataya yihual hual lajtuaya, tilajtulo pa ticchihuasi niman hué. Huan antimitzyantiticate chicahuac, ximochihuacan pa yajmo ancayas ilacocolinjmes Dios. <sup>21</sup> Pa tejchihuillis cuali tehuanten, Dios quilalilic Cristo ilatexpahuilisli mochi inminlajlaculisli moxtin yehuanten pin lalticpan. Inon quichiac pa yoje Cristo panus ilacocoltilisli mochi laijlaculisli, mas que Cristo amo quiman quimatic quichiac laijlaculisli. Quichihuilic Dios inon pa yoje tehuanten Dios techitasquiaya jan cuali quinami yihual unca cuali amo quipixtica laijlaculisli nindeno. Huan tejchihuilic Dios inon pan ipampa Cristo.

## 6

<sup>1</sup> Tehuanten hual titequipanujticate ca Dios, antimitztemachilo chicahuac, ximacahuiltican pa anmijchihualtis in cuali hual Dios tejchihuilia. Ma camo huala jan latic (de in balde) ca amhuanten. <sup>2</sup> Tiquijtulo inon, pampa Dios quijtúa pa ilajtol lajcuiluli:

Pa in tonali hual niqijjtuc cuali, nimitzcaquic,

huan nimitzpalehuic pan in tonali quiman ticataya laquixtili pa ipolehuilisli molajlaculisli.

Xiquitacan. Axan unca in tonali hual quijtuc cuali huan quilalic. Xiquitacan. Axan unca in tonali hual anmitzquixtis Dios pin ipolehuilisli anmolajlaculisli.

<sup>3</sup> Amo ticchihualo nindeno hual quitzacuilis se pa camo canas iojli Dios. Amo ticnequilo pa moitilis len amo cuali ca quinami ticchihualo Dios itequipanulisli. <sup>4</sup> Huan quinami tehuanten ticate Dios itequipanujquimes, yoje pan ipampa mochi lachihualisli, timonextilo tehuanten lacames hual tiyulilo quinami Dios quinequi. Yoje tiyulilo tipanujticate miac amo cuali hual tejchihuililo hual amo huil timoquixtililo pa inon. Tiyulilo timoizticate capa monequi pa ticpiasi miac hual amo huil ticanasi. Tiyulilo capa lacames tejchihuililo niman amo cuali. <sup>5</sup> Techhuitequilo, tejtzacualo pa calijtic, majcoquilo lacames techixnamiquilijticate pa tejchihuilisli tetcuinuc. Ticpialo pa titequipanusi chicahuac huan pampín tisiahuilo miac. Cate miac layuajmes amo techmacahuiltulo pa ticochisi, huan miac tonalijmes tipanusi timayanticate. <sup>6</sup> Ma yoje tilanextilo pampa ticate ixolomes Dios pampa tiyulilo chipahuac huan pampa ticpialo lajmatilisli hual tiqitalo pa Dios ilajtol. Ticnextilo pampa amo ticualantiquisalo, huan pampa ticate cuali ca oc sequin. Ticnextilo pampa ticpialo pa toyolo in Espíritu Santo huan pampa tiquinlasojlalo lacames laijtic toyolo tiquinchihuilijticate cuali. <sup>7</sup> Tilanextilo pampa ticate Dios ixolomes pampa tiquijtulo len unca melahuac, huan pampa Dios quinnextilia moxtin ichicahualisli ca mochi hual ticchihualo. Ticnextilo pampa ticpialo innojen calica huil timoanalo ipan in hual amo cuali. Pa inon Dios techuelilitia, pampa yihual techita lacames hual amo ticate laijlaculi. Yoje timoanasi ca Satanás pampa Dios quilalic pa timoanasi quiman yes tiqitalo in amo cuali pa tomajma cuali huan tomajma amo cuali, capa yes Satanás quinequi techana. <sup>8</sup> Timonextilo pampa ticate Dios ilacames quiman oc sequin techmacalo momajtilisli o quiman tejtzacuililo

pa camo ticpiasi mochi hual unca toyaxca pa ticpiasi o ticchihuasi, huan pampín tejxijxiculo lacames. Timonextilo quinami Dios ilacames sinda laquetzalo tetzcuinuc huan sinda laquetzalo cuali inahuac in hual ticchihualo huan tiquijtulo tehuanten. Tejchihuillilo quinami islacinijmes, huan ma yoje tilacames mejmelahuac. <sup>9</sup> Quijtulo pampa tehuanten quinami lacames hual amo monotzalo pa quinmiximatis se. Ma yoje, capa cate ilacames Dios techiximatilo cuali. Ca sequin nesi ca nadita tialo timiquilo, huan ¡xiquitacan! Dios techquixtía pin polehuillisi pa tiyultiasi. Techitalo quinami lacames hual Dios quincocoltica pampa ticate laijlaculi huan ma yoje ayamo ticate lamictili. <sup>10</sup> Techitalo quinami lacames hual quincocojtica inminyolo huan ma yoje ticpialo paquillisli. Techitalo quinami lacames hual amo quipialo nindeno, huan ma yoje tiquinchiuililo lacames míac pa yoje quipiasi in míac hual Dios quinmaca. Techitalo quinami lacames hual amo quipialo nindeno hual inminyaxca huan ma yoje ticpialo mochi hual techmaca Dios hual unca toyaxca noje.

<sup>11</sup> Tocrían pa Corinto, amo timotzacuilije pa camo antimitzilisi mochi in totequipanulisli. Antimitznequilo míac. <sup>12</sup> Tolasojlalisli pa amhuanten amo unca tipichin. Neli tehuanten titemilo ca lasojlalisli pa amhuanten. Ma yoje ca amhuanten, nesi quinami amo antechlasojla míac tehuanten. <sup>13</sup> Axan annimitzilía inon quinami niquinmilisquiaya xolomes: Xitechcuepilian quinami antimijchihuillije, xitechlasojlaca míac, amo jan nadita san.

*Tehuanten ticate mochi sejse quinami tiopan capa chanti Dios laijtic tehuanten*

<sup>14</sup> Amo ximonamictican ca yehuanten hual amo quineltoalo toTata. Huan amo ximochihuillican lajtulisli calica annijchihualtilo quinami yehuanten. Yehuanten hual yulilo quinami Dios quinequi neli amo huil yulilo ca yehuanten hual amo quinequilo yulilo quinami quinequi Dios. Huan aquinojen quipialo ilahuillisli Dios laijtic capa inminyolo amo huil yesi ca se lajtulisli ca yehuanten hual inminyolo unca laticumac. <sup>15</sup> Huan amo huil cate ca se lajtulisli Cristo huan Belial. (Belial unca oc se itoca Satanás.) Se hual quineltoaca Cristo amo quipía laxilulisli ca in hual quipía se hual amo quineltoaca Cristo. <sup>16</sup> Huan amo unca ca se lajtulisli capa chanti Dios huan capa cate in monos hual lacames quinmolancuacuetzililo. Inon unca pampa tehuanten ticate itiopan Dios hual amo mocahua pa yulis (hual yuli mochipa), jan quinami quijtúa Dios:

Niyulis laijtic yehuanten huan nichantis pa yehuanten inminyolo, huan niyes inminDios huan yehuanten yesi nolacames.

<sup>17</sup> Pampín, in Tata noje quijtúa:

Yoje, xiquisacan nepa capa yehuanten hual amo nechneltoalo, huan ximocahuacan laxiluli capa yehuanten,

ximocahuacan pa anquijtus huan anquichías len calica Dios annimitzitas la'aniltili ca laijlaculisli.

Cuaquinon annimitzixnamiquis ca lanequillisli,

<sup>18</sup> huan niyes anmoTajtzin amhuanten huan amhuanten anyes noxolomes lacames huan sihuames,

quijtúa in Tata hual quipía mochi chichahualisli.

Yoje quijtúa in Tata.

## 7

<sup>1</sup> Lasojli nocrián, Dios quilic neli quinami yihual yahui quichía mochi inon. Pampín, ma timochipahuillican mochi hual quinchihuillía lacocoltilisli tocuero huan toyolo. Ma timochihuacan lacames hual quimatilo yulilo

quichijtcate mochi cuali. Yoje momatis pampa ticate Dios ilacames, tiyul-ticate quinami yihual quinequi pa tiyulisí, pampa timomajtilo ilaixpan Dios ca lasojlalisli.

*Quijtúa quinami in corintotecos mopalaje pa inminyolo*

<sup>2</sup> ¡Ximotolinican pa anquimatis in hual ticnequilo tiqijjtulo jan quinami antechiximati! Amo tijcayahuaje amaqui, amo tiqijlaculije amaqui ilaneltoocalisli, amo tijcajuacamanaje amaqui pa ticanalosquiaya len iyaxca.

<sup>3</sup> Amo annimitzilijtica inon quinami nicataya annimitzmotexpahuilijtataya, pampa amo quipía míac quiman annimitztilic quinami antimitzlasojlalo míac. Niman míac tiyulilosquiaya ca amhuanten huan timiquilosquiaya ca amhuanten sinda Dios quinequiaya. <sup>4</sup> Niqijjtúa niman chichahuac pa noyolo pampa amhuanten anyulis anquichijtica in cuali hual monequi pa anquichías. Nilajtúa hué anmonahuac amhuanten. Nicpía mosehuilisli hué pa noyolo pan anmopampa, niunca lalacahualtili. Mas que tipanulo míac hual amo cuali, ma yoje nimocahua ca niman míac paquilisli.

<sup>5</sup> Quema, tipanuloaya míac hual amo cuali, pampa quiman tiajsije pin lalticpan Macedonia, amo huil timosehuiloaya pa tocuerpos nindeno. Techtojalocaya pa tejchihuililosquiaya tetzcuinuc mochi cajcapa timo-itililoaya. Lacames hual amo quineltocalo technamiquije totenco pa tejchi-huilisli mochi amo cuali. Huan laijtic toyolo mochi tonali timomajtiloaya.

<sup>6</sup> Ma yoje, Dios quinlacahualtía yehuanten hual amo quipialo chichahualisli pa inminyolo, huan techlacahualtic pan ipampa Tito pan tonali hual ajsic. <sup>7</sup> Huan amo ticataloaya lalacahualtili san pampa yihual hualac. Noje timolacahualtije pan ipampa in lacahualtilisli calica amhuanten anquilacahualtic. Quema, timolacahualtije pampa yihual techilic quinami anquinequi míac antechitas, huan quinami anmitzcocúa anmoyolo pampa nechcococ noyolo pampa anpanujtica umpa in hual amo cuali. Huan timolacahualtije pampa techilic quinami anquinequi annechnapatía huan quinami anquichijtica quinami annimitzilía. Pampa inon nicataya ca niman míac paquilisli.

<sup>8</sup> Annimitzilía leca. Sinda annimijchihuilic pa anmitzcocuhuaya anmoyolo pan ipampa noamal, ma yoje amo nechcocúa noyolo axan, mas que quiman annimitztilanilic in amal, quema, nechcocuhuaya. Nechcocuhuaya pampa nicmatiaya quinami in amal quicocoltisquiaya anmoyolo, mas qee anmitzicnotiaja jan pa je tipichin san.

<sup>9</sup> Ma yoje, quinami unca axan, niunca ca paquilisli. Amo niunca ca paquilisli pampa anmitzcococ anmoyolo. Niunca ca paquilisli pampa anmitzcocoltic anmoyolo in amal huan pampín anquipalac anmoyolo pa anlajtusquiaya pa anmoyolo quinami Dios lajtúa. Inon cataya pampa anquipiaya se icnotilisli hual Dios anmitzmacac, huan yoje amo anquipoluc nindeno pan topampa. <sup>10</sup> Sinda Dios anmitzicnotiltía, yoje anmitzpalaltilia anmoyolo pa anlajtus pa anmoyolo quinami yihual. Huan inon anmitzquixtía pin ipolehuilisli laijlaculisli. Huan amo anicnotis pampa panujtica in amo cuali capa amhuanten. Sinda amhuanten anicnotia yoje quinami quincocúa inminyolo yehuanten pa in lalticpan hual cate laijlaculi, cuaquín in icnotilisli amo anmitzpalehuía. San anmitzmacahuiltía pa anmiquis. <sup>11</sup> Anquimati inon, pampa xiquitacan quinami anmitzpalehuic in icnotilisli hual Dios anmitztilanilic. Axan anuncia lacames hual niman anquinequi anyuli quinami Dios quinequi. Huan xiquitacan quinami axan anquinequi niman míac pa anquinnextilía moxtin pampa yajmo anmotexpahuía ca nindeno. Xiquitacan quinami axan ancualantica pampa quichijtcate in amo cuali sequin



capa amhuanten hual noje cate Dios ilacames. Xiquitacan quinami axan anmomajtitica pampa in amo cuali panujtica capa amhuanten. Xiquitacan quinami axan anquinctica míac annechita oc sejsa huan anquinctica pa annimitzitas cuali. Xiquitacan quinami axan anquinejnequi pa mochi quisas cuali pa nehual huan pa Dios itequipanulisli. Xiquitacan quinami ca míac lanequilisli anlajlaniaya huan ancajuac pa moquixtis pa amhuanten in se hual quichíac in amo cuali.

Ca mochi hual moitaya ca in lachihualisli, anmonextilic neli quinami amo anmoijlacultía nindeno pampa inon. <sup>12</sup> Yoje, mas que annimitzijcuiluilic, amo cataya mochi pampa quichíac yihual in lachihualisli amo cuali. Huan amo cataya mochi pampa inon hual quipanuc yihual hual panuc in amo cuali hual quichihuilic. No, annimitzijcuiluilic pa yoje, quinami Dios anmitziztica, anajsis anquimatis amhuanten nojen quinami annechneltocas ca mochi anmoyolo. <sup>13</sup> Pampín ticate ca paquilisli pa toyolo. Timocahualo lalachualtili, timoitalo ca chichahualisli pa toyolo.

Huan noje, pampa yoje timolacahuajtije tehuanten, ticpialoaya míac paquilisli pampa cataya Tito ca niman míac paquilisli. Yihual cataya yoje, pampa quipíac mosehuilisli pa iyolo pan anmopampa anmoxtin. <sup>14</sup> Niclaquetzilizic lajtomes huejué pampa anquichihuaya yoje. Pampín, amo nicataya lapinahualtili. Ma yoje, jan quinami mochi hual antúmitzilije unca melahuac, jan vojque momatiaya melahuac in huejué lajtomes hual tiquijtije pampa anyuli pa in Tata. <sup>15</sup> Huan pampa inon, yihual Tito anmitzlasojla míac, pampa quijnamiquía quinami anquineltoac huan quinami anquimamiquic anmomajtitataya huan anyuyucatataya pan tonali hual ajsic ca amhuanten. <sup>16</sup> Nicpía paquilisli, pampa huil niqijtúa chichahuac ca mochi noyolo pampa amhuanten anquichías mochi cuali hual monequi pa anquichías.

## 8

### *Dios ilacames quimatilo quimaca len quipialo pa lapalehuisi*

<sup>1</sup> Nocnán, ticnequilo pa anquimatis oc sejsa quinami unca in cuali hual san Dios huil tejchihuilía. Inon monextilic capa yehuanten hual quineltoalo pin lalticpan Macedonia. <sup>2</sup> Panuje niman míac lacocoltilisli inminpampa yehuanten hual quincocolilo. Ma yoje quipialo niman míac paquilisli, huan mas que cate lacames hual san quipialo naditita, ma yoje quinechicujje niman míac pa quinmacasi yehuanten hual amo quipialo. <sup>3</sup> Huil annimitzilía neli, quimacaje quinami huil ca in hual quipiaje. Quema, neli quimacaje pa yehuanten mas que amo quipialoaya len pa quinmacas. Huan quimacaloaya amo pampa nehual niqinmilic pa quimacaje. Cataya pampa yehuanten san quinequiloaya. <sup>4</sup> Quema, techtemachijje ca mochi inminyolo pa tiquinchihuililosquiaya cuali pa tiquinmacahuiltilosquiaya pa quinmacasi inminlajco pa quimpalehuissqui Dios ilacames jan quinami quimpalejticate in oc sequin. <sup>5</sup> Huan amo quimacaloaya quinami tiquijtuloaya pa toyolo yahuiloaya quimacalo. Inon hual monotza niman míac, motemacajque yehuanten nojen ca in Tata, huan cuaquín motemacajque ca tehuanten quinami Dios quinequic. <sup>6</sup> Huan pampa quichihuaje yoje, tiquiyantije Tito pa quilamis quichías capa amhuanten itequipanulisli in cuali hual san Dios huil quinchihuilía lacames. Inon ilanechiculisli mochi in tomin hual quinequilo quimacalo Dios ilacames. Quinami pehuaje quinechicuje in tomin, tiquilije pa quichijtiahuilosquiaya. <sup>7</sup> Axan, quinami



anquichía niman cuali mochi hual anquichía, ximoiztiacan pa anquichías cuali in itequipanulisli in cuali hual Dios anmijchihuilía, pampa anquinel-toca in Tata niman cuali. Huan anquilamachiltía ilajtol Dios niman cuali, anquipía niman míac lajmatilisli. Huan anyuli anquichijtica Dios itequipan-ulisli niman cuali, huan antechlasojla niman cuali. Pampín, monequi pa anquichías in tequipanulisli quinami anquichía mochi niman cuali.

<sup>8</sup> Ma yoje, amo annimitzilijtica chichahuac pa anquichías quinami quichi-huaje yehuanten. San nicnequi pa anquitas quinami ca míac lanequilisli oc sequin quinpalehuilo Dios ilacames hual amo quipialo hual monequi pa quipiasí. Huan yoje amhuanten noje huil anquimatis sinda neli an-quinlasojlatica Dios ilacames quiman anquinmita jan quinami annoita amhuanten. <sup>9</sup> Yojque techlasojla toTata, pampa anquimati in cuali hual toTata Jesucristo tejchihuilía. Mas que quipiaya míac, ma yoje mochíac lacal hual amo quipiaya nindeno pa yoje anmijchihuilisquiaya cuali, pa yoje ammochiasquiaya amhuanten lacames hual quipialo míac pan ipampa quinami yihual mochíac se hual amo quipiaya nindeno.

<sup>10</sup> Axan, annimitzilía quinami niqijtúa pa noyolo ca in itequipanulisli in cuali hual Dios tejchihuilía: Unca cuali axcan pa amhuanten anlaquisas ca inon hual axan quipía se xil quiman anpehuac anquichíac. Huan amo san anpehuac anquichíac, noje anpehuac anquinequic anquichíac. <sup>11</sup> Axan xilaquisacan pa yoje quinami anmolalic chichahuac pa anquinequic an-quichíac, amhuanten jan yoje anquinequis míac pa anlaquisas anquichías quinami huil anquichías ca in hual anquipía. <sup>12</sup> Yoje yes cuali, pampa da unca lanequilisli, cuaquinon Dios quita cuali in hual quimaca se sinda quiquixtilía ilajquito in hual yihual quipía. Dios amo quijtúa pa se quimacas ilajquito inon hual amo quipía.

<sup>13</sup> Amo nicnequi pa oc sequin cayasi lamacahuali pa camo quimacas len, sinda pan ipampa inon amhuanten anyahui anquipía pa anquimacas míac sinda amo anquipía míac. <sup>14</sup> San nicnequi pa cayas jan yoje pa moxtin. Cuaquin ca in míac hual anquipía axan, cayas cuali pa anquinmacas anmolajquito yehuanten hual amo quipialo in hual monequi pa quipiasí. Huan yehuanten anmitzcuepilis pan ipampa quinami anmitzmacasi inmin-lajquito in míac hual quipialo míac hual monequi pa amhuanten anquipías. Huan yoje quisas jan yoje pa moxtin. <sup>15</sup> Quinami unca lajcuiluli pa ilajtol Dios, quijtúa: “Aqui quipejpenac míac amo quicahuilic míac. San quicahuilic hual monequiaya pa quipiasquiaya. Huan aqui quipejpenac nadita noje quicahuilic mochi hual monequiaya pa quipiasquiaya.”

### *Tito huan itocanjmes*

<sup>16</sup> Huan ma ticsehuican Dios pampa quilalic pa iyolo Tito pa quinequis pa huil quitas ca amhuanten in lanequilisli hué pa anquinchihuilis cuali yehuanten hual amo quipialo, jan yoje quinami in lanequilisli hual an-nimitzpíla pa noyolo. <sup>17</sup> Niqijtúa inon pampa yihual quipiaya paquilisli quiman tiquiyantije pa yahuisquiaya capa amhuanten. Huan amo in san. Noje yahui capa amhuanten pampa yihual niman míac quinequiaya yahui.

<sup>18</sup> Ca yihual Tito, tictilanticate pa quitocas in tocní hual quiximatilo niman cuali moxtin in laneltocanjmes cajcapa monechiculo pa quimolancuacuet-zilisli Dios. In tocní quiximatilo pampa quilamachiltía in lamachitilisli cuali. <sup>19</sup> Huan amo in san. Noje in laneltocanjmes cajcapa monechiculo quilajultije pa canas ojli ca tehuanten quiman ticchijtcate in itequipanulisli in cuali hual Dios quinchihuilía lacames. Ticchijtcate in tequipanulisli pa

yoje toTata quincacuis míac lajtomes huejué huan cuajcuali hual quilisi ilacames, huan pa yoje quinextis tolanequilisli calica tiquinpalehuisi Dios ilacames. <sup>20</sup> Yoje ticnequilo tictzacuililo aquí yes techmotexpahuilisquiaya inahuac quinami tiqinxiluilijiticate Dios ilacames hual amo quipialo len. <sup>21</sup> Unca pampa timotolinilo pa ticchihuasi quinami Dios quita cuali. Huan amo in san, noje ticchihuasi quinami lacames quitalo cuali.

<sup>22</sup> Huan ca yehuanten tictlanticate tocní hual sejpa huan oc sejpa míac ticchihuilije pa ticmatilosquiaya quinami quichihuaya mochi. Huan yoje tiqitaje pampa tequipanúa míac, yihual unca se lalal hual neli quinequi quitequipanuilía in Tata. Axan yihual quinequi niman míac pa quichías in tequipanulisli, pampa quijtúa chicahuac pa iyolo pampa amhuanten anquichías inon hual monequi pa anquichías. <sup>23</sup> Sinda se quinequi anmitzlanía quinami quichías Tito, annimitzilía yihual nolasojli huan titequipanulo ca yihual pa amhuanten. Huan pa anquimatis quinami lachihualo tocnían hual tiqintilanticate, yehuanten inminlanahuatinijmes in míac inminlanechiculisli laneltocanjimes hual cajcapa monechiculo quimolanacuacuetzilijiticate Dios pan ipampa itoca Cristo. Mochi in míac lanechiculisli quinextililo moxtin pin lalticpan Cristo ilaixpelalisli cualtichin huan ichicahualisli hual san yihual quipía. <sup>24</sup> Pampín xicnechicucan in tomin pa yehuanten hual amo quipialo, huan yoje anquinextilis inminlaixpan moxtin laneltocanjimes quinami anquinlasojla Dios ilacames, huan quinami unca melahuac quinami tiquinlaquetzililo hué ca oc sequin lacames quinami anquitequipanuilía in Tata.

## 9

### *In tomin hual quinechicujque pa in laneltocanjimes hual amo quipialoaya*

<sup>1</sup> Axan amo nadita monequi pa annimitzijcuilulis inahuac inon hual anquinctica anquinmaca Dios ilacames. <sup>2</sup> Nicmati quinami míac anquinctica. Nilaquetza hué inminlaixpan yehuanten pa Macedonia quinami amhuanten anquichijtica. Niquinmilía quinami amhuanten pin lalticpan Acaya anlaquisac ca in lanechiculisli axan quipía se xihuil. Huan pampa quimatilo quinami anquinequi míac pa anquichías inon, yoje in míac ca yehuanten noje canaje lanequilisli pan ipampa anmolanequilisli. <sup>3</sup> Ma yoje, niqintilantica tocnían pa camo cayas jan lapic (de in balde) quinami tilajtuje hué inahuac quinami amhuanten axan anquipía lanechiculi in tomin. Pampa niqinmilic quinami ancayasquiaya ca in lanechiculisli lachihuali, niqintilantica pa yoje neli ancayas ca in tomin lanechiculi. <sup>4</sup> Niquintilantica amo san gá in sinda sequin macedontecos yasi ca nehual, huan quiman ajsisi umpa huan quitasi pampa amo anunca lachijchihuali pampa ayamo anquinechicuc in tomin, yoje tipinahuasi pampa tiqijtu-loaya pa toyolo pampa neli anyesquiaya lachijchihuali. Huan amhuanten noje neli anpinahuaya sinda ayamo ancataya lachijchihuali. <sup>5</sup> Pampín, niqijtuc pampa monequi pa niqinyantis tocnían pa yasi capa amhuanten huan pa nehual ayamo nías, pa yoje yehuanten laicanasi quilaquisaltisi mochi hual moita ca inon hual anquijtuc neli pampa anyahuiaya anquimaca, pa yoje cayas lachijchihuali. Ma yoje, amo ticnequilo pa yes quinami len antimitzquijquixtilijiticate quinami se ilapixcalisli tomin. San ticnequilo pa yes quinami len hual anquinequi anquimaca.

<sup>6</sup> Inon niqijtutica: Aquí latoca jan nadita yahui lapixca jan nadita. Huan aquí latoca míac yahui lapixca míac. Jan yoje aquí quimaca nadita quipías

san nadita in cuali hual Dios quinchihuilía lacames. <sup>7</sup> Monequi pa mochi sejse quichías quinami quijtuc pa iyolo pa quichías. Ma camo quimaca quinami se hual amo quinequisquiaya, ma camo quimaca quinami quichihualticitate, pampa Dios quilasoja se hual quimacatía len ca paquilisli huan quixtoca quimaca. <sup>8</sup> Huan Dios huil anmitzmaca míac pan ipampa mochi in cuali hual san yihual huil quinchihuilía lacames, pa yoje anquipixtías mochi hual quinequi anmitzmaca. Huan amhuanten noje huil anquimacas míac pa huil anquichías mochi tequipanulisli cuali. <sup>9</sup> Jan yoje unca lajcuiluli Dios ilajtol:

Quimaca cajcapa yesi yehuanten hual amo quipialo, quinami se hual quixintía latocli.

In cuali hual quichía huejcahuas huan amo quiman lamis.

<sup>10</sup> Dios hual cana latocli pa quimacas se hual latoca huan quimaca pan pa lacualisli, yoje yihual anmitzmiactilis anmochicahualisli pa anquinchihuilis cuali oc sequin. <sup>11</sup> Quema, Dios anmitzmacas míac pan ipampa mochi in cuali hual huil anmijchihuilía. Huan yoje huil anquinmacas míac yehuanten hual amo quipialo. Huan pan tonali hual canaló inon hual tehuanten tiqinhuiquilisli yehuanten, cuaquín laquisas ca yehuanten quisejtcate Dios. <sup>12</sup> Quema, pampa sinda tictequipanulisli Dios tiqinhuiquilijtcate in tomin, amo san ticmacaticate Dios íxolomes len monequi pa quípasi. Noje inon hual tiqinchihuililo quisas ca yehuanten quisejtcate Dios míac. <sup>13</sup> Quiman anquichía in tequipanulisli yoje anquinpalejtica Dios íxolomes. Yoje inon quinextilis quinami anquilía Dios lajtomes huejué huan cuajcuali pa anmoyolo pampa anquineltocha in hual quijtúa in lamachtilisli cuali hual anquilamachiltía. Huan anquilis lajtomes huejué huan cuajcuali pa anmoyolo pampa anquimaca míac pa yulisi cuali yehuanten huan moxtin oc sequin. <sup>14</sup> Pampa inon, yehuanten quinequisli míac pa anmitzitasí pa anmitziximatisi. Huan quilajlanisi Dios pa amhuanten, pampa Dios anmijchihuilic niman míac ilachihualisli cuali pa anmoyolo. <sup>15</sup> ¡Ma ticsehuican Dios pampa yihual tejchihuilía cuali yoje míac! ¡Amo huil tiqinmijnamiquilo lajtomes pa tiquijsusi quinami unca hué in cuali hual tejchihuilía!

## 10

*Pablo quijsucilúa quinami yihual quipta lahuelilitisli hual unca iyaxca se ilanahuatini Dios*

<sup>1</sup> Nehual, Pablo, annimitzyantía inon, quinami Cristo anmitzyantisquiaya, ca lajtomes amo la'ajuali huan amo chijchicahuac. Xicmatican len quinequi quijtúa in hual nía annimitzillía. Quijtulo sequin pampa nehual nimomajtía quiman annimitzixnamiquía, noixco ca annoixco. Ma yoje, quiman amo níunca ca amhuanten, cuaquín, quijtulo, annimitzlaquetzillía chicahuac, amo nimomajtítica. <sup>2</sup> Axan annimitztequijtica inon. Quiman yes nihualas ca amhuanten amo xijchihuilican pa nicpías pa nimonextis nicualantica ca sequin hual nicpías pa niqinmixcomacas. Quijtulo pampa ticate lacames hual lachihualo yoje quinami lachihualo yehuanten pin lalticpan hual cate laijlaculi. <sup>3</sup> Inon amo unca neli, pampa mas que tiyulilo pin lalticpan, ma yoje amo timoanalo quinami guaches pan se moanalisi. <sup>4</sup> Innojen calica timoanalo amo cate in teposlimes hual quinmulalo in guaches. Innojen calica timoanalo quipialo ichicahualisli Dios pa quixitinisi mochi hual mochía chicahuac pa quisulahuas Dios ilajtol. <sup>5</sup> Yoje, ticsulahualo quinami lajtulo

pa inminyolo lacames quinami yehuanten. Mochihualo hué pa quimot-expahuilisi Dios huan pa molalisi pa lajtusi quinami icocolinjmes pa yoje motzacuilisi pa camo quiximatisi Dios. Mochi in hual quijtulo, inon ticsulahalalo pan ipampa Cristo. <sup>6</sup> Huan ticate lachijchihuali pa ticmacasi tixuxli pa mochi inminlajlacuilisi yehuanten hual ayamo quinequilo laneltocalo. Huan inon ticchihuasi quiman yes amhuanten anmonextilis quinami anquineltoaca cuali mochi ilajtol Dios.

<sup>7</sup> Amhuanten anquita huan anquijnamiquía mochi jan quinami nesi se pa quiahuac. Sinda se quijtúa chichahuac pa iyolo pampa yihual se ca Cristo ilacames, ma moijnamiquilti inon: Jan quinami yihual unca iyaxca Cristo, jan yoje ticate tehuanten. <sup>8</sup> Techmacac in Tata tolahuellitilisi pa antimijchihuilisi cuali, amo pa antimitzijlacusi. Pampa inon, amo nechpinahuáltia sinda nilajtúa nadita hué inahuac tolahuellitilisi. <sup>9</sup> Amo nienesquiaya quinami annimitzmajtisquiaya ca noamames. <sup>10</sup> Ma yoje, quijtulo yehuanten: “Pablo lajtúa ca chichualisli. In lajtomes hual yihual quijcuilíaca cate ej’etic pa quichías se huan unca chichahuac. Ma yoje, quiman unca ca tehuanten, cuaquín momajtía, huan in hual yihual quijtúa huil ticxijxiculo.” Yoje quijtulo. <sup>11</sup> Axan, nehual niquijtúa, lacames hual quijtulo yoje, ma quimatican len quinequi quijtúa inon. Inon hual tiquijtulo ca toamames sinda amo ticate capa amhuanten, jan yoje ticchihualo sinda ticayasi capa amhuanten.

<sup>12</sup> Neli timomajtilo tiquijtulo pa toyolo pampa ticate jan yoje quinami oc sequin hual momatitilo. Amo tictemulo pa tiquinmitalo oc sequin pa ticmatisi sinda tiajsilo ticayalo quinami yehuanten. Yehuanten hual molamachihuililo ca yehuanten inminlamachihualoni amo quimatilo quijnamiquilo. Noje amo quimatilo quijnamiquilo sinda moitalo pa quimatisi sinda cate jan quinami oc sequin. <sup>13</sup> Tehuanten amo tiquijtusi inahuac ticate hué tehuanten. San tiquijtusi inon hual techmonotzilía. Tilajtusi hué san ipampa inon hual Dios techlalilic. Unca tolajquito itequipanulisli. Huan tilajtusi hué ipampa inon capa techlalic pa tictequipanulisli. Huan techlalilic pa tiajsisi pa tictequipanulisli capa amhuanten. <sup>14</sup> San tilaquetzalo hué inahuac totequipanulisli capa amhuanten. Tilaquetzalo ca in laquetzalisi hual unca toyaxca, pampa quema, tiajsije capa amhuanten pa antimitzilisi Cristo ilamachiltilisi cuali. Sinda amo tiajsiloaya capa amhuanten pa ticpehualtisi in lamachiltilisi cuali, cuaquín amo cataya toyaxca pa tilaquetzasi hué inahuac totequipanulisli. <sup>15</sup> Huan san tilaquetzalo hué inahuac inon hual Dios techlalilic. Nicnequi niquijtúa, amo tilaquetzalo hué tonahuac tehuanten quinami cataloaya tehuanten hual ticchihuaje inon hual quichihuae oc sequin lacames. Inon hual, quema, ticchixticate pa panus neli capa amhuanten unca pa mochías niman hué in tequipanulisli hual huil ticchihuasi capa amhuanten. Noje ticchixticate pa huil tiajsisi huejca ca in lamachiltilisi cuali huan amo pa titequipanusi san capa anchantis. Tiquijtulo neli pa toyolo pampa yahui caya yoje pampa anquilalis anmolaneltocalisli ca in Tata oc se nadita huan oc se nadita mojmosta. <sup>16</sup> Yoje, huil tiquinmachiltisi Dios ilajtol pin lalimes hual mocahualo ca yoje capa unca anmolali. Ma yoje, ma ye san ca capic Dios techlalilic tehuanten pa tictequipanulisli. Cuaquín amo tilajtusi hué tonahuac tehuanten quinami cataloaya tehuanten hual ticchihuaje tequipanulisli hual quichíac oc se tocní capa Dios quilalilic pa quitequipanulisli.

<sup>17</sup> Sinda se quinequi laquetza hué pampa inon hual san yihual quichíac, ma camo quichía. ¡Ma laquetza hué quijtutica quinami quichíac cuali in Tata!

<sup>18</sup> Inon tiquijtulo, pampa Dios amo quita cuali in se hual lajtúa hué pampa

quichíac len yihual ihuían. Sinda yihual in Tata lajtúa hué pampa quichía se inon, yoje momatis pampa quita cuali.

## 11

### *In lanahuatinijmes hual islacatilo*

<sup>1</sup> Nicnequisquiaya pa anquicaquis nadita laquetzalisli hual nesis quinami nilajtutica quinami se hual amo quimati len quijjtutica. Quema, xijcaquican in laquetzalisli amo ansiajtica huan amo ancualantica pampa nía annimitzilía inon. Neli annechpilía lanequilisli pa annechcaquis. <sup>2</sup> Nichahuatía pa amhuanten, Dios nejchihuilic pa nilajnamiquis yoje pa noyolo, pampa annimitzanac pa anyes quinami sihual yancuic hual monamicítia ca Cristo. Unca quinami sihual yancuic huan chipahuac hual yes iyaxca ilahuical, in se san hual iyaxca in se ilahuical. <sup>3</sup> Ma yoje, san quinami in cuhual quicuajcuamanac Eva ca islacatilisli pa camo quineltocas Dios, nimomajtitica amhuanten noje anmijcuanis pan iojli Cristo pampa cuajnesi anlajtúa yoje pa anmoyolo. Huan yoje yajmo anquilasojlas Cristo quinami monequi quilasojla se sihual yancuic ilahuical ca se laijnamiquilisli chipahuac. <sup>4</sup> Nicnequi pa anquicaquis inon hual nehual annimitzilis. Nicnequi pa anquicaquis pampa amhuanten amo anhuejcahua pa anquimacahuiltis pa anmitzmaxtis se hual huala capa amhuanten pa anmitzlamachiltía pampa unca oc se Jesús hual quipía oc se lamaxtilisli. Yihual amo quinami in Jesús hual antimitzlamachiltije. Amo anhuejcahua pa anquineltocas oc se espíritu hual amo in Espíritu Santo hual anpehuac anquineltocac. Huan amo anhuejcahua pa anquimacahuiltis oc se pa anmitzyantis pa anquineltocas se lamachiltilisli hual amo unca in lamachiltilisli cuali. <sup>5</sup> Amo unca cuali pa anquimacahuiltis pa anmitzyantis yoje yehuanten. Niquijtúa nehual amo niunca se hual monequi pa niquitas oc se hual nechpalehuis pa niajsis nicayas jan yoje cuajcualtichin quinami in lanahuatinijmes hual islacatilo. Quijtulo pampa yehuanten lacames niman huejué. <sup>6</sup> Mas que cuajnesi amo nilanotza cuali inminlaixpan lacames, ma yoje nicmati cuali len niqijjtúa. Ca mochi quinami huil, tehuanten antimitzmachiltije inon ca lajtol hual moxtin quimatiloaya len quinequiaya quijtu. Huan antimitznextilije len quinequi Dios ca mochi hual ticchihuaaje.

<sup>7</sup> Nimochíac tipichin pampa nitequipanuc pa nimolacualtic, pa yojque amhuanten huil anmochiasquiaya huejué anmochijtataya ixolomes Dios. ¿Anquijtúa cataya laijlaculisli pa nehual pampa annimitzmachiltic ilamachiltilisli cuali Dios huan amo annimitzljajlanic laxlahuilisli nindeno pa inon? <sup>8</sup> Xiquitacan, cataya quinami nicanilic tomin oc sequin inminlanechiculisli laneltocanijmes quiman nechmacaje inmintomin pa nimolacualtic pa yojque annimijchihuilis Dios itequipanulisli capa amhuanten. <sup>9</sup> Huan innojen tonalijmes nicatani ca amhuanten huan monequini pa nicpiasquiaya len, amo nicmacac tequil amaqui ca amhuanten pa nechpalehuis, pampa tocnían pa Macedonia hual hualaje ca nehual nechhualiquilic mochi in hual monequini pa nicpiasquiaya. Huan yojque nimotzacuilic huan nimotzacuilis mochi quinami huil pa camo annimitzljajlanic etialisli. <sup>10</sup> Neli niqijjtutica inon ilaixpan Cristo hual unca lajtic nehual pa nechlaquetzaltis melahuac. Inon hual nilaqueztica hué nonahuac nehual amo yes latzacuali pa camo mocaquis pin calimes hual cate pa Acaya. <sup>11</sup> Huan ¿leca niqijjtúa inon? ¿Unca pampa amo annimitzlasojla? ¿Dios quimati annimitzlasojla!

<sup>12</sup> Inon hual nicchijtica, nía nicchijtia pa niquintzacuilis yehuanten hual quitemulo quinami huil laquetzasi hué inahuac quinami tequipanulo. Quijtulo pampa tequipanulo san quinami tehuanten titequipanulo. <sup>13</sup> Lacames quinami yehuanten cate lanahuatinijmes hual islacatilo, cate tequipanujquimes hual lacuajcuamanalo, mochijtcate quinami ilanahuatinijmes Cristo, huan neli amo cate. <sup>14</sup> Huan ¿leca timocahualo timoiztcate, amo ticmztcate len tiqijjtulo inahuac inon? Yihual Satanás mochía quinami se ilanahuatini in cielo hual quipía Dios ilahuilislí. Quema, mochía quinami se hual quichía in hual unca cuali. <sup>15</sup> Yojque, amo timolapolulosquiaya sinda tiquitalo Satanás itequipanujquimes mochijtcate quinami lacames hual quimaxtilo islacatijtcate quinami monequi pa yulis se pa quipaquiltis Dios. In lanahuatinijmes lamisi quinami quinmahuilúa pampa quimaxtilo in amo cuali.

### *Quinami Pablo panuc lacocoltilisli*

<sup>16</sup> Annimitzilia oc sejpga, ma camo quiytu amaqui pampa nehual amo nicmati nindeno. Sinda quema anquijjtúa yoje, xichitacan quinami nicataya se hual amo quimati nindeno, pa yojque nehual noje nilaquetzas nadita hué nonahuac nehual. <sup>17</sup> In hual niqijjtutica, amo niqijjtutica quinami cataya ilajtol in Tata. San niqijjtutica quinami nicataya se hual amo quimati nindeno huan ma yoje amo pinahua pa lajtus quinami unca hué yihual ihuían. <sup>18</sup> Míac lacames quijtulo quinami yehuanten cate hué, quinami cate huejueyenten pan ipampa len huil canaló nican pan lalticpan. Pampín niqijjtus quinami nehual niunca hué, quinami se hual amo quimati nindeno, pampa niyulic nipanujtica míac calica huil nilajtúa quinami nehual nicuali. <sup>19</sup> Niqijjtúa yoje, pampa amo anquintzacuilía yehuanten hual amo quimatilo nindeno pa camo anmitzmxtisi, pampa anquijjtúa yehuanten quimatilo míac. Pampa inon annechmacahuiltis sinda nehual nilaquetza quinami se hual amo quimati nindeno. <sup>20</sup> Quema, pampa anquimacahuiltía sinda se lalac anmitztequipanultis chichahuac amo anmitzlxalajtica, o anmitzanilía len o anmitzajcayahua o mochía hué capa amhuanten o anmitzhuejuecaltía huan anmitztecua pa anmoixco. <sup>21</sup> Cuajnesi nicpía pa niqijjtus: “¡Nipinahua pampa timomajtiloaya pa antimijchihuililosquiaya quinami inon!”

Ma yoje, sinda aquí yes amo momajtía pa quiytus len inahuac quinami yihual unca hué, nehual noje amo nía nimomajtía pa nilaquetzas quinami nehual niunca hué yoje quinami yihual. Xiquijnamiquican pampa nehual nilajjtutica quinami se hual amo quimati len quijtutica. <sup>22</sup> Quijtulo pampa cate hebreos hual quimatilo lajtulo ca hebreo. Nehual noje nihebreo huan nilajtúa ca hebreo. Quijtulo pampa cate israelitos. Nehual noje, ni'israelito. Quijtulo pampa cate imiahuimes Abrahám. Nehual noje niunca. <sup>23</sup> Quijtulo pampa cate Cristo itequipanujquimes. Huan nel niqijjtúa niunca se itequipanujquil niman hué quinami yehuanten amo quiman cataloaya. Ma yoje xiquijnamiquican, nilajjtutica quinami se hual unca pa quiahuac itzontecon. Nitequipanuc niman míac, amo yoje míac tequipanuje yehuanten. Nicataya latzacuali calijtic niman míac huan yehuanten amo quiman ajsije cayaje latzacuali yoje míac. Amo nicmati quichi tonalijmes nicataya lahuitequilí huan míac tonalijmes niahuiaya nimiquí. <sup>24</sup> Ca macuili lahuitequilisli nechhuitequije in judíos ca mecal hueyote innojen treinta y nueve latecualisli. <sup>25</sup> Ca ye lahuitequilisli nechhuitequiloaya lacames ca cuahuimes. Se tonali nechlxalijque tixcalazos. Xitiniye ye barcos capa

niahuiaya pan al huejcalan. Se semilhuil huan se layúa nicataya pin al huejcalan ca itenco huejca. Nilanilujtataya pan icuahumes in barco hual xitinic. <sup>26</sup> Míac nicanaya ojli capa nimoitaya quinami nimiquisquiaya. Cataloaya atencojmes huejué huan cataloaya laxtequinijmes. Nimoitaya ca in judíos nocnán huan ca yehuanten hual amo judíos hual quinequi-loaya nechmictilo. Nimoitaya míac quinami nimictinemisquiaya pa cajcaltilan huan pa cuajlan huan pan barcos huan ca lacames hual quijtuloaya yehuanten tocnán laneltocanijmes huan islacatiloaya. <sup>27</sup> Huan nicpiaya pa nitequipanuc niman chicahuac, amo nicpixtataya in hual monequiaya pa nicpías. Míac layuajmes amo huil nimocochiltiaya, oc sejsa huan oc sejsa nimayantinemiaya huan niamictinemiaya. Quema, míac tonalijmes amo nicpiaya len nijcuasquiaya, míac tonalijmes niqiztataya sehua huan amo nicpiaya tzotzomajli.

<sup>28</sup> Huan ca mochi innojen, nimoita ca ietialisli mochi inminlanechicujquimes in laneltocanijmes. Niquijnamiquía míac moxtin yehuanten pampa amo nicmati len quinpanujtica. <sup>29</sup> Mochi sejsa capa yehuanten hual panúa lacocoltisli o laijlaculisli, ca yihual nechcocúa noyolo quinami nechpanuaya nehual yoje. Huan mochi sejsa capa yehuanten sinda unca se hual quilaicanac pa quichías laijlaculisli, cuaquín nel nichichinahuiaya laijtic noyolo pampa nechcocuhuaya noyolo, nipinahuaya huan nicualaniaya. <sup>30</sup> Sinda monequi pa nilajtus hué, cuaquinon nilajtus hué pampa amo nicpía chichahualisli. <sup>31</sup> In Dios huan iTajtzin in Tata Jesús, yihual hual moxtin amo mochahuasi pa quilisi lajtomes huejué huan cuajcuali, yihual quimati amo nislacatijtica. <sup>32</sup> Pin caltilan hué itoca Damasco, in huelitini (gobernador) hual in hué Aretas quilalic nepa, yihual quinlalic guaches pa mochi in caltilan capa calaquilo huan quisalo pin caltilan. Quinlalic nepa pa nejtzacualosquiaya pa camo nicholusquiaya. Yoje huil nechquitzquilosquiaya. <sup>33</sup> Huan tocnán nechtemuhuije pa se chiquihuil hué pa se lapulisli pin cali (tepandi) cuajtic huan palahuac lachihuali ca tixcali hual quiyahualuaya in caltilan. Yoje nimoquixtic pin nopolehuilisli huan nicholuc.

## 12

*Dios quimaxtic Pablo míac pan ipampa len quinextilic pa quitas ihuán huan pa quicaquis ihuán*

<sup>1</sup> Nicpiaya pa nilajtus hué annimitzilijtica mochi innojen hual nechpanuje nehual, mas que amo nechpalehuiaya huan amo quimpalehuiaya oc sequin. Ma yoje, niajtías niquijjutica quinami in Tata nechlaltaltic míac pan ipampa quinami laxotocalisli, huan noje quinami míac nechlacaquiltic nehual nohuán san. Cate innojen hual amo huil ticmatilo pan ipampa tolahueltisli ihuán. <sup>2</sup> Nicmati in hual quipanuc se lalac, yihual se ca Cristo ilacames hual axan quipía catorce xixihuil, cataya la'ajcoquili huan ajsic capa unca se cielo (ilhuicac) hual unca pa pani in ome cielos. Amo nicmati sinda in lalac cataya pa laijtic icuerpo (inacayo) o pa quiahuac icuerpo. Dios quimati san. <sup>3</sup> Huan nicmati in lalac yec laquitzquili pa yes la'ajcoquili. Huan sinda cataya la'ajcoquili ca icuerpo o amo ca icuerpo, jan iyolo san, inon amo nicmati. <sup>4</sup> San cataya la'ajcoquili pa ilajco in cielo itoca paraiso huan nepa quicaquic lajtomes hual Dios amo quimacahuiltiaya se lalac pa quiqtusquiaya sinda huil quinmijtuaya in lajtomes. <sup>5</sup> Pampa inon hual quipanuc in se unca noyaxca pa nilajtus hué. Quema, nicataya in lalac huan nicmati unca melahuac in hual nijcaquic. Ma yoje, amo nicnequi nilajtúa



hué inahuac in hual nechpanuc. San nicnequi nilajtúa inminahuac innojen hual lanextilo pampa amo nicpía chicahualisli. <sup>6</sup> Huil nilajtusquiaya hué inahuac in hual nechpanuc, pampa sinda nicnequiaya nicchía, amo nícataya quinami se hual amo quimati len unca melahuac. Ma yoje, nimotzacuilis pa como nilaquetzas hué inahuac inon. Yoje amaqui quijtus laijtic yihual pampa nehual niunca hué mas que cuajnesi ninesi niman hué ca oc sequin o nechitalo hué oc sequin o quijtulo pa inminyolo pampa niunca hué quiman quicaquilo in hual niqijtúa.

<sup>7</sup> Dios nechnextilic niman míac quinami unca yihual ca oc sequin lanextilisli pa innojen. Ma yoje, pa como nimochihuasquiaya hué quiman niqijnamictica mochi in cuali hual nejchihuic, quimacahuiltic pa Satanás latilanis pa se ca iijyecames nechcocolitías quinami se huizli quitzopintica icuero se. Quema, in unca pa nejtzacuilis pa como nimochías hué. <sup>8</sup> Pan ye latemachilisli nictemachic in Tata pa yihual quijcuanisquiaya capa nehual in iijyecal Satanás. <sup>9</sup> Ma yoje, nechilic in Tata: “In cuali hual nimijchihuilia unca mochi hual monequi pa ticpías, san inon. Unca pampa nochicahualisli ajsis monextilis hué ca lacames quiman yehuanten amo quipialo chicahualisli.” Yoje nechilic. Cuaquinon, ca paquilisli hué, nicnequi míac pa nilaquetzas hué inahuac quinami yoje huan yoje amo nicpía chicahualisli. Nicchías inon, pa yojque ichicahualisli Cristo moitilis ca nehual. <sup>10</sup> Pampín, pa nesis hué Cristo, nicpía niman míac paquilisli quiman nimoita amo nicpíxtica chicahualisli huan quiman nechuejuecaltilo huan quiman nipanúa lacocoltilisli huan quiman nechtojtocalo pa nejchihuilisli amo cuali huan quiman nimoita capa amo huil niquisa pa como nīpanus lacocoltilisli. Niqijtúa inon pampa sinda niunca amo nicpíxtica nochicahualisli, cuaquinon monextía ca nehual Dios ichicahualisli.

*Pablo quita míac hual quichihualo laneltocanijmes pa Corinto hual quicocúa iyolo*

<sup>11</sup> Axan, nimochiác quinami se hual amo quimati len quijtutica. Amhuanten annejchihualtic inon. Monequiaya pa amhuanten anlajtusquiaya hué inahuac mochi hual nechpanuc nehual pa yoje amo nicpiaya pa nilajtus yojque. Ma yoje, amo anlajtuc hué inahuac in hual nechpanuc. Pampín annejchihualtic pa nilaquetzas yoje, pampa innojen lanahuatinijmes hual anquintoca moitalo huejué. Ma yoje, nehual amo nimoita tipichin inminahuac. Mas que amo nimonotza nindeno, amo niunca nadita tipichin huan yehuanten huejué. <sup>12</sup> Neli unca pampa capa amhuanten, Dios quinchíac pan nopampa innojen lanextilisli hual lanextililo quinami neli niunca se ilanahuatini ca in oc sequin. Niqinchihuaya innojen huan nīpanuaya mochi hual nejchihuic amo cuali hual ajsic ca nehual. Quema, niqinchihuaya innojen lanextilisli hual monextije pampa mochihualoaya ca Dios ichicahualisli. Cataloaya hual quinlachiáltije ca lamajtilisli lacames huan quinnextilic Dios ichicahualisli hué. <sup>13</sup> Pampín, amo niunca tipichin huan in oc sequin lanahuatinijmes niman huejué. ¿Anquijtúa pampa amhuanten ancanac jan nadita in cuali hual Dios tejchihuilia? Cate míac oc sequin ilanechicujquimes Dios ilacames cajcapa. ¿Anquijtúa pampa innojen canaje míac ilachihualisli cuali? Amo cataya yoje. O jan in san, ¿cuajnesi anquijtutica amo annimijchihuic mochi hual niqinchihuic mochi oc sequin inminlanechiculisli in laneltocanijmes quiman amo annimitzlalilic len etic pa annechlacualtis? ¡Xicupjpuhuacan in hual amo nicnequi annimijchihuic!



<sup>14</sup> Xiquitacan. Inon unca in ye lapaxaluilisli hual niunca lachijchihuali pa annimitzpaxaluilis. Huan amo annimitzmacahuiltilis pa annechlacualtis. Amo nictemujtica pa nicanas len unca anmoyaxca. Quema, nictemúa quinami annimitzanas amhuanten pa in Tata. Amo nicnequi nicana len unca anmoyaxca, pampa in xolomes amo quipialo pa quinmajcoquilisi len pa inmintajtzitzían. Cate inmintajtzitzían hual quipialo quinmajcoquilisi len pa inminxolomes. <sup>15</sup> Huan nehual quinami anmotajtzin nicayas ca míac paquilisli pa annimitztequipanuilis huan pa niclaxlahuis mochi, quema, mas que yajmo nechcahuilis tomin nindeno huan yajmo nechcahuilis nochicahualisli. Inon nicchiasquiaya pa yoje annimitzpaléhuis pa anquipías mochi in cuali hual Dios quipía pa anmoyolo. Huan sinda yojqe annimitzlasojlatía, cuaquín ¿amo yoje míac anyahui annechlasojla?

<sup>16</sup> Ma caya inon da amo annimitzlalilic in etialisli pa annechlacualtis. Ma yoje, quijtulo pampa nehual nicataya se hual niunca lachijchihuali pa nicchías len yes pa nicanas len nicnequiaya. Quijtulo pampa annimitzanilic len nicnequiaya ca lacaujcuamanalisli. <sup>17</sup> ¿Annimitzcuajcuamanac amhuanten pan ipampa se ca yehuanten hual nictilanic ca amhuanten? No, amo se ca yehuanten. <sup>18</sup> Niquiyantic Tito pa yas ca amhuanten huan nictilanic in oc se tocní pa yasi huan yihual. Axan, ¿yihual Tito anmitzcuajcuamanac? Amo quiman. Tilachihuaje Tito huan nehual ticpixtataloaya toyolo tehuanten jan yoje, se quinami in oc se.

<sup>19</sup> ¿Axan anquijutitica pa míac tonalijmes pampa timotolinticate pa tinesisi cuali anmolaixpan? No. San unca ilaixpan Dios tiquijtulo inon, quinami ticate se ca Cristo. Mochi hual antimitzililo unca pa antimijchicahualtisi pa momiactis anmolanellocalisli pa Cristo, amhuanten nocnían hual annimitzlasojla. <sup>20</sup> Monequi pa anyes lachicahuiltili, pampa nimomajtitica cuajnesi quiman niajsis capa amhuanten, amo annimitzitas quinami nicnequi pa ancayas. Huan amhuanten cuajnesi amo annechitas nehual quinami anquinequi. Nimomajtía pampa cuajnesi annimitzitas anmolaxilijtica lajtomes huan anchahuatijtica huan ancualantiquisa huan san anquijutitica pa anmoyolo quinami mochi seje huil cana len pa yihual ihuían. Huan cuajnesi annimitzitas anlaxijxicujtica huan anlatenejtica yoje lalatili huan anlajtutica hué inahuac quinami anmoita. Quema, cuajnesi annimitzitas anyultica amo ca melahualisli. Huan yoje ca nadita amo anquitas len monequi pa quichihuasi Dios ilacames. <sup>21</sup> Quema, nimomajtía pampa quiman nihualas ca amhuanten oc seja, cuajnesi noDios nechpinahualtis anmolaixpan. Cuajnesi nicpiás pa nimococus pa noyolo pampa míac capa amhuanten quichihuaje laijlaculisli huan amo mopatilije inminyolo pa lajtusi pa inminyolo quinami Dios. Quinchihuaje innojen hual Dios quinmita pucmic. Lacames canaje sihuames amo quinami quijtúa lajtol Dios. Huan amo mocahuaje pa quinequisi quichihuasi len hual amo cana cuali. Quema, nimomajtía da míac amo quipalaje inminyolo pampa quinchihuaje innojen.

## 13

### *Pablo quinmilía len yahui quichía quiman ajsi, cuaquín quinchicahua*

<sup>1</sup> Quiman niajsis ca amhuanten, yes ye paxaluilisli nihualac ca amhuanten. Len yes hual cayas latexpahuili pan se, monequis pa ome o ye quijtusi pampa neli quimatilo pampa in se quipía laijlaculisli. <sup>2</sup> Inon quinmilía yehuanten hual quichihuaje laijlaculisli: Quiman nihuala oc seja, amo nía nimotzacuilía pa camo niquinmacas ojli. Niquinmilic yehuanten huan moxtin in oc sequín, huan niquinmilía axan mas que ayamo niunca nepa.

Jan yoje niqinmilic quiman nicataya ca amhuanten in ome paxaluilisli hual annimitzpaxaluilic. <sup>3</sup> Yoje nicayas, pampa anquinequi anquimati quinami neli lajtúa Cristo pan nopampa. Yihual quinextilia miac chicahualisli quiman annimijchiuilijtica len. Huan monextia ichicahualisli hué noje capa amhuanten pa anmitzmacas ojli sinda anquichía len yes hual amo cuali. <sup>4</sup> In momati, pampa mas que cataya lapiluli Cristo pan in cuahuil nestataya quinami se hual amo quiapiaya chicahualisli pa moquixtis pin imiquilisli, ma yoje axan yuli pan ipampa ichicahualisli Dios. Huan unca jan yoje ca tehuanten. Amo ticpialo tochicahualisli toyaxca. Ticpialo ichicahualisli pampa ticate se ca yihual. Ma yoje, quiman antimijchiuilijticate quinami unca toyaxca pampa ticpialo lahuelilitlisli, tiyulisí ca yihual pan ipampa Dios ichicahualisli pa antimitzpalehuisi.

<sup>5</sup> Ximonextilican neli sejse ca anmoxtin pa anquimatis da anyultica quinami monequi pa yulisi yehuanten hual neli quilalilo inminlaneltocalisli ca Cristo. Mochi sejse ma quita pa yihual iyolo pa quimatis neli pampa unca se ca Dios ilacames. ¿Amo anquijnamiquía inon quinami Jesucristo yuli laijtic anmoxtin sejse? Ma yoje, sinda amo anquilalic anmolaneltocalisli ca Cristo, amo huil anlanextilis pampa unca laijtic pa anmoyolo. <sup>6</sup> Nicchixtica pa amhuanten anquitas pampa tehuanten antimitznextilic cuali quinami neli ticpialo Jesucristo laijtic toyolo tehuanten. <sup>7</sup> Huan ticlajlanilo Dios pa camo anquichías len amo cuali. Amo ticlajlanilo inon pa yoje lacames quimatisi pampa neli Cristo yuli laijtic pa tehuanten. Inon ticlajlanilo pa anyulis anquichijtica in hual unca cuali mas que lacames cuajnesi techitasi quinami tehuanten amo neli ticate ilanahuatinijmes Cristo. Huan cuajnesi techitasi quinami tehuanten amo tilanextilije cuali pampa ticpialo Cristo laijtic toyolo tehuanten. Amo monotza len sinda san nesis pampa tehuanten amo tilanextilije cuali pampa unca pa toyolo. Ma yoje, monotza miac pa amhuanten anquichías len quinequi Dios. <sup>8</sup> Inon niqijtúa pampa amo huil nicchía nindeno pa niqintzacuilis Dios ilacames sinda yulticate quinami quijtúa ilajtol melahuac. Amo huil nicchihuaya mas que cuajnesi nicnequisquiaya nicchía inon pa annimitzmachiltis quinami nicpía in ilahuelilitlisli se ilanahuatini Cristo. San huil nicchía inon sinda ilacames amo yulticate quinami quijtúa Dios ilajtol. <sup>9</sup> Pampa inon ticpialo paquilisli quiman amo ticpialo chicahualisli huan amhuanten anunca ca chicahualisli. Ticnequilo tiqijtulo, ticpialo paquilisli sinda amo ticpialo pa titequipanultisi tolahuelilitlisli pa antimitzajuasi chicahuac. Quema, ticpialo paquilisli quiman anquipia chicahualisli pa anyulis quinami Dios quinequi. Inon hual ticlajlanilo Dios unca pa anmochías niman cuali quinami yihual quinequi. <sup>10</sup> Pampa inon annimitzjzcuiluilijtica innojen lajtomes mas que amo niunca ca amhuanten, pa yoje pan in tonali hual nihualas, amo nicpías pa nicayas cualanquil ca amhuanten quiman nictequipanus in lahuelilitlisli hual nechmacac in Tata. In lahuelilitlisli unca pa annimitzpalehuis pa anquineltocas niman cuali. Amo nechmacac lahuelilitlisli pa annimitzquixtilis anmochicahualisli pa camo huil anyulis quinami yihual quinequi. <sup>11</sup> Axan, nechcahuilía san inon pa annimijchicahuas, nocnían. Ximotolinican pa anmonextilis quinami monequi pa yulisi ilacames Dios. Xiyén chicahuac pa anmoyolo quinami annimitzyantía, xilajnamiquican quinami se san ca oc sequin, huan xiyulican ca mosehuilisli pa mochi anmoyolo. Huan Dios hual lalasojla huan quinlalilis mosehuilisli pa lacames inmoyolo, yihual cayas ca amhuanten. <sup>12</sup> Ximopaltican se ca oc sequin ca in tenamiquilisli quinami jan Dios ilacames quichihualo. <sup>13</sup> Anmitzpialtilo moxtin tocnían nican hual quipialo inminlaneltocalisli lalalili ca Dios.

<sup>14</sup> Ma caya ca amhuanten in cuali hual san toTata Jesucristo huil tejchi-huilía huan ma caya ca amhuanten ilasojlalisli Dios. Huan ma caya ca amhuanten in Espíritu Santo hual techmachiltía pampa timoxtin ticate se san ca Dios. Unca pampa timoxtin ticpialo pa toyolo in Espíritu Santo. Yoje ma ye.

## In amal hual Pablo quinmijcuiluilic in laneltocanjmes pin lalticpan itocani Galacia

### *Pablo quinmijcuiluilía in laneltocanjmes pa Galacia*

<sup>1</sup> Nehual Pablo, nilanahuatini huan amo nechtilanije lacames. Noje amo cataloaya lacames hual nechlajtultije pa niyes lanahuatini. Cataloaya Jesucristo huan Dios toTajtzin nechlajtultije pa niyes lanahuatini. Quema, nechlajtultije Jesucristo hual miquic huan Dios toTajtzin hual quiyuliltic oc sejpa quiman miquic. <sup>2</sup> Nehual huan moxtin tocnán hual cate ca nehual, antimitzjcuiluilijtcate amhuanten in laneltocanjmes hual anmonechicúa pa mías caltilan hual cate pin lalticpan Galacia. <sup>3</sup> Ma Dios toTajtzin huan in Tata Jesucristo anmijchihuilican cuali huan ma caya inminmosehuilisi pa anmoyolo. <sup>4</sup> Quema, Jesucristo motemacac pa miquis pa vojque Dios techquixtilis tolaijlaculisli. Huan yoje techquixtía pin polehuilisi ca capic techuica in amo cuali hual axcan yulilo quichijtcate yehuanten pin lalticpan. In amo cuali pin lalticpan amo mocahua pa techijlacus. Techquixtía Cristo pa in polehuilisi pampa yoje quinequic toDios. Yihual noje unca toTajtzin hual amo mocahua pa yes toTajtzin, vojque ma ye. <sup>5</sup> Pampa inon, ma tiqijtucan pa Dios toTajtzin lajtomes huejué hual amo quiman lamis, vojque ma ye.

### *Amo unca oc se lajtol hual techmaxtía quinami Dios techquixtía pin polehuilisi*

<sup>6</sup> Nimolapolultía pampa vojque amo ca mías tonaljmes anquicajtica ilaneltocalisli Dios hual anmitznotzac pa ancanas iojli pan ipampa in cuali hual tejchihuilía Cristo. Quema, anquicajtica huan axcan anquinctica ancanas oc se ojli pa anquineltoacas oc se lamaxtilisli calica, quil, anmoquixtis pin polehuilisi. <sup>7</sup> Xiquitacan. Amo unca oc se lamaxtilisli calica huil anmoquixtis pin polehuilisi. Jan sequin lacames anmitzlapolulticcate. Anmitzilijtcate pampa inminlamaxtilisli unca melahuac. Quincticcate quijlaculo ilamaxtilisli Cristo ilamachiltisli cuali. <sup>8</sup> Ma yoje, sinda tehuanten tohuán o quema, se ilanahuatini in cielo antimitzmachiltilo oc se lamaxtilisli pa in lamachiltisli cuali, huan sinda in lamaxtilisi amo unca san ilamaxtilisi in lamachiltisli cuali hual tpehualtije antimitzlamachiltije, cuaquín ma Dios techpolehuilti ca mochi icualanilisli. <sup>9</sup> Quinami antimitzilije pa innojen tonaljmes hual tpehualoaya antimitznotzalo, nehual noje axcan niqijtúa oc sejpa: Sinda se anmitzlamachiltía oc se lamaxtilisli pa in lamachiltisli cuali pa anquineltoacas noje ca tolamaxtilisli hual anquicaquic tehuanten antimitzilijtataloaya, ma Dios quipolehuilti ca mochi icualanilisli.

<sup>10</sup> Axan, ¿leca annimitzilic inon? ¿Anquijtúa nicnectica pa nechitasi cuali lacames o pa nechitas cuali Dios? ¿Anquijtúa nictemujtica quinami huil niqinpaquiltis lacames? No, amo yoje, pampa sinda niqinpaquiltitiahuiaya lacames, huan sinda niqinmaxtitiahuiaya len yehuanten quinequilo pa niqinmaxtis, cuaquinon vojque yajmo nicitaya Cristo itequipanujquil, pampa amo niclamachiltiaya Cristo ilanextilisli.

*Yoje unca quinami Pablo mochihuac lanahuatini*

<sup>11</sup> Inon annimitzilía, nocnían, pampa nicnequi pa anquimatis inon. Amo cataloaya lacames hual nechilije in lamachiltisli cuali calica annimitzlamachiltic Cristo ilanextilisli. <sup>12</sup> Amo nijcaquic in lanextilisli pan inmimpampa lacames, yehuanten amo nechnextilije. Cataya pan ipampa Jesucristo ihuán nijcaquic, yihual nechnextilic.

<sup>13</sup> Cataya yoje quinami nechpanuc: Anquimatic quinami niyulini pa innojen tonaliymes hual nictequipanuilini Dios quinami quitequipanuillilo in judíos. Huan quinami yehuanten yulilo, nehual noje niyulini. Quema, huan niquintojtocani yehuanten hual quineltocaloaya Cristo monechicujtinemiloaya pa quitequipanuillosquiaya Dios. Niquintojtocani niman míac, huan oc sequin amo yoje míac quintojtoaloaya quinami nehual. Ca mochi nochichualisli niquintojtocani pa niqinchihuillisquiaya amo cuali. Nimotolinini pa niqintzacuilisquiaya pa yojque yajmo quineltocalosquiaya Cristo. <sup>14</sup> Huan nimonextilijtiahuiaya niman míac quinami in judíos quimolancuacuetzililo Dios. Amo monextilijtiahuiloaya yoje míac yehuanten nocnían in judíos hual moscaltije ca nehual. Nicnequini niman míac pa nicnapatis mochi in lajtol hual technextililo quinami ticmolancuacuetzililo Dios hual totajtzitzian techcahuilije, amo yoje míac quinequiniyme quichihualo in oc sequin judíos nocnían. Nehual nicnequini pa moxtin quineltocalosquiaya inminlajtol in judíos. <sup>15</sup> Ma yoje, Dios quilalic pa nictequinquilis yihual. Inon quilalic quiman ayamo nilacatic. Nechnotzac pan ipampa in cuali hual tejchihuilía pa nicchías itequipanulisli. Yoje, in tonali hual yihual quitac cuali, <sup>16</sup> nechnextilic iXolol pa neli nicmatis aqui yihual huan pa yojque niclamachiltis ilamachiltisli cuali Jesucristo capa moxtin in oc sequin nican pin lalticpan hual amo judíos. Huan quiman nicmatic pampa niahuiaya niquinlamachilti ilamachiltisli cuali ca yehuanten hual amo judíos, cuaquinon ca lacames amo nilaquetzac pa niquinmilisquiaya inon. <sup>17</sup> Huan amo nipanquisac pa Jerusalén pa nilaquetzas ca yehuanten hual yeje lanahuatinijmes pa innojen tonaliymes quiman nehual ayamo nimochihuaya lanahuatini. No, niccháac inon: Níac pa in lali Arabia huan cuaquin nimocuepac oc seppa pa in caltilan hué Damasco.

<sup>18</sup> Cuaquinon panuje ye xixihuimes, huan nipanquisac pa Jerusalén pa nicpaxaluilic Cefas. Nicataya ca yihual pa quince tonaliymes. <sup>19</sup> Amo niquitac oc se ca in lanahuatinijmes, jan Jacobo san, yihual icni in Tata Jesús. <sup>20</sup> Innojen lajtoyes hual annimitzijcuiluilijtica, xiquitacan, ilaixpan Dios annimitzilía, amo nislacatijtica.

<sup>21</sup> Cuaquinon níac pa in lalimes Siria huan Cilicia. <sup>22</sup> Yoje amo nechiximatije nehual yehuanten hual quineltocaje Cristo pin lalticpan Judea, yehuanten hual nepa pa míac caltilan monechiculo pa quimolancuacuetzilisi toTata. <sup>23</sup> Jan quimatije san pampa nehual axcan niclamachiltitine-miaya ilanextilisli in lamachiltisli cuali hual pa yina nicnequini nictzacuali pa yajmo mosemanasquiaya ca lacames. Quema, nehual hual pa yina niquintojtocani niqinchihuillijtataya tetzcuinuc pa yajmo quineltocasi axan niclamachiltitine-miaya. <sup>24</sup> Huan yehuanten in laneltocanijmes pa Judea quililoaya Dios lajtoyes huejué pampa yihual nejchihuilic inon.

## 2

### *In oc sequin lanahuatinijmes quinamiquilo Pablo quinami inmiciñ*

<sup>1</sup> Cuaquinon panuje catorce xixihuimes, huan nipanquisac oc seppa pa Jerusalén, huan Bernabé tipanquisaje. Noje ca tehuanten ticuicaje Tito. <sup>2</sup> Ca

ompic nipanquisac pampa nechnextilic toTata pampa yihual quinequiaya pa nías. Huan nilaquetzac ca yehuanten inminhuían hual moxtin quinmitaloaya quinami inminhuejueyenten in laneltocanijmes. Niquinlaquetzilic quinami niclamachilitataya in lamachiltisli cuali capa yehuanten hual amo judíos. Niquinlaquetzilic pa neli quimatisi len niclamachilitica. Nicnequiaya nicmati sinda cuajnesi yesquiaya jan lapic (de in balde) mochi in tequipanulisli hual nicchihuaya capa cataloaya yehuanten hual niquinlamachilitinemiaya. <sup>3</sup> Huan yehuanten in huejueyenten amo quitaje yoje notequipanulisli. Tito cataya nepa ca nehual, huan yihual se griego, amo judío. Ma yoje, amo quilije pa yihual quipías pa yes latequili pa icuilaxli quinami lanextilisli pa quinami quineltocaya. <sup>4</sup> Ma yoje, nepa cataloaya sequin hual techilije pampa yeje tocnían hual quineltocaloaya Cristo quinami tehuanten. Huan islacatiloaya. Calaquije capa timonechicuje, amo ticmatije aquinojen yehuanten, calaquije quinami lacoachahuanijmes capa tehuanten pa technapachilosquiaya. Quinequiloaya quimatilo sinda tiquineltocaloaya in judíos inminlajtomes hual quinnextililo quinami quimolancuacuetzililo Dios. In lajtomes amo ticpialo pa tiquinneltocasi, jan ticpialo pa ticneltocasi Cristo Jesús. Ma yoje, yehuanten technapachiloaya pa techneltocaltosquiaya quinami quinnextililo inminlajto quinami quimolancuacuetzililo Dios in judíos. Yoje tejchihualosquiaya quinami tequipanujquimes hual amo quilaxlahuilo. <sup>5</sup> Ma yoje, amo tiquinmacahuiltije pa se nadita pa yehuanten tejchihualtilosquiaya len techyantiloaya pa ticchihualosquiaya. Yojque amo mocahuas pa cayas ca amhuanten ilanextilisli melahuac in lamachiltisli cuali jan quinami antimitzlamachiltije.

<sup>6</sup> Ma yoje, ma annimitzili in hual quichihuaje yehuanten hual nesiloaya cate huejueyenten ca in laneltocanijmes. Huan mas que cataloaya huejueyenten, amo niquitaya inon quinami len hual monotza. Dios amo quita se quinami tehuanten tiquitalo in se. Huan yehuanten hual quinmitaloaya quinami huejueyenten ca in laneltocanijmes amo nechnahuatic pa nicnextisquiaya oc se lanextilisli pa in lanextilisli hual itequi nicnextiaya. <sup>7</sup> Amo nechilije nindeno quinami inon. Quitaje quinami Dios nechlajultic jan nehual san pa nilaicanas niclamachiltis in lamachiltisli cuali capa yehuanten hual amo judíos. Jan yoje cataya quinami Dios quilajultic Pedro pa laicanas quilamachiltis ilamachiltisli cuali Jesús ca in judíos. <sup>8</sup> Quitaloaya quinami Dios huil tequipanuaya laijtic capa Pedro pa yoje yes lanahuatini pa in judíos. Noje quitaloaya quinami huil tequipanuaya laijtic capa nehual pa nives lanahuatini pa yehuanten hual amo judíos.

<sup>9</sup> Huan yoje, quiman quimatije pampa Dios nejchihuilic ilachihualisli cuali pa nives lanahuatini, cuaquín Jacobo huan Cefas huan Juan, yehuanten hual moxtin quinmitaloaya quinami huejueyenten ca in laneltocanijmes pampa quinpalehuiloaya, yehuanten techmacaje inminmajmajuan cuali Bernabé huan nehual pa lanextilisli pampa cataloaya ca se laijnamiquilisli, pa yojque Bernabé huan nehual tiajtiasi tilamachiltisi capa yehuanten hual amo judíos. Huan yehuanten, Jacobo huan Cefas huan Juan yajtiahuilosquiaya lamachilito capa in judíos. <sup>10</sup> San techilije pa tiquijnamictiasi tiquinpalehuisi yehuanten hual amo quipialo míac calica yulisi, huan inon nimotolintiahuiaya pa nicchías.

### *Pablo cajua Pedro nepa Antioquía*

<sup>11</sup> Ma yoje, cataya se tonali hualac Cefas pa Antioquía capa ticataloaya Bernabé huan nehual ca in laneltocanijmes pa Antioquía. Huan niquixcomacac Cefas pampa yihual quichíac len hual amo cataya quinami tech-

nextilía Dios ilajtol. <sup>12</sup> Niquixcomacac pampa lacualoaya ca in laneltocaniymes hual amo judíos. Cuaquín hualaje sequin laneltocaniymes judíos hual chantije pa Jerusalén, yehuanten quintilaníc Jacobo. Ajsije yehuanten, pehuaya mocahua pa lacuas Cefas ca in laneltocaniymes hual amo judíos. Quema, moquixtiaya pa capa yehuanten pampa momajtiaya da cuajnesi cajualosquiaya in laneltocaniymes judíos hual Jacobo quintilaníc. <sup>13</sup> Huan yojque, in oc sequin laneltocaniymes judíos hual cataloaya nepa ca tehuanten, pehuaje lachihuaje quinami Cefas. Yoje, amo lachihualoaya quinami Dios technextilía pa ticchiuasi, mas que quimatiloaya pampa amo ticpialo pa ticneltocasi in lajtomes hual quinnextililo quinami in judíos quimolancuacuetzililo Dios. Huan quema, yihual Bernabé pehuac moquixtica capa in laneltocaniymes hual amo judíos. Lajtuaya ca ilanextilisi Dios pa iyolo huan ma yoje lachihuaya quinami in oc sequin laneltocaniymes judíos. <sup>14</sup> Huan nehual niqitac quinami amo quichijtaloaya quinami quijtúa ilanextilisi melahuac in lamachiltisli cuali. Pampín inminyampa moxtin, nicnotzac Cefas, niqulic: “Tehual tijudío. Ma yoje tiyuli quinami se hual amo judío, amo tiyuli quinami se judío. ¿Leca ticnequi tiqinchihualtía yehuanten hual amo judíos pa mochihuasi quinami judíos?”

*In judíos moquixtililo pin polehuilisi san pan ipampa inminlaneltocalisi quinami moxtin hual amo judíos*

<sup>15</sup> Tehuanten tilacatiye judíos, amo tilacatiye lacames laijlaculi quinami yehuanten hual amo judíos. <sup>16</sup> Ma yoje, tiajsije ticmatije pampa Dios amo quijtúa pampa se yajmo unca laijlaculi jan pampa in se yuli quichijtica quinami quijtúa in lajtol hual quinnextilía quinami quimolancuacuetzililo Dios in judíos. No, Dios quijtúa se yajmo unca laijlaculi pampa in se axan quilalic ilaneltocalisi ca Cristo Jesús. Huan tehuanten in laneltocaniymes judíos, ticneltocaje Cristo Jesús pa yojque Dios techitas quinami lacames hual yajmo ticate laijlaculi. Amo techita yojque pampa tiyulilo ticchijtcate quinami quijtúa in lajtol hual in judíos quichihualo. Unca yoje, pampa Dios quijtúa amo unca se hual yihual quita quinami yajmo unca laijlaculi jan pampa yuli quichijtica quinami quijtúa inminlajtol in judíos.

<sup>17</sup> Tiquitalo pampa tilacames laijlaculi. Pampín tictemulo pa Dios techitas lacames hual yajmo ticate laijlaculi quiman ticlalilo tolaneltocalisi ca Cristo. Cuaquín ¿huil tiquijtusi pampa Cristo tejchiuualtic laijlaculisli pampa quijtúa yajmo ticpialo pa ticneltocasi len quijtúa inminlajtol in judíos pa yoje Dios techitas cuali? ¡Ma como quiman tiqijtuacan len quinami inon!

<sup>18</sup> Yoje, sinda yajmo niclalis nolaneltocalisi ca inminlajtol in judíos pa nechquixtilis nolaijlaculisli, cuaquinon, yojque nijquixtiliaya inminlajtol in judíos ichicahualisli. Huan sinda nipehuaya niclali nolaneltocalisi ca inminlajtol oc seppa, cuaquinon yojque nicmacaya oc seppa in lajtol ichicahualisli huan yojque nimonextiaya quinami se hual quichía laijlaculisli.

<sup>19</sup> Niasic nicmatic yoje pan ipampa quinami inminlajtol in judíos amo quipía lahueliltisli pa nechquixtilis nolaijlaculisli. Huan pampa inon nimocahuac pa niclalisquiaya nolaneltocalisi ca inminlajtol in judíos. Axan unca quinami nipolehuic, yoje in lajtol yajmo huil nechlaijlacultía. Yoje nicchíac pa huil niyulis pa Dios pan ipampa Dios iyulilisi. <sup>20</sup> Quema, unca quinami ca Cristo nimiquic pin cuahuil capa yihual miqic. Huan unca quinami nehual yajmo niyultica, pampa unca yihual Cristo hual yultica laijtic capa nehual. Huan in yulilisi hual axcan nicpía pa nocuerpo unca Cristo iyulilisi,

pampa niyuli niclaliytica nolaneltocalisli ca Dios iXolol hual nechlasojlac huan motemacac pa miquis mas que in miqulisli nechahuiluc nehual. <sup>21</sup> Ca inon nolanextilisli amo niqijlacujtica yoje in cuali hual tejchiuilía Dios calica techquixtilía tolaijlaculisli. Sinda ticpialoaya pa ticchihualosquiaya quinami quijtúa inminlajtol in judíos pa yoje Dios techitas lacames hual amo ticate laijlaculi, cuaquín amo quiapiaya pa miquisquiaya Cristo, jan lapic (de in balde) miquic.

### 3

#### *Inminlajtol in judíos o in laneltocalisli lalilili ca Cristo*

<sup>1</sup> ¡Ah, amhuanten de Galacia! ¿Amo huil anlajnamiquía cuali? Unca quinami se laxuxani anmijchiuilic len pa yoje anmoquixtis pan iojli Cristo. Annitiznextilic quinami Cristo miquic pin cuahuil pa yojque yihual anmitzquixtis pin ipolehuilisli anmolaijlaculisli, huan cataya quinami anquitac lajcuiluli inminlaixpan anmoixtololojmes. <sup>2</sup> In san nicnequi nicmati, nicnequi pa amhuanten annechnextilis: ¿Anmitzmacac Dios in Espíritu Santo pampa anquichíac len quijtúa in lajtol hual quimaxtilo in judíos? O ¿anmitzmacac pampa anquicaquic Cristo ilamachiltilisli cuali huan anquilalic anmolaneltocalisli ca in? <sup>3</sup> ¿Amo anquipía nadita lajmatilisli? ¿Nía nicpía pa niqijtus pampa amo anlajnamiquía cuali? Xiquitacan. Anpehuac anyulic pan ipampa in Espíritu Santo in tonali hual anquilalic anmolaneltocalisli ca Cristo. Axcan ¿anquijtúa monequi pa anquichías len hual quijtúa in lajtol hual quimaxtilo in judíos pa anajsis anyes quinami Dios quinequi, huan inon pan ipampa in lajtol? ¿Anquijtúa axan in Espíritu Santo amo quipía lahueliltilisli pa anmitzpilis chipahuac anmoyolo pa yojque Dios anmitzitas cuali? <sup>4</sup> ¿Yec jan lapic (de in balde) in míac lacocoltilisli hual anpanuc? Nicchixtica da amo yec jan lapic. <sup>5</sup> Cataya Dios hual anmitzmacac ca mochi iyolo in Espíritu Santo, anmitztlalilijtica lajtíc capa anmoyolo. Huan yihual Dios anmitzhuelilic pa anquinchías míac hual quinextía ilahueliltilisli hué. Axan, ¿anquijtúa pampa Dios anmijchiuilic mochi inon pampa anquichíac len quijtúa in lajtol hual in judíos quimaxtilo? O ¿anmijchiuilic pampa anquilalic anmolaneltocalisli ca ilamachiltilisli cuali? Quema, cataya pampa anquilalic anmolaneltocalisli ca ilamachiltilisli cuali.

<sup>6</sup> Unca jan quinami Abraham quineltocac Dios huan pampín Dios quitac yihual se lalac hual amo yec laijlaculi. <sup>7</sup> Yojque, anquimati pampa jan yehuanten san hual quineltocalo in Tata, Dios quinmita quinami lacames hual amo cate laijlaculi, jan quinami Dios quítac Abraham. Yojque huil tiqijtulo pampa tehuanten imiahuimes Abraham pampa ticneltocalo in Tata quinami quineltocani Abraham. <sup>8</sup> Huan Dios ilajtol lajcuiluli niman pa yina techilía quinami Dios quilalic se tonali pa yihual quinmitas yehuanten hual amo judíos quinami lacames hual amo cate laijlaculi. Inon Dios quilic quiman ayamo yec lajcuiluli ilajtol, pampa timomaxtilo quinami quilic Abraham in lamachiltilisli cuali hual yahuíaya quichihuili, quilic: “Tehual, Abraham, tichneltocac nehual, pampín nimitzita quinami se hual amo unca laijlaculi, huan pan ipampa tehual molaneltocalisli, nía nicchía pa moxtin yehuanten pin lalticjan huil canasi in cuali hual niqinmacas.” Yoje Dios quilic Abraham. <sup>9</sup> Yoje, pampa quineltocalo Dios in Tata, quinami quichíac Abraham, pampín Dios quinchihuilía niman cuali.

<sup>10</sup> Ma yoje, cate yehuanten hual quijtulo Dios quinmitas amo quipixticate laijlaculisli pampa quilalije pa quichihualosquiaya len quijtúa in lajtol hual



quimaxtilo in judíos. Huan yehuanten yalo panulo lacocoltilisli pan ipampa Dios icualanilisli, pampa yoje unca lajcuiluli pa ilajtol Dios, quijtúa: “Dios quijtúa pampa elehuis aquí yes amo yultía quichijtica mochi hual unca lajcuiluli pin amal capa quiplá lajcuiluli in lajtol.” <sup>11</sup> Huan neli unca pampa aquí hual quineltoca in lajtol hual quimaxtilo in judíos, yihual Dios amo quita quinami se hual amo unca laijlaculi, pampa yojqe ilajtol Dios quijtúa: “Aquí hual Dios quita quinami se hual amo unca laijlaculi unca in se hual quilalía ilaneltocalisli ca in Tata, huan pampa inon yihual yulis.” <sup>12</sup> Huan ilajtol Dios hual quimaxtilo in judíos amo quijtúa pampa Dios techita quinami amo ticate laijlaculi sinda ticlalilo tolaneltocalisli ca in Tata. Pampa no, jan quijtúa inon: “Aquí hual quichía mochi hual quijtúa ilajtol Dios, yihual yulis pampa inon.”

<sup>13</sup> Cristo techmacahuac pa como techpiasquiaya quinami laipili ilajtol Dios hual quimaxtilo in judíos. In lajtol quijtúa pampa aquí yes amo quineltoca mochi in lajtol, yihual mocahua amo cuali huan miquis panujtica lacocoltilisli hual amo quiman lamis. Cristo miquic panujtataya lacocoltilisli miac. Yojqe techquixtic pin ipolehuilisli in amo cuali capa timocahualoaya tehuanten pan ipampa ilajtol Dios hual quimaxtilo in judíos. Cristo miquic pa yoje amo ticpialosquiaya pa timiquisi ej'elehuis pampa ticchihuaje laijlaculisli. Unca pampa Dios ilajtol lajcuiluli quijtúa: “Dios quijtuc pampa elehuis aquí yes miqi pilujtica pan se cuahuil.” <sup>14</sup> Huan Cristo yec lapiluli pan in cuahuil pa yojqe yehuanten hual amo judíos quiyasi in paquilisli hual noje quiplac Abraham. Huan yehuanten quiyasi san pan ipampa Jesucristo. Noje Cristo yec lapiluli pan in cuahuil pa yojqe Dios techlalilis laijtic toyolo in Espíritu Santo. Dios neli techilic yahuiaya quinlalili in Espíritu Santo yehuanten hual quilalilo inminlaneltocalisli ca in Tata Jesucristo.

### *Ilajtol Dios hual quimaxtilo in judíos amo unca quinami in hual Dios axan techilía*

<sup>15</sup> Nocnían, nía annimitzilía se lanextilisli. Unca quinami quichihualo se testamento o lajtulisli. Sinda moxtin panulo se lajtulisli ca se testamento, cuaquí amaqui huil quita quinami se amal hual amo monotza nindeno. Huan amaqui quilalilis oc se lajtol, pampa quichihuaje cuali ca lajcuilulisli huan temulol hual lacames quitaje quiman quichihuaje. <sup>16</sup> Huan Dios neli quilic Abraham pampa yahuiaya quinmaca innojen hual quilic. Huan noje quilic, quil: “Nía annimitzmaca tehual huan momiahuil innojen.” Dios amo quilic, quil: “Nía annimitzmaca tehual huan momiahuimes”, yoje quinami yeje miac. No, quinami yec se san imiahuil, quil quilic: “Huan nía nicmaca momiahuil”, quil quilic. Huan Abraham imiahuil unca Cristo. <sup>17</sup> Axcan, ma annimitzili len quinequi quijtúa inon: In lajtulisli Dios quilalic pan ipampa ilahuelilitisli. Huan quiman panuje cuatro cientos treinta xixihuimes, Dios quimacac in judíos in lajtol. Ma yoje, amaqui huil quixitinía in lajtulisli o testamento pa yajmo quipixtías lahuellilitisli. Amo huil quichihuiliaya pa como panus len Dios neli quilic Abraham. <sup>18</sup> Axan, sinda techmacaya Dios yulilisli niman cuali hual iyaxca, huan sinda techmacaya pampa ticneltocaloaya ilajtol Dios hual quimaxtilo in judíos, cuaquinon inon hual iyaxca yajmo tiahuiloaya ticpialo quinami yihual neli techilic pampa yahuiaya techmaca. Ma yoje, Dios neli quilic Abraham pampa yahuiaya quimaca in hual iyaxca Dios san pan ipampa in cuali hual tejchihuilia.

<sup>19</sup> Axan, ¿leca quimacac Dios ilajtol hual quimaxtilo in judíos? ¿Len monotza in lajtol? Dios quilalilic pa ilajtulisli pa yoje ticmatisi quinami

míac ticchihualo laijlaculisli, quinequi quijtúa, pampa amo ticneltocate Dios ilajtol. Quema, Dios quilalilic pa ilajtulisli in lajtol hual quimaxtilo in judíos pa cayas ca yehuanten pa mochi xixihuil pa quiman yahuiaya huala pan lalticpan imiahuil Abraham, nicnequi niquijtúa, pa quiman hualaya Cristo. Yihual Cristo in se hual Dios neli quilic pampa cataya iyaxca Cristo pa techueliltis pa ticpiasi inon hual iyaxca Dios. Yihual Dios quintilanic ilanahuatinijmes in cielo pa quihualicasi ilajtol pan lalticpan, huan totajtzitzián canaje pan ipampa Moisés. Yoje, Cristo unca quinami Moisés, pampa cataya lalalili lajco capa ome pa techpalehuis pa timochihuasi ca se lajtulisli. <sup>20</sup> Ma yoje, tiqitalo neli quinami ajsic ilajtulisli in lajtol capa totajtzitzián. Amo ajsic pan ipampa se san, ajsic pan inminpampa ilanahuatinijmes in cielo huan Moisés. Huan Dios, yihual se san huan yec yihual ihuían hual neli quilic Abraham pampa yahuiaya quimaca imiahuil Abraham inon hual iyaxca Dios.

*¿Len techmacac ilajtol Dios hual quimaxtilo in judíos?*

<sup>21</sup> Axcán, ¿anquijtúa ilajtol Dios hual quimaxtilo in judíos quiylacuc len Dios neli quilic Abraham pampa yahuiaya quimaca imiahuil? ¡Ma como quiman tiqijitucan yojque! Sinda Dios quimacaya se lajtol hual huil quinyuliltiaya lacames, cuaquinon neli pan ipampa in lajtol Dios techitaya quinami lacames hual amo ticate laijlaculi sinda ticneltocaloaya in lajtol. <sup>22</sup> Ticmatilo Dios ilajtol lajcuiluli quijtúa pampa moxtin yehuanten pin lalticpan cate laijlaculi. Amo quiman huil moquixtilo pin ichicahualisli inminlajlaculisli hual quinpiya quinami latzacuali pa se calijtic. Yoje, quiman quilalilo inminlaneltocalisli ca Jesucristo, cuaquinon yihual quinmacahua pa yajmo quinpiaya latzacuali inminlajlaculisli. Quinmacahua huan quinmaca inon hual iyaxca Dios. In unca hual Dios neli quinmilía yehuanten hual quineltocalo Cristo.

<sup>23</sup> Huan pa míac xixihuil quiman ayamo hual <sup>23</sup> Jesucristo pa huil ticlalilo tolaneltocalisli ca yihual, ilajtol Dios hual quimaxtilo in judíos cataya quinami se hual technapachiaya, techpiaya quinami ticayaje latzacuali. Quema, momatiaya yoje in lajtol ca tehuanten. Cuaquinon ajsic in tonali hual Dios technextilic quinami ticate laquixtili pin polehuilisli pampa ticlalilo tolaneltocalisli ca Jesucristo. <sup>24</sup> Yoje, in lajtol mochíac quinami se hual quinmiztía xolomes, quinlaneltocalitía inmintajtzin. Pampa inon innojen xolomes quichialo ca mochi inminyolo in tonali quiman yesi lamacahuali pa yajmo quinmiztías in se hual quinmiztía. Huan yoje ilajtol Dios hual quimaxtilo in judíos tejchihuilía tehuanten pa ticchias in tonali ca mochi toyolo quiman tiyesi lamacahuali pa yajmo tejtzacuas in lajtol. Quema, in lajtol technextilic quinami amo huil ticneltocalo tehuanten tohuán in lajtol. Technextilic quinami monequi pa techpalehuis Cristo, pa yoje Dios techitas quinami lacames hual amo cate laijlaculi pampa ticlalije tolaneltocalisli ca Cristo. <sup>25</sup> Yojque axan ticate lamacahuali pa yajmo huelitis capa tehuanten ilajtol Dios hual quimaxtilo in judíos. Unca quinami cate lamacahuali in xolomes pa yajmo huelitis capa yehuanten yihual hual quinmiztía. ¿Leca tiquijtulo inon? Unca pampa axan ajsic in tonali quiman huil ticlalilo tolaneltocalisli ca Cristo huan yajmo ca ilajtol Dios hual quimaxtilo in judíos.

<sup>26</sup> Axcán, unca Dios hual anmitziztía pampa anmoxtin anunca Dios ixolomes pampa anquilalic anmolaneltocalisli ca Cristo Jesús. <sup>27</sup> Inon unca pampa anmoxtin hual ancataya lacuayatequili anlanextilic pampa anmomati quinami yehuanten hual iyaxca Cristo. Axan anmochíac quinami

yihual, anquipixtica iyulilislí huan ilanextilislí huan ilajtol lajitic capa anmoyolo. <sup>28</sup> Axan amo anmitzita Dios quinami amhuanten judíos o griegos, huan yoje monequi pa camo anmoitas yoje amhuanten. Dios amo anmitzita quinami lacames hual quinmocuhuilic oc se pa quitequipanuilisi o quinami se hual amo quiman quimocuhuilic oc se. Huan amo anmitzita quinami lacal o sihual. No, axan anmitzita Dios jan se ilanechiculislí míac, se quinami in oc se, san pampa anmochíac se ca yihual pampa anquilalíc laneltocalislí ca yihual. Pampín, ximoitacan amhuanten quinami Dios anmitzita. <sup>29</sup> Huan amhuanten hual anquineltoaca Cristo, yoje anuncia imiahuimes Abraham axan, quinami moijtúa pan ipampa in Espíritu. Anunca imiahuimes pampa anquilalíc anmolaneltoocalislí ca Dios jan quinami quichíac Abraham. Anquipía inon hual iyaxca Dios hual yihual neli quilic Abraham pampa yahuiaya quimaca imiahuil.

## 4

<sup>1</sup> Ma annimitzili len nicnequi niquijtúa. Quiman yihual hual yahui quipía inon hual iyaxca itajtzin huan ayamo ajsi yes lacal, yoje yihual unca quinami se tequipanujquil hual iteco quimocuhuilic. Amo unca iyaxca pa lajlanis nindeno inahuac in hual iyaxca itajtzin, mas que yihual in xolol unca iteco mochi. <sup>2</sup> No, quiscaltilo yehuanten hual quinmiztialo in xolomes, huan quinmitilijtialo in laicananjimes in hual iyaxca itajtzin in xolol. Huan quiman ajsis in tonali hual quilalíc itajtzin, cuaquinon quipías ixolol in hual iyaxca itajtzin. <sup>3</sup> Yoje tehuanten noje ticataloaya quinami xolomes, amo ticmatiloaya nindeno quinami unca in hual iyaxca Dios hual ticpialo quiman ticlailo tolaneltoocalislí ca Jesucristo. Ticataloaya quinami tequipanujquimes lacuhuali. Tiquinneltocaloaya in lajtomes hual technextililoaya yehuanten pin lalticpan, jan innojen san hual amo quipialo nindeno pa quitas ca iyolo se. Yehuanten quijtulo pa inminyolo pampa sinda quinneltocas se innojen lajtomes, yoje unca quinami ajsis quipaquiltis Dios. <sup>4</sup> Ma yoje, ajsic in tonali hual Dios quilalíc, cuaquinon Dios quitilanic ixolol, yihual lacatic pan ipampa se sihual. Yoje, quema, mochíac lacal quinami tehuanten, huan yojqe quipiaya pa yulis quichijtica len quijtúa ilajtol Dios hual quimaxtilo in judíos, yoje quinami moxtin in oc sequin judíos. <sup>5</sup> Mochíac lacal pa yoje huil laxlahuis pa quinmacahuas yehuanten hual cataloaya quinami tequipanujquimes lacuhuali hual quipialoaya pa quichihualosquiaya in hual quijtúa inminlajtol in judíos. Quema, Cristo quinmacahuac pa yoje Dios quinmitas yehuanten quinami amo laijlaculi. Huan Dios ixolol quichíac inon pa yoje Dios quinmanasquiaya quinami ixolomes noje quinami Cristo unca ixolol.

<sup>6</sup> Axan, pampa anuncia Dios ixolomes, yoje Dios anmitztilanilic iEspíritu ixolol pa calaquís lajitic anmoyolo huan anmitzhueliltía pa anquinoztas Dios anquilijtica: “¡Abba!” hual quinequi quijtúa: “¡Tata!” <sup>7</sup> Huan yoje, yajmo tiunca quinami tequipanujquil hual tequipanúa amo ca laxlahuilislí. Axan tiunca ixolol. Huan pampa tiunca ixolol, cuaquin noje tiunca hual tia ticpía inon hual iyaxca toTajtzin Dios pan ipampa yihual Dios.

*Pablo momajtía pampa amo lajtulo pa inminyolo quinami Dios quinequi innojen laneltocanjimes pa Galacia*

<sup>8</sup> Ma yoje, innojen tonaljimes hual panuje quiman amo anquiximatini Dios, nepa ancataya quinami tequipanujquimes hual amo canaje laxlahuilislí. Anquintequipanuilini yehuanten hual amo yeje dioses, amo quipixtataloaya ilahueliltilislí hual dioses quipialo. <sup>9</sup> Axcan, anquiximati Dios, o

ma niqijtu, Dios axcan anmitziximati, anmitzmoyaxcajtlic. Axan ¿quinami anmocuetica oc seppa pa anquichías len quijtúa in lajtomes hual Dios quinmilic Moisés? Innojen amo quipialo chicahualisli pa anmitzpalehuis anquitequipanuilis Dios ca anmoyolo. Huan amo huil quipantilía nindeno pan inon hual iyaxca Dios hual yihual anmitzmaca. Nesi quinami anquinequi anmochía oc seppa tequipanujquimes lacuhuali pa anquipias pa anquichías inon hual quijtulo in lajtomes hual quinneltocalo in judíos. <sup>10</sup> Ma annimitzili len niqijtutica: Anquijtúa pampa monequi pa anquinchías fiestas (ilhuimes) pan tonalijmes huan meslimes huan xixihuimes, pampa anquijtúa cuajnesi inon anmitzpalehuis pa Dios anmitzitas lacames hual amo cate laijlaculi. <sup>11</sup> Annimitzpilía míac lamajtilisli pampa anquichijtica inon. Niqijtutica cuajnesi nitequipanuc jan lapic (de in balde) quiman annimitzlamachiltic Dios ilajtol.

<sup>12</sup> Annimitzyantía, nocnián, ximochihuacan quinami nehual, pampa nehual noje nimochíac quinami amhuanten. Nicnequi pa anyes lamacahuali pa como anquitocas in lajtol hual Dios quinmacac in judíos. Amhuanten amo annejchihuilic len amo cuali. <sup>13</sup> Huan anquimati cataya pampa nicataya cocoxqui niajsic capa amhuanten pa nipehuas annimitzlamachiltis ilamachiltisli cuali toTata. <sup>14</sup> Huan in tonali niajsic, mas que annehitaya cocoxqui huan pampín anquinequic annejxixicuc huan annehijyac, ma yoje amo anquichíac yojque. Annechnamiquic quinami niyec ilanahuatini Dios. Quema, annechnamiquic quinami nehual niyec yihual Cristo Jesús. <sup>15</sup> Axan, ¿capa unca anmopaquilisli hual anquipiác pampa annimitzlamachiltic ilajtol Dios? Nesi quinami yajmo anquipiá. Huan neli annimitzilía, nicmati sinda amhuanten huil anquichihuaya, cuaquín anmoquixtiliaya anmoixtololjmes pa annechmacasquiaya, pampa anquipiaya niman míac paquilisli pampa ticataloaya capa amhuanten. <sup>16</sup> Axan, ¿nimochíac quinami anmolacololini pampa annimitzilía len unca melahuac? No, niqijtúa niunca anmolasoji pampa annimitzilía inon.

<sup>17</sup> Nesilo quinami anmitzlasojlalo míac innojen lacames huan anmitzmaxticate in lamaxtilisli amo cuali. Inon amo unca cuali, pampa yojque quinequilo anmijtzacuillilo pa como anquicaquis in lamachiltisli cuali, pa yojque anquinlasojlas míac yehuanten pan ipampa inminlamaxtilisli. <sup>18</sup> Huan unca cuali sinda lacames lanextilijtiasíi mojmota quinami anmitzlasojlalo. Ma yoje unca cuali san sinda anmitzlasojlalo pampa quinequilo anmijchihuilis cuali. Yoje nicnequi annimijchihuilía huan inon amo san pin tonalijmes hual niunca ca amhuanten. Noje nicnequi annimijchihuilía pin tonalijmes hual amo niunca ca amhuanten. <sup>19</sup> Noxolomes de noyolo, inon hual anquichía nechcocoltía noyolo oc seppa. Unca quinami nicataya sihual hual quínectica quilacatlía ixolol. Quema, nechcocujtías mojmota. Huan jan quiman niquitas neli pampa anquilalijtica mochi anmolaneltocalisli ca Cristo san, huan quiman niquitas neli pampa Cristo yultica laijtic capa amhuanten, san cuaquinon yajmo nechcocus. <sup>20</sup> ¡Nicnequisquiaya míac pa huil nicayas ca amhuanten axcan huan pa nicpalas in quinami annimitzijcuiluilijtica innojen lajtomes, pampa laijtic noyolo amo nicmati quinami monequi pa nilajtus anmonahuac amhuanten!

*In lanextilisli hual technextilía Agar huan Sara*

<sup>21</sup> Xiquitacan, amhuanten hual anquijtúa monequi pa ticneltocasi ilajtol Dios hual quimaxtilo in judíos pa yojque Dios techitas quinami lacames hual amo cate laijlaculi, xiquitacan: ¿Anquimati neli len quinequi quijtúa in lajtol?

<sup>22</sup> Ma annimitzili in hual quipanuc Abraham. Unca lajcuiluli pin iamal ilajtol Dios. In Abraham quinpiaya ome xolomes lacames: se lacatic ca in sihual tequipanujquil hual mocuhuilic Abraham, yihual amo isihua. Huan in oc se lacatic ca Abraham isihua hual amo quiman yec tequipanujquil lacuhuali.

<sup>23</sup> Lacatic in xolol ca in sihual tequipanujquil jan quinami lacatilo mochi xolomes. Ma yoje, pa Abraham isihua hual amo quiman yec tequipanujquil lacatic ixolol quinami Dios neli quilic Abraham pampa yahuiaya lacati.

<sup>24</sup> Huan neli unca inon hual panuc ca in ome ixolomes Abraham, huan noje quinequi quijtúa oc se lajtulisli. Quema, inon hual quinpanuc innojen ome sihuames unca quinami in ome lajtulisli hual Dios quinchíac ca lacames. Dios quichíac in se lajtulisli pani in loma (tepel) itoca Sinaí. Yehuanten hual quilalilo laneltocalisli ca in lajtulisli cate quinami tequipanujquimes hual quipialo pa quineltocasi ilajtol Dios hual quimaxtilo in judíos. Yehuanten quinami in sihual huan ixolol hual yeje itequipanujquimes Abraham hual amo quinlaxlahuilo. In sihual motocaya Agar. <sup>25</sup> Huan pin lali itoca Arabia unca in loma (tepel) itoca Sinaí hual noje quitocayaltito Agar. In lajtulisli hual nepa yec latemacali unca se lajtulisli pa yehuanten hual cate quinami tequipanujquimes hual amo quinlaxlahuilo. Huan quinami Agar yec tequipanujquil quinami inon huan yec inantzin se tequipanujquil quinami yihual, yojque unca in cali Jerusalén axan ca yehuanten in judíos, in cali Jerusalén huelitía capa yehuanten. Cate quinami tequipanujquimes hual amo quinlaxlahuilo. Quipialo pa quineltocasi mochi ilajtol in lajtulisli. Yojque Jerusalén unca quinami inminentzin in tequipanujquimes hual amo quinlaxlahuilo. <sup>26</sup> Ma yoje, unca oc se Jerusalén hual unca pin cielo (il-huicac). In oc se Jerusalén unca quinami isihua Abraham hual amo yec tequipanujquil. Tehuanten hual ticneltocalo in lajtulisli hual Dios quichíac ca Abraham, axan ticpialo in oc se Jerusalén quinami tonantzin hual amo tequipanujquil lailpili. Pampín tehuanten amo titequipanujquimes lailpili. <sup>27</sup> Huan in Jerusalén pin cielo unca quinami tonantzin pampa yojque unca lajcuiluli Dios ilajtol, quijtúa:

Xicpía paquilisli tehual hual amo huil tiquinpía xolomes.

Quema, xipehua xitzajtzti ca paquilisli tehual hual amo ticmati len ticocu quiman quilacatlítia se xolol,

pampa cate niman míac ixolomes yihual hual amo huil quiapiaya se xolol, huan amo yoje míac cate ixolomes in se hual quiapiaya ilahuical.

<sup>28</sup> Huan amhuanten, nocnían, anunca quinami Isaac, yihual yec inminxolol Abraham huan isihua hual amo yec tequipanujquil. Quema, amhuanten imiahuimes Abraham pampa amhuanten anunca quinami Abraham, anquilalic anmolaneltocalisli ca in hual Dios neli anmitzilic. <sup>29</sup> Ma yoje, quinami panuc pa yina, ixolol in sihual tequipanujquil hual amo quilaxlahuiloaya quitojtocani ixolol in sihual hual amo yec tequipanujquil. Huan yojque panujtica axcan. Yehuanten lacatilo jan quinami moxtin lacatilo huan quineltocalo in lajtulisli hual unca pa yehuanten hual cate quinami tequipanujquimes hual amo quinlaxlahuilo. Yoje quitojtocalo pa quinchihuilisi amo cuali yehuanten hual lacatilo noje pan ipampa in Espíritu Santo, yehuanten hual quineltocalo in lajtulisli hual Dios neli quilic.

<sup>30</sup> Huan ¿len quijtúa Dios ilajtol lajcuiluli inahuac inon? Quijtúa: “Xijquixti pa quiahuac in sihual tequipanujquil huan ixolol hual amo quilaxlahuilo, pampa ixolol in tequipanujquil lailpili amo quiman moxiluilis hual iyaxca itajtzin ca ixolol in sihual hual amo unca tequipanujquil.” <sup>31</sup> Yoje, nocnían, tehuanten amo ticate quinami ixolomes in sihual tequipanujquil hual

amo quilaxlahuilo. Tehuanten quinami ixolomes in sihual hual amo yec tequipanujquil.

## 5

*Xiyultiacan chicahuac pampa anunca lamacahuali, yajmo monequi pa anquineltocas inminlajtol in judíos*

<sup>1</sup> Cristo amo quinequi pa tiyesi quinami tequipanujquimes hual amo quilaxlahuilo hual quipialo pa quichihuasi in hual quijtúa ilajtol in lajtulisli hual quimaxtilo in judíos. Pampín yihual techmacahuac pa yajmo techanasquiaya in lajtulisli. Yoje, amo ximomacahuiltican pa anquineltocas oc sejpa se lamaxtilisli amo cuali hual unca quinami se cual lamamani etic hual quilalililo inminpan in tequipanujquimes hual amo quilaxlahuilo. Quema, in lamaxtilisli anmijchihuilis yoje.

<sup>2</sup> Axcan, nehual, Pablo, annimitzilía sinda anquinmacahuiltía pa anmitztequisi ca in lanextilisli pa anmocuilaxli huan yoje anquijtúa Dios anmitzitas quinami lacames hual amo cate laijlaculi, cuaquín Cristo amo anmijchihuilía len cuali. <sup>3</sup> Huan oc sejpa niquilía neli, mochi local hual quinequi pa quitequisi pa icuilaxli, cuaquinon yoje quipías pa yulis quichijtica mochi in hual quijtúa in lajtol hual quimaxtilo in judíos. <sup>4</sup> Quema, yajmo anquipía nindeno pa anquitas ca Cristo sinda pan ipampa in lajtol anquitemus pa Dios anmitzitas lacames hual amo cate laijlaculi. Sinda yoje anquichía, cuaquín anquicajcahuac in cuali hual tejchihuilía Dios calica yihual anmitzita amo anquixtica laijlaculisli. <sup>5</sup> Ma camo ye yoje, pampa tehuanten ticchixticate pa toyolo in hual neli tialo ticanalo. Dios techmacas in pampa techita ixolomes hual amo quipialo laijlaculisli. Ticlalilo tolaneltocalisli ca inon pan ipampa in Espíritu Santo hual technextilic mochi in. <sup>6</sup> Sinda se quilalía ilaneltocalisli ca Cristo Jesús, amo monotza nindeno sinda unca latequili icuilaxli o amo unca latequili icuilaxli. Inon hual quema quimonotzilía se unca inon, da se quilalía ilaneltocalisli ca Cristo huan pampín quinlasojla oc sequin, huan yuli quinchihuilijtica cuali.

<sup>7</sup> Anpehuac anquitequipanuilic Cristo cuali, nesic quinami anmotoliniaya pa anyulis quinami Cristo quinequi. ¿Aqui anmijtzacuulic huan pampín anmocahuac pa anquineltocasquiaya in lamaxtilisli hual unca melahuac? Amo unca nindeno hual quipía lahuelilitilisli pa anmijchihualtilis inon. <sup>8</sup> In oc se lamaxtilisli hual anquineltocac quijtúa monequi pa anquineltocas Moisés ilajtol hual quimaxtilo in judíos. Ma yoje, Dios amo anmitzilic inon. Yihual anmitznotzac pa anquineltocas Cristo san. <sup>9</sup> Amo xiquilcahuacan in quinami quijtulo: “Se nadita laxocoyajquil quiteposahualtía mochi in texli.” In quinequi quijtúa se nadita in lamaxtilisli amo cuali mosemanas ca moxtin in laneltocanijmes huan míc quineltoresi. <sup>10</sup> Nehual amo nicmahuilía anmonahuac amhuanten, nocnían, huan Cristo nechmaca mosehuilisli pa noyolo pampa anquijtus jan yoje inahuac in lamaxtilisli amo cuali. Huan aqui hual anmitzlapolultitica anmitzmacatica tequil ca in hual anmitzmaxtifica, yihual panus lacocoltilisli aqui yes hual unca.

<sup>11</sup> Huan nehual, nocnían, sinda ayamo nimocahuaya pa niquinnextilía lacames pampa monequi pa yes latequili inmincuilaxli, cuaquín ¿leca nechtojtocaloaya in judíos? Unca pampa amo niquinmaxtifica lacames yoje. Sinda quema niquinmaxtiaya yojque, cuaquinon amo cualaniloaya. Amo cualaniloaya pampa sinda niquinmaxtiaya lacames yoje, cuaquín

yajmo niquinmaxtiaya pampa san Cristo huil tejchihauiliaya mochi to-lajlaculisli pan ipampa quinami yihual miquic pan in cuahuil. Huan in lamaxtilisli yehuanten amo quixtocalo quicaquilo. <sup>12</sup> Yehuanten hual anmitzmacalo tequil ca inminlamaxtilisli, nicnequisquiaya yehuanten motonilosquiaya mochi, huan amo jan inminculaxli san, pampa inminlamaxtilisli unca quinami inminlamaxtilisli lacames hual amo quineltocalo Dios.

<sup>13</sup> Yoje nilajcuilujtica, nocnían, pampa Dios anmitznotzac pa anquinel-tocas Cristo. Anmitznotzac pa yojque amo quiman anyesquiaya quinami tequipanujquimes hual amo quinlaxlahuilo, hual quipialo pa quineltocasi ilajtol Dios hual quimaxtilo in judíos. Ma yoje, mas que anunca lamacahuali pa yajmo monequi pa quineltocasi in lajtol, amo quiman xiquijtucan pampa inon anmitzmacahuiltía pa anquichías len amo cuali hual cuajnesi quinequis anmijchihualtis anmocuero. No, unca inon hual yes cuali pa anquichías: Ximotequipanuilcan se huan oc se ca lasojlalisli. <sup>14</sup> Xicchihuacan yojque pampa yoje anquichías Dios ilajtol sinda anquichías ja in san hual unca: “Ticlasojlas yihual hual moita ca tehual jan quinami timolasojlas tehual.” <sup>15</sup> Ma yoje, sinda anmoana pampa amo anunca ca se lajtulisli, cuaquin anunca quinami yulijquimes hual mocuajcualo huan quintolulo in lajcomes. Ximoiztiacan amhuanten pa como anmochías laneltocanjmes hual yajmo molasojlalo huan yajmo quinequilo monechiculo pan ipampa in Espíritu Santo pa quimolancuacuetzilisi in Tata huan quitequipanuilisli.

### *Tocuerpos quinequilo tejchihualtilo len amo quinequi in Espíritu Santo*

<sup>16</sup> Huan annimitzilía, xiyulican ca in Espíritu Santo huelitijtica pa anmoyolo. Yojque amo anmoitas anquichijtica in amo cuali hual quinequilo anmocuero pa anquichías. <sup>17</sup> Monequi pa anyulis yojque pampa inequilisli tocuerpo moquetza ipan in Espíritu Santo, huan inequilisli in Espíritu Santo moquetza ipan inequilisli tocuerpo. In omenten moquetzalo inminpan in se ca in oc se, pa yojque amo anyulis anquichijtica len cuajnesi anquinequi anquichía. <sup>18</sup> Huan sinda anmitzlaicana in Espíritu Santo huan anquinelto-ca, cuaquin ilajtol Dios hual quimaxtilo in judíos amo huil anmitzmotexpahuilis ca nindeno.

<sup>19</sup> Axan, momati cuali len quinequi tejchihualtía tocuerpo sinda ticmacahuiltilo. Techyantía pa timonilusi se ca oc se mas que amo timonamic-tije, techyantía pa ticchihuasi len yes quinami inon, techyantía pa como tipinahuasi pa ticchihuasi len yes amo cuali hual tocuerpo techyantía pa ticchihuasi. <sup>20</sup> Tocuerpo quinequi pa tiquinmolancuacuetzilisi inminlaixpan monos, quinequi pa tilaxuxasi, amo mocahua pa quinequis pa tiquincocolisi oc sequin. Tocuerpo techyantía pa como ticayasi ca se lajtulisli ca oc sequin. Amo mocahua pa quinequis pa tejchahuatilisli pampa ticnequilo ticpialo len pa tehuanten tohuían. Techyantía pa ticalantiquisasi quijquiman. Techyantía pa ticnequisi ticpiasi mochi quinami ticnequilo pa yoje ticayasi in hué huan pa oc sequin cayasi tijtipichin. Quinequi pa como cayasi ca se lajtulisli capa tocnían monechiculo. Quinequi pa tehuanten timoxilusi pa yajmo ticayasi ca se ilanechiculisli tocnían pa yojque huil ticchihuasi oc se lanechiculisli capa quipiasi oc se lajtulisli huan lamaxtilisli. <sup>21</sup> Techyantía pa como tiquinxicusi oc sequin pampa quipialo len ticnequilo o pampa cate huejué. Techyantía pa tilamictisi, quinequi pa tilahuanasi, quinequi pa timoitasi pin fiestas (ilhuimes) capa unca miac lahuanalisli. Quema, quinequi pa ticchihuasi innojen huan mochi oc sequin lachihualisli quinami



innojen. Huan mas que ayamo anquichía innojen, jan quinami annim-itzilic quiman nicataya nepa, axan annimitzilía pampa aquinojen yulilo quichijtcate len quinami innojen, yehuanten amo quipiasí in hual unca iyaxca Dios. Quinequi quijtúa, amo quiman huil cayasi ca Dios capa huelitía. <sup>22</sup> Ma yoje, sinda tiyulilo ticneltocaticate in Espíritu Santo, cuaquinon yihual techmaca pa ticpiasi miac lasojjalislí huan pa ticpiasi miac paquilislí huan pa ticpiasi mosehuilislí pa toyolo. Techmaca pa huil timopepenialtisi amo ticualanticate sinda tejchihuililo amo cuali, techmaca pa huil tilaquetzasi huan tilajtusi cuali ca oc sequin huan pa huil tiquinchihuilislí cuali oc sequin, techmaca pa ticmatísí ticmacasi len cuali oc sequin, techmaca pa huil ticchihuasi len tiquinmililo neli pampa tialo ticchihualo. <sup>23</sup> Techmaca pa camo ticnequisi timolacuepilisí. Techmaca pa camo ticmacahuiltsí pa tejchihualtítías tolanequilislí, huan pa camo huelitis pa tehuanten in hual ticnequilo. Technextilía pa camo timoanasi ca oc sequin pa ticanasi len, mas que unca toyaxca. Huan techmaca pa ticmatísí timotzacuilislí pa ticchihuasi len amo unca quinami Cristo quinequi. Amo unca se ilajtol Dios hual quinmotexpahuilía lacames hual yulilo quichijtcate yoje. <sup>24</sup> Huan yehuanten hual cate ilacames Jesucristo quisulahuaje ichicahualislí inmincuero hual itequi quinequisquiaya quinchihualti len amo cuali. Unca quinami cate lasalulí inmincuero huan ilanequilislí amo cuali inmincuero pan icuahuil Cristo capa miquic. Unca quinami miquic inmincuero, quinami Cristo miquic pin cuahuil. <sup>25</sup> Techyulitlic in Espíritu Santo. Pampa inon, noje ma tiyulican ticneltocaticate in Espíritu Santo pa techlaicanas ca mochi hual ticchihualo.

<sup>26</sup> Ma camo timochihuacan lacames hual quitemulo in quinami tiquinchihuilislí lacames pa techitási hueyenten sinda amo timonoztcate pa techitási yoje. Ma camo tictemucan quinami tiquincualantisi oc sequin pa yoje yehuanten quitemusi pa moxtin quijtusi lajtomes huejué pa yehuanten nojen. Huan ma camo ticualanican pampa oc sequin quipialo len amo ticpialo tehuanten. Ma camo ticualanican sinda quijtulo lajtomes huejué pa oc sequin huan amo quijtulo len hué pa tehuanten.

## 6

### *Ximopalehuican se huan oc se*

<sup>1</sup> Nocnían, sinda jan ancájsis se quichijtica len hual amo unca quinami quinequi Cristo, cuaquinon amhuanten hual anquimati anquineltoaca in Espíritu Santo, xicpalehuican in se pa canas oc sejpa Cristo iojli. Xicpalehuican amo ca cualanilislí anquinetica pa yihual panus lacocoltilislí pampa quichiac inon. Monequi pa anquijnamiquis cuali pa anmoitas amhuanten nojen pa camo anmitztilanilís anmoyolo Satanás pa anquicuilmatis pan Cristo iojli. <sup>2</sup> Ximopalehuican se huan oc se ca mochi hual anmitzpanúa, sinda anpanúa len lacocoltilislí o sinda Satanás anmitztilanilía anmoyolo, o len yes quiman monequi pa anquipías lapalehuilislí. Yojque anquichías in hual quijtúa Cristo ilajtol.

<sup>3</sup> Sinda unca se hual moita quinami se hué hual quijtúa pampa amo monequi pa anquipalehuis, huan ma yoje yihual neli amo monotza nindeno, cuaquin yihual ihuían mocuajcuamantica. <sup>4</sup> Yoje mochi sejse ma yultía molachilijtica quinami yihual ihuían yuli. Huan ma molachili pa quijnamiquis innojen hual quinchía. Cuaquinon sinda lajtlic iyolo moitas ca paquilislí, quipías yihual ihuían len calica moixtocas. Amo quinequis moitas niman cuali huan amo quinmitas amo yoje cuali oc sequin. <sup>5</sup> Monequi pa se



molachilis pa quijnamiquis quinami yuli, pampa mochi sejse quipías pa quinanquillis iyampa Dios quínami yuli.

<sup>6</sup> Huan yehuanten hual cate monextilinjmes o cate lanextili pa quimatisi Dios ilajtol, ma quinxiluilican ca mochi in cuali hual quipialo ca yehuanten hual quinnextililo ilajtol Dios.

<sup>7</sup> Amo ximocuaajcuamanacan. Dios amo lamacahuiltía pa lacames quixixicusi ilajtol. Quínami quijtulo, len yes quitoca se lalac, cuaquín inon noje quipixca. In quinequi quijtúa len quichía se lalac, yoje yahui mocuepa cana quínami len quichíac. <sup>8</sup> Unca yoje, pampa sinda se lalac yuli quichijtica in hual icuerpo quichihualtía, yoje yahui mochía se lalac laijlaculi. Huan sinda se lalac yuli quichijtica in hual in Espíritu Santo lajtic capa yihual quinequi pa quichías, cuaquín pan ipampa in Espíritu Santo quipías yulilislí hual amo químan lamis. <sup>9</sup> Huan ma camo tisiahuican pa camo tiyultiasi ticchijcate in cuali, pampa químan Dios quita pampa ajsic in tonali cuali pa techmacas, cuaquinon techmacas in hual yihual quipía pa tehuanten, sinda amo ticchihuasi tipichin tolaneltocalislí. <sup>10</sup> Pampa inon, químan yes tiqitalo quínami huil, ma ticchihuilican cuali moxtin. Huan ca míac lanequillislí, ma tiquinchihuilican cuali yehuanten hual cate Dios ixolomes, yehuanten hual quilalilo inminlaneltocalislí ca Cristo.

### *Quinmaca lajtol huan quinchicahua*

<sup>11</sup> Xiquitacan quichi huejué cate in lajcuilulislí calica annimitzjcuiluilijtica ca nehual nomajma. <sup>12</sup> Innojen lacames hual anmitzililo monequi pa anquipías latequili anmocuilaixli san quinequilo pa in judíos quinmitasi cuali pampa quinmaxticate yehuanten hual amo judíos pa quineltocasi ilajtol Dios hual quimaxtilo in judíos. Pampa inon quichihualo pa yojque in judíos amo quitojtocasi. Quitojtocaloaya sinda yehuanten lamaxtiloaya quínami Cristo miqic pin cuahuil huan san pampa inon ticayasi laquixtili pin polehuilislí sinda ticlalilo tolaneltocalislí ca yihual san. <sup>13</sup> Quema, lamaxtilo yojque jan pa camo cayasi latojtocali, pampa yehuanten hual quipialo latequili inmincuilaixli amo quineltocalo in lajtol hual quimaxtilo in judíos, san quinequilo pa amhuanten anquipías latequili anmocuilaixli pa yojque huil lajtulo moixtocate inminlaixpan in judíos quínami anunca míac lacames hual yehuanten quinchihualtije in hual quijtúa ilajtol in judíos. <sup>14</sup> Ma yoje, pa nehual, ma camo químan ye pa nilajtus nimoixtocate ipampa nindeno, jan ma nilajtu niqixtocate quínami toTata Jesucristo miqic pin cuahuil pa nehual. Quema, pan ipampa Jesucristo imiquilislí pin cuahuil, niqita quínami noje pilujtica pa in cuahuil mochi pin lalticpan hual amo unca ca se lajtulislí ca Dios. Unca quínami miqic mochi in pin lalticpan. Huan yoje yajmo huil nejchihualtilia noyolo pa camo niyulislí ca se lajtulislí ca Dios. Huan nehual noje niquínami nipilujtica pan in cuahuil, niquínami nimiqic noje. Pampín, quínami se mijquil, amo niquijnamiquía quínami inon hual unca pin lalticpan quinequi nechquixtia pa Cristo iojli. <sup>15</sup> Unca yoje, pampa sinda se quipía latequili icuilaxli o sinda amo quipía latequili, inon amo monotza nindeno. In hual neli monotza unca sinda Dios quichía yancuic se pan ipampa quínami quilalía in se ilaneltocalislí ca Jesús. Yojque Dios quitas yihual quínami se hual amo unca laijlaculi. <sup>16</sup> Huan yehuanten hual yulilo quichijcate mochi hual unca ca se lajtulislí ca in lamaxtilislí, ma Dios quinmaca imosehuilislí pa inminyolo huan iicnililislí, huan noje ma quinmaca innojen yehuanten hual neli cate iisraelitos Dios.

<sup>17</sup> Pa axcan huan pa quiman, ma camo nechmacatía tequil amaqui hual quijtutica da amo nicpía lahuellitlisli pa niyes ilanahuatini Jesucristo, pampa cate pan nocuerpo huajuahuastic hual nechcahuilije in sahuames. Niqinpiá innojen huajuahuastic pampa yehuanten nechcocoltije quiman niclamachiltiaya ilamachitlisli cuali Cristo. Innojen cate lanextilisli hual lanextililo pampa niunca se ilanahuatini Jesucristo.

<sup>18</sup> Nocnían, ma caya ca amhuanten in cuali hual san huil tejchihuilía toTata Jesucristo. Yoje anmoyolo yes ca se lajtulisli ca in Espíritu Santo hual unca laijtíc capa amhuanten. Yoje ma ye.

## In amal hual in lanahuatini Pablo quinmijcuiluilic in laneltocanjmes pin caltilan Efeso

### *Pablo quinmijcuiluilá in laneltocanjmes pa Efeso*

<sup>1</sup> Nehual niPablo, niunca ilanahuatini Jesucristo pampa yoje quinequi Dios. Annimitzjcuiluilijtica amhuanten hual Dios ilacames, amhuanten hual anunca pin caltilan Efeso. Amhuanten hual amo anmocahua pa anquineltocas Jesucristo, anmoajxiltia pa anmoyolo ca Cristo Jesús. <sup>2</sup> Ma Dios toTajtzin huan in Tata Jesucristo anmijchihuilican míac lachihualisli cuali. Huan ma anmitzmacacan míac mosehuilisli pa anmoyolo.

### *Pan ipampa Cristo quipialo latuchihualisli pa inminyolo*

<sup>3</sup> Ma moxtin laqueztiaacan hué inahuac in Dios hual yihual iTajtzin toTata Jesucristo. Yihual techmacac huan tejchihuilic mochi hual unca cuali, mochi hual huil ticpialo pan ipampa toyolo. Techajsi mochi inon hual unca pa tehuanten pin cielo (ilhuicac) pan ipampa Cristo. Unca pampa techita Dios axan jan quinami tehuanten ticate ca Cristo pa in cielo (ilhuicac). <sup>4</sup> Unca yoje ca tehuanten jan quinami Dios techlalic pa tiyesi ilacames iyaxca, tehuanten hual timoajxiltilo ca yihual ca toyolo. Dios quilalic pa tejchihuilis inon quiman ayamo quinchíac in cielo huan in lalticpan. Techlalic pa tiyesi ilacames pa tiyulisi chipahuac amo ticpixticate se laijlaculisli pa yoje amo quipiasquiaya pa techmotexpahuilis. <sup>5</sup> Huan pampa yihual Dios techlasojla, yihual quilalic pa tiyelosquiaya ixolomes yihual Dios pan ipampa Jesucristo. Dios quichíac inon pampa quinequic tejchihuilic cuali. <sup>6</sup> Quichíac pa yoje moxtin lajtutias ca lajtomes huejué inahuac yihual pampa tejchihuilia míac cuali hual lanextilia quinami unca niman hué ilahuelilitlisli. Quema, tejchihuilic in lachihualisli hué pan ipampa Jesucristo hual yihual quilasojla míac. <sup>7</sup> Pan ipampa Cristo, yoje quipujpuhuac Dios mochi tolaijlaculisli. Axan ticate lamacahuali pa camo tiqitiasi ilacocoltisli Dios hual techpanusquiaya pampa tiyeje laijlaculi. Cristo quilaxlahuic pa inon ca iesli hual toyahuic in tonali hual miquic. <sup>8</sup> In lapujpualisli unca pan ipampa in niman míac cuali hual Dios quipía pa tehuanten pa tejchihuilis. In cuali tejchihuilic niman míac, techmacatica mochi lajmatilisli huan lahuelilitlisli pa titequipanusi ca in lajmatilisli. <sup>9</sup> Yojque techmachiltic in hual yihual quilalic pa panus, in hual yihual quinequi pa mochias. Amaqui huil quimatiaya inon pa yina huan pa mochi xixihuimes hual ajsitihualaje pa axcan. Ma yoje, techlamachiltia axcan jan quinami cuali quinequic quichíac. Quilalic pa tejchihuilisquiaya in cuali pan ipampa Cristo. <sup>10</sup> Quilalic quinami yahuiaya quichía inon quiman ajsisquiaya in tonali hual yihual quilalic. Quilalic pa axcan Cristo quipias lahuelilitlisli pan mochi hual unca pin cielo (ilhuicac) huan pan lalticpan. Yoje quilalic pa mochihuasi se san ca Cristo.

<sup>11</sup> Huan noje, pampa ticate se ca Cristo, ticanaloaya in hual unca pin cielo hual iyaxca. Dios quichijtia huan yoje se tonali laquisas mochi quinami quinequi. Inon panuc quinami yihual Dios lajtuc laijtjic iyolo. Pampa inon yihual quilalic pa ticpiasi inon hual iyaxca. <sup>12</sup> Quichíac inon pa yojque tilaquetzalosquiaya ca lajtomes huejué pa yihual hual laixpela niman míac

ca chichahualisli hué, pampa tehuanten ticate aquinojen hual pa yina ticchialoaya in tonali hual nesis Cristo nican pan lalticpan. <sup>13</sup> Huan yoje, unca pan ipampa Cristo amhuanten anquipiác in Espíritu Santo hual Cristo neli techilic pampa yahuiaya techtilanilía. Inon lanextilía quinami amhuanten anunca iyaxca Jesucristo. Ancanac in Espíritu Santo pampa anquialic mochi anmolaneltocalisli pa in lamachiltisli cuali hual anmitzilía quinami anmitzquixtía pin ipolehuilisli anmolaijlaculisli. Quema, inon in lajtol melahuac hual anquicaquic. <sup>14</sup> Huan pampa anquipía in Espíritu Santo pan anmoyolo, yoje in unca quinami anquixtica nadita inon hual iyaxca Dios. Huan anquipías mochi inon quiman ajsis in tonali hual Dios quilalic pa anquipías. Noje anquipías inon hual iyaxca Dios pa quiman Dios laquisas techquixtilis mochi in amo cuali lajtic toyolo. In amo cuali quinequi huelitía ca toyolo tehuanten hual Dios techanac pa tiyesi iyaxca. Yihual laxlahuic pa tehuanten. Huan pampa inon, moxtin laquetzasi ca lajtomes huejué pa yihual hual laixpela niman míac ca chichahualisli hué.

*Pablo quilajlanía Dios pa quimacas lajmatilisli in laneltocanjmes*

<sup>15</sup> Yoje, in tonali hual nicmatic quinami anquialic mochi anmolaneltocalisli ca in Tata Jesús, huan nicmatic quinami anquinnequi moxtin ixolomes Dios, cuaquinon nicsehuic. <sup>16</sup> Huan amo nimocahuaya pa nicsehuisquiaya Dios pa amhuanten. Annimitzijnamiquía ilaixpan Dios quiman yes nicla-jlantica. <sup>17</sup> Inon nicchía pa yojque iDios toTata Jesucristo, in Dios hual unca toTajtzin hual laixpela niman míac ca ichichahualisli hué anmitzmacas sejse ca moxtin se yolo hual quimati, se yolo hual anmitznextilis innojen calica anquiximatis Dios mochi quinami unca. <sup>18</sup> Nicla-jlanis Dios pa yihual anmitzmachiltis cuali lajtic anmoyolo, pa yojque anquimatis len unca inon hual anquichixtica pa anquipías hual yihual yahui anmitzmaca, yihual hual anmitznotzac pa anquineltoacasquiaya. Nicla-jlanía pa anmitzmachiltis quinami unca hué in hual iyaxca huan niman cualtichin hual yihual yahui quinxiluilía ca yehuanten hual iyaxca. <sup>19</sup> Huan nicla-jlanía pa yihual anmitzmachiltis quinami niman hué unca ichichahualisli hual amo quiman lami, ichichahualisli amo huil tiquijtulo quinami unca hué. Tehuanten ticpialo in chichahualisli tequipanujtica lajtic tehuanten. <sup>20</sup> Huan noje ca inon, in chichahualisli unca in hual Dios quitequipanuc pan in tonali hual quiyuliltic Cristo hual quimictije huan quilalpachuje ca in mijquimes. Quiyuliltic, cuaquinon quilalic ca yihual pa ima cuali nepa pin cielo capa unca Dios. Axan huan yihual huelitijcate. <sup>21</sup> Quema, Dios quichihuilic Jesús pa yihual yes niman hué. Amo quiman ajsisi yesi yoje hué moxtin oc sequin hual huelitilo o hual quipialo lahueliltisli o quipialo chichahualisli pa huelitisi o hual cate in tecojuan niman huejué. Quema, Dios quilalic pa itoca Cristo yes niman hué. Amo quiman ajsisi yesi yoje hué mochi in oc sequin inmintocajmes hual cate pin lalticpan, quema, huan inmintocajmes hual cayasi pan tonali quiman lamis in lalticpan. <sup>22</sup> Dios quilalic pa yes yoje niman hué, pa yojque Cristo quipías lahueliltisli pan yehuanten. Huan Dios quilalic pa yes inminteco moxtin hual quineltoocalo. <sup>23</sup> Cristo huan yehuanten hual quineltoocalo cate quinami se cuerpo. Cristo unca quinami itzontecon in cuerpo, hual unca icali Dios. Huil tiquijtulo yehuanten cate quinami mochi hual unca ca in cuerpo. Huan yehuanten in laneltocanjmes huan Cristo cate jan se. Unca quinami tiquijtuloaya yehuanten in laneltocanjmes motemiltilo ca Cristo huan yoje mochihualo jan se ca Cristo. Unca quinami

yihual quitemiltía ca yihual ihuían mochi capa yes pin cielo (ilhuicac) huan pan lalticpan.

## 2

### *Timoquixtilisi pin polehuilisi pan ipampa in cuali hual Dios tejchihuilia*

<sup>1</sup> Huan amhuanten Dios anmitzaya quinami anyeje mijquimes pan ipampa quinami anpolehuiaya anquichijtataya inon hual amo cuali. Inon anquichihuaya in tonalijmes hual ayamo ancanaya Dios iojli. <sup>2</sup> Pa yina anyulini anquichijtataya in amo cuali, in laijlaculisli. Yoje anyulini pampa yoje yulilo yehuanten hual amo Dios ixolomes. Yehuanten yulilo quinami Satanás quinnextilía pa yulisi. Yihual Satanás inminhué in ijyecames ej'elehuis hual cate huelitijtcate pin ijyecal. Yihual quinchihualtía amo cuali yehuanten hual amo quinequilo quineltocalo Dios. <sup>3</sup> Timoxtin noje tiyulinijme yoje pa yina tiqinchijtataloaya innojen hual tocuerpo (tonacayo) quinequiaya pa ticchihualosquiaya. Quema, ticchihuanijme len yec tiquijtunijme pa laijtic toyolo. Huan pan ipampa in hual ticchihuanijme, yoje tiyeje hual tiahuiloaya tipanulo lacocoltilisi. Dios yahuiaya techcocolti, jan quinami yahui quincocoltía in oc sequin hual amo quineltocalo. <sup>4</sup> Ma yoje, Dios laicniliá niman míac, huan technequic niman míac ca lasojlalisi hué. <sup>5</sup> Pampín, techyuliltic timoxtin pan ipampa Cristo, mas que tiyeje quinami mijquimes pampa amo ticanaloaya Dios iojli. ¡Xiquijnamiquican, pan ipampa Dios ilachihualisi niman hué, anunca laquixtili pin ipolehuilisi anmolaijlaculisli! <sup>6</sup> Techyuliltic huan unca quinami techquixtic pa capa cate in mijquimes, quinami quixquixtic Cristo. Unca quinami techlalic ca yihual capa unca pin cielo (ilhuicac). Quema, inon Dios tejchihuilic pan ipampa Cristo Jesús. <sup>7</sup> Inon tejchihuilic Dios pa yoje quinnextilis yehuanten hual yulisi pa mochi in xixihuimes hual ajstitihualasi quinami unca niman hué ilachihualisi cuali calica tejchihuilic tehuanten yoje niman cuali pan ipampa Cristo Jesús. <sup>8</sup> Pan ipampa Dios ilachihualisi cuali, amhuanten anunca laquixtili pa ipolehuilisi anmolaijlaculisli. Huan anmijchihuilic in lachihualisi hué pan ipampa quinami anquilalic mochi anmolaneltocalisi ca Cristo Jesús. Amo unca pan anmopampa nindeno. Unca pampa Dios anmitzmacac anmolaneltocalisi pa anquilalis ca yihual. <sup>9</sup> Amo anunca laquixtili pin ipolehuilisi anmolaijlaculisli pan ipampa in hual anquichía amhuanten. Sinda yoje cataya, cuajnesi cayasquiaya se hual laquetzasquiaya hué inahuac quinami moquixtic pin polehuilisi. <sup>10</sup> Unca pampa tehuanten ticate iyaxca Dios hual yihual tejchiac yancuic. Tejchiac yancuic pan ipampa Cristo Jesús pa yoje tiyulisi ticchijtcate in hual unca cuali. Huan Dios pa yina quilalic pa cayalosquiaya innojen cuajcuali pa tiyulisi tiqinchijtcate tehuanten hual axan ticneltocalo Cristo, pampa yihual tejchijchihuilic pa huil tiqinchihualosquiaya.

### *Ticpialo mosehuilisi pa toyolo pan ipampa Cristo*

<sup>11</sup> Yoje, xiquijnamiquican inon. Amhuanten hual amo judíos, yoje anlatic. Huan yehuanten in judíos hual quipialo latequili inmincuilaxli cate jan lacames san hual quinchihuililo je lanextilisi hual lanextilía quinami yehuanten cate Dios ilacames. Huan yehuanten anmitztenehuanijme quijtutataloaya pampa amhuanten lacames hual amo anquiapiaya latequili anmocuilaxli, huan pampín amhuanten amo Dios ilacames, yoje quijtunijme. <sup>12</sup> Huan pa innojen tonalijmes, amhuanten anmocahuani laijcuanili

pa camo huil cayasi ca Cristo. Anmocahuani latzacuali pa camo anquipi-  
 asquiaya inminyaxca ilacames Israel. Amo anquimatini huan amo anquipi-  
 iani nindeno anmoyaxca ca in lajtulisli hual Dios quinchíac ca in israelitos.  
 Pa in lajtulisli Dios lajtuc neli inahuac in cuali hual yahuiaya quinchihuili  
 in judíos, lajtuc pa in tonalijmes quiman ayamo quinchihuilic. Huan  
 amhuanten hual amo judíos, pan innojen tonalijmes ayamo anquineltocaya  
 pampa Cristo anmitzquixtía pa ipolehuilisli anmolaijlaculisli. Pampín amo  
 anquipiani nindeno cuali pa anquichiasquiaya pa anmitzpanusquiaya, amo  
 anquipiani Dios. <sup>13</sup> Axcan pan ipampa Cristo Jesús, anuncia la'ajxiltili ca  
 Dios toTajtzin. Inon unca pan ipampa iesli Cristo hual tuyahuic in tonali  
 hual miquic, mas que pa yina pa innojen tonalijmes ancatani huejca, Dios  
 amo cataya ca amhuanten. <sup>14</sup> Pampín, yihual Cristo unca tomosehuilisli pa  
 tehuanten hual judíos huan yehuanten hual amo judíos. Tejchihuilic inon  
 pa axcan timochihuasi se san, tehuanten hual pa yina tiyeje ome. Pa yina  
 cayani len hual tejtzacuilini pa camo tiyelosquiaya se san. Catani quinami  
 se pader (tepandí) hual tejtzacuilini in judíos huan yehuanten hual amo  
 judíos pa camo tiyelosquiaya se. Huan axcan, unca quinami Cristo Jesús  
 quixitinic in pader hual amo techmacahuiltini pa timoitalosquiaya cuali.  
<sup>15</sup> Quema, pampa miquic Cristo, quichíac pa ilajtol Dios hual quimaxtilo in  
 judíos yajmo huil tejtzacuilisli tehuanten in judíos ca camo tiyesi se san ca  
 yehuanten hual amo judíos. Pa yina catanijme ome in judíos huan yehuanten  
 hual amo judíos. Axcan, sinda quineltocalo pampa Cristo quinquixtía pin  
 ipolehuilisli inminlaijlaculisli, cuaquinon yoje quinchía Dios pa in ome yesi  
 se yancuic san hual mocahualo jan sejpa ca mosehuilisli yehuanten nojen.  
<sup>16</sup> Huan quichíac pa yesi in ome jan sejpa ca mosehuilisli ca Dios. Tejchihuilic  
 pan ipampa quinami Cristo miquic pa icuerpo pin cuahuil, yoje tejchijtica  
 tehuanten quinami se cuerpo pampa ticcate se ca yihual. Quinchihuilic pa in  
 judíos yajmo quinmiztiasi amo cuali yehuanten hual amo judíos. Huan noje  
 quichíac yoje pa yajmo timolalisi ipan Dios quinami lacocolinijmes.

<sup>17</sup> In tonalijmes hual cataya Cristo pan lalticpan, quinmilic in lamachtil-  
 isli cuali yehuanten in amo judíos hual cayanijme huejca capa amo huil  
 ajsiloaya ca Dios, noje quinmilic in judíos hual amo catanijme huejca.  
 Quichíac pa yesquiaya mosehuilisli ca Dios huan ca amhuanten huan  
 tehuanten. <sup>18</sup> Unca pan ipampa in hual tejchihuilic Cristo. Inon techmaca  
 in judíos huan yehuanten hual amo judíos pa yes toyaxca pa huil timoajx-  
 iltisi capa unca Dios toTajtzin, mochi sejse ticpixticate in se Espíritu Santo.  
<sup>19</sup> Pampa inon, amhuanten hual anuncia judíos yajmo anquinami lacames  
 hual chantilo pa oc se lali huan amo quipialo inminyaxca yehuanten hual  
 chantilo pa inminlali. Yajmo anquinami yehuanten hual lacatije pa oc se lali  
 huan jan quipialo sequin innojen hual inminyaxca yehuanten hual chantilo  
 pa inminlali. Axcan amhuanten anquinami yehuanten hual chantilo capa  
 Dios unca, amhuanten ixolomes Dios, unca quinami anchanti pa ichan.  
<sup>20</sup> Huan Dios ichan unca quinami lachihuali ca tehuanten hual ticlalilo  
 tolaneltocalisli ca Cristo. Huan se cali quipía ilalastili. Noje Dios icali quipía  
 ilalastili. Unca inminlamaxtilisli in lanahuatinijmes huan ilajtunijmes hual  
 unca quinami ilalastili icali Dios. Huan Cristo Jesús, yihual quinami in tixcali  
 hual quipehualtía ilalastili in cali. Cate lalalili mochi oc sequin itixcalimes  
 in lalastili quitocaticate in tixcali hual unca quinami Cristo. <sup>21</sup> Quema, pan  
 ipampa Cristo Jesús, moxtin in laneltocanijmes huil tiquijitulo yehuanten  
 quinami len yes calica se quichía se cali, quilalía se adobe jan yoje ca  
 oc se adobe, huan yoje mopantía in cali, mochijtica hué. Huan jan yoje

in laneltocaniymes momiactilo pan ipampa Cristo Jesús huan mochihualo quinami se cali hual yes pa Dios san capa huil chanti pampa unca quinami ichan lasojli huan chipahuac. Unca Cristo hual quichíac in cali. Quichíac pa quipías míac lasojlalisli huan chipahualisli. <sup>22</sup> Huan amhuanten nojen Dios anmitztequipanujtica. Unca quinami yihual anmijchitica se cali, pa yojque yihual Dios chantis ca amhuanten pan ipampa in Espíritu Santo.

### 3

*Dios quilic Pablo pa quinlamachiltis in lamachiltisli cuali ca yehuanten hual amo judíos*

<sup>1</sup> Pampa inon, niunca lailpili huan latzacuali pin calijtic pampa annimitzlamachiltis ilajtol Cristo Jesús amhuanten hual amo judíos. <sup>2</sup> Neli niqijtúa anquicaquiaya quinami Dios nechlajtultic pa nichías in tequipanulisli. In tequipanulisli unca pa niclamachiltis ilachihualisli cuali jan pa yojque amhuanten hual amo judíos anquimatis inon. <sup>3</sup> Ma yoje, se lalac amo huil quimati inon pan ipampa ilajmatilisli yihual, jan Dios huil techlamachiltía. Huan Dios nechlamachiltis nehual inon jan quinami amo quipía míac annimitzjcuilulic pin amal ca naditas lajtomes. Nechlamachiltis Dios pan ipampa quinami nechlacaquiltic yihual. <sup>4</sup> Capa yes anunca anmomaxtítica, huil anquimatis lajtic amhuanten anmoyolo pampa neli nejchíac nehual Dios pa nicmatis len quinequi quijtúa ilamachiltisli Cristo hual jan Dios san huil technextilía. <sup>5</sup> Inon Dios amo quilamachiltiaya lacames huan imiahuimes hual yulinijme pa yina. Ma yoje, axcan ca lajtomes hual moxtin quimatilo, Dios quinnextilic inon ilanahuatinijmes huan ilajtunijmes huan quinlalic pa quitequipanulisli yojque yihual san. <sup>6</sup> Quinnextilic pan ipampa in Espíritu Santo quinami yehuanten hual amo judíos cate quinami icuerpo (inacayo) Jesús yoje ca moxtin in laneltocaniymes. Huan quipialo inminlajco inon hual unca iyaxca Dios. Inon unca hual Cristo quilic neli pampa yahuiaya quinmaca yehuanten hual quineltovalo. Quema, mochi inon quipialo yehuanten hual amo judíos jan quinami quipialo in judíos hual quilalilo mochi inminlaneltocalisli ca Cristo. Quipialo pampa cate jan se ca Cristo pan ipampa ilamachiltisli cuali.

<sup>7</sup> Huan nimochihuaya se lamachiltini pa in lamachiltisli cuali. Dios, pan ipampa quinami nejchihuilic cuali, nechmacac in lahuelilitisli yojque quinami nechueliltía ichicahualisli hué. <sup>8</sup> Nehual niunca aqi hual amo nimonotza ca Dios ilacames. Amo unca oc se hual amo monotza quinami nehual amo nimonotza. Ma yoje, nejchihuilic cuali Dios pa niquinmacas yehuanten hual amo judíos in lamachiltisli cuali hual techilía mochi in niman míac hual quipía Cristo pa tejlulic tehuanten. Huan amo huil ticmatilo mochi hual quipía, pampa amo huil caji inon hual tiqijtulo pa lajtic toyolo. <sup>9</sup> Nejchihuilic in cuali pa nichías pa quimatis moxtin quinami Dios quilalic pa se tonali moxtin huil quipiasí yulilisli hual san Dios huil quinmaca pan ipampa Cristo Jesús. Amo quimacahuilic Dios pa lacames quimatisi inon quiman quinchíac pan ipampa Jesucristo. Mochahuaya lalatali pa Dios iyolo pa mochi xixihuimes hual panujtihuallaje. Axan techmachiltic. <sup>10</sup> Axan Dios quinequi pa quimatisi in ijyecames hual huilitilo pin cielo in niman míac lajmatilisli hual Dios san quipía. Huan quinequi pa quimatisi pan inminpampa yehuanten hual quinnotzac pa yesi ilacames.

<sup>11</sup> Dios quilalic pa panus inon quiman ayamo quipehualtic mochi, huan quichíac pan ipampa Cristo Jesús toTata. <sup>12</sup> Pan ipampa yihual huan pan

ipampa quinami ticlailo tolaneltoalisli ca yihual, tehuanten huil timo-  
ajxiltilo ca Dios. Amo unca nindeno hual tejtzacuilis huan ticmatilo yi-  
hual amo quiman techtojpehuas pa timijcuanisi capa yihual. <sup>13</sup> Pampín,  
annimitztemachía pa como anmomacahuiltilis pa anquipolus anmoyolo in  
lacocoltzilisi hual nipanujtica pa amhuanten. Cayas len hual yes niman cuali  
pa amhuanten huan anmijchihuilis len hué pampa nipanujtica inon.

### *Cristo ilasojlalisli*

<sup>14</sup> Ca inon hual nilamic niqijcuiluc, annimitzilic quinami anmijchihuilía  
cuali Dios. Pampín nicmolancuacuetzilía iTajtzin toTata Cristo Jesús. Huan  
niclajlanía Dios pa amhuanten. <sup>15</sup> Yihual inminTajtzin moxtin pin cielo  
(ilhuicac) huan pan lalticpan hual quineltocalo. Huan yehuante ixolomes  
motocayaltilo ca yihual itoca jan quinami mochi ixolomes se local  
motocayaltilo quinami itoca inmintajtzin. <sup>16</sup> Nicmolancuacuetzilía toTajtzin  
hual quipía niman míac ilaixpelalisli cualtichin pa teixiluilis pan tehuanten.  
Pampín nictemachía pa yihual anmitzmacas míac chicahualisli pan ipampa  
iEspíritu pa yojque anmochicahuiltilis pa anmoyolo amhuanten. <sup>17</sup> Huan  
niclajlanía pa yoje Cristo chantis pa anmoyolo pan ipampa quinami an-  
quineltoca, pampa yihual anmijchihuilis cuali quinami neli quilía. Sinda  
unca Cristo pa anmoyolo, cuaquín unca quinami se cuahuil quinpía ilalhuay-  
ojmes pin lali, huan amo quiman anmocahuas pa anquinlasojlas oc sequin.  
<sup>18</sup> Pampa in, noje nictemachía Dios pa anmijchihuilis mochi inon pa yoje  
huil anquimatis quinami Cristo anmitzlasojla míac amhuanten huan moxtin  
in oc sequin ilacames Dios. Ilasojlalisli Cristo ajsi capa yehuante huan  
imiahumes hual yulilo pan lalticpan pa mochi xixihuimes hual huejcahua  
caya in lalticpan. Ajsi capa se quiman lacatic huan huejcahua caya pa  
quiman miquis. Ajsi capa yehuante hual niman huejué huan capa yehuan-  
ten hual niman tijtipichin huan yehuante hual ej'elehuis. Monequi pa  
anquimatis quinami ilasojlalisli unca quinami niman palahuac huan niman  
huejcanic huan niman cuajtic huan niman huejcalan. <sup>19</sup> Noje nictemachía  
Dios pa anmitzmachiltis quinami unca niman hué ilasojlalisli hual amo huil  
tiqijtulo quinami unca hué. Inon nictemachía pa yoje ancayas tentica ca  
Dios pa anmoyolo.

<sup>20</sup> Dios ilahueliltilisli unca lajtic tehuante huan techueliltitica pa tiyesi  
quinami yihual Dios quinequi pa tiyesi. Yoje, quinami unca ilahueliltilisli,  
Dios huil quichía niman míac. Quema, mochi hual huil tictemachilo pa  
quichías amo quiman quilamilis in hual huil quichía. Huan mochi hual  
huil tiqijtulo lajtic toyolo pa quichías amo quiman huil quilamilis in hual  
huil quichía. <sup>21</sup> Pampa inon, ma laquetzacan ca lajtomes huejué pa yihual  
moxtin ixolomes hual monechiculo pa quimolancuacuetzilisi capa cayasi  
pin lalticpan. Mochihuaje se san ca Cristo. ¡Ma como quiman mocahuacan  
pa laquetzasi ca lajtomes huejué pa yihual pa mochi tonalijmes hual huejca-  
huas in lalticpan, ma como quiman lamilo in lajtomes huejué! Yoje ma ye.

## 4

### *In Espiritu Santo tejchía se san ca Cristo*

<sup>1</sup> Nehual, cuaquín, hual niunca quinami lailpili huan niunca latzacuali  
pa calijtic pampa nictequipanuilía in Tata, axan annimitzyantía pa anyulis  
quinami cana cuali pa yulisi yehuante hual quinnotzac Dios pa cayasi  
ca yihual huelitijcate. <sup>2</sup> Pa anyulis quinami inon, monequi pa anmoitas  
quinami lacames huan sihuames tijtipichin hual amo anmonotza pa Dios



anmitzilis lajtomes huejué huan cuajcuali. Monequi pa anyes lacames hual amo anmocalantitiquisa quiman yes quichihualo laijlaculisli oc sequin. Huan sinda Dios quimacahuilitia pa anmitzpanus in amo cuali, monequi pa anmopepenialtis in amo cuali amo ca cualanilisli. Monequi pa anmopepenialtis in amo cuali hual cuajnesi anmijchihuilisi oc sequin, huan pa camo anmocahuas pa anmolasoilas mas que sequin ca amhuanten hual quinelto calo in Tata anmijchihuililo niman amo cuali. <sup>3</sup> Monequi pa anyes lacames hual mojmosta anmotolinía pa anmocahuas ca jan se lajtulisli pa anmoyolo hual unca ilajtulisli in Espíritu Santo. Huan in lajtulisli yahui caya huan amo yahui mopala ca amhuanten pan ipampa in mosehulisli pa anmoyolo. <sup>4</sup> Monequi pa anyultías anquipixtica se lajtulisli, pampa quipía Dios jan se lanechiculisli ca laneltocanijmes san. Cate quinami icuerpo (inacayo). Huan unca se Espíritu san hual quiyuliltia icuerpo lachihuali ca in laneltocanijmes, yehuanten Dios iyaxca. Huan quinami unca se lanechiculisli huan se Espíritu, jan yoje Cristo anmitznzoc pa anyulis anquichixtica jan se lachialisli pa anmoyolo. Inon unca in tonali quiman nesis Cristo oc seppa. Unca quinami ancayas pan tonali hual anmijchías Dios pa ancayas quinami Cristo. <sup>5</sup> Huan ticpialo se toTata san huan se lamaxtilisli san capa ticlalilo mochi tolanelto calisli hual pan ipampa inon tehuanten ticate Dios ixolomes. Huan unca se lacuayatequiculisli calica ticate quinami layapali pa toyolo ca temulol pa yoje momatis pampa ticate Dios ixolomes. <sup>6</sup> Huan unca se Dios, yihual toTajtzin timoxtin. Huelitía ca mochi lahueliltisli pan moxtin, moita quinami tequipanúa pan ipampa mochi hual quichíac, huan yuli pa laijtic toyolo timoxtin.

<sup>7</sup> Huan techmacac Cristo mochi sejse lahueliltisli pan ipampa in cuali hual tejchihuilía. Techlamachihuilía quinami yihual quita cuali. <sup>8</sup> Yoje quijtúa Dios ilajtol:

Quiman lejcuc pa in cielo (ilhuicac), cataya quinami yihual quinlaicantataya mochi in míac ilacocolinijmes lailpili.

Huan quinlaicantataya latomali yehuanten hual ilacocolinijmes quipianijme lailpili,

huan quinmacac len cuali lacames hual yeje iyaxca.

<sup>9</sup> Axan, cuaquín, quijtúa ilajtol Dios pampa lejcuc Cristo. Yoje, sinda “lejcuc”, quinequi quijtúa pampa yihual quipiaaya pa quipehualtic temujtataya pa temuán (temuayan) pan lalticpan. <sup>10</sup> Huan in se hual temuc noje unca yihual hual lejcuc huejca pa pani mochi in cielo (ilhuicac). Inon quinequi quijtúa pampa yihual monotza pa mopilis mochi tolasojlalisli axan. Yoje yihual cayas mochi capa yes pin cielo huan pin lalticpan.

<sup>11</sup> Axan, cuaquín, nican unca len cuali yihual quinmacac lacames. Quilalic pa sequin yesi lanahuatinijmes hual yihual quinlalic pa yihual ihuan. Yehuanten quitaje quiman pehuaya yuli oc seppa. Quicaquije ilamachiltisli cuali Cristo. Quipiaje lahueliltisli yoje quinami huil quichihuaeje in hual quinmahuisultiaya ca lamajtilisli lacames. Inon quipiaje pan ipampa Dios ilahueliltisli. Huan Cristo noje quinlalic sequin pa yesi ilajtunijmes. Yehuanten quinmaca Dios ilajtomes pa quijtusi quijquiman. Quinlalic sequin pa yesi lamachiltinijmes hual yehuanten nejntinemilo quinmilijticate oc sequin in lamachiltisli cuali. Huan quinlalic sequin pa mocahuasi se nican, se nepa pa laixnamiquilo ca Dios ixolomes pa camo moxilusi huan pa camo moixpolujtiasi huan noje pa quinmaxtisi ilajtol Dios. <sup>12</sup> Cristo quinmacac pa quipiasi in lahueliltisli pa yoje Dios ixolomes yesi lachijchihuali pa motequipanuilisli se huan oc se huan pa quitequipanuilisli Dios, quinami monequi pa quichihuasi yehuanten hual quimatilo cuali Dios ilajtol. Huan

yoje moxtin ixolomes Dios hual tiquijtulo cate Cristo icuerpo quipiasi míac chicahualisli pa inminyolo huan yultiasi momiacticate pan inminpampa míac lacames huan sihuames hual quilalilo mochi inminlaneltocalisli ca Jesucristo. <sup>13</sup>Yoje yultialo pa yoje timoxtin tiajsisi capa ticayasi ca se lajtulisli pampa ticlailo mochi tolaneltocalisli ca Dios ixólol huan tiquiximatilo yihual. Yoje mochi sejse ca tehuanten in laneltocanijmes tiyesi quinami se lacal hual quimati, tiquijtuticate laijtic toyolo huan timochijticate quinami Dios quita pampa monequi pa mochías se lacal hual quimati. Yoje tiajsisi tiyesi mochi quinami Cristo.

<sup>14</sup>Cuaquin yajmo ticayasi quinami xolomes hual amo quineltocalo se lamaxtilisli san. Mopalalo pa quineltocasi se lamaxtilisli quinami mopala in al pani in al huejcalan majcoctica ca in iyecal. Cate lacames hual amo mocahualo ca in lamaxtilisli melahuac. Quincuajcuamanalo oc sequin ca oc se lamaxtilisli. Quimatilo míac pa lamaxtisi ca len yes lajtulisli o lachihualisli pa lacuajcuamanasi. Yoje moixpolusi pan Dios iojli. Ma yoje, tehuanten amo ticayasi lacuajcuamanali yoje. <sup>15</sup>Yes cuali pa timochihuasi lacames huan sihuames hual ca mochi lachihualisli timoscaltilo pa tiyesi quinami Cristo, yihulticate melahuac huan timolasojticate. Tiyesi quinami Cristo hual yihual quinami itzontecon in cuerpo. In cuerpo tiquijtulo unca moxtin yehuanten hual quilalilo mochi inminlaneltocalisli ca Cristo. <sup>16</sup>Huan pan ipampa Cristo, moxtin yehuanten hual cate icuerpo mopalehuilo. Mochi sejse ca ixolomes unca quinami lasaluli ca in oc sequin quinami ilalhuames icuerpo se. Pan ipampa inon, mochi sejse hual quilalía ilaneltocalisli ca Cristo, ca yihual Cristo quitilania ichicahualisli pa yoje momiactisi yehuanten hual cate Cristo icuerpo. Sinda quichía mochi sejse itequipanulisli hual Dios quimacac, cuaquinon momiactisi Cristo ilacames. Yoje icuerpo hual cate ilacames ajsisi pa yesi mochi quinami yihual quinequi. Mochi sejse ca yehuanten quinlasojlas moxtin in oc sequin.

### *Cristo techmaca yulilisli yancuic*

<sup>17</sup>Inon niqulía, huan neli niquijtúa niunca iyaxca in Tata. Monequi pa yajmo anyulis quinami quililo yehuanten in amo judíos hual amo quineltocalo Cristo. Yulilo quinecticate huan quijtuticate laijtic inminyolo len molaxpololtía. <sup>18</sup>Yulilo quinami cate pan laticumac. Amo quimatilo nindeno pampa cate latzacuali amo quipixticate Dios iyulilisli yancuic. Inon Dios jan quimaca se hual quineltoca Jesucristo. Unca pampa amo unca lanequilisli ca yehuanten pa quimatisi Dios ilajtol. In lajmatilisli yajmo huil calaquía pan inminyolo pampa amo quimacahuiltilo pa calaquis. <sup>19</sup>Yoje yajmo monextilo nindeno quiman yes quinequi quinnextilía inminlajmatilisli calica quimatilo len unca cuali huan amo cuali. Motemacalo pa yulisi quichijticate niman míac hual amo cana cuali. Quichihualo len niman amo cuali hual quinpinahuailo aquinojen quinmitalo quichijticate yoje. Huan amo quiman quinequilo motzacuililo pa camo quichihuasi mochi hual inmincuerpo quinyantía pa quichihuasi hual amo cuali. <sup>20</sup>Ma yoje, amhuanten amo yojque ancanac pa anyulis pan tonali hual anquiximatic Cristo huan anpehuac anyulic quinami quinequi yihual. <sup>21</sup>Niquijtúa pampa anquicaquic Cristo ilajtol melahuac huan ancataya lanextili quinami monequi pa anyulis anquipixtica Cristo pa anmoyolo. <sup>22</sup>Ancataya lanextili pa yajmo anyulis quinami anyulini pin tonalijmes hual ayamo anquiximatic Cristo. Axan, xiyulitiacan yoje. Yajmo anunca lacames quinami anyec pa yina. Pa in tonalijmes hual ayamo anquiximatic Cristo, anyulini anmoijlacujtataya pan ipampa quiman anquinequini anquichía in hual amo cuali

huan anquinequini anquipía in hual amo cuali pa amhuanten. Sinda jan anquipiasquiaya inon, anquijtuni, cuaquín anmocahuasquiaya ca paquilisli. Yoje anmocaujcuamanani. <sup>23</sup> Axcan, yes cuali pa anquijnamiquis quinami ancataya layancuili pa anmoyolo. Ximopalacan axan pa yajmo anlajtus quinami anlajtuni amo cuali ca lajitic anmoyolo. <sup>24</sup> Quema, Dios anmijchiac lacames huan sihuames yajyancuic pa anyes quinami yihual. Anmijchiac pa anyes lacames huan sihuames hual quimatilo quichihualo inon hual pa moxtin unca cuali, anyultica chipahuac pa yoje anyes jan pa yihual san.

<sup>25</sup> Pampín, yajmo xislatican. Mochi seje capa amhuanten ma camo mocahua pa quilis hual unca melahuac ca aqui yes moitíla ca yihual. Mochi seje ca tehuanten timoixnamiquililo ca mochi oc sequin, jan quinami ilajlajco se icuerpo moixnamiquilo ca in oc sequin ilajlajco. <sup>26</sup> Sinda ancualani, amo xicchihuacan laijlaculisli quiman ancualani. Ma camo calaqui in tonali sinda ayamo anmocahuac pa ancualanisquiaya. <sup>27</sup> Amo xijcahuilican in lahuejuecaltini Satanás nindeno calica yihual huil anmijchihualtis in hual amo cuali quiman yes ancualantica. <sup>28</sup> Aqui hual laixtequini, ma yajmo laixtequi. Axan, yes cuali pa tequipanus chichahuac quichijtica in cuali ca imajmajuan pa yojque huil quinmacas len yehuanten hual amo quipialo nindeno.

<sup>29</sup> Sinda anquijtúa lajitic anmoyolo lajtol laijlaculi, cuaquín amo ximomacahuiltican pa anquijtus. Axan, sinda anquijtúa lajitic anmoyolo len cuali pa anquijtus hual quinpalehuis oc sequin pa yulisi quinami quinequi Cristo, cuaquín xiquijtucan in lajtol hual cana cuali. Yoje quinpalehuis yehuanten hual quicaquilo. <sup>30</sup> Amo xicnotía iEspíritu Santo Dios. Ca in Espíritu Santo momati pampa amhuanten anunca iyaxca Dios pampa yihual unca lajitic amhuanten. Unca quinami yihual anmitzypilic anmoyolo ca itemulol Dios. Momatis pampa anunca Dios ilacames in tonali quiman Dios lamis anmitzquixtilis anmolajilaculisli.

<sup>31</sup> Amo ximomacahuiltican pa anyes lacames hual anyuli anquijtitica lajitic anmoyolo len amo cuali hual anquinequisquiaya anquinchihuili oc sequin. <sup>32</sup> Ximochihuacan lacames hual anlajtúa cuali ca oc sequin huan anquinmicnía. Xiyén (Xiyecan) lacames hual anquimati anquipujúa inminlajilaculisli sequin ca oc sequin jan quinami Dios quipujpúac anmolajilaculisli pan ipampa Cristo.

## 5

### *Quinami monequi pa yulisi Dios ixolomes*

<sup>1</sup> Yoje, ximochihuacan lacames hual mochihualo quinami Dios, jan quinami xolomes hual Dios quinlasojla miac. <sup>2</sup> Huan xiyulican anquinlasojlatica oc sequin quinami Cristo anmitzlasojlac. Motemacac pa miquis pa amhuanten hual anquipiaya pa anmiquisquiaya pampa anyec laijlaculi. Motemacac ca Dios quinami se huendi lamictili pa anmijchihuac anmolajilaculisli. Mochíac se huendi lamictili calica Dios mocahuac lapaquilti. Quema, mocahuac ca paquilisli ca inon hual quichíac Cristo.

<sup>3</sup> Ma yoje, ma camo panu ca amhuanten inon quinami lacames quichihualo len unca amo cuali ca sihuames huan quinami sihuames quichihualo hual amo cuali ca lacames. Quema, ma camo quiman molaquetzilican pan amhuanten, huan ma camo panu capa amhuanten innojen lachihualisli hual lapinahualtilo. Ma camo molaquetzilican capa amhuanten quinami quinequilo canaló niman miac. No, pampa amo cana cuali pa Dios ilacames

molaquetzilisi pa quichihuasi len quinami innojen. <sup>4</sup> Noje ma camo quijtucan huan ma camo quichihuacan in hual lapinahualtía, huan ma camo laquetzacan ca lajtomes quinami quijtulo yehuanten hual amo laijnamiquilo cuali. Inon amo lapalehuía nindeno pa quimaxtis oc sequin. Huan ma camo lajtucan quihuizquiljticate in hual unca cuali, pampa ca inon noje mopinajtilo. Pa Dios ixolomes amo cana cuali pa quichihuasi yoje. Yes cuali pa laquetzasi quisejtcate Dios. <sup>5</sup> Xicchihuacan yoje, nicnequi niquijtía, xiyultiacan quinami monequi pa yulisi lacames hual cate layancuili pa inminyolo. Monequi pa neli anquimatis inon: Se hual yuli monilujtica ca oc se sihual o lalac calica amo monamictic o yuli quichijtica hual amo unca ca se lajtulisli ca in hual Dios quilalic, amo yahui quipía nindeno hual iyaxca Cristo capa huelitía Cristo. Cristo noje unca Dios. Huan se hual yuli lapinahualtítica amo quipías in hual iyaxca Cristo. Amo cayas se hual quipías in hual iyaxca Cristo sinda yuli quinectica niman míac pa yihual ihuían. Aqúi hual yuli quichijtica yoje neli amo quinequi pa huelitis Dios capa yihual. San quinequi yuli quipixtica míac huan quimacahuiltía pa innojen míac hual quinnequi huelitía ca yihual. In unca jan quinami quimolancuacuetzilía se in monos. <sup>6</sup> Ma camo anmitzcuaajcuamana amaqui ca lajtomes amo mejmelahuac, anmitziljtica pampa huil anyuli anquichijtica len yes amo cuali hual anquinequi anquichía, pampa yehuanten quichihualo innojen hual nilamic annimzilic. Dios cualani ca yehuanten pampa amo quinelocalo. Pampín yalo panulo in lacocoltilisli pan ipampa Dios icualanilisli, polehuisi huan amo quiman quisasi. <sup>7</sup> Pampa inon, amo xicipacan nindeno ca quinami yulilo yehuanten.

<sup>8</sup> Pa yina mas que anyulini quinami capa laticumac amo ancantataya Dios iojli, axan unca quinami anyultica pan lahuilisli, pampa anquitac Dios iojli. Xiyulican axan quinami monequi pa yulisi yehuanten hual quipialo Dios ilahuilisli lajitic inminyolo. <sup>9</sup> Momatis quinami anquipía lahuilisli pa anmoyolo pan ipampa quinami anyuli anquichijtica in hual unca cuali huan ca laijnamiquilisli cuali huan melahuac. <sup>10</sup> Xiyulican anquijtutica lajitic anmoyolo quinami quinequi Dios pa anyulis anlachijtica huan cuaquín xicchihuacan yoje. <sup>11</sup> Amo xiyultiacan anquipiljtica paquilisli anquichijtica in hual mojlacúa. Inon unca quinami quichihualo yehuanten hual quipialo laticumac inminyolo. Yes cuali pa anquinnexilis yehuanten quinami inon hual quichijtcate quinmijlacus huan amo quiman huil mochijchihuasi. <sup>12</sup> Quema, pampa quipinahualtía se quiman laquetza san nadita inminahuac innojen hual quinchijtialo capa amaqui quinmita huan amaqui quimati. <sup>13</sup> Dios ixolomes hual quipialo ilahuilisli pa inminyolo quimatisi quinami amo cana cuali innojen hual quichijtialo. Mochi huil momati pan ipampa Dios ilahuilisli. <sup>14</sup> Yoje moita jan quinami unca, sinda unca amo cuali o sinda unca cuali. Pampín, tiquililo se hual quimahuilía quineltoaca Cristo, tiquililo: Xicmati pampa tiunca capa tía tipolehuía tehual hual tiyuli quinami ticoxtica.

Dios mitzita quinami timiquic pampa tiunca laijlaculi.

Ma yoje, axan xicpala moyolo pa tipehuas tiyulis pa moyolo, huan yoje Cristo mitzlahuis mo'ojli.

<sup>15</sup> Pampín, xiquiztiacan quinami anyuli, nocnían hual anquineltoaca. Amo xiyulican quinami yehuanten hual amo laijnamiquilo. Xiyulican quinami quinojen laijnamiquilo quipixtcate Dios lajmatilisli. <sup>16</sup> Xitequipanucan cuali pin tonalijmes hual anmitzcahuililo, pa yoje anyulis pa anquichías in hual Dios quinequi. Xicchihuacan yoje pampa tiyulticate pin tonalijmes

capa lacames quichihualo m'iac hual elehuis. <sup>17</sup> Pampa inon, amo xiyén oc se'pa lacames hual amo lajinamiquilo. Axan yes cuali pa anquimatis in hual in Tata quinequi pa anquich'ias. <sup>18</sup> Huan amo xilahuanacan. Amo anquitas paquilisli yoje. San anmoijlac huan yoje se tonali yajmo huil anyes laquixtili pa ipolehuilisli anmolajlaculisli. Amo quiman lamis in polehuilisli. Xicayacan anquimacahuiltitica pa in Esp'iritu Santo anmitzmoyaxcajtilis, yoje neli anquitas paquilisli. <sup>19</sup> Xilaqueztiacan se ca oc se anmoilijtica ca salmos huan himnos huan alabanzas pa anmoyolo. Xijcantaruilican (xijcuiquilian) in Tata anquilijtica lajtomes cuajcualtichin pa anmoyolo. <sup>20</sup> Quiman anquichijtica yoje, xicsehuican Dios toTajtzin mojmosta pa mochi ilaicnililisli huan ilatuchihualisli. Huan quiman yes anquisehu'ia Dios, xicsehuican pan ipampa itoca Jesucristo toTata. Pan ipampa yihual ticpialo inon hual toyaxca hual techmacahuiltia pa ticalaquisi iyampa Dios.

### *Quinami monequi pa tiyulisi pa tochan*

<sup>21</sup> Mochi se'se ca amhuanten ma moita tipichin ca moxtin in oc sequin. Ma ye yoje, pa yoje pan tonali hual monequi pa anquinpalehuis oc sequin, cuaquín huil anquintequipanulis anmocn'ian laneltocanijmes. Xiyén (xiyecan) yoje anmoxtin pampa anquimati anmomajtia ilaixpan Cristo huan yihual techilia chichahuac pa tiyulisi yoje. <sup>22</sup> In sihuames quipialo pa moitasi tipichin inminlaxpan inminlahuicalhuan, jan quinami quilalilo pa quimacahuiltisi pa in Tata Cristo quinmilis in hual quipiasi pa quichihuasi. <sup>23</sup> Monequi pa quichihuasi yoje pampa unca iyaxca se lahuical pa laicanas, jan quinami unca Cristo iyaxca pa laicanas capa moxtin in laneltocanijmes hual cate quinami icuerpo (inacayo). Yihual quinmiztia huan quinmacatia in hual monequi pa quipiasi. Huan yihual quinpalehu'ia huan quinnapatia. <sup>24</sup> Ma yoje, quinami moxtin in laneltocanijmes momacahuiltilo pa quinlaicanas Cristo, jan yoje in sihuames noje ma momacahuiltican pa quinlaicanasi inminlahuicalhuan ca mochi.

<sup>25</sup> Lacames, xiquinlasojlacan anmosihuahuan jan quinami Cristo techlasojla tehuanten in laneltocanijmes, huan pampín motemacac pa timoxtin tehuanten. <sup>26</sup> Inon quich'iac pa yoje techlalis pa tiyesi san se, cuali huan chipahuac pa yihual san. Quema, tejchipahuilic timoxtin Cristo tolajlaculisli tehuanten. Unca quinami yihual techaltitilic tolajlaculisli quiman ticyolcuitilije ticlaliytataloaya mochi tolaneltoalisli ca ilajtol. <sup>27</sup> Yoje quinchipahuilic Cristo ilacames pa mohualiquilisquiaya se lanechiculisli ca lacames. Quinequic pa yelosquiaya cualtichin pan ipampa ilaixpelalisli jan quinami unca se sihal lalaquentili pan tonali hual monamictia. Quinequi pa camo quipialosquiaya nindeno hual unca laijlaculi huan len yes hual Dios amo quitasquiaya cuali. Quema, quinequiaya Cristo pa yesi lacames hual quinlalic pa yesi iyaxca pa yuililosquiaya yojque chipahuac huan pa camo quinmotexpahuilisquiaya nindeno. <sup>28</sup> Yojque quinlasojla Cristo ilacames hual cate quinami icuerpo. Huan jan yoje monequi pa ilacames noje quinlasojlasi inminsihuahuan jan quinami se lalac quilasojla icuerpo yihual. Aquí hual quilasojla isihua molasojla yihual noje. <sup>29</sup> Amo quiman cataya se hual quixijxicuhuaya icuerpo (inacayo) yihual. Mochi se'se quiztia icuerpo, quilacualtitica huan moutzcutica pa huil mocahuas ca paquillisli. Huan jan yoje quinmiztia Cristo ilacames. <sup>30</sup> Unca pampa timoxtin ticate quinami ilajquitos icuerpo Cristo, ticate quinami lachihuali ca inacal huan iumines. <sup>31</sup> Huan Dios ilajtol quijtia, quil: "Pampa inon se lalac quicajcahuas itajtzin huan inantzin huan mocajtia inahuac isihua. Huan in omenten Dios quinmita quinami jan se san." <sup>32</sup> In unca se lamaxtilisli niman hué hual

tiquitalo pa Dios ilajtol. Unca se lamaxtilisli hual amo ticmatilo cuali len quinequi quijtúa. Dios techmaxtía yoje pampa Cristo huan ilacames hual quinnotzac cate se san ca yihual. <sup>33</sup>Ma yoje, ca monamictilisli pin lacames huan inminsihuahuan, quinequi Dios pa ticmatisi pampa mochi sejse lalac quipía pa quilasojla isihua quinami molasojla yihual noje. Huan isihua ma quilasojla ilahuical ca lamajtilisli.

## 6

<sup>1</sup>Amhuanten in xolomes, xiquinneltocacan anmotajtzitzían. Anquinelto- toca in Tata, pampín cuali unca pa anquinneltocas anmotajtzitzían. <sup>2</sup>Dios ilaj- tol quijtúa, quil: “Xiquinlasojla ca lamajtilisli motajtzin huan monantzin.” In lajtol unca in lapehualtilisli pin majlacli lajtomes capa neli techilía Dios pampa yahui tejchihuilía cuali sinda ticneltocalo in lajtol. <sup>3</sup>Quema, pampa in lajtol lami ca in lajtomes, quijtúa, quil: “Xicchia, pa yoje tiyulis cuali huan pa tiyulis míac tonalijmes pan in lalticpan.”

<sup>4</sup>Huan amhuanten inmintajtzitzían amo xiquinchihuilican anmoxolomes yoje hual amo melahuac huan yoje anquincualantía. Monequi pa anquin- scaltis anquinlasojlatica huan anquinlaneltoaltitica. Huan xiquinnextili- can pa quimatisi len quinequi quijtúa Dios ilajtol. Ca mochi, xiquinnextili- can quinami monequi pa quichihuasi cuali sinda inon hual quichijtcate amo cana cuali. Xicchiuacan yoje pan ipampa Dios ilajmatilisli hual unca laijtic anmoyolo.

<sup>5</sup>Amhuanten in tequipanujquimes hual amo quinlaxlahuilo, xiquinnelto- cacan anmotecojuan nican pan lalticpan. Xicmatican ximomajtican inmin- laixpan pa anquintequipanuilis cuali, jan anquinctica pa anmotequipan- ulisli yes lachihuali cuali. Yoje monequi pa quichihuasi Cristo ilacames. Pampín, xiquintequipanuilican quinami anquintequipanuiliía Cristo.

<sup>6</sup>Amo xitequipanucan jan pa anmotecojuan anmitzitasi antequipanujtica cuali, yoje pa anmitzitas cuali. Noje xitequipanucan cuali pan tonalijmes hual amo anmitziztcate. Xitequipanucan quinami monequi tequipanulo Cristo itequipanujquimes. Monequi pa quichihuasi ca mochi inminyolo quinami Dios quinequi. <sup>7</sup>Xiquintequipanuilican anmotecojuan yoje, an- quinctica anquinchihuilía cuali. Xiquintequipanuilican quinami anquite- quipanuliaya in Tata huan amo quinami anquintequipanuiliaya jan la- cames san. <sup>8</sup>Anquimati pampa len yes cuali hual quichía mochi sejse, yoje in Tata quicuepilis sinda in se unca tequipanujquil hual iteco mocuhuilic, o sinda in se amo unca tequipanujquil lacuhuali.

<sup>9</sup>Huan amhuanten in tecojuan xiquinchihuilican jan yoje ca anmote- quipanujquimes huan ximocahuacan pa anquintzajtzilis ancualantica, an- quinmilijtica len amo cuali anyahui anquinchihuilía pa anquincocoltis. Anquimati quinami inminTeco huan amnoTeco unca pin cielo (ilhuicac), yihual in Tata Jesús. Huan anmitziztica amhuanten in tecojuan jan quinami quinmiztica anmotequipanujquimes. Huan mas que amhuanten anunca in tecojuan, ma yoje amo anmitzita niman cuali huan yehuanten amo yoje cuali.

### *Quinami moanalo Dios ilacames pan ipampa in Espíritu*

<sup>10</sup>Pa niclamis in amal, nocnían, ma annimitzili inon: Anyultica ca in Tata quinami se san. Pampín, xicanacan in Tata ichichualisli niman hué pa anmoyolo. <sup>11</sup>Dios quipía míac pa amhuanten hual anmitzpalehuis pa anmitzhueliltis anmoanas ca in lili. Yihual in lili motolinía pa anmitzcua- jcuanas pa yoje anmijcuanis pa iojli Cristo. Inon hual Dios quipía pa

amhuanten quitzacuilis anmoyolo pa camo moitas pin polehuilisli. Anmi-jtzacuilia quinami in tzotzomajli lachihuali ca teposli calica molaquentilo in guaches. Huan anmi-jtzacuilia quinami in teposli calica mopalehuilo sinda moanticate. <sup>12</sup> Xicmatican pampa tehuanten amo timoanticate ca lacames lachihuali ca nacal huan esli quinami tehuanten. No, timoanticate ca miac ijyecames hual quinequilo techlamisi. Quipialo in ijyecames miac lahuelilitlisli, mas que sequin inminlahuelilitlisli unca hué huan oc sequin inminlahuelilitlisli amo yoje hué. Yulilo nepa pin cielo itzindan capa unca Dios, huan huelitilo ca chicalualisli pa mochi in lalticpan. Huelitilo capa moxtin in lacames hual cate laticumac pa inminyolo pampa cate laijcanili pa camo cayasi capa unca Dios. <sup>13</sup> Pampa inon, xicanacan mochi hual Dios quipia pa anmitzmacas pa anmitzpalehuis, cate innojen calica anmoanas. Yoje huil anmoqueztias anquisulajtica Satanás huan moxtin iijyecames pin tonali amo cuali quiman yes molasalo anmopan. Huan in tonali hual anlaquisas ca mochi hual Dios anmitzpaheux pa anquichiasquiaya, cuaquin huil anmocahuas anmoqueztica inminlaixpan anmolacocolinjmes lasulahuali. <sup>14</sup> Ximoquezticacan lachijchihuali cuaquin, pa anmoanas. Axan, ximopehualtican pa anyes lacames mejmelahuac, mojmosta anquichijtica huan anquijjutica in hual unca melahuac. Xiyulican mojmosta melahuac. Yoje pa anmoyolo amo anquitas polehuilisli pan tonali hual anmoanas ca Satanás huan iijyecames. Sinda anyulis yoje, anyes quinami se guache hual mochijchia ca icuejtiloni pa icuerpo pa yoje itzotzomajli amo nadita quitzacuas pan tonali hual quipias pa moanas. Mochijchia noje se guache molaquentitica ca teposli pa camo huil quichihuilia polehuilisli nindeno iyolo. <sup>15</sup> Ximochijchihuacan pa ancayas lachijchihuali pa anyas ca capic yes pa anquimilis lacames in lamachilitlisli cuali hual quinmaca mosehuilisli pa inminyolo. Yoje anyes quinami guaches hual quinpioalo icixhuajmes lachijchihuali ca lacsames pa huil yasi ca capic yes. <sup>16</sup> Ca mochi inon, monotza miac pa anmotzacuilis pa camo anquitas polehuilisli pa anmoyolo. Huil anmotzacuilis pan ipampa quinami anquineltoca Cristo ca mochi anmoyolo. Inon unca quinami in teposli hual in guaches quipialo pa inminmajmajuan. Ca inon quintzacualo pa camo cajsisi inmincuerpo in lamulalisli huan teposlimes calica moanalo. Huan jan yoje anmolaneltocalisli hual anquilalia ca Cristo anmitzpalehuis pa anmonapatis pa camo anmitzajsis mochi hual Satanás anmijchihuilia. Anmijchihuilia pa anmocahuas pa anquineltocas Cristo. Unca quinami Satanás anmitzmulatica ca lamulalisli militinticate. <sup>17</sup> Huan xicalican pa anmotzontecon in lajtol melahuac calica anmitzquixtic Cristo pin ipolehuilisli anmolaijlaculisli pa yoje amo anyes lapoluli. In lajtol melahuac unca quinami se lasehualoni (sombbrero) lachihuali ca teposli pa anmotzontecon calica se guache motzacuilia pa camo quitecuasi pa itzontecon. Xicmatican cuali ilajtol Dios. In unca quinami se teposli latequi hual in Espiritu Santo quipia calica anmitzhueliltia pa anquitequipanus pan tonali jmes hual anmoantica ca Satanás huan in oc sequin ijyecames. <sup>18</sup> Pa huil anquitequipanus mochi inon hual anmitzmaca Dios pa anmitzpalehuis, monequi pa anquilajlanis Dios cajcapa yes anmoita, anquimacahuilititica in Espiritu Santo pa moyaxcajtis ca anmoyolo. Yoje yihual quilajlanis Dios pa amhuanten. Amo ximocahuacan pa anquilajlanis Dios pa mochi hual amhuanten anquinequi. In lajlanilisli amo ximocahuacan pa anquichias ca mochi anmoyolo. Ximozticacan pa camo anmitztilanilis anmoyolo Satanás pa anmijchihualtis len amo cuali. Anyes quinami guaches hual mocahualo ejsaticate, laizticate, pa camo anmitzajsis se lacocolini pa anmoyolo. Yojque



xiclajlanican Dios pa len yes monequi pa quipiasi ilacames. <sup>19</sup> Huan xicla-  
 jlanican pa nehual, pa Dios nechmacas lajtol pa niquinmilis oc sequin in  
 lamachiltisli cuali. Amaqui huil quimati len quinequi quijtúa sinda Dios  
 amo quipalehuía. Axan yihual quinpalejtica lacames pa quimatisi. Pampín,  
 xiclajlanican pa camo nimomajtis niquinnahuatilis in lamachiltisli cuali.  
<sup>20</sup> Niunca se hual nicnahuatía inon, mas que niunca latzacuali pa calijtic.  
 Xiclajlanican Dios pa nehual niquinlaquetzilis ca in lamachiltisli cuali, jan  
 quinami nicpiás pa niquinmilis, amo nimomajtitica.

*Pablo quinchicahua*

<sup>21</sup> Pa anquimatis in hual nechpanujtica huan in hual nicchijtica, tocní  
 Tíquico anmitzmachiltis mochi. Yihual tocní hual ticlasojlalo huan yihual se  
 itequipanujquil toTata. Yihual ticmatilo pampa yuli quichijtía in hual quipía  
 pa quichías. Yuli ca in Tata huelitijtica pa iyolo. <sup>22</sup> Pampa inon, nictilanic  
 pa yas ca amhuanten, pa anquimatis quinami unca ca tehuanten huan pa  
 anmijchicahualtilis anmoyolo.

<sup>23</sup> Ma quipiacan mosehuilisli huan mochi hual cuali tocnían. Ma mola-  
 sojlacan quinami monequi pa molasojlasi yehuanten hual quilalilo mochi  
 inminlaneltoocalisli ca Cristo. Quipialo in mosehuilisli huan in lasojlalisli  
 pampa Dios toTajtzin huan in Tata Jesucristo quinmacalo. <sup>24</sup> Ma mocahua  
 Dios ilachihualisli cuali ca moxtin hual quilasojlalo toTata Jesucristo ca  
 lasojlalisli hual amo quiman lamis huan amo quiman mopala. Yoje ma ye.



## Filipenses: In amal hual in lanahuatini Pablo quinmijcuiluilic laneltocaniymes pin caltilan Filipos

### *Pablo quinmijcuiluilía capa unca latzacuali calijtic*

<sup>1</sup> Tehuanten Pablo huan Timoteo hual ticpialo Cristo Jesús quinami toTeco antimitzjicuiluilijticate (antimitzescibiruilijticate) amhuanten hual umpa anchantitica pa Filipos. Amhuanten anuncia Dios ilacames pan ipampa inon hual Cristo anmijchihuilic. Antimitzjicuiluilijticate amhuanten noje in hueyenten hual anquinmiztia in oc sequin laneltocaniymes huan amhuanten hual anquinpalehuía. <sup>2</sup> Ma Dios toTajtzin hual iTajtzin toTata Jesucristo anmijchihuilí cuali huan ma anmitzmaca mosehuilislí pa anmoyolo.

### *Quinami Pablo quilajlaniaya Dios pa yehuanten hual quineltocaloaya pa Filipos*

<sup>3</sup> Nicsehuía noDios mochi quijquiman annimitzijnamiquía. <sup>4</sup> Mojmosta nicehuía quiman niclajlanía, nicehuía Dios pa amhuanten. <sup>5</sup> Quema, ca paquilislí nilaquetza ca Dios pampa antequipanuc ca nehual pa yoje oc sequin lacames quimatisi in lamachiltlisli cuali. Amo anmocahuac anquichijtiac yojque quiman anpehuac anquineltocac in lamachiltlisli cuali. Huan yoje anquichijtiá axcan. <sup>6</sup> Huan amo nicmahuilía inahuac inon hual Dios anmijchihuilijtica. Nicnequi niqijjtúa, yahui anmijchihuilía mochi hual pehuac anmijchihuilic pa anmoyolo. Huan laquisas pa in tonali quiman Cristo Jesús hualas oc seppa pa huelitis nican pan lalticpan. <sup>7</sup> Huan jan unca cuali pa nehual nicchixtías inon hual nicmati pampa anpanus anmoxtin, pampa mojmosta annimitzpiá amhuanten nocnián pa noyolo. Inon unca pampa anquipía in cuali hual Dios anmitzmaca jan quinami nehual noje nicpiá. Quema, niqijnamiquía inon capa yes, ma caya quiman niunca latzacuali calijtic, ma caya quiman niquinnextilijtica lacames pampa in lamachiltlisli cuali hual niquinmilijtica neli unca Dios ilamachiltlisli cuali. Pampín amo lamis cayas yojque. <sup>8</sup> Inon annimitzilía pampa Dios quimati neli quinami annimitznequi anmoxtin ca in lasojlalisli hual Cristo Jesús nechmaca pa amhuanten. <sup>9</sup> Huan niclajlanía Dios pa yihual anmitzmachiltis quinami huil anlalasoilas míac. Ma yoje, niclajlanía pa anmitzmachiltis pa anlalasoilas ca lajmatlisli hual yoje cayas ca se lajtulisli ca Dios ilamaxtilislí. <sup>10</sup> Niclajlanía inon pa yoje neli anquimatis len unca in niman cuali pa anquichías amhuanten. Monequi pa anquimatis inon pa yojque ancayas amo anquipixtica len lajilaculisli calica se quinequi anmitzmotexpahuilía pa mochi in tonalijmes quiman ticchixticate in tonali hual mocuepas Cristo. <sup>11</sup> Quema, niclajlanía Dios pa anmitzhueliltis Jesucristo pa anyultías anquichijtica in míac hual cuali hual Dios quinequi pa anquichías. Yojque moxtin laquetzasi ca lajcomes huejué pa yihual ilahueliltisli hué huan ilaixpelalisli cualtichin.

### *Pa nehual amo unca yulislí sinda Cristo amo unca ca nehual*

<sup>12</sup> Huan nocnián, nicnequi pa anquimatis inon: Inon hual nechpanuc neli quinpalehuic yehuanten nican pa quimatisi míac oc sequin in lamachiltlisli cuali. <sup>13</sup> Quema, niunca latzacuali pa calijtic huan moxtin in guaches hual

quitzialo in hué César quimatilo quinami niunca latzacuali calijtic pampa niquinlaquetzilía lacames ilamachiltisli cuali Cristo. Huan noje quimatilo inon moxtin in oc sequin hual nican cate. <sup>14</sup> Huan in miac ca tocnían hual cate iyaxca toTata yajmo momajtilo miac quiman quinlaquetzilijcate Dios ilajtol. Quema, amo momajtilo pa quinlaquetzilisi ilajtol Dios mas que niunca latzacuali pa calijtic.

<sup>15</sup> Huan neli, sequin quinlaquetzililo ilajtol Cristo pampa mocualanililo nonahuac nehual huan quinequilo molalilo nopan quinami nolacocolinijmes. Huan oc sequin quilamachiltilo ilajtol Cristo pampa cuajcuali inminyolo huan quinequilo pa oc sequin quimatisi ilajtol yihual. <sup>16</sup> Ca niquic, sequin quilamachiltilo ilajtol Dios pampa quilasojlalo Jesucristo huan ilajtol huan yehuanten hual iyaxca. Quimatilo pampa niunca nican latzacuali pin calijtic pampa nilanextilijtinemiaya quinami in lamachiltisli cuali neli unca ilajtol Dios. <sup>17</sup> Huan ca ompic, in oc sequin quilamachiltilo ilajtol Cristo pampa quinequilo mochihualo huejueyenten, inminlaicananijmes yehuanten hual iyaxca Dios. Amo quilamachiltilo ilajtol Cristo ca inminyolo melahuac. Quema, quiytulo laijtic pa inminyolo pampa yalo nechlalililo oc sequin lacocoltilisli pa nipanus nican pin calijtic capa niunca latzacuali. <sup>18</sup> Ma yojque. Ma quinlaquetzilican ilajtol Cristo pa yojque miac lacames mochihuasi ilanechiculisli inminlamaxtilisli. Ma quinlaquetzilican ilajtol yihual pampa quinequilo pa lacames quimatisi ilajtol Cristo. Cate ca mochi innojen lachihualisli quilamachiltilo yehuanten ilajtol. Ca inon nicpía paquilisli. Huan amo in san. <sup>19</sup> Noje nicpías paquilisli pampa nicmati inon hual nechpanujtica quisas cuali pa yojque nehual nicayas lamacahuai.

Huan inon cayas pampa anquilajlantica Dios pa nehual, huan noje pampa nechpalehuía in iEspíritu Jesucristo. <sup>20</sup> Quema, inon quisas cuali pa nehual yojque quinami nicchixtica ca miac lanequilisli pa panus. Quisas cuali yojque quinami niqijitúa neli pa noyolo huan nicchixtica da amo nicchía nindeno hual pampa inon nipinahuas. Huan noje quinami nicchixtica axan, nicnequi pa camo nimomajtis nadita pa niqijitus ilajtol Cristo jan quinami mojmosta nicchíac. Inon nicnequi pa yoje nicchihuilis hué Cristo pan ipampa nocuerpo, ma ye sinda niyulis, ma ye sinda nimiquis. Yoje nicnequi pa moitas quinami Cristo unca niman hué huan amo unca nindeno hual ajsis yes hué quinami yihual. <sup>21</sup> Unca pampa pa nehual sinda niyuli, Cristo monotza mochi, niyuli jan pa yihual san. Huan sinda nimiquis, nicanas mochi pampa nicayas capa yihual unca. <sup>22</sup> Huan sinda niyuli, yojque huil nicchía miac hual cuali pan ipampa quinami nictequipanuilía. Pampín, amo nicmati len yesquiaya in cuali pa nicchías. <sup>23</sup> Unca etiactica, pampa nimoita lajco pin ome lachihualisli. Pan se lachihualisli, nimiquisquiaya pa yoje nicayasquiaya ca Cristo pampa inon yesquiaya niman cuali pa nehual. Amo ajsisquiaya caya yoje cuali sinda nimocahua niyultica. <sup>24</sup> Ma yoje, pa amhuanten, monequi miac pa nimocahuas nican niyultica pa yojque annimitzpalehuis. <sup>25</sup> Huan nicmati pa noyolo pampa amo nía nimiqui. Nicmati pampa nimocahuas niyultica ca anmoxtin pa yojque anquipixtías miac paquilisli pan ipampa quinami anquilalía anmolaneltocalisli ca Jesucristo. <sup>26</sup> Quema, nimocahuas niyultica ca amhuanten pa yojque anlaquetzas ca lajtomes niman hué pa Cristo Jesús ipampa inon hual nejchihuilis. Nechmacahuiltis pa nicayas oc sejpa ca amhuanten. <sup>27</sup> Jan xiquitacan pa yoje quinami anyulis yes quinami monequi pa yulis se hual quipía ilaneltocalisli pa ilamachiltisli cuali Cristo. Xiyulican yojque. Cuaquinon sinda nihualas annimitzitas o sinda amo nihualas, ma yojque nijcaquis

quijtusi pampa anmocajtica jan se pa anmoyolo pan ipampa in Espíritu Santo. Huan nijaquis quijtusi quinami ca se laijnamiquilisli anmoxtin anmotolintica pa anquinnextilis yehuanten hual molalilo ipan Dios pampa unca melahuac ilamachilitisli cuali capa ticlalilo tolaneltocalisli. <sup>28</sup> Huan amo ximomajtan nindeno pampa molalilo anmopan pa anmijchihuilisi tetzcuinuc yehuanten. Sinda amo anmomajtía inminlaixpan yehuanten, cuaquinon pampa inon quimatisi yehuanten anmolacocolinjmes pampa Dios anmitzpalejtica pa camo anmomajtis. Huan quimatisi pampa yahui quinmijlacúa yehuanten. Ma yoje, inon noje quinmachiltis pampa yihual Dios yahui anmitzquixtilía pin ipolehulisli anmolajlaculisli. <sup>29</sup> Inon unca pampa Dios anmijchihuilic cuali pa yojque anquilalis anmolaneltocalisli ca Cristo. Huan amo jan in san. Yihual noje anmijchihuilía cuali quiman anmitzmacahuiltía pa anpanus lacocoltilisli pa Cristo. <sup>30</sup> Anquitac inon hual nejchihuilije in tonalijmes hual nicataya nepa pa Filipos. Nipanuc míac lacocoltilisli hual nejchihuilije yehuanten, huan axcan anquimati quinami nipanujtica lacocoltilisli nican pin calijtic capa niunca latzacuali. Huan yoje anpanujtica lacocoltilisli amhuanten noje pampa anmijchihuilijtcate inon yehuanten in lacocolinjmes hual molalilo ipan Dios.

## 2

### *Cristo mochíac tipichin mas que yihual unca niman hué*

<sup>1</sup> Cristo anmijchicahuiltía anmoyolo, anmitzlacahualtic pan ipampa quinami anmitzlasojla. Anquipía in Espíritu Santo pampa yihual yuli ca laijtic amhuanten mochi sejse. Axan anquimati quinami yihual anmitznequi huan anmitzicnilía huan pampa inon anquimati anlaicnilía huan anlalaso-  
jla. <sup>2</sup> Yoje pampa anquipía mochi inon pan ipampa Cristo, xijchihuilican pa nicayas ca niman míac paquilisli. Nicnequi niquijtúa, ximochihuacan se san ca quinami anlajtúa laijtic anmoyolo. Xicpiacan in lasojlalisli se pa oc se huan pa toTata. Xiyén (Xiyecan) ca mochi anmoyolo ca se lajtlisli se ca oc se. <sup>3</sup> Amo xilajtucan laijtic anmoyolo quinami anquichías len pa yoje san amhuanten ancanas in hual anquinequi. Amo xicchíacan pa anmitzlasojlas lacames pampa quixtocalo in hual anquichijtica, yoje quinami amhuanten ancataya hueyenten. Yes niman cuali pa anmoitas amhuanten quinami tijtipichin, huan pa anquijtus laijtic pa anmoyolo pampa oc sequin cate cuali huan amhuanten amo yoje cuali quinami yehuanten. <sup>4</sup> Mochi sejse ca amhuanten ma camo quitemu quinami quipías in hual cuajnesi unca iyaxca pa quipías. Yes cuali pa quitemus mochi sejse quinami quinpalehuis oc sequin pa quipias innojen hual unca inminyaxca pa quipias.

<sup>5</sup> Ma laijnamiqican moxtin ca amhuanten yoje quinami Cristo noje laijnamiquic quiman hualaya pin lalticpan. <sup>6</sup> Yihual amo mocahua pa yes jan quinami Dios unca. Ma yoje, amo quijtuaya laijtic pa iyolo pampa quipiaya pa nesisquiaya quinami Dios pan ipampa mochi lanextilisli pa yoje lacames quitelosquiaya jan quinami Dios. <sup>7</sup> Amo quichíac yoje. San mocahuac pa quitequipanus ilahuelilitisli huan mocahuac pa nesisquiaya ca mochi ilaixpelalisli cualtichin calica lacames quiximatilosquiaya quinami Dios. Cuaquinon, pan lalticpan hualac nestataya quinami se hual quinquipanuilía oc sequin. Quema, lacatic pan ipampa se sihual quinami tehuanten, yoje mochijtataya local. <sup>8</sup> Huan nepa capa moitaya nestataya quinami local, mochihuaya quinami local tipichin, amo quinami se local hué hual moixtoca. Huan quineltocaya mochi hual Dios quilliaya, quineltocac quiman Dios quilic pa motemacas pa miquis. Quema, quinmacahuiltic pa quimictisi

pan se cuahuil. <sup>9</sup> Pampa inon, Dios noje quichíac pa yes niman hué, huan quitocayaltic ca se itoca hual lanextilía pampa yihual quipía niman míac lahuellitlisli. Moxtin oc sequin amo quiman ajsisi quipiasí lahuellitlisli yoje hué. <sup>10</sup> Dios quitocayaltic yoje quinami yihual motoca, pa yoje yihual hual itoca Jesús quimolancuacuetzilisi moxtin pin cielo huan pan in lalticpan huan itzindan in lalticpan. <sup>11</sup> Huan moxtin quijtusi quineltocaticate ca mochi inminyolo pampa Jesucristo unca in Tata, Yojque quijtuticate míac lajtomes huejué huan cuajcualtichin pa Dios toTajtzin.

*In laneltocanjmes lahuilo pin lalticpan*

<sup>12</sup> yojque, amhuanten hual annimitzlasojla, amo anmocahuac pa anquineltocasquiaya Dios ilajtol hual annimitzilic. Axcan, jan quinami anquichíac nepa quiman nicataya ca amhuanten, ximoiztiacan míac pa anquichijtías yojque quiman amo niunca ca amhuanten. Huan yojque ximotolintiacan pa anajsis anyes jan quinami Dios quinequi pa ajsisi yesi xolomes. Huan nepa capa anquichijtía yojque, ximomajtitiacan pa como anquichías len amo cuali pa como anquicualantis Dios. <sup>13</sup> Xiquijnamiquican pampa Dios unca lajtic pa anmoyolo amhuanten pa anmitznequiltis pa anquichías in hual cuali pa amhuanten. Inon unca itequipanulisli hual quilalic pa mochías.

<sup>14</sup> Xicchihuacan mochi hual Dios quinequi pa anquichías, huan amo xicualantiacan anmolaxilijtica lajtomes pampa anquipía pa anquichías inon. <sup>15</sup> yojque amo anmitzmotexpahuilisi inminyampa Dios huan lacames huan ancayas chipahuac pa anmoyolo. Neli anyes xolomes Dios huan yihual amo anmitzlalilis len calica anmitzmotexpahuilisi amhuanten, mas que anunca ca lacames pin lalticpan hual amo yulilo melahuac. Yulilo ca oc se lamaxtilisli, amo quinami Dios quinlalilic pa yulisi. Dios anmitzlalic ca yehuanten pin lalticpan pa yoje anyes quinami tixuxlimes pa anquinlahuis lacames lajtic pa inminyolo pa quimatisi ilajtol Dios. <sup>16</sup> Inon amhuanten amo anmocahuas pa anquineltocas. Huan amo anmocahuas pa anquinlaquetzilis ilajtol Dios calica yihual quinyuliltía lacames. Pampa in, nilajtus hué huan nilajtus ca paquilisli anmonahuac amhuanten pa in tonali hual hualas Cristo oc sejpá. Inon yes pampa nicmatis pa in tonali amo jan lapic (de in balde) nitequipanuaya chichahuac pa yojque anquipiasquiaya ilajtol Dios. <sup>17</sup> Huan amo inon san. Noje anmotemacac ca Dios quinami se huendi pa anquitequipanulisli pampa anquineltoca Jesucristo. Huan nehual sinda nechmictisi huan quisas noesli quinami se huendi, yojque yes anmohuendi amhuanten noje. Huan pampa inon nicpías paquilisli. Noje nehual huan anmoxtin ticpías paquilisli. <sup>18</sup> Jan yojque, xicpiacan paquilisli, noje ca nehual ma ticpiacan paquilisli.

*Timoteo huan Epafrodito*

<sup>19</sup> Ma yoje, sinda in Tata Jesús quichijchía mochi pa huil nicchías, nicchixtica pa como nihuejcahuas pa annimitztilanilis Timoteo pa yojque nehual noje nicayas lapaquiltisli quiman nicmatis quinami anunca huan len anmitzpanujtica. <sup>20</sup> Annimitztilanilijtica Timoteo, pampa amo nicpía oc se nican quinami yihual hual laijnamiquía lajtic pa iyolo quinami nehual quiman annimitzijnamiquía amhuanten. Yihual Timoteo neli anmitzijnamiquía ca mochi iyolo jan quinami nehual. Yihual quinequi pa mochi quisas cuali pa amhuanten. <sup>21</sup> Amo nicnequi nictilani oc se, jan Timoteo san. Moxtin in oc sequin jan quitemulo len pa mopaquiltisi yehuanten san, amo pa quipaquiltisi Cristo Jesús. <sup>22</sup> Ma yoje, amhuanten anquimati quinami cuali

yihual tequipanúa. Nechtequipanuilic quinami se xolol quitequipanuiliía itajtzin, pa yoje míac oc sequin lacames quimatisi in lamachiltisli cuali. <sup>23</sup> Yoje, nicchixtica pa nictilanis yihual jan axcan, san pa in tonali hual niquitas quinami yahui nechpanúa nican pin calijtic capa niunca latzacuali. <sup>24</sup> Huan nicmati pa noyolo inon hual in Tata nechnextilic. Nehual amo nihuejcahuas nías ca amhuanten pa annimitzitas.

<sup>25</sup> Ma yoje, niqijituc pampa monequi pa annimitztilanilis Epafrodito. Yihual nocni ilaneltocani Cristo, tictequipanuililo Cristo tiomenten, huan tipanulo lacocoltilisli pa Cristo tiomenten quinami guaches. Annechtilanilic pa yihual nechpalehuis pampa monequiaya pa nicpiasquiaya lapalehuilisli. <sup>26</sup> Annimitztilanilijtica axan jan pampa yihual quimatic quinami anquicaquic pampa cataya cocoxqui. <sup>27</sup> Huan neli cataya cocoxqui, ca je tipichin miquiaya. Ma yoje, Dios quicnilic huan quipajtic, huan amo yihual san. Nehual noje nechicnilic Dios pampa quipajtic Epafrodito pa yoje amo nechcocujtiasquiaya noyolo oc sejpa míac quinami nechcocujtataya quipiaya tonalijmes. <sup>28</sup> Pampín, niejsehuía míac pa annimitztilanilis, pa yoje pan tonali hual anquitas, cuaquín anquipías paquilisli oc sejpa huan yojqe mosehuis noyolo. <sup>29</sup> Xicnamiquican cuali ca mochi paquilisli, pampa yihual anmocni pan ipampa in Tata. Xicpilican lacames quinami yihual míac lasojlalisli. <sup>30</sup> Yihual quitequipanuiliaya Cristo huan pampín ca nadita yihual yahuiaya miqui. Quema, yihual molalic capa ca nadita yihual yahuiaya miqui pa yoje huil nejchihuilis mochi hual amhuanten amo huil annejchihuiliaya.

### 3

#### *Quijtúa Pablo quinami se quipías yulilisli hual neli melahuac*

<sup>1</sup> Huan nocnían, unca inon hual mocahua pa annimitztilis: Ma annimtizili xicpiacan paquilisli pampa amhuanten anunca Dios ixolomes. Amo nimomaca tequil pampa annimitzijcuiluilía in lajtomes oc sejpa. Huan pa amhuanten yes cuali pampa anmijzacuilis pa camo anquitas polehuilisli. <sup>2</sup> Ximoiztiacan pa camo anmitzcuajcuamanas in lamaxtinijmes hual yulilo amo cuali quichijticate quinami peojmes. Quinectinemilo quipalalo Dios ilamaxtilisli ca inminlamaxtilisli yehuanten. Quijtulo monequi pa anquipías latequili anmocuilaxli pa yoje momatis pampa anunca ixolomes Dios, jan quinami latequilo in judíos. <sup>3</sup> Quema, ximoiztiacan pampa in lamaxtinijmes cate amo cuajcuali. Tehuanten neli ticate Dios ixolomes. Tehuanten ticpialo ilanextilisli Dios pa toyolo. Sinda se quipía in lanextilisli pa icuilaxli san, inon amo monotza pa lanextilis pampa yihual unca se ca Dios ixolomes. Tehuanten ticmolancuacuetzililo Dios pan ipampa in Espíritu Santo huan tiquililo lajtomes huejué Cristo Jesús pampa techquixtilic tolaijlaculisli. Ticmatilo pampa amo monotza nindeno in hual huil ticchihualo tehuanten tohuían, pampa amo techpalehuía nindeno pa timochihuasi ixolomes Dios. <sup>4</sup> Sinda huil timochihualoaya ixolomes Dios pan ipampa len ticchihualo, cuaquín nehual nicchihuaya inon, sinda nicmatiaya pampa yoje nimochiasquiaya se ca Dios ixolomes. Sinda cataya oc se lalcal hual quijtuya pampa ca yihual unca iyaxca pa mochías se ca Dios ixolomes pan ipampa ilahuelilitisli hual canac pan ipampa len quichíac, cuaquín nehual niqijituaya unca noyaxca pa nimochías se ixolol Dios ca lahuelilitisli hué hual in se ilahuelilitisli amo quiman ajsis yes yoje hué. <sup>5</sup> Inon niqijitúa, pampa nechlalilije nopan inminlanextilisli in judíos quiman nilacatic huan niyulic chicué tonalijmes.

Nilacatic israelito, nehual se imiahuimes Benjamin hual yec se ca in doce (majlacli huan ome) lacames hual quinpehualtije in israelitos. Quema, nehual niunca se hebreo pampa notajtzitzian yeje mochi hebreos. Huan ilajtol Dios hual in judíos quimaxtilo nicneltocac yojque quinami motolinilo in fariseos pa quinellocasi ca niman miac chicahualisli. <sup>6</sup> In oc sequin nocnian judíos amo chahuatiloaya inahuac mochi hual quinellocalo in judíos quinami nehual nichahuatiaya. Huan nicnequiaya pa yoje yultialosquiaya. Quema, niquintojtocaya pa niquinchihuilis lacocoltlisli yehuanten in judíos hual quilalije inminlanellocalisli ca Jesucristo. Huan moxtin in fariseos nechitaloaya quinami se hual amo quipiaya laijlaculisli, pampa nicchihuaya mochi hual quijtúa in lajtol hual quimaxtilo in judíos. In lajtol quinnextilía quinami yehuanten quipialo pa quitequipanuilisli Dios. <sup>7</sup> Inon niqijituni cataya lapalehuilisli pa nehual hual nicpiaya pampa nicchihuani mochi hual quijtúa in lajtol. Axan niquita pampa amo unca tipichin lapalehuilisli pa nehual, pampa nicpía mochi lapalehuilisli pan ipampa Cristo. <sup>8</sup> Quema, neli niqijitúa noje pampa mochi capa niclalic nolanellocalisli amo nejchi-huilic nadita lapalehuilisli. Unca yojque, pampa axan niquiximati Cristo Jesús noTata huan inon monotza niman miac, amo yoje miac monotza inon hual niqijituni pampa catani lapalehuilisli pa nehual. Huan pampa niclalic nolanellocalisli ca Cristo, nicpoluc mochi hual nicpiaya.

Ma yoje niquita mochi in hual nicpoluc jan quinami se bagazo palanquil, pa yojque nicpiás Cristo quinami noTeco huan mochi hual quipía pa nechmacas. <sup>9</sup> Quema, niquita mochi inon hual nicneltocani quinami cuilal pa yojque Dios nechitas san se ca Cristo. Axcan Dios nechitas amo ca laijlaculisli. Inon amo cayas pampa nicchíac in hual quijtúa in lajtol hual quimaxtilo in judíos. Cayas pampa niclalic nolanellocalisli ca Cristo. Yojque Dios quijtúa pampa se amo quipía laijlaculisli pampa in se quilalía ilanellocalisli ca Cristo. <sup>10</sup> Huan nicnequi nicpía Cristo huan nicnequi nicaya san se ca yihual pa yoje niquiximatis huan pa nicmatis ilahueliltilisli hué. Quinextilic inon pan tonali hual yulic oc sejpa. Quisac pin mijquimes. Huan nicnequi nicpía Cristo pa nicpiás nolaxilulislis ca quinami yihual panuc lacocoltlisli. Nehual nicnequi nimoita quinami se hual miquic ca Cristo pan tonali hual yihual miquic, pa yoje yajmo niyulis quinami niyulini. <sup>11</sup> Inon nicnequi ma ye quinami yes, pa yoje niajsis niyulis oc sejpa pa nicayas ca Cristo quiman nimiquis.

*Pablo motolinía pa ajsis capa Cristo quinequi pa cayas*

<sup>12</sup> Amo niqijitutica pampa nicajsic mochi hual Cristo quipía pa nehual. Huan amo niqijitutica yihual nejchihuilic pa niyes mochi quinami yihual quinequi. Ma yoje, niman nimotolinía pa nimoyaxajtilis in hual Cristo quipía pa nehual. Nicchía yoje pampa nicmati Cristo Jesús nechmoyaxajtilic. <sup>13</sup> Nocnian, niqijitúa laijtic nehual pampa nehual ayamo nechmoyaxajtilic in hual Cristo nechpilía. Jan in se san nicchía. In hual nechpanuc yajmo nicmacahuilítia pa nejtzacuilis pa camo niyultías huan pa camo nicchijitías quinami Dios quinequi pa nicchías. Yoje, quinami se hual molalúa ca laluxtilisli, niman nimotolinía ca mochi nolahueliltilisli pa nicajsis in hual unca nolaixpan, in hual Dios quipía pa nehual. <sup>14</sup> Quema, niman nilatojtocatía pa niajsis capa Dios quilalic pa niajsis, nicnequi niqijitúa, capa nicajsis in laxlahuilisli. Pa inon pan ipampa Cristo Jesús, Dios nechnotzac pa nicanas iojli hual nechuica pa in cielo (ilhuicac). In laxlahuilisli unca noyulislisli yancuic hual nicpía pan ipampa Cristo.

<sup>15</sup> Yoje, tehuanten hual huil tilaijnamiquilo cuali inahuac in hual unca iyaxca Dios, ma ticmatican laiitjc pa toyolo pampa ayamo tiajsije tiyeje quinami Dios quinequi. Huan sinda sequin ca amhuanten anquijtua ca oc se laiynamiquilisi, cuaquinon Dios noje anmitzmachiltis quinami amo unca melahuac in hual anquijjutica pa anmoyolo. <sup>16</sup> Jan ximoiztiacan pa anmocajtias mojmosta pa iojli Dios. Huan ximoiztiacan pa como anmocajtias pa anquineltocas mochi hual anmonextilic quinami monequi pa anyulis pan Dios iojli, hual anquimati axan.

<sup>17</sup> Nocnían, xicayacan quinami nehual, xiyultiacan quinami nehual niyuli. Xiquitacan yehuanten hual yulilo yoje huan xiyulican quinami yehuanten, jan quinami antechitac tehuanten tiyuliloaya. <sup>18</sup> Nicpia pa annimitzijnamiquiltis inon. Unca pampa miac annimitzilic sejpa huan oc sejpa quinami cate miac hual quijtulo pampa cate Dios ixolomes. Ma yoje, yulilo quinami ilacocolinjmes Cristo. Amo quineltocalo in lajtol hual quinnextilic quinami Cristo miquic pin cuahuil pa yehuanten. Huan axan nichoca annimitzilijtica inon. <sup>19</sup> Yehuanten moiylacusi, pampa inon panusi lacocoltilisi. Amo quimolancuacuetzililo Dios, jan quijtulo pa inminyolo quinami quinmacasi paquilisi inmincueros. Moixtocalo ca mochi hual quichihualo hual lapinajtulo. Jan quijnamiquilo san len huil canaló nican pan lalticpan. <sup>20</sup> Ma yoje, tehuanten tolali capa ticpialo in hual toyaxca neli unca pin cielo (ilhuicac), ticate ichantinjmes in cielo. Ticchixticate pa hualas quistica pa nepa toTata Jesucristo hual techquixtilis pa mochi in polehuilisi hual tipanulo nican. <sup>21</sup> Yihual techpatilis tocueros hual nican pin lalticpan mocóculo huan palanilo huan miquilo. Techpatilis pa mochi huasi tocueros yajyancuic quinami yihual icuerpo. Yajmo miquisi, san quipias laixpelalisi huan chicahualisi cualtichin. Inon Cristo tejchihuilis pan ipampa ilahueliltilisi calica huil quinneltocaltis mochi pa yihual.

## 4

### *Amo ximocahuacan pa anquipias paquilisi pan ipampa in Tata*

<sup>1</sup> Yoje, nocnían, xicayacan melahuac pan iojli in Tata, yoje ca ilahueliltilisi. Annimitzlasojla, nicnequi annimitzita miac. Annehmaca miac paquilisi. Huan pampa amhuanten anquineltoca Cristo, pampa in nicmati amo jan latic (amo de in balde) annimitzlaquetzilic Dios ilajtol. Yoje, amhuanten hual annimitzlasojla, anunca quinami se laxlahuilisi pa nehual, quinami in hual cajsí se hual cajsic laicanac ca se laxulitisi.

<sup>2</sup> Amhuanten, Evodia huan Síntique, annimitzlanía ca mochi noyolo, xicayacan ca se lajtulisi quinami anquitequipanulía in Tata. <sup>3</sup> Quema, huan nimitzlanía tehual nocni lasojli hual titequipanulo tiomenten, xiquinpalehui in ome sihuames. Yehuanten tequipanuje chicahuac ca nehual pa quilamachiltis in lamachiltilisi cuali. Jan yoje quichihuale Clemente huan in oc sequin hual titequipanuje timoxtin. Dios quinniximati huan quinpía inmintocajmes lajcuiluli pa iamal capa cate inmintocajmes yehuanten hual quipialo iyulilisi yancuic hual yihual quinmacac. <sup>4</sup> Xicpiacan paquilisi mojmosta pampa anquipía in Tata pa anmoyolo. Niquijtus oc sejpa: ¡Xicpiacan paquilisi! <sup>5</sup> Xiyulican mojmosta xiquinpalejtican moxtin. Huan amo ximotemachilijtiacan innojen hual anquijtua cate anmoyaxca pa anquinpías. Yoje moxtin quimatisi quinami anyuli cuali. Xicchiuacan yoje pampa amo huejahuas pa hualas in Tata.

<sup>6</sup> Amo ximacahuiltican nindeno pa anmitzquixtilis anmosehuilisi pa anmoyolo. Xiclaquetzilican Dios mochi len yes hual anmitzpanus, pampa



inon yes cuali pa amhuanten. Xiclañlanican chicahuac huan xicsehuican, yoje xiclamachiltican Dios len monequi pa anquipías. <sup>7</sup> Huan anquipías mosehuilisli pa anmoyolo hual Dios anmitzmacas. Amo huil ticmatilo quinami Dios techlalilia imosehuilisli pa toyolo. Ma yoje, anmitzquixtilia mochi hual anmitzmajtia, anmitztilijtica anmoyolo huan mochi hual anquijtic laijtic pa anmoyolo pa yojque ancayas se san ca Cristo Jesús.

### *Xiquijnamiquican len unca cuali*

<sup>8</sup> Axcan nocnían, jan in mocahua pa annimitzilis: Len yes hual unca neli huan len yes hual monotza pa quilasojlasi lacames huan len yes hual unca melahuac, huan len yes hual unca chipahuac, huan len yes hual unca cualtichin huan len yes hual moxtin quijtulo unca cuali, quema, sinda anquimati len yes hual unca niman cuali huan sinda anquimati len yes hual monotza pa lacames laquetzasi hué inahuac inon, cuaquin xiquijnamiquican mochi inon pa anmitzpalehuis pa anyulis cuali.

<sup>9</sup> Annonextilic miac pan nopampa nehual, anquinmanac miac pan nopampa, anquicaquic miac pan nopampa huan anquimati miac pan nopampa. Pampín, xiyulican xicchijtiacan yoje quinami annimitznextilic. Huan cayas ca amhuanten Dios hual techmaca mosehuilisli pa toyolo.

### *In laneltocanjmes de Filipos quimacaje miac Pablo*

<sup>10</sup> In Tata nechmacac niman miac paquilisli pampa oc seppa anpehuac anquijtic laijtic pa anmoyolo quinami huil annehpalehuis. Neli, amo quiman annechilcahuaya. Ma yoje, amo anmitzajsiaya tonali capa huil annehpalehuisquiaya. <sup>11</sup> Amo annimitzilijtica inon pampa monequi pa nicpiás len. In unca pampa nimonextilic pa nimocahuas ca paquilisli ca len yes nicpia o amo nicpia. <sup>12</sup> Nicmati niyuli ca paquilisli, sinda nicpia nadita, huan sinda amo nicpia nindeno. Huan nicmati niyuli ca paquilisli sinda nicpia miac. Sinda nicpia miactzindi o nadita, nicpia paquilisli. Quema, mochi tonali quijquiman huan cajcapa nimoitac, nimonextilic len Dios san quipiac pa nechnextilis. Nicmati nipachihuía huan nicmati nimayana. Nicmati nicpia miac huan nicmati amo nicpia miac. <sup>13</sup> Huil nicchia mochi hual Dios nechmaca pa nicchías, huan nicchia pan ipampa Cristo hual nejchicahuatia. <sup>14</sup> Ma yoje, ma annimitzili niquita niman cuali inon hual annejchihuilic quiman ca nehual ancanaya len lacocoltilisli quinami nipanuyaya. Huan annehpalehuic ca in hual monequiaya pa nicpiásquiaya.

<sup>15</sup> Amhuanten pa Filipos noje anquimati quinami pan tonali hual nipehuac annimitzilic in lamachiltisli cuali huan cuaquin pan tonali hual niquisac pin lalticpan Macedonia, amo cataya se ca inminlanechiculisli Cristo ilacames hual quichihuaje se lajtulisli pa nechmacatialesquiaya inon calica nimolacualtis. Ca in lajtulisli, nechmacalosquiaya len monequi pa nimolacualtisquiaya huan yehuanten Dios quinmacasquiaya in cuali hual quipia pa yehuanten. Jan amhuanten pa Filipos san anquichiac se lajtulisli pa annehpalehuis. <sup>16</sup> Yoje, quiman nicataya pin caltilan Tesalónica, amhuanten annechtilanilic len pa nimolacualtis seppa huan oc seppa. <sup>17</sup> Amo annimitzilijtica inon pampa nictemujtica pa annechtilanilis oc seppa huan oc seppa. Jan nictemúa quinami huil momiactitias in cuajcuali hual anquichia anquitequipanuiliptica Dios. Yihual moijnamiquiltis ca mochi huan amijchihuilis niman cuali. <sup>18</sup> Huan nicanac mochi hual annechtilanilic, quema, axcan nicpia miac hual monequiaya pa nicpiás. Axcan tentica capa nicajcoquia mochi hual annechtilanilic, pampa nicanac in hual annechtilanilic ca Epafrodito. Pa Dios in unca quinami se huendi hual ajuíac. Nicnequi



niquijtúa, inon hual annejchihuilic neli unca se huendi pa Dios hual yihual quixtocas quipías, mocahua ca paquilisli ca inon. <sup>19</sup> Huan noDios anmitzmacas mochi hual monequi pa anquipías pan ipampa Cristo Jesús. Yoje, quinami amo quiman lamis in míac cuali hual Dios quipía, jan yoje amo lamis anmitzmacas. Yoje unca quinami yihual quichía mochi ca ilahueliltilisli hué. <sup>20</sup> Ma toTajtzin Dios quipía pa mochi tonalijmes mochi tolasojlalisli huan ma quinaqui mochi tolajtomes huejué huan cuajcualtichin pa yihual. Yoje ma ye.

*Lami iamal ca lapialtilisli*

<sup>21</sup> Xiquinchicahuacan moxtin yehuanten ilacames Cristo. Xiquinchicahuacan yoje quinami monequi anquinchicahuas yehuanten hual iyaxca Cristo. Tocnían hual nican cate ca nehual anmijchicahualo. <sup>22</sup> Anmijchicahualo moxtin in oc sequin ilacames Cristo. Ca yehuanten anmijchicahualo niman míac ilacames Cristo hual chantilo pa ichan César ihué in lali Roma.

<sup>23</sup> Ma caya ca amhuanten anmoyolo in cuali hual san huil anmijchihuilía toTata Jesucristo. Yoje ma ye.

## In amal hual quinmijcuiluilic Pablo in laneltocanijmes hual cataloaya pa colosas, in Colosenses

### *Pablo quinmijcuiluilía in laneltocanijmes pa Colosas*

<sup>1</sup> Nehual Pablo niunca se ilanahuatini Cristo Jesús pampa yojque nechlajtultic Dios. Nehual huan tocní Timoteo antimijchicahualo. <sup>2</sup> Annimitzjicuiluilijtica amhuanten Dios ixolomes hual anquitequipanuilía nepa pa anmocaltilan Colosas, amhuanten hual amo anmocahua pa anquineltocas Cristo. Ma Dios toTajtzin anmitzmaca ilachihualisli cuali huan imosehulisli pa anmoyolo.

### *Pablo quilajlanía Dios pa in laneltocanijmes*

<sup>3</sup> Amo timocahualo pa ticsehuisi Dios pampa amhuanten anunca tocnían. Dios yihual iTajtzin toTata Cristo Jesús. Ticsehuido quiman yes ticlajlanilo yihual. <sup>4</sup> Unca pampa ticmatije quinami niman míac anquineltoca Cristo Jesús. Huan ticsehuido pampa ticmatije quinami niman míac anquinlasojla moxtin yehuanten hual cate Dios ixolomes hual quitequipanuililo. <sup>5</sup> Anquineltoca Cristo Jesús huan anquinlasojla Dios ixolomes pampa anmochixtica pa in tonali quiman anquípías ca yehuanten in hual Dios anmitzpilía pin cielo (ilhuicac) pa anmitzmacas. Anquimatic inon pa innojen tonalijmes quiman anquicaquic Dios ilajtol melahuac hual unca ilamachilitisli cuali. <sup>6</sup> In lamachilitisli cuali ajsic capa amhuanten, huan yoje pejtica momachiltía pa mochi in lalticpan. Momiactitalo in lacames hual pejticate yulilo quinami Dios quinequi. Quema, momiactitalo in lacames hual quineltoacate in lamachilitisli cuali. Unca jan quinami noje panujtica ca amhuanten quiman anquicaquic Dios ilajtol. Umpa anpehuaya anquimati quinami neli Dios quinchihuilía cuali lacames. Huan Dios ilachihualisli cuali unca quinami quinpuphua inminlajlaculisli. <sup>7</sup> Quema, Dios tejchihuilía icuali jan quinami anmitznextilic Epafras hual yihual ticnequilo míac. Ca yihual tictequipanuililo Cristo. Ticmatilo quinami cuali tequipanúa Epafras, ticmatilo yihual neli quitequipanuilijtica cuali Cristo. <sup>8</sup> Noje yihual techmachiltic quinami anlálasojla mochi sejse ca amhuanten, pampa laijtic pa anmoyolo anquípía in Espíritu Santo hual anmitzlasojlaltía.

<sup>9</sup> Huan pampa inon, pa in tonali hual ticmatije inon anmonahuac amhuanten, yoje tipehualoaya ticlajlanilo Dios huan ticlajlanilo míac mojmosta pa anquimatis mochi hual len quinequi pa anquichías. Ticlajlanilo ca míac lajlanilisli pa anquimatis inon ca in lajmatlisli hual ticpialo tehuanten huan amhuanten pan ipampa toyolo. Huan ticlajlanilo pa anquimatis len quinequi quijtúa mochi pan ipampa in lajmatlisli pa anmoyolo. <sup>10</sup> Pampín anquimatis anyulis anlanextilijtica pampa anunca lacames hual toTata Cristo huelitijtica pa anmoyolo. Quema, yojque anyulis anquipaquiltitica toTata ca mochi hual anquichía. Pa anquipaquiltis Dios, anyulis anquichitjica mochi hual unca cuali. Yojque anyajtías anquimaztica len quinequi Dios pa anquichías. <sup>11</sup> Huan pa anquichías inon, Dios anmitzhueliltis ca mochi ilahuelilitisli, pampa yihual quipía mochi lahuelilitisli. Yojque ca

ilahuelilitlisli hual yihual Dios anmitzmaca, amhuanten huil anmopepenialtía mochi amo cuali, amo anquinctica anmolacuepilis sinda anmijchihuילו len amo cuali. Huan yojque ca Dios ilahuelilitlisli anquipias paquilisli, mas que anmitzpanus len amo cuali. <sup>12</sup> Tielajlanilo Dios pa anyulis mochi tonalijmes anquisejtica toTajtzin hual unca pin cielo. Unca toTajtzin hual tejchiac pa ticayasi lachijchihuali pa ticanasi mochi icuali Dios hual huelitijtica capa tehuanten. In cuali cayas inminyaxca mochi ixolomes Dios. Capa Dios huelitía unca quinami mochi unca lahuilisli, pampa ticmatilo pa toyolo mochi hual unca melahuac. <sup>13</sup> Techquixtic toTajtzin pin polehuilisli capa huelitiaya Satanás. Pan ipampa in laijlaculisli, mochi unca laticumac capa quipía Satanás in lahuelitlisli. Techijcuanic Dios pa camo ticayasi nepa, huan techlalic capa huelitijtica iXolol hual toTajtzin quilasoja mía. <sup>14</sup> Yehuanten quimictije Dios iXolol huan quisac iesli. Unca quinami techcuhuac ca iesli. Yoje techijcuanilía tolaijlaculisli, huan yojque techquixtic pin ilahuelilitlisli Satanás. Axcan tolaijlaculisli unca lapujpuhuali.

*Unca mosehuilisli pa toyolo pan ipampa quinami Cristo miquic*

<sup>15</sup> Amaqui huil quita Dios huan amaqui huil quiximati. Ma yoje technextilic Cristo jan quinami unca Dios, pampa yihual unca quinami Dios. Huan Dios hual unca Cristo iTajtzin quimacac Cristo pa yes iyaxca Cristo pa huelitis pa mochi hual quichiac. <sup>16</sup> Pan ipampa Cristo Dios quinchiac mochi hual unca pin cielo (ilhuicac) huan pin lalticpan. Quinchiac len huil tiqitalo huan len amo huil tiqitalo. Quema, quinchiac mochi hual quipialo lahuelitlisli huan in iyecames hual mochihuanijme amo cuaqcuali hual huelitilo yoje huan yoje ca mía ojlimes hual amo moitalo. Mochi innojen quinchiac yihual Cristo pa cayalosquiaya pa yihual. Cristo quinpias pa yehuanten quichihuilis len quinequi, huan pa yehuanten lanextilisi quinami yihual unca hué. <sup>17</sup> Huan Cristo yultataya quiman ayamo yec lachihuali nindeno. Yihual quinchihuilia pa camo mocahuasi pa yesi mochi innojen hual quinchiac. <sup>18</sup> Cristo huelitía capa yehuanten hual quinel-tocalo, jan quinami se itzontecon huelitía pa se icuerpo. Huan yihual in niman hué ca mochi hual huelitilo. Unca iyaxca pa huelitis pa mochi, pampa yihual quipehualtic mochi. Yihual unca in niman hué ca yehuanten hual miquije huan cuaquin yulije oc seppa. Yojque unca yihual in niman hué ca mochi. <sup>19</sup> Unca pampa Dios iTajtzin quitac cuali pa yihual iXolol Jesucristo yesquiaya quinami yihual huan pa quipiasquiaya mochi lahuelitlisli quinami yihual. <sup>20</sup> Quema, Dios quitac cuali pa iXolol Jesucristo quichiasquiaya pa yelosquiaya ca mosehuilisli ca Dios mochi hual cate pin lalticpan huan pin cielo. Inon quinequi quijtúa pampa quitac cuali Dios pa iXolol quichiasquiaya pa lacames huan mochi hual cate pin lalticpan yajmo yesi Dios ilacocolinjmes. Huan pampa miquic Cristo pin cuaquil huan quisac iesli, yoje quinchihuilic in mosehuilisli.

<sup>21</sup> Huan nepa pa yina huan axan amhuanten amo anquinequini anquiximati Dios. Anquijtuni pa anmoyolo quinami Dios ilacocolinjmes pampa amo anmocajtiahuiaya pa anquichias len niman amo cuali. <sup>22</sup> Ma yoje, axcan anmijchihuilic Cristo pa anyesquiaya ca mosehuilisli ca yihual. Yojque anmijchihuilic nepa quiman miquic. Huan axan anunca ca mosehuilisli ca yihual. Yoje yajmo anmitzitas laijlaculi mas que anquichiac amo cuali. Axan huil anquitequipanuilía yihual san. Huan anmitzitas quinami lacames hual amaqui huil anmitzmotexpahuilis ca nindeno huan yoje huil

anmitzialis ilaixpan Dios. <sup>23</sup> In nicmati pampa anyultía anquineltocatica Cristo. Huan sinda amo anmocahuas pa anquipías mochi anmolaneltocalisli ca yihual, amo anmijcuanis pa iojli Cristo. Nepa anquichixtías in tonali quiman anquipías mochi hual len Dios neli anmitzmacas. Yoje techilía Dios ilamachiltisli cuali hual anquicaquic. In yec lamachilti ca moxtin hual cate pin lalticpan. Huan nehual Pablo nilapalehuía niclamachiltitica inon pampa nechmaca Dios in tequipanulisli.

*Dios quilajultic Pablo pa quintequipanulis in laneltocanijmes capa yes moitililo*

<sup>24</sup> Axan nipanujtica lacocoltilisli pa amhuanten. Pampa in, nicpixtica paquilisli, pampa nipanujtica len lacocoltilisli pan nocuerpo calica niclantía ca in lacocoltilisli hual panuc Cristo pa in laneltocanijmes, yehuanten hual quineltocalo Cristo. Yehuanten cate quinami Cristo icuerpo nican pan lalticpan. <sup>25</sup> Nehual niquitequipanuilía yehuanten in laneltocanijmes pampa nechlajultic Dios pa yojque nitequipanus pa annimitzpalehuis. Quema, Dios nechlajultic pa annimitzlamachiltis mochi ilajtol. <sup>26</sup> Pan tonaliijmes mochi pa yina huan in tonaliijmes hual ajsitihualaloaya pa axan, Dios amo lamacahuiltiaya pa quimatilosquiaya lacames in hual quiapiaya lalatali. Axan amo tolaixpan tehuanten hual ticate ilacames. <sup>27</sup> Quinnextilijtica inon pampa quinequiaya pa quimatilosquiaya ixolomes quinami unca niman hué huan cualtichin inon hual quiapiaya lalatali. Axan Dios quinnextilijtica yehuanten hual amo judíos. Huan inon hual Dios quinnextilijtica unca pampa Cristo yuli lajitic pa amhuanten. Pampa in, anquichixtica pa ajsis in tonali quiman ticpiasi ca yihual mochi in lahueliltisli cualtichin hual yihual quipía pa tejxiluilisli.

<sup>28</sup> Mojmosta tilanahuatijticate ca ilajtol Cristo. Tiquinmilijticate moxtin pa lacaquisi pa quimatisi len unca in polehuilisli hual quinpanus yehuanten hual amo quineltocalo. Tiquinnextilijticate mochi sejse pa monextilisli niman cuali Cristo ilajtol, pa yoje tiquinlalisli moxtin ilaixpan Dios pa yihual quinmitas jan cuali san, pampa cate ca se lajtulisli ca Cristo. <sup>29</sup> Huan pa yoje Dios quinmitas jan cuali san yehuanten, nitequipanúa niman chicahuac. Nimotolintica ca mochi ichicahualisli Cristo calica nechtequipanultía ca ilahueliltisli.

## 2

<sup>1</sup> Niquijtua inon pampa nicnequi pa anquimatis quinami miac nimotolinía niclajlantica Dios pa amhuanten huan yehuanten in laneltocanijmes pin caltilan Laodicea, moxtin hual amo quiman nechitaje pa nechiximatilosquiaya. <sup>2</sup> Nimotolinía niclajlantica Dios pampa nicnequi pa quipias lanequilisli pa quineltocatiyasi. Huan quipias in lanequilisli sinda cayasi ca jan se lajtulisli. Yehuanten cayasi jan se sinda molasojlasi pa neli quimatisi mojmosta oc se nadita pa inminyolo len quinequi quijtua Dios ilajtol. Ma molasojlapan pa yoje quimatisi len quinejquijtu mochi. Yojque quimatisi inon hual Dios amo quimacahuiltiaya pa ticmatilosquiaya niman pa yina huan pa mochi xixihuimes hual ajsitihualaloaya pa axan. Axan Dios techmachiltía. Huan techmachiltía pa ticmatisi Cristo ilamachiltisli cuali calica tiquiximatilo. <sup>3</sup> Mochi hual monotza pa ticmatisi unca lalatali ca Cristo. Yihual quipía la'ajcoquili capa yihual. <sup>4</sup> Inon annimitzilijtica pa amaqui anmitzcuajcuamanas ca lajtoyes cuajcualtichin hual annitzyamanilisli anmoyolo pa anquineltocas se lamaxtilisli hual islacati. <sup>5</sup> Mas que amo niunca nehual umpa ca amhuanten, ma yoje pa noyolo unca jan quinami nicataya

umpa. Nicpixtica paquilisli pampa niquita quinami amhuanten anyuli yoje quinami quixtoca Dios. Huan amo anmocahua pa anquineltocas Cristo ca míac chicahualisli.

<sup>6</sup> Pampa in, xiyultiacan anquineltocatía Cristo Jesús toTata jan quinami anpehuac anquineltocac pa innojen tonalijmes hual anpehuac anquicaquic ilajtol. <sup>7</sup> Xicchihuacan yoje, pampa anmonextilic cuali ilamaxtilisli huan anmonextilijtía mojmosta oc se tipichin. Huan mojmosta anquineltoca chicahuac ilamaxtilisli. Xicchihuacan yojque pampa yojque anmitzmaxtic Epafras. Quema, xicmatican niman cuali Cristo ilamaxtilisli huan xicsehuican míac Dios.

### *In yulilisli yancuic hual unca pan ipampa Cristo*

<sup>8</sup> Ximoitilican pa como anmitzlaneltocaltis se ilamaxtilisli hual nesi cuali huan ma yoje amo unca cuali. Se lamaxtilisli quinami inon amo huil anmitzmaca nindeno cuali pa anmoyolo. Sinda lacames quineltocalo, cuaquín mocuajcuamanalo. Se lamaxtilisli quinami inon unca jan in hual quimaxtilo lacames san. Unca in lamaxtilisli hual quijtulo laijtíc pa inminyolo. San quipía nadita ilamaxtilisli Dios huan míac oc se lamaxtilisli hual unca jan ilamaxtilisli in lalticpan san huan amo unca ilamaxtilisli Cristo.

<sup>9</sup> Ximoitilican pa como anquineltocas se lamaxtilisli hual amo iyaxca Cristo, pampa Cristo quipía mochi hual unca Dios chantitica umpa laijtíc icuerpo. <sup>10</sup> Yoje, antentica ca iyulilisli Cristo. Anquipía mochi hual monequi pa anyulis ca yihual hual huelitía pa mochi in ijyecames hual quipialo lahuellitilisli. <sup>11</sup> Anpehuac anquineltocac Cristo huan yoje anmochíac Dios ixolomes pampa Cristo quilalic se lanextilisli pa anmoyolo, jan quinami in judíos mochihualo Dios ilacames quiman quitequilo nadita icuilaxli quinami lanextilisli. Ma yoje, in lanextilisli hual anquípía amo anmijchihuilije lacames ca inminmajmajuan. Cristo anmijchihuilic pa anyes Dios ixolomes pan ipampa in lanextilisli. Yojque anmitzhueliltic pa yajmo anyulis anquichijtica innojen amo cuajcuali hual anmoyolo amo mocahuaya pa quichihualtis anmocuerpo. <sup>12</sup> In tonali hual ancataya lacuayatequili ca in lanextilisli pa anmoyolo unca quinami ancataya lalalpachuli ca Cristo huan cuaquín anyulic oc sejpa ca yihual. Mas que Cristo miquic, quiyuliltic Dios ca ichicahualisli. Huan pampa anquimatic inon, yihual anmitzyuliltic yoje ca ichicahualisli. <sup>13</sup> Huan yojque amhuanten anmiquic pa anmoyolo pampa anquichíac laijlaculisli huan amo anyec lacames hual quitocaje Dios. Amo anquipiaya Cristo ilanextilisli pa anmoyolo. Ma yoje, Dios anmitzyuliltic yoje yancuic ca Cristo, quipujpuhuac mochi in amo cuali hual ticchihuaje. <sup>14</sup> Yoje, Dios amo techcahua pa timopolusi pampa amo ticneltocaje len quijtúa ilajtol. Unca quinami yihual quijcuanic in amo cuali hual cataya lajcuiluli hual techmotexpahuiliaya tehuanten. In lajcuilulisli quitequihuiaya pa timiquisi. Ma yoje, cataya Cristo hual miquic, amo tehuanten. Unca quinami cataya lasaluli pin cuahuil in lajcuilulisli hual techmotexpahuiliaya tehuanten, jan quinami quisaluje Cristo pin cuahuil. Axcan in lajcuilulisli yajmo huil techmotexpahuilía. <sup>15</sup> Yojque quinquixtilic Cristo in ijyecames amo cuajcuali inminlahueliltitilisli calica huellitiloaya. Yihual lanextilic inminlaixpan moxtin pampa yehuanten neli amo quipialo lahuellitilisli pa techilisi len ticpialo pa ticchihuasi. Inon quichíac pampa quinsulahuac pa in tonali hual miquic pin cuahuil.

*Xictemucan quinami anquípías innojen hual cate pin cielo (ilhuicac) pa tehuanten*

<sup>16</sup> Yoje, amo xicneltocacan amaqui hual anmitzmotexpahuilía pampa anquicua len yes lacuali huan ancuni len yes pa cunis se. Huan amo xicneltocacan sinda anmitzmotexpahuilía pampa amo anquichía fiesta (ilhuil) pan calía yes tonali, quinami len layúa hual nesi in mesli yancuic, huan in tonali hual mosehuilo in judíos. <sup>17</sup> Amo monequi pa anquineltoacas in lajtomes pampa quiman Dios quinmilic yehuanten pa yina pa camo quicuasi len lacuali, huan pa quichihuasi fiesta (ilhuil) pan se tonali o oc se tonali, san cataya pampa yihual quinmaxtiaya nadita quinami Cristo yahuiaya tejchihuilí tolaijlaculisli pin tonaliyimes hual yahuiaya caya pan lalticpan. Unca quinami ilasehuán (ilasehuayan) se quinextilía nadita quinami nesi in se. Huan jan yoje Dios ilajtol pa yina quinextiliaya ca se lanextilisli hual amo huil tiqitaloaya niman cuali. Quinextiliaya len Cristo yahuiaya tejchihuilí quiman hualac. <sup>18</sup> Amo ximomacahuiltican pa anmitzilis se pampa amo unca anmoyaxca pa anquimolancuacuetzilía Dios pampa anunca tijtipichin, huan yojque, quil, monequi pa anquimolancuacuetzilis Dios pan inminpampa ilanahuatinijmes pin cielo (ilhuicac). Se hual anmitzilis inon anmijchihuilis pa camo ancanas inon hual Dios quipía pa anmitzmacas. In se quijtúa pampa monextilic innojen ilamaxtilisli pan ipampa len quitemiquic, moita in se quinami se hué. Ma yoje, amo cataya Dios hual quilic in hual anmitzilía in se. Jan anmitzilía in hual yihual ihuán quijtuc laijtuc pa iyolo. <sup>19</sup> Se quinami in lacal o sihual amo quitocatica Cristo. Yihual Cristo tiquijtulo unca quinami itzontecon in cuerpo huan in cuerpo unca quinami moxtin hual quineltoocalo. Pampín mochi in cuerpo moscaltis hué pan ipampa ichicahualisli Dios sinda mochías ca se lajtulisli ca Cristo hual unca itzontecon in cuerpo. Se ilajlajco icuerpo salijiticate ca ilapantilisli. Huan ilalhumes canaló mochi hual monequi pa quipias pan ipampa itzontecon. Huan pa inminyolo in laneltoconijmes yoje canaló mochi hual Dios quinequi pa quipiasí. Cristo inmintzontecon quinmaca.

<sup>20</sup> Axan anquimati Cristo miquic. Amhuanten anquineltoaca, huan pampa in, unca quinami anmiquic amhuanten ca yihual. Yoje, amo anquipías pa anquichías nindeno hual lacames quijtulo pampa monequi pa quichías se pa yoje quipaquiltis Dios. Axan amo anyultica quinami yehuanten pin lalticpan quijtulo monequi pa yulis se. Amo xiquinneltocacan in lajtomes hual quichihualo lacames hual quijtulo quinami monequi pa ticmolancuacuetzilis Dios. <sup>21</sup> Nican unca se lanextilisli hual quijtulo: "Sinda se yulisquiaya quinami Dios quinequi pa yulis, cuaquín amo huil quimatoca in, amo huil quilalía in pa inejnepil, amo huil cana in ca imajmajuan." <sup>22</sup> Mochi innojen Dios quinchíac pa yoje huil ticchihuasi totequipanulisli huan pa tiquincuasi huan cuaquilon lamilo, yajmo monotzalo len. Amo xiquinneltocacan lajtomes quinami innojen hual amo lapalehuilo nindeno pa se quimolancuacuetzilis Dios. <sup>23</sup> Yehuanten hual quinneltocalo lajtomes quinami innojen nesilo quinami lacames hual quimatilo niman cuali quinami Dios quinequi pa tiyulisli. Quijtulo sinda yoje mochihualtilo pa quimolancuacuetzilisli miac, Dios quijtus pampa yehuanten niman hué huan oc sequin amo yoje hué. Quijtulo pampa yoje huil quimati se quinami mochías tipichin ilaixpan Dios. Quijtulo sinda se quinneltoca in lajtomes, quicocoltilo icuerpo huan yoje quipaquiltía Dios, huan inon amo unca neli. No, in lajtomes amo monotzalo nindeno, amo quitzacuilía toyolo pa camo quichihualtis tocuerpo in amo cuali hual mojmosta quinectica quichía.

## 3

<sup>1</sup> Cuaquinon, anquimati Dios anmitzyulitic pa anmoyolo ca yulilisli yancuic jan quinami quiyuliltic Cristo. Pampa in, xictemucan pa anquimatis in hual Dios quinequi pa anquimatis, hual unca quinami huelitía. Dios axan quipía Cristo quinami molalijtica pa ima cuali. Yoje lanextilijtica pampa moxtin quipialo pa quimolancuacuetzilisi Cristo jan quinami quimolancuacuetzililo Dios. <sup>2</sup> Xiquijnamictiacan inahuac len unca pin cielo (ilhuicac), amo xiquijnamictiacan inahuac len unca pin lalticpan. <sup>3</sup> Niquijtúa inon pampa anmocahuac pa anyulisquiaya quinami anyulini pa innojen tonalijmes hual ayamo anquineltoyaya Cristo. Axan lamic in yulilisli. Ma yoje anquipía yulilisli axan hual inahuac inon ayamo anquimati mochi. Unca jan quinami tehuanten ayamo ticmatilo mochi hual inahuac Cristo, mas que amhuanten anyultica ca Cristo capa unca Dios. Axcan, amo lamis anmoyulilisli, unca quinami len hual unca lalatili. <sup>4</sup> Ma yoje, pan tonali hual nesis Cristo hual techyuliltic ca iyulilisli, cuaquinon noje ca yihual annesis capa Dios huelitía ca ilaixpelalislis cualtichin. Cuaquín anyes quinami Cristo.

*Toyulilisli hual tiyulinijme pa yina huan toyulilisli yancuic*

<sup>5</sup> Yoje, quinami anquitemujtica pa anquimatis quinami huelitía Dios, xicayacan quinami se mijquil hual yajmo quichía len amo cuali. Ximocahuacan pa anquichías len quichijtialo yehuanten pin lalticpan hual amo quineltoyalo Dios. Amo xiquinmanacan oc sequin sihuames o lacames. Amo xicchihuacan len hual lanextilía pampa anlajtutica amo cuali pa anmoyolo, amo xilajnamiquican yoje. Amo ximomacahuiltican pa len anmitznequiltis pa anquipías len amo unca cuali. Huan amo xiyén (xiyecan) lacames o sihuames hual quinectialo pa quipiasi mías huan mías. Yehuanten hual quichihualo inon cate quinami yehuanten hual quimolancuacuetzililo hual len quinequilo, quinami yesquiaya se dios. <sup>6</sup> Amo xicchihuacan yoje, pampa Dios neli quintojtocas ilaixpan pa yesi lacocoltili yehuanten hual yulilo amo quineltoyaticate. Quincocoltis pampa quinchihualo innojen. <sup>7</sup> Amhuanten nojen anyulini anquichijtataya innojen pa yina pan tonalijmes hual anyulini quinami yulilo yehuanten hual amo quineltoyalo toTata. <sup>8</sup> Huan axcan, amhuanten ximocahuacan noje pa camo anquichías mochi innojen, niquijtúa, yajmo xicualanican, yajmo xicualantiquisacan, yajmo xicnequican xiquinchihuiclan oc sequin len amo cuali, yajmo xilahuejuecaltican, yajmo xilajtucan ca lajtomes amo cuajcuali, yajmo xilacolican ca lajtomes quinami innojen. Ma camo quisa pa anmocamac nindeno quinami inon. <sup>9</sup> Amo xislacatican se ca oc se. No, yajmo xicchihuacan innojen, pampa anmoquixtilic in yulilisli hual pa yina catani lajtic anmoyolo hual anmijchihualtitiahuini innojen hual amo cuajcuali. <sup>10</sup> Huan anmolaquitizquic ca in yulilisli yancuic hual anquipía pa anmoyolo, in yulilisli hual anmijchiac lacames yajyancuic. Dios quichiac in local yancuic huan quichijtía pa anajsis anyes quinami yihual pan ipampa in yulilisli yancuic calica neli anquimaztías yihual. <sup>11</sup> Sinda quipía se local in yulilisli yancuic, cuaquinon Dios amo moijnamiquía nindeno inahuac quinami cataya, ma ye se hual lacatic pa calía yes lali, ma ye quinami nesi icuilaxli, ma ye da quipía latequili icuilaxli quinami in judíos, o da amo quipía latequili quinami yehuanten hual amo judíos. Dios amo moijnamiquía quinami cataloaya, ma ye quinami quinmitalo oc sequin lacames, sinda quinmitalo huejeu o tijtipichin, ma yén (yecan) yehuanten hual amo quimatilo o yehuanten hual quimatilo, ma yén hual yulilo quinami in yulijquimes cuajleros o yulilo pan calimes

cuajcualtichin, ma yén tequipanujquimes o inmintecojuan. No, Dios jan moijnamiquía sinda Cristo yultica lajtíc pa iyolo se. Dios moijnamiquía jan inahuac Cristo san, unca yihual san hual monotza mochi.

<sup>12</sup> Anmoquixtilic anmoyulilisi hual anmijchihualtiaya amo cuali. Axcan anuncia amhuanten hual Dios anmitzljaltultic pa anyes ixolomes. Anmitzljaltultic pa anquitequipanuilis yihual san, huan yihual anmitznequi. Yoje, xiquinmicnilican oc sequin, xiquinchihuilican cuali oc sequin. Xiye-can quinami lacames tijtipichin. Amo xilachihualtican pa oc sequin quichijtiasi quinami amhuanten anquinequi. Amo ximolacuepilian, ximopepenialtican in amo cuali quiman oc sequin anmijchihuililo amo cuali.

<sup>13</sup> Ximotzacuilican pa camo anquincocolis oc sequin pampa quichihualo laijlaculisi. Huan xicpujpuhuacan quiman yes se ca amhuanten quita len ca oc se ca amhuanten hual quicualantía. Jan quinami Cristo lapujpuhua, jan yojque xicchihuacan amhuanten noje. <sup>14</sup> Huan mas que anquichía mochi inon, monequi pa anquijnamiquis ca mochi anmochicahualisli pampa anquipía pa anmochías lacames hual quimatilo lalasojlalo. Ximolasojlalan, pampa yojque anmoxtin anyulis jan ca mosehuilisi ca in oc sequin. Inon lanextilis pampa amhuanten anquimati anyuli jan cuali san. <sup>15</sup> Xiyulican ca mosehuilisi huelitijtica pa anmoyolo. In mosehuilisi anmitzmaca Dios hual anmitznotzac pa jan yoje anyuliquiaya quinami se cuerpo, mas que anuncia míac. Huan xiyén (xiyecan) lacames hual quimatilo yulilo quisejticate Dios.

<sup>16</sup> Ma cajxilti pa mochi anmoyolo Cristo ilamaxtilisi. In anmitzmaca niman míac lajmatilisi pa anquimatis len unca neli huan melahuac. Ma quinmaxtican mochi sejse ca míac lajmatilisi. Ximonequiltican pa anmo-maxtis ca míac lajmatilisi. Inon huil anquichía pan ipampa salmos hual cate alabanzas laquixtili pa Dios ilajtol pa tiquinlalilisi latzotzonalisi. Noje huil anquichía pan ipampa alabanzas huan cantaditas (cuicames) hual anmitzmaca in Espíritu Santo calica anquinmilis lajtomes huejué pa Dios. Xijcantaruilican (xijcuiquilian) Dios anquisejtica pa anmoyolo. <sup>17</sup> Huan len yes anquijtúa, len yes anquichía, xicchihuacan mochi anquijnamictica pampa yihual huelitijtica pa amhuanten. Pampa inon anquinotzas ca itoca pa yihual cayas ca amhuanten pa anmitzpalehuis. Xicchihuacan yoje anquisejtica Dios toTajtzin. Unca anmoyaxca pa anquichías inon pan ipampa Cristo.

*Monequi pa in laneltocanjmes yulisi quinchijticate innojen pa inmincaltian huan pa inminchan*

<sup>18</sup> Amhuanten sihuames xilamacahuiltican pa anmitzlaicanasi anmolahuicalhuan. Unca cuali pa yojque anquichías, pampa anuncia iyaxca in Tata Jesucristo. <sup>19</sup> Huan amhuanten inminlahuicalhuan yehuanten, xiquinlasojlalan anmosihuahuan, huan amo xiyén (xiyecan) cualancudos ca yehuanten. <sup>20</sup> Amhuanten in xolomes xiquinneltocacan anmotajtzitzián huan anmonantzitzián. Yoje anquipaquiltía míac in Tata Dios huan yojque anlanextilía quinami anuncia Dios ixolomes. <sup>21</sup> Amhuanten inmintajtzitzián huan inminantzitzián, amo xiquinmajmajuatiacan anmoxolomes, pa camo cuajnesi momajtisi o pinahuasi pa quichihuasi len quinchihuilis cuali.

<sup>22</sup> Amhuanten tequipanujquimes anquinpía anmotecojuan nican pin laltican. Xicchihuacan mochi hual anmitzilisi pa anquichías. Amo xicchihuacan jan capa anmitzita anquitequipanujtica, quinami jan anquinpaquiltiaya lacames san. Xiquinneltocatiacan ca mochi anmoyolo, pa yojque anlanextilía quinami anquipilía lasojlalisli ca toTata. <sup>23</sup> Huan len yes anquichía, xicchihuacan ca mochi anmoyolo quinami anquitequipanulijtica in Tata,



huan amo jan lacames san. <sup>24</sup> Yojque xicchihuacan amhuanten, pampa anquimati anyahui ancana mochi hual quipía in Tata pa anmitzmacas. In monequi pa anquichías pampa anquitequipanuillía toTata Cristo. <sup>25</sup> Yojque xicchihuacan pampa aquí hual quichihuillía len amo cuali, yihual panus lacocoltilisli pampa quichihuiclinon, pampa Dios quita se jan quinami quita oc se, ma ye aquí yes.

## 4

<sup>1</sup> Amhuanten tecojuan, xiquinchihuiclian cuali anmotequipanujquimes. Quinami anquichihuillía se, yoje xicchihuiclian in oc se. Yoje xicchihuiclian, pampa noje anquimati anquipía anmoteco pin cielo.

<sup>2</sup> Amo ximocahuacan pa anquilajlanis Dios. Xiclaajlantiacan quiman yes tiquijnamiquí. Huan quiman anquilajlanía, amo xilatzehuican. Xiquijtutiacan pa anmoyolo in hual anquilajtica, huan amo ximocahuacan pa anquisehús Dios. <sup>3</sup> Huan quiman yes anquilajlantica, xiclaajlanican pa tehuanten noje, pa yojque Dios techajxiltis capa huil tiquinlaquetzilisli ilamaxtilisli Cristo. Pa yina Dios ilacames amo quimatiniyme cuali len quinequiaya quijtu Dios ilajtol quiman momaxtinijme len quijtuc inahuac Cristo. Axan ticmatilo tehuanten. Huan axan niunca latzacuali pa calijtic pampa niquinlaquetzilijtnemiaya ilamachiltisli Cristo. <sup>4</sup> Ma yoje, nicnequi pa Dios nechpalehuis pa niquinlaquetzilis pa yoje niquinmilis moxtin ilamaxtilisli Cristo ca lajtol calica amo moixpolulo yehuanten hual quicaquilo, quinami monequi pa nichías. Pampa in, xiclaajlanican Dios pa nechpalehuis.

<sup>5</sup> Ma anmitznextili anmolajmatilisli quinami anyulis cuali quiman anunca capa yehuanten hual amo quineltocono Cristo. Xiquitequipanucan cuali mochi tonalijmes hual Dios anmitzmacas pa anyulis. <sup>6</sup> Xilajtutiacan yoje pa anquinmixtocaltis lacames Dios ilajtol. Yoje anyes quinami in istal hual quixtocaltilía se lacuali. Sinda anlajtúa yoje, cuaquinon anquimatis jan quinami monequi pa anquinnanquilis moxtin.

### *Quinchicahua pampa yahui quilamía iamal*

<sup>7</sup> Anmitzilis Tíquico mochi hual nechpanujtica huan quinami niunca. Yihual se tocní hual ticlasojlalo míac, huan ticmatilo quinami yihual huil lapalehuía. Huan yihual titequipanuillilo in Tata Jesús. <sup>8</sup> Annimitztilanilijtica pa yoje yihual quimatis quinami anunca huan len anmitzpanujtica, jan quinami yihual anmitzmachiltis quinami nehual nipanujtica huan yoje ca in anmitzlacahuáltis. <sup>9</sup> Yasi huan Onésimo hual unca se tocní hual ticlasojlalo, huan ticmatilo yihual amo mocahua pa quitequipanuillis toTata. Yihual se tocní hual lacatic pa anmocaltilan Colosas. Yehuanten Tíquico huan Onésimo anmitzlamachiltisli mochi hual panujtica nican.

<sup>10</sup> Aristarco anmitzpialtía, ca yihual ticate latzacuali pa calijtic nican. Anmitzpialtía noje Marcos hual unca icni Bernabé, icni pa oc se cali. Anmitztilanilije lajtol pa anquimatis quinami anquichihuiclinon Marcos, sinda umpa huala, xicmosehuiclian. <sup>11</sup> Noje anmitzpialtía Jesús hual noje itoca Justo. In yeyenten cate judíos, quipialo ilanextilisli in latequilisli pa inmincuilaxli. Jan yehuanten san cate in judíos hual ca nehual huan nolajlasojli tequipanujquimes titequipanulo pa ilahuellitilisli Dios. Yehuanten nechlacahuáltilo míac. <sup>12</sup> Anmitzpialtía Epafras, yihual lacatic pa anmolali huan quitequipanuillía Jesucristo. Yihual quilajlantía Dios míac ca mochi iyolo, pa yoje amo quiman anmocahuas pa anyulis anquineltoatica Cristo, quinami lacames hual moscaltije ca lajmatilisli. Yoje quimatilo cuali mochi in hual quinequi Dios pa quichihuasi. <sup>13</sup> Inon niquijtúa inahuac Epafras pampa

annimitzilía neli yihual tequipanúa niman míac pa amhuanten huan pa yehuanten hual quineltocalo Cristo pin caltilan Laodicea huan pin caltilan Hierapolis. <sup>14</sup> Anmitzpialtía Lucas, yihual in lapajtini hual ticlasojlalo, noje annitzpialtía Demas.

<sup>15</sup> Xiquinpialtican tocnían hual quineltocalo Cristo hual cate pa Laodicea. Xiquinpialtican Nimfas huan yehuanten hual quineltocalo hual mon-echiculo pa ichan pa quimolancuacuetzilisi Dios. <sup>16</sup> Huan quiman anlamic anquinmómoxtilic in amal anmoyampa anmoxtin, cuaquinon xiclajtultican se pa yihual quinmómoxtilis in amal inminyampa yehuanten pa Laodicea hual quineltocalo toTata. Huan amhuanten jan yoje ximómoxtilican in amal hual niquintilanilic yehuanten pa Laodicea. <sup>17</sup> Huan xiquilican Arquipo pa moiztías pa lamis quichías mochi in tequipanulisli hual quimacac in Tata pa quichías.

<sup>18</sup> Nehual niPablo annimitzpialtitica annimitzjicuilulijtica nican ca nehual nomajma. Yoje anquimatis pampa mochi in amal unca hual annimitztilanilijtica. Xiquijnamiquican quinami nehual niunca latzacuali pin calijtic. Ma caya ca amhuanten in cuali hual san Dios huil anmijchihuilia. Yoje ma ye.

## In amal calica Pablo in lanahuatini quipehualtic ilajcuilulisi pa in laneltocanjmes pa Tesalónica

### *Quimpialtia Pablo*

<sup>1</sup> Tehuanten Pablo huan Silvano huan Timoteo antimitzizcuiluililo amhuanten in laneltocanjmes hual anmonechicúa pin caltlan Tesalónica, amhuanten hual anquineltoca Dios toTajtzin huan in Tata Jesucristo. Ma Dios anmitzmaca ilachihualisli cuali hual amo quiman lami, ilachihualisli cuali hual amo timonotzalo pa ticpiasqui. Huan ma anmitzmaca mochi hual unca cuali pa amhuanten axcan huan pa mochi tonalijmes hual ancayas ca imosehuilisli pa amoyolo.

*Oc sequin lajtulo hué inahuac quinami quineltocalo Cristo yehuanten pa Tesalónica*

<sup>2</sup> Amo timocahualo pa ticsehuisi Dios pa amhuanten anmoxtin. Quema, antimitziznamiquilo quiman yes ticlajlanilo Dios. <sup>3</sup> Amo quiman timocahualo pa tiquijnamiquisi quinami anquinextilia quinami niman cuali anquineltoca Cristo pan ipampa anmotequipanulisli. Amo timocahualo pa tiquijnamiquisi quinami antequipanúa míac huan pampín ansiahui míac. Inon anquichía pampa anquinlasojla míac in oc sequin. Huan amo timocahualo pa tiquijnamiquisi quinami amo anmocahua pa anquichías in tonali hual mocuepas toTata Jesucristo pa anmitzanas. Inon anquichía pampa anquipixtica laneltocalisli ilaixpan Dios toTajtzin. <sup>4</sup> Amhuanten anunca tocnían hual Dios amo mocahua pa anmitzlasojlas. Huan ticmatilo pampa yihual anmijchihuilic anmoyolo pa anyes san ixolomes yihual. <sup>5</sup> Inon ticmatilo, pampa tolamachiltisli cuali amo antimitzlamachiltije ca lajtol san. No, quiman antimitzlamachiltije, nepa cataya in Espíritu Santo pa anmitznextilis Dios iojli. Huan in Espíritu Santo neli techmachiltic pampa yihual cataya nepa tequipanujtataya ca ilahueliltisli. Huan ticmatiloaya neli pampa tolaftomes yeje melahuac. Inon ticmatilo, jan quinami amhuanten anquimati len pa lacames timonextililoaya anmolaxpan, pa antimijchihuililosquiaya cuali.

<sup>6</sup> Huan amhuanten anpehuaya anquinchihuilic cuali oc sequin quinami tehuanten tiquinchihuililoaya huan quinami quinchihuilini in Tata Jesús. Quema, ancanac Dios ilajtol huan pampín anmijchihuilije innojen lacames nepa míac hual cataya amo cuali. Ma yoje, anmocahua ca paquilisli ca in hual anmitzmacac in Espíritu Santo. <sup>7</sup> Huan yoje anmochíac laneltocanjmes cuajcuali. Pampín moxtin in oc sequin laneltocanjmes pin lalticpan Macedonia huan pin lalticpan Acaya quinequiloaya mochihualo quinami amhuanten. <sup>8</sup> Inon unca pampa niman míac mocaqui ilajtol in Tata capa anunca. Mocaqui pan ipampa quinami anyultica. Pampín amo yehuanten san pa Macedonia huan Acaya momachiltije inahuac inon. Noje laquetzalo moiljticate quinami anquineltoca Jesucristo pa mochi in oc sequin lalimes. Pampín amo monequi pa antimitzilisi nindeno, pampa anquimati anquineltoca cuali. <sup>9</sup> Unca pampa yehuanten techmachiltilo len panuc quiman tipehualoaya antimitzlamachiltilo in lamachiltisli cuali pa in tonalijmes hual antimitzpaxaluililoaya. Techmachiltilo quinami anmocahua pa anquinmolancuacuetzilisquiaya in monos huan anpehuac anquitequipanuilic

in Dios hual yultica, yihual in Dios hual neli unca. <sup>10</sup> Noje techmachtililo quinami amo anmocahua pa anquichixtías mojmosta Dios iXolol hual yahui huala quística pin cielo (ilhuicac). Yihual miquic huan Dios quiyuliltic oc sejpa. Quema, yihual Jesús hual techquixtilis pin ipolehuilisli icualanilisli Dios. Inon icualanilisli calica yihual quincocoltis yehuanten pin laticpan pan tonali hual yihual hualas.

## 2

<sup>1</sup> Amhuanten neli anquimati, tocnán, pampa in tonalijmes hual antimitzpaxaluilije, amo jan lapic (de in balde) cataya. <sup>2</sup> Quinami anquimati, mas que tilamije tipanuje lacocoltisli nepa quiman ticataloaya pin caltilan Filipos capa techihuicilic len niman amo cuali, ma yoje, Dios techpalehuic pa camo timomajtisi. Ticmatiloaya yihual techpalehuisquiaya pa antimitzililosquiaya ilamachtilisli cuali. Huan cataloaya míac hual motoliniloaya pa tejtzacuililosquiaya pa camo antimitzililosquiaya in lamachtilisli cuali. <sup>3</sup> Neli cataya pampa quiman antimitzililoaya tolajtol pa antimitzlaneltocaltisi, amo timoxpoluloaya ca nindeno hual antimitzililoaya. Noje amo tiyuliloaya amo cuali. Huan amo ticnequiloaya, no, amo tiquijtuje pa toyolo pa antimitzcayahualosquiaya. <sup>4</sup> Jan quinami Dios techitac cuali pa yihual techtilanis pa ticlamachtilisi in lamachtilisli cuali, yojque tilajtol. Amo tilajtulo pa tiquinpaquiltisi lacames. San ticnequilo ticipaquiltilo Dios hual quimati mochi hual tiquijtulo pa toyolo. <sup>5</sup> Huan amo quiman antimitzilije se lajtol calica ticnequiloaya antechixtocaltisquiaya. Inon anquimati. Huan amo antimitzilije in lamachtilisli cuali pa yoje huil antimitzanilosquiaya len hual anmoyaxca amhuanten, Dios neli quimati inon. <sup>6</sup> Amo tictemuiloaya quinami tiquinchihuicilosquiaya pa amhuanten huan oc sequin lacames anquijtusquiaya lajtomes cuajcuali tonahuac tehuanten. <sup>7</sup> Huan amo antimitzyaniloaya pa antechlasojlasquiaya mas que unca toyaxca pa antechlasojlas. Quema, inon unca inminyaxca moxtin ilanahuatinijmes Cristo. Ma yoje, tehuanten timochihualoaya quinami amhuanten innojen tonalijmes hual ticataloaya nepa. Antimijchihuiciloaya cuali quinami mojmosta quinchihuilía cuali ixolomes inminantzin. <sup>8</sup> Quema, yoje ticnequiloaya pa ticayasi ca amhuanten. Pampín ticataloaya ca paquillisli pa antimitzililosquiaya in lamachtilisli cuali. Huan amo in san. Noje ticnequiloaya antimixxiluililo ca mochi toyolo mochi hual ticipalo calica huil antimijchihuicilosquiaya cuali. Inon cataya pampa antimitzlasojlaloaya niman míac. <sup>9</sup> Neli unca, nocnán, anquijnamiquía quinami titequipanujti-ahuililoaya mojmosta huan lamiaya tochicahualisli. Quema, mojmosta tisi-ahuililoaya míac. Yihualitonali, pa semilhuil huan pa layúa, titequipanuloaya pa timolacualtilosquiaya. Yojque ticchihualoaya pa camo anquipiasquiaya pa antechlacualtilosquiaya nindeno. Huan pa innojen tonalijmes antimitzmachtililoaya Dios ilamachtilisli cuali.

<sup>10</sup> Amhuanten neli anquimati huan Dios noje neli quimati quinami tilachihualoaya cuali anmolaxpan. Jo quema, tiyuliloaya quinami huil ticipaquiltiloaya Dios. Mojmosta ticchihualoaya len quijtua Dios ilajtol. Amo quiman ticchihualoaya nindeno calica huil techmotexpahuiciloaya Dios huan lacames. <sup>11</sup> Huan quinami anquimati inon, ticataloaya ca mochi sejse capa amhuanten quinami se itajtzin ca ixolomes. Antimijchicahualtitinemoiloaya huan antimitzpajtinemoiloaya pa anyulisquiaya quinami Dios quinequi. <sup>12</sup> Noje antimitzmacaloaya lajtol pa anlachihuasquiaya quinami monequi pa lachihuasi Dios ixolomes, pampa yihual anmitznotzac pa anhuelitis ca yihual huan pa anquipias anmolajco ilaixpelalisli cualtichin.

<sup>13</sup> Innojen tonalijmes hual anquicaquic in lamachiltisli cuali hual unca Dios ilajtol, amo anquineltocac quinami cataya jan inminlajtol lacames san. Anquineltocac quinami cataya ilajtol Dios. Huan neli unca ilajtol Dios. Pampín noje amo timocahualo pa ticsehuis Dios. Huan in lajtol, tocnían, anmitzneltocaltic Dios. <sup>14</sup> Unca pampa amochiac quinami in laneltocanijmes pin lalticpan Judea, yehuanten hual monechiculo nepa pa miac caltilan pa quimolancuacuetzilisi Cristo Jesús. Amhuanten anpanuc lacocoltilisli hual anmijchihuilije yehuanten hual lacatije pa anmolali. Huan in laneltocanijmes de Judea panuje lacocoltilisli hual quinchihuilije yehuanten in judíos hual lacatije pa inminlali huan amo quineltocalo Cristo. <sup>15</sup> Quema, in judíos quimictije in Tata Jesús huan quinmictije Dios ilajtunijmes. Huan techtojtocaje pa tejchihuilisi amo cuali. Amo quipaquiltulo Dios, molalilo inminpan moxtin. <sup>16</sup> In judíos tejtzacuililo pa camo tiquinmilisi in lamachiltisli cuali yehuanten hual amo judíos. Amo quinequilo pa yehuanten yesi laquixtili pin ipolehuilisi inminlajlaculisli. Yoje in judíos amo mocahualo pa quichihuasi inminlajlaculisli, quichihualo miac quinami huil, amo quijtulo “Inon san”. Axan ajsc pan yehuanten icualanilisi Dios, mas que huejcahuaya quinmasi. Axan quipanusi inminlacocoltilisli.

### *Pablo quinequi quinpaxaluilía oc sejpa yehuanten pa Tesalónica*

<sup>17</sup> Ma yoje, tehuanten, tocnían, nican pa nadita tonalijmes ticataloaya laxiluli pa camo huil antimitzitasi. Timoitaloaya quinami icnomes. Ticataloaya laxiluli pa camo ticayasi ca amhuanten, huan ma yoje, toyolo mojmosta cataya ca amhuanten. Huan timotolinije ca miac chicahualisli pa antimitzpaxaluililosquiaya, pampa ticnequiloaya miac. <sup>18</sup> Quema, ticnequiloaya tihualalo ca amhuanten, nehual Pablo nicnequiaya nihuala sejpa huan oc sejpa. Ma yoje, tejtzacuilic Satanás. <sup>19</sup> Huan ¿leca ticnequiloaya tihualalo? Ma antimitzilican leca. Hualas toTata Jesús huan ticayasi iyampa, cuaquinon ¿aquinojen ticchiasi tiquinmitasi? Huan ¿ca aquinojen ticayasi ca niman miac paquilisli? Huan ¿pa aquinojen tiquijtusi lajtomes huejué umpa pampa yesi quinami laxlahuilisli pa tehuanten? Amhuanten anyes. <sup>20</sup> Quema, tilaixpelasi chicahuac iyampa Jesucristo huan ticayasi ca niman miac paquilisli pampa noje ancayas nepa amhuanten.

## 3

<sup>1</sup> Yojque, ajsc se tonali hual yajmo huil timopepenialtiloaya amo ticmaztataloaya quinami ancataya. Yoje techanac cuali pa tiyelosquiaya lacajcahuali pin caltilan Atenas tohuían. <sup>2</sup> Nican cataya tocní Timoteo, huan antimitztilanilije. Yihual noje itequipanujquil Dios hual quilamachiltía Cristo ilamachiltisli cuali. Antimitztilanilije pa anmitzitas huan pa anmitzpalehuis anquineltocas Cristo chicahuac. Ticnequiloaya pa yihual anmijchicahualtilisquiaya anmolaneltocalisli <sup>3</sup> huan ticnequiloaya pa camo anmomajtsiquiaya pampa anpanujtataya in lacocoltilisli. Timomajtije pampa inon hual anpanujtica cuajnesi anmijchihuilisquiaya pa yajmo anquineltocasquiaya Cristo. Huan amo ticnequiloaya pa inon anmitzpanusquiaya amo jan se ca amhuanten. Amhuanten anquimati pampa timoxtin ticpialo pa tipanusi lacocoltilisli. <sup>4</sup> Innojen tonalijmes hual ticataloaya ca amhuanten, amo timocahualoaya pa antimitzililosquiaya pampa amhuanten anyahuiaya anpanu lacocoltilisli huan jan yoje anquimati pampa neli anpanuc lacocoltilisli. <sup>5</sup> Pampín nehual noje yajmo huil nimopepenialtiaya amo nicmaztataya quinami ancataya, huan nictilaníc Timoteo pa yihual

nechlamachiltisquiaya quinami anquineltocatía Cristo. Nimomajtiaya cuajnesi anmitztilanilic Satanás anmoyolo pa yajmo anquineltocasquiaya. Yoje jan lapic (de in balde) cayasquiaya totequipanulisi in tonalijmes hual antimitzlamachiltije ilajtol Dios. Axan, ticmatilo pampa amo cataya yoje.

<sup>6</sup> Jan quipía se nadita mocuepac ca tehuanten Timoteo, techilic quinami unca cuali ca amhuanten nepa Tesalónica. Quitac quinami amo anmocahua pa anquineltocas Cristo huan quinami anmolasoja amhuanten. Techilic noje quinami antechijnamiquía huan quinami anquinequi míac antechita, jan quinami tehuanten ticnequilo míac antimitzitalo noje. <sup>7</sup> Pampín, tocnían, mas que unca míac hual monequi pa ticpiasi huan míac amo cuali hual tipanulo pampa lacames quinequilo tejtzacuililo pa calijtic, ma yoje ticanaje lachicahualtilisi yancauc. Unca pampa timomachiltije quinami anquineltoca in Tata Jesucristo. <sup>8</sup> Axcan tiyulticate ca niman míac paquilisi pampa ticmatilo quinami amo anquimacahuilítia nindeno pa anmijtzacuilis pa camo anquineltocatías Cristo. <sup>9</sup> ¡Quinami míac ticate ca paquilisi ilaixpan Dios pampa amhuanten anquichía yoje! Amo ticmatilo quinami huil ticsehuilo Dios pampa amhuanten anyuli anquichijtica len Dios quinequi. Quema, amo ticmatilo oc sequin lajtomes calica ticsehuilo. <sup>10</sup> Yihualitonali, pa semilhuil huan pa layúa ticlajlanilo Dios míac pa techmacahuilits pa antimitzpaxalulisi pa ticayasi ca amhuanten. Noje ticnequilo antimitzmaxtilo mochi in oc sequin lamaxtilisi hual ayamo anquimati, innojen oc sequin ilajtomes Dios hual monequi pa anquineltocas.

<sup>11</sup> Axcan, ma quiquixtican yihual toTajtzin Dios huan toTata Jesucristo mochi inon hual tejtzacuilía pa camo tihualasi capa amhuanten. <sup>12</sup> Huan amhuanten, ma anmitzlasojlaltítia in Tata niman míac pa yoje ajsis anmolasojlalisi capa moxtin. Ma mochi sejse ca amhuanten quinlasoja moxtin in oc sequin ca amhuanten hual quineltocalo toTata. Noje ma quinlasoja moxtin in oc sequin lacames pin lalticpan hual amo quineltocalo. Unca yoje quinami tehuanten antimitzlasojlalo amhuanten. <sup>13</sup> Sinda yoje anlalasoja, cuaquíu anmijchicahuilítia Dios anmoyolo pa anquinequis anyulis quinami Dios quinequi. Yoje amo cayas len pa anmoyolo calica yihual anmitzmotexpahuilis pan tonali hual anmoitas iyampa Dios. Huan anmoitas iyampa Dios pa in tonali hual nesis toTata Jesús pa cayas ca tehuanten. Yihual nesis ca moxtin yehuante hual cataloaya lachipahuili pa inminyolo pa yoje yesi iyaxca ilacames. Yoje ma ye.

## 4

### *In yulilisi hual quipaquiltía Dios*

<sup>1</sup> Axan, tocnían, ma antimitzilican oc se lajtol. Antimitzililo antimitzyantiticate pa anquichijtías mochi tonali míac hual mojmosta momiactis pa lanextilis pampa anyultica quinami Dios quinequi. Quema, in Tata Jesús quinequi pa antimitzilisi inon. Xicchihuacan jan yoje quinami antimitzilije. Monequi pa anyulis yoje pa anquipaquiltis Dios, huan axcan ticmatilo pampa jan yoje anyultica.

<sup>2</sup> Ticmatilo inon pampa anquimati in lajtol hual antimitzilije pa anquichías quiman ticataloaya ca amhuanten. In lajtol techmacac in Tata Jesús.

<sup>3</sup> Techmacac in lajtol pampa Dios quinequi pa mocajtías chipahuac anmoyolo pa anyes san ilacames itequipanujquimes. Pampín monequi pa camo monilus se ca se sihual o ca se lalac sinda ayamo monamictic ca in se. Huan sinda monamictic se, monequi pa monilus jan ca isihua o ca ilahuical san.

<sup>4</sup> Ma quimati mochi sejse ca amhuante quinami monequi pa quineltocaltis

icuerpo (inacayo) pa yoje quimatis moxtin pampa yihual quitequipanuilia Dios. Ma quimati quinami quipia icuerpo pa yes pa san Dios quitequipanus. <sup>5</sup> Amo ximacahuiltican pa anmocuerpo anmijchihualtis len amo cuali hual cuajnesi anquinequi anquichia. Jan yoje quichihualo yehuanten hual amo quiximatilo Dios. <sup>6</sup> Ma como quihuitzquili icni, amo jan se ca amhuanten. Huan ma como quicajcayahua icni pan ipampa inon hual antimitzilijtcate. In Tata quilacuepilis mochi sejse pa mochi hual quichihuilic se icni, jan quinami neli antimitzilije noje in tonalijmes hual ticataloaya ca amhuanten. <sup>7</sup> Unca pampa amo technotzac Dios pa timocahualosquiaya ca toyolo laijlaculi. Technotzac pa ticayasi mochi tonali chipahuac pa toyolo pa tictequipanuilisi. <sup>8</sup> Pampin, sinda se amo quinequi quineltoca inon hual antimitznextilijtcate, cuaquin ma quimati yihual pampa amo cataloaya lacames hual quilije inon. Cataya Dios hual quilic, quemá, Dios hual quimaca in Espíritu Santo. Yihual unca pa anmoyolo axan. In Espíritu anmitznextilia quiman amo anquineltoatica Dios.

<sup>9</sup> Axan, amo monequi pa tehuanten antimitzjicuululisi len lajtol inahuac quinami monequi pa anquinlasojlas anmocnían, hual cate yehuanten hual quineltocalo Cristo. Anmoxtin Dios anmitzmaxtia quinami anmolasojlás se huan oc sequin. <sup>10</sup> Pampin, anquinlasojla moxtin tocnían hual cate pa mochi in lalticpan Macedonia. Ma yoje, antimitzyantilo, tocnían, ma momiactitia mochi tonali anmolasojlalislisi se ca oc sequin. <sup>11</sup> Huan antimitzyantilo pa anmotolinis pa anyulis cuali huan ca mosehuilislisi pa anmoyolo, amo antzajtztinemi huan ancualantinemi. Antimitzyantilo pa antequipanus mochi sejse capa hual iyaxca yihual huan amo capa hual iyaxca oc se. Huan antimitzyantilo pa antequipanus ca anmomajmajuan amhuanten, jan quinami antimitzilije chicahuac. <sup>12</sup> Xicchihucan yojque pa anyulis quinami quitasi cuali yehuanten hual amo quineltocalo Cristo. Huan yojque amo monequis pa anmitzlacualtisi oc sequin.

*Pablo lajtúa inahuac in tonali quiman mocuepas Jesucristo*

<sup>13</sup> Axan ticnequilo, tocnían, pa anquimatis len quinpanuc yehuanten hual cochije, ticnequilo tiquijtulo yehuanten tocnían hual miquije. Dios yahui quinhualica ca Jesús yehuanten hual polehuije. Quinhualicas pan ipampa Jesús ilahueliltislisi. Amo ticnequilo pa anmitzcoc anmoyolo quinami quincocúa inminyolo yehuanten hual amo quichixticate Cristo. <sup>14</sup> Neli ticneltocalo pampa Jesús miquic huan yulic oc sejpa. Pampin, jan yoje yehuanten hual quineltocanjme Jesús huan miquije, yehuanten Jesús quinyulitisi oc sejpa.

<sup>15</sup> Inon ticmatilo pampa techilic Dios huan antimitzililo len techilic, unca inon: Tehuanten hual ayamo timiquije pan tonali hual hualas in Tata, tehuanten hual Dios techmacahuiltia pa ticayasi tiyulticate pa in tonali, yihual tialo ticnamiquilo. Ma yoje amo quiman ticnamiquisi tiquinlaicanticate yehuanten hual miquije. <sup>16</sup> Unca pampa yihual in Tata temujtihualas, tzajtztihualas huan lanoztihualas. Mocaquis ilajtol se ca in lanahuatinimes huejué pin cielo, huan mocaquis ilancaquetzaloni Dios. Cuaquinon quipehualtisi inminmoquetzalislisi yehuanten hual miquije quineltocataloaya Cristo. <sup>17</sup> Cuaquinon, tehuanten hual tiyulticate, tehuanten hual ticayasi timocajtcate tiyulticate pan lalticpan, timonechicusi ca yehuanten huan tiyesi la'ajcoquili pin mextemimes pa ticnamiquisi in Tata pin ijye-cal. Huan yojque ticayasi ca in Tata, amo quiman timoxilusi nepa capa yihual unca. <sup>18</sup> Pampin, ximolacahuiltican huan ximochicahuiltican ca in lajtomes.

## 5

<sup>1</sup> Amo monequi, tocnían, pa antimitzjicuilulisi lajtol calica antimitzilisi quichi xixihuimes huejcahuas in lalticpan huan quiman hualas Cristo oc sejpa. <sup>2</sup> Amhuanten anquimati cuali pampa in tonali quiman hualas in Tata yes quinami quiman hualas se laxtequini pa layúa. Amaqui quimati quiman yahui huala. <sup>3</sup> Quiman laqueztiasi quinami amo unca nindeno hual quinmajtía, huan quinami amo unca nindeno hual quichihuilía xitnilisli, cuaquin quinmajsitiquisas in xitnilisli quinami se laxitinijcal. Yes quinami icocolisli se sihual hual yahui quilacatiltía ixolol. Huan amo cayas quinami moquixtisi. <sup>4</sup> Ma yoje, amhuanten, tocnían, amo anunca quinami yehuanten hual cate capa laticumac amo quimazticate len yahui panúa. Anquimati pampa Cristo yahui mocuepa huan ca amhuanten amo cayas quinami quiman huala se laxtequini. <sup>5</sup> Inon antimitzililo pampa anmoxtin anunca lacames hual anquipía Dios ilahuilisi pa anmoyolo, amhuanten iyaxca Cristo. Capa yihual unca, nepa amo quiman mocahuas pa yes lahuilisi. Tehuanten huan amhuanten amo ticate inminyaxca yehuanten hual quipialo laticumactilisli pa inminyolo. <sup>6</sup> Pampín, ma camo tiyulican quinami cuajnesi tiqijtulo pampa amo monequi pa ticchixtiasi in tonali, quinami yehuanten hual coxticate amo quichixtialo. Yoje unca quinami quijtulo pa inminyolo yehuanten hual amo quineltocalo Cristo. Pa tehuanten, yes cuali pa tiyulisi quinami lacames hual mochixticate pa panus in hual ticmatilo pampa yahui panúa. Huan ma tiyén (tiyecan) lacames hual mojmosta tilajnamiquilo pa toyolo ca mochi tolajnamiquilisi. <sup>7</sup> Unca pa layúa quiman cochilo in cochinjmes, huan pa layúa lahuanalo in lahuanquimes. <sup>8</sup> Ma yoje, tehuanten tiyulilo quinami amo mocahua pa yes semilhuil. Ticchixticate in tonali quiman mocuepas Cristo. Pampín, ma tiyén (tiyecan) hual amo timocahualo pa tilajtusi pa laijtc toyolo ca mochi tolajnamiquilisi. Ma timochihuacan quinami in guaches hual mochijchihualo pa moanasi. Molaquentilo ca tzotzomajli lachihuali ca teposli pa inminlaixpan huan lapachultilisli lachihuali ca teposli pa inmintzontecon. Pa tehuanten hual ticneltocalo Cristo, tolaneltocalisli huan tolasojlalisli cate quinami in tzotzomajli lachihuali ca teposli hual quipialo pan inminlaixpan. Huan pampa ticchixticate pa Jesús techquixtis pin polehuilisi, inon unca quinami timonapatiloaya ca in lapachultilisli lachihuali ca teposli pan totzontecon. <sup>9</sup> Yoje ticayasi laquixtili pin polehuilisi pampa Dios amo quilalic pa tiquitasi icualanilisli tehuanten hual ticneltocalo Cristo. Dios quilalic pa tiyelosquiaya laquixtili pin ipolehuilisi tolajlaculisli. Quilalic pa tiyesi laquixtili pan ipampa toTata Jesucristo. <sup>10</sup> Yihual miquic pampa tiyeje lacames laijlaculi. Pampín sinda tiyulilo o sinda timiquilo, ma yojque timoxtin tiyulisi ca yihual quiman hualas. <sup>11</sup> Pampín, ximochicahuallitican se ca innojen oc sequin ca amhuanten, huan ximopalejtican se ca oc sequin pa yoje mochi sejse ca amhuanten quimatisi ilamaxtilisli Jesús. Xicchihuacan jan quinami ticmatilo pampa yoje anquichjtica.

*Pablo quinmaca lajtol in laneltocanjmes*

<sup>12</sup> Huan tocnían, ma antimitzilican pa anquinmiximatis cuali yehuanten hual tequipanulo ca amhuanten, yehuanten hual anmitzlaicanalo pan iojli in Tata. Yehuanten anmitznextililo quinami monequi pa anyulis quinami Dios quinequi. <sup>13</sup> Xiquinmiztiacan ca lamajtilisli pampa quichihualo in tequipanulisli. Xiyulican jan sejpa ca mosehuilisi ca amhuanten.



<sup>14</sup> Huan tocnían, antimitzyantilo, xiquinmilican yehuanten hual amo quinequilo tequipanulo pa tequipanusi quinami Dios quinequi. Xiquinchicahualtican yehuanten hual amo quipialo chicahuaac. Xiquinpalehuican yehuanten hual amo quipialo chicahualisli. Amo xicualanican ca yehuanten hual amo cate ca se lajtulisli ca amhuanten. Amo xicualanican ca yehuanten hual huejcahualo monextililo yulilo quinami Dios quinequi. Yihual quita cuali pa anquinmitas quinami lacames hual amo huil monextililo jan axcan.

<sup>15</sup> Ximolachilican pa camo anmolacuepilis, no, amo jan se ca amhuanten. Dios quita cuali pa camo anmocahuas pa anquichihuilis len cuali amhuanten huan moxtin oc sequin.

<sup>16</sup> Xicayacan mojmosta ca niman míac paquilisli. <sup>17</sup> Huan amo ximocahuacan pa anquilajlanis Dios. <sup>18</sup> Xicsehuican Dios pa mochi hual anmitzpanúa, pampa inon unca len Dios quinequi pa amhuanten. Yihual technextilic melahuac len quinequi pa amhuanten. Technextilic pan ipampa mochi in hual Cristo Jesús quichíac huan technextilic.

<sup>19</sup> Amo xictzacuilican in Espíritu Santo pa camo quijtus o quichías len yes hual yihual quimacatiquisa aqui yes pa quijtus o pa quichías. Sinda anquichihuaya inon, yoje unca quinami anquisehuiaya in Espíritu Santo jan quinami anquisehuiaya se tixuxli. <sup>20</sup> Huan amo xicxijxicucan len quijtulo yehuanten hual quipixtiquisalo se ilajtol Dios. <sup>21</sup> Xicstemucan quinami anquimatis neli sinda unca yoje in hual quijtulo. Cuaquinon xicneltocacan ca mochi anmoyolo inon hual neli anquimati unca cuali. <sup>22</sup> Ximijcuanican pa camo anmoitas inahuac mochi in hual nesi amo cuali, ximolachilican pa camo anquichías.

<sup>23</sup> Dios quipía mochi hual unca cuali pa anmitzmacas ca mosehuilisli. Pampín, ma anmijchipahuili mochi anmoyolo pa anquitequipanuulis, anquixtica mochi hual quinequi pa anquipías. Yoje anmijchihuilia pa anyes jan iyaxca san. Huan ma mocahua anmoyolo huan anmoyulilisli huan anmocuero (anmonacayo) ca nindeno hual amo unca cuali, pa yoje amo cayas len calica Dios anmitzmotexpahuilis pa in tonali hual hualas oc sejpa toTata Jesucristo. <sup>24</sup> Yihual Dios hual anmitznotza pa anquineltocas Cristo, yihual amo mocahuas pa quichías inon hual quijtúa pampa yahui quichía.

<sup>25</sup> Tocrían, xiclaajlanican Dios pa tehuanten mojmosta.

<sup>26</sup> Xiquinpialtican moxtin tocnían ca latenamiquilisli hual yoje ca tehuanten lanextilia quinami tiquinlasojlalo moxtin hual ilacames Cristo.

<sup>27</sup> Annimitzilía chicahuaac ilaixpan toTata pa anquinmomaxtilis moxtin tocnían in amal nican.

<sup>28</sup> Ma caya ca amhuanten in cuali hual san toTata Jesucristo huil tejchi-huilia.

## In oc se amal hual Pablo in lanahuatini quinmijcuiluilic in laneltocanijmes pa Tesalónica

*Pablo huan yehuanten ca yihual quinmijcuiluilía in laneltocanijmes pa Tesalónica*

<sup>1</sup> Tehuanten Pablo huan Silvano huan Timoteo antimitzjicuiluililo amhuanten pa Tesalónica, amhuanten hual anquineltoca Dios toTajtzin huan in Tata Jesucristo. <sup>2</sup> Ma Dios toTajtzin huan in Tata Jesucristo anmijchihuilican inminlachihualisli cuali calica anmitzquixtia pin ipolehuilisli anmolajlaculisli. Huan ma anmitzmacacan axan huan mojmosta mosehuilisli huan mochi in cuali hual unca ca yehuanten pa anmitzmacasi pampa anmitzlasojlalo.

*Dios quinmilis lacames laijlaculi pampa lamisi polehuisi pan tonali hual mocuepas Cristo*

<sup>3</sup> Tocnían, monequi pa ticsehuisi Dios mojmosta pampa anunca tocnían, jan quinami unca cuali pa yojque ticchihuasi. Unca cuali pampa anquineltoca Cristo míac, huan momiactía anmolaneltocalisli. Huan mochi sejse ca amhuanten anyuli anquinlasojlatica míac. Huan anmolasojlalisli momiactía pa moxtin in oc sequin ca amhuanten mojmosta. <sup>4</sup> Pampín, tehuanten, pan tonalijmes hual ticate capa monechicujticate ilaixpan Dios oc sequin laneltocanijmes, amo quiman tiquilcahualo pa tilajtusi ca míac lanequilisli quinami amo anmocahua pa anmoepenialtis mochi in amo cuali hual anmijchihuilijticate. Tilajtulo noje quinami amo quiman anmocahua pa anquineltocas Jesucristo, mas que anmitztojtocalo pa anmitzcocoltisi. Quema, anmitzpanujtica míac amo cuali hual anmijchihuililo. Huan amhuanten anmoepenialtia pa anpanus mochi inon amo anquinlacuepilijtica. <sup>5</sup> Pampín, ticmatilo Dios quinchihuilía moxtin hual mohuiquilía pa canasi. Anpanujtica lacocoltili pampa anquixtoca quinami Dios huelitía. Pampín Dios quijtúa pampa anmonotza pa anyulis capa yihual huelitía.

<sup>6</sup> Huan ticmatilo pampa Dios quita cuali pa quinlacuepilis yehuanten jan quinami yehuanten anmijchihuililo. <sup>7</sup> Amhuanten hual anmijchihuililo amo cuali, Dios quita cuali pa anmitzmacas mosehuilisli pa anmoyolo ca tehuanten noje quiman nesis quistica pin cielo (ilhuicac) in Tata Jesús. Yihual hualas ca ilanahuatinijmes pin cielo hual quipialo ichicahualisli, milintihualasi quinami tixuxli. <sup>8</sup> Huan quinmacas lacocoltilisli yehuanten hual amo quiximatilo Dios, quema, yehuanten hual amo quineltocalo ilamachiltilisli cuali toTata Jesús. <sup>9</sup> Yehuanten cate hual yalo panulo lacocoltilisli hual amo quiman lamis, lacocoltilisli hual amo lamis quinmijlacus. Cayasi laijcuanili pa ilaixpan Dios huan ilaixpelalisli chichahuac ilahuelilitisli, amo huil mocuepasi ca yihual. <sup>10</sup> Quema, in panus pa in tonali quiman hualas Jesús. Cuaquinon quipiasi Jesucristo ilaixpelalisli chichahuac yehuanten hual quinlajultic pa yesi ilacames chijchipahuac pa inminyolo. Yehuanten momahuisultisi quiman quitasi moxtin yehuanten hual quineltocalo Jesús. Huan yoje anquichías amhuanten noje pa Tesalónica pampa anquineltocac in hual antimitzilije quinami unca in Tata Jesús.

<sup>11</sup> Yoje, pampa ticmatilo inon, tehuanten noje amo timocahualo pa ticla-  
 jlanisi Dios pa amhuanten. Yihual anmitznotzac pa anquineltocasquiaya il-  
 amachilitlisli cuali. Pampín ticlajlanilo pa anmitzitas quinami lacames hual  
 monotzaloaya pa yihual anmitznotzasquiaya. Noje ticlajlanilo Dios pa yi-  
 hual lamis quichías ca ilahuelilitlisli mochi hual anquinequi anquichía hual  
 unca cuali. Anmolaneltocalisli anmitznexilis len monequi pa anquichías.  
 Pampín ticlajlanilo pa yihual anmitzpaheuis pa anlamis anquichías in hual  
 anquichía amhuanten. <sup>12</sup> Cuaquín, quiman oc sequin quitasi mochi in  
 cuali hual anquichía, noje ticlajlanilo Dios pa yehuanten noje quitasi ca  
 amhuanten mochi hual huil quimatilo inahuac toTata Jesús. Noje ticlajlanilo  
 Dios pa itoca Jesús mochías hué huan cualtichin ca amhuanten anmoyolo.  
 Huan ticlajlanilo pa anmochías hué pampa anyultica inahuac yihual. Huan  
 anquipía mochi inon san pampa anmijchiuilic Dios in cuali hual amo  
 quiman lamis.

## 2

### *In lalcal mochi amo cuali*

<sup>1</sup> Axcán, tocnán, ma antimitzilican quinami panus in tonali quiman  
 hualas toTata Jesucristo. Inon cayas quiman ticayasi lanechiculi pa tic-  
 namiquisi. <sup>2</sup> Antimitzililo inon amalá anmomacajsiitiquisa sinda cuajnesi  
 anmitzililo len yes lajtol sequin lacames. No, yajmo ximomajtitiacan sinda  
 anmitzililo pampa lamis ajsic in tonali hual mocuepac pan lalticpan in  
 Tata. Amo xiquinneltocacan sinda cuajnesi anmitzililo pampa tiquiliye inon  
 tehuanten pan ipampa se ijyecal o lajtol o se amal hual quijtúa pampa  
 tehuanten tiquijcuiluje. <sup>3</sup> Amo ximomacahuiltican pa amaqui anmitzcua-  
 jcuamanas nindeno, pampa san ajsis in tonali quiman ajsije in tonalijmes  
 capa quicahuasi ilamaxtilisli Cristo in miac ca yehuanten hual quijtulo  
 pampa quineltoalo Cristo. Panus inon, cuaquinon nesis se lalcal hual amo  
 quineltoacas Dios ilajtomes huan amo quinneltocas inminlajtomes lacames.  
 Yihual yes se lalcal hual Dios yahui quijcuanía pa yajmo cayas capa unca Dios.  
<sup>4</sup> In lalcal molalis pa mochías ilacocolini in niman hué, hual unca Dios. Cayas  
 in lacocolini hué pa mochi innojen hual lacames quinmolancuacuetzililo  
 quinami inmindioses. Quema, yoje quichías, molalis pa huelitis pa calijtic  
 Dios itiopan hué. Lacuajcuamanas, lamachiltitica pampa yihual Dios.

<sup>5</sup> ¿Amo anquijnamiquía quinami annimitziliaya innojen lajtomes quiman  
 ayamo nimohuicac capa amhuanten? <sup>6</sup> Huan axan anquimati aqui quitza-  
 cuilijtica pa ayamo nesis in lalcal elehuis hual amo laneltocas. Ma yoje,  
 yihual in lalcal niman elehuis, quema, nesis pan tonali hual Dios quilalic.  
<sup>7</sup> Ticmatilo pampa cate lacames hual yultialo amo quinneltocaticate Dios  
 ilajtomes. Amo ticmatilo leca unca yoje. San ticmatilo pampa unca se hual  
 quintzacuilijtica yehuanten hual molalilo ipan mochi. Quintzacuilijtica  
 pa yoje ayamo huelitis pa mochi lalticpan. Yihual quintzacuilijτίας huan  
 cayas laijcuanili pa yajmo yes pin lalticpan quiman lamis ca ilatzacuilisli  
 hual Dios quilalilic. <sup>8</sup> Cuaquinon nesis in lalcal hual amo laneltoca, yi-  
 hual quinlaicanas moxtin hual molalilo ipan Dios. Ma yoje, in Tata Jesús  
 quimictitiquisas in lalcal hual amo laneltoca. Quimictis ca iijyul icamac,  
 quisulahuas. Huan lamis mochi ilahuelilitlisli in lalcal hual amo laneltoca.  
 Jesús quisulahuas jan ajnaxcan quiman in lalcal quitas Jesús ilaixpelalisli pa  
 in tonali hual mocuepas Jesús pin lalticpan. <sup>9</sup> Ma yoje, pa in tonalijmes hual  
 ayamo hualas Jesús, in lalcal hual amo laneltoca yahui huelitía pan lalticpan.  
 Satanás quimacas lahuelilitlisli pa huelitis. Quimacas mochi lahuelilitlisli

pa quichías mochi islacatilisli hual quinmahuisultis lacames ca lamajtilisli. <sup>10</sup> In lalac quipías mochi lahueliltilisli pa quincuaicuanas yehuanten ca mochi lachihualisli hual amo cuali. Huan Satanás quinextilis in lalac quinami quichías inon. Yoje quincuaicuanas, huan yehuanten polejtiasi pampa amo quinequiloaya quicaquilo Jesús ilajtol pa quineltocalosquiaya in hual melahuac. Yoje sinda quineltocaloaya, cuaquín cataloaya laquixtili pin ipolehuilisli inminlajlaculisli. <sup>11</sup> Pampín Dios quinchihuilis len hual quinlaneltoaltis in islacatilisli. Quijtusi pa inminyolo pampa in lalac hual amo laneltoca unca Dios. Quema, yihual in lalac quinmilis pampa yihual unca Dios. <sup>12</sup> Pampa inon, Dios yahui quinmaca lacocoltilisli moxtin yehuanten, huan amo quiman moquixtisi capa unca inon. Quinmacas lacocoltilisli pampa amo quineltocalo ilajtol Jesús hual unca melahuac, huan amo mochahualo pa quixtocasi quichihuasi len amo cuali.

### *Dios quinlajtultic pa quinquixtis pin polehuilisli in laneltocanjmes*

<sup>13</sup> Ma yoje, amhuanten, tocnían, Dios anmitzlasojla, huan mojmosta ticcate ticsejticate Dios pampa amhuanten anunca tocnían. Anmitzljaltultic pan tonalijmes quiman ayamo quipehualtic in lalticpan. Anmitzljaltultic pa anmitzmacas inon hual iyaxca hual unca pa Dios íxolomes. Inon anmijchihuilis pampa anmitzlalilic in Espiritu Santo pa anyulis yoje chipahuac pa anmoyolo, huan pampa anquineltocac Jesús ilajtol hual mochi unca melahuac. <sup>14</sup> Cataya pampa inon Dios anmitznotzac pan ipampa in lamachiltilisli cuali hual antimitzlamachiltije. Anmitznotzac Dios pa anquipiasquiaya anmolajco ilaixpelalisli cualtichin toTata Jesucristo hual cayas anmoyaxca.

<sup>15</sup> Yojqe, tocnían, amo quiman ximocahuacan pa anquineltocas ca mochi amochicahualisli mochi in lajtomes hual antimitznextilije pan ipampa tolajtol o pan ipampa in hual antimitzjicuiluilije. <sup>16</sup> Yihual toTata Jesucristo huan Dios toTajtzin techlasojlalo huan amo quiman mochahualo pa techlacahualtisi. Yoje ma tejchihuilican noje pa ticchiasi ca míac lanequilisli in niman cuali hual quipialo pa techmacasi teuanten. Inon yalo techmacalo pan ipampa inminlachihualisli cuali hual amo quiman lami. <sup>17</sup> Ma anmitzlacahualtican anmoyolo, ma anmijchicahualtican pa yoje huil anquichías pa mochi tonalijmes míac hual cuali, huan pa mochi tonalijmes huil anquijtus in hual unca cuali.

## 3

### *Xiclajlanican Dios pa tehuanten*

<sup>1</sup> Axcán, tocnían, ma antimitzilican inon pa tilaquisasi ca in amal. Xiclajlanican Dios pa tehuanten, pa camo ticayasi latzacuali pa camo tiejsehuisi ticuicasi ilajtol in Tata ca capic yes. Quema, pampa ticnecticate pa oc sequin lacames quitasi quinami Dios ilajtol quipía lahueliltilisli hué. Inon quitasi jan quinami amhuanten anquitac ilahueliltilisli hué ilajtol. Anmitzhueliltic ilajtol pa anyulis quinami quinequi toTata. <sup>2</sup> Noje xiclajlanican Dios pa yihual techquixtis pa camo timiquisi quiman yes ticayasi capa lacames ej'elehuis hual amo mochahualo pa quichihuasi len amo unca cuali. Amhuanten anquimati pampa amo cate míac hual quineltocalo Jesucristo. <sup>3</sup> Ma yoje, mojmosta huil ticmatilo pa toyolo pampa in Tata quipía mochi chichahualisli. Ticmatilo pampa yihual anmijchicahualtis huan anmitznapatis pa camo anmitzmatocas Satanás. <sup>4</sup> Huan amo inon san. In Tata techmachiltia quinami anquineltoca cuali amhuanten. Pampín ticmatilo pampa anquichitica huan anquichitías len yes antimitzililo. <sup>5</sup> Huan in Tata hual unca

pa anmoyolo ma anmitzlaicana pa anquilasojlas Dios huan pa anquimatis anmopepenialtis ca chicahualisli mochi hual anmijchihuililo yehuanten hual molalilo anmopan. Yojque Cristo mopepenialtic ca chicahualisli mochi hual quichihuilije yehuanten hual molalije ipan.

### *Monequi pa tequipanusi pa molacuaitisi*

<sup>6</sup> Antimitzililo, tocnían, quinami quijtúa in lamaxtilisli huan ilahuelilitlisli toTata Jesucristo, antimitzililo pa anmijcuanis pa capa amo ancayas ca aqui yes ca tocnían hual mojmosta amo quinequi tequipanúa. Yihual hual amo quinequi tequipanúa amo yultica yoje quinami antimitznextilije. <sup>7</sup> Inon antimitzililo pampa amhuanten anquimati quinami anquipía pa anquichías mochi quinami tehuanten ticchihuanijme. Amo tilatzejtineminijme nepa in tonalijmes hual ticatanijme ca amhuanten. <sup>8</sup> Amo tijcuanijme ilacualisli amaqui sinda amo ticlaxlahuije. Quema, ca miac tequipanulisli chicahuac titequipanunijme yihualitonali pa layúa huan pa semilhuil pa timolacuaitilosquiaya. Amo ticnequiloaya pa anquipiasquiaya pa antechlacuaitis, amo jan se ca amhuanten. <sup>9</sup> Amo cataya pampa amo unca toyaxca pa antimitzililosquiaya pa antechlacuaitis. No, cataya pampa ticnequiloaya pa anquitasquiaya quinami tehuanten ticchihualoaya, cuaquinon anquichiasquiaya quinami tehuanten. <sup>10</sup> Huan noje innojen tonalijmes hual ticataloaya ca amhuanten, inon antimitzilinijme: Sinda amo quinequi tequipanúa se, ma camo lacua. <sup>11</sup> Antimitzililo innojen lajtomes pampa techlamachilitlo cate sequin ca amhuanten hual amo yulticate cuali quinami monequi pa yulisli. Amo quinequilo tequipanulo huan mojmosta calpanujtinemilo quinmacatinemilo tequil oc sequin. <sup>12</sup> Pampín, yehuanten hual cate quinami innojen, tiquinmililo huan tiqinyantilo ca ilahuelilitlisli ilamaxtilisli in Tata Jesucristo pa tequipanusi yehuanten pa molacuaitisi. Yojque mosehuisi pa inminchan, yajmo calpanujtinemisi pa quicuasi len amo inminyaxca. Yojque quicuasi inon hual inminyaxca.

<sup>13</sup> Huan amhuanten, tocnían, amo xisiahuican pa anquichías len unca cuali. <sup>14</sup> Sinda unca se capa amhuanten hual amo quinequi quineltoca tolatol hual tiquijcuilulo pa in amal, cuaquín ximomachiltican pa anquimatis aqui unca in se, huan amo ximomacahuiltican pa anquichías nindeno ca yihual, pa yojque yihual pinahuas. <sup>15</sup> Ma yoje, amo xiquijtucan pampa yihual se tolacocolini tehuanten. Dios quita cuali pa anquilaquetzilis pa quimatis quinami monequi pa yihual quineltocas len Dios quilía. Pampín, xiclaquetzilian quinami anquinlaquetzilia moxtin tocnían.

### *Laquisa quijcuilúa ca latuchihualisli*

<sup>16</sup> Axcan yihual in Tata hual quimaca mosehuilisli huan quipía mochi hual unca cuali pa tehuanten, ma anmitzmaca mochi inon pan mochi tonalijmes huan ca móchi lachihualisli. Ma caya ca amhuanten anmoxtin in Tata.

<sup>17</sup> Nehual Pablo annimitzpialtía, huan niquijcuilujtica in nolapialtisli ca nehual nomajma. Yojque anquimatis pampa nehual neli nictilanía in amal, yojque nilajcuilúa. <sup>18</sup> Ma caya ca amhuanten anmoxtin in cuali hual san toTata Jesucristo huil tejchihuilía.

## In amal calica Pablo in lanahuatini pehuac quiman quijcuiluilic Timoteo

### *Lapialtilisli*

<sup>1</sup> Nehual Pablo ilanahuatini Cristo Jesús pampa Dios huan Jesucristo nechilije pa niyes ilanahuatini. Dios techquixtia capa timoitalo pin polehuilisli. Huan Jesucristo tejchihuilía pa ticchiasi ticneltocaticate mochi hual yihual neli techilic pampa yahuiaya techmaca. <sup>2</sup> Nimitzjicuiluilijtica tehual, Timoteo, tehual neli tinoxolol. Nimitzjicuiluilijtica pampa jan quinami nimitzilic Dios ilajtol, yoje tiyuli ticneltocatica Dios huan Jesucristo ixolol. Ma Dios toTajtzin huan Jesucristo toTata mitzmacacan inminlachihualisli cuali huan inminlaicnihilisli huan inminmosehuilisli pa moyolo.

### *Quimaca lajtol hual quijtúa quinami monequi quinchihuilis lamaxtinijmes hual islacatilo*

<sup>3</sup> San quinami nimitzyantic quiman niyahuiaya nicana ojli pa in lalticpan Macedonia, yoje oc sejpa nimitzyantía pa timocahuas nepa pin caltilan Efeso. Nicnequi pa tiquinmilis chicahuac sequin lacames nepa pa camo lamaxtisi ca oc se lamaxtilisli. Ma lamaxtican san yoje quinami niqinnextilic. <sup>4</sup> Ma camo molalican pa lamaxtisi quinpuhuilijtcate lapuhualisli hual amo quipialo quinami lamisi. In lapuhualisli amo cate melahuac, san cate lapuhualisli hual quijtulo quinami yulinijme lacames huan inminsihuahuan huan inminxolomes huan inmiehuimes hual inminahuac yehuanten timomaxtilo san quinami itocalo pa ilajtol Dios. Ma yoje, Dios amo techilic oc se lajtol, san quinami itocanijme yehuanten. Huan sinda lacames lamaxtilo quinlapuhuilijtcate lapuhualisli quinami innojen, yoje quichihualo pa lacames pehuasi molaxilisli lajtomes ca yehuanten. Huan sinda molaxililo lajtomes ca yehuanten, yoje yajmo momachiltilo quinami Dios quinequi pa quinmaxtisi yehuanten hual quineltoocalo Dios ilajtol. Dios quinequi pa quinmaxtisi cuali ilajtol Dios pa yehuanten quineltoocasli niman cuali.

<sup>5</sup> Nicnequi pa tiquinmilis chicahuac pa lamaxtisi cuali pa yoje moxtin ajsisi quimatisi quinami quipialo pa lalasojlasi quinami Dios lalasojla. Quinequi quijtúa, quipialo pa lalasojlasi ca inminyolo chipahuac. Quipialo pa lalasojlasi quimaztcate laijtic inminyolo pampa quichijtcate in cuali hual Dios quinequi. Quipialo pa lalasojlasi quineltoocaticate Dios huan amo lacuajcuamanticate quinami lalasojlalo. <sup>6</sup> Innojen sequin lacames yajmo lamaxtilo yoje cuali. Pehuaje lamaxtije ca lajtomes hual amo quipalehuilo in laneltocanijmes. <sup>7</sup> Yehuanten quinequilo miac pa quimaxtisi in lajtol hual Moisés quijtuc pa yina, mas que amo quimatilo len quinequilo quijtulo in lajtomes hual quijtuticcate. Noje amo quimatilo in hual quijtulo niman chicahuac pampa quema, quimatilo.

<sup>8</sup> Ticmatilo in lajtol unca cuali sinda se quimaxtía cuali. <sup>9</sup> Monequi pa anquimatisi pampa in lajtol Dios amo quinlalilic yehuanten hual yulilo quichijtcate inon hual cuali. Quinlalilic yehuanten hual amo quinequilo quineltoocalo in lajtol. Quinlalilic yehuanten hual amo quimacahuiltilo pa Dios huelitis pan yehuanten. Quinlalilic yehuanten hual amo quila-sojlalo Dios huan quichihualo laijlaculisli. Quinlalilic yehuanten hual quinhuitzquililo mochi Dios ilamaxtilisli huan quixijxiculo. Quinlalilic yehuanten hual quinmictilo inmintajtzitzián o inminnantzitzitzián. Quinlalilic

yehuanten hual quinmictilo oc sequin. <sup>10</sup> In lajtol Dios quinlalilic yehuanten hual quinmanalo sihuames o lacames mas que amo monamictije ca yehuanten, quinlalilic yehuanten hual motecalo lacames ca lacames o sihuames ca sihuames quinami se lalac moteca ca se sihual. Quinlalilic in lacames amo cuaqcuali hual quinqutzquilo lacames pa quinhuicasi huan amo quinmacahualo. Quinlalilic yehuanten hual islacatilo huan quijitulo ilaixpan Dios len amo unca melahuac. Huan quinlalilic yehuanten hual quichihualo mochi oc sequin lachihualisli hual amo cate quinami quijtúa Dios ilamaxtilisli hual techyuliltia cuali. <sup>11</sup> Huan in lamaxtilisli unca ca se lajtulisli ca in lamachiltisli cuali hual technextilía Dios ilahueliltisli hué ca ilaixpelalisli cualtichin. In unca Dios ilamachiltisli cuali hual tiquijtulo unca niman hué. Pan ipampa inon yihual techquixtilía tolajlaculisli pa camo tipolehuisi. Huan Dios hual latuchía nechnotzac pa niclamachiltisquiaya in lamachiltisli cuali.

### *Pablo quisehuía Dios pampa quicnilic*

<sup>12</sup> Nicsehuía Cristo Jesús toTata hual nechmacac lahueliltisli huan nechitac nehual quinami se hual yuli quichijtica quinami quinequi. Huan pampa inon nechlajtultic pa nictequipanuilis quinami nicchijtica. <sup>13</sup> Quema, nechlajtultic pa nicchías inon, mas que pa yina nicuejuecaltini yihual huan niquintojtocani pa niquinchihuilsquiaya tetzcuinuc yehuanten hual quineltocaloaya yihual. Niquinhuitequini huan niquinchihuilini niman amo cuali. Ma yoje, Dios nechicnilic pampa amo nicmatini da nicchijtataya len niman amo cuali pampa ayamo niceltocani Cristo. <sup>14</sup> Huan toTata nechmacac niman míac lachihualisli cuali. Pampín unca pa noyolo míac laneltocalisli huan lasojlalisli. Unca nepa pampa Cristo Jesús unca pa noyolo.

<sup>15</sup> Moxtin huil quilalilo mochi laneltocalisli ca in hual niquijtutica. Unca cuali pa se quineltocas ca mochi iyolo inon: Neli Cristo Jesús hualac pan lalticpan pa quinqixtis pin inminpohuilisli yehuanten hual quichihualo laijlaculisli. Huan ca yehuanten amo unca oc se lalac niman laijlaculi quinami nehual. <sup>16</sup> Cataya pampa inon Dios nechicnilic pa yoje Cristo lanextilis quinami amo mocahua pa laicnilis niman míac, mas que nehual niyec yoje niman amo cuali pa moxtin hual quichihualo laijlaculisli, huan nihuejcahuaya pa nicpalasquiaya noyolo. Yoje, axcan huan pa mosta, moxtin hual yalo cayalo quineltocaticate Jesucristo pa quipiasí yulililisi hual amo quiman lamis, yoje yehuanten yalo nechijnamiquilo nehual huan quijtusi pampa sinda Cristo nechicnilic, cuaquinon quinmicnilis yehuanten noje. <sup>17</sup> Yihual in hué hual amo mocahua pa huelitis. Yihual amo quiman miquis, yihual amo huil tiquitalo, jan yihual san unca Dios. Pampín ma quilasojlalan ca mochi lamajtilisli. Huan pa mochi tonalijmes ma camo lami pa lajtusi hué pa yihual ca mochi lajtomes huejué. Yoje ma ye.

<sup>18</sup> Inon nimitzilía pa ticchías, Timoteo noxól. Unca ca se lajtulisli ca in hual pa yina quijtuje monahuac tehual yehuanten hual quijjutataloaya Dios ilajtol in tonali hual ticmatije pampa Dios mitzljaltultic. Huan ilajtol Dios hual quijtuje monahuac tehual mitzpalehuis pa timoanas pa ticsulahuas mochi hual amo cuali. <sup>19</sup> Huan quiman yes timoana, amo ximocahua pa ticneltocas chicahuac Dios ilajtol melahuac. Huan amo ximocahua pa ticneltocas in lajmatilisli laijtic moyolo hual Dios mitzmaca. Ca in lajmatilisli ticmatis len unca cuali huan len amo unca cuali. In lajmatilisli sequin yajmo quitequipanulo huan pampín in lajmatilisli yajmo quipalehuía inminlaneltocalisli pampa yajmo quineltocalo ilajtol Dios. Huan quiman yes da se yajmo quineltoca Dios ilajtol, cuaquín panúa lacocoltilisli. Cayas

quinami panúa se hual unca pa se barco hual xitintica. Yoje yajmo huil moquixtía pa camo polehuisi. <sup>20</sup> Yojque cate Himeneo huan Alejandro, huan yehuanten niqunquixtic pa camo cayasi capa in laneltocanjmes. Niquincahuac pa quitocasi Satanás, pa yojque yesi lacocoltili, pa yojque yajmo quihuejuecaltisi in Tata.

## 2

### *Pablo quijtúa quinami monequi pa ticlajlanisi Dios*

<sup>1</sup> Axan, ma nimitzili ilapehualtilisli mochi in lajtulisli hual nicpía pa nimitzilis. Nimitzyantía pa tiquinmilis moxtin pa quilajlanisi Dios pa quinmacas inon hual monequi pa quipias. Huan ma lajtucan ca Dios inahuac mochi. Ma quilajlanican yoje pa moxtin lacames. <sup>2</sup> Ma quilajlanican pa in huejueyenten huan pa moxtin hual huelitilo. Xiquinmili pa moxtin quilajlanisi Dios pa yoje tiyulisi jan cuali. Ma quilajlanican pa techpalehuis pa tiyulisi ticpixticate mosehuilisli pa toitenco huan mosehuilisli pa laijtic toyolo. Ma quilajlanican Dios pa techpalehuis pa yoje tiyulisi timomajtiticate ilaixpan Dios huan pa techitasi oc sequin lacames ca lasojlalisli. <sup>3</sup> Dios hual techquixtía pa camo tipolehuisi quita cualtichin huan quixtoca sinda yoje ticlajlanilo. <sup>4</sup> Yihual quinequi pa moxtin moquixtisi pin inminpolehuilisli huan quinequi pa lamisi quimatisi pampa Dios ilajtol unca melahuac. <sup>5</sup> Quema, pampa jan unca se Dios san, huan jan unca se san hual molalía lajco capa Dios huan lacames. Yoje quipaquiltía Dios pa yoje quinmacahuiltis lacames pa moajxiltisi capa yihual. Dios unca laijcuanili pa camo cayas ca lacames pampa cate laijlaculi. Huan in lalac Cristo Jesús, yihual in lalac hual molalía nepa. <sup>6</sup> Yihual motemacac pa quimictisi pa yoje panus ca yihual in lacocoltilisli hual cataya pa tehuanten pampa tiyeje laijlaculi. Yojque yihual laxlahuic pa quiquixtilis moxtin pin inminpolehuilisli. Inon Jesucristo quilamachiltic pan tonali hual Dios quilalic. <sup>7</sup> Pampa inon, yihual nechlajtultic pa nehual niyes lamachiltini huan lanahuatini. Niquijtutica inon hual melahuac, amo nislacatijtica. Yihual nechlajtultic pa niyes lamaxtini capa yehuanten hual amo judíos, pa yoje yehuanten pan ipampa nolamaxtilisli quineltocasi Dios ilajtol hual unca melahuac.

<sup>8</sup> Yoje, pa mochi lali capa lacames hual quineltocalo toTata monechiculo pa quimolancuacuetzilisi, nicnequi pa quilajlanisi toTata quinmajcocticate inminmajmajuan, amo quipixticate laijlaculisli hual Dios ayamo quinpujpuhuac. Huan nicnequi pa quilajlanisi amo cualanticate ca inmicinjan. Huan ma camo cayacan quijtuticate ca laijtic inminyolo quinami quinchihuilisli amo cuali oc sequin. <sup>9</sup> Huan in sihuames jan yoje, ma mochijchi-huacan molaquentiticate yoje pa nesisli cuali. Ma pinahuacan pa molaquentisi yoje amo cuali, ma molaquentican quinami lanextía pampa quipialo lajmatilisli. Ma camo quitemucan quinami huil cayasi cualtichin quinami quipilo inmintzondi pa nesis ipati. Ma camo molalilican len lachihuali ca oro o maquisli hual ipatilo. <sup>10</sup> No, cate cualtichin pa inminyolo in sihuames sinda yulilo quinchihuilijiticate cuali oc sequin. Pampín, sinda in sihuames quijtulo pampa momajtilo iyampa Dios, cuaquín ma mochihuacan cualtichin yoje pan ipampa quinami quinchihuililo cuali oc sequin. <sup>11</sup> Ma yulican sihuames monexilijiticate ilajtol Dios. Ma yoje, ma camo lajtucan ca in lahueliltilisli hual quipialo in lacames. Ma molalican pa inminyolo pa quineltocasi len Dios ilajtol quijtúa inminahuac sihuames. Ma yulican monexilijiticate ca mosehuilisli. <sup>12</sup> Amo nicmacahuiltía pa se sihual lamaxtisi capa moxtin monechiculo, huan amo nicmacahuiltía pa quipias lahueliltilisli



pa huelitisi capa in lacames. Nicnequi pa monextilis ca mosehuilisi ca lacames hual quipialo lahuelilitisli pa quimaxtisi Dios ilajtol. <sup>13</sup> Nicnequi pa yes yoje, pampa Dios quichíac Adán, cuaquín quichíac Eva. <sup>14</sup> Huan amo cataya lacuajcuamanali Adán. Cataya in sihual hual, quema, cataya lacuajcuamanali huan yoje quichíac laijlaculisli, moquixtic pan iojli Dios. <sup>15</sup> Ma yoje, ca sihuames quisas cuali huan yulis ca paquilisli monamictiticate huan quinmizticate inminxolomes. Cayas yoje ca yehuanten sinda yulilo quineltocaticate in Tata huan yulilo quipixticate Dios ilasojlalisli. Noje cayas yoje ca yehuanten sinda yulilo moxilujticate pa camo quichihuasi nindeno hual amo cuali huan yulilo quichijticate mochi ca lajmatilisli.

### 3

#### *Quijtúa quinami monequi lachihualo hual huelitilo capa in laneltocanijmes*

<sup>1</sup> Ma quimatican pampa unca melahuac in lajtulisli hual quijtúa yoje: Sinda se lalac quinequi mochía se hual quinmiztía in laneltocanijmes, cuaquín yihual quinequi quichía tequipanulisli hual Dios quita niman cuali. <sup>2</sup> Pampín, monequi pa yihual yulis niman cuali pa yoje Dios amo quitas nindeno quinami yuli hual amo quixtoca. Monequi pa quipías jan se isihua san huan monequi pa camo canas oc se sihual sinda ayamo polehuic isihua. Sinda polehuis, cuaquín huil monamictis oc sejpa. Monequi pa yulis ca lajmatilisli, quiztica cuali mochi hual quichía. Monequi pa quimatis motzacuilis pa camo quichías len sinda ayamo quijtuya miac pa iyolo inahuac inon. Monequi pa yes lalac hual quimati laijnamiqúa cuali pa lajtic iyolo huan quichijtía cuali. Monequi pa quimatis quinchiuilis cuali oc sequin hual amo quinmiximati. Monequi pa quimatis lamaxtis. <sup>3</sup> Monequi pa camo lahuanas. Ma camo ye cualancudó hual quinequis moanas ca oc se. Cayas cuali pa yes lalac hual quimati yuli cuali, hual amo cualani sinda quitas len hual amo cana quinami san yihual quinequi. Ma camo ye lalac hual quinequi quinlaxilía lajtomes, huan ma camo quixtoca quipía miac tomin. <sup>4</sup> Ma quimati huelitía pa ichan ca lajmatilisli cuali. Ma quimati quineltocalti cuali ixolomes yoje pa quinequisi quineltocasi inmintajtzin in xolomes. <sup>5</sup> Quema, pampa sinda se lalac amo quimati huelitía cuali pa ichan, cuaquín ¿quinami quimatis huelitis cuali ca in laneltocanijmes? Amo huil. <sup>6</sup> Se hual quinmiztía in laneltocanijmes ma camo ye lalac hual jan quipía je nadita pehuac quineltocac Jesucristo, yojque pa camo pehuas moixtocas huan moitas quinami se hué. Yojque yajmo huil quitas len unca cuali pa quichías. Yojque ca nadita cuajnesi yes lapoluli quinami Dios quimacahuac pa mopulus in lili. <sup>7</sup> Quema, monequi pa yihual hual laiztica yes lalac hual quitasi cuali yehuanten hual amo quineltocalo Cristo. Unca pampa sinda yehuanten quimatilo da amo yuli cuali, yehuanten huan Satanás quihuejuecaltisi, huan Satanás quimoyaxcajtisli.

#### *Quijtúa Pablo quinami monequi lachihualo in lapalehuinijmes*

<sup>8</sup> Huan jan yoje in lapalehuinijmes monequi pa yesi lacames hual yulilo yoje pa moxtin quinmitas ca lamajtilisli. Monequi pa camo lacuajcuamanasi, monequi pa camo quixtocasi cunisi miac hual lalahuanaltía. Monequi pa camo yesi lacames hual yulilo quitemujticate quinami yoje cuali o yoje amo cuali huil canasi miac tomin. <sup>9</sup> Monequi pa se lapalehuini quipías lachipahuali in lajmatilisli pa iyolo hual in Espíritu Santo quichipahuilía. Huan ca in lajmatilisli yulis quineltocatica Jesucristo ca se lajtulisli ca mochi hual Dios technextilic quinami unca yihual Dios. <sup>10</sup> Ma yoje, quiman ayamo

mochihuaje lapalehuinijmes, monequi pa moxtin in oc sequin quimatasi pampa neli yulilo yoje cuali. Pampín ma quinlajlanican in laneltocanimjes quinami yulilo yehuanten. Yoje quimatasi sinda cayasi sequin hual quinequillosquiaya quinmotexpahuililo.<sup>11</sup> Huan quinami in lacames, noje in sihuames lapalehuinijmes quipialo pa yulisi yoje pa moxtin quinmitasi ca lamajtilisli. Ma camo yén (yecan) sihuames hual quixtocalo laqueztine-milo len amo cuali inminahuac oc sequin. Ma yén (yecan) sihuames hual quimatilo yulilo ca lajmatilisli quizticate mochi hual quichihualo. Huan ma yecan sihuames hual oc sequin quimatilo pampa mochi hual quichihualo unca melahuac.<sup>12</sup> Huan in lapalehuinijmes, ma quipía se lalaj san se isihua san. Huan ma quimatican quinneltocaltican cuali inminxolomes, ma quimatican huelitican cuali pa inminchan yehuanten nojen.<sup>13</sup> Nicmati pampa monequi pa yesi yojque in lapalehuinijmes. Yojque moxtin in laneltocanimjes laquetzasi ca lajtomes huejué pa yehuanten hual latequipanuililo cuali. Noje quimatisi lajtusi cuali pampa quinneltocalo Jesucristo cuali huan pampa yihual quinchihuilía cuali yehuanten.

*Mochi hual unca melahuac inahuac Dios technextilía pan ipampa quinami ticmolancuacuetzililo*

<sup>14</sup> Innojen lajtomes nimitzijcuiluilijtica, Timoteo, mas que nicchixtica pa camo nihuejcahuas nihualas ca tehual.<sup>15</sup> Huan sinda nihuejcahuas nihualas, nimitzijcuiluilijtica innojen lajtomes pa ticmatis quinami monequi pa yulis lachijtica se capa yes quintequipanuilijtica yehuanten hual quinneltocalo toTata. Yehuanten cate ixolomes in Dios hual yultica. Moxtin yehuanten moitalo pa mochi ilanechiculisli Dios cajcaca cate laneltocanimjes. Quinapatililo ilajtol melahuac pa camo quixitinilo yehuanten hual quinequilo quixitinilo. Noje yehuanten cate quinami in cuajmaxalimes hual quipalejticate se cali, pampa quipalehuilo pa ilajtol yajtias momaztica pin lalticpan.<sup>16</sup> Timoxtin in laneltocanimjes neli tiquijtulo ca se lajtulisli pampa unca niman hué in lajtol inahuac Cristo huan quinami ticmolancuacuetzililo. Pa yina amo ticmatiloaya aqui unca huan axan ticmatilo. Unca quinami quijtulo innojen lajtomes:

Yihual Cristo hual huan Dios catanijme, mochíac lalac.

Monextic pan ipampa in Espíritu pampa yihual unca quinami Dios, amo quipixtica laijlaculisli.

Quitajque Dios ilanahuatinijmes hual cate ca yihual pin cielo, quitaje quiman yulic oc sejpa.

Lacames quilamachiltijque quinami yulini yihual capa yehuanten pa in lalimes pin lalticpan.

Lacames pin lalticpan quilalilijque inminlaneltocalisli.

Yec la'ajcoquili pa in cielo ca ilahueliltilisli hué huan cahuanilisli cualtichin pa cayas oc sejpa ca Dios.

## 4

*Yehuanten hual yajmo quinneltocasi*

<sup>1</sup> Ma yoje, quijtúa in Espíritu Santo inon ca lajtol melahuac. Quijtúa pampa quiman ajsilo in xixihuimes quiman yahui lami mochi inon hual Dios quichíac, cuaquin sequin mocahuasi pa quinneltocasi toTata. Pehuasi quinneltocasi ijyecames hual quinequisi quinlaicanasi pa quincuaajcumanasi, huan yojque pehuasi quinneltocasi inminlamaxtilisli ijyecames ej'elehuis.<sup>2</sup> Quema, in ijyecames amo cuajcuali quilalilo inminlamaxtilisli pa inminyolo lacames hual islacatilo. Mas que quinequilo nesilo quinami lacames

melahuac, inminlamaxtilisli amo unca melahuac. San momachiltía pan ipampa len quijtulo islacatijtcate yehuanten hual yajmo quinequilo quineltoalo ilajmatilisli pa inminyolo hual quinnextilía len unca cuali huan amo cuali. Yajmo quimatilo nindeno pa inminyolo ilajmatilisli. Unca quinami se domutzo capa yec lachichinuli se, yajmo lamatilo nindeno pampa in domutzo quintzacuilía. <sup>3</sup> Ca inminlamaxtilisli, quinmaxtilo lacames pampa amo unca cuali pa monamictis se. Quinmililo pa camo quicuasi in lacualisli o oc se lacualisli, mas que Dios quinchíac innojen pa quincualosquiaya lacames hual neli quimatilo pampa ilajtol unca melahuac. Quema, quinchíac pa quincualosquiaya quisejtataloaya yihual pampa quinmacac. <sup>4</sup> Mochi in hual Dios quichíac hual huil tijcualo, inon unca niman cuali pa quicuas se. Amo unca nindeno hual monequi pa se quilasas pa camo quicuas yihual sinda cana pa quicuas quisejtica Dios. <sup>5</sup> Ticsehuilo Dios pampa yojque yihual techtuchihuilía in hual tijcualo. Techtuchihuilía pan ipampa ilajtol huan pan ipampa quinami ticlajlanilo Dios. Pampín, ca in hual tijcualo unca quinami tehuanten ticmahuisujtcate ca lamajtilisli.

### *Se hual quitequipanuilía cuali Jesucristo*

<sup>6</sup> Xi quinmili inon yehuanten tocnían. Sinda yoje ticchía, cuaquín tiyes se ilapalehuini niman cuali Cristo Jesús. Yoje moyolo mochicahualtis pan ipampa ilajtomes Jesucristo hual ticnelto, mochicahualtis pan ipampa in lamaxtilisli niman cuali hual tehual ticneltoctahuiaya.

<sup>7</sup> Pa tiyes lapalehuini niman cuali pa Jesucristo, amo quiman xiquincaqui huan amo quiman xilaqueztinemi innojen míac lapuhualisli hual amo quijtulo nindeno pa quinextilis se quinami yulis pa in Tata. Cate lapuhualisli quinami quinquahuililo ilamantzitas hual san quicaquilo yehuanten hual amo laijnamiquilo cuali. Ximonextilijtía ca mochi mochicahualisli pa tiyulis quinami Dios quinequi pa tiyulis. <sup>8</sup> Sinda se monextilía pa mochías chicahuac icuerpo (inacayo), cuaquín in quichihuilis len lapalehuilisli pa nadita. Ma yoje, sinda se monextilía ca mochi ichicahualisli pa yulis quinami Dios quinequi pa yulis, cuaquín inon quipalehuis pa mochi. Unca pampa Dios techilía neli sinda timonextilisli yoje, cuaquín tiyulisli cuali ca mochi hual yihual quinequi techmaca nican quiman ticate pan lalticpan huan nepa quiman ticayasi ca yihual capa huelitijtica. <sup>9</sup> Huil ticlalilo mochi laneltocalisli ca in lajtulisli, monequi pa moxtin quineltoyasi. <sup>10</sup> Yoje, pa quineltoyasi inon, titequipanulo chicahuac. Huan timoanalo pa ticsulahuasi Satanás pa ticlamachiltisli Dios ilajtol, pampa ticlajli tolaneltocalisli ca Dios hual yultica. Yihual quinquixtía moxtin lacames pin míac polehuilisli. Huan ma yoje, yehuanten hual quineltoalo quimatilo pampa yihual quinquixtía pa camo polehuisi. Inon unca ipolehuilisli inminlajlaculisli huan unca polehuilisli niman hué. <sup>11</sup> Xi quinmili chicahuac in laneltocanijmes innojen lajtoyes hual axan nimitzilic, xiquinmaxti. <sup>12</sup> Amo xicmacahuiliti amaqui pa mijxixicis pampa tehual tilalac yancuic. Monequi pa timochías se lanextilini hual quinextilía quinami Dios quinequi pa yulis yehuanten hual quineltoalo. Ximochía lanextilini pan ipampa quinami tilajtúa huan quinami tiyuli huan quinami tilalasoja huan quinami tilanelto. Huan ximochía lanextilini pan ipampa quinami timocahua ca se lajtulisli san ca Dios ilajtol. <sup>13</sup> Quiman ticchixtica pa nihualas, xiquinlachili cuali quinami quichihualo quiman monechiculo in laneltocanijmes. Xiquita pa cayas se ca mochi sejse lanechiculisli hual quinmomaxtilis ilajtol Dios. Xiquita pa cayas se cajcapa monechiculo hual quimati quinchicahualtía in laneltocanijmes

pa camo quineltocasi lamaxtilisli hual amo melahuac. Xiquita pa cayasi ca yehuanten hual quimatilo quinnexutilo ilajtol Dios. <sup>14</sup> Huan tehual ximoiztía pa camo timocahuas pa tictequipanus in lahueliltilisli hual Dios mitzmacac pan ipampa in cuali hual san yihual huil tejchihuilia, ma camo mochías tipichin. In lahueliltilisli mitzmacac pan ipampa in lajtulisli hual quijtuloaya yehuanten hual lajtuloaya pan ipampa in Espiritu Santo. Cataya quiman inminhueyenten in laneltocanijmes mitzlatlilije inminmajmajuan mopan tehual.

<sup>15</sup> Xiquijnamiqúi mojmosta innojen lajtomes hual nimitzijcuilulijtica pa ticchías. Ximomaca ca mochi moyolo pa tiquinneltocas innojen lajtomes, pa yoje moxtin quitasi pampa tehual tiajsi ticmati tiyultía quinami yuliaya pa toTata. <sup>16</sup> Ximolachili pa tiyulis cuali, ximolachilijtia quinami tilamaxtia. Xiyuli huan xilamaxti cuali ca mochi moyolo. Sinda ticchías yoje, cuaquín timoquixtis pa camo tipolehuis tehual huan tiquinquixtis pa camo polehuisi yehuanten hual mitzcaquisi.

## 5

### *Yoje monequi pa yulis lachijtica se quiman yes moita ca in laneltocanijmes*

<sup>1</sup> Amo xicajua se abuelito ca cualanilisli. Quema, xiquihuica ca anmohuían pa tiqúilis len quichijtica hual amo cuali. Xiquili in quinami yihual motajtzin tehual. Xiquinchihuili in lacames yajyancuic quinami yehuanten cataloaya mocnían. <sup>2</sup> Xiquinchihuili in ilamantzitas quinami ticchihuilisquiaya monantzín huan xiquinchihuili in sihuames yajyancuic quinami cataloaya mocnían sihuames. Huan ximoiztía pa ticneltocas mochi ilajtol Dios hual technextilia inon hual cana cuali pa quichihuasi lacames huan sihuames quiman yes tilaqueztica ca in sihuames yajyancuic.

<sup>3</sup> In sihuames inminhuían xiquinmita ca lasojlalisli yehuanten hual amo huil molacualtilo. <sup>4</sup> Ma yoje, sinda se sihual ihuían quinpía ixolomes o ixohuiyojmes, cuaquín ma lapehualtican pa quimatisi ixolomes o ixohuiyojmes quinami monequi pa quinchihuilisli cuali inminnantiztían, quinami Dios quinequi pa quinchihuilisli. Ma quinchilichilan, pampa Dios quita cuali inon. <sup>5</sup> Huan in sihual hual mocahua ihuían, amo quipixtica aqui quilachilia, cuaquín yihual quichixtica pa Dios quipalehuis. Yoje yuli quilajlantica Dios pa quilachilis, lajtúa ca Dios yihualitonali, pa semilhuil huan pa layúa. <sup>6</sup> Huan in sihual ihuían hual yuli quilantica miac tomin pa yihual ihuían, yoje yihual, mas que yultica ca icuerpo (inacayo), unca quinami miquic ca iyolo. <sup>7</sup> Monequi pa tiquinmilis pa noje quinneltocasi innojen lajtomes. Yoje amaqúi huil quinhuejuecaltis inahuac quinami yulilo. <sup>8</sup> Sinda unca se hual amo quinequi quinchilía icnían, quema, huan amo in san, sinda se amo quinequi quinchilía yehuanten pa ichan, yoje yihual quinami quijtutica pampa yajmo quineltoca Jesucristo. Neli amo unca yoje elehuis se hual amo quiman quilalíc ilaneltoctalisli ca Jesucristo.

<sup>9</sup> Laneltocanijmes quipialo pa quinchilisisi in sihuames inminhuían hual quintequipanuñilo in laneltocanijmes. Ma yoje, quiman quijcuilulo itoca se sihual ihuían pan amal ca in oc sequin sihuames inminhuían pa quintequipanuñisisi in laneltocanijmes, cuaquín ma ye se sihual ihuían hual ajsic quinpíac sesenta xixihuimes huan axan moviejojtítia. Ma ye se sihual ihuían hual yuliaya ca se ilahuical san. <sup>10</sup> Monequi pa yes se sihual ihuían hual quinchihuilijtinemini cuali, hual moxtin quimatilo quinami quichijtinemini cuali huan yoje quijtulo. Monequi pa yes se sihual ihuían hual quinscaltic

xolomes. Monequi pa yes sihual ihuían hual quimati quinmosehuiltía yehuanten hual ajsilo pa ichan huan quintequipanuilía, quema, quinpactica inmicxihuajmes in laneltocaniymes quiman ajsilo. Monequi pa yes sihual ihuían hual quimati quinpalehuía yehuanten hual panujticate icnotilisli o lacocoltilisli. Monequi pa yes sihual ihuían hual yulini quimaztataya miac lachihuaya cuali.

<sup>11</sup> Sihuames yajyancuic hual inminhuían, amo xiquijcuilu inmintocajmes pan amal pa latequipanuilisi, pampa lamatisi lanequilisli pa se local. Cuaquín yajmo quinequisi quitequipanuilisi Cristo pan ipampa quinami quintequipanuililo in laneltocaniymes. Quinequisi monamictisi oc sepa. <sup>12</sup> Yoje Dios quinmotexpahuilis pampa amo quinequisi lamisi quichihuasi inon hual neli quilije yahuilooaya pehualo quichihualo. Quilije pampa quinequiloaya quitequipanuililo Cristo pan ipampa quinami quintequipanuililo in laneltocaniymes. <sup>13</sup> Huan amo inon san. Yehuanten mochihualo latzejquimes, paxalujtinemilo pa se cali huan pa oc se cali. Huan amo jan mochihualo latzejquimes san. Noje pehuasi latenehuasi, pehuasi quinequisi quimatisi innojen hual amo quinpialo nindeno pa quitasi, quijuticate len amo cuali pa quijtusi. <sup>14</sup> Pampín, nicnequi pa monamictisi oc sepa in sihuames yajyancuic hual inminhuían, pa quinpiasi xolomes, huan pa quiztinemisi inminchan. Yojque, se hual amo quinequi quineltoca toTata amo huil quinmotexpahuilis. Monequi pa molachilisli pa camo quinpanus inon. <sup>15</sup> Unca pampa axcan cate sequin sihuames inminhuían hual moquixtije pa iojli Cristo huan canaje iojli Satanás.

<sup>16</sup> Huan sinda unca se sihual hual quineltoca Cristo huan yihual quinpía sihuames inminhuían chantiticate pa ichan, monequi pa in sihual quinpalehuis in sihuames inminhuían. Ma camo momacacan tequil in laneltocaniymes ca innojen sihuames inminhuían umpa pa yoje in laneltocaniymes huil quinlachilisli sihuames inminhuían hual quema, amo quipialo aqui quinlachilis.

<sup>17</sup> Cate abuelojmes ca in laneltocaniymes hual huelitilo niman cuali. Ma quijtucan moxtin pa inminyolo pampa innojen abuelojmes monotzalo pa quinlasojlasi moxtin ca lamajtilisli pampa cate abuelojmes huan noje monotzalo pa moxtin quinmacasi lasojlalisli pampa huelitilo. Quema, monotzalo pa quipiasi miac lasojlalisli, huan amo san in lasojlalisli hual monotzalo yehuanten hual jan abuelojmes san. Ma yoje, in abuelojmes hual tequipanulo chicahuac pa quilamachiltisi ilajtol Dios huan quimaxtilo, yehuanten monotzalo niman miac pa oc sequin quinlasojlasi ca lamajtilisli. <sup>18</sup> Monotzalo quipialo lasojlalisli pampa ilajtol Dios lajcuiluli quijtúa yoje, quil: “Amo xiquilpi pa itzontecon pa camo huil lacuas se buey hual quitelicsa in trigo.” Huan noje: “In tequipanujquil monotza cana ilaxlahuilisli.”

<sup>19</sup> Amo xilajlani quinami quichíac laijlaculisli se hual moviejojtíc sinda jan se san quimotexpahuilía. Sinda ome o ye quimotexpahuililo, cuaquín xilajlani.

<sup>20</sup> Yehuanten hual quichihualo len amo cuali xiquinmajua inminyampa moxtin, pa noje in oc sequin momajtsi pa quichihuasi len amo cuali.

<sup>21</sup> Nechizticate Dios huan Cristo Jesús huan inminlanahuatinijmes pin cielo (ilhuicac) hual quinlajtultije pa quintequipanuilisi, nechizticate quiman nimitzijcuiluilía pa tiqinneltocas in lajtomes. Xiquinneltoca, amo ximomacahuilí pa ticchías quinami ticnequi quiman yes monequi pa tiqulis se pampa quichíac laijlaculisli. Xiquili quinami unca melahuac. Huan sinda monequi pa tiqulis se pampa quipía laijlaculisli, cuaquín

amo xiquita cuali se quiman tiquta amo cuali in oc se hual noje quipía laijlaculisli. <sup>22</sup> Amo xicnequi xiejsehui pa ticlalilis momajmajuan pan se lalac. Nicnequi niqijitúa, amo xiejsehui pa ticmonextilis ca se lajtulisli ca se hual cuajnesi mitzilis pampa in Tata quinoztac pa quitequipanuulis yoje capa quipías lahuelilitlisli quinami in abuelojmes. Monequi pa ticchixtías pa quiman ticmatis pa moyolo yihual yuli quinami nimitzilic monequi pa yulisi in abuelojmes. Yoje amo timoitas ticpixtica len ca oc se ilaijlaculisli. Ximopili ca se lajtulisli ca mochi ilajtol Dios pa camo timoitas ca laijlaculisli.

<sup>23</sup> Yajmo xicuni jan al san. Xicuni nadita iayo uva coc pa pajtis moyolo, pampa míac tonalijmes mitzcocúa.

<sup>24</sup> Xicmati cuali pa moyolo quinami yulilo in lacames hual tía tiquinla-jtultía. Sequin lacames inminlaijlaculisli quimatilo moxtin in laneltocani-jmes, quimatilo cuali da quichihuaje laijlaculisli. Pampín jan ajnaxcan yesi latexpahuil huan yoje amo monequi pa quilajlanisi inahuac inon. Oc sequin lacames inminlaijlaculisli amo quimatisi jan ajnaxcan. Ma yoje, quiman quilajlanilo, cuaquín quimatisi cuali huan noje yesi latexpahuil. <sup>25</sup> Huan jan yoje, ca sequin lacames quimatilo moxtin quinami quichihualo cuali. Ca oc sequin lacames amo quimatilo quinami quichihualo cuali. Ma yoje, quimatisi cuali se tonali, amo huil mocahua lalati quinami quichihualo cuali.

## 6

<sup>1</sup> Moxtin hual cate tequipanujquimes hual amo quilaxlahuilo, ma quinmitacan inmintecojuan quinami lacames hual monotzalo pa quitequipanuulisi quimazticate momajtilo inminlaixpan yehuanten, pa yoje inmintecojuan amo quihuejuecaltisi Dios huan ilamaxtilisli. <sup>2</sup> Huan yehuanten hual quipialo inmintecojuan hual quineltocalo Jesucristo, ma camo quinxixicucan inmintecojuan pampa axcan yehuanten inmicnían. Ma quitequipanuulican niman cuali. Unca pampa inmintecojuan axan cate laneltocanijmes huan pampa inon, inmintecojuan cayasi lapalehuili niman cuali pampa in tequipanujquimes quitequipanuulilo cuali. Axan yehuanten cate inmicnían laneltocanijmes hual quinlasojlalo. Xiquinmaxtitía innojen lajtomes, noje xiquinyantitía pa yulisi quinchijticate innojen.

### *In hual neli ipati*

Xiquinmaxtitía innojen, noje xiquinyantitía innojen lajtomes hual nía animitzilía: <sup>3</sup> Cuajnesi unca se hual lamaxtía ca oc se lamaxtilisli. Amo quipala ilamaxtilisli pa pahuas lamaxtis ca ilajtomes cuajcuali toTata Jesucristo. Amo quinequi lamaxtía ca in lamaxtilisli hual unca ca se lajtulisli ca quinami Dios quinequi. <sup>4</sup> Cuaquín xiquinmaxtitía pampa in lamaxtini lajtúa pa iyolo quinami yihual unca se lamaxtini niman hué. Moita quinami yihual se hual neli quimati míac. Ma yoje, amo quimati nindeno. Yihual quinami se hual yajmo laijnamiquía cuali, pampa mojmosta quixtoca lajlanía quinami se hual amo laijnamiquía cuali. Quitemúa quinami huil quinlaxilis lajtomes ca oc sequin pampa quinequi pa se lajtol quinequi quijtúa in hual yihual quinequi. Lacames quinami yihual mochihuasi hual quipilijtiasi laxiculisli oc sequin lacames. Pampín mocualantilo ca yehuanten pampa amo mochihuasi ca se lajtulisli. Lahuejuecaltilo huan quijtulo laijt inminyolo o ca lajtol chichahuac pampa amo cate cuali yehuanten hual amo cate ca se lajtulisli ca yehuanten. Cuajnesi quinequilo quinchihuililo amo cuali. <sup>5</sup> Huan yoje quintocasi quinlaxilijticate lajtomes cualanticate. Yehuanten lacames hual amo quimatilo laijnamiquilo cuali, yajmo lajtulo ca lajtol

melahuac. Quijtulo pampa huil mochihuasi quinami huejueyenten huan huil canasi míac sinda monextisi quinami lacames hual yulilo quichijtcate quinami Dios quinequi. <sup>6</sup> Huan neli se quipías míac sinda yuli quichijtica quinami Dios quinequi. Yoje mocahua ca paquilisli pa iyolo ca len Dios quimaca, amo quinequi quijnamiquía len yes hual amo quipía. <sup>7</sup> Quiman tilacatiye, amo ticualicaje nindeno pin laticpan. Huan amo huil tiquihuicalo nindeno ca tehuanten quiman timiquisi. <sup>8</sup> Ma yoje, sinda ticpialo len pa tijcuasi huan totzotzomajli huan capa tichantilo, cuaquín ticayasi ca paquilisli ca inon. <sup>9</sup> Yehuanten hual quinequilo mochihualo lacames huan sihuames hual quipialo míac tomin, cuaquín ca in lanequilisli Satanás quintilanilía inminyolo. Unca quinami se laquitquiloni hual quilalc Satanás pa quinquitquisquiaya pa yojque quinmoyaxajtilis yehuanten. Cuaquín pehuasi quinequisi niman míac hual quinequilo yehuanten hual amo laijnamiquilo cuali. Huan yojque quinmijlacutilo inmincuerpo huan inminyolo. Lanequilisli amo cuali quinami inon quinmijlacúa lacames, quinpolehuiltis, unca quinami in lanequilisli quinmijsimaltía yehuanten. <sup>10</sup> Quema, pampa sinda se yuli quinectica quipía míac tomin, cuaquín yihual yahui mocahua capa moitas quinchijtica míac inon hual amo cuali. Pampín yihual panus lacocoltilisli. Huan sequin lacames moquixtije pan iojli Jesucristo, amo quijnamiticcate in hual quichijtcate pampa yulilo quinecticate canaló tomin. Pampa inon panulo míac lacocoltilisli pa inminyolo.

### *Ximoana cuali pa in hual ticneltocalo*

<sup>11</sup> Axan, tehual, tilacal hual tictequipanuilijtica Dios. Pampín, amo ximomacahuilti pa tiquinchías innojen. Ximomajti pa tiquijtus pa moyolo pa tiquinchías innojen hual axan nimitzilic. Huan ca mochi moyolo, xictemu quinami timochías ca se lajtulisli ca mochi ilajtol Dios. Ximotolini pa ticneltocas niman cuali Dios ilajtol huan pa tilalasojlas míac. Huan ximotolini pa timopepenialtis quiman yes mijchihuililo len amo cuali. Huan ximopepenialti cuali ca lacames. Amo xicualani ca yehuanten sinda amo quimatilo cuali len ticnequi tiquijtúa. <sup>12</sup> Ximoantía ca in moanalisli cuali, in quinequi quijtúa, ximoana pa ticsulahuas mochi hual tejtzacuilía pa camo ticneltocasi cuali Jesucristo. Xicneltoca ca mochi moyolo, pampa axan ticpía yulilislí calica Dios mitzmacas mochi hual quinequi pa ticpías, yulilislí hual amo quiman lamis. Dios mitznotzac pa mitzmacas in yulilislí quiman tiqulic pampa ticneltocac Dios ilajtol. In in lajtulisli cualtichin, inon tiqulic neli inminlaixpan míac lacames hual huil quijtulo neli pampa mitzcaquije. <sup>13-14</sup> Unca Dios hual quimaca yulilislí pa moxtin. Unca Jesucristo hual quilic neli in lajtulisli cualtichin in tonali quiman quilic neli Dios ilajtol ilaixpan Poncio Pilato. Yoje, inminyampa Dios huan Jesucristo, nimitzilí chicahuac pa camo quiman timocahuas pa ticchías in hual nimitzilic pa ticchías, huan pa ticchías yoje cuali pa camo huil mitzmotexpahuilís amaqui. Quema, xicchá yoje quiman ticchixtica pa hualas toTata Jesucristo. <sup>15</sup> Huan in tonali hual panus inon hual Dios quilalic, cuaquín yihual Dios quinextis Cristo. Quema, jan yihual Dios san hual moxtin laquetzalo niman hué inahuac yihual, san unca iyaxca pa huelitis pin cielo huan pan laticpan. Yihual in niman hué, inminhué moxtin in huejueyenten, yihual inminTata moxtin oc sequin hual huelitilo. <sup>16</sup> Jan yihual san amo quiman mocahua yuli. Amo quiman pehuac, amo quiman lamis. Yihual chanti capa lahui niman chicahuac huan pampín amaqui huil moajxiltía capa yihual. Amo quiman cataya se pin laticpan hual quitac, amo unca se hual huil quita. In Dios



ma quilasojlacan niman m'iac huan ma quip'ia chichahualisli hué hual amo quiman lami. Yoje ma ye.

<sup>17</sup> Yehuanten hual quipialo m'iac tomin nican pan lalticpan, ma quijnamiquican inmintomin amo huil huejcahuas pa quiman. Pampín, xiquinmili chichahuac pa como moitasi quinami huejueyenten. Xiquinmili pa como quijtusi pa inminyolo pampa mochi inminlapalehuilisli unca pan ipampa inmintomin. Xiquinmili pa quilalilisi inminlaneltoocalisli ca Dios. Yihual techmaca mochi pa ticayasi ca paquilisli, yihual amo tzutzucal. <sup>18</sup> Xiquinmili chichahuac pa quichihuasi in hual cuali. Quema, xiquinmili pa yulisi quichi-huilliticate niman m'iac hual cuali. Xiquinmili pa como quiman huejcahuasi pa quinxiluilisi in hual inminyaxca ca yehuanten nojen huan oc sequin hual amo quipialo. <sup>19</sup> Sinda yojque quichihuasi, cuaquín Dios quinlaxlahuis ca m'iac hual ipati nepa pin cielo (ilhuicac). Cayas quinami yehuanten moajcoquilisi pin cielo len hual ipati niman m'iac. Inon neli quinmachiltis pa inminyolo pampa neli quipialo len hual amo quiman xitinis hual ca inon quilalilo mochi inminlaneltoocalisli. Cayas pa yehuanten pin tonalijmes hual hualalo. Yoje huil canasi in yulilisli hual unca yulilisli melahuac hual amo quiman lamis.

*Laqusa ca in amal quijtica Timoteo len monequi quich'ia*

<sup>20</sup> O Timoteo, Dios mitzlalilic pa ticmaxtis mochi ilamaxtilisli Jesucristo. Ximoizt'ia m'iac pa como quiman timocahuas pa ticmaxtis in lamaxtilisli. Yoje yehuanten hual mitztocasi pa lamaxtisi nepa capa tehual tilamaxtic noje quipiasli mochi in lamaxtilisli inahuac Jesucristo. Huan amo quiman xijcaqui innojen lamaxtilisli hual amo unca ca se lajtulisli ca Dios. Amo monotzalo yehuanten inminlajtomes hual quinmaxtilo. Quijtulo pampa inminlajmatilisli unca hual Dios quinmaca huan unca in lajmatilisli hué. Ma yoje, inminlajmatilisli amo lajmatilisli, jan islacatilisli san. Monext'ia amo ca se lajtulisli ca Cristo ilajmatilisli melahuac. <sup>21</sup> Huan cate sequin hual quineltocaje in lajmatilisli amo melahuac huan pampín mijcuanthinemije pan iojli Cristo. In cuali hual san Dios huil tejchihuil'ia ma caya ca tehual.



## In oc se amal hual Pablo in lanahuatini quijcuiluilic Timoteo

<sup>1</sup> Nehual Pablo, ilanahuatini Cristo Jesús. Nilanahuatini pampa Dios vojque quinequi. Nimochíac ilanahuatini pan ipampa in lajtulisli melahuac hual neli nechilic Dios inahuac in yulilisli hual ticpialo pan ipampa Cristo Jesús. Inon unca pampa Dios techita quinami ticate capa cataya Cristo pan tonali quiman miqúic huan yulic oc sejpa huan lejcuc pin cielo. <sup>2</sup> Nimitzijcuiluilijtica tehual, Timoteo, noxolol hual nimitzlasojla míac. Dios toTajztin huan Cristo Jesús toTata ma mitzmacac inminlachihualisli cuali huan inmicnilisli huan inminmosehuilisli pa moyolo.

### *Quijtúa melahuac ilahueliltisli Cristo*

<sup>3</sup> Nicsehuía Dios hual nictequipanuilía ca in ilajmatilisli noyolo, quinami quitequipanuilinijme notajtzitzián. Quema, nicsehuía Dios jan quinami niqúixtoca mojmosta nimitzijnamiquía quiman yes niclajlanía Dios pa tehual. Yihualitonali, pa semilhuil huan pa layúa niclajlanía Dios pa tehual. <sup>4</sup> Nicnequi míac nimitzita quiman nimoijnamiqúiltía quinami tijchoquilic. Yoje, pa in tonali nimitzitas oc sejpa, nicayas niman ca paquilisli. <sup>5</sup> Axan niunca laijnamiqúilti quinami ticneltoca chicahuac toTata. Yoje unca laneltocalisli quinami in hual pehuaya caya pa mochan quiman pehuaya quineltoca moabuelita Loida huan cuaquín quineltocaya monantzin Eunice. Huan nicmati pa noyolo tehual noje ticpía in laneltocalisli quinami yehuanten.

<sup>6</sup> Pampa inon, nimitzijnamiquiltía pa timoejsehuiltis pa tictequipanuilis toTata niman cuali ca in chicahualisli hual Dios mitzmacac pin tonali nimitzlalilic nomajmajuan mopan. Quema, ximoijsehuilti quinami tiquijsehuiltisquiaya pa milinis se tixuxli. <sup>7</sup> Ximochihualti inon, pampa Dios amo techmacac yolo hual momajtia. No, in toyolo hual techmacac quipía chicahualisli huan lasojlalisli. Huan techmaca lahueliltisli pa timosulahuasi quiman yes ticnequilo ticchihualo len amo cuali. Huan techmaca chicahualisli pa ticchihuasi len Dios quinequi pa ticchihuasi. <sup>8</sup> Pampa inon, amo xipinahua ca ilamachiltisli cuali toTata. Huan amo xipinahua ca nehual, mas que niunca latzacuali pa calijtic. Quinmacahuiltic Dios pa nejtzacuasi pa yoje nictequipanuilis toTata nican. Pampín, amo xipinahua nonahuac nehual. Quema, huan nehual ma tipanucan lacocoltilisli. In techpanujtica pampa ticneltocalo in lamachiltisli cuali. Ma tipanucan lacocoltilisli, pampa ticpialo Dios ichicahualisli calica huil tipanusi. <sup>9</sup> Yihual techquixtic pa camo tipolehuisi, huan tejchipahuilic huan technotzac pa tictequipanuilisli yihual san. Yoje tiqitasí quinami Dios amo mocahua quichía cuali. Pampa inon monequi pa tiyulisi ticchijtcate cuali quinami yihual. Dios amo technotzac pampa techitaya lacames hual ticmatiloaya ticchihualo cuali. Technotzac pampa yihual quipiaya pa techilis len, huan quinequiaya lanextili quinami yihual lachihuilía cuali. Huan Dios techitaya pa tejchihuilis tehuanten ilachihualisli cuali pan ipampa Cristo Jesús nepa capa ayamo quipehuatic in lalticpan. <sup>10</sup> Axcan ticmatilo ilachihualisli cuali pampa hualac Cristo Jesús hual techquixtía pa camo tipolehuisi. Hualac pan lalticpan huan technextilic ilachihualisli cuali Dios. Cristo Jesús quinchíac ome lachihualisli quiman hualac pan lalticpan: Miquic huan yulic oc sejpa. Yoje yajmo timomajtilo quiman ticpialo pa timiquisi. Noje Cristo

technextilic cuali pampa huil ticpiasi yulilislis hual amo quiman lamis sinda ticneltocalo in lamachiltisli cuali.

<sup>11</sup> Huan nehual Dios nechlajtultic pa niyes lamachiltini pa in lamachiltisli cuali, huan pa niyes lanahuatini pa in, huan pa niyes lamaxtini pa in. <sup>12</sup> Pampa inon, noje nipanujtica innojen lacocoltisli. Ma yoje, amo nipinahua, pampa niquiximati Dios, hual ca yihual niclalic nolaneltocalisli. Neli nicmati yihual huil nechpia pa camo nimoitas pin polehuilislis pan in tonali hual mocuepas Cristo. Hualas pa nechanas pa yoje amo quiman nilamis nicayas ca yihual. Inon nicmati neli pampa niclajlanic Dios pa yihual nejchihuilis inon.

<sup>13</sup> Xiquijnamiqui mojmosta quinami tichcaquic nilamaxtic, huan tehual xiyuli huan xilamaxti jan quinami quijtulo nolajtulisli, pampa nolajtomes cate ca se lajtulisli ca ilajtol Dios. Quema, xicchía yoje ca in laneltocalisli huan lasojlalisli hual ticpia pampa mitzmacac Cristo Jesús. <sup>14</sup> Dios mitzmacac in tequipanulisli pa timoanas ca molamaxtilisli pa yoje tiquinsulahuas moxtin hual quijtulo pampa amo unca melahuac ilamachiltisli cualtichin Cristo. Ximoana pan ipampa in Espíritu Santo hual ticpialo laijtic tehuanten.

<sup>15</sup> Ticmati pampa moxtin yehuanten in laneltocanijmes nepa pin lalticpan Asia amo quinequije nechpalehuije. Ome ca yehuanten cate Figelo huan Hermógenes. <sup>16</sup> Ma quinmicnili in Tata yehuanten pa ichan Onesíforo, pampa yihual Onesíforo nejchihuilic míac pa nimoitasquiaya ca paquilisli sejsa huan oc sejsa. Huan yihual amo pinahuaya pampa niunca latzacuali pin calijtic huan ni'ilpitica ca teposli. <sup>17</sup> No, quiman ajsic nican pin caltilan hué Roma, nechtemuc ca mochi iyolo huan nechitac. <sup>18</sup> Yojque quiman Onesíforo moitas iyampa Dios, ma Dios quicnili quiman quilis len yahui cana pa ilaxlahuilisli. Huan tehual, Timoteo, ticmati niman cuali quinami cuali Onesíforo nechpalejtiahuiaya nepa pin caltilan Efeso.

## 2

### *Se iguache cuali Jesucristo*

<sup>1</sup> Tehual, noxolol, ximochicahualti ca in lachihualisli cuali hual mijchi-huilic Cristo Jesús. <sup>2</sup> Mochi tonali quiman ticataloaya pin míac lacames hual quimatiloaya pampa unca neli in hual nimitzmaxtini, nepa timonextilic míac. Yoje, xiquinmaxti oc sequin lacames in hual timonextilic. Ma yén (yecan) lacames hual neli quineltocalo toTata, lacames hual huil quinmaxtisi oc sequin.

<sup>3</sup> Tictequipanuiljtica Cristo Jesús. Pampín, xipanulacocoltisli quinami se guache panúa lacocoltisli quiman quitequipanuiljtica ilaicanani pin moanalisli. <sup>4</sup> Se guache amo momacahuiltía pa quipías tequipanulisli quinami yehuanten hual amo guaches. No, se guache quipía pa quichías quinami quinequien in laicanani hual quilaquehuac. <sup>5</sup> Huan jan yoje, sinda se unca pan se laluxtilisli, amo canas in laxlahuilisli sinda amo canas quinami quijtúa ilajtol in laluxtilisli. <sup>6</sup> Huan sinda se lalacal tequipanuc míac pa laquis in hual quitocac, unca iyaxca pa quipehualtis ilapixcalisli ilaquilyo in hual quitocac. <sup>7</sup> Xiclali in pa motzontecan len niquijtúa, pampa mitzmaca in Tata lajmatilisli ca mochi.

<sup>8</sup> Xiquijnamictía Jesucristo hual miquic huan cuaquín yulic oc sejsa huan axan amo quiman miquis. Yihual imiahuil in hué David huan amo quiman lamis huelitis. Inon unca quinami quijtúa ilamachiltisli cuali Cristo Jesús hual niclamachiltía. <sup>9</sup> Pampa inon nipanúa inon, nipanúa lacocoltisli huan

pampín nejtzacuaje pa calijtic mas que amo nicchihuaya len amo cuali. Ma yoje, mas que nehual niunca latzacuali, amo unca latzacuali Dios ilajtol.

<sup>10</sup> Pampa inon nimopepenialtía amo nicualantica pampa nejhihuiliticate mochi innojen amo cuali. Nimopepenialtía pa yojqe quinpanus cuali yehuanten hual Dios quinlajultic pa yesi ilacames. Nimopepenialtitica amo nicualantica ca mochi inon pa yoje yesi laquixtili pa camo polehuisi. Inon quinpanus pan ipampa ichichualisli Cristo Jesús, huan quiyasi lahuelilitisli hué huan laixpelalisli cualtichin hual amo quiman lamis.

<sup>11</sup> Huil ticlalililo mochi laneltocalisli ca in lajtulisli hual quijtúa yoje: Sinda ca Cristo timiquije, noje ca yihual tiyulisli.

<sup>12</sup> Sinda timopepenialtilo amo ticalanticate ca in amo cuali hual tejchi-huililo, cuaquín noje ca yihual tihuelitisi.

Sinda tiquijtulo pampa amo tiquiximatilo Cristo, cuaquín yihual noje quijtus pampa amo techiximati tehuanten.

<sup>13</sup> Sinda amo tilamisi ticchihuasi in hual tiqulije Cristo neli pampa tiyahuiloaya ticchihualo, ma yojqe yihual neli lamis quichías len yes yihual quilic pampa yahuiaya quichía, pampa yihual amo huil momacahuiltía pa islacatis inahuac nindeno hual yahui quichía.

### *Se tequipanujquil hual Dios quixtoca*

<sup>14</sup> Xiquinmijnamiquiltitía laneltocanjmes ca innojen lajtomes, nicnequi niqijtúa, innojen lacames hual tiquinmilic pa yesi lamaxtinijmes pa Dios ilajtol. Xiquinmili chichahuac ilaixpan Dios pa camo quinlaxililo lajtomes ca amhuanten, pampa yehuanten hual quicaquilo lámilo molapolultilo.

<sup>15</sup> Ximotolini ca mochi moyolo pa tiyulis jan yoje quinami Dios quita cuali. Xictequipanuisli cuali Dios pa yojqe amo tipinahuas quiman Dios mitzla-jlanis pa mitzmacas molaxlahuulisli. Huan amo tipinahuas sinda tictequipanus cuali Dios ilajtol melahuac.

<sup>16</sup> Huan ximijcuani pa camo ticayas ca yehuanten hual lamaxtilo ca se lamaxtilisli hual amo monotza huan amo unca quinami quijtúa Dios ilamaxtilisli. Quijtulo pampa quimaxtilo ilajtol Dios huan amo quijtulo melahuac, amo unca quinami quijtúa ilajtol. Yehuanten cate hual quimaxtilo inminlamaxtilisli lacames hual amo huil laijnamiqulilo cuali. Yultialo quijtuticate huan quichijticate len amo unca quinami quijtúa Dios ilamaxtilisli.

<sup>17</sup> Huan yehuanten inminlamaxtilisli quinmijlacus in oc sequin laneltocanjmes, mocahuasi pa quineltocasi cuali Cristo. Inminlamaxtilisli unca quinami se sahuual hual moscaltitía hué pan se icuerpo (inacayo), quilantía. Ome lacames hual quinmaxtilo yoje cate innojen Himeneo huan Fileto.

<sup>18</sup> Yehuanten moquixtijje pa iojli Cristo capa quita se mochi imelahualisli in lamachilitisli cuali. In omenten quijtulo pampa axan panuc in tonali quiman Dios techyulitic, quijtulo pampa quinyulitic jan toyolo san pan tonali quiman ticneltocaje Jesucristo. Quijtulo pampa quiman timiquisi, cuaquín tocuerpos (tonacayo) amo yulisi oc sejpá. Huan yoje quinmijlaculo sequin hual quineltocalo ilajtol Dios. Quinmijlaculo pampa quinlaneltocaltilo yoje hual amo quinami Dios ilajtol quimaxtía.

<sup>19</sup> Ma yojqe, Dios ilajtol mocahua melahuac. Pa tehuanten unca quinami se cali ilalastili hual amo quiman mopolúa, mocahua itzindan in cali. Huan mas que sequin mocahualo pa quineltocasi quinami quijtúa Dios ilajtol, yehuanten hual neli quineltocalo Cristo mocahualo pa iojli, pampa yehuanten neli cate Dios ilacames. Momatis pampa yehuanten Dios ilacames jan quinami se amal layapali ca se temulol momatis pampa yes iyaxca se caltilan pan ipampa ilayapalisli in caltilan. Huan Dios ilayapalisli pa ilacames unca ilajtol hual yoje quijtúa: “In Tata quinmiximati yehuanten hual iyaxca”,

huan “Moxtin yehuanten hual quijtulo neli pampa yehuanten cate Dios ilacames, ma yajmo yulican quichijficate in hual Dios amo quinequi.”

<sup>20</sup> Calijtic se cali hué amo cate san hual lachihuali ca oro huan ca plata. Noje cate innojen lachihuali ca cuahuil huan ca lali. Sequin quinquipanulo pa tequipanulisli hual monotza míac. Oc sequin quinquipanulo pa tequipanulisli hual quixijxiculo. In cali ca mochi innojen calijtic huil tiquijtulo unca quinami icali Dios nican pan lalticpan. Unca yehuanten hual monchiculo pa quimolancuacuetzilisi, quijtulo pampa mochihuaje ilacames Dios. Ma yoje, sequin ca yehuanten amo neli quineltocalo Cristo. Pampín Dios quinlasas pa quiahuac quinami quinlasalo innojen hual yajmo cate cuali pin cali hué. In oc sequin hual neli quineltocalo Cristo cate quinami innojen lachihuali ca oro huan plata. <sup>21</sup> Yoje, sinda se lalac mochihauilía pa yajmo quichías in hual Dios quixijxicúa, yoje mochías se hual huil quichía in hual Dios quita quinami len hual monotza. Dios quichihauilía iyolo pa yes iyaxca Dios hual huil quinquipanúa míac pa itequipanulisli. Yihual cayas lachijchihuali pa huil quichías len yes itequipanulisli cuali Dios.

<sup>22</sup> Tehual tilacal yancuic. Cate lachihualisli amo cuajcuali hual quinchihualo yehuanten hual amo laijnamiquilo cuali hual quitilanililo inminyolo in lacames yajyancuic pa quinchihuasi. Amo yoje míac quitilanililo inminyolo lacames amo yajyancuic. Tehual amo xicnequi xiquinchía innojen, ximomajti pa camo tiquinchías. Xicnequi ca mochi moyolo pa ticpiás moyolo ca se lajtulisli ca Dios ilajtol. Huan xicnequi ca mochi moyolo pa ticpiás mosehuilisli pa moyolo ca moxtin in laneltocanjmes. Yehuanten cate hual quilajlanilo Dios huan lajtulo hué inahuac yihual pampa quipialo inminyolo chipahuac. <sup>23</sup> Amo quiman xicpiá nindeno pa tiquijtus quiman yes mitzlaquetzilisi inahuac in hual quichihualo lacames hual amo quimatilo laijnamiquilo cuali huan ma yoje quixtocalo laquetzalo inminahuac innojen. Ticmatic quinami quisalo lalasalajtomes quiman yes lajtulo yoje. <sup>24</sup> Huan monequi pa camo quilaxilis lajtomes se itequipanujquil Dios. Quema, monequi pa monextis cuali ca moxtin, amo quiman cualantía. Monequi pa quimatis lamaxtis, monequi pa quimatis mopepenialtis amo cualantica quiman yes quichihuililo len amo cuali. <sup>25</sup> Monequi pa quinnexilis len unca cuali yehuanten hual molalilo ipan. Monequi pa quichías yoje amo ca cualanilisli o la'ajualisli, mojmosta quichixtica pa cuajnesi Dios quinpatilis inminyolo. Yoje pehuasi laijnamiquisi pa inminyolo quinami Dios quinequi. Huan quinequisi quijtusi pampa Dios ilajtol unca melahuac. <sup>26</sup> Yoje mochihuasi lacames hual quimatilo moquixtilisi ilaquitizquiloni in lili. In laquitizquiloni unca in lamaxtilisli amo cuali. Pan ipampa ilamaxtilisli in lili, yihual in lili quinquitzquic pa yoje quichihuililosquiaya inon hual yihual quinequi.

### 3

*Pablo quijtúa quinami cayasi yehuanten pin tonalijmes quiman pehuas lamis mochi*

<sup>1</sup> Jan xicmati inon, Timoteo. Quiman ajsitihualalo in tonalijmes hual pehuas lamis mochi, cuaquín cayasi tonalijmes capa lacames panusi míac lacocoltisli. <sup>2</sup> Innojen panusi pampa mochihuasi niman e'elehuis. Jan yehuanten san monequisi, mochi seje ihuán. Quinequisi míac pa monchiculisli míac tomin, quimiactiticate mojmosta. Moixtocasi, quinmitasi tijtipichin oc sequin, lahuejuecaltisi, amo quinneltocasi inmintajtzitzián, amo quinequisi lasehuisi, huan quixijxicusi mochi hual unca iyaxca Dios. <sup>3</sup> Amo

quimatisi lalasojlasi, amo quiman quinequisi mochihuasi jan sejpa ca mosehuilisi ca oc sequin. Quincocolisi oc sequin, amo quimatisi motzacuilisi pa camo quichihuasi amo cuali, yesi quinami yulijquimes pin cuajlan hual amo mochihuasi pa quinequisi quichihuilisi lacocoltilisi oc sequin, molalisi ipan mochi hual unca cuali. <sup>4</sup> Quintemacasi inmicían huan yehuanten hual quinmiximatilo ca yehuanten hual molalilo inminpan, ejsehuisi pa quichihuasi len amo cuali, amo quinequisi pa amaqui quinmilis quinami monequi pa yulisi, pampa quijtusi yehuanten inminhuán quimatilo mochi. Quixtocasi mopaquiltisi, amo quixtocasi quipaquiltisi Dios. <sup>5</sup> Nesisi quinami lacames hual quimolancuacuetzililo Dios pampa yasi pa in tiopan huan quitzajtzilisi Dios. Ma yoje, neli quijtusi pampa Dios amo quipía lahueliltilisi pa techpalehuis.

Amo ximomacahuiltía pa tiquinequis lacames quinami innojen, ximijcuani pa camo ticayas ca yehuanten. <sup>6</sup> Ca in lacames cate yehuanten hual calpanulo pa se cali huan oc se cali, motolinilo pa quinmaxtisi in sihuames hual amo quimatilo. Quinmaxtisi ca inminlamaxtilisi amo cuali. Huan in sihuames quineltocalo pampa amo quimatilo laijnamiquilo cuali. Quipialo míac laijlaculisli in sihuames huan pampa inon momajtilo huan ma yoje quixtocalo in lamaxtilisi amo cuali. Yulilo quinecticate quichihualo míac hual amo monotza, huan yulilo quinecticate quipialo míac hual amo unca cuali. <sup>7</sup> Huan yoje yulilo monextilijtcate len amo monotza hual quinnextililo innojen lamaxtinijmes amo cuajcuali. Ma yoje, in sihuames amo quiman ajsisi quimatisi len quinequi quijtúa Dios ilajtol melahuac. <sup>8</sup> Innojen lacames hual lamaxtilo ca in lamaxtilisi amo cuali cate jan quinami Janes huan Jambres. Yehuanten lacames hual moquetzaje ipan Moisés. Jan yoje in lacames hual quimaxtilo in hual amo monotza noje moquetzalo ipan Dios ilajtol melahuac. Yehuanten lacames hual amo huil laijnamiquilo cuali. Amo monotza nindeno inminlamaxtilisi pampa amo unca quinami quijtúa Dios ilajtol melahuac. Yoje, Dios quinmilic pampa amo quiman lamisi inminpolehuilisi. <sup>9</sup> Huan mas que lamaxtitiasi, ma yojque amo cayasi míac hual quineltocasi inminlamaxtilisi, pampa moxtin quimatisi pampa unca inminlamaxtilisi lacames hual amo quimatilo laijnamiquilo, jan quinami quimatije quinami catani yoje in hual quimaxtinijme in ome lacames Janes huan Jambres.

### *Pablo quinmaca Timoteo itequipanulisli jan oc sejpa san*

<sup>10</sup> Ma yoje, tehual amo tiquinami yehuanten, pampa pa mochi tonali tichlasojlaya huan ticnequiaya ticmati mochi inon hual nicmaxtiaya, huan ticnequiaya ticmati quinami niyuliaya, huan quinami nicnequiaya pa moxtin quimatisi Dios ilajtol, huan quinami nicneltocaya Jesucristo, huan quinami nimochicahualtiaya ca yehuanten hual moquetzaloaya nopan, huan quinami nilalasojlaya, huan quinami nipanuyaya lacocoltilisi quiman yes nechtojtocaloaya pa nejchihuuililosquiaya amo cuali. <sup>11</sup> Ticmati quinami nechtojtocaloaya huan quinami nipanuyaya lacocoltilisi quinami nechpanuc pa Antioquia huan Iconio huan Listra. Ticmati quinami niyec latojtocali míac nepa, nechcocoltiloaya niman chichahuac. Ma yoje, mochi inon amo nejsulahuac, nechquixtic in Tata, amo nipolehuic. <sup>12</sup> Huan moxtin hual quinequilo yulilo quinami Dios quinequi pa yulisi quineltocaticate Cristo Jesús, yehuanten hual amo quineltocalo Cristo quintojtocasi pa quinchihuilisi mochi amo cuali huan tetzjuinuc. <sup>13</sup> Lacames ej'elehuis mochijtiasi niman ej'elehuis quinami huil mojmosta, huan mochijtiasi lacuajcuamananijmes. Yehuanten yulisi lacuajcuamantinemisi huan yesi lacuajcuamanali.

<sup>14</sup> Ma yoje, tehual, xiyultía tiquinneltocatica innojen lamaxtilisli hual timonexilic hual ticmati pampa cate mejmelahuac. Titechijnamiquía tehuanten hual timitzmaxtije innojen. <sup>15</sup> Huan ticmati pampa quiman tiyec xolotzindi huan pa axan ticmatic ilajtol Dios hual unca lajcuiluli. Ilajtol Dios lajcuiluli huil mitzmaca lajmatilisli pa tiyes laquixtili pa como tiquitas polehuilisli pampa ticneltoca Cristo Jesús. <sup>16</sup> Mochi ilajtol Dios hual unca lajcuiluli Dios quinmilic ilajtunijmes pan ipampa iijyul iEspíritu pa yoje yehuanten quijcuilulosquiaya. Huan ilajtol lajcuiluli monotza pa se quitequipanus quiman se quinmaxtitica oc sequin, monotza pa quitequipanus pa la'ajuas ca lasojlalisli quiman yes se quinequi quinneltoca lamaxtilisli hual amo melahuac. Ca ilajtol Dios quinexilis cuali quinami se lamaxtilisli amo unca quinami Dios ilamaxtilisli. Dios ilajtol lajcuiluli noje monotza pa quitequipanus se pa quinexilis oc se quinami canas oc sepa iojli Cristo sinda moquixtic pa iojli. Huan monotza pa quitequipanus se pa quimaxtis quinami Dios quinequi pa tiyulisli. <sup>17</sup> Yojque, quiman quinmaxtilo Dios ilajtol lajcuiluli moxtin ilaneltocanijmes Dios, mochi sejse quipías lahuelilitlisli pa quichías in hual Dios quinequi pa quichías. Huil quichías mochi tequipanulisli cuali, pampa Dios quihueliltía pa quichías.

## 4

<sup>1-2</sup> Jesucristo toDios yahui nesi nican pan lalticpan pa huelitis huan pa quinmilis yehuanten hual yulilo huan hual miquije inon hual quinchihuilis hual cuali huan amo cuali quiman yuliloaya pan lalticpan. Pampin, ilaixpan yihual nimitzyantía niman chichahuac pa ticlamachiltis ilajtol Cristo Jesús inminlaxpan lacames. Ximochijchía pa ticlamachiltis ilajtol Dios capa yes timoitas, xiclamachilti quiman yes tiquijtúa unca tonali cuali pa ticlamachiltis, o quiman yes tiquijtúa da amo unca tonali cuali. Xiquinmili oc sequin quiman quichijticate laijlaculisli. Xiquinmajmajua, xiquinhuica pa tehual mohuán pa tiquinyantis ca lasojlalisli pa quichihuasi cuali. Xiquinchihuili mochi inon timochicahualtilijtica pa como ticualanis ca yehuanten quiman yes huejcahuasi pa pehuasi quichihuasi cuali. Huan xiquinmaxti yoje mochi quinami huil tiquijnamiquía Dios ilamaxtilisli. <sup>3</sup> Yoje xicchía pampa ajsisi tonalijmes quiman lacames amo yalo quinequilo quicaquilo in lamaxtilisli melahuac inahuac Dios ilajtol hual quinyuliltía inminyolo. Yehuanten quinmanasi míac oc sequin lamaxtinijmes hual quinmaxtisi quinami quixtocalo pa cayasi lamaxtili. Quixtocasi quicaquisi lamaxtilisli hual amo unca quinami quijtúa ilajtol Dios. <sup>4</sup> Huan yojque mocahuasi pa quicaquisi Dios ilajtol melahuac, huan pehuasi quicaquisi inminlapuhualisli yehuanten hual amo laijnamiquilo cuali. Pehuasi quinneltocasi quinami cataya len melahuac inon hual in lamaxtinijmes ej'elehuis quijtulo quiman yes lamaxtilo. <sup>5</sup> Tehual, xilajnamiqui cuali mochi, ximopepenialti pa huil tipanus lacocoltilisli. Xitequipanu mojmosta quinami se hual quilamachiltinemi ilamachiltisli cuali toTata. Xicchía mochi pa tilaquisas ticchías motequipanulisli pa toTata.

<sup>6</sup> Nimitzilía inon, pampa nehual niquinami se huendi hual cuni se, huan axan unca quinami nechtuyajticate. Nicnequi niquijtúa, ajsi in tonali quiman nía niqui, yalo nechmictilo. <sup>7</sup> Amo quiman nimocahuaya pa nimotolinis pa niclamachiltinemisquiaya ilajtol Dios pa míac caltilan cajcapan pin lalticpan. Unca quiman nimoanac cuali ca mochi hual quinequiaya latzacuali pa como mósemanas ilajtol Dios. Axan unca quinami nilaquisac nimolaluc pa se laluxtilisli hual niquinlaquixtic in oc sequin pampa nilamic

niccháac in hual Dios nechilic pa niccháas. Amo quiman nimocahuac pa nicneltocasquiaya Cristo Jesús. <sup>8</sup> Pa in tonali hual yahui huala, nepa yahui nejchihuiliá Dios in hual yes niman cuali. Yahui lamachiltía pampa amo quita nindeno ca nehual hual amo quixtoca. Yoje quipía se laxlahuilisli pa nehual hual nechajcoquilijtica nepa pin cielo (ilhuicac). Huan in Tata quimati cuali quinami monequi pa quinchihuilis yehuanten pa quinami yuliloaya pan lalticpan. Yoje, yihual nechmacas in laxlahuilisli pan in tonali quiman nechlajlanis quinami niyuliaya. Huan amo san nehual nechmacas. Noje quinmacas laxlahuilisli quinami inon moxtin hual quinequilo mojosta pa ajsis in tonali quiman yihual hualas oc sejpa.

*Pablo quinahuatía pa hualas ca yihual Timoteo*

<sup>9-10</sup> Xiejsehui pa tihualas ca nehual, pampa nechcajcahuac Demas. Yihual quixtocaya míac in yulilisli hual ticpialo axcan pan lalticpan, huan amo yoje míac quixtocaya in yulilisli hual ticpiasi pan tonali hual hualas Cristo. Demas uyac pa Tesalónica. Uyac Crescente pa in lalticpan Galacia, uyac Tito pa Dalmacia. <sup>11</sup> Jan Lucas huan nehual ticate san. Xicana Marcos huan xicualica ca tehual quiman tihualas, pampa yihual nechpalehuis míac ca notequipanulisli pa in Tata. <sup>12</sup> Tíquico nictilanic pa Efeso. <sup>13</sup> In laquen hual nijcahuac pin caltilan Troas pa ichan Carpo, inon xicualica quiman tihualas. Xiquinhualica noje in amames, huan xiquiztía pa tiquinhualicas in cuilaxlimes hual quipialo lajcuilulisli pani yehuanten, innojen niquinpiasquiaya pampa míac nechmonotzililo.

<sup>14</sup> Alejandro in teposlero nejchihuilic míac amo cuali. Quilacuepilis in Tata quinami yihual nejchihuilic. <sup>15</sup> Tehual noje ximoiztía tiquitas, pampa yihual amo mocahua pa molalis topan pampa quicocolía in hual ticmaxtilo.

<sup>16</sup> Quiman nicpehualtiaya pa nimonapatis inminyampa yehuanten hual nechmotexpahuilloaya, amaqui cataya nepa pa nechpalehuisquiaya, moxtin nechcajcahuaje. Ma camo quinmotexpahuili Dios pampa quichihuaje yoje. <sup>17</sup> Ma yoje, moquetzac ca nonahuac in Tata huan nejchicahualtic. Yojqe cataya lamachiltili mochi ilamachiltisli toTata, pa quicaquilosquiaya moxtin yehuanten hual amo judíos. Huan yojqe nicataya laquixtili pa camo nipolehuis. Cataya quinami in Tata nechquixtic pa icamac se león. <sup>18</sup> Quema, nechquixtis in Tata pa camo nimoitas pa mochi polehuilisli huan in amo cuali hual quinequilo nejchihuililo. Nechquixtis huan nechhuicas pa nicayas ca yihual capa huelitijtica. ¡Yihual quipías in chicahualisli hué huan in laixpelalisli cualtichin pa mochi tonalijmes, huan amo quiman lamis! Yojqe ma ye.

*Pablo quichicahua Timoteo huan quimaca latuchihualisli*

<sup>19</sup> Xiquinchicahua Prisca huan Aquila huan yehuanten pa ichan Onesíforo. <sup>20</sup> Erasto mocahuaya pa Corinto, huan Trófimo nijcahuac cocoxqui nepa Mileto. <sup>21</sup> Xiejsehui pa tajsis nican quiman ayamo ajsilo in tonalijmes hual sehualalo. Mijchicahualo Eubulo huan Pudente huan Lino huan Claudia huan moxtin tocnán.

<sup>22</sup> Ma caya pa moyolo in Tata. In cuali hual jan yihual san huil tejchihuiliá ma caya ca amhuanten.



## In amal hual Pablo in lanahuatini quijcuiluilic Tito

### *Quipialtía Tito*

<sup>1</sup> Nehual Pablo niunca itequipanujquil Dios. Huan niunca ilanahuatini Jesucristo. Yihual nechlajultit pa niyes ilanahuatini pampa yec yihual hual nejchiphauilic nechquixtilijtataya nolaijlaculisli, jan quinami quinchihuilía moxtin hual Dios quinlajultit. Inon nicneltoca. Yehuanten huan nehual ticmatilo pampa inon unca melahuac huan unca jan quinami Dios quinequi pa tiyulisi. <sup>2</sup> Tiyulilo yojque pampa neli ticchialo ticmazticate pampa huala in tonali quiman tialo tiyulilo ca in yulilisi hual amo quiman lamis. Huan Dios hual amo quiman lacuajcuamana, yihual neli quilic pampa techmaca in yulilisi hual amo quiman lamis. Inon neli quilic quiman ayamo pehuac in lalticpan. <sup>3</sup> Pa in tonali hual yihual quilalic, techcaquiltic ilajtol in yulilisi. Techcaquiltic pan ipampa lamachiltisli, huan nechnahuatit pa niclamachiltis ilajtol. <sup>4</sup> Huan nimitzjicuiluilijtica (nimitzscribiruilijtica) tehual, Tito, neli unca quinami tehual noxolol yoje quinami tiomenten ticneltocalo toTata. Ma Dios toTajtzin huan Cristo Jesús hual techquixtía pa camo tipolehuisi mitzmacacan in cuali hual san yehuanten huil tejchihuilía. Huan ma mitzmacacan noje inminmosehuilisli pa moyolo.

### *Itequipanulisli Tito pa Creta*

<sup>5</sup> Nimitzcahuac pa Creta pampa nicnequi pa ticmelahuas mochi nepa hual mocahua pa mochiychías. Nicnequi pa tiquinlajultit abuelojmes pa yehuanten huelitisi capa Dios ilacames pa mochi sejse caltan capa cate laneltocanijmes. Xicchá inon jan quinami nimitznextilic. <sup>6</sup> Huil ticlajultit se lalac pa yes abuelo sinda amaqui amo quiman quimotexpahuilic. Monequi pa quipías jan se isihua san. Sinda quinpiá xolomes, monequi pa yehuanten quineltocasi Jesucristo, monequi pa yulisi cuali pa yojque amaqui huil quinmotexpahuilis. Huan monequi pa ixolomes quimatisi quineltocasi inmintajtzin. <sup>7</sup> Quema, pampa yihual hual quinlachilía yehuanten in laneltocanijmes unca quinami Dios itequipanujquil hué. Quipía pa yes se lalac hual amaqui quimotexpahuilía. Ma camo ye se hual quitejtemúa pa mochi cayas quinami yihual quinequi. Ma camo ye se hual quinequi cualani jan ajnaxcan, o se hual quinequi lahuana, o se hual quixtoca latecua, o se hual quixtoca lacajcayahua pa momiactilis itomin. <sup>8</sup> Ma ye lalac hual quinequi quinnamiquí ca lasojlalisli lacames pa ichan. Ma ye lalac hual quixtoca quichía len unca cuali huan melahuac ca moxtin. Ma ye lalac hual quimatis quitequipanulisli Dios quinami monequi pa quichihuilis. Monequi pa quimatis motzacuilis pa camo quichías len amo unca cuali. <sup>9</sup> Quema, monequi pa yes yojque, monequi pa camo mocahuas pa quineltocas ilajtol Dios. Cá ilajtol Dios huil ticlalililo mochi tolaneltocalisli. Ilajtol unca quinami quijtúa in lamaxtilisli hual ticmaxtilo ca Dios ilajtol lajcuiluli. Monequi pa in lalac yes yojque pa yes lahueliliti pa quinchicahualtis oc sequin quiman quinnaxtila ca in lamaxtilisli cuali. Noje pan ipampa in lamaxtilisli cuali, huil quinmelahuas yehuanten hual amo lamaxtilo quinami quijtúa ilajtol Dios. Huil quinnextilis quinami amo unca melahuac in hual quimaxticate.

<sup>10</sup> Monequi pa cayasi abuelojmes cuajcuali quinami innojen, pampa cate miac lacames nepa pa Creta hual amo quimatilo momajtilo. Lajtulo quinami



hual amo laijnamiqulilo cuali huan lacuajcuamanalo. Yehuanten in lacames niman amo cuajcuali cate laneltocanijmes judíos hual lamaxtilo. Yehuanten quinequilo pa moxtin yesi latequili pa icuilaxli. <sup>11</sup> Monequi pa yes latzacuali inmincamac, pampa yehuanten lacames hual quinchihuililo pa moquixtisi pa iojli Cristo lacames ca moxtin inminsihuahuan huan inminxolomes. Inon quichihualo pan ipampa in amo cuali hual quinmaxtilo. Huan lamaxtilo pa vojque canasi míac tomin huan amo pinahualo quinami quichihualo inon.

<sup>12</sup> Cataya se lalacal pa Creta hual yec se ca inminlajtunijmes, yihual lajtuni quinlatenejtataya in lacames creteños, quijtuni: “Yehuanten in creteños yulilo mojmosta islacatijcate, quinchihuililo lacocoltisli oc sequin quinami yulijquimes pa cuajlan, latzehuilo huan quixtocalo lacualo niman míac.” <sup>13</sup> Huan inon hual quijtuc quinami cate in creteños unca melahuac. Pampa inon, xiquinmajmajua ca lajtol chichahuac seppa huan oc seppa pa yoje yehuanten quineltocasi toTata jan quinami quijtúa pa ilajtol quinami monequi pa ticneltocasi. <sup>14</sup> Ma quineltocacan vojque, ma camo quinneltocacan innojen lapuhualisli hual amo Dios ilajtol. Innojen lapuhualisli quinpuhuililo yehuanten hual amo laijnamiqulilo cuali, cate lapuhualisli hual quinchijchihualo in judíos. Ma camo quinneltocacan in lajtomes hual amo monozalo pa lanextilisli quinami monequi pa quimolan-cuacuetzilisli Dios. In lajtomes quinchijchihualo lacames hual amo quixtocalo quicaquilo len unca melahuac.

<sup>15</sup> Yehuanten hual mochi tonali quipialo inminyolo chipahuac quinmitalo mochi chijchipahuac. Ma nimitzili se lanextilisli: Quinmitalo chipahuac innojen hual quicuasi, quitalo chipahuac ilamaxtilisli Dios ilajtol. Huan yehuanten hual amo quipialo chipahuac inminyolo, huan yehuanten hual amo quineltocalo Cristo, amo quitalo chipahuac nindeno. Amo laijnamiqulilo chipahuac huan amo unca chipahuac ilajmatilisli inminyolo. <sup>16</sup> Quijquijtulo pampa quiximatilo Dios. Ma yoje, pampa inon hual quichihualo, yoje momati pampa amo neli quiximatilo Dios. Inon momati pampa yehuanten lachihualo tetzcuinuc. Amo lachihualo quinami Dios quijtúa huan amo monozalo pa quichihuasi se tequipanulisli cuali.

## 2

### *In lamaxtilisli hual amo quijlacúa*

<sup>1</sup> Axan, tehual, amo ximocahua pa tiquijtus in hual unca quinami monequi pa yes lamaxtilisli cuali. <sup>2</sup> Xiquinyanti in abuelojmes pa yesi lacames hual quimatilo motzacuililo pa camo quichihuasi inon hual amo cuali. Xiquinyanti pa yesi lacames hual moxtin quinequilo quimatilo momajtilo inminlaixpan yehuanten, pa yesi lacames hual quimatilo lajtulo ca laijnamiqulilisli. Xiquinyanti pa yesi lacames hual quimatilo quineltocalo Dios quinami quijtúa ilajtol. Xiquinyanti pa yesi lacames hual quimatilo lalasojalalo huan mopepenialtilo quiman panusi lacocoltisli, vojque ca se lajtulisli ca ilajtol Dios. <sup>3</sup> Xiquinyanti jan yoje in ilamantzitas pa yulisi nesticcate pa moxtin quitasi quinami cuali quitequipanuilijticate Dios. Ma camo yén (yecan) latenehuanijmes, ma camo quinequican canican míac iayo uva coc hual lalahuanaltía. Ma yén (yecan) lamaxtinijmes hual quimatilo quimaxtilo len unca niman cuali. <sup>4</sup> Sinda yoje cate in ilamantzitas, huil quinnextilisli sihuames yajyancuic quinami quinchihuilisli cuali ca lasojlalisli inminlahuicalhuan, huan pa quinchihuilisli cuali ca lasojlalisli inminxolomes. <sup>5</sup> Huil quinnextilisli sihuames yajyancuic quinami huil moiztiasi cuali, huil quinnextilisli quinami motzacuilisli pa camo quijtusi laijtiti inminyolo quinequisi oc sequin lacames. In ilamantzitas huil quinnextilisli

sihuames yajyancuic quinami quipiasi pa quichihuasi cuali in tequipanulisli pa inminchan. Huil quinnextilisi quinami mochihuasi sihuames hual quinequilo quimatilo quinneltocalo inminlahuicalhuan. Sinda yojque quichihualo sihuames yajyancuic, yoje yehuanten hual amo quinneltocalo Cristo amo huil quijtusi nindeno amo cuali inahuac ilajtol Dios.

<sup>6</sup> Jan yojque, xiquinmili lacames yajyancuic pa quinequisi quimatisi moiztiasi cuali inahuac mochi. <sup>7</sup> Tehual mohuían, ximonexti quinami se lanextilisli cuali pan ipampa molachihualisli cuali. Capa yes tilamaxtía, ma ye lamaxtilisli hual huil quimatisi len quinequi quijtúa, lamaxtilisli hual amo quipía se islacatilisli. Xiye se lamaxtini hual moxtin quimatisi momajtisi moyampa. <sup>8</sup> Huan molajtulisli ma ye ca lajmatilisli cuali quiman yes tilajtus, pa yojque amaqui huil quijtúa nindeno amo cuali calica huil techtenehua. Yojque, aqui hual unca tolacocolini pinahuas pampa amo quipías nindeno amo cuali calica techtenehuas.

<sup>9</sup> Xiquinyanti tequipanujquimes hual amo quilaxlahuilo pa quichihuasi quinami quinmili inmintecojuan huan pa como monanquilisli. <sup>10</sup> Ma como quinmixtequilian inmintecojuan. Ma yulican pa yojque inmintecojuan huil quimatisi pa inminyolo pampa amo quiman quincajcayahualo inmintequipanujquimes. Ma ye yojque pa yojque pan ipampa mochi hual quichihualo in tequipanujquimes huil quinnextilía niman cualtichin ilamaxtilisli Dios hual techquixtía pa como tipolehuisi.

<sup>11</sup> Unca ca yehuanten in cuali hual san Dios huil tejchihuilía nican pan lalticpan. Unca ilachihualisli cuali calica Dios huil quinquixtía lacames pa como polehuisi. Quema, nesic ca moxtin. <sup>12</sup> Axcan nican pan lalticpan Dios ilachihualisli cuali technextilía quinami monequi pa tictequipanultisi tochicahualisli huan tolanequilisli pa ticchihuasi len unca cuali. Huan technextilía quinami timosulahuasi quiman ticnequilo ticchihualo len amo cuali. Ilachihualisli cuali Dios technextilía quinami ticchihuilisli cuali oc sequin, amo tiquizticate se cuali huan oc se amo yoje cuali. Huan ilachihualisli cuali Dios technextilía quinami monequi pa ticmolancuacuetzilisi Dios. <sup>13</sup> Dios ilachihualisli cuali technextilía pa ticchiasi inon hual techmaca niman míac paquilisli. Nicnequi niquijtúa, ticchixticate in tonali quiman nesis toDios hué, yihual in Tata Cristo Jesús hual techquixtía pa como tipolehuisi. Yihual hualas ca huelilitilisli hué huan laixpelalisli cualtichin. <sup>14</sup> Yihual motemacac pa miquis pa tehuanten pa yihual yojque laxlahuis pa techquixtis pa como tipolehuisi pampa tiyeje laiilaculi. Yojque yajmo tiyulilosquiaya quinami yehuanten hual amo quinneltocalo ilajtol Dios. Quema, Cristo yojque techanac pampa quinequiaya quinpía lacames ca inminyolo chijchipahuac. Quinequiaya pa yehuanten yesi iyaxca san, lacames hual quixtocalo míac quichihualo tequipanulisli cuali.

<sup>15</sup> Xiyultía tiquinmilijtica innojen lajtomes. Xiquinyanti huan xiquinmaja ca lasojlalisli sinda monequi, xicchia in ca mochi mohuelilitilisli. Amo ximacahuilti amaqui pa mijxixicus.

### 3

#### *Innojen cate hual quipiasi pa quichihuasi laneltocanijmes*

<sup>1</sup> Xiquinmijnamiquilti in laneltocanijmes pa molalisi pa quinneltocasi yehuanten hual huelilitilo capa in laneltocanijmes, yehuanten hual quipialo huelilitilisli. Quema, ma quinneltocacan, ma mochijchihuacan pa huil quichihuasi mochi tequipanulisli o lachihualisli hual cate cuali. <sup>2</sup> Ma como

quihuejuecaltican amaqui. Ma camo yén (yecan) lacames hual quimatilo cualanilo pa molaxilisi lajtomes. Ma yecan lacames hual quipialo lanequilisi pa quinpalehuisi oc sequin yoje quinami unca cuali, huan ca lasojlalisi. Ma yecan lacames hual quimatilo quinchihuililo cuali moxtin lacames huan ma camo quijtucan amo cuali pa inminyolo inminahuac yehuanten huan ma camo cualantiquisacan ca yehuanten.

<sup>3</sup> Monequi pa tyesi yoje pampa tehuanten noje quimaniyan amo ticmatiloaya laneltocalo. Ticataloaya lacuajcuamanali amo ticmaztataloaya in ojli melahuac. Amo huil tictzacualoaya tocuervo (tonacayo) pa camo ticchihualosquiaya mochi in amo cuali hual tocuervo (tonacayo) mojmosta quinequiaya pa ticchihualosquiaya. Tiyeje quinami ticpianijme pa tiquin-tequipanuilis tocuervo. Tiyulinijme ticnectataloaya ticchihualo len yes calica ticayalosquiaya ca paquilisi. Tiyulinijme tiquintenejtataloaya pa toyolo moxtin oc sequin. Timocualanilinijme ca oc sequin, amaqui huil techpilini lasojlalisi. Tehuanten amo huil tiquitanijme se huan oc se, amo tiquinmixtocanijme. <sup>4</sup> Ma yoje, quiman yec lamachilti pin lalticpan pampa Dios quinlasojla lacames, in Dios hual techquixtia pa camo techajsis mochi hual techijlacúa, quema, quiman yec lamachilti pampa yihual quixtoca quinchihuilía cuali lacames, cuaquin Dios, quema, techquixtic pa camo techajsisquiaya inon. <sup>5</sup> Huan amo techquixtilic inon hual techijlacúa pampa tehuanten tiquinchihuaje innojen hual cate quinami yihual quijtúa, in hual yihual quita cuali. Pampa no, techquixtilic in laijlaculisli pampa quinequi techinilic. Tejchihahuac, unca quinami yihual techaltic toyolo. Axcan ticate yajyancuic quinami se hual lamac lacatic. Tejchiac yajyancuic pan ipampa in Espíritu Santo. <sup>6</sup> Dios techmacac in Espíritu Santo pa yihual in Espíritu Santo techueliltis pa ticchihuasi mochi in míac hual yihual quipía pa ticchihuasi. Huan Dios techlalilic in Espíritu Santo lajitic tehuanten pan ipampa Jesucristo hual techquixtic pa camo tipolehuisi. <sup>7</sup> Dios tejchihuilic in lachihualisli cuali pa yojque neli ticchiasi in hual iyaxca hual quipía pa techmacas tehuanten. In hual iyaxca unca in yulilisi hual amo quiman lamis. Huan in hual iyaxca ticpialo axcan pampa Dios techiztica cuali quinami lacames hual amo quipialo laijlaculisli, techiztica yojque pan ipampa in cuali hual san yihual huil quinchihuilía lacames.

<sup>8</sup> Inon unca se lajtulisli capa huil ticlalilo mochi laneltocalisli. Huan nicnequi pa tiquinmilis innojen pampa ticmati pa moyolo pampa unca melahuac. Yojque yehuanten hual amo quiman mocahualo quineltocaticate Dios amo mocahualo pa quijnamiquisi innojen hual cuajcuali hual huil quinchihuasi. Cuaquinon quiman quijnamiquilo innojen, ma molalican pa quinchihuasi. Innojen lajtomes hual nimitzilic cate niman cuajcuali huan quinchihuililo cuali moxtin. <sup>9</sup> Ma yoje, amo xicipá nindeno pa tiquitas huan pa tilajlanis inahuac innojen lapuhualisli hual quichihualo sequin lacames. Yehuanten momaxtilo pa ilajtol Dios jan quinami itocaloaya san lacames hual yulinijme pa yina. Cuaquin quinchihualo lapuhualisli, quijtulo unca quinami yulinijme innojen lacames. Huan innojen lapuhualisli jan islacatilisli san. Inon unca hual quichihualo yehuanten hual amo laijnamiquilo cuali. Huan amo xiquinlaxili lajtomes ca oc sequin quiman quijtulo quinami monequi pa quinmolancuacuetzilisi Dios. Cate lajtomes san hual quinchihualo lacames hual amo neli quineltocalo Dios. Amo xicipá nindeno pa tiquijtas ca inon, pampa mochi inon amo quipalehuía amaqi se nadita pa quitequipanuilis Dios.

<sup>10</sup> Xijquixti capa amhuanten se hual yultía quineltocatica huan quimaxtica se lamaxtilisli hual amo unca yoje quinami quijtúa ilajtol Dios. Quema,

sinda yuli quichijtía yojque mas que tiquilic sejpa huan oc sejpa pa mocahuas quimaxtitica inon pampa amo unca quinami quijtúa Dios ilajtol, cuaquinon xijquixti. Amo xicmacahuilti pa mocahuas ca in laneltocanjmes. <sup>11</sup> Xicchia yojque pampa ticmati in se amo yultica melahuac. Se quinami yihual quichijtica laijlaculisli, huan quimati pampa quichijtica laijlaculisli, yojque moiylacúa.

*Pablo quilía Tito in hual monequi quichía*

<sup>12</sup> Quiman nictilanis Artemas pa yas ca tehual, o cuajnesi nictilanis Tíquico, tehual ximotolini pa tiejsehuis tihualas ca nehual pa Nicópolis, pampa nimolalic pa nipanus umpa in tonalijmes quiman sehualías. <sup>13</sup> Xicchia mochi hual huil tehual pa tiquinpalehuis Zenas in licenciado huan Apolos pa canasi inminojli, pa quipiasi mochi hual monequi pa quipixtiasi. <sup>14</sup> Huan noje, ma molalican pa monextilisi tocnían pa quichihuasi in hual unca cuali. Ma quitemucan mochi quinami huil lapalehuisi quiman monequi pa oc sequin laneltocanjmes quipiasi len. Yojque monotzalo inminyulifisli sinda yulilo quichijticate inon.

*Pablo quichicahua Tito huan quituchía*

<sup>15</sup> Mijchicahualo moxtin yehuanten hual cate ca nehual. Xiquinchicahua yehuanten hual techlasojlalo pampa timoxtin, tehuanten huan yehuanten ticneltocalo in se ilamaxtilisli toTata.

Ma caya ca anmoxtin in cuali hual san toTata huil tejchihuilía.

## In amal hual Pablo in lanahuatini quijcuiluilic Filemón

### *Quipialtía Filemón*

<sup>1</sup> Nehual Pablo niunca latzacuali calijtic, nejtzacuaje nican pampa nictequipanuilía Cristo Jesús. Huan tocní Timoteo timitzijcuiluilijticcate in amal, lasojli Filemón, tehual hual titequipanúa ca tehuanten. <sup>2</sup> Noje in amal antimitzijcuiluilijticcate amhuanten in laneltocaniymes hual anmonechicúa pa mochan, lasojli Filemón. Huan noje antimitzijcuiluilijticcate tocní sihual Apia huan tocní Arquipo, yihual quinami iguache in Tata jan quinami tehuanten. <sup>3</sup> Ma Dios toTajtzin huan in Tata Jesucristo anmitzpiacan ca in cuali hual san yehuanten quipialo pa tehuanten. Huan ma anmitzpiacan ca inminnosehuilisli pa anmoyolo.

### *Pablo quijtúa quinami lalasoja huan laneltoca Filemón*

<sup>4</sup> Nicsehuía noDios mojmosta quiman yes nimitzijnamiquía pa mochi tonaliymes quiman niclajlanía Dios. <sup>5</sup> Unca pampa nechlamachiltilo quinami amo timocahua pa ticlasojlas in Tata Jesús huan quinami ticlalia molaneltocalisli ca yihual. Noje nechlamachiltilo quinami tiquinlasojla yehuanten hual Dios quinlajtultic pa yesi iyaxca. <sup>6</sup> Nictemachía Dios pa yihual mitzhuelilits pa tictemus quinami tiquinlamachiltis oc sequin quinami ticneltoca Jesucristo, pa yoje yehuanten noje quinequisi quinellocasi. Yoje ajsisi quimatisi len quinequi quijtúa mochi innojen cuaqcuali hual ticpialo pampa tehuanten timochihuaje ilacames Cristo. <sup>7</sup> Niunca ca niman miac paquilisli huan nimomaca chicahualisli pampa nicmati quinami tilalasoja, Nito, pampa tehual niman miac tiquinmaca chicahualisli pan inminyolo yehuanten hual Dios quinlajtultic pa yesi ilacames.

### *Pablo quitemachía Filemón se lachihualisli cuali*

<sup>8</sup> Yoje, mas que nicpía nolahueliltilisli pampa nehual niunca ilanahuatini Cristo huan pampa inon huil nicana eslito pa nimitzilis len monequi pa ticchías, ma yojque, amo nicchías inon. <sup>9-10</sup> San nimitzljajlanía pa tijchihuilis inon pampa timolasojlalo. Nehual niPablo niabuelito hual axan noje niunca latzacuali pin calijtic pampa nicneltoca Cristo Jesús, nía nimitzyantía ca in lasojlalisli pa tijchihuilis in lachihualisli cuali pa in Onésimo. Yihual unca quinami noxolol. Unca quinami lacatic ca nehual nican pin calijtic capa niunca latzacuali, pampa quinellocac ilajtol Dios hual niclamachiltic. Huan yojque yihual lacatic ca Dios.

<sup>11</sup> Pa yina, amo mijchihuilic lapalehuilisli. Ma yoje, axcan mijchihuilía lapalehuilisli tehual huan jan yojque nejchihuilía lapalehuilisli nehual noje. <sup>12</sup> Axcan yihual nictilanía ca tehual oc sejpa, quema, yihual, hual niclasojla niman miac. <sup>13</sup> Huan nehual nictectataya pa mojmosta huil nicpiasquiaya nican ca nehual. Yojque yihual nechtequipanuilis pa in tonaliymes quiman nimoitas latzacuali calijtic nican, pampa niclamachiltía ilajtol Dios. Niquijituc sinda nechtequipanuiliaya, cuaquín cataya quinami tehual tichtequipanuiliaya. <sup>14</sup> Ma yoje, amo nicnequiaya nicchía nindeno sinda ayamo nicmatiaya da tehual tichmacahuiltisquiaya pa nicpiasquiaya yihual nican ca nehual. Yojque amo tijchihuiiaya nehual in lachihualisli cuali pampa ticpiaya pa tijchihuilisquiaya. Yesquiaya pampa ticnequiaya

tijchihuili. <sup>15</sup> Inon nimitzilía pampa cuajnesi cataya pampa inon yihual yec lahuicali pa camo cayasquiaya pa mochan se nadita. Niquijtúa, amo ticpiaya pa se nadita pa yojque ticpiasquiaya oc sejpa. Huan quiman cayasquiaya ca tehual oc sejpa, cuaquín amo quiman tilamisquiaya ticpia. <sup>16</sup> Niquijtúa, yajmo ticpiás quinami tequipanujquil pampa yihual axcan unca len niman cuali pa tehual. Amo yesquiaya yoje cuali pa tehual sinda jan mocahuaya se tequipanujquil san. Axcan ticpiás Onésimo quinami mocni hual ticlasojla, quinami nehual axcan nicpia quinami nolasojli nocni. Unca pampa yihual nicnextilic iojli Cristo. Ma yoje, yihual Onésimo axan unca niman miac molasojli, pampa amo jan unca lacal san pa tehual. Noje yihual mocni pampa yoje quichíac in Tata. <sup>17</sup> Pampín, sinda tichita nehual quinami mocni tequipanujquil pa in itequipanulisli in Tata, cuaquín xicnamiqui Onésimo ca lanequilisli quiman ajsis pa mochan, jan quinami tichnamiquisquiaya nehual. <sup>18</sup> Huan sinda yihual mitzcajcayahuac o sinda yihual mitzhuiquilía len, xichcahuili pa niclaxlahuis. <sup>19</sup> Nehual Pablo niquijcuilujtica inon ca nehual nomajma, nimitzlahuis. Inon nimitzilía san pa camo nimitzijnamiquiltis pampa tehual tichuiquilía nehual moyulilisli. Cataya pan nopampa nehual ticanac iojli Cristo. <sup>20</sup> Quema, Nito, ma nicpia se lachihualisli cuali pan mopampa tehual. Inon nicpiás quiman niquitas quinami ticneltocas toTata, niquijtúa, quiman ticnamiquía Onésimo quinami mocni. Yojque tichmacas paquilisli pa noyolo pampa yoje ticneltoca Cristo.

<sup>21</sup> Nicmati pa noyolo pampa tehual tía ticneltoca in Tata. Yojque, nimitzijcuiluilía pampa nicmati tehual tijchihuilis niman miac, huan amo san inon hual nimitzilic pa ticchías. <sup>22</sup> Noje nimitzilía pa ticchijchías se calijtic pa nehual, pampa nicchixtica da yalo nechmacahualo. Quema, niquisas nican pampa amhuanten anquilajlantica Dios pa nejchihuilis in cuali hual san yihual huil tejchihuilía. Yojque huil annimitzpxaluilis.

### *Quinchicahua huan quinmaca latuchihualisli*

<sup>23</sup> Mijchicahua Epafras, yihual huan nehual ticate latzacuali pin calijtic pampa yihual noje quilamachiltiaya ilajtol Cristo Jesús. <sup>24</sup> Mijchicahualo Marcos huan Aristarco huan Demas huan Lucas, ca nehual tequipanulo yehuanten.

<sup>25</sup> Ma caya ca amhuanten anmoyolo in cuali hual san Jesucristo huil tejchihuilía.

## In amal hual se lanahuatini quinmijcuilulic laneltocanijmes Hebreos

### *Dios axan techlaquetzilia pan ipampa iXolol*

<sup>1</sup> Pa innojen tonalijmes hual panujque niman de pa yina, Dios quinmilic totajtztizian ilajtol pan ipampa ilajtunijmes. Quinmilic je tipichin nican huan je tipichin nepa miac tonalijmes, nican se tonali, nepa se tonali, huan ca miac lachihualisli, se lachihualisli nican huan se lachihualisli nepa.

<sup>2</sup> Axcan, pa innojen tonalijmes hual techhuicasqui pa in tonali quiman lamis in lalticpan, techilic ilajtol pan ipampa se hual lajtua pa iyolo quinami se xolol lajtua quinami itajtzin lajtua pa iyolo. Quema, unca iXolol hual Dios quilalic pa quipias quinami se xolol quipias in hual iyaxca itajtzin. Quipias mochi hual unca pin cielo (ilhuicac) huan pan lalticpan. Huan Dios quinchiac mochi hual unca, quinchiac pa huejcahuas pa quiman ajsis in tonali hual yihual quilalic. Quinchiac pan ipampa iXolol. <sup>3</sup> IXolol Dios quinextia mochi in cuali de Dios huan ichichahualisli hue, quinami se espejo quicuepa in quinami nesi se sinda moquetza ilaixpan in espejo. Quema, Dios iXolol unca jan quinami unca Dios. Yihual iXolol Dios lajtuc huan mochi mochiac pampa ilajtol quipia lahuelilitisli. Jan yojque ca ilajtol chichahuac quipalehua pa mocahuas mochi hual quinchiac. Huan quiman panujque niman miac xixihuimes, Dios iXolol lamis quichiac inon quinami moxtin huil yelosquiaya lachipahuali pa yajmo cayasi laijlaculi. Cuaquinon molalic huan canac lahuelilitisli pa huelitis nepa pin cielo niman pa pani pa mochi. Axcan nepa unca huelitijtica capa unca imajma cuali Dios in niman hue.

### *Dios iXolol unca niman hue, amo yoje huejue cate lanahuatinijmes pin cielo*

<sup>4</sup> Mochihuaya niman hue Dios iXolol. Amo cate yoje huejue in lanahuatinijmes pin cielo (ilhuicac) pampa quitocayaltijque Dios iXolol ca se itoca hue huan niman cuali. Amo yoje cuali motocalo in lanahuatinijmes pin cielo.

<sup>5</sup> Ticmatilo yihual itoca unca yoje niman hue pampa Dios amo quiman quilic se lanahuatini pin cielo inon hual quilic iXolol, quil:

Tehual tinoXolol, axan nimitzljaltulic pa tiyes noXolol.

Huan Dios amo quiman quilic se lanahuatini pin cielo inon hual quilic iXolol, quil:

Nehual niyes ca yihual quinami iTajtzin, huan yihual yes pa nehual quinami noXolol.

<sup>6</sup> Huan amo inon san. Quiman quilaicanac capa yehuanten pin lalticpan yihual hual quipias canas mochi in lasojlalisli hual quimontzilia se xolol hual quipehualtic in xolomes hual lacatilo ca inmintajtzin, Dios quijtua, quil: Ma quimolancuacuetzilican moxtin ilanahuatinijmes Dios hual cate pin cielo.

<sup>7</sup> Huan unca inon hual quijtua innahuac ilanahuatinijmes pin cielo, quil:

Quinchihuilia ilanahuatinijmes pin cielo pa yesqui quinami iyecames.

Quema, yehuanten ilanahuatinijmes pin cielo hual quitequipanuililo,

quinchihuilia pa yesqui quinami tixuxlimes milinticate.

Quichihualo jan ajnaxcan len yihual quinequi.

<sup>8</sup> Ma yoje, inon unca len quijtua yihual hual unca iXolol, quil:

Unca tehual moyaxca pa tihuelitis, O Dios, mitzhuejcahuilis, amo quiman tilamis tihuelitis.

Huan yojque quinami tihuelitía unca melahuac huan tihuelitía quinami quinmahuilúa moxtin, tiquixtoca pa moxtin yulisqui cuali huan melahuac.

<sup>9</sup> Tiquita amo cuali sinda amo yulilo quinami quijtúa molajtol.

Pampa in, O Dios, tehual moDios mijchihuilic pa ticpías in paquilisli huan pa cahuanis moixco ca paquilisli, quinami cahuanía se iixco sinda unca laxahuilili ca chahuac.

Quema, mitzmaca míac paquilisli hual yihual quipía pa tehual.

Amo yojque míac quinmacac yehuanten monahuac hual huelitilo.

<sup>10</sup> Huan noje quilía in Xolol, quil:

Ipehuayan mochi (Quiman pehuaya mochi), tehual ticchihuac in lalticpan ca momajmajuan, Tata, huan in cielos (ilhuicac) tiquinchíac ca momajmajuan.

<sup>11</sup> Yehuanten in cielos huan in lalticpan moijlacusqui.

Ma yoje, tehual tihuejcahuas, amo quiman tipolehuis.

Yehuanten mochi viejojtisqui (mochihuasqui cacaxli) quinami se tzotzomajli.

<sup>12</sup> Quema, quinami se laquen hual quicuilpachúa pa quilasas sinda yajmo quinequi,

tehual yojque ticchías ca in cielos quiman yajmo monotzalo.

Quinami se tzotzomajli, cayasqui lapatili.

Huan tehual, amo quiman timocahuas pa tiyes jan yoje quinami tiunca, huan amo quiman lamisqui moxixihuimes quiman tiyulis, amo quiman lamis moyulilisli.

<sup>13</sup> Huan amo inon san. Amo quiman quilic se lanahuatini pin cielo inon hual quilic iXolol, quil:

Ximolali pa noma cuali capa tihuelitis ca nehual.

Nepa xicaya pa quiman nilamis niquinsulahuas moxtin molacocolinijmes pa cayasqui inmintzindan mocxihuaimes.

<sup>14</sup> ¿Pa len, cuaquín, monotzalo in lanahuatinijmes pin cielo? Yehuanten cate ijyecames cuajcuali hual quichihualo in hual Dios quinmilía pa quichihuasqui. Quintilanía pa quinchihuilisqui len monequi pa yehuanten hual quineltocalo Cristo. Yehuanten Dios ilacames, huan yalo quipialo in hual Dios yahui quinmaca, iyulilisli calica yesqui lamacahuali pa yajmo quinmajsis in amo cuali huan in miquilisli.

## 2

### *Monequi pa se moiztías mojmosta quinami quineltoca in Tata*

<sup>1</sup> Pampa inon ticpialo pa timomachiltitiasqui míac in lajtomes hual tijcaquijque techilijque Dios iXolol. Ma camo caya in pa tehuanten cuajnesi timijcuanisqui pa yajmo tictocasqui iojli Cristo hual unca ilajtol yihual techilijque. Yojque tiyelosquiaya quinami se canóa hual lanilúa huan amo ajsitía in xalipan capa quinequi. <sup>2</sup> Quema, ximomachiltitican, pampa Dios ilajtulisli hual ilanahuatinijmes pin cielo (ilhuicac) quihualiquilijque Moisés quisaya neli capa unca Dios. Huan sinda cataya se o oc sequin hual amo quichíac jan quinami quijtuc huan amo quineltocac, cuaquín yihual quixitinilijque, huan cataya laxitinilisli hual cahuiluaya. <sup>3</sup> Huan jan yoje, tehuanten amo timoquixtisqui pa camo tiquitasqui laxitinilisli sinda amo timomachiltitiasqui quinami Dios quitilanic ixolol pa techquixtisquiaya pin polehuilisli. ¡Inon techmonotzilía niman míac! Pehualoaya quicaquilo lacames in lamachiltilisli cuali quiman in Tata quimachiltiaya, huan yehuanten technextililoaya tehuanten quinami unca melahuac.



<sup>4</sup> Dios noje quinpalehuic pa technextilosquiaya pampa unca melahuac, pampa quinchíac míac hual quinclachialtic ca lamajtilisli lacames quiman quitajque. Huan quinchíac innojen hual pa quimaniyan ilajtunijmes quijtu-jque pampa yahuiloya panulo. Quema, míac quichíac hual pampa innojen molachialtiloya lacames ca lamajtilisli. Huan amo inon san. Noje in Espiritu Santo quinmacac míac ca se huan oc se lahuellitlisli yehuanten hual quineltoalo Jesucristo, quinami quimacahuiltic Dios mochi sejse.

*Dios ixolol Jesucristo unca quinami icnían*

<sup>5</sup> Yojque, Dios amo quilalic pa in lanahuatinijmes pin cielo (ilhuicac) huellitilosquiaya pin lalticpan yancuic hual yahui ye se tonali, hual inahuac inon tilaqueztcate. <sup>6</sup> Pa se iamal ilajtol Dios unca lajcuiluli (laescribiruli) inon hual quijtúa neli, quil:

¿Len monotzalo lacames pa tiquinmijnamiquis yehuanten?

¿Len monotzalo pa tiquinchihuilis cuali?

<sup>7</sup> Ticlalic pa nadita pa camo ajsisqui yesqui yojque huejué quinami in lanahuatinijmes pin cielo.

Huan tiquinchihuilic pa quimatisqui momajtisqui inminlaixpan lacames mochi hual ticchíac.

Quema, ticlalic pa mochi hual ticchíac quinchihuilisquiaya lacames niman míac lasojlalisli.

<sup>8</sup> Tiquinmacac pa quipiasqui lahuellitlisli pa mochi hual ticchíac.

Yojque, quiman quimacac pa lacames quipialosquiaya lahuellitlisli ca mochi, cuaquin inon quinequi quijtúa pampa amo unca lahuellitlisli nindenno hual amo unca inminyaxca lacames. Quinequi quijtúa pampa pa lacames unca inminyaxca pa hueltisqui pa mochi hual Dios quichíac, mas que ayamo tiqitalo lacames quipixtcate lahuellitlisli pa mochi. <sup>9</sup> Ma yoje, tiqitalo Jesucristo hual Dios quichihuilic pa camo yesquiaya yojque hué quinami in lanahuatinijmes pin cielo (ilhuicac) pa nadita nican pan lalticpan. Inon cataya pampa Dios quinequiaya quinchihuilisli cuali lacames, huan pampa inon, quilalic pa Cristo huil panusquiaya miqulisli pa moxtin, quema, mochi sejse ca yehuanten. Yojque ticmatilo Dios quijtuc pampa monequi pa moxtin quilasojlasi Cristo. Tiquitalo quipixtica lahuellitlisli axcan pa mochi hual Dios quichíac. Tiquitalo Cristo yojque pampa yihual panuc in miqulisli pa timoxtin.

<sup>10</sup> Canaya cuali pa Dios quichihuasquiaya yoje, pampa pa yihual cate mochi hual quichíac. Noje pan ipampa yihual cate mochi hual quichíac. Huan canaya cuali pa yihual laquisas quichihuas pa Cristo yes mochi quinami monequiaya pa yihual yes pan ipampa in miqulisli hual quipiaya pa panusquiaya. Yoje Cristo huil yes in se hual quichíac in ojli hual canasqui in míac Dios ixolomes pa moquixtisqui pin ipolehuilisli inminlajlaculisli. Yojque Dios quinmanaya míac lacames hual yihual quinclajtultic pa yesqui ixolomes, pa yojque quinpías capa yihual unca, yehuanten quipixtcate len lajco ichicahualisli cualtichin. <sup>11</sup> Huan axcan, quema, in se Jesucristo quinquixtic yehuanten in lacames pin lalticpan pa yesqui Dios ixolomes. Áxcan yihual unca se san ca yehuanten moxtin ixolomes Dios, yehuanten hual cate laquixtili pa yesqui Dios ixolomes. Quema, moxtin quisajque capa Dios. <sup>12</sup> Pampa inon Jesucristo amo pinahua quijtúa pampa tehuanten ticate icnían. Quema, huan quilía Dios iTajtzin, quil:

Nehual nílámachiltis monahuac tehual quiman niunca ca nocnían.

Niquincantarus (niquincaicas) lajcomes huejué monahuac tehual quiman niunca ca nocnían hual monechiculo pampa mitzneltocalo.

<sup>13</sup> Huan amo inon san. Quijtúa, quil:  
 Niclalis nolaneltoocalisli ca yihual Dios.  
 Huan noje ca inon, quijtúa, quil:  
 Xiquita, nican ticate nehual huan ixolotzitzindis Dios hual yihual nech-  
 macac pa niquinmiztías.

<sup>14</sup> Yojque, in xolotzitzindis cate tehuanten hual ticnelto calo Jesucristo, huan ticate lacames huan sihuames ca nacal huan esli quinami moxtin. Huan jan yoje, Jesucristo lacatic ca nacal huan esli quinami tehuanten. Lacatic pa yoje huil miquis quinami mochi lalacal. Huan quiman miquic, cataya pa yoje huil quisulahuac in se hual quipía lahuelilitlisli capa unca miquilisli. Yihual unca in lili Satanás. <sup>15</sup> Jesucristo noje lacatic quinami lacames pa yoje quinchihuilisquiaya lacames pa yajmo momajtisqui miquisqui. Yehuanten in lacames hual pa mochi inminyulilisli yultiahuloaya momajtitaloaya pampa yahuloaya miquilo. Amo huil mocahualoaya pa momajtilosquiaya. Cataloaya quinami tequipanujquimes lachihualtili, amo huil mocahualo quintequipanuילו inmintecojuan. <sup>16</sup> Neli unca pampa Cristo amo mochíac quinami in lanahuatinijmes pin cielo pa yojque quinpalehuisquiaya. Yihual mochíac quinami Abraham imiahuimes pa quinpalehuisquiaya. <sup>17</sup> Yojque, quiپیaya pa mochihuasquiaya mochi quinami cate in lacames hual yihual quijtúa pampa yehuanten icnían. Yojque mochihuaya se tiopista hué pa quinpalehuisquiaya yehuanten hual Dios ixolomes. Quinpalehuisquiaya ilaixpan Dios pan ipampa quinami quinquixtilisquiaya inminlajlaculisli. Yojque yihual yesquiaya tiopista hué hual quimatiaya laicnili. Yesquiaya tiopista hual yehuanten huil quimatiloaya pampa yihual huil quinpalehuía. <sup>18</sup> Huan amo san inon, yihual huil quinpalehuía aquinojen yesqui hual Satanás quitilanilía inminyolo pa quichihuasqui len amo cuali, pampa yihual ihuían panuc lacocoltilisli huan Satanás quitilanilic yihual iyolo pampa quinequiaya quichihualti in hual amo unca cuali.

### 3

#### *Jesucristo techmonotzilía míac, amo yojque míac techmonotzilía Moisés*

<sup>1</sup> Cuaquinon, nocnían hual Dios anmitzljaltultic pa anyes jan iyaxca san, Dios pin cielo (ilhuicac) anmitznotzac mochi sejse pa anyes iyaxca. Huan anquineltocac, jan quinami moxtin in oc sequin hual neli cate ixolomes. Axcán, xiquijnamiquican yihual hual Dios quitilanic pa lajtus ca ilahuelilitlisli huan pa yes tiopista hué pa tehuanten. Yihual in tiopista hué pa techpalehuis quiman ticmolancuacuetzilisi yihual hual ticmatilo unca toDios. Huan tiquiijtulo neli pampa inon hual ticnelto calo unca yojque. <sup>2</sup> Huan Jesucristo quichíac mochi hual Dios quilic pa quichihuasquiaya quiman quilajltultic pa yesquiaya ilanahuatini huan itiopista hué. Quema, Jesucristo quichíac mochi jan quinami Moisés quichíac mochi umpa. Cataya quiman Dios quichíac pa Moisés yes lanahuatini pa moxtin yehuanten ilacames Dios hual yeje in israelitos. <sup>3</sup> Ma yoje in lalacal Jesucristo monotza pa quinmilisi niman míac lajtomes huejué huan cuajcuali hual Moisés amo quiman ajsis monotzas. Unca jan quinami yihual hual quichía se cali monotza pa canas niman míac lasojlalisli hual amo ajsis quipías in cali. <sup>4</sup> Axcán, sinda unca se cali, neli ticmatilo pampa cataya se hual quichíac. Huan amo inon san. Dios unca yihual hual quichíac mochi. <sup>5</sup> Moisés quichíac mochi hual Dios quilic pa quichías. Catani pin tonalijmes hual Moisés yulini quinami Dios itequipanujquil capa moxtin ilacames Dios. Huan Dios quilajltultic Moisés

nepa pa quijtus neli innojen hual Dios quilic pa quijtus. <sup>6</sup> Jan yojque Cristo quichíac mochi hual Dios quilic pin tonalijmes quiman yihual Cristo iXolol Dios cataya capa Dios ilacames. Huan tehuanten ticate Dios ixolomes, sinda tehuanten amo timocahuasqui pa ticlalisqui tolaneltocalisli pa in hual Dios techilía neli pampa yahui techmaca. Huan ma como timocahuacan pa tiquinmilisqui lacames ca lajtomes huejué in hual Dios tejchihuilía tehuanten. Quema, ma ticchijtiacan inon pa quiman laquisas totequipanulisli pa Dios. Ma camo quiman timocahuacan pa ticchiasqui ca paquilisli huan yojque se tonali ticpiasqui inon hual yahui techmaca.

*Dios ixolomes calaquisqui capa amo lamisqui mosehuisqui*

<sup>7</sup> Pampa inon, jan quinami quijtúa in Espíritu Santo pa Dios ilajtol lajcuiluli, quil:

Sinda anquicaqui ilajtol Dios axan,

<sup>8</sup> xicnequican pa anquineltocas in hual anmitzilijtica.

Amo xicayacan quinami yehuanten quiman catanijme pin lali capa amaqui chantini, nepa quiman Dios quinlalilic in hual quimacahuilic pa quimatisqui sinda neli quineltocaloaya.

Nepa yehuanten molalijque ipan yihual, quinami icocolinijmes.

<sup>9-10</sup> Annotajtzitzían pa cuarenta xixihuil qitaloaya quinami nehual nicpía chicahualisli hue,

huan motoliniloaya pa nechlalilosquiaya len calica quijtuloaya nicpiasquiaya niquinnextili nolahuelfilitisli.

Yojque, nicualanic ca yehuanten hual yulinijme nepa, huan niquilic:

“Yehuanten amo mocahuasqui pa quicuilmatisqui no'ojli, quema, yehuanten amo quixtocalo no'ojlimes.”

<sup>11</sup> Yojque, nicualanic huan niquijtuc ca lajtol hual amo mopalac:

“Amo quiman ajsisqui capa yulisqui ca nomosehuilisli.”

<sup>12</sup> Ximoztian, nocnán, pa camo yes ca amhuanten se hual quipía iyolo amo cuali, quinequi quijtúa, se hual amo quinequi quilalía ilaneltocalisli ca Dios, huan yojque mocahuas pa quineltocas Dios hual amo lami yuli. Ximolachilican, pampa Dios yuli huan quichía in hual quijtúa pampa yahui quichía. <sup>13</sup> Quema, ximochicahualtitiacan se huan oc se mojmosta quiman huejcahua in tonali hual tiquijtulo unca axcan. Xicchijtiacan yojque pa yoje amaqui capa amhuanten lacuilmatis pa iyolo. Pampa in yajmo mocahuas pan Dios iojli, unca lacuajcuamanali pan ipampa ilajlaculisli. <sup>14</sup> Monequi pa timochicahualtisqui, pampa timochihuajque se san ca Cristo pa toyolo. Yojque timoxiluililo ca Cristo mochi hual iyaxca. Ma yoje, inon cayas san sinda ca mochi tochicahualisli tiyultialo ticlalilijticate ca Cristo tolaneltocalisli. Ticmatijque pampa ilamachiltilisli yihual yec melahuac quiman tpehuajque ticneltocajque.

<sup>15</sup> Yojque moijtúa:

Sinda anquicaqui ilajtol axcan,

amo xiyén (xiyecan) quinami yehuanten hual amo quinequinijme nechcaquilo nepa quiman nechcualantijque.

*Dios ixolomes quipiasi yulisi quilalijticate ilaneltocalisli ca Jesucristo*

<sup>16</sup> Yojque ¿aquinojen yehuanten hual quicaquijque, huan jan yojque quicalantijque? Quema, catanijme moxtin yehuanten hual quisajque quicajtataloaya Egipto ca Moisés quinlaicantataya. <sup>17</sup> Huan ¿ca aquinojen cualanini Dios pa cuarenta xixihuil? Cualanini ca yehuanten hual quichihuanijme laijlaculisli, huan pampa in yehuanten polehuijque nepa pin lali

capa amaqui chantini. <sup>18</sup> Huan ¿aquinojen cataloaya yehuanten hual Dios quijtuc ca lajtol hual amo mopalac pampa amo quiman calaquilosquiaya capa yulilosquiaya ca imosehuilisli? Cataniyme yehuanten hual amo quinel-tocaniyme. <sup>19</sup> Yojque tiqitalo pampa amo huil calaquiniyme pampa amo quinel-tocaniyme pampa Dios huil quinchihuiliaya inon hual quijtuc.

#### 4

<sup>1</sup> Yojque, ma timomajtican pa camo yes cuajnesi se ca amhuanten quijtúa laijtic yihual pampa amo quineltoaca inon. Yojque nesis yes se hual amo ajsis canas Dios imosehuilisli hual yihual Dios neli quijtuc pampa unca pa tehuanten. <sup>2</sup> Unca pampa noje tehuanten tijcaquijque Dios ilajtol cuali jan quinami yehuanten hual quicaquijque Moisés quiman quinmilini Dios ilajtol. Ma yoje, in lanahuatilisli hual yehuanten quicaquijque amo quin-palehuic, pampa yehuanten hual quicaquijque amo quicaquijque quinel-tocaticate. <sup>3</sup> Axan, tehuanten hual ticneltocajque ilajtol tiajsijque capa tiqitalo imosehuilisli.

Ma yoje, quinami quijtuc inminahuac yehuanten, unca lajcuiluli pa Dios ilajtol, quil:

Quinami nicalanini ca yehuanten, niqijtuc ca lajtol hual amo mopalac pampa amo ajsisqui capa yulisqui ca nomosehuilisli pa yehuanten.

Huan amo ajsijque capa huil yulilosquiaya ca imosehuilisli, mas que cataya pa yehuanten, pampa mochi hual Dios quichíac cataya lachihuali quiman lamic quinchíac in cielo huan in lalticpan. <sup>4</sup> Inon ticmatilo, pampa ilajtol lajcuiluli pa se iamames quijtúa, quil:

Huan mosehuic Dios pa in tonali chicome, mosehuic pan tonali hual lamic quichíac mochi hual quichijtataya.

<sup>5</sup> Ma yoje, mas que Dios mosehuic, monequi pa annimitzilis oc sejpa quinami yihual quijtúa pa oc se iamal, quil:

Amo ajsisqui capa yulisqui ca nomosehuilisli nehual.

<sup>6</sup> Yehuanten hual quicaquijque Dios ilajtol cuali amo ajsijque capa huil yulilosquiaya ca imosehuilisli, pampa amo quineltoajque Dios ilajtol. Yojque, quinami quincahuililo tonalijmes pa huil ajsisqui lacames capa yulisqui ca imosehuilisli Dios, ma quineltoacan ilajtol. <sup>7</sup> Unca pampa axan, oc sejpa Dios quilalía se tonali pa yojque lacames huil yulisqui ca imosehuilisli. Huan in tonali amo mocahuas yes axcan in tonali. Quema, Dios quijtuc inon pan ipampa David. Quijtuc quiman panujque míac xixihuimes pejtataloaya ca in tonalijmes quiman yulini Moisés pa quiman yulini David. Quijtuc inon hual axcan oc sejpa niqijcuiluc pa in amal, quil:

Axan, sinda anquicaqui ilajtol,

amo xiyén quinami yehuanten hual amo quinequinijme nechcaquilo.

<sup>8</sup> Josué quinlaicanac in israelitos pa in lali Canaan. Ma yoje, sinda cataya pa in lali capa in israelitos yahuiloaya yulilo ca Dios imosehuilisli, cuaquinon David amo quijtuaya inahuac oc se imosehuilisli Dios hual ajsisquiaya quiman panujque míac xixihuil pejtataloaya ca quiman Josué ajsijque huan in israelitos pin lali Canaan. <sup>9</sup> Huan yojque, mas que ayamo ajsic, ticmatilo pampa cayas pa Dios ixolomes mosehuilisli hual amo quiman lamis. In mosehuilisli yes quinami Dios imosehuilisli quiman laquisac quinchíac in cielos (ilhuicac) huan in lalticpan. <sup>10</sup> Inon niqijtúa, pampa quiman aqui yes ajsis capa yulis ca Dios imosehuilisli, cuaquín mosehuis pa yajmo tequipanus, noje quinami Dios mosehuic pa yajmo tequipanus quiman lamic quinchíac in cielo huan in lalticpan. <sup>11</sup> Yojque, ma timotolinican

pa tiajsisqui capa tiyulisqui ca imosehuilisli Dios, pa yojque amo mochías laijlaculi se ca tehuanten pampa amo ticneltoaloaya jan quinami amo quineltoanijme yehuanten hual yulinijme pa yina.

<sup>12</sup> Unca pampa yuli Dios ilajtol quinami Dios yuli, huan yojque ilajtol quipía chichahualisli míac, huil ajsi pa capa unca in niman laijtic pa toyolo, techmachiltitica leca ticequilo ticchihualo len yes ticchihualo. Quema, Dios ilajtol calaquía toyolo pa lanextilis mochi hual unca pa toyolo huan pa quinextilis len unca pa se iyulilisli huan iyolo. Unca quinami se machete latentili ca pani huan ca itzindan huil latequi pa quinextis mochi ilaijtic in hual quitectica. Quema, quinextía in tuétano huan mochi ilancuitas pa iumimes se. <sup>13</sup> Huan ilaixpan Dios amo unca len lalatili pan mochi hual yihual quichíac. Mochi moita inminlaixpan yihual iixtololojmes quinami neli unca, amo unca lalatili jan nadita. Huan timoxtin ticpiasi pa tiqutasqui ca yihual.

### *Jesús yihual in tiopista niman hué*

<sup>14</sup> Yojque, quinami ticpialo se tiopista hué hual quipanhauic in cielos (ilhuicac) huan ajsic capa unca Dios, nicnequi niqijtúa, yihual Jesús iXolol Dios, ma camo quiman timocahuacan ticlalican tolaneltocalisli ca yihual. Inon unca tolaneltocalisli hual tiqijitulo neli pampa ticpialo. <sup>15</sup> Inon niqijtúa pampa ticpialo Jesucristo, yihual se tiopista hué hual huil quimati quinami tehuanten amo ticpialo chichahualisli. Yihual ihuían panuc mochi lacocoltilisli jan quinami tehuanten. Ma yoje amo quiman quichíac laijlaculisli. <sup>16</sup> Yojque, ma camo timomajtican ticlajlanican Dios timoajxiltiticate pa laijtic toyolo ca capic yihual unca huelitijtica capa quichihuilía cuali. Ma ticchihuacan yojque pa yihual techicnilis mas que ticchihuaje laijlaculisli, huan pa yihual tejchihuilis cuali pa techpalehuis quiman yes monequi pa ticpiasqui in cuali hual yihual tejchihuilía.

## 5

<sup>1</sup> Momati pampa mochi tiopista hué unca lajtultili capa cate lacames. Huan unca lajtultili pa quichías in hual monequi pa quinmoitaltilis lacames ca mosehuilisli ca Dios. Quipía in tiopista pa quinlalilis ilaixpan Dios huendis huan huendis lajlachichinuli pa quinpupjuhuas lacames inminlajlaculisli.

<sup>2</sup> Se tiopista hué quimati laquetza cuali ca yehuanten hual amo quimatilo huan pampín seppa huan oc seppa quicuilmatilol Dios iojli. Quimati quinchihuilía yojque pampa quimati quinami unca ca yehuanten hual amo quipialo chichahualisli, pampa in tiopista hué noje amo quipía chichahualisli pampa unca quinami yehuanten. <sup>3</sup> Pampa inon, quipía pa quilalis huendi pa yihual ihuían ilajlaculisli huan noje pa inminlajlaculisli yehuanten. <sup>4</sup> Huan se lalac amo quiman molajtultía pa yes tiopista, pampa amo unca iyaxca pa quichías inon. Quema, quipía in lasojli tequipanulisli san sinda yihual Dios quilajtultía pa yes tiopista. Jan yojque Dios quilajtultic Aaron pa quinpehualtis in tiopistas huejué pa yehuanten in israelitis. <sup>5</sup> Huan yojque Cristo noje amo mochihuilic hué pa molajtultisquiaya pa yesquiaya tiopista hué. Cataya Dios in Tajtzin hual quichihuilic hué, quilic pa yesquiaya tiopista hué, pampa quilic:

Tehual tinoXolol, unca moyaxca pa ticpiás mochi lasojlalisli, nimijchihuilic noXolol axcan.

<sup>6</sup> Huan jan yojque quijtúa noje pa oc se lajtol lajcuiluli, quil:  
Tehual titiopista huan amo timocahuas tiyes tiopista.

Tiunca tiopista san quinami yec tiopista Melquisedec.

<sup>7</sup> Yojque, Jesucristo, quiman cayani pan lalticpan, quitzajtzilic Dios huan quilajlanic ca lajtol chicahuac, quicocojttataya iyolo huan chocatataya. Quilajlanic yihual Dios hual huil quiyuliltia se hual miquic. Huan Dios quicaquic, pampa Cristo yulini quimaztataya momajtia ilaixpan Dios. <sup>8</sup> Huan mas que yihual iXolol Dios, yihual monextilic yulic quineltoatica Dios ca mochi in lacocoltisli hual panuc. <sup>9</sup> Huan yojque yec lajtultili pa yes in se lacal san hual huil quinquixtic pa camo polehuisqui mas que quichihuaque laijlaculisli yehuanten hual quineltoalo. <sup>10</sup> Quema, Dios quilajtultic pa yes tiopista hué pa quitequipanuillis Dios quinami quitequipanuilini Melquisedec.

### *Unca polehuilisli pa se sinda mocahua quineltoaca Cristo*

<sup>11</sup> Inahuac in Melquisedec ticpialo miac pa antimitzilisqui huan unca etic pa antimitznextilisqui, pampa anmochiac lacames hual amo anquimati cuali len quinequi quijtua se lamaxtilisli. <sup>12</sup> Niquijtua inon, pampa mas que axan quipia miac quiman anpehuac anquineltoac Jesucristo, ma yoje, ayamo anquimati len pa huil anquinmaxtis oc sequin Dios ilajtol. Quema, quiman anpehuac anquineltoac pa quiman anajsic pa axan, monequi pa se anmitzmaxtis oc seppa in lajtomes niman tijtipichin inahuac Dios ilajtol. Unca quinami xolotzindis quinequilo jan leche san, amo huil quicualo in hual monequi pa quicuasqui ca inminlames. <sup>13</sup> Huan yojque unca se sinda amo quimati len quinequilo quijtulo innojen lajtomes niman huejué inahuac Dios ilamaxtilisli. Quijtulo innojen lajtomes quinami Dios quinmana lacames pa yesqui iyaxca. Unca pampa axan Dios quinmita yehuanten lacames hual amo quipialo laijlaculisli. Sinda amo quimati se inon, cuaquin yojque in se unca quinami se xolol hual jan huil cuni leche, pampa in se amo quimati jan quinami se xolotzindi amo quimati. <sup>14</sup> Se hual quimati niman cuali Dios ilajtol unca lacal laiscaltili, yihual quinami se lacal hual moscaltic. Huan pampa quimaztia cuali ilajtol Dios, quimati yuli quimaztica len unca cuali huan len unca amo cuali. Tiquijtulo yihual quinami se hual huil lacua chicahuac.

## 6

<sup>1</sup> Yojque, ma camo tipehuacan oc seppa pa timomachiltisqui in lamaxtilisli tipichin inahuac Jesucristo quinami ticchihuaque quiman tipehuajque ticneltocajque. Huan ma timomachiltican lamaxtilisli chicahuac inahuac yihual, ma tyén (tiyecan) quinami lacames hual quimatilo. Ma camo timolaquetzilican inahuac in lamaxtilisli oc seppa hual mochi sejse quicaqui quiman pehua quineltoaca Jesucristo. Nicnequi niquijtua, ma camo timomachiltican oc seppa ca in lamaxtilisli hual unca quinami monequi pa se quipalas iyolo. Quipalas iyolo pa yajmo yulis quinchijtica lachihualisli hual lamilo quixilujticate se pa camo cayas capa Dios pan tonali hual miquis. Ma camo timomachiltican oc seppa in lamaxtilisli quinami monequi pa se quilalis ilaneltoalisli ca Dios. <sup>2</sup> Huan ma camo timomachiltican oc seppa in lamaxtilisli inminahuac in miac lacuayatequilisli huan lapacalisli, huan inon quiman quinlalililo inminmajmajuan inminpan oc sequin. Quinlalililo pa canasqui len pan ipampa in Espíritu Santo. Ma camo timomachiltican oc seppa in lamaxtilisli hual techilia pampa tiyulisqui oc seppa quiman timiquilo, huan in lamaxtilisli hual techilia pampa cayas in tonali

quiman Dios quinqtojtocas pa polehuilisli lacames capa amo quiman moquixtis. <sup>3</sup>Ticchihuasqui inon sinda Dios techmacahuilítia, nicnequi niqijtúa, tipehuasqui tilamaxtisqui ca lamaxtilisli chicahuac.

<sup>4</sup>Inon niqijtúa, pampa amo quiman huil quinpalehuilo yehuanten pa quipalásqui inminyolo oc seppa pa pehuasqui lajtusqui pa inminyolo quinami Dios sinda Dios quinquahuic seppa inminyolo ca ilajtol calica yojque quipalac inminyolo. Yehuanten canajque in hual Dios quinmacac hual unca iyaxca in cielo. Yulijque pa se nadita quimazticate inon. Quimatic len inahuac in Espíritu Santo. <sup>5</sup>Ajsijque quimatijque quinami unca cuali len Dios quijtúa. Yulijque pa nadita quimazticate ilahueliltilisli Dios hual momatis pin tonalijmes hual ajsitihualalo. <sup>6</sup>Cuaquinon, sinda yajmo quinequilo cantialo iojli Jesucristo, amo huil quipalehuilo pa quipalásqui inminyolo oc seppa pa lajtusqui laijtíc inminyolo quinami Dios. Sinda lacames yajmo quinequilo quineltoalo Jesucristo ilamaxtilisli, yojque lanextilijticate quinami yehuanten moijlaculitilo jan yoje quinami yehuanten hual quipilujque Jesucristo pin cuahuil. Quema, yojque quichihualo pa Cristo nesis quinami se elehuís hual amo monotza pa quineltoacasqui. <sup>7</sup>Nican unca se lanextilisli pa anquimatis len inon quinequi quijtúa: In lali hual techcunía in quiahuil hual míac huetzi ipan, yojque quimaca mochi pacholimes pa quipixcasqui itecojuan in lali hual quixahualo huan quitocalo. Huan yojque Dios quichihuilía in lali niman cuali. <sup>8</sup>Ma yoje, sinda jan quimaca huizli huan pacholimes hual quipialo isacayo hual latzopinilo, cuaquín in lali amo monotza nindeno. Ca nadita Dios yahui quijtúa pampa mocahuas laijlaculi, huan lamis moitas lachichinuli. Huan jan yoje yes ca yehuanten hual quimatilo cuali ilajtol Dios huan ma yoje amo yulilo quinami quinequi.

### *Inon hual ticchixticate techpalehuía pa camo tijcahuasqui Dios iojli*

<sup>9</sup>Mas que tilajtulo yojque, lasojli nocnían, neli ticmatilo pa toyolo axcan pampa amo anyultica yojque anquicuilmajtjtica Dios iojli. Neli tiqijtulo laijtíc toyolo pampa anyultica quinami yihual quinequi. Huan anquipías iyulilisli pampa yihual anmijchihuilic cuali pa anyes laquixtili pin polehuilisli. <sup>10</sup>Dios quimati quinchihuilía moxtin quinami yulilo huan amo quilhaua quinami anyuli anquichihuiljtica míac hual cuali huan quinami anlanextilía quinami anquimati anquinlasojla yehuanten hual motocayaltilo ca Dios itoca. Huan yojque anlanextilía quinami anquilasojla Dios pan ipampa quinami anquinpalehuiaya yehuanten hual iyaxca Dios, huan amo anmocahua anquinpalehuía. <sup>11</sup>Ticnequilo míac pa mochi sejse ca amhuanten lanextilis yojque quinami anquinctica niman míac pa anquimatis mochi hual quimaxtía Jesucristo hual aqei anquichixtica. Ticnequilo pa anlanextilis quinami anquipía in míac lanequilisli. <sup>12</sup>Xicnequican míac inon, pa yojque amo anmochías latzejquimes huan pa anyulis yojque quinami monequi pa anyulis amhuanten hual anquimati Dios ilajtol melahuac. Quema, xiyulican yojque quinami yulilo yehuanten hual quipiasqui in hual Dios neli quinnmilic pampa yahuiuloaya quipialo. Huan quipiasqui pampa quineltoalo inon hual Dios quinmiliaya. Quichialo míac tonalijmes amo quipolujticate inminyolo, huan cuaquín canasqui.

<sup>13</sup>Pa yina Dios neli quilic Abraham in hual yahuiaya quichihuili. Yojque quilic ca yihual Dios itoca, ca lajtol hual amo mopalac. Amo cataya oc se hual quipiaya itoca niman hué quinami Dios itoca calica huil quijtuaya Dios inon ca lajtol hual amo mopala. <sup>14</sup>Huan quilic: “Nimijchihuilis niman míac cuali huan nimitzmacas niman míac momiahuimes hual momiactisqui huan quitemiltisqui in lali.” Huan quiman Dios quijtuc inon ca lajtol hual amo



mopalac, lanextilic pampa inon hual quiytuaya yahuiaya panu. <sup>15</sup> Huan yojque Abraham amo quipoluc iyolo pa innojen míac xixihuimes quiman quichixtataya. Huan umpa Dios quimacac in hual quilic neli yahuiaya quimaca. <sup>16</sup> Lacames neli quijtulo ca lajtol hual amo mopala ca itoca se hual unca niman hué, pampa yehuanten inmintocajmes amo quiman ajsilo yelo yojque hué. Quijtulo ca se itoca hual quipia lahueltilisli pa quinchihualtis len quijtulo ca lajtol hual amo mopala. Huan ca mochi lacames hual quinlasalo lajtomes, san ca se lajtulisli ca lajtol hual amo mopala huil quinlamía pa yajmo quinlasalo lajtomes. Unca pampa in hual quijtúa mocahua melahuac pan ipampa in lajtol hual amo mopala. <sup>17</sup> Cate míac innojen hual Dios quinequi tejchihuilia. Quinequi pa ticmatisqui innojen hual yihual quinequi tejchihuilia. Huan innojen hual tejchihuilis, amo quiman quipalas. Pampa inon, quinextic pampa unca neli pan ipampa se lajtol hual amo mopala. <sup>18</sup> Yojque, nican cate omenten hual amo quiman mopalasqui. In hual Dios neli quilic mocahua quinami quilic. In lajtol calica Dios quijtuc inon amo mopalas pampa Dios amo huil islacati. Ticchiasqui ticmzticate pa toyolo unca neli in hual Dios quijtuc pampa se tonali yahui techmaca tehuanten. Huan ticholujque pa toyolo capa unca Dios pa yihual techpías huan techquixtilis mochi hual techijlacúa. Yojque timochicahualtilo pa toyolo pa ticchiasqui inon hual neli techilic pampa ticpiasqui. <sup>19</sup> Huan inon hual ticchialo ticmatilo ca mochi toyolo pampa unca melahuac. Huan amo quiman mijcuanis, amo unca nindeno hual quipalas. Quinami in teposlí etic hual quipía se barco pa camo mijcuanis capa unca lasaluli, yojque inon hual ticchixticate techpilía toyulilisli capa amo huil mijcuanis, pa camo tiasqui tictemusqui nindeno capa ticlalisqui tolaneltocalisli. Inon unca hual ticchialo: Ticayasqui se tonali ca Dios pin niman lasojli calijtic pin cielo (ilhuicac). Unca quinami in niman lasojli calijtic itepotzcon in tzotzomajli telahuac hual pilujtica lajco pin lasojli calijtic huan in niman lasojli calijtic pin tiopan pa Jerusalén. <sup>20</sup> Huan nepa pin niman lasojli calijtic pin cielo calaquic Jesucristo quiman ayamo ticalaquijque tehuanten. Techlaicanti-ahuiaya quiman calaquic nepa. Huan noje ticalaquisqui tehuanten se tonali. Yojque quichiac pampa mochíac tiopista hué pa tehuanten. Yihual se tiopista quinami yec in tiopista itoca Melquisedec.

## 7

### *Jesucristo, yihual tiopista quinami yojque yec tiopista Melquisedec*

<sup>1</sup> In Melquisedec yec hué hual huelitiaya pa Salem huan yec itiopista Dios in niman hué. Yihual Melquisedec quinamiquic Abraham in tonali hual Abraham mocuetataya quiman quinsulahuac in huejueyenten hual quiquitzquijque icni Lot. Huan Melquisedec quinoztac Dios pa quichihuilisquiaya cuali Abraham. <sup>2</sup> Noje pa yihual Melquisedec, Abraham quimacac len hual quinmanilic in huejueyenten amo cuajcuali. Quinxiluc diez lajlajco ca mochi hual quinmanilic huan quiquixtilic se lajco pa quimacasquiaya Melquisedec. Axan, ¿len quinequi quijtúa in quinami itoca Melquisedec? Pehua quinequi quijtúa “hué hual quichía mochi melahuac”. Huan noje yec hué hual huelitiaya pa Salem hual quinequi quijtúa “hué hual huelitia ca mosehuilisli pa moxtin”. <sup>3</sup> Ilajtol Dios amo techilía aqui yeje itajtzin huan inantzin, amo techilía aquinojen yeje iabuelojmes huan imiahuimes. Amo techilía quiman pehuac o lacatic huan quiman lamic o miquic. Yojque, ilajtol Dios techilía san quinami Melquisedec yec lanextilisli pa quinami



unca iXolol Dios hual amo pehuac huan amo lamis. Huan yojque Dios iXolol quinami Melquisedec amo mocahuas yes tiopista.

<sup>4</sup> Axcan, ¡xiquitacan quinami unca niman hué in Melquisedec! Abraham yec inmintajtzin yehuanten hual quipehualtijque in judíos. Yehuanten Dios ilacames hual cate nican pan lalticpan. Ma yoje Abraham quimacac in Melquisedec se lajco ca innojen diez lajlajco hual yeje mochi innojen hual quinmanilic in huejueyenten hual quinsulahuac. <sup>5</sup> Huan Abraham quinpíac ixohuiyojmes hual lacatijque quiman panujque xixihuil. Se ca yehuanten itocaya Leví. Huan sequin ca imiahuimes Leví Dios quinmacac pa yes inmínyaxca pa yesqui tiopistas pa Dios ixolomes in israelitos, jan sequin imiahuimes Leví san. Huan in lajtol quilía pa in tiopistas imiahuimes Leví canasqui se lajco hual quiquixtililo mochi diez ilajlajco mochi tomin hual quipialo inmiciñan, mas que inmiciñan noje yeje inminmiahuimes innojen oc sequin ixohuiyojmes Abraham. <sup>6</sup> Huan in Melquisedec amo yec Abraham imiahuil quinami yehuanten. Ma yoje, Abraham quimacac se ilajco in diez ilajlajco inon hual quipiaya Abraham, huan yihual quituchíac Abraham. Quema, quilajlanic Dios pa quichihuilisquiaya cuali Abraham, mas que Dios quilic neli Abraham pampa yahuiaya quichihuili míac lachihualisli niman cuali. Yoje pan ipampa Abraham, moxtin in lacames pin lalticpan quipialosquiaya míac cuali hual quinmaca Dios. <sup>7</sup> Axcan, pa in se hual niman hué unca iyaxca pa quilis latuchihualisli in se hual unca tipichin. Amaqui huil quijtúa amo unca yojque. <sup>8</sup> Huan axcan capa cate in tiopistas hual cate imiahuimes Leví, yehuanten canaló in se ilajco innojen diez lajlajco. Huan yehuanten cate lacames hual miquisqui. Pa yina capa cataya Melquisedec, yihual Abraham quimacac se ilajco mochi innojen diez, huan ilajtol Dios neli quijtúa san pampa yuli Melquisedec. <sup>9</sup> Huan mas que yehuanten imiahuimes Leví hual mochi tonali canaló in se ilajco mochi diez ilajlajco in hual quipialo inmiciñan, ma yoje huil tiquijtulo pampa unca quinami yehuanten noje quilaxlahuilijque Melquisedec in se ilajco in diez lajlajco. Quilaxlahuilijque pan ipampa Abraham. <sup>10</sup> Unca pampa cataloaya lajitic Abraham, ayamo lacatijque imiahuimes Abraham pan tonali hual Melquisedec quinamiquic Abraham mocuecataya quiman lamis quinsulahuac innojen huejueyenten.

<sup>11</sup> In ilajtol Moisés hual quijtúa quinami tequipanulo tiopistas, inon yec in lajtol hual niman míac monozaya. Unca pampa in israelitos quicaquijque in lajtol pan ipampa Moisés pa yojque cayalosquiaya tiopistas pa quitequipanuililosquiaya Dios pa yehuanten in israelitos. In tiopistas yeje imiahuimes Aarón hual yec imiahuil Leví. Sinda in tiopistas huil quichihuילוaya in israelitos quinami Dios quinequiaya, cuaquinon amo monequiaya pa cayasquiaya oc se tiopista hual amo cataya imiahuil Aarón. Amo monequiaya pa cayasquiaya oc se tiopista hual yesquiaya quinami Melquisedec. <sup>12</sup> Huan sinda quipalalo in lajtol hual quijtúa quinami unca inmintequipanulisli in tiopistas, cuaquinon monequi pa mopalas mochi in lajtol. <sup>13</sup> Monequi pa yes yojque pampa tiquijtuticate quinami unca Jesucristo totiopista. Huan yihual amo unca imiahuil Leví. Unca imiahuil Judá hual yec icni Leví. Huan pa Judá imiahuimes amo quiman cataya inmínyaxca pa quitequipanuililosquiaya Dios pan lasojli calijtic capa quichihuילוlo huendi pa Dios pin tiopan hué. Jan cataya inmínyaxca san sequin imiahuimes Leví. <sup>14</sup> Huan moxtin quimatilo quinami toTata Jesucristo unca imiahuil Judá. Pa ilajtol Moisés amo quijtúa nindeno hual quimacahuilítia pa yehuanten imiahuimes Judá huil mochihualo tiopistas.

<sup>15</sup> Huan inon huil momati niman cuali quiman ajsi mochía tiopista oc se lalac hual unca quinami in tiopista Melquisedec. <sup>16</sup> Inon quinequi quijtúa pampa unca se tiopista hual amo mochíac tiopista yojque quinami quijtúa in lajtol hual Dios quimacac Moisés. In lajtol quijtúa se tiopista quipías yes se imiahuil Aarón. Aarón quinpehualtic innojen tiopistas hual cate Leví imiahuimes. Ma yoje, in tiopista hual unca quinami Melquisedec unca se tiopista hual amo quiman lami huan, pampa quipía in lahuellitlisli pa camo quiman lamis, cuaquín yoje unca iyaxca pa yes tiopista. <sup>17</sup> Unca pampa Dios quijtúa pa ilajtol lajcuiluli, quil:

Tehual, titiopista huan amo quiman timocahuas tiyes tiopista yojque quinami Melquisedec yec tiopista.

<sup>18</sup> Yojque tiquitalo quinami in se lajtulisli hual cataya pa yina yajmo monequi pa yes laneltocali, pampa amo quipía chicahualisli pa quinchiuilis lacames in hual monequi pa yojque yelosquiaya laquixtili pin ipolehuilisli inminlajlaculisli. Pampín yajmo monotza in lajtulisli. <sup>19</sup> Cataya pampa in lajtol hual Dios quimacac Moisés amo ajsiaya quinpalehui Dios ilacames pa mochihualosquiaya quinami Dios quinequi. Pampa inon, Dios techualiquilic len niman cuali hual in lajtulisli hual quimacac Moisés amo quiman ajsiaya caya yojque cuali. Inon ticchialo ticmazticate chicahuac pa toyolo pampa tiajisquisquí timochihuasqui quinami Dios quinequi. Pampa inon, axcan huil timoajxiltilo ca Dios.

<sup>20</sup> Huan pa Jesucristo, mochíac iyaxca inon pa yes tiopista pan ipampa quinami Dios quijtuc ca lajtol hual amo mopala, quijtuc pa yojque yesquiaya.

<sup>21</sup> Huan amo cataya lajtol hual amo mopalaya pa yehuanten hual mochihualoaya tiopistas quinami quijtúa in lajtol hual Moisés techmaxtic. Ma yoje, ca Jesucristo, Dios ilajtol quijtúa, quil:

Axcan quijtuc chicahuac in Tata huan amo quipalas len quijtuc, quilic:

“Tehual tiunca tiopista huan amo timocahuas yes tiopista yojque quinami yec tiopista Melquisedec.”

<sup>22</sup> Pan ipampa inon, Jesucristo mochía se hual technextilía quinami Dios axcan quilalic se lajtulisli niman cuali pa tehuanten, amo quinami in se lajtulisli pa yina. <sup>23</sup> Huan amo inon san. Cate míac in oc sequin tiopistas hual yeje tiopistas pan ipampa Moisés ilajtol. Amo huil mocahualo tequipanujticate quinami tiopistas, pampa quipiasqui pa miquisqui quinami timoxtin.

<sup>24</sup> Amo unca yoje ca Jesús. Yihual mocahua tequipanujtica quinami tiopista pampa yihual mocahua yultica, yihual amo lami. <sup>25</sup> Pampa inon huil quinquixtía pin ipolehuilisli inminlajlaculisli yehuanten hual hualalo moajxiltiticate ca Dios pampa yihual quinpalehuía pa moajxiltisqui. Inon unca pampa Jesucristo amo mocahuas yulis pa quilajlanis Dios pa yihual Dios quinchiuilis cuali huan pa quinmacas mochi len monequi pa quipiasqui yehuanten hual quineltocalo.

<sup>26</sup> Se tiopista hué jan quinami Jesucristo neli unca in tiopista hual monequiaya pa ticpialosquiaya, pampa yihual unca mochi chipahuac pa iyolo ca Dios. Yihual amo quipía nindeno calica se quimotexpahuilía ca laijlaculisli. Amo caniltic nindeno pa iyolo hual amo cuali. Yihual mijcuanía pa camo quichías lacames inminlajlaculisli, amo quiman yuliaya yojque. Huan Dios quilalic pa capa unca pa pani mochi in cielos. Yihual unca inminhué moxtin in huejueyenten pa yojque huelitis pan mochi hual Dios quichíac. <sup>27</sup> Huan amo monequi pa quimacas mojmosta huendi pa yihual ilajlaculisli huan cuaquín pa quimacas huendi pa inminlajlaculisli in oc sequin lacames. In oc sequin tiopistas, quema, quipialo pa quichihuasqui yojque huendi

mojmosta. Amo unca yojque ca totiopista hué Jesucristo hual quichíac se huendi san pa in tonali hual motemacac yihual ihuían pa yes huendi. Huan in huendi mocahua cuali, amo quiman lamis ilahuelilitlisli. <sup>28</sup> Unca yojque, pampa quinami quijtúa Dios ilajtol hual Moisés quimaxtic, quinlajtultiloaya pa yesqui tiopistas lacames hual cate laijlaculi quinami moxtin, huan amo cate chijchicahuac. Ma yoje, quiman quipiajque in lajtol miac xixihuimes, Dios lajtuc ca lajtol hual amo mopala huan quilajtultic iXolol pa yes tiopista. Yihual Dios quihuelilitic pa mocahuas in se tiopista niman hué, se tiopista hual amo quiman lamis.

## 8

### *Jesús technextilic quinami ticajsilo Dios ilajtulisli yancuic*

<sup>1</sup> Axan, inon unca in niman hué hual tilajtuticate, nicnequi niqijtúa, unca in niman cuali pa anquimatis pampa ticpialo se tiopista hué hual unca quinami axcan annimitzilic. Yihual unca pa in cielo inahuac Dios toTajtzin Hué. Huan yihual huelitjticate, pa imajma cuali toTajtzin molalijtica. <sup>2</sup> Yihual Cristo quipía itequipanulisli pa tehuanten nepa pin niman lasojli itioipan Dios. In unca pin lasojli tiopan melahuac hual jan moita pin cielo (ilhuicac) san. In Tata quichíac in lasojli tiopan, amo cataloaya lacames hual quichihuaajque. <sup>3</sup> Axcan, ma tiqijjtucan len inminahuac tiopistas huejué. Mochi tiopista hué unca lajtultili pa quinlalisqui huendis huan innojen hual quimacasqui lacames ilaixpan Dios. Pampín, monequi pa in tiopista hué, Jesucristo, quipías len pa quilalis ilaixpan Dios quinami huendi. <sup>4</sup> Sinda cataya nican pan lalticpan, amo huil yesquiaya tiopista, pampa cate tiopistas hual quinlalilo huendis ilaixpan Dios, quinami quinmilía in lajtol hual Dios quimacac Moisés. <sup>5</sup> Huan in lasojli tiopan capa quitequipanuililo Dios in tiopistas nican pan lalticpan jan technextilía quinami ilanextilisli in lasojli tiopan melahuac hual unca pin cielo. Ticmatilo inon, pampa quiman Moisés yahuiaya pehua quichía in lasojli tiopan lachihuali ca tzotzomajli telahuac, Dios quilic ca lajtol chichahuac, quil: “Xiquita cuali pa ticchías mochi quinami tiquitac nepa quiman nimitznextilic pan in loma hué (tepel).” <sup>6</sup> Quinami unca inmintequipanulisli in tiopistas, Cristo tequipanúa quinami tiopista hué niman cuali. Amo quiman cataya yoje cuali inmintequipanulisli in tiopistas hual tequipanulo quinami quijtúa in lajtulisli pa yina. Unca yojque pampa Cristo unca se hual latequihuía quinami quijtúa se lajtulisli hual unca niman cuali, amo jan yoje cuali quinami cataya in lajtulisli hual catani pa yina. In ilajtulisli Cristo mochíac pan ipampa lajtomes mejmelahuac hual cataloaya niman cuali.

<sup>7</sup> Axcan, sinda in lajtulisli calica pehuac Dios ilajtol quipiaya mochi hual monequiaya, cuaquinon amo monequiaya pa cayas oc se lajtulisli hual axan unca. <sup>8</sup> Ticmatilo monequiaya pa cayas se lajtulisli yancuic pampa Dios amo quítac mochi cuali ca in lajtulisli hual catani pa yina, pampa quijtúa, quil: Quijtúa in Tata: Ajsitihualasqui tonalijmes quiman nicchías lajtulisli yancuic ca yehuanten hual cate Israel huan yehuanten hual cate Judá.

<sup>9</sup> Amo yes quinami in lajtulisli hual nicchíac ca inmintajtzitzían pa yina, pa in tonali hual cataya quinami niquinquitzilic inminmajmajuan pa niquinlaicanac pa quiahuac in lali Egipto. Nicchías se lajtulisli yancuic ca yehuanten pampa amo yultiahuiloaya quineltocatataloaya nolajtulisli calica nipehuac niquinnextilic no'ojli.

Huan pampín nehual niquincajcahuac, quijtúa in Tata.

<sup>10</sup> Axan inon unca in lajtulisli hual nía nicchía ca yehuanten hual cate Israel quiman ajsisqui innojen tonalijmes, quijtúa in Tata:

Niclalilis nolajtomes laijtic inmintzontecón

huan yes quinami niqinmijcuiluilijtica nolajtomes pan inminyolo, huan niyes yehuanten inminDios, huan yehuanten yesqui nehual nola-cames.

<sup>11</sup> Huan yehuanten amo quipiasqui quinmaxtisqui mochi sejse icni, quijtu-tica, quil, xiquiximati in Tata, pampa moxtin nechiximatisqui, yehuanten hual niman tijtipichin, quema, huan yehuanten hual niman huejué.

<sup>12</sup> Cayas yojque pampa nehual niquinmicnilis mas que yehuanten quichi-hualoaya laijlaculisli, yuliloaya quichijtataloaya in amo cuali.

Cuaquinon yajmo niqijnamiquis inminlajlaculisli.

<sup>13</sup> Yojque, pampa yahuiaya quinmaca se lajtulisli yancuic, inon quinequi quijtúa pampa in lajtulisli calica pehuac Dios axcan mochijtía quinami cacaxli. Huan quinami mochijtía cacaxli, yojque amo yahui huejcahua pa yes, yahui ajsi in tonali quiman yajmo cayas.

## 9

### *In lasojli tiopan pan lalticpan huan in hual unca pa in cielo (ilhuicac)*

<sup>1</sup> Axcan, in lajtulisli calica pehuac Dios ilajtulisli ca tehuanten noje quip-iaya lamaxtilisli hual unca quinami monequiaya pa lacames quimolan-cuacuetzilisqui Dios. Huan quijtuc mochi quinami yesquiaya lachihuali in lasojli tiopan capa quimolancuacuetzililo. <sup>2</sup> Yojque quichihuajque se cali ca tzotzomajli huan cuilaxli tejtelahuac. Huan calijtic in lajco capa calaquinjime hual itocani in lasojli tiopan cataloaya in tapalcal lachihuali ca oro pa lahuilisli huan inon capa in tiopistas quinlalinijme jan yoje in panes quinami huendi pa Dios. <sup>3</sup> Huan itepotzcon in tzotzomajli telahuac hual pilujtataya huan quixilujtataya lajco pin cali calijtic cataya oc se lajco calijtic hual motocani in niman lasojli calijtic. <sup>4</sup> Nepa catanjime in xicali lachihuali ca oro calica lapopochuinijme pin niman lasojli calijtic huan in latzacuali itocani iarca in lajtulisli. In catani lapachuli ca oro pa mochi iquiahua. Laijtic in arca cataya se texcumil lachihuali ca oro quipixtataya nadita maná hual unca in hual Dios pin cielo quitilanic pa quicualosquiaya in israelitos quiman cataloaya capa amo cataya len pa quicualosquiaya. Noje cataloaya icuajtzindi Aarón hual xuchuhuic huan in tixcalimes pajpalahuac capa quijcuiluc Dios ilajtomes in lajtulisli. <sup>5</sup> Pa pani in arca cataloaya in querubines cuajcualtichin ca cahuanilisli hual quipialoaya lapalahuali inminastacapajmes pa pani pa yojque quitzacualosquiaya in latzacualoni hual quitzacuaya in arca pa pani. Huan in latzacualoni motocani in capa Dios laicnilía, capa quinpuppuhuani inminlajlaculisli. Ma yoje, amo tialo tilajtulo innahuac innojen sejse ca sejse axcan.

<sup>6</sup> Quiman catani lachihuali in cali huan mochi hual quipiaya pa cayas calijtic, cuaquinon in tiopistas calaquinjime mojmosta calijtic pin lasojli calijtic quichijtataloaya len monequini pa quimolancuacuetzililosquiaya Dios. <sup>7</sup> Huan pin niman lasojli calijtic jan calaquini in tiopista hué san. Huan calaquini pa jan se tonali san pa sejse xihuil. Huan quipiani pa quihuicas-quiaya esli ca yihual quiman calaquini. Quihuicani in esli quinami huendi pa yihual ilajlaculisli huan cuaquinon calaquini ca esli quinami huendi pa in oc sequin israelitos inminlajlaculisli. Cataya pa inminlajlaculisli hual amo quimatiniyme quiman quichihuanijme. <sup>8</sup> Yojque in Espíritu Santo

technextilía quinami Dios ayamo techlapulic ojli calica ticalaquilosquiaya pin niman lasojli calijtic, in quinequi quijtúa noje in tiopan pin cielo capa unca Dios. Dios amo techlapulic ojli pa in niman lasojli tiopan pa in cielo (ilhuicac) pa tajsisqui nipa mojmosta quiman mocahuani moquezataya in lasojli tiopan pan lalticpan. In lasojli calijtic catani pa molancuacuetzalislí pa quiahuac in niman lasojli icalijtic in tiopan. <sup>9</sup> Huan quinami Dios ayamo techlapulic ojli pa in niman lasojli tiopan pin cielo (ilhuicac), inon technextilía quinami pa yina amo catani quinami se ajsisquiaya capa unca Dios. Cataya pampa in calijtic capa calaquinijme in cali lachihuali ca tzotzomajli pan lalticpan quitzacuilini se pa como calaquisquiaya capa Dios. Quinami quijtuni in lajtulisli calica pehuac Dios quinnotzac ilacames, quipianijme pa quinlalilosquiaya ilaixpan Dios huendis huan innojen oc sequin hual quimacanjime. Ma yoje, innojen amo huil quimachiltini se pa iyolo pampa Dios quiztataya chipahuac pa iyolo quiman quimolancuacuetzilini quinami quijtúa in lajtulisli calica Dios pehuac quinnextilic iojli. Nicnequi niqijtúa, se ilajmatilisli inahuac inon hual unca cuali o amo cuali amo mocahuani pa quimotexpahuilis inahuac ilaijlaculisli. <sup>10</sup> Quiman quimolancuacuetzilini Dios quinami quijtuaya in lajtulisli hual cataya pa yina, yojque jan quinnextilini yehuanten len momacahuilini pa quicualosquiaya huan cunilosquiaya. Huan quinextilini quinami mopacalosquiaya huan quinmaxtini oc sequin lajtomes. Innojen lajtomes cataloaya quinami mochipahuililosquiaya inmincuerpos pa quichihualosquiaya quinami monequiaya pa quimolancuacuetzilisqui Dios. Quipianijme pa quichijtihualalosquiaya quinami quijtuloaya in lajtomes, huan yojque se tonali ajsilosquiaya in tonalijmes quiman cayasquiaya in lajtulisli yancuic.

<sup>11</sup> Cuaquinon, Cristo nescic pa yes totiopista hué pa techpalehuis ca innojen cuali hual Dios techmaca pan ipampa in lajtulisli yancuic. Yihual amo panuc pa in cali lachihuali ca tzotzomajli telahuac pa ajsisquiaya pa in niman lasojli tiopan pan lalticpan. Yoje unca quinami quichihuanijme pa yina in tiopistas. Yihual panuc ca capic cataya se cali niman hué huan niman cuali, quinami Dios quinequic. Inon unca se cali hual amo quichihuaunque lacames. In cali amo unca lachihuali ca len hual moita pan lalticpan. <sup>12</sup> Quema, yihual panuc pa calaquis jan sejpa san pin niman lasojli tiopan, quinequi quijtúa, pa in cielo (ilhuicac) capa unca Dios. Huan amo quihuiac ca yihual inminesli chivos huan toros, quinami quihuicanijme ca yehuanten in tiopistas pa yina. Yihual calaquic pan ipampa iesli yihual ihuán. Huan yojque neli techmacahuac, yojque techquixtilic tolaijlaculisli ilaixpan Dios. Yajmo monequi pa quichías oc sejpa. <sup>13</sup> Huan neli in tiopistas cajuichunijme yehuanten israelitos ca inminesli chivos huan toros huan itinexli se sihuacuacua becerra yancuic lachichinuli. Quinchihuiliniyme yojque yehuanten quiman moitanijme amo chijchipahuac huan yojque amo huil quilaliliniyme inminhuendi ilaixpan Dios. Huan quiman cajuichunijme yojque, cuaquinon mocahuaniyme cuali pa huil quilalilosquiaya huendis. Yojque, sinda cajuichunijme yojque huan mocahuaniyme cuali pan ipampa in esli, <sup>14</sup> axcan ¡quinami amo anmijchipahuilis anmoyolo Cristo iesli! Iesli quipía niman miac chicahualisli hué. Inminesli innojen toros huan chivos amo quiman huil quipía chicahualisli yoje hué. Quema, anmolajmatilisli inahuac in hual unca cuali huan amo cuali yajmo anmitzmotexpahuilis anmoyolo inahuac len yes anquichíac hual anmijxilusquiaya ca capic amo quiman huil anmocuepas ca Dios. Huan axan huil anquitequipanuila in Dios hual amo quiman lami, amo anquimahuilijtica nindeno. Unca pampa Cristo motemacac quinami huendi pa Dios, se huendi hual amo quipiaya len

hual amo cuali. Motemacac quinami huendi pan ipampa in Espíritu Santo hual amo quiman lami.

<sup>15</sup> Yojque, yihual Cristo moquetza lajco pin lacames huan Dios pa quin-palehuis yojque quinami quijttúa in lajtulisli yancuic. Yojque yehuanten hual Dios quinnotzac pa yesqui ixolomes huil canaló inon hual unca iyaxca Dios, inon hual amo quiman lamis, inon hual Dios quijttuc neli pampa yahuiaya quinmaca. Quinmacas inon pampa unca Cristo hual miquic, huan pampa in, imiquilisli quinmacahua. Quinquixtilic in laijlaculisli hual quichihuajque quiman quipianijme pa quineltocasqui in lajtulisli calica Dios quipehualtic. <sup>16</sup> Axcán, sinda unca se lajcuilulisli hual quijcuilúa se pa yoje momatis aquí canas inon hual iyaxca quiman miquis, yojque monequi pa momatis neli pampa miquic aquí hual quijcuiluc in lajcuilulisli. <sup>17</sup> Unca pampa jan mochías cuali se lajcuilulisli quiman miqui aquí yes hual quilajcuilultic. <sup>18</sup> Pampín, in lajtulisli calica Dios quipehualtic, inon quiyancuilijque ca inminesli yulijquimes hual miquijque. <sup>19</sup> In tonali quiman Moisés quinmilic moxtin in israelitos mochi in lajtol, canac inminesli becerros huan chivos huan al huan se borrego itojmiyo layapali chichiltic huan se cuajtzindi de hisopo huan cajuichuc in amal capa cataya lajcuiluli in lajtol huan cajuichuc moxtin in israelitos. <sup>20</sup> Huan quijttuc: “In unca in esli calica Dios quichía cuali in lajtulisli hual quijttuc chichahuac pa anquineltocas.” <sup>21</sup> Huan jan yoje cajuichuc ca in esli in cali lachihuali ca tzotzomajli huan cuilaxli tejtelahuac. Huan cajuichuc mochi innojen hual cataloaya calijtic calica quitequipanuulinijme Dios. <sup>22</sup> Huan neli, quinami quijttúa in lajtol, in niman miac ca mochi innojen cataloaya lachipahuali ca esli. Dios amo quipujpuhua ilajlaculisli amaqui sinda amo unca ilatuyahuilisli esli.

### *Cristo motemacac pa miquis pa yihual techquixtilis tolajlaculisli*

<sup>23</sup> Yojque, monequiaya pa mochipahuilisqui ca innojen lachihualisli calica quitequipanuulijque Dios. Quema, innojen lachihualisli pan lalticpan cataloaya lachihuali quinami nesilo innojen hual cate pa in cielo (ilhuicac). Ma yoje, innojen hual cate pin cielo, monequi pa mochipahuilisqui ca huendis niman cuali, amo ca huendis quinami quinmacalo pan in lalticpan. <sup>24</sup> Huan inon unca len panuc. Dios quimacac se huendi niman cuali. Cristo amo calaquic pa in lasojli tiopan hual lacames quichihuajque hual unca quinami ilanextilisli in lasojli tiopan melahuac pa in cielo (ilhuicac). Calaquic pa in cielo, axcán unca nepa pa nesis iyampa Dios pa huil tech-palehuis. <sup>25</sup> Huan amo quipía pa motemacas miac quinami huendi, sejpa huan oc sejpa. Inon unca quinami in tiopista hué pan lalticpan calaquini mochi xihuil pin niman lasojli icalijtic in tiopan, quihuicatataya esli hual amo iyaxca. <sup>26</sup> Sinda yojque quipiaya pa quichiasquiaya Cristo, cuaquín quipiaya pa panus miquilisli miac, sejpa huan oc sejpa quiman pehuac in lalticpan huan in cielos. Quinami unca axcán, yihual nesis jan sejpa san quiman lanticate in tonalijmes pan in lalticpan hual axcán unca. Nesis pa quinquixtilis lacames inminlajlaculisli pan ipampa quinami motemacac pa miquis. <sup>27</sup> Dios quinlalilic lacames pa quipiasqui pa miquisqui sejpa huan cuaquinon nesisqui iyampa pa yihual quinlaxlahuis quinami quinmahuilúa pa quinami yuliloaya pan lalticpan. <sup>28</sup> Huan jan quinami Dios yojque quilalic, jan yojque Cristo hual cataya latemacali quinami huendi jan sejpa san pa panus miquilisli pa inminlajlaculisli miac, axcán yahui nesi oc sejpa, huan inon amo pa motemacas quinami huendi pa laijlaculisli. Yihual nesis pa quinmanas ca yihual yehuanten hual ca miac lanequilisli quichixticate.

## 10

<sup>1</sup> Monequi pa anquimatis inon: In lajtol hual Dios quimacac Moisés calica Dios pehuac ilanextilisli techiliaya quinami quipiasqui pa yulisqui yehuanten hual iyaxca. San technextiliaya nadita innojen cuali hual Dios quinmaca lacames quiman hualasquiaya in lamachiltisli cuali capa yehuanten. In lajtol calica quipehualtic inon amo technextilía quinami neli cate mochi innojen. Huan pampa inon in lajtol amo quiman huil quinchía cuali quinami Dios quinequi pa yesi yehuanten hual moajxtililo ca Dios huan quinhualicalo in huendis mochi xixihuil, sejpa huan oc sejpa. <sup>2</sup> Sinda in lajtol huil quinchihuilaya pa yelosquiaya cuali lacames, cuaquin ¿amo mocahualoaya pa quinhualicalosquiaya huendis? Quema, neli unca inon. Sinda yehuanten hual moajxtililo ca Dios cataloaya lachipahuali yojque, cuaquinon yajmo lamatiloaya quinami quinmotexpahuiliaya inminlajlaculisli hual quinchihualoaya. <sup>3</sup> No, ca in huendis hual quinhualicaloaya mochi xixihuil, quinoimnamiquiltilía inminlajlaculisli. <sup>4</sup> Unca yojque pampa inminesli de toros huan chivos amo quiman huil quinquixtilía lacames inminlajlaculisli. <sup>5</sup> Pampa inon, quiman hualac Cristo pan lalticpan, quilic Dios, quil: Huendis ca esli huan huendis hual quincualo amo tiquinnequic, Oh Dios. Ma yoje, tinejchiuilic se cuerpo.

<sup>6</sup> Huendis noje hual quichichinulo pa quinquixtilisqui laijlaculisli, ca innojen amo timopaquiltía,

huan amo timopaquiltía ca huendis hual cate yulijquimes lachichinuli.

<sup>7</sup> Cuaquinon niyalic:

“Xiquita, nihualaya pa nicchihuas quinami tehual ticnequi, oh Dios.

Unca lajcuiluli pin iamal molajtol in hual niahuiaya nicchia.”

<sup>8</sup> Quiman quijtuc inon hual lamic moijcuiluc, amo quinnequic huan amo mopaquiltic ca huendis ca inminesli huan huendis hual quicualo, huan huendis hual cate yulijquimes hual quichichinulo, huan huendis pa laijlaculisli. Yojque laquezfataya inminahuac huendis hual quinmacalo Dios quinami quijtúa ilajtol in lajtulisli. In lajtulisli cataya inon calica Dios pehuac monextilic ca yehuanten hual quinlajtultic. <sup>9</sup> Huan umpa quijtuc: “Xiquita, nihualaya pa nicchihuas quinami tehual ticnequi.” Huan quiman quijtuc yojque, inon quinequi quijtúa pampa lamiaya ca in lajtulisli calica pehuac pa yojque pehuasquiaya quilali in lajtulisli yancuic. <sup>10</sup> Pan ipampa quinami Cristo quichíac inon hual Dios quinequic, niquijtúa, quiman motemac icuerpo jan sejpa san pa yes huendi hual amo quiman quipías mocuepas yes huendi, yojque yihual tejchiac lacames chijchipahuac huan iyaxca Dios san.

<sup>11</sup> Mochi tiopista quipías pa mocahuas moqueztica mojmosta quiman quitequipanulía Dios ca innojen huendis hual quinlalia sejpa huan oc sejpa míac ilaixpan Dios. Huan innojen huendis amo quiman huil quinquixtilía lacames inminlajlaculisli. <sup>12</sup> Ma yoje, quiman Cristo quitemacac se huendi san pa yehuanten inminlajlaculisli, se huendi hual yes cuali huan amo quiman moijlacus, yojque molalic inahuac ima cuali Dios. Inon quinequi quijtúa yihual quilamic itequipanulisli, yajmo quipiaya quichía nindeno. <sup>13</sup> Nepa yahui mocahua pa in tonali hual moitasqui mochi ilacocolinijmes lasulahuali, quinami cayalosquiaya itzindan icxihuajmes. <sup>14</sup> Pan ipampa jan se huendi san, yihual quinchíac niman cuali yehuanten hual quinlajtultic pa yesqui iyaxca. Yojque Dios huil quinhuicas yehuanten pa cayasqui ca yihual. <sup>15</sup> Huan in Espíritu Santo noje techilía neli in lajtulisli yancuic, pampa pa ilajtol Dios quijtúa quil:



<sup>16</sup> Inon unca in lajtulisli hual niclalis pa yehuanten quiman panusqui innojen tonalijmes, quijtúa in Tata:

Niclalis nolajtomes pa yehuanten inminyolo huan pa inminlajnamiquilisli. Yes quinami niqunmijcuiluilis laijtjc yehuanten pan inminyolo.

<sup>17</sup> Huan cuaquinon quijtúa, quil:

Huan yajmo quiman niqunmijnamiquis inminlajlajculisli, huan amo quijnamiquisqui quinami amo nechnehtocanjme.

<sup>18</sup> Yojque pan ipampa in lajtomes, quinami in Espíritu Santo techmaxtía, axcan ticmatilo pampa quiman quinpanuc inon quinami in Tata quinpuphuac inminlajlajculisli, yojque yajmo monequi pa yesqui huendis pa ilapuphualisli tolajlajculisli.

### *Monequi pa timoajxiltisqui ca Dios*

<sup>19</sup> Pampa inon, nocnían, ticmatilo pa toyolo pampa huil ticalaquisqui pin niman lasojli tiopan hual unca icielo Dios, huan inon pan ipampa iesli Cristo hual toyahuic quiman miquic. <sup>20</sup> Ticalaquisqui ca in ojli hual quiyancuilic, in ojli hual techmaca yulilisli. Yihual techlapulic in ojli pan ipampa icuerpo (inacayo) quiman miquic. Pan lalticpan huil calaquiní in tiopista hué in niman lasojli icalijtic in cali lachihuali ca tzotzomajli san pan ipampa in tzotzomajli telahuac pilujtataya hual quitzacuaya in niman lasojli calijtic. Jan yojque pin cielo pin niman lasojli calijtic capa unca Dios, san huil ticalaquisqui pan ipampa icuerpo Cristo totiopista niman hué. Yihual quichía quinami in tzotzomajli telahuac. <sup>21</sup> Yojque, ticpialo se tiopista hué hual huelitía capa moxtin yehuanten hual cate ixolomes Dios. <sup>22</sup> Pampa in, ma timoajxiltican ca Dios ticpixticate toyolo melahuac ca mochi toyolo ticneltocaticate Cristo. Ticpiajqque toyolo lachipahuali quinami cataya lajuichuli, pa yoje tolajmatilisli inahuac len unca cuali huan amo cuali amo techmotexpahuilis nindenó. Huan yojque toyolo cate chipahuac. Huan tocueros ticpiajqque quinami la'altili ca al chipahuac. Yojque ticataloaya lachipahuali, techquixtilic mochi laijlajculisli hual ticchihuaque ca tocueros. <sup>23</sup> Ma camo tijcajcahuacan inon hual ticneltocalo. Ma camo ticmahuilican inon, ma camo tiquijtucan pa toyolo pampa amo unca melahuac. Huil ticlalililo mochi laneltocalisli ca yihual hual techilic neli pampa yahuiaya tejchihuili quinami techilic. <sup>24</sup> Huan ma tiquijnamiquican quinami huil timonejnequiltisqui se huan oc se pa timolasojlasqui huan pa tiquinchihuilisqui cuali oc sequin. <sup>25</sup> Huan ma camo timocahuacan pa timonechicusqui pa tijcaquisqui Dios ilajtol. Sequin yajmo monechiculo míac. Tehuanten ma timochicahualtican timoxtin pa ticchihuasqui len Dios quinequi. Huan amo inon san, pampa anquita ajstitihuala in tonali quiman Dios quinmilis lacames inon hual yihual quinchihuilis, quinlaxlajtica pa quinami yuliloaya pan lalticpan.

<sup>26</sup> Monequi pa tiyulisqui yojque. Ticmatijque Dios ilajtol melahuac huan sinda tiyulilo ticchijticate laijlajculisli pampa ticnequilo timolalilo quinami Dios icocolinijmes, cuaquinon yajmo unca huendi pa laijlajculisli. <sup>27</sup> Quema, neli ja in san techcahuilis: Dios yahui techtojtoca yihual iyampa huan ticchiasqui inon huan timomajtisi míac, pampa Dios yahui quincocoltía icocolinijmes ca niman míac cualanilisli huan yehuanten polehuisqui pan ipampa in cualanilisli calica Dios quincocoltis quinami ca tixuxli. <sup>28</sup> Anquimati quinami cataya pa yina sinda se lacal quixijxic in lajtol hual Moisés quimaxtic. Sinda quixijxic quinami quijtuaya in lajtol amo quipiaya lahueliltisli, cuaquin in se quipiaya pa miquis sinda cataloaya ome, ye lacames hual quijtuloaya ca lajtol hual amo mopala pampa quimatiloaya in



se yojque quixixcuc in lajtol. Huan amo quicnilijque. <sup>29</sup> Huan sinda cataya yojque ca se hual quixixcuc in lajtol hual Moisés quinmactic, cuaquinon Dios quicojcoltis niman chichahuac se hual quixixcucía iXolol Dios, amo san quinami quichihuulinijme se hual quixixcuc ilajtol Moisés. Unca quinami yihual in se quitelicsac itzindan icxihuajmes iXolol Dios. Unca quinami quijtutica pampa quiman techtoyahuilic Cristo iesli calica quichiac cuali in lajtulisli yancuic, yojque cataya jan quinami miqui oc se lalac. Huan ca iesli Cristo, Dios quilajtultic in lalac pa quitequipanuilis yihual Dios san. Unca quinami in se quijtutica Cristo iesli unca quinami laijlaculi, yojque quihuejuecaltitica in Espíritu Santo hual tejchiuilia in cuali hual Dios techmaca. <sup>30</sup> Tehuanten tiquiximatilo Dios huan ticmatilo quinami yihual quijtuc: “Unca noyaxca nehual pa nimolacuepilis. Nehual niclaxlahuis nolacocolinijmes ca lacocoltilisli.” Huan noje quijtúa Dios ilajtol, quil: “In Tata quincocoltis ixolomes quiman quichihualo laijlaculisli.” <sup>31</sup> ¡Momajtis miac se sinda quipías pa moitas iyampa in Dios hual yuli quiman in Dios yahui lacocoltía! <sup>32</sup> Ma yoje, amhuanten amo ximocahuacan pa anquijnamiquis in tonalijmes pa yina quiman anquilalic anmolaneltocalisli ca Cristo huan Dios anmitzlahuilic anmoyolo. Anmochicahualtic pa anpanus niman miac lacocoltilisli huan amo anmolacuepiloc. <sup>33</sup> Sejpa huan oc sejpa lacames anmitzpinahualtijque inminyampa moxtin, anmitzhuejuecaltitataloaya huan anmitzcocoltitataloaya. Huan sejpa huan oc sejpa ancataloaya inminahuac yehuanten hual in lacames amo cuajcuali yojque quinchihuilitataloaya. <sup>34</sup> Inon niquijtúa, pampa anquinmicnilic yehuanten in laneltocanijmes hual cataloaya latzacuali pin caljtuc huan anquinpalehuic. Huan anpanuc ca paquilisli in amo cuali quiman Dios ilacocolinijmes anmitzixtequiliijque inon hual anmoyaxca. Inon anpanuc pampa amhuanten anquimati pampa anquipía len pin cielo hual unca niman cuali, amo quinami innojen hual anquipía nican pan lalticpan. Inon hual anquipía pin cielo amo quiman mochahua pa huejcahuas. <sup>35</sup> Yojque, amo xijcajtiquisacan inon hual anquimatis pa anmoyolo, inon hual anquipía pampa anquilalic anmolaneltocalisli ca Dios. Anquipías laxlahuilisli hue hual Dios anmitzmacas pan ipampa in chichahuilisli pa anmoyolo. <sup>36</sup> Unca pampa monequi pa anpanus in amo cuali hual anmijchihuilitilo mas que anmitzcocúa. Monequi pa anquimpanus pa yoje huil anquichías len Dios quinequi huan pa huil anquipías in hual yihual quijtuc neli pampa yahui anmitzmaca. <sup>37</sup> Dios ilajtol quijtúa, quil: Jan nadita san huan yihual hual hualas, hualas huan amo huejcahuas pa hualas.

<sup>38</sup> Huan yihual hual nehual Dios niquijtuc neli pampa amo quipía laijlaculisli, yihual yulis pan ipampa ilaneltocalisli hual quilalic ca in Tata. Huan sinda se, aquí yes, yajmo quilalis ilaneltocalisli ca nehual, cuaquinon amo nicayas lapaquiltili ca yihual.

<sup>39</sup> Ma yoje, tehuanten amo ticate hual timomajtilo pa tiyultiasqui ticlalticcate tolaneltocalisli ca Cristo. Sinda ticataloaya yojque, cuaquín tipolehuiloaya huan tilamiloaya laxiluli pa camo ticayasí ilaixpan Dios. No, tehuanten ticate hual ticneltocatialo huan timopililo tiyulticcate pa camo tipolehuisqui.

## 11

*Quinami yes sinda se quilalía ilaneltocalisli ca Dios huan iXolol Dios*

<sup>1</sup> Axcan, in laneltocalisli unca inon hual ticmati pa toyolo, in hual ticchixcicate pa panus o pa ticanasqui. Huan noje in laneltocalisli unca inon hual

ticmatilo unca neli mas que amo tiqitalo. <sup>2</sup> Dios lajtúa niman cuali inmi-nahuac yehuanten hual yulinijme pa yina huan yojque quineltocanjme. <sup>3</sup> Huan pan ipampa quinami ticneltocalo Dios, yojque ticmatilo pampa Dios quinchíac mochi huan quilallic pa yesqui huan pa panusqui huan pa nejne-misqui jan quinami tiqitalo quichihualo axcan, mas que in hual tiqitalo yihual quichíac ca in hual amo moita. <sup>4</sup> Huan pampa yoje quineltocani Abel, quihualicac se huendi hual Dios quitac cuali, amo cataya quinami in huendi hual quihualicac icni Cain pa quilalis ilaixpan Dios. Huan pan ipampa Abel ihuendi, yojque Dios technextilía neli quinami yihual quixtocac len Abel quimacac huan quijtuc pampa Abel unca cuali huan amo quipía laijlaculisli. Huan yojque, pan ipampa quinami Abel quilalic ilaneltocalisli ca Dios, yojque yihual Abel ayamo mocahua pa techilis tehuanten pa ticlalisqui tolaneltocalisli ca Dios. Quema, techilijtica Abel inon mas que yihual miqúic, pampa timomaxtilo inon pa Dios ilajtol.

<sup>5</sup> Huan pampa Enoc quilalic ilaneltocalisli pan Dios, cataya laijcuanili pa camo quipanuc pa miqúis. Yojque yajmo moitilic pampa Dios quijcuanic, yajmo nesci pin lalticpan pa cayas capa unca Dios. Yojque quipanuc Enoc, pampa pin tonalijmes quiman Dios ayamo quiquixtic pa yajmo cayasquiaya pin lalticpan, momatini neli pampa yihual quipaquiltini Dios. <sup>6</sup> Huan sinda se amo quilalía ilaneltocalisli ca Dios, cuaquinon in se amo quiman huil quipaquiltía Dios. Yojque, aqui yes quinequi moajxiltía ca Dios, monequi pa quineltocas pampa Dios unca, huan quimaca mochi len cuajcuali yehuanten hual quitemulo pa quiximatisqui ca mochi inminyolo.

<sup>7</sup> Quilalic Noé ilaneltocalisli ca Dios quiman Dios quilic pampa cayasquiaya polehuilisi hual ayamo quitac Noé. Pampín quineltocac huan quichíac in cali itoca arca pa yojque yihual huan yehuanten pa ichan cayalosquiaya laquixtili pa camo polehuilosquiaya. Huan pampa yihual quichijchíac in arca, yojque yihual quinmotexpahuilic inminlaijlaculisli moxtin in oc sequin pin lalticpan. Yojque polehuijque pampa amo quineltocaloaya. Huan yihual Noé canac inon hual iyaxca Dios pampa quimacac Dios. Unca pampa inon hual unca iyaxca Dios noje unca pa yehuanten hual Dios amo quinmitilía laijlaculisli.

<sup>8</sup> Pampa quilalic Abraham ilaneltocalisli ca Dios, cuaquín quiman Dios quinzotzac, yihual quineltocac huan quisac huan quicahuac ilali. Quisac pa yasquiaya ca capic cataya se lali hual yihual yahuiaya cana quinami len hual yec iyaxca Dios. Yahuiaya cana quiman panujque míac xixihuil. Quema, quisac Abraham umpa, amo quimaztataya ca capic yahuiaya. <sup>9</sup> Pampa quilalic ilaneltocalisli ca Dios, Abraham pehuac chantic pin lali hual Dios quilic neli pampa yahuiaya quimaca. Chantini nepa quinami se hual amo chantitica pa ilali iyaxca. Huan Isaac huan Jacob chantinijme pin calimes lachihuali ca tzotzomajli telahuac. Yehuanten noje yahuiyoaya quipialo in lali ca Abraham quinami len hual iyaxca Dios. Cataya pampa Dios neli quinmilic yehuanten pampa yahuiaya quinmaca in lali. <sup>10</sup> Abraham neli quichixtataya pa ajsis in tonali quiman huil chantisquiaya pa se caltilan hual amo mocahuas yes. In caltilan Dios quilalic pa quichías huan cuaquinon quichíac.

<sup>11</sup> Pampa quilalic Sara ilaneltocalisli ca Dios, canac chichahualisli pa quipías se xolol, más que ca yihual panujque in xixihuimes quiman sihuames huil quinpialo xolomes. Yihual huil quipíac in xolol pampa quimatic Dios quichihuilía yojque quinami neli quilía. <sup>12</sup> Yojque, tiqitalo se lalac Abraham hual cayani quinami se hual miqúic, pampa se lalac hual yulic cien xixihuil

quinami yihual amo huil quinlacatiltía xolomes, jan quinami amo huil se mijquil. Quema, in se lacal quinpiaya niman míac xolomes, amo huil quinquhua se, quinami amo huil quinquhua se in luceros (silalimes) pin cielo o in xali pan xalipan.

<sup>13</sup> Innojen moxtin miqijque quipixtataloaya inminlaneltocalisli ca Dios, mas que amo canajque inon hual Dios quinmilic neli pampa yahuiaya quinnaca. Ma yojque cataya quinami quiztataloaya huejca len Dios quinmilic neli huan laquetzaloaya inahuac in ca paquilisli quinami quipialtitaloaya se hual quilasojlaloaya. Moitaloaya quinami yehuanten yeje lacames chantitaloaya amo pa inminchan. Catanijme quinami yultataloaya pa se lali hual amo inminyaxca quiman cataloaya nican pan lalticpan. <sup>14</sup> Huan lacames hual lajtulo yojque quijtulo ca lajtol melahuac pampa quitemulo se lali hual yes inminyaxca capa huil chantisqui. <sup>15</sup> Neli unca pampa sinda Abraham huan ixolol huan ixohuiyojmes quijnamiquinijme quinami yulinijme pa in lali capa cataloaya quiman ayamo quisajque, cuaquín huil mocuepanijme pa yulilosquiaya nepa. <sup>16</sup> Ma yojque, quinami cataya, quipianijme niman míac lanequilisli pa quipialosquiaya se lali niman cuali. Quinequi quijtúa in lali pin cielo capa yahuioloaya chantilo. Yojque, Dios amo pinahua pampa yehuanten quilijque yihual unca inminDios. Inon ticmatilo, pampa yihual Dios quinchijchihulic se cali nepa capa yehuatenn yulisqui.

<sup>17</sup> Pampa Abraham quilalic ilaneltocalisli ca Dios, quitemacac ixolol Isaac quinami huendi quiman Dios quilic pa quichías yojque. Inon quilic Dios pa quimatis da quineltoacasquiaya Abraham mochi hual Dios quilic. Quema, Abraham yahuiaya quilalili Isaac quinami huendi lamictili pa Dios. <sup>18</sup> Huan yahuiaya quichía inon mas que Dios quilic Abraham pampa imiahuimes yahuioloaya lacatilo pan ipampa Isaac, yihual ihuían. <sup>19</sup> Ma yoje, yihual quineltoac Dios huil quinyuliltía yehuanten hual miqijque. Yojque, cataya quinami neli Abraham mocuepac quipiác yultataya oc seppa Isaac, pampa cataya quinami miqic.

<sup>20</sup> Pampa quilalic Isaac ilaneltocalisli ca Dios, quinotzac Dios pa quituchi-huas Jacob huan Esaú ca in hual yahuiaya quinpanu pin tonalijmes hual yahuioloaya ajsilo. <sup>21</sup> Huan pampa quilalic Jacob ilaneltocalisli ca Dios, cuaquín pan tonali hual yahuiaya miqic, quinotzac Dios pa quintuchihuas in omenten ixolomes José, mopalejtataya ca icuajtonteloni quiman mopachuc pa quimolancuacuetzilis Dios. <sup>22</sup> Pampa quilalic José ilaneltocalisli ca Dios, cuaquín pan tonali hual yahuiaya lami, yihual quinmilic icnián israelitos quinami yahuioloaya quisalo in lali Egipto, huan pampa in quinmilic pa quinhualosquiaya iumimes ca yehuanten pa quinalpachulosquiaya pin lali Israel.

<sup>23</sup> Pampa itajtzin huan inantzin Moisés quilalijque inminlaneltocalisli ca Dios, cuaquín pan tonali hual lacatic Moisés, quilatijque pa ye mesli, pampa quitanijme quinami yec se xolol cualtichín pan ipampa in cuali hual Dios quichihulic. Huan amo momajtijque pampa in hué Faraón quilic pa yesqui lamictili mochi inminxolomes lacames yehuanten in israelitos. <sup>24</sup> Pampa quilalic Moisés ilaneltocalisli ca Dios, quiman mochíac hué, amo quinequic pa quiximatilosquiaya quinami ixolol ixolol sihual in hué Faraón nepa Egipto. <sup>25</sup> Molalilic pa panus lacocoltilisli ca Dios ilacames. Amo quinequic canac paquilisli pan ipampa in lajlaculisli hual techpaquiltía pa jan se tipichin san nican pan lalticpan. <sup>26</sup> Moisés quimatini lacames quihuejuecaltilosquiaya pampa catani se ca Cristo ilacames. Ma yojque

quixijxicuni inminlahuejuecaltlisli, pampa ca Cristo Moisés quimatini yihual yahuini cana niman míac. Amo quiman canasquiaya yoje míac se hual moyaxcajtiaya ca mochi hual ipatiaya pin lali Egipto. Moisés quijituni yojque, pampa quijnamiquini inon hual Dios yahuiaya quimaca quiman yahuiaya caya ca yihual. <sup>27</sup> Pampa quilalic Moisés ilaneltocalisli ca Dios, quisac quicahuac in lali Egipto. Quicahuac amo momajtitataya mas que in hué Faraón yahuiaya cualani. Moisés quinequiaya panu lacocoltilisli quinami se hual quiztataya toTata hual amaqui ca in lacames nican huil quita.

<sup>28</sup> Pampa quilalic ilaneltocalisli ca Dios, quichíac Moisés jan quinami quilic Dios inahuac in fiesta (ilhuil) itoca pascua. Quinpehualtic yehuanten in israelitos pa quichihualosquiaya quinami quijtúa in lajtol hual quinmiliaya quinami quichihualosquiaya in fiesta, quinmajuichuc iesli in borreguito pa pani in ilalapujquimes inmincalimes, pa yoje in lanahuatini hual quisac pin cielo amo quinmictisquiaya in xolomes hual quipehualtijque inminlalacatilitlisli mochi seje lalac israelito ca isihua. Dios quitilanic in lanahuatini pa quinmictis san innojen xolomes hual quipehualtijque inminlalacatilitlisli yehuanten egipcios hual ilali unca Egipto. <sup>29</sup> Huan pampa quilalijque yehuanten in israelitos inminlaneltocalisli ca Dios, quipanahuijque in Al Huejcalan Chichiltic quinami cataloaya pan lali huaqui. Ma yojque, quiman in guaches egipcios motoliniloaya pa quipanahuilosquiaya, yehuanten moactijque.

<sup>30</sup> Pampa yehuanten in israelitos quilalijque inminlaneltocalisli ca Dios, huetzijque in cali cuajcuajtic (tepandi) hual quiyahualunijme itenco in caltilan itoca Jérico huan quitzacuac in caltilan pa camo huil calaquilosquiaya. Ma yoje, huetzijque quiman lamijque quinyahualujtinemiloaya in guaches israelitos pa chicome tonalijmes. <sup>31</sup> Pampa quilalic ilaneltocalisli ca Dios in sihual Rahab hual quipiaya icali capa calaquinijme lacames ca yihual, yihual quinnamiquic cuali in ome guaches israelitos hual ajsijque pa quitemoslosquiaya quinami quinsulahuilosquiaya yehuanten pa Jérico. Huan pampa in, amo cataya lamictili ca mochi in oc sequin pa Jérico hual amo quinel-tocaloaya Dios.

<sup>32</sup> Huan ¿quinami huil annimitzlaquetzilis inminahuac oc sequin? Pampa monequiaya pa nihuejcahuas míac pa huil annimitzlaquetziliztías quinami quichihuanijme Gedeón huan Barac huan Sansón huan Jefe huan David huan Samuel huan Dios ilajtunijmes. <sup>33</sup> Pan ipampa quinami quilalijque inminlaneltocalisli ca Dios, quinsulahuajque huejueyenten ca inminlacames. Huelitijque quinchihuiljitaloaya mochi seje pa panus lacocoltilisli quiman quichihuac in amo cuali o pa quipias in hual iyaxca quinami quijtuaya in lajtol. Dios quinmacac pa quipialosquiaya in hual yihual quinmilic neli pampa yahuiaya quinmaca. Quintzacuilijque leones pa camo quinmictilosquiaya. <sup>34</sup> Quinsehuijque tixuxlimes hueyotes. Moquixtilijti-ajque yehuanten hual yahuilooaya quinmictilo. Mochihualoaya chichahuac mas que amo quipialoaya chichualisli. Quinsulahuajque ca míac chichahualisli míac guaches capa moanaloaya. Quincholuetijque inminguaches inminlacocolinijmes. <sup>35</sup> Cataloaya sihuames hual mocuepajque quinquajque yulticate oc sepa inminxolomes hual miqijque. Huan cataloaya sequin ca ilacames Dios hual cataloaya latalanili pa yesi lamictili yulito pampa amo quinequijque pa yajmo quilalilosquiaya inminlaneltocalisli ca Dios pa yoje quinmacahualosquiaya yehuanten hual quinmictitaloaya. No, innojen ilacames Dios panujque mochi in lacocoltilisli pa yoje huil yulisqui oc sepa ca yulilisi niman cuali capa unca Dios. <sup>36</sup> Oc sequin ca Dios ilacames

quicocuhuaya inminyolo niman mías pampa quinhuitzquiliyque yehuanten hual amo quineltocaloaya Dios, huan pampa quinhuitequijque chicahuac. Huan amo inon san. Quinmilpijque ca teposli huan quintzacuajque pin calijtic. <sup>37</sup> Cataloaya sequin hual quinmictijque ca tixcalazos. Sequin quintzontequijque ca ome lajcomes ca lacotonijquimes. Panujque lacocoltisli calica lacames quincocoltijque niman chicahuac pa quinchihuיליםquiaya pa yajmo quineltocalosquiaya Dios. Lacames quinmictijque ca teposlimes calica moanalo guaches. Quipialoaya pa chantilosquiaya pa mochi cajcapa, molaquentitaloaya ca inmincuilaxlimes borregos huan chivos. Pan mías tonalijmes amo quipialoaya len quicualo huan len cunilo. Lacames hual amo quineltocaloaya Dios quincocoltiloaya, mías quinchihuילוaya tetzcuinuc. <sup>38</sup> Amo mocaquiloaya pa in lacames ej'elehuis yulilosquiaya pin lalticpan ca Dios ilajtunijmes, amo monotzaloaya pa quipialosquiaya len cuali hual Dios huil quinmacasquiaya. Huan yehuanten Dios ilajtunijmes quipialoaya pa yulilosquiaya nejnentataloaya cajcapa. Amo quipialoaya capa chantilosquiaya. Moitiloaya pan lalimes capa amaqui chantini huan noje pin lomas (tepemes). Chantiloaya pin cuevas (ostumes) o len yes coyunqui pin lalticpan. <sup>39</sup> Huan yehuanten amo canajque in hual Dios quinmilic neli pampa yahuloaya canal. Amo canajque mas que Dios technextilia pa ilajtol quinami mopaquiltia pampa yehuanten yojque quilalijque ca yihual inminlaneltocalisli. <sup>40</sup> No, amo canajque len Dios quinmilic neli yahuiaya quinmaca, pampa niman pa yina, yihual quilalic pa techmacas tehuanten len niman cuali pa yojque quiman ticayasqui lanechiculi ca yehuanten, Dios lamis tejchihuilis tehuanten huan yehuanten in hual monequi pa tiajsisqui tyesqui cuali quinami quinequi yihual huan amo pa ajsisqui yesqui quinami Dios quinequi jan yehuanten san.

## 12

### *Ma tilachixtiacan mojmosta pa hualas Jesús*

<sup>1</sup> Yojque, ticmatilo techyahualujticate yojque mías ilacames Dios hual techmachiltilo pan ipampa Dios ilajtol quinami yulinijme quilalijtataloaya inminlaneltocalisli ca yihual. Pampa inon, ma tiquijcuanican mochi hual tejtzacuilia pa camo tiyulisqui quinami Dios quinequi. Nicnequi niqijitua, ma timijcuanilican in laijlaculisli hual amo quiman huejcahua pa techtilanilis toyolo pa timoiylacusqui. Mas que techcocua toyolo huan tocuero mías, ma tipanucan mochi in amo cuali hual tejchihuילו lacames pampa tictequipanuililo Dios. Unca quinami timolalujticate pan se laluxtilisli pan se ojli hual Dios techlalilic. <sup>2</sup> Quema, ma timolalucan quinami tiquizticate Jesús. Yihual tejchihuילו in ojli hual techhuica ca Dios. Huan quilamic jan quinami monequiaya pa yoje yes se ojli cuali capa ticlalilosquiaya tolaneltocalisli ca yihual. Mas que quicocoltijque pa yojque miqic pan in cuahuil, ma yoje yihual panuc inon huan amo quixixxicuc, amo quimonotzilic quinami quipinahuajtijque pa yoje miquisquiaya, pampa yihual quimatiaya Dios yahuiaya quimaca mías paquilisli pan ipampa inon hual tejchihuילו pin cuahuil. Huan axan yehuatica pa ima cuali Dios pin cielo (ilhuicac) quipalejtica pa huelitis.

<sup>3</sup> Xiquijnamiquican yihual quinami momacahuilic panuc in amo cuali hual quichihuilityque lacames laijlaculi, jlen amo quilijque huan quichihuilityque cualantataloaya ca yihual huan ilajtomes! Sinda anquijnamiqia inon, cuaquinon in anmitzpalehuis pa camo ansiahuis. Huan anmitzpalehuis pa camo anquipolus anmolanequilisli pa anmoyolo pa anquitequipanuilis.

<sup>4</sup> Annotolinia pa anmotzacuilis pa camo anquichias laijlaculisli. Ma yojque,

xiquijnamiquican pampa ayamo anquiapiaya pa anajsis anmiquis pampa inon. <sup>5</sup> Huan ¿cuajnesi anquilcahuac Dios ilajtol lajcuiluli calica anmijchicahualtia anmitznoztica quinami ixolomes? Quijtúa, quil:

Noxól, amo xiquita quinami len tipichin quiman yes in Tata mitzmaxtis chichahuac quinami monequi pa tiyulis,

huan amo xicpolu moyolo quiman yes mitzajuas huan mitzcocoltis.

<sup>6</sup> Unca pampa in Tata quinextilia chichahuac quinami monequi pa yulis mochi sejse hual quilasoja.

Huan quiman monequi, yihual quinmajua ca lacocoltilisli mochi se hual cana quinami ixolol, inon quichía pampa quilasoja.

<sup>7</sup> Anquiá pa anmopepenialtis in la'ajualisli huan lacocoltilisli sinda in Tata anmitznextilia chichahuac quinami monequi pa anyulis. Yojque yihual Dios anmijchihuilijtica quinami ixolomes. Anquimati pampa amo unca se itajtzin hual amo quinextilia chichahuac ixolol pa quimatis quinami monequi pa yulis. <sup>8</sup> Huan sinda anunca lacames hual toTajtzin amo quiman anmitznextilia chichahuac quinami monequi pa anyulis, cuaquinon anunca quinami xolomes hual lacatijque pan ipampa se lalac hual amo monamictia ca in sihual inminnantzin, yihual in lalac amo quinnequi in xolomes. Moxtin hual ixolomes Dios panulo len calica Dios quinnextilia chichahuac quinami monequi pa yulisqui. <sup>9</sup> Huan amo inon san. Noje tiquinpialo nican pan lalticpan totajtzitzian hual technextiliniyme chichahuac quinami monequi pa tiyulisqui, huan ticmatiniyme timomajtilo inminlaixpan. Monequi pa timolalisqui ca niman miac lanequilisli pa ticmacahuiltisqui pa Dios huelitis pa tehuanten. Yihual unca itajtzin toyolo, huan yojque tyulisqui cuali.

<sup>10</sup> Quema, unca niman cuali pa yojque ticchihuasqui, pampa totajtzitzian nican pan lalticpan technextililoaya chichahuac quinami quinequiloaya pa tiyulilosquiaya pa je tipichin. Inon tejchihuiliiloaya yojque san quinami yehuanten quitaloaya cuali. Huan quiman Dios technextilia chichahuac quinami monequi pa tiyulisqui, inon quichía pa tejchihuilis cuali pa yoje tiajsisqui tiyesqui chipahuac quinami Dios, jan quinami monequi pa yesqui ilacames. <sup>11</sup> Pa nadita techcocoltia quiman yes ticate lanextili quinami monequi pa tiyulisqui. Amo tiquixtocalo quiman yes techpanúa yojque. Ma yoje, quiman panulo yehuanten hual yojque cate lanextili, cuaquin quimatilo yulilo yojque cuali quinami monequi pa yulisqui Dios ilacames, huan pampín yulilo ca mosehuilisli pa inminyolo.

### *Moitas pa polehuilisli se hual amo quinequi quineltoqa Dios ilajtol*

<sup>12</sup> Yojque, mochi sejse ximochicahualtican pa huil anquichias len Dios quilalic pa amhuanten. Xicayacan chichahuac quiman yes anpanajtica lacocoltilisli o len etic. Yes quinami anquinchicahualtica anmomajmajuan huan anmolancuajmes. <sup>13</sup> Huan xinejnemican melahuac pan iojli Dios pa yoje huil anquinpalehuis yehuanten hual nejnemilo chirengojtialo pa iojli Dios, quinequi quijtúa yehuanten hual amo quimatilo cuali len quinequi quijtúa Dios ilamaxtilisli. Huan pampín quinequilo mijcuanilo pa camo mocahuas pin ojli, quinami se hual nejnemi chirengo huetzi huan mococoltia. Yes cuali sinda anquinpalehuis pa mocahuasqui cuali pan iojli Dios, cuaquinon yesqui yojque quinami hual chirengojtiahuiloaya huan cuaquin pajtijque.

<sup>14</sup> Ximotolinican pa anyulis ca mosehuilisli ca moxtin, huan ximotolinican pa anyulis chipahuac pa anmoyolo anquitequipanuiljtica in Tata. Sinda amo yuli se yojque, cuaquin amo quitas in Tata pa huil yulis ca yihual.

<sup>15</sup> Ximoiztiacan pa camo cayas cuajnesi capa amhuanten se hual yajmo ajsis canas in cuali hual Dios quichihuilía pa quipalehuis. Huan sinda capa amhuanten cayas se hual quichías amo cuali, mas que yihual se san, ma yoje yihual anmitzmaxtía se ojli amo cuali. Pampín míac ca amhuanten pehuasqui quichihuasqui amo cuali. Se hual quichía inon unca quinami se lalhuayol chichic hual moscaltía huan quiseumana pajli amo cuali pa mochi cajcapa. <sup>16</sup> Ma camo caya se capa amhuanten hual quinmana sihuames, huan se hual quiqtúa pampa jan monotza san inon hual huil ticanalo nican pan lalticpan, huan quiqtúa pampa amo monotza nindeno hual unca iyaxca Dios. Cataya yojque Esaú. Yihual quinamacac hual cataya iyaxca pa quiptías, pampa yihual yec icni hué ca innojen ome ixolomes Isaac. Quema, quinamacac pa len quinequiaya quicua san. <sup>17</sup> Ma camo caya se capa amhuanten quinami yihual. Anquimati quinami quiman panujque tonalijmes, quinequiaya cana in hual iyaxca itajtzin hual itajtzin quilajlanisquiaya Dios pa quimacasquiaya pa yes iyaxca Esaú, huan itajtzin yajmo quinequic. Yojque, pampa quinamacac Esaú in hual iyaxca, yajmo quicahuilic quinami yihual quipalásquiaya iyolo mas que yihual quitemuc chocatataya quinami huil canasquiaya oc sejpá.

<sup>18</sup> Xiyultiacan anquilalijtica anmolaneltocalisli ca in Tata san, pampa amo anmoajxiltic ca Dios quinami yehuanten in israelitos pa yina. Yehuanten moajxiltijque ca len hual huil quimatoca se. Nepa cataya tixuxli hué milintataya, cataya laticumactilisli hual niman tetzahuac, huan cataya malacal ijyecal ijyecatataya. <sup>19</sup> Noje cataya ixahuanilisli se lancaquetzaloni latzotzotataya. Huan mocaquic se lajtol quijtutataya lajtomes chijchicahuac. Quiman quinqaquiique, quitemachijque ca mochi inminyolo pa Dios yajmo quiman quinnotzasquiaya ca lajtomes. <sup>20</sup> Cataya pampa amo huil canajque chichahuilisli pa quicaquisqui in hual quiqtuc Dios ilajtol quiman quinmilic, quil: “Sinda quimatoca in loma (tepel) san se yulijquil, anquiptías pa anquimictis ca tixcalazos.” <sup>21</sup> Quema, in hual quiztataloaya quinmajtic niman míac huan pampa in, yihual Moisés quiqtuc, quil: “Nimacajsijtica míac huan niyuyucaticá.”

<sup>22</sup> Amhuanten amo anmoajxiltic ca in iloma hué Dios quinami yehuanten. Anmoajxiltic ca Dios hual yuli. Yihual nepa pa in loma Sión pin cielo capa unca Dios icaltlan hué. Anhualac ca capic cate míac ilanahuatinijmes pin cielo, ilanahuatinijmes hual amo huil quinpuhua se quichi cate. Yehuanten monechicujticate ca paquilisli hué quimolancuacuetzilijticate Dios. <sup>23</sup> Quema, anmoajxiltic ca Dios, anhualajtataya ca ilanechiculisli yehuanten ixolomes Dios hual mocuhuilic pa quinmacas len niman huejué hual inminyaxca. Dios quiptía lajcuiluli inmintocajmes pin cielo. Anmoajxiltic ca Dios hual unca in se hual unca iyaxca pa quinchihuilis moxtin quinami quinmahuilúa pa quinami yulinijme pan lalticpan. Huan anmoajxiltic ca inminyolojmes lacames hual yulijque quichijtataloaya quinami quiqtúa Dios ilajtomes. Cate lacames hual axcan cate cuali jan quinami Dios quinequi. <sup>24</sup> Huan anmoajxiltic ca Jesús. Pan ipampa yihual unca Dios ilajtulisli yancuic pa lacames. Quema, tiajsijque ca capic unca iesli la'ajuichuli pa quinchipahuilis inminyolo lacames. Huan Jesucristo iesli technextilía lejlen niman cuajcuali. Amo huil ajsisi cayasi yojque cuajcuali innojen hual technextilía Abel iesli.

<sup>25</sup> Ximoiztiacan pa anquicaquis cuali aqui anmitzilijtica mochi inon. Xijcaquican, pampa sinda amo moquixtilijque pin polehuilisli quiman amo



quinequijque quicaquijque yihual hual quinnotzac nican pan lalticpan, cuaquinon neli unca tehuanten amo timoquixtilisqui pin polehuilisli sinda amo ticnequilo tijaquilo yihual hual technotza hual unca pin cielo (il-huicac). <sup>26</sup> Pa yina quiman lajtuc Dios pin loma (tepel) Sinaí, quitzejtzeluc in lali ca ilajtol. Huan axcan quijtuc neli, quil: “Ajsis oc se tonali quiman nictzejtzeluc in cielos noje, amo jan in lalticpan san.” <sup>27</sup> In lajtomes “Ajsis oc se tonali” technextilía pampa yahui quijcuanía mochi hual huil cayas latzejtzeluli. In quinequi quijtúa mochi hual yihual Dios quichíac. Inon yahui quichía pa yoje mocahuas san in hual amo huil yes latzejtzeluli pa quixitinis. <sup>28</sup> Pampa in, ma ticsehuican Dios pampa tialo ticpialo len lahuellitlisli huan cali capa tichantisqui hual amo huil yes latzejtzeluli, amo quiman xitinis, inon Dios techmacas. Huan ma ticmolancuacuetzilican yihual ca in lasojlalisli huan momajtilisli hual yihual quita ca paquilisli. <sup>29</sup> Unca pampa toDios unca quinami se tixuxli hual quichichinúa mochi pa yajmo moitas.

## 13

### *Inon unca quinami se quipaquiltía Dios*

<sup>1</sup> Xiyultiacan anmolasojlatica quinami monequi molasojlalo lacames inmicnían. <sup>2</sup> Amo xiquilcahuacan pa anquinmanas pa anmochan yehuanten hual ajsilo ca amhuanten, pampa yojque sequin quinmanajque ilanahuatinijmes in cielo huan amo quimatijque pampa yeje ilanahuatinijmes in cielo. <sup>3</sup> Xiquinmijnamiquican tocnían hual cate latzacuali pin calijtic. Xiquinmijnamiquican quinami ancataya latzacuali pin calijtic ca yehuanten. Xiquinmijnamiquican hual aquinojen quintojtocaticate pa quinchihuilisqui miac tetzcuinuc yehuanten hual amo ilacames Dios, pampa amhuanten noje anunca pa anmocuero huan inon cuajnesi anmitzpanus jan quinami quinpanujtica yehuanten.

<sup>4</sup> Ma lajtucan pa inmínyolo moxtin ca lasojlalisli inahuac monamictilisli, huan ma mocahua ilapexli se jan pa yihual huan in oc se san calica monamictic. Ma camo quiman monilucan ca oc se quiman yulticate in omenten, pampa Dios quintilanis pa panusqui lacocoltisli yehuanten hual monamictijque huan ma yoje monilulo ca oc se. Huan yojque Dios quinchihuilis yehuanten hual amo monamictilo huan ma yoje monilulo.

<sup>5</sup> Xiyén (Xiyecan) lacames hual amo anyuli anquinectica miac tomin, huan xicayacan ca paquilisli ca in hual anquipía, pampa Dios quijtuc, quil: “Amo quiman nimijcuanis pa camo nicayas ca amhuanten, huan amo quiman annimitzcajcahuas.” <sup>6</sup> Yojque, huil tiquijtulo ticmazticate pa toyolo inon:

In Tata unca hual nechpalehuía; amo nimomajtis.

¿Len amo cuali huil nejchihuililo lacames?

Amo nimomajtis inahuac len huil nejchihuilis se lalac aqui yes.

<sup>7</sup> Xiquinmijnamiquican yehuanten hual anmitzlaicanalo pan iojli Dios, yehuanten hual anmitzilijque ilajtol Dios. Xiquinmijnamiquican in cuali hual anquipía pampa yehuanten yulijque anmitznexiltijticate Dios ilajtol. Huan xiyultiacan anquineltocatica in Tata quinami quichihualo yehuanten.

<sup>8</sup> Jesucristo yec yalhua jan quinami unca axcan huan amo mocahuas pa yes jan yojque. <sup>9</sup> Amo xilamacahuiltican pa anmitzlaicanasqui pa anmijcuanis pan in Tata iojli yehuanten hual quimaxtilo oc se huan oc se lamaxtilisli hual amo cate jan quinami Cristo ilamaxtilisli. Inon tiquijtulo pampa san monequi pa se mochicahualtilis iyolo pan ipampa Dios in cuali hual tejchihuilía. Ma camo quijtu se pa iyolo pampa huil mochicahualtilía iyolo



pan ipampa len quicua. Yehuanten hual quilalilo inminlaneltoalisli ca in lamaxtilisli, Dios amo quinmaca len cuali jan pampa yulilo quichijtcate quinami quijtúa se lamaxtilisli quinami inon.

<sup>10</sup> Pa in tiopistas judíos cate inminyaxca pa quipiasqui mochi seise ilajco in huendi hual unca pani capa quilalilo ilaixpan Dios pin lasojli calijtic. Tehuanten ticpialo quinami huendi hual amo unca inminyaxca pa quipiasqui inminlajco yehuanten hual quimolancuacuetzililo Dios quinami in judíos o aquinojen yesqui hual amo quimolancuacuetzililo Cristo. <sup>11</sup> In yulijquimes mijquimes inminesli in tiopista hué quihualicac pin lasojli calijtic quinami huendi pa laijlaculisli. Cuaquín yihual quinchichinuaya innojen mijquimes pa iquiahuac in lajcotiyan capa chantitataloaya yehuanten in israelitos. <sup>12</sup> Huan jan yojque Jesús panuc lacocoltilisli pa quiahuac Jerusalén pa yoje quinchipahuilis lacames inminyolo pan ipampa yihual iesli. Yoje Dios huil quinmana lacames pa yesqui iyaxca. <sup>13</sup> Pampa inon ma tiacan ca yihual pa quiahuac in caltilan, nicnequi niquijtúa, ma tiacan ca yihual timijcuanticate pa como tiquintocasi moxtin hual quimaxtilo len yes hual amo unca quinami Cristo ilamaxtilisli. Quema, ma tiacan ca yihual ca chichualisli pa toyolo pa timopepenialtisqui lahuejuecaltisli pa yihual. <sup>14</sup> Ticchihualo yojque pampa nican pan lalticpan amo ticpialo tochan hual amo mocahua pa huejcahuas. Tictémulo ticchixticate caltilan hual yes tochan, in hual yahui caya capa tichantisqui. <sup>15</sup> Pan ipampa Cristo, ma ticualicacan huendi pa pani, nepa capa Dios unca. In huendi unca tolajtomes hual tiquinlaquetzililo oc sequín pa quimatisqui quinami Dios unca niman hué. <sup>16</sup> Amo ximocahuacan pa anquijnamiquis anquinchihuilis cuali oc sequín. Huan amo ximocahuacan pa anquinxiluilis len anquipía ca oc sequín hual monequi pa quipiasqui. Inon cate quinami huendis hual quipaquiltulo Dios.

<sup>17</sup> Xiquinneltocacan yehuanten hual anmitzlaicanalo pan Dios iojli, huan xiclalican pa anquichías quinami anmitznextililo, pampa anmitzlachilijtcate anmoyulilisli quinami quichihualo lacames hual quipiasqui quinananquilsiqui Dios quinami anmitziztiajque. Xiyulican xicchijtiacan yojque quinami lacames hual quinhueliltisqui pa quinanquilsiqui Dios ca paquilisli huan amo ca inminyolo quincocujtica. Sinda yojque quincocuhuaya inminyolo, cuaquín inon amo anmitzpalehuiaya amhuanten.

<sup>18</sup> Xiclajlanican Dios pa tehuanten, pampa tolajmatilisli pa toyolo calica ticmatilo len unca cuali huan len amo unca cuali techilía pampa tiyulticate cuali. Ticnequilo ticchihualo mochi cuali yojque quinami monequi pa lacames quichihuasqui. <sup>19</sup> Annimitzyantía pa anquilajlanis Dios pa nehual pa yoje amo nihuejcahuas míac tonalijmes pa nihualas nicayas ca amhuanten, pa huil annehpias ca amhuanten.

### *Latuchihualisli huan lapialtilisli pa quilamis in amal*

<sup>20</sup> Huan axcan, in Dios hual quimaca mosehuilisli pa toyolo ma caya ca amhuanten. Yihual in Dios hual quiyuliltic toTeco Jesús capa cataya mictataya pin mijquimes. Yihual Jesús unca in hué hual quinmiztia Dios iborregos, quinequi quijtúa yehuanten ilacames Dios. Yihual in laitani, pan ipampa iesli quichíac in lajtulisli hual techquixtis pin topolehuilisli. In lajtulisli axcan unca huan amo quiman lamis huejcahuas. <sup>21</sup> Quema, ma anmitzmaca in Dios mochi hual unca cuali hual anmitzhueliltis pa anquichías mochi hual yihual quinequi. Inon anquichías san sinda yihual Dios quitequipanultía lajtic amhuanten inon hual quipaquiltía. Inon quichías

pan ipampa Jesucristo. ¡Pa yihual ma caya chichahualisli niman hué huan cualtichin pa xixihuimes hual amo quiman lamisqui! Yojque ma ye.

<sup>22</sup> Nocñan, annimitzilijtica pa anmoyolo, xiquijnamiquican ca mochi lanequilisli in hual annimitzijcuiluic pa annimitznexstlisquiaya. Neli amo annimitzijcuiluic se amal niman huejcanic. <sup>23</sup> Xicmatican pampa tocní Timoteo cataya lamacahuali. Sinda amo huejcahuas pa hualas ca niqúic, cuaquín huan yihual antimitzitasqui antimitzpaxaluilijtcate.

<sup>24</sup> Xiquinpialtican moxtin yehuanten hual anmitzlaicanalo amhuanten pan iojli Dios, huan xiquinpialtican moxtin ilacames Dios. Yehuanten pin lali Italia anmitzpialtilo.

<sup>25</sup> Ma caya ca amhuanten in cuali hual san Dios tejchihuilía. Yoque ma ye.

## In amal hual quijcuiluc Santiago

*Santiago quinmijcuilulía in laneltocanjimes hual chantilo cajcapa pa mochi in lalticpan*

<sup>1</sup> Nehual Santiago niunca se itequipanujquil Dios huan in Tata Jesucristo. Annimitzpialtía amhuanten in laneltocanjimes hual anunca ca inminmi-ahuimes in lacames hual quinpehualtije in israelitos. Huan noje anunca lasemanali anchantitica capa yehuanten hual amo israelitos.

*In lajmatilisli hual techajxiltilía Dios*

<sup>2</sup> Nocnián, xiquitacan mochi quinami paquilisli sinda anmitzajsis in tonali hual anpanus lacocoltilisli hual anmitzajsilo quijquiman. <sup>3</sup> Anquimati pampa inon unca quinami Dios monextilía huan anmitznextilía quinami anquineltocatica yihual. Yoje anmonextilía anmopepenialtía pa como anmocaahas pa anquineltocas. <sup>4</sup> Huan ximopepenialtitiacan pa yoje anajnsi anyes lacames hual quipiási mochi laneltocalisli huan lajmatilisli. Yoje anquipías mochi in hual monequi pa anquipías pa anyulis quinami quinequi Cristo.

<sup>5</sup> Huan sinda se ca amhuanten amo quipía míac lajmatilisli, ma quilajlani Dios hual quixtoca quimaca míac yehuanten hual quilajlanilo, huan amo quinmajua quiman quimacatica. Quema, Dios quimacas. <sup>6</sup> Ma yoje, sinda se quilajlanis Dios pa len, ma quilajlani quineltocatica pampa Dios yahui quimaca. Ma como quimahuili nindeno. Yihual hual quimahuilía unca quinami in al pin al huejcalan hual in iyecal quihuicatica huan quihual-icatica. In se quijtus, quil: “Cuajnesi Dios nechmacas”, cuaquín quijtus, quil: “Cuajnesi amo nechmacas.” <sup>7</sup> Pampa in, ma como quijtu pa iyolo in se pampa yahui cana len hual Dios quimacas. <sup>8</sup> Quema, in se unca quinami quipía ome lajtulisli hual in se amo quijtúa quinami in oc se. Amo huil molalía pa quichijtías len pa laquisas quichías, amo mocahua pa quipalas ilajnamiquilisli.

<sup>9</sup> Axan, ma moixtoca se tocní hual amo quipía len calica moixtocas. Quema, ma moixtoca pampa Dios quichíac hué, ma moixtoca pampa Dios quimacac inon hual quipía. <sup>10</sup> Huan ma moixtoca se tocní hual quipía míac tomin pampa quimati amo quipía quinami moixtocas pan ipampa in míac hual quipía. Quimati pampa in míac hual quipía unca quinami xuchimes huan sacal hual pilinilo. <sup>11</sup> Quisa in tonali huan pehua tona, quihuactía in sacal huan huetzilo ixuchimes, huan umpa lami quinami cataloaya cualtichin. Yoique cate yihual hual quipía míac. Noje capa yuli quichijtica itequipanulisli, ajsis se tonali huan yajmo nesis. Huan ma moixtoca se tocní hual quipía míac hual yehuanten pin lalticpan amo moixtocalosquiaya sinda quipialoaya inon. Niquijtúa, ma moixtoca pampa quipía innojen hual Dios quita ipati hual yehuanten pin lalticpan quixixiculo. Se tocní hual quipía míac tomin quimati yihual unca quinami ixuchimes in sacal hual pilinilo, quimati pampa yihual miquis.

*Tipanulo len amo cuali huan unca latilanili toyolo pa tejchihualtis amo cuali*

<sup>12</sup> Ma quipía paquilisli in se hual panúa lacocoltilisli huan amo quimac-ahuilía pa quisulahuas. Se tonali quisas pa in lacocoltilisli calica Dios

quichihuilía pa quimatis sinda neli quineltoca. Cuaquinon cayas iyaxca pa yulis quipixtica ca Dios yulilislí hual amo quiman lamis. Dios quijtúa neli pampa quimacas inon yehuanten hual quilasojlalo. <sup>13</sup> Ma yoje, quiman yes unca latilanili se iyolo pa quichías len amo cuali, ma camo quijtu, quil: “Dios nechtilanilijtica noyolo.” Dios amo quinami inon, amo quiman quitilanilis Dios se iyolo pa quichías laijlaculisli. Amo unca nindeno hual huil quitilanilis Dios iyolo pa quichías len amo cuali. <sup>14</sup> Se quipía latilanili iyolo pa quichías len amo cuali sinda quimacahuiltía pa quisulahuas iyolo in hual quinequi quichía. <sup>15</sup> Cuaquinon, in amo cuali hual quinequi quichía se mochía laijlaculisli. Quinequis quichiuas oc sejsa huan oc sejsa míac huan cuaquinon amo huil quijtúa pa iyolo oc se lachihualisli. Unca quinami quiman pilhuatica se sihual, in xolol mochijtia hué huan cuaquinon quilacatitlis in sihual. Yoje unca ca in laijlaculisli hual se quinequi quichía. Quinectía quichía huan quiman lamis quichías, unca quinami yihual quipilhuatica (quichijtica pa lacatis) laijlaculisli. Cuaquinon in laijlaculisli moyaxcajtília in se huan umpa quisulahuas. Yoique moxilus pa camo cayas ca Dios huan amo quiman mocuepas ca Dios pan ipampa miqulislí.

<sup>16</sup> Amo ximocuaajcuamanacan, lasojli nocnían. Dios amo quiman quitilanilía se iyolo pa quichías laijlaculisli. <sup>17</sup> Yihual quichijchíac mochi in lahuilislí hual techmáca in tonali huan in luceros (silalimes) huan in lahuilislí hual ticpialo lajtic tehuanten toyolo. Huan yihual quitemuhilo pa tehuanten mochi innojen cuali hual amo quipialo len hual amo cuali, mochi innojen hual quinequi techmáca. Huan yihual Dios amo quinami in tonali huan in silalimes. Yihual ilahuilislí amo quiman mopala quinami in tonali mopala sinda quitzacuilis in mextemil. <sup>18</sup> Dios quichíac quinami quinequiaya, tejchi-huilic pa tiyesi ixolomes. Inon tejchihuilic pan ipampa quinami tijcaquijque ilajtol hual unca melahuac. Yoique Dios tejchihuilíaya pa tiyesi in niman cuali ca mochi hual yihual quinchíac.

### *In se tequipanulisli pa Dios hual unca melahuac*

<sup>19</sup> Xicmatican inon, lasojli nocnían. Ma ejsehuican moxtin pa lacaquisi, ma camo ejsehuican pa lajtus, mas que quimatilo. Huan ma camo ejsehuican pa cualanisi. <sup>20</sup> Lacames hual cualanilo amo quichihualo len quipaquitilo Dios sinda cualantiquisalo. <sup>21</sup> Yoje, ximocahuacan pa camo anquinequis anquichías in míac amo cuali hual anmoyolo quinequi anmijchihualtía. Monequi pa anyes quinami lacames hual amo quimatilo míac. Xicneltocan Dios ilajtol hual yihual cajxiltía pa anmoyolo. In lajtol huil anmitzquixtía pa camo anpolehuis pampa anquichíac laijlaculisli.

<sup>22</sup> Huan xicchihuacan len quijtúa ilajtol Dios. Amo jan xijcaquican san, pampa yoique anmocuaajcuamana amhuanten, anquilcahua len anquicaqui. <sup>23</sup> Sinda quicaqui se in lajtol huan amo quichihua len quijtúa, cuaquín yihual unca quinami se lalac hual moita pan se espejo. Quita pa iixco ixurupupus huan idomutzitos. <sup>24</sup> Moita huan mohuica, huan jan ajnaxcan quilcahua in xurupupus huan domutzitos pan iixco. <sup>25</sup> Ma yoje, aqui hual momaxtía huan quicaqui in lajtol hual quimaca Dios huan Jesucristo huan quijnamictía pa quineltocas, yoique yihual quimati in lajtol quijtúa mochi hual unca cuali. Huan sinda quimacahuiltía pa calaquis pa iyolo pa yoje yihual quichías len quilía, cuaquín yoje in lajtol quimacahua pa quinequis quichías len quipaquitía Dios. Huan in se quipías paquilislí ca mochi hual quichías, pampa quineltoca ca mochi iyolo.

<sup>26</sup> Cuajnesi se quijtúa pa iyolo pampa momajtía ilaixpan Dios pan ipampa quinami laquetza ca Dios ilajtomes huan momaxtía huan quichía oc sequin lachihualisli hual lacames quichihualo pa quimolancuacuetzilisi Dios. Ma yoje, sinda amo quimati motzacuilía pa camo quijtus len amo cuali, ca in mocuajcuamantica pa iyolo yihual. Mochi inon hual quichía amo quimonotzilía nindeno, pampa amo quipaquilía Dios. <sup>27</sup> Jan pan ipampa inon huil ticmatilo sinda se neli quimati momajtía ilaixpan Dios toTajtzin: In se quinpalehuía in icnombres huan in sihuames hual inminhuían quiman panujticate in amo cuali. Noje quimacahuilía Dios pa quichipahuilis iyolo mojmosta pa quiquixtilis mochi in amo cuali hual quichía yultica nican pin lalticpán. Yoje Dios amo quitilis nindeno amo cuali sinda se yoje yuli momajtitica ilaixpan Dios. Quema, Dios quitas chipahuac quinami quitequipanuilis in se.

## 2

### *Monequi pa camo tiqitasi cuali se tozni huan oc se tozni amo yoje cuali*

<sup>1</sup> Nocnían, anquinelto ca toTata Jesucristo hual quipía ichicahualisli hual laixpela quinami Dios. Pampa in, amo xiquinchihuilican sequin cuali huan oc sequin amo yoje cuali. <sup>2</sup> Nican unca se lanextilisli. Cuajnesi calaquis pa anmitzpaxaluilis capa anmonechicujtica se hué local hual quipía se anillo lachihuali ca oro pa ixerixa huan molaquentitica ca se tzotzomajli cualtichin. Huan cuajnesi calaquis se dangochito noje pa anmitzpaxaluilis. <sup>3</sup> Cuaquinon, anquitas cuali in hué lalaquentili cualtichin huan anquilis: “Ximosehui, ximolali pa in icpali cualtichin”, huan anquilis in dangochito: “Ximoquetza o ximolali nepa pan lali.” <sup>4</sup> Cuaquín sinda anquichía yojque, anquichijtica amo cuali pa amhuanten nojen. Unca pampa anmochijtica quinami cataya anmoyaxca pa anquixtocas o amo anquixtocas quinami nesilo lacames huan amo anquijnamiquía quinami Dios quinmita.

<sup>5</sup> Xichcaquican, lasojli nocnían, ma annimitzljajlani inon: ¿Amo quinlajtultic Dios yehuanten pin lalticpán hual amo quipialo míac hual quimatilo cuali quinami quilalilo inminlanelto calisli ca Dios? ¿Amo quinlajtultic pa huelitis ca yihual? In unca iyaxca Dios hual yihual neli quilía yahui quinmaca aquinojen hual quilasojlalo. <sup>6</sup> Huan amhuanten anquixixicúa in local hual amo quipía míac tomin. ¿Amo cate lacames hual quipialo míac tomin yehuanten hual anmitzcayayahua huan amijchihuilía míac amo cuali? ¿Amo cate yehuanten hual anmitzhuilantialo inminlaixpan in la'ajuanijes? <sup>7</sup> ¿Amo cate yehuanten hual quihuejuecaltilo itoca lasojli Jesucristo hual ca itoca timofocalo tehuanten?

<sup>8</sup> Sinda neli anyuli anquichijtica quinami quijtúa ilajtol in hué Jesucristo, in lajtol lajcuiluli hual quijtúa: “Ticlasojlas yihual hual moita monahuac jan quinami timolosojla tehuía”, cuaquín anquichía cuali. <sup>9</sup> Ma yoje, sinda anquita cuali se hual quipía míac tomin huan amo anquita yoje se hual amo quipía míac, cuaquín yoje anquichijtica laijlaculisli. In lajtol quinextía quinami amhuanten anunca lacames laijlaculi. <sup>10</sup> In unca pampa aqui hual quinelto ca mochi in lajtol, huan ma yoje quichía len tipichin amo cuali hual in lajtol quijtúa pa camo quichías, cuaquinon yihual amo quinelto ca mochi in lajtol. Huan pampa in, Dios quimotexpahuilis pampa amo quichiac len quijtúa in lajtol. <sup>11</sup> Dios quijtuc, quil: “Amo ticanas sihual hual amo mosihua.” Huan noje quijtuc, quil: “Amo tiquinmictis lacames.” Axcán, sinda amo ticana sihual hual amo mosihua huan ma yoje ticmictía se, cuaquín

tiunca laijlaculi, amo ticneltocatica in lajtol. <sup>12</sup> Yoje, xilajtucan huan xilachihuacan quinami yehuanten hual quimatilo, pampa se tonali Dios yahui anmitzmozexpahuilía. Huan in lajtol calica anmitzmozexpahuilis unca in lajtol hual anmitznequiltis anquichías len quipaquiltía Dios. <sup>13</sup> Quiman Dios quimozexpahuilía se, yihual amo quicnilis sinda in se amo laicnilíaya pin tonalijmes hual yuliaya pan lalticpan. Sinda laicnilía se quiman yultica pan lalticpan, cuaquín Dios amo quimozexpahuilía pampa Dios quimati laicnilía.

### *Laneltocalisli huan lachihualisli*

<sup>14</sup> Nocnián, ¿len monotza sinda quijtúa se, quil: “Nicneltoca Jesucristo”, huan ma yoje amo quichía len unca cuali? Amo monotza nindeno. ¿Cuajnesi huil moquixtilis pa camo polehuis sinda unca yoje laijlaculi jan pampa quijtúa yihual quíneltoca Cristo san? No, amo huil. <sup>15</sup> Cuajnesi ajsis capa amhuanten se tocní lalac o sihual dangochito, monectica pa quipías len quicuas pa in tonali. <sup>16</sup> Cuaquinon se ca amhuanten quilis, quil: “Xía, xicana len calica timolaquentis cuali huan xipachihui”, huan ma yoje amo quimaca innojen hual monequi pa quipías. Axcán, ¿len monotza in? <sup>17</sup> Yoje, sinda se quijtúa pampa quíneltoca Cristo, huan ma yoje, amo quinchihuilía cuali oc sequin, cuaquín polehuic ilaneltocalisli.

<sup>18</sup> Axcán cuajnesi se yahui quijtúa, quil: “Tehual tiquijtúa ticneltoca Cristo huan nehual niquinchihuilía cuali oc sequin. Xichnextili quinami ticneltoca Cristo mas que amo tiquinchihuilía cuali oc sequin, huan nehual nimitznex-tilis quinami nicneltoca Cristo pan ipampa in cuali hual niquinchihuilía oc sequin.” <sup>19</sup> Ticneltoca pampa unca jan se Dios san. Ticchía cuali. Huan yoje quíneltocalo in ijyecames ej'elehuis huan yuyucalo pampa momajtilo. <sup>20</sup> Tehual hual tilajtúa quinami se hual amo laijnamiquía, ¿ticnequi pa nimitznex-tilis quinami mocuajcuamantica se hual quijtúa pampa quíneltoca Cristo huan ma yoje amo lachihuilía cuali? Cuaquín nimitznex-tilis. <sup>21</sup> Dios canac Abraham, quijtc pampa amo cataya laijlaculi pampa Abraham quichíac quinami yihual Dios quinequic pa quichiasquiaya. Catani quiman Abraham quilalic quinami huendi ixolol Isaac pani capa quilalilo huendi. <sup>22</sup> Tiquita quinami Abraham ilaneltocalisli quichihualtic in hual Dios quilic. Yoje Abraham quinex-tilic quinami neli yihual quíneltocac Dios pan ipampa inon hual quichíac. <sup>23</sup> Huan yoje lamic mochíac Dios ilajtol lajcuiluli, quijtúa, quil: “Abraham quíneltocac Dios. Pampa in, Dios quítac Abraham quinami se lalac hual amo quiipiaya laijlaculisli.” Huan Abraham yoje yec latocay-altili quinami ilasojli Dios.

<sup>24</sup> Yoje, anquimati pampa Dios quita cuali se quiman quita in hual in se quichía pampa quíneltoca Dios, huan amo jan sinda quijtúa pampa quíneltoca Dios unca yultica. <sup>25</sup> Huan noje Dios quítac Rahab quinami se hual amo laijlaculi. Yihual Rahab yec in sihual hual quinmacahuiltini pa lacames calaquilosquiaya pa ichan. Mas que Rahab yec sihual hual yojque quichihuani, ma yoje Dios quítac cuali. Cataya pampa yihual quinlatic in guaches israelitos pa ichan pa camo quinmitalosquiaya yehuanten pa icaltin hual quintemuloaya. Cuaquinon quintilanic in guaches israelitos pa oc se ojli pa moquixtitiyasi pa camo quinmitalosquiaya. <sup>26</sup> Yoje, amo monotza pa se quijtúa pampa yihual quíneltoca pampa Dios yuli huan ma yoje amo quinchihuilía cuali oc sequin. Unca quinami polehuic ilaneltocalisli, quinami unca se icuerpo hual yajmo quipía yulilislí.

## 3

*Tonejnepil*

<sup>1</sup> Nocrían, ma camo yén (yecan) míac lamaxtinijmes ca amhuanten, pampa anquimati tehuanten in lamaxtinijmes Dios techmotexpahuilis niman chicahuac sinda amo tilamaxtilo cuali. <sup>2</sup> Timoxtin timoixpolulo míac, sejpa huan oc sejpa. Huan sinda unca se hual amo moixpolúa pan ipampa in hual quijtúa, cuaquín in se quimati mochihualtía len cuali. <sup>3</sup> Ticlalilo se teposli lajtic icamac se caballo. In techneltocaltíla in caballo, yojque ticmalinililo mochi icuerpo in caballo. <sup>4</sup> Xiquinmitacan in barcos huejué. Quinpitza in ijyecal chicahuac huan quinqtojpehua. Ma yoje quimalina in barco in laicanani ca je cuahuil palahuac huan tipichin, quimalina ca capic in laicanani quinequi pa yas. <sup>5</sup> Yoje noje unca inejnepil se. Unca len tipichin pa se icuerpo (inacayo), huan lajtúa hué inminahuac innojen huejué hual quichía in se. ¡Xiquitacan quinami se tixuxli tipichin quimilinaltía se cuajlan hué! <sup>6</sup> Huan inon hual quijtúa se inejnepil unca quinami tixuxli. Quema, inminejnepil lacames quipehualtía mochi in laijlaculisli pin lalticpan. Dios quilalic tonejnepil pa innojen hual quichihualo tocuerpo. Huan pan ipampa len quijtúa inejnepil se, mochi in se moijlacúa. Quema, pan ipampa len quijtúa se inejnepil, iyulilislí se unca quinami lalalaltíli ca tixuxli hual amo huil quisehuía. Unca quinami quilalaltía inejnepil ca itixuxli in coyunqui capa cate in mijquimes, capa amo mocahua pa lalas. Satanás huelítía pan se inejnepil. <sup>7</sup> Huil quinehuiltílo lacames mochi yulijquimes huan tutomes huan yulijquimes hual mohuilanalo. <sup>8</sup> Ma yoje, se inejnepil amaqi huil quisehuiltía. Unca len amo cuali hual amo quiman mosehuía. Unca quinami tentica ca pajli hual lamictía. <sup>9</sup> Ca tonejnepil tilaquetzalo cuali inahuac Dios toTata. Noje ca tonejnepil tiqinhuejuecaltílo lacames hual Dios quinchíac chicuenta nesi yihual. <sup>10</sup> Quisa pa quiahuac se icamac latuchihualislí huan lahuejuecaltílisli. Nocrían, inon amo cana cuali sinda unca yoje, monequi pa camo cayas yoje. <sup>11</sup> ¿Cuajnesi quisa al tzopelic huan al ca istal pan se iixtololon al? <sup>12</sup> XiQuitacan, nocrián, se amacuál amo huil quilalía laquilyo quinami xocotilan, huan se pacholi hual laqui uvas amo huil quilalía higos. Huan noje se iixtololon al amo huil quimaca al ca istal huan al tzopelic.

*In lajmatilislí hual neli unca*

<sup>13</sup> Sinda unca ca amhuanten se hual quimati huan quipía míac lajmatilislí, ma quinextilí inon pan ipampa quinami yulí lachijtica cuali. Ma camo lajtúa hué pa iyolo moilijtica quichi hué unca ilajmatilislí huan ma camo quijtu pampa yihual niman cuali huan oc sequin amo yoje cuali quinami yihual. <sup>14</sup> Huan sinda mojmosta ancualani pampa oc sequin cate lachijtcate capa anquinequi anquichía pa yoje moxtin anmitzitasi quinami se hué, cuaquín amo ximoixtocacan pampa anquipía lajmatilislí. Sinda anquichía yoje, cuaquín anislacati huan amo anlachía inon hual unca melahuac. <sup>15</sup> In lajmatilislí hual anquijtúa pampa anquipía, in amo ilajmatilislí in cielo (ilhuicac) hual temúa pan lalticpan pa Dios ilacames. No, in unca inminlajmatilislí lacames san hual jan quimatílo len quipalehuía quiman yulticate nican pan lalticpan. In lajmatilislí amo quinmacac in Espíritu Santo. Quema, quinmacaje ijyecames amo cuajcuali. <sup>16</sup> Capa yesi yehuanten hual cualanilo pampa quinequilo lachihualo capa oc sequin cate lachijtcate, nepa moitas lapolulislí huan mochi lachihualislí amo cuajcuali hual huil moita pin lalticpan. <sup>17</sup> Amo unca yoje ilajmatilislí Dios pin cielo hual

quintilanilía yehuanten nican pan lalticpan. Sinda anquimatis mochi oc se lajtol, ma yoje, nicnequi niman míac pa anquimatis cuali inon: Amo quipía nindeno amo cuali ilajmatilisli in cielo. Yulilo chipahuac yehuanten hual quipialo in lajmatilisli. Se hual quipía ilajmatilisli in cielo (ilhuicac) amo mocualantiguaisa, quinlasojla huan quinchihuilía cuali moxtin, quema, noje yehuanten hual niman tijtipichin. Huan yihual quinequi quicagui in cuali hual quijtulo oc sequin. Huan ilajmatilisli in cielo hual Dios quimaca tejchihuilía pa tiquinmicnilisi huan pa tiquinpalehuisi aquinojen panujticate lacocoltilisli o len yes amo cuali. In lajmatilisli hual Dios quimaca tejchihuilía pa tiquinchiuilisi cuali mochi oc sequin hual amo quipialo len monequi pa quipiasli pa inminyolo huan inmincuerpos. Huan huil ticmatilo pampa in lajmatilisli technequiltía pa tiquinchiuilisi cuali in oc sequin. Amo techmacahuiltía pa tiyulisli tiquincaujcuamanticate oc sequin pa camo quimatisi quinami tilajnamiquilo pa toyolo. <sup>18</sup> Yehuanten hual quinequilo mosehuilisli pa inminyolo huan pa inminchan yulilo mopalejticate se huan oc se pa momiactis inminmosehuilisli. Yojque yulisli quichijticate len unca cuali huan melahuac.

## 4

*Monequi pa camo ticlasojlalo quinami yehuanten pin lalticpan yulilo quichijticate*

<sup>1</sup> ¿Leca anmoana huan leca anlaquetza ancualantica amhuanten se ca oc sequin? ¿Amo unca pampa inon? Anquinequi anyuli ancantía míac hual ipati pa amhuanten, míac hual huil anquicuhua pin lalticpan. Pampa in, anmoana pampa anmocuerpo quinequi quipía len hual Dios amo quixtoca. <sup>2</sup> Anquinequi chicahuac len huan amo anquipía. Pampa in, anlamicría huan anquinequi anmoyaxcajtía ca inon huan inon huan amo huil ancana len anquinequi. Yojque anmoantía huan anmocualanilía. Amo ancana in hual anquinequi pampa amo anquilajlanía Dios. <sup>3</sup> Huan sinda anquilajlanía Dios, amo ancana pampa anmolajlanilía innojen hual Dios amo quinequi pa anquipías. Anquinequi innojen jan pampa anquinctica anquipía len anmocuerpo quinctica hual amo unca cuali pa amhuanten. <sup>4</sup> Huan yojque iyajmo anquipaquiltía Dios! Neli anquimati pampa anquixtoca anquichía quinami yehuanten hual amo quineltoalo Dios. Yoje anmolalijtica pa anquichías quinami Dios ilacocolinijmes. Pampa in, aqui quilalis pa yulis quinami yehuanten pin lalticpan, yihual mochías se ilacocolini Dios. <sup>5</sup> O ¿cuajnesi anquijtúa ilajtol Dios lajcuiluli amo quijtúa mochi hual quinequiaya quijtu quiman quijtuc: “Dios amo quinequi quimacahuiltía pa se ijyecal yulis pa tocuero quiman unca nepa in Espíritu Santo lajitic ca tocuero”? Dios quinequi in espíritu hual quilalic pa chantis lajitic tocuero, huan amo quita cuali sinda amo ticmacahuiltilo pa yes mochi iyaxca pa quitequehuis. <sup>6</sup> Ma yoje, mas que yojque unca, Dios quimaca mochi tonali míac lapalehuilisli huan lachihualisli cuali pa huil ticneltocasi. Pampa in, ilajtol quijtúa, quil: “Dios molalía pa quintzacuilis yehuanten hual quixijxiculo len yihual quinequi quinchihuilía. Ma yoje, quimaca ilapalehuilisli huan quinchihuilía cuali yehuanten hual quimatilo pampa monequi pa quinpalehuis.” <sup>7</sup> Pampa in, amo xicxijxicun Dios. Xicneltocacan pa ancanas ilachihualisli cuali. Xiclalican pa anmotzontecon pa camo anquichías quinami quinequi in lili, huan yihual cholus anmitzcajtiquisa. <sup>8</sup> Ximoajxiltican ca Dios, huan Dios moajxiltis ca amhuanten. Ximochipahuilican anmoyulilisli, amhuanten



hual anquichía laijlaculisli. Ximochipahuilican anmoyolo, amhuanten hual anmotolinía pa anquitocas Dios huan noje pa anquitocas quinami yulilo yehuanten pin lalticpan. <sup>9</sup> Ma anmitzcocu míac anmoyolo huan xichocacan. Xicpalacan anmohuitzquilisli ca icnotilisli pa anmoyolo. Huan xicpalacan anmpoquilisli ca míac lacocoltilisli pa anmoyolo. <sup>10</sup> Xipehuacan ximoitacan tijtipichin ilaixpan in Tata, huan in Tata anmijchías hué ilaixpan yihual.

### *Monequi pa se amo quinequi quimaca ojli icni hual quineltoaca in Tata*

<sup>11</sup> Nocnían, amo xiquintenehuacan se ca oc se. Aqi hual quitenehua icni huan quinequi quimaca ojli icni, yihual quitenehua in lajtol hual quijtúa pampa ticpialo pa tiquinlasojlasi tocnían. Quema, huan yoje yihual quijtutica in lajtol amo unca cuali, huan amo quinequi quichía quinami quijtúa in lajtol. Sinda yoje tilajtulo inahuac in lajtol, cuaquín amo ticchijtica quinami quijtúa in lajtol. Timochijtica quinami se hual quijtúa yihual quipía lahuelilitlisli pa quijtus quinami monequi panu mochi. Yojque timoyaxcajtía ca len hual amo moyaxca, in san iyaxca Dios. <sup>12</sup> Unca jan se san hual quimaca in lajtol, in lajtol hual amo quiman lamis huejcahuas. Huan unca jan se san hual quipía lahuelilitlisli pa quijtus quinami monequi pa panus mochi. Huan yihual hual quimaca in lajtol huan quipía in lahuelilitlisli unca Dios. Yihual huil laquixtía pa camo polehuisi huan huil tilanían pa capa amo sehuis in tixuxli. Axcán, ¿aqi tehuil hual ticnequi ticana lahuelilitlisli pa tiquilis se hual unca monahuac len monequi quipanus pampa quichíac laijlaculisli?

### *Amo ticmatilo len yahui panu mosta*

<sup>13</sup> Axan, xiquitacan, amhuanten hual anquijtúa, quil: “Axan o mosta tiasi pa in caltilan umpa, tipanusi se xihuil nepa. Tilanamacasi huan tilacuhuasi, huan pampa inon ticanasi míac tomin.” <sup>14</sup> Yojque anquijtúa, huan amo anquimati len yahui panu mosta. ¿Len unca anmoyulilisli? Unca quinami in pogli hual quisa pin al posuntica, nesi jan se nadita, cuaquín jan ajnaxcan yajmo nesi. <sup>15</sup> Yesquiaya cuali pa anquijtus, quil: “Sinda in Tata quinequi, cuaquín tiyulisi huan ticchihuasi inon nican huan nepa.” <sup>16</sup> Huan amo anquijtúa inon, jan anlajtúa anmoixtocatica pampa anquijtúa pa anmoyolo da huil anquinchía innojen. Amo unca cuali pa anlajtus anmoixtocatica yoje, unca niman amo cuali. <sup>17</sup> Yoje, aqi yes hual quimati quichía len cuali, huan ma yoje amo quichía, cuaquín pa yihual unca laijlaculisli.

## 5

### *Quimaca lajtol in lacames hual quipialo míac*

<sup>1</sup> Axan, ¡xiquitacan, amhuanten hual anquipía míac, xipehuacan xichocacan huan xitzajtzican, pampa anyahui anpanu lacocolisli! <sup>2</sup> In míac hual anquipiaya la'ajcoquili moijlacuc, amo unca cuali pa nindeno. Anmonahuajmes cuajcualtichin axan quicoyunijque in oculilimes. Quema, innojen hual anmoyaxca hual ipatiloaya amo monotzalo nindeno ilaixpan Dios. <sup>3</sup> Anmotomin lachihuali ca oro huan plata yajmo monotza len. Inon anmitznexilis amhuanten quinami Dios anmitzita. Anquijtuaya pampa anmotomin anmitzpalehuiaya ca mochi, huan anquixixicuc ilapalehuilisli Dios. Yojque anpolehuis quinami anmotomin polehuic. Anpolehuis huan nesis quinami anmijchichinúa se tixuxli, pampa anquimatis anmotomin yajmo anmitzpalehuis. Anmoajcoquiliac lacocoltilisli pa quiman lamis in lalticpan pampa anquichíac in laijlaculisli. <sup>4</sup> Dios quimati pampa amo

anquinlaxlahuiaya anmotequipanujquimes. Unca quinami inmintomin anmitzmotexpahuilic. Anmitzlapixquilije pan anmocuajmilimes, huan amhuanten anquincajcayahuaca. Axan inmintzajtzilisi in lapixcanijmes ajsic ca Dios, quicaqui Dios iTata ilanechiculisli in lanahuatinijmes pin cielo hual cate Dios iguaches. <sup>5</sup> Anyuliaya pan in lalticpan anmocuhuilijtica len yes pa anmopaquiltis, mochi innojen cuajcualtichin hual amo monequiaya pa anquipiasquiaya. Anquichihuaya len yec anquinequiaya pa anmopaquiltisquiaya. Anunca quinami bueyes hual motomahualtilo huan cuaquinon ajsi in tonali quiman quinnictilo. Yojque ca amhuanten, anquijtuaya pa anmoyolo san quinami huil anmopaquiltiaya, huan axan ajsitica in tonali quiman Dios anmitzcocoltia pampa anquichiac in laijlaculisli. <sup>6</sup> Quema, amhuanten hual anquipia miac anquinmotexpahuilic lacames hual amo quichihualoaya len laijlaculisli. Cuaquin anquinmictic huan yehuanten amo quichihuae nindeno pa monapatije.

*Dios ilacames quipialo pa mopepenialtisi in amo cuali hual quinchihuililo lacames, huan monequi pa yulisi quilajlanticate Dios*

<sup>7</sup> Pampa inon, nocnian, amo xiquinlacuepilian. Ximochiacan huan ximopepenialtican in amo cuali hual anmijchihuililo. Yoje xiyultiacan anquichixtica pa ajsis in tonali quiman hualas in Tata. Xiquitacan. Iteco in lali quipia pa quichias pa ajsis in tonali quiman huil quitequis in cualtichin laquilyo hual quitocac. Amo huil quejsehuiltia. Ma yoje, amo mocahua pa quichias pa yucsis in laquilyo. Quiahui ipan miac sejpa huan oc sejpa, cuaquinon huil quitequi. <sup>8</sup> Amhuanten noje, amo ximocahuacan pa anquichias ca mosehuilisli. Xicanacan chicahualisli pa anmoyolo, pampa amo huejcahua pa hualas in Tata. <sup>9</sup> Amo ximotexpahuilijtinemican sequin ca oc sequin, yoje pa como anmitzmotexpahuilis Dios. Xiquitacan. Dios quipia lahuelilitisli pa latilanis pa quisas capa yihual huan canas ca yihual aqui yes, huan amo huejcahuas pa cayas ca tehuanten. <sup>10</sup> Xijcaquican se lanextilisli, nocnian. Dios ilajtunijmes quijtunijme ca lahuelilitisli Dios ilajtol huan panunijme miac amo cuali hual quinchihuilinijme lacames ej'elehuis. Ma yoje, mopepenialtinijme ca mochi inon. <sup>11</sup> Xiquitacan. Tiquijtulo yehuanten quipianijme paquilisli pampa quipianijme in cuali hual san Dios huil quinchihuilia. Cataya pampa mopepenialtinijme ca mochi in amo cuali hual oc sequin quichihuilinijme quiman quintojtocanijme. Anquimati quinami Job quipanuc in miac lacocoltisli hual in lili quichihuilini huan anquimati noje quinami in Tata quichiac pa mochi quisac cuali pa yihual. Quema, in Tata quimati laicnilia huan quimati quinami lapalehuia.

<sup>12</sup> Axan, nocnian, mas que amo anmotzacuilis pa como anquijtus mochi oc se lajtulisli, ma yoje, ximotzacuilican pa como anquijtus lajtol hual amo huil mopala. Amo xiquijtucan innojen lajtomes pan ipampa in cielo, amo xiquijtucan innojen lajtomes pan ipampa in lalticpan, amo xiquijtucan in lajtomes hual amo mopalasi, niqijtua, amo xiquinmijtucan lajtomes hual amo mopalalo pan ipampa len yes oc se lajtulisli hual amo mopala. San quiman anquijta: "Quema", ma ye quema. Quiman anquijtua: "Amo", ma ye amo, in san. Yoje xiquijtucan pa como anmitzmotexpahuilis Dios.

*Xicneltocacan Dios quiman anquilajlania*

<sup>13</sup> Unca se ca amhuanten hual quicocua iyolo, ma quilajlani Dios. Unca se ca amhuanten hual quipia paquilisli, ma quicantarulli (quicuiquil) Dios. <sup>14</sup> Unca se cocoxqui ca amhuanten, ma quinnotza pa hualasi inminlaicananijmes in laneltocanijmes. Ma quilajlanican Dios pa yihual, ma

quixahuilican ca chahuac, quinozticate Dios ca ilahuelilitisli itoca in Tata Jesucristo. <sup>15</sup> Huan pampa quilajlanilo quineltocticate Dios, yes laquixtili in cocoxqui pa camo polehúis ipampa icocolisli. Huan moqueztinemis pampa in Tata quipajtic. Huan sinda quichíac laijlaculisli, Dios quipujpuhuas. <sup>16</sup> Pampa in, xicyolcuitican anmolaijlaculisli se ca oc se, huan xiclaianican Dios se pa oc se, pa yojque Dios anmitzquixtilis pa yajmo panus mochi in amo cuali hual anmitzpanujtica. Se lalac hual quiyolcuitic ilaijlaculisli ca Dios, Dios quipujpuhuas. Yoje, quiman in se quilajlanía Dios ca mochi iyolo, cuaquín Dios quichihuilis míac hual cuali. <sup>17</sup> Dios ilajtuni Elías yec se lalac jan quinami tehuanten. Lajtuni pa iyolo quinami tehuanten huan yulini lachijtica quinami tehuanten. Ma yoje, quilajlanic Dios ca mochi iyolo pa camo quiahuis, huan amo quiahuiaya pa ye xixihuil huan chicuase mesli. <sup>18</sup> Oc se jpa quilajlanic Dios, huan in cielo quimacac quiahuil huan in lalticpan mopixuc, pehuac quilalic ilaquilyo.

<sup>19</sup> Nocnían, sinda se ca amhuanten quicahua Dios iojli, in quinequi quijtúa sinda mocahua pa quineltoctas Dios ilajtol melahuac, cuaquín, xicmatican inon: <sup>20</sup> Sinda oc se tocní quichihuilis pa in se mocuepas quineltoctas ilajtol Dios, cuaquinon yihual yoje quiquixtilic se yulilisli pa camo polehúis. Noje yihual quichihuilic pa Dios yajmo quijnamiquis ilaijlaculisli hual cataloaya míac.

## In amal calica pehuac ilajcuilulisli San Pedro in lanahuatini

*Pedro quinmijcuiluilía laneltocaniymes hual chantilo cajcapa pa míac lalimes*

<sup>1</sup> Nehual Pedro ilanahuatini Jesucristo annimitzijcuiluilijtica in amal amhuanten hual anchantitica pa quiahuac anmolali. Axan anchantitica capa chantilo yehuanten hual amo quinelto calo Dios. Amhuanten in israelitos hual anunca tocnían anchantitica lasemanali cajcapa pin lalticpan Ponto huan pa Galacia huan pa Capadocia huan pa Asia huan pa Bitinia. <sup>2</sup> Quema, annimitzijcuiluilijtica amhuanten hual Dios toTajtzin anmitzljaltultic huan quilalic pa anquinelto calo Jesucristo quiman ayamo anlacatic. Anmitzljaltultic pan ipampa in Espíritu Santo hual anmijxiluc pa camo ancayas ca yehuanten hual amo quinelto calo Dios pa yoje huil anquitequipanuilis. Anmijxiluc pa anquinelto calo Jesucristo huan Dios ilajtol lajcuiluli, huan anmijchipahuilic ca iesli Jesucristo. Unca quinami anmitzajuichuc ca iesli pa yojqe anmijchipahuas. Ma Dios anmijchi huili míac cuali huan ma anmitzmaca míac imosehuilisli pa anmoyolo.

*Yulilisli hual techlachialtía pa len niman cuali pa tehuanten*

<sup>3</sup> Ma lajtucan cuali moxtin pa Dios, yihual iTajtzin toTata Jesucristo. Dios laicnilía míac. Pampín techicnilía míac, techmaca yulilisli yancuic. Tejchía ixolomes, huan yoje ticchialo in tonali quiman neli ticayasi ca Dios. Inon ticchixticate pampa Jesucristo yulic oc sejpá, quisac capa cataloaya in mijquimes. <sup>4</sup> Yoje quiman ticayasi ca Dios, techmacas in hual iyaxca yihual, inon hual amo quiman mopólus. Unca niman cuali, amo quiman lamis. Dios anmitzajcoquilijtica in hual iyaxca pin cielo (ilhuicac). <sup>5</sup> Anmitzlachilijtica pampa yahui anmitzmaca len hual anmitzquixtis capa anunca ca mochi polehuilisli huan yajmo quiman anquitas polehuilisli. Unca len hual anmitzmacas niman míac paquilisli huan amo quiman lamis. Huan inon unca lachijchihuali pa Dios anmitznexilis pin tonali quiman lamis toyulilisli quinami ticmatilo axan nican pan lalticpan. Yoje yajmo timoitasi pin polehuilisli.

<sup>6</sup> Pampa in, anquipíac míac paquilisli, mas que pa je nadita axan, anquipía pa anpanus míac lacocotilisli hual anmitzcocúa anmoyolo. <sup>7</sup> Anpanúa inon pa yoje Dios anmitznexilis quinami anquinelto calo. Huan yoje quinami anquinelto calo, Dios quita quinami niman cuali. Amo yoje cuali quita oro, pampa oro amo huejcahuas mas que quichipahualo pin tixuxli. Ma yoje, anmolanelto calisli huejcahuas. Huan quiman Dios monexiltía ca inon quinami anquinelto calo Cristo, cuaquín pan tonali hual nesis Jesucristo oc sejpá pin cielo temujtihuala, Dios anmitzilis lajtomes huejué. Inon cayas pampa anquisac cuali ca in hual monexilic quinami cuali anquinelto calo. Quema, Dios anmijxiluilis anmolajco ilaixpelalisli cualtichin huan anmolajco ilahueliitilisli.

<sup>8</sup> Amo quiman anquitas Jesucristo. Ma yoje anquilasojla, huan anquinelto calo mas que axan amo anquitzica. Pampín anquipía paquilisli hué hual amo anquinpía lajtomes pa anquinlaquetzilis oc sequin inon. In paquilisli quisa pin cielo quihualicatica niman míac laixpelalisli hual unca iyaxca Dios.

<sup>9</sup> Quema, anquipía in paquilisli pampa anyahui ancaya laquixtili pa camo

anpolehuis, pa ancayas mojmosta ca Jesucristo. Huan amo quiman lamis pampa anquineltoaca.

<sup>10</sup> Dios ilajtunijmes amo mocahuanijme pa quitemulosquiaya ca mochi inminyolo pa quimatisi len quinequi quijtúa inon quinami Dios yahuiaya anmitzquixti pa camo anpolehuis mas que anquichía laijlaculisli. Yehuanten lajtunijme pa yina inahuac in cuali hual san Dios huil quinchihiuila lacames, inon hual yahuiaya anmijchihuili amhuanten. <sup>11</sup> Quitemunijme quinami huil quimatilosquiaya jan quiman Dios yahuiaya anmitznextili in cuali. Quitemunijme quinami huil quimatilosquiaya len yahuiaya panu pa tolali quiman Dios yahuiaya anmitznextili in cuali. Cataya iEspíritu Cristo ca yehuanten ilajtunijmes Dios. Quinnextiliaya len yahuiaya panu. Quinmiliaya neli pampa Cristo yahuiaya panu lacocoltilisli huan cuaquinon Cristo yahuiaya cana chichualisli hué ca laixpelalisli cualtichin hual Dios quimacasquiaya. <sup>12</sup> Huan iEspíritu Cristo quinnextilic Dios ilajtunijmes pampa amo quinmijcuilujtataloaya innojen lajtomes pa yehuanten inminhuian, pampa no, quinmijcuilujtataloaya pa amhuanten nojen. Quema, yehuanten anmitztequipanuiloaya yoje. Axan, anquimati inon hual yehuanten quijsuiloaje. Anmitzlamachiltije yehuanten hual anmitzilije Dios ilamachiltisli cuali. Anmitzilije pan ipampa in Espiritu Santo hual Dios quinlanilic hual cataya capa yihual pin cielo. Inon hual quijsuilonijme Dios ilajtunijmes anmitzpanuc amhuanten. Huan Dios ilanahuatinijmes pin cielo (ilhuicac) quinequilo mía pa quimatisi mochi inon.

### *Dios technotza pa tiyulisi chipahuac mojmosta*

<sup>13</sup> Pampa in, quiman anmoquixtilis mochi quinami anlajtúa pa anmoyolo, mochi in hual anmijtzacuila pa camo anlajtus cuali pa anmoyolo, cuaquín xiyén (xiyecan) lacames hual huil anlajtúa pa anmoyolo ca lajmatilisli. Xicchiacan san in cuali hual Dios tejchihuila. Yihual anmitzquixtis pa camo anpolehuis quiman hualas Cristo oc sejpa. Quema, in cuali hual anmijchihuila axan anquixtica. Pampa in, amo ximocahuacan xicchixtiacan in lachihualisli cuali, amo xicmahuilican pampa inon amo unca melahuac. <sup>14</sup> Amhuanten anunca Dios ixolomes. Xicneltoacan, amo ximomacahuiltican pa anquinequis anquichías len amo cuali, quinami anquinequini anquichía quiman amo anquimatic quinami Dios unca. <sup>15</sup> Axan, xiyecan quinami Jesucristo hual anmitznotzac. Yihual mocahuas laxiluli pa camo cayas inahuac mochi hual amo cuali. Pampa in, amhuanten noje ximoxilucan pa camo anquichías nindeno amo cuali ca mochi anmolachihualisli. <sup>16</sup> Quema, pampa unca lajcuiluli pa Dios ilajtol, quil: “Ximoxilucan pa camo anquichías nindeno hual amo cuali, pampa nehual Dios nimoxilúa pa camo cayas ca nehual nindeno hual amo cuali.” <sup>17</sup> Huan sinda anquinotza Dios pa anmitzpalehuis, anquilijtica “toTajtzin”, cuaquín xiyulican anmomajtitica pa mochi tonali anmocahuas anyultica nican pan lalticpan. ToTajtzin quilis len lacocoltilisli quipías pa panus mochi sejse. Cayas quinami cahuilúa sinda yuliaya quichijtica amo cuali. Amo quita se cuali huan oc se amo cuali sinda in omenten yuliloaya quichijticate jan yoje amo cuali. <sup>18</sup> Anquimati Dios laxlahuic pa anmitzmacahuas pa yajmo anyulis quinami anyulini. Anyulini yoje quinami anmitznextilije pa anyulis anmotajtzitzian huan inminlanextilisli amo anmitzpalehuic. Dios amo laxlahuic ca tomin lachihuali ca plata huan oro huan len quinami innojen hual mopolulo huan moijlaculo. <sup>19</sup> No, laxlahuic ca esli hual yihual quita niman cuali. In esli yec iesli Jesucristo. Yec quinami iesli se borreguito cualtichin, chipahuac, amo quixtica nindeno hual amo

cuali, se borreguito hual quilalilo pa huendi pa quinextilis quinami iesli Cristo quiquixtilía laijlaculisli. <sup>20</sup> Dios neli quilalic pa anmitzmacahuas pan ipampa iesli Jesucristo. Inon quilalic quiman ayamo quinchíac in cielo huan in lalticpan. Huan Dios anmitztilanilic Jesucristo nican pan lalticpan pin tonalijmes quiman lantica inon hual quichíac. Anmitztilanilic pampa anmitzlasojla. <sup>21</sup> Cristo anmitznextilic quinami unca Dios huan pampín anquineltoca Dios. Unca Dios hual quiyuliltic Jesucristo quiman miquic. Huan quimacac chichahualisli hué ca laixpelalisli cualtichin hual san yihual huil quipía. Yoje, amhuanten amo anmocahua pa anquineltocas Dios huan amo anmocahua pa anquichías in tonali quiman anquitas.

<sup>22</sup> Huan anquichipahuac amoyulilisli pampa anquineltocac Dios ilajtol melahuac. Pampín neli anquinmixtoca míac anmocnían, amo anlacaujcuamantica. Huan axcan xiquinlasojlapan anmocnían ca mochi amoyolo. Xichihuacan míac pa anquinnextilis quinami anquinlasojla. <sup>23</sup> Huil anquichía yoje pampa Dios anmitzlatiltic yanquic. Huan Dios ilajtol unca quinami latocli, ma yoje amo latocli hual moijlacúa. No, ilajtol unca quinami latocli hual amo quiman moijlacúa. Huan anlatic pan ipampa in latocli, ilajtol in Dios hual yuli huan mocahua mojmosta ca amhuanten. <sup>24</sup> Moijlaculo inmincuerpos lacames huan yulijquimes, pampa Dios ilajtol lajcuiluli quijtúa, quil:

Mochi inmincuerpos cate quinami sacal, amo huejcahualo,  
huan ichichahualisli huan in hual unca cualtichin ca yehuanten cate quinami  
in sacal ixuchil.

Pilinía in sacal huan huetzi ixuchil. <sup>25</sup> Ma yoje, ilajtol Dios amo quiman  
mocahuas pa yes.

Huan in lajtol unca in lamachiltisli cuali hual anmitznextilía quinami  
anmoquixtilis pa como anpolehuis pampa anquichíac laijlaculisli. In lajtol  
hual anmitzlamachiltije.

## 2

<sup>1</sup> Pampa inon, ximocahuacan pa como anquichías in amo cuali, amo xilacaujcuamanacan. Amo ximochihuacan quinami amo anunca pa yoje lacames anmitzitasi cuali. Amo xicualanican quiman anquita in hual oc sequin quipialo huan amhuanten amo anquipía, amo xilahuejuecaltican.

<sup>2</sup> Xiyén (Xiyecan) quinami xolomes hual quipía nadita lacatije. Yehuanten quinequilo leche ca lanequilisli chichahuac pa yoje huil moscaltisi. Yoje, amhuanten xicnequican míac ilajtol Dios hual amo anmitzcuajcuamana. Ilajtol Dios unca pa amhuanten quinami leche unca pa in xolomes. Yoje, pan ipampa ilajtol Dios anquimaztías míac quinami yihual anmitzquixtía pa como anpolehuis. <sup>3</sup> Quema, pampa anquimati in Tata Jesucristo unca niman cuali, jan quinami anquimati len tijcuas unca cuali quiman anquilalía pa anmocamac.

### *Cristo unca quinami se tixcali yultica*

<sup>4</sup> Huan anhualac amhuanten ca in Tata Jesucristo mas que in oc sequin amo quinequije hualaje ca yihual. Ma yoje, Dios quilajtultic huan quilasojla in Tata Jesucristo. Yihual unca quinami se tixcali calica quichihualo se cali, mas que yihual unca quinami se tixcali hual yuli. Yihual yultica oc sepa huan quimaca yulilisli oc sequin. <sup>5</sup> Amhuanten nojen ancanac iyulilisli. Axcan anyultica pan ipampa yihual. Anunca quinami tixcalimes calica quichihualo cali. Ca in Tata huan ca amhuanten Dios quichíac len quinami se tiopan capa chantilo toyolo. Ca in Tata Jesucristo anunca quinami tixcalimes

hual yulticate. Huan yoje tehuanten titiopistas hual Dios techlajtultic pa tictequipanuilisi. Tictequipanuililo ticmacaticate Dios quinami huendis hual toyolo quimacalo quiman ticlajlanilo. Noje tiqinchihuililo oc sequin innojen cuajcuali huan tiqijitulo quinami Dios unca hué. Huan cana cuali Dios mochi in tohuendi pampa ticneltocalo Jesucristo. <sup>6</sup> Pampa inon, Dios ilajtol quipía lajcuiluli inon, quil:

Xiquita, niclalic pa Sión capa nichanti se lalac hual niquta quinami se tixcali hual niclajtultic.

In tixcali ipati míac, huan unca in tixcali calica nipehuas nicchías nocali. Huan aquí quilalis ilaneltocalisli ca in tixcali amo quiman pinahuas pampa yoje quichíac.

<sup>7</sup> Pampa in, Dios anmitzlasojla míac pampa anquilalía anmolaneltocalisli ca Jesucristo. Yehuanten hual amo quineltocalo Jesucristo cate quinami in lacames hual yahuiloya quichihualo in cali huan amo quinequiloaya quichihualo ca se tixcali hual quinequiaya iteco in cali. Pampa in, Dios ilajtol quijtúa, quil:

Iteco in cali canac in tixcali hual amo quinequiloaya canaloyehuanten hual quichihualoaya in cali.

Quilalic capa quipiaje pa pehualosquiaya quichihualo in cali.

<sup>8</sup> Huan noje quijtúa ilajtol Dios, quil:

Mocualantije ca yihual hual unca in tixcali calica nicchía nocali, unca quinami momañajtije ca in tixcali.

Amo quixtocaje ilajtol, amo quinequije quimatije len quinequiaya quiytu, unca quinami huetzije quiman momañajtije.

Quema, molalije pa camo quicaquisi ilajtol, amo quinequije quineltocaje. Huan quilalic Dios pa quinpanus yoje.

### *Moxtin hual cate iyaxca Dios cate huejueyenten huan tiopistas*

<sup>9</sup> Amhuanten anunca se lanechiculisli hual Dios quilajtultic pa anyes amo quinami oc sequin lacames. Amhuanten anunca tiopistas quinami huejueyenten, anunca lacames huan sihuames hual Dios moxilulic pa quitequipanuilisi yihual. Quema, anunca lacames huan sihuames hual Dios quinpia pa anmoxtin anyes pa yihual. Dios anmitzpía pa amhuanten anlamachiltis pampa unca niman cuali mochi hual Dios quichía. Cataya yihual Dios hual anmitznotzac pa anquisas capa laticumac pa yoje ancalaquis pin lahuilisli, in lahuilisli hual anmitzmahuisultía ca niman míac momajtilisli.

<sup>10</sup> Pa yina anyec lacames hual anmijxixicunijme, axcan anunca ixolomes Dios. Pa yina amaquí anmitzicnilini. Axcan Dios anmitzicnilía.

### *Anyuli pa anquitequipanuilis Dios*

<sup>11</sup> Lasojli nocnían, anchantitica capa yehuanten hual amo quineltocalo Dios, huan anmocajtica pa inminlali. Annimitzilía, ca mochi noyolo, ximijcuanican pa camo ancayas capa mochi hual anmitztilanilía anmoyolo in anquichías len amo cuali hual anmocuerpo (anmonacayo) anmijchihualtia. In amo cuali hual quinequi quichía se icuerpo amon mocahua pa quicocoltis iyulilisli. <sup>12</sup> Huan annimitzilía pa anyultías cuali mojmosta. Yoje yehuanten capa anchantitica quitasi pampa unca cuali quinami anyuli. Huan anmitzcocolilo, quijtuticate pampa amhuanten anquichijtica amo cuali. Ma yoje quitasi in cuali hual anquichijtica. Yoje quilisi Dios lajtomes huejué pan in tonali quiman Dios hualas pa quinlajlanis quinami yuliloaya quiman cataloaya pan lalticpan.

<sup>13</sup> Xiclalican pa anmoyolo pa anquineltocas mochi in lajtomes hual quichihualo in huejueyenten, pampa in Tata quixtoca pa anquichías yoje. Xicneltocacan in hué pampa yihual unca in niman hué. <sup>14</sup> Xicneltocacan in la'ajuani hual in hué quilalía pa quinmacas lacocoltilisli yehuanten hual quichihualo len amo unca cuali, huan pa laquetzas cuali inahuac yehuanten hual quichihualo cuali. <sup>15</sup> Yoje quinequi Dios, pampa sinda anquichía len cuali, yehuanten hual amo laijnamiquilo cuali huan yehuanten hual quimatilo amo huil quijtulo nindeno amo cuali anmonahuac amhuanten.

<sup>16</sup> Amhuanten anuncia lamacahuali, yajmo anuncia Satanás itequipanujquimes lailpili pa yihual anmijchihualtis. Xiyulican quinami lacames lamacahuali. Ma yoje, jan pampa anuncia lamacahuali, amo xiquijtucan pampa huil anquichía len amo cuali. Amo anuncia lamacahuali pa anyulis anquichijtica yoje. Ancataya lamacahuali pa anyulis quinami Dios itequipanujquimes. <sup>17</sup> Xiquinlasojlaca moxtin, xiquinlasojlaca anmocnían hual quineltocalo Jesucristo, xicmatican ximomajtica ilaixpan Dios, xicmatican ximomajtica ilaixpan in hué.

### *In lanextilisli hual quijtua quinami Cristo panuaya lacocoltilisli*

<sup>18</sup> Amhuanten hual anuncia tequipanujquimes hual amo anmitzlxlahuilo, xiclalican pa anmoyolo pa anquineltocas anmotecojuan. Xiclalican pa anquinneltocas ca mochi anmomañtilisli. Huan amo xicayacan yoje jan ca in tecojuan san hual cate cuali ca amhuanten huan amo anmitztequipanulitilo chichahuac. Quema, xicayacan yoje ca in tecojuan hual cualancudos. <sup>19</sup> Sinda anpanúa lacocoltilisli pan ipampa amo cuali hual amo anquichíac, Dios quita cuali sinda anmopepenialtía pa anpanus inon pampa anquimati anuncia Dios ixolomes. Inon anquimati pan ipampa anmolajmatilisli pa anmoyolo. <sup>20</sup> ¿Quinami anmitzpalehuía amhuanten sinda anmopepenialtía pa anpanus lacocoltilisli quiman anquichía laijlaculisli? Amo anmitzpalehuis. Ma yoje, sinda anquichía cuali huan pampa in anmitzcocoltisi huan anmopepenialtía pa anquipanus, cuaquin inon Dios quita cuali. <sup>21</sup> Unca pampa anmitznotzac Dios pa anyulis anquichijtías yoje, jan quinami quichíac Cristo. Yihual panuc lacocoltilisli pa amhuanten, yoje anmitzcahuilic se lanextilisli pa amhuanten ancanas in ojli hual canac yihual. <sup>22</sup> Cristo amo quiman quichíac laijlaculisli huan amo quiman mocaquic quística pa icamac se lajtol hual lacuajcuamanaya. <sup>23</sup> Quiman yehuanten quihuejuecaltije Cristo, yihual amo quinhuejuecaltic yehuanten. Panuc lacocoltilisli, yihual amo quinmilic, quil: "Nehual nimolacuepilis ca amhuanten." No, yihual quilalic pa imajmajuan Dios inon hual panujtataya pampa Dios quimati quinchihuilia yehuanten quinami quinmahuilúa. Yihual quilía ca melahualisli len monequi quipanusi pampa quichihuaje laijlaculisli. <sup>24</sup> Jesucristo canac ilacocoltilisli tolaijlaculisli, canac pan yihual icuerpo (inacayo) iyaxca. Yoje quihuicac tolaijlaculisli pin cuahuil capa miquic, quinami quihuicalo se huendi pa capa quilalilo huendis. Quema, yihual miquic pin cuahuil pa yoje tehuanten tiyulisi ticchijtcate cuali, pampa axan yajmo tiyulisi ticchijtcate laijlaculisli. Quinchihuaje sahuames capa quihuitequije Cristo. Huan pampa yoje mopepenialtic yihual, tehuanten ticate laquixtili pa camo tipolehuisi pampa ticchihuaje in laijlaculisli. Unca quinami techpajtic tolaijlaculisli. <sup>25</sup> Quema, amhuanten ancatan quinami borregos hual mopolujtnemiloaya. Axcán anmocuepac ca yihual hual anmitzlachilía. Yihual unca anmolachiani amhuanten, yihual Jesucristo.



## 3

*Yoje monequi pa yulisi yehuanten hual monamictilo*

<sup>1</sup> Noje amhuanten sihuames, ximomacahuiltican pa anquineltocas anmoluahualhuan pa quipias in lahuelilitlisli hual unca inminyaxca. Xicchihua-can inon pampa sinda sequin amo quinelto calo Dios ilajtol, cuajnesi quinel-tocasi quiman quitasi quinami cuali anyuli amhuanten inminsihuahuan mas que amhuanten amo anquinmilía Dios ilajtol. <sup>2</sup> Quema, cuajnesi an-quineltocaltis quiman quitasi quinami cuali amhuanten sihuames anyuli inminlaixpan huan quinami anquimati anmomajtia inminyampa. <sup>3</sup> Amo monequi pa anquijtus pa anmoyolo mojmosta quinami anmochijchihuilis cualtichin. Ma annimitznextili len nicnequi niquijtua: Amo xicchijchi-huacan anmotzondi lailpili pa yoje nesis ipati. Huan amo xiclalican miac anillos huan zarcillos huan collares huan maquislimes huan miac hual unca lachihuali ca oro. Huan amo ximolaquentican ca tzotzomajli calica anquinmitaltitinemis moxtin. <sup>4</sup> Xiyulican cuali pa anmoyolo hual unca lalatili. Se hual quipía iyolo quinami inon quipía len cualtichin hual amo quiman lamis. Huan pa ilainjamiqulisli amo jan ajnaxcan mocualantía. Dios quita niman cuali se hual quipía yoje iyolo. <sup>5</sup> Yoje yulinijme in sihuames pa yina, yehuanten hual Dios quinlajultic pa quitequipanuili. Quimatinijme pa inminyolo pampa Dios yahuiaya lami quichía inon hual quijtuc, huan yoje mochihuaniijme cuali pa inminyolo. Quimacahuiltinijme pa quinlaicanalosquiaya inminlahuicalhuan huan quimatinijme momajtilo inminyampa yehuanten. <sup>6</sup> Sara quimatini momajti iyampa ilahuical Abraham, quinoztani “notata”. Huan anmochía quinami Sara ixolomes sihuames sinda anquichía cuali quinami yihual quichihuani. Yoje amo monequi pa anmomajtis quiman anmijchihuilisi len amo cuali.

<sup>7</sup> Huan jan yoje, amhuanten in lacames, xichantican cuali ca anmosi-huahuan. Xiyulican anquinlasojlatica pampa yehuanten amo chijchicahuac quinami amhuanten. Huan monequi pa anquinchihuilis cuali quinami an-mitznextilía anmolajmatilisli hual Dios anmitzmaca pa anmoyolo. Quema, xiyulican anquinlasojlatica yehuanten pampa yehuanten yalo quipialo in hual iyaxca Dios jan quinami amhuanten. Quema, anmoxtin anquipía in cuali hual san Dios huil anmijchihuilía hual unca yulisisli hual amo quiman lamis. Huan yojque, sinda anyuli anquinpixtica lasojlalisli pa anmosihuahuan, cuaquín amo cayas nindeno hual anmijtzacuilis quiman yes anquilajlantica Dios.

*Yehuanten hual panulo lacocoltisli pampa quichihualo len unca cuali*

<sup>8</sup> Ma annimitzili jan oc se lajtol. Xicayacan anmoxtin ca se lajtulisli san. Quema, quiman oc sequin quipialo paquilisli, cuaquín xicpiacan paquilisli ca yehuanten. Sinda chocaticate pampa quincocúa inminyolo, cuaquín xiquinchoquilian, xicchihuacan quinami yehuanten. Xiquinlasojlaca anmocnián, xilaicnilican miac, huan ximoitacan quinami lacames huan sihuames tijtipichin. <sup>9</sup> Amo ximolacuepilican len amo cuali, huan amo xilacocolican quiman anmitzcocolilo. Dios quinequi pa anlajtus cuali inmi-nahuac yehuanten. Xicchihuacan yoje, pampa Dios anmitznotzac pa anyulis anquichijtica yoje. Sinda anyuli anquichijtia inon, cuaquín anquipías in hual iyaxca Dios toTajtzin, anmijchihuilis cuali. <sup>10</sup> Quema, pampa yoje quijtua Dios ilajtol, quil:

Yihual hual quinequi quipía yulisisli hual amo quiman lamis, huan quinequi quinmita tonalijmes cuajcuali nican pan lalticpan,

monequi pa camo quimacahuiltis inejnepil pa quijtus len amo cuali.

Ma camo lacuajcuamana pan ipampa len quijtúa. <sup>11</sup> Ma mocahua pa quichías len amo cuali, ma quichía len cuali.

Ma quitemu quinami huil yulis ca mosehuilisi pa iyolo, ma motolini pa yulis yoje.

<sup>12</sup> Pampa mojmosta quiztica Dios aquinojen quichijtcate len cuali, huan yihual quincequi quiman quilajlanticate.

Ma yoje, aquinojen quichihualo amo cuali in Tata quinmixcomaca amo quinmiztica cuali.

<sup>13</sup> Ma annimitzljalani inon: ¿Aqui yahui annijchihuilía amo cuali pampa mojmosta anyuli anquichijtica cuali ca mochi anmochicahualisi? Amaqui yahui annijchihuilía amo cuali hual amo quiman lamis. <sup>14</sup> Ma yoje, sinda cuajnesi anpanuaya lacocoltilisi pampa anquichijtica cuali, cuaquin Dios annijchihuilis cuali. Pampa in, xicpiacan paquilisi sinda anpanúa lacocoltilisi. Amo ximomajtican inminlaixpan yehuanten pampa huil annijchihuilisi len tetzcuinuc. <sup>15</sup> Monequi pa anlajtus pa anmoyolo quinami Dios quilajtultic in Tata Cristo pa yes iteco anmoyolo. Ximochijchihua-can mojmosta pa huil anmonapatis ca yehuanten hual annitzlajlanilo leca anquichixtica pa annitziqixtis Cristo pa camo anpolehuis. <sup>16</sup> Ma yoje, ximonapatican ca lajtol cuali, amo xiquinmajuacan. Xilaquetzacan anmomajtitica ilaixpan Dios quiman anquinlaquetziliztica quinami Cristo techpalehuía. Xicpixtiacan cuali anmolajmatilisi pa anmoyolo hual Dios annitzmaca pa anquimatis len unca cuali. Huan sinda mocahuas cuali anmolajmatilisi, cuaquinon pinahuasi yehuanten hual annitzcocolilo huan laquetzalo amo cuali inahuac quinami cuali anyuli anquineltoatica Cristo.

<sup>17</sup> Sinda quinequi Dios pa se panus lacocoltilisi pampa quichijtica cuali, inon unca niman cuali. Amo quiman yesquiaya cuali sinda quipanúa lacocoltilisi pampa quichiac amo cuali.

<sup>18</sup> Yoje, Cristo miquic sejpa, yihual hual amo quiman quichiac len amo cuali. Miquic pa yehuanten hual quichihualo mochi amo cuali. Inon Cristo quichiac pa techuicas ca Dios. Cristo in local yec lamictili huan miquic yoje icuerpo. Ma yoje, pa iyolo yec layulitili huan axan yihual yajmo quiman miquis. Huan pa iyolo yajmo quiman yes laijcuanili pa camo cayas ca Dios. <sup>19</sup> Quiman miquic, Cristo noje uyac pan ipampa iyolo capa cataloaya latzacuali in ijyecames amo cuajcuali, cataloaya pin calijtic lachihuali pa yehuanten. Nepa yihual quinnahuatilic ilajtol. <sup>20</sup> Yehuanten in ijyecames molaliloaya ipan Dios, amo quineltoaloaya. Huan yihual Dios mopepenialtiaya ca inminlajlaculisi, quinmacahuiltiaya yehuanten pa yultias amo quineltoaticate pan tonalijmes quiman quichijtataya Noé in arca. Cuaquin quintzacuac pa calijtic moxtin pa inminpolehuilisi. Ma yoje, pan ipampa in arca Dios quinixtic pin ipolehuilisi in al jan se quesqui san, jan ocho (chicué) lacames huan sihuames. <sup>21</sup> Huan in al tehuanten huil tiqijtulo unca quinami in al quiman lacuayatequilo. Ca ilacuayatequilisi Jesús anmonextilía pampa anunca iyaxca huan yoje anunca laquixtili pin polehuilisi. In lacuayatequilisi amo unca pa annijchipahuilis anmocuerpo. In lacuayatequilisi, quema, lanextia pampa neli anquilijtica Dios quinami anquinequi anyuli cuali quinami annitznextilía anmolajmatilisi hual Dios quilalc pa amhuanten anmoyolo. Huan inon huil anquichía pampa Jesucristo yulic oc sejpa, quistataya capa cataloaya in mijquimes. <sup>22</sup> Yihual uyac pin cielo, nepa huan Dios huelitijtcate. Yihual monotza pa quipías mochi tolasojlalisi. Huan moxtin in lanahuatinijmes pin cielo, moxtin hual

quipialo lahuelilitisli huan moxtin hual quipialo chichahualisli pa huelitisi quipiasi pa quineltocasi.

## 4

### *Dios techueliltic pa tictequipanuilisi*

<sup>1</sup> Cristo panuc lacocoltilisli quiman yec lalac nican pan lalticpan. Pampa in, amhuanten noje xilajtucan pa anmoyolo quinami Cristo huan yojque ximochicahualtican pa anpanus lacocoltilisli. Aquí hual panuc lacocoltilisli pa icuerpo yajmo quipía laijlaculisli huelitijtica pa icuerpo. <sup>2</sup> Yoje, yajmo anyulis anquinetica anquichía len quinequilo quichihualo yehuanten hual amo quineltocalo Jesucristo. Axan anyuli quinami Dios quinequi, pa mochi tonalijmes hual anmitzcahuilía pa anyulis pan in lalticpan.

<sup>3</sup> Quema, pampa anyuliaya míac tonalijmes quiman anquichihuani amo cuali quinami quinequilo yehuanten hual amo quineltocalo Dios. Axcan, anlamic ca in. Amhuanten yajmo xiyulican anquinetinemi ancana sihuames o lacames. Amo xicnecninemican ancana len hual amo anmoyaxca. Amo xilahuanacan, amo xinejnentinemican antzajtztinemi pin lajcotiyan quinami lahuanquimes. Amo xiacan pin fiestas (ilhuimes) pa anlacas míac huan pa anlaunis huan cuaquín anlahuana. Amo xicunican len pa anlahunas huan amo xiacan capa quinmolancuacuetzililo inminlaixpan monos. Nepa quichihualo len niman amo cuali, pampa inon amo unca quinami quijtúa Dios ilajtol. <sup>4</sup> Yajmo anquichías yojque. Huan yehuanten anmitzitalo ca lapolulisli pampa amhuanten yajmo anquinequi anquichía quinami anquinequini. Yajmo anejsehuía ca yehuanten pa anquichías len niman amo cuali quinami yehuanten. Huan pampa in anmitzhuejuecaltilo.

<sup>5</sup> Ma yoje, pampa inon, yehuanten quipiasi pa quinanquilisi Dios pa inminlajlaculisli. Dios unca lalalili mojmosta pa quinmilis in lacocoltilisli hual quipialo pa panusi yehuanten hual yulticate huan hual micticate.

<sup>6</sup> Pampa inon, quinlamachiltije in lamachiltisli cuali ca yehuanten hual mictataloaya, pa yoje quinami quimatoca inmnyolo huil yuli quinami yuli Dios, mas que pin lalticpan yelosquiaya latilanili pa panusi lacocoltilisli jan quinami moxtin lacames.

<sup>7</sup> Ajsitihuala in tonali quiman mochi lamis. Pampa in, xicmatican quinami monequi pa anhuelitis mochi sejse pa yihual ihuían. Xilajnamiquican cuali pa anquimatis quinami Dios quinequi pa anquilajlanis. <sup>8</sup> Ma yoje, mochi innojen lajtomes amo monotzalo yoje míac quinami monotza inon: Monequi pa anyulis anmolasojlatica se huan oc se ca mochi anmochicahualisli, pampa aquí hual lalasojla quipujpuhua míac inminlajlaculisli. Noje Dios quipujpuhua míac laijlaculisli yihual hual quinlasojla oc sequin.

<sup>9</sup> Huan anmocnián hual quineltocalo Cristo, xiquinnamiquican ca paquilisi quiman hualalo pa amochan. Amo xiquijtutínemican pampa yehuanten anmitzmacalo tequil. <sup>10</sup> Mochi sejse ca amhuanten canac len ilahuelilitisli Dios. Xictequipanucan in lahuelilitisli pa anmopalehuis se huan oc se capa amhuanten. Quema, Dios tejchihuilía niman míac cuali, huan Dios techmaca in lajtol pa tictequipanusi cuali mochi in cuali hual tejchihuilic. <sup>11</sup> Yoje, sinda Dios quimacac lahuelilitisli se pa lajtus cuali, ma yén (yecan) ilajtomes yihual quinami Dios ilajtol. Sinda se latequipanuilía, ma latequipanuilisi quinami quipía chichahualisli hual Dios temaca. Huan mochi hual anquichía, xicchiuacan yoje pa moxtin quitasi pampa Dios quipía chichahualisli hué. Inon quitasi pan ipampa quinami Jesucristo unca capa amhuanten. Ma

camo mocahua pa quipías Dios ichicahualisli hué huan ilahueliltlisli pa huelitis. Yoje ma ye.

### *Quinami in laneltocanijmes panulo lacocoltilisli*

<sup>12</sup> Lasojli nocnían, sinda anmitzajsis tonalijmes quiman anpanúa lacocoltilisli, amo xiquijtucan pa anmoyolo pampa amo monequi pa anmitzpanus len quinami inon sinda anmococúa quinami anmitzcocoltisquiaya tixuxli. In unca se lanextilisli hual Dios anmitztilanilic pa quimatis sinda neli anquineltoca. Pampa in, amo xiquijtucan quinami cataya len hual amo anquimati leca anmitzpanujtica. <sup>13</sup> Yes cuali pa anquipías paquilisli pampa anpanujtica in nadita o míac lacocoltilisli hual unca quinami Cristo quipanuc. Yoje, anquipías niman míac paquilisli noje quiman hualas Cristo oc sejpa pan lalticpan ca mochi ichicahualisli huan laixpelalisli hué. <sup>14</sup> Sinda anunca lahuejuecaltili pampa anquineltoca Cristo, yoje anquipixtica paquilisli. Anquipía mochi hual anquinequi pa anmoyolo, pampa Dios iEspíritu huan ilaixpelalisli huan ichicahualisli mosejtica pa anmoyolo. <sup>15</sup> Ma yoje, ximoiztiacan pa camo quiman cayas se ca amhuanten lamictini o laxtequini o se hual quichía len yes hual unca elehuis. Huan ma camo caya se ca amhuanten hual latilantinemi capa amo unca iyaxca pa latilanis. Sinda se panúa lacocoltilisli pampa quichía len quinami innojen, cuaquín cahuilúa pa panus lacocoltilisli. <sup>16</sup> Ma yoje, sinda se panúa lacocoltilisli pampa quineltoca Cristo, ma camo pinahua. Cayasquiaya niman cuali pa yoje quichihuilis pa Dios yes laitali niman hué huan cualtichin pampa in se quineltoca Jesucristo huan yuli quinami Cristo quinequi.

<sup>17</sup> Monequi pa anquichihuilis pa Dios yes laitali hué pampa ajsije tonalijmes quiman Dios pehua quinchihuilía len quinmahuilúa yehuanten hual quinlajtultic pa yihual ihuían. Huan sinda Dios pehua ca tehuanten pa tejchihuilis quinami techahuilúa, cuaquín ¿len quinpanus yehuanten hual amo quineltocalo Dios ilamachiltlisli cuali quiman Dios quinchihuilis quinami quinmahuilúa? Yihual quincocoltis niman chicahuac. <sup>18</sup> Huan sinda ca nadita amo yesquiaya laquixtili pin polehUILISli yehuanten hual yulilo quichijtcate quinami Dios quinequi, cuaquín ¿len quipanus se hual amo quixtoca ilajtol Dios huan mojmosta yuli quichijtica len amo cuali?

<sup>19</sup> Pampa in, yehuanten hual panulo lacocoltilisli pampa Dios quinequi pa yoje yes, monequi pa yehuanten motemacasi ca Dios hual quinchíac. Quema, ma motemacacan ca Dios pa yihual quinlachilis huan yehuanten ma yultiacan quichijtcate len unca cuali. Dios, quema, quichijtías in hual quijtúa pampa yahui quichía.

## 5

### *Quimaca lajtol in laneltocanijmes*

<sup>1</sup> In abuelojmes ca amhuanten, annimitzilía inon: Nehual niabuelito quinami amhuanten, huan niqitac Cristo quiman panuaya lacocoltilisli. Huan pampa in, nicmati neli pampa panuc lacocoltilisli huan inon niqijtúa neli. Noje nicpía se nadita ichicahualisli hué Cristo huan ilaixpelalisli cualtichin Cristo. Yihual amo huejcahuas nesis nican pan lalticpan. Pampín, annimitzilía ca mochi noyolo inon: <sup>2</sup> Xiquinlachilican in laneltocanijmes capa amhuanten quinami anquinlachilisquiaya se lanechiculisli borregos, pampa neli yehuanten in laneltocanijmes cate quinami Dios iborregos. Xiquinlachilican ca lanequilisli. Amo xiquitacan pa anmoyolo quinami Dios anmitzejsehuiltitica pa anquinlachilis. Huan amo xiquinlachilican jan pa

anmonechicuhuilis tomin ca se lanechiculisli amo cuali. San xiquinlachilican ca mochi anmoyolo. <sup>3</sup> Huan xiquinlachilican in laneltocanijmes, amo quinami ancataya tecojuan cualancudos huan chijchicahuac. Dios amo anmitzljaltultic pa anquinlachilis yoje quinami huejueyenten. Inon hual cuali pa anquichías: Monequi pa anmochías mochi sejse ca amhuanten se lanextilisli cuali pa in laneltocanijmes pa yoje yehuanten quinequisi yulisi quinami amhuanten. <sup>4</sup> Huan in tonali hual nesis Jesucristo in laitani niman hué, yihual anmijchihuilis míac hual hué huan anmitzmacas paquilisli hual amo quiman lamis. Anlaixpelas ca ilaixpelalisli cualtichin.

<sup>5</sup> Huan jan yoje, amhuanten in lacames yajyancuic, xiclalican pa anquinneltocas in abuelojmes. Huan anmoxtin abuelojmes huan lacames yajyancuic, ximochihuacan quinami tijtipichin anmolaixpan se huan oc se. Xicchihuacan yojque pampa Dios ilajtol quijtúa inon, quil:

Dios molalía inminpan yehuanten hual moixtocalo,

huan quinchihuilía cuali yehuanten hual moitalo tijtipichin.

<sup>6</sup> Xicmacahuiltican Dios pa yihual anmijchías amhuanten tijtipichin pan ipampa ichicahualisli hué. Yoje yihual anmijchías hué quiman ajsis in tonali hual yihual quialic pa anmijchías hué. <sup>7</sup> Huan axan quiman anquichixtica in tonali, xiclajlanican Dios pa anmitzquixtilis mochi hual anmitzmaca etialisli pa anmoyolo, pampa yihual anmitziznamiquía amhuanten ca míac lasojlalisli pa iyolo.

<sup>8</sup> Xilajtucan cuali pa anmoyolo huan ximolachilijtinemican. Anmolacocolini in lili anmitznapachijtinemi quinami se león soluntinemi hual quitemujtica aqwi yes pa quicuas. In quinequi quijtúa in lili quinequi pa anmoixtis capa Cristo iojli pa huil anmitzquitzquis pa anmitzneltoaltis quinami yihual in lili quinequi. <sup>9</sup> Xiclalican ca chicahualisli pa anmoyolo pa anquixcomacas, xicneltoacan Dios ca mochi anmochicahualisli. Anquimati pampa anmocnían pa mochi in lalticpan quipias pa mopepenialtisi pa panusi in lacocoltilisli hual anquipanujtica amhuanten. <sup>10</sup> Ma yoje, Dios hual quichihuilía cuali pa quinpalehúis moxtin quiman yes monequi pa yesi lapalehuili, yihual anmitznotzac pa anquineltoacas Cristo. Anmitznotzac pa anquipías nadita ichicahualisli hué huan ilaixpelalisli cualtichin. Inon anquipías quiman anlamic anpanuc lacocoltilisli nican pan lalticpan pa je nadita. Cuaquinon yihual Dios lamis quichías mochi hual yahui anmijchihuilía. Anmijchihuilis pa camo anmijcuanis capa yihual iojli. Anmitzmacas chicahualisli huan anmijchihuilis pa anquilalis anmolaneltoaltisli niman míac ca ilajtol. <sup>11</sup> Yihual ma quipía in chicahualisli pa camo quiman lamis huelitis. Yoje ma ye.

### *Lami in amal ca lapialtilisli*

<sup>12</sup> Pan ipampa Silvano annimitzjcuiluilic in amal amo ca míac lajtomes. Yihual Silvano se tocní hual neli quineltoaca toTata, inon niqijjtúa neli. Ca in amal nicnequic annimijchicahualtic pa anquineltoacas in hual annimiltzilic huan pa anmopepenialtis pa anpanus mochi in lacocoltilisli hual anmitzpanúa. Huan neli annimitzilía pampa in hual annimitzjcuiluilic unca melahuac, amhuanten anquipías anmolajco ichicahualisli Dios huan ilaixpelalisli cualtichin. Inon in cuali hual anmijchihuilía. Pampa in, xiajtiacan anquineltoacata.

<sup>13</sup> Anmijchicahualo in laneltocanijmes hual cate nican pa Babilón. Noje anmijchicahua Marcos hual unca quinami se noxolol. <sup>14</sup> Ximopialtican

amhuanten se huan oc se, ximotenamiquican ca se latenamiquilisli hual lanextía quinami anmolasoja se huan oc se quinami icnían.

Ma quipiacan mosehuilisli pa inminyolo moxtin hual quinelto calo Cristo huan moxtin hual iyaxca Cristo. Yojé ma ye.

## In oc se amal hual quijcuiluc San Pedro in lanahuatini

### *Pedro quinmijcuilulía in laneltocanijmes*

<sup>1</sup> Nehual Simón Pedro itequipanujquil huan ilanahuatini Jesucristo animitzjcuilulijtica amhuanten hual Dios anmitzmacac laneltocalisli calica anquipía mochi in cuali hual Dios quinequi pa anquipías. Huan anmolaneltocalisli ancanac quiman anquicaquic in lamaxtilisli jan yoje quinami ticanaje tolaneltocalisli hual techmacaje toDios huan Jesucristo hual techquixtic pa camo tipolehuisi. Pampín amhuanten huan tehuanten timoitalo jan yoje ilaixpan Dios. Yihual techmacac in laneltocalisli pampa yihual amo quita se lalac hué huan oc se lalac amo yoje hué quiman quinmaca laneltocalisli. <sup>2</sup> Ma Dios huan Jesús toTata anmijchihuilican cuali. Huan ma anmitzmacacan mosehuilisli pa anmoyolo niman míac pan ipampa quinami anquinmiximati.

### *Se laneltocani quipías pa quinnextilis oc sequin quinami Dios motequihúa pa mochías niman cuali se laneltocani*

<sup>3</sup> Pan ipampa ichichahualisli hual jan yihual quipía, Dios techmacac mochi hual unca ca in yulilisli hual tejchiphuulía toyolo, in yulilisli hual amo quiman lamis. Noje techmacac mochi hual technextilía quinami ticpiasi pa tiyulisi ticpaquiltiticate Dios. Huan in mochi ticpialo pan ipampa quinami tiquiximatilo Jesucristo hual technotzac pa tiyesi iyaxca. Technotzac pan ipampa in cuali niman hué hual san Dios huil tejchihuilía. Technotzac noje pan ipampa ichichahualisli cuali calica yihual quichía mochi cuali. <sup>4</sup> Pan ipampa innojen, Dios techilic neli pampa tejchihuilía míac hual unca hué huan techmonotzilía niman míac. Pan inminpampa innojen lajtomes hual techilic neli, amhuanten huil anajsis anquipías in hual anmijchihuilía quinami Dios. Huil annoquixtilis mochi in amo cuali pin lalticpan hual quijlacúa anmoyolo, in amo cuali hual anquinequi anquichía nican pan lalticpan. <sup>5</sup> Huan pampa anquinpía innojen, ximotolinican ca mochi anmoyolo pa anquiscaltis anmolaneltocalisli. Amo ximomajtican pa anquichías in hual anquimati Dios quinequi pa anquichías. Huan xiquiscaltican anmochichahualisli ca lajmatilisli. <sup>6</sup> Huan xiquiscaltican anmolajmatilisli ca quinami anmotzacuilis pa camo anquichías in hual amo cuali. Huan xiquiscaltican in quinami anmotzacuilis pa camo anquichías in hual amo cuali ca quinami anyuli anquitocatica Cristo huan quinami anyuli anmochijtica lacames hual oc sequin quimatilo pampa amo quiman anquicuaajuamana. Huan xiquiscaltican inon ca quinami anquitequipanuulía Dios. <sup>7</sup> Huan xiquiscaltican in quinami anquitequipanuulía Dios ca quinami anquinlasojla anmocnián. Huan xiquiscaltican in quinami anquinlasojla anmocnián ca quinami anquinlasojla moxtin oc sequín.

<sup>8</sup> Quema, xicchihuacan yojque, pampa sinda mojmosta anyuli anquichijtica quinami innojen hual nilamic annimitzilic, cuaquín anquiximatis cuali toTata Jesucristo huan anquimatis quinami niman cuali huil anquitequipanuulis pa anquinmanas oc sequin pa quilalisi laneltocalisli ca yihual. <sup>9</sup> Aqi hual amo quimati yuli quichijtica innojen hual annimitzilic, yoje yihual unca quinami se pachacal huan quilcahuac quinami in Tata quichiphuulic iyolo ilaijlaculisli hual quichihuani quiman ayamo

quimatiaya inahuac Jesucristo. <sup>10</sup> Pampa in, nocnían, ximotolintiayan míac mochi tonali pa anyulis quinami annimitzilizic. Yojque anajsis anquimatis neli quinami in Tata anmitznotzac pa anmitzljaltultic pa anyes iyaxca. Jo quema, pampa sinda anyuli quinami quijtulo innojen lajtomes hual annimitzjcuilulic, cuaquín amo quiman annimjcuanis pan iojli Dios. <sup>11</sup> Yoje Dios anmitzmacas pa yes anmoyaxca pa ancalaquis capa toTata Jesucristo hual techquixtic pa camo tipolehuisi. Ancalaquis pa anmochahuas capa yihual huelitía sinda anquineltocas in hual annimitzjcuilulic.

<sup>12</sup> Pampa in, nía niclalía pa annimitzijnamiquiltis innojen mas que axan anquinmati. Huan neli amo anmochahuas pa anquineltocas Dios ilajtol lajcuiluli hual unca melahuac, ilajtol hual unca ca amhuanten. <sup>13</sup> Niquijtúa unca cuali pa annimijchicahualtis pa anmoyolo pa anquijnamiquis mochi inon quiman niyultica. <sup>14</sup> Annimitzilía inon pampa nicmati amo huejcahuas ajsis in tonali quiman nimigis, jan quinami neli nechnextilic toTata Jesucristo. <sup>15</sup> Ma yoje, nimotolinis pa nijcahuas ca amhuanten se lajcuilulisli calica itequi amhuanten huil anquinmijnamiquis mochi innojen quiman yajmo niunca.

### *Yehuanten hual quitaje quinami Cristo unca hué*

<sup>16</sup> Quiman antimitzlamachiltije ichicahualisli hué toTata Jesucristo huan quiman yihual yahui huala pan lalticpan oc sejpa, amo antimitzpuhuililoaya jan lajtomes san hual tiquinchijchihuae pa antimitzcuajcuamanasi. No, tehuanten tiquitaje ca toixtololojmes quinami unca niman hué Jesucristo.

<sup>17</sup> Cataya quiman Dios toTajtzin technextilic yihual quimacatica Jesucristo laixpelalisli cualtichin, technextilic quinami quilasojla nepa pa in tonali quiman yihual Dios laquetzac ca yihual. Tijaquije laquetzac pin cielo capa yihual unca ca chichahualisli hué huan laixpelalisli cualtichin. Quema, Dios quilic in lajtomes iyampa Jesucristo, quil: "In se unca noXolol hual niclasojla, ca yihual nicpía niman míac paquilisli." <sup>18</sup> Huan in lajtol tehuanten tijaquije hualajtataya pin cielo quiman ticataloaya ca Jesucristo nepa pani pin loma (tepel) hual Dios quilalic pa panusquiaya in jan nepa pani in loma san.

<sup>19</sup> Huan ticpialo len hual unca niman melahuac, amo ajsi monotza yoje míac inon hual tiquitaje. Unca inon hual quijcuiluje Dios ilajtunijmes. Huan anquichías cuali sinda anquijnamiquis in lajtomes quinami cate se lahuilisli laixpelatica pan capa laticumac. Quema, xiquinmijnamiquican innojen quiman anquichías pa hualas Cristo oc sejpa pan lalticpan. Ajsis in tonali, cuaquín anquimatis pampa Cristo ilaixpelalisli yahui annimjzacuilía pa yajmo anquimahuilis pa anmoyolo sinda in lajtomes cate melahuac o amo cate melahuac. Unca quinami quiman nesi in lucero (silalin) laxpoyahuero, cuaquinon ticmatilo pampa yahui lanesi. <sup>20</sup> Huan xicmatican inon hual monotza niman míac. Amo ajsi monotza yoje míac mochi oc se lajtol: Amo quiman unca se ilanahuatilisli Dios hual aquí yes huil quimati len quinequi quijtúa pan ipampa ilajmatilisli ihuían. <sup>21</sup> Inon unca pampa amo unca se ilajtuni Dios hual quijtuc ilajtomes Dios jan pampa yihual ihuían quinequiaya quinmijtu. San Dios ilajtunijmes quinmijtuje ilajtomes Dios. Huan san quinmijtuje quiman in Espíritu Santo quinlaliliaya ilajtomes pa inminyolo in lajtunijmes. Dios quinlajtultic ilajtunijmes pa quijtulosquiaya.

## 2

*Yehuanten hual quimaxtilo islacatilisli  
(Judas 4-13)*



<sup>1</sup> Ma yoje, pa yina ca yehuanten catanijme lajtunijmes hual islacatinijme, quijtunijme pampa Dios quintilanic. Jan yoje cayasi ca amhuanten lamaxtinijmes quinami yehuanten. Hualasi ca amhuanten quipixticate lamaxtilisli hual amo unca quinami quijtúa Dios ilajtol. Ca in lamaxtilisli hualasi ca amhuanten huan amo anquimatis len yalo quichihualo, cayasi quinami lacochehuanijmes. Huan sinda quineltoca se inminlamaxtilisli, yihual yoje moxilus capa Dios huan cayas laijlaculi. Innojen lamaxtinijmes quijtusi pampa amo unca neli toTeco Jesucristo quincuhuac quiman miquic pan cuahuil. Pampín moijlacusi huan amo huejcahuas quiman inon quinpanus. Moxilusi capa Dios huan amo quiman huil mocuepasi. <sup>2</sup> Huan miac quichihuasi quinami innojen lamaxtinijmes lamaxtilo. Yulisli quichijiasi in hual niman elehuis huan amo pinahuasi. Pampa inon yehuanten hual amo quineltocalo Dios quihuejuecaltisi Dios iojli pampa amo yulilo cuali innojen lamaxtinijmes huan yehuanten hual quineltocalo inminlamaxtilisli. <sup>3</sup> Anmitzcujcuamanasi huan anmitzcajcayahuasi pa yehuanten anmitzanilisli anmotomin. Pa yina lamaxtiti hualaloaya lacames quinami yehuanten huan axcan noje lamaxtilo. Huan Dios hual quijnami quia mochi hual quichihualo, quilalic pa yehuanten yasi capa panusi lacocoltilisli. Dios amo quiman cochi, huan yehuanten Dios quinxilus ilaixpan yihual ca capic amo quiman mocuepasi ca yihual.

<sup>4</sup> Inon ticmatilo, pampa Dios quintilanic pa panusi lacocoltilisli in lanahuatinijmes pin cielo hual quichihuaje laijlaculisli. Quinlacac pa mocahuasi capa huejcalan huan capa laticumac. Nepa quincahuac, amo quinmacahuas. Huan quinchiasi in tonali quiman Dios quinmilis pampa quipiasi moxilusi pa yajmo cayasi capa yihual pa panusi lacocoltilisli huan amo quiman mocuepasi. <sup>5</sup> Huan Dios amo quinquixtic pa camo polehuisi yehuanten hual yulinijme pa yina. Jan quinquixtic Noé huan oc sequin siete (chicome) san pa camo polehuisi. Noé lamachiltitinemini quinami Dios quijtúa monequi pa lacames yulisli quinami quijtúa ilajtol. Ma yoje, amo quinequiloaya quicaquilo Noé. Cuaquín Dios catocctic mochi in lalticpan ca al huan yojque miquije moxtin hual amo momajtiniyime ilaixpan Dios. <sup>6</sup> Huan Dios quinchichinuc in caltilan Sodoma huan in caltilan Gomorra huan mochihuaje tinexli. Inon quichiac pa yelosquiaya innojen caltilan se lanextilisli, pa yoje yehuanten hual amo quimatilo momajtilo ilaixpan Dios quimatisi len yahui quinpanúa. <sup>7</sup> Huan Dios quiquixtic Lot pin polehuilisli quiman Dios yahuiaya quinchichinu Sodoma huan Gomorra. Lot yec lalac hual yulini quinami quinequi Dios. Huan quicocuni iyolo Lot quiman quitani quinami yulinijme amo cuali in lacames nepa, amo quineltocanijme Dios ilajtol. <sup>8</sup> Quema, pampa quiman chantini in lalac cuali ca yehuanten, nepa quitani huan quicaquini miac amo cuali hual quichihuaniyime. Pampa in, quicocuni mojmosta iyolo cuali. <sup>9</sup> Ticmatilo pampa quichiac mochi inon in Tata. Pampa in, ticmatilo yihual quimati quinami quiquixtia pa camo polehuis se hual panujtica lacocoltilisli. Noje quimati quinami quipixtia pa in lacocoltilisli yehuanten hual amo quimatilo momajtilo ilaixpan Dios. Yojque quinpías pa quiman ajsis in tonali quiman quintojtocas ilaixpan yihual ca capic yesi lacocoltili huan amo huil mocuepasi. <sup>10</sup> Huan niman neli unca pampa Dios quincocoltis yehuanten hual itequi quinequilo quichihualo niman amo cuali. Quinequilo quichihualo len quinequilo inmincuerpos (inminacayo) pa quichihuasi, noje quixixiculo in Tata ilahueltilisli. Innojen lamaxtinijmes amo pinahualo. Amo quimatilo momajtilo. Quinhuejuecaltilo yehuanten hual quipialo chicahuilisli huan laixpelalisli cualtichin. <sup>11</sup> Dios ilanahuatinijmes pin cielo quipialo niman

míac chichahualisli huan lahuelilitlisli. Inon amo quiman ajsisi quipiasí innojen lamaxtinijmes ej'elehuis hual amo momajtilo quinhuejuecaltilo. Ma yoje, in Tata Dios ilanahuatinijmes pin cielo momajtilo quinhuejuecaltilo ca laxijxiculisli iyampa in Tata Dios yehuanten hual quipialo lahuelilitlisli elehuis. <sup>12</sup> Amo yoje innojen lamaxtinijmes amo cuajcuali. Cate quinami yulijquimes hual amo huil laijnamiqúilo. Huan quinami cate in yulijquimes, innojen lamaxtinijmes lacatije pa yesi laquitzquili huan lamictili. Quihuejuecaltilo inahuac len amo quimatilo nindeno. Pampa in, polehuisi quinami yulijquimes quiman Dios quíntojtocas ilaixpan yihual ca capic yesi lacocoltili, capa amo huil mocuepasi. <sup>13</sup> Panusi lacocoltilisli hual yes inminlaxlahuilisli pa in amo cuali hual yehuanten quichihuaje. Pa semilhuil quixtocalo lahuanalo huan quichihualo mochi amo cuali. Yoje quichihualo quiman lacualo huan launilo ca amhuanten, pampa lahuanalo huan quichihualo mochi capa amhuanten hual amo cana cuali. Quixtocalo míac quichihualo quinami inmincuerpos quinequilo pa quichihuasi.

<sup>14</sup> Innojen lamaxtinijmes quitalo se síhual huan janajnaxcan quinequilo motecaló ca yihual sínda huil. Itequi quinequilo quichihualo laijlaculisli huan amo quiman quíjtulo pa inminyolo pampa yalo lamilo ca inon. Yehuanten quinmaxtilo oc sequin hual amo quimatilo míac Dios ilajtol huan amo quinmahuililo sínda inon hual quinmaxtilo unca melahuac o amo melahuac. Yojque pehualo quichihualo laijlaculisli quinami innojen lamaxtinijmes amo cuajcuali. Ma yoje, innojen lamaxtinijmes quipialo inminyolo lamaxtili cuali pa lacajcayahuasi pa canasi míac tomin pa yehuanten inminhuán. Yehuanten, lacames ej'elehuis hual Dios quinmajmajua pa quíntojtocas pa como quiman mocuepasi ca yihual. <sup>15</sup> Quicajcahuaje Dios íojli melahuac, mopoluje pa ojlimes amo cuajcuali. Canaje íojli Balaam íxolol Bosor. Mas que yec ilajtuni Dios, in Balaam quixtocac canac míac tomin pan ípampa quinami quichíac innojen lachihualisli amo cuajcuali. <sup>16</sup> Ma yoje, Balaam cataya la'ajuali pan ípampa íburra. In burras amo huil lajtulo. Ma yoje Dios quíntozaltic íburra Balaam quinami lacames. Yoje in burra quítzacuilic Balaam pa como quichiasquíaya in hual yahuíaya quichía. Cataya pampa Balaam amo quínequíaya laijnamiquí cuali.

<sup>17</sup> Innojen lamaxtinijmes amo cuajcuali amo anmitzpalehuilo nindeno. Cate quinami se íixtolólon al hual huaquí, cate quinami ayahuimes huan mextemimes hual quínhuica in íjyecal huan amo quipialo quíahuil. Quema, pa in lamaxtinijmes amo cuajcuali, Dios quípia capa yahuí quíntzacua, capa niman laticumac. Huan yehuanten cayasi panujticate lacocoltilisli hual amo quiman lamis. <sup>18</sup> Unca pampa laquetzalo míac ca lajtomes hual amo monotzalo, moixtocaticate pampa huil quinmaxtilo lacames ca inminlamaxtilisli hual amo melahuac. Huan yojque quíncuajcuamanalo lacames pa quichihuasi mochi hual quínmílacúa. Innojen lacames yulínijme quichíjticate amo cuali quinami moxtin hual amo yulilo quinami quíjtulo Dios ilajtomes. Cuaquínon pehualoaya mocahualo pa yulísi yoje. Cuaquínon quiman panuc nadíte pehualoaya yulilo cuali. Cuaquí quínsíloaya in lamaxtinijmes amo cuajcuali huan pehualoaya quínlaquetzililo, huan yoje in lacames cataloaya lacuajcuamanali huan pehualoaya yulilo amo cuali oc seípa. <sup>19</sup> Innojen lamaxtinijmes quínmílo pampa yehuanten huil yulilo yojque. Quínmílo pampa tehuanten ticate lamacahuili pa como tícneltoacasi Dios ilajtol, yajmo títequípanujquimes hual tícpiasi pa tícneltoacasi ilajtol. Ma yoje, innojen lamaxtinijmes yulilo quichíjínemílo amo cuali huan yojque yehuanten cate quinami tequípanujquimes hual quípiasí pa quichihuasi in amo cuali. Se mochía yoje pampa quísulahua

len yes hual yuli quichijtica. <sup>20</sup> Sinda lacames pehualo quineltoalo toTata Jesucristo hual techquixtía pa camo tipolehuisi huan yajmo quichijtinemilo in amo cuali hual quinhucias pa polehuisi, yoje moquixtilije ipucmilisli in lalticpan. Ma yoje, sinda pehualo quichijtinemilo oc sejpa quinami quichi-huanijme, cuaquín niman moijlacusi. Yoique mosulahuasi pan ipampa in hual mocahuaje pa quichihualosquiaya quiman pehuaje quineltoaje Cristo. Cuaquinon moifasi polejtcate quinami yoje amo polejtataloaya quiman ayamo pehuaje quineltoaje Cristo. <sup>21</sup> Cataya cuali pa yehuanten sinda amo quiman quimatiloaya Jesucristo iojli cuali. Axan quimatiloaya huan ma yoje moquixtije pa camo mocahuasquiaya pa iojli, amo quinequije quineltoaje ilajtol hual yihual quinnexilic. <sup>22</sup> Yoje quinpanuc yehuanten quinami quijitulo lacames, quil: “In pelo mocuepa quicua len quijsolac, huan in coyamil (cuchi) la'altili mocuepa maltía pin succuil.” Yoique in lacames canaloya in ojli cuali, moquixtije, canaje oc sejpa in ojli amo cuali.

### 3

#### *In tonali quiman hualas oc sejpa in Tata*

<sup>1</sup> Ome amames ca in amal annimitzizcuilulic, lasojli nocnían. Huan ca in ome amames nicchicahualtítica anmolajmatilisli chipahuac ca Dios ilajtol hual unca pa anmoyolo. Nicchicahualtítica pan ipampa quinami annimitziznamiquiltítica. <sup>2</sup> Inon nicchía pa yoique anquijnamiquis len quijtuje pa yina Dios ilajtunijmes hual yihual molajtultilic pa quijtusi ilajtomes. Huan annimitziznamiquiltítica pa anquijnamiquis len quijtuc in Tata hual techquixtic pa camo tipolehuisi, in hual anmolanhuatiniymes anmitzmaxtije.

<sup>3</sup> Monequi pa camo quiman anquilcahuas inon: Pin tonalijmes quiman yahui lámí mochi, hualasi lahuitzquilinijmes. Lahuitzquilijtinemisi huan yulisi quichijtcate len yes elehuis hual quinequilo quichihualo. <sup>4</sup> Quijtusi, quil: “Axcan, ¿capa unca in Tata? Yihual quinmilic totajtzitzian pampa yahuiaya huala oc sejpa. Huan quiman polehuije totajtzitzian, amo hualac oc sejpa. Mochi nejnentía quinami nejnentiahuiaya pa yina, jan yoje quinami nejnentiahuiaya pin tonalijmes quiman pehuac in lalticpan.” <sup>5</sup> Yoje quijtusi yehuanten, pampa amo quinequisi quijnamiquis len panuc pa yina. Pa yina cataloaya in cielos (ilhuicac) huan in lalticpan. Dios pan ipampa ilajtomes quinchíac. In lalticpan majcoquic quistataya pin al pan ipampa in al, Dios quixiluc in al pa nesis in lalticpan. <sup>6</sup> Huan pan ipampa al Dios quixitinic in lalticpan. Huan yehuanten hual cataloaya pa yina quinmatotcic. <sup>7</sup> Axan, ajsitihualas in tonali hual Dios quinxitinis huan quintilanis pa panusi laco-coltilisli yehuanten hual amo quimatilo momajtilo ilaixpan yihual. Cuaquín pa in tonali Dios pan ipampa ilajtol yahui quinxitinía ca tixuxli in cielos huan in lalticpan hual cate axan. Yihual quinmajcoctica pa quinxitinis yoje.

<sup>8</sup> Ma yoje, amhuanten, lasojli nocnían, monequi pa anmoijnamiquiltis inon quinami in Tata quita se tonali. Ca yihual se tonali unca quinami mil xixihuimes huan ca yihual mil xixihuimes cate quinami se tonali. <sup>9</sup> Dios in Tata amo huejcahua pa quichías len techilic neli pampa yahuiaya quichía, mas que sequin quijtol yihual huejcajtica pa quichías. Dios motzacuilía pa camo hualas pa quintojtocas ilaixpan yihual ca capic amo huil mocuepasi. Amo quinequi pa se polehucis. Quinequi pa moxtin ajsisi quipalasi inminyolo pa lajtusi pa inminyolo quinami yihual.

<sup>10</sup> In tonali hual hualas in Tata ajsis quinami ajsi se laxtequini, in quinequi quijtúa amaqui quimati quiman yahui ajsi in tonali. Pan in tonali moxilusi

in cielos ca se comunilisi hué, yajmo nesis huan molalaltisi in tonali huan in mesli huan in luceros (silalimes) ca lalalisi niman totonqui. Yoje xitinisi atiaxticate. Huan in lalticpan huan mochi pin lalticpan hual quichihuaje in lacames yajmo nesis.

<sup>11</sup> Yoje, pampa ticmatilo mochi innojen yalo xitinilo, ¡len amo monequi pa anyes lacames niman cuali pa jan anyulis san pa anquitequipanullis Dios ca mochi anmoyolo! <sup>12</sup> Monequi pa anquichixtías pa ajsis in tonali quiman Dios in Tata nesis. Huan xicchiuacan mochi len huil anquichía pa anquejsehuiltis pa ajsis in tonali. Inon huil anquichía pan ipampa quinami anyulis cuali quinami Dios quinequi. Pa in tonali nesis Dios huan pampa in, molalaltisi in cielos huan xitinisi, huan atiasi mochi in hual Dios quinchíac pin cielo huan pan lalticpan ca lalalisi niman totonqui. <sup>13</sup> Ma yoje, tehuanten ticchixticate cielos huan lalticpan yajyancuic, quinami Dios neli quijtuc pampa yahuiaya quinchía. Pin lalticpan huan cielos yajyancuic amo cayas laijlaculisli, moxtin lachihuasi cuali quinami Dios quinequi.

<sup>14</sup> Pampa in, lasojli nocnían, sinda anquichixtía in tonali quiman Dios quintojtocas ilaixpan yihual moxtin hual amo quimatilo momajtilo ilaixpan, ximotolinican pa anmoitas ilaixpan Dios amo anquipixtica nindeno ca amhuanten hual Dios amo quixtoca. Ximotolinican pa anquipías Dios imosehuilisli pa anmoyolo. <sup>15</sup> Huan xiquijnamiquican inon quinami Dios huejcahua pa cualanis ca tehuanten pampa quinequi techquixtía pa camo tipolehuisi pampa ticchiuaje laijlaculisli. Jan yoje anmitzjcuilulic noje tocní lasojli Pablo ca in lajmatilisli hual quimacac Dios. <sup>16</sup> Yoje laquetza noje pa mochi iamames innahuac innojen hual nilamic annimitzilic. Pa iamames Pablo cate sequin lajtomes hual amo huil quimati se jan ajnaxcan len quinequilo quijtulo. Huan cate lacames hual amo quixtocalo huan amo quinequilo quimatilo len quinequi quijtúa in hual quijcuiluc Pablo. Pampin quijtulo pampa quinequilo quijtulo oc se lamaxtilisli pa inon hual Pablo quinequiaya quijtu. Huan quichihualo jan yoje ca oc sequin ilajtomes lajcuiluli hual Dios ilajtunjmes quijcuiluje. Ma yoje, Dios quintojtocas ilaixpan yihual pa panusi lacocoltisli pampa yulilo laijlaculi. Quintojtocas ilaixpan yihual pan in tonali quiman hualas. Huan yoje yehuanten cayasi laxitinili.

<sup>17</sup> Anquimatic inon quiman anpehuac anquineltocac Cristo. Pampa inon, lasojli nocnían, ximolachilican pa camo anmomacahuiltis pa anmoquixtis pan Dios iojli. Ximocahuacan pani iojli. Huan ximolachilican pa camo anpehuas anquineltocas inon hual quinequisi anmitzmaxtisi yehuanten hual amo quimatilo momajtilo quixixciculo ilajtol Dios. Yehuanten quimaxtilo in hual amo cuali. Xiyultiacan anquineltocatica ca chicahualisli Dios ilajtol. <sup>18</sup> Huan ximochicahualtitiacan míac ca in cuali hual Dios ihuían huil annijchihuilía. Ximochicahualtitiacan míac pa anquiximatis niman cuali toTata Jesucristo hual techquixtía pa camo tipolehuisi. Ma quipía yihual in laixpelalisli cualtichin huan niman hué axcan huan mojmosta pa quiman ajsis in tonali hual amo quiman lamis. Yoje ma ye.

## In amal calica pehuac ilajcuilulislí San Juan in lanahuatini

### *In lajtol hual layuliltía*

<sup>1</sup> Jesucristo yec quiman ayamo pehuani mochi. Tijcaquije, tiqitaje ca toixtololojmes len quichíac. Tiqitaje yihual, ticmatocaje ca tomajmajuan, quema, yihual hual tictocayaltilo “In lajtol hual layuliltía”. <sup>2</sup> Noje tictocayaltilo “In yulilislí”. Huan in yulilislí Dios technextilic, pampa yihual mochíac lacal. Huan tiqitaje in lacal huan neli antimitzililo inon. Axcan antimitzmachiltililo in yulilislí. In yulilislí amo quiman lamis, itequi yulilo huan Dios toTajtzin. Huan in yulilislí hual itoca Jesucristo monextic ca tehuanten. <sup>3</sup> Quema, tiqitaje huan tijcaquije, huan antimitzmachiltijiticate yihual amhuanten pa yoje anyes se ca tehuanten, anquipixtica amhuanten noje anmolajco iyaxca in cuali hual Dios techmaca, jan quinami tehuanten ticpialo tolajco iyaxca in cuali hual Dios techmaca. Huan neli ticate se ca Dios toTajtzin huan ca ixolol Jesucristo. <sup>4</sup> Innojen lajtomes antimitzijcuilulijiticate pa ancayas ca niman míac paquilislí quinami Dios quinequi pa ancayas.

### *Dios unca lahuilislí*

<sup>5</sup> Huan inon unca in lamachiltislí hual tijcaquije Cristo techiliaya. Huan oc sepa inon antimitzmachiltiticate. Dios unca lahuilislí. Ticnequilo tiqijtulo, Dios quichía mochi hual unca cuali. Quema, mochi hual cuali moita ca yihual. Huan ca yihual amo unca laticumac nindeno, ticnequilo tiqijtulo, amo unca laijlaculislí capa yihual, amo unca nindeno capa yihual hual amo ca se lajtulislí ca yihual. <sup>6</sup> Sinda tiqijtulo pampa tehuanten ticate se ca Dios huan ma yoje tiyulilo amo cuali quinami yehuante hual yulilo quinami cate capa laticumac, cuaquín tislacatilo. Huan moxtin quimatilo pampa amo tiqijtulo melahuac, amo tiyulilo melahuac. <sup>7</sup> Sinda ticlalisi pa ticchiuasi in hual Dios quinequi, quinequi quijtúa, sinda tiyulilo ca lahuilislí laijtic tehuanten, in lahuilislí unca iyaxca Dios. Dios chanti ca ilahuilislí, quinequi quijtúa, Dios amo mocahua pa quichías cuali, quinami yihual quipía mochi hual cuali. Yoje, ticpialo paquilislí quiman ticate se ca oc se, ticpialo in cuali calica Dios techtuchía. Huan iesli Jesucristo iXolol Dios tejchipahuilía mochi laijlaculislí.

<sup>8</sup> Sinda tiqijtulo amo ticpialo laijlaculislí, cuaquín timocuaajcuanalano. Amo unca melahuac laijtic tehuanten, Cristo huan ilamaxtilislí melahuac amo unca laijtic tehuanten. <sup>9</sup> Sinda ticyolcuitililo Dios tolaijlaculislí, yihual quipujpuhuas tolaijlaculislí huan tejchipahuilí mochi in amo cuali hual tiqinchihuililo lacames huan Dios. Ticmatilo Dios quipujpuhuas tolaijlaculislí, pampa yihual amo mocahua pa quichías quinami quijtúa. Huan quipujpuhua tolaijlaculislí pampa yihual quimati quichihuilía se jan quinami quichihuilía oc se pampa quineltocalo Jesucristo. <sup>10</sup> Sinda tiqijtulo amo ticchihuaaje laijlaculislí, yojque tiqijtulo pampa islacati Dios, huan ilajtol amo unca laijtic tehuanten.

## 2

*Cristo lajtúa ca Dios pa tehuanten*

<sup>1</sup> Nitos, annimitzjcuiluilijtica innojen pa camo anquichías laijlaculisli. Ma yoje, sinda se quichía laijlaculisli, cuaquín tehuanten ticpialo se lapalehuini hual lajtus pa tehuanten iyampa toTajtzin Dios. In lapalehuini unca Jesucristo, yihual hual amo quiman quipía laijlaculisli. Itequi quichía in hual Dios quinequi, huil calaquí capa Dios unca. <sup>2</sup> Huan Jesucristo unca in huendi calica yihual quipaquiltic Dios pa mosehuis pa yajmo cualanis pampa ticchihuaaje laijlaculisli. Huan Cristo amo mochíac huendi pa jan tehuanten tolaijlaculisli san. Noje mochíac huendi pa inminlaijlaculisli moxtin in oc sequin lacames pin lalticpan.

<sup>3</sup> Huan yojque ticmatilo pampa tiquiximatilo Cristo: Sinda ticchihualo len yihual tejhíla, cuaquín tiquiximatilo. <sup>4</sup> Yihual hual quijtúa, quil: “Niquiximati”, huan ma yoje amo quichía in hual quilía Cristo, cuaquín yihual islacati, amo lajtúa melahuac laijtic iyolo. <sup>5</sup> Yihual hual quichía len quijtúa Dios ilajtol, cuaquinon neli in se quimati quilasoja Dios pan ipampa mochi in hual quichía. Yojque ticmatilo pampa tiyulticate ca toyolo ca se lajtulisli ca Dios. <sup>6</sup> Yihual hual quijtúa pampa yultía ca se lajtulisli ca Dios quipía pa yulis jan yoje quinami yulini Cristo nican pan lalticpan.

### *Se lajtolyancuic*

<sup>7</sup> Lasojli nitos, amo annimitzjcuiluilijtica se lajtol yancuic. Niquijcuilúa se lajtol hual anquixixtataya quiman anpehuaya anquicaqui Dios ilajtol huan axan anquipía. In lajtol laviejojtili unca in lajtol hual anquicaquic. <sup>8</sup> Ma yoje, unca se lajtol yancuic hual annimitzjcuiluilijtica, huan in lajtol unca melahuac, pampa Jesucristo quijtuc huan quichíac in hual quijtúa in lajtol. Noje unca melahuac in lajtol yancuic, pampa monequi pa anquichías amhuanten in hual quijtúa. Monequi pa anquichías pampa axan miycuancate tolaixpan tehuanten huan panujticate in tonalijmes capa laticumac, quinequi quijtúa, panujticate in tonalijmes quiman yehuanten pin lalticpan amo quimatilo in hual amo unca ca se lajtulisli ca Dios. Laixpelatica ilahuilislí in hual melahuac, quinequi quijtúa, axan ajsitica in tonali quiman ilajtol Dios quinextilijtica in hual unca ca se lajtulisli ca Dios.

<sup>9</sup> Yihual hual quijtúa pampa quipía ilahuilislí Dios laijtic capa yihual, huan ma yoje amo quilasoja icni, cuaquín yihual amo unca ca se lajtulisli ca Dios. Yihual unca quinami quipía laticumactilislí laijtic capa yihual pa yina huan axcan. <sup>10</sup> Yihual hual quilasoja amo quiman quichías nindeno hual quitzacuilis oc se pa camo quineltocas Cristo. <sup>11</sup> Yihual yultica pin laticumactilislí hual niman amo quinequi icni. Huan amo mocahua pa yulis quichijtica len hual lanextilía pampa ilajtol Dios amo huelitía pa iyolo. Quema, in se amo quimati pampa quichijtica laijlaculisli, huan amo quimati len yahui quipanúa pampa quichijtica laijlaculisli. Yihual quixtoca yuli ca iyolo laticumac huan yojque amo huil quimati len Dios quinequi pa quichías.

<sup>12</sup> Amhuanten hual anpehuac anquineltoca Cristo jan je nadita san, jan quipía se ome tonalijmes quiman anpehuac anquineltocac Cristo, annimitzjcuiluilijtica, pampa Dios quinpujpuhuac anmolaijlaculisli pan ipampa in hual Cristo tejchihuilic quiman miquic pa tehuanten huan yulic oc seppa. <sup>13</sup> Amhuanten hual anquineltoca Cristo axan quipía míac tonalijmes, anunca quinami inmintajtzitzían in laneltocanijmes, annimitzjcuiluilijtica pampa anquiximati yihual Cristo hual yultataya quiman ayamo pehuac in lalticpan huan axan yultía. Amhuanten hual anquineltoca Cristo ayamo pa míac tonalijmes, anunca quinami lacames yajyancuic, annimitzjcuiluilijtica pampa anquisulahuac Satanás.

Amhuanten hual jan anpehuac anquineltoac Cristo, anunca quinami xolomes, annimitzjicuiluilitica pampa axan anquiximati yihual toTajtzin. <sup>14</sup> Amhuanten hual anquineltoac Cristo pa míac tonalijmes annimitzjicuiluic pampa anquiximatic Cristo quiman anpehuac anquineltoac. Amhuanten hual anquineltoac Cristo ayamo pa míac tonalijmes annimitzjicuiluic pampa anquipía chichahualisli huan anquipía ilajtol Dios itequi pa anmoyolo, huan anquisulahuac Satanás.

<sup>15</sup> Amo xicnequican in lalticpan capa yulilo lacames quichijtcate inon hual Dios amo quixtoaca. Huan amo xiyulican anquinnectica innojen hual quinmanalo lacames pin lalticpan. Sinda se quinequi yuli quinami yulilo yehuanten pin lalticpan hual amo quineltoalo Dios, cuaquín yihual amo quinequi Dios. <sup>16</sup> Yehuanten pin lalticpan hual amo quineltoalo Dios san quinequilo innojen: Quinequilo quipialo in hual amo cuajcuali hual inmincuerpo quinchihualtilo pa quinequisi. Quinequilo canaló len quitalo inmixtololojmes. Quinequilo moixtoalo pampa quipialo mochi hual huil canaló pin lalticpan. Huan in lanequilisli amo quinmacac toTajtzin. Quinmacac Satanás hual huelitía pin lalticpan. <sup>17</sup> Huan in lalticpan yahui lantica ca mochi innojen amo cuajcuali hual lacames quinequilo quichihualo. Ma yoje, yihual amo mocahua pa yulis hual yuli quichijtica in hual Dios quinequi.

### *In islacatilisli hual neli unca*

<sup>18</sup> Nitos, axcan ticcate pin tonalijmes quiman yahui lami in lalticpan. Anquicaquic anmitzilije pampa yahui huala in hué hual unca Cristo ilacocolini niman hué. Huan anquimati pampa axcan cate míac hual cate ilacocolinijmes Cristo. Pampa inon, ticmatilo pampa axan cate in tonalijmes quiman yahui lami in lalticpan. <sup>19</sup> Yehuanten Cristo ilacocolinijmes mijcuanije capa tehuanten, amo quineltoacanijme Cristo quinami tehuanten. Sinda quineltoaloaya Cristo quinami tehuanten, cuaquín mocahualoaya ca tehuanten. Mijcuanije capa tehuanten pa yojque Dios lanextilisquiaya yehuanten moxtin amo quineltoaloaya Dios quinami tehuanten neli ticneltoalo.

<sup>20</sup> Amhuanten anquipía ilaxahuilisli in Espíritu Santo. In quinequi quijtúa anquipía in Espíritu Santo lajtic anmoyolo, huan pampa in anmoxtin anquimati Dios ilajtol melahuac. <sup>21</sup> Amo annimitzjicuiluic pampa amo anquimati Dios ilajtol melahuac. Annimitzjicuiluic pampa quema, anquimati ilajtol melahuac, huan pampa anquimati mochi islacatilisli amo unca Dios ilajtol melahuac.

<sup>22</sup> Axcan, ¿aqui unca yihual hual quijtúa in islacatilisli? Annimitzilía. Unca yihual hual quijtúa Jesús amo unca in Cristo hual Dios quitilanic pan lalticpan. Quema, yihual unca Cristo ilacocolini, yihual hual quijtúa Dios amo unca iTajtzin Jesús huan Jesús amo unca iXolol Dios. <sup>23</sup> Mochi seje hual quijtúa Jesucristo amo unca iXolol Dios noje amo quipía Dios quinami iTajtzin. Yihual hual quijtúa inminyampa lacames pampa Cristo unca iXolol Dios noje quipía Dios quinami iTajtzin.

<sup>24</sup> Huan amhuanten, ma mocahua ca amhuanten ilajtol Dios hual anquicaquic quiman anpehuac anquineltoac Cristo. Sinda mocahua lajtic anmoyolo in lajtol hual anquicaquic quiman anpehuac anquineltoac Cristo, cuaquín amhuanten anyultía ca se lajtulisli ca iXolol Dios huan toTajtzin. <sup>25</sup> Huan inon unca hual Cristo techilic neli pampa yahuiaya techmaca. Yihual techmaca yulilisli hual amo quiman lamis, tiyultiasi mojmosta ca se lajtulisli ca yihual.



<sup>26</sup> Innojen lajtomes annimitzjicuilulijtica pa anquimatis aquinojen cate yehuanten hual motolinilo pa anmitzlaicanasi pa camo anquitocas Cristo iojli. <sup>27</sup> Ma yoje, amhuanten anquipía in laxahuilisli, quinequi quijtua in lajmatilisli hual Cristo anmitzmacac hual mocahua yultica pa lajtic capa anmoyolo. Pampa in, amo monequi pa se anmitzmaxtis quinami anquimatis da ilamaxtilisli se unca jan quinami ilamaxtilisli Cristo. Unca pampa ilaxahuilisli, quinequi quijtua, ilajmatilisli hual Cristo anmitzmacac, inon anmitzmaxtia mochi. Unca melahuac, amo unca islacatilisli. Yoje, xiylutiacan ca se lajtulisli ca yihual, jan quinami yihual anmitzmaxtic.

<sup>28</sup> Huan axcan, Nitos, xiylutiacan ca se lajtulisli ca yihual, pa yoje quiman yihual hualas oc sejpa, amo timomajtisi pa tiquitasi. Huan amo tipinahuasi iyampa yihual quiman nesi capa tehuanten. <sup>29</sup> Sinda anquimati pampa Jesucristo amo quipía len amo cuali huan amo quichía len amo cuali, cuaquinon anquimati pampa lacatic pa iyolo quipixtica Dios pa iTajtzin aqui yes hual yuli quichijtica in hual unca cuali.

### 3

#### *Dios ixolomes*

<sup>1</sup> Xiquitacan, ¡len amo techlachialtia ca lamajtilisli inon quinami Dios toTajtzin techlasojla! ¡Techoyaltia ixolomes, huan neli ticate ixolomes! Pampa in, yehuanten pin lalticpan hual amo quinelocalo Dios amo quimatilo nindeno inahuac in hual ticipalo pampa ticate Dios ixolomes. Quema, inon yehuanten amo quimatilo pampa amo quimatije Dios quitilanic Jesucristo pin lalticpan. <sup>2</sup> Lasojli nitos, axcan ticate ixolomes Dios. Huan ayamo tiqitalo mochi quinami ticayasi. Ma yoje, ticmatilo pampa quiman nesis Cristo, cuaquin tiyesi quinami yihual Cristo, pampa tiquitasi quinami yihual unca. <sup>3</sup> Aquinojen yesi hual yojque quichixticate Cristo pa mochihuasi quinami yihual mocahualo pa quichihuasi mochi hual amo cuali. Huan amo mocahualo pa quilajlanisi Cristo mochi tonali pa yihual quinquixtilis mochi laijlaculisli. Yehuanten quinctialo pa mochihuasi quinami Cristo hual amo quipía nindeno amo cuali.

<sup>4</sup> Moxtin hual quichihualo laijlaculisli noje amo quicaquilo Dios ilajtol. Laijlaculisli unca mochi lachihualisli hual amo unca quinami quijtua Dios ilajtol. <sup>5</sup> Anquimati pampa hualac Cristo pin lalticpan pa quiquixtilis in laijlaculisli. Huan yihual amo quipía laijlaculisli nindeno. <sup>6</sup> Mochi hual yultialo ca se lajtulisli ca yihual amo yultialo quichijticate laijlaculisli. Moxtin hual yultialo quichijticate laijlaculisli amo quiman quimatije pampa quipialo pa quinelocasi Cristo. Huan noje amo quiman quiximatije Cristo pa inminyolo. <sup>7</sup> Nitos, ma camo anmitzcuaajcuamana amaqui. Aqui yes hual yultia quichijtica in hual cuali unca ca se lajtulisli ca Dios huan ilajtomes, jan quinami unca Jesucristo. <sup>8</sup> Aqui yes hual yultia quichijtica laijlaculisli unca iyaxca in lili, pampa quiman pehuac in lalticpan pa axan, in lili quichía laijlaculisli. Pampa inon hualac pan lalticpan iXolol Dios pa quilamis mochi inon hual quichiac in lili.

<sup>9</sup> Moxtin hual quipialo Dios quinami inminTajtzin, quinequi quijtua, moxtin hual quipialo in yulilisli yancuic hual Dios quinmaca, yoje yehuanten amo yultialo quichijticate laijlaculisli. Unca pampa iyulilisli Dios mocahua ca yehuanten lajtic. Yojque amo huil yultialo quichijticate laijlaculisli, pampa yehuanten lacatije pa inminyolo quipixticate Dios pa inminTajtzin.

<sup>10</sup> Ca inon anquimatis yehuanten hual cate ixolomes Dios huan yehuanten hual cate ixolomes in lili. Moxtin hual amo yultialo quichijticate len cuali



quinami Dios quinequi amo cate iyaxca Dios, huan jan yojque cate moxtin hual amo quinlasojlalo inmicnían, yehuanten amo cate iyaxca Dios.

*Ma timolasojlalan se huan oc se*

<sup>11</sup> Inon ticmatilo, pampa quiman anpehuac anquineltocac Cristo, noje anquicaquic in lanahuatilisli hual techilic pa timolasojlasi mochi sejse, huan pa tiquinlasojlasi oc sequin. <sup>12</sup> Monequi pa camo tiyesi quinami Caín hual yec iyaxca in lili, huan yihual Caín quimictic icni. Huan ¿leca quimictic? Quimictic pampa yihual Caín yultiahuiaya quichijtataya in hual amo cuali, huan icni quichihuaya in hual cuali.

<sup>13</sup> Amo ximoitacan ca lapolulisli, nocnían, sinda anmitzcocolilo yehuanten pin lalticpan hual amo quineltocalo Dios. <sup>14</sup> Tehuanten ticmatilo pampa yajmo ticcate pin polehuilisli capa timoxilusi ca capic amo quiman timocuepasi pa Dios. Unca pampa ticpialo Dios iyulilisli hual yihual quinmaca yehuanten hual quineltocalo Cristo. Inon ticmatilo pampa tiquinlasojlalo tocnían. Yihual hual amo lalasoja mocahua pin polehuilisli capa moxilusi ca capic amo quiman mocuepas capa Dios. Inon unca miqulilisli pa iyolo. <sup>15</sup> Moxtin hual amo quinmitalo cuali huan quincocolilo inmicnían cate lamictinijmes. Huan anquimati da amo unca se lamictini hual quipía Dios iyulilisli hual amo quiman lamis. In iyulilisli amo unca laijtic capa yihual.

<sup>16</sup> Pampa inon ticmatilo Jesucristo techlasojla, pampa motemacac pa miquis pa tehuanten. Yoje, monequi pa timotemacasi pa timiquisi pa tocnían. <sup>17</sup> Cuajnesi unca se hual quipía miac hual cana pin lalticpan calica molacualtis huan calica molaquentis. Huan cuajnesi quita icni hual monequi pa quipías len huan ma yoje amo quinequi quimaca nindeno pa quipalehuís. Axcan, ¿anquijitúa yihual quimati quilasojla icni ca Dios ilasojlalisli? No, amo quilasojla. <sup>18</sup> Nitos, ma camo tiquijitucan san pampa tilalasojlalo, ma camo tiquilican san. Quema, ma tilalasojlalan neli pan ipampa in cuali hual tiquinchiuililo oc sequin.

*Quinami ticmatisi pampa cayas cuali ca tehuanten quiman tiquitasi Dios*

<sup>19</sup> Sinda tiyulilo yojque tiquinlasojlaticate oc sequin, tiquinchiuilijiticate cuali, cuaquinon ticmatisi pampa tiyulticate ca se lajtulisli ca Dios ilajtol melahuac. Huan yoje, iyampa Dios neli huil timoílisi pa toyolo pampa ticcate ca se lajtulisli ca Dios ilajtol. <sup>20</sup> Quema, pampa sinda tiquijitulo pa toyolo pampa cuajnesi ticchihuaje laijlaculisli, cuaquín Dios unca niman hué huan toyolo niman tipichin, huan yihual quimati mochi. Yihual quimatis sinda ticchihuaje laijlaculisli o da amo ticchihuaje. <sup>21</sup> Lasojli nitos, sinda amo techilía toyolo pampa ticpialo laijlaculisli, cuaquín ticmatilo pa toyolo pampa Dios techita cuali. <sup>22</sup> Yojque, len yes timotemachililo pa Dios techmacas, yihual techmaca. Techmaca pampa ticchihualo in hual yihual techilía, ticchihualo in hual quipaquiltía. <sup>23</sup> Huan inon unca hual techilía pa ticchihuasi. Techilía pa ticneltocasi iXolol Jesucristo hual yihual quitilanic pin lalticpan. Noje techilía pa tiyultiasi timolasojlaticate tehuanten se huan oc se, jan quinami yihual techilía. <sup>24</sup> Huan yihual hual quineltoca mochi hual techilía amo mocahua pa yultías ca se lajtulisli ca Dios, huan Dios unca ca se lajtulisli ca yihual. Dios techmaca iEspíritu huan pampa inon ticmatilo yihual amo mocahua pa yulis ca tehuanten laijtic toyolo.

**4**

*Dios iEspíritu huan iespíritu hual unca ilacocolini Cristo*

<sup>1</sup> Lasojli nocnían, amo xicayacan anquineltocatica moxtin hual quijtulo pampa quipialo in Espíritu Santo quiman anmitzlaquetzilizjicate len yehuanten quijtulo unca Dios ilajtol. Quema, ximonextilican ca Dios ilajmatilisli pa yojque anquimatis sinda neli quijtuticate Dios ilajtol. Ximonextilican yojque, pampa cate míac hual mosemantiaje pin lalticpan, quinlaquetzilizjicate inminlajtomes ijyecames ej'elehuis. Quijtulo pampa laquetzicate pan ipampa in Espíritu Santo mas que cate lajtunijmes hual islcatilo. <sup>2</sup> Nican unca quinami anquimatis sinda in Espíritu Santo neli quimacac in lajtol hual anmitzilijtica se: Mochi sejse hual quijtúa pampa laqueztica pan ipampa Dios iEspíritu huan quijtúa neli pampa Dios quitilanic Jesucristo pa hualac quinami lacal pa in lalticpan, neli quijtutica Dios ilajtol. <sup>3</sup> Huan mochi sejse hual pa iyolo amo quijtúa neli pampa Dios quitilanic Jesucristo pa hualac pin lalticpan quinami lacal, cuaquín in se amo unca iyaxca Dios. Inon ilamaxtilisli in lili, in ijyecal elehuis hual unca ilacocolini Cristo. Anquiacuini pampa in ijyecal elehuis ca ilamaxtilisli yahuiaya huala pin lalticpan, huan axcan unca pin lalticpan.

<sup>4</sup> Amhuanten, Nitos, anquipía Dios ilamaxtilisli pa anmoyolo. Anunca iyaxca Dios huan amo anquimacahuilic pa anmitzcuaajcuamanalosquiaya yehuanten hual quipialo ilamaxtilisli elehuis ilacocolini Cristo. Amo anmitzcuaajcuamanaje pampa in Espíritu Santo hual unca lajtic anmoyolo quipía niman míac chichualisli hual amo quipialo yehuanten hual quipialo ilamaxtilisli ilacocolini Cristo. <sup>5</sup> Yehuanten cate lacames pin lalticpan hual amo quineltocalo Dios. Pampa in, laquetzalo ca inminlamaxtilisli yehuanten pin lalticpan. Huan yehuanten pin lalticpan quinequilo quicaquilo yehuanten. <sup>6</sup> Tehuanten ticpialo Dios ilamaxtilisli pa toyolo, tehuantenticate iyaxca Dios. Yihual hual quiximatijla Dios quicaqui ilajtol Dios hual tiquijtulo, huan quineltoca. Yihual hual amo unca iyaxca Dios amo quineltoca ilajtol Dios hual tiquijtulo. Yojque ticmatilo da quipialo in Espíritu Santo ca Dios ilamaxtilisli melahuac, o da quipialo ijyecal ilacocolini Cristo ca ilamaxtilisli hual lacuaajcuamana.

### *Dios unca lasojlalisli*

<sup>7</sup> Lasojli nocnían, ma timolasojlacan tehuanten se huan oc se, pampa Dios techmaca in lasojlalisli. Mochi sejse ca moxtin pin lalticpan hual lalasoja quipía Dios quinami iTajtzin huan mojmosta moscaltía quinami yihual quiximati Dios. <sup>8</sup> Yihual hual amo lalasoja amo quiman pehuac quiximatic Dios, pampa Dios quimati lalasoja, huan amo mocahua pa lalasojas. <sup>9</sup> Tehuanten Dios yojque technextilic quinami techlasojla: Quitilanic iXolol Jesucristo, in se ixolol san hual quipiaya, amo oc se quinami yihual. Quitilanic pin lalticpan pa ticpiasi yulilisli hual amo quiman lamis huan in yulilisli unca pan ipampa Jesucristo. Quema, yihual quipía lahueliltilisli pa techyuliltis ca in yulilisli hual amo quiman lamis. <sup>10</sup> Techlasojla Dios yoje: Amo ticataloaya tehuanten hual ticlasojlaje Dios. Unca Dios hual techlasojlac tehuanten. Huan yihual quitilanic iXolol pa miquis pampa tiyeje lajlaculi. Miquic pa yoje quipaquiltis Dios pa yihual yajmo cualanis ca tehuanten pampa tiyeje lajlaculi.

<sup>11</sup> Lasojli nocnían, sinda Dios techlasojlac yojque, cuaquín tehuanten noje ticpialo pa timolasojlasi tehuanten se huan oc se. <sup>12</sup> Amo quiman cataya se lalac hual quitac Dios. Ma yoje, sinda timolasojlalo tehuanten se huan oc se, cuaquín Dios amo quiman mocahua pa techitas cuali. Yihual unca pa lajitic toyolo. Yoje tejchihuilía pa tilalasojlasi cuali quinami yihual quinequi pa tilalasojlasi ca mochi in chichualisli hual yihual techmaca. <sup>13</sup> Yoje quinami

nía annimitzilá, ticmatilo pampa tiyultialo ca se lajtulisli ca Dios huan Dios mojmosta unca ca se lajtulisli ca tehuanten. Ticmatilo inon pampa yihual techmacac lajtic tehuanten iEspíritu Santo. <sup>14</sup> Huan tehuanten tiquitaje Jesucristo hual unca Dios iXolol. Huan tiquijtulo neli pampa toTajtzin Dios quitilanic iXolol pa yihual quinquixtilis pa ipolehuilisli inminlajlaculisli yehuanten pin lalticpan. <sup>15</sup> Yihual hual quijtua inminlaixpan moxtin pampa Jesucristo yihual Dios iXolol, cuaquín Dios quiztías cuali yihual, huan yihual yulis ca se lajtulisli ca Dios.

<sup>16</sup> Tehuanten ticmatilo huan ticneltocalo in lasojlalisli hual Dios quipía pa tehuanten. Dios quimati lalasoja huan amo mocahua pa lalasojas. Yihual hual yultía lalasojlatica yuli ca se lajtulisli lajtic Dios huan Dios yuli ca se lajtulisli lajtic yihual. <sup>17</sup> Huan jan quinami Cristo unca, yojque tehuanten ticcate noje quinami yihual nican pan in lalticpan. Pampa in, tilalasojlalo cuali quinami Dios quinequi pa tilalasojlasi, pa yojque amo timomajtisi pan tonali quiman Dios quinmilis yehuanten pin lalticpan sinda cayasi ca yihual o sinda quitojtocas ilaixpan yihual ca capic unca polehuilisli hual amo quiman lamis. <sup>18</sup> Yehuanten hual lalasojlalo amo momajtilo. Sinda tilalasojlalo quinami Dios quinequi, cuaquín yojque unca laquixtili mochi momajtilisli hual unca lajtic tehuanten. Sinda se momajtia, unca pampa quimati yihual quipías pa panus lacocoltilisli. In in lacocoltilisli hual cahuilúa se hual yuli quichijtica lajlaculisli. Huan yihual hual momajtia ayamo ajsic quimatic lalasojlac quinami Dios quinequi pa lalasojas.

<sup>19</sup> Tehuanten ticlasojlalo Jesucristo pampa yihual techlasojlac quiman tehuanten ayamo tiquiximatije. <sup>20</sup> Sinda se quijtua: “Niclasojla Dios”, huan ma yoje quicocolía huan amo quita cuali icni, cuaquín islacati. Yihual hual amo quilasoja icni hual quitac, cuaquín neli unca yihual amo huil quilasoja Dios hual amo quiman quitac. <sup>21</sup> Huan inon unca hual techilic chicahuac Dios: Yihual hual quilasoja Dios noje quipía pa quilasojas icni.

## 5

### *Ticsulahualo mochi hual unca pin lalticpan*

<sup>1</sup> Mochi sejse hual quineltoaca pampa Jesucristo unca in Cristo hual Dios quitilanic, yihual quipía Dios pa iTajtzin. Lacatic pan ipampa Dios. Huan yehuanten quipialo Dios quinami inminTajtzin. Mochi sejse hual quilasoja iTajtzin Dios noje quilasoja mochi sejse hual lacati quipixtica Dios pa iTajtzin. <sup>2</sup> Nía annimitzilá quinami ticmatilo pampa tiquinlasojlalo Dios ixolomes. Sinda ticlasojlalo Dios huan ticchihualo in hual techilía, cuaquín ticmatilo pampa tiquinlasojlalo Dios ixolomes. <sup>3</sup> Yojque ticlasojlalo Dios sinda ticneltocalo mochi hual techilía. Huan in hual techilía Dios amo techlamilía tochicahualisli pa ticchihuasi. <sup>4</sup> Unca pampa mochi sejse hual lacatic quipixtica Dios pa iTajtzin quisulahua mochi lacocolini pin lalticpan hual molalilo ipan pa quitzacuilisi pa camo quineltoacas in Tata. Huan yojque unca quinami ticsulahualo: Sinda amo timocahualo pa ticneltocasi Jesucristo ca mochi toyolo, yihual techpalehuis pa tiquinsulahuasi. <sup>5</sup> Huan ¿qui yihual hual quisulahua in lili hual huelitia pin lalticpan? Unca yihual hual quineltoaca pampa Jesucristo unca Dios iXolol.

### *In ilajtulisli melahuac Dios iXolol*

<sup>6</sup> Jesucristo unca yihual hual hualac pin lalticpan huan monextilic pampa yihual unca Dios iXolol pan tonali hual yec lacuayatequili pin al. Noje monextilic pampa yihual unca Dios iXolol quiman quisac iesli capa miquic.

Yojque amo yec lacuayatequili san, yihual yec lacuayatequili huan lamictili. Huan in Espiritu Santo unca hual quijtúa neli pampa unca yojque, pampa in Espiritu Santo amo quiman islacati. <sup>7</sup> Ticmatilo inon unca melahuac pampa cate ye hual techmacalo lajtol melahuac pampa Jesucristo unca Dios iXolol, cate iTajtzin huan yihual Jesucristo huan in Espiritu Santo, in yeyenten quijtulo yojque. <sup>8</sup> Noje ticmatilo Jesucristo unca iXolol Dios pampa cate ye pa in lalticpan hual mochi tonali techmacaticate lamaxtilisli melahuac pa ticmatisi inon. Se unca in Espiritu Santo. Yihual techmachiltía pa toyolo pampa unca neli. Oc se unca in al quiman Jesucristo yec lacuayatequili ca al, moxtin hual cataloaya nepa quimatije yihual yec Dios iXolol. In oc se unca iesli, pampa Cristo miquic huan toyahuic iesli, huan cataloaya míac hual quitaje inon. Yojque in yeyenten techmaxtilo neli se lajtol san, techmaxtilo neli pampa Jesucristo yihual Dios iXolol. <sup>9</sup> Sinda lacames techlilo neli len, huan tiquinneltocalo, neli unca ticneltocasi Dios sinda yihual techilía neli len lajtol. Unca pampa in hual Dios techilía unca niman neli. Amo ajsis yes yoje neli inon hual lacames techlilo. Huan Dios techilic neli huan techilijtica neli pampa Jesucristo unca iXolol. <sup>10</sup> Yihual hual quinneltoca ca mochi iyolo Dios iXolol yoje quipía in lajtol melahuac laijtic yihual iyolo. Aquí yes hual amo quinneltoca Dios, yoje yihual quichijtica pa Dios nesi quinami se hual islacati, pampa amo quinneltoca in hual Dios quijtuc neli inahuac iXolol. <sup>11</sup> Huan in lajtol melahuac unca inon: Dios techmacac yulilisli hual amo quiman lamis huan ticpialo in yulilisli pan ipampa iXolol. <sup>12</sup> Aquí hual quipía iXolol Dios pa laijtic iyolo noje quipía in yulilisli. Huan aquí yes hual amo quipía iXolol Dios pa laijtic iyolo yihual amo quipía in yulilisli.

### *Yahui laqusa ca in amal*

<sup>13</sup> Annimitzjcuilulic in amal amhuanten hual anquinneltoca Dios iXolol pa yojque anquimatis pampa anquipía in yulilisli hual amo quiman lamis.

<sup>14</sup> Ticmatilo pa toyolo Dios tejchihiulía cuali, pampa ticmatilo sinda tictemachilo len hual unca yoje quinami quinequi, cuaquin yihual techcaqui. <sup>15</sup> Huan yojque, quinami ticmatilo Dios techcaqui quiman tictemachilo, noje ticmatilo pampa axan ticanaje in hual tictemachije.

<sup>16</sup> Sinda se quita icni quichijtica laijlaculisli hual amo quihuica pa miquis, monequi pa quitemachilis Dios huan Dios quimacas icni yulilisli, sinda quichijtica laijlaculisli hual amo quihuicas pa miquis. Unca laijlaculisli hual quihuicas se pa miquis, huan amo annimitzilijtica pampa monequi pa quitemachilis Dios sinda quichíac se in laijlaculisli. <sup>17</sup> Mochi in amo cuali unca laijlaculisli huan unca laijlaculisli hual amo quihuica se pa miquis.

<sup>18</sup> Ticmatilo pampa yihual hual quipía Dios quinami iTajtzin amo yuli quichijtica laijlaculisli, pampa Dios iXolol quipixtía huan in lili amo quimafoca.

<sup>19</sup> Ticmatilo pampa ticate ilacames Dios huan moxtin in oc sequin pin lalticpan mocahualo ca in lili huelitijtica pan yehuanten.

<sup>20</sup> Ma yoje, amo ticmatilo jan inon san. Noje ticmatilo pampa hualac Dios iXolol, huan techmacac lajmatilisli pa tiquiximatisi Dios. Yihual amo quiman mocahua pa techilis in hual unca melahuac. Huan ticate ca se lajtulisli ca yihual hual mojmosta quijtúa len unca melahuac, pampa ticate ca se lajtulisli ca iXolol Jesucristo. Yihual unca in Dios hual quijtúa inon hual melahuac huan quipía yulilisli hual amo quiman lamis pa quimacas yehuanten hual quinneltocalo. <sup>21</sup> Nitos, ximoiztiacan, ximopilican pa camo anquinmolancuacuetzilijtinemis inminlaixpan oc sequin dioses o monos,

ximijcuanican capa innojen. Amo quiman xicneltocacan se lajtol hual amo unca ca se lajtulisli ca Dios. Yoje ma ye.

## In amal ome hual quijcuiluc in lanahuatini San Juan

<sup>1</sup> Nehual in abuelito hual niquinlaicana yehuanten hual quineltoalo toTata Jesucristo. Annimitzpialtía amhuanten, tehual, tocní síhual. Dios mitzljaltultic pa tiyes ixolol. Anmitzljaltultic tehual huan moxolomes. Amhuanten neli annimitzlasojla. Huan amo jan nehual san annimitzlasojla. Noje moxtin hual quimatilo Dios ilajtol melahuac, yehuanten noje anmitzlasojlalo. <sup>2</sup> Quema, antimitzlasojlalo pampa Dios ilajtol neli ticipalo pa toyolo. In lajtol amo quiman mocahuas pa cayas ca tehuanten. <sup>3</sup> Cayas ca tehuanten in cuali hual tejchihuilía Dios toTajtzin huan Jesucristo iXolol Dios toTajtzin. Noje cayas ca tehuanten inmicnihilisli huan inminmosehuilisli pa toyolo. Pampín, tiyulisli ticneltocaticate Dios ilajtol neli, huan tiyulisli tilasojlaticate.

<sup>4</sup> Nicpiaya niman mías paquilisli pampa nicmatic quinami sequin ca moxolomes yulilo quipixticate Dios ilajtol neli pa inminyolo. Yulilo jan quinami toTajtzin quinmilía. <sup>5</sup> Huan axcan, tocní síhual, amo nimitzjicuilulijtica se lajtol yancuic pa ticneltocas. Jan unca in lajtol san quinami techilic Dios hual tijcaquije quiman tipehuaje ticneltocaje Jesucristo huan axan ticpixtialo. Huan nimitzilía ca noyolo, ma timolasojlacan tehuanten se huan oc sequin. <sup>6</sup> Huan inon unca in lasojlalisli, sinda tiyulilo ticchijticate mochi hual techilía Dios. Quema, in unca in lajtol pa ticneltocasi, jan quinami anquicaquic quiman anpehuac anquineltoac: Dios anmitzilía pa anyulis anmolasojlatica anmoxtin se huan oc se.

### *Lacuajcuamananijmes*

<sup>7</sup> Nimitzilía inon pampa cate mías hual quisaje lacuajcuamantinemilo, mosemantinemilo capa moxtin pin lalticpan. Yehuanten amo quijtulo neli pampa Jesucristo cataya ca Dios quiman ayamo pehuac in lalticpan, quijtulo pampa yihual amo lacatic quinami xolol pin lalticpan huan mochíac lalac. Se hual yojque quijtúa unca lacuajcuamanani huan molalilía quinami ilacolli Cristo. <sup>8</sup> Ximolachilijtiacan pa camo moijlacus in hual anquichíac pa in Tata. Ximolachilijtiacan pa ancanas mochi hual Dios quinequi anmitzmaca. <sup>9</sup> Sinda mochi sejse quinequi yultía quineltoatica oc se lamaxtilisli huan amo quinequi yultía quineltoatica Cristo ilamaxtilisli, cuaquín yihual amo quineltoaca Dios, amo quiximati Dios pa iyolo. Sinda se yultía quineltoatica Cristo ilamaxtilisli, cuaquín yihual quinneltoca toTajtzin huan iXolol, quinmiximati pa iyolo. <sup>10</sup> Sinda hualas aqui yes ca amhuanten huan amo lamaxtía ca Cristo ilamaxtilisli, cuaquín amo xicajxiltican pan anmochan, huan jan yoje amo xicpialtican. <sup>11</sup> Annimitzilía inon pampa aqui quipialtía yihual yojque quipalejtica in se ca ilamaxtilisli hual niman amo cuali.

### *Yahui laquisa ca iamal*

<sup>12</sup> Nicpiaya mías pa annimitzilis. Ma yoje, amo nicnequi annimitzilía ca amal huan lajcuilulisli. Yes cuali pa nilachixtías pa huil nihualas ca amhuanten pa tilaquetzasi tehuanten, pa yojque timoxtin ticpiasi mochi in paquilisli hual Dios quinequi pa ticpiasi.

<sup>13</sup> Mitzpialtilo ixolomes mocni síhual, mocni hual Dios quilajtultic pa yes ixolol. Yoje ma ye.

## In amal ye hual quijsuiluc in lanahuatini San Juan

### *Lajtúa cuali de Gayo*

<sup>1</sup> Nehual in abuelito hual niqunlaicana moxtin hual quineltoalo toTata Jesucristo, nimitzpialtitica tehual, Gayo, hual moxtin mitzlasojlalo huan nehual neli nimitzlasojla.

<sup>2</sup> Lasojli nocni, nicnequi pa mochi yas cuali ca tehual huan pa mojmosta ticayas cuali, jan quinami yahui ca moyulilisli hual amo mocahua pa cayas cuali. <sup>3</sup> Nimitzilía inon, pampa nicpiaya míac paquilisli in tonali hual ajsije nican sequin tocnían huan neli nechlaquetzilizje in quinami tiyultica ca se lajtulisli ca Dios ilajtol melahuac, quinami neli tiyultica. <sup>4</sup> Amo unca nindeno hual nechmacas paquilisli hué quinami inon pa quiman nechmachiltilo pampa nocnían yulticate quinami techilía Dios ilajtol. <sup>5</sup> Lasojli nocni, ticchijtica in hual lanextía quinami neli ticneltoala ilajtol Dios quiman tiquinpalehuía tocnían hual amo tiquinmiximatiaya. <sup>6</sup> Quema, yehuanten laquetzaloaya neli quinami tiquinlasojlaya. Quijtuje inon inminyampa moxtin in laneltocaniymes nican. Ma nimitztemachi pa tiquinchiuilisli cuali quiman yes timochicahuas ca yehuanten quiman quisasi nepa mochan. Xiquinmaca mochi hual monequi pa quiplasi, pampa yehuanten Dios quintilanic. Pampa inon, xiquinchiuili yojque quinami ticchiuilisquiaya yihual Dios. <sup>7</sup> Quema, xiquinchiuili yojque, pampa yehuanten canaje ojli pa quimachiltisi ilajtol Dios capa yehuanten hual amo quineltoalo Dios. Canaje ojli huan amo quiman quintemachije yehuanten hual amo quineltoalo Dios pa quinpalehuisi. <sup>8</sup> Yoje, monequi pa tehuanten tiquinlacualtisi yehuanten tocnían hual yulilo lachijtcate yojque. Yojque tehuanten timochihualo tequipanujquimes ca yehuanten, tiquinpalejticate pa quimachiltinemisi ilajtol Dios.

### *In lacal Diótreres yuli lachijtica amo cuali*

<sup>9</sup> Niqunmijcuilulic se amal yehuanten in laneltocaniymes nepa. Ma yoje, in Diótreres mojmosta quinequi mochía hué ca moxtin in laneltocaniymes. Amo quinequi techneltoala quiman ticlajlanilo len. <sup>10</sup> Pampa in, pa in tonali nihuas niclajnamiquiltis mochi hual yihual quichijtica. Amo mocahua pa latenejtinemis tonahuac tehuanten huan amo mocahua pa quinmilis oc sequin pampa ticchiuialo laijlaculisli. Yoje yihual islatatijtinemi, huan techuejuecaltitinemi ca lajtomes amo cuajcuali. Huan ca in amo mocahua. Noje amo quinequi quinnamiquía tocnían quiman paxalulo nepa, huan jlen amo quintzacuilía yehuanten hual quema, quinequilo quinmajxiltilo! Quinquixtía capa in laneltocaniymes, amo quinmacahuiltía pa monechicusi ca yehuanten.

<sup>11</sup> Lasojli nocni, amo xicchá quinami yehuanten hual yulilo quichijtcate len unca amo cuali. Xiyuli ticchijtica quinami yehuanten hual yulilo quichijtcate cuali. Aquí hual mojmosta yuli quichijtica cuali unca ixolol Dios. Aquí hual yuli quichijtica amo cuali amo quiximati Dios.

### *Quijtúa quinami yuli quichijtica cuali Demétrio*

<sup>12</sup> Moxtin quijtulo quinami yuli quichijtica cuali Demétrio huan moxtin quimatilo pampa unca neli inon hual quijtulo quinami yuli yihual. Huan

tehuanten noje tiquijtulo neli pampa yihual yuli quichijtica cuali, huan tehual ticmati in hual tiquijtulo tehuanten unca melahuac.

*Laqisa lajcuilúa ca in lajtomes*

<sup>13</sup> Nicpiaya míac pa nimitzilisquiaya. Ma yoje, amo nicnequi nicchía ca in liculi huan lajcuiluloni. <sup>14</sup> Unca pampa nicchixtica pa quiman timoitasi, cuaquinon tilaquetzasi tiomenten.

<sup>15</sup> Ma Dios mitzpía ca mosehuilisli pan moyolo. Yehuanten in lajlasojli hual cate nican anmijchicahualo. Xiquinchicahua ca itoca mochi sejse tolajlasojli hual nepa cate.



## In amal hual quijcuiluc in lanahuatini San Judas

### *Judas quinmijcuilulía yehuanten hual Dios quinnotzac pa yesi ilacames*

<sup>1</sup> Nehual Judas itequipanujquil Jesucristo huan icni Jacobo, annimitz-  
ijcuilulijtica amhuanten hual Dios toTajtzin anmitznotzac. Amhuanten  
anmitzljajtultic toTajtzin pa anyes iyaxca. Yihual anmitzanac huan an-  
mitzpixtica pa Jesucristo. <sup>2</sup> Ma Dios anmitzmaca míac ilaicnililisli huan míac  
imosehuilisli pa anmoyolo huan míac ilasojlalisli.

### *Quijtúa pampa cate yehuanten hual quimaxtilo islacatilisli* *(2 Pedro 2:1-17)*

<sup>3</sup> Lasojli nocnían, nicnequiaya míac annimitzjcuiluli pa annimitzmax-  
tilisquiaya in hual timoxtin ticneltocalo, nicnequi niqijtúa, in quinami  
Jesucristo techquixtic pa ipolehuilisli tolaijlaculisli. Ma yoje, niqitac  
pampa monequi míac pa annimitzilisli pa anquinapatis Dios ilamaxtilisli  
hual ticneltocalo. Dios quimacac in lamaxtilisli jan sejpa san pa como  
mochahuas pa cayas ca tehuanten hual yihual techlajtultic pa tiyesi ixolomes.

<sup>4</sup> Quema, xicnaptican Dios ilamaxtilisli, pampa cate sequin lamaxtinijmes  
hual nesije capá amhuanten. Pa yina Dios quimatic pampa hualalosquiaya  
yehuanten. Techcahuilic ilajtol lajcuiluli hual quijtúa pampa Dios quilalic  
pa yesi latojtocali pa in lacocotilisli hual yahui quinpanúa yehuanten hual  
amo quintelocalo. Quema, yehuanten amo quimatilo momajtilo ilaixpan  
Dios, huan islacatilo. Quijtulo Dios tejchiuulic cuali huan pampa in, quil,  
huil ticchihualo len yes ticnequilo ticchihualo ca tocuerpo. Quema, quij-  
tulo pampa huil ticchihualo mochi laijlaculisli. Yoje, ca inminlamaxtilisli,  
yehuanten quimaxtilo pampa amo unca neli in hual Dios quijtúa quinami  
unca Jesucristo. Quimaxtilo pampa amo unca neli pampa jan Jesucristo san  
unca toTeco huan toTata.

<sup>5</sup> Axan, nicnequi annimitzijnamiquiltía inon, mas que ancataya  
lamachiltili pa anquimatis mochi inon. Nicnequi pa como anmochahuas pa  
anquijnamiquis. Annimitzijnamiquiltía pampa quiman toTata quinquixtic  
toajtztizian pin polehuilisli nepa pin lali Egipto, cuaquín quinmictic  
yehuanten hual amo quintelocanijme. <sup>6</sup> Noje annimitzijnamiquiltía in  
hual quinchihuilic ilanahuatinijmes pin cielo. Sequin pehuaje quitocaje  
oc se lajtulisli pa in hual Dios quilalic pa quinhuelilits. Quinequiloaya  
len hual amo inminyaxca. Yoje, quicajcahuaje inminchan pin cielo  
(ilhuicac). Axan Dios quinpía latzacualli, amo quiman quinmacahuas,  
mochahuasi pan laticumac, quichixticate pa quiman ajsis in hué tonali  
hual Dios quinmixcomacas ca in amo cuali hual quichihualoaya. Cuaquín  
quintojtocas pa yajmo cayasi iyampa. <sup>7</sup> Noje nicnequi annimitzijnamiquiltía  
quinami quixitinic in caltilan Sodoma huan in caltilan Gomorra huan in  
oc sequin caltilan itejtenco. Yehuanten pa innojen caltilan catanijme  
yojque quinami in lanahuatinijmes amo cuajcuali pin cielo, monilunijme  
ca lacames huan sihuames, se ca míac oc sequin. Noje yehuanten amo  
quiman mochuanijme pa monilusi quinami Dios techilic pa como quiman  
quichihuasi lacames. Yehuanten cate lanextilisli pa tehuanten, pa como  
tiyulisli yoje. Dios quinlamic innojen caltilan ca tixuxli huan noje quinlamic  
in lacames hual nepa chantinijme.

<sup>8</sup> Huan innojen lamaxtinijmes amo cuajcuali hual cate capa amhuanten ma yoje quichihualo quinami in lacames hual chantinijme pa innojen caltilan. Quichihualo noje quinami in lanahuatinijmes ej'elehuis nepa pin cielo. In lamaxtinijmes lajtemiquilo huan quiman ejsalo, quijtulo Dios quinmilic pan ipampa in lajtemiquilisli pampa unca cuali quichihualo in amo cuali. Quijtulo pan ipampa in lajtemiquilisli Dios quinmilic pampa quinmacahuiltia pa quichihuasi ca inmincuerpo len Dios techilla pa como quiman ticchihuasi. Noje quijtulo pan ipampa in lajtemiquilisli Dios quinmilic pampa quinmacahuiltia pa como quinellocasi ilahuelilitlisli aqui yes huelitijtica. Huan quijtulo pan ipampa in lajtemiquilisli unca inminyaxca quinhuejuecaltisi moxtin hual cate huejué. <sup>9</sup> Ma yoje, ma annimitzili in hual quilic Miguel. Yihual ilaicanani moxtin ilanahuatinijmes Dios hual cate pin cielo. Se tonali huan in lili molaxilijtataloaya lajtoyes pa quimatisi aqui cataya iyaxca pa quihuicas imijquil Moisés. Huan Miguel quimatiaya momajti ilaixpan in lili huan pampa in momajtic Miguel pa quixcomacas in lili ca lahuejuecaltisli pampa lajtuaya elehuis. Jan quilic, quil: "Ma mitzajua in Tata." <sup>10</sup> Ma yoje, amo cate quinami Miguel innojen lamaxtinijmes ej'elehuis, pampa yehuanten quihuejuecaltilo len yes hual amo quiximatilo. Huan ca inmincuerpos yehuanten quichihualo quinami quichihualo in yulijquimes, in yulijquimes hual amo quimatilo laijnamiquilo. Huan yojque mojjlaculo yehuanten hual cate quinami innojen lamaxtinijmes ej'elehuis.

<sup>11</sup> ¡Ah, yehuanten, quinami yalo panulo lacocoltilisli! pampa yulilo quinami Caín, canaje iojli. Noje cate quinami Balaam. Yihual quinnextilic Dios ilacames pa quichihuasi len amo cuali, huan oc se lalal quilaxlajtataya Balaam pa quinchihuilis inon. Huan innojen lamaxtinijmes ej'elehuis noje cate quinami Coré hual quixcomacac Moisés huan Aarón, mochíac inminlacocolini. Quinhuejuecaltic, huan pampa in, miquic huan noje miquije moxtin hual quitocaje. <sup>12</sup> Quema, innojen lamaxtinijmes amo cuajcuali annitlzalilo pan polehuilisli. Cate quinami tetilan itzindan in al huejcalan hual amo moitililo. Motecualo in barcos ca innojen tixcalimes, moxtinilo. Huan nepa ca amhuanten cate in lamaxtinijmes ej'elehuis quiman anlacuajtica pa anquimolancuacuetzilis toTajtzin. Amo momajtilo ilaixpan Dios. Lacualo huan launilo míac, quitemujticate quinami canaló míac pa yehuanten san. Amo annitzpalehuilo nindeno. Yehuanten cate quinami mextemimes hual amo temacalo quiahuil, san quinhueicatía in iyyecal. Cate quinami cuahuimes hual amo quipialo ilaquilyo. Noje huaquije pampa cate quinami lacapunali, yajmo quiman laquilo. Mas que unca in mesli pa quipialo ilaquilyo, amo quipialo. Innojen cuahuimes cate quinami miquije sejpa huan oc sejpa. Miquije pampa amo quipialo ilaquilyo huan noje miquije pampa cate quinami lacapunali. Amo quiman ajsisi oc sejpa pa in tonali quiman quimacalo laquilyo. Huan yojque mocahuasi innojen lamaxtinijmes. Miquije pa inminyolo pampa amo quiman quinellocaje Dios, huan in tonali hual miquilo inmincuerpos, cuaquinon moxilulo capa unca Dios huan amo quiman huil mocuepasi. <sup>13</sup> Quema, yehuanten lamaxtinijmes cate quinami in al huejcalan quiman majcoteca. Amo mosehuía, quiquixtitica posunquíl hual unca yojque quinami inminlachihualisli huan inminlajtoyes inminlamaxtilisli hual quisalo pa inmincamac in lamaxtinijmes ej'elehuis. Mochi inon hual quichihualo unca pinahualisli niman elehuis. Quema, innojen lamaxtinijmes cate quinami luceros (silalimes) hual amo cate san sejpa, amo mocahualo pa mopalasi capa cate pin cielo (ilhuicac). Huan in luceros mopolusi huan yajmo quiman moitasi. Cayasi capa laticumactía niman míac. Yoje quinami in luceros, innojen lamaxtinijmes ej'elehuis amo mocahuasi pa cayasi capa niman laticumac, capa amo

quiman quisasi. Ca ompic Dios quintilanis.

<sup>14</sup> Adán quipiaya ixohuiyo hual quipiaya ixohuiyo hual quipiaya ixohuiyo hual motocani Enoc. Huan in Enoc yec Dios ilajtuni huan quijituc in hual yahuiaya quinpanu innojen lamaxtinijmes amo cuajcuali, quijtuc, quil: “Xiquitacan. Quinlajtultic in Tata miles huan miles hual yihual quinmochipahuilic huan quinlajtultic pa yesi iyaxca pa quitequipanuilisi yihual san. Niqitac hualac ca yehuanten. <sup>15</sup> Hualaje pa quinpolehuiltisi huan pa quintilani capa yesi lacocolti moxtin yehuanten ej'elehuis, moxtin hual amo momajtilo ilaixpan Dios. Quinmixcomacaje ca mochi inminlachihualisli hual lanextililo quinami amo quimatilo momajtilo ilaixpan Dios. Noje in Tata huan yehuanten hual iyaxca quinmilije pampa quichihuaje laijlaculisli pan mochi in miac tonalijmes quiman quicocolije Dios ca lajtomes chijchicahuac.” <sup>16</sup> Quijtuaya Enoc inon pa yehuanten hual amo mocahualo pa quixtocasi in hual elehuis. Mojmota quijtulo laijtuc inminyolo pampa amo quixtocalo quinami Dios huelitía. Yultialo quinecticate quichihualo o quipialo len amo unca cuali. Amo mocahualo pa quixtocasi laquetzasi ca lajtomes chijchicahuac quicocolijtcate mochi hual Dios quichía. Quinlaquetzililo cuali ca oc sequin quinmilijtcate in hual quinpaquiltis. Huan quichihualo inon san pa yehuanten quinchihuilisi in hual quinequilo innojen lamaxtinijmes ej'elehuis. O quichihualo pa yoje innojen lamaxtinijmes huil quinquixtilisi len yes quinequilo.

<sup>17</sup> Ma yoje, amhuanten, lasojli nocnían, amo ximocahuacan pa anquijnamiquis quinami pa yina laquetzaloaya ilanahuatinijmes toTata Jesucristo, quijtuloaya in hual yahuiaya panu. <sup>18</sup> Anmitzililoaya: Ajsisi tonalijmes quiman yahui lami in lalticpan hual tiquiximatilo. Cuaquín cayasi lacames hual quihuitzquilisi mochi hual quilía Dios. Mojmota yultiasi quichijtcate mochi tetzcuinuc hual quinequilo quichihualo, amo momajtiticate ilaixpan Dios. <sup>19</sup> Cate yehuanten innojen lamaxtinijmes ej'elehuis hual quijtulo inminlamaxtilisi unca cuali, huan quijtulo pampa in, yehuanten cuali. Huan oc sequin hual quineltocalo Jesucristo amo ajsilo cayalo cuali quinami yehuanten, quil. Ma yoje, lacuajcuamanticate, yojque anmitzjcuani capa cate in oc sequin laneltocanijmes. Quijtulo, quil, jan yehuanten san yulilo quichijtcate quinami Dios quinequi. Quijtulo, quil, moxtin in oc sequin laneltocanijmes yulticate quinami yulilo yehuanten pin lalticpan hual amo quimatilo Dios ilajtol. Huan neli cate yehuanten in lamaxtinijmes ej'elehuis hual yulilo quinami yehuanten pin lalticpan, pampa noje quinami yehuanten, amo quipialo Dios iEspíritu.

<sup>20</sup> Ma yoje, amhuanten, lasojli nocnían, ximochicahualtican quinami anquineltoatica Jesucristo. Unca Dios hual anmitzmaca anmolaneltoalisli. Mochi ilajtomes cate melahuac, amo unca oc se laneltocalisli, jan inon san hual Dios quimaca. Huan xiclaflanican Dios anquimacahuiltitica pa anmitzpalehuis in Espiritu Santo. <sup>21</sup> Ximopixtiacan huan xiquijnamiquican mochi tonali quinami Dios anmitzlasojla. Xiyultiacan anquichixtica toTata Jesucristo ilaícnillisli pa quiman hualas oc sejpá huan techuicas capa ticayasi ca toyulilisli hual amo quiman lamis.

<sup>22</sup> Ximotolinican pa anquinsulahuas yehuanten hual momahuilijtcate pampa quinmaxtije in lamaxtilisi amo cuali innojen lamaxtinijmes ej'elehuis, xiquinsulahuacan pa camo quineltocatiyasi. <sup>23</sup> Xiquinquixtican pin polehuilisi yehuanten hual pehuaje quineltocaje in lamaxtilisi elehuis. Xiquinquixtican quinami anquinquixtitiquisasquiaya se pin tixuxli pa camo miquis lachichinuli. Quema, xiquinmicnilican, huan amhuanten ximomajtican pa camo anmitzijlacus in lamaxtilisi elehuis hual quinchihuilic yehuanten pa quichihuasi laijlaculisli. Xijcocolican

inminlaijlaquisli, xiquitacan quinami cataya se tzotzomajli pucmic hual anmitzijaltía. Quema, xiquiztiacan yoje pa como anmoaniltis ca inminlaijlaquisli.

*Lami ca lajtomes huejué pa Dios*

<sup>24</sup> Axcán, ma tiquilican lajtomes huejué yihual hual huil techpías pa como tihuetzisi pan iojli. Huil techuicas pa timoquetzasi iyampa yihual tiqizticate ilaixpelalisli niman cualtichin huan ichicahualisli hué. Tiquitasi amo ticpixticate laijlaquisli nindeno. Huan tiqitasi ticpixticate niman míac paquilisli. <sup>25</sup> Quema, pa yihual in Dios hual unca se san, hual techquixtic pin polehuilisli pan ipampa toTata Jesucristo, ma quipía mochi laixpelalisli niman cualtichin. Ma techcaqui tiquilijticate lajtomes huejué. Ma caya pa yihual chichahualisli hué huan lahueliltisli. Ma quipía mochi innojen quiman pehuaya mochi huan axcán huan pa mochi tonalijmes hual ajsitihualasi. Yoje ma ye.

## Jesucristo quinextilía San Juan len cataya lalatili hual yahui panúa, in Apocalipsis

### *Jesucristo iApocalipsis*

<sup>1</sup> Pan in amal niqijtúa inon hual Jesucristo nechnextilic. Nechnextilic innojen inahuac yihual hual Dios techlatic tehuanten quiman pehuac mochi pa yina. Axcan Jesucristo technextilía. Dios quimacac in lajtomes pa yihual Cristo quinmilis huan pa quinnextilis itequipanujquimes len quipías pa panus huan amo huejcahuas pa panus. Huan Cristo quimachiltic in lajtomes pan ipampa ilanahuatini pin cielo (ilhuicac) hual yihual nechtilanilic nehual itequipanujquil Juan. <sup>2</sup> Huan nehual Juan niqijtúa neli pampa in amal unca ilajtol Dios huan niqijtúa neli pampa Jesucristo quijtúa neli innojen lajtomes hual nican cate lajcuiluli. Unca melahuac. Quema, mochi hual nehual Juan niqitac unca lajcuiluli nican. Huan Jesucristo quijtúa neli pampa unca melahuac.

<sup>3</sup> Quipías niman míac paquilisli hual aqui momaxtía in amal huan hual aqui quicaqui momaxtía in amal. In amal unca Dios ilajtulisli, huan quipías paquilisli hual aquinojen quineltocasi in hual unca lajcuiluli nican, pampa ajstihuala in tonali quiman panusi innojen.

### *Juan quinmijcuilulía in chicome lanechiculisli capa monechiculo laneltocanjmes*

<sup>4</sup> Nehual, Juan, in amal annimitzijuicuilulijtica amhuanten hual Dios ilacames pa innojen siete (chicome) caltilan hual cate pin lalticpan Asia. Ma cayacan ca amhuanten in cuali hual Dios tejchiuilía huan imosehuilisli pa anmoyolo. Dios toTajtzin unca huan cataya huan hualas. Huan ma annitmacacac in cuali lachihualisli huan mosehuilisli pa anmoyolo innojen chicome Espíritus hual cate iyampa yihual yehuatica pan iicpali hual laixpela chicahuac capa huelitía. <sup>5</sup> Huan ma annitmacacac innojen Jesucristo hual huil ticlalilo mochi tolaneltocalisli ca mochi hual quijtúa. Quema, miqic pampa quijtuc len melahuac. Yihual in se hual quipehualtic in oc se yulilisli pa lacames. Yihual yulic oc sejpa ca iyulilisli in cielo, in yulilisli hual quipía in lahuelilitisli hual unca quinami itajtzin se quimaca ixolol hual ca yihual pehuac inminlacatisli moxtin ixolomes. Yihual Jesucristo noje huelitía pan in huejueyenten hual cate pan in lalticpan. Yihual techlasojla huan pan ipampa iesli yihual techmacahuac pa camo tipanusi in lacocoltisli hual cayasquiaya pampa ticchihuaje laijlaculisli. <sup>6</sup> Techmacac noje lahuelilitisli pa tihuelitisi quinami huejueyenten, pa tictequipanulisli Dios quinami itiopistas, yihual Dios iTajtzin Jesucristo. Huan Jesucristo, ixolol Dios, jma quijtucan lajtulisli hué pa yihual ca mochi momajtilisli, ma camo mochahua pa huelitis! Yoje ma ye.

<sup>7</sup> ¡Xiquitacan, yihual huala ca in mextemimes! Huan moxtin quitasi, quema, huan yehuanten hual quipanahuije ca teposli latentili. Huan moxtin in míac lacames pin lalticpan, quincocus inminyolo pampa quitasi yihual huan momajtisi huan chocasi quiman quitasi. Quema, yoje cayas.

<sup>8</sup> “Nehual niunca quinami in Alfa huan in Omega, in A huan in Z. Nicnequi niqijtúa, niunca hual aqui quipehualtic mochi, huan niunca hual aqui quilamis mochi”, quijtúa in Tata Dios, yihual hual aqui unca huan hual aqui cataya huan hual aqui hualas, yihual hual aqui quipía mochi chicahualisli.

*Juan quita in Cristo laixpelatica niman cualtichin*

<sup>9</sup> Nehual, Juan, niunca anmocni, huan nicpía nolajco quinami amhuanten anquipia anmolajco ca len yes cocolisli hual tipanulo, huan anmolajco ilahueliltilisli Dios huan anmolajco in hual ticpialo pa timopepenialtisi pa tipanusi in amo cuali hual tejchihuililo pampa ticpialo Jesús pa toyolo. Nicataya pin lali hual unca lajco pin al huejcalan, in lali itoca Patmos. Nechtlanije nepa Dios ilacocolinijmes pampa niqinmachiltiaya lacames ilajtol Dios, niqinlaquetzilijtataya neli lajtomes inahuac Jesucristo. <sup>10</sup> Niajsic nicayac ca in Espíritu Santo nechueliltijtataya ca ichichualisli. Cataya pan in tonali hual tictocayaltilo itonali in Tata. Huan pa notepotzcon nijcaquic se lajtol hué nechnotzac, cataya quinami latzotzona se lancaquetzaloni.

<sup>11</sup> Quijtuc:

—Niunca hual nicpehualtic mochi huan hual niclamis mochi, quinami in letras A huan Z. Inon hual tiquita, xiquijcuilu pan se amal huan xiquintilanili in chicome lanechiculisli capa cate Dios ilacames pa innojen chicome caltilan hual cate Efeso huan Esmirna huan Pérgamo huan Tiatira huan Sardis huan Filadelfia huan Laodicea. Cate pin lalticpan de Asia.

<sup>12</sup> Jan axcan nimomalinac pa niquitasquiaya aqui laquezataya ca nehual ca in lajtol. Huan quiman nimomalinac, niqinmitac majlaclihuanome (doce) tapalcames milintataloaya. Cataloaya lachihuali ca oro. <sup>13</sup> Lajco pin tapalcames niquitac se hual nesiaya quinami ilacal in cielo, lalaquentili ca se nahuas huejcanic hual ajsic pa icxihuaajmes. Quipiaya se lacuejtiloni custic quinami oro ilpitataya itzindan itzicalan. <sup>14</sup> Nesiaya itzontecon huan itzondi iztatataya quinami itojmiyo de borrego, iztatataya quinami in tisihuil. Huan iixtololojmes cataloaya quinami se tixuxli milintica. <sup>15</sup> Huan icxihuaajmes cataloaya quinami teposli cahuantica quinami jan axcan quisaje pan se tixuxli niman totonqui. Huan ilajtol cataya quinami xahuani in al huejcalan quiman moajcoctica. <sup>16</sup> Pa ima cuali quinpiaya chicome luceros (silalimes), huan quistataya pa icamac se teposli latentili calica moanalo guaches. Huil latequiaya ca pani huan ca itzindan. Huan nesiaya iixco quinami in tonali quiman laixpela ca mochi ilaixpelalisli.

<sup>17</sup> Quiman niquitac, nihueztic inminlaixpan quinami nicataya se mijquil. Ma yoje, quilalic nopan ima cuali huan nechilic:

—Amo ximomajti. Nehual niunca hual quipehualtic mochi huan hual quilamis mochi. <sup>18</sup> Nehual in hual yultica. Nimiquic huan xiquita, niyultica huan amo quiman nilamis. Huan quinami se hual quinpiá lalapuhualonijmes noje quipía lahueliltilisli pa quinlapus lalapujquimes, nehual noje nicpía lahueliltilisli pa niqijtus pa miquisi lacames huan pa yasi ca capic cate in mijquimes o pa camo miquisi pa cayasi ca in mijquimes. <sup>19</sup> Axcan, xiquijcuilu inon hual tiquitac huan hual tía tiquita inahuac len unca axan huan len neli yahui panúa quiman lamisi innojen hual tía tiquita. <sup>20</sup> Nimitzilis len queinequi mitznextilía innojen chicome luceros pa noma cuali hual tiqinmiztica, huan in chicome tapalcames lachihuali ca oro hual lajticate. Pa yina huan axan ayamo quimatije nindeno inahuac inon yehuanten pin lalticpan. Innojen chicome luceros cate in lanahuatinijmes hual quilachililo in chicome lanechiculisli capa cate Dios ilacames pa innojen chicome caltilan. Huan in chicome tapalcames hual lajticate cate in chicome lanechiculisli capa monechiculo Dios ilacames.

## 2

*In lanahuatilisli pa in lanechiculisli pa Efeso*

<sup>1</sup> Xiquijcuiluli inminlanahuatini ilacames Dios hual cate pin caltilan Efeso, xiquili: “Yoje mitzilía Cristo hual mojmosta quinpixtía in chicome luceros pa ima cuali huan nejnemía lajco capa cate in chicome tapalcames lachihuali ca oro, mitzilía: <sup>2</sup> Nicmati mochi inon quinami tichtequipanuilía. Titequipanuc chichahuac huan timopepenialtic amo tisiajtataya pa ticmaxtis melahuac nolamaxtilisli cuali. Huan nicmati quinami amo huil timopepenialtía pa lacames amo cuajcuali cayasi ca amhuanten. Huan tiquinchihuilic lajlanilisli pa timonextilis sinda yehuanten neli cate ilanahuatiniyimes Dios hual yoje quijtulo, huan anquimatic pampa islacatilo. <sup>3</sup> Nicmati quinami timochicahuatlía pa tipanus in amo cuali hual mijchihuililo, huan amo timopolúa. Quema, timochicahuatlíc pa tipanus inon pampa ticpía notoca. Titequipanuc chichahuac pa nehual. <sup>4</sup> Ma yoje, nicpía pa nimitzilis pampa niquita len amo cuali ca téhual. Yajmo tichlasojla huan amo tiquinlasojla oc sequin quinami tilalasojlani quiman tipehuac tichtequipanuilic. <sup>5</sup> Pampin, xiquijnamiqúi quinami ticataya pa yina huan xiquinchihuacan innojen cuajcuali hual tipehuac ticchíac quiman timochíac noyaxca. Huan sinda amo ticchías yojque, nihualas ca amhuanten huan nimitzizcuanilis motapalcal capa unca. Nicnequi niqijtúa, nolacames hual chantilo pan Efeso yajmo quinlahuilisli oc sequin pa quinpalehuisi lacames pa canasi no'ojli. Yoje cayas sinda amo ticpalas moyolo. <sup>6</sup> Ma yoje unca inon hual ticchía cuali: Tiquincocolía in hual quichihualo yehuanten hual quitocalo len quimaxtilo in nicolaítas. Nehual noje amo niquixtoca inminlamaxtilisli. <sup>7</sup> Aquí quipía inacas ma quicaquí len quinmilía iEspíritu Santo Cristo yehuanten hual cate ilanechiculisli Dios ilacames. Yihual hual quisulahua len yes quinequi quijcuani pan no'ojli, nicmacas pa yes iyaxca pa quicuas ilaquilyo in cuahuil hual quiyuliltía nolacames. In cuahuil unca pa Paraiso, ilajcotiyan ilaquilyo Dios. Nicyuliltis pa quipías mochi in cuali capa Dios huelitía.”

### *Len quijcuiluc pa in laneltocaniyimes pa Esmirna*

<sup>8</sup> Huan xiquijcuiluli in ilanahuatini Dios ilacames hual cate pa Esmirna, xiquili: “In hual quijtúa yihual hual quipehualtic mochi huan quilamis mochi, yihual hual miqúic huan yulic oc sejpa: <sup>9</sup> Nicmati mochi in cocolisli hual ticpanujtica huan quinami amo ticpía míac tomin, mas que neli ticpía míac hual ipati laijtic moyolo. Huan nicmati quinami mitzhuejuecaltilo yehuanten hual quijtulo cate judíos huan ma yoje, pa inminyolo amo neli yehuanten judíos. No, yehuanten cate ilacames Satanás, yehuanten monechiculo pa quichihualo len quinequi Satanás. <sup>10</sup> Amo ximomajtitúa quiman tía tipanúa lacocoltisli pa nadita axan. Xiquita. Nadita axan yahui quinlasa in lili sequin ca amhuanten pan calijtic pa motolinis anmijchihuilis pa yajmo anquineltocas Dios, quinequi pa anmijcuanis pan Dios iojli. Huan pa majlacli tonalijimes anpanus míac amo cuali. Ximopepenialti pa tipanus mochi inon huan sinda ticpías timiquis, ma yoje ximopepenialti pa timiquis. Sinda yoje ticchía, cuaquín nimitzmacas noyulilisli hual unca nolaxlahuilisli hual niquinmacas hual aquinojen mopepenialtulo pa panusi mochi. <sup>11</sup> Aquí quipía inacas pa lacaquis, ma quicaquí len quinmilía in Espíritu Santo innojen inminlanechiculisli Dios ilacames. Yihual hual lasulahua amo quipanus in miqúilisli hual amo quiman lamis.”

### *Len quijcuiluc pa in laneltocaniyimes pa Pérgamo*

<sup>12</sup> Huan xiquijcuiluli ilanahuatini de Dios ilacames hual cate pa Pérgamo, xiquili: “Innojen cate ilajtomes yihual hual quiman lajtúa, huil laxitinía

quinami iteposli se guache hual unca latequilti huan latequi ca pani huan ca itzindan: <sup>13</sup> Nicmati capa anchanti, unca capa Satanás quipía iicpali capa huelitía. Nicmati mochi hual ticchías. Amo quiman timocahuac pa tichneltocasquiaya nehual, huan amo quiman timocahuac pa tichneltocasquiaya mas que tiunca capa chanti Satanás. Quema, tiyultiahuiaya ticlajtataya molaneltocalisli ca nehual quiman quimictije Antipas hual yec notequipanujquil hual amo quiman mocahuaya pa quichías in hual nicnequiaya. <sup>14</sup> Ma yoje, niquita nadita pan tehual hual amo niquixtoca. Cate sequin capa amhuanten hual quineltocalo ilamaxtilisli Balaam. Yihual quinextilic in hué Balak quinami huil quinnequiltic pa quichihualosquiaya laijlaculisli yehuanten in israelitos. Quinyantic pa quicualosquiaya nacal hual quilaliloaya inminlaixpan monos hual ilacames Balak quinmolancuacuetzilinjme. Huan quinyantic pa quichihualosquiaya amo cuali in lacames ca sihuames hual amo inminsihuahuan. <sup>15</sup> Noje cate ca amhuanten sequin hual quitocalo inminlamaxtilisli in nicolaítas. <sup>16</sup> Pampa in, xicpala moyolo pa tilajnamiquis quinami Dios. Huan sinda amo, cuaquinon nihualas ca tehual jan axcan huan nimoanas ca yehuanten quinami ca inminteposli guaches hual quisa pa nocamac, hual unca nolajtomes. <sup>17</sup> Aquí huil lacaqui, ma quicaqui len quinmilía in Espíritu Santo in míac inminlanechiculisli Dios ilacames. Aquí quinsulahua yehuanten hual quimaxtilo len amo cuali, yoje yihual nicmacas len lalatili pa quicuas hual quichicahualtis iyolo. In pa quicuas unca quinami maná hual quistihuala pin cielo. Huan nicmacas se tixcali iztac hual quipía lajcuiluli ipan itoca yancuic, huan in itoca amaqui quimatis, san yihual hual nictocayaltic ca itoca.”

*Len quijcuiluilic ilanahuatini in laneltocanjmes pin caltilan Tiatira*

<sup>18</sup> Huan xiquijcuiluli ilanahuatini ilacames Dios hual cate pa Tiatira, xiquili: “Yoje quijtúa iXolol Dios hual quinpía iixtololojmes chicuenta se tixuxli milintica huan quinpía icixhuajmes cahuanticate quinami se teposli latotonili pan se tixuxli: <sup>19</sup> Nicmati mochi in hual ticchía, quinami tilalasojla huan quinami tichneltoca huan quinami tichtequipanuilía huan quinami timopepenialtía pa tipanus mochi hual mitzajsilo mitzlacocoltítica huan amo timocualanilía. Huan nicmati quinami in tequipanulisli hual tijchi-huilic axan unca míac, amo yoje míac cataya in tequipanulisli hual tipehuac tijchiuilic. <sup>20</sup> Ma yoje, niquita inon ca tehual hual amo niquixtoca. Ticmacahuilítia pa in sihual hual unca quinami Jezabel quipías lahuellitilisli ca Dios itequipanujquimes. Yihual motocayaltía ilajtuni sihual Dios huan quinmaxtía quincuaajcuamantica notequipanujquimes pa quichihuasi len amo cuali lacames ca sihuames. Quinmaxtía pa quicuas lacuali hual quilalilo quinami huendi inminlaixpan monos. <sup>21</sup> Nicmacac míac tonalijmes pa quipalascuaya iyolo. Ma yoje, amo quinequi quipala pa camo quichías in amo cuali ca lacames. <sup>22</sup> Xiquita. Nicchihuilis pa huetzis cocoxqui pan se lapexli huan niquinchiuilis pa panusi míac cocolisli yehuanten hual yulilo yoje quinami yihual quinnextilía. Quema, yoje niquinchiuilis sinda amo mocahualo pa quichihuasi quinami yihual quichía. <sup>23</sup> Huan niquinmictis ixolomes, niquijtúa, yehuanten hual yulilo quinami yihual quinnextilía. Huan moxtin inminlanechiculisli nolacames quimatis nehual niunca hual aqui nilatejemúa pa laijtic inminyolo lacames huan pa laijtic inmintzontecan. Niquinmacas mochi sejse ca amhuanten len yes quinmahuilía pa quipias. <sup>24</sup> Huan moxtin in oc sequin ca amhuanten nolaneltocanjmes hual cate pan Tiatira amo yulilo quinami quinextilía ilamaxtilisli Jezabel. Yehuanten



amo monextilije in lamaxtilisli hual quijtulo sequin pampa moitalo pin ihuejcalan niman laijtic iyolo Satanás. Axcan niquinmilía yehuanten inon: Amo nía niquinlalilía oc se etialisli, san inon: <sup>25</sup> Ma yultiacan quineltocaticate in lamaxtilisli hual anquimati, ja in san. Huan xiyultiacan yoje pa quiman nihualas. <sup>26</sup> Yehuanten hual quinsulahualo yehuanten hual lamaxtilo len amo cuali huan yultialo quichijtcate len niquixtoca pa quiman lamis in lalticpan, cuaquín niquinmacas lahueliltlisli pa huelitisi pan yehuanten pin mochi lalimes. <sup>27</sup> Huelitisi quinami lachianijmes ca lahueliltlisli chicahuac. Huelitisi ca teposlimes pijpitzahuac. Amaqui huil quinmixcomacas pa pintzacuilis. Yesi quinami quiman se quilapanas se tapalcan ca se teposli pitzahuac, quinsulahuasi moxtin. <sup>28</sup> Jan quinami nehual nicanac ilahueliltlisli notajtzin, yojque yehuanten canasi lahueliltlisli. Huan niquinmacas laixpelalisli cualtichin hual unca iyaxca in cielo (ilhuicac), quinami quipía in lucerota (silalin hué) hual quisa cualcan. <sup>29</sup> Yihual hual aqui huil lacaqui, ma quicaqui len quinmilía in Espíritu Santo innojen inminlanechiculisli Dios ilacames.”

### 3

#### *Quijcuilulía se amal in laneltocanijmes pin caltilan Sardis*

<sup>1</sup> Xiquijcuiluli ilanahuatini ilacames Dios hual cate pin Sardis, xiquili: “In lajtomes cate iyaxca aqui hual quinpía in chicome (siete) iljyecames Cuajcuali Dios, hual quinequi quijtúa mochi iEspíritu Dios, huan quinpía in chicome luceros (silalimes), quilía: Nicmati mochi in hual ticchía. Lacames quijtulo pampa tiyultica pa moyolo. Ma yoje, neli timictica pa moyolo. <sup>2</sup> Xiejsa huan xiquinchicahualti innojen hual ayamo mocahuaje quipiaje Dios iyulilisli, pampa ca nadita yalo miquilo. Ticpía pa ticchías yojque, pampa niquitac quinami tehual amo tiajsic ticchiac quinami nolacames quipialo pa quichihuasi iyampa noDios. <sup>3</sup> Xicaya tiquijnamictía len ticpiac. Cataya Dios ilajtol melahuac. Xicaya tiquijnamictía len tijaquic. Xicaya ticneltocatía inon huan xicpala moyolo pa laijnamiquis quinami Dios. Sinda amo ticnequi tilachixtía, cuaquín nihualas ca tehual quinami huala se laxtequini, niquiqtúa, amo ticmatis len tonali nihualas ca tehual. <sup>4</sup> Ma yoje nepa Sardis ticpía se ome lacames hual amo quiman quinmopucmilic inmintotzomajli, nicnequi niquiqtúa, yulilo chipahuac pa inminyolo. Huan yehuanten yulisi ca nehual lalaquentili ca tzotzomajli iztatica, pampa quinmahuilá. <sup>5</sup> Aqui hual quisulahuá in amo cuali yes lalaquentili yojque ca tzotzomajli iztatica. Huan amo nichías pa yajmo nesis itoca pan noamal hual quinpía inmintocajmes moxtin hual yulisi ca nehual. Niquilis neli inminlaixpan noTajtzin huan ilanahuatinijmes pin cielo pampa niquiximati in se quinami noyaxca. <sup>6</sup> Moxtin hual huil lacaqui, ma quicaquican len quinmilía in Espíritu Santo in mías inminlanechiculisli in laneltocanijmes.”

#### *Quinmaca lajtol in laneltocanijmes pa in caltilan Filadelfia*

<sup>7</sup> Xiquijcuiluli ilanahuatini ilacames Dios hual cate pa Filadelfia, xiquili: “Innojen lajtomes cate ilajtomes in se hual unca niman cuali huan chipahuac huan pampa inon amaqui huil ajsi ihuán capa yihual. Jan yihual san in lalcal hual unca melahuac. Yihual quipía ilapuhualoni David, quinequi quijtúa, san yihual quipía lahueliltlisli pa quilapulis se in cielo pa calaquis. Quema, yihual huil lalapúa huan amaqui huil latzacua. Huan yihual huil latzacua huan amaqui huil lalapúa: <sup>8</sup> Nicmati mochi hual ticchía. Xiquita.

Nimitztlalilic moixpan se lalapujquil lapujtica hual amaqui huil quitzacuas. Cayas pa tiquinnexilis lacames no'ojli. Nicmati ticpía jan nadita chicahualisli. Ma yoje tiyultía ticchijtica quinami quijtúa nolajtol huan amo quiman tiquijituc da amo tiunca noyaxca nehual. <sup>9</sup> Xiquita. Nicchihuilis pa panus inon: Cate yehuanten hual ilacames Satanás mas que quijtulo pampa yehuanten judíos, huan amo quijtulo neli, islacatilo. Xiquita. Niqinmolancuacuetzaltis inminlaixpan mocxihuaimes, huan quimatisi pampa nehual, quema, nimitzlasojlac. <sup>10</sup> Amo timocahua pa ticneltocas nolajtol hual quinmilía lacames pa mopepenialtisi pa panusi in amo cuali hual quinchihuililo lacames. Pampa in, quiman ajsis in tonali quiman moxtin hual yulisi pan in lalticpan yalo panulo míac lacocoltisli, nimitztlachilis pa como anmitzpanus inon. <sup>11</sup> Amo nihuejcahuas nihualas. Xicneltocatía mojmosta ca mochi moyolo len ticmati inahuac nolajtol, pa yojque amaqui mitzanilis in hual moyaxca pa huil tihuelitis capa Dios huelitía. <sup>12</sup> Aquí hual lasulahua nichías pa yes quinami se cuajmaxali pa ilasojli tiopan noDios. Quinequi quijtúa, yihual amo mocahuas pa cayas capa unca Dios huan amo quiman mijcuanis. Quinami se cuajmaxali amo mijcuanía, amo mijcuanis capa yihual. Huan niqijcuilus ipan, quijtus itoca noDios huan noje itoca icaltilan noDios hual unca in Jerusalén yancuic hual temujtihualas, quisas pa in cielo capa unca noDios. Huan aquí hual lasulahua quipías lajcuiluli ipan yihual notoca yancuic. <sup>13</sup> Moxtin hual huil lacaquilo ma quicaquican len quinmilía in Espíritu Santo in míac inminlanechiculisli Dios ilacames.”

*Quimaca lajtol ilanechiculisli in laneltocanjmes hual cate pin caltilan Laodicea*

<sup>14</sup> Xiquijcuiluli ilanahuatini ilacames Dios hual cate pa Laodicea, xiquili: “Yojque quijtúa yihual hual amo quiman mocahua pa quichías quinami quijtúa ilajtulisi Dios. Yihual quijtúa len melahuac inahuac mochi hual cataya huan mochi hual unca huan mochi hual cayas. Moxtin huil quilalilo mochi inminlaneltocalisli ca len quichía huan quijtúa. Cataya yihual hual quipehualtic mochi hual unca pin cielo huan pan in lalticpan, mochi hual Dios quinequic pa cayas. <sup>15</sup> Nicmati mochi hual tichía. Amo tiunca iztic, amo tiunca totonqui, san tiunca totonquito. Quinequi quijtúa, tehual amo tiyuli quinami yehuanten hual quinequilo nechmolancuacuetzililo, huan amo tichtequipanuilía ca mochi anmoyolo, jan tichtequipanuilía nadita san. ¡Niquequisquiaya pa ticayasquiaya iztic o totonqui! <sup>16</sup> Axan, pampa tiunca yojque, nimitzquixtis capa nehual, quinami se hual quichijcha pa icamac len al hual unca san totonquito. <sup>17</sup> Tiquijtúa pampa ticpía míac huan ticpía mochi hual ticnequi, amo monequi pa ticpías nindeno. Ma yoje, neli amo timonextilía quinami pa moyolo amo ticpía len. Huan monequi pa Dios mitzicnilis. Quicocúa iyolo pampa tehual tiunca yoje. Huan noje pa moyolo amo huil lachía, tiunca quinami pachacal huan yoje amo ticpía míac pa moyolo, amo ticpía míac laneltocalisli calica quinami timocuejtitis pa moyolo, tiunca quinami se nacatil pa moyolo. <sup>18</sup> Nimitzilía, xichcaqui nehual. Xichtemachi pa timocuhuilis len yes hual mitzpalehuía pa moyolo. Yes quinami oro chipahuac hual unca lachipahuali pin tixuxli. Jan yojque neli timonechicuhuilis míac pa moyolo. Huan ximocuhuii tzotzomajli iztac huan chipahuac hual nicpía pa amhuanten. In tzotzomajli amo quipialo len amo cuali. Yojque amo tinesis quinami se nacatil hual pinahua noyampa. Huan xichmoanili nehual colirio pa timoxahuilis inmixtololjmes anmoyolo pa pajtisi, pa yoje oc sepa huil tilachías pan ipampa anmoyolo. <sup>19</sup> Nehual

mojmosta niqunnexutilijtica quinami monequi pa yulisi yehuanten hual niqunlasojla. Huan niqunmaca lacocoltilisli pa monextilisi inon. Pampa in, yojque nia nimijchihuilía tehual sinda amo ticipalas quinami tiyultica huan quinami amo tichtequipanuilis ca mochi moyolo. <sup>20</sup> Xiquita. Unca quinami nimoqueztica ilaixpan in lalapujquil huan nilanoztica mojmosta. Sinda se nechcaquis nicnoztica huan nechlapulis in lalapujquil, nicalaquis huan nicayas ca yihual huan tilaqueztiasi quinami lasojlimes. Yihual cayas ca nehual huan nehual nicayas ca yihual. <sup>21</sup> Aquí hual lasulahua, yihual nicmacahuiltis pa molalis ca nehual capa nihuelitía. Jan yojque nimolalic inahuac noTajtzin capa yihual huelitía quiman nehual niquninsulahuac nolacocolinjmes. <sup>22</sup> Aquí hual huil lacaquilo, ma quicaqui len quinmilía in Espiritu Santo in míac inminlanechiculisli Dios ilacames.”

## 4

### *Juan quita quinami quimolancuacuetzililo Dios pin cielo*

<sup>1</sup> Quiman panuc inon, nilachíac huan ¡xiquitacan! Cataya se lalapujquil lapujtataya pin cielo. Huan nijcaquic in lajtol hual nipehuac nijcaquic xahuantataya quinami se lancaquetzaloni. Huan nechnotzac, nechilic:

—Xilejcu ca nican huan nimitznextilis len yahui panúa quiman lamisi panusi innojen hual panujticate axan innojen tonaljmes.

<sup>2</sup> Jan ajnaxcan in Espiritu Santo nechnac huan pan ipampa yihual ni-moitac pin cielo (ilhuicac). Nepa niquitac quinami se iicpali se hué capa molalía pa huelitis, huan cataya se yehuatataya ipan. <sup>3</sup> Huan yihual hual nepa yehuatataya lapelaniaya quinami lapelaniya se maquisli lachihuali ca diamante o rubí. Huan quiyahualujtataya pa iicpali se cosamalol xuxuctic quinami se esmeralda. <sup>4</sup> Huan quiyahualujtataloaya in icpali hual laixpelaya oc sequin veinticuatro (sempuhuali huan nahui) icpalimes huan yehuatataloaya veinticuatro abuelojmes inminpan. Moxtin cataloaya lalaquentili ca tzotzomajli iztaticate huan quinpialoaya yahuali lachihuali ca oro pa inmintzontecon. <sup>5</sup> Huan quisac pin icpali lapelanilisli huan comunilisli huan in comunilisli xahuaniaya ca xahuanisli hué. Huan ilaixpan in icpali hual laixpelaya cataloaya chicome (siete) tixuxlimes milintataloaya pa in hachones. In hachones milintataloaya monextilo Dios ichicahualisli hué huan cate In chicome Dios iljyecames (iEspíritus) Cuajcuali. <sup>6</sup> Huan lapalahuali ilaixpan in icpali hual laixpelaya cataya quinami se al hué lanescas quinami se vidrio.

Huan lajco pa mochi huan yahualujticate in icpali moquezatataloaya nahui yulijquimes huan ca mochi inminlaixpan huan inmintepotzcon quinpialoaya míac inmixtololjmes. <sup>7</sup> Se ca innojen yulijquimes nesiaya quinami se león, oc se nesiaya quinami se buey yancuic. Oc se quipiaya iixco quinami se lacal, huan oc se nesiaya quinami se cuaujli (águila) hual quinpalaajtataya inastacapajmes pa palanisquiaya. <sup>8</sup> Mochi sejse innojen yulijquimes quinpialoaya chicuase inastacapajmes. Ca lajco pa mochi sejse inastacapajmes huan pa itenco huan pa itzindan cataloaya míac inmixtololjmes. Yihualitonalí pa semilhuil huan pa layúa amo mocahualoaya pa quijtusi:

Niman cuali huan chipahuac in Tata, huan pampa in, amo huil ajsi ca yihual nindeno hual amo unca cuali huan chipahuac,  
 niman cuali huan chipahuac huan amo huil ajsi ca yihual nindeno hual amo unca cuali huan chipahuac,  
 niman cuali huan chipahuac huan amo huil ajsi ca yihual nindeno hual amo unca cuali huan chipahuac.

Yojque unca toTata Dios hual quipía mochi chicahualisli,  
yihual yec huan yihual unca huan yihual yes.

<sup>9-10</sup> Huan innojen yulijquimes, quiman yes quililo innojen lajtomes huejué huan quijtuloaya ca momajtilisli huan quisehuiloaya in se hual mocahua yultica, cuaquín molasaloaya in veinticuatro abuelojmes pa quimolancuacuetzilisi in se hual mocahua yultica. Huan moquixtililoaya inminyahualimes lachihuali ca oro hual quinextiloaya pampa unca inminyaxca pa huelitisi, quinlasalo ilaixpan in icpali hual laixpela huan quililo:

<sup>11</sup> ToTata, tehual toDios, unca moyaxca pa mitzilisi innojen lajtomes huejué huan unca moyaxca pa moxtin quimatisi momajtisi molaixpan tehual.

Huan unca moyaxca pa ticpías mochi lahuelilitisli,  
pampa tehual tiquinchíac mochi.

Mochi innojen cayaje, quema, cataloaya lachihuali pampa ticnequiaya yojque.

## 5

### *In amal huan in Borreguito*

<sup>1</sup> Huan niquitac quinami yihual hual yehuatataya pan in icpali hual laixpelaya quipiaya se amal lacololuli pa ima cuali. Huan in amal cataya lajcuiluli ca pani huan ca itzindan huan cataya latzacuali ca chicome latzacualonijmes lachihuali ca cera. <sup>2</sup> Huan niquitac se ilanahuatini in cielo (ilhuicac) hual quipiaya míac chicahualisli huan ca lajtol chicahuac tzajtziaya in lajlanilisli, quijtcu:

—¿Aqui quipía lahuelilitisli pa quincapehuas in latzacualonijmes pin amal lacololuli pa quipalahuas in amal?

<sup>3</sup> Huan amo moitilic se pa mochi in cielo (ilhuicac) huan pan laticpan huan amo cataya se capa in mijquimes hual quipiaya lahuelilitisli pa quipalahuasquiaya in amal pa quitasquiaya huan momaxtisquiaya. <sup>4</sup> Huan nichocac míac pampa amo moitilic jan se san hual quipiaya lahuelilitisli pa quipalahuasquiaya in amal pa quitasquiaya huan pa momaxtisquiaya.

<sup>5</sup> Cuaquinon se ca in abuelojmes nechilic:

—Yajmo xichoca. Xiquita, in lalac hual tictocayaltilo inminLeón inminlacames imiahuimes Judá, yihual lasulahuac. Yihual imiahuil David in hué, huan yihual quinsulahuac ilacocolinijmes hual cate miquilisli huan laijlaculisli. Axan huil ca mochi lahuelilitisli quincapehuas in latzacualonijmes pa quipalahuas in amal.

<sup>6</sup> Cuaquinon nilachíac huan niquitac se Borreguito moquezataya inminlaixpan innojen veinticuatro abuelojmes huan inminlaixpan in icpali hual laixpelaya huan inminlaixpan innojen yulijquimes. Huan in Borreguito quinpiaya pa icuerpo (inacayo) domutzojmes hual nesiloaya capa quitzopinije icocolinijmes pa quimictisi. Huan in Borreguito quinpiaya chicome icuacuas huan chicome iixtololojmes. Innojen iixtololojmes quinequilo quijtulo pampa iEspíritu Santo Dios unca quinami chicome ijyecames (espíritus) cuajcuali hual cate latilanili pa mochi in laticpan huan quimatilo mochi inahuac Dios. <sup>7</sup> Huan uyac canac in amal hual cataya pa ima cuali yihual hual yehuatataya pani in icpali hual laixpelaya. <sup>8</sup> Huan quiman canac in amal, molasaje ilaixpan in Borreguito in nahuenten yulijquimes huan in sempuhualihuanahui (veinticuatro) abuelojmes. Mochi sejse ca yehuanten quinpioaya se arpa huan se tapalquita lachihuali ca oro tentataya

ca ajualisli. In ajualisli quinequi quijtúa inminlajlanilisli Dios ilacames.  
 9 Huan quicantaruilloaya (quicuilquilloaya) se cantadita (cuical) yancuic, quijtuaya:

Unca tehual moyaxca pa ticpiás lahuelilitilisli pa ticanas in amal pa tiquin-  
 capehuas ilatzacualonijmes pa quipalahuas, pampa ticataya lamictili.  
 Huan pan ipampa quinami tictoyahuac moesli tiquinlaxlahuilic in lacames  
 pa huil yesi Dios ilacames.

Yehuanten chantilo pan mochi lalimes huan cate ca mochi cuilaxli huan  
 lajtulo len yes lajtol huan cate len yesi lacames hual pan yehuanten  
 huelitilo in huejeyenten pin lalticpan.

10 Huan tiquinnechicuc pa yesi se lalacera hual pan yehuanten Dios huelitúa  
 quinami inminhué.

Huan yehuanten yesi itiopistas toDios, huan huelitisi pan lalticpan.

11 Cuaquinon nilachíac huan nijcaquic inminlajtol niman míac millones  
 ilanahuatinijmes in cielo (ilhuicac) hual quinyahualujtataloaya in icpali  
 hual laixpelaya huan innojen yulijquimes huan in abuelojmes. 12 Huan ca  
 lajtol chicahuac quijtuje:

Unca iyaxca in Borreguito hual cataya lamictili pa yes in niman hué pa  
 yojque quipiás in lahuelilitilisli.

Amo quiman huil cayas yoje hué mochi hual ipati huan mochi hual  
 laxlahuilo niman míac pa quipiasli.

Unca iyaxca pa yes in niman hué pa yoje quijtusi pampa yihual quipía mochi  
 lajmatilisli huan chicahualisli.

Huan unca yihual iyaxca pa yes in niman hué pa yoje moxtin quimatisi  
 momajtisi ilaixpan yihual.

Huan unca iyaxca pa lacames quilisi lajtomes huejué, huan pa moxtin lajtusi  
 niman cuali inahuac yihual.

13 Cuaquinon niquinaquic moxtin hual Dios quinchíac pin cielo huan pan  
 lalticpan huan yehuanten itzindan in lali hual miquije huan yehuanten hual  
 yuliló pin al huejcalan, quema, moxtin hual cate capa yes, quijtuloaya:

In latuchihualisli huan in lasojlalisli ca momajtilisli huan in laixpelalisli  
 cuajcualtichin huan mochi lahuelilitilisli ma yén (yecan) iyaxca yihual  
 hual yehuatca pani in icpali hual laixpela,

huan iyaxca in Borreguito.

Quema, ma camo quiman mocahua pa yes inminyaxca.

14 Huan in nahuenten yulijquimes amo mocahualoaya quijtutataloaya:

—¡Yoje ma ye!

Huan in veinticuatro abuelojmes molasaje pan lali huan quinmolan-  
 cuacuetzililoaya mopachujtataloaya.

## 6

### *In chicome latzacualonijmes lachihuali ca cera*

1 Cuaquinon niquitaya quiman quicapehuac in Borreguito se in chicome  
 latzacualonijmes lachihuali ca cera, huan nijcaquic se yulijquil ca in nahui  
 yulijquimes lajtuc ca ilajtol quinami comuniaya, quijtuc:

—¡Xiajtía!

2 Huan nilachíac huan ¡xiquitacan! Cataya se caballo iztac huan yihual hual  
 yehuatataya ipan quipiaya se arco. Huan quimacaje se yahuali lachihuali ca  
 teposli quinami quinpialo in hueyenten, in yahuali unca pa se lasulahuani.  
 Huan quisac quinami se lasulahuani huan yahuiaya lasulahuac míac oc sejsa.

<sup>3</sup> Quiman quicapehuac in Borreguito oc se latzacualoni, nijcaquic lajtuc oc se in nahui yulijquimes quijtuc:

—¡Xiajtía!

<sup>4</sup> Huan quisac oc se caballo chichiltic cahuanic. Huan yihual hual yehuatataya ipan cataya lamacahuiliti pa quichihuasquiaya pa yajmo yes mosehuilisli pan in lalticpan, pa yojque lacames momictilosquiaya. Huan quimacaje se teposli hué calica guaches moanalo, huan in quinequi quijtúa pampa cayas moanalisli ca lacames.

<sup>5</sup> Quiman quicapehuac oc se latzacualoni, axan cataya ye latzacualoni-jmes lacapehuali, nijcaquic lajtuc oc se in nahui yulijquimes, quijtuc:

—¡Xiajtía!

Huan nilachíac huan ¡xiquitacan! Quisac se caballo liltic, huan yihual hual yehuatataya ipan quipiaya se romana pa ima. <sup>6</sup> Huan nijcaquic len mo-caquic quinami se lajtol, mocaquic lajco pin nahui yulijquimes, quijtuaya:

—Ma laxlahui se mochi itomin hual cana tequipanujtica se tonali pa mocuhuilis se lamachihualoni trigo hual quilamachihuililo yehuanten hual quipialo lahuelilitisli. Huan ma laxlahui jan yoje pa ye lamachihualoni-jmes cebada hual quilamachihuililo. Huan amo xiquinmijlacu ichahuac in cuahuilera hual laquilo olivos huan iayo uva coc hual laquilo in uvatilan.

<sup>7</sup> Huan quiman quicapehuac in oc se latzacualoni lachihuali ca cera, axan cataloaya nahui latzacualoni-jmes lacapehuali, nijcaquic lajtuc in lajtol hual cataya capa in nahui yulijquimes, ca in se laquisac lajtuc in yulijquimes, quijtuc:

—¡Xiajtía!

<sup>8</sup> Huan nilachíac huan ¡xiquitacan! Quistíac se caballo hual nesic quinami se iixco hual mictica, huan yihual hual yehuatataya ipan motocaya Miquilisli. Huan quitocaya Miquilisli in huejcalan capa cate in mijquimes. Huan quimacaje lahuelilitisli pa quinmanas moxtin hual miquilo. Yehuanten quinmictisi se local ca mochi nahui lacames pin lalticpan. Quinmictisi pan ipampa moanalisli huan pan ipampa lamictilisli huan pan ipampa mayandi huan pan ipampa cocolisli huan pan inminpampa in yulijquimes hual moitalo pin cuajlan hual cate pin lalticpan.

<sup>9</sup> Quicapehuac oc se latzacualoni, axan cataloaya macuili latzacualoni-jmes lacapehuali. Huan niquinmitac itzindan capa quilalilo in huendis pin cielo huan nepa cataloaya amo ca inmincuerpos (inminacayo) yehuanten hual cataloaya lamictili pampa quinlamachiltilije lacames ilajtol Dios huan quinlaquetzilije neli in hual in Tata quinmilic. <sup>10</sup> Tzajtziye ca lajtol chicahuac, quijtuje:

—Tata, tehual toTeco, timoxilúa pa camo ticayas capa mochi hual amo cuali huan elehuis, amaqui huil cayas chipahuac quinami tehual. Tehual tic-chía melahuac quinami tiquijtúa. Axan, ¿pa quichi tonalijmes tihuejcahuas pa timotexpahuilis huan fitechlacuepilis ca yehuanten hual chantilo pan lalticpan?

<sup>11</sup> Cuaquinon mochi sejse ca yehuanten quinmacaje se nahuas iztac. Huan quinmilije pa mosehuisi oc se nadita pa quichiasi pa quiman cayalosquiaya lamictili in oc sequin ca moxtin inmicnían tequipanujquimes. Yahuiloaya cayalo lamictili quinami yehuanten cataloaya lamictili.

<sup>12</sup> Quicapehuac in Borreguito oc se latzacualoni, ca in cataloaya chicuase hual cataloaya lacapehuali. Huan nilachíac huan cataya se laulinilisli niman chicahuac. Huan mochíac liltic in tonali quinami tzotzomajli huahuastic calica mocuejtulo quiman miqui se. Huan mochi in mesli nesíaya quinami esli.

<sup>13</sup> Huetzije in luceros (silalimes) pin cielo pan in lalticpan. Huetzije quinami

huetzi ilaquilyo hual yucsi pa tonalco, ilaquilyo se amacuál tipichin quiman huala se ijyecalazo hual quitzejtzelúa. <sup>14</sup> Tzayanic in cielo huan mocololuc quinami se amal. Mochi loma (tepel) huan mochi lali hual cataya lajco pin al huejcalan mijcuanije capa cataloaya. <sup>15</sup> Cuaquinon in huejueyenten pin lalticpan hual huelitiloaya huan in huejué inminlaicananijmes guaches huan yehuanten hual quipialo míac tomin huan in lacames chijchicahuac huan moxtin hual yeje tequipanujquimes hual amo quilaxlahuilo huan hual yeje tequipanujquimes hual quilaxlahuilo, moxtin molatije pin cuevas (ostumes) huan pin teles (temes) pin lomas (tepemes). <sup>16</sup> Quinnotzaloaya in lomas huan in teles, quinmililoaya:

—Xihuetzican topan huan xitechlatilican yihual hual yehuatica pan in icpali hual laixpela, yihual techiztica. Xitechlatilican pa camo techitas in Borreguito hual cualantica, huan yahui techtilanía capa ticocu.

<sup>17</sup> Unca pampa axan ajsic in tonali hué quiman cualanilo niman míac, huan amaqui huil mopepenialtía pa moquixtis pa camo quitas icualanilisli.

## 7

### *Quinxilulo míac inminmiahuimes in doce ixolomes Israel hual mochihuaje doce calimes israelitos*

<sup>1</sup> Panuc inon, huan niquinmitac nahui ilanahuatinijmes in cielo moquezataloaya capa huil quipialoaya lahuelilitisli pan mochi in lalticpan. Quintzacuiljítaloaya in ijyecames pa camo ijyecas se ijyecal pan lalticpan huan pan al huejcalan huan pa camo ijyecas pan cuahuimes. <sup>2</sup> Cuaquinon niquitac oc se ilanahuatini in cielo lejcuc capa quisa in tonali. Quipiaya in lanextilisli calica Dios hual yultica quinlalilis pan yehuanten hual iyaxca. Huan lanotzac ca lajtol chicahuac in lanahuatini. Quinnotzac in nahui ilanahuatinijmes in cielo hual quipiaje lahuelilitisli pa quixitinisi in lalticpan huan in al huejcalan, quinmilic:

<sup>3</sup> —Ayamo xiquinxitican in lalticpan huan in al huejcalan huan in cuahuimes pampa monequi pa tiquinlalisisi ilanextilisli Dios pa pani inmixco itequipanujquimes Dios.

<sup>4</sup> Huan nijcaquic quichi quinlalilije in lanextilisli. Cataloaya ciento cuarenta y cuatro mil, cataloaya inminmiahuimes in doce ixolomes Israel hual lacatije ca innojen doce calimes hual quinpehualtije innojen doce ixolomes Israel. <sup>5</sup> Cataloaya doce mil imiahuimes Judá huan doce mil imiahuimes Rubén huan doce mil imiahuimes Gad, <sup>6</sup> huan doce mil imiahuimes Aser huan doce mil imiahuimes Neftalí huan doce mil imiahuimes Manases, <sup>7</sup> huan doce mil imiahuimes Simeón huan doce mil imiahuimes Leví huan doce mil imiahuimes Isacar, <sup>8</sup> huan doce mil imiahuimes Zabulón huan doce mil imiahuimes José huan doce mil imiahuimes Benjamín.

### *Se lanechiculisli niman hué hual cate lacames lalaquentili ca tzotzomajli iztac*

<sup>9</sup> Panuc inon, huan nilachíac huan ¡xiquitacan! Cataloaya lacames huan sihuames, se lanechiculisli niman hué. Amaqui huil quinpuhuaya pampa cataloaya niman míac. Lacatije pa mochi lalimes pin lalticpan. Quema, yeje inmicnían yehuanten hual lacatije pa mochi cali, yeje yehuanten hual yuliloaya pin mochi lalimes pin lalticpan huan yeje yehuanten hual lajtuloaya mochi lajtomes hual lajtulo lacames pin lalticpan. Huan moquezataloaya ilaixpan in icpali hual laixpelaya huan ilaixpan in Borreguito.

Cataloaya lalaquentili ca nahuajmes ij'iztac, huan quinpioaloaya pa inminmajmajuan iitzmolinquijmes isacayo palma. <sup>10</sup> Huan tzajtziloaya ca lajtlochichahuac, quijitutataya:

¡Ticate laquixtili pin ipolehuilisli tolaijlaculisli!

Inon tejchihuilijqe in Borreguito huan toDios hual yehuatica pani iicpali hual laixpela.

<sup>11</sup> Huan moxtin in lanahuatinijmes pin cielo moquetzaje quiyahualujtaloaya in icpali hual laixpelaya huan quinyahualujtaloaya in veinticuatro abuelojmes huan in nahui yulijquimes. Huan molasaje pan lali ca inmixco pan lali huan quimolancuacuetziloaya Dios. <sup>12</sup> Quijtutaloaya:

¡Yoje ma ye! Ma camo mocahua pa cayas pa toDios latuchihualisli huan laixpelalisli cualtichin huan lajmatilisli huan lasehuilisli,

huan mojmosta ma caya lasojlalisli ca momajtilisli huan lahuelilitisli huan chichahuilisli. Yoje ma ye.

<sup>13</sup> Cuaquinon se abuelo ca in abuelojmes nechnotzac huan nechilic:

—¿Tiquinmiximati yehuanten lalaquentili ca inminahuajmes ij'iztac, huan ticmati capa quistihualaje?

<sup>14</sup> Niquilic:

—Tata, tehual ticmati, xichili.

Huan nechilic:

—Yehuanten in lacames hual quipía se nadita panuloaya niman míac lacoctilisli. Huan axan quisaje umpa huan quinpacaje inminahuajmes huan mochihuaje ij'iztac pan ipampa iesli in Borreguito. <sup>15</sup> Pampa in, axcan cate ilaixpan Dios iicpali hual laixpela, huan quitequipanuillilo yihualitonali pa semilhuil huan pa layúa calijtic itiofan. Quinnapatis yihual hual yehuatica pani in icpali hual laixpela, pampa yihual amo quiman mocahuas pa cayas ca yehuanten. <sup>16</sup> Yajmo quiman mayanasi, yajmo quiman amiquisi, yajmo quinchichinus in tonali, huan yajmo quinmacas tequil quiman quichía tona. <sup>17</sup> Yoje cayas pampa ca yehuanten cayas in Borreguito hual yes inminlachiani. Huan yihual quinlaicanas capa cate iixtololojmes al. Huan Dios quinchipahuilis mochi ichoquis inmixtololojmes.

## 8

*Quicapehua oc se latzacualoni lachihuali ca cera, axan cate chicome hual cate lacapehuali, huan nesi in lapopochuiloni lachihuali ca oro*

<sup>1</sup> Quicapehuac in Borreguito in latzacualoni, ca in lamije in latzacualonijmes. Cuaquinon mocahuac mochi pin cielo, amo xahuanic pa se lajco hora. <sup>2</sup> Cuaquinon niquinmitac in chicome ilanahuatinijmes in cielo hual moquetzalo ilaixpan Dios. Huan quinmacaje chicome lancaquetzalonijmes.

<sup>3</sup> Umpa hualac oc se ilanahuatini in cielo, moquetzac pa capa quichichinulo huendi. Huan in lanahuatini quipiaya se lapopuchuiloni. Quimacaje míac ajuialisli pa yoje ipogli in lapopuchuilisli lejcusquiaya ca inminlajlanilisli Dios ilacames. Huan inminlajlanilisli huan ipogli in lapopuchuilisli monechicuje pani inon lachihuali ca oro capa quilalilo huendi. Cataya ilaixpan in icpali hual laixpelaya. <sup>4</sup> Huan lejcuc ipogli in lapopuchuilisli ca inminlajlanilisli Dios ilacames, lejcuc ilaixpan Dios capa cataya pa ima in ilanahuatini in cielo. <sup>5</sup> Cuaquinon canac in lanahuatini in lapopuchuiloni. Qitemiltic ca ticahuandi hual cataya capa quilalilo huendi huan quilasac innojen ticahuandi pan lalticpan. Huan moqaquic comunilisli, xahuanilisli chichahuac, huan cataloaya míac lapelanilisli huan se laulinilisli.

*Tzotzonaló in lancaquetzalonijmes*



<sup>6</sup> Axcan mochijchihua je in chicome ilanahuatinijmes in cielo ca inminlancaquetzaloni jmes pa quinpitzi.

<sup>7</sup> Quipitzi in se lanahuatini ilancaquetzaloni. Cuaquinon cataloaya tishuil huan tixuxli laniluli ca esli hual huetzi je pan lalticpan. Yo je, se ilajco mochi ye ilajlajco in lalticpan chichinahuic. Huan ca mochi ye cuahuimes, cataya se cuahuil ca innojen hual chichinahuic, huan mochi in sacal xuxuctic chichinahuic.

<sup>8</sup> Oc se lanahuatini quipitzi ilancaquetzaloni huan cataya lalasal pin al huejcalan len quinami se loma hué (tepel) milintataya. <sup>9</sup> Cuaquin ca mochi ye ilajlajco in al huejcalan, cataya se ilajco hual mochiac esli, huan ca mochi ye michimes pin al huejcalan, cataya se michin hual miquic, huan ca mochi ye barcos, cataya se hual xitinic.

<sup>10</sup> Oc se ilanahuatini in cielo quipitzi ilancaquetzaloni. Cuaquin quistihualaya pin cielo, huetzi se lucero (silalin) hué milintataya quinami milini se ocolcuahuil. Huan ca mochi yeyenten atencojmes huejué huan ca mochi yeyenten ixtololojmes al, huetzi in lucero pan se. <sup>11</sup> Itoca in lucero Chichialisli. Ca mochi ye ilajlajco in alimes, cataya se ilajco in alimes hual mochiac chichic. Huan miquije miac quiman cunije in al pampa quichichialtic in al in lucero. <sup>12</sup> Quipitzi oc se lanahuatini ilancaquetzaloni huan ca mochi ye ilajlajco ilahuilisli in tonali, cataya se ilajco hual yajmo lahuic. Huan ca mochi ye ilajlajco ilahuilisli in mesli, cataya se ilajco hual yajmo lahuic. Huan ca ye ilajlajco inminlahuilisli in luceros, cataya se ilajco hual yajmo lahuije. Yo je pa semilhuil huan yo je pa layua, ca mochi ye ilajlajco ilahuilisli, se ilajco yajmo lahuia.

<sup>13</sup> Cuaquinon nilachiac huan nijcaquic se lanapatini (cuaujli) chocatataya ca chocalisli chichahuac quiman palantataya pa pani pin cielo, quijtuaya:

—¡Ay, ay, ay! ¡Yalo mococulo miac yehuanten hual chantilo pan in lalticpan!  
¡Yalo panulo niman miac lacocoltilisli pampa in oc sequin ye ilanahuatinijmes in cielo mochijchijticate pa quinpitzi inminlancaquetzaloni jmes!

## 9

<sup>1</sup> Cuaquinon oc se in chicome ilanahuatinijmes in cielo quipitzi ilancaquetzaloni, huan niquitac se lucero hual quistihualac pin cielo huan huetzi pan in lalticpan. Huan nepa pin cielo quimacaje in lapuhualoni pa quilapuc in coyunquil hual ajsi pa in huejcalan hual amo quiman caji itzindan.

<sup>2</sup> Quilapuc in coyunquil hual huejcalan hual amo quiman huil caji itzindan, huan pin coyunquil quisac len hual nesiaja quinami pogli, cataya quinami ipogli se tixuxtilan hué. In quinami pogli quilaticumactic in tonali. Yajmo huil moitac in tonali huan ilahuilisli pan ipampa in quinami pogli hual quisac pin coyunquil. <sup>3</sup> Cuaquinon quisaloaya pin pogli chapulimes huan yehuanten temu je pani in lalticpan. Quipialoaya lahuellitlisli pa latzopinisi ca pajli hual quinami quipialo culomes pan lalticpan. <sup>4</sup> Quinmilije pa camo quicocoltisi in sacal pan lalticpan o len pacholi xuxuctic o len cuahuil. Jan cataloaya lamacahuilitli pa quincocoltisi lacames hual amo quipialoaya Dios ilanextilisli pani inmixco. <sup>5</sup> Momacahuilitloaya in chapulimes pa quincocoltisi lacames pa macuili mesli. Ma yo je, amo cataloaya lamacahuilitli pa quinmictisi. Huan inminlacocoltilisli cataya quinami ilacocoltilisli se culol quiman quitzopinia se. <sup>6</sup> Pa in tonalijmes lacames quitemusi quinami huil miqusi huan amo huil quitasi. Quinequisi miac pa miqusi huan in miqulisli quinami cholus pa camo huil miqusi.

<sup>7</sup> Nesiloaya in chapulimes quinami caballos hual cate lachijchihuali pa yasi moanasi. Quimpialoaya pan inmintzontecan len nesiloaya quinami

yahualimes lachihuali ca oro. Yeje inmixco quinami inmixco lacames. <sup>8</sup>Inmintzondi cataya quinami itzondi sihuames huan inminlames cataloaya quinami leones inminlames. <sup>9</sup>Quipialoaya inminxiniyul quinami teposli hual in guaches quilalilo pan inminlaixpan. Huan caquiztitiahuiiloaya inminastacapajmes. Cataya quinami icapanalisli huan ixahuanilisli miac layahualulonijmes hual quintilanalo caballos quiman molalulo pa moanasi. <sup>10</sup>Quimpialoaya inminlamili (inmincolas, inmincuilapili) quinami culomes, huan inmintzopinilonijmes inminlamili cataloaya capa quipialoaya inminlahuelilitisli pa quincocoltisi lacames pa macuili mesli. <sup>11</sup>Huan quipialo in chapulimes se hué hual unca in lanahuatini hual quipia lahuelilitisli pin huejcalan hual amo quiman huil cajsí se itzindan. In lanahuatini itoca ca in lajtol hebreo unca Abadón huan ca in lajtol griego itoca Apolyón.

<sup>12</sup>Axan panuc in se cocolisli. Oc sequin ome cocolisli amo huejcahuasi pa ajsitihualasi.

<sup>13</sup>Cuaquion oc se ilanahuatini in cielo quipitzac ilancaquetzaloni, ca in cataloaya chiuase lanahuatinijmes hual quinpitzae inminlancaquetzaloniymes. Huan quiman in lanahuatini quipitzac, cuaquín nijcaquic se lajtol lajtutataya capa in nahui icuacuas inon lachihuali ca oro capa quilalilo in huendis. <sup>14</sup>In lajtol quiliaya in lanahuatini hual lamíc quipitzac ilancaquetzaloni, quilic:

—Xiquinmacahua in nahui lanahuatinijmes hual cate lailpili pa in atenco hué itoca Eufrates.

<sup>15</sup>Yojque cataloaya lamacahuali in nahui lanahuatinijmes. Cataloaya ilpitataloaya pa mocahualosquiaya nepa pa quiman ajsisquiaya in ihora itonali imesli in xihuil quiman yelosquiaya lamacahuali pa quinmictisi se lalac ca mochi ye lacames pin lalticpan. <sup>16</sup>Nijcaquic quichi cataloaya in guaches ca inmincaballos hual yahuiloaya quinmictilo. Cataloaya dos cientos millones guaches.

<sup>17</sup>Huan cataya quinami inon niquinmitac in caballos, quinami toTata nechlachtic. In guaches hual quinmaxactataloaya in caballos quinpialoaya teposli itzindan inminhuajcomes pa quinzacuilisli pa camo yesi lacocoltili. Huan in teposli nescic quinami tixuxli chichiltic huan azul, quinami se tixcali zafiro huan custic quinami azufre. Huan inmintzontecon in caballos nesiloaya quinami inmintzontecon leones. Huan quisaje pa inmincamac tixuxli huan pogli huan azufre. <sup>18</sup>Se lalac ca mochi ye lacames miquije pan ipampa innojen ye hual quisaloaya pa inmincamac in caballos: in tixuxli huan in pogli huan in azufre hual tzojyac. <sup>19</sup>Cataya pampa in caballos inminlahuelilitisli pa lamictis cataya ca inmincamac huan ca inminlamili. Cataloaya quinami cuhuames inminlamili (inmincolas). Huan inminlamili quinpialoaya inmintzontecon calica quincocoltiloaya lacames quinami cuhuames lacocoltilo.

<sup>20</sup>Ma yoje, in lacames hual mocahuaje yultataloaya pampa amo miquije pan ipampa mochi in lacocoltilisli, yehuanten amo quipalaje inminyolo pa yajmo quichihualosquiaya in amo cuali. Huan amo quipalaje inminyolo pa mocahualosquiaya pa quinmolancuacuetzililosquiaya iyecames ej'elehuis huan monos lachihuali ca oro huan ca plata huan ca bronce huan ca tixcali huan ca cuahuil. Yehuanten in monos hual amo huil lachialo huan amo huil lacaquilo huan amo huil nejnemilo. <sup>21</sup>Huan amo quipalaje inminyolo pa yajmo quinmictilosquiaya lacames huan amo quipalaje inminyolo pa yajmo quichihualosquiaya laxualisli huan pa yajmo quichihualosquiaya amo cuali lacames ca sihuames hual amo inminsihuahuan, huan pa yajmo laixtequilosquiaya.

## 10

### *In ilanahuatini in cielo hual quipiaya in amatzindi*

<sup>1</sup> Cuaquinon niquitac oc se ilanahuatini in cielo niman chicahuac quis-tihualaya pin cielo huan temuc. Quiyahualujtataya se mextemil, cataya se cosamalol ca pani itzontecón, huan iixco nesic quinami in tonali, huan icxihuaimes nesiloaya quinami cuajmaxali milintataloaya. <sup>2</sup> Quipiaya se amatzindi lapalahuali pa ima. Quilalic icxían cuali pani in al huejcalan huan icxían amo cuali pani in lali. <sup>3</sup> Huan lanotzac ca lajtól chichahuac, cataya quinami tzajtzi se león. Quiman tzajtzic, comunije chicome comunilisi. <sup>4</sup> Huan quiman comunije in chicome comunilisi, niahuiaya niqijcuilu len quijtuje. Huan jan axcan nijcaquic se lajtól pin cielo quijtuc:

—Amo xicmacahuiliti pa lacames quimatisi len quijtuje in chicome comunilisi, amo xiqijcuilu.

<sup>5</sup> Huan cajoquic pa in cielo ima in ilanahuatini in cielo hual niquitac moquezataya pani in al huejcalan huan pani in lali. <sup>6</sup> Huan quijtuc ca lajtól hual amo mopala, quijtuc ca itoca yihual hual amo mocahua pa yulis, yihual hual quinchíac in cielo huan mochi hual unca pin cielo. Huan quinchíac in lalticpan huan mochi hual unca pin lalticpan. Huan quinchíac in al huejcalan huan mochi hual unca pin al huejcalan. Quema, quijtuc ca lajtól hual amo mopala, quil:

—Yihual Dios yajmo yahuiaya huejcahua. <sup>7</sup> Axcan pan innojen tonalijmes quiman quipitzas ilancaquetzaloni in lanahuatini hual quilamis in lapitzalisi, mochi inon inahuac Dios huan ilajtól lamis mochías. Lamis mochías mochi inon hual ayamo quimatiloaya lacames, mochi inon hual Dios quinmachilitic ilajtunijmes hual quitequipanuilinijme pa yina.

<sup>8</sup> Cuaquinon, in lajtól hual nijcaquic pin cielo nechnotzac oc sejsa, nechilic:

—Xía xicana in amatzindi hual quipalajtica pa ima in ilanahuatini in cielo hual moqueztica ipan in al huejcalan huan ipan in lali.

<sup>9</sup> Cuaquinon níac ca in ilanahuatini in cielo huan niquilitic pa nechmacasquiaya in amatzindi. Huan nechilic:

—Xicana huan xijcua. Cayas chichic pa moyolo, huan cayas tzopelic quinami néculi lajitic mocamac.

<sup>10</sup> Cuaquinon nicanac in amatzindi hual quipiaya pa ima in lanahuatini huan nijcuac. Cataya tzopelic quinami néculi pa nocamac, huan quiman nilamic nijcuac cataya chichic pa noyolo. <sup>11</sup> Huan nechilic:

—Ticpías pa ticlamachiltis oc sejsa len Dios quijtúa. Ticlamachiltis inminyampa míac lacames hual chantilo cajcapa pin lalticpan. Ticlamachiltis pa inminlalimes lacames. Huan ticlamachiltis capa cate yehuanten hual lajtulo míac oc sequin inminlajtomes. Huan ticlamachiltis inminyampa huejueyenten.

## 11

### *In omenten hual quijtulo mochi melahuac inahuac Dios*

<sup>1</sup> Cuaquinon nechmacaje se lamachihualoni calica niahuiaya nilamachía. Cataya quinami icuahuil se ilachiani borregos. Huan nechilije:

—Ximoquetza huan xiclamachía itioapan Dios huan inon capa quilalilo huendis huan xiquinpuhua yehuanten hual quimolancuacuetzililo. <sup>2</sup> Amo xiclamachía in lajcotiyan pa quiahuac in tiopan. Xijcahua in, pampa temacac Dios yehuanten hual chantilo pin lalimes, quitelicsasi pani icaltilan

Dios hual unca Jerusalén. Quitelicsasi pa cuarenta y dos (ompuhualihuanome) mesli (meses). <sup>3</sup> Huan yehuanten in omenten hual quijtulo neli nolajtol niqunmacas lahuellitlisli pa lajtusi pa nehual pa mil doscientos sesenta tonalijmes. Cayasi lacuejtili ca tzotzomajli huahuastic calica moquentilo lacames quiman miqúi se.

<sup>4</sup> Yehuanten omenten quintocayaltilo in ome cuahuimes hual ilaquilyo cate olivos huan in ome tapalcames cuajcuajtic pa lahuilislí hual moquezticate ilaixpan in Tata hual huelitía pin lalticpan. <sup>5</sup> Huan sinda se quinequis quincocoltis in omenten, quisas tixuxli pa inmincamac huan quichichinus moxtin inminlacocolinjmes. Quema, sinda se quinequis quinchihuilis amo cuali, yoje yes lamictili, amo huil moquixtis pa camo polehuisi. <sup>6</sup> Quipialo in omenten lahuellitlisli pa quitzacuas in cielo (ilhuicac) pa camo quiahuis pin tonalijmes quiman lajtutiasí pa Dios. Huan quipialo lahuellitlisli pa quinpalasi in alimes pa mochihuasi esli. Huan quipialo lahuellitlisli pa quinlalilisi pan lalticpan mochi cocolisli. Quiman yes quinequis quichihuasi yojque, cuaquín huil quichihuasi. <sup>7</sup> Huan pan tonali hual laquisalo lajtulo pa Dios, cuaquín in yulijquil temajquil hual lejcus pa quisas pa quiahuac in huejcalan capa amo quiman huil cajsí se itzindan, yihual moanas ca in omenten huan quinsulahuas, quinmictis. <sup>8</sup> Huan inminmijquimes innojen omenten mocahuasi lasticate pa iojli in caltilan hué capa quipiluje pin cuahuil inminTata. In caltilan quitocayaltilo Sodoma huan Egipto pampa inminyolo yehuanten hual chantilo pa in caltilan cate quinami inminyolojmes yehuanten hual yulinijme pa yina pin caltilan Sodoma huan pin lali Egipto. <sup>9</sup> Pa ye huan lajco tonalijmes lacames hual chantilo pa mochi lalimes huan lajtulo mochi lajtomes quinmitasi innojen mijquimes huan amo lamacahuiltilo pa yesi lalalpachuli. <sup>10</sup> Huan yehuanten hual chantilo pan lalticpan quipiasí míac paquilisli huan laquetzasi huan yulisi ca niman míac paquilisli, momacasi len ipatí. Quichihuasi yoje pampa in omenten ilajtunijmes Dios quincocoltije yehuanten hual chantilo pin lalticpan. <sup>11</sup> Ma yoje, quiman panusi in ye huan lajco tonalijmes, calaquis lajtíc yehuanten se iijyul Dios iyulilislí, huan moquetzasi pa inmicxihuajmes. Huan momajtitiquisasi niman míac yehuanten hual quinmitalo. <sup>12</sup> Cuaquinon quicaquisi se lajtol chichahuac hual lajtúa pin cielo quinmilijtica:

—¡Xilejucan ca niqúic!

Huan lejculo pa in cielo pa se mextemil ca inmincocolinjmes quinmizticate. <sup>13</sup> Huan pa in nadita laulinic niman chichahuac huan huetzic se cali hual cataya ca mochi diez calimes pin caltilan. Huan chicome mil lacames hual moxtin quinmiximatije quinami motocaloaya miqúije pan ipampa in laulinilislí. Huan in oc sequín hual mocahualoaya yulficate momajtiloaya niman míac huan quijtuloaya lajtomes huejué ca in Dios hual unca pin cielo.

<sup>14</sup> Yoje panuje omenten ca in yeyenten lacocoltislí. Xiquitacan. Amo huejcahuas ajsis in oc se lacocoltislí huan ca inon cayasi in yeyenten lacocoltislí.

### *Cate ca in lancaquetzaloni chicome hual quipitzaje*

<sup>15</sup> Cuaquinon quipitzac in lanahuatini ilancaquetzaloni huan ca in lamije lancaquetzaje in chicome ilanahuatinijmes in cielo. Quipitzac huan moquijje lajtomes chijchichahuac pin cielo hual quijtuloaya:

Capa huelitilo yehuanten pin lalticpan axan mochíac capa huelitilo toTata huan iCristo hual quilajtultic pa yes in hué.

Huan yihual amo quiman mocahuas pa huelitis.

<sup>16</sup> Huan molasaje pa inmixco pa quimolancuacuetzililosquiaya Dios in veinticuatro abuelojmes hual yehuafataloaya pani inmicpalimes hual laixpelaloaya. <sup>17</sup> Quijtutataloaya:

Timijsehulo tehual toTata Dios hual ticpía mochi chicahualisli, tehual hual tiunca huan ticataya huan ticayas.

Timijsehulo pampa ticanac mochichahualisli hué huan tipehuac tihuelitic.

<sup>18</sup> Yehuanten pin lalimes cualaniloaya chicahuac.

Ma yoje, tehual tihualac ca mocualanilisli pa tiquintilanis capa yesi lacocolti.

Huan noje ajsic in tonali pa quiman tehual tiquintilanis huejca pa camo cayasi ca tehual yehuanten hual miquije, tiquintilanis ca capic amo quiman huil mocuepasi.

Huan ajsic in tonali pa quiman tiquinmacas laxlahuilisli motequipanujquimes, yehuanten molajtunijmes huan molacames huan yehuanten hual quimatilo momajtilo molaixpan tehual,

in lacames huejué huan in lacames tijtipichin.

Huan ajsic in tonali pa tehual tiquintilanis capa cayasi lacocolti yehuanten hual quiqlacuje in lalticpan.

Tiquintilanis capa amo quiman huil mocuepasi.

<sup>19</sup> Cuaquinon Dios quilapuc itiopan pin cielo (ilhuicac). Huan in latzacuali capa cajcoquía ilajtulisli lajcuiluli moitac calijtic itiopan pin cielo. Huan lapelantataya huan cataloaya xahuanilisli chicahuac huan míac comunilisli huan se laulinilisli. Huan noje huetziaya tisihuil etic.

## 12

### *In sihual huan in xolol lacal huan in cuhual*

<sup>1</sup> Cuaquinon nestic pin cielo len lanextilisli hué calica Dios quinlachialtic lacames ca lamajtilisli ilachihualisli hué. Inon hual nestic yec se sihual lalaquentili ca in tonali huan ca in mesli itzindan icxihuajmes. Huan pani itzontecon quiapiaya se yahuali lachihuali ca teposli ca doce luceros (silalimes).

<sup>2</sup> Yihual yahuiaya quilacatilti huan tzajtzaiya ca in cocolisli pampa yahuiaya lacati ixolol.

<sup>3</sup> Umpa nestic pin cielo oc se len hué hual quinlachialtiaya lacames ca lamajtilisli. Xiquitacan, moitaya se cuhual hué huan chichiltic, quinpiaya chicome (siete) itzontecon huan majlacli (diez) icuacuas huan quinpiaya chicome yahualimes lachihuali ca teposli pani pa itzontecojmes.

<sup>4</sup> Huan ca ilamili quinmixpanac se lajco in silalimes (luceros) pa latzindan pin lalticpan. Yojque mocahuaje pin ilhuicac (in cielo) san omenten lajlajco ca mochi in silalimes hual nepa catanijme. Huan moquetzac in cuhual niman hué ilaixpan in sihual hual ixolol jan axcan yahuiaya lacati. Yahuiaya quitolu in cuhual in xolol quiman lacatisquiaya.

<sup>5</sup> Cuaquín quilacatiltic in sihual se xolol lacal huan in xolol lacal unca Cristo hual yahui huelitía melahuac huan chicahuac pa mochi in lalimes ca inminlacames pin lalticpan. Huan ixolol in sihual cataya la'ajcoquili pa cayas ca Dios pa huelitisi huan yihual capa unca iicpali hual laixpela capa huelitía. <sup>6</sup> Cuaquín choluc in sihual ca capic amaqui chantiaya. Nepa unca se lajcotiyan hual quichijchihuilic Dios capa yihual quipixtias in sihual pa mil doscientos sesenta tonalijmes.

<sup>7</sup> Panuc inon, cataya moanalisi pin cielo. Miguel in lanahuatini niman hué quinlaicanaya ilanahuatinijmes pin cielo huan moanaloya ca in cuhual hué. Huan moanaje in cuhual huan ilanahuatinijmes ca Miguel huan ilanahuatinijmes pin cielo. <sup>8</sup> Huan cataloaya lasulahuali in cuhual

huan ilanahuatinijmes, yajmo cataya capa mocahuasi yehuanten pin cielo. <sup>9</sup> Cuaquín quilasaje pa latzindan in cuhual, in cuhual hual yulic pa yina huan yuli axan, unca latocayaltili in lili huan Satanás. Yihual quincuajcuamana moxtin yehuanten pin lalticpan. Quilasaje pa latzindan pin lalticpan huan quinxlasaje ilanahuatinijmes noje ca yihual pa latzindan pin lalticpan.

<sup>10</sup> Cuaquinon nijcaquic pin cielo se lajtol chicahuac quijtuaya:

—Axan ajsic in tonali quiman moxtin yehuanten hual iyaxca Dios cate mochi lamacahuali pa yoje Satanás yajmo huelitis ca ichicahualisli pan yehuanten. Axan ajsic in tonali quiman Dios huelitía ca ichicahualisli. Quema, ajsic in tonali quiman Cristo huelitis ca ilahuelilitisli. In unca pampa unca lalasalí pa latzindan in se hual quinmotexpahuilijtica tocnía yihualitonali pa semilhuil huan pa layúa iyampa Dios. <sup>11</sup> Huan tocnía quisu-lahuaje in Satanás pan ipampa iesli in Borreguito hual toyahuic quiman miquic. Quema, quisulahuaje Satanás pan ipampa quinami lamachiltije quinami Cristo in Borreguito quinquixtilic pin ipolehuilisli inminlajlaculislí. Quisulahuaje pampa amo mocahuaje pa quijtusi ilamaxtilisli in Borreguito, mas que yahuiloaya yelo lamictili. <sup>12</sup> ¡Xicipacan míac paquilisli amhuanten in cielos huan moxtin hual chantilo nepa! Huan ¡axcan anyahui anpanúa niman míac lacocoltilisli amhuanten pan in lalticpan huan pin al huejcalan, pampa axan temuc ca amhuanten in lili cualantica chicahuac pampa quimati quinami quicahuilía jan nadita san pa yihual huelitis!

<sup>13</sup> Huan quiman quitac in cuhual Satanás quinami yihual cataya lalasalí pa latzindan pin lalticpan, cuaquín quitojtocac in sihual hual quilacatiltic in xolol lalac. <sup>14</sup> Ma yoje, Dios quimacac in sihual ome inastacapajmes in lanapatini hué (cuaujli) pa huil palantiasquiaya cholujtataya ilaixpan in cuhual pa yoje ajsisquiaya capa amaqui chantiaya. Nepa Dios quipixtías pa ye huan lajco xixihuil. <sup>15</sup> In cuhual mijsolac al pa icamac pa itepotzcon in sihual pa catoctitiasquiaya ca in míac al. <sup>16</sup> Huan in lalticpan quipalejtihualaya in sihual, tzayanic huan molapuc huan quitoluc in al hual mijsolac in cuhual pa icamac. <sup>17</sup> Pampa in, cualanic in cuhual ca in sihual huan mohuicac pa moanas ca yehuanten ixolomes in sihual hual quicahuilije. Yehuanten cate aquinojen hual quichihualo quinami quilía Dios ilajtol, huan lajtulo neli in hual melahuac inahuac Jesús. Huan in cuhual moquetzac pani ixalipan in al huejcalan.

## 13

### *In ome yulijquimes temajquimes*

<sup>1</sup> Huan niquitac se yulijquil temajquil majcoctataya pin al huejcalan. Quimpiaya majlacli (diez) icuacuas huan chicome (siete) itzontecon. Huan quinpiaya majlacli yahualimes lachihuali ca teposli pani icuacuas. Cataya pan innojen siete itzontecon se itoca hual quihuejuecaltic Dios. <sup>2</sup> Huan in yulijquil temajquil hual niquitac yec quinami se tecuani, icxihuaajmes quinami icxihuaajmes se oso. Huan icamac cataya quinami icamac se león tzondiudo. Huan in cuhual temacac ichicahualisli huan iicpali capa huelitía huan quimacac lahuelilitisli hué in yulijquil temajquil. <sup>3</sup> Se itzontecon nesiaya quinami quipiaya se latzontequilisli calica cataya lamictili, huan ma yoje, in latzontequilisli calica miquic itzontecon cataya lapajtili. Huan moxtin yehuanten pin lalticpan quitocaloaya in yulijquil temajquil quiztat-aloya yihual ca lamajtilisli. <sup>4</sup> Lacames quimolancuacuetzililoaya in cuhual

hué pampa yihual quimacac ilahuelilitlisli in yulijquil temajquil. Huan quimolancuacuetzililoaya in yulijquil temajquil, quijtuloaya:

—Amo unca oc se quinami in yulijquil temajquil. Amaqui huil moana ca yihual huan quisulahua.

<sup>5</sup> Huan canac in yulijquil temajquil lahuelilitlisli pa quiytus lajtomes huejué pa yihual ihuían huan lajtomes hual quihuejuecaltilo Dios. Huan cataya lamacahuiltili pa quipiasquiaya lahuelilitlisli pa cuarenta y dos (ompuhualihuanome) mesli (meses). <sup>6</sup> Huan yoje quichihuac. Quilapuc icamac pa quiytusquiaya lahuejuecaltisli inahuac Dios, quinhuejuecaltic itoca huan capa chanti, huan quinhuejuecaltic yehuanten hual chantilo pin cielo. <sup>7</sup> Noje cataya lamacahuiltili pa moanas ca yehuanten hual iyaxca Dios huan pa quinsulahuas. Huan cataya lamacahuiltili pa quipías lahuelilitlisli ca mochi lacames hual amo cate mías huan ca mochi lacames hual cate mías. Huan cataya lamacahuiltili pa huelitis pan mochi lacames hual lajtulo len yes lajtol, huan pa quipías lahuelilitlisli pan mochi inminlalimes lacames. <sup>8</sup> Huan moxtin hual chantilo pan lalticpan quimolancuacuetzilisi in yulijquil temajquil, quema, mochi lalac hual amo quipía lajcuiluli itoca pa iamal in Borreguito hual cataya lamictili. Nepa cate lajcuiluli inmintocajmes yehuanten hual in Borreguito quinyulitic. Cataloaya lajcuiluli nepa quiman yihual ayamo quichíac in lalticpan huan in cielo.

<sup>9</sup> Aquí hual huil lacaqui, ma quicaqui inon. <sup>10</sup> Aquinojen hual cate Dios ilacames hual quipialo pa cayasi laquitzquili pa cayasi latzacuali pa calijtic, cuaquín pa calijtic yas. Aquí hual quinmictía oc sequin, yihual quipías pa yes lamictili. Pampín, ma mochijchihuacan, pampa nican quipialo pa mopepenialtisi pa panusi inon. Huan noje nican monequi pa como mocahuasi pa quilalisi inminlaneltocalisi ca Dios ilajtol.

<sup>11</sup> Cuaquín niquitac oc se yulijquil temajquil hual quisac pa lajtic itzindan in lalticpan. Quimpiaya ome icuacuas quinami se borreguito, huan lajtuc quinami se cuhual. <sup>12</sup> Canac mochi in lahuelilitlisli hual quipíac in yulijquil hual quisac pin al huejcalan. Quema, in yulijquil hual quisac pin al huejcalan quimacahuiltic in yulijquil hual nesi quinami borreguito pa tequipanus ca ilahuelilitlisli. Cuaquín in hual nesi quinami borreguito quinmolancuacuetzaltic moxtin pin lalticpan in yulijquil temajquil hual quisac pin al huejcalan. In yulijquil unca hual itzontequilisli cataya lapa-jtili, in latzontequilisli calica cataya lamictili itzontecon. <sup>13</sup> Huan in oc se yulijquil temajquil quinchíac mías huejué hual quinmiltitisi ca lamajtilisli in lacames. Quema, quihuetziltiaya tixuxli pin cielo, huetzihualac pan in lalticpan ca in lacames lachixticate. <sup>14</sup> Huan pan inminpampa innojen, in lacames mías moitaloaya momajtitataloaya. In oc se yulijquil temajquil cataya lamacahuiltili pa quinchías. Quinchihuaya mochi ca ipalehuilisli in yulijquil temajquil hual quisac pin al huejcalan. Yoje quincuaqcuamanaya lacames pan in lalticpan. Quema, quinmiliaya pa quichihuasi se mono quinami in yulijquil hual quisac pin al huejcalan, quinmiliaya pa quimolancuacuetzilisi. Yoje quimahuísuloaya ca lamajtilisli in yulijquil hual cataya latzontequili pa miquis ca se teposli calica moanalo guaches, huan ma yoje yulic oc sepa. <sup>15</sup> Huan in oc se yulijquil temajquil cataya lamacahuiltili pa quimacas ijyul in mono chicuenta in yulijquil temajquil pa yoje lajtus in mono. Huan cataya lamacahuiltili pa latilanis pa yesi lamictili moxtin hual amo quineguiloaya quimolancuacuetzililo in mono. <sup>16</sup> Huan amo inon san. Quinchihuiliaya pa quipiasi se lanextilisli pa ima cuali o pa itzontecon pa pani inmixtololojmes moxtin lacames huejué huan tijtipichin, hual quipialo mías o amo quipialo mías, tequipanujquimes hual itecojuan



amo quilaxlahuilo huan tequipanujquimes hual quilaxlahuilo. <sup>17</sup> Yojque amo quimacahuiltisi pa lacuhuas huan lanamacas se sinda amo quipías in lanextilisli. In lanextilisli unca itoca in yulijquil temajquil o inúmero de itoca. <sup>18</sup> Monequi pa se quipías lajmatilisli pa químatís len quinequi quijtúa inon. Sinda se quipía lajmatilisli ma quilamachía inúmero in yulijquil temajquil pampa unca se número hual lacames quimatilo. Unca seiscientos sesenta y seis (setzondimajlaclihuanypuhualichicuase).

## 14

### *Inmíncantadita (inmíncaical) in 144,000*

<sup>1</sup> Cuaquinon nilachíac huan ¡xiquitacan! Pani in loma (tepetzindi) Sión moquezataya in Borreguito, in hual neli unca in Cristo. Huan ca yihual cataloaya ciento cuarenta y cuatro mil lacames hual quipialoaya lajcuiluli pa inmíntzontecon pa pani inmíxtololojmes itoca in Borreguito huan itoca iTajtzin. <sup>2</sup> Huan nijcaquic se lajtol pin cielo, xahuanic quinami míac alimes huan quinami comunilisli chichahuac. Huan noje cataya in lajtol quinami inmínlatzotzonalisli lacames hual quíntzotzonticate inmínarpas. <sup>3</sup> Huan cantaruloaya (cuicaloaya) se cantadita (cuical) yanquic inmínlaixpan in icpali hual laixpelaya huan in nahuenten yulijquimes huan in veinticuatro abuelojmes. Amaqui huil monextilic quicantaruc (quicuicac) in cantadita sinda amo yec se cá in ciento cuarenta y cuatro mil lacames. In Borreguito laxlahuic pa yesi iyaxca, quínquixtic capa moxtin hual cate pin lalticpan. <sup>4</sup> Yehuanten cate lacames hual amo moijlacuje ca sihuames pampa amo químan moniluje ca sihuames. Yehuanten cate hual aquinojen quitocalo in Borreguito ca cajcápic yes yahuis. Yehuanten Cristo quínquihuac capa yes yehuanten cate pin lalticpan. Cate mochi pa Dios huan pa in Borreguito. Cate quinami cataya jan pa Dios san in miahuimes hual canaje yehuanten in israelitos pa yina químan quípehualtinijme in lapíxcalisli. <sup>5</sup> Huan amo químan huil quijtúa se pampa yehuanten islatatije pampa ca yehuanten amo quita Dios nindeno hual amo unca cuali.

### *Ilanahuatilisli in ye ilanahuatinijmes in cielo*

<sup>6</sup> Cuaquinon níquitac oc se ilanahuatini in cielo palantataya lajco pin cielo quínnahuatíjtataya yehuanten hual chantilo pan lalticpan in lamachiltilisli cuali hual amo químan mocahuas pa cayas. Quínnahuatíjtataya pa mochi inmínlalimes lacames huan mochi yehuanten hual amo cate míac, huan lacames hual lajtulo mochi lajtomes, quema, moxtin lacames. <sup>7</sup> Quijtuaya ca lajtol chichahuac:

—Ximomajtican ilaixpan Dios ca lasojlalisli, huan xiquilican lajtomes huejué, pampa ajsic in tonali químan yihual quíntilanís pa yajmo cayasi ca yihual yehuanten hual amo quíneltocalo. Quema, xicmolancuacuetzilican yihual hual quínchíac in cielo huan in lalticpan huan in al huejcalan huan innojen íixtololojmes in alimes.

<sup>8</sup> Quitocaya in ilanahuatini in cielo oc se ilanahuatini in cielo, quíjtuaya:

—Yajmo huelítia Babilon, in caltilan hué. Moijlacuc, axan moijlacuc. Yehuanten pin Babilón hual huelítije quínchihualtije moxtin lacames pin lalimes pin lalticpan, quínchihualtije amo cuali lacames ca sihuames hual amo inmínshihuan, quínchihuaje quinami lahuanquimes hual amo quimatije len quíchihualoaya, quinequi quijtúa, quínmolancuacuetzaltilic oc sequín dioses.

<sup>9-10</sup> Huan oc se ilanahuatini in cielo quitocac in ilanahuatini in cielo huan quíjtuaya ca lajtol chichahuac:



—Sinda se quimolancuacuetzilis in yulijquil temajquil huan imono, huan quipías ilanextilisli pa itzontecon pa pani iixtololojmes o pa ima, cuaquín yihual mococus miac pan ipampa Dios icualanilisli. Cayas quinami Dios quitoyahuilis paji chichic huan tetzahuac pa quicuniltis ca itapalquita Dios, hual quinequi quijtúa yihual panus icualanilisli. Huan cayas lacocoltli ca tixuxli huan azufre inminlaixpan Dios ilanahuatinijmes chijchipahuac pin cielo huan ilaixpan in Borreguito. <sup>11</sup> Huan amo mocahuas pa moajcoquis ipogli inminlacocoltilisli hual chichinahuía. Amo mosehuisi yihualitonali pa semilhuil huan pa layúa yehuanten hual quimolancuacuetzililo in yulijquil temajquil huan imono. Yehuanten cate hual quipialo in ilanextilisli itoca in yulijquil temajquil. <sup>12</sup> Nican cate lajtomes hual quinmililo Dios ilacames pa mopepenialtisi pa panusi lacocoltilisli. Yehuanten cate hual aquinojen yulilo quichijtcate quinami quijtúa Dios ilajtol huan yulilo quilalijtcate inminlaneltotalisli ca Jesús.

<sup>13</sup> Huan nijcaquic se lajtol pin cielo nechiliaya:

—Xiquijcuilu inon: “Axcán huan pa mochi tonali quipiasí paquilisli yehuanten hual miquisi ca inminyulilisli inahuac in Tata.” Quema, quijtúa in Espíritu, yoje mosehuisi, pampa lamije quichihuaje inmintequipanulisli. Huan quintocas pa cayas ca yehuanten pin cielo ilaxlahuilisli inmintequipanulisli.

### *In lapixcalisli pan in lalticpan*

<sup>14</sup> Cuaquinon nilachíac huan ¡xiquitacan! Cataya se mextemil iztatataya huan se quinami ilacal in cielo yehuatataya pani in mextemil, quipiaya pa itzontecon se yahuali lachihuali ca oro huan pa ima quipiaya se teposli latequi calica yahuiaya lapixca. <sup>15</sup> Huan quisac pin tiopan pin cielo oc se ilanahuatini in cielo huan quinotzac ca lajtol chichahuac yihual hual yehuatataya pani in mextemil, quilic:

—Xicxilani moma ca in teposli pa tilatequis, pampa ajsic in tonali pa tilatequis. Axan chichahuayac pa tilapixcas in lalticpan.

<sup>16</sup> Cuaquín yihual hual yehuatataya pani in mextemil quitemuhuic iteposli latequi pa latzindan pan lalticpan huan yoje quitequic ilapixcalisli pin lalticpan.

<sup>17</sup> Cuaquinon quisac pin tiopan pin cielo oc se lanahuatini huan yihual noje quipiaya se teposli latequi. <sup>18</sup> Huan quisac capa quilalilo in huendis oc se ilanahuatini in cielo, yihual in lanahuatini hual quipía lahueliltilisli ca tixuxli. Quinotzac ca lajtol chichahuac yihual hual quipiaya in teposli latequi, quilic:

—Xicxilani momajma ca in teposli latequi, xiquinpejpena inminmajmitas ilaquilyo in uvatlan pin lalticpan, pampa chichahuayaje in uvatlan.

<sup>19</sup> Cuaquín quitemuhuic in lanahuatini iteposli latequi pin lalticpan huan quipejpenac ilapixcalisli in uvas pan lalticpan, huan quinlasac mochi in majmitas pin capa quintelicsalo in uvas pa quisas iayo. In quinequi quijtúa iayo uvas unca quinami esli. Huan quisas iesli yehuanten hual quichihualo amo cuali pampa Dios cualantica ca yehuanten. Quintilanis capa yesi lacocoltli. <sup>20</sup> Capa quintelicsalo in uvas cataya pa quiahuac in caltlan Jerusalén. Huan quisac iesli in uvas capa quitelicsaloaya. Moajcoquic huan ajsitihualac in esli pa pani, ajsic pa inminlatilanaloniymes in caballos huan totocac huejca pa quinami trescientos kilómetros.

## 15

*In lanahuatinijmes pin cielo ca in chicome cocolisli calica Dios laquisa ca icualanilisli*

<sup>1</sup> Cuaquinon niquitac oc se lanextilisli hué pin cielo hual quinlachiatic lacames ca lamajtilisli pampa quinextiaya Dios ichicahualisli. Niqinmitac chicome ilanahuatinijmes in cielo hual quipialoaya lahuelilitisli pa quincoltisi yehuanten pin lalticpan ca chicome cojocolisli calica laquisas Dios ca icualanilisli.

<sup>2</sup> Huan niquitac len hual nesic quinami se al huejcalan lachihuali amo ca al, nesiaya quinami lachihuali ca len hual lanesca. Huan in quinami se al huejcalan nesiaya quinami quipiaya tixuxli laniluli ca in hual lanesca. Huan inahuac in quinami al huejcalan hual lanescatataya niqinmitac moquez-tataloaya yehuanten hual quisulahuaje in yulijquil temajquil. Quisulahuaje pan ipampa quinami amo quimolancuacuetzilije imono huan amo quimacahuiltije pa quilalilosquiaya inúmero itoca. Quimpialoaya pa inminmajmajuán iarpas Dios. <sup>3</sup> Huan quicantarujtataloaya (quicuicataloaya) se icantadita (icuical) calica quinmilije lajtomes huejué in Borreguito Cristo hual quinquixtic pin polehuilisli. Inon quinami icantadita Moisés hual quicantaruc (quicuicac) quiman quinquixtic Dios ilacames pin ipolehuilisli in Al Huejcalan Chichiltic. Huan ca in cantadita (cuical) quicantaruilloaya: Techlachialtilo ca lamajtilisli innojen huejué hual tiquinchá, toTata Dios, tehual hual ticpía mochi chicahualisli, tehual ticchá len unca cuali pa moxtin hual quinmahuilúa, huan ticchá mochi hual melahuac.

Tehual inminhué mochi de quiman pehuac huan pa quiman lamis.

<sup>4</sup> Amaqui unca hual amo momajtis molaixpan tehual huan amaqui unca hual amo miztilis lajtulisli huejué pampa motoca, oh Tata, unca niman hué,

pampa tehual mohuían tiunca mochi cuali huan chipahuac, timoijcuanilía pa camo ticayas capa unca laijlaculisli.

Moxtin lacames pin mochi lalimes mitzmolancuacuetzilijthualasi,

pampa tehual tiqinnextilic quinami tehual ticchá mochi hual unca cuali.

Huan ticmelahua mochi quiman tiquintilanía pa yajmo cayasi ca tehual moxtin hual quichihualo amo cuali.

<sup>5</sup> Huan quiman lamis inon, nilachíac huan axan niquitac lalapuli itioan Dios nepa pin cielo. Quema, niquitac pa calijtic pa in niman lasojli calijtic.

<sup>6</sup> Huan quisaje pin tiopan in chicome (siete) lanahuatinijmes hual quipialoaya in lahuelilitisli pa quincoltisi in lacames pin lalticpan ca in chicome lacoltisli. Quisaje lalaquentili ca nahuajmes lachihuali ca ichcal iztatataya, chipahuac huan laixpelatataya. Quimpialoaya lacuejtilonijmes lachihuali ca oro laipili pa itzindan inmintzicalan. <sup>7</sup> Huan se ca in nahuenten yulijquimes quinmacac in chicome lanahuatinijmes chicome tapalquitas lachihuali ca oro tentataloaya ca inon calica yahuiaya lami icualanilisli hué Dios hual amo quiman mocahua pa yulis. <sup>8</sup> Huan tentataya ca pogli in tiopan, in pogli cataya Dios ichicahualisli hual laixpela huan ilahuelilitisli. Huan amaqui huil calaquia in tiopan, monequiaya pa quichías pa lamisi in chicome lacoltisli hual quintilanisi pan lalticpan in chicome lanahuatinijmes.

## 16

*In tapalquitas tenticate ca lacoltisli pa in lacames ej'elehuis*

<sup>1</sup> Cuaquinon nijcaquic lajtol chicahuac lanoztataya pin tiopan. Quinmiliaya in chicome ilanahuatinijmes in cielo:

—Xiacan huan xiquintoyahuacan pani in lalticpan in chicome tapalquitas hual quincocoltisi in lacames pin lalticpan ca Dios icualanilisli.

<sup>2</sup> Cuaquín uyac in se lanahuatini huan quitoyahuac itapalquita pani pin lalticpan. Nestiquisaje sahuames pan inmincuerpos (inminacayo) yehuanten hual quipialoaya inminpan ilanextilisli in yulijquil temajquil huan yehuanten hual quimolancuacuetzilije imono. Posahualoaya huan xopuniloaya niman míac innojen sahuames. Amo quinequiloaya pajtilo.

<sup>3</sup> Oc se lanahuatini quitoyahuac itapalquita pani in al huejcalan huan in al mochíac quinami iesli se lacal mijquil. Huan miquije mochi hual yultataloaya pin al huejcalan.

<sup>4</sup> Quitoyahuac oc se lanahuatini itapalquito pani in atencojmes huejué huan pani in iixtololojmes alimes, huan mochihuaje esli. <sup>5</sup> Umpa, nijcaquic ilanahuatini in al, quijtuc:

—Tehual, Dios, ticchíac quinami quinmahuiluc pampa tiquincocoltitica yoje. Tehual tiunca huan ticataya niman cuali huan chipahuac huan timoijcuanilía mochi hual laijlaculi. <sup>6</sup> Pampín, ticchía quinami quinmahuilúa. Tiquinmacac in lacames esli pa cunisi, pampa yehuanten quintoyahuilic inminesli molacames huan molajtunijmes. Quema, quinmahuilúa pa quinpanusi yehuanten in lacocoltisli pa cunisi esli.

<sup>7</sup> Huan noje nijcaquic tzejtzc inon capa quilalilo huendis, quijtuc:

—Quema, Tata Dios, tehual ticpía mochi chicahualisli, innojen hual tiquinchía pa tiquinlalilis in lacocoltisli, unca melahuac huan unca quinami quinmahuiluaya.

<sup>8</sup> Oc se lanahuatini quitoyahuac itapalquita pin tonali, huan cataya lamacahuiltili in tonali pa quinchichinus lacames ca itixuxli. <sup>9</sup> Quinchichinuc lacames ca in tonalisli chicahuac huan yehuanten cajcajuaje tetzcuinuc itoca Dios hual quipía lahuelilitisli ca in lacocoltisli. Ma yoje, amo quinpalaje inminyolo pa quimolancuacuetzililosquiaya yihual in niman hué.

<sup>10</sup> Quitoyahuac oc se lanahuatini itapalquita pa capa huelitiaya in yulijquil temajquil. Axan cataloaya macuili lanahuatinijmes hual quintoyahuaje inmintapalquitas. Huan quiman in lanahuatini quitoyahuac, laticumactíac pa mochi lali capa huelitiaya in yulijquil temajquil. Huan lacames quincua-jcualoaya inminejnepil pampa inon quincocoltiaya yoje míac. <sup>11</sup> Huan cajcajuaje tetzcuinuc in Dios de in cielo (ilhuicac) pampa yihual quincocoltitataya ca in lacocoltisli huan in sahuames. Ma yojque amo quipalaje inminyolo pa yajmo quichihualosquiaya amo cuali.

<sup>12</sup> Quitoyahuac oc se lanahuatini itapalquita pani in atenco niman hué hual itoca Eufrates. Axan cate chicuase lanahuatinijmes hual latoyahuac. Huan in atenco hué Eufrates mohuactic. Mohuactic pa yoje mochijchihuasquiaya se ojli pa canalosquiaya in huejueyenten hual hualalosquiaya capa quisa in tonali.

<sup>13</sup> Cuaquinon pa icamac in cuhual hué huan pa icamac in yulijquil temajquil huan pa icamac in se hual unca lajtuni hual islacati niquinmitac quistataloaya ye iyecames amo cuajcuali, nesiloaya in iyecames quinami ranas (cuyemas). <sup>14</sup> Cate Satanás ilanahuatinijmes, quinchihualo len quinlachaftilo ca lamajtilisli lacames. Yajtialo pa mochi in lalticpan capa cate yehuanten hual huelitilo pan lacames. Yajtialo capa yehuanten pa quinnechicusi ca mochi inminguaches pa moanasi pan in tonali hué quiman Dios hual quipía mochi chicahualisli hualas pa lamis quichías len quinequi

quichía. <sup>15</sup> Huan nican Jesucristo quijtúa: “Xiquitacan, nihualas quinami se laxteguini. Quipiás míac paquilisli hual aqui mocahua nejchixtica quinami laexiltli, huan quinami se lalaquentli pa yojque amo moitas quinami se amo quipixtica itzotzomajli huan yojque nesis nolaixpan quinami se nacatil pinajtica. Quema, ma yuli chipahuac pa camo pinahuas quiman nihualas.” Yojque quijtúa Cristo. <sup>16</sup> Huan innojen ijyecames ej'elehuis quinnehicuc moxtin in huejueyenten huan inminguaches pan se lajcotiyan hué hual ca lajtol hebreo itoca Armagedón.

<sup>17</sup> Quitoyahuac itapalquita in lanahuatini hual quilamic in latoyahualisli, quitoyahuac pin ijyecal. Cuaquín mocaquic calijtic in tiopan pin cielo se lajtol chicahuac hual quijtuc yihual hual molalijtataya pani in icpali hual laixpela, quijtuc:

—Axcan unca lalamili.

<sup>18</sup> Cuaquinon cataloaya míac lapelanilisli huan míac xahuanilisli chicahuac. Comuniaya míac huan laulinic chicahuac yojé quinami amo quiman panuc quiman cataloaya lacames pan in lalticpan, yojque chicahuac cataya in laulinilisli. <sup>19</sup> Tzayanic ca ye lajcomes in caltilan hué, huan innojen caltilan pin mochi in lalimes huetzije. Huan quijnamiquic Dios Babilón pa quichihuilis pa canas mochi in ilacocoltilisli icualanilisli niman chicahuac. <sup>20</sup> Huan yajmo nesije in lalimes hual cate lajco pin al huejcalan, yajmo moitijije in lomas (tepemes). <sup>21</sup> Huan pin cielo huetzic míac tisihiul huan mochi seje in tisihiul cataya etic quinami cincuenta kilos. Huetzije inminpan in lacames. Huan yehuanten cajcajuaje Dios pampa huetzic ilacocoltilisli in tisihiul, pampa cataya se lacocoltilisli niman chicahuac.

## 17

### *Quitlanía in hué sihual lacalero pa panus lacocoltilisli*

<sup>1</sup> Cuaquinon hualac ca nehual se ilanahuatini innojen chicome hual quinpialoaya in chicome tapalquitas huan nechilic:

—Xihuala huan nimitznexilis quinami Dios yahui quitlanía pa ilacocoltilisli in hué sihual lacalero hual yehuatica pani in míac alimes. <sup>2</sup> Ca in sihual lacalero, moxtin in huejueyenten pin lalticpan quinmolancuacuetzililoaya monos huan amo quimolancuacuetzililoaya Dios. Huan inon Dios quita quinami in laijlaculisli hual quichía se lalac ca se sihual hual amo isihua. In sihual lacalero quintilanilic inminyolo in huejueyenten pa quichihualosquiaya laijlaculisli ca yihual. Unca quinami quiman se sihual lacalero quimaca iayo uva coc se lalac pa lahuanas. Huan yojque yehuanten hual chantilo pan lalticpan cate quinami lahuanticate ca iayo uva coc in sihual.

<sup>3</sup> Huan nilachiaya quinami nechuicac pan ipampa in Espíritu Santo huan tiajsije pa se lali capa amaqui chantiaya. Nepa niquitac se sihual yehuatataya ipan se yulijquil temajquil chichiltic hual motocayaltic ca míac itocajmes hual quihuejuecaltilo Dios. Huan quinpiaya in yulijquil temajquil chicome (siete) itzontecon huan majlacli (diez) icuacuas. <sup>4</sup> Cataya lalaquentli in sihual ca tzotzomajli morado huan chichiltic huan cataya lachijchihuali ca oro huan maquisli lachihuali ca perlas huan oc sequin tixcalitos hual ipatilo míac. Quipiaya pa ima se tapalquita lachihuali ca oro tentataya ca len Dios amo quinequi quita, tentataya ca len niman amo cuali hual quichihualo lacames quiman quinquepanuillilo oc sequin dioses. <sup>5</sup> Huan pa itzontecon pa pani iixtololojmes cataya lajcuiluli se itoca hual amaqui quimati len quinequi quijtúa sinda Dios amo quinextía len quinequi quijtúa.

Huan itoca unca: “BABILONIA HUÉ, INMINANTZIN MOXTIN SIHUAMES LACALEROS HUAN YEHUANTEN HUAL QUINMOLANCUACUETZILILO OC SEQUIN DIOS PIN LALTICPAN PA QUICHIHUASQUI MOCHI HUAL DIOS AMO QUINEQUI QUITA.”<sup>6</sup> Huan niqitac in sihal cataya quinami lahuantataya ca inminesli moxtin ilacames Dios huan yehuanten hual miquije pampa quilamachiltiyoaya neli ilamaxtilisli Jesús. Niqitac, huan nimomajtic miac.<sup>7</sup> Ma yoje, nechilic in lanahuatini:

—¿Leca tiquita ca lamajtilisli? Nimitzilis len quinequi mitznextilía inon hual tiquita quichijtica in sihal, inon hual se amo huil quimati ihuían. Huan noje nimitzilis in hual mitzmachiltía in yulijquil temajquil hual quinpía innojen chicome itzontecon huan majlacli icuacuas, in yulijquil capa yehuatica in sihal.<sup>8</sup> Huan noje nimitzilis in hual quinequi mitznextilía in yulijquil temajquil hual quinpía chicome itzontecon huan majlacli icuacuas, in yulijquil capa yehuatica in sihal. Yulini sejpa huan amo unca axan. Ma yoje yahui lejcúa pa quisas pin huejcalan capa se amo quiman huil cajsí itzindan. Inon unca capa mochi hual ej'elehuis huelitilo. Quisas pin huejcalan, cuaquín yahui mopolúa huan yajmo moitas. Huan moitasi ca lamajtilisli lacames quiman qitalo in yulijquil temajquil, pampa yulini sejpa huan amo unca axan. Ma yoje yahui huala pan in lalticpan. Huan innojen lacames cate yehuanten hual amo quipialo lajcuiluli inmintocajmes pin amal capa moitililo mochi inmintocajmes yehuanten hual Dios quijtuc pampa yahuiyoaya quipialo iyulilisi. Inon quijtuc Dios quiman ayamo quinchíac in lalticpan huan in cielo.

<sup>9</sup> Cuaquín, inon hual axan nía nimitzilía, monequi pa se quipía lajmatilisli pa huil laijnamiquis cuali. Innojen chicome itzontecon cate in chicome lomas (tepemes) capa yehuatica in sihal.<sup>10</sup> Noje innojen chicome itzontecon cate chicome huejueyenten. Lamije capa huelitiloaya macuili ca innojen huejueyenten. Se ca yehuanten huelitijtica axan. Ayamo pehuac huelitic in oc se. Huan quiman ajsis in tonali pa huelitis, huejcahuas jan se nadita san.<sup>11</sup> Huan in yulijquil temajquil hual cataya huan amo unca axan, yihual in hué ocho (chicué), mas que yihual noje unca se ca innojen oc sequin chicome huejueyenten. Huan umpa, yihual polehuis pa camo quiman mocuepas.

<sup>12</sup> 'Huan innojen majlacli (diez) icuacuas hual tiquinmitac cate majlacli huejueyenten hual ayamo quipiaje lahuelilitisli pa huelitisi quinami huejueyenten. Quema, quipiasí lahuelilitisli quinami huejueyenten pa huelitisi se nadita ca in yulijquil temajquil.<sup>13</sup> In majlacli huejueyenten lajtusi pa inminyolo quinami se san huan quintemacasi inminchicahualisli pa huelitisi huan inminlahuelilitisli quitemacasi in yulijquil temajquil.<sup>14</sup> Moanasi ca in Borreguito, huan in Borreguito quinsulahuas, pampa yihual unca inminteco moxtin tecojuan huan inminhué moxtin huejueyenten. Huan yehuanten hual cate ca yihual, hual aquinojen yihual quinnotzac pa yesi ilacames, quema, yihual quinlajtultic huan yehuanten mocahuasi pa yultiasi yehuanten hual yihual quinlajtultic.

<sup>15</sup> Noje ilanahuatini in cielo nechilic:

—In alimes hual tiquinmitac capa yehuatataya in sihal lalalero, yehuanten cate lacames, quema, miac lacames huan in lalimes capa cate miac lacames huan in lacames hual lajtulo mochi in lajtomes pin lalticpan.<sup>16</sup> Huan innojen majlacli icuacuas hual tiquinmitac hual cate hueyenten, yehuanten huan in yulijquil temajquil quicocolisi in sihal lalalero. Huan quinixtilisli mochi hual quipía, quema, huan itzotzomajli, huan quicahuas quinami nacatil. Quicuasi inacal icuerpo (inacayo) huan quichichinusi ca tixuxli.<sup>17</sup> Inon quipanus pampa Dios quilallic inon pa inminyolo pa lamisi

quichihuasi inon hual Dios quinequi pa quipanus. Yehuanten majlacli (diez) huejueyenten lajtusi pa inmínyolo quinami se pa yoje quitemacasi in yulijquil temajquil inminlahuelilitlisli calica huelitilo quinami huejueyenten. Huan yoje quilamisi quichihuasi in hual Dios quijtuc. <sup>18</sup> Huan in sihual hual tiquitac unca in caltilan hué hual huelitía inminpan moxtin in huejueyenten pin lalticpan.

## 18

### *In quinami lamis huetzis Babilonia*

<sup>1</sup> Panuc inon huan cuaquín niqitac oc se ilanahuatini in cielo temuji-hualaya umpa, quipixtihualaya lahuelilitlisli niman hué. Huan ca ilaix-pelalislí cualtichin quilahuic in lalticpan huan laixpelaya chicahuac. <sup>2</sup> Huan lanotzac ca se lajtol chicahuac, quijtuc:

—Yajmo huelitía Babilonia in caltilan hué, yajmo huelitía. Axan mochíac se lajcotiyan capa chantilo in ijyecames amo cuajcuali. Unca capa quipiasí pa chantisi mochi in tutomes cajcatzahuac huan tejtetzcuinuc. <sup>3</sup> Yajmo huelitía pampa yihual quinmijlacuc mochi lacames pin lalticpan. Unca quinami yihual quinlauniltic ca iayo uva coc hual quinnequiltic pa camo quicaquillosquiaya Dios. Quinnequiltic pa quichihualosquiaya mochi hual amo cuali, quinami yihual quinequiaya. Quema, cataya quinami quiman se lalac quicajcahuas isihua pa canas oc se sihual, yojque in huejueyenten pin lalticpan quinmolancuacuetzilic idioses. Huan yehuanten pin lalticpan hual lacuhualo huan lanamacalo mochihuaje lacames hual quipialo míac. Monechicuhuilije míac tomin pan ipampa quinami lanamacaje huan lacuhuaje yoje amo cuali ca in caltilan quinami monextilije. Cataya pampa pa Babilonia quitaje míac tomin pa yojque mocuhuililosquiaya niman míac hual cualtichin calica mochihuaje niman chijchicahuac pa huelitisi.

<sup>4</sup> Cuaquinon nijaquic oc se lajtol pin cielo, quijtuaya:

—Xiquisacan nepa, amhuanten nolacames, ma camo caya pa amhuanten ancanas len ca in sihual quiman Dios quitilanis capa yes lacocoltili pampa quichíac míac laijlaculisli. <sup>5</sup> Quipanus in lacocoltilislí pampa momontuje innojen pan ipampa ilaíjlaculisli. Huan axan quijnamiquic Dios mochi in amo cuali hual quichíac in sihual. <sup>6</sup> Xiclacuepílican amo cuali jan quinami yihual quinchihuilic amo cuali oc sequin. Quema, xiclacuepílican ome ca mochi sejse lachihualislí amo cuali hual yihual quichíac. Ma ye quinami se tapalquita ca pajli pa cunis, ome tapalquitas ca mochi se calica yihual quinlauniltic oc sequin. Quema, xicnílú pa cunis pin itapalquita yihual. <sup>7</sup> Moiliaya lajtomes huejué inahuac yihual ihuían, huan mahuiltiaya quinami se sihual lalalero. Pampín, jan yojque xicmacacan yoje míac lacocoltilislí huan cocolislí pa iyolo, quinami yihual quinchihuilic oc sequin. Quema, xicchiuilicán yojque, pampa laijtíc iyolo quijjtuc: “Niuunca nican niyehuatica quinami se hué sihual, amo niunca nohuían. Amo quiman nicmatis len cocolislí pa noyolo.” <sup>8</sup> Huan pampa quijtúa yoje, yoje pan jan se tonalí san cajsís yihual ilacocoltilislí. Panus cocolislí huan icnotilislí huan mayandi, huan yes lachichinulí ca tixuxlí, pampa in Tata Dios hual quitilanis in sihual ilaixpan yihual quipía mochi chicahualislí.

<sup>9</sup> Huan quichoquilisi in huejueyenten pin lalticpan hual in caltilan Babilonia quinnequiltic pa camo quicaquisi Dios huan quinnequiltic pa yulisi amo cuali ca míac tomin quinami yehuanten pin caltilan yulije. Lacames quichihuaje amo cuali quinami lanamacaloaya huan lacuhualoaya ca in caltilan Babilonia. Cataya quinami in amo cuali hual lacames quichihualo ca

sihuames hual amo inminsihuahuan. Tzajtzi ca icnotilisli in huejueyenten quiman quitasi in pogli quiman chichinajtías in caltilan. <sup>10</sup> Moquetzasi huejca pa camo quinmajsi in tixuxli, momajtitiasi pampa quitasi in lacocoltilisli hual quipanujtías, huan quilisi:

—¡Ay! ¡Ay pa tehuál, ticaltlan hué, ticpiaya míac lahuelilitisli, Babilonia! ¡Huan pan se tonali mitzajsic in lacocoltilisli jan ajnaxcan pampa amo tijcahuaya ticchía in amo cuali!

<sup>11</sup> Huan chocasi in lanamacanijmes pin lalticpan, huan quipiasí icnotilisli pampa in caltilan hué axan moijlacuc huan yojque yajmo quicuhuas amaqui len quipialo pa quinamacasi. <sup>12</sup> Quipiaje oro huan plata huan maquisli lachihuali ca perlas, tzotzomajli cualtichin, morado, seda, huan tzotzomajli chichiltic huan mochi lachihuali ca cuahuil hual ajuíac, mochi len lachihuali ca marfil huan mochi hual unca lachihuali ca cuahuil hual ipati, huan ca teposli quinami cobre huan ca hierro huan ca mármol, <sup>13</sup> huan canela huan innojen hual quicualo hual ajuíac (especies), ajuialisli, altzindi hual ajuíac, huan in hual lapopchuía, huan iayo uva coc huan chahuac huan harina huan trigo huan ganado huan borregos huan caballos huan layahualujquimes huan yehuanten hual latequipanuילו lailpili, quinequi quijtúa, lacames hual pa mochi xixihuimes hual yulilo quipialo pa quineltocasi oc se lalac. <sup>14</sup> Quilisi lacames in caltilan hué, quil:

—¡Inon hual ticnequiaya ca mochi moyolo yajmo unca ca tehuál, axan uyac! ¡Huan mochi innojen hual cataloaya niman cuali huan cualtichin, axan tiquinpoluc, yajmo quiman tiquinmitas!

<sup>15</sup> Yehuanten hual quinnamacaloaya innojen monechiculije inmintomilaje huan mochihuaje lacames hual quipialo míac. Huan yehuanten moquetzasi huejca capa amo quinmajsi in tixuxli quichichinujtica in caltilan, momajtiticate pampa quipanujtica in lacocoltilisli tetzcuinuc, chocatinemisi huan lajtutinemisi ca icnotilisli. <sup>16</sup> Quijtusi:

—¡Ay, ay pa in caltilan hué! ¡Mochi ilacames molaquentinijme ca tzotzomajli cualtichin morado huan chichiltic, cataloaya lachijchihuali ca oro huan maquisli huan ca perlas! <sup>17</sup> ¡Pan se tonali san mochi in hual ipati moijlacuc!

Moquetzaloaya huejca pa camo calaquisi in caltilan moxtin in laicananijmes huan yehuanten hual quinnejnemilito barcos pa se caltilan capa calaquilo barcos pa oc se caltilan pa itenco in al huejcalan. Huan in maríneros huan moxtin hual molacualtilo tequipanujticate pa al huejcalan moquetzaloaya huejca, quiztataloaya in caltilan. <sup>18</sup> Tzajtziloaya quiman quitaloaya in pogli hual majcoquiaya capa chichinahuiaya, quijtuloaya:

—Amo quiman cataya se caltilan quinami in caltilan hué.

<sup>19</sup> Huan quilasaje lalpotocli paní inmintzontecon pa lanextilosquiaya quinami quincocuhuaya inminyolo. Chocaloaya huan lajtuloaya ca icnotilisli, tzajtzitaloaya huan quijtutataloaya:

—¡Ay, ay pa in caltilan niman hué! ¡Nepa monechiculiloaya lacames míac tomin moxtin pan ipampa in míac tomin hual cataya pin caltilan! Monechiculiloaya niman míac moxtin hual yeje inmintecojuan barcos. Monechiculoaya míac moxtin hual quinpioaloaya barcos. ¡Pan se tonali moijlacuc in caltilan niman hué! Yojque quijtuye.

<sup>20</sup> ¡Axcán, xicpiacan paquilisli pampa yajmo unca in caltilan niman hué, amhuanten pin cielo, huan amhuanten hual anunca ilacames Dios huan ilanahuatinijmes huan ilajtunijmes. Xicpiacan paquilisli pampa axan quitlanic Dios ca capic yajmo mocuepas yes. Yojque quitlanic Dios pampa anmijchihuilic in niman amo cuali.



<sup>21</sup> Cuaquinon se ilanahuatini in cielo hual quipiaya míac chicahualisli canac se tixcali hué quinami se melal hué huan quilasac pin al huejcalan, huan quijtuc:

—Yoje cayas lalasali ca lacomunaltisli in caltilan hué Babilonia huan yajmo moitas. <sup>22</sup> Huan yajmo mocaquis ca tehual, Babilonia, inminlatzotzonalisli yehuanten hual quintzotzonalo in arpa, huan oc sequin latzotzonquijmes quinami flautas huan lancaquetzalonijmes. Huan yajmo moitas ca tehual se hual quimati quichía len tequipanulisli. Yajmo mocaquis ca tehual ixahuanisli se hual testica ca melal. <sup>23</sup> Yajmo lahuis ca tehual se tapalquita pa lahuilisli huan yajmo mocaquis ca tehual inminlajtomes lalac hual yahui monamictía huan sihual hual monamictía. In unca hual tipanus pampa tiyulic ticchijtataya laijlaculisli. Molanamacanijmes yeje in huejueyenten pin lalticpan. Huan tehual, O Babilonia, pan ipampa molaxualisli mocuajcuamanaloaya moxtin yehuanten pa mochi in lalimes pin lalticpan.

<sup>24</sup> Huan pin caltilan niman hué moitilic inminesli ilajtunijmes Dios huan inminesli ilacames. Quema, moitilic inminesli moxtin ilacames Dios hual cataloaya lamictili pan in lalticpan.

## 19

<sup>1</sup> Panuc inon huan nijcaquic len xahuaniaya quinami ilajtol chicahuac niman míac lalalera pin cielo, tzajtziyoaya:

¡Aleluya, xiquilican Dios lajtomes huejué!

Unca pan ipampa toDios cate laquixtili pin polehuilisli ilacames.

Huan yihual cahuilúa pa quilisi mochi lajtomes huejué huan pa quipías lahuelilitisli.

<sup>2</sup> Unca pampa yihual quinchihuilía lacames ca lachihualisli melahuac.

Dios quitilanic pa yes lacocoltili in hué sihual lalalero hual quinmijlacuc in lacames pin lalticpan pan ipampa quinami quinnequiltic lacames pa quintequipanulisli oc sequin dioses.

Ca Dios in unca quinami lacames moanilito ca sihuames hual amo inminsihuahuan.

Huan yojque yihual Dios quilacuepiloc in sihual pampa yihual quinmictic Dios itequipanujquimes.

<sup>3</sup> Oc sejpa tzajtziye:

—¡Aleluya! Amo quiman mocahuas pa lejcus ipogli.

<sup>4</sup> Huan in veinticuatro abuelojmes huan in nahuenten yulijquimes molasaje pan lali pa quimolancuacuetzilisi Dios hual yehuatataya pani iicpali hual laixpelaya, quilije:

—¡Yoje ma ye! ¡Aleluya!

<sup>5</sup> Huan pa in icpali hual laixpelaya mocaquic se lajtol tzajtzitataya, quijtuaya:

Xiquilican toDios lajtomes huejué, anmoxtin itequipanujquimes, amhuanten hual anquimati anmomajtía ilaixpan yihual ca lasojlalisli, amhuanten in lacames tijtipichin, huan amhuanten in lacames huejué.

### *In fiesta (ilhuil) hual unca imonamictilisli in Borreguito*

<sup>6</sup> Cuaquinon nijcaquic len quinami inminlajtol niman míac lalalera, xahuaniye quinami míac alimes huan quinami comunilisli niman chicahuac, tzajtzitataloaya:

¡Aleluya! pampa in Tata toDios hual quipía mochi chicahualisli huelitijtica.



7 Ma ticpiacan paquilisli huan ma titzajtzican niman míac, ma tiquilican lajtomes huejué inahuac ichichahualisli, pampa ajsic itonali imonamictilisli in Borreguito, huan isihua calica monamictía huala.

8 Quimacaje pa yes lalaquentili ca tzotzomajli cualtichin, hual laixpela huan unca niman chipahuac.

Quijtúa yojque, pampa in lino cualtichin quinequi quijtúa inminlachihualisli cuajcuali hual yulilo quinchijtcate Dios ilacames.

9 Huan in ilanahuatini in cielo nechilic:

—Xiquijcuilu inon: “Quipiasi paquilisli hual quinnotzalo pa hualasi lacuasi pan tonali capa cayas imonamictilisli in Borreguito.”

Huan nechilic:

—Innojen cate Dios ilajtomes mejmelahuac.

10 Cuaquinon nimolasac ilaixpan pa icxihujmes pa nicmolancuacuetzilis. Huan nechilic:

—Amalá tichmolancuacuetzilis. Niunca ca tehual huan anmocnían hual tictequipanuילו Dios huan ticpialo in lajtomes pa neli tiquinmilisi lacames mochi inahuac Jesús. Xicmolancuacuetzili Dios.

Monequi pa Dios ilacames quichihualo yojque, pampa sinda tiquilisi in hual melahuac inahuac Jesús, yoje inon unca len quinequi quijtúa mochi ilajtol Dios, jan in lajtulisli quinextilía lacames inahuac Jesús.

### *Yihual hual cataya ipan in caballo iztatataya*

11 Cuaquinon niqitac lapujtataya in cielo, huan ¡xiquitacan! Cataya se caballo iztatataya. Huan yihual hual yehuatataya ipan itoca in Se Hual Amo Mocahua pa Quichías Jan Quinami Quijtúa, huan noje itoca Melahuac. Huan yihual quinchihuilía moxtin melahuac quinami quinmahuilúa. Huan quichía moanalisi hual yes melahuac. 12 Cate iixtololajmes quinami se tixuxli milintica. Huan pani itzontecon quinpía míac teposyahualimes hual laixpelalo. Huan quipía se itoca lajcuiluli hual oc se amo quimati, san yihual quimati. 13 Cataya lalaquentili ca se nahuas layapali ca esli. Huan itoca calica quitocayaltilo unca ILAJTOL DIOS. 14 Huan Dios ilanahuatinijmes hual cate iguaches in cielo quitocaloaya yehuatataloaya inminpan caballos ij'iztatataloaya. Cataloaya lalaquentili ca tzotzomajli iztatataya huan niman chipahuac. 15 Pa icamac yihual hual quinlaicanaya quisaya se teposli hual latequi ca pani huan ca itzindan, se teposli calica moanalito. Ca inon yihual moanas ca in míac lacames pa inminlalimes, huan huelitis chichahuac pan yehuanten quinami ca se pitzahuac lachihuali ca teposli. Quema, unca quinami yihual quitelicas capa unca lamontuli iuvas Dios pa quisas iayo in uvas quinami esli. In quinequi quijtúa, yihual quichías inon hual Dios hual quipía mochi chichahualisli quinequi quinchihuilili pa yoje quilamis icualanilisli niman chichahuac. 16 Pani inahuas huan ipan icxían pa pani quiipiaya lajcuiluli se itocajmes: “INMINHUÉ IN HUEJUEYENTEN HUAN INMINTECO IN TECOJUAN”.

17 Cuaquinon niqitac se ilanahuatini in cielo moquezataya pin tonali, huan ca lajtol chichahuac quinnotzac mochi in tutomes hual palanilo lajco pin cielo, quinmilic:

—Xihualacan ximonechicucan pa anquicuas Dios ilacualisli hué.

18 Ximonechicucan pa anquicuas inminacal inmincuerpos (inminacayo) laicananijmes huan lacames chijchichahuac, huan inminacal caballos huan hual aquí yehuatate inminpan, huan inminacal moxtin lacames

tequipanujquimes hual amo quinlaxlahuilo huan tequipanujquimes hual quinlaxlahuilo huan lacames tijtipichin huan huejué.

<sup>19</sup> Huan niqinmitac in yulijquil temajquil huan in huejueyenten pin lalticpan ca inminguaches monechicujtataloaya pa moanasi ca yihual hual yehuatataya pani in caballo iztatataya huan ca iguaches in cielo. <sup>20</sup> Huan quiquitzquije in yulijquil temajquil huan noje ca yihual quiquitzquije in lajtuni hual islacatiaya. In lajtuni yec hual aqui quinchihuaya innojen lanextilisli hual quinlachialtiaya ca lamajtilisli yehuanten hual quiipaje ilanextilisli in yulijquil temajquil pani inmincueros. Noje quinmolancuacuetzaltiliaya imono. Inon quichiac in lajtuni hual islacatiaya, quichiac pan ipampa ilahueliltisli in yulijquil temajquil. In omenten, in lajtuni huan in yulijquil temajquil cayaje lalasali yultataloaya pin coyunquil capa unca tixuxli hual chichinahuía ca azufre. <sup>21</sup> Huan inminguaches in omenten cayaje lamictili ca in teposli hual latequi calica moanalo. In teposli unca iyaxca yihual hual yehuatataya pani in caballo, in teposli hual quisa icamac. Huan mochi in tutomes pachihuije ca inminacal.

## 20

### *In mil xixihuimes*

<sup>1</sup> Cuaquinon, niqitac temujtihualaya se ilanahuatini in cielo, quipixtataya pa ima ilalapuloni in huejcalan hual amo quiman huil cajsí itzindan, huan noje quiipiaya se lapantini hué. <sup>2</sup> Huan quiquitzquic in cuhual, yihual unca in cuhual hual viejotjc, yihual in lili huan Satanás. Quilpic pa mocahuas lailpili pa mil xixihuil. <sup>3</sup> Quilasac pin huejcalan, huan quitzacuac huan quichihuilic pa camo huil molapus, pa yojque pa innojen mil xixihuil yajmo quincuaajcuamanasquiaya in lacames capa yulilo pa inminlalimes. Quiman lamisi in mil xixihuimes, monequis pa yes lamacahuali pa se nadita.

<sup>4</sup> Cuaquinon niqinmitac icpalimes quinami innojen capa lacames huejué huelitilo, huan yehuatatataloaya inminpan yehuanten hual cataya inminyaxca pa quinchihuilis lacames quinami quinmahuiluaya. Noje niqinmitac moxtin yehuanten amo ca inmincueros hual Dios ilacocolinjmes quincotonilije inminquixlan pampa quijtuloaya neli Jesús ilamachiltisli cuali huan quinlaquetzililoaya lacames ilajtomes Dios. Amo quiman quimolancuacuetzilije in yulijquil temajquil huan amo quiipaje ilanextilisli pa inmintzontecon pa pani inmixtololojmes o inminmajmajuan. Yulije oc sejpa huan huelitiloaya ca Cristo pa mil xixihuil. <sup>5</sup> Ayamo yulije oc sejpa in oc sequin mijquimes. Quiman lamisi in mil xixihuil, cuaquinon yulisi oc sejpa. Ma yoje, yehuanten hual yulisi oc sejpa pa huelitisi ca Cristo cayasi ilapehualtilisli in mijquimes hual yulisi oc sejpa. <sup>6</sup> Quipiás paquilisli hual aqui Cristo quiyuliltis ca in lapehualtilisli quiman yulilo oc sejpa yehuanten hual miquije. Yihual unca se ca in lacames hual iyaxca Dios san. Ca yehuanten in oc se miqulilisi amo quipiás chichualisli pa quinmictis oc sejpa. Yehuanten yesi inmintiopistas Dios huan Cristo, huan huelitisi ca yihual ca mil xixihuil.

<sup>7</sup> Huan quiman lamisi in mil xixihuil, cayas lamacahuali Satanás capa unca lailpili. <sup>8</sup> Quisas pa quincuaajcuamanas in lacames pa mochi in lalimes pin lalticpan, in quinequi quijtúa Gog huan Magog. Huan Satanás quinnechicus pa moanasi. Cayasi quinami in xali pan ixalipan in al huejcalan, pampa yehuanten cayasi niman míac. <sup>9</sup> Huan nejnemisi mosemantiasi pa mochi in lali. Quiyahualusi ilacames Dios hual cayasi pa mochi itenco ilasojli caltilan Dios, in caltilan hual Dios quinequi míac. Cuaquinon temujtiquisas tixuxli capa in cielo huan quinlamis quinchichinus moxtin hual quinlaicanas

Satanás. <sup>10</sup> Huan in lili Satanás hual quincuajcuamanac cayas lalasalí pin coyunquil capa unca tixuxli huan azufre, nepa cate in yulijquil temajquil huan in lajtuni hual islacatiaya. Huan in yeyenten amo mocahuasi pa cayasi lacocoltili yihualitonali pa semilhuil huan pa layúa pa quiman.

### *Dios quintilanía ilaixpan yihual yehuanten hual amo quineltocalo*

<sup>11</sup> Cuaquinon niquitac se icpali hué hual laixpelaya, iztatataya, huan niquitac yihual hual yehuatataya ipan. Ilaixpan yihual choluje in lalticpan huan in cielo (ilhuicac), huan yajmo cataya capa moitalosquiaya yehuanten. <sup>12</sup> Huan niquinmitac in mijquimes tijtipichin huan in mijquimes hual cataloaya huejueyenten nepa moquezataloaya ilaixpan in icpali hué. Huan cataloaya lapalahuali in amames. Noje cataya lapalahuali oc se amal hual unca iamal yulilislí. Huan cayaje latilanilí iyampa Dios in mijquimes pa quicaquisi in hual cataya lajcuilulí inminahuac yehuanten pin amames. Cataya lajcuilulí mochi hual quichihualoaya quiman yuliloaya pan lalticpan. <sup>13</sup> Huan quitemacac in al huejcalan in mijquimes hual moitilije pin al. Quitemacac in lajcotiyan huejcalan in mijquimes huan quitemacac miqulislí in mijquimes hual moitaje ca innojen. Huan moxtin yehuanten Dios quintilaní pa quiahuac iyampa yihual quinami quinmahuiluc pampa quichihuanijme mochi laijlaculislí quiman yulinijme pan lalticpan. <sup>14</sup> Cuaquinon miqulislí huan in lajcotiyan huejcalan capa cataloaya mijquimes cataloaya lalasalí pin coyunquil hual chichinahuía ca tixuxli hual amo quiman sehuis. Inon unca in oc se miqulislí, in coyunquil ca tixuxli. <sup>15</sup> Huan sinda se itoca amo cataya lajcuilulí pin iamal yulilislí, cuaquín yihual cataya lalasalí pin coyunquil capa in tixuxli.

## 21

### *Cielo (ilhuicac) yancuic huan lalticpan yancuic*

<sup>1</sup> Cuaquinon niquinmitac se cielo yancuic huan se lalticpan yancuic, pampa in cielo (ilhuicac) huan in lalticpan hual tiqiximatilo yajmo cataloaya, huan yajmo cataya in al huejcalan. <sup>2</sup> Huan nehual, Juan, niquitac Dios icaltilan lasojli, cuali huan chipahuac, in Jerusalén yancuic, temu-jthualaya capa in cielo capa unca Dios. Cataya lachijchihuali cualtichin quinami se síhual hual yahui monamictía ca ilahuicá. <sup>3</sup> Huan nijcaquic se lajtol hué lajtutataya pin cielo, quijtuaaya:

—Xiquitacan. Axan unca ca lacames capa chanti Dios. Yihual chantis ca yehuanten huan yehuanten yesi ilacames. Huan yihual Dios cayas ca yehuanten huan yes inminDios. <sup>4</sup> Yihual quinquactilis mochi ichoquis pa inmixtololjmes, huan yajmo yes miqulislí, yajmo cayas ilacocolislí inminyolo lacames, huan yajmo cayas chocalislí huan lacocoltilislí huan cocolislí, pampa yajmo cayasi innojen hual tiquinpanulo nican pan lalticpan.

<sup>5</sup> Huan yihual hual yehuatataya pani in icpali hual laixpelaya quijtuc:

—Xiquitacan. Niqunchijtica mochi yajyancuic.

Noje nechilic:

—Xiquijcuilu inon, pampa huil ticlalía mochi molaneltocalislí ca in lajtomes pampa neli cate huan mejmelahuac.

<sup>6</sup> Huan nechilic:

—Axcan lamíc mochíac mochi. Nehual niquinami Alfa huan Omega, in A huan in Z. Niunca in pehualislí huan in lamilislí. Yehuanten hual amiquilo pa inminyolo niquinmacas in al huan amo quiyasi pa quilaxlahuisi. In al quimaca yulilislí huan quisa pin iixtololon al capa nehual niunca. <sup>7</sup> Huan mas que panúa lacocoltilislí pampa quichihuililo nolacocolinijmes, yihual

hual lasulahua quipías ca nehual inon hual noyaxca. Huan niyes iDios huan yihual yes noxolol. <sup>8</sup> Huan yehuanten hual momajtilo pa yultiasi necheltocaticate pampa quinchihuililo lacocoltilisli nolacocolinijmes, cuaquín quipiasi inminyaxca pin coyunquil hual chichinahuía ca tixuxli huan azufre. Inon unca in oc se miqulilisi. Huan jan yojque quinpanus yehuanten hual amo quineltocalo ilajtol Dios huan yehuanten hual yulilo quichijtcate mochi hual Dios amo quinequi, huan yehuanten in lamictinijmes huan yehuanten hual quichihualo amo cuali lacames ca sihuames huan yehuanten in laxuxanijmes huan yehuanten hual quinmolancuacuetzililo monos huan yehuanten hual yulilo islacatijtcate. Quema, yehuanten noje quipiasi pa panus in oc se miqulilisi pin coyunquil hual chichinahuía ca tixuxli huan azufre.

### *In Jerusalén yancuic*

<sup>9</sup> Cuaquinon hualac se lanahuatini hual cataya ca in oc sequin chicuase ilanahuatinijmes in cielo hual quinpialoaya in chicome (siete) tapalquitas tentataloaya ca in chicome lacocoltilisli, calica Dios lamic ca icualanilisi. Laquetzac ca nehual huan nechilic:

—Xihuala, huan nimitznextilis in sihual yancuic, isihua in Borreguito.

<sup>10</sup> Huan pan ipampa in Espíritu Santo, nechhuicatíac ca se loma (tepel) hué huan cuajtic, huan nechnextilic Dios icaltilan lasojli, cuali huan chipahuac, itoca Jerusalén. Huan quíac pin cielo capa unca Dios, temujtihualaya.

<sup>11</sup> Quipixtihualaya ilaixpelalisli cualtichin hual iyaxca Dios, laixpelaya quinami se maquisli cualtichin hual unca se maquisli quinami in jaspe, lanescatataya. <sup>12</sup> Quipiaya calimes huejcanic (tepandi) hual quitzacuaya in caltilan. Cataya hué huan cuajtic ca doce lalapujquimes huan inminpan in lalapujquimes cataya lajcuiluli inmintocajmes in doce inminlanechiculisi inminmiahuimes ixolomes Israel. <sup>13</sup> Pa capa quísa in tonali cataloaya ye lalapujquimes, pa in sur cataloaya ye lalapujquimes, huan capa calaquía in tonali cataloaya ye lalapujquimes huan pa in norte cataloaya ye lalapujquimes. <sup>14</sup> Huan quinpiaya doce lastilili innojen hual quitzacuaya in caltilan. Huan inminpan cataloaya lajcuiluli quinami motocalo yehuanten doce ilanahuatinijmes in Borreguito.

<sup>15</sup> Huan yihual hual laquetzaya ca nehual quiapiaya se pitzahuac lachihuali ca oro pa lalamachiasquiaya. Yahuiaya quilamachía in caltilan huan ilalapujquimes huan innojen hual quitzacuaya. <sup>16</sup> In caltilan cataya lachihuali quinami se tixcali cuadrada. Cataya huejcanic jan quinami cataya palahuac. Quilamachíac in caltilan ca ipitzahuac huan cataya 2.200 kilómetros. Cataya yoje huejcanic huan palahuac huan cuajtic. <sup>17</sup> Huan innojen hual quitzacuaya in caltilan quinlamachíac, huan cataloaya sesenta y cuatro metros telahuac. In ilanahuatini in cielo quilamachihuaya ca in lamachihuilisli calica tehuanten in lacames ticlamachihualo.

<sup>18</sup> In caltilan cataya lachihuali ca oro, lanescatataya quinami vidrio. <sup>19</sup> Innojen hual quitzacuaya in caltilan cataya de jaspe huan in doce itixcalimes ilastilili cataloaya lachijchihuali ca doce tixcalimes hual ipatilo míac. In se yec jaspe, in oc se yec zafiro, in oc se yec ágata, huan in oc se yec esmeralda. <sup>20</sup> Huan in oc se yec ónice, huan in oc se yec cornalina huan in oc se yec crisólito huan in oc se yec berilo, huan in oc se yec topacio, huan in oc se yec crisopraso, huan in oc se yec jacinto, huan lamic ca se hual yec amatista. <sup>21</sup> Mochi sejse innojen doce lalapujquimes yec se perla, huan in ojli hué yec lachihuali ca oro, lanescatataya quinami vidrio. <sup>22</sup> Amo niqitac tiopan pin caltilan pampa nepa pa mochi cajcapa

quinmolancuacuetzililo in Dios hual quipía mochi chicahualisli huan in Borreguito. <sup>23</sup> Amo monequiaya pa quilahuisi in tonali huan in mesli, pampa quilahuía Dios huan in Borreguito inminlaixpelalisli cualtichin. <sup>24</sup> Huan ilaixpelalisli in caltilan quinlahuisi in lalimes huan inminlacames nejnemisi pin ilahuilislí in caltilan pin lalticpan yancuic. Huan yehuanten hual huelitilo pin lalticpan quihualicasi pa in caltilan laijtíc mochi hual inminyaxca hual tiqitalo cualtichin, pampa quimatisi quinami mochi unca iyaxca Dios. <sup>25</sup> Ilalupujquimes amo quiman cayasi latzacuali, pampa amo motzacualo pin semilhuil huan nepa amo layuajtía. <sup>26</sup> Huan quinhuicasi pa in caltilan in hual ipati huan inminlaixpelalisli cualtichin huan inminlasojlalisli inminlacames in lalimes pan lalticpan yancuic. <sup>27</sup> Amo calaquís nepa nindeno hual amo unca chipahuac, huan amo calaquís se hual íslacati. Jan yehuanten san calaquís hual quinpialo inmintocajmes lajcuiluli pin íamal yulilislí, yehuanten hual cate iyaxca in Borreguito.

## 22

<sup>1</sup> Cuaquinon nechnextilic in atenco hué capa unca in al hual layuliltía, lanescatataya quinami vidrio, huan totoca quístataya capa inminicpali Dios huan in Borreguito. <sup>2</sup> Totocatataya lajco pin iojli in caltilan. Noje pa se itenco huan oc se itenco in atenco hué nepa cataya in cuahuil hual layuliltía, huan quiapiaya ilaquilyo. Laqui mochi doce mesli pan xihuil huan mochi seje mesli quiapiaya ilaquilyo. Huan isacayo unca pa quinpajtis in lacames inminlalimes. <sup>3</sup> Yajmo cayas len hual Dios cajcajuac pa quílacusquiaya. Huan pin caltilan cayas inmicpali Dios huan in Borreguito, huan inmintequipanujquimes quinmolancuacuetzilisi. <sup>4</sup> Quitasi íixco huan quípasi itoca pan inmintzontecon pa paní inmixtololojmes. <sup>5</sup> Huan yajmo cayas layúa. Yajmo monequis pa cayas ilahuilislí se tapalquita pa lahuilislí, huan ilahuilislí in tonali, pampa inminlahuilislí yes in Tata Dios. Huan amo quiman mocahuasi pa huelitisi ca Dios in Tajtzin.

### *Jesucristo amo huejcahuas pa hualas oc seja*

<sup>6</sup> Huan nechilic:

—Ca innojen lajtomes huil quilalía se mochi ilaneltocalislí pampa cate melahuac. Huan in Tata, yihual in Dios hual quinmaca ilajtomes pa inminyolo ilajtunijmes Dios, yihual quitilanic ilanahuatini pin cielo pa quínextilís itequipanujquimes len quípía pa panus, huan amo huejcahuas.

<sup>7</sup> Huan xiquitacan, yihual in Tata anmitztilanilía in lajtol, quíjtúa: “Amo nihuejcahuas pa nihualas.” Yoje quíjtúa.

¡Quípías paquilislí hual aquí quilalís ilaneltocalislí ca Dios ilajtomes lajcuiluli pa in amal!

<sup>8</sup> Nehual níjuan, nehual hual aquí níquincaquic huan níquinmitac innojen. Huan químan níquincaquic huan níquinmitac, nímolásac pa nímolancuacuetzilísquiaya nepa pa ícxihujmes in lanahuatini hual nechnextilic ino. <sup>9</sup> Huan yihual nechilic:

—Amalá tichmolancuacuetzili. Nehual níunca itequipanujquil Dios. Nehual níctequipanuilía ca tehual huan mócnían hual cate ilajtunijmes Dios huan yehuanten hual quíneltocalo in hual quíjtúa in amal. Xícmolancuacuetzili Dios.

<sup>10</sup> Huan noje nechilic:

—Amo xíquintzacuulí in lacames pa camo quimatisi ilajtol Dios hual unca lajcuiluli pa in amal, pampa ajsitihualalo in tonalíjmes químan panusi innojen. <sup>11</sup> Sínda yihual hual yultía quíchíjtica in amo cuali quínequi

yultía quichijtica yojque, cuaquín ma yultía quichijtica yojque. Huan sinda quinequi yuli tetzcuinuc, cuaquín ma yultía tetzcuinuc. Huan sinda se quinequi yultía quichijtica len unca quinami Dios quinequi, ma yultía yojque. Huan yihual hual quinequi yultía jan pa Dios san ca iyolo chipahuac, ma yultía yojque.

<sup>12</sup> Quema, xiquitacan. Amo nihuejcahuas nihualas. Nicualicas in laxlahuilisli huan niquinxiluilis yehuanten hual niquinlajtultic. Moxtin inminlaxlahuilisli niclamachihuilis se huan oc se. In lamachihuilisli cayas pa in hual quichihuaaje quiman yuliloaya pan lalticpan. <sup>13</sup> Nehual in Alfa huan in Omega, quinequi quijtúa in pehualisli huan in lamilisli. Nicpehualtía huan niclamía.

<sup>14</sup> Quipiasi paquilisli yehuanten hual quinpacalo inminahuas, quinequi quijtúa, yehuanten hual mochipahuilisi pa inminyolo. Sinda quichihualo yojque, cuaquín cayas iyaxca pa quicuasi ilaquilyo in cuahuil hual layuliltía. Yojque huil calaquisi ilalapunquimes Jerusalén in yancuic. <sup>15</sup> Pa quiahuac in lalapunquimes cate in lacames ej'elehuis huan in laxuxanijmes huan yehuanten hual quichihualo amo cuali ca sihuames. Nepa noje cate lamictinijmes huan yehuanten hual quinmolancuacuetzililo in monos huan moxtin hual quixtocalo islacatilo huan lacuajcuamanalo huan yulilo quichiticate yojque.

<sup>16</sup> —Nehual Jesús annimitztilanilic nolanahuatini amhuanten pa anmitzilis in lajtol neli nonahuac nehual, pa yojque in míac inminlanechiculisli nolacames neli quimatisi. Nehual niquinami se pacholi hual ixuac ca ilalhuayol se cuahuil hual huaquic, nehual imiahuil in hué David. Nehual in lucero (silalin) laxpoyahuero hual laixpela chichahuac.

<sup>17</sup> Quijtuo in Espiritu Santo huan isihua in Borreguito:

—Xihuala.

Huan yihual hual quicaqui, ma quijtuo:

—Xihuala.

Huan yihual hual amictica pa iyolo ma huala huan yihual hual quinequi, ma cuni in al hual layuliltía, amo quipía pa laxlahuis.

<sup>18</sup> Moxtin, mochi seje hual quicaquilo in lajtomes pa in amal, ma quimati pampa in unca ilajtol Dios. Huan niquinmilía moxtin in lajtol: Sinda se quinpalas in lajtomes huan quipantis oc sequin lajtomes ca in lajtomes hual nican cate lajcuiluli, cuaquín Dios quipantis ca yihual in míac lacocoltilisli hual cate lajcuiluli pa in amal. <sup>19</sup> Huan sinda unca se hual quinquixtilis ilajtomes ilajtol Dios hual cate lajcuiluli pa in amal, cuaquín Dios quiquixtilis in hual iyaxca ca in cuahuil hual ilaquilyo layuliltía, huan quiquixtilis in hual iyaxca pa calaquis pin caltilan cuali huan niman chipahuac, Dios icaltilan lasojli. Quema, quiquixtilis ilajco innojen hual unca lajcuiluli pin amal nican.

<sup>20</sup> Yihual hual quijtúa neli innojen quijtúa:

—Neli amo nihuejcahuas pa nihualas.

Yoje ma ye. ¡Xihuala, toTata Jesús!

<sup>21</sup> Ma caya ca anmoxtin Dios ilacames in cuali hual tejchihuilía in Tata Jesús. Yoje ma ye.